


Ru Loq' Pixab' Ri Dios



New Testament in K'iche' Cantel; quc (GT:quc:K'iche'), new
spelling

Ru Loq' Pixab' Ri Dios

New Testament in K'iche' Cantel; quc (GT:quc:K'iche'), new spelling

copyright © 2011 Wycliffe Bible Translators, Inc.

Language: K'iche'

Dialect: Cantel

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in K'iche'

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-27

PDF generated using Haiola and XeLaTeX on 11 Nov 2022 from source files dated 29 Jan 2022
a560dee0-689a-5ef3-ad95-4b31984022c0

Contents

SAN MATEO	1
SAN MARCOS	40
SAN LUCAS	65
SAN JUAN	105
HECHOS	135
ROMANOS	176
1 CORINTIOS	193
2 CORINTIOS	209
GÁLATAS	220
EFESIOS	227
FILIPENSES	233
COLOSENSES	238
1 TESALONICENSES	242
2 TESALONICENSES	246
1 TIMOTEO	248
2 TIMOTEO	253
TITO	257
FILEMÓN	260
HEBREOS	261
SANTIAGO	274
1 PEDRO	279
2 PEDRO	284
1 JUAN	288
2 JUAN	293
3 JUAN	294
JUDAS	295
APOCALIPSIS	297

RI UTZALAJ TZIJ RE RI EVANGELIO RI XUTZ'IB'AJ RI SAN MATEO

Waral kätzijox wi jachin taq ru mam ri Jesús ojer

¹ Are wa' ri ki b'i' ri u mam ri Jesús ojer. Ri Jesús Are rachalaxik ri qa mam David xuquje' ri qa mam Abraham ojer.

² Ri qa mam Abraham are u tat ri qa mam Isaac. Ri qa mam Isaac are u tat ri qa mam Jacob. Ri qa mam Jacob are u tat ri qa mam Judá xuquje' taq ri e rachalal ri are'. ³ Ri qa mam Judá are u tat ri qa mam Fares xuquje' ri qa mam Zara. Ri ki nan k'ut are ri nan Tamar. Ri qa mam Fares are u tat ri qa mam Esrom. Ri qa mam Esrom are u tat ri qa mam Aram. ⁴ Ri qa mam Aram are u tat ri qa mam Aminadab. Ri qa mam Aminadab are u tat ri qa mam Naasón. Ri qa mam Naasón are u tat ri qa mam Salmón. ⁵ Ri qa mam Salmón are u tat ri qa mam Booz. Ru nan ri qa mam Booz are ri nan Rahab. Ri qa mam Booz are u tat ri qa mam Obed. Ru nan ri qa mam Obed are ri nan Rut. Ri qa mam Obed are u tat ri qa mam Isaí. ⁶ Ri qa mam Isaí are u tat ri qa mam David ri nim taqanel. Ri qa mam David ri nim taqanel ruk' ri chichu' ri xrixoqilaj na ri tat Urías, e are' u nan u tat ri qa mam Salomón.

⁷ Ri qa mam Salomón are u tat ri qa mam Roboam. Ri qa mam Roboam are u tat ri qa mam Abías. Ri qa mam Abías are u tat ri qa mam Asa. ⁸ Ri qa mam Asa are u tat ri qa mam Josafat. Ri qa mam Josafat are u tat ri qa mam Joram. Ri qa mam Joram are u tat ri qa mam Uzías. ⁹ Ri qa mam Uzías are u tat ri qa mam Jotam. Ri qa mam Jotam are u tat ri qa mam Acáz. Ri qa mam Acáz are u tat ri qa mam Ezequías. ¹⁰ Ri qa mam Ezequías are u tat ri qa mam Manasés. Ri qa mam Manasés are u tat ri qa mam Amón. Ri qa mam Amón are u tat ri qa mam Josías. ¹¹ Ri qa mam Josías are u tat ri qa mam Jeconías, xuquje' ri e rachalal. Pa taq ri q'ij ri' xek'am b'i' ri winaq aj Israel, xeopan k'u pa ri tinimit Babilonia.

¹² Aretaq ri winaq aj Israel e k'o chik pa ri tinimit Babilonia, ri qa mam Jeconías xk'o'ji jun u k'ojol, Salatiel u b'i'. Ri qa mam Salatiel are u tat ri qa mam Zorobabel. ¹³ Ri qa mam Zorobabel are u tat ri qa mam Abiud. Ri qa mam Abiud are u tat ri qa mam Eliakim. Ri qa mam Eliakim are u tat ri qa mam Azor. ¹⁴ Ri qa mam Azor are u tat ri qa mam Sadoc. Ri qa mam Sadoc are u tat ri qa mam Akim. Ri qa mam Akim are u tat ri

qa mam Eliud. ¹⁵ Ri qa mam Eliud are u tat ri qa mam Eleazar. Ri qa mam Eleazar are u tat ri qa mam Matán. Ri qa mam Matán are u tat ri qa mam Jacob. ¹⁶ Ri qa mam Jacob are ru tat ri a José ri rachajil ri María. We María ri' are k'u wa' ru nan ri Jesús ri káb'ix Cristo* che.

¹⁷ Je ri' chi kajlajuj juch'ob' tataxelab' kachi'l ri ki k'ojol e ok'owinaq xchaptaj loq ruk' ri qa mam Abraham k'a ruk' ri qa mam David. Kajlajuj chik xchaptaj loq ruk' ri qa mam David k'a aretaq xek'am b'i' ri winaq aj Israel, xeopan pa ri tinimit Babilonia. Te k'u ri' e k'o chi kajlajuj chik k'a xil na u wäch ri Cristo.

Kil u wäch ri alaj a Jesús

¹⁸ Are je wa' xb'antajik aretaq xil u wäch ri alaj a Jesús: Ri q'apoj al María ru nan u yo'm chi u tzij che k'ulanem ruk' ri a José. Mäja' k'u kek'uli'k aretaq ri al María xkanaj yawab' winaq rumal ru chuq'ab' ri Loq'alaj Espiritu. ¹⁹ Ri a José k'ut ri rachajil are jun achi ri jikom ranima' cho ri Dios, man kraj tä k'ut käresaj u k'ixb'al ri al María chkiwäch ri winaq. Rumal ri' xuchomaj u ya'ik kanoq xaq chi k'uyal. ²⁰ Aretaq je' tajin kuchomaj wa', xpe jun ángel ri taqom loq rumal ri Dios ri xuk'ut rib' chuwäch ri a José pa ri u waram, xub'ij che: A José, at b'a' at rachalaxik ri tat David. Maxej awib' chuk'amik ri al María che awixoqil, rumal chi ri ral ri kil na u wäch, are rech ri Loq'alaj Espiritu wa'. ²¹ Ri are' kák'o'ji na jun ral ala, kakoj k'u na JESÚS che u b'i'. (Ri "Jesús" kel kub'ij "To'l Qe".) Je' u b'i' wa' rumal chi keuto' na ru winaqil, keresaj na pa ri ki mak, —xcha ri ángel.

²² Ronojel wa' xb'antajik rech gas je' kel wi jas ru b'im ri Qajaw Dios rumal ri q'alajisal re ru Loq' Pixab' ri kub'ij:

²³ Ri q'apoj ali kákanaj na kan yawab' winaq, káril k'u na u wäch jun ral ala ri káb'ix na Emanuel che, —kácha'. Kel kub'ij wa': Ri Dios k'o quk', —kácha ri'.

²⁴ Aretaq xk'astaj ri a José che ru waram, xunimaj ri xb'ix che rumal ri ángel ri taqom loq rumal ri Dios. Xuk'am ri al María che rixoqil. ²⁵ Man xkiriq tä k'u na kib', xane k'a te' aretaq xil na u wäch ri ral ri al María. Ri a José xukoj k'u JESÚS che u b'i'.

2

Ri ajno'jab' keopan che rilik ri alaj a Jesús

¹ Ri alaj a Jesús xil u wäch pa ri tinimit Belén, ri k'o pa Judea. Are chi' k'o ri tat Herodes che nim taqanel puwi' ronojel ri Judea. Xeopan k'u jujun achijab' ajno'jab' pa ri tinimit Jerusalén, jela' k'u kepe pa

* **1:16** Ri tzij "Cristo" o "Mesías" kel kub'ij "cha'tal rumal ri Dios".

relb'al q'ij. ² Xkita' k'u u tzijol chila', xkib'ij: ¿Jawije' k'ariqtaj wi ri nim taqanel ri k'ataqan na pa ki wi' ri winaq aj Israel ri k'ä te' xil u wäch? Xa xqil ru ch'imil pa relb'al q'ij, rumal ri' xujpe chuq'ijilaxik, —xecha'.

³ Aretaq ri tat Herodes ri nim taqanel xuta wa', sib'alaj xsach u k'ux, je' xuquje' konojel ri nik'iaj winaq aj Jerusalén. ⁴ Xtaqan k'u ri nim taqanel che ki sik'ixik ri ki nimaqil sacerdots, xuquje' ri tijonelab' re ri Pixab', xuta' k'u chke jawije' kil wi na u wäch ri Cristo. ⁵ Ri e are' xkib'ij che: Pa ri tinimit Belén ri k'o pa Judea, rumal chi ri q'alajisal re ru Loq' Pixab' ri Dios je wa' xutz'ib'aj:

⁶ Ri at tinimit Belén,
at ri' ri rech ri rulew ri Judá,
machomaj chi ri at man nim tä a q'ij at
chkiwäch ri q'atal taq tzij ri e k'o chila',
rumal chi awuk' at kel wi na jun nim k'amal
b'e,

ri kuk'am na ki b'e ri nu winaq aj Israel,
—kächa', —xecha ri tijonelab' re ri Pixab'.

⁷ Are k'u ri tat Herodes chelaq'al xeusik'ij ri ajno'jab', xuta' k'u chke jampa' qas xk'utun ri ch'imil. ⁸ Te ri' xeutaq b'i pa Belén, xub'ij b'i chke: Jix b'a' jela', chitatab'ela' jawije' k'o wi ri ak'al. Aretaq kiriqo, chixpe chub'ixik chwe, rech ri in xuquje' kine' na chuq'ijilaxik, —xcha chke.

⁹ Ri ajno'jab' xuwi xkito ri xb'ix chke rumal ri nim taqanel, xeb'e'k. Are k'u ri ch'imil ri xkil pa relb'al q'ij xnb'ej chkiwäch, k'ä xopan na puwi' ri k'o wi ri ak'al, xtak'i k'u chila'. ¹⁰ Ri ajno'jab', aretaq xkil ri ch'imil, sib'alaj xekikotik. ¹¹ Xeb'ok k'u b'i pa ri ja, xkil k'u ri ak'al k'o ruk' ri al María ru nan. Xexuki'k, xkiq'ijilaj ri ak'al. Te k'u ri' xkijaj u wi' ri ki k'olib'al, xkisipaj q'an puaq, incienso, xuquje' mirra* che ri Are'. ¹² Te k'u ri' xb'ix chke pa achik' chi meok'ow chi jela' jawije' k'o wi ri tat Herodes. Xetzelej k'u b'i pa ri ki tinimit, xkik'am b'i jun b'e chik.

Waral kätzijox wi jas xb'an che ri alaj a Jesús xk'am b'i pa Egipto

¹³ Aretaq e b'enaq chi ri ajno'jab', xpe jun ángel ri taqom loq rumal ri Dios, xuk'ut rib' chuwäch ri a José pa achik', xub'ij che: Chatwalijjoq, chak'ama b'i ri ak'al, rachi'l ru nan, chixanimaj b'ik. Jix pa Egipto, chixkanaj k'u na kan chila' k'ä kinb'ij na chiwe jampa' kixpetik. Je ri' chib'ana rumal chi ri tat Herodes kutzukuj na u kämisaxik ri ak'al, —xcha ri ángel che.

¹⁴ Xwalij k'u ri a José, xuk'am ri ak'al, rachi'l ru nan, chaq'ab' k'ut xeb'el b'ik, xeb'e' pa Egipto. ¹⁵ Chila' xek'o'ji wi na k'ä xkam na ri tat Herodes. Je' xb'antaj wa' rech qas je' kel wi jas ri xub'ij ri Dios rumal

ri q'alajisal re ru Loq' Pixab' ri kub'ij: “Pa Egipto xinsik'ij wi loq ri nu K'ojol,” —kächa'.

Ri tat Herodes kutaq ki kämisaxik ri ak'alab'

¹⁶ Aretaq ri tat Herodes xretamaj chi man are tä qas tzij ri xb'ix kan che kumal ri ajno'jab', sib'alaj xpe royowal. Xutaq k'u ki kämisaxik konojel ri ak'alab' alab'om ri tz'aqat chi kieb' ki junab' xuquje' ri mäja' kätz'aqat kieb' ki junab' ri e k'o pa ri tinimit Belén xuquje' ri e k'o pa taq ri tinimit chunaqaj ri Belén, je' jas ri q'ij ri xkib'ij kan ri ajno'jab'. ¹⁷ Xa je ri' qas je' xel wi jas ri xutz'ib'aj kan ri qa mam Jeremías ri q'alajisal re ru Loq' Pixab' ri Dios ri kub'ij:

¹⁸ Xtataj k'ut chi k'o jun ri kuraq u chi'
pa ri tinimit Ramá,
nimalaj oq'ej wa', nimalaj b'is käb'anik.
Are ri nan Raquel ri kub'isoj ki wäch
ri ral,

ri man kuya' taj käku'b'isax u k'ux
rumal chi ya e käminaq chik ri ral,
—kächa'.

¹⁹ Aretaq k'ut käminaq chik ri tat Herodes, jun ángel ri taqom loq rumal ri Dios xuk'ut rib' chuwäch ri a José pa achik' jela' pa Egipto, xub'ij che: ²⁰ Chatwalijjoq, chak'ama b'i ri ak'al awuk', xuquje' ru nan, chixtzelej chi na jumul pa Israel. Xekäm k'u konojel ri kākaj kākikämisaj ri ak'al, —xcha che.

²¹ Xwalij k'u ri a José, xuk'am b'i ri ak'al rachi'l ru nan, xtzelej chi na jumul pa Israel. ²² Aretaq k'ut ri a José xuto chi are ri tat Arquelaos chik k'o che nim taqanel pa Judea chuk'exel ri Herodes ru tat, xuxej rib' x'e' jela'. Xch'ab'ex k'u rumal ri Dios pa achik', rumal ri' jela' x'e' wi pa Galilea. ²³ Aretaq xopan chila', jela' xek'ol wi pa ri tinimit Nazaret. Je' xb'antaj wa' rech qas je' kel wi ri xkib'ij kan ri q'alajisal taq re ru Loq' Pixab' ri Dios, chi ri Jesús käb'ix na aj Nazaret che.

3

Ri Juan Qasal Ja' kutzijoj ru Loq' Pixab' ri Dios pa taq ri juyub' ri ketz'inowik

¹ Pa taq ri q'ij ri' ri tat Juan Qasal Ja' xopan pa Judea, pa taq ri juyub' ri kätz'inowik. Tajin kutzijoj ru Loq' Pixab' ri Dios. ² Kub'ij k'u chke ri winaq: Chik'exa ri iwanima', chik'exa ri i chomanik, rumal chi xa jub'iq' chik man kuchaplej ru taqanik ri Dios, —xcha chke.

³ We tat Juan ri' are wa' ri xtz'ib'ax kan chrij ojer rumal ri qa mam Isaías, ri q'alajisal re ru Loq' Pixab' ri Dios ri kub'ij: K'o jun ri ko käch'aw pa taq ri juyub' ri ketz'inowik, kub'ij:

“Chib'ana u b'anik ri nim b'e ri käb'in wi
ri Qajaw.

* 2:11 Ri mirra are jun kunab'al ri sib'alaj paqil rajil.

Chisuk'umaj, chib'ana sib'alaj jikom che,"
—xcha ri qa mam Isaías.

⁴ Are k'u ri tat Juan xukoj atz'iaq ri b'anom ruk' ri rismal jun awaj, camello u b'i, tz'um k'u ru pas. Xa sak' xuquje' uwal che' xutijo. ⁵ Xepe k'u ri winaq aj Jerusalén, xuquje' ri e k'o pa taq nik'iaj taq tinimit chik re Judea xuquje' ri e k'o chunaqaj ri nima' Jordán, xeopan k'u ruk' ri tat Juan chutatab'exik ri kub'ij. ⁶ Aretaq xkiq'alajisaj ri ki mak, xb'an k'u ki qasna' rumal ri tat Juan pa ri nima' Jordán.

⁷ Aretaq k'ut xril ri tat Juan chi e k'ia chke ri tata'ib' fariseos xuquje' ri tata'ib' saduceos xepetik rech káb'an ki qasna',* xub'ij chke: ¡Ri alaq sub'anelab' taq winaq!† ¡Jachin k'u ri xb'in chech alaq chi rajwaxik kanimaj alaq chuwäch ri nimalaj royowal ri Dios ri kápetik? ⁸ B'ana b'a' alaq ri taqal u b'anik, ri kuq'alajisaj chi qas tzij xk'extaj ri anima' alaq, ri chomanik alaq. ⁹ Mächaplej k'u alaq u b'ixik pa anima' alaq: "Ri uj, uj rachalaxik kan ri qa mam Abraham." Kinb'an k'u chech alaq chi ri Dios kákowinik kub'an chke taq we ab'aj ri' chi e rachalaxik kan ri qa mam Abraham. ¹⁰ Kámik ri' tajin kákoj ri ikiäj che taq ri ki xera' ri che' rech ket'oyik. Ronojel che' ri man kuya tá utzalaj u wäch, kät'oy k'u na wa', káporox na pa ri q'aq'. ¹¹ Ri in qas tzij kinb'an qasna' alaq ruk' joron, k'utb'al wa' chi k'exom chi anima' alaq, k'exom chi ri chomanik alaq. Käpe chi k'u na jun chik ri kub'an na qasna' alaq ruk' ri Loq'alaj Espiritu xuquje' ruk' q'aq'. Ri Are' nim na u q'ij chnuwäch in, nim k'u na u b'anik. Man taqal tá chwe in chi kinkir ru k'amal u xajäb'. ¹² Ri Are' are jas jun achi ri kujosq'ij ru triko. Ruk'am chi ru pala, kujopij k'u na ri triko, kutas che ri pajo. Kuk'ol na ri triko pa ri k'uja. Are k'u ri pajo kuporoy na pa jun q'aq' ri man kächup tá chik, —xcha chke.

Káb'an u qasna' ri Jesús

¹³ Xel k'u loq ri Jesús pa Galilea, xopan chuchi' ri nima' Jordán ri k'o wi ri tat Juan rech káb'an u qasna' rumal. ¹⁴ Man xraj tá k'u ri tat Juan, xane xub'ij che ri Jesús: Ri in man taqal tá chwe chi kinb'an qasna' la. Rajwaxik ne chi ri lal káb'an la nu qasna' in, —kácha'. ¿Jas che xpe la wuk' in? —xcha che ri Jesús.

¹⁵ Xub'ij k'u ri Jesús che: Che we chanim ri', chaya chwe chi je' kinb'an wa'. Are k'u wa' taqalik rech káqa'no jachike ri kátaqan wi ri Dios, —xcha che.

Ri tat Juan k'ut xunimaj ri xub'ij. ¹⁶ Aretaq k'ut xb'antaj u qasna' ri Jesús, xel loq ri Are' pa ri ja'. ¡Chanim xjaqjob' ri kaj! Ri Jesús k'ut xril ri Loq'alaj Espiritu xqaj loq puwi' ri Are', je' u b'anik jun palomäx. ¹⁷ Te ri' xtataj k'ut chi käch'aw loq jun chikaj ri xub'ij: Are ri Loq'alaj nu K'ojol wa'. Käkikot ri wanima' rumal, —xcha'.

4

Kätaqchi'x ri Jesús che mak

¹ Te k'u ri' ri Loq'alaj Espiritu xuk'am b'i ri Jesús pa taq juyub' ri ketz'inowik, rech kätaqchi'x che mak chila' rumal ri Itzel.

² Kawinaq q'ij, kawinaq aq'ab' xk'oji chila', man k'o tá k'u jas ri xutijo. Te k'u ri' sib'alaj xnumik. ³ Xpe k'u ri Itzel, xopan ruk' ri Jesús rech kutaqchi'j ri Are' che mak, xub'ij che: We qas tzij chi lal u K'ojol ri Dios, taqan la chke taq we ab'aj ri' chi káka'n na wa, —xcha che.

⁴ Xch'aw ri Jesús, xub'ij che: Ru Loq' Pixab' ri Dios ri Tz'ib'talik kub'ij: "Man xaq tá xuwi rumal ri wa kek'asi na ri winaq, xane xuquje' rumal ronojel ru Tz'ij ri Dios," —kácha', —xcha ri Jesús che.

⁵ Ri Itzel xuk'am b'i ri Jesús pa ri loq'alaj tinimit Jerusalén, xupaqb'a k'u puwi' ri nimalaj rachoch Dios. ⁶ Te ri' xub'ij che: We qas tzij chi lal u K'ojol ri Dios, k'iaqa b'i ib' la ikim, rumal chi ru Loq' Pixab' ri Dios ri Tz'ib'talik kub'ij:

Ri Dios keutaq na loq ri ángeles awuk' che a chajixik.

Katkichap na che ra q'ab' che a to'ik rech man kachaq'ij tá rawaqaan cho ab'aj,

—kácha', —xcha ri Itzel che.

⁷ Ri Jesús xch'awik, xub'ij che: Xuquje' kub'ij ru Loq' Pixab' ri Dios ri Tz'ib'talik: "Mayak royowal ri Awajaw, ri a Dios," —kácha', —xcha che.

⁸ Te k'u ri' ri Itzel xuk'am b'i ri Jesús puwi' jun nimalaj juyub'. Xeuk'ut k'u konojel taq ri tinimit ajuwächulew chuwäch ri Are', xuquje' ri ki q'inomal. ⁹ Xub'ij k'u che ri Jesús: Ronojel wa' kinya che la, we káxuki la, kinq'ijilaj la, —xcha che.

¹⁰ Xch'aw ri Jesús, xub'ij che: Jat, Satanás, chatel chnuwäch rumal chi ru Loq' Pixab' ri Dios ri Tz'ib'talik kub'ij: "Chaq'ijilaj ri Awa-jaw ri a Dios, xuwi k'u ri Are' chapatánij," —kácha', —xcha che.

¹¹ Xel k'u b'i ri Itzel ruk' ri Jesús. Xepe k'u jujun ángeles rech kepatánin che ri Are'.

Ri Jesús kuchaplej tzijonem pa Galilea

* 3:7 Ri tata'ib' fariseos e are' winaq wa' aj Israel ri sib'alaj xkigatej u nimaxik ru Pixab' ri Moisés. Xka'n k'u nimal, xkichomaj k'ut chi e utz na chkiwäch konojel ri winaq. K'ia ki naq'atisam wi kib' ri man qas tá are ri kub'ij ru Tz'ij ri Dios. Ri tata'ib' saduceos e are' xuquje' nimaq taq winaq wa' aj Israel. Ri e are' k'ut man kákiqoj taj chi qas tzij kek'astaj na ri káminaqib' (Hechos 23:6-8). † 3:7 Ri mero tzij waral are "Ri alaq, alaq ralk'ual ri kumätz'".

¹² Ri Jesús, aretaq xuto chi k'o ri tat Juan pa che', xe' pa Galilea. ¹³ Man xkanaj tä k'u kan pa ri tinimit Nazaret, xane xa xk'oji pa Capernaum, jun tinimit Romano wa' ri k'o chi' ri mar chkinaqaj ri ojer taq tinimit Zabulon ruk' Neftali. ¹⁴ Je' xb'antaj wa' rech gas je' kel wi jas ri xutz'ib'aj kan ri qa mam Isaias ri q'alajisal re ru Loq' Pixab' ri Dios ri kub'ij:

¹⁵ Winaq aj Zabulon, winaq aj Neftali, ix ri' ri naqaj ix k'o wi che ri mar, ch'äqäp che ri nima' Jordán, chila' pa Galilea jawije' e k'o wi winaq ri man aj Israel taj.

¹⁶ Ri winaq ri je' ta ne e k'o pa q'equm xkil jun nimalaj saqil. E are' winaq wa' ri e k'o pa ri ki mak, ri e k'o cho ri kämikal, xpe jun nimalaj saqil pa ki wi', —xcha ri qa mam Isaias.

¹⁷ K'ä te ri' k'ut ri Jesús xuchaplej u tzijoxik ru Loq' Pixab' ri Dios, xub'ij k'u chke ri winaq: Chik'exa ri iwanima', chik'exa ri i chomanik, rumal chi xa jub'iq' chik man kuchaplej ru taqanik ri Dios, —xcha chke ri winaq.

Ri Jesús keusik'ij kiejeb' chapal taq kär rech keb'e' ruk'

¹⁸ Ok'owem kub'an ri Jesús chuchi' ri mar re Galilea, xeril k'u kieb' achijab' kachalal kib'. Ri jun are ri tat Simón ri xuquje' káb'ix Pedro che, ri jun chik are ri tat Andrés. Tajin kákik'iaq b'i jun k'at chapáb'al kär pa ri cho rumal chi e chapal taq kär ri e are'. ¹⁹ Ri Jesús xub'ij chke: Chixsa'j wuk'. Kinb'an k'u na chiwe chi kixok che ki mulixik winaq che ki k'exwäch ri kär, —xcha chke.

²⁰ Chanim xkiya kan ri ki k'at, xeb'e' ruk' ri Jesús.

²¹ Ok'owinaq chi apan jub'iq' ri Jesús, xeril chi k'u kieb' achijab' chik kachalal kib'. E are' ri tat Jacobo rachi'l ri tat Juan. E u k'ojol ri tat Zebedeo wa'. E k'o pa jun barco kachi'l ri ki tat, tajin kákik'ojol k'u ri ki k'at. Xesik'ix k'u rumal ri Jesús. ²² Ri e are' k'ut chanim xkiya kan ri barco ruk' ri Zebedeo ri ki tat, xeb'e' ruk' ri Jesús.

Ri Jesús kuya tijonik chke k'ia winaq

²³ Ri Jesús xb'in pa konojel taq ri tinimit re Galilea, xuya tijonik chke ri winaq pa taq ri rachoch Dios. Xutzijoj ri Utzalaj Tzij re ri Evangelio chrij ru taqanik ri Dios pa ki wi' ri winaq. Xuquje' xukunaj ronojel u wäch yab'il ri k'o chke. ²⁴ Xtataj k'u u tzijol ri Jesús kumal ri winaq pa konojel taq ri tinimit re Siria. Ri winaq k'ut xekik'am loq konojel ri ki rigom k'äx rumal k'ia u wäch k'äx'ol, yab'il, q'oxom. Xekik'am loq ri e k'o itzel taq espíritu chke, xuquje' ri winaq ri man utz tä chi ki jolom rumal chi e elinaq ch'uj, xekik'am k'u loq ri käminaq ki cuerpo. Ri

Jesús k'ut xekunaj konojel. ²⁵ E k'ia winaq k'ut aj Galilea xeb'e' ruk' ri Jesús. Xuquje' e k'o winaq aj Decápolis, aj Jerusalén, aj Judea, e k'o k'u ri xepe ch'äqäp che ri nima' Jordán.

5

Ri Jesús kapaqi puwi' jun juyub' rech kuya tijonik

¹ Aretaq ri Jesús xeril ri k'ialaj winaq, xpaqi puwi' ri juyub', xt'uyi chila'. Xkimulij k'u kib' ru tijoxelab' ruk'. ² Ri Jesús xuchaplej ki tijoxik, je wa' xub'ij chke:

Waral káqil wi jachin taq ri utz ke

³ Utz ke ri kákina' pa kanima' chi k'o ri rajwaxik chke ri kápe chila' chikaj. Ri Dios k'ut kátaqan na pa ki wi'.

⁴ Utz ke ri keb'isonik rumal chi ri Dios káku'b'isan na ki k'ux.

⁵ Utz ke ri man káka'n tä nimal. Ri e are' k'ut kákechb'ej na ri ulew ri u b'im ri Dios chi kuya chke.

⁶ Utz ke ri kenumik, ri káchaqi'ij ki chi' che jun k'aslemal jikom. Are k'u ri Dios káyo'w na wa' chke.

⁷ Utz ke ri kel ki k'ux chke nik'iaj winaq chik. Ri Dios k'ut kutoq'ob'isaj na ki wäch ri e are'.

⁸ Utz ke ri saq kanima'. Ri e are' k'ut kákil na u wäch ri Dios.

⁹ Utz ke ri kákitzukuj u ya'ik utzil chkixol ri winaq. Ri Dios kub'ij na chi e are' ralk'ual ri Are'.

¹⁰ Utz ke ri ketzelax ki wäch rumal ru b'anik ri jikomal cho ri Dios. Ri Dios k'ut kátaqan na pa ki wi'.

¹¹ Utz iwe ix aretaq káb'an k'äx chiwe kumal ri winaq, kixyoq' kumal, kákib'ij ronojel u wäch ri man gas tzij taj chiwij, xa rumal chi kixkojon chwe in. ¹² Chixkikot b'a', chixtze'noq rumal chi kik'am na jun nimalaj tojb'al iwe chila' chikaj. Je k'u k'äx wa' xb'an chke ri q'alajisal taq re ru Loq' Pixab' ri Dios ri xek'oji kan ojer, —xcha ri Jesús.

Ri ix, je' ta ne ix saqil, je' ta ne ix atz'am chke ri winaq cho ruwächulew

¹³ Ri ix, je' ta ne ix atz'am chke ri winaq cho ruwächulew. We k'u man k'o chik u tzayil ri atz'am, zjas ta k'u lo káb'an che rech k'o chi kupatänij? Man k'o tä chi u patän ri', xane xa kák'iaq na apanoq, kátak'alex k'u na kumal ri winaq.

¹⁴ Ri ix, je' ta ne ix saqil chke ri winaq cho ruwächulew je' jas jun tinimit ri k'o puwi' jun juyub', ri amaq'el káq'alajinik. ¹⁵ Man kätzij tä jun chäj, te k'u ri k'äyi' chuxe' jun koxon, xane xa k'äyi' ri' pa jun k'olib'al chikaj rech kätunun pa ki wi' konojel ri e k'o pa ri ja. ¹⁶ Je wa' chib'ana ix xuquje', chib'ana' chi ri saqil ri k'o iwuk' kätunun chkiwäch ri winaq. Je ri'

rech aretaq kâkil ri utzil ri kib'ano, kâkiya u q'ij ri i Tat ri k'o chila' chikaj.

Ri Jesús kuya tijonik chrij ri Pixab'

¹⁷ Michomaj ix chi in petinaq che resaxik ri Pixab' ri xutz'ib'aj kan ri qa mam Moisés, o ri ki tijonik ri q'alajisat taq re ru Loq' Pixab' ri Dios. Man in petinaq ta che resaxik, xane in petinaq chub'ixik ri qas u b'anik ri Pixab' xuquje' ri ki tijonik ri q'alajisat taq re ru Loq' Pixab' ri Dios. ¹⁸ Qas tzij kinb'ij chiwe, man k'o ta kesax na che ri Pixab', xane xa ronojel kâb'antaj na. K'â mäjôq kâsach u wäch ri kaj ulew, man k'o ta jun punto, man k'o ta jun alaj tz'ib' ri kesax na che ri Pixab'. ¹⁹ Rimal ri' jachin ri man kunimaj ta jun chke ri taqanik re ri Pixab', pune are ri man nim ta u b'anik, xuquje' kuk'ut chkiwäch nik'iaj winaq chik chi man qas rajwaxik taj kânimax wa', ri are' man nim taj kil wi na chkiwol ri winaq ri kâtaqan na ri Dios pa ki wi'. Are k'u ri winaq ri kunimaj ri Pixab', xuquje' kuk'ut chkiwäch nik'iaj winaq chik chi kâkinimaj wa', qas nim na u b'anik wa' chkiwol ri winaq ri kâtaqan na ri Dios pa ki wi'. ²⁰ Kinb'ij k'u chiwe, chi we man jikom na ri i k'aslemal ix chuwäch ri ki k'aslemal ri tata'ib' fariseos xuquje' ri tijonelab' re ri Pixab',* man kixok ta ri chkiwol ri winaq ri kâtaqan na ri Dios pa ki wi'.

Ri Jesús kuya tijonik chrij ri oyowal

²¹ Ri ix i tom chi xb'ix chke ri qa mam ojer: "Mixkâmisaniq, apachin k'u ri kâkâmisaniq kâq'at na tzij puwi'," —kâcha'. ²² Are k'u ri in kinb'ij chiwe chi jachin ri kuyak royowal chrij ri rachalal kâq'at na tzij puwi'. Jachin ri k'âx kâch'aw che ri rachalal kâq'at na tzij puwi' kumal ri q'atal taq tzij. Xuquje' jachin ri kub'ij che ri rachalal chi xa are jun kon, chi man k'o ta chi u patän, ke' na ri' pa ri q'aq'.

²³⁻²⁴ Rimal k'u ri', we kak'am b'i ri a sipanik cho ri ta'b'al toq'ob', chila' k'ut kâna'taj chawe chi k'o jun k'âx ri kuna' ri awachalal chawij, chaya kan ri a sipanik cho ri ta'b'al toq'ob'. Jat na ruk' ri awachalal rech katutzir ruk' nab'e, te k'u ri' kuya' katztelej cho ri ta'b'al toq'ob' chuya'ik ra sipanik cho ri Dios.

²⁵ We k'o jun winaq kub'an u k'ulel chawe, katuk'am k'u b'i pa ri q'atb'al tzij, chatutzir na ruk' pa ri b'e rech man katujach ta pu q'ab' ri q'atal tzij. We ta mat je ri', ri q'atal tzij katujach na pa ki q'ab' ri mayor, ri mayor k'ut katkikoj na pa che'. ²⁶ Qas tzij b'a' ri kinb'ij chawe chi man k'o ta awelik loq chila' k'â katoj na ronojel ri a multa, —xcha ri Jesús.

Ri Jesús kâtzijon chrij ri nimalaj mak ri äwas u b'anik ruk' ri rixoqil o ri rachajil jun winaq chik

²⁷ Ri ix i tom chi xb'ix kan nab'e: "Mab'an ri nimalaj mak ri äwas u b'anik chrij ra k'ulaj," —kâcha'.

²⁸ Are k'u ri in kinb'ij chiwe, chi jachin ri kuka'yej jun ixoq, xaq xuwi ruk' ru rayixik u wäch xmakun ri' ruk' pa ranima', —kâcha ri Jesús.

²⁹ We ri awaq'äch re ri awikiäq'ab' kub'ano chi katzaq pa mak, chawesaj, chak'iaqa apanoq. Are utz na chawe we kel jun ch'äqap che ra cuerpo, chuwäch wa' chi ronojel ra cuerpo kâk'iaq b'i pa ri q'aq'. ³⁰ We k'u are ri a q'ab' re ri awikiäq'ab' kub'ano chi katzaq pa mak, chaq'ata', chak'iaqa apanoq. Are k'u utz na chawe we kel jun ch'äqap che ra cuerpo, chuwäch wa' chi ronojel ra cuerpo kâk'iaq b'i pa ri q'aq', —xcha ri Jesús.

Ri Jesús kuya tijonik chrij ru jachik kib' juk'ulaj winaq

³¹ (Kâch'aw chi ri Jesús, kub'ij:) Xuquje' xb'ix kan nab'e: "Apachin ri kujach b'i ri rixoqil, rajwaxik kuya b'i jun wuj che ri kub'ij wi chi jachom kanoq," —kâcha'. ³² Ri in k'ut kinb'ij chiwe, chi we jun achi kujach b'i ri rixoqil man rumal ta u ch'ab'exik jun achi chik, kub'an ri' chi ri rixoqil kub'an ri nimalaj mak ri äwas u b'anik. Jachin k'u ri kâk'uli ruk' jun ixoq ri jachom b'ik, kub'an ri' ri nimalaj mak ri äwas u b'anik, —xcha ri Jesús.

Ri Jesús kuya tijonik chrij ri juramento ri kâka'n ri winaq

³³ Xuquje' i tom ri' ri xb'ix chke ri qa mam ojer: "Qas chab'ana' jas ri xachi'j u b'anik ruk' juramento cho ri Qajaw Dios," —xeuchixik. ³⁴ Ri in k'ut kinb'ij chiwe, chi mib'an juramento aretaq k'o ri kichi'j che jun winaq chik. Mib'an juramento ruk' ri kaj rumal chi chila' k'o wi ri Dios. ³⁵ Mib'an juramento ruk' ruwächulew rumal chi are je' ta ne u tak'alib'al ri raqan ri Dios. Mib'an juramento ruk' ri tinimit Jerusalén rumal chi are u tinimit ri Dios ri Nimalaj Taqanel. ³⁶ Xuquje' mib'an juramento ruk' ri i jolom, rumal chi man kixkowin taj kib'an saq o q'eq che xa jun i wi'. ³⁷ Xane xaq xuwi chib'ij "je", je ri" o "man je' taj", —kixcha'. Are k'u ri tzij ri xaq u wi' tzij chik, rech ri Itzel ri', —xcha ri Jesús chke.

Ri Jesús kuya tijonik chrij ri jun winaq ri kutzelej u k'exel ri k'âx ri kâb'an che

³⁸ Ri ix i tom chi xb'ix kan nab'e: "We jun kâresaj u waq'äch jun winaq chik, kesax na ru waq'äch ri are'. We jun kâresaj u

* **5:20** Ri tijonelab' re ri Pixab' e are' achijab' wa' ri sib'alaj xkitijoj kib' chrij ru Pixab' ri Moisés, xkik'utu wa' chkiwäch ri winaq.

ware jun winaq chik, kesax na ru ware ri are', —kächa'. ³⁹ Are k'u ri in kinb'ij chiwe: Chixel chuwäch ri itzel achi ri kraj käch'ojin iwuk'. Xane we k'o jun katch'ayow che ri jupera' palaj, chaya ri jupera' palaj chik chuwäch. Mitzelej u k'exel ri k'äx ri käb'an chiwe. ⁴⁰ We k'o jun kraj katusik'ij pa q'atb'al tzij, kraj k'ut kumaj ri a kamixa', chaya b'i ra chaket che xuquje'. ⁴¹ We k'o jun kukoj u chuq'ab' chawe chi kak'am b'i jun eqa'n ri käb'inib'ej jun legua, chak'ama b'i kieb' legua ruk'. ⁴² Apachin ri k'o jas kuta' chawe, chaya che. Makowirisaj ri awanima' chuwäch ri winaq ri kraj käqajan awuk'.

Cheiwaj ri i k'ulel

⁴³ Xuquje' i tom ri' ri xb'ix kan nab'e: "Loq' chawila wi ri awachi'l, chawetzelay k'u u wäch ri a k'ulel", —kächa'. ⁴⁴ Are k'u ri in kinb'ij chiwe: Loq' chiwila wi ri i k'ulel. Chib'ij: Ri Dios k'o pi wi', —kixcha chke ri winaq ri keyoq'on chiwe. Chib'ana utzil chke ri käketzelaj i wäch, chib'ana b'a' orar pa ki wi' ri xaq käka'n k'äx chiwe. ⁴⁵ We je' kib'an wa' q'alaj ri' chi qas ix ralk'ual ri qa Tat ri k'o chila' chikaj. Are k'u ri qa Tat kesan loq ri q'ij pa ki wi' ri utzalaj taq winaq, xuquje' pa ki wi' ri itzel taq winaq. Kutaq k'u loq ri jäb' pa ki wi' ri käka'n ri jikomal, xuquje' pa ki wi' ri man käka'n tä ri jikomal. ⁴⁶ Are k'u we xaq xuwi keiwaj ri kixkaj ix, ¿jas ta k'u che käy' na tojb'al re wa' chiwe rumal ri Dios? Xuquje' ne ri toq'il taq alka'bal käkaj kib' ri e are'. ⁴⁷ We xaq xuwi kiya rutzil ki wäch ri iwachalal, ¿a kichomaj lo ri' chi i b'anom jun nimalaj utzil? Je' k'u ne wa' xuquje' käka'n ri man qas ketam tä u wäch ri Dios. ⁴⁸ Je b'a' chib'ana ix jas ri qa Tat ri k'o chila' chikaj. Ri Are' tz'aqat pa ru chomab'al. Ri ix xuquje' chib'ana tz'aqat pa ri i chomab'al, —xcha ri Jesús.

6

Ri Jesús kuya tijonik chrij ri utzil ri kub'an jun winaq

¹ Ru patänixik ri Dios ri kib'ano, mib'an wa' chkiwäch ri winaq xaq rech käkilo, käkiya k'u i q'ij. We je' kib'an wa', ri qa Tat ri k'o chila' chikaj man k'o tä tojb'al iwe kuya na. ² Rumal ri' aretaq keito' ri k'o ki rajwaxik, mitzijoj chke konojel ri winaq, je' jas ri käka'n ri winaq ri xaq kieb' ki wäch käkitzijoj chke konojel ri winaq pa taq ri rachoch Dios, pa taq ri b'e. Je' käka'n wa' xaq xuwi rech utz kech'aw ri winaq chki. Qas tzij k'ut kinb'ij chiwe chi ri käb'ix chki xuwu wa' ri tojb'al ke käkiriq na. ³ Xane ri ix aretaq k'o jas u wäch jun tob'anik ri kiya chke ri k'o ki rajwaxik, k'o jun metamanik. Mitzijoj ne wa' che ri utzalaj iwachi'l. ⁴ Chib'ana b'a' ri utzil xaq chelaq'al. Ri qa Tat k'ut ri kilow

ronojel ri kib'an chelaq'al, are käyo'w na ri tojb'al iwe, —xcha ri Jesús.

Ri Jesús kuya tijonik chrij ri u b'anik orar

⁵ Ri ix aretaq kib'an orar mib'an iwe jas ri käka'n ri winaq ri xaq kieb' ki wäch, ri käqaj chkiwäch xaq e tak'atoj käka'n orar pa taq ri rachoch Dios, pa taq ri u cruz taq b'e. Xaq are käkaj chi ke'ilital kumal ri winaq. Qas tzij kinb'ij chiwe chi xuwi wa' ri tojb'al ke käkiriq na. ⁶ Xane ri ix aretaq kib'an orar, chixok pa ja, chitz'apij ri uchija. Chib'ana orar chuwäch ri qa Tat ri k'o iwuk' pa i tukiel wi. Ri qa Tat k'ut ri kilowik chi tajin kib'an orar chelaq'al, are käyo'w na ri tojb'al iwe.

⁷ Aretaq kib'an orar, mib'ij k'ia tzij ri man k'o tä ki patän, jas ri käka'n ri winaq ri man qas ketam tä u wäch ri Dios. Ri e are' käkichomaj chi ri Dios keutatab'ej xa rumal chi k'ia ri käkib'ij pa taq ri oración ri käka'no. ⁸ Mib'an b'a' iwe jas ri käka'n ri e are'. Rumal chi ri qa Tat retam chik jas ri rajwaxik chiwe k'ä mäja' kita' wa' che. ⁹ Rumal ri' aretaq kib'an orar, je wa' chib'ij:

Qa Tat ri k'o la pa ri kaj,
chnimarisa x na u q'ij ri b'i' la.

¹⁰ Taqan na la pa ki wi'
konojel winaq.

B'ana b'a' na la ri rayib'al la
cho ruwächulew,
jas ri käb'an chila' chikaj.

¹¹ Ya la chqawäch ri käqatijo,
jas ri rajwaxik chqe kämik.

¹² Sacha la ri qa mak ri qa'nom
je' jas ri uj käqasach ri ki mak
ri käka'n k'äx chqe.

¹³ Mäya la chqe chi kujtaqchi'x
che mak, xane chujto' la
cho ri Itzel.

Ronojel wa' käqata' che la
rumal chi ri lal
kätaqan la puwi' ronojel.

K'o nimalaj chuq'ab' uk' la
puwi' ronojel,
chnimarisa x na b'a' q'ij la amaq'el
pa taq ri q'ij ri junab' ri kepetik.
Amén.

(Je wa' kib'ij aretaq kib'an orar, —xcha ri Jesús chke.)

¹⁴ We ri ix kisach ki mak nik'iaj winaq chik ri ka'nom k'äx chiwe, ri qa Tat ri k'o chila' chikaj xuquje' kusach na ri i mak ix. ¹⁵ Are k'u we man kisach ki mak nik'iaj winaq chik, ri qa Tat man kusach tä na ri i mak ix, —xcha ri Jesús chke ru tijoxelab'.

Ri Jesús kuya tijonik chrij ri ayuno

¹⁶ Aretaq ri ix kib'an ayuno mib'an iwe jas ri käka'n ri achijab' ri xaq kieb' ki wäch. Ri e are' käka'n che kib' chi keb'isonik. Je' käka'n wa' xaq rech käkil ri winaq chi tajin käka'n ayuno. Qas tzij kinb'ij chiwe chi xuwi wa' ri tojb'al ke käkiriq na. ¹⁷ Ri ix k'ut aretaq

kib'an ayuno, chich'aja ri i palaj, utz kib'an chuxayik ri i wi'. ¹⁸ Je wa' kib'ano rech ri winaq man kākich'ob' taj chi tajin kib'an ayuno, xane xaq xuwi ri qa Tat ri k'o iwuk' pa i tukiel wi kilowik. Are k'ut kāyo'w na ri tojb'al iwe.

Waral kätzizjoxik wi ri q'inomal ri k'o chila' chikaj

¹⁹ Mimulij i q'inomal waral cho ruwächulew, rumal chi waral xa kechikopir ri jastaq, xa keq'elob'ik, xa kelaq'axik. ²⁰ Xane are chimulij i q'inomal chila' chikaj, jawije' ri man kechikopir tä wi, man keq'elob' taj, man kelaq'ax tä k'ut. ²¹ Ri k'o wi ri i q'inomal, chila' ri' b'enaq wi ri iwanima', —xcha ri Jesús.

Ri qa waq'äch are je' jas jun candela ri kuya saqil

²² Ri a waq'äch are je' jas jun candela ri kuya saqil chawe. We utz ri a waq'äch, q'alaj ri' ri a b'e chawäch. ²³ We k'u man utz ra waq'äch, man q'alaj tä ri' ra b'e, at k'o ri' pa q'equm. We ri saqil ri k'o pa ri awanima' kub'an q'equm, jisib'alaj nim na ri q'equm ri'! —xcha ri Jesús chke ru tijoxelab'.

Rajwaxik chi xa jun ri káqapatänij, ri Dios o ri q'inomal

²⁴ Man k'o tä jun winaq kākowinik keupatänij kieb' patrón. Kāretzelaj k'u na u wäch ri jun, loq' kāril na ri jun chik. Kub'an ri jikomal ruk' ri jun, man nim tä k'u kāril wi ri jun chik. Jun winaq man kuya' taj kupatänij ri Dios we b'enaq u k'ux ruk' ri q'inomal, —xcha ri Jesús chke.

Ri Dios keuchajij ri ralk'ual

²⁵ Rumal ri' kinb'ij chiwe: Mixok il che jas ri kib'an chuch'akik ri i wa o ri kitijo. Mixok il che ri iwatz'iaq ri kikojo. Are k'u nim na u b'anik ri k'aslemal chuwäch ri kitijo, are k'u nim na u b'anik ri i cuerpo chuwäch ri atz'iaq ri kikojo. ²⁶ Chiwilampe ri chikop ri kerapap chikaj. Man kākā'n tä tiko'n, man kākikay tä k'u u wäch ri tiko'n chuk'olik wa' pa taq k'uja. Pune je ri', ri qa Tat ri k'o chila' chikaj ketzuquwik. Nim k'u na i q'ij ix chkiwäch ri chikop ajuwokaj. ²⁷ ¿A k'o lo jun chiwe ri kākowinik kāk'asi chi na kieb' oxib' junab' xa rumal chi sib'alaj kok il che? ¡Man k'o taj! —xcha ri Jesús chke.

²⁸ ¿Jas k'u che sib'alaj kixok il che ri iwatz'iaq? Chiwilampe ri kotz'ij pa taq ri juyub' jas kākā'no kek'iyik. Man keb'atz'in taj, xuquje' man kekiemen taj. ²⁹ Kinb'ij k'u chiwe chi pune ta ne je ri', ri nim taqanel Salomón, ruk' ronojel ru q'inomal, man xkowin tä xukoj jun ratz'iaq je' jas jun chke we kotz'ij ri', —xcha chke. ³⁰ We ri Dios je wa' u b'anom che ri katz'iaq ri q'ayes ri e k'o kāmik pa juyub', chuweq k'ut xa keyi' na pa ri q'aq', je ta k'u lo ri ix! ¿A mat

kixrilij na ri Dios che ri iwatz'iaq? Ri ix xa jub'iq' kixkojonik, —xcha chke. ³¹ Rumal ri', mixok b'a' il, mib'ij: “¿Jawije' kāpe wi ri qa wa? o ¿jawije' kāpe wi ri káqatijo? o ¿jawije' kāpe wi ri qatz'iaq?” —mixcha', —xcha chke. ³² Konojel k'u we jastaq ri' are ri käkitzukuj ri winaq. Are k'u ri ix k'o ri i Tat chila' chikaj ri retam chi keajwataj wa' chiwe. ³³ Rumal ri' are nab'e chitzukuj chi ri Dios kátaqan pa ri i k'aslemal, xuquje' chib'ana ri jikomal chuwäch ri Are', kāya'taj k'u na ronojel ri kajwataj chiwe. ³⁴ Mixok b'a' il che ri chuweq. Ri chuweq k'o na ri k'āx kārictajik jas ri kāmik. Ruk' wa' ri i kosik re ri q'ij kāmik, —xcha ri Jesús chke ru tijoxelab'.

7

Miq'at tzij pa ki wi' nik'iaj winaq chik

¹ Miq'at tzij pa ki wi' nik'iaj winaq chik, rech ri Dios man kuq'at tä tzij pi wi' ix. ² Ri Dios je' u q'atik tzij kub'an na pi wi' ix jas ru q'atik tzij kib'an ix pa ki wi' nik'iaj winaq chik. Jas ri pajb'al ri kikoj ix chke nik'iaj winaq chik, je' kākōj na chiwe ix. ³ ¿Jas che kab'ij tzij chkiw' nik'iaj winaq chik? ¡Je' ta ne chi kawil ri in nitz' mes ri k'o pa ru waq'äch ri awachalal, man kawil tä k'u ri a mak at ri je' jas jun kuta'm ri k'o pa ra waq'äch! ⁴ We ri at k'o jun kuta'm pa ra waq'äch, ¿a kuya' lo ri' kab'ij che ri awachalal: “Chaya chwe chi kinwesaj koq ri in nitz' mes ri k'o pa ra waq'äch”? ⁵ ¡Ri at xaq kieb' a wäch! Chawila' nab'e jas u b'anik ra k'aslemal at, je' ta ne chi kawesaj jun kuta'm ri k'o pa ra waq'äch. Je ri' qas katka'y na che resaxik koq ri in nitz' mes ri k'o pa ru waq'äch ri awachalal.

⁶ Meiya ri loq'alaj taq jastaq ri rech ri Dios chke ta ri tz'i', mepe k'u ne chiwiv, kākā'n k'u ch'aqataq chiwe. Meiya ri je'lalaj taq ab'aj perlas chkiwäch taq ri aq, xaq k'u ne mäkita'alej.

Chib'ana orar; chita' ri kiwaj. Chitzukuj ruk' ri Dios, chik'orok'a ri uchija

⁷ Chita' ri kiwaj, kāya'taj k'u na wa' chiwe rumal ri Dios. Chitzukuj ruk' ri Dios, kiriq k'u na. Chik'orok'a ri uchija, kájaqtaj k'u na wa' chiwäch. ⁸ Je ri', rumal chi jachin ri k'o jas kuta', kāya'taj na che. Jachin ri k'o kutzukuj, k'o kuriqo, jachin k'u ri kuk'orok'a ri uchija, kájaqtaj na wa' chuwäch.

⁹ ¿A k'o lo jun chiwe ri kuya jun ab'aj che ri u k'ojol aretaq kuta' u wa? ¹⁰ ¿A kuya ne lo jun kumätz che aretaq kuta' jun kār? ¹¹ We ri ix, ix ajmakib', kixkowin chuya'ik utzalaj taq jastaq chke ri iwalk'ual, ¿a mat ri i Tat ri k'o chila' chikaj keuya na utzalaj taq jastaq chke ri kākita' che?

¹² Je k'u ri', jas ri kiwaj ix chi kākā'n ri winaq chiwe, je' chib'ana ix chke ri e are' xuquje'. Are k'u je wa' ri kub'ij ri Pixab' ri

xutz'ib'aj ri qa mam Moisés, xuquje' je wa' kub'ij taq ri wuj ri xkitz'ib'aj kan ri q'alajisal taq re ru Loq' Pixab' ri Dios.

Waral kâqil wi ri uchib'e ri latz' u wäch

¹³ Chixok b'i pa ri uchib'e ri latz' u wäch. Ri uchib'e xuquje' ri b'e ri ke' pa ri k'äx jawije' käsach wi ki wäch ri winaq, nim ki wäch. E k'ia k'ut ri keb'ok pa ri uchib'e ri'. ¹⁴ Are k'u ri uchib'e xuquje' ri b'e ri ke' pa ri k'aslemal ruk' ri Dios, nu'ch ki wäch xuquje' sib'alaj k'äx. Man e k'ia tä k'ut ri keriqowik.

Etamtal jun che' we utz o man utz taj rumal ru wächinik

¹⁵ Chichajij iwib' chkiwäch ri achijab' ri xaq e b'anal taq tzij, ri kâka'n che kib' chi e q'alajisal taq re ru Loq' Pixab' ri Dios. E are k'u wa' kepe iwuk', sib'alaj utz kepetik je' ta ne chij ri kij, are k'u chkipam e jiq'ab' taq utiw. ¹⁶ Ri ix kich'ob' na jachin taq wa' rumal ri kâka'no. Je' jas jun che' käch'ob'taj u wäch rumal ru wächinik. ¿A k'o lo jumul ri ketam uvas chrij ri k'ix? ¿A ketam lo higos chrij ri tzäkäm? ¡Man je' taj! ¹⁷ Je k'u ri ronojel utzalaj che' utz ri u wäch ri kuya'. Are k'u ri che' ri man utz taj, man utz tä ru wäch ri kuya'. ¹⁸ Ri utzalaj che' man kâkowin taj kuya ru wäch ri man utz taj. Ri che' ri man utz taj man kâkowin taj kuya utzalaj u wäch ri'. ¹⁹ Ronojel che' ri man kuya tä utzalaj u wäch, kât'aqix na, kâk'iäq na ri' pa ri q'aq'. ²⁰ Je wa ri' ri ix qas kich'ob' na jas ki b'anik ri winaq rumal ri kâka'no, —xcha chke.

Man konojel tä ri winaq keopan na chila' jawije' kâtaqan wi ri Dios

²¹ Man konojel tä winaq keb'ok chila' jawije' ri kâtaqan wi ri Dios, pune kâkib'ij chwe: "Qajaw, Qajaw," —kecha ri', xane xaq xuwi ri keb'anow ru rayib'al ri nu Tat ri k'o chila' chikaj. ²² E k'ia ri kâkib'ij na chwe pa ri q'ij ri': "Qajaw, Qajaw, ri uj qa yo'm tzijonem pa ri b'i' la. Pa ri b'i' la xequesaj b'i itzel taq espíritus chke ri winaq, xuquje' are pa ri b'i' la ri xqa'n k'ia u wäch kajmab'al," —kecha na. ²³ Ri in k'ut kinb'ij na chke: "Man wetam tä i wäch. Chixel b'i chnuwäch, ri ix xaq ix b'anal taq etzelal," —kincha na chke, —xcha ri Jesús chke ru tijoxelab'.

Waral kâqil wi ri kieb' u wäch tak'alib'al ja

²⁴ Je k'u ri' jachin ri kutatab'ej ri nu tzij, kub'an k'ut jas ri kinb'ij, are je ri' jas jun achi ri k'o u no'j, ri xuyak ri rachoch pa ab'aj. ²⁵ Xqaj k'u ri jäb', xek'iy taq ri ja', xpe jun nimalaj kiäqiq' chrij ri ja, man xtzaq tä k'ut rumal chi ru tak'alib'al are ab'aj. ²⁶ Jachin k'u ri kutatab'ej ri nu tzij, man kub'an tä

k'ut jas ri kinb'ij, junam ri' ruk' jun achi ri man kuch'ob' taj jas ri kub'ano, ri xuyak ri rachoch puwi' ri senyäb'. ²⁷ Xqaj ri jäb', xek'iy taq ri ja', xpe jun nimalaj kiäqiq' chrij ri ja, xtzaq k'u ri ja. ¡Ronojel xa xwulijik! —xcha ri Jesús.

²⁸ Aretaq ri Jesús xto'taj che tzijonem, ri winaq sib'alaj xkikajmaj ru tijonik. ²⁹ Je ri', rumal chi ri u tijonik kuk'utu chi are je' jas jun ri k'o u taqanik pa ki wi', man je' taj jas ri xka'n ri tijonelab' re ri Pixab'.

8

Ri Jesús kukunaj jun achi ri k'o itzel ch'a'k che

¹ Aretaq ri Jesús xqaj loq cho ri juyub', e k'ia winaq xeteri loq chrij. ² Xopan k'u ruk' ri Jesús jun achi ri k'o itzel ch'a'k che. * Xxuki chuwäch ri Jesús, xub'ij che: Tat, ri in wetam chi kâkowin la che nu kunaxik we kaj la, —xcha che.

³ Xuyuq k'u ru q'ab' ri Jesús, xuchap koq ri achi, xub'ij che: ¡Kwaj! Chutzir b'a' la, —xcha che.

Xuwi wa' xub'ij ri Jesús. Xutzir k'u ri achi ri k'o ri itzel ch'a'k che. ⁴ Xub'ij k'u ri Jesús che: ¡Tampe la! K'o jas mab'ij la che jachin jun. Oj la, jek'utu ib' la cho ri sacerdotē.† Ya la ri sipanik ri taqom kan rumal ri qa mam Moisés chi käyi'k aretaq kâkunataj jun ri k'o itzel ch'a'k che. Are k'u q'alajisab'al wa' chkiwäch ri winaq chi utzirinaq chi la, —xcha che.

Ri Jesús kukunaj jun ala patänil re jun ki nimal soldados

⁵ Aretaq xopan ri Jesús pa ri tinimit Capernaum, xpe jun achi ruk'. Are jun chke ri ki nimal soldados aj Roma. Xuta' k'u jun toq'ob' che ri Jesús. ⁶ Je wa' xub'ij: Tat, ri ala ri patänil we qajinaq pa ch'at cho ja, kâminaq u cuerpo. Sib'alaj k'äx u riqom rumal ri yab'il, —xcha che.

⁷ Ri Jesús xub'ij che: Kine' na chukunaxik, —xcha che.

⁸ Ri ki nimal soldados xch'awik, xub'ij che ri Jesús: Tat, man taqal tä chwe chi kok la pa ri wachoch. Xaq xuwi taqan la chi kel ri yab'il che ri patänil we, ruk' k'u wa' kutzir na, —xcha che. ⁹ Ri in xuquje' ri kâtaqan pa nu wi' ri nim u b'anik. Xuquje' ri in e k'o nu soldados ri kintaqan pa ki wi'. Aretaq kinb'ij che jun chke ri nu soldados chi ke'k, ke' k'ut. Aretaq kinb'ij che jun chik chi käpetik, käpe k'u ri are'. Aretaq kintaq ri patänil we chub'anik jun chak, ri are' kub'an ri kinb'ij, —xcha ri ki nimal soldados che ri Jesús.

* **8:2** Ri itzel ch'a'k are jun yab'il ri sib'alaj k'äx ri kusipaj rib'. xuquje' ri Diccionario, K'isb'al re we Nuevo Testamento.

† **8:4** "Sacerdote aj Israel": Chawila' ri San Lucas 1:8,

¹⁰ Aretaq ri Jesús xuta wa', sib'alaj xukaj-maj, xub'ij k'u chke ri winaq ri e teren chrij: Qas tzij kimb'ij chiwe, chi man k'o tä jumul ri nu riqom chkixol ri winaq aj Israel jun achi jas we achi ri' ri sib'alaj kâkojon chwe, —xcha chke. ¹¹ Kimb'ij k'u chiwe chi e k'ia ri kepe na chrelb'al q'ij, xuquje' chuqajb'al q'ij, ri ket'uyi na junam ruk' ri qa mam Abraham, ri qa mam Isaac, ri qa mam Jacob chuchi' ri mesa chila' jawije' ri kâtaqan wi ri Dios. ¹² Are k'u ri xa xkichomaj keb'ok chila' jawije' ri kâtaqan wi ri Dios, man keb'ok taj rumal chi man xekojon taj. Xane xa kek'iaq na b'i pa ri q'equm. Chila' k'ut keb'og' wi na, chila' kâkiquch'uch'ej wi na ri ki ware, —xcha ri Jesús chke ri winaq.

¹³ Te ri' xub'ij ri Jesús che ri ki nimal soldados: Oj la cho ja. Rumal chi xkoj la chi kâkunataj ri ala, je k'u kâb'antaj na, —xcha che.

Tzare chi' k'ut xutzir ri ala aretaq xub'ij ri Jesús wa' we tzij ri'.

Ri Jesús kukunaj ru ji' chichu' ri tat Pedro

¹⁴ Ri Jesús xe' cho rachoch ri tat Pedro, xril k'u ru ji' chichu' ri tat Pedro qajinaq pa ch'at rumal jun nimalaj q'aq'. ¹⁵ Ri Jesús xuchap ri chichu' che ru q'ab', xel k'u ri q'aq' chrij. Chanim k'ut xwalijik, xuchap ki patânixik.

Ri Jesús keukunaj k'ia yawab'ib'

¹⁶ Aretaq xq'eqal chik, e k'ia winaq ri k'o itzelalaj taq espíritus chke xek'am b'i cho ri Jesús. Xa k'u ruk' jun tzij ri xub'ij ri Jesús xeb'el b'i ri itzelalaj taq espíritus, xuquje' xeukunaj konojel taq ri yawab'ib'. ¹⁷ Je' xb'antaj wa' rech je' kelik jas ri xub'ij ri qa mam Isaías ri q'alajisal re ru Loq' Pixab' ri Dios: "Ri Are' xuriq k'âx rumal qech, xuya qa chuq'ab', xujukunaj che ri qa yab'ilal," —xcha ri qa mam Isaías.

Waral kâqil wi ri winaq ri xkib'ij chi kâkaj keb'e' ruk' ri Jesús

¹⁸ Ri Jesús xril chi e k'ia winaq ki mulim kib' ruk', xub'ij chke ru tijoxelab': Chuq'ax ch'âqâp che ri mar, —xcha chke. ¹⁹ Xpe k'u jun tijonel re ri Pixab', xqeb' k'u ruk' ri Jesús, xub'ij che: Ajtij, kwaj kine' uk' la apawije' ta ne ri ke' wi la, —xcha che.

²⁰ Xch'aw k'u ri Jesús, xub'ij che: Ri yak k'o ki jul, xuquje' ri chikop ri kerapap cho ri kaj k'o ki sok. Are k'u ri in, in ri' ri Ralk'ual ri Dios ri Qas Winag,† man k'o tä jawije' ri kinwar wi, —xcha che.

²¹ Jun achi chik, jun chke ru tijoxelab', xub'ij che ri Jesús: Tat, ya la chwe chi nab'e kine'k, kinmuq kan ri nu tat aretaq kâkâmik, —xcha che.

²² Xch'aw k'u ri Jesús, xub'ij che: Tasa'j at wuk', chaya chke ri kâminaqib' chi chkimuqu ri ki kâminaq, —xcha ri Jesús che.

Ri Jesús kub'ano chi kâtâni ri kiâqiq'

²³ Te ri' xok ri Jesús pa ri barco, ru tijoxelab' k'ut xeb'e' ruk'. ²⁴ Xpe k'u jun nimalaj kiâqiq' ri sib'alaj k'âx puwi' ri ja', je ri' chi ri nimaq taq uwoja' tajin keb'ok pa ri barco. Are k'u ri Jesús tajin kâwarik. ²⁵ Xeb'e' k'u ru tijoxelab', xekik'asuj, xkib'ij che: ¡Qajaw Jesús, chujto' la! ¡Tajin kujkâmik! —xecha che.

²⁶ Xch'aw k'u ri Jesús, xub'ij chke: ¿Jas che sib'alaj kixej iwib'? ¡Ri ix qas tzij man nim tä más ri i konojik! —xcha chke.

Xwalij k'u ri Jesús, xuyaj ri kiâqiq' xuquje' ri mar. Xtâni k'u ri kiâqiq', xlibob' ronojel ru wi' ri mar. ²⁷ Ri achijab' sib'alaj xkikajmaj, xkib'ij k'ut: ¿Jachin lo ri' we achi ri', chi ri kiâqiq' xuquje' ri ja' re ri mar keniman che? —xecha ri achijab'.

E k'o kieb' achijab' aj Gadara ri e k'o itzel taq espíritus chke

²⁸ Aretaq xeopan ch'âqâp che ri mar, pa ri ki tinimit ri winaq aj Gadara, xeb'el loq kieb' achijab' pa ri campo santo chkixol taq ri muqub'al, xeopan k'u ruk' ri Jesús. E k'o itzel taq espíritus chke we achijab' ri'. Sib'alaj xib'ib'al kepetik, je ri' chi man k'o tä chi jun kâkowinik kok'ow pa ri b'e' ri'. ²⁹ Xkichap k'u u raqik ki chi', ko xech'awik, xkib'ij che ri Jesús: ¿Jas kaj la chqe uj, Jesús, lal ri' ri u K'ojol ri Dios? ¿A petinaq la waral chub'anik k'âx chqe pune mâja' kuriq ri q'ij? —xecha che ri Jesús.

³⁰ E k'ia k'u ri aq tajin keyuq'ux apan chila' pa ri juyub' ri'. ³¹ Ri itzel taq espíritus xeb'ochi' che ri Jesús, xkib'ij che: We kujesaj b'i la, ya la chqe chi kujok chke ri aq, —xecha che.

³² Xub'ij k'u ri Jesús chke: Jix b'a', chixok chke ri aq, —xcha chke.

Xeb'el k'u b'i ri itzel taq espíritus chke ri achijab', xeb'ok b'i chke ri aq. Konojel k'u ri aq xkik'iaq b'i kib' chutzam ri juyub', xeqaj k'u pa ri mar, xejij'ik.

³³ Are k'u ri ajyuq'ab' taq aq sib'alaj xkixej kib', xeanimaj b'ik, xeb'e'k. Aretaq xeopan pa ri tinimit xkesaj u tzijol wa' ri xkilo, xuquje' ri xb'antaj kuk' ri achijab' ri xek'oji ri itzel taq espíritus chke. ³⁴ Konojel k'u ri winaq ri e k'o pa ri tinimit xeb'e' jela' jawije' k'o wi ri Jesús. Aretaq xkil ri Jesús, xkib'ochi'j, xkib'ij che chi chel b'i pa ri ki tinimit.

† 8:20 Ri Jesús xukoj we b'i'aj ri' chb'il rib' chuk'utik chi are ri Cristo o ri Mesías ri xtz'ib'ax ojer pa ru Loq' Pixab' ri Dios chi are ri To'l Qe ri kâpetik.

9

Ri Jesús kukunaj jun achi ri káminaq u cuerpo

¹ Te k'u ri' xok ri Jesús pa jun barco, xq'ax ch'äqäp che ri cho, xopan k'u pa ru tinimit ri Are'. ² Xk'am k'u b'i jun achi cho ri Jesús ri káminaq u cuerpo, q'oyol k'u ri' cho jun alaj ch'at. Aretaq ri Jesús xrilo chi ri achijab' ri e teleninaq loq sib'alaj kekojon che, xub'ij che ri yawab': Mäb'ison chi la, tat, ri mak la xesachtajik, —xcha che.

³ Jujun k'u chke ri tijoxelab' re ri Pixab' tajin kechomanik, xkib'ij pa kanima': "We achi ri' kub'ij ri äwas u b'ixik chrij ri Dios," —xcha'. ⁴ Ri Jesús retam chik jas ri tajin kákichomaj, xub'ij k'u chke: ¿Jas che k'o we itzel taq chomanik ri' pa anima' alaq? —xcha chke. ⁵ ¿Jachike ri man k'äx tä u b'ixik: "Ri mak la xesachtajik", o ru b'ixik: "Walij la, oj la cho ja"? —xcha ri Jesús chke. ⁶ Rech b'a' ketamaj alaq chi ri in, in ri' ri Ralk'ual ri Dios ri Qas Winag, k'o k'u nu taqanik pa ki wi' ri winag cho ruwächulew chusachik ri ki mak, jtampe alaq ri kinb'ij! —xcha chke.

Xub'ij k'u ri Jesús che ri achi ri káminaq u cuerpo: Walij la, oj la cho ja, k'ama b'i la ri sok la, —xcha che.

⁷ Xwalij k'u b'i ri achi ri káminaq u cuerpo, xe' cho rachoch. ⁸ Aretaq xkil ri winag wa', xkixej kib'. Xkinimarisaq k'u u q'ij ri Dios, rumal chi u yo'm pa ki q'ab' winag chi taqal u b'anik we kajmab'al ri'.

Ri Jesús kusik'ij ri tat Mateo rech ke' ruk'

⁹ Xel b'i ri Jesús chila'. Ok'owem kub'an ri Are' jawije' ri kätöj wi ri alkab'al, xril k'u u wäch jun achi, Mateo u b'i, t'uyl chila'. Xub'ij k'u che: Tasa'j wuk', —xcha che.

Xwalij k'u ri tat Mateo, xe' ruk' ri Jesús.

¹⁰ Pa jun q'ij k'ut t'uyl ri Jesús chi' ri mesa cho rachoch ri tat Mateo. E k'ia k'u ri toq'il taq alkab'al, xuquje' nik'iaj ajmakib' chik e t'uyl ruk' ri Jesús chi' ri mesa junam kuk' ru tijoxelab'. ¹¹ Xepe k'u ri tata'ib' fariseos, xkil ronojel wa'. Xkita' k'u chke ru tijoxelab', xkib'ij: ¿Jas che käwi' ri Jesús ri iwajtij kuk' ri toq'il taq alkab'al xuquje' kuk' ri ajmakib'? —xcha chke.

¹² Aretaq xuta ri Jesús wa', xub'ij chke: Ri winag ri utz ki wäch, ri k'o ki chuq'ab', man rajwaxik tä kunal ke, xane are rajwaxik wa' chke ri yawab'ib', —xcha chke.

¹³ Oj alaq, jetamaj alaq jas kel kub'ij wa' we tzij ri' ri tz'ib'tal kan pa ru Loq' Pixab' ri Dios ri kub'ij: "Ri in are kwaj chi ri ix kitoq'ob'isaj ki wäch ri winag. Man are tä kwaj chi keikämisaq taq awaj che ki sipaxik chnuwäch," —kächa ri Dios, —xcha chke. Ri in, man in petinaq tä che ki sik'ixik winag ri jikom kanima' cho ri Dios, xane in petinaq

che ki sik'ixik ri ajmakib' rech kákik'ex kanima', kákik'ex k'u ki chomanik, —xcha chke.

E k'o winag ri xkita' che ri Jesús chrij ri ayuno

¹⁴ Ru tijoxelab' ri tat Juan Qasal Ja' xeopan ruk' ri Jesús, xkib'ij che: ¿Jas che ri uj xuquje' ri tata'ib' fariseos amaq'el káqa'n ri ayuno,* are k'u ri tijoxelab' la man káka'n tä ri ayuno? —xecha che.

¹⁵ Ri Jesús xch'awik, xub'ij chke: ¿A keb'ison lo ri winag ri e k'o pa jun k'ulanem aretaq ri achi ri te' xk'uli'k k'o kuk'? Kopan k'u na ri q'ij aretaq kesax b'i we achi ri' chkixol. Te k'u ri' káka'n na ri ayuno pa ri q'ij ri', —xcha ri Jesús chke.

¹⁶ Xuquje' xub'ij ri Jesús chke: Man k'o tä jun winag ri kut'is jun k'ak' k'ojob'al chrij jun q'el atz'iaq. We ta je ri' ri k'ak' k'ojob'al kuk'ol rib', káresaj k'u b'i jub'iq' che ri q'el atz'iaq, kánimar k'u ru teq'tob'ik, —xcha chke. ¹⁷ Man k'o tä jun ri kuya k'ak' vino pa q'el taq q'eb'al re tz'um. We ta je ri', ri vino kut'ub'ij na ri tz'um, ketzeletaj k'u na ri vino xuquje' taq ri ri k'ak' v'ino käyi' pa taq k'ak' taq q'eb'al re tz'um, rech ri vino xuquje' taq ri tz'um man ketzeletaj taj, —xcha ri Jesús chke.

Kákunax jun ixoq yawab', xuquje' kák'astajisax ru mia'l ri tat Jairo ri xkäm na

¹⁸ Je wa' tajin kub'ij ri Jesús chke ri winag aretaq xopan jun tata' ki nimal ri winag aj Israel. Xxuki chuwach ri Jesús, xub'ij che: Ri alaj nu mia'l k'ä te' xkäm kanoq. We k'u ri lal ke' la wuk', käya la ri q'ab' la puwi', kák'asi na, —xcha che.

¹⁹ Xe' k'u ri Jesús ruk' ri tata', e rachi'l ru tijoxelab'. ²⁰ K'o k'u jun ixoq yawab', ri xke' kab'lajuj junab' xaq kel u kik'el. Xqeb' k'u chrij ri Jesús, xuchap koq ru chi' ru q'u'. ²¹ Xub'ij k'u pa ranima': "Xuwi ta ne we kinchap koq ru q'u', kinutzir na," —xcha ri ixoq. ²² Ri Jesús k'ut xutzolq'omij rib', xril ri ixoq, xub'ij che: Mäb'ison chi la, nan, xkunataj k'u la, rumal chi xkojon la chwe, —xcha che.

Tzare chi' k'ut xutzir ri ixoq.

²³ Aretaq ri Jesús xopan cho rachoch ri tata' ri ki nimal ri winag aj Israel, xrilo chi e k'o chi ri ajq'ojomab' ri keb'e' che ri muqnajik, xuquje' xeril ri winag chi sib'alaj kákik'is kib' che oq'ej, sib'alaj kákiraq ki chi'. ²⁴ Xub'ij k'u chke: jchel na apan alaq cho ja! Man káminaq tä ri ali, xane xa käwarik, —xcha chke.

Are k'u ri winag xa xkitze'j u wäch ri Jesús.

²⁵ Ri Jesús k'ut xeresaj b'i ri winag cho ja, te k'u ri' xok b'ik. Xuchap ri ali che ru q'ab'. Ri ali k'ut xwalijik. ²⁶ Xel k'u u tzijol wa' ri xb'antajik pa taq konojel ri tinimit chila'.

* 9:14 Chawila' ri tzij "Ayuno" pa ri Diccionario, k'isb'al re we Nuevo Testamento.

Ri Jesús keukunaj kieb' achijab' ri man kekowin taj keka'yik

²⁷ Aretaq xel b'i ri Jesús chila', kieb' moyab' xeteri b'i chriy, xkaraq ki chi', xkib'ij: ¡Tat, lal ri' ri Ralk'ual kan ri qa mam David, toq'ob'isaj la qa wäch! —xcha che.

²⁸ Aretaq ri Jesús xok b'i pa ri ja, ri kieb' moyab' xegeb' ruk'. Ri Jesús xuta' chke: ¿A kákoj alaq chi kinkowin chub'anik wa'? —xcha che.

Käqakojo, Tat, —xcha ri e are'.

²⁹ Ri Jesús xuchap koq ri ki waq'äch, xub'ij chke: Je' ta b'a' chb'antajik jas ri xkoj alaq chi kinkowin chub'anik, —xcha che.

³⁰ Xutzir k'u ri ki waq'äch. Ri Jesús sib'alaj xeupixb'aj, xub'ij chke: Mätzijoj alaq wa' che jachin jun, —xcha che.

³¹ Te k'u ri', aretaq xeb'el b'ik, xkichap u tzijoxik wa' jas ri xub'an ri Jesús kuk' pa konojel taq ri tinimit ri k'o jela'.

Ri Jesús kukunaj jun achi ri man kákowin tá chik käch'awik

³² Tajin keb'el b'i ri kieb' moyab' ri xekunaxik, aretaq xk'am loq chuwach ri Jesús jun achi mem ri k'o jun itzel espíritu che.

³³ Aretaq xesax b'i ri itzel espíritu rumal ri Jesús, ri achi ri mem xuchaplej tzijonem. Ri winaq sib'alaj xkikajmaj wa', xkib'ij: Man k'o tá jumul ri je' qilom wa' waral pa Israel, —xcha'.

³⁴ Are k'u ri tata'ib' fariseos xkib'ij: We achi ri' keresaj b'i ri itzel taq espíritu chke ri winaq ruk' ru chuq'ab' ri ki nimal ri itzel taq espíritu, —xcha'.

Ri Jesús kel u k'ux chke ri winaq

³⁵ Ri Jesús xeusolij ri nimaq taq tinimit xuquje' ri alaj taq tinimit. Pa taq ri rachoch Dios ri kákimulij wi kib' ri winaq xuya tijonik, xutzijoj ri Utzalaj Tzij re ri Evangelio chriy ru taqanik ri Dios pa ki wi' ri winaq. Xukunaj ronojel u wäch yab'il, xuquje' xresaj ronojel u wäch k'äx chke ri winaq. ³⁶ Aretaq xeril ri k'ialaj winaq, xel u k'ux chke rumal chi keb'isonik, man k'o tá káku'b'isan ki k'ux. E je' ta ne chij ri man k'o tá kajyuq'. ³⁷ Xub'ij k'u chke ru tijoxelab': Qas tzij sib'alaj nim ri q'atoj, xa k'u e kieb' oxib' ri ajchakib'. ³⁸ Chib'ochi'j b'a' ri Ajchaq'el ri q'atoj chi keutaq b'i nik'aj ajchakib' chik pa ru chak, —xcha che.

10

Kecha' ri kab'lajuj apóstoles rumal ri Jesús

¹ Ri Jesús xeusik'ij ri kab'lajuj u tijoxelab'. Xuya chke chi kákoj taqanik pa ki q'ab' che kesaxik b'i ri itzel taq espíritu, xuquje' che ki kunaxik ri winaq che ronojel u wäch yab'il o ronojel u wäch k'äx ri k'o chke.

² Are wa' ri ki b'i' ri kab'lajuj apóstoles*: nab'e ri tat Simón ri xuquje' káb'ix Pedro che, ruk' ri tat Andrés ri rachalal. Ri tat Jacobo ruk' ri tat Juan ri rachalal ri e u k'ojol ri tat Zebedeo. ³ Ri tat Felipe, ri tat Bartolomé, ri tat Tomás, xuquje' ri tat Mateo ri toq'il alkab'al. Ri tat Jacobo ru k'ojol ri tat Alfeo. Ri tat Lebeo ri xuquje' káb'ix Tadeo che. ⁴ Ri tat Simón ri káb'ix u nimal tinimit che, xuquje' ri tat Judas Iscariote ri xjachow ri Jesús.

Ri Jesús keutaq b'i ri kab'lajuj u tijoxelab' chutzijoxik ri Utzalaj Tzij re ri Evangelio

⁵ Ri Jesús xeutaq b'i we achijab' ri', xeupixb'aj b'ik, xub'ij chke: Mixe' pa taq ri ki tinimit ri winaq ri man aj Israel taj. Man kixok tá k'ut pa taq ri ki tinimit ri winaq aj Samaria. ⁶ Xane are kixe' kuk' ri winaq aj Israel, ri e je' ta ne chij e sachinaq kan pa taq juyub'. ⁷ Jix, jib'ij chke chi xa jub'iq' man kuchaplej ru taqanik ri Dios. ⁸ Cheikunaj ri yawab'ib', cheik'astajisaj ri káminaqib', cheikunaj ri k'o itzel taq ch'a'k chikj, cheiwesaj k'u b'i ri itzel taq espíritu chke ri winaq. Ri ix xaq sipam wa' we kuinem ri' chiwe, k'o k'u b'a' mita' che ri ki to'ik ri winaq, —xcha che.

⁹ Mik'am b'i i rajil. Ri q'an puaq, ri saq puaq, ri kää puaq mik'am k'u b'ik. ¹⁰ Mik'am b'i ri i chim che ri b'e. Xa jun i kamixa' kik'am b'ik. Mik'am b'i i xajáb'. Mik'am b'i i ch'imiy. Je ri', rumal chi taqal che ri ajchak chi käyi' ri kajwataj che.

¹¹ Apachike tinimit ri kixopan wi, we nim, we ch'utin, chitzukuj jun winaq chila' ri gas kixk'ulaj. Chixkanaj kan chila' k'a' kichap na b'i jumul chik ri i b'e. ¹² Aretaq kixok pa jun ja, chiya rutzil ki wäch ri e k'o pa ri ja. Kib'ij chke chi are utzil kiwaj chke. ¹³ We taqal chke ri winaq ri e k'o pa ri ja chi kiya kan rutzil ki wäch ruk' utzil, chiya kanoq. We k'u man taqal chke, miya kan rutzil ki wäch. ¹⁴ Are k'u we man kixk'ulax kumal, we man káka'j taj kákitatab'ej ri i tzij, chixel b'i cho ri ja ri' o pa ri tinimit ri'. Chitota' kan ri ulew ri k'o che taq ri iwaqan. (Chib'ana wa' chuq'alajisaxik chikj ri winaq re ri tinimit ri' chi man utz tá ri káka'no, k'o ki mak.) ¹⁵ Qas tzij kinb'ij chiwe chi pa ri q'ij ri káq'at na tzij pa ki wi' ri winaq ri' rumal ri Dios, nim na ri k'ájisab'al ki wäch ri winaq re ri tinimit ri' chuwach ri k'ájisab'al ki wäch ri winaq aj Sodoma xuquje' ri winaq aj Gomorra,† —xcha che.

Káb'an na k'äx chke ri kojonelab'

¹⁶ ¡Chiwilampe'! Ri in kixintaq b'ik je' ta ne chi ix chij chixol ri utiw. Chixsak'aj b'a' je' jas ri kumátz, chib'ana k'ut je' jas ri kub'an

* **10:2** Ri tzij "apóstol" kel kub'ij "taqom". E kab'lajuj u taqo'n ri Jesús ri e cha'tal rumal. † **10:15** Ri kieb' tzij "Sodoma" y "Gomorra" keriqtaj pa ri Diccionario, k'isb'al re we Nuevo Testamento.

ri palomäx ri man kub'an tä k'äx. ¹⁷ Chiwila b'a' iwib', rumal chi ri winaq kixkijach na pa ki q'ab' ri ki nimaqil ri winaq, kixkijach na pa taq ri rachoch Dios ri käkimulij wi kib' ri winaq. ¹⁸ Kixkik'am na b'i chkiwäch q'atal taq tzij, xuquje' chkiwäch nimaq taq taqanelab' rumal wech in, rech kiq'alajisaj ri Utzalaj Tzij re ri Evangelio chkiwäch ri e are' xuquje' chkiwäch ri winaq ri man aj Israel taj. ¹⁹ Aretaq k'ut kixk'am b'ik rech kixjach chkiwäch ri q'atal taq tzij, mixej iwib'. Michomaj b'ik jas ri kib'ij, o jas ri kib'an chub'ixik wa'. K'ol b'a' pa i jolom chi aretaq rajwaxik kixch'awik, ri Dios käyo'w na chiwe ri tzij ri kib'ij. ²⁰ Man ix tä k'u ri ri kixtzijon na, xane are ri Loq'alaj Espiritu rech ri qa Tat käyo'w na ri tzij pa ri iwanima', —xcha chke.

²¹ Ri winaq kekijach na ri kachalal pa kämisaxik. Ri nan tat kekijach na ri kalk'ual pa kämisaxik. Ri alk'ualaxelab' käkiyak na kib' chkiy ri ki nan ki tat, kekijach na pa kämisaxik. ²² Ketzelax na i wäch kumal konojel ri winaq xa rumal wech in. Apachin k'u ri kuch'ij ri k'äx k'ä käk'is na ronojel kuriq na ru tob'anik ri Dios. ²³ Aretaq käb'an k'äx chiwe pa jun tinimit, chixanimaj b'i pa jun tinimit chik. Qas tzij kinb'ij chiwe chi mäja' kixkowin chusolixik taq konojel ri tinimit ri e k'o wi ri winaq aj Israel aretaq kinpe in, in ri' ri Ralk'ual ri Dios ri Qas Winag, —xcha chke ru tijoxelab'.

²⁴ Ri tijoxel man are tä nim na u b'anik chuwäch ru tijonel. Ri ajchak k'ut man are tä nim na u b'anik chuwäch ri u patrón. ²⁵ Ri tijoxel rajwaxik käku'b'i u k'ux chi käjunamataj na ruk' ru tijonel. Ri ajchak k'ut rajwaxik käku'b'i u k'ux chi käjunamataj na ruk' ru patrón. We ri ajchaq'el ja käb'ix Beelzebú che xa che yoq'b'al re, zjas ta k'u lo käb'ix chke ri rachalaxik ri are'?

Waral käqil wi jachin chuwäch ri rajwaxik käqaxej wi qib'

²⁶ Rumal ri' mixej iwib' chkiwäch ri winaq. Man k'o tä ri ch'uq'talik ri mat kel na chi saq. Man k'o tä k'u ri k'u'talik ri mat ketamax na. ²⁷ Ri kinb'ij chiwe ix pa ri q'equm, chiya u b'ixik pa saqil. Ri kinb'ij chiwe chik'uyal, chiraga i chi' chub'ixik wa' pa taq ri b'e. ²⁸ Mixej iwib' chkiwäch ri winaq ri kekowinik käkikämisaj ri cuerpo, man kekowin tä k'u chukämisaxik ri ranima' jun. Xane are chixej iwib' chuwäch ri jun ri käkowinik kusach u wäch ru cuerpo jun winaq xuquje' ri ranima' ri are' pa ri q'aq'.

²⁹ ¿A mat xa jun centavo kek'iyix wi kieb' alaj taq chikop ajuwokaj? Man k'o tä k'u jun chke we alaj taq chikop ri' ri käkämik we ta mat kraj ri i Tat. ³⁰ Xuquje' ne ri risma i wi', konojel wa' e ajilatal rumal ri Dios. ³¹ Mixej b'a' iwib', ri ix sib'alaj ix loq' na chkiwäch

k'ia alaj taq chikop ajuwokaj, —xcha ri Jesús chke.

Ri käkiq'alajisaj kib' chkiwäch ri winaq chi e kjoninaq che ri Jesucristo

³² Konojel ri käkiq'alajisaj kib' chkiwäch ri winaq chi e kjoninaq chwe, ri in xuquje' king'alajisaj na chuwäch ri nu Tat ri k'o chila' chikaj chi e wachi'l in. ³³ Apachin k'u ri kub'ij chkiwäch ri winaq chi man retam tä nu wäch, ri in xuquje' kinb'ij chuwäch ri nu Tat ri k'o chila' chikaj chi man wetam tä u wäch ri are', —xcha ri Jesús.

Rumal ri Jesús käk'oji na ch'oj chkiwol ri winaq

³⁴ Michomaj chi ri in petinaq chuya'ik utzil chkiwol ri winaq cho ruwächulew, xane rumal wech in käk'oji na ch'oj chkiwol ri winaq. ³⁵ Käb'antaj na ch'oj rumal wech, jun tata' chrij ri u k'ojol, ru k'ojol k'ut chrij ru tat, jun chichu' chrij ri ral ali, ri ali k'ut chrij ru nan, xuquje' ne ri jun ali chik chrij ru nan ralib', ru nan ralib' k'ut chrij ri are'. ³⁶ Je ri' chi ri ki k'ulel ri winaq chkiwajunal, e are' ri kachalaxik ri e are', —kächa ri Jesús.

³⁷ Apachin ri loq' na käril ru nan u tat chnuwäch in, man taqal tä ri' chi kok che nu tijoxel. Apachin ri loq' na käril ru k'ojol o ru mia'l chnuwäch in, man taqal tä ri' chi kok che nu tijoxel. ³⁸ Apachin ri man käpe tä wuk' in rumal chi man kraj taj kuriq ri kämik'al jas ri kinriq in, man taqal tä ri' chi kok che nu tijoxel. ³⁹ Jachin ri kraj kuto' u wi' ru k'aslemaal waral cho ruwächulew, käkäm na ri'. Jachin k'u ri kuya ru k'aslemaal rumal wech in, kuto' na u wi' ri' ru k'aslemaal.

Waral kätzijox wi ri tojb'al re ri käqa'no

⁴⁰ Ri winaq ri utz i k'ulaxik kub'ano, in ri' kinuk'ulaj. Jachin ri kinuk'ulaj in, are kuk'ulaj ri' ri Jun ri xintaqow loq. ⁴¹ Jachin ri kuk'ulaj jun q'alajisal re ru Loq' Pixab' ri Dios ri taqom loq rumal ri Dios, kuk'am na ri tojb'al re jas ri käyi' che jun q'alajisal re ru Loq' Pixab' ri Dios. Jachin ri kuk'ulaj jun utzalaj achi, kuk'am na ri tojb'al re jas ri käyi' che jun utzalaj achi rumal ri utzil ri kub'ano. ⁴² Apachin ri kuya jun vaso joron che jun chke we winaq ri' ri man nim tä ki b'anik xa rumal chi are nu tijoxel wa', qas kuriq na ri tojb'al re, —xcha ri Jesús chke.

11

E k'o u taqo'n ri Juan Qasal Ja' keopan ruk' ri Jesús

¹ Aretaq ri Jesús xto'taj che ki pixb'exik ri kab'lajuj u tijoxelab', xel b'i chila' rech kuya tijonik chke nik'iaj winaq pa taq ri tinimit jela', xuquje' rech kutzijoj ri Utzalaj Tzij re ri Evangelio chke.

² Are k'u ri tat Juan Qasal Ja' k'o pa che'. Xretamaj k'ut jas ri tajin kub'an ri Cristo. Ri are' xeutaq b'i kieb' chke ru tijoxelab' ruk' ri Jesús. ³ Je' xub'ano rech kākita' che: ¿A lal ri' ri Cristo ri kāpe na? o ¿A rajwaxik ne kāqeyej chi na jun chik? —xcha che.

⁴ Xch'aw k'u ri Jesús, xub'ij chke: Oj alaq, b'ij alaq che ri tat Juan jas ri tajin kil alaq, xuquje' ri tajin kāta alaq. ⁵ B'ij alaq che chi ri moyab' keka'y chik, ri ch'okojib' keb'in chik, ri k'o itzel ch'a'k chikij tajin keutzir che ri ki yab'. B'ij alaq che chi ri so'rab' kākita chik, ri kāmānāqib' tajin kek'astajik, xuquje' chi ri meb'a'ib' tajin kātzirox ri Utzalaj Tzij re ri Evangelio chke. ⁶ Utz re ri winaq ri man kub'an tā kieb' u k'ux chwij, —xcha chke ru tijoxelab' ri tat Juan.

⁷ Aretaq xeb'e ru tijoxelab' ri tat Juan, ri Jesús xuchaplej u tzijoxik ri tat Juan chke ri winaq, xub'ij chke: ¿Jas xe' alaq che rilik pa ri juyub' ri kātzi'nowik? ¿A xe' alaq che rilik jun aj ri tajin kāsab'isax rumal ri kiāqiq'? ⁸ We man are tā ri', ¿jas ri xil alaq? ¿A xil alaq jun achi ri je'l ri ratz'iaq u kojom? Etam alaq chi ri k'o je'lalaj taq katz'iaq, e k'o ri e are' pa taq kachoch ri nimaq taq taqanelab'. ⁹ ¿Jas k'u ri xe' alaq che rilik? ¿A xil alaq jun q'alajisal re ru Loq' Pixab' ri Dios? Je', je ri', —xcha'. Tzare k'u ri tat Juan nim na u b'anik chuwāch apachike q'alajisal re ru Loq' Pixab' ri Dios. ¹⁰ Ri tat Juan are wa' ri tz'ib'am kan chrij pa ru Loq' Pixab' ri Dios ri Tz'ib'talik ri kub'ij:

Kintaq na b'i ri nu taq'o'n,
kānab'ej k'u na chawāch
ri kub'an na u b'anik ra b'e,
—kācha ri', —xcha ri Jesús chke ri winaq.
¹¹ Qas tzij ri kinb'ij chiwe chi chkirol konojel ri winaq ri e k'olinaq k'a we kāmik ri', man k'o tā jun ri nim na u q'ij chuwāch ri tat Juan Qasal Ja'. Pune je ri', ri jun ri man qas nim tā u b'anik kātāqan ri Dios pa ranima', are nim na u q'ij wa' chuwāch ri tat Juan Qasal Ja', —xcha chke.

¹² Tzpa taq ri q'ij ri xpe ri tat Juan Qasal Ja' k'a kāmik, ri winaq xkichaplej loq u tijik ki chuq'ab' rech keb'ok pa ru taqanik ri Dios. Ri kākikoj ki chuq'ab' kākichomaj chi e are' kech'akan na. ¹³ Ri Pixab' ri xutz'ib'aj ri qa mam Moisés kub'ij chi kāpe na ri Dios rech kātāqan pa ki wi' ri winaq, xuquje' je' xkib'ij konojel ri q'alajisal taq re ru Loq' Pixab' ri Dios k'a xpe na ri tat Juan. ¹⁴ We k'u ri ix qas kiwaj kikoq wa', ri tat Juan are ri q'alajisal re ru Loq' Pixab' ri Dios ri kāpe na jas ri xpe ri qa mam Elias ojer. ¹⁵ Jachin taq ri kākijikib'a kanima' chutatab'exik ri nu tzij, chkitatab'ej b'a', —xcha chke.

¹⁶ ¿Jas ruk' keinjunamaj wi ri winaq re we q'ij junab' ri'? Ri winaq kāmik kejunamataj kuk' ri ak'alab' ri keetz'en pa taq ri k'ayib'al, kākiraq ki chi' che ki ch'ab'exik ri kachi'l,

kākib'ij: ¹⁷ “Xqoq'esaj ri su' chiwe, man xixxojow tā k'ut. Xqa'n u q'ojom kāmānaq, man xixox' tā k'ut,” —kecha ri'. ¹⁸ Xpe k'u ri tat Juan ri man wi' taj, ri man kutij tā vino. Ri winaq k'ut kākib'ij chi xa k'o jun itzel espíritu che. ¹⁹ Aretaq k'ut xinpe in, in ri' ri Ralk'ual ri Dios ri Qas Wināq, ri kinwi'k, ri kintij vino, konojel k'ut kākib'ij chi xa in jiq'alaj achi, in q'ab'arel, in kachi'l ajmakib' xuquje' toq'il taq alkab'al. Ri winaq ri utz ru chak q'alaj wa' chi k'o ri u no'j ri Dios ruk', —xcha ri Jesús.

Ri tinimit jawije' e k'o wi ri winaq ri man keniman tā che ri Dios

²⁰ Ri Jesús k'ut xuchap ki yajik ri winaq pa taq ri tinimit jawije' u b'anom wi k'ia taq kajmab'al. Je ri', rumal chi ri winaq ri e k'o chila' man ki k'exom tā kanima', man ki k'exom tā k'u ri ki chomanik. Xub'ij k'u chke: ²¹ K'āx iwe, winaq re ri tinimit Corazín! K'āx iwe, winaq re ri tinimit Betsaida! We ta xeb'an wa' we kajmab'al ri' pa taq ri tinimit Tiro, ri tinimit Sidón jas ri xeb'antaj iwuk' ix, k'extajinaq ta chi ri' ri kanima', ri ki chomanik ri winaq jela'. Xkikoq ta katz'iaq ri' ri kuq'alajisaj chi keb'isonik. Xuquje' k'o ta b'anom wi chi kuq'alajisaj chi are rumal ri ki mak chi keb'isonik, —xcha'. ²² Kinb'ij k'u chiwe ix chi pa ri q'ij ri kuq'at na tzij ri Dios, nim na ri k'ājisab'al i wāch kiriq na chuwāch ri k'ājisab'al ki wāch ri kākiriq na ri winaq aj Tiro, aj Sidón. ²³ Are k'u ri ix winaq aj Capernaum, ri sib'alaj kinimarisaj iwib', k'a pa ri q'aq' k'ut kixqasax wi na. We ta kuk' ri winaq aj Sodoma xeb'an wi taq ri kajmab'al ri xeb'antaj iwuk' ix, k'o ta na ri' ri ki tinimit kāmik. ²⁴ Kinb'ij k'u chiwe chi pa ri q'ij aretaq kuq'at na tzij ri Dios, nim na ri k'ājisab'al i wāch ix kiriq na chuwāch ri kākiriq ri winaq aj Sodoma, —xcha ri Jesús.

Ri Jesús kub'ij chke ri winaq chi kepe ruk' rech kuxlan kanima'

²⁵ Pa ri q'ij ri' xub'ij ri Jesús: Kinnimarisaj q'ij la, Tat, Rajaw ri kajulew. Je ri', rumal chi xk'u' la ri etamb'al la chkiwāch ri winaq ri k'o ki no'j, ri k'o ketamb'al, are k'utum k'u la wa' chkiwāch ri man k'o tā ketamb'al, ri je' ta ne chi e ak'alab'. ²⁶ Je', Tat, rumal chi je ri' ri utzalaj rayib'al la chke ri winaq.

²⁷ Ri nu Tat u jachom pa nu q'ab' ronojel ri k'olik. Man k'o tā jun ri qas retam u wāch ru K'ojol ri Dios, xane xaq xuwi ri qa Tat. Xuquje' man k'o tā jun ri qas retam u wāch ri qa Tat, xane xaq xuwi ri in, in ri' ri u K'ojol, xuquje' jachin k'u taq chke ri kwaj kinb'ij wi jas ru b'anik ri qa Tat Dios. ²⁸ Chixsa'j wuk' in, iwonojel ri ix kosinaq, iwonojel ri k'o iweqa'n, kinya k'u uxlanem chiwe. ²⁹ Chik'ama ri eqb'al yunt ri kinya chiwi. Chiwetamaj iwe wuk' in rumal chi

ri in k'o nu paciencia, man kinnimarisaj tä wib'. Kuxlan k'u na ri iwanima'. ³⁰ Ri eqb'al yunt ri kinya chiwij man k'äx tä ruk'axik. Ri eqa'n k'ut ri kinya chiwij, man al tä ri'.

12

Ru tijoxelab' ri Jesús käkich'up ru jolom triko pa jun q'ij re uxlanem

¹ Pa jun q'ij re uxlanem ri Jesús tajin kok'ow xol taq ri triko. Are k'u ru tijoxelab' xpe ki numik, xkichap k'u u ch'upik ru jolom taq ri triko. Xkib'aq pa ki q'ab', te k'u ri' xkitijo. ² Aretaq ri tata'ib' fariseos xkilo, xkib'ij che ri Jesús: Chilampe la, ri tijoxelab' la tajin kaka'n chak ri äwas u b'anik pa taq ri q'ij re uxlanem.

³ Ri Jesús xub'ij chke: *¿A mat k'o jumul ri sik'im ala q jas ri xub'an ri qa mam David ojer aretaq ri are' xuna' numik, xuquje' jas ri xka'n ri e k'o ruk'?* ⁴ Xok k'u b'i ri qa mam David pa ri nimalaj rachoch Dios, xutij k'u re ri wa ri yo'm cho ri Dios, xuya k'u ke ri e k'o ruk' xuquje'. Äwas k'u u tijik wa' kumal xaq jachinog, xane xaq xuwi chke ri sacerdotes ya'tal wi wa', —xcha'. ⁵ Xuquje' xub'ij: *¿A mat k'o jumul ri sik'im ala q pa ri Pixab' ri xutz'ib'aj ri qa mam Moisés, chi ri sacerdotes ri kepatänin pa ri rachoch Dios man keuxlan tä pa ri q'ij re uxlanem?* Pune ta ne je ri' man mak tä k'u ri' chi je' kaka'n wa'. ⁶ Kinb'ij k'u chech ala q, chi waral k'o Jun* ri nim na u b'anik chuwäch ri nimalaj rachoch Dios. ⁷ Ri ala q xa man käch'ob' tä ala q jas kel kub'ij wa' we tzij ri' ri tz'ib'tal kan pa ru Loq' Pixab' ri Dios ri kub'ij: “Ri in kwaj chi ri ix kib'an toq'ob' chke ri winaq, man are tä kwaj chi keikämisa j awaj che ki sipaxik chnuwäch,” —kacha ri'. We ta qas käch'ob' ala q wa', mat kâq'at ala q tzij chi kâk'äjisax ki wäch ri winaq ri man k'o tä ki mak. ⁸ Are k'u ri' ri in, in ri' ri Ralk'ual ri Dios ri Qas Winag, k'o nu taqanik puwi' ri q'ij re uxlanem xuquje', —xcha ri Jesús chke ri tata'ib' fariseos.

Ri Jesús kukunaj jun achi ri kâminaq jun u q'ab'

⁹ Xel k'u b'i ri Jesús chila', xok b'i pa jun chke ri rachoch Dios ri kâkimulij wi kib' ri winaq. ¹⁰ K'o k'u jun achi chila' ri kâminaq jun u q'ab'. Are k'u ri tata'ib' fariseos kâkaj kâkitzujuk u mak ri Jesús, rumal ri' xkita' che: *¿A ya'talik kâkunax jun yawab' pa ri q'ij re uxlanem?* —xecha che.

¹¹ Xch'aw ri Jesús, xub'ij chke: We jun chiwe k'o jun u chij, kâtza q k'u b'i pa jun k'ua' pa jun q'ij re uxlanem, *¿a mat ke' ri' che resaxik?* ¹² E ta k'u lo jun winaq, are ri Dios nim na u b'anik kâril wi wa' chuwäch

jun chij. Rumal ri' ya'tal u b'anik toq'ob' pa taq ri q'ij re uxlanem, —xcha chke.

¹³ Xub'ij k'u ri Jesús che ri achi: Yuqu ri q'ab' la, —xcha che.

Xuyuq ru q'ab', xutzir k'ut. Je' chik ri u q'ab' ri' jas ri jun chik. ¹⁴ Xeb'el k'u b'i ri tata'ib' fariseos, xkitala ki no'j chb'il taq kib' jas ri kaka'n chukämisa xik ri Jesús.

Ri xub'ij kanoq jun q'alajisal re ru Loq' Pixab' ri Dios chrij ri Jesús

¹⁵ Aretaq ri Jesús xuch'ob' ri ki chomanik ri tata'ib' fariseos, xel b'i chila'. E k'ia k'u ri winaq xeteri b'i chrij. Ri Jesús k'ut xeukunaj konojel taq ri yawab'ib'. ¹⁶ Xeutaq k'u ri winaq, xub'ij chke chi k'o jachin che mäkib'ij wi jachin ri Are'. ¹⁷ Xub'ij ri Jesús wa' rech je' kel wi jas ri xub'ij loq ri qa mam Isaías ri q'alajisal re ru Loq' Pixab' ri Dios ri xub'ij:

¹⁸ Are wa' ri patänil we
ri cha'tal wumal,
ri sib'alaj loq' chnuwäch,
ri kâkikot ri wanima' rumal.

Kinya na ri Loq'alaj ru Espiritu
pa ranima' ri Are'.

Kub'ij k'u na chke konojel
ki wäch winaq chi
ri in kinq'at na tzij pa ki wi'.

¹⁹ Man käch'ojin taj, man kuraq tä u chi',
man k'o ta jun kâto'w ri Are' ko käch'aw
pa taq ri b'e.

²⁰ We k'o jun winaq ri je' jas jun aj
ri kotakik, man kuq'up taj.

We ne k'o jun winaq ri junam
jas jun candela
ri man nim tä ru q'aq'al,
man kuchup tä ri'.

Xane kâchakun na che rilik
chi kopan na ri q'ij
aretaq qas kâq'at na tzij
ruk' jikomal.

²¹ Konojel k'u ki wäch winaq
cho ruwächulew,
kâku'b'i na ki k'ux chrij ri Are',
—xcha ri Dios chuchi' ri q'alajisal re ru Loq'
Pixab'.

Kâb'ix chrij ri Jesús chi yo'm u chuq'ab' rumal ri Itzel

²² Xk'am k'u b'i jun achi ruk' ri Jesús. Ri achi mem xuquje' moy, k'o k'u jun itzel espíritu ruk'. Xkunax k'u rumal ri Jesús, je ri' chi ri achi xkowinik xka'yik xuquje' xch'awik. ²³ Konojel ri winaq xkikajmaj wa', xkib'ij: *¿A mat are wa' ri Ralk'ual kan ri qa mam David† ri kâb'ixik chi kâpe na? —xecha'.*

²⁴ Aretaq k'ut xkita ri tata'ib' fariseos ri kâkib'ij ri winaq, ri e are' xkib'ij: We achi ri' kâkowinik keresaj b'i ri itzel taq espíritu

* **12:6** Ri jun ri' are ri Jesús mismo. † **12:23** Ri “Ralk'ual kan ri qa mam David” kel kub'ij “To'l Qe”, junam jas ri tzij “Cristo” o “Mesías”.

chke ri winaq xa rumal ru chuq'ab' ri Beelzebú[‡] ri ki nimal ri itzel taq espíritus ri k'o ruk', —xecha'.

²⁵ Ri Jesús xuch'ob'o jas ri tajin kákichomaj, xub'ij k'u chke: Apachike q'atb'al tzij ri u b'anom kieb', ri juch'ob' q'atal taq tzij kákiyak kib' chkiy ri juch'ob' chik, ri q'atb'al tzij ri' kák'is na u wäch. We jun tinimit o jun ja winaq u b'anom kieb' rumal chi k'o ch'oj chxixol, man naj tä ri' kuch'ijo. ²⁶ Je ri' xuquje', we ta ri Satanás käresaj b'i ri Satanás, u b'anom kieb' ri'. We ta je ri', ¿a naj ta k'u ri' kuch'ij ru taqanik? ¡Man je' taj! ²⁷ Ri ala q káb'ij ala q chi ri in kinwesaj b'i ri itzel taq espíritus ruk' ru chuq'ab' ri Beelzebú. We ta je ri', ¿jachin käyo'w ki chuq'ab' ri tijoxelab' ala q che kesaxik b'i ri itzel taq espíritus? Qas are ri e are' kákiq'alajisaj chi xa sachinaq ala q. ²⁸ Ri in k'ut kinwesaj b'i ri itzel taq espíritus ruk' ru chuq'ab' ri Espiritu rech ri Dios ri k'o wuk'. Kel kub'ij wa' chi ri Dios k'o chi uk' ala q rech kátaqan puwi' ala q, —xcha chke.

²⁹ Man k'o tä jun kákowinik kok pa rachoch jun achi ri sib'alaj k'o u chuq'ab', kärelaq'aj k'u b'i ri jastaq re, we ta mat nab'e kuyut na ri achi ri k'o u chuq'ab'. Te k'u ri' kákowinik kärelaq'aj b'i ri jastaq re.

³⁰ Ri jun ri man junam tä u chomanik wuk', kinuk'ulelaj ri'. Ri jun ri man káchakun tä wuk', xaq kutur ri' ri nu chak, —xcha chke.

³¹ Rumal ri' kinb'ij chech ala q: Ronojel mak ri káka'n ri winaq kuya' käsachtaj na ki mak ri' rumal ri Dios, xuquje' ronojel ri áwas u b'ixik chrij ri Dios ri kákib'ij ri winaq kuya' käsachtaj na ki mak ri'. Are k'u we kákib'ij ri áwas u b'ixik chrij ri Loq'alaj Espiritu man kuya' taj käsachtaj ri ki mak ri'. ³² Apachin ri kub'ij tzij ri áwas u b'ixik chwij in, in ri' ri Ralk'ual ri Dios ri Qas Winaq, käsachtaj na u mak ri' che. Apachin k'u ri kub'ij ri áwas u b'ixik chrij ri Loq'alaj Espiritu, man käsachtaj tä na u mak ri' che waral cho we uwächulew. Man käsach tä k'u u mak ri' pa ri jun k'aslema chik ri käpe na, —xcha ri Jesús.

Ri jun che' rumal ru wäch käch'ob'tajik jas u b'anik

³³ We utz ri che', utz ru wäch ri kuya. We man utz tä ri che', man utz tä ru wäch ri' ri kuya. Ri jun che' rumal ru wäch käch'ob'tajik jas u b'anik. ³⁴ ¡Ri ala q, ala q sub'anelab' taq winaq! ¿A kákowin lo ala q ri' chub'ixik utzalaj taq tzij, ala q itzel taq winaq k'ut? Ri kel loq pu chi' ri winaq, are wa' ri gas k'o pa ranima'. ³⁵ Ri utzalaj winaq, utz ri' ri kub'ij rumal rech ri utzil ri k'o pa ranima'. Ri itzel winaq, man utz tä ri' ri kub'ij rumal

chi etzelal wa' ri k'o pa ranima'. ³⁶ Kinb'ij k'u chech ala q, chi pa ri q'ij aretaq kuq'at na tzij ri Dios, konojel ri winaq kákiyach na kuenta rumal ronojel tzij ri ki b'im ri man k'o tä u patän. ³⁷ Jas k'u je' ri kátzjon ri winaq, are je ri' ri q'atow tzij ri káb'an na puwi'. Káq'alajisax k'u na we k'o u mak o man k'o taj.

Ri lawalo taq winaq kákita' jun kajmab'al etal che ri Jesús

³⁸ Jujun tata'ib' fariseos kachi'l jujun tijoxelab' re ri Pixab', xkib'ij che ri Jesús: Ajtij, káqaj chi káb'an la jun kajmab'al etal chqawäch rech káqilo, —xecha che.

³⁹ Ri Jesús xch'awik, xub'ij chke: Ri lawalo taq winaq, ri man jikom tä kanima', kákaj chi kinb'an jun kajmab'al etal chkiwäch. Man käyi' tä k'u wa' chke, xane xaq xuwi ri etal chrij ri Jonás ri q'alajisal re ru Loq' Pixab' ri Dios ojer. ⁴⁰ Je' jas ri Jonás xk'oji chupam ri jun nimalaj kár oxib' q'ij, oxib' aq'ab', are k'u je' kinb'an na in, in ri' ri Ralk'ual ri Dios ri Qas Winaq, kink'oji k'u na xe' ri ulew oxib' q'ij, oxib' aq'ab'. ⁴¹ Ri winaq aj Nínive, pa ri q'ij re ri q'atow tzij aretaq káq'at tzij pa ki wi' ri winaq ri e k'o kámik, kákiq'at na tzij pa ki wi' chi kák'ájisax ki wäch. Je ri', rumal chi ri winaq aj Nínive, xkik'ex ri kanima', xkik'ex k'u ri ki chomanik aretaq ri Jonás xutzijoj ru Loq' Pixab' ri Dios chke. Waral k'ut k'o Jun ri nim na u b'anik chuwäch ri Jonás. ⁴² Xuquje' ri nimalaj taqanel ixoq ri xk'oji chumox ri relb'al q'ij, kák'oji na pa ri q'ij re ri q'atow tzij. Aretaq káq'at tzij pa ki wi' ri winaq ri e k'o kámik, ri are' kuq'at na tzij pa ki wi' chi kák'ájisax ki wäch. Je ri', rumal chi ri ixoq ri' naj xel wi loq, xpe k'u chutatab'exik ri nimalaj retamb'al ri Salomón. Waral k'ut k'o wi Jun ri nim na u b'anik chuwäch ri Salomón.

Waral kátzijox wi ri kub'an jun itzelalaj espiritu, kátzelej loq

⁴³ Aretaq jun itzelalaj espiritu kel b'i che jun winaq, xaq káwakatalob' chik pa taq juyub' ri kátz'inowik, kutzukuj jawije' kuxlan wi. Aretaq man kuriq taj jawije' kuxlan wi, kub'ij: ⁴⁴ “Kintzelej na b'i cho ri wachoch jawije' ri xinél wi loq.” —kácha'. Aretaq kopanik, kuriqa ri ranima' ri winaq je' u b'anik jun ja tolonik, mesom chi u pam, utz k'u b'anom che. ⁴⁵ Ke' k'ut, keuk'ama chi na wuqup itzelalaj taq espíritus ri sib'alaj e lawalo na chuwäch ri are'. Konojel wa' keb'ok pa ranima' ri winaq. Ri winaq ri' nim na ri k'áx kuriq na chuwäch ri k'áx ri xuriq nab'e. Je k'u wa' ri kákik'ulmaj na ri lawalo taq winaq kámik, —xcha chke.

Ru nan ri Jesús xuquje' taq ru chaq' keopan ruk'

[‡] 12:24 Ri tzij “Beelzebú” are jun chke ru b'i' ri Satanás.

⁴⁶ Ri Jesús tajin kätzijon na kuk' ri winaq aretaq xopan ru nan, e rachi'l ri rachalal. Xaq k'u chrij ri ja e tak'atoj wi, kākaj k'ut ketzijon ruk' ri Jesús. ⁴⁷ K'o k'u jun ri xub'ij che ri Jesús: Ri nan la, xuquje' ri chaq' la e k'o chrij ri ja, käch'ab'ex la kumal, —xecha che.

⁴⁸ Xub'ij k'u ri Jesús che ri xb'in che: ¿Jachin ri' ri nu nan, xuquje' jachin taq ri qas e wachalal? —xcha che.

⁴⁹ Xeuk'ut ru tijoxelab' chkiwäch ri winaq, te k'u ri' xub'ij: E are wa' je' ta ne ri nu nan, xuquje' ri nu chaq', —xcha'. ⁵⁰ Je ri', rumal chi apachin ta ne ri káb'anow ru rayib'al ri nu Tat ri k'o chila' chikaj, are wa' ri qas wachalal, ri nu chaq', ri wanab', ri nu nan, —xcha ri Jesús chke.

13

Ri Jesús kutzijoj ri k'utb'al chrij ri tikel ija'

¹ Pa ri q'ij ri' ri Jesús xel loq cho ja, xe' k'u chuchi' ri mar, xt'uyi k'u chila'. ² Xkimulij k'u kib' k'ia winaq ruk', je ri' chi xok b'i ri Are' pa jun barco, xt'uyi k'u chub'am. Konojel ri winaq xekanaj kan cho ri ulew chuchi' ri mar. ³ Xeukoj k'u taq k'utb'al che ki tijoxik ri winaq chikij k'ia u wäch taq no'j, xub'ij chke: Xel b'i jun tikel ija' cho rachoch, xe' chub'anik u tiko'n, —xcha chke. ⁴ Aretaq tajin kujopij ri ija', xqaj jub'iq' ri ija' pa ri b'e. Xeopan k'u ri chikop ajuwokaj. Kerapapik xeqajik, xa xkitij b'i ri ija'. ⁵ Xqaj chi jub'iq' xol taq ri ab'aj, ri man k'o tä wi k'ia ulew. Chanim k'ut xk'iy ri jub'iq' ija' ri' rumal chi man pim tä ri ulew. ⁶ Aretaq k'ut xel loq ri q'ij, xek'at ri alaj taq tiko'n rumal, xechaq'ijik rumal chi man qas tä k'u k'o ki xera'. ⁷ Xqaj chi k'u jub'iq' ri ija' pa taq ri q'ayes ri k'o ki k'ixol. Xek'iy k'u ri q'ayes, xekijiq'isaj ri tiko'n. ⁸ Are k'u ri nik'iaj ija' chik xeqaj pa utzalaj ulew. Sib'alaj xewächinik. E k'o jujun tiko'n xkiya jujun ciento ki wäch pa taq ri ki jolom ri triko chkiujunal, e k'o k'u jule' chik xkiya oxk'al ki wäch pa taq ri jujun ki jolom. Ri nik'iaj tiko'n chik xkiya juwinaq lajuj ki wäch chkiujunal, —xcha ri Jesús chke ri winaq. ⁹ We ri ix kijikib'a ri iwanima' chutatab'exik ri nu tzij, ichitatab'ej b'a'! —xcha chke.

Ri Jesús kub'ij chke ru tijoxelab' jas ki patän ri k'utb'al ri kukojo

¹⁰ Ru tijoxelab' ri Jesús xeqeb' ruk', xkita' che: ¿Jas che kuk' taq k'utb'al ketzijob'ej la ri winaq? —xecha che.

¹¹ Ri Jesús xch'awik, xub'ij chke: Ri ix yom chiwe rumal ri Dios ri retamaxik ri man ketam tä ri nik'iaj winaq chik chrij ru taqanik ri Dios pa ki wi' ri winaq. Man ya'tal tä k'u chke ri e are' chi käch'ob' wa'. ¹² Ri winaq ri k'o k'o ruk', käyi' chi na nik'iaj che

rech känimar ri k'o ruk'. Are k'u ri winaq ri man k'o tä k'o ruk', ri jub'iq' ri k'o ruk' kesax na che. ¹³ Rumal ri' keintzijob'ej ri winaq kuk' taq k'utb'al, rumal chi pune jaqal ri ki waq'äch, man kekowin tä chuch'ob'ik ri käkilo, je' ta ne chi man keka'y taj. Pune käkಿತatab'ej ri qas tzij, man käch'ob' tä ri' ri ki tatab'em. Je' ta ne chi man käkita tä ri kinb'ij. ¹⁴ Are k'u je' káb'antaj na wa' kuk' ri e are' jas ri xub'ij ri qa mam Isaías ri q'alajisal re ru Loq' Pixab' ri Dios:

Ri ix, pune kitatab'ej ri qas tzij,
man kich'ob' taj.

Pune kixka'yik, man kich'ob' tä
ri kiwilo.

¹⁵ Je ri', rumal chi ab'ajarinaq
ri kanima' we winaq ri'.

Man utz tä ketow tzij.

Ki tz'apim k'u ri ki waq'äch
rech man keka'y taj.

Je' u b'anom ri kanima'
rech man käkita taj,

rech man kääqaj tä ri nu tzij pa kanima',
rech man kinkitzukuj taj rech keinkunaj,
—xcha ri Dios chuchi' ri q'alajisal re ru Loq' Pixab'.

¹⁶ Are k'u ri iwe ix, sib'alaj utz iwe, rumal chi tajin kiwil ri tajin kinb'ano, tajin kita ri tajin kinb'ij. ¹⁷ Qas tzij kinb'ij chiwe chi e k'ia q'alajisal taq re ru Loq' Pixab' ri Dios, xuquje' e k'ia utzalaj taq winaq xkaj xkilo jas ri tajin kiwil ix kämik, man xkil tä k'ut. Xkaj xkita jas ri tajin kita ix kämik, man xkita tä k'ut, —xcha ri Jesús chke ru tijoxelab'.

Ri Jesús kub'ij chke ru tijoxelab' jas kel kub'ij ri k'utb'al chrij ri tikel ija'

¹⁸ Chitatab'ej b'a' jas kel kub'ij ri k'utb'al chrij ri tikel ija', —xcha chke. ¹⁹ Ri ija' ri xeqaj pa ri b'e, e are wa' jas ri winaq ri käkಿತatab'ej ru Loq' Pixab' ri Dios chrij ru taqanik ri Dios pa ki wi' ri winaq, man käch'ob' tä k'ut. Chanim käpe ri Itzel, käresaj k'u b'i ri tzij ri xqaj pa kanima'. ²⁰ Ri ija' ri xeqaj xol taq ri ab'aj, e are wa' jas ri winaq ri käkita ru Tzij ri Dios ruk' kikitomal, je'l käkito. ²¹ Rumal k'ut chi man qas tä k'o ri ki xera', xa kieb' oxib' q'ij käch'ijjo. Aretaq k'ut käch'aplej u riqik k'äx, kraj keyoq'ik rumal rech ru Tzij ri Dios, chanim ketzaq kanoq. ²² Ri ija' ri xeqaj pa taq ri q'ayes ri k'o ki k'ixol, e are wa' jas ri winaq ri käkita ru Tzij ri Dios, are k'u käkilij na ri jastaq rech we uwächulew ri', kesub'taj rumal ri q'inomal. Are k'u wa' käjiq'isan ru Tzij ri Dios, man kääwächin tä k'u ri' pa ri kanima'. ²³ Are k'u ri ija' ri xeqaj pa utzalaj ulew, e are wa' jas ri winaq ri käkita ru Tzij ri Dios, käch'ob'o. Käkija k'u k'ia ki wäch. E je' jas ri ija' ri xkiya jujun ciento ki wäch chkiujunal, nik'iaj chik e je' jas ri ija' ri xkiya oxk'al ki

wäch chkiujunal, jujun chik e je' jas ri ija' ri xkiya juwinaq lajuj ki wäch chkiujunal, — xcha chke.

Waral käqil wi ri k'utb'al chrij ri itzel q'ayes ri xk'iy xol taq ri triko

²⁴ Ri Jesús xukoj jun k'utb'al chik chkiwäch: Ru taqanik ri Dios pa ki wi' ri winaq, are junam ruk' jun achi ri xutik utzalaj ija' pa ri rulew. ²⁵ Xpe k'u jun u k'ulel ri ajchaq'el ri tiko'n. Aretaq konojel tajin kewarik, xok b'i pa ri ulew, xutika k'u kan itzel taq q'ayes xol taq ri triko. Te k'u ri' xe'k. ²⁶ Aretaq xk'iy ri triko, xechomaqir ru jolom, xuquje' xek'iy ri itzel taq q'ayes. ²⁷ Xeb'e' k'u ri ajchakib', xekib'ij che ri ki patrón: "Tat, we qas utz ri ija' ri xtik la, jawije' k'ut xpe wi wa' we itzel q'ayes ri?" — xcha che. ²⁸ Xub'ij k'u ri patrón chke: "Xa k'o jun nu k'ulel xb'anow wa'," — xcha chke. Ri ajchakib' xkib'ij che ri ki patrón: "¿A kaj la chi keqab'oq ri itzel taq q'ayes?" — xcha che. ²⁹ Ri patrón xub'ij chke: "Man utz tá ri' we je' kib'ano, rumal chi we ne kib'oq b'i ri triko junam ruk' ri itzel q'ayes. ³⁰ Chek'iy na ri itzel taq q'ayes junam ruk' ri triko, chiweyey na k'a kuriq ri q'atoj. Keintaq k'u na b'i ri ajchakib' rech nab'e kákimol ri itzel taq q'ayes, káxim pa taq yataj, te k'u ri' kákiporoj. Are k'u ri triko káik'ol na pa ri nu k'uja," — xcha chke.

Ri Jesús kutzijoj ri k'utb'al chrij ri ija' re mostaza

³¹ Ri Jesús xukoj chi jun k'utb'al chkiwäch, xub'ij: Ru taqanik ri Dios pa ki wi' ri winaq, junam wa' ruk' ri ija' re ri tiko'n ri káb'ix "mostaza" che, ri kutik jun achi pa ri rulew. ³² Qas tzij ri ija' ri' are ri sib'alaj nitz' na chkiwäch konojel taq u wäch ija'. Aretaq k'ut kák'iyik, are nim na ke' chkiwäch konojel taq ri tiko'n. Kub'an jun nimalaj che', je ri' chi ri chikop ajuwokaj káka'n ri ki sok xol taq ru q'ab', kemu'jan chupam, — xcha ri Jesús chke.

Waral käqil wi ri k'utb'al chrij ri ch'am re kaxlan wa

³³ Ri Jesús xukoj chi jun k'utb'al chkiwäch, xub'ij: Ru taqanik ri Dios pa ki wi' ri winaq, are je' jas ri ch'am ri kuya jun ixoq ruk' oxib' pajb'al k'aj, rech kuk'iyisaj ronojel ri q'or re kaxlan wa, — xcha ri Jesús chke.

Waral käqil wi ri ki patän ri k'utb'al ri kukoji ri Jesús

³⁴ Ronojel wa' we tzij ri' xub'ij ri Jesús chke ri winaq kuk' taq k'utb'al. Xaq xuwi kuk' taq k'utb'al xeutzijob'ej ri winaq. ³⁵ Je' xb'antaj wa' rech qas je' kel wi jas ri xub'ij ri q'alajisal re ru Loq' Pixab' ri Dios ri Tz'ib'tal kanoq: Kintzijon na kuk' taq k'utb'al, kinb'ij na ri man etamtal taj tzaretaq ri Dios xub'an ri kajulew,

— xcha ri'.

Ri Jesús kuq'alajisaj ri kel kub'ij ri k'utb'al chrij ri itzel q'ayes xol taq ri triko

³⁶ Xtäni k'u ri Jesús che ru tzij, xeutaq b'i ri winaq cho taq ri kachoch, ri Are' k'ut xok pa ja. Are k'u ri tijoxelab' xkiriq kib' ruk', xkib'ij che: B'ij la chqe jas kel kub'ij ri k'utb'al chrij ri itzel q'ayes ri xtik kan pa ri ulew, — xcha che.

³⁷ Ri Jesús xub'ij chke: Ri kátkow ri utzalaj ija', in ri' ri Ralk'ual ri Dios ri Qas Winag. ³⁸ Ri ulew are ronojel ruwächulew. Ri utzalaj ija' e are wa' ri winaq ri kátaqan ri Dios pa ki wi'. Ri itzel q'ayes e are wa' ri winaq ri e rech ri itzel. ³⁹ Ri k'ulel ri xtikow ri itzel q'ayes, are ri Itzel wa'. Ri q'atoj kel kub'ij ri k'isb'al re ruwächulew aretaq kák'is ronojel. Ri keb'anow ri q'atoj e are' ri ángeles. ⁴⁰ Je' jas ri káb'an che ri itzel q'ayes, kámolik, kák'iaq pa ri q'aq', are k'u je' káb'an na pa ri k'isb'al re ruwächulew. ⁴¹ Ri in, in ri' ri Ralk'ual ri Dios ri Qas Winag, keintaq na loq ri nu ángeles che ki molik konojel ri winaq ri kekitaqchi'j nik'iaj winaq chik che mak, xuquje' ri b'anal taq etzelal. ⁴² Kekik'iaq k'u na b'i pa ri nimalaj q'aq', jawije' keb'oq' wi na, kákiquch'uch'ej na ri ki ware. ⁴³ Are k'u ri káka'n ri kraj ri Dios, keopan na jawije' ri kátaqan wi ri qa Tat chila' chikaj. Kejuluw na je' jas ri q'ij. We kijikib'a ri iwanima' chutatab'exik ri kinb'ij, ¡chitatab'ej b'a'! — xcha ri Jesús chke ru tijoxelab'.

Waral käqil wi ri k'utb'al chrij ri q'inomal ri muqtalik

⁴⁴ Ru taqanik ri Dios pa ki wi' ri winaq, kinjunamaj ruk' jun koxon puaj ri muqtalik. Káriqaj k'u ri puaj rumal jun achi. Ri are' kumuq chi k'u kan jumul chik chila'. Rumal ru kíkotemal ke'k, kuk'iyij ronojel ri jastaq re, kuloq' ri ulew, — kácha'.

Waral käqil wi ri k'utb'al chrij ri perla ri paqal rajil

⁴⁵ Xuquje' kinjunamaj ru taqanik ri Dios ruk' jun ajk'ay ri kutzukuj je'lalaj taq ab'aj ri kejuluwuk. ⁴⁶ Aretaq kuriq jun ri sib'alaj paqal rajil, ke'k, kuk'iyij ronojel ri jastaq re, kuloq' ri perla ri xurigo, — kácha'.

Waral käqil wi ri k'utb'al chrij ri k'at chapäb'al kâr

⁴⁷ Xuquje' kinjunamaj ru taqanik ri Dios pa ki wi' ri winaq ruk' jun k'at chapäb'al kâr ri kák'iaq b'i pa ri ja', keb'ok k'u ronojel ki wäch kâr chupam. ⁴⁸ Aretaq nojinaq chi ri k'at, kesax loq kumal ri chapal taq kâr, kákiya chuchi' ri ja', te k'u ri' ket'uyi che ki cha'ik ri kâr. Ri utzalaj taq kâr kekiya pa taq chikäch, are k'u ri man e utz taj, kekik'iaq kan pa ri ja', — kácha'. ⁴⁹ Are je' wa' káb'antaj na aretaq kák'is ruwächulew. Kepe ri ángeles che ki cha'ik ri utzalaj taq winaq chkiwol ri

man e utz taj. ⁵⁰ Ri man e utz taj kekik'iaq na pa ri nimalaj q'aq'. Chila' keb'oq' wi na, kâkiquch'uch'ej na ri ki ware, —xcha ri Jesús chke.

Waral kâqil wi ri kâtzijox chrij ri k'ak' taq jastaq xuquje' ri q'el taq jastaq

⁵¹ Ri Jesús xuta' chke ri winaq, xub'ij: *¿A kich'ob' ronojel ri xinb'ij? —xcha chke.*

Kâqach'ob'o, —xecha che.

⁵² Xub'ij k'u ri Jesús chke: Aretaq jun tjonel re ri Pixab' kraj kâretamaj ronojel chrij ru taqanik ri Dios pa ki wi' ri winaq, je' u b'anik ri' jas jun ajchaq'el ja ri k'o k'ia jastaq re. Aretaq rajwaxik ri q'el che, kâresaj loq, kukojo. Aretaq rajwaxik ri k'ak' che, kâresaj loq, kukojo, —xcha ri Jesús chke.

Ri Jesús k'o jumul chik pa ri tinimit Nazaret

⁵³ Aretaq xto'taj ri Jesús che ki tijoxik ri winaq kuk' taq we k'utb'al ri', xel b'i chila'. ⁵⁴ Xopan k'u pa ri u tinimit ri Are'. Xuchaplej ki tijoxik ri winaq pa ri rachoch Dios ri k'o chila'. Are k'u ri winaq sib'alaj xkikaj-maj wa', xkib'ij: *¿Jawije' xretamaj wi we achi ri' we no'j ri? ¿Jas lo kub'ano che ki b'anik ri nimaq taq kajmab'al ri tajin keb'antaj rumal? —xecha'.* ⁵⁵ Are wa' ru k'ojol ri tata' ri qolol che',* ru nan k'ut are ri nan María. Katz ri a Jacobo, ri a José, ri a Simón, xuquje' ri a Judas. ⁵⁶ E k'o k'u ri ranab' quk' waral xuquje'. *¿Jawije' k'ut xretamaj wi wa' ronojel ri tajin kub'ano? —xecha'.*

⁵⁷ Rumlal ri' ri winaq xa tzel xkita ru tzij. Xub'ij k'u ri Jesús chke: Pa nik'iaj tinimit chik, nim kil wi ronojel q'alajisal re ru Loq' Pixab' ri Dios. Xaq xuwi pa ru tinimit ri are', xuquje' chkixol ri rachalal, xuquje' cho rachoch man nim tä kil wi, —xcha chke.

⁵⁸ Man xkowin tä k'u ri Jesús chub'anik k'ia taq kajmab'al chila' rumal chi ri winaq man xekojo tä che ri Are'.

14

Kâkâmisax ri Juan Qasal Ja'

¹ Pa taq ri q'ij ri' ri tat Herodes, ri nim taqanel pa Galilea, xretamaj ri tajin kub'an ri Jesús. ² Xub'ij k'u chke ri winaq ri e k'o ruk': Are ri Juan Qasal Ja' ri' ri xk'astaj loq chkixol ri kâminaqib', rumal ri' kâkowin ri are' chub'anik k'ia u wâch kajmab'al, —xcha ri tat Herodes chke.

³ Tzare k'u ri tat Herodes xtaqan chuchapik ri tat Juan rech kâyutik, kâyi' pa che', xa rumal rech ri nan Herodías ri xk'uli ruk' are' pune are rixoqil ri Felipe ru chaq'. ⁴ Xub'ij k'u ri tat Juan che ri tat Herodes: Man taqal tä che la chi kâb'an ixoqil la che ri rixoqil ri chaq' la, —xcha che.

⁵ Ri tat Herodes sib'alaj kraj kukâmisaj ri tat Juan, kuxej k'u rib' chkiwâch ri winaq. Je ri', rumal chi konojel ketam chi ri Juan Qasal Ja', are jun q'alajisal re ru Loq' Pixab' ri Dios. ⁶ Xuriq k'u ri nimaq'ij re ri rok'owisaxik u junab' ri tat Herodes. Are k'u ri ali ri ral ri nan Herodías xok b'i kuk', xuchap xojowem chkiwâch ri ula' ri e k'olik. Xqaj k'u ri ali chuwâch ri tat Herodes. ⁷ Sib'alaj xqaj chuwâch, xub'an k'u juramento chi kuya che ri ali apachike ta ne ri kraj ri are'. ⁸ Ri ali k'ut kojom chi loq u k'ux rumal ru nan, xub'ij che ri tat Herodes: Kwaj chi kâya la chwe ru jolom ri Juan Qasal Ja' pa jun plato, —xcha che.

⁹ Sib'alaj k'u xb'ison ri tat Herodes. Rumlal k'u rech chi xub'ij wa' ruk' juramento chkiwâch konojel ri rula' chi kuya che ri ali apachike ri kuta' che, xtaqan k'u chuya'ik wa' che. ¹⁰ Xtaqan che resaxik ru jolom ri Juan Qasal Ja' ri k'o pa che'. ¹¹ Xk'am loq pa jun plato, xyi' k'u che ri ali. Ri ali k'ut xuya che ru nan.

¹² Xeopan k'u ru tijoxelab' ri tat Juan, xkik'am b'i ru cuerpo, xekiya kan pa jun muqub'al. Xeb'e' k'ut, xekib'ij che ri Jesús.

Ri Jesús kuya ki wa job' mil winaq

¹³ Ri Jesús, aretaq xuto jas ri xb'antaj che ri tat Juan, xel b'i chila' u tukiel, xok pa jun barco, xe' k'u jela' jawije' ri man k'o tä wi winaq. Xketamaj k'u ri winaq chi ri Jesús b'enâq jela'. Xeb'el loq pa taq ri ki tinimit, xeb'e' k'u chi kaqan churiquk ri Jesús. ¹⁴ Aretaq xel loq ri Jesús pa ri barco, xeril ri k'ialaj winaq, xel k'u u k'ux chke. Xeukunaj ri yawab'ib' ri xkik'am b'i jela' kuk'. ¹⁵ Qajem k'u kub'an ri q'ij, ru tijoxelab' ri Jesús xegeb' ruk', xkib'ij che: We juyub' ri' ri uj k'o wi sib'alaj kâtzinowik, b'enâq chi k'u ri q'ij. Chetaqa la b'i ri winaq rech keb'e' pa ri alaj taq tinimit ri naqaj e k'o wi, rech kâkiloq' k'u na ri ki wa, —xecha che.

¹⁶ Ri Jesús xub'ij chke: Man rajwaxik taj keb'e'k, xane xa chiya ix ri kâkitijo, —xcha chke.

¹⁷ Xkib'ij k'u ru tijoxelab' che: Xa job' kaxlan wa rachi'l kieb' kâr k'o quk', —xecha che.

¹⁸ Ri Jesús xub'ij chke: Chik'ama loq chwe waral, —xcha chke.

¹⁹ Xtaqan k'u ri Jesús chi ket'uyi ri winaq cho ri râxalaj uwosaq. Ri Jesús xeuk'am k'u ri job' kaxlan wa xuquje' ri kieb' kâr, xka'y chikaj, xeutewchij. Te k'u ri' xeuipir ri kaxlan wa, xeuya chke ri tijoxelab' rech kekijach wa' chkiwâch ri winaq. ²⁰ Xewi' k'u konojel, xenoj k'ut. Te k'u ri' xekik'ol ri ch'agataq ri xekanaj kanoq. Xub'an kab'lajuj chikâch wa' chi ronojel. ²¹ Kraj are

* **13:55** Ri qolol che' xuquje' kâb'ix "ajanel" o "carpintero" che rumal ru chak.

job' mil achijab' ri xewi'k. Man xeajilax tä k'u ri ixoqib' xuquje' ri ak'alab' (ri xuquje' xewi'k).

Ri Jesús käb'in puwi' ri ja'

²² Te k'u ri' ri Jesús xub'ij chke ru tijoxelab' chi utz we keb'ok pa ri barco rech keb'e'k, kenab'ej apan chuwäch ri Are' rech keopan ch'äqäp che ri mar. Are k'u ri Are' xkanaj na kan kuk' ri k'alaj winaq che ki jachik b'ik. ²³ Aretaq e jachtajinaq chi b'i ri winaq rumal ri Jesús, xe' ri Are' puwi' ri juyub' u tukiel chub'anik orar. Aretaq xok ri aq'ab', ri Jesús u tukiel k'o chila'. ²⁴ Are k'u ri tijoxelab' e k'o chi pa ri barco puwi' ri ja' pu nik'iajal ri mar. Ri nimaq taq uwoja' xupuk'ij rib' chrij ri barco, rumal chi xa chkiwäch petinaq wi ri kiäqiq'. ²⁵ Xa k'u jub'iq' man käsaqirik aretaq xopan ri Jesús kuk', tajin käb'in puwi' ri ja'. ²⁶ Aretaq ri tijoxelab' xkilo chi käb'in ri Jesús puwi' ri ja', xkixej kib'. Rumal rech chi xkixej kib' xkيراq ki chi', xkib'ij: ¡Are jun xib'inel wa'! —xecha'.

²⁷ Chanim ri Jesús xeuch'ab'ej, xub'ij chke: ¡In wa', mixej iwib', chichajij anima! —xcha chke.

²⁸ Xch'aw k'u ri tat Pedro, xub'ij che: We lal ri', Tat, taqan la chi kinb'in puwi' ri ja', rech kinopan uk' la, —xcha che.

²⁹ Ri Jesús xub'ij che: Tasa'j b'a', —xcha ri Jesús che.

Ri tat Pedro xel b'i pa ri barco, xuchap-lej b'inem puwi' ri ja' rech kuriqa ri Jesús. ³⁰ Aretaq k'ut xrilo chi sib'alaj k'o u chuq'ab' ri kiäqiq', xuxej rib'. Xe' ri raqan pa ri ja', xuraq u chi', xub'ij che ri Jesús: ¡Wajaw, chinto' la! —xcha che.

³¹ Ri Jesús chanim xuchap che ru q'ab', xub'ij che: ¡Tzij ri' chi man qas tä katkojonik! ¿Jas che xub'an kieb' a k'ux? —xcha che.

³² Aretaq k'ut xpaqi ri Jesús pa ri barco, xtäni ri kiäqiq'. ³³ Ri e k'o pa ri barco xexuki chuwäch ri Jesús, xkib'ij che: Qas tzij, lal ri' ri u K'ojol ri Dios, —xecha che.

Ri Jesús keukunaj ri yawab'ib' pa Genesaret

³⁴ Xeq'ax pa ri mar, xeopan k'u chuchi' ri ulew pa Genesaret. ³⁵ Aretaq ri winaq ajchila' xkich'ob' u wäch ri Jesús, xkesaj u tzijol wa' pa taq ri tinimit. Xekik'am k'u loq' konojel ri yawab'ib' jawije' chi' k'o wi ri Jesús. ³⁶ Xkib'ochi' ri Jesús chi xuwi ta ne kuya chke chi käkichap koq ru chi' ru q'u'. Konojel k'u ri xechapowik, xeutzirik.

15

Käriqtaj k'äx rumal ri e naq'atal wi ri winaq

¹ Te ri' jujun tata'ib' fariseos xuquje' jujun chke ri tata'ib' tijonelab' re ri Pixab' ri e petinaq pa ri tinimit Jerusalén, xkimulij

kib' chrij ri Jesús, xkita' che: ² ¿Jas che ri tijoxelab' la man käka'n taj jas ri e naq'atal wi ri qa nan qa tat ojer? Man käka'n taj jas ri naq'atal u b'anik. Are wa' ru ch'ajik ri rij ri ki q'ab' aretaq mäja' kewi'k, —xecha che.

³ Xuta' k'u ri Jesús chke: E ri alaq, ¿jas che yo'm kan alaq ru Loq' Pixab' ri Dios? Chuk'exwäch wa' are jikib'am anima' alaq chrij ri naq'atal wi alaq. ⁴ Kub'ij k'u ri Dios pa ri Loq' Pixab' ri Tz'ib'talik: “Nim cheaw-ila wi ra nan a tat,” —kächa'. Xuquje' kub'ij: “Jachin ri kuyoq' ru nan u tat, tzrajwaxik wi ri' käkamisaxik,” —kächa', —xcha chke. ⁵ Ri alaq k'ut käb'ij alaq chi xaq xuwi rajwaxik kub'ij jun achi chke ru nan u tat: “Ronojel ri kinkowinik kinkoj che to'ik alaq, nu yo'm cho ri Dios,” —kächa'. ⁶ We ri achi je' kub'ij wa', man käya tä alaq che chi k'o jas kub'an che ki to'ik ru nan u tat. Je ri' man nim tä chik kil wi alaq ru Tzij ri Dios, man k'o tä k'u u patän ru Loq' Pixab' ri Dios chuwäch alaq rumal ru b'anik ri naq'atal wi alaq. ⁷ ¡Xaq kieb' wäch alaq! Qas tzij ri xub'ij ri qa mam Isaías ri q'alajisal re ru Loq' Pixab' ri Dios chij alaq aretaq xutz'ib'aj kan we tzij ri' ri kub'ij:

⁸ We winaq ri' xaq chi ki chi'

käkinimarisaj nu q'ij,

Man qas tä käkijikib'a ri kanima'

chwij,

—xcha'.

⁹ Xaq loq' keq'ijilan chwe,

xaq k'u ki taqanik winaq käkiya

che tijonik,

—xcha ri Dios chuchi' ri qa mam Isaías.

¹⁰ Ri Jesús xeusik'ij ri winaq ruk', xub'ij chke: Alaq, onojel alaq, tatab'ej alaq ri nu tzij, ch'ob'o alaq ri kinb'ij. ¹¹ Ri kutij ri winaq, man are tä ri' ri ketzelan u wäch ru k'aslemal, xane xa are ri kel loq pu chi' ri winaq are wa' ri ketzelan u wäch ru k'aslemal, —xcha chke.

¹² Xegeb' k'u ri tijoxelab' ruk' ri Jesús, xkib'ij che: ¿A etam la chi ri tata'ib' fariseos k'äx xkina' ri xb'ij la? —xecha che.

¹³ Ri Jesús xch'awik, xub'ij chke: Apachike u wäch tiko'n ri man xtik tä rumal ri nu Tat ajchikaj, käb'oq na apanoq. ¹⁴ Xaq je' taq ke la' ri fariseos. Ri e are' e je' jas moyab' ri käkik'am ki b'e nik'iaj moyab' chik. We jun moy kuk'am u b'e jun moy chik, ri kieb' ri' ketzaq na pa jun jul.

¹⁵ Xub'ij k'u ri tat Pedro che ri Jesús: B'ij la chqe jas kel kub'ij ri k'utb'al ri xkoj la, —xcha che.

¹⁶ Ri Jesús xub'ij che: ¿A mat lo kich'ob' wa' ri ix? —xcha che. ¹⁷ ¿A mat iwetam chi ronojel ri kutij ri winaq pa ri rixko' ke' wi, kel k'u kanoq aretaq kub'ana ru chul? —kächa chke. ¹⁸ Are k'u ri kel loq pu chi' ri winaq, pa ranima' ri' kel wi loq. Are k'u wa' ri ketzelan u wäch ru k'aslemal. ¹⁹ Je ri', rumal

chi pa ranima' ri winaq kel wi loq ri itzel taq chomanik, ru b'anik kămisanik, ru b'anik ri nimalaj mak ruk' ri rixoxil jun winaq chik, ru b'anik jas ri kăka'n ri tz'i' ri xaq kăkiriq kib', man k'o tā ki pixab', ru b'anik elaq', ru b'anik ri b'anow tzij, xuquje' ru yakik tzij chrij jun winaq chik. ²⁰ E are wa' we etzelal ri' ri ketzelan u wăch ru k'aslemal ri winaq cho ri Dios. Are k'u we jun winaq man kub'an tā ri naq'atal u b'anik, man kuch'aj tā ri rij ru q'ab' aretaq măja' kăwi'k, man kăretzelaj tā ru k'aslemal ri' cho ri Dios, — xcha ri Jesŭs chke ru tijoxelab'.

Jun ixox'ri man are tā aj Israel kăkojon che ri Jesŭs

²¹ Xel b'i ri Jesŭs chila', xe'k, xopan pa Fenicia chunaqaj ri tinimit Tiro, xuquje' ri tinimit Sidŏn. ²² Xpe k'u jun ixox'aj Cananea ri k'o chila', xopan ruk' ri Jesŭs, xuraq k'u u chi', xub'ij: iTat, lal ri' ri rachalaxik kan ri David, chel k'ux la chwe! Ri wal ali k'o jun itzel espŭritu che, sib'alaj kuriq k'ăx rumal, — xcha che.

²³ Ri Jesŭs k'ut man k'o tā jun tzij xub'ij che. Xepe k'u ru tijoxelab' ri Jesŭs, xkita' toq'ob' che, xkib'ij: Taqa la b'i ri chichu' rumal chi xaq kuraq u chi' teren chqij, — xcha che.

²⁴ Xub'ij k'u ri Jesŭs chke: Ri Dios in u taqom loq xaq xuwi kuk' ri winaq aj Israel, rumal chi ri e are' e je' ta ne chij ri e sachi-naq, — xcha che.

²⁵ Xpe k'u ri ixox, xqeb' ruk' ri Jesŭs, xxuki chuwach, xub'ij che: iTat, chinto' la! — xcha che.

²⁶ Ri Jesŭs xub'ij che: Man utz tā ru chapik ri ki wa ri qas ralk'ual jun, kăk'iaq ta k'u chkiwach ri alaj taq tz'i', — xcha che.

²⁷ Xub'ij k'u ri ixox' che: Je', Tat. Xuquje' ne ri alaj taq tz'i' ri keb'ok pa ja, kăkitij ru xe'r taq ki wa ri kajaw ri ketzaq pulew, — xcha che.

²⁸ Ri Jesŭs xub'ij che ri ixox: iQas tzij b'a' chi nim ri kojoniik la, nan! Chb'antaj ta b'a' jas ri kaj la, — xcha che.

Tzare chi' k'ut xutzir ri ral ali.

Ri Jesŭs keukunaj k'ia yawab'ib'

²⁹ Xel b'i ri Jesŭs chila', xok'ow chuchi' ri mar re Galilea. Te k'u ri' xpaq' puwi' jun juyub', xt'uyi k'u chila'. ³⁰ Xeopan k'u k'ia winaq ruk' kuk'am b'i ch'okojib', moyab', memab', winaq ri k'ăx u b'anom ri ki q'ab', xuquje' e k'ia ri k'o nik'iaj yab'il chik chke. Xekiya chuwach ri Jesŭs, ri Are' k'ut xeukunaj. ³¹ Ri winaq sib'alaj xkikajmaj aretaq xkilo chi ri memab' xech'aw chik, ri k'ăx u b'anom ki q'ab' xeutzirik, ri ch'okojib' xeb'in chik, ri moyab' xeka'y chik. Xkichap k'u u nimarisaxik u q'ij ri Dios aj Israel.

Ri Jesŭs keutzuq kiejeb' mil winaq

³² Ri Jesŭs xeusik'ij ru tijoxelab', xub'ij chke: Kel nu k'ux chke ri winaq rumal chi oxib' q'ij chi wa' e k'o wuk', man k'o tā k'u jas kăkitijo. Man kwaj taj keintaq b'i cho taq kachoch măja' k'u kewi'k, ketzaq ta k'u ne pa taq ri b'e, — xcha chke.

³³ Ru tijoxelab' xech'awik, xkib'ij che: iJawije' ta k'u lo kăqariq wi ri wa ri kăqaya chke we k'ialaj winaq ri' waral pa we juyub' ri' ri kătz'inowik? — xcha che.

³⁴ Xuta' k'u ri Jesŭs chke: iJanipa' kaxlan wa k'o iwuk'? — xcha che.

Ri e are' xkib'ij: Wuqub' kaxlan wa, rachi'l kieb' oxib' alaj taq kăr, — xcha che.

³⁵ Xtaqan k'u ri Jesŭs chke ri k'ialaj winaq chi keku'b'i pulew. ³⁶ Te k'u ri' xeuk'am ri wuqub' kaxlan wa, xuquje' ri alaj taq kăr, xmaltioxinik. Xeupiro, xeuya chke ru tijoxelab' rech kăkijach wa' chkiwach ri winaq. Je k'u ri' xka'no. ³⁷ Xewi' k'u konojel ri winaq, xenojik. Xekimulij k'u ri ch'agataq taq wa ri xekanaj kanoq. Ronojel wa' xub'an wuqub' chikăch wa. ³⁸ E kiejeb' mil achijab' k'ut ri xewi'k. Man xekajilaj tā k'u ri ixoxib' xuquje' ri ak'alab' (ri xuquje' xewi'k). ³⁹ Te k'u ri' ri Jesŭs xeujach b'i ri winaq rech keb'e' cho taq kachoch. Ri Are' xok b'i pa ri barco, xe' pa ri tinimit Magdala.

16

Ri tata'ib' fariseos xuquje' ri saduceos kăkita' jun kajmab'al etal che ri Jesŭs

¹ Ri tata'ib' fariseos xuquje' ri tata'ib' saduceos xeopan ruk' ri Jesŭs. Te k'u ri' xkita' che chi kuk'ut chkiwach jun kajmab'al etal ri kăpe chikaj. Xkib'ij wa' che xaq rech kăqaj ri Jesŭs pa ki q'ab'. ² Xch'aw k'u ri Jesŭs, xub'ij chke: Pa b'enaq taq q'ij kăb'ij alaq: "Sa'q'ij wa' kub'ano rumal chi kiăq ri uwokaj," — kăcha alaq. ³ Are k'u ri aq'ab'il kăb'ij alaq: "Kămik kăpe jăb' rumal chi kiăq ri uwokaj, xuquje' q'eqmuj," — kăcha alaq. iRi alaq xaq kieb' wăch alaq! Kăkowin alaq chuch'ob'ik ri u wăch ri kaj, man kăch'ob' tā k'u alaq jas ri tajin kuk'ut ri Dios chuwach alaq pa taq we q'ij junab' ri'. ⁴ We winaq ri' ri e lawalo, ri man jikom tā kanima', kăkaj chi kinb'an jun kajmab'al etal chkiwach. Man kăyi' tā chi k'u na jun etal chke, xane are kinna'taj chke ri etal rech ri Jonăs, — xcha chke.

Ri Jesŭs xeuya kan wa' we achijab' ri', xe'k.

Ri Jesŭs kătzijon chrij ri ki ch'amil ri tata'ib' fariseos

⁵ Aretaq xeq'ax ru tijoxelab' ri Jesŭs ch'ăqăp che ri mar, xsach pa ki jolom ru k'amik b'i ki wa. ⁶ Xub'ij k'u ri Jesŭs chke: iChitampe! Chichajij iwib' chuwach ri ki ch'amil ri tata'ib' fariseos xuquje' chuwach

ri ki ch'amil ri tata'ib' saduceos, —xcha chke.

⁷ Xkitzijob'ela k'u kib' ri tijoxelab', xkib'ij: Ri Are' kub'ij wa' chqe rumal chi man k'o tä qa wa qa k'amom loq, —xecha'.

⁸ Aretaq ri Jesús xretamaj jas ri tajin kākib'ij, xub'ij chke: ¿Jas che tajin kib'ij chi man k'o tä i wa? ¡Tzij ri' chi xa man qas tä kixkojonik! —xcha chke. ⁹ ¿A xaq are mäja' kich'ob'o, man kána'taj tä chiwe chi xinpir ri job' kaxlan wa, xinjach k'u wa' chkiwäch ri job' mil winaq? ¿A mat kána'taj chiwe janipa' chikäch ch'aqataq taq kaxlan wa ri man xek'is taj ri xek'olo? ¹⁰ ¿A mat k'u kána'taj chiwe xuquje' chi xinpir ri wuqub' kaxlan wa, xinjach k'u wa' chkiwäch kiejeb' mil winaq, janipa' chikäch ch'aqataq taq kaxlan wa ri man xek'is taj ri xek'olo? ¹¹ ¿Jas che man kich'ob' taj chi ri in man are tä tajin kinb'ij ri kaxlan wa aretaq xinb'ij chi kichajij iwib' chuwäch ri ki ch'amil ri tata'ib' fariseos xuquje' ri tata'ib' saduceos? —xcha ri Jesús chke.

¹² Te k'u ri' ri tijoxelab' xkich'ob'o chi ri Jesús man are tä xub'ij chke chi kākichajij kib' chuwäch ri ch'am re kaxlan wa, xane chuwäch ri ki tijonik ri tata'ib' fariseos xuquje' ri tata'ib' saduceos.

Ri tat Pedro kuq'alajisaj chi ri Jesús are ri Cristo

¹³ Aretaq ri Jesús tajin kánaqajin che ri tinimit Cesarea Filipo, xuta' chke ri tijoxelab', xub'ij chke: ¿Jas kākib'ij ri winaq chwij chi jachin ri in, in ri' ri Ralk'ual ri Dios ri Qas Winaq? —xcha chke.

¹⁴ Xkib'ij k'u che: E k'o jujun winaq kākib'ij chi lal ri' ri Juan Qasal Ja', xuquje' kākib'ij jule' chik chi lal ri' ri qa mam Elías. E k'o chi nik'iaj kākib'ij chi lal ri' ri qa mam Jeremías o jun chik chke ri ojer q'alajisaj taq re ru Loq' Pixab' ri Dios, —xecha chke.

¹⁵ Xuta' k'u ri Jesús chke: E k'u ri ix, ¿jachin ri in ri kib'ij ix? —xcha chke.

¹⁶ Xch'aw ri tat Pedro, xub'ij che: Lal ri' ri Cristo, ru K'ojol ri k'aslik Dios, —xcha chke.

¹⁷ Ri Jesús xch'awik, xub'ij che: Utz awe, Simón, u' K'ojol ri tat Jonás, rumal chi man are tä jun winaq ri xb'in wa' chawe, xane are ri nu Tat ri k'o chila' chikaj. ¹⁸ Ri in kinb'ij chawe chi ri at, at Pedro. Puwi' k'u we nimalaj ab'aj ri' keinjeqb'a wi na ri winaq ri kekojon chwe.* Man kākowin tä k'u na ri kāmikal chusachik ki wäch, —xcha chke. ¹⁹ Keinya chawe ri lawe re ri k'olib'al ri taqan wi ri Dios. Jachike ri kaq'alajisaj chi man utz tä u b'anik cho ruwächulew, man utz tä u b'anik ri' chila' chikaj. Jachike ri kaq'alajisaj chi utz u b'anik cho ruwächulew, utz u b'anik ri' chila' chikaj.

²⁰ Ri Jesús k'ut xeupixb'aj ru tijoxelab', xub'ij chke chi mäkitzijoj wa' che jachin jun chi ri Are' are ri Cristo.

Ri Jesús kutzijoj chi kākäm na

²¹ Tzare chi' k'ut ri Jesús xuchaplej u q'alajisaxik chkiwäch ru tijoxelab' chi ri Are' rajwaxik ke' na pa ri tinimit Jerusalén. Xub'ij chi káb'an na sib'alaj k'äx che kumal ri ki nimaqil ri winaq, kumal ri ki nimaqil ri sacerdotes, xuquje' kumal ri tijonelab' re ri Pixab'. Xuquje' rajwaxik chi kākämisax na, te ri' kāk'astaj chi k'u na churox q'ij chkixol ri kāminaqib'. ²² Are k'u ri tat Pedro xuk'am b'i ri Jesús u tukiél wi. Xuchaplej u yajik, xub'ij che: ¡Mat kraj ri Dios wa', Wajaw! ¡Mat je' kāk'ulmaj la wa'! —xcha chke.

²³ Xutzolq'omij k'u rib' ri Jesús, xub'ij che ri tat Pedro: ¡Chatel chnuwäch, Satanás, xaq at ya' latz' chwe! Man kach'ob' tä k'u ru chomanik ri Dios, xane xaq xuwi kach'ob' ri ki chomanik winaq, —xcha chke.

²⁴ Ri Jesús k'ut xub'ij chke ru tijoxelab': We k'o jun kraj kápe wuk' in, rajwaxik chi mub'an chik xaq jas ri kraj ri are'. Rajwaxik kutelej loq ru cruz, kápe wuk' in, —xcha chke. (Kel kub'ij wa' chi ri winaq ri' man nim tä chik káril ru k'aslemaal, xane kuya u tzij pune ta ne kuriq ri kāmikal rumal rech ri Jesús.) ²⁵ Je ri', rumal chi apachin ta ne ri kraj kuto' u wi' ru k'aslemaal cho ruwächulew, kākäm na ri winaq ri', kutzaq na ronojel. Apachin k'u ri kuya ru k'aslemaal pa ri k'äx rumal wech in, kuto' na u wi' ri' ri qas u k'aslemaal wa'. ²⁶ ¿Jas ta k'u lo ri kuch'ak jun winaq we kärechb'ej ronojel ruwächulew, kutzaq k'u na ri ranima'? ¿Jas ta k'u lo ri kākowin ri winaq chuya'ik chuk'exwäch ri ranima'? —xcha chke. ²⁷ Kinpe k'u na in, in ri' ri Ralk'ual ri Dios ri Qas Winaq, e wachi'l ri loq'alaj taq ángeles. Känimarisax na nu q'ij jas ru nimarisaxik u q'ij ri nu Tat. Kinya k'u na ri tojb'al ke ri winaq chkiujunal jas ri xka'n ri e are' pa ri ki k'aslemaal. ²⁸ Qas tzij kinb'ij chiwe chi e k'o jujun chke ri e k'o waral ri man kekäm tä na k'ä kinkil na in, in ri' ri Ralk'ual ri Dios ri Qas Winaq, in petinaq rech kintaqan pa ki wi' ri winaq, —xcha ri Jesús chke ru tijoxelab'.

17

Käk'extaj ru kayeb'al ri Jesús

¹ Xke' waqib' q'ij u b'im kan ri Jesús wa', aretaq xeuk'am b'i ri tat Pedro, ri tat Jacobo, xuquje' ri tat Juan ru chaq' ri tat Jacobo. Ki tukiél wi xepaqi puwi' jun nimalaj juyub'. ² Xk'extaj k'u ru kayeb'al ri Jesús chkiwäch. Ru palaj ri Jesús xjuluwik je' jas ri q'ij. Ri ratz'iaq xub'an sib'alaj saqloloj je' jas ri saqil. ³ Xaq k'u te'talik xkik'ut kib' kieb'

* **16:18** “Ri winaq ri kekojon chwe” e are' ri káb'ix “Iglesia” chke pa castellano. Chawila' ri tzij “Iglesia” pa ri Diccionario, k'isb'al re we Nuevo Testamento.

achijab' ri tajin ketzijon ruk' ri Jesús. E are' ri qa mam Moisés rachi' ri qa mam Elías.
 4 Xch'aw k'u ri tat Pedro, xub'ij che ri Jesús: Qajaw, ¡sib'alaj utz chi uj k'o waral! We kaj la, káqa'n na oxib' mo',* jun che la, jun che ri qa mam Moisés, jun chik che ri qa mam Elías, —xcha che.

5 Aretaq tajin kätzijon ri tat Pedro, xqaj loq jun saqloloz sutz' chkij, xech'uqtaj k'u rumal. Te k'u ri' xch'aw loq Jun chupam ri sutz', xub'ij: Are ri loq'alaj nu K'ojol wa', sib'alaj káikot ri wanima' rumal. Chitatab'ej b'a' ri kub'ij, —xcha ri'.

6 Ri tijoxelab', aretaq xkita wa', sib'alaj xkixej kib'. Xexuki'k xkigasaj ri ki palaj cho ri ulew. 7 Are k'u ri Jesús xqeb' kuk', xeuchap k'u qajog, xub'ij chke: Mixej b'a' iwib'. Chixwalijog, —xcha chke.

8 Ri e are' chanim xeka'ylob'ik. Man k'o tä chi k'u jachin xkilo, xane xaq xuwi ri Jesús k'o kuk'.

9 Qajem ke loq cho ri juyub', ri Jesús xeupixb'aj, xub'ij chke: K'o jachin mitzijoj wi ri iwilom k'a kink'astaj na chkixol ri káminaqib', in ri' ri Ralk'ual ri Dios ri Qas Winaq, —xcha chke.

10 Ri tijoxelab' xkita' che ri Jesús, xkib'ij che: ¿Jas che káikib'ij ri tijonelab' re ri Pixab' chi rajwaxik kápe na ri qa mam Elías nab'e? —xecha che.

11 Xch'aw k'u ri Jesús, xub'ij chke: Tzij ri' chi kápe ri qa mam Elías nab'e, rech kub'an na u b'anik ronojel. 12 Ri in k'ut kinb'ij chiwe chi ya ulinaq chik ri qa mam Elías. Ri winaq k'ut man xkich'ob' tä u wäch, xane xa xka'n che ri are' jas ri xkaj xka'no. Je k'u ri' xuquje' ri in, in ri' ri Ralk'ual ri Dios ri Qas Winaq, kinriq na k'ax pa ki q'ab', —xcha chke.

13 Xkich'ob' k'u ri tijoxelab' chi ri tajin kub'ij ri Jesús chke, are ri Juan Qasal Ja'.

Ri Jesús kukunaj jun ala ri k'o jun itzel espíritu che

14 Aretaq k'ut xeopan chila' jawijje' e k'o wi ri k'ialaj winaq, xpe jun achi, xopan ruk' ri Jesús, xxuki k'u chuwäch, xub'ij che: 15 Tat, chel k'ux la che ri nu k'ojol, xa k'o jun itzel espíritu che, sib'alaj k'u kuriq k'ax rumal. K'ia mul kätzaq pa ri q'aq', pa ri ja'. 16 Xink'am loq, xinya chkiwäch ri tijoxelab' la, ri e are' k'ut man xekowin tä chukunaxik, —xcha che ri Jesús.

17 Ri Jesús xch'awik, xub'ij: ¡Ay, ri alaq winaq ri man kákojon tä alaq che ri Dios! ¡Xaq xuwi káb'an alaq jas ri kaj alaq! ¿A are lo kaj alaq chi xaq tajin wi kink'oji uk' alaq ronojel q'ij? ¿A are lo kaj alaq chi xaq kinkuy alaq? K'ama b'a' alaq loq ri ala chnuwäch, —xcha chke.

18 Ri Jesús k'ut xuyaj ri itzel espíritu ri k'o che ri ala, xresaj b'ik. Tzare chi' xutzir ri ala, utz chi k'u kanoq.

19 Ru tijoxelab' ri Jesús xkita' che pa u tukiel wi: ¿Jas che ri uj man xujkowin tä che resaxik b'i ri itzel espíritu ri'? —xecha che.

20 Xub'ij ri Jesús chke: Are wa' rumal chi man qas tä k'o ri i kojoniq, —xcha chke. Qas tzij kinb'ij chiwe chi we ta ri i kojoniq je' jas ri in nitz' ija' re mostaza, kixkowin ri' kib'ij che we juyub' ri': "¡Chatel b'i chi!, jat jela!" —kixcha che. Ri juyub' kel na b'ik. Man k'o tä ri mat kixkowin chub'anik we ta qas tzij kixkowin, —xcha chke. 21 Xaq xuwi ruk' ru b'anik orar, xuquje' ruk' ru b'anik ayuno kel b'i jun itzel espíritu ri je' u b'anik wa', —xcha ri Jesús chke ru tijoxelab'.

Ri Jesús kutzijoj jumul chik chi kákam na

22 Aretaq xetzelej b'i kuk' ri k'ialaj winaq, ri Jesús xub'ij chke ru tijoxelab': Ri in, in ri' ri Ralk'ual ri Dios ri Qas Winaq, kinjach na pa ki q'ab' ri winaq. 23 Kinkámisax na, churox q'ij k'ut kink'astaj na chkixol ri káminaqib', —xcha chke. Aretaq xkita wa' ri tijoxelab', sib'alaj xeb'isonik.

Waral káqil wi ru tojik ri alkab'al re ri nimalaj rachoch Dios

24 Aretaq ri Jesús kuk' ru tijoxelab' xeopan pa ri tinimit Capernaum, ri toq'il taq alkab'al re ri nimalaj rachoch Dios xeopan ruk' ri tat Pedro, xkib'ij che: ¿A mat kutoj re ri ajtij alaq ri alkab'al re ri nimalaj rachoch Dios? —xecha che.

25 Je', je ri', —xcha ri tat Pedro chke.

Aretaq k'ut xok b'i ri tat Pedro pa ri ja, nab'e xch'aw ri Jesús, xub'ij che: Simón, ¿jas kachomaj? ¿Jachin taq chke kákita' wi ri alkab'al o ri kuchuj ri nimaq taq taqanelab' rech ruwächulew? ¿A kákita' wa' chke ri ki winaqil o chke ri man ki winaqil taj? —xcha che.

26 Ri tat Pedro xch'awik, xub'ij che: Chke ri man ki winaqil taj kákita' wi wa', —xcha che.

Ri Jesús xub'ij che: We je ri', ri winaq ri keb'el pa ri ki tinimit ri nimaq taq taqanelab' man k'o tä alkab'al ri' kákitojo, —xcha che. 27 Man kwaj tä k'ut chi kinyak roy-owal jachin jun winaq. Rumal ri' jat chuchi' ri mar, chak'iaqa b'i ri anzuelo pa ri ja'. Chawesaj loq ri nab'e kár ri kachapo, pu chi' k'ut kawesaj wi jun puag. Ruk' ri puag ri' katoj ri alkab'al re ri nimalaj rachoch Dios, ri wech in xuquje' ri awech at. Chak'ama k'u wa', kate' k'ut, katojo kanoq, —xcha che.

18

Ri tijoxelab' kákichomala kib' chrij jachin chke ri nim na u b'anik

* 17:4 Man q'alaj tä wa' we are "mo'" o are "káb'al".

¹ Pa ri q'ij ri' ri tijoxelab' xkimulij kib' ruk' ri Jesús, xkita' che: ¿Jachin ri nim na u b'anik chila' jawije' ri kátaqan wi ri Dios? —xecha che.

² Ri Jesús xusik'ij apan jun alaj ak'al, xuk'amo, xutak'ab'a chkiwäch ru tijoxelab'. ³ Xub'ij k'u chke: Qas tzij kinb'ij chiwe. We ri ix man kik'ex tä ri iwanima', ri i chomanik, we man kib'an iwe jas ri káka'n ri ak'alab' man káka'n tä nimal, man kixopan tä ri' chila' jawije' ri kátaqan wi ri Dios, —xcha chke. ⁴ Je k'u ri' kinb'ij chiwe chi ri nim na u b'anik chila' jawije' ri kátaqan wi ri Dios, are ri man nim tä kub'an che rib', kub'an k'ut jas we ak'al ri'. ⁵ Apachin ri kuk'ulaj jun ak'al jas we ak'al ri' rumal wech in, in ri' kinuk'ulaj, —xcha chke.

Käkiriq k'äx ri winaq ri káka'no chi jun winaq chik kuriq ri b'e ri man utz taj

⁶ Apachin k'u ri kub'ano chi jun chke we ch'utiq ri' ri kekojon chwe kuriq ri b'e ri man utz taj, are utz ri' we ta käxim jun ka' re molino chuqul ri winaq ri', kák'iaq ta k'u b'i pa ri mar. ⁷ ¿Sib'alaj k'äx chke ri winaq cho ruwächulew chi k'o jas ri kub'ano chi ri winaq käkiriq ri b'e ri man utz taj! Amaq'el k'ut kákik'ulmaj wa'. Sib'alaj k'äx k'u re ri winaq ri kub'ano chi jun winaq chik kuriq ri b'e ri man utz taj.

⁸ Rumal ri', we ri a q'ab' o ri awaqan kub'ano chi ri at kariq ri b'e ri man utz taj, chaq'ata', chak'iaqa apanoq. Are utz na chawe we kariq na ri qas k'aslemaal pune at kut o at ch'oko', chuwach ri k'o kieb' a q'ab' o kieb' awaqan kate' pa ri k'atik jawije' k'o wi ri q'aq' ri man kächuptaj taj. ⁹ We are ri a waq'äch kub'ano chi kariq ri b'e ri man utz taj, chawesaj, chak'iaqa apanoq. Are utz na chawe we kariq na ri qas k'aslemaal pune xa jun ra waq'äch k'olik, chuwach ri k'o kieb' a waq'äch, katk'iaq b'i pa ri nimalaj q'aq', —xcha ri Jesús chke.

Waral káqil wi ri k'utb'al chrij ri chij ri xsachik

¹⁰ Miwetzelay b'a' ki wäch jun chke we ch'utiq ri' ri kekojon chwe. Kinb'ij k'u chiwe chi ri e are' amaq'el ronojel q'ij k'o ri ki ángeles chuwach ri nu Tat chila' chikaj. ¹¹ Je ri', rumal chi ri in, in ri' ri Ralk'ual ri Dios ri Qas Winaq, xinpe che ki to'ik ri winaq ri e sachinaq.

¹² ¿Jas kichomaj chrij ri kinb'ij na? We k'o jun achi ri k'o jun ciento u chij, kátzaq k'u kan jun chke, ¿a mat keuya na kan ri' ri jumuch' b'elejlajuj pa ri juyub', ke' k'u chutzukuxik ri jun ri xtzazq kanoq? Je', je ri'. ¹³ We kuriqo, sib'alaj kákikot na ruk'. Nim na ru kikitomal ruk' wa' chuwach ru kikitomal kuk' ri jumuch' b'elejlajuj ri man xetzaq taj. ¹⁴ Je k'u ri' ri i Tat ri k'o chila' chikaj man

kraj taj chi kátzaq jun chke we ch'utiq ri' ri kekojon chwe.

Ri kub'an jun chusachik u mak jun winaq chik

¹⁵ We ri awachalal kub'an jun k'äx chawe, chattzizon ruk' pa u tukiel wi, chab'ij che jas ru mak. We kukoj rib' chupam, xatkowin ri' chuch'akik ra wachalal. ¹⁶ We k'u ri awachalal man kukoj tä rib' pa ru mak aretaq kattzizon ruk', chasik'ij jun o kieb' winaq chik, rech ronojel ri kib'ij ketamax wa' kumal kieb' u oxib' tal taq tzij. ¹⁷ We k'u man kok ri tzij pu jolom ri káb'ix che kumal ri nik'iaj chik, cheasik'ij konojel ri nik'iaj qachalal. We k'u man kuto jas ri kákib'ij konojel ri qachalal, chab'ana che chi je' jas jun winaq ri man kákojon tä che ri Dios o jun toq'il alkab'al.

¹⁸ Qas tzij kinb'ij chiwe chi jachike ri kiq'alajisaj chi man utz tä u b'anik kumal ri winaq cho ruwächulew, man utz tä u b'anik ri' chila' chikaj. Jachike k'u ri kiq'alajisaj chi utz u b'anik kumal ri winaq waral cho ruwächulew, utz u b'anik ri' chila' chikaj.

¹⁹ Xuquje' kinb'ij chiwe chi we k'o kieb' chixol waral cho we uwächulew ri kuriq rib' ki chomanik puwi' jun rajwaxik, káka'n k'u orar chuta'ik wa', ri qa Tat ri k'o chila' chikaj kuya na wa' chke. ²⁰ Je ri', rumal chi jawije' ri ki mulim wi kib' kieb' oxib' winaq rumal chi kekojon chwe, kuk' ri' in k'o wi, —xcha ri Jesús chke ru tijoxelab'.

²¹ Xpe ri tat Pedro, xuta' k'u che ri Jesús: Qajaw, we ri wachalal k'ia mul kub'an k'äx chwe, ¿janipa' mul rajwaxik kinsach u mak? ¿A kraj ne wuqub' mul ri'? —xcha che.

²² Xch'aw k'u ri Jesús, xub'ij che: Man kinb'ij tä chawe chi xa wuqub' mul kasach u mak, xane rajwaxik kasach u mak wuqub' mul chik, wuqub' mul chik, k'a kopan na pa job' ciento, —xcha che.

Ri k'utb'al chrij ri patäninel ri man xraj taj xusach u mak ri rachi'l

²³ Je ri', rumal chi ru taqanik ri Dios pa ki wi' ri winaq, are je' jas jun q'inom achi ri xeumulij ri rajchakib', xuchap k'u u ta'ik we k'o ri ki k'as, o we ne k'o u k'as ri are' kuk'. ²⁴ Aretaq tajin kuchaplej rajilaxik ri ki kuenta chkijujunal, xk'am loq jun ajchak ri u k'as k'ia mil quetzales. ²⁵ Are k'u ri jun ajchak ri' man k'o tä kutojb'ej re ru k'as. Ri patrón xtaqanik chi kák'iyix ri ajchak ri' pu q'ab' jun winaq chik rech kápatänin che, rachi'l ri rixoqil, ri ralk'ual, xuquje' konojel ri jastaq re, rech kátojtaj ru k'as. ²⁶ Are k'u ri ajchak xxuki chuwach ru patrón, xb'ochi'nik, xuta' toq'ob', xub'ij che: “Tat, chajij la paciencia wuk', kintoj na ronojel ri nu k'as,” —xcha che. ²⁷ Ri patrón xu-toq'ob'isaj u wäch ri rajchak, xusach u mak,

xub'ij che chi man kutoj tä chi ru k'as, xutzogopij k'u b'ik. ²⁸Te ri' ri ajchak ri xtzogopitaj b'ik, xuriq jun rach ajchak ri u k'as kieb' oxib' quetzal ruk'. Xuchap ri rach ajchak chuqul, xuchap u jitz'axik, xub'ij che: "iChatojo ra k'as wuk'!" —xcha che. ²⁹Ri rach ajchak xxuki chuwäch, xb'ochi'nik, xuta' toq'ob' che, xub'ij: "Chachajij paciencia wuk', kintoj na ronojel ri nu k'as," —xcha che. ³⁰Ri are' k'ut man xusach tä u mak ri rach ajchak, xane xukoj pa che', xub'ij che chi rajwaxik kutoj na ru k'as. ³¹Aretaq xkil wa' ri nik'iaj ajchakib' chik, sib'alaj xeb'isonik. Xeb'e' k'ut, xekib'ij che ri ki patrón ronojel ri xb'antajik. ³²Xpe k'u ri ki patrón, xtaqan chusik'ixik ri ajchak ri', xub'ij che: "iItzel ajchak! Ri in xinkuy ra k'as rumal chi xata' toq'ob' chwe. ³³Ri at xuquje' rajwaxik xatoq'ob'isaj ta u wäch ri awach ajchak, jas ri xinb'an in chawe xintoq'ob'isaj a wäch," —xcha che. ³⁴iRu patrón k'ut, sib'alaj xpe royowal! Xtaqanik chi kāk'äjisax u wäch ri rajchak k'ä kutoj na ru k'as.

³⁵Ri Jesús xuk'isb'ej re ru tzij, xub'ij: Jas ri xub'an ri patrón che ri rajchak, are je' kub'an na ri nu Tat ri k'o chila' chikaj chiwe, we man qas kisach ki mak ri iwachalal, —xcha ri Jesús chke.

19

Ri Jesús kuya tijonik chrij ri ki jachik kib' juk'ulaj winaq

¹Aretaq xto'taj ri Jesús chub'ixik ronojel wa' we tzij ri', xel b'i pa Galilea, xe' pa taq ri tinimit re Judea, ch'äqäp che ri nima' Jordán. ²E k'ia winaq xeteri b'i chrij, xeukunaj k'u taq ri yawab'ib' chila'.

³Xeopan k'u jujun tata'ib' fariseos ruk' ri Jesús, xkita' che: iA taqal che jun achi kujach b'i ri rixoqil pune man qas k'o u mak? —xecha che. Xkib'ij wa' che xaq rech kâqaj ri Jesús pa ki q'ab'.

⁴Xch'aw k'u ri Jesús, xub'ij chke: iA mat sik'im alaq pa ru Loq' Pixab' ri Dios ri Tz'ib'talik jas ri xub'an ri Dios pa ru chaxplexik loq ronojel, "chi achi chi ixoq xeb'ano"? —kâcha'. ⁵Xuquje' kub'ij: "Rumal wa' jun achi kuya na kan ru nan u tat, kâtuni k'u na ruk' ri rixoqil. Xa e jun chik ri kieb' winaq ri'," —kâcha'. ⁶Je k'u ri' man e kieb' tä chik, xane xa e jun chik. Rumal k'u ri', jas ri xeutunub'a ri Dios, mäjach ki wäch wa' kumal ri winaq, —xcha ri Jesús chke ri tata'ib' fariseos.

⁷Xkib'ij k'u ri tata'ib' fariseos: iJas che ri qa mam Moisés xtaqanik chi jun achi kuya' kutz'ib'aj jun wuj ri kub'ij wi chi kujach b'i ri rixoqil? Je k'u ri' kuya' kujach b'i ri rixoqil, —xecha che.

⁸Ri Jesús xub'ij chke: Xa rumal chi sib'alaj ab'ajarinaq ri anima' alaq, are rumal ri' xuya chech alaq chi kuya' kâjach b'i alaq ri ixoqil alaq. Man je' tä k'u wa' aretaq xchapletaj loq ronojel. ⁹Ri in k'ut kinb'ij chech alaq chi apachin ri kujach b'i ri rixoqil, we man rumal ru ch'ab'exik jun achi chik, kâk'uli chi k'u na ruk' jun ixoq chik, ri achi ri' kub'an ri nimalaj mak ri äwas u b'anik chrij ri nab'e rixoqil. Ri achi k'ut ri kâk'uli ruk' jun ixoq ri jachom kanoq kub'an ri nimalaj mak ri', —xcha ri Jesús chke ri tata'ib' fariseos.

¹⁰Xkib'ij k'u ru tijoxelab' ri Jesús che ri Are': We jun achi man kuya' taj kujach b'i ri rixoqil, are utz na ri' chi man kâk'uli taj, —xecha che.

¹¹Ri Jesús xub'ij chke: Man konojel tä winaq kâkich'ij wa' chi man kek'uli taj, xane xaq xuwi ri yo'm chke rumal ri Dios chi kâkich'ijo. ¹²K'o k'u jas che jujun achijab' man kek'uli taj. E k'o jujun xa tzkech wi man kek'uli taj, e k'o nik'iaj chik ri xa b'anom chke kumal ri achijab' chi man kek'uli taj, e k'o k'u nik'iaj chik kâkich'ijo man kek'uli taj xa rumal chi kâkaj kâkipatänij ri Dios. Jachin ri kâkowinik je' kub'an wa', chub'ana', —xcha ri Jesús chke ru tijoxelab'.

Ri Jesús keutechwchij ri ak'alab'

¹³Ri winaq xekik'am loq ri ak'alab' cho ri Jesús rech kuya ru q'ab' pa ki wi', rech xuquje' kub'an orar pa ki wi'. Ri winaq ri xekik'am loq ri ak'alab' xeyaj kumal ri tijoxelab'. ¹⁴Ri Jesús k'ut xub'ij chke: Chiya chke ri ak'alab' chi kepe wuk', meiq'atej rumal chi ri winaq ri kâtaqan ri Dios pa ki wi' e are' winaq ri e je' jas we ak'alab' ri', —xcha chke.

¹⁵Xuya k'u ru q'ab' pa ki wi' ri ak'alab', te k'u ri' xel b'i chila'.

Jun q'inomalaj ala kâtzijon ruk' ri Jesús

¹⁶Jun ak'al achi xopan ruk' ri Jesús, xuta' che: Utzalaj Ajtij, iJas u wäch utzil rajwaxik kinb'ano rech kinriq ri k'aslemal ri man k'o tä u k'isik? —xcha che.

¹⁷Ri Jesús xub'ij che: iJas che kab'ij chwe chi utz ri in? Man k'o tä jun qas utz, xane xaq xuwi ri Dios, —xcha che. We k'u kawaj kariq ri k'aslemal ri man k'o tä u k'isik, chanimaj ru taqanik ri Dios, —xcha che.

¹⁸Ri achi xub'ij che: iJachike taq ri' ru taqanik ri Dios ri rajwaxik kinniman chke? —xcha che.

Ri Jesús xub'ij che: Matkâmisaniq, mab'an ri nimalaj mak ri äwas u b'anik ruk' ri rixoqil jun winaq chik, mab'an ri elaq', mab'an tzij chrij jun winaq chik. ¹⁹Nim cheawila wi ra nan a tat. Loq' cheawila wi ri awach winaq jas ri at loq' kawil awib', —xcha ri Jesús che ri achi.

²⁰ Ri achi xub'ij che ri Jesús: Ronojel wa' nu taqem u b'anik tzaretaq in ak'al na. ¿Jas ta chi k'u ri rajwaxik kinb'ano? —xcha che.

²¹ Ri Jesús xub'ij che: We kawaj kájikomataj ra k'aslemal cho ri Dios, jat, cheaq'iyij konojel ri jastaq awe, chaya ri rajil chke ri meb'a'ib'. Kák'oji k'u na ra q'inomal chila' chikaj. Te ri' tasa'j wuk', —xcha che.

²² Aretaq ri achi xuta ri xub'ij ri Jesús, xk'extaj ru wäch, xb'isonik, xe'k rumal chi k'ia ru q'inomal k'olik.

²³ Xub'ij k'u ri Jesús chke ru tijoxelab': Qas tzij kinb'ij chiwe, chi sib'alaj k'äx kutij jun q'inom kok chxixol ri winaq ri kátaqan ri Dios pa ki wi'. ²⁴ Are man k'äx tä ri rok'owisaxik jun awaj camello* pa ru julil jun t'isomb'al b'aq, chuwäch ri rokik jun q'inom chxixol ri winaq ri kátaqan ri Dios pa ki wi', —xcha che.

²⁵ Ri tijoxelab' aretaq xkita wa', sib'alaj xkikajmaj, xkib'ij k'u chb'il taq kib': ¿Jachin ta k'u lo ri kákowinik kuriq ru tob'anik ri Dios? —xecha'.

²⁶ Ri Jesús ko xka'y chke, te ri' xub'ij: Man kekowin tä ri winaq chub'anik wa', kákowin k'u na ri Dios che ronojel, —xcha che.

²⁷ Ri tat Pedro xub'ij che ri Jesús: Qajaw, chilampe la chi ri uj qa yo'm kan konojel ri jastaq qe, uj k'o uk' la. ¿Jas k'u ri käyi' na chqe? —xcha che.

²⁸ Xch'aw k'u ri Jesús, xub'ij chke: Qas tzij kinb'ij chiwe, kopan na jun q'ij aretaq káb'an k'ak' che ronojel. Aretaq ri in, in ri' ri Ralk'ual ri Dios ri Qas Winaj, kinku'b'i na pa ri je'lalaj nu t'uylub'al, kánimarisax nu q'ij, are chi' k'ut chi ri ix, ri ix ri k'o wuk' kixku'b'i na xuquje' pa kab'lajuj je'lalaj taq t'uylub'al. Kiq'at k'u na tzij pa ki wi' ri kab'lajuj tinimit re Israel. ²⁹ Konojel ri ki yo'm kan kachoch, kachalal, ki nan ki tat, kixoxil, kalk'ual, kulew rumal wech in, kákiriq na jun ciento mul ri tojb'al ke, xuquje' kákiriq na ri k'aslemal ri man k'o ta u k'isik pa taq ri q'ij ri junab' ri kepe na, —xcha che. ³⁰ E k'ia k'u ri winaq ri nim ke'il wi kámik ri man nim tä chi na ke'il wi pa taq ri q'ij ri'. Xuquje' e k'ia ri man nim tä ke'il wi kámik ri nim ke'il wi na pa ri q'ij ri', —xcha che ru tijoxelab'.

20

Waral káqil wi jun k'utb'al chkij ri ajchakib'

¹ Ru taqanik ri Dios pa ki wi' ri winaq, are je' jas jun achi ajchaq'el jun nimalaj ulew. Xel b'i sib'alaj aq'ab' che ki tzukuxik ajchakib' che ki mulixik ru wäch taq uvas. ² Xeurig k'u jujun achijab', xuchomaj k'u kuk' chi kákich'ak kakab' quetzal che ri jun

q'ij, xeutaq k'u b'i pa ri rulew che ri chak. ³ Xel chi k'u b'i jumul pa ri u b'e'lej hora re ri aq'ab'il. Xeril nik'iaj achijab' chik ri xaq tajin keqasan q'ij pa ri k'ayib'al. ⁴ Xub'ij k'u chke: "Jix pa ri nu chak, kinya k'u na ri tojb'al iwe ri taqal chiwe," —xcha che. Ri e are' k'ut xeb'e' pa ri chak. ⁵ Ri patrón xel chi b'i jumul pa ri nik'iaj q'ij che ki tzukuxik ajchakib', xuquje' pa ri urox hora re ri b'enaq q'ij, junam xub'an kuk' nik'iaj ajchakib' chik. ⁶ Pa ri uro' hora chik re ri b'enaq q'ij, xel chi b'i jumul pa ri k'ayib'al. Xeuriga chi nik'iaj achijab' ri xaq tajin keqasan q'ij, xub'ij k'u chke: "¿Jas che xaq ix k'o waral juntir ri jun q'ij man k'o tä k'u chak kib'ano?" —xcha che. ⁷ Ri e are' xkib'ij: "Xa man k'o tä jun ri káb'in chak chqe," —xecha che. Xub'ij k'u chke: "Jix pa chak wuk' in pa ri wulew, kinya k'u na ri tojb'al iwe ri taqal chiwe," —xcha che. ⁸ Aretaq k'ut xok ri aq'ab', ri patrón xub'ij che ri chajil ke ri ajchakib': "Cheasik'ij ri ajchakib', chaya b'i ri tojb'al ke. Are kachap ki tojik nab'e ri xeb'ok k'isb'al. Are k'u ri xeb'ok nab'e keatoj wa' k'isb'al," —xcha che. ⁹ Xepe k'u ri ajchakib' ri te' xeb'ok pa chak pa ri uro' hora re ri b'enaq q'ij. Chkijujunal tz'aqat kakab' quetzal xyi' chke. ¹⁰ Te k'u ri', aretaq hora chik chi ketoj ri okinaq nab'e pa ri chak, ri e are' xkichomaj chi más na ri tojb'al ke käyi' chkiwäch ri k'ä te' xeb'ok pa ri chak. Xuquje' k'u ri e are' xyi' kakab' quetzal chke chkijujunal. ¹¹ Aretaq xkik'amo xkichap u yajik ri ki patrón. ¹² Xkib'ij: "We ajchakib' ri' ri te' xeb'ul k'isb'al, xa jun hora xechakunik. Xaq junam k'u ki tojik xb'an la jas ri uj. Ri uj k'ut xqach'ij ronojel ri jun q'ij chak, xuchakun chuwäch ru chuq'ab' ri q'ij," —xecha che. ¹³ Ri patrón xub'ij che jun chke ri ajchakib': "E ri at, man k'o tä jas ri tajin kinb'an chawe ri mat jikom. ¿A mat junam xqachomaj chi xaq kieb' quetzal ri tojb'al awe? ¹⁴ K'ama b'i ri tojb'al awe, jat. Ri in kwaj kinya ri tojb'al ke we nik'iaj ri' ri te' xeb'ok k'isb'al junam jas ri xinya chawe at. ¹⁵ ¿A mat pa nu q'ab' k'o wi jachike ri kwaj kinb'an ruk' ri nu rajil? ¿A xa k'äx ne kana' chi in utz kuk' konojel?" —xcha ri patrón che ri ajchak. ¹⁶ Je k'u ri' ri winaq ri man nim tä ke'il wi kámik nim ke'il wi na. Are k'u ri winaq ri nim ke'il wi kámik, man nim tä chi ke'il wi na. E k'ia ri e sik'im. Man e k'ia tä k'ut ri e cha'talik, —xcha che ru tijoxelab'.

Ri Jesús kutzijoj chi na jumul chik chi kákäm na

¹⁷ Paqalem re ri Jesús pa Jerusalén, xeusik'ij k'u ri kab'lajuj u tijoxelab' pa ki tukiél wi, xub'ij chke: ¹⁸ ¿Chiwilampe! B'enam qe, tajin kujaqi pa ri tinimit

* **19:24** Ri camello are jun awaj ri kuya' kákiejen jun chrij, más k'ut kákoj che taq eqa'n. Nim na ri' chuwäch jun kiej.

Jerusalén. Kinjach k'u na in, in ri' ri Ralk'ual ri Dios ri Qas Winag, pa ki q'ab' ri ki nimaqil ri sacerdotes, xuquje' pa ki q'ab' ri tijonelab' re ri Pixab'. Kákiq'at k'u na tzij pa nu wi' chi kinkāmisax na. ¹⁹ Kinkijach k'u na pa ki q'ab' ri nik'iaj winaq chik, káketz'b'ej na nu wäch, kinkich'ay na, kinkirip k'u na cho ri cruz. Kink'astaj k'u na chkixol ri kāmīnāqib' churox q'ij, —xcha ri Jesús chke ru tijoxelab'.

Ri xuta' ri ki nan ri tat Jacobo, ri tat Juan

²⁰ Te k'u ri' xegeb' ru k'ojol ri tat Zebedeo ruk' ri Jesús. E are' ri tat Jacobo, ri tat Juan, kachi'l ri ki nan. Ri ki nan xxuki chuwäch ri Jesús chuta'ik jun toq'ob' che. ²¹ Ri Jesús xuta' che: ¿Jas kaj la, nan? —xcha che.

Ri chichu' xub'ij: Aretaq kächaplej taqanik la pa ki wi' ri winaq, kwaj chi káya la chke ri kieb' wal chi keku'b'i uk' la, ri jun pa wikiäq'ab' la, ri jun chik pa ri moxq'ab' la, —xcha che.

²² Xub'ij k'u ri Jesús chke: Ri ix man kich'ob' taj jas u wäch toq'ob' ri tajin kita' chwe. ¿A kixkowinik kich'ij ri k'äx ri kinriq na in, kitij iwe ri k'o pa ri vaso ri kintij wi na we? ¿A kixkowinik káb'an na i qasna' ix jas ri qasna' ri káb'an na chwe in? —xcha che.

Xkib'ij k'u che: Kujkowinik, —xecha che.

²³ Xub'ij ri Jesús chke: Qas tzij kiriq na k'äx, kitij k'u na iwe ri k'o pa ri vaso ri kintij na we in, xuquje' káb'an na i qasna' jas ri káb'an na chwe in. Are k'u ri t'uuyem pa ri nu wikiäq'ab' o pa ri nu moxq'ab', man kuya' taj kinya in chiwe, xane are wa' kech ri e cha'tal rumal ri nu Tat chi ket'uui pa taq ri t'uuyulib'al ri', —xcha che.

²⁴ Aretaq ri lajuj tijoxelab' chik xkita u b'ixik ronojel wa', xpe koyowal ri e are' chrij ri tat Jacobo, ri tat Juan. ²⁵ Xeusik'ij k'u ri Jesús, xub'ij chke: Ri ix iwetam chi ri winaq ri yo'm chke chi ketaqan pa ki wi' ri nik'iaj winaq chik, kākina' chi qas k'o ki chuq'ab' pa ki wi'. Ri ki nimaqil ri winaq k'ut ketaqan pa ki wi', —xcha che. ²⁶ Man je' tā k'u wa' ri ix. Xane apachin chiwe ri kraj chi nim kil wi, rajwaxik chi kok na che patānil ke konojel. ²⁷ Apachin chiwe ri kraj kok che i nimal, rajwaxik chi kok na che patānil ke ri nik'iaj chik. ²⁸ Are je ri', rumal chi ri in, in ri' ri Ralk'ual ri Dios ri Qas Winag, man in petinaq taj rech kinpatānixik, xane rech kinpatānin chke nik'iaj chik, xuquje' rech kinya ri nu k'aslema che tojb'al re ri ki torik k'ia winaq, —xcha ri Jesús chke ru tijoxelab'.

Ri Jesús keukunaj kieb' moyab'

²⁹ Aretaq ri Jesús tajin kel b'i pa ri tinimit Jericó e rachi'l ru tijoxelab', e k'ia winaq xeteri b'i chrij. ³⁰ E k'o k'u kieb' achijab' moyab' t'uuyul chi' ri b'e. Xkito chi ri Jesús tajin kok'ow chila', xkiraq ki chi', xkib'ij che

ri Jesús: ¡Tat, lal ri' ralk'ual kan ri qa mam David, toq'ob'isaj la qa wäch! —xecha che.

³¹ Ri winaq xa xekiyajo, xkib'ij chke chi chkitz'apij u pa ki chi'. Are k'u ri e are' man xkita taj, xane sib'alaj ko chi na xkiraq ki chi', xkib'ij: ¡Tat, lal ri' ralk'ual kan ri qa mam David, toq'ob'isaj la qa wäch! —xecha che.

³² Xtak'i k'u ri Jesús. Xeusik'ij ri kieb' moyab', xuta' chke: ¿Jas kaj alaj chi kinb'an chech alaq? —xcha che.

³³ Ri moyab' xkib'ij: Tat, káqaj kujka'yik, —xecha che.

³⁴ Te ri' ri Jesús xutoq'ob'isaj ki wäch, xuchap k'u koq ri ki waq'äch. Chanim k'ut xekowinik xeka'yik, xeb'e' k'u ruk' ri Jesús.

21

Kok ri Jesús pa ri tinimit Jerusalén

¹ Aretaq naqaj chik e k'o wi che ri tinimit Jerusalén, xeopan pa ri alaj tinimit Betfagé. Tajin keok'ow chuwäch ri Ujuyub'al Olivos. Ri Jesús xeutaq b'i kieb' chke ru tijoxelab'.

² Xub'ij b'i chke: Jix pa ri alaj tinimit ri k'o apan chqawäch. Chila' kiriq wi na jun ati't burro yuquulik, rachi'l jun alaj burro. Chikira', cheik'ama k'u loq chwe, —xcha che. ³ We k'o jachin jun k'o jas kub'ij chiwe, chib'ij che chi xa kajwataj che ri Qajaw Jesús, chanim k'ut kutzelej chi na loq, —kixcha che.

⁴ Je' xb'antaj wa' rech qas je' kelik jas ri xutz'ib'aj kan ri q'alajisal re ru Loq' Pixab' ri Dios ri kub'ij:

⁵ Chib'ij chke ri winaq re ri tinimit Jerusalén ri k'o puwi' ri juyub' Sión: “¡Chiwilampe! Ri Nimalaj i Taqanel petem re iwuk'.

Man nim tā u b'anik u b'anom che rib', xane kiejeninaq chrij jun burro.

Chrij ri alaj ral jun burro

kiejeninaq wí,”
—kácha ri'.

⁶ Xeb'e' k'u ri kieb' tijoxelab', je' xka'no jas ri xetaq wi b'i rumal ri Jesús. ⁷ Xkik'am loq ri ati't burro rachi'l ri ral. Xkiya k'u ri ki q'u' chrij, xkiejen k'u ri Jesús. ⁸ E k'ia k'u ri winaq xkilik' ri ki q'u' pa ri b'e, xuquje' e k'o nik'iaj chik ri xekiya u xaq taq che' pa ri b'e ri xekich'upala pa taq ri juyub'. ⁹ Ri winaq ri e nab'ejinaj chuwäch ri Jesús, xuquje' ri e teretoj chrij, ko xech'awik, xkib'ij: ¡Chnimarisax u q'ij ri ralk'ualaxik ri qa mam David ri nim taqanel! ¡Utz re ri petinaq pa ru b'i' ri Qajaw Dios! ¡Chnimarisax u q'ij ri Dios! —xecha'.

¹⁰ Aretaq xok ri Jesús pa ri tinimit Jerusalén, konojel ri winaq xkitukij kib', xkitatab'ala chb'il taq kib', xkib'ij: ¿Jachin wa' we achi ri? —xecha'.

¹¹ Ri winaq xkib'ij: Are wa' ri Jesús, ri q'alajisal re ru Loq' Pixab' ri Dios, ri aj Nazaret re Galilea, —xecha'.

Ri Jesús kujosq'ij ri nimalaj rachoch Dios

¹² Te k'u ri' xok b'i ri Jesús pa ri nimalaj rachoch Dios, xeresax b'i ri ajk'ayib' xuquje' ri kekiloq' taq jastaq pa ri nimalaj rachoch Dios. Xeutzag ri ki mesa ri k'exal taq puaq xuquje' xeutzag ri ki tem ri ajk'ay taq palomäx. ¹³ Xub'ij chke ri winaq: Tz'ib'tal pa ru Loq' Pixab' ri Dios, kub'ij: “Ri wachoch in are jun ja ri káb'an wi orar,” —käch'a'. Ri alaq k'ut jun kachoch elaq'omab' b'anom alaq che, —xcha chke.

¹⁴ Chila' pa ri nimalaj rachoch Dios, xeopan jujun achijab' moyab' ruk' ri Jesús, xuquje' jujun ch'okojib'. Xekunax k'u rumal ri Jesús. ¹⁵ Aretaq k'ut ri ki nimaqil ri sacerdotes xuquje' ri tijonelab' re ri Pixab', xkil taq ri kajmab'al ri xub'an ri Jesús, xuquje' xkito chi ri ak'alab' kākiraq ki chi' pa ri nimalaj rachoch Dios, kākib'ij: “jNim u q'ij ri ralk'ual kan ri nim taqanel David ojer!” —kecha'. Ri e are' xpe koyowal. ¹⁶ Xkib'ij k'u che ri Jesús: ¿A kätä la jas ri tajin kākib'ij ri ak'alab'? —xecha che.

Ri Jesús xch'awik, xub'ij chke: Je', kinto, —xcha chke. ¿A mat sik'im pu alaq ri tz'ib'tal pa ru Loq' Pixab' ri Dios? Je wa' kub'ij: Xya la chke ri ak'alab',

chke ri alaj taq ak'alab' ri ketu'nik chi qas tzij kākib'ixoj b'ix ri kuya u q'ij ri Dios, —käch'a', —xcha chke.

¹⁷ Xe' k'u ri Jesús, xeuya kan ri ki nimaqil sacerdotes xuquje' ri tijonelab' re ri Pixab'. Xel b'i pa ri tinimit Jerusalén, xe' pa ri tinimit Betania. Chila' k'ut xkanaj kan che ri chaq'ab'.

Ri Jesús kuyaj ru che'al higos ri man k'o tä u wäch

¹⁸ Aq'ab'il aretaq tajin ketzelej b'i pa Jerusalén, e petinaq pa ri tinimit Betania, xnum k'u ri Jesús. ¹⁹ Xril apan jun u che'al higos ri k'o chuchi' ri b'e. Xerila, man k'o tä k'u u wäch xuriqo, xane xaq xuwi u xaq. Xub'ij k'u ri Jesús che ri che': jMan k'o tä chi jumul chik kāk'oji a wäch! —xcha che.

Chanim k'ut xchaq'jar ru che'al higos. ²⁰ Ru tijoxelab' ri Jesús aretaq xkil wa' sib'alaj xkikajmaj. Xkita' k'u che ri Jesús: ¿Jas che chanim xchaq'jar ru che'al higos? —xecha che.

²¹ Ri Jesús xch'awik, xub'ij chke: Qas tzij kinb'ij chiwe, we qas kixkojonik, man kub'an tä k'u kieb' i k'ux, man xuwi tä wa' kixkowin chub'anik jas ri xinb'an in che ru che'al higos. Xane kuya' kib'ij che we juyub' ri': “Chatel b'i waral, chak'iaqab' i awib' pa ri mar,” —kixcha che. Káb'antaj k'u na wa', —xcha chke. ²² Ronojel k'u ri kita' che ri Dios

käya'taj na chiwe we qas kixkojonik, —xcha chke.

K'o taqanik pu q'ab' ri Jesús

²³ Ri Jesús xok pa ri nimalaj rachoch Dios. Aretaq tajin keutijoj ri winaq chila', ri ki nimaqil sacerdotes, xuquje' ri ki nimaqil ri winaq aj Israel xeopan ruk', xkita' che: ¿Jachin xtaqow la chi káb'an la ronojel wa' we ri'? ¿Jachin lo ri yo'winaq che la chi je' káb'an la wa'? —xecha che.

²⁴ Ri Jesús xch'awik, xub'ij chke: Ri in xuquje' k'o ri kinta' chech alaq. We kākowin alaq chub'ixik chwe jas ri kinta', kinb'ij na chech alaq jachin ri yo'winaq chwe chi k'o nu taqanik rech je' kinb'an wa', —xcha chke. ²⁵ B'ij alaq chwe: ¿Jachin xtaqow ri tat Juan chub'anik ri qasna? ¿A are ri Dios o e are ri winaq? —xcha chke.

Xkichaplej k'u u tzijob'exik kib', xkib'ij: We kākab'ij chi are ri Dios xtaqowik, kub'ij na chqe: “¿Jas k'u che man xkojon tä alaq che?” —käch'a na. ²⁶ We kākab'ij chi e are ri winaq xtaqowik, kākaxej qib' chkiwäch ri winaq. Konojel k'u ri winaq kākikoj chi ri tat Juan are jun q'alajisal re ru Loq' Pixab' ri Dios, —xecha'.

²⁷ Rumal wa' xkib'ij che ri Jesús: Man getam taj, —xecha che.

Ri Jesús xch'awik, xub'ij chke: Man kinb'ij tä k'u in chiwe jachin yo'winaq chwe chi kinb'an wa' we ri', —xcha chke.

Waral kākil wi ri k'utb'al chkiy ri kieb' u k'ojol jun achi

²⁸ Ri Jesús xub'ij chke ri tata'ib' fariseos: ¿Jas kächomaj alaq che wa' ri kinb'ij chech alaq ri'? K'o jun achi ri e k'o kieb' u k'ojol. Xub'ij k'o che jun chke ru k'ojol: “Nu k'ojol, jat kāmik pa ri nu chak che ki mulixik ru wäch taq ri uvas,” —xcha che. ²⁹ Ri ala xub'ij che ru tat: “jMan k'o tä kine' wi in!” —xcha che. Te k'u ri' xuk'ex ru chomanik, xe' na che ri chak. ³⁰ Ri tata' xe' chi ruk' ri jun u k'ojol chik, xub'ij che: “Jat kāmik pa ri nu chak che ki mulixik ru wäch taq ri uvas,” —xcha che. Ru k'ojol xub'ij che: “Je', tat, utz ri' kine'k,” —xcha che. Man xe' tä k'ut. ³¹ ¿Jachin k'u chke we kieb' ri' xub'ano jas ri xraj ru tat chi káb'anik? —xcha ri Jesús chke ri tata'ib' fariseos.

Ri e are' xkib'ij: Are ri xtaq nab'e, —xecha che ri Jesús.

Xub'ij ri Jesús chke: Qas tzij ri kinb'ij chech alaq chi ri toq'il taq alkab'al, xuquje' ri itzel taq ixoqib' nab'e keb'ok na chuwäch alaq chkixol ri winaq ri kätapan ri Dios pa ki wi', —xcha chke. ³² Je ri', rumal chi ri Juan Qasal Ja' xpetik, xuk'ut chuwäch alaq jas káb'an alaq rech jikom ri k'aslemal alaq cho ri Dios, man xkoj tä k'u alaq ru tzij. Are k'u ri toq'il taq alkab'al, xuquje' ri itzel taq ixoqib' xkikojo. Are k'u ri alaq, pune xil

alaq wa' ri xka'n ri e are', man xk'ex tä ri anima' alaq, man xk'ex tä k'u ri chomanik alaq. Man xkoj tä alaq ri xub'ij ri tat Juan Qasal ja' chech alaq, —xcha ri Jesús chke ri tata'ib' fariseos.

Waral kâqil wi ri k'utb'al chkiy ri ajchakib'ri man e utz taj

³³ Tatab'ej b'a' alaq we jun k'utb'al chik ri', —xcha chke. K'o jun achi ri xub'an jun tikb'al uvas, xukoralij rij, te k'u ri' xuk'ot jun jul ri kâpitz' wi ri uvas, xub'an xuquje' jun tak'atikalaj ja ri kâkoj che chajib'al re ronojel.

Xuya k'u kan pa qajomal chke jujun achi-jab', te ri' xe' ri are' naj pa jun tinimit chik. ³⁴ Xopan k'u ri q'ij ri xechâq'aj ri ki wäch ri uvas, ri ajchaq'el xeutaq b'i jujun patänil taq re kuk' ri ajchakib' chuk'amik re ri ki wäch ri uvas. ³⁵ Are k'u ri ajchakib' xekichap ri patäninelab', jun xkich'ayo, jun xkikâmisaj, jun chik k'ut xka'n chab'aj. ³⁶ Ri ajchaq'el ri ulew xeutaq chi b'i nik'iaj taqo'n chik. E k'ia chi na ri xeutaq b'ik chuwäch ri nab'e. Ri ajchakib' k'ut je' xka'n chke jas ri xka'n chke ri nab'e taq taqo'n.

³⁷ Chuk'isb'al ronojel xutaq b'i ri u k'ojol, xuchomaj k'ut: "Qas nim kâkil wi na ri nu k'ojol," —xcha'. ³⁸ Aretaq k'ut ri ajchakib' xkil ru k'ojol ri tata', xkitzijob'ela kib', xkib'ij: "Are wa' ri kechb'en na ronojel. Jo', qakâmisaj rech kâq'ax kan ronojel ri ulew pa qa q'ab' uj," —xecha'. ³⁹ Xkichapo, xkesaj b'i pa ri tikb'al uvas, xkikâmisaj.

⁴⁰ Te k'u ri' ri Jesús xuta' chke, xub'ij: Aretaq kâpe ri ajchaq'el ri ulew tikb'al uvas, ¿jas kub'an na chke ri ajchakib'? —xcha chke.

⁴¹ Ri e are' xkib'ij che ri Jesús: Man ku-toq'ob'isaj tä na ki wäch, keukâmisaj na ri itzel taq ajchakib' ri', kuya k'u na ri tikb'al uvas chke nik'iaj chik, ri kâkijach ru wäch ri tiko'n aretaq kuriq ri q'ij, —xecha che.

⁴² Xub'ij k'u ri Jesús chke: ¿A mat sik'im alaq wa' we tzij ri' pa ru Loq' Pixab' ri Dios? Je wa' kub'ij:

Ri ab'aj ri man xkaj tä ri yakal taq ja, are ab'aj wa' xkoj che toq'eb'al re ri ja.

Je b'anom wa' rumal ri Qajaw Dios.

Qas kajmab'al k'u wa' chqawäch, —kâcha', —xcha ri Jesús chke ri tata'ib' fariseos. ⁴³ Rumal ri' kinb'ij chech alaq chi ri Dios man kâtaqan tä chi na puwi' alaq, xane ri Dios are kâtaqan na pa ki wi' ri winaq ri utz kâka'n che ri ki chak, ri kâkijach kuenta cho ri Dios aretaq kuriq ri q'ij. ⁴⁴ Are k'u we k'o jun kâztaq puwi' ri ab'aj, kâq'aj na. We k'u ne are ri ab'aj kâztaq puwi' jun winaq, kâk'âjisax na rumal ri ab'aj, —xcha chke.

⁴⁵ Aretaq ri ki nimaqil ri sacerdotes xuquje' ri tata'ib' fariseos xkita wa', xkich'ob'o chi chkiy ri e are' xutzijoj wi wa'

we k'utb'al ri'. ⁴⁶ Xkaj xkichap ri Jesús. Xkixej k'u kib' chkiwäch ri winaq, rumal chi ri winaq xkikojo chi ri Jesús are jun q'alajisal re ru Loq' Pixab' ri Dios.

22

Waral kâqil wi jun k'utb'al chrij ri k'ulanem

¹ Jumul chik ri Jesús xuchaplej ki tzi-job'exik ri winaq kuk' taq k'utb'al, xub'ij chke: ² Ru taqanik ri Dios pa ki wi' ri winaq, junam ruk' jun nim taqanel ri xub'an jun nimaq'ij che ru k'ulanem ru k'ojol. ³ Xeutaq b'i ri patänil taq re che ki sik'ixik loq ri winaq ri e sik'im pa ri k'ulanem, man xkaj tä k'u ri winaq xepetik. ⁴ Ri tata' xeutaq chi b'i nik'iaj chik patänil taq re, xub'ij b'i chke: "Chib'ij chke ri winaq ri e sik'im chi xutzir ri wa. Xintaqan che ki kâmisaxik ri nu wakâx, ri awaj ri e nu q'ob'sam xepilitajik. Ronojel ri ulab'al k'o chik, sa'j alaq pa ri k'ulanem," —kixcha chke. ⁵ Are k'u ri winaq ri xesik'ix che ri k'ulanem man xeb'ok tä il che ri xub'ij ri nim taqanel. Xaq xkitzujuk jas xka'no. Jun xe' chusolixik ri rulew, jun chik xe' che k'ayinik. ⁶ Ri nik'iaj chik xekichap ri u taqo'n ri nim taqanel, xka'n k'âx chke, xekikâmisaj. ⁷ Ri nim taqanel sib'alaj xpe royowal, xeutaq k'u b'i ru soldados che ki kâmisaxik ri winaq ri xekâmisax na taqo'n. Xtaqan che ru poroxik ri ki tinimit. ⁸ Xub'ij k'u chke ri patänil taq re: "Ronojel ri kajwataj che ri k'ulanem k'o chik, are k'u ri winaq ri xeqasik'ij che ri k'ulanem man taqal tä chke chi kepetik. ⁹ Rumal ri' jix pa taq ri nim b'e, cheisik'ij loq konojel ri winaq ri keirigo rech kepe pa ri k'ulanem," —xcha chke. ¹⁰ Ru taqo'n xeb'el b'i che ki tzukuxik ri winaq pa taq ri b'e. Xekimulij k'u loq konojel ri xekirigo, ri e utz xuquje' ri man e utz taj. Xnoj k'u ri ja kumal ri winaq.

¹¹ Xok b'i ri tata' che kilik konojel ri xesik'ix pa ri k'ulanem. Xril k'u jun achi chki-xol ri winaq ri man u kojom tä atz'iaq re k'ulanem. ¹² Xub'ij che: E k'u ri at, "¿Jas che xatok loq waral we man k'o tä awatz'iaq re k'ulanem?" —xcha che. Ri achi man k'o tä jas xub'ij. ¹³ Ri nim taqanel xub'ij chke ri ke'ilow ri mesa: "Chiyutu ri raqan u q'ab'. Jik'läqa kan chrij ja pa ri q'equm. Chila' k'ut koq' wi na, kuquch'uch'ej na ru ware," —xcha chke. ¹⁴ E k'ia k'u ri e sik'im, xaq k'u e kieb' oxib' ri e cha'talik, —xcha chke.

Waral kâqil wi ru tojik ri alkab'al

¹⁵ Xeb'e' k'u ri tata'ib' fariseos, xkitala ki no'j, xjunamataj k'u ki chomanik rech kâkik'ot u chi' ri Jesús xaq rech kuya' kâkib'ij chi k'o u mak. ¹⁶ Rumal ri' xekitaq b'i jujun chke ri kachi'l junam kuk' nik'iaj chik ri e rachi'l ri tat Herodes chub'ixik che ri Jesús: Ajtij, qetam chi jikom ri anima' la,

xuquje' chi kāk'ut la ru b'eyal ru rayib'al ri Dios chkiwäch konojel ri winaq. Man kächej tä ib' la chkiwäch ri winaq, pune k'o jas kākichomaj chij la, rumal chi man nim tä kil la jun winaq chuwäch ri jun chik. ¹⁷ B'ij b'a' la chqe jas ri kächomaj la: *Ǿ* taqal chqe kāqatoj alfab'al che ri César o man taqal taj? —xecha che.

¹⁸ Ri Jesús xretamaj k'ut ri itzel taq ki chomanik, xub'ij chke: Xaq kieb' wäch alač, *Ǿ* jas che kätä' alač wa' chwe? *Ǿ* mat xa kaj alač chi kingaj pa q'ab' alač? ¹⁹ K'amampe alač loč jun puaq chnuwäch ri kätobj'ex re ri alfab'al, —xcha che.

Xkik'am k'u loč ri jun puaq. ²⁰ Aretaq ri Jesús xrilo, xub'ij chke: *Ǿ* jachin ajchač'el we kayeb'al ri', xuquje' we b'taj ri' ri tz'ib'tal chuwäch? —xcha che.

²¹ Ri e are' xech'awik, xkib'ij: Are rech ri César, —xecha che.

Xub'ij k'u ri Jesús chke: Ya b'a' alač che ri César ri rech ri César. Ya k'u alač che ri Dios ri rech ri Dios, —xcha che.

²² Aretaq ri tata'ib' fariseos xkita ri xub'ij ri Jesús chke, sib'alaj xkikajmaj u wäch. Xkiya k'u kanoč, xeb'e'k.

Ri tata'ib' saduceos kākita' che ri Jesús chrij ri ki k'astajib'al ri kāmīnaqib'

²³ Pa ri q'ij ri' xepan jujun tata'ib' saduceos ruk' ri Jesús. Ri tata'ib' ri' kākib'ij chi man kek'astaj tä chi na ri kāmīnaqib'. Xkita' k'u che ri Jesús, xkib'ij: ²⁴ Ajtij, b'im kan chqe rumal ri qa mam Moisés chi we kākām jun achi, kākānāj kan ri rixōqil pa malka'nīl, man k'o tä k'u kan ralk'ual ruk', rajwaxik chi ri rachalal chač'axel ri k'o kanoč kāk'uli ruk' ri ixōq ri malka'n rech kek'oji ralk'ual ruk'. Ri ak'alab' ri' e je' ta ne rech ri kāmīnač. ²⁵ Chqaxol uj je' xk'ulmataj wa': Kek'oji wuqub' achijab' kachalal kib'. Ri nab'eal xk'uli'k, xkām k'ut. Man k'o tä ralk'ual xk'oji kan ruk' ri rixōqil, xa je' ri xkanāj kan ri malka'n ixōq che rixōqil ri chač'axel rachalal. ²⁶ Je' xk'ulmataj xuquje' ruk' ri ukab', ri uroχ rachalal, k'ä xek'is na ri wuqub' achalaxik. ²⁷ E kāmīnač chik konojel, xkām k'u b'i ri ixōq. ²⁸ Aretaq k'ut kek'astaj na ri kāmīnaqib', *Ǿ* jachin chke wa' we wuqub' achijab' ri' kāk'amow ri ixōq che rixōqil? Xk'oji k'u che kixōqil ri wuqub', —xecha che.

²⁹ Ri Jesús xch'awik, xub'ij chke: Ri alač xa sachinač alač rumal chi man etam tä alač ru Loč Pixab' ri Dios ri Tz'ib'talik, man etam tä k'u alač ru chuč'ab' ri Dios. ³⁰ Aretaq ri kāmīnaqib' kek'astajik, man kek'uli tä chik, man kākīya tä k'u ri kalk'ual che k'ulanem, xane xaq e junam chik kuk' ri ángeles rech ri Dios ri e k'o chila' chikaj, —xcha chke. ³¹ Chrij k'u wa' chi kek'astaj na ri kāmīnaqib', k'o na ri kwaj kinb'ij chech alač: *Ǿ* mat

sik'im alač ri kub'ij wi ri Dios? Je wa' kub'ij: ³² “In ri', in ru Dios ri Abraham, ru Dios ri Isaac, ru Dios ri Jacob,” —kācha'. Ri qa Dios man are tä Dios kech ri kāmīnaqib', xane kech ri e k'ask'oj, —xcha ri Jesús chke ri tata'ib' saduceos.

³³ Aretaq xkita ri winaq wa' ri xub'ij ri Jesús, konojel sib'alaj xkikajmaj ru tijonik.

Ri Jesús kutzijoj ri taqanik ri nim na u b'anik

³⁴ Aretaq ri tata'ib' fariseos xkito chi ri saduceos xtz'apix u pa ki chi' rumal ri Jesús, ri e are' xkimulij kib'. ³⁵ Jun k'u chke ri fariseos are tijonel re ri Pixab'. Xopan k'u ruk' ri Jesús rech kuk'am u pu chi', xub'ij che: ³⁶ Ajtij, *Ǿ* jachike ri taqanik ri nim na u b'anik ri k'o pa ri Pixab'? —xcha che.

³⁷ Ri Jesús xub'ij che: “Sib'alaj chiwaj ri i Dios, ri Iwajaw, chijikib'a ri i k'ux, chijikib'a ri iwanima' chrij, chikojo ri i chomanik chub'anik wa',” —xcha che. ³⁸ Are wa' ri taqanik ri nim na u b'anik, ri nab'e chkiwäch konojel. ³⁹ Ri ukab' taqanik ri nim na u b'anik ri junam ruk' ri nab'e are wa': “Cheiwaj ri i wach winaq, jas ri ix kiwaj iwib’,” —xcha'. ⁴⁰ We kieb' taqanik ri' e are wa' ri qas u k'ux ronojel ri Pixab' ri xutz'ib'aj ri qa mam Moisés, xuquje' e are wa' u k'ux ri ki tijonik ri q'alajisal tač re ru Loč Pixab' ri Dios, —xcha che.

Ri Jesús kätzijon chrij ri ralk'ualaxik ri Cristo

⁴¹ K'ä ki mulim kib' ri tata'ib' fariseos. ⁴² Ri Jesús xuta' chke: *Ǿ* jas kächomaj alač chrij ri Cristo? *Ǿ* Ralk'ual jachinoč? —xcha chke.

Ri e are' xkib'ij: Ri Cristo are ralk'ual kan ri qa mam David ojer, —xecha che.

⁴³ Ri Jesús xub'ij chke: *Ǿ* jas k'u che ri qa mam David ojer rumal ri Loč'alaj Espiritu xub'ij Qajaw che ri Cristo? Xub'ij k'ut:

⁴⁴ Xub'ij ri Qajaw ri qa Dios che ri Wajaw: “Chatt'uyul pa ri nu wikiäq'ab', k'ä kinya na chawe chi katch'akanik, kattaqan k'u pa ki wi' konojel ri kākā'n ki k'ulel chawe,”

—xcha ri qa mam David. ⁴⁵ *Ǿ* jas ta ne che ri Cristo are ralk'ual kan ri David we ri qa mam David xub'ij Qajaw che ri Cristo? —xcha ri Jesús chke.

⁴⁶ Man k'o tä chi k'u jachin jun xkowinik xch'awik, xub'ij ta chi jun tzij che ri Jesús. Pa tač k'u ri q'ij ri' xetani'k, man k'o tä chi jachin jun k'o jas xuta' che ri Jesús.

23

Ri Jesús kub'ij chi ri winaq rajwaxik kākichajij kib' chkiwäch ri fariseos xuquje' chkiwäch ri tijonelab' re ri Pixab'

¹ Ri Jesús xub'ij chke ri winaq xuquje' chke ru tijoxelab': ² Ri tijonelab' re ri Pixab', xuquje' ri tata'ib' fariseos k'o taqanik pa ki

q'ab' chuq'alajisaxik ri Pixab' ri xutz'ib'aj ri qa mam Moisés. ³ Cheinimaj b'a', chib'ana k'u ronojel ri kākib'ij chiwe. Xuwi k'u mib'an iwe jas ri kākā'n ri e are', rumal chi jun wi ri kākib'ij, jun chi k'u wi ri kākā'no. ⁴ Ri taqanik ri kākīya are je' jas jun eqā'n ri sib'alaj al, ri man k'o tā jun kuch'ij ri ra'al. Kākaj k'ut chi kākīnimaj ri winaq. Ri e are' k'ut man k'o tā jub'iq' kākā'n che ki to'ik. ⁵ Ronojel ri kākā'no xaq rech kilitaj kumal ri winaq. Kāqaj chkiwāch kākīnak' paj taq tzij re ru Loq' Pixab' ri Dios cho ru krukil ri ki palaj xuquje' che ri ki q'ab' ri tz'ib'tal cho rab'arā'q taq wuj. Xuquje' kāqaj chkiwāch kākīkoj charchāq taq atz'iaq ri k'o retz'b'alil nimaq na chu wāch ri ke ri winaq. ⁶ Are kākitzukuj ri t'uuyulib'al ri nim ke'il wi na pa taq ri ula'nem, xuquje' ri t'uuyulib'al ri nimaq ki b'anik pa taq ri rachoch Dios. ⁷ Kākaj chi sib'alaj utz ki ch'ab'exik kāk'an kumal ri winaq pa taq ri b'e, xuquje' chi kāk'ix ajtij chke.

⁸ Are k'u ri ix mib'ano chi ri winaq kākib'ij ajtij chiwe. Iwonojel ri ix, iwachalal iwib', xa k'u jun ri Iwajtij k'olik, are ri Cristo. ⁹ Mib'an i tat che jun winaq cho ruwāchulew, xa k'u jun ri i Tat, are ri k'o chila' chikaj. ¹⁰ Mib'an che iwib' chkiwāch ri winaq chi ix k'amal taq ki b'e, xuwi k'u ri Cristo are K'amal i B'e. ¹¹ Jachin ri keupātānij konojel, are wa' ri nim na u b'anik chixol. ¹² Jachin ri nim kub'an che rib' man nim tā kil wi na. Jachin k'u ri man nim tā kub'an che rib' are ri' nim kil wi na.

¹³ K'āx ech alaq, tijonelab' re ri Pixab' xuquje' ri alaq tata'ib' fariseos! iXaq kieb' wāch alaq! Keq'atej alaq ri winaq rech man keb'ok tā chikxol ri winaq ri kātāqan ri Dios pa ki wi'. Xaq keq'atej alaq ri kākaj keb'okik, man kok tā k'u alaq xuquje'.

¹⁴ K'āx ech alaq, tijonelab' re ri Pixab' xuquje' ri alaq tata'ib' fariseos! iXaq kieb' wāch alaq! Kātoqij alaq ri kachoch ri malka'nib' taq ixoqib', te ri' kāyuq alaq u tza'm ri tzij alaq aretaq kāk'an alaq orar, rech man q'alaj tā ri etzelal ri kāk'an alaq. Rumal ri' nim na ri k'ājisab'al wāch alaq aretaq kāq'at na tzij pa ki wi' ri winaq.

¹⁵ K'āx ech alaq, tijonelab' re ri Pixab' xuquje' ri alaq tata'ib' fariseos! iXaq kieb' wāch alaq! Ri alaq kāwakat alaq cho ronojel ruwāchulew, kāq'ax alaq ch'āqāp che taq ri mar chuch'akik jun winaq ruk' ri tjonik alaq. Aretaq k'ut kākowin alaq chuch'akik, kāk'an alaq che chi taqalik ke' pa ri q'aq' nab'e chuwāch alaq.

¹⁶ K'āx ech alaq, ri alaq moyab' k'amal taq b'e! Ri alaq kāk'ij alaq: "We jun winaq kukoj ru b'i' ri nimalaj rachoch Dios pa ru tzij aretaq kub'an juramento, man qas rajwaxik tā ri' kub'ano jas ri xuchi'j u b'anik. Are k'u we kukoj pa ru tzij ri q'ān puq

ri kojom che ri nimalaj rachoch Dios, rajwaxik wi ri' kub'ano jas ri xuchi'j." —kācha alaq. ¹⁷ iXaq alaq kon, xaq alaq moyab'! iJachike nim na u b'anik: ri q'ān puq o ri nimalaj rachoch Dios ri kub'an nim u b'anik che ri q'ān puq? ¹⁸ Xuquje' kāk'ij alaq: "We jun winaq kukoj ri ta'b'al toq'ob' pa ru tzij aretaq kub'an juramento, man qas rajwaxik tā ri' kub'ano jas ri xuchi'j u b'anik. We k'u are kukoj ri sipanik ri k'o puwi' ri ta'b'al toq'ob' pa ru tzij, rajwaxik ri' kub'ano jas ri xuchi'j," —kācha alaq. ¹⁹ iXaq alaq kon, xaq alaq moyab'! iJachike ri nim na u b'anik: ri sipanik o ri ta'b'al toq'ob' ri kub'an sib'alaj loq' che ri sipanik? ²⁰ Jachin ri kukoj ri ta'b'al toq'ob' pa ru tzij, man xuwi tā ri ta'b'al toq'ob' ri' kukoj pa ru tzij, xane ronojel ri k'o puwi' ri ta'b'al toq'ob'. ²¹ Jachin ri kukoj ri nimalaj rachoch Dios pa ru tzij man xuwi tā ri nimalaj rachoch Dios ri' kukoj pa ru tzij, xane xuquje' ri Dios ri k'o chila'. ²² Xuquje' jachin ri kukoj ri kaj pa ri u tzij aretaq kub'an juramento, man xuwi tā kukoj ri je'lalaj u t'uuyulib'al ri Dios pa ru tzij, xane xuquje' ri Dios ri t'uuyul puwi'.

²³ K'āx ech alaq, tijonelab' re ri Pixab' xuquje' ri alaq tata'ib' fariseos! iXaq kieb' wāch alaq! Ri alaq kāya alaq che ri Dios ru lajujil ri q'eb'un, ri anis, ri comino, yo'm k'u kan alaq u b'anik ri tjonik ri nim u b'anik ri k'o pa ri Pixab'. Man kāk'an tā alaq ri jikomal, man kātōq'ob'isaj tā alaq ki wāch nik'iaj winaq chik, man qas tā kākōjon alaq che ri Dios. Are wa' ri rajwaxik kāk'an alaq, man kāya tā k'u kan alaq u b'anik ri nik'iaj chik. ²⁴ iRi alaq, xaq alaq moyab' k'amal taq b'e! Kāk'an ech alaq jas kub'an jun achi, man kraj taj kub'iq' b'i jun amalo. Je' ta ne chi kāk'iq' b'i alaq jun awaj camello.

²⁵ K'āx ech alaq, tijonelab' re ri Pixab' xuquje' ri alaq tata'ib' fariseos! iXaq kieb' wāch alaq! Utz kāk'an alaq chkiwāch ri winaq xaq rech utz kil wi alaq kumal. Qas tzij k'ut kelaq'an alaq, kārayij alaq ri kech nik'iaj winaq chik. Je' ri b'anik alaq jas ri laq ri xuwi ch'ajtal ri rij, are k'u ru pam tz'il na. ²⁶ Alaq moyab' taq fariseos. Are rajwaxik nab'e kāk'aj ru pam ri vaso xuquje' ri plato, te k'u ri' kāk'aj ri rij.

²⁷ K'āx ech alaq, tijonelab' re ri Pixab' xuquje' ri alaq tata'ib' fariseos! iXaq kieb' wāch alaq! Junam alaq kuk' ri muqub'al ke taq ri kāmīnaqib' ri tz'ajom ri rij che chun. Rumal ri' sib'alaj je'l kelik. Are k'u ru pam nojinaq che ki b'aqil taq kāmīnaqib', xuquje' nojinaq che ronojel chulaj tz'ilol. ²⁸ Je ri' ri alaq. Utz kel alaq chkiwāch ri winaq. Are k'u ri anima' alaq sib'alaj man utz taj, xaq k'u kieb' u wāch ri kāk'an alaq.

²⁹ K'āx ech alaq, tijonelab' re ri Pixab' xuquje' ri alaq tata'ib' fariseos! iXaq kieb' wāch alaq! Ri alaq kāk'an alaq ki b'anik ri

muqub'al kech ri q'alajisal taq re ru Loq' Pixab' ri Dios ojer. Kāwīq alaq ri muqub'al kech ri winaq ri utz xka'no. ³⁰ Kāb'ij k'u alaq: "We ta xujk'oji kan pa ri ki q'ijol ri qa nan qa tat ojer, mat xujtob' ri' che ki kāmīxaxik ri q'alajisal taq re ru Loq' Pixab' ri Dios ojer," —kācha alaq. ³¹ Ruk' wa' we kāb'ij alaq ri', kāq'alajisaj ib' alaq chi alaq kachalaxik kan ri winaq ri xekāmisan ri q'alajisal taq re ru Loq' Pixab' ri Dios. ³² iXaq tajin kāk'is alaq u b'anik ri xkichaplej kan u b'anik ri nan tat alaq ojer!

³³ iAlaq kumätz! iItzel taq winaq! iAlaq kal taq kumätz! iJachin ta lo ri kätow alaq chuwach ri k'ājisab'al wāchaj re ri q'aq'? ³⁴ Rūmal ri' keintaq na loq q'alajisal taq re ru Loq' Pixab' ri Dios uk' alaq, keintaq na loq achijab' ri k'o ki no'j xuquje' tijonelab'. Are k'u ri alaq kekāmīxaj na alaq, kerip na alaq jujun chke cho ri cruz. Jujun chik kech'ay na alaq pa taq ri rachoch Dios. Jujun chik kāb'an alaq k'āx chke je ri' chi rajwaxik keanimaj na b'i pa taq ri tinimit. ³⁵ Rūmal ri' alaq ajchaq' mak che ri ki kāmīkal konojel ri utzalaj taq winaq ri e kāmīsam. Xchap-taj loq ruk' ri Abel ri ala ri jikom ranima' k'ā ruk' ri Zacarías ru k'ojol ri Berequías ri xkāmīxaj alaq chkixol ri rachoch Dios ruk' ri ta'b'al toq'ob'. ³⁶ Qas tzij kinb'ij chech alaq chi ronojel wa' we mak ri' kāqaj na pa ki wi' ri winaq kāmīk, —xcha ri Jesús chke ri tijonelab' re ri Pixab' xuquje' ri fariseos.

Ri Jesús kāroq'ej ki wāch ri winaq pa ri tinimit Jerusalén

³⁷ iAy, winaq aj Jerusalén! iIx ri' ri keikāmīxaj ri q'alajisal taq re ru Loq' Pixab' ri Dios, keib'an che ab'aj ru taq'o'n ri Dios! iK'ia mul nu rayim i mulixik iwonojel ri ix jas kub'an jun ati't ek' keumulij ri alaj taq ral chuxe' ru xik'! iRi ix k'ut man xiwaj taj! ³⁸ Xaq b'a' chiwila na kāwonob'ax na kan ri iwachoch. ³⁹ Kinb'ij k'u chiwe chi man kiwil tā chi na nu wāch k'ā kopan na ri q'ij aretaq kib'ij: "Nim u q'ij ri petinaq pa ru b'i' ri Qajaw Dios," —kixcha na, —xcha ri Jesús chke.

24

Ri Jesús kuq'alajisaj chi kāwulix na ri nimalaj rachoch Dios

¹ Xel loq ri Jesús pa ri nimalaj rachoch Dios, b'enam re aretaq xeqeb' ru tijoxelab' ruk', xkichaplej u k'utik taq ri ja re ri nimalaj rachoch Dios chuwach. ² Xch'aw k'u ri Jesús, xub'ij chke: iA kiwil we nimaq taq ja ri? Qas tzij ri kinb'ij chiwe chi man kākanaj tā k'u kan jun ab'aj puwi' jun ab'aj chik. Ronojel kāwulix na, —xcha chke.

Ri Jesús kutzijoq taq ri etal re ri k'isb'al taq q'ij

³ Xe' k'u ri Jesús e rachi'l ru tijoxelab' puwi' ri Ujuyub'al Olivos. T'uyl k'u ri Jesús chila', ru tijoxelab' xeopan ruk', xkib'ij che pa u tukiel wi: Kāqaj chi kāb'ij la chqe, iJampa' kāb'antaj na wa'? iJas u wāch etal kāb'antaj na chuk'utik chqawāch chi xopan ri q'ij re ri petb'al la xuquje' ri k'isb'al re ruwāchulew? —xcha chke.

⁴ Ri Jesús xub'ij chke: Chichajij iwib', k'o jachin jun mixsub'uwik, —xcha chke. ⁵ E k'ia k'ut ri kepe na, kākikoj na ri nu b'i', kākib'ij: "In ri' ri Cristo," —kecha na. E k'ia winaq k'ut ri kesub'taj na kumal, —xcha chke. ⁶ Ri ix kita na chi tajin kāb'an nimalaj ch'oj, kita na ki tzijoxik taq ch'oj jawije' taq chi', mixej k'u iwib'. Rajwaxik chi je' kāb'antaj na wa', k'ā māja' k'u ri k'isb'al. ⁷ Kāb'ojin k'u na ri jun tinimit ruk' ri jun tinimit chik, xuquje' käch'ojin na jun nim taqanel ruk' jun nim taqanel chik. Kāpe na wi'jal, kāpe na nimaq taq yab'il, kepe na k'ia kāb'raqan jawije' taq chi'. ⁸ Xaq k'u chapleb'al wa' re ronojel ri k'āx ri kāpe na pa ki wi' ri winaq.

⁹ Kixjach k'u na chkiwāch ri q'atal taq tzij rech kāb'an k'āx chiwe, kixkāmīxax na. Konojel ri winaq kāketzelay na i wāch xa rumal wech in. ¹⁰ Pa taq ri q'ij ri' e k'ia ri kub'an na kieb' ki k'ux chwij. Kāketzelay na kib' chb'il taq kib', kākijachala na kib' pa kāmīxaxik. ¹¹ E k'ia ri kepe na ri xaq e b'anal taq tzij, kākib'ij chi e q'alajisal taq re ru Loq' Pixab' ri Dios, e k'ia k'u ri winaq ri kekisub' na. ¹² Sib'alaj kāmīnar na ri etzelal. Je ri' chi e k'ia winaq man kākaj tā chi na kib'. ¹³ Jachin k'u ri kuch'ij ri k'āx k'ā kāk'is na ronojel, kuriq na ru tob'anik ri Dios. ¹⁴ Kātzijox k'u na ri Utzalaj Tzij re ri Evangelio chrij ru taqanik ri Dios cho ronojel ruwāchulew chke konojel ki wāch winaq, te k'u ri' kāpe na ri k'isb'al.

¹⁵ Ri qa mam Daniel, jun chke ri q'alajisal taq re ru Loq' Pixab' ri Dios, xutz'ib'aj ojer chrij ri itzel away ri ketzelan na ronojel. (Jachin ri kusik'ij wa' ri tz'ib'tal waral, chuch'ob'o' jachin ri' ri away ri kub'ij chi'.) Kiwil na wa' kāk'oji chila' pa ri loq'alaj k'olib'al jawije' ri man ya'tal tā wi chi k'olik. ¹⁶ Rajwaxik chi ri winaq ri e k'o pa Judea keanimaj b'i pa taq ri juyub'. ¹⁷ Ri winaq ri k'o puwi' ri rachoch, aninaq chqaj loq, mok chi b'i chupam ri ja chuk'amik b'i jas jun jasach. ¹⁸ Xuquje' ri winaq ri k'o pa ri juyub', mātzelej chi b'i cho ja chuk'amik b'i ri ratz'iaq. ¹⁹ iSib'alaj k'āx ke ri ixoqib' ri yawab' taq winaq chik pa taq ri q'ij ri', xuquje' ri k'o alaj taq kal ri k'ā ketu'nik! ²⁰ Chib'ana b'a' orar, chita' che ri Dios chi māk'ulmataj ronojel wa' pa u q'ijol ri tew, xuquje' chi mat kāb'antaj wa' pa ri q'ij re uxlanem. ²¹ Kāpe k'u na nimalaj k'āx'ol pa taq ri q'ij ri', ri man k'o tā jumul u

b'anom wa' tzare chi' xchaplex loq ru b'anik ruwächulew rumal ri Dios, k'à kàmik. Te k'u ri' man käpe tä chi na nimalaj k'äxk'ol junam ruk' ri k'äxk'ol ri'. ²² We ta ri Qajaw Dios man kub'ano chi xaq q'atatal q'ij kāk'oji we k'äxk'ol ri', mat k'o jun winaq ri' ri kāk'asi kanoq. Ri Dios k'ut u b'anom chi xaq q'atatal q'ij kāk'oji wa' we k'äxk'ol ri' rumal chi keraj ri e cha'tal rumal ri Are', —xcha chke.

²³ We k'u k'o jun ri kub'ij chiwe: "Chiwilampe', k'o ri Cristo chi ri'," we kub'ij: "Chiwilampe', k'o jela'," —kacha chiwe, mikojo ri kub'ij. ²⁴ Kepe k'u na winaq ri kāk'a'n che kib' chi e Cristo, xuquje' kepe na jule' chik ri kāk'a'n che kib' chi e q'alajisal taq re ru Loq' Pixab' ri Dios. Kāk'a'n na nimaq taq etal, xuquje' nimaq taq kajmab'al che ki sub'ik ri winaq, xuquje' ne ri e cha'tal rumal ri Dios we kekowinik. ²⁵ Nu b'im chi k'u apan wa' chiwe ix, k'à māj'a' kāk'antajik. ²⁶ Rumal ri', we kāk'ix chiwe: "Chiwilampe', waral k'o wi ri Are' pa ri juyub' ri kätz'inowik," mixe' che rilik. We kāk'ix chiwe: "Chiwilampe', waral k'o wi pa ja," mikojo, —xcha ri Jesús chke. ²⁷ Je' jas kub'an ri kaypa' ri kärepp'un cho ri kaj chrelb'al q'ij kāk'alajin k'à chuqajb'al q'ij, are je ri' ri nu petik in, in ri' ri Ralk'ual ri Dios ri Qas Winaq. ²⁸ Jawije' k'u k'o wi ri kāmīnaq, chila' kākimulij wi na kib' ri k'uch, —xcha ri Jesús chke ru tijoxelab'.

Waral kätzijox wi jas u petik ri Ralk'ual ri Dios ri Qas Winaq

²⁹ Xaq xuwi k'u kok'ow ri nimalaj k'äx ri', ri q'ij kāk'equmar na, ri ik' man kätunun tä chik, ketzaq k'u na loq ri ch'imil cho ri kaj. Keslab'isax k'u na konojel ri k'o ki chuq'ab' ri e k'o cho ri kaj je' jas ri q'ij, ri ik', ri ch'imil xuquje' nik'iaj chik. ³⁰ Te k'u ri' kilitaj na cho ri kaj ri retal ri nu petb'al in, in ri' ri Ralk'ual ri Dios ri Qas Winaq. Keb'oq' k'u na ri winaq pa konojel tinimit cho ruwächulew. Kinkil k'u na in, in ri' ri Ralk'ual ri Dios ri Qas Winaq, in petinaq pa taq ri sutz' cho ri kaj ruk' nimalaj chuq'ab', känimarisax k'u na nu q'ij. ³¹ Keintaq k'u na b'i ri nu ángeles, rech ruk' ru ch'ab'al ri trompeta ri sib'alaj ko kätataj na pa ronojel ruwächulew, keb'e' k'u che ki mulixik konojel ri e cha'tal rumal ri Dios pa ri relb'al q'ij, pa ri u qajb'al q'ij, pa ri u mox ri relb'al q'ij, pa ri uwikiäq'ab' ri relb'al q'ij, pa ronojel ruwächulew, —xcha chke.

³² Chich'ob'o b'a' ri k'utb'al chrij ru che'al higos: Aretaq keräxar ru q'ab', ketuxin k'u ru xaq, iwetam ri' chi xaq jub'iq' chik man kopan ri q'alaj. ³³ Je ri' xuquje' ri ix aretaq kiwilo chi tajin kāk'ulmataj ronojel wa', chiwetamaj chi xaq jub'iq' chik man kopan ri q'ij ri kinpetik. Je' ta ne chi in k'o chi' ri uchib'e'. ³⁴ Qas tzij ri kinb'ij chiwe chi keb'antaj na ronojel wa' k'à māj'oq kekām ri

winaq re we q'ij junab' ri'. ³⁵ Käsach na u wäch ri kaj xuquje' ruwächulew, are k'u ri tzij ri nu b'im chiwe keb'antaj na wa', man käsach tä ki wäch, —xcha chke.

³⁶ Man k'o tä k'u jachin jun retam jampa' kopan ri q'ij ri', man etamtal tä k'u ri hora. Man ketam tä ri ángeles chila' chikaj, man retam tä k'u ru K'ojol ri Dios, xane xaq xuwi ri qa Tat Dios retam wa', —xcha chke.

³⁷ Jas ri xk'ulmataj pa ru q'ijol ri qa mam Noé ojer, are je' kāk'ulmataj na aretaq ri in kinpetik, in ri' ri Ralk'ual ri Dios ri Qas Winaq. ³⁸ Pa taq ri q'ij ri', k'à māj'oq xqaj ri nimalaj q'eqal jäb', ri winaq xaq xuwi xkilij ri wi'm, ru tijik taq vino. Xek'ul'ik, xkiya ri kalk'ual che k'ulanem. Je wa' xka'n ronojel q'ij k'à xok na ri qa mam Noé pa ri arca. ³⁹ Man xeb'ok tä il k'à xqaj na ri q'eqal jäb' pa ki wi', xekām k'u konojel. Je ri' xuquje' kāk'ulmataj na aretaq kinpe in, in ri' ri Ralk'ual ri Dios ri Qas Winaq. ⁴⁰ Pa ri q'ij ri' kek'oji na kieb' achijab' ri tajin kechakun pa juyub'. Jun chke kāk'am na b'ik, are k'u ri jun chik käyi' na kanoq. ⁴¹ Pa ri q'ij ri' kek'oji na kieb' ixoqib' ri tajin keke'n'ik. Ri jun kāk'am na b'ik, are k'u ri jun chik käyi' na kanoq.

⁴² Chiwila b'a' iwib', chixk'ask'atoq, rumal chi man iwetam taj jachike hora ri käpe ri Iwajaw, ru K'ojol ri Dios. ⁴³ Mäsach b'a' chiwe ri kinb'ij chanim ri': We ta jun rajaw ja retam jas hora kopan ri elaq'om chaq'ab', man käwar tä na ri', xane kāk'asi na. Man kuya tä ri' chi ri elaq'om kok b'i pa ri rachoch che relaq'axik b'i ri jastaq re. ⁴⁴ Rumal ri' chib'ana u b'anik iwib', xaq chixeyenoq. Aretaq k'ut man kichomaj taj chi kinpetik, kinpe na in, in ri' ri Ralk'ual ri Dios ri Qas Winaq.

Waral kätzil wi ri patäninel ri jikom ranima' xuquje' ri patäninel ri man jikom tä ranima'

⁴⁵ Qachomajmpe' jas ri kub'an jun patrón, ri k'o jun patänil re ri jikom ranima', ri k'o u no', kukoj k'u na kan che ki chajixik konojel ri e k'o pa rachoch rech kuya ri ki wa konojel ri rajchakib' ronojel q'ij. ⁴⁶ Utz re ri patäninel ri' we tajin kub'ano jas ri xtaq wi kanoq aretaq kätzlezej loq ru patrón. ⁴⁷ Qas tzij ri kinb'ij chiwe, chi ri patrón kukoj na ri patäninel ri' che chajil re konojel ri jastaq re. ⁴⁸ We k'u ri patäninel man utzalaj achi taj, kuchomaj k'u ri are' chi ru patrón man kätzlezej tä loq chanim, ⁴⁹ kuchaplej u b'anik k'äx chke ri nik'iaj ajchakib', kuchaplej wi'm, kuchaplej u tijik ja' kuk' ri q'ab'arelab'. ⁵⁰ Te'talik ri patrón kätzlezej loq pa ri q'ij ri man retam tä ri patäninel, pa ri hora ri man kuchomaj taj. ⁵¹ Sib'alaj k'äx k'u ri k'äjisab'al u wäch kuya na ri patrón, junam u k'äjisaxik u wäch kub'an na kuk' ri winaq ri xaq kieb' ki wäch.

Kutij k'u na oq'ej kuk', kuquch'uch'ej na ru ware, —xcha ri Jesús chke ru tijoxelab'.

25

Waral kâqil wi ri k'utb'al chkiy ri lajuj alitomab'

¹ Ru taqanik ri Dios pa ki wi' ri winaq kinjunamaj ruk' ri lajuj alitomab' ri xeb'e' cho rachoch ri ali ri kâk'uli'k che reyexik ri novio. Chkijujunal k'ut xkik'am b'i ri ki lâmparas. ² E job' chke ri alitomab' e saq'orib', are k'u ri job' chke e sak'aj. ³ Ri alitomab' ri e saq'orib' xkik'am b'i ri ki lâmparas, man xkik'am tâ k'u b'i nik'iaj aceite chik rech kâkiya chkipam. ⁴ Are k'u ri alitomab' ri e sak'aj xkik'am b'i ri ki lâmparas xuquje' xkik'am b'i ri ki leme't re aceite. ⁵ Xb'eytaj k'u ri novio. Ri lajuj alitomab' konojel xkichaplej yuxk'atem, xewar k'ut. ⁶ Pa nik'iaj aq'ab' k'ut xtataj jun ri ko xch'awik, xub'ij k'ut: "¡Chiwilampe', xpe ri novio, chixel loq chuk'ulaxik!" —xcha'. ⁷ Xewalij k'u konojel ri alitomab', xkib'an u b'anik ri ki lâmparas. ⁸ Are k'u ri alitomab' ri e saq'orib' xkib'ij chke ri alitomab' ri e sak'aj: "Chiya jub'iq' qe ri iwaceite rech man kechup tâ ri qa lâmparas uj," —xecha chke. ⁹ Ri alitomab' ri e sak'aj xech'awik, xkib'ij: "Man kuya' taj, rumal chi man kub'ana tâ ne ri qech uj we kâqaya ri iwe ix. Are utz xa kiloq'o loq ri iwe pa ri k'ayib'al," —xecha chke. ¹⁰ E b'enaq k'u ri job' alitomab' ri e saq'orib' chuloq'ik ri aceite aretaq xopan kan ri novio. Ri job' alitomab' ri kuk'am kaceite xeb'ok ruk' ri novio pa ri nimaq'ij re ri k'ulanem. Xtz'apix k'u ri uchija. ¹¹ Xetzelej k'u loq ri job' alitomab' chik ri xeb'e' chuloq'ik ri kaceite, xkib'ij k'ut: "¡Tat, tat, jaga la ri uchija chqawäch!" —xecha'. ¹² Ri are' k'ut xub'ij chke: "Qas tzij kinb'ij chiwe chi man wetam tâ i wäch," —xcha chke.

¹³ Xub'ij k'u ri Jesús chke ru tijoxelab': Chiwila b'a' iwib' ix, chixk'ask'atoq, rumal chi man iwetam taj jachike q'ij, jachike hora kinpe in, in ri' ri Ralk'ual ri Dios ri Qas Winag, —xcha chke.

Waral kâqil wi ri k'utb'al chriy ri puaq

¹⁴ Ru taqanik ri Dios pa ki wi' ri winaq kinjunamaj ruk' jun achi ri ke' pa b'inem. Ri achi ri', aretaq xaq jub'iq' kraj chi kel b'ik rech ke' pa jun tinimit chik, xeusik'ij ri patänil taq re, xujach k'u kan ru rajil chkiwäch rech kechakun ruk'.

¹⁵ Xuya chke chkijujunal jas ri kekowinik chukojik. Xuya job' mil quetzal che ri jun, che ri jun chik xuya kieb' mil quetzal, che ri jun chik xuya mil quetzal. Te ri' ri achi xe' pa ru b'inem. ¹⁶ Ri patäninel ri xuk'am job' mil quetzal xe'k, xchakun ruk' ri puaq. Je ri' xuch'ak chi job' mil quetzal chik. ¹⁷ Xuquje' ri patäninel ri xuk'am kieb' mil quetzal je'

xub'ano, xuch'ak chi kieb' mil quetzal chik. ¹⁸ Are k'u ri patäninel ri xuk'am xa mil quetzal xe'k, xuk'u' ru rajil ru patrón, xumuq pa ri ulew.

¹⁹ Xke' k'u k'ia q'ij, xtzelej loq ri ki patrón ri patäninelab', xuchap k'u u b'anik kuenta kuk' chriy ru rajil. ²⁰ Nab'e xopan ri u k'amom job' mil quetzal, xujach k'u che ru patrón ri job' mil quetzal chik ru ch'akom, xub'ij che: "Tat, job' mil quetzal xya la chwe, kâmik ri' kinjach che la ri job' mil quetzal chik ri xinch'ako," —xcha che. ²¹ Ri patrón xub'ij che: "Ri at, at utzalaj patäninel ri jikom awanima". Rumal chi jikom awanima' ruk' ri jub'iq' ri xinya chawe, nim k'u na ri kinya chi na chawe. Chatok b'a' loq, chatkikot junam wuk'," —xcha che. ²² Xopan chik k'u ri patäninel ru k'amom kieb' mil quetzal, xub'ij che ru patrón: "Tat, kieb' mil quetzal xya la chwe, kâmik ri' kinjach che la ri kieb' mil chik ri xinch'ako," —xcha che. ²³ Ri patrón xub'ij che: "Ri at xuquje' at utzalaj patäninel ri jikom awanima". Rumal chi jikom awanima' ruk' ri jub'iq' ri xinya chawe, nim k'u na ri kinya chawe, chatok b'a' loq, chatkikot junam wuk'," —xcha che. ²⁴ Aretaq k'ut xopan ri patäninel ri u k'amom xa mil quetzal, xub'ij che ru patrón: "Tat, ri in wetam chi sib'alaj lal k'a'n, chi kâyak la u wäch ri ulew ri man xtikonij tâ wi la, kâmol la ri man xjopin tâ wi la. ²⁵ Rumal ri' xinxej wib', xine' k'ut, xink'u' ri rajil la, xinmuq pulew. Kinjach k'u we rajil la ri'," —xcha che. ²⁶ Xub'ij k'u ri patrón che: "Ri at, at itzelalaj patäninel ri xa kasaq'orij ra chak. Kak'ey u ch'akik ri puaq. Ri at awetam chi kinyak u wäch ri ulew ri man kintikonij tâ wi, xuquje' kinmol ri man xinjopij taj. ²⁷ We je ri', xaya ta k'u ri nu rajil pa ri banco. We ta je ri' xab'ano, aretaq xintzelej loq xink'am ta ri' ri nu rajil ruk' ri ral," —xcha che. ²⁸ Ri patrón xub'ij chke ri nik'iaj ajchakib' chik ri e k'o chila': "Chik'ama b'a' ri mil quetzal che, chiya che ri jun ri k'o lajuj mil quetzal ruk'," —xcha chke. ²⁹ "Je ri', rumal chi jachin ri k'ia k'o ruk' kâyi' na nik'iaj chik che, kok'ow k'u na u wi' ri k'o ruk'. Are k'u ri jun ri man k'ia tâ k'o ruk', kesax na ri jub'iq' ri k'o ruk'," —xcha chke. ³⁰ "Are k'u we patäninel ri' ri man k'o tâ xuch'ak chriy ri rajil ri xyi' che, jik'iaqa kan chriy ja pa ri q'equm. Chila' k'ut koq' wi na, chila' kuquch'uch'ej wi na ru ware," —xcha ri Jesús chke ru tijoxelab'.

Waral kâqil wi ru q'atik tzij pa ki wi' ri winaq

³¹ Aretaq kinpe na in, in ri' ri Ralk'ual ri Dios ri Qas Winag, ya jun Nim Taqanel chik kinpetik. Konojel ri ángeles kepe na che wachi'l, kint'uyi k'u na pa ri je'lalaj nu t'uyulib'al ri sib'alaj nim u q'ij. ³² Ri winaq re konojel taq ri tinimit cho ruwächulew

käkimulij na kib' chnuwäch, keincha' k'u na ri jikom ki k'aslemal chkixol ri man jikom taj. Je' kinb'an na jas ri kub'an ri ajuuq' keucha' ri u chij chkixol ri k'isik'. ³³ Keinya na ri chij pa ri nu wikiäq'ab', are k'u ri k'isik' pa nu moxq'ab'. ³⁴ Te ri' in, in ri' ri Nim Taqanel, kinb'ij na chke ri e k'o pa nu wikiäq'ab': "Chixsa'j ix, ri ix tewchital rumal ri nu Tat. Chixok chila' jawije' ri kâtaqan wi ri Dios, ri u chomam chi k'u loq wa' tzaretaq xub'an ri kajulew chi kuya chiwe. ³⁵ Rumal chi aretaq xinnumik, xiya nu wa, aretaq xchaq'ij nu chi', xiya jas kintijo, aretaq xinwonokatik, xinik'ulaj cho taq iwachoch. ³⁶ Aretaq man k'o tä chi watz'iaq, ri ix xiya ri watz'iaq, aretaq xinyawajik, xixopan wuk', aretaq xinok pa che', xixe' che wilik," —kincha na chke. ³⁷ Ri winaq ri jikom kanima' chuwäch ri Dios kâkib'ij na chwe: "Tat, ¿jampa' k'u ri xqilo chi kânum la, te k'u ri' xqaya wa la? ¿jampa' xqilo chi kâchaq'ij chi' la, te k'u ri' xqaya jas ri kâtij la? ³⁸ ¿jampa' ta k'u xqilo chi xaq kâwonokat la, xqak'ulaj ta k'u la pa ri qachoch? ¿jampa' xqilo chi man k'o tä atz'iaq la, xqaya k'ut? ³⁹ ¿jampa' ta k'u xqilo chi lal yawab' o k'o la pa che', te k'u ri' xujopan uk' la che rilik jas b'anom la?" —kecha na. ⁴⁰ Ri in, in ri' ri Nim Taqanel, kinb'ij na chke: "Qas tzij kinb'ij chiwe, chi apachike utzil ri xib'an che apachin chke ri wachalal pune man nim u b'anik, chwe in ri' xib'an wi wa'," —kincha na chke.

⁴¹ Kinb'ij k'u na chke ri winaq ri e k'o pa nu moxq'ab': "Chixel chnuwäch, ix ri q'atom tzij pi wi' chi kâk'äjisax i wäch. Jix pa ri q'aq' ri man kâchuptaj taj ri b'anom u b'anik rech chila' kek'ol wi ri Itzel e rachi'l ru ángeles. ⁴² Rumal chi aretaq xinnumik, man xiya tä nu wa, aretaq xchaq'ij nu chi', man xiya tä chwe jas kintijo. ⁴³ Aretaq xaq xinwonokatik, man xinik'ulaj tä cho taq iwachoch. Aretaq man k'o tä chi watz'iaq, man k'o tä ri xiya chwe. Aretaq xinyawajik, aretaq xinok pa che', man xixopan tä che wilik," —kincha na chke. ⁴⁴ Kâkib'ij k'u na chwe: "Tat, ¿jampa' ta k'u lo xqilo chi kânum la, jampa' xqilo chi kâchaq'ij chi' la, jampa' xqilo chi xaq kâwonokat la, jampa' xqilo chi man k'o tä atz'iaq la, jampa' xqilo chi xyawaj la o xok la pa che', te k'u ri' man xujotob' tä che la?" —kecha na chwe. ⁴⁵ Ri in, in ri' ri Nim Taqanel, kinch'awik, kinb'ij na chke: "Qas tzij kinb'ij chiwe chi apachike utzil ri man xib'an tä che apachin jun winaq, pune man nim u b'anik, chwe in ri' man xib'an tä wi," —kincha na chke. ⁴⁶ Ri winaq ri' keb'e' na chila' jawije' ri man kâtäni tä wi ru k'äjisaxik ki wäch. Are k'u ri

winaq ri jikom kanima' cho ri Dios keb'e' na chila' jawije' ri k'o wi ri k'aslemal ri man k'o tä u k'isik, —xcha ri Jesús chke.

26

Käkitzijob'ela kib' chuchomaxik jas kâka'n chukämisaxik ri Jesús

¹ Aretaq xto'taj ri Jesús chub'ixik ronojel wa' we tzij ri', xub'ij chke ru tijoxelab'. ² Ri ix iwetam chi xa pa kieb' q'ij kâb'an na ri nimaq'ij, Pascua u b'i'.* Ri in k'ut, in ri' ri Ralk'ual ri Dios ri Qas Winag, kinjach na pa ki q'ab' ri nu k'ulel, rech kinrip cho ri cruz, kinkämisax na, —xcha chke.

³ Xkimulij k'u kib' ri ki nimaqil sacerdots, ri tijonelab' re ri Pixab' xuquje' ri ki nimal ri winag aj Israel cho ri nimalaj ja rech ri tat Caifás ri ki nimal sacerdots. ⁴ Chila' xkitala ki no'j chb'il taq kib' jas kâka'n na chuchapik ri Jesús ruk' sub'unik rech kâkikämisaj. ⁵ Xkib'ij k'ut: Machap pa ri nimaq'ij, rech metukin ne ri winaq, —xecha'.

Jun ixoq kuya k'ok'alaj kunab'al pu jolom ri Jesús

⁶ Are k'u ri Jesús k'o pa ri tinimit Betania cho rachoch ri tat Simón, jun tata' ri xk'o'ji na itzel ch'a'k che. ⁷ Xopan jun ixoq ri ruk'am jun k'olib'al kunab'al re alabastro ri nojinaq che k'ok'alaj kunab'al. Sib'alaj paqal rajil wa' we kunab'al ri'. T'uyl k'u ri Jesús chi' ri mesa, ri ixoq xuq'ij ri aceite pu jolom ri Jesús. ⁸ Aretaq ri tijoxelab' xkil wa', xpe koyowal, xkib'ij k'u chb'il taq kib': ¿Jas che xaq xtiw wa' we kunab'al ri'? —xecha'. ⁹ Xk'iyix ta ne wa', xtoj ta nimalaj rajil, xyi' ta k'u ri puaq chke ri meb'a'ib', —xecha'.

¹⁰ Xuta k'u ri Jesús ri kâkib'ij, xub'ij chke: ¿Jas che kiya latz' che ri ixoq ri'? Jun nimalaj utzil k'u wa' ru b'anom chwe, —xcha chke. ¹¹ Amaq'el ronojel q'ij k'ut e k'o ri meb'a'ib' iwuk', are k'u ri in man in k'o tä iwuk' amaq'el. ¹² Ri xub'an ri ixoq aretaq xuq'ij ri k'ok'alaj aceite chwij, xa xukoj k'u b'i' ri k'ok'alaj kunab'al chrij ri nu cuerpo k'ä mäjoq kinmuqik, —xcha chke. ¹³ Qas k'u tzij ri kinb'ij chiwe chi apawije' ta ne ri kâtzijox wi na ri Utzalaj Tzij re ri Evangelio cho ronojel ruwächulew, ru b'anom we ixoq ri' kâtzijox na che na'tab'al re, —xcha chke.

Ri tat Judas kuchi'j u jachik ri Jesús

¹⁴ Te k'u ri' jun chke ri kab'lajuj tijoxelab', ri u b'i' Judas Iscariote, xel b'ik, xe' kuk' ri ki nimaqil ri sacerdots. ¹⁵ Xub'ij k'u chke: ¿Jas kâya alaq chwe, we kinjach ri Jesús pa q'ab' alaq? —xcha chke.

Ri e are' k'ut xkiya juwinaq lajuj raqan saq puaq che ri tat Judas. ¹⁶ Tzare chi' k'ut

* 26:2 "Pascua": Jun chke ri ki nimaq'ij ri winaq aj Israel, nim k'u u b'anik. Are natab'al re ri q'ij ri xeb'el loq pa ri ki q'ab' ri winaq aj Egipto ojer.

ri tat Judas xutzukuj jun utzalaj q'ij rech kujach ri Jesús pa ki q'ab'.

Käb'an ri wi'm re ri Qajaw Jesús

¹⁷ Pa ri nab'e q'ij re ri nimaq'ij aretaq kätijow ri kaxlan wa ri man käyi' tä ch'äm ruk', ru tijoxelab' ri Jesús xegeb' ruk', xkib'ij che: ¿Jawije' kaj wi la chi káqa'n wi ri wi'm re ri Pascua rech kätij la? —xcha che.

¹⁸ Ri Jesús xub'ij chke: Jix pa ri tinimit cho rachoch ri jun achi, chib'ij k'u che: “Kuta' ri Qajtij che la, kub'ij: Ya xopan ri hora. Cho achoch k'u la kinb'an na u b'anik wi ri nimaq'ij re ri Pascua kuk' ri nu tijoxelab',” —kácha ri', —kixcha che, —xcha ri Jesús chke.

¹⁹ Ri tijoxelab' xka'no jas ri xetaq wi rumal ri Jesús. Xka'n k'u u b'anik ri wi'm re ri Pascua chila'.

²⁰ Aretaq chaq'ab' chik, ri Jesús xt'uyi chi' ri mesa kuk' ri kab'lajuj u tijoxelab'. ²¹ E t'uyul chila' chi' ri mesa, tajin kewi'k aretaq ri Jesús xub'ij chke: Qas tzij ri kinb'ij chiwe chi k'o jun chiwe ri kinujach na, —xcha chke.

²² Ru tijoxelab' sib'alaj xeb'isonik. Chki-jujunal k'ut xkichaplej u ta'ik che ri Jesús: Qajaw, ¿a man xa in ri'? —xcha che.

²³ Ri Jesús xch'awik, xub'ij chke: Are ri jun ri kurub' ru wa wuk' pa ri laq, are k'u ri' ri kinjachow na, —xcha chke. ²⁴ Je' k'u kel na jas ri tz'ib'tal pa ru Loq' Pixab' ri Dios chwij in, in ri' ri Ralk'ual ri Dios ri Qas Winaq. ¡K'äx k'u ri kuriq na ri achi ri kinjachow na! ¡Utz na re we achi ri' we ta mat xil u wäch! —xcha chke.

²⁵ Xch'aw k'u ri Judas ri tijoxel ri kájachow na, xub'ij che ri Jesús: We ne in, Ajtij, —xcha che.

Xub'ij ri Jesús che: Je', at ri', —xcha che.

²⁶ Aretaq tajin kewi'k, ri Jesús xuk'am ri kaxlan wa, xub'an orar, xumaltioxij wa' che ri Dios. Te k'u ri' xupiro, xuya chkiwäch ru tijoxelab', xub'ij: Chitija iwe wa', je' ta ne chi are nu cuerpo wa', —xcha chke.

²⁷ Te k'u ri' xuk'am jun vaso, xumaltioxij wa' che ri Dios, te ri' xuya chkiwäch ru tijoxelab', xub'ij chke: Chitija iwe iwonojel. ²⁸ Je' ta ne chi are nu kik'el wa' ri kujikib'a ri k'ak' trato ru b'anom ri Dios kuk' ri winaq. Käturuw k'u na wa' ri nu kik'el che sachb'al ki mak k'ia winaq. ²⁹ Qas tzij ri kinb'ij chiwe chi man k'o tä jumul kintij chi na we ri vino re uvas, k'ä pa ri q'ij ri kintij na ri k'ak' vino junam iwuk' chila' jawije' ri kátaqan wi ri nu Tat, —xcha chke.

Ri Jesús kub'ij apan che ri tat Pedro chi kub'ij na chi man retam tä u wäch

³⁰ Te k'u ri' xkib'ixoj jun b'ix ri kuya u q'ij ri Dios, xeb'el b'i chila', xeb'e' pa ri Ujuyub'al Olivos. ³¹ Xub'ij k'u ri Jesús chke: Ri ix iwonojel kib'isoj na nu wäch, kiniya na kan

nu tukiel kämik chaq'ab'. Je k'u tz'ib'tal kan pa ru Loq' Pixab' ri Dios: “Kinkämisaj na ri ajyuq', kejab'un k'u na ri chij,” —kácha'. ³² Aretaq k'u ri in, in k'astajinaq chik chki-xol ri käminaqib', kinnab'ej na b'i chiwäch, kine' na pa Galilea, —xcha chke.

³³ Xub'ij k'u ri tat Pedro che ri Jesús: Pune konojel käyi' la kan kumal, ri in man je' tä ri' kinb'ano, —xcha che.

³⁴ Xub'ij k'u ri Jesús che: Qas tzij ri kinb'ij chawe chi tzpa we aq'ab' ri' kämik, kab'ij na at oxmul chi man awetam tä nu wäch mäjoq koq' ri ama' ek', —xcha che.

³⁵ Ri tat Pedro xub'ij che: Pune rajwaxik chi kinkäm na uk' la, man k'o tä na jumul kinb'ij chi man wetam tä wäch la, —xcha che.

Je k'u xkib'ij xuquje' konojel ru tijoxelab'.

Ri Jesús kub'an orar pa Getsemani

³⁶ Xopan k'u ri Jesús pa ri ch'äqap ulew u b'i' Getsemani e rachi'l ru tijoxelab', xub'ij k'u chke: Chixt'uyul kan waral. Ri in k'ut kine' na jela' chub'anik orar, —xcha chke.

³⁷ Xuk'am b'i ri tat Pedro ruk' xuquje' ri kieb' u k'ojol ri tat Zebedeo. Xuchaplej k'u t'ujuwem ri Jesús, xk'äx'ob' ri ranima'. ³⁸ Xub'ij k'u chke: Sib'alaj kuk'is rib' ri wanima' chupam ri b'is. Chixkanaj kan chi', chixk'ask'at wuk', —xcha chke.

³⁹ Te ri' xb'in chi apan jub'iq' ri Jesús, xxuki'k, xuya ru palaj cho ri ulew, xub'an orar, xub'ij: Tat, we kuya', chesaj b'a' la we vaso ri' chnuwäch, b'ana la chi man käpe tä ri k'äx ri' chwij. Mäb'an b'a' xa jas ri nu rayib'al in, xane jas ri rayib'al la, —xcha che ri Dios.

⁴⁰ Xtzelej k'u ri Jesús jawije' e k'o wi ru tijoxelab', xeuriqua tajin kewarik. Xub'ij k'u che ri tat Pedro: ¿A mat xixkowinik xixk'asi ta jun hora wuk'? —xcha che. ⁴¹ Chiwila b'a' iwib', chixk'ask'atog, chib'ana orar rech man kixtzaq taj aretaq kixtaqchi'x che mak. Qas tzij pa ri iwanima' kiwaj kib'an ri utzil, man k'o tä k'u u chuq'an' ri i cuerpo chub'anik wa', —xcha chke.

⁴² Xe' chi jumul ri Jesús chub'anik orar, je' xub'ij wa': ¡Tat! We b'a' tzrajwaxik wi chi käpe ri k'äx ri' chwij, b'ana b'a' la chwe jas ri rayib'al la, —xcha che ri Dios.

⁴³ Te k'u ri' xtzelej chik, xeuriqua ru tijoxelab' jumul chik tajin kewarik rumal chi sib'alaj k'äx ki waram. ⁴⁴ Xeuya kanog, xe' chi jumul ri Jesús chub'anik orar churoxmul, je k'u xub'ij jas ri xub'ij nab'e'. ⁴⁵ Te k'u ri' xe' jela' jawije' e k'o wi ru tijoxelab', xub'ij chke: Chixwar b'a', chixuxlanog. Xopan ri hora. Kinjach k'u na in, in ri' ri Ralk'ual ri Dios ri Qas Winaq, pa ki q'ab' ri ajmakib', —xcha chke. ⁴⁶ ¡Jo' b'a'! ¡Chixwaljoq! Chiwilampe', xpe ri jachal we, —xcha chke.

Kächap ri Jesús kumal ru k'ulel

⁴⁷ K'a tajin käch'aw ri Jesús aretaq xopan ri tat Judas, jun chke ri kab'lajuj u tijoxelab'. E petinaq ruk' ri are' k'ia winaq ri kuk'am machetes, kuk'am che'. E taqom loq kumal ri ki nimaqil sacerdotes, xuquje' kumal ri ki nimaqil ri winaq aj Israel. ⁴⁸ Ri tat Judas ri jachal re ri Jesús u yo'm k'u kan jun etal chke ri winaq, xub'ij: "Ri kintz'umaj, are ri' ri Jesús. Chichapa', qas utz chib'ana b'i chuk'amik," —xcha chke.

⁴⁹ Xqeb' k'u ri tat Judas ruk' ri Jesús, xub'ij che: [Xok aq'ab', Ajtij! —xcha che.

Te k'u ri' xutz'umaj. ⁵⁰ Ri Jesús xch'awik, xub'ij che: Wachil', ¿jas a tajkil xatpetik? —xcha che.

Xeqeb' k'u ri winaq ruk' ri Jesús, xkichapo, xkiyut b'ik.

⁵¹ Aretaq je' xb'anik, jun chke ri e rachi'l ri Jesús xuk'am ru machete, xusok ri patänil re ri ki nimal sacerdotes, xuq'at apan ru xikin.

⁵² Xub'ij k'u ri Jesús che: Chaya ri a machete pa ri k'olib'al re. Konojel k'u ri kech'ayan ruk' machete, ruk' machete kekämisax na, —xcha che. ⁵³ ¿A mat awetam chi kinkowinik kinta' apan che ri nu Tat chi kinuto', chi ri Are' kutaq na loq chanim oxk'al lajuj mil ángeles che nu to'ik? ⁵⁴ We ta k'u je ri', man je' tá kel wi ri' ri tz'ib'tal pa ru Loq' Pixab' ri Dios, chi rajwaxik káb'antaj na wa' we ri', —xcha che.

⁵⁵ Xub'ij k'u ri Jesús chke ri winaq: ¿Jas lo wa' chi je' ta ne chrij jun elaq'om elinaq wi loq alaqa? ¿A k'amom alaqa loq ri machete alaqa, ri che' alaqa che nu chapik? —xcha chke. Ronojel q'ij xink'o'ji uk' alaqa pa ri nimalaj rachoch Dios, xinya ri tijonik chech alaqa, man xinchap tá k'u alaqa. ⁵⁶ Je k'u káb'an na wa' chwe, rech je' káb'antaj na jas ri tz'ib'am kan chwij kumal ri q'alajisal taq re ru Loq' Pixab' ri Dios, —xcha chke.

Chanim k'ut konojel ri tijoxelab' xkiya kan ri Jesús u tukiel, xeanimaj b'ik.

Kopan ri Jesús chkiwäch ri ki nimaqil sacerdotes

⁵⁷ Ri winaq ri xechapow ri Jesús xkik'am b'i chuwäch ri tat Caifás, ri qas ki nimal ri sacerdotes. Chila' k'ut ki mulim wi kib' ri tijonelab' re ri Pixab', xuquje' ri ki nimaqil ri winaq aj Israel. ⁵⁸ Are k'u ri tat Pedro xuterenej b'i ri Jesús chi naj, xopan pa ri uwoja rech ri rachoch ri qas ki nimal sacerdotes. Xok b'i ri tat Pedro, xt'uyi k'u ri are' chila' kuk' ri chajil taq re ri nimalaj rachoch Dios rech kárido jas ri kák'ulmataj na ruk' ri Jesús.

⁵⁹ Ri ki nimaqil sacerdotes, ri ki nimaqil ri winaq aj Israel, xuquje' konojel ri k'amal taq ki b'e ri winaq, tajin kákitzujuk jas u wäch mak ri káq'alajisax chrij ri Jesús, pune man qas tzij taj, rech káq'at tzij puwi' chi kákämisaxik. ⁶⁰ Man xkiriq tá k'ut, pune e

k'ia winaq xkimulij kib', xkib'ij ri man qas tzij taj chrij ri Jesús. K'isb'al re k'ut xepe kieb' achijab' chik ri xkicq'alajisaj ri man qas tzij taj chrij ri Jesús. ⁶¹ Xkib'ij: We achi ri' kub'ij: "Ri in kinkowinik kinwulij ri nimalaj rachoch Dios, kinyak chi k'u na pa oxib' q'ij," —kácha', —xecha ri achijab'.

⁶² Xwalij k'u ri qas ki nimal sacerdotes, xuta' che ri Jesús, xub'ij che: ¿A mat k'o jas jun tzij kab'ij chutzelexik u wäch ri tajin káb'ix chawij? ¿Jas pu wa' ri tajin kákicq'alajisaj we achijab' ri' chawij? —xcha che.

⁶³ Man xch'aw tá k'u ri Jesús. Xub'ij k'u ri ki nimal sacerdotes che: Pa ru b'i' ri k'aslik Dios, kinb'ij chawe chi chab'ana juramento chub'ixik ri qas tzij. Chab'ij chqwe we at ri' ri Cristo ri u K'ojol ri Dios, —xcha che.

⁶⁴ Xch'aw k'u ri Jesús, xub'ij che: In ri', tat, jas ri káb'ij la, —xcha che. Kinb'ij k'u in chech alaqa, chi kinil na alaqa ri in, in ri' ri Ralk'ual ri Dios ri Qas Winag, aretaq in t'uyul pa ru wikiäq'ab' ri Dios ri sib'alaj k'o u chuq'ab', aretaq kinpe pa taq ri sutz' ajchikaj, —xcha che.

⁶⁵ Are k'u ri qas ki nimal sacerdotes xu-raq'atij ri ratz'iaq chuk'utik chi sib'alaj k'äx xuna' ri xub'ij ri Jesús. Xub'ij k'u ri tata': We achi ri' u b'im ri äwas u b'ixik chrij ri Dios. ¿Jas ta ne che e rajwaxik chi nik'iaq q'alajisanelab' chik chrij? I tom k'u ix chi u b'im ri äwas u b'ixik chrij ri Dios, —xcha chke ri winaq. ⁶⁶ ¿Jas k'u kichomaj?

Ri e are' xkib'ij: K'o u mak, rajwaxik k'ut chi kákämisaxik, —xecha'.

⁶⁷ Xkichub'aj u palaj ri Jesús, xkit'oko. Nik'iaq chik xkikoj q'ab' chupalaj. ⁶⁸ Xkib'ij k'u che: At ri' ri Cristo, jchach'ob'o ne jachin ri xatch'ayowik! —xecha che.

Ri tat Pedro kub'ij chi man retam tá u wäch ri Jesús

⁶⁹ Are k'u ri tat Pedro t'uyul kan cho ja. Xopan k'u jun ali ajik' ruk', xub'ij che: Ri at xuquje' xat'k'o'ji ruk' ri Jesús ri aj Galilea, —xcha che.

⁷⁰ Are k'u ri tat Pedro xresaj rib' chupam chkiwäch konojel, xub'ij: Man kinch'ob' taj jas ri tajin kab'ij, —xcha che.

⁷¹ Ri tat Pedro qas raj kel b'i chuchi' ri ja, aretaq xilitaj chi rumal jun ajik' chik, ri ajik' xub'ij chke ri e k'o chila': We achi ri' xuquje' xk'o'ji ruk' ri Jesús ri aj Nazaret, —xcha chke.

⁷² Jumul chik ri tat Pedro xresaj rib' chupam, xub'an jurar, xub'ij: Ri in man wetam tá u wäch ri achi ri', —xcha'.

⁷³ Man naj tá k'u ri' ri winaq ri e k'o chila' xeopan ruk' ri tat Pedro, xkib'ij che: Qas tzij ri at, at jun kuk' ri e rachi'l ri Jesús, rumal chi junam katch'awik jas ri winaq aj Galilea, —xecha che.

⁷⁴ Ko k'u xch'aw ri tat Pedro, xub'an jurar cho ri Dios, xub'ij: Man wetam tä u wäch ri achi ri', —xcha chke.

Are chi' k'ut xoq' jun ama' ek'. ⁷⁵ Xna'taj k'u che ri tat Pedro ru b'im ri Jesús che: "Ri at kab'ij na oxmul chi man awetam tä nu wäch, mäjoq koq' ri ama' ek'," —xcha che. Xel k'u b'i ri tat Pedro, sib'alaj xuk'is rib' che oq'ej.

27

Ri Jesús kāk'am b'i chuwäch ri Pilato

¹ Aretaq xsaqirik, konojel ri ki nimaqil ri sacerdot, xuquje' ri ki nimaqil ri winaq aj Israel xkitala ki no', xkichomaj jas kāk'a'n chukāmisaxik ri Jesús. ² Xkiyut k'u b'i ri Jesús, xkik'am b'ik, xekijacha pu q'ab' ri tat Poncio Pilato ri q'atal tzij.

Kukāmisaj rib' ri tat Judas

³ Aretaq k'ut ri tat Judas, ri jachal re ri Jesús, xrilo chi xq'at tzij puwi' ri Jesús chi kākāmisaxik, xuna' k'āx pa ri ranima'. Xutzelej ri juwinaq lajuj raqan saq puag chke ri ki nimaqil ri sacerdot, xuquje' ri ki nimaqil ri winaq aj Israel. ⁴ Xub'ij chke: Xinmakun cho ri Dios rumal chi xinjach pa q'ab' alaj jun achi ri man k'o tä u mak rech kākāmisaj alaj, —xcha chke.

Ri e are' k'ut xkib'ij che ri tat Judas: ¿Jas qe uj che? ¿At chatilowog! —xecha che.

⁵ Are k'u ri tat Judas xuk'iaq kan ri puag pa ri nimalaj rachoch Dios, xel b'ik, xe'k, xujitz'aj rib'.

⁶ Ri ki nimaqil ri sacerdot, xkisik' ri puag, xkib'ij: Man kuya' taj kākaya wa' we puag ri' pa ri k'olib'al kuchuj, rumal chi rajil kik' wa', —xecha'.

⁷ Xkichomaj k'ut chi ruk' wa' we puag ri' kākiloq' ri ulew ri kāk'ix Rulew ri B'anal B'o'j che, rech k'o jun ulew ri kemuq wi ri winaq ri man e aj Israel taj. ⁸ Rumal ri', k'ā kāmik, ri ulew ri' kāk'ix Ulew re Kik' che. ⁹ Je ri' xb'antajik jas ri xub'ij kan ri qa mam Jeremías ri q'alajisal re ru Loq' Pixab' ri Dios: "Xkik'am ri juwinaq lajuj raqan saq puag (ri rajil jun achi ri chomam kumal ri winaq aj Israel). ¹⁰ Ruk' wa' xkiloq' ri rulew ri B'anal b'o'j. Are wa' ri in u taqom wi ri Qajaw Dios," —xcha ri'.

Ri Jesús k'o chuwäch ri Pilato

¹¹ Xk'am k'u b'i ri Jesús, xekijacha cho ri tat Pilato ri q'atal tzij. Xuta' k'u ri Pilato che, xub'ij: ¿A at ri' ri kattaqan pa ki wi' ri winaq aj Israel? —xcha che.

Ri Jesús xub'ij che: Je ri' jas ri kāk'ij la, —xcha che.

¹² K'ia tzij k'ut xka'n ri ki nimaqil ri sacerdot, chrij ri Jesús, xuquje' ri ki nimaqil ri winaq aj Israel. Are k'u ri Jesús man k'o tä jas xub'ij. ¹³ Xub'ij k'u ri tat Pilato che: ¿A mat kata ri tajin kāk'ix chawij? —xcha che.

¹⁴ Man k'o tä k'u jun tzij xub'ij ri Jesús, je ri' chi xukajmaj wa' ri tat Pilato. Man kuriq tä k'u ri are' jas kub'ano.

Kāq'at tzij puwi' ri Jesús chi kākāmisaxik

¹⁵ Are k'u ri tat Pilato ri q'atal tzij naq'atalik chi pa ri nimaq'ij kub'an jun toq'ob' chke ri winaq, kutzogopij b'i jun ajpache', apachin ta ne ri kāk'a' kumal ri winaq. ¹⁶ K'o k'u jun ajpache', Barrabás u b'i', ri etamtalik chi are jun itzel achi. ¹⁷ Aretaq k'ut ki mulim chi kib' ri winaq, ri tat Pilato xuta' chke: ¿Jachin ri kiwaj chi kintzogopij b'ik? ¿A are kintzogopij b'i ri tat Barrabás o are kintzogopij b'i ri Jesús ri kāk'ix Cristo che? —xcha chke ri winaq.

¹⁸ Kuch'ob' k'u ri tat Pilato chi xa rumal chi k'āx kākina' che ri Jesús, rumal ri' ki jachom pu q'ab'.

¹⁹ T'uyl k'u ri tat Pilato pa ri q'atb'al tzij, aretaq ri rixoqil xtaqan chub'ixik che: "K'o jas mab'an che we achi ri' ri man k'o tä u mak. Xinwachik'aj k'u jun jasach ri sib'alaj xib'ib'al chaq'ab' rumal we achi ri'," —xcha che.

²⁰ Are k'u ri ki nimaqil ri sacerdot, xuquje' ri ki nimaqil ri winaq aj Israel xkikoq' ki chuq'ab' chub'ixik chke ri winaq chi más utz na kākib'ij chi are kätzogopix ri tat Barrabás, kākāmisax k'u ri Jesús. ²¹ Ri q'atal tzij k'ut xch'aw chi jumul, xuta' chke ri winaq: ¿Jachin chke ri kieb' achijab' kiwaj chi kintzogopij b'ik? —xcha chke.

Ri winaq xkib'ij: Are kätzogopij la ri tat Barrabás, —xecha che.

²² Xuta' k'u ri tat Pilato chke ri winaq: ¿Jas k'u kintb'an che ri Jesús ri kāk'ix Cristo che? —xcha chke.

Konojel ri winaq xech'awik, xkib'ij: ¿Chripoq! —xecha'.

²³ Xch'aw k'u ri tat Pilato, xub'ij chke: ¿Jas che? ¿Jas pu etzelal u b'anom wa' we achi ri'? —xcha chke.

Ko k'u na xech'aw ri winaq, xkib'ij: ¿Chripoq! —xecha'.

²⁴ Aretaq ri tat Pilato xrilo chi man kok tä tzij pa ki jolom ri winaq, xane xa tajin kākikukij kib', xtaqan chuk'amik joron, xuch'aj ru q'ab' chkiwäch ri winaq, te k'u ri' xub'ij: Man k'o tä we in che ru kāmikal we achi ri' ri man k'o tä u mak. Chib'ana ix jas ri kiwaj kib'an che, —xcha chke.

²⁵ Konojel k'u ri winaq xech'awik, xkib'ij: ¿Ri uj, xuquje' ri qalk'ual, uj ajchaq' mak che ru kāmikal we achi ri'! —xecha'.

²⁶ Ri tat Pilato xutzogopij k'u b'i ri tat Barrabás. Xtaqan chuch'ayik ri Jesús, te k'u ri' xujach b'ik rech kārīpik, kākāmisax cho ri cruz.

²⁷ Te ri' xepe ru soldados ri q'atal tzij, xkik'am b'i ri Jesús pa ri nimalaj ja jaw-ije' konojel ri soldados xkimulij kib' chrij.

²⁸ Xkesaj ri ratz'iaq ri Jesús, xkikoj jun kiäq q'u' chrij. ²⁹ Xkikoj jun corona re kemom k'ix chujolom, xkiya jun che' pu q'ab' re uwikiäq'ab', xexuki chuwäch, xkitze'j u wäch, xkib'ij: ¡Nim u q'ij ri Nim Taqanel pa ki wi' ri winaq aj Israel! —xecha'.

³⁰ Xechub'an chupalaj ri Jesús, xuquje' xkik'am ri che' pu q'ab', xkiq'osij chujolom. ³¹ Aretaq xeto'taj che retz'b'exik u wäch, xkijolij ri kiäq q'u' chrij, xkikoj k'u ri qas ratz'iaq ri Are' chrij. Te k'u ri' xkik'am b'i churipik cho ri cruz.

Kärip ri Jesús cho ri cruz

³² Elem b'i ke, xkiriq k'u jun achi aj Cirene, Simón u b'i', xkikoj ki chuq'ab' che rech kutelej b'i ru cruz ri Jesús.

³³ Je wa ri' xeopan pa ri juyub' ri käb'ix Gólgota che. We b'i'aj ri' kel kub'ij: Ri Juyub' re ru B'aqil Jolomaj. ³⁴ Xkiya jun vino che ri Jesús ri yujtal ruk' jun k'a q'ayes ri käb'ix "mirra" che. Aretaq k'ut xuna' ri Jesús, man xraj taj xutijo.

³⁵ Aretaq ki ripom chik ri Jesús cho ri cruz, ri soldados xkesaj suerte chujachik ri ratz'iaq ri Jesús chkiwäch. Je k'u xb'antajik jas ri xub'ij kan ri q'alajisal re ru Loq' Pixab' ri Dios ojer: "Xkesaj suerte chujachik ri watz'iaq chkiwäch," —xcha'.

³⁶ Te k'u ri' ri soldados xet'uyi chila' chuchajixik ri Are'. ³⁷ Kojom k'u puwi' ri cruz jun tz'ib'talik ri kub'ij jas che xq'at tzij puwi' ri Jesús rech käripik. Ri tz'ib'talik xub'ij: ARE WA' RI JESÚS, RI NIM TAQANEL PA KI WT' RI WINAQ AJ ISRAEL, —kächa'.

³⁸ Xuquje' xerip kieb' ela'q'omab' ruk'. Jun pu wikiäq'ab', jun pu moxq'ab'. ³⁹ Ri winaq ri xeok'owik xkiyoq'o, xkisutusa ri ki jolom. ⁴⁰ Xkib'ij: At ri' ri kab'ij chi katkowinik kawulij ri nimalaj rachoch Dios, xa k'u pa oxib' q'ij kayak chi na wa' jumul chik, chato' b'a' awib'. We at ri' ru K'ojol ri Dios, chatqaj loq cho ri cruz, —xecha che.

⁴¹ Je' xuquje' ri ki nimaqil ri sacerdotes, ri tijonelab' re ri Pixab', ri tata'ib' fariseos kuk' ri ki nimaqil ri winaq aj Israel, xkitze'j u wäch, xkitzijob'ela kib', xkib'ij: ⁴² Xtob' chke nik'iaj chik, man kākowin tā k'u ri Are' chuto'ik rib'. We qas are Nim Taqanel kech ri winaq aj Israel, chqaj loq cho ri cruz, rech kujkojon che, —xecha'. ⁴³ Kub'ij chi u ku'b'am u k'ux chrij ri Dios. We b'a' qas tzij loq' chuwäch ri Dios, ri Are' kätow ta na chanim ri'. U b'im k'ut chi are u K'ojol ri Dios, —xecha'.

⁴⁴ Ri ela'q'omab' ri e ripom ruk' ri Jesús, xuquje' xketz'b'ej u wäch.

Käkäm ri Jesús

⁴⁵ Xq'equmar k'u ronojel ruwächulew. Xuwi xuchap pa ri nik'iaj q'ij, k'a'te' xok'ow pa ri urox hora b'enaq q'ij. ⁴⁶ Qas pa ri hora ri' xuraq u chi' ri Jesús, ko xch'awik,

xub'ij: Eloi, Eloi, ¿lama sabactani? —xcha'. Je' kel kub'ij wa': Nu Dios, nu Dios, ¿jas che in wonob'am la kanoq? —kächa'.

⁴⁷ Jujun k'u chke ri e tak'atoj chila' xkita wa', xkib'ij: We achi ri' are tajin kusik'ij ri qa mam Elías ri q'alajisal re ru Loq' Pixab' ri Dios ojer, —xecha'.

⁴⁸ Te k'u ri' jun chke ri winaq xutik anim, xe'k, xuk'ama loq jun estropajo, xurub' chupam ch'am vino, xuya wa' puwi' jun aj, xuya aq'an che ri Jesús rech kutijo. ⁴⁹ Are k'u ri nik'iaj winaq chik xkib'ij: Chiya kanoq, chqila na we ne käpe ri qa mam Elías chuto'ik, —xecha'.

⁵⁰ Jumul chik ko xuraq u chi' ri Jesús, xkäm k'ut, xel ranima'. ⁵¹ Are chi' k'ut ri tasb'al u pam ri nimalaj rachoch Dios xjisjob'ik, kieb' xub'ano, xpe ajsik k'a'ik. Xpe jun käb'raqan, ri nimaq taq ab'aj k'ut xepaxik.

⁵² Ri ki jul taq ri käminaqib' xejajjob'ik, e k'ia ri ojer taq winaq ri xekojon che ri Dios, ri e käminaq chik, xek'astaj chkixol ri käminaqib'.

⁵³ Ri e are' xeb'el b'i pa ri ki jul aretaq k'astajinaq chi ri Jesús chkixol ri käminaqib', xeb'ok k'u pa ri loq'alaj tinimit Jerusalén. Chila' k'ut k'ia winaq xeiowik.

⁵⁴ Are k'u ri ki nimal soldados aj Roma xuquje' ri soldados ri e k'o ruk' ri ki chajim ri Jesús, aretaq xkina' ri käb'raqan xuquje' xkil ronojel ri xk'ulmatajik, sib'alaj xkixej kib', xkib'ij: ¡Qas tzij, u K'ojol ri Dios wa' we achi ri'! —xecha'.

⁵⁵ E k'o k'u k'ia ixoqib' chila' ri tajin keka'y apan chinaj. We ixoqib' ri' xeteri ruk' ri Jesús, xepe ruk' pa Galilea, xetob' k'u che. ⁵⁶ Chkixol k'u ri e are' k'o ri nan María ri aj Magdala, ri María ru nan ri Jacobo, ri José, xuquje' ri ki nan ru k'ojol ri Zebedeo.

Kämuq ru cuerpo ri Jesús

⁵⁷ Aretaq okem kub'an ri aq'ab', xpe jun q'inom achi, José u b'i'. Are aj Arimatea, jun u tijoxel k'u ri Jesús wa'. ⁵⁸ Xok cho ri tat Pilato, xuta' ru cuerpo ri Jesús che. Xtaqan k'u ri tat Pilato chi käyi' che. ⁵⁹ Ri tat José xuk'am ru cuerpo ri Jesús, xupis chupam jun saqalaj payu'. ⁶⁰ Xuya pa jun k'ak' muqub'al ri rech ri are', ri k'otom koq pa ri ab'aj. Xuwolqotij k'u kan jun ab'aj chuchi' ri muqub'al che tz'apib'al re, te k'u ri' xe'k. ⁶¹ K'o k'u ri nan María ri aj Magdala chila' rachi'l ri jun María chik. E t'uyul chuwäch ri xmuq wi ri Jesús.

Xekoj soldados chuchajixik ru cuerpo ri Jesús

⁶² Chukab' q'ij chik, ya ok'owinaq chi ri q'ij aretaq ri winaq aj Israel kākā'n u b'anik ronojel che ri q'ij re uxlanem, ri ki nimaqil ri sacerdotes kuk' ri tata'ib' fariseos xeb'e' ruk' ri tat Pilato. ⁶³ Xkib'ij k'u che: Tat, xna'taj chqe chi ri Jesús ri k'ia b'anow taq tzij xub'ano, aretaq k'asal

na xub'ij chi churox q'ij kāk'astaj na chkixol ri kāmīnaqib'. ⁶⁴ Rumal ri' taqan la chuchajixik ri muqub'al k'ä kätz'aqat na ri oxib' q'ij, rech man kepe tä ru tijoxelab' che rela'axik b'i ru cuerpo, te k'u ri' kākib'ij ta k'u chke ri winaq: "Xk'astaj ri Jesús chkixol ri kāmīnaqib'," —mecha'. We je ri' are jun b'anow tzij ri' ri sib'alaj nim na chuwäch ri nab'e, —xecha che ri tat Pilato.

⁶⁵ Ri tat Pilato xub'ij chke: Chik'ama b'i we soldados ri' iwuk'. Jix, jichajij ri muqub'al. Utz chib'ana che, jas ri kixkowin che, —xcha chke.

⁶⁶ Xeb'e' k'ut, utz xka'n che ri muqub'al. Xkikoj jun retal chrij ri ab'aj ri kojom chuchi'. Xekiya k'u kan ri soldados chila' chuchajixik ri muqub'al.

28

Ri Jesús kāk'astaj chkixol ri kāmīnaqib'

¹ Ok'owinaq chi k'u ri q'ij re uxlanem, saqirem kub'an pa ri nab'e q'ij re ri semana. Ri nan María ri aj Magdala rachi'l ri jun María chik xeb'e' che rilik ri muqub'al. ² Xaq k'u te'talik xpe jun nimalaj káb'raan. Are jun ángel ri taqom loq rumal ri Dios xqaj loq chikaj, xopan chila' jawije' ri muqutal wi ri Jesús. Xresaj apan ri ab'aj ri tz'apib'al re ru chi' ri muqub'al, te k'u ri' xt'uyi puwi'. ³ Ri ángel sib'alaj kájuluwuk jas ri jun kaypa'. Ri ratz'iaq sib'alaj saq je' jas ri saq tew.

⁴ Aretaq xkil wa' ri soldados, sib'alaj xkixej kib', xeb'irb'itik, pak'alik xeqajik je' ta ne ri xekāmik. ⁵ Ri ángel xub'ij chke ri ixoqib': Mixej iwib'. Wetam chi are tajin kitzukuj ri Jesús ri xrip cho ri cruz, —xcha chke. ⁶ Man k'o tä chi waral, xane k'astajinaq chi b'i chkixol ri kāmīnaqib' jas ri xub'ij. Jiwilampe' jawije' ri xyi' wi. ⁷ Jix b'a' aninaq. Chib'ij wa' chke ru tijoxelab': "Ri Are' xkām na, xk'astaj k'u b'i chkixol ri kāmīnaqib'. Nab'ejinaq chiwäch, b'enam re pa Galilea. Chila' k'ut kiwil wi na u wäch." Are wa' ri nu tajkil iwuk', —xcha ri ángel chke ri ixoqib'.

⁸ Chanim k'ut xeb'el b'i ri ixoqib' chi' ri muqub'al, jub'iq' kixe'm kib', jub'iq' kekikotik. Aninaq xeb'e' chub'ixik wa' chke ru tijoxelab'. ⁹ B'enam k'u ke pa ri b'e aretaq ri Jesús xuk'ut rib' chkiwäch, xuya k'u rutzil ki wäch. Ri ixoqib' xegeb' ruk' ri Jesús, xkiq'ijilaj, xkichap k'u ri raqan. ¹⁰ Ri Jesús xub'ij chke: Mixej iwib'. Jib'ij chke ri wachalal chi rajwaxik keb'e' pa Galilea. Käkil k'u na nu wäch chila', —xcha chke.

Waral káqil wi jas ri xkib'ij ri soldados

¹¹ E b'enaq ri ixoqib' pa ri b'e, jujun chke ri soldados ri xechajin ri muqub'al xeb'e' pa ri tinimit Jerusalén, xekib'ij k'u chke ri ki nimaqil ri sacerdotes ri xk'ulmatajik. ¹² Are k'u ri ki nimaqil ri sacerdotes xeb'e' kuk' ri ki nimaqil ri winaq aj Israel, rech

kájunamataj ki tzij. Xkiya k'u nimaq taq puag chke ri soldados che tojb'al ke. ¹³ Xkib'ij k'u chke: Chib'ij ix chi chaq'ab' aretaq tajin kixwarik xepe ru tijoxelab' ri Jesús, xke-la'q'aj b'i ru cuerpo, —kixcha na. ¹⁴ We k'u kopan u b'ixik wa' ruk' ri q'atal tzij, ri uj kujtob' na chub'ixik che chi qas tzij rech man k'o tä k'äx kirigo, —xecha chke.

¹⁵ Xkik'am k'u ri puag ri soldados, je' xka'no jas ri xb'ix chke. Je wa' xel u tzijol chkixol ri winaq aj Israel, je k'u wa' käkitzijoj k'ä we kāmik ri'.

Ri Jesús keupixb'aj ri apóstoles

¹⁶ Xeb'e' k'u ri julajuj u tijoxelab' ri Jesús pa Galilea, pa ri juyub' ri xub'ij ri Jesús chke. ¹⁷ Aretaq xkil u wäch ri Jesús, xkiq'ijilaj. E k'o k'u jujun ri xub'an kieb' ki k'ux chrij. ¹⁸ Xqeb' k'u ri Jesús kuk' ru tijoxelab', xub'ij chke: Chwe in yo'm wi ronojel taqanik pa ri kaj, xuquje' pa ki wi' ri winaq cho ruwächulew, —xcha chke. ¹⁹ Jix b'a' kuk' konojel ki wäch winaq cho ruwächulew, chib'ana' chi keb'ok che nu tijoxelab'. Chib'ana ki qasna' pa ru b'i' ri qa Tat, pa ru b'i' ru K'ojol, pa ru b'i' ri Loq'alaj Espiritu. ²⁰ Cheitijoj chunimaxik ronojel ri ix nu taqom wi. Chiwetamaj k'ut chi ri in, in k'o iwuk' ronojel q'ij, k'ä pa ri k'isb'al q'ij re ruwächulew, —xcha ri Jesús chke ru tijoxelab'. Amén.

RI UTZALAJ TZIJ RE RI EVANGELIO RI XUTZ'IB'AJ RI SAN MARCOS

Ri Juan Qasal Ja' kätzijon pa taq juyub' ri kätz'inowik

¹ Je' u chaplexik wa' ri Utzalaj Tzij re ri Evangelio chrij ri Jesucristo ri u K'ojol ri Dios.

² Je wa' ri xtz'ib'ax kan ojer chrij ri Cristo* rumal ri qa mam Isaías ri q'alajisal re ru Loq' Pixab' ri Dios, kub'ij:
¡Chiwilampe'!

—xcha ri Dios chke ri winaq. Xub'ij k'u che ru K'ojol:

Ri in kintaq b'i ri nu taqo'n,

känab'ej k'u na chawäch,

kub'an na u b'anik ra b'e,

—xcha ri Dios che.

³ K'o jun ri ko käch'aw pa taq juyub' ri kätz'inowik, kub'ij: "Chib'ana u b'anik ri nim b'e ri käb'in wi ri Qajaw, chisuk'umaj, chib'ana k'u sib'alaj jikom che ru b'e,"

—kächa', —xcha ri qa mam Isaías. ⁴ Je wa' ri xpe ri tat Juan. Are k'u tajin kub'an ki qasna' ri winaq pa taq juyub' ri kätz'inowik. Kutzijoj k'u chke chi rajwaxik käkik'ex kan-ima', käkik'ex ki chomanik, te k'u ri' käb'an ki qasna' rech käq'alajinik chi je' ki b'anom wa'. Xa je ri' käsachtaj taq ri ki mak. ⁵ Xepe k'u konojel ri winaq aj Jerusalén, xuquje' ri e k'o pa taq ri nik'iaj tinimit chik re Judea, xeopan ruk' ri tat Juan chutatab'exik ri kub'ij. Aretaq käkiq'alajisaj ri ki mak, käb'an k'u ki qasna' rumal ri tat Juan pa ri nima' Jordán.

⁶ Are k'u ri tat Juan kukojatz'iaq ri b'anom ruk' ri rismal jun awaj camello† u b'i, tz'um ru pas. Xa sak' xuquje' u wa'l che' kutijo. ⁷ Kätzijon k'u ri tat Juan, kub'ij chke ri winaq: Käpe chi na Jun ri qas nim u q'ij, nim k'u na u b'anik chnuwäch in. Man taqal tä chwe in kinpachi'k kinkir ru k'amal u xajäb', —kächa'. ⁸ Qas tzij ri in nu b'anom qasna' alaq ruk' joron, ri Are' k'ut kub'an na qasna' alaq ruk' ri Loq'alaj Espiritu rech ri Dios, —xcha chke ri winaq.

Käb'an u qasna' ri Jesús

⁹ Pa taq ri q'ij ri' xpe ri Jesús pa ri tinimit Nazaret re Galilea, xopan ruk' ri tat Juan. Xb'an u qasna' rumal ri tat Juan pa ri nima' Jordán. ¹⁰ Te k'u ri' aretaq tajin kel loq ri Jesús pa ri ja', chanim xril ri kaj tajin käjaqjob'ik, xuquje' xril ri Loq'alaj Espiritu tajin käqaj loq puwi', je' ru b'anik

jun palomäx. ¹¹ Te k'u ri' xch'aw loq jun chikaj, xub'ij: At ri' ri loq'alaj nu K'ojol. Käkikot k'u ri wanima' awumal, —xcha ri'.

Kätaqchi'x ri Jesús che mak

¹² Te k'u ri' ri Loq'alaj Espiritu xuk'am b'i ri Jesús pa taq juyub' ri kätz'inowik. ¹³ Xk'oji k'u chila' kawinaq q'ij chxixol ri awaj aj pa taq juyub'. Kätaqchi'x ri Jesús che mak rumal ri Satanás. Xepe k'u ri ángeles chupatänixik.

Pa Galilea ri Jesús kuchaplej tzijonem

¹⁴ Mäja' naj kojom ri tat Juan pa che' aretaq ri Jesús xopan pa Galilea. Kutzijoj ri Utzalaj Tzij re ri Evangelio chrij ru taqanik ri Dios pa ki wi' ri winaq. ¹⁵ Xub'ij k'u ri Jesús chke: Xopan ri q'ij, xa jub'iq' chik man kuchaplej ru taqanik ri Dios. K'exa anima' alaq, k'exa b'a' alaq ri chomanik alaq, kojon k'u alaq che ri Utzalaj Tzij re ri Evangelio, —xcha chke ri winaq.

Ri Jesús keusik'ij kiejeb' chapal taq kär

¹⁶ Ok'owem kub'an ri Jesús chuchi' ri mar re Galilea, xril ri tat Simón rachi'l ri tat Andrés ru chaq'. Tajin käkik'iaq b'i jun k'at chapäb'al taq kär pa ri mar rumal chi e chapal taq kär ri e are'. ¹⁷ Xub'ij k'u ri Jesús chke: Chixsa'j wuk'. Kinb'an k'u na chiwe chi kixok che ki mulixik winaq chuk'exwäch ri kär, —xcha chke.

¹⁸ Chanim xekiya kan ri ki k'at, xeb'e' ruk' ri Jesús.

¹⁹ Xb'in chi k'u apan jub'iq' ri Jesús, xril ri tat Jacobo rachi'l ri tat Juan ru chaq', e u k'ojol ri tat Zebedeo wa'. E k'o pa ri ki barco, kekik'ojoj k'u ri ki k'at. ²⁰ Xeusik'ij ri Jesús. Ri e are' k'ut chanim xkiya kan ri Zebedeo ri ki tat pa ri barco kuk' ri ajchakib', xeb'e' k'u ruk' ri Jesús.

Jun achi ri k'o jun itzelalaj espíritu che

²¹ Xeopan k'u pa ri tinimit Capernaum. Are k'u pa ri q'ij re uxlanem xok ri Jesús pa ri rachoch Dios, xuchap ki tijoxik ri winaq chila'. ²² Ri winaq k'ut sib'alaj käkikajmaj ru tijonik ri Jesús rumal chi keutijoj je' jas jun achi ri k'o u taqanik pa ki wi', man junam taj jas ri käka'n ri tijonelab' re ri Pixab'. ²³ Xok k'u b'i pa ri rachoch Dios jun achi ri k'o jun itzelalaj espíritu che. Are chi' ri tajin käch'aw ri Jesús, ri achi xuraq u chi', ²⁴ xub'ij: ¡Aa! ¿Jas kaj la chqe uj, Jesús aj Nazaret? —kächa ri'. ¿A xa petinaq la chusachik qa wäch? In wetam wäch la, chi lal ri' ri loq'alaj achi taqom loq rumal ri Dios, —xcha che ri Jesús.

²⁵ Are k'u ri Jesús xuyajo, xub'ij che: ¡Chatz'apij u pa chi', chatel che we achi ri! —xcha che.

²⁶ Ri itzelalaj espíritu xub'an che ri achi chi xtzaqik, xuyakya rib', ko xuraq u chi',

* 1:2 Ri tzij "Cristo" o "Mesías" kel kub'ij "cha'tal rumal ri Dios".

† 1:6 Ri camello are jun awaj ri kuya' käkiejen jun chrij, más k'ut käkoj che taq eqa'n. Nim na ri' chuwäch jun kiej.

xel b'i che. ²⁷ Konojel k'ut xkikajmaj wa', xkichapla u tzijob'exik kib', xkib'ij: ¿Jas wa'? ¡jun k'ak' tijonik ne lo wa'! We achi ri' yo'm pu q'ab' keutaq ri itzelalaj taq espíritus, keniman k'u che, —xecha ri winaq.

²⁸ Chanim k'ut ri tajin káb'an rumal ri Jesús xel u tzijol wa' pa taq konojel ri tinimit ri e k'o pa Galilea, xuquje' pa taq ri tinimit ri naqaj e k'o wi che ri Galilea.

Ri Jesús kukunaj ru ji' chichu' ri tat Pedro

²⁹ Aretaq ri Jesús xel b'i pa ri rachoch Dios, xe' chanim cho rachoch ri tat Simón, ri tat Andrés, e rachi'l k'u ri tat Jacobo, ri tat Juan.

³⁰ Are k'u ru ji' chichu' ri tat Simón qajinaq che jun nimalaj q'aq'. Chanim k'ut xkitzijoj wa' che ri Jesús. ³¹ Ri Jesús xqeb' ruk' ri chichu', xuchap che ru q'ab', xuwalijisaj k'ut. Chanim xtáni ri q'aq' chriy ri chichu'. Xuchap k'u ri ki patänixik.

Ri Jesús keukunaj ri yawab'ib'

³² Aretaq xq'eqal chik, qajem kub'an ri q'ij, xekik'am b'i konojel ri yawab'ib' cho ri Jesús, xuquje' konojel ri e k'o itzel taq espíritus chke. ³³ Konojel ri winaq ri keb'el pa ri tinimit Capernaum xkimulij kib' chi' ri ja, rachoch ri tat Simón. ³⁴ Ri Jesús xeukunaj k'ia yawab'ib' ri e k'o k'ia u wäch yab'il chke, xuquje' xeresaj b'i k'ia itzel taq espíritus chke ri winaq. Man kuya tä k'u ri Jesús chke ri itzel taq espíritus chi kech'awik, rumal chi ketam u wäch.

Pa Galilea ri Jesús kutzijoj ri Utzalaj Tzij re ri Evangelio chriy ru taqanik ri Dios

³⁵ Sib'alaj aq'ab' k'ut xwalij ri Jesús, k'ä mäjoq kásaqirik. Xel b'ik, xe' pa ri juyub' ri kätz'inowik, xub'an k'u orar chila'. ³⁶ Are k'u ri tat Simón, xuquje' ri e k'o ruk' xeb'e'k, xkitzukuj ri Jesús. ³⁷ Aretaq xkiriqo, xkib'ij che: Konojel ri winaq ketzukun che la, —xecha che.

³⁸ Xub'ij k'u ri Jesús chke: Jo' pa ri jule' taq tinimit chik ri e k'o chqanaqaj, rech chila' xuquje' kintzizon wi. Che k'u wa' in elinaq wi loq, —xcha chke.

³⁹ Ri Jesús kusolij k'u taq ri tinimit pa ronojel Galilea. Pa taq ri rachoch Dios ri kákimulij wi kib' ri winaq, kutzijoj ri Utzalaj Tzij re ri Evangelio chriy ru taqanik ri Dios pa ki wi' ri winaq, xuquje' keresaj b'i itzel taq espíritus chke.

Ri Jesús kukunaj jun achi ri k'o itzel ch'a'k che

⁴⁰ Xopan k'u ruk' ri Jesús jun achi ri k'o itzel ch'a'k[†] che. Xuchap u b'ochi'xik ri Jesús, xxuki'k, xub'ij che: Tat, ri in wetam chi ri lal kákowin la che nu kunaxik we kaj la, —xcha che.

⁴¹ Xel k'u u k'ux ri Jesús che. Xuyuq ru q'ab', xuchap koq ri achi, xub'ij che: Kwaj, —kácha'. Chutzir b'a' la, —xcha che.

⁴² Xuwi wa' xub'ij, chanim xel ri itzel ch'a'k che ri achi, xutzirik. ⁴³ Ri Jesús sib'alaj xupixb'aj ri achi k'ä mäja' kutaq b'ik, ⁴⁴ xub'ij b'i che: ¡Tampe la! K'o jas mab'ij la che jachin jun. Oj la, jek'utu ib' la cho ri sacerdote. Ya la ri sipanik ri taqom kan rumal ri qa mam Moisés ojer chi käyi'k aretaq kákunataj jun ri k'o itzel ch'a'k che. Are k'u q'alajisab'al wa' chkiwäch ri winaq, —xcha che.

⁴⁵ Xel k'u b'i ri achi, sib'alaj kutzijoj ri xb'an che. Xresaj k'u u tzijoxik wa', je k'u ri' chi ri Jesús man kákowin tä chik kok chi saqil pa taq ri tinimit. Xane xaq pa taq juyub' ri kätz'inowik kák'oji wi ri Are'. Kepe k'u ri winaq pa ronojel tinimit, keopan ruk' ri Jesús.

2

Ri Jesús kukunaj jun achi ri káminaq u cuerpo

¹ Xopan jumul chik ri Jesús pa ri tinimit Capernaum. Xke' k'u kieb' oxib' q'ij, xtatajik chi k'o chi cho ja. ² Chanim k'ut xkimulij kib' k'ia winaq, je ri' chi man k'o tä chi jawije' kek'oji wi, pune ta ne xa chuchi' ri ja. Are k'u ri Jesús kutzijoj ru Loq' Pixab' ri Dios chke.

³ Xeopan k'u kiejeb' achijab' ruk' ri Jesús, ki telem jun achi ri káminaq u cuerpo. ⁴ Man kekowin tä k'ut keb'ok chuwäch ri Jesús, ki mak ri sib'alaj k'ia winaq. Xkesaj k'u apan ru xo'til ri ja. Xkik'ot jun jul puwi' ri ja chusik'el ri k'o wi ri Jesús, xkiquasaj k'u b'i ri alaj ch'at ri q'oyol wi ri káminaq u cuerpo. ⁵ Aretaq ri Jesús xrilo chi sib'alaj kekojon che, xub'ij che ri achi ri káminaq u cuerpo: Tat, ¡xesachtaj ri mak la! —xcha che.

⁶ E t'uyul k'u chila' jujun chke ri tijonelab' re ri Pixab', tajin kechomanik, ketzizon k'u pa kanima', ⁷ káki'ij: “¿Jas che je' kätzizon wa' we achi ri? Kúb'ij ri sib'alaj áwas u b'ixik,” —kecha'. “¿Jachin ta lo ri kákowin chusachik mak xane xaq xuwi ri Dios?” —xecha ri'.

⁸ Chanim xuna' wa' ri Jesús pa ranima', ya retam chik jas ri tajin kákichomaj, xub'ij k'u chke: ¿Jas che je' káchomaj alaq wa' pa anima' alaq? —kácha chke. ⁹ ¿Jachike ri man k'äx tä u b'ixik che ri achi, ri u b'ixik: “Ri mak la xesachtajik”, o ri u b'ixik: “Walij b'a' la, k'ama la b'i ri sok la, b'in b'a' la”? —kácha ri Jesús. ¹⁰ Rech b'a' ketamaj alaq chi ri in, in ri' ri Ralk'ual ri Dios ri Qas Winag, ^{*} k'o nu taqanik pa ki wi' ri winaq cho ruwächulew, xuquje' rech ketamaj alaq chi ya'tal chwe in

[†] 1:40 Ri itzel ch'a'k are jun yab'il ri sib'alaj k'äx ri kusipaj rib'.

^{*} 2:10 Ri Jesús xukoj we b'iaj ri' chb'il rib' chuk'utik chi are ri Cristo o ri Mesías ri tztz'ib'ax ojer pa ru Loq' Pixab' ri Dios chi kápetik.

chi kinsach ri ki mak, itampe alaŋ ri kinb'ij! —xcha chke.

Xub'ij k'u ri Jesús che ri achi ri kāmīnaŋ u cuerpo: ¹¹ Kinb'ij che la, iwaliŋ b'a' la! Oj la cho ja, k'ama la b'i ri sok la, —xcha ri Jesús che ri achi.

¹² Chanīm xwaliŋ ri achi, xutelej b'i ri alaj u ch'at. Xel b'i chkiwāch konojel, je ri' chi konojel xkikajmaj ri xb'antajik, xkinimarisaj u q'ij ri Dios, xkib'ij: ¡Man k'o tā jumul ri je' qilom wa'! —xecha'.

Ri Jesús kusik'ij ri tat Levi rech ke' ruk'

¹³ Ri Jesús xe' chi jumul chuchi' ri mar, sib'alaj e k'ia k'u ri winaq ri xeopan ruk'. Are k'u ri Are' xeutijoj che ru Loŋ' Pixab' ri Dios. ¹⁴ Ok'owem kub'an ri Jesús jawije' ri katoj wi ri alkab'al, xrii k'u ri tat Levi, u k'ojoj ri tat Alfeo, t'uuyul chila'. Xub'ij k'u che: Sa'j la wuk', —xcha che.

Xwaliŋ k'u ri tat Levi, xe' ruk' ri Jesús.

¹⁵ Pa jun q'ij k'ut t'uuyul ri Jesús chi' ri mesa cho rachoch ri tat Levi e rachi'l ru tijoxelab'. E k'ia k'u ri toŋ'il taŋ alkab'al, xuquje' nik'iaj ajmakib' e t'uuyoj chi' ri mesa ruk' ri Jesús, kuk' ru tijoxelab'. E k'ia k'u ri winaq e tereninaŋ loŋ. ¹⁶ Xepe k'u ri tata'ib' fariseos,† xuquje' ri tijonelaŋ' re ri Pixab'. Xkilo chi ri Jesús tajiŋ kawi' kuk' toŋ'il taŋ alkab'al xuquje' nik'iaj ajmakib' chik, xkita' k'u chke ru tijoxelab', xkib'ij: ¿Jas che kawi' ri Jesús kuk' toŋ'il taŋ alkab'al xuquje' nik'iaj ajmakib' chik? —xecha chke.

¹⁷ Aretaŋ xuta ri Jesús wa', xub'ij chke: Ri winaq ri utz ki wāch, ri k'o ki chuŋ'ab', man rajwaxik tā kunal ke, xane are rajwaxik wa' chke ri yawab'ib', —kācha chke. Man in petinaŋ tā che ki sik'ixik ri winaq ri jikom kanima' cho ri Dios, xane in petinaŋ che ki sik'ixik ri ajmakib' ri māja' kākik'ex kanima', māja' kākik'ex ki chomanik, —xcha ri Jesús chke.

E k'o winaq ri kākita' che ri Jesús chri ri u b'anik ayunar

¹⁸ Pa jun q'ij ri' tajiŋ kākā'n ayunar ru tijoxelab' ri Juan Qasal Ja' xuquje' ri ki tijoxelab' ri tata'ib' fariseos. E k'o k'u jujun winaq xeopan ruk' ri Jesús, xkib'ij che: Ru tijoxelab' ri tat jun xuquje' ri ki tijoxelab' ri tata'ib' fariseos kākā'n ayunar. ¿Jas k'u che man kākā'n tā ayunar ri tijoxelab' la? —xecha che.

¹⁹ Xch'aw k'u ri Jesús, xub'ij chke: ¿A kuya' ne lo kākā'n ayunar ri e k'o pa jun k'ulanem aretaŋ ri achi ri te' xk'uli'k k'o kan kuk'? Aretaŋ k'o ri achi ri' kuk' man kuya' taj kākā'n ayunar, —kācha'. ²⁰ Kopan k'u na ri

q'ij aretaŋ kesax b'i ri achi chkixol. Te k'u ri' kākā'n na ayunar pa ri q'ij ri', —xcha chke.

²¹ Xuquje' xub'ij ri Jesús: Man k'o tā jun winaq ri kut'is jun pimalaj k'ojoj'al chrii jun q'el atz'iaŋ. We ta je ri', ri k'ak' atz'iaŋ kuk'ol rib', kāresaj b'i jub'iq' che ri q'el atz'iaŋ, kānimar k'u ru teŋ'tob'ik, —kācha'.

²² Man k'o tā jun ri kuya k'ak' vino pa taŋ q'el taŋ q'eb'al re tz'um. We ta je ri', ri vino keut'ub'ij ri' ri tz'um, ketzeletaj k'u na kan ri vino xuquje' taŋ ri tz'um. Rajwaxik k'ut chi ri k'ak' vino kāyi' pa taŋ k'ak' taŋ q'eb'al re tz'um, —xcha ri Jesús.

Ri tijoxelab' kākich'up ri u jolom triko pa jun q'ij re uxlanem

²³ Pa jun q'ij re uxlanem ok'owem re ri Jesús pa taŋ ri tiko'n. Are chi' ri tajiŋ keb'in ru tijoxelab' ruk', xkichaplej ki ch'upik ru jolom taŋ ri triko. ²⁴ Ri tata'ib' fariseos xkib'ij che ri Jesús: ¡Chilampe la! ¿Jas che ri tijoxelab' la kākā'n chak ri āwas u b'anik pa taŋ ri q'ij re uxlanem? —xecha che.

²⁵ Xub'ij k'u ri Jesús chke: ¿A man k'o tā jumul ri sik'im alaŋ ri xub'an ri qa mam David ojer aretaŋ ri k'o rajwaxik che, xuna' numik, xuquje' ri xka'n ri e k'o ruk'? ²⁶ Xok k'u b'i ri qa mam David pa ri rachoch Dios aretaŋ ri tat Abiatar are ki nimal sacerdotes, xutij k'u re ri wa ri yo'm cho ri Dios, xuya k'u ke ri e k'o ruk' xuquje'. Āwas k'u u tijik wa' kumal xaŋ jachinoŋ, xane xaŋ xuwi chke ri sacerdotes‡ ya'tal wi wa', —xcha chke.

²⁷ Xuquje' xub'ij ri Jesús chke: Ri q'ij re uxlanem xb'antaj wa' ojer rech ri winaq kākiriŋ utzil rumal, man xeb'an tā k'u ri winaq rech kākā'n jun utzil che ri q'ij re uxlanem. ²⁸ Je k'u ri' ri in, ri ri' ri Ralk'ual ri Dios ri Qas Wināŋ, k'o nu taŋanik puwi' ri q'ij re uxlanem xuquje', —xcha ri Jesús chke ri tata'ib' fariseos.

3

Ri Jesús kukunaj jun achi ri kāmīnaŋ jun u q'ab'

¹ Xok chi jumul ri Jesús pa ri rachoch Dios, k'o k'u jun achi chila' ri kāmīnaŋ jun u q'ab'.

² Kaluchi'x k'u ri Jesús kumal jujun tata'ib' che rilik we kārutzirisaj ru q'ab' ri achi pa ri q'ij re uxlanem rech kuya' kākib'ij chi k'o u mak ri Jesús. ³ Xub'ij k'u ri Jesús che ri achi ri kāmīnaŋ jun u q'ab': ¡Waliŋ b'a' la! ¡Tak'al la chqawāch! —xcha che.

⁴ Xub'ij k'u ri Jesús chke ri achijab' ri tajiŋ kākāluchi'j: ¿Jachike ri man āwas tā u b'anik pa ri q'ij re uxlanem, ri u b'anik utzil o ri u

† 2:16 Ri tata'ib' fariseos e are' winaq wa' aj Israel ri sib'alaj xkigatej u nimaxik ru Pixab' ri Moisés. Xka'n k'u nimal, xkichomaj k'ut chi e utz na chkiwāch konojel ri winaq. K'ia ki naŋ'atisam wi kib' ri man qas tā are ri kub'ij ru Tziji ri Dios.

‡ 2:26 "Sacerdote aj Israel": Chawila' ri San Lucas 1:8, xuquje' ri Diccionario, k'isb'al re we Nuevo Testamento.

b'anik etzelal? ¿A utz ru to'ik ru k'aslemal jun winaq o ru kāmiasaxik wa'? —xcha chke.

Man xech'aw tā k'u ri tata'ib'. ⁵ Xpe roy-owal ri Jesús chke ri achijab' ri', keuka'yej konojel ri e k'o pa taq u xkut, kub'isoj ki wäch rumal chi sib'alaj ab'ajarinaq ri kan-ima'. Xub'ij k'u che ri achi: ¡Yuqu ri q'ab' la! —xcha che.

Xuyuq k'ut, xutzir k'u ru q'ab'. ⁶ Xeb'el k'u b'i ri tata'ib' fariseos, chanim xkiriq kib' kuk' ri rachi'l ri tat Herodes, xkitala' ki no'j chb'il taq kib' jas ri kaka'n chukāmiasaxik ri Jesús.

E k'o k'ia winaq chuchi' ri mar

⁷ Are k'u ri Jesús xe' apan chkiwäch ri winaq chuchi' ri mar, e rachi'l k'u ru tijox-elab'. Sib'alaj e k'ia ri winaq aj Galilea ri xeteri b'i chrij. ⁸ Xuquje' e k'ia ri winaq aj Judea xepetik. E k'o ri aj Jerusalén, xuquje' ri kepe pa Idumea. Nik'iaj kepe ch'äqäp che ri nima' Jordán, xuquje' pa taq ri tinimit Tiro, ri tinimit Sidón. Xa rumal chi xkita u tzijol ronojel ri tajin kub'an ri Jesús, xeopan k'u ruk'. ⁹ Xub'ij k'u ri Jesús chke ru tijoxelab' chi xaq chkö'ol jun barco ri kāk'o'ji wi ri Are', rech man kápitz' tā kumal ri k'ialaj winaq. Je' xka'no. ¹⁰ Are ri Jesús xeukunaj k'ia winaq, je ri' chi konojel ri yawab'ib' kākich'ikimij kib' chrij ri Jesús rech kākichap koq. ¹¹ Ri winaq ri e k'o itzelalaj taq espíritus chke, aretaq xkil ri Jesús, xetzaq k'u chuwwäch, xkiraq ki chi', xkib'ij: ¡Lal ri' ri u K'ojol ri Dios! —xecha che.

¹² Ri Jesús sib'alaj xeupixb'aj ri itzelalaj taq espíritus chi mākib'ij jachin ri Are'.

Kecha' ri kab'lajuj apóstoles rumal ri Jesús

¹³ Xpaqi k'u ri Jesús puwi' jun juyub'. Are k'u chila' ri xeusik'ij wi jachin taq ri xraj xeucha'. Xeopan k'u ruk'. ¹⁴ Xeukoj k'u kab'lajuj achijab' rech kek'o'ji ruk', rech keu-taq b'i chutzijoxik ru Loq' Pixab' ri Dios. ¹⁵ Xuquje' xuya chke chi kāk'o'ji ki kuinem che ki kunaxik ri yawab'ib', xuquje' xuya taqanik pa ki q'ab' che kesaxik b'i ri itzel taq espíritus chke ri winaq. ¹⁶ E are k'u wa' ri kab'lajuj ri xeucha' ri Jesús: ri tat Simón ri káb'ix Pedro che rumal ri Jesús, ¹⁷ ri tat Jacobo u k'ojol ri tat Zebedeo, xuquje' ri tat Juan ru chaq' ri tat Jacobo. E are' wa' ri xkoj Boanerges che ki b'i' rumal ri Jesús. Ri b'i'aj ri' kel kub'ij chi e junam ruk' ri kiäqul ja. ¹⁸ Xeucha' xuquje' ri tat Andrés, ri tat Felipe, ri tat Bartolomé, ri tat Mateo, ri tat Tomás, ri tat Jacobo u k'ojol ri tat Alfeo, ri tat Tadeo, ri tat Simón ri káb'ix “u nimal tinimit” che. ¹⁹ Ri tat Judas Iscariote, ri xjachow ri Jesús, xuquje' xcha'ik rumal.

Ri Jesús kutzijoj ri mak ri man käsachtaj taj

²⁰ Te k'u ri' xe' ri Jesús cho ja. Jumul chik xkimulij kib' k'ia winaq, je ri' chi ri Jesús e rachi'l ru tijoxelab' man kekowin tā ne kewi'k. ²¹ Aretaq ri rachelal ri Jesús xkito chi k'o chila', xeb'e' chuchapik. ¡Xkib'ij k'ut chi ch'ujarinaq ri Are'!

²² Ri tijonelab' re ri Pixab' k'ut, ri e petinaq pa Jerusalén, kākib'ij chi k'o ri Beelzebú ruk' ri Jesús. (Ri Beelzebú are ki nimal ri itzel taq espíritus.) Kākib'ij chi xa rumal wa' ri Jesús kākowin che kesax b'i ri itzel taq espíritus, —kecha ri'.

²³ Ri Jesús k'ut xeusik'ij ri winaq, xukoj jun k'utb'al chkiwäch, xub'ij: ¿Jas ta k'u lo kub'an ri Satanás che resaxik b'i rib'? —kācha chke. ²⁴ We jun q'atb'al tzij u b'anom kieb', ri juch'ob' q'atal taq tzij kuyak rib' chrij ri juch'ob' chik, kuk'is na u wäch ri q'atb'al tzij ri' chb'il rib'. ²⁵ Xuquje' we jun achalaxik u b'anom kieb', ri juch'ob' kuyak rib' chrij ri juch'ob' chik, kuk'is k'u na u wäch ri achalaxik ri' chb'il rib', —kācha'. ²⁶ We ta u b'anom kieb' ri Satanás, kuyak k'u rib' chrij chb'il rib', man kākowin tā ri' chujeqb'axik rib', xane kuk'is k'u na rib' ri are', —kācha'.

²⁷ Man k'o tā jun kākowinik kok pa ri rachoch jun achi ri sib'alaj k'o u chuq'ab', kerelaq'aj b'i ri jastaq re, we ta mat nab'e kuyut na ri achi ri k'o u chuq'ab', k'ä te k'u ri' kākowinik kerelaq'aj b'i ri k'o pa rachoch, —kācha ri Jesús chke.

²⁸ Qas tzij kinb'ij chech alaq chi konojel ri mak ri kaka'n ri winaq kuya' kesachtaj na wa', xuquje' apachike ta ne ri äwas u b'ixik chrij ri Dios, ri kākib'ij ri winaq, —kācha'. ²⁹ Apachin k'u ri kub'ij ri äwas u b'ixik chrij ri Loq'alaj Espiritu, man käsachtaj tā u mak ri' pa taq ri q'ij ri kepe na, rumal chi u b'anom jun mak ri man kuya' taj käsachtajik, —xcha chke.

³⁰ Ri Jesús xub'ij wa' rumal chi ri winaq xkib'ij: K'o jun itzelalaj espiritu che ri Are', —xecha ri'.

Ru nan ri Jesús xuquje' taq ru chaq' keopan ruk'

³¹ Xopan k'u ru nan ri Jesús ruk', xuquje' taq ru chaq'. Ri e are' k'ut xa e tak'atoj apan chrij ri ja, xetaqan k'u chusik'ixik ri Jesús. ³² E k'ia k'u ri winaq ri ki sutim rij ri Jesús, xkib'ij che ri Are': Ri nan la xuquje' taq ri chaq' la xaq e k'o apan cho ja, ketzukun che la, —xecha che.

³³ Xch'aw ri Jesús, xub'ij chke: ¿Jachin ri nu nan, jachin k'u taq ri qas nu chaq'? —kācha'.

³⁴ Xeuka'yej ri e t'uyut'oj pa taq u xkut, xub'ij: Chewilampe ri nu nan, xuquje' taq ri nu chaq'. ³⁵ Apachin ta ne ri káb'anow ru rayinik ri Dios, e are wa' ri qas wachalal, ri nu chaq', ri wanab', ri nu nan, —xcha ri Jesús chke.

4

Ri Jesús kutzizoj ri k'utb'al chrij ri tikol ija'

¹ Ri Jesús xuchaplej chi na jumol ki tijoxik ri winaq chuchi' ri mar. Xkimulij k'u kib' k'ialaj winaq ruk', je ri' chi xok b'i pa jun barco puwi' ri mar, xt'uyi k'u chupam. Konojel ri winaq xekanaj kan cho ri ulew chuchi' ri mar. ² Xeukoj k'u taq k'utb'al che ki tijoxik ri winaq chki' k'ia u wäch taq no', xub'ij chke: ³ ¡Tampe ala! —kächa'. Xel b'i jun tikol ija' cho rachoch, xe'k, xub'ana u tiko'n. ⁴ Areta'q tajin kujopij ri ija', xqaj jub'iq' pa ri b'e. Xeopan k'u ri chikop, ker-apapik kegajik, xa xkitij b'i ri ija'. ⁵ Xqaj chi jub'iq' xol taq ri ab'aj, ri man k'o tä wi k'ia ulew. Chanim k'ut xk'iy ri jub'iq' ija' ri' rumal chi man pim tä ri ulew. ⁶ Areta'q k'ut xel loq ri q'ij, xek'at ri alaj taq tiko'n, xechaq'jik rumal chi k'ä mäja' nim ki xera'. ⁷ Xqaj chi k'u jub'iq' ri ija' pa taq ri q'ayes ri k'o ki k'ixol. Xk'iy k'u ri q'ayes ri', xujiq'isaj ri tiko'n, je ri' chi man xwächin taj. ⁸ Are k'u ri nik'iaj ija' chik xeqaj pa utzalaj ulew. Xeb'el loq ri tux, xek'iyik, xewächinik. E k'o jujun tiko'n xkiya juwinaq lajuj ki wäch chupam ru jolom triko chki'ujunal, e k'o jule' chik ri xkiya oxk'al ki wäch chupam ru jolom chki'ujunal. Ri nik'iaj tiko'n chik xkiya jun ciento ki wäch chupam ru jolom chki'ujunal, —xcha chke.

⁹ Te k'u ri' xub'ij chke ri winaq: We k'o jun ri kujikib'a ranima' chutatab'exik ri nu tzij, ¡chutatab'ej b'a! —xcha chke.

Ri Jesús kub'ij chke ru tijoxelab' jas ki patän ri k'utb'al ri kukojo

¹⁰ Areta'q ri Jesús xaq u tukiel chik k'olik, xeopan jujun chke ri winaq ruk', kachi'l ri kab'lajuj u tijoxelab'. Xkita' k'u che jas kel kub'ij ri k'utb'al ri xutzizoj chke. ¹¹ Xch'aw k'u ri Jesús, xub'ij: Ri ix, yo'm chiwe rumal ri Dios ri retamaxik ri man ketam tä ri nik'iaj winaq chik chrij ru taqanik ri Dios pa ki wi' ri winaq. Are kätziox k'u wa' chke ri jule' winaq chik xa kuk' taq k'utb'al. ¹² Je ri', rumal chi pune jaqal ri ki waq'äch, man kekowin tä chuch'ob'ik ri käkilo. Pune k'u käkkitab'ej na ri qas tzij, man käkich'ob' tä ri' ri ki tatab'em, rech man käkitezlej tä kib' ruk' ri Dios, man käsachtaj tä ki mak, —xcha chke.

Ri Jesús kutzizoj chke ru tijoxelab' jas kel kub'ij ri k'utb'al chrij ri tikol ija'

¹³ Xub'ij chi k'u ri Jesús chke: ¿A mat lo kich'ob' ri kel kub'ij wa' we k'utb'al ri' ri xintzizoj chiwe? ¿Jas k'u kiwetamab'ej taq ke konojel ri nik'iaj taq k'utb'al chik ri keintzizoj na chiwe? —kächa chke. ¹⁴ Ri tikol ija' are junam ruk' ri winaq ri kutzizoj ru Loq' Pixab' ri Dios. ¹⁵ Ri ija' ri xeqaj pa ri b'e, e are k'u wa' jas ri winaq ri kätik ru

Tzij ri Dios pa kanima', käkita k'u ri Tzij, chanim k'ut käpe ri Satanás, käresaj ri Tzij ri xqaj pa kanima'. ¹⁶ Junam xuquje' ri ija' ri xeqaj xol taq ri ab'aj. E are wa' jas ri winaq ri käkita ru Tzij ri Dios ruk' kikotemal, je'l käkito. ¹⁷ Man qas tä k'u k'o ri ki xera', xane xaq kieb' oxib' q'ij käkich'ijo. Areta'q käkichaplej u riqik k'äx, kraj keyoq'ik rumal rech ru Tzij ri Dios, chanim ketzaq kanoq. ¹⁸ Ri jule' ija' chik ri xqaj pa taq q'ayes ri k'o ki k'ixol, e are wa' jas ri winaq ri käkita ru Tzij ri Dios. ¹⁹ Te k'u ri' are kekili' na ri jastaq re we uwächulew ri', kesub' rumal ri q'inomal, xuquje' käkirayij k'ia u wäch jastaq chik, ke' k'u kanima' kuk'. Rumal k'u wa' käjiq'isax ri Tzij pa kanima', man käwächin tä k'u ri'. ²⁰ Ri ija' ri xeqaj pa utzalaj ulew, e are k'u wa' jas ri winaq ri käkita ru Tzij ri Dios, käkik'amowaj, käqaj wa' pa kanima', käkiya k'u k'ia ki wäch. Jujun käkiya juwinaq lajuj ki wäch chki'ujunal, jule' chik käkiya oxk'al ki wäch chki'ujunal, ri nik'iaj chik käkiya jun ciento ki wäch chki'ujunal, —xcha chke.

Man k'o tä jas ri k'u'talik ri mat käq'alajin na

²¹ Xuquje' xub'ij ri Jesús chke: ¿A kätzij lo jun chäj pa ri ja, te k'u ri' käyi' wa' chuxe' jun laq, o käyi' chuxe' ri ch'at? Man je' tä ri', xane käyi' wa' chikaj rech q'alaj ronojel, —kächa'. ²² Man k'o tä jas ri ch'uq'tal u wi' ri mat käq'alajin na. Man k'o tä jas ri k'u'talik ri mat kel na chi saq, —kächa'. ²³ We k'o jun ri kujikib'a ranima' chutatab'exik ri nu tzij, ¡chutatab'ej b'a! —xcha chke.

²⁴ Xuquje' xub'ij ri Jesús chke: ¡Chitampe ri tajin kinb'ij chiwe! —kächa'. Jas ri pajb'al ri kiko' ix, are je' ri pajb'al ri kok na chiwe ix, xuquje' käyi' na u wi' chiwe ix ri kitatab'ej ri nu tzij. ²⁵ Apachin k'u ri k'o k'o ruk', käyi' chi na nik'iaj che. Apachin k'u ri man k'o tä k'o ruk', kesax na che ri are' ri jub'iq' ri k'olik, —xcha chke.

Kätziox ri k'utb'al chrij ri ija' jas kub'ano käk'iyik

²⁶ Xub'ij chi k'u chke: Ru taqanik ri Dios pa ki wi' ri winaq, are jas jun achi ri kutik kan ri ija' pa rulew. ²⁷ Käwar chaq'ab', käwalij k'ut. Käk'astaj chi paq'ij. Je ri' keok'ow taq ri q'ij, ri aq'ab'. Kätux k'u ri ija' ri k'o pa ulew, käk'iyik. Man retam tä k'u ri achi jas kub'an ri ija' käk'iyik. ²⁸ Tzpa re wi ri ulew kub'ano chi kek'iy ri tiko'n, kewächinik. Nab'e kel loq ru tux, käk'iy k'u wa'. Te k'u ri' käpe ru jolom ri triko. K'ä te ri' kechomaqir ru jolom. ²⁹ Areta'q e chomaq chik, chanim kākōj ri ixjos chkixej rumal chi chaqi'j chik, xopan ri q'ij rech ri q'atoj, —xcha chke.

Kätziox ri k'utb'al chrij ri ija' re mostaza

³⁰ Xub'ij chi ri Jesús: ¿Jas ruk' káqajunamay wi ru taqanik ri Dios? ¿Jas u wäch k'utb'al káqakoj chuk'utik wa'? —kácha'. ³¹ Are je' jas ri ija' re ri tiko'n ri káb'ix "mostaza" che. Aretaq kátikik, xa i nitz' wa' chkiwäch konojel ri ija' ri e k'o cho ruwächulew. ³² Aretaq tikom chik, kel loq, nim na ke' chkiwäch konojel taq ri nik'iaj tiko'n. Kenimaqir taq ru q'ab', je ri' chi ri chikop ajuwokaj kekowinik káka'n ri ki sok, kemu'jan chupam ri tiko'n ri', —xcha ri Jesús chke.

Waral kátzjox wi ri ki patän ri k'utb'al ri kekoj rumal ri Jesús

³³ Je wa' xub'an ri Jesús che ki tijoxik ri winaq. Xukoj k'ia taq k'utb'al chkiwäch jas taq we ri' chutzijoxik ru Loq' Pixab' ri Dios chke, xa jas ri kekowin chuch'ob'ik. ³⁴ Xaq xuwi kuk' taq k'utb'al xeutzijob'ej ri winaq. Xukir k'u ronojel wa' we tijonik ri' chkiwäch ru tijoxelab' xaq pa ki tukiel wi.

Ri Jesús kub'ano chi kätäni ri kiäqiq'

³⁵ Pa ri q'ij ri', aretaq tajin kok ri aq'ab', xub'ij chke ru tijoxelab': Chujq'ax jela' ch'äqäp che ri mar, —xcha chke.

³⁶ Xekiya k'u kan ri k'ia winaq. Ri tijoxelab' xkik'am b'i ri Jesús pa ri barco. T'uuyul k'u wi ri Are' chupam. Xkachi'laj k'u b'i nik'iaj taq barcos chik. ³⁷ Xpe k'u jun nimalaj kiäqiq' ri sib'alaj k'äx puwi' ri ja'. Are k'u ri nimaq taq uwoja' tajin keb'ok pa ri barco, je ri' chi tajin kánoj ri barco che ri ja'. ³⁸ K'o k'u ri Jesús pa ri barco pa ri ku'lb'al chrij. Tajin káwarik, u yo'm ru jolom puwi' jun ch'äkataj. Xepe ru tijoxelab', xkik'asuj, xkib'ij che: ¡Qajtij! ¿A mat káxej ib' la chqe chi kujkämik? —xecha che.

³⁹ Xk'astaj k'u ri Jesús, xuyaj ri kiäqiq', xub'ij che ri mar: ¡Chattänaloq! ¡Xaq jun chatk'ol wi! —xcha che.

Xtän k'u ri kiäqiq', xillob' k'u ronojel ru wi' ri mar. ⁴⁰ Te k'u ri' xub'ij ri Jesús chke ri tijoxelab': ¿Jas che sib'alaj kixej iwib'? ¿A mat kixkojon che ri Dios? —xcha chke.

⁴¹ Xkikajmaj k'u ri xub'an ri Jesús, ¡sib'alaj xkixej kib'! Käkib'ila' k'u chb'il taq kib', kákib'ij: ¿Jachin k'u lo we achi ri' chi ri kiäqiq', xuquje' ri ja' re ri mar keniman che? —xecha'.

5

K'o jun achi aj Gadara ri e k'o itzelalaj taq espíritus che

¹ Xeopan ch'äqäp che ri mar pa ri ki tinimit ri winaq aj Gadara. ² Aretaq elem kub'an ri Jesús pa ri barco, chanim xriq rumal jun achi ri k'o jun itzelalaj espíritus che. Elinaq loq ri achi pa ri campo santo chkixol ri muqub'al. ³ Chila' k'ut, xol taq ri muqub'al, kájeqi wi. Man k'o tä jachin jun ri kowininaq chuyugb'axik, pune xkixim na kuk' ximib'al re ch'ich'. ⁴ K'ia mul ximom

kuk' chapb'al aqanaj, xuquje' kuk' ximib'al re ch'ich'. Xeut'oqopij k'u ri ximib'al re ch'ich', xeupaxij ri chapb'al aqanaj. Man k'o tä jun ri k'o u chuq'ab' chujeq'b'axik ri achi ri'. ⁵ Chi chaq'ab', chi paq'ij kák'oji ri achi ri' xol taq ri muqub'al xuquje' pa taq juyub', kuraq u chi', kusok k'u rib' kuk' taq ab'aj. ⁶ Aretaq k'ut ri achi xril apan ri Jesús chinaj, xutik anim, xe' ruk', xxuki chuwäch. ⁷ Xuraq k'u u chi', ko xch'awik, xub'ij: ¿Jas kaj la chwe, Jesús, lal ri' ru K'ojol ri Nimalaj Dios aj Chikaj? Kinb'ochi'n che la cho ri Dios, chi máb'an la k'äx chwe, —xcha che.

⁸ Xub'ij wa' rumal chi ri Jesús tajin kub'ij che: ¡itzelalaj espíritus, chatel b'i che ri achi! —kácha che.

⁹ Xuta' k'u ri Jesús che, xub'ij: ¿Jas ra b'i'? —xcha che.

Xub'ij k'u che ri Jesús: Ri nu b'i' are K'iyal. Je wa' ri nu b'i' rumal chi sib'alaj uj k'ia, —xcha che.

¹⁰ Sib'alaj xub'ochi'j ri Jesús chi mätaqanik chi cheb'el b'i pa ri tinimit ri'. ¹¹ E sib'alaj k'ia k'u ri aq ri tajin keyuq'ux apan chila' pa ri juyub' ri'. ¹² Ri itzelalaj taq espíritus tajin keb'ochi'n che ri Jesús, kákib'ij: Chujtaqa b'i la kuk' ri aq rech kujok b'i chke, —kecha che.

¹³ Ri Jesús k'ut xuya chke chi je' káka'no. Xeb'el k'u b'i ri itzelalaj taq espíritus, xeb'ok b'i chke ri aq. Konojel ri aq, kraj e k'o kieb' mil, xkik'iaq b'i kib' chutzam' ri juyub', xeqaj k'u pa ri mar, xejiq'ik.

¹⁴ E are k'u ri ajuyuq' taq aq xeanimajik, xeb'ek'. Xkiya u tzijol wa' pa ri tinimit, xuquje' pa taq ri juyub'. Xepe k'u ri winaq che rilik jas ri' ri xb'antajik. ¹⁵ Aretaq xeopan ruk' ri Jesús, xkil ri achi ri nab'e xek'oji na k'ia itzelalaj taq espíritus che. T'uuyul k'u ri achi chila', kojom chi ri ratz'iaq, ulinaq chi putzil. Xkixej k'u kib' ri winaq. ¹⁶ Ri winaq ri xkilo jas ri xb'an che ri achi ri xek'oji ri itzelalaj taq espíritus che, xuquje' jas ri xkik'ulmaj taq ri aq, xkitzijoj k'u ronojel wa' chke ri winaq ri xkimulij kib'. ¹⁷ Xkib'ochi'j k'u ri Jesús chi kel b'i chanim pa ri ki tinimit.

¹⁸ Okem kub'an ri Jesús pa ri barco, ri achi ri xek'oji ri itzelalaj taq espíritus che xub'ochi'j ri Jesús chi kuya che chi ke' ruk'. ¹⁹ Man xuya tä k'u ri Jesús che, xane xub'ij che: Oj la cho achoch la kuk' ri achalaxik la, tzijoj la chke ri e are' ronojel ru b'anom ri Qajaw Dios che la, chi sib'alaj xel u k'ux che la, xutoq'ob'isaj wäch la, —xcha che.

²⁰ Xe' k'u ri achi, xutzijoj k'u pa taq ri tinimit re Decápolis ronojel ru b'anom ri Jesús che. Xkikajmaj k'u wa' konojel ri winaq.

Kākunax jun ixoq yawab', xuquje' kāk'astajisax ri u mia'l ri tat Jairo chkixol ri kāmīnaqib'

²¹ Aretaq ri Jesús xq'ax chi jumul ch'äqäp che ri mar pa ri barco, sib'alaj k'ia winaq xkimulij kib' ruk'. K'o k'u ri Are' chuchi' ri mar. ²² Xopan k'u jun achi ruk' ri Jesús. Are ki nimal ri winaq re ri rachoch Dios ri tata' ri', Jairo u b'i'. Aretaq ri tat Jairo xril ri Jesús, xxuki chuwäch. ²³ Sib'alaj xub'ochi'j ri Jesús, xub'ij che: ¡Ri alaj nu mia'l tajin kākāmik! ¡Sa'j la wuk'! Ya la ri q'ab' la puwi' rech kutzirik, kāk'asi k'ut, —xcha che.

²⁴ Xe' k'u ri Jesús ruk'. E k'ia ri winaq ri xuquje' xeb'e' ruk', kākīpitz' k'u ri Jesús. ²⁵ K'o k'u jun ixoq ri xke' kab'lajuj junab' xaq kel u kik'el. ²⁶ Sib'alaj u riqom k'äx pa ki q'ab' k'ia taq kunanelab' u sachom k'u ronojel ri k'o ruk'. Man k'o tä k'u utzil u riqom, xane xa tajin kāmīmataj. ²⁷ Aretaq xuta u tzijol ri tajin kub'an ri Jesús, xopan k'u ruk'. Xok chkixol ri k'ialaj winaq, xqeb' chrij ri Jesús, xuchap koq ru q'u'. ²⁸ Kub'ij k'u pa ranima': "Xuwi ta ne we kinchap koq ru q'u', ¡kinutzir na!" —kächa ri ixoq. ²⁹ Chanim k'ut, aretaq xchapaj ru q'u' ri Jesús rumal, xtāni ru kik'el ri kelik. Xuna' ri ixoq pa ru cuerpo chi xkunataj che ri itzelalaj yab'il ri u riqom. ³⁰ Ri Jesús k'ut xuna' chi xel jub'iq' ru chuq'ab' chukunaxik ri ixoq. Chanim xutzolq'omij rib' chkixol ri k'ialaj winaq, xka'y k'u chke, xub'ij: ¡Jachin ri xchapow ri watz'iaq? —xcha'.

³¹ Xkib'ij k'u ru tijoxelab' che: ¡kil ya' la chi kāpitz' la kumal ri k'ialaj taq winaq! ¡Jas che káb'ij la: "¡Jachin ri xinchapowik?" —kächa la, —xecha che ri Jesús.

³² Kāka'ylob' k'u ri Jesús che rilik jachin ri xb'anow wa'. ³³ Are k'u ri ixoq ri xchapowik, xuxej rib', xb'irb'ituk, xe' ruk' ri Jesús, xxuki k'u chuwäch. Kuch'ob'o chi xkunataj rumal ri Are', xutzijoj k'u che ri Jesús ronojel ri qas tzij chrij ri k'ulmatajinaq ruk'. ³⁴ Ri Jesús xub'ij che: Nan, xkunataj la rumal chi xkojon la chwe. Oj b'a' la, chuxlan anima' la, xutzir k'u kan la che ri yab'il la, —xcha che.

³⁵ Tajin kätzijon ri Jesús aretaq xeopan jun winaq, e petinaq pa rachoch ri ki nimal ri winaq re ri rachoch Dios, xkib'ij che ri tat Jairo: ¡xkām ri mia'lla! Xaq māya la latz' che ri Ajtij, —xecha che ri tata'.

³⁶ Aretaq ri Jesús xuta ri xb'ixik, man nim tä xril wi wa', xub'ij che ri ki nimal ri winaq re ri rachoch Dios: Māxej ib' la, xane xaq xuwi kojon la chwe, —xcha che.

³⁷ Man xraj tä k'u ri Jesús chi k'o jachin chik xe' ruk', xane xaq xuwi ri tat Pedro, ri tat Jacobo, xuquje' ri tat Juan u chaq' ri tat Jacobo. ³⁸ Aretaq xeopan cho rachoch

ri ki nimal ri winaq re ri rachoch Dios, ri Jesús xriilo chi ri winaq kākītukij kib', xuquje' kākik'is kib' che oq'ej, sib'alaj kākīraq ki chi'. ³⁹ Okinaq k'u b'i ri Jesús pa ri ja, xub'ij chke: ¡Jas che sib'alaj kārāq chi' alaq, kāk'is ib' alaq che oq'ej? Man kāmīnaq tä ri ak'al, xane xa kāwarik, —xcha che.

⁴⁰ Ri e are' xa xkitze'j u wäch ri Jesús. Ri Are' k'ut xeresaj b'i konojel ri winaq cho ja. Xeuk'am ru tat, ru nan ri ak'al, xuquje' taq ri rachi'l, xok k'u b'i jawije' tutz'ul wi ri ak'al. ⁴¹ Ri Jesús xuchap ri ali che ru q'ab', xub'ij che: ¡Talita, kumi! —xcha che. Ri tzij ri' kel kub'ij: ¡Alaj ali! Kinb'ij chawe, ¡chatwalijoq! —kächa'.

⁴² Chanim xwalij ri ali, xb'inik. Kab'lajuj chi k'u u junab'. Sib'alaj xkikajmaj wa' ri winaq. ⁴³ Ri Jesús sib'alaj xcupixb'ij chi mākitzijoj wa' chke nik'iaj winaq chik. Xub'ij chi chkiya che ri ali jas kutjo.

6

Jumul chik ri Jesús k'o pa ri tinimit Nazaret

¹ Xel b'i ri Jesús chila', xtzelej k'u b'i pa ru tinimit ri Are', xeb'e' k'u ru tijoxelab' ruk'. ² Aretaq xopan ri q'ij re uxlanem, ri Jesús xuchaplej ki tijoxik ri winaq pa ri rachoch Dios. Xkikajmaj k'u wa' k'ia chke ri winaq ri xeto'wik, xkib'ij: ¡Jawije' xretamaj wi ronojel wa' ri Are'? —kecha'. ¡Jas u wäch no'j wa' ri yo'm che? ¡Jas ta k'u lo kub'an che ki b'anik ri nimalaj taq kajmab'al ri tajin keb'antaj rumal? —kecha'. ³ Are b'a' wa' ri qolol che',* ri ral ri nan María, katz ri a Jacobo, ri a José, ri a Judas, xuquje' ri a Simón. E k'o k'u ri ranab' ri Jesús quk' waral xuquje', —xecha'. Tzel k'u xkita ru tzij.

⁴ Xub'ij k'u ri Jesús chke: Pa nik'iaj tinimit chik nim kil wi ronojel q'alajisal re ru Loq' Pixab' ri Dios. Xaq xuwi pa ru tinimit ri are', xuquje' chkixol ri rachalal, xuquje' cho rachoch, man nim tä kil wi wa', —xcha che.

⁵ Man xkowin tä k'u ri Jesús chub'anik jun nimalaj kajmab'al chila', xane xaq xuwi xuya ru q'ab' pa ki wi' kieb' oxib' yawab'ib', xeukunaj. ⁶ Ri Are' xukajmaj wa' chi man k'o tä jub'iq' ri ki konojel ri winaq che. Xeusolij k'u taq ri alaj taq tinimit ri e k'o chunaq ri Nazaret, xeutijoj ri winaq chila'.

Ri Jesús keutaq b'i ri kab'lajuj u tijoxelab' chutzijoxik ri Utzalaj Tzij re ri Evangelio

⁷ Ri Jesús xeusik'ij ri kab'lajuj u tijoxelab' ruk', xuchaplej ki taqik b'i chi kakab'il. Xuya taqanik pa ki q'ab' che kesaxik b'i ri itzelalaj taq espíritus. ⁸ Xub'ij k'u chke chi k'o jas mākik'am b'ik, mākik'am b'i ki chim, o ki wa, o puag pa ri k'olib'al ki rajil, xane xaq xuwi ri ki ch'imiy. ⁹ Xuquje' xub'ij chke

* 6:3 Ri qolol che' xuquje' káb'ix "ajanel" o "carpintero" che rumal ru chak.

chi chikikojo b'i ki xajäb', mäkik'am k'u b'i kieb' ki kamixa', xane xa jun käkikoj b'ik.¹⁰ Xub'ij xuquje' ri Jesús chke: Apachike ja ri kixok wi, chila' chixkanaj wi kanoq k'ä kixel na b'i pa ri tinimit ri', —kächa'.¹¹ Apachike tinimit ri man kixk'ulax tä wi, ri man kākaj taj kākītatab'e'j ri i tziy, aretaq kixel b'i chila', chitota' kan ri ulew ri k'o che taq ri iwaqan. Chib'ana wa' chuq'alajisaxik chkiy ri winaq re ri tinimit ri' chi man utz tä ri kāk'a'no, k'o ki mak. Qas tziy kinb'ij chiwe chi pa ri q'ij ri kāk'at na tziy pa ki wi' ri winaq ri' rumal ri Dios, kätan na ri' ri kāk'an chuk'äjisaxik ki wäch ri winaq re ri tinimit Sodoma, re ri tinimit Gomorra[†] chuwach ri kāk'an chuk'äjisaxik ki wäch ri winaq re ri tinimit ri', —xcha chke.

¹² Xeb'el k'u b'i ri tijoxelab', xeb'e'k, xkitz-ijoj chi ri winaq rajwaxik kākik'ex kanima', kākik'ex k'u ki chomanik. ¹³ Xekesaj k'u k'ia itzel taq espíritu chke ri winaq. Xuquje' xkikoj aceite chke k'ia yawab'ib', xekikunaj k'ut.

Käkämisax ri Juan Qasal Ja'

¹⁴ Ri nim taqanel Herodes xretamaj ri tajin kub'an ri Jesús rumal chi konojel ri winaq ki tom u tziyol ronojel wa'. Xub'ij k'u ri tat Herodes: Are ri Juan Qasal Ja' ri' ri xk'astaj loq chkixol ri kāmīnaqib', rumal k'u ri' k'o u kuinem ri are' chub'anik k'ia u wäch kajmab'al, —xcha'.

¹⁵ E k'o k'u nik'iaj chik tajin kākib'ij: Are ri tat Elías wa' ri ojer qa mam, —kecha'.

Nik'iaj chik kākib'ij: Are wa' jun chke ri ojer q'alajisal taq re ru Loq' Pixab' ri Dios, —xecha ri'.

¹⁶ Aretaq k'ut xuta wa' ri tat Herodes, xub'ij ri are': Are ri tat Juan wa' ri xinwesaj u jolom, xa k'astajinaq loq chkixol ri kāmīnaqib', —xcha'.

¹⁷ (Xa k'u rumal rech ri nan Herodías xkāmīsax ri Juan Qasal Ja'.) Tzare k'u ri tat Herodes xtaqan chuchapik ri tat Juan rech kâyutik kâyi' pa che', xa rumal rech ri nan Herodías ri xk'uli ruk' ri tat Herodes, pune are rixoqil ri tat Felipe ru chaq' ri tat Herodes. ¹⁸ Xchap k'u ri tat Juan rumal chi ri are' xub'ij che ri tat Herodes: Man taqal tä che la chi kāk'an ixoqil la che ri rixoqil ri chaq' la, xane äwas ri kāk'an la, —xcha che.

¹⁹ Sib'alaj xpe royowal ri nan Herodías che ri tat Juan rumal ronojel ri xub'ij. Sib'alaj kraj u kāmīsaxik. Man kākowin tä k'ut rumal ri tat Herodes. ²⁰ Je ri', rumal chi ri tat Herodes nim kārīl wi ri tat Juan, kuxej k'u rib' chuwach. Retam k'ut chi are jun utzalaj achi ri jikom ranima' cho ri Dios. Xa rumal ri' kuchajij ri tat Juan rech man

k'o tä k'äx kāk'an che. Aretaq k'ut ri tat Herodes kutatab'e'j ru tziy, man kuriq taj jas kub'ano. Pune ta ne je ri', sib'alaj xqaj chuwach ri tat Herodes xutatab'e'j ri xub'ij. ²¹ Xuriq k'u ri nimaq'ij re ri rok'owisaxik u junab' ri tat Herodes. Ri are' xub'an jun nimalaj wi'm chke ri winaq ri nimaq' ki b'anik ri e k'o ruk', xuquje' chke ri ki nimaqil ri soldados, kachi'l ri ki nimaqil ri winaq aj Galilea. ²² Tajin kewi' ri rula' aretaq ri ali ri ral ri nan Herodías xok b'i kuk', xuchap xojowem chkiwach, kăxojowik, kăxojowik. Xqaj k'u ri ali chuwach ri tat Herodes, xuquje' chkiwach ri tajin kewi' ruk'. Xub'ij k'u ri nim taqanel che ri ali: Chata' b'a' chwe jas ri kawaj, kinya k'u na wa' chawe, —xcha che.

²³ Ri tat Herodes xuchi'j che ri ali ruk' juramento, xub'ij: Apachike ta ne ri kata' chwe kinya na chawe. Pune ta ne kata' chi kinya nik'iaj chke taq ri tinimit ri kintaqan wi, kinya na wa' chawe, —xcha che. ²⁴ Xel k'u b'i ri ali, xuch'ab'e'j ru nan, xub'ij: ¿Jas ta ne ri kinta' che? —xcha che.

Xub'ij k'u ru nan: ¡chata' chi kâyi' chawe ru jolom ri Juan Qasal Ja'! —xcha che.

²⁵ Aninaq xok chi b'i ri ali ruk' ri nim taqanel, xuta' che, xub'ij: ¡Kwaj chi kâya la chwe ru jolom ri Juan Qasal Ja' pa jun plato chanim ri'! —xcha che.

²⁶ Sib'alaj xb'ison k'u ri tat Herodes. Ri are' man kraj taj kuk'ex ri xuchi'j che ri ali, rumal chi xub'ij wa' ruk' juramento chkiwach konojel ri rula'. ²⁷ Chanim ri nim taqanel xutaq b'i jun chke ri soldados chuk'amik loq ru jolom ri Juan Qasal Ja'. ²⁸ Xel k'u b'i ri soldado, xe'k, xresaj u jolom ri tat Juan ri k'o pa che'. Xuk'am loq pa jun plato, xuya che ri ali, ri ali k'ut xuya che ru nan.

²⁹ Aretaq xkita wa' ru tijoxelab' ri tat Juan, xeb'e' che rilik, xkik'am k'u b'i ru cuerpo, xkiya pa jun muqub'al.

Ri Jesús kuya ki wa job' mil winaq

³⁰ Xkimulij k'u kib' ruk' ri Jesús ri kab'lajuj apóstoles[‡] ri taqom b'i rumal, xkitzizijoj che ri Are' ronojel ri xka'no, xuquje' ronojel ri xekitijoj wi ri winaq. ³¹ Xub'ij k'u ri Jesús chke: Chixsa'j wuk' xa i tukiel wi. Jo' jawije' ri man k'o tä wi winaq, kujuxlan k'u jun rat chila', —xcha chke.

Je' xub'ij wa' rumal chi e k'ia winaq ri tajin keopan kuk', xuquje' e k'o ri tajin keb'el b'ik, je ri' chi ri Jesús e rachi'l ru tijoxelab' man kekowin taj kewi'k. ³² Xeb'e' ki tukiel wi pa jun barco, xeopan chila' pa ri juyub' ri kätz'inowik. ³³ E k'ia k'u ri winaq ri e petinaq pa taq konojel ri tinimit chila'. Xkilo aretaq xe' ri Jesús e rachi'l ru tijoxelab', xkich'ob'

[†] 6:11 Ri kieb' tziy "Sodoma" y "Gomorra" keriqtaj pa ri Diccionario, k'isb'al re we Nuevo Testamento. [‡] 6:30 Ri tziy "apóstol" kel kub'ij "taqom". E kab'lajuj u taqo'n ri Jesús ri e cha'tal rumal.

k'u ki wäch. Xa je ri' ri winaq chi kaqan xeb'e' ri e are' jela' jawije' ri xeb'e' wi ri Jesús, ru tijoxelab'. Xkikowij b'ik, xeopan k'u nab'e chkiwäch. ³⁴ Aretaq xel loq ri Jesús pa ri barco, xeril ri k'ialaj winaq. Xel k'u u k'ux chke rumal chi je' ta ne e chij ri man k'o tä kajyuq'. Ri Jesús k'ut xuchaplej ki tijoxik. K'ia k'ut ri xuk'ut chkiwäch. ³⁵ Qajem k'u kub'an ri q'ij, ru tijoxelab' xegeb' ruk', xkib'ij che: We juyub' ri' ri uj k'o wi sib'alaj kätz'inowik, b'enaq chi k'u ri q'ij. ³⁶ Chetaqa la b'i ri winaq rech keb'e' cho taq kachoch ri winaq ri e sutininaq chqij, xuquje' pa taq ri alaj taq tinimit ri naqaj e k'o wi, käkiloq' k'u na ri ki wa. Man k'o tä k'u ri käkijito, —xecha che.

³⁷ Xch'aw k'u ri Jesús, xub'ij chke: Chiya ix ri käkijito, —xcha chke.

Xkib'ij ru tijoxelab' che: ¿Jas ta k'u kää'a'no? ¿A kujkowin ta lo kuje'k keqaloq' kieb' cientos quetzales kaxlan wa che tzuqub'al ke we winaq ri'? —xecha che.

³⁸ Xuta' k'u ri Jesús, xub'ij chke: ¿Janipa' kaxlan wa e k'o iwuk'? jiwilampe'! —xcha chke.

Aretaq xketamaj, xkib'ij: Xa job' kaxlan wa e k'olik, xuquje' kieb' kâr, —xecha che.

³⁹ Xtaqan k'u ri Jesús chi ket'uyi ri winaq pa taq mulaj cho ri räxalaj uwosaq. ⁴⁰ Xet'uyi k'ut pa taq mulaj, pa taq ciento, pa nik'iaj taq ciento. ⁴¹ Ri Jesús xeuk'am k'u ri job' kaxlan wa xuquje' ri kieb' kâr, xka'y chikaj, xeutewchij. Te k'u ri' xeupeir ri kaxlan wa, xeuya chke ru tijoxelab' rech kekijach wa' chkiwäch ri winaq. Xuquje' ri kieb' kâr xeujach chkiwäch konojel. ⁴² Xewi' k'u konojel, xenoj k'ut. ⁴³ Te ri' xekik'ol ri ch'äqataq taq kaxlan wa, xuquje' ri ch'äqataq kâr ri xekanaj kanoq. Xub'an kab'lajuj chikäch wa chi ronojel. ⁴⁴ E job' mil achijab' k'ut ri e k'o chkixol ri winaq ri xewi'k, ri xkitij ke ri wa.

Ri Jesús káb'in puwi' ri ja'

⁴⁵ Te k'u ri' ri Jesús xub'ij chke ru tijoxelab' chi utz we keb'ok pa ri barco rech keb'e'k, kenab'ej apanoq chuwäch ri Are' pa ri tinimit Betsaida ch'äqäp che ri mar. Are k'u ri Jesús xkanaj kan kuk' ri k'ialaj winaq che ri jachik b'ik. ⁴⁶ E jachtajinaq chi k'u b'i ri winaq rumal ri Jesús, xe' ri Are' pa ri juyub' chub'anik orar. ⁴⁷ Are chi' ri tajin kok ri aq'ab', ri tijoxelab' e k'o pa ri barco puwi' ri ja' pu nik'iajal ri mar. Are k'u ri Jesús u tukiel k'o kan chuchi' ri mar. ⁴⁸ Xrilo chi ru tijoxelab' tajin käkiriq k'äx chub'inisaxik ri barco rumal chi chkiwäch petinaq wi ri kiäqiq'. Xa jub'iq' kraj man käsaqirik aretaq xopan ri Jesús kuk', tajin káb'in puwi' ri ja'. U chomam ri Jesús chi xa kok'ow chkiwäch. ⁴⁹ Aretaq ri tijoxelab' xkilo chi káb'in ri Jesús puwi' ri ja', xkichomaj k'ut chi are jun xib'inel wa'. Xexib'ix k'u rumal,

xkiraq k'u ki chi'. ⁵⁰ Je ri', rumal chi konojel xkilo, sib'alaj xkixej kib'. Chanim ri Jesús xeuch'ab'ej, xub'ij chke: In wa', jmixej iwib', chichajij iwanima'! —xcha chke.

⁵¹ Xok k'u b'i ri Jesús pa ri barco kuk' ru tijoxelab', xtäni k'u ri kiäqiq'. Sib'alaj k'u xkikajmaj wa' ri tijoxelab'. ⁵² Man okinaq tä k'u pa ki jolom jas kel kub'ij ri kajmab'al ri xub'an ri Jesús aretaq xujach ri kaxlan wa chke ri winaq, xane xa ab'ajarinaq ri kanima'.

Ri Jesús keukunaj ri yawab'ib' pa Genesaret

⁵³ E q'axinaq chi ch'äqäp che ri mar, xeopan chuchi' ri ulew pa Genesaret, xkixim k'u ri ki barco chila' chuchi' ri mar. ⁵⁴ Aretaq xeb'el b'i pa ri barco, ri winaq chanim xkich'ob' u wäch ri Jesús. ⁵⁵ Xeb'inlob'ik, xekisolij konojel taq ri tinimit chila'. Are k'u ri winaq xkichaplej ki k'amik loq ri yawab'ib' cho taq alaj taq ch'at jawije' chi' ri käkito chi k'o wi ri Jesús. ⁵⁶ Apawije' chi' k'ut ri xopan wi ri Jesús, we pa taq alaj taq tinimit, we pa nimaq taq tinimit, we k'u pa taq juyub', xeyi' ri yawab'ib' pa taq ri b'e, xkib'ochi' k'u ri Jesús chi xuwi ta ne kuya chke chi käkichap koq u chi' ru q'u'. Konojel k'u ri xechapowik xeutzir kanoq.

7

Käriqtaj k'äx rumal ri e naq'atal wi ri winaq

¹ Ri tata'ib' fariseos xuquje' jujun chke ri tata'ib' tijonelab' re ri Pixab' ri e petinaq pa ri tinimit Jerusalén xkimulij kib' chri' ri Jesús. ² Xekil k'ut chi jujun chke ru tijoxelab' ri Jesús käkijito ri ki wa, man kää'a'n tä k'u ke ri e naq'atal wi ri fariseos. Are wa' ri u ch'ajik ri rij ri ki q'ab', na'l kää'a'n che. Tzel k'u xkil wa' ri fariseos, xeyoq'on chke ru tijoxelab' ri Jesús. ³ Je ri', rumal chi ri tata'ib' fariseos, xuquje' konojel ri nik'iaj winaq aj Israel na'l käkich'aj ri rij ki q'ab', te k'u ri' kewi'k. Xaq are ki k'amom ri e naq'atal wi ri ki nan ki tat ojer. ⁴ Xuquje' aretaq ketzelej loq pa ri k'ayib'al, we man käkich'aj tä kib', man kewi' taj. E k'o k'u k'ia ri e naq'atal wi ri kää'a'n ri e are', je' jas ri ki ch'ajik ri vasos, ri t'uy, ri ch'ich' taq laq, xuquje' taq ri ki ch'at. (Xa rumal ri e naq'atal wi ri tata'ib' fariseos, xkib'ij chi äwas ri' we man kää'a'n tä ke ri winaq jas ri kää'a'n ri e are'.) ⁵ Rumal wa' ri fariseos xuquje' ri tijonelab' re ri Pixab' xkita' che ri Jesús, xkib'ij che: ¿Jas che man kää'a'n tä ri tijoxelab' la jas ri e naq'atal wi ri qa nan qa tat ojer? —kecha'. Xane kewi'k, man na'l taj kää'a'n chuch'ajik ri rij ri ki q'ab' nab'e, —xecha che.

⁶ Xch'aw k'u ri Jesús, xub'ij chke: Qas tzij ri xub'ij ri qa mam Isaías ri q'alajisal re ru

Loq' Pixab' ri Dios ojer chij alaq. Are la' chi xa kieb' wäch alaq, jas ri tz'ib'tal rumal, ri kub'ij:

We winaq ri' xaq che ki chi'
kâkinimarisaj nu q'ij, man qas
kâkijikib'a ri kanima' chwij,
—kâcha ri Dios.

⁷ Xaq loq' keg'ijilan chwe.

Kâkiya che tijonik xaq xuwi
ri ki pixab' ri winaq,
—kâcha ri', —xcha ri qa mam Isaias. ⁸ Je ri', rumal chi ri alaq yo'm kan alaq ru Loq' Pixab' ri Dios. Chuk'exwäch k'u wa', xa jikib'am anima' alaq chki' ri e naq'atal wi ri winaq, je' jas ri na'l ki ch'ajik ri t'uy, ri vasos, xuquje' k'ia u wäch ri e je' taq wa' ri naq'atal wi alaq, —xcha chke.

⁹ Xuquje' xub'ij chke: Ri alaq man nim tä chik kil wi alaq ru taqanik ri Dios. Man k'o tä chi u patän wa' chuwäch alaq. Chuk'exwäch wa' kâb'an alaq xa jas ri naq'atal wi alaq, —kâcha chke. ¹⁰ U b'im k'u kan ri qa mam Moisés: "Nim cheawila wi ra nan a tat," —kâcha'. U b'im xuquje': "Jachin k'u ri kuyoq' ru nan u tat, tzrajwaxik kâkâmisax na wa'," —kâcha ri'. ¹¹ Ri alaq k'ut kâb'ij alaq: Xaq xuwi rajwaxik chi kub'ij jun achi che ru nan u tat: "Are Corbân wa' ronojel ri kinkowinik kinkoj che to'ik alaq," —kâcha chke. (Ri "Corbân" kel kub'ij: "Yo'm cho ri Dios", —kâcha'.) ¹² We je' kub'ij wa' ri achi ri', man käya tä alaq che chi k'o jas kub'an che ki to'ik ru nan u tat. ¹³ Je ri' man nim tä chik kil wi alaq ru Tzjij ri Dios, man k'o tä chi u patän ru Loq' Pixab' ri Dios chuwäch alaq. Xaq xuwi chki' taq ri naq'atal wi alaq käya wi alaq tijonik. Xuquje' k'ia ri je' taq wa' kâb'an alaq, —xcha ri Jesús chke ri tata'ib' ri'.

¹⁴ Ri Jesús xeusik'ij ri winaq ruk' jumul chik, xub'ij k'u chke: Alaq, onojel alaq, tatab'ej alaq ri nu tzij, ch'ob'o alaq ri kinb'ij, —kâcha chke. ¹⁵ Man k'o tä ri kutij ri winaq ri kâkowinik kâretzelaj u wäch ru k'aslemal. Xane are ri kel loq pa ranima' ri winaq, are wa' ri ketzelan u wäch ru k'aslemal. ¹⁶ We k'o jun ri kujikib'a ranima' chutatab'exik ri nu tzij, jchutatab'ej b'a'! —xcha chke.

¹⁷ Okinaq chi ri Jesús pa ri ja, u yo'm k'u kan ri winaq, xepe ru tijoxelab', xkita' che ri Are' chrij ri k'utb'al ri xutzijoj chke. ¹⁸ Xuta' k'u ri Jesús chke, xub'ij: ¿A xuquje' ne ri ix man kich'ob' tä wa'? —kâcha'. ¿A mat iwetam chi ronojel ri kutij ri winaq, ri kok chupam, man kâkowin tä wa' che retzelaxik u wäch ru k'aslemal? ¹⁹ Are je ri', rumal chi man kok tä pa ranima', xane xaq xuwi pa ri rixko'l, kel k'u kanoq aretaq kub'an ru chul, —xcha chke.

Xub'ij wa' chke chuk'utik chi man k'o tä jun u wäch wa ri äwas u tijik, ri ketzeletaj jun winaq rumal. ²⁰ Xuquje' xub'ij: Ri kel

loq pa kanima' ri winaq are wa' ri ketzelan u wäch ri ki k'aslemal. ²¹ Je ri', rumal chi pa kanima' ri winaq, keb'el wi loq ri itzel taq ki chomanik, xuquje' ri etzelal ri kâka'n ri e are' ri e je' taq wa': ru b'anik ri nimalaj mak ruk' ri rixoqil o ri rachajil jun chik, ru b'anik jas ri kâka'n ri tz'i' ri xaq kâkiriq kib', man k'o tä ki pixab', xuquje' ru b'anik ri kâmisaniq, ²² ri elaq'anik, ru rayixik ri kech nik'aj winaq chik, ri etzelal, ri sub'unik, ri sak'ajil chub'anik ronojel u wäch etzelal, ri k'âx kuna' jun chrij jun winaq chik ri utz u riqom, ru yakik tzij chrij jun chik, ru b'anik nimal, xuquje' ri man kuya' tä jun chi kok tzij pu jolom, xane xa kub'an re ri are'. ²³ Konojel wa' we etzelal ri' keb'el loq pa kanima' ri winaq, ketzeletaj k'u ri ki k'aslemal kumal, —xcha chke.

Jun ixoq'ri man are tä aj Israel kâkojon che ri Jesús

²⁴ Xel b'i ri Jesús chila', xe'k, xopan pa Fenicia chunaqaj ri tinimit Tiro, xuquje' ri tinimit Sidón. Xok k'u b'i pa jun ja. Man kraj taj chi ri winaq kâketamaj chi k'o chila', man kâkowin tä k'ut chuk'u'ik rib'. ²⁵ Chanim k'ut xretamaj jun ixoq chi ri Jesús k'o chila'. Ri ixoq ri' k'o jun alaj ral ali ri k'o jun itzelalaj espîritu che. Xopan k'u ruk' ri Jesús, xxuki chuwäch. ²⁶ Ri ixoq ri' man are tä aj Israel, xane ilom u wäch pa Fenicia, ch'äqäp re ri Siria. Xub'ochi' ri Jesús, xuta' toq'ob' che chi kâresaj b'i ri itzel espîritu che ri ral ali. ²⁷ Xub'ij k'u ri Jesús che: Cheyej na la rech nab'e käyi' ri ki wa ri ak'alab', chenoj k'u na ri e are'. Man utz tä ru chapik ri ki wa ri ak'alab', kâk'läq ta k'u chkiwäch ri alaj taq tz'i', —xcha chke.

²⁸ Xch'aw k'u ri ixoq, xub'ij che ri Jesús: iJe', Tat! Xuquje' ne ri alaj taq tz'i' ri keb'ok pa ja kâkitij ru xe'r taq ri ki wa ri ak'alab', —xcha chke.

²⁹ Xub'ij k'u ri Jesús che ri ixoq: Rumal we tzij ri' ri xb'ij la, kuya' ke' la cho ja. Elinaq chi k'u b'i ri itzel espîritu che ri alaj ali ri al la, —xcha chke.

³⁰ Xe' k'u ri ixoq cho ja. Aretaq xopanik xuriga ri ral q'oyol pa ru ch'at, elinaq chi k'u b'i ri itzel espîritu che ri alaj ali.

Jun achi mem xuquje' so'r kâkunax rumal ri Jesús

³¹ Xel k'u b'i ri Jesús chila' chunaqaj ri tinimit Tiro, xok'ow pa ri tinimit Sidón, xuquje' pa taq ri tinimit re Decápolis, xopan k'u chuchi' ri mar re Galilea. ³² Aretaq k'o chila' xk'am loq jun so'r achi ri xuquje' mem ruk' ri Jesús. Ri xek'amow loq keb'ochi'nik, kâkita' toq'ob' che ri Jesús chi kuya ru q'ab' puwi' ri achi. ³³ Ri Jesús xuk'am k'u b'i ri achi chkiwäch ri winaq pu tukiel wi. Xe-unim ru wi' taq u q'ab' pa taq ru xikin ri achi, xuquje' xchub'anik, xuchap koq ri

raq'. ³⁴ Xka'y k'u ri Jesús chikaj, xb'iq'b'itik, xub'ij che ri achi: ¡Efata! —xcha'. Kel kub'ij wa': ¡Chjaqtajqo! —kächä'.

³⁵ Chanim k'ut xejaqtaq ru xikin ri achi, xuquje' xutzir ri raq'. Käkowin chi k'ut kätzjonik. ³⁶ Ri Jesús k'ut keupixb'aj ri winaq chi k'o jun mäkib'ij wi. Pune sib'alaj keupixb'aj na, xa sib'alaj kakesaj na u tzijol wa'. ³⁷ Sib'alaj k'u käkikajmaj ri winaq, käkib'ij: ¡Sib'alaj utz kub'an ri Jesús che ronojel! Kub'ano chi käkita chik ri so'rab', xuquje' kub'ano chi ri memab' kech'awik, —xecha ri winaq.

8

Ketzuq ri kiejeb' mil winaq rumal ri Jesús

¹ Pa taq ri q'ij ri', ki mulim kib' sib'alaj k'ia winaq jumul chik, man k'o tä k'u ri käkitiyo. Ri Jesús xeusik'ij ru tijoxelab', xub'ij chke: ² Kel nu k'ux chke ri winaq rumal chi oxib' q'ij chi wa' e k'o wuk', man k'o tä k'u jas käkitiyo. ³ We kintaqan chke chi keb'e' cho kachoch, mäja' k'u kewi'k, ketzaq na pa taq ri b'e'. Jujun k'u chke naj e petinaq wi, —xcha chke.

⁴ Ru tijoxelab' xech'awik, xkib'ij che: ¡Jaw-ije' ta k'u lo käkowin wi jun kuriq ri wa che ki tzuq' wa' we winaq ri' waral pa we juyub' ri' ri kätz'inowik? —xecha che.

⁵ Xuta' k'u ri Jesús chke: ¡Janipa' kaxlan wa e k'o iwuk? —xcha'. Ri e are' xkib'ij: ¡Wuqub'! —xecha che.

⁶ Xtaqan k'u ri Jesús chke ri k'ialaj taq winaq chi keku'b'i pulew. Te k'u ri' xeu'k'am ri wuqub' kaxlan wa, xmaltoxinik, xepi-ro. Xeuja chke ru tijoxelab' rech kek-ijach wa' chkiwäch ri winaq. Je k'u ri' xka'no. ⁷ Xuquje' e k'o kieb' oxib' alaj taq kâr. Ri Jesús xeutewchij ri alaj taq kâr, xub'ij chke ru tijoxelab' chi kekijach wa' xuquje' chkiwäch ri winaq. ⁸ Xewi' k'u konojel ri winaq, xenojik. Xekimulij k'u ri ch'äqataq taq kaxlan wa ri xekanaj kanoq, ronojel k'u wa' xub'an wuqub' chikäch wa. ⁹ Kraj e k'o kiejeb' mil winaq ri xewi'k. Te k'u ri' xeutag b'i ri Jesús cho kachoch. ¹⁰ Chanim k'ut xok b'i ri Jesús pa ri barco kuk' ru tijoxelab', xeb'e' pa Dalmanuta.

Ri tata'ib' fariseos käkita' jun kajmab'al etal che ri Jesús

¹¹ Xeopan k'u ri tata'ib' fariseos ruk' ri Jesús, xkichap tzij ruk'. Te ri' xkita' che chi kuk'ut chkiwäch jun kajmab'al etal ri kâpe chikaj. Xkib'ij wa' che rech kâqaj ri Jesús pa ki q'ab'. ¹² Sib'alaj xb'iq'b'it k'u ri Jesús, xub'ij: ¡Jas che käkita' etal ri winaq re we q'ij junab' ri'? —kächä'. Qas tzij ri kinb'ij chech alaq chi man käyi' tä chi na jun etal chke, —xcha ri Jesús.

¹³ Xel b'i ri Jesús chkiwäch. Xok chi jumul pa ri barco, xe' k'u ch'äqap che ri mar.

Ri Jesús kätzjon chrij ri ki ch'amil ri tata'ib' fariseos

¹⁴ Xsach pa ki jolom ri tijoxelab' u k'amik b'i ki wa. Xaq xuwi jun kaxlan wa k'o kuk' pa ri barco. ¹⁵ Ri Jesús xeuipixb'aj, xub'ij chke: ¡Chitampe! ¡Chichajij iwib' chuwäch ri ki ch'amil ri tata'ib' fariseos, xuquje' chuwäch ru ch'amil ri Herodes! —xcha chke.

¹⁶ Xkitzijob'ela k'u kib' ri tijoxelab', xkib'ij: Ri Are' kub'ij wa' rumal chi man k'o tä qa wa qa k'amom loq, —xecha'.

¹⁷ Aretaq ri Jesús xretamaj jas ri tajin käkib'ij, xub'ij chke: ¡Jas che kitzijob'ela iwib' chi man k'o tä i wa? —kächä chke. ¡A xaq are mäja' kich'ob'o, mäja' kiwetamaj? ¡A xa ab'ajarinaq na ri iwanima'? —kächä'.

¹⁸ Pune k'o i waq'äch rech kixka'yik, ¡man kixka'y taj! Pune k'o i xikin rech kito, ¡man kitatab'ej taj! ¡A mat kâna'taj wa' chiwe ri xinb'ano? —kächä chke. ¹⁹ Aretaq xinpri ri job' kaxlan wa, xinjach k'u wa' chkiwäch ri job' mil winaq, ¡janipa' chikäch nojinaq chke ch'äqataq taq wa ri man xk'is taj ri xei'k'olo? —xcha chke.

¡E kab'lajuj! —xecha ri e are'.

²⁰ Aretaq k'ut xinpri ri wuqub' kaxlan wa, xinjach wa' chkiwäch ri kiejeb' mil winaq, ¡janipa' chikäch nojinaq chke ch'äqataq taq wa ri man xk'is taj ri xei'k'olo? —xcha chke.

¡E wuqub' chikäch! —xecha che.

²¹ Xub'ij k'u ri Jesús chke: ¡Jas lo wa' chi k'ä mäja' kich'ob'o? —xcha chke.

Ri Jesús kukunaj jun moy achi pa ri tinimit Betsaida

²² Te k'u ri' xopan ri Jesús pa ri tinimit Betsaida, e rachi'l k'u ru tijoxelab'. Jujun winaq xkik'am loq jun moy achi cho ri Jesús, xkib'ochi'j chi kuchap koq ri achi. ²³ Ri Jesús xuchap ri moy che ru q'ab', xuyuqej b'ik, xeb'el k'u b'i pa ri tinimit. Xchub'an k'u pa taq u waq'äch ri moy, xuya ru q'ab' puwi' ri achi, xuchap koq ru waq'äch, te k'u ri' xuta' che: ¡A k'o ri kil la? —xcha che. ²⁴ Are k'u ri moy xka'y aq'anoq, xub'ij: Kinwil ri winaq chi je' ta ne e che', kinwil k'ut chi keb'inik, —xcha'.

²⁵ Ri Jesús xuya chi jumul ru q'ab' puwi' ri achi, xuchap koq ru waq'äch. K'ä te ri' qas xka'yik. Xutzir kan ru waq'äch, utz chik xkowin ri achi che rilik ronojel. ²⁶ Te k'u ri' ri Jesús xutag b'i cho rachoch, xub'ij b'i che: Utz na we man kok tä la pa ri tinimit, man k'o tä k'u ri kätzijoq la apan che jun chik jas ri nu b'anom che la, —xcha che.

Ri tat Pedro kuq'alajisaj chi ri Jesús are qas tzij ri Cristo

²⁷ Xe' k'u ri Jesús, e rachi'l ru tijoxelab', xeopan pa taq ri tinimit re Cesarea Filipino.

B'enam k'u ke pa ri b'e, xuta' chke ru tijoxelab', xub'ij: ¿Jachin ri in ri kākib'ij ri winaq? —xcha chke.

²⁸ Xkib'ij k'u che: E k'o jujun winaq kākib'ij chi lal ri' ri Juan Qasal Ja', —kecha'. Xuquje' kākib'ij jule' chik chi lal ri' ri qa mam Elías. E k'o chi nik'iaj kākib'ij chi lal jun chke ri ojer q'alajisal taq re ru Loq' Pixab' ri Dios, —kecha', —xecha che.

²⁹ Te ri' xch'aw ri Jesús jumul chik, xuta' chke: E k'u ri ix, ¿jachin ri in ri kib'ij ix? —xcha chke.

Xch'aw k'u ri tat Pedro, xub'ij che: ¡Lal ri' ri Cristo! —xcha che.

³⁰ Xeupixb'aj k'ut ri Jesús chi mākitzijoj wa' che jachin jun.

Ri Jesús kutzijoj chi kākām na

³¹ Ri Jesús xuchaplej ki tijoxik ru tijoxelab', xub'ij chke: Rajwaxik chi ri in, in ri' ri Ralk'ual ri Dios ri Qas Winag, kinriq na sib'alaj k'āx, kinxutux na kumal ri ki nimaqil ri winaq, kumal ri ki nimaqil sacerdotes, xuquje' kumal ri tijonelab' re ri Pixab'. Xuquje' rajwaxik chi kinkāmisax na, te ri' kink'astaj chi k'u na churox q'ij chkixol ri kāmīnaqib', —xcha chke. ³² Utz u b'ixik wa' xub'an ri Jesús rech kākich'ob'o. Are k'u ri tat Pedro xuk'am b'i ri Jesús u tukiel wi, xuchaplej u yajik. ³³ Xutzolq'omij k'u rib' ri Jesús, xeuka'yej ru tijoxelab', xuyaj ri tat Pedro, xub'ij che: ¡Chatel chnuwäch, Satanás! —kācha ri Jesús. ¡Man kach'ob' tā k'u ru chomanik ri Dios, xane xaq xuwi kach'ob' ri ki chomanik winaq! —xcha ri' chkiwäch.

³⁴ Ri Jesús xeusik'ij ri k'ialaj winaq junam kuk' ru tijoxelab', xub'ij k'u chke: We k'o jun kraj kāpe wuk' in, rajwaxik chi mub'an xa jas ri kraj ri are'. Rajwaxik chutelej ru cruz, chpet wuk' in, —kācha'. (Kel kub'ij wa' chi ri winaq ri' man nim tā chik kārīl wi ru k'aslemal, pune ta ne kuriq ri kāmīkal rumal rech ri Jesús.) ³⁵ Apachin ta ne ri kraj kuto' u wi' ru k'aslemal cho ruwächulew, kākām k'u na wa' we winaq ri', kutzaq na ronojel. Man kuriq tā na ri' ri k'aslemal ri man k'o tā u k'isik. Apachin ta ne ri kuya ru k'aslemal rumal wech in, xuquje' rumal rech ri Utzalaj Tzij re ri Evangelio, kuto' na u wi' ri qas u k'aslemal, —kācha'. ³⁶ ¿Jas ta k'u lo ri' ri kuch'ak jun winaq we kärechb'ej ronojel ruwächulew, kutzaq k'u na ri qas u k'aslemal? ³⁷ ¿Jas ta k'u lo ri kākowin ri winaq chuya'ik chuk'exwäch ri qas u k'aslemal? —kācha chke. ³⁸ Apachin k'ut ri kāk'ix chwe in xuquje' che ri nu tzij chkiwäch ri itzelalaj taq winaq rech we q'ij junab' ri', ri man keniman tā chi che ri Dios, xane xa kāka'n jas ri kākaj ri e are', in ri' ri Ralk'ual ri Dios ri Qas Winag, kink'ix na xuquje' che ri

winaq ri' aretaq kintzelej loq, kinpe k'u na ri' wachi' ri loq'alaj taq ángeles, kánimarisax k'u na nu q'ij jas ru nimarisaxik u q'ij ri nu Tat, —xcha chke.

9

¹ Te k'u ri' xub'ij ri Jesús chke konojel: Qas tzij ri kinb'ij chiwe chi e k'o jujun chke ri e k'o waral chnuwäch ri man kekām taj k'ā kākil na chi ya petinaq ri' ruk' nimalaj chuq'ab' ru taqanik ri Dios pa ki wi' ri winaq, —xcha chke.

Kāk'extaj ru ka'yeb'al ri Jesús

² Xke' waqib' q'ij chik u b'im kan wa' ri Jesús, aretaq xeuk'am b'i xaq xuwi ri tat Pedro, ri tat Jacobo, xuquje' ri tat Juan ki tukiel wi, xepaqi k'u puwi' jun nimalaj juyub'. Xk'extaj k'u ru ka'yeb'al ri Jesús chkiwäch. ³ Sib'alaj xjuluw ri ratz'iaq ri Jesús, sib'alaj saqlolaj je' jas ri saq tew, je ri' chi man k'o tā jun ch'ajal atz'iaq cho ruwächulew ri je' kākowin chusaqarisaxik wa' kub'ano. ⁴ Tzakjīmaab'al chik, xkik'ut kib' kieb' achi-jab' ri tajin ketzijon ruk' ri Jesús, e are k'u ri qa mam Elías rachi' ri qa mam Moisés. ⁵ Xch'aw ri tat Pedro, xub'ij k'u che ri Jesús: Qajtij, ¡sib'alaj utz chi uj k'o waral! Qa'na oxib' mo',* jun che la, jun che ri qa mam Moisés, xuquje' jun che ri qa mam Elías, —xcha che.

⁶ Je' xub'ij wa' rumal chi man kuriq taj jas kub'ij, ¡sib'alaj k'u xkixej kib' ri tijoxelab'! ⁷ Te ri' xqaj jun sutz' chkiq, xech'uqtaj k'u rumal. Xch'aw k'u loq jun chupam ri sutz', xub'ij: ¡Are loq'alaj nu K'ojol wa'! Chitatab'ej ri kub'ij, —xcha'.

⁸ Chanim xeka'ylob'ik, man k'o tā chi k'u jachin ri xkilo, xane xaq xuwi ri Jesús k'o kuk'.

⁹ Qajem ke cho ri juyub', ri Jesús xeupixb'aj chi k'o mākitzijoj wi ri kilom, k'ā aretaq kāk'astaj na ri Are', ri Ralk'ual ri Dios ri Qas Winag, chkiqil ri kāmīnaqib'. ¹⁰ Xeniman k'u che ri Jesús, man k'o tā xkib'ij che jun chik jas ri' ri xkik'ulmaj. Xa xkitzi-job'ej kib' chkiqil chi jas ri' ri k'astajik chkiqil ri kāmīnaqib'. ¹¹ Xkita' k'u che ri Jesús, xkib'ij che: ¿Jas che kākib'ij ri tijonelab' re ri Pixab' chi rajwaxik kāpe na ri qa mam Elías nab'e? —xecha che.

¹² Xch'aw ri Jesús, xub'ij chke: Tzij ri' chi kāpe ri qa mam Elías nab'e, rech kub'an na u b'anik ronojel. ¿Jas k'u kub'ij ru Loq' Pixab' ri Dios ri Tz'ib'talik chwij in, in ri' ri Ralk'ual ri Dios ri Qas Winag? Tz'ib'am chi sib'alaj kinriq na k'āx, ketzelax k'u na nu wäch, —kācha ri'. ¹³ Kinb'ij k'u chiwe chi ya ulinaq ri tat Elías, xka'n k'u ronojel u wäch k'āx che ri are', xa jas ri xkaj xka'no, je' jas ri kub'ij

* 9:5 Man q'alaj tā wa' we are "mo'" o are "kāb'al".

chrij pa ru Loq' Pixab' ri Dios ri Tz'ib'talik, —xcha ri Jesús chke.

Ri Jesús kárutirisaj jun ala ri k'o jun itzel espíritu che

¹⁴ Te k'u ri' aretaq xetzelej loq, xeopan kuk' ri nik'iaj tijoxelab' chik, xekil k'ialaj taq winaq ki sutim kij ri tijoxelab', xuquje' e k'o jujun chke ri tijonelab' re ri Pixab' ki chapom tzij kuk'. ¹⁵ Aretaq ri winaq xkil ri Jesús, sib'alaj xkikajmaj u wäch, aninaq xeb'e' chuch'ab'exik. ¹⁶ Xuta' ri Jesús chke ru tijoxelab', xub'ij: ¿Jas wa' ri tajin kichomala kuk'? —xcha chke.

¹⁷ Jun chke ri winaq xch'awik, xub'ij che: Ajtij, xink'am loq ri nu k'ojol chuwäch la, rumal chi k'o jun itzel espíritu che, ri u b'anom che chi man kākowin taj käch'awik. ¹⁸ Apawije' ta ne ri k'o wi aretaq ri itzel espíritu kuchapo, kuk'iaq pulew, chila' kuyakya wi, kápuluw k'u u pu chi', xuquje' kuquch'uch'ej u ware, käche'r k'u u cuerpo. Xinta' toq'ob' chke ri tijoxelab' la rech kākesaj b'i ri itzel espíritu che, man xekowin tā k'ut, —xcha che.

¹⁹ Xch'aw chi ri Jesús, xub'ij: ¡Ay, winaq, alaq ri' rech we q'ij junab' ri', man kākojon tā alaq! —käch'a'. ¿A are lo kaj alaq chi xaq are' kink'oji uk' alaq ronojel q'ij, chi kinchajij paciencia uk' alaq? —käch'a'. ¡K'ama b'a' alaq loq ri ala chnuwäch! —xcha chke.

²⁰ Xkik'am k'u loq ri ala ruk'. Aretaq ri itzel espíritu xril ri Jesús, chanim xuyakya ri ala, xtxaq k'u ri ala pulew, xuwołotij rib', xpuluw u pu chi'. ²¹ Xuta' ri Jesús che ru tat ri ala, xub'ij: ¿Jampa' xuchap wa' we k'äx ri'? —xcha che.

Xub'ij ru tat: Tzpa ru ch'utinal, —xcha'. ²² K'ia mul ri itzel espíritu kuk'iaq ri ala pa ri q'aq', pa ri ja' chukāmisaxik. We k'u k'o jas ri kākowin la chub'anik che, toq'ob'isaj la qa wäch, ¡chujto' la! —xcha che.

²³ Xub'ij k'u ri Jesús che: We kākowin la kākojon la chwe, ¡ronojel kuya' kāb'anik rumal ri winaq ri kākojonik! —xcha ri Jesús che.

²⁴ Chanim ru tat ri ala ko xch'awik, xub'ij: ¡Tat, kinkojonik! ¡Chinto' b'a' la rech kinkojon na más! —xcha che.

²⁵ Aretaq ri Jesús xril chi k'ia winaq tajin kākimulij kib' chrij, xuyaj ri itzelalaj espíritu, xub'ij che: Itzelalaj espíritu ri kab'an mem, ri xuquje' kab'an so'r chke ri winaq, katin-taqo chi chatel che ri ala, ¡matok chi jumul che! —xcha che.

²⁶ Xuraq k'u u chi' ri itzelalaj espíritu, sib'alaj xuyakya kan ri ala, xel k'u b'i che. Xkanaj kan ri ala je' ta ne kāmīnaq, je ri' chi e k'ia ri xkib'ij: ¡xkāmik! —xecha'. ²⁷ Ri Jesús k'ut xuchap ri ala che ru q'ab', xuyako. Xtak'i k'u aq'an ri ala.

²⁸ Okinaq chi k'u ri Jesús pa jun ja, xepe ru tijoxelab', xkita' che ri Jesús pu tukiel wi, xkib'ij: ¿Jas che ri uj man xujkowin tā che resaxik b'i ri itzelalaj espíritu? —xecha che.

²⁹ Xub'ij k'u ri Jesús chke: Xaq xuwi rumal ru b'anik orar xuquje' ri u b'anik ayunar kel b'i jun itzelalaj espíritu ri je' u b'anik wa', —xcha ri Jesús chke ru tijoxelab'.

Ri Jesús kutzijoj apan jumul chik chi kākām na

³⁰ Aretaq xeb'el b'i chila', xeb'e'k, xeok'ow k'u pa Galilea. Man kraj tā k'u ri Jesús chi k'o jun kāretamaj chi k'olik. ³¹ Je ri', rumal chi ri Jesús tajin keutijoj ru tijoxelab', xub'ij chke: Ri in, in ri' ri Ralk'ual ri Dios ri Qas Winag, kinjach k'u na in pa ki q'ab' ri winag, kinkikāmisaj na ri e are', —käch'a'. Pune in kāmīnaq chik, kink'astaj k'u na churox q'ij chxixol ri kāmīnaqib', —xcha chke. ³² Ri e are' k'ut man xkich'ob' tā ri tajin kub'ij chke, xkixej k'u kib' chuta'ik che.

Ri tijoxelab' kākichomala' kib' chrij jachin chke ri nim na u b'anik

³³ Xeopan k'u pa ri tinimit Capernaum. Aretaq ri Jesús ya k'o chik pa ri ja, xuta' chke ru tijoxelab', xub'ij: ¿Jas ri' ri tajin kichomala iwib' chrij aretaq uj petinaq pa ri b'e? —xcha chke.

³⁴ Man xech'aw tā k'ut rumal chi ri e are' tajin kākichomala' kib' pa ri b'e chrij jachin chke are ri nim na u b'anik. ³⁵ Xt'uyi k'u ri Jesús, xeusik'ij ri kab'lajuj u tijoxelab', xub'ij chke: We k'o jun ri kraj kok che ki nimal ri winag, rajwaxik kub'ano chi man nim tā u b'anik chxixol, xane kok na che patānil ke konojel, —xcha chke.

³⁶ Xuk'am k'u ri Jesús jun alaj ak'al, xutak'ab'a pa ki nik'iajal ri tijoxelab'. Xuq'aluj k'ut, xub'ij chke: ³⁷ Apachin ri kāk'amow we ak'al ri' rumal wech in, ri' kinuk'amo. Apachin k'u ri kinuk'am in, man xaq xuwi tā ri in kinuk'amo, xane xuquje' are kuk'am ri xintaqow loq, —xcha chke ru tijoxelab'.

Apachin ri man kujuk'ulelaj taj are jun quk'

³⁸ Xub'ij k'u ri tat Juan che ri Jesús: Ajtij, qilom jun achi ri man jun tā quk' ri tajin kukoj ri b'i' la che kesaxik b'i ri itzel taq espíritu. Ri uj xqag'il k'u kanoq rumal chi man jun tā quk', —xcha che.

³⁹ Xub'ij k'u ri Jesús: Miq'ila chik, —käch'a'. Rumal chi man k'o tā jun ri kukoj ri nu b'i' chub'anik jun nimalaj kajmab'al, te k'u ri' chanim kub'ij tzij ri man utz taj chwij in. ⁴⁰ Apachin k'u ri man kujuk'ulelaj taj, are jun ri' quk', —käch'a'. ⁴¹ Apachin ri kuya jun vaso joron chiwe pa ri nu b'i' rech kitijo xa rumal chi ix rech ri Cristo, qas kuriq na ri tojb'al re, —xcha chke.

Käkiriq k'äx ri winaq ri kaka'no chi jun winaq chik kuriq ri b'e ri man utz taj

⁴² Apachin k'u ri kub'ano chi jun chke we ch'utiq ri' ri kekojon chwe kuriq ri b'e ri man utz taj, are utz ri' we ta kaxim jun ka' re molino chuqul ri winaq ri', kāk'iaq ta k'u b'i pa ri mar. ⁴³ We ta q'ab' kub'ano chi ri at kariq ri b'e ri man utz taj, chaq'ata apanoq. Are utz na chawe we kariq na ri gas a k'aslemal pune at kut, chuwäch ri k'o kieb' a q'ab' kate' pa ri k'atik jawije' k'o wi ri q'aq' ri man kächuptaj taj. ⁴⁴ Chila' k'ut man kekäm tä wi na ri ixjut ri käkitiq ri ki tijol ri winaq, man kächuptaj tä k'u ri q'aq'. ⁴⁵ We ta ri awaqañ kub'ano chi at kariq ri b'e ri man utz taj, chaq'ata apanoq. Are utz na chawe we kariq na ri gas a k'aslemal, pune xa jun awaqañ k'olik, chuwäch ri k'o kieb' awaqañ katk'iaq b'i pa ri k'atik jawije' k'o wi ri q'aq' ri man kächuptaj taj. ⁴⁶ Chila' k'ut man kekäm tä wi na ri ixjut ri käkitiq ri ki tijol ri winaq, man kächuptaj tä k'u ri q'aq'. ⁴⁷ We ta k'u ra waq'äch kub'ano chi ri at kariq ri b'e ri man utz taj, chawesaj apanoq. Are utz na chawe katok chkixol ri winaq ri kätqañ ri Dios pa ki wi', pune xa jun a waq'äch k'olik, chuwäch ri k'o kieb' a waq'äch, katk'iaq b'i pa ri k'atik jawije' k'o wi ri q'aq' ri man kächuptaj taj. ⁴⁸ Chila' k'ut man kekäm tä wi na ri ixjut ri käkitiq ri ki tijol ri winaq, man kächuptaj tä k'u ri q'aq'.

⁴⁹ Konojel winaq käkiriq na k'äx je' ta ne chi käyi' q'aq' pa ki wi' junam jas ri käyi' ri atz'am puwi' ronojel awaj ri kākāmisax chusipaxik cho ri Dios. ⁵⁰ Utz ri atz'am. We k'u man k'o tä chik u tzañil ri atz'am, ¿jas ta k'u lo kikoq chik chutzayixik? Chk'ol utzil pa iwanima' je' jas ri utzalaj atz'am, man kixch'ojin tä k'ut, —xcha ri Jesús chke.

10

Ri Jesús kuya tijonik chrij ri ki jachik kib' juk'ulaj winaq

¹ Xel k'u b'i ri Jesús pa ri tinimit Capernaum, xe' pa Judea, xuquje' xe' ch'äqäp che ri nima' Jordán. Xkimulij k'u kib' k'ia winaq ruk' jumul chik. Ri Jesús jumul chik xeutijoj jas ri naq'atal wi ri Are'. ² Xeopan k'u jujun tata'ib' fariseos ruk' ri Jesús, xkita' k'u che we taqal che jun achi kujach b'i ri rixoqil. Xa xkib'ij wa' che ri Jesús rech káqaj ri Are' pa ki q'ab'. ³ Xch'aw ri Jesús, xub'ij chke: ¿Jas pu ri xtaq wi alaq rumal ri qa mam Moisés? —xcha'.

⁴ Xkib'ij k'u ri tata'ib' fariseos: Ri qa mam Moisés xuya' chqe chi jun achi kuya' kutz'ib'aj jun wuj ri kub'ij wi chi ri achi kujach b'i ri rixoqil, xa je ri' k'ut kájach b'i ri ixoq, —xecha che.

⁵ Xub'ij k'u ri Jesús chke: Xa rumal chi sib'alaj ab'ajarinaq ri anima' alaq, are rumal ri' xtz'ib'ax wa' we taqanik ri' chech alaq rumal ri qa mam Moisés, —kacha chke. ⁶ Tzpa ru chaplexik loq ronojel, aretaq ri Dios xuchap u b'anik ruwächulew, "chi achi chi ixoq xeub'an ri Dios". ⁷ "Rumal wa' jun achi kuya kan ru nan u tat, kätuni k'u na ruk' ri rixoqil. ⁸ Xa e jun na ri kieb' ri'," —kacha ri'. Je k'u ri' man e kieb' tä chik, xane xa e jun wa'. ⁹ Rumal k'u ri' jas ri xeutunub'a ri Dios, mājach ki wäch wa' rumal ri winaq, —xcha ri Jesús chke ri tata'ib' fariseos.

¹⁰ Aretaq e k'o chik pa ja, ri tijoxelab' xkita' che ri Jesús chi kub'ij chi na jumul chik jas kel kub'ij ri' ri xtzijox rumal. ¹¹ Xub'ij k'u ri Jesús chke: Apachin ri kujach b'i ri rixoqil, kāk'uli chi k'u na ruk' jun ixoq chik, ri achi ri' kub'an ri nimalaj mak ri äwas u b'anik chrij ri nab'e rixoqil. ¹² We are ri ixoq kujach b'i ri rachajil, kāk'uli chi k'u na ruk' jun achi chik, ri ixoq ri' kub'an ri nimalaj mak ri äwas u b'anik chrij ri rachajil, —xcha ri Jesús chke ru tijoxelab'.

Ri Jesús keutewchij ri ak'alab'

¹³ Ri winaq xekik'am loq ri ak'alab' cho ri Jesús rech kuya ru q'ab' pa ki wi'. Xeyaj k'u ri winaq kumal ri tijoxelab'. ¹⁴ Aretaq xril ri Jesús chi keyajon ri tijoxelab', xpe royowal, xub'ij chke: Chiya chke ri ak'alab' chi kepe wuk', meiq'atej rumal chi ru taqanik ri Dios pa ki wi' ri winaq are kech ri e je' taq wa', —kacha'. ¹⁵ Qas tzij ri kinb'ij chiwe chi apachin ri man kuk'am tä ri' ru taqanik ri Dios je' jas ri kub'an jun alaj ak'al, man käyi' tä k'u che chi kätqañ ri Dios puwi', —xcha chke.

¹⁶ Ri Jesús xeup'aluj ri ak'alab', xuya k'u ru q'ab' pa ki wi', xeutewchij.

Kopan jun q'inomalaj ala ruk' ri Jesús

¹⁷ Aretaq ri Jesús xutaqej chi ru b'e, chanim xpe jun ak'al achi ruk', xxuki chuwäch, xuta' che, xub'ij: Utzalaj Ajtij, ¿jas kinb'an in rech kinriq ri k'aslemal ri man k'o tä u is'ik? —xcha che.

¹⁸ Xub'ij k'u ri Jesús che: ¿Jas che kab'ij utz chwe? ¡Man k'o tä jun gas utz, xane xaq xuwi ri Dios! —kacha che. ¹⁹ Awetam k'u ri kätqañ wi ru Loq' Pixab' ri Dios: "Matkāmisanik, mab'an ri nimalaj mak ri äwas u b'anik ruk' ri rixoqil jun winaq chik, mab'an ri elaq', mab'an tzij chrij jun winaq chik, mab'an sub'unik che jun winaq chik che resaxik ri rech ri are', nim cheawil wi ra nan a tat," —kacha ri', —xcha ri Jesús che.

²⁰ Xub'ij k'u ri achi che: Ajtij, ronojel wa' nu taqem tzaretaq in ak'al na, —xcha che.

²¹ Ri Jesús ko xka'y che ri achi, sib'alaj loq' xril wi, xub'ij che: K'o jun jasach chik ri k'ä māj'a kab'ano. Cheak'iyij konojel ri jastaq awe, chaya ri rajil chke ri meb'a'ib'. Käk'oji k'u na ra q'inomal chila' chikaj. Jo', tasa'j

wuk', chatelej k'u ra cruz, —xcha che. (Kel kub'ij wa' chi man nim tä chik käril wi ru k'aslemal, pune ta ne kuriq ri kämikal rumal rech ri Jesús.)

²² Xk'extaj k'u ru wäch ri achi, xk'äxx'ob' ri ranima' rumal ri xub'ij ri Jesús che. Xb'isonik xe'k, rumal chi k'ia u q'inomal k'olik.

²³ Xka'y ri Jesús pa taq u xkut, xub'ij chke ru tijoxelab': ¡Sib'alaj k'äx käkitij ri q'inomab' keopan ruk' ri Dios rech kätaqan pa ki wi'! —xcha che.

²⁴ Ri tijoxelab' xkikajmaj ri xub'ij chke, man xkiriq tä chik jas xka'no. Xch'aw chi jumul ri Jesús, xub'ij chke: Qachalal, gas k'äx käkitij ri winaq ri käku'b'i ri kanima' chrij ri q'inomal, keopan ruk' ri Dios rech kätaqan pa ki wi'. ²⁵ Are man k'äx tä ri rok'owisaxik jun kiej camello pa ru julil jun 'tisomb'al b'aq chuwäch ri ropanik jun q'inom ruk' ri Dios rech kätaqan puwi', —xcha che.

²⁶ Sib'alaj xkikajmaj wa' ri tijoxelab', xkib'ij k'u chb'il taq kib': ¿Jachin tas k'u lo ri käkownik kuriq ru tob'anik ri Dios? —xecha'.

²⁷ Ri Jesús tajin keuka'yej, xub'ij k'u chke: Man kekowin tä ri winaq chub'anik wa', käkown k'u na ri Dios che, rumal chi ri Dios käkown chub'anik ronojel, —xcha che.

²⁸ Ri tat Pedro xuch'ab'ej ri Jesús, xub'ij: Tat, chilampe la chi ri uj qa yo'm kan ri jastaq qe, uj k'o uk' la, —xcha che.

²⁹ Xub'ij k'u ri Jesús: Qas tzij ri kinb'ij chiwe chi man k'o tä jun ri kuya kan ri rachoch, ri rachalal, ru nan u tat, ri rixoqil, ri ralk'ual, ri rulew rumal wech in, xuquje' rumal rech ri Utzalaj Tzij re ri Evangelio, ³⁰ ri mat kuriq na kämik pa taq we q'ij junab' ri' jun ciento mul ri e je' taq wa' ri rachoch, rachalal, ru nan, ralk'ual, rulew, pune ruk' k'äx ri käb'antaj che kumal ri winaq. Xuquje' kuriq na ru k'aslemal ri man k'o tä u k'isik pa taq ri q'ij ri junab' ri kepe na, —kächa che. ³¹ E k'ia chke ri winaq ri nim keil wi kämik, man nim tä chi na keil wi pa ri q'ij ri', xuquje' e k'o ri man nim tä keil wi kämik, nim k'ut keil wi na, —xcha che.

Ri Jesús kutzijoj jumul chik chi kākām na

³² E b'enaq k'u pa ri b'e, paqalem käka'n pa Jerusalén, nab'ejinaq k'u ri Jesús chkiwäch ru tijoxelab'. Ri e are' sib'alaj xkikajmaj u wäch ri Jesús. Konojel ri e teren chrij sib'alaj kixe'm kib'. Ri Jesús xeusik'ij jumul chik ri kab'lajuj u tijoxelab' ruk' pa ki tukiel wi, xuchaplej k'u u b'ixik chke ri käb'an na che. ³³ Xub'ij k'u chke: Chiwilampe', b'enam qe, tajin kujpaqi pa ri tinimit Jerusalén. Kinjach k'u na in, in ri' ri Ralk'ual ri Dios ri Qas Winag, pa ki q'ab' ri ki nimaqil ri sacerdotes, xuquje' pa ki q'ab' ri tijonelab' re ri Pixab'. Käkiq'at na tzij pa nu wi' chi

kinkämisax na, kinkijach k'u na pa ki q'ab' ri nik'iaj winaq chik. ³⁴ Käketz'b'ej na nu wäch, xuquje' käkichub'aj na nu wäch. Kinkirapuj na, kinkikämisaj. Kink'astaj chi k'u na churox q'ij, —xcha ri Jesús chke.

Ri tat Jacobo, ri tat Juan kākita' jun toq'ob' che ri Jesús

³⁵ Xegeb' k'u ru k'ojol ri tat Zebedeo ruk' ri Jesús, e are' ri tat Jacobo, ri tat Juan, xkib'ij k'u che: Qajtij, käqaj chi käb'an la chqe apachike u wäch toq'ob' ri käqata' che la, —xecha che.

³⁶ Xub'ij ri Jesús chke: ¿Jas k'u kiwaj chi kinb'an chiwe? —xcha che.

³⁷ Xkib'ij k'u che: Aretaq känimarisaq ri q'ij la, kätaqan chi la pa ki wi' konojel, ya la chqe chi kujt'uyi na uk' la, chi jun chqe käk'oji pa ri wikiäq'ab' la, ri jun chik pa ri moxq'ab' la, —xecha che.

³⁸ Xub'ij k'u ri Jesús chke: ¡Man kich'ob' taj jas u wäch toq'ob' ri kita' chwe! —kächa che. ¿A kixkowinik kich'ij na ri k'äx ri kinriq na in, kitij k'u na iwe ri k'o pa ri vaso ri kintij na we in? ¿A kixkowinik käb'an i qasna' ix jas ri qasna' ri käb'an na chwe in? —xcha che.

³⁹ Xkib'ij k'u che: Kujkowinik, —xecha che.

Xub'ij k'u ri Jesús chke: Qas tzij kitij na iwe ri k'o pa ri vaso ri kintij na we in, xuquje' käb'an na i qasna' jas ri qasna' ri käb'an na chwe in, —kächa che. ⁴⁰ Are k'u ri t'uyulem pa ri nu wikiäq'ab', we ne pa ri nu moxq'ab', man kuya' taj kinya in chiwe. Are wa' kech ri e cha'tal rumal ri Dios chi ket'uyi pa taq ri t'uyulib'al ri', —xcha che.

⁴¹ Aretaq ri lajuj tijoxelab' chik xkita u b'ixik ronojel wa', xpe koyowal ri e are' chke ri tat Jacobo, ri tat Juan. ⁴² Xeusik'ij k'u ri Jesús, xub'ij chke: Ri ix iwetam chi ri winaq ri ya'tal chke chi ketaqan pa ki wi' ri nik'iaj winaq chik, qas tzij e k'o ri' pa ki q'ab'. Ri ki nimaqil winaq ketaqan pa ki wi' xuquje', —kächa'. ⁴³ Man je' tä k'u wa' ri ix, xane apachin chiwe ri kraj chi nim kil wi, rajwaxik chi kok na wa' che patänil iwe. ⁴⁴ Apachin chiwe ri kraj kok che i nimal ix, nab'e rajwaxik chi kok na che patänil ke konojel, —kächa'. ⁴⁵ Are je ri', rumal chi ri in, in ri' ri Ralk'ual ri Dios ri Qas Winag, man in petinaq taj rech kinpatänixik, xane rech kinpatänin chke nik'iaj chik, xuquje' rech kinya ri nu k'aslemal che tojb'al re ri ki tzoqopixik k'ia winaq, —xcha ri Jesús chke.

Ri Jesús kukunaj ri moy achi, Bartimeo u b'i'

⁴⁶ Xeopan k'u pa ri tinimit Jericó. Elem chi k'u b'ik kub'an ri Jesús pa Jericó, e rachi'l k'u ru tijoxelab' xuquje' k'ialaj taq winaq chik. K'o k'u jun moy achi, Bartimeo u b'i', t'uyul chi' ri b'e, are k'u jun molonel wa',

u k'ojol ri tat Timeo. ⁴⁷ Aretaq xuto chi tajin kok'ow ri Jesús aj Nazaret, ko xch'awik, xub'ij: ¡Tat Jesús, ralk'ual kan ri qa mam David, toq'ob'isaj la nu wäch! —xcha'.

⁴⁸ E k'ia ri winaq ri xkiyajo, xkib'ij che chi chutz'apij u pu chi'. Ri are' k'ut xa man kuta taj, xane más ko na xch'awik, xub'ij: ¡Ralk'ual kan ri qa mam David, ^{*} toq'ob'isaj la nu wäch! —xcha'.

⁴⁹ Xtak'i k'u ri Jesús, xub'ij: Sik'ij b'a' alaq loq, —xcha chke.

Xkisik'ij k'u loq ri moy, xkib'ij che: ¡Chachajij awanima'! ¡Chatwalijoq! Ri Jesús tajin katusik'ij, —xecha che.

⁵⁰ Ri are' k'ut xuroqij kan ru q'u' jela', chanim xwalijik, x'e'k, xopan ruk' ri Jesús. ⁵¹ Xch'aw k'u ri Jesús, xub'ij che: ¿Jas kaj la chi kinb'an che la? —xcha che.

Xub'ij ri moy che: Ajtij, kwaj kinka'y jumul chke, —xcha che.

⁵² Xub'ij ri Jesús che: Kuya' ke' la. Ya xutzir la rumal chi xkojon la chwe, —xcha che.

Chanim k'ut xkowinik xka'yik, xteri b'i chrij ri Jesús pa ri b'e.

11

Kok ri Jesús pa ri tinimit Jerusalén

¹ Aretaq naqaj chik e k'o wi che ri tinimit Jerusalén, chkiwäch ri tinimit Betfagé ruk' ri tinimit Betania, tajin keok'ow chuxe' ri Ujuyub'al Olivos, ri Jesús xeutaq b'i kieb' chke ru tijoxelab'. ² Xub'ij chke: Jix pa ri alaj tinimit ri k'o apan chqawäch. Aretaq kixopan chila' kiriq na jun burro yuqulik. Man k'o tä jun winaq kiejeninaq chrij, —kächa'. Chikira', chik'ama loq, —kächa chke. ³ We k'o jun kub'ij chiwe: ¿Jas che kib'an wa? —kächa ne chiwe. Chib'ij che: Xa kajwataj che ri Qajaw Jesús, chanim k'ut kutzelej chi na loq che la, —kixcha che.

⁴ Xeb'e' k'u ri tijoxelab', xekiriqa k'u ri burro pa ri b'e, yuqul koq chuchi' ri porta. Xkikir k'ut.

⁵ Jujun chke ri a tak'atoj chila' xkib'ij chke: ¿Jas kib'ano kikir ri burro? —xecha chke.

⁶ Ri tijoxelab' xkib'ij chke jas ru b'im b'i ri Jesús. Xyi' k'u chke chi käkik'am b'ik. ⁷ Xkik'am k'u b'i ri burro, xkiya che ri Jesús. Xkiya ri ki q'u' chrij, xkiejen k'u ri Jesús. ⁸ E k'ia winaq xkilik' ri ki q'u' pa ri b'e, xuquje' k'o jujun chik ri xekiya u xaq taq che' ri xekich'upula pa taq ri juyub'.

⁹ Ri winaq ri e nab'ejinaq chuwäch ri Jesús, xuquje' ri e teretoj chrij, ko xech'awik, xkib'ij: ¡Chnimarisax u q'ij ri Dios! ¡Utz re ri petinaq pa ru b'i' ri Qajaw Dios! —kecha'. ¹⁰ ¡Tewchim b'a' ri' ri taqanik ri käpe na pa qa wi'! Tzare wa' ri taqanik ri xchaplex nab'e

rumal ri qa mam David. ¡Chnimarisax u q'ij ri Dios! —xecha'.

¹¹ Xopan k'u ri Jesús pa ri tinimit Jerusalén, xok pa ri nimalaj rachoch Dios. U ka'ylob'em chik ronojel, b'enaq chi k'u ri q'ij, xel b'ik, x'e' pa Betania, e rachi'l ri kab'lajuj u tijoxelab'.

Ri Jesús kuyaj ri u che'al higos ri man k'o tä u wäch

¹² Chukab' q'ij k'ut, aretaq tajin ketzelej loq, e petinaq pa ri tinimit Betania, xnum ri Jesús. ¹³ Xril k'u apan chinaj jun u che'al higos, räx k'u ru xaq. X'e' ri Jesús che rilik we k'o u wäch kuriqa'. Aretaq xopan ruk' ri che', man k'o tä k'u u wäch xuriqo, xane xaq xuwi ru xaq k'olik. Je ri', rumal chi mäja' ru q'ijol ri higos. ¹⁴ Xch'aw k'u ri Jesús, xub'ij che ri che': K'o jun mätijow chik ra wäch, —xcha che.

Xkita k'u wa' ru tijoxelab'.

Ri Jesús kujosaq'ij ri nimalaj rachoch Dios

¹⁵ Te k'u ri', aretaq xeopan pa Jerusalén, xok b'i ri Jesús pa ri nimalaj rachoch Dios, xuchaplej kesaxik b'i ri ajk'ayib', xuquje' ri kekiloq' taq jastaq chupam ri nimalaj rachoch Dios. Xeutaq ri ki mesa ri k'exal taq puag, xuquje' xeutaq ri ki tem ri ajk'ay taq palomäx. ¹⁶ Man xuya' tä k'u ri Jesús chi k'o jun kok'ow chupam ri nimalaj rachoch Dios ri ruk'am rega'n. ¹⁷ Xeutijoj k'u ri winaq, xub'ij chke: Tz'ib'am k'u wa' pa ru Loq' Pixab' ri Dios, kub'ij: “Ri wachoch in, are jun ja ri käb'an wi orat,” —kuchixik. “Je k'u u kojik wa' kumal konojel winaq,” —kächa ri'. Xuquje' xub'ij ri Jesús: Ri alaq k'ut, jun kachoch elaq'omab' b'anom alaq che, —xcha chke.

¹⁸ Xkita k'u wa' ri ki nimaqil sacerdotes xuquje' ri tijonelaq' re ri Pixab'. Xa je ri' xkitzujuk' jas käkä'n chukämisaxik. Je' xka'n wa' rumal chi xkixej kib' cho ri Jesús, rumal chi konojel ri winaq käkikajmaj ru tijonik ri Are'. ¹⁹ Are chi' k'ut tajin kok ri aq'ab', xel b'i ri Jesús pa ri tinimit.

Käkäm ru che'al higos ri yajtajinaq rumal ri Jesús

²⁰ Aq'ab' k'ut, chukab' q'ij tajin keok'ow pa ri b'e, xkilo chi ru che'al higos chaq'jarinaq chik ronojel. ²¹ Xna'taj k'u wa' che ri tat Pedro, xub'ij che ri Jesús: Ajtij, ¡chilampe la! Ru che'al higos ri xyaj la, ya chaq'jarinaq chik, —xcha che.

²² Xch'aw k'u ri Jesús, xub'ij chke ru tijoxelab': ¡Tzrajwaxik b'a' kijikib'a iwanima' chrij ri Dios! —kächa chke. ²³ Qas tzij ri kinb'ij chiwe chi apachin ri kub'ij che we nimalaj juyub' ri': “Chawesaj awib' chi', chak'iaqa b'i awib' pa ri nimalaj ja',” —we kächa che. We ta kub'ij wa', man käkieb'lan tä k'u u k'ux,

* **10:48** Ri “Ralk'ual kan ri qa mam David” kel kub'ij “To'l Qe”, junam jas ri tzij “Cristo” o “Mesías”.

xane kujikib'a u k'ux chi ri kub'ij káb'antaj na, qas káb'antaj k'u na wa'. ²⁴ Rumal wa' kinb'ij chiwe chi aretaq k'o kita' che ri Dios aretaq kib'an orar, chijikib'a iwanima' che ri Dios chi kik'amo, káb'antaj k'u na wa' chiwe, —kácha'. ²⁵ Amaq'el k'ut aretaq kib'an orar, we k'o jun k'ax pa iwanima' chrij jun winaq chik, chisacha u mak, rech ri i Tat ri k'o chikaj kuya' kusach ri i mak ix xuquje'. ²⁶ We k'u man kisach tá ki mak nik'iaj chik, ri i Tat ri k'o chikaj man kusach tá ri i mak ix, —xcha chke.

K'o taqanik pu q'ab' ri Jesús

²⁷ Xetzelej chi b'ik, xeb'e' pa ri tinimit Jerusalén. Ri Jesús tajin kub'inib'ej u pam ri nimalaj rachoch Dios, aretaq ri ki nimaqil sacerdotes, ri tijonelab' re ri Pixab', xuquje' ri ki nimaqil ri winaq xeopan ruk'. ²⁸ Xkib'ij k'u che: Jachin xtaqow la chi káb'an la ronojel wa' we ri'? Jachin lo ri yo'winaq che la chi je' káb'an la wa'? —xecha che.

²⁹ Xub'ij ri Jesús chke: Ri in xuquje' k'o ri kinta' chech alaq. We kákowin alaq chub'ixik chwe jas ri kinta', kinb'ij na chech alaq jachin ri yo'winaq chwe chi k'o taqanik pa nu q'ab' rech je' kinb'an wa', —kácha chke. ³⁰ B'ij alaq chwe jachin xtaqow ri tat Juan chub'anik ri qasna', we are ri Dios o are ri winaq, —xcha chke.

³¹ Xkichapla u tzijob'exik kib', xkib'ij: We káqab'ij chi are ri Dios xtaqowik, kub'ij na ri Jesús chqe: “Jas k'u che man xikoj taj?” —kácha na. ³² ¿A káqab'ij ta k'ut chi e are ri winaq xetaqowik? —kecha'.

Kákiex k'u kib' chkiwäch ri winaq rumal chi elinaq chi saq chkiwäch ri winaq chi qas tzij ri tat Juan are q'alajisal re ru Loq' Pixab' ri Dios. ³³ Rumal wa' xkitzelej u wäch u tzij ri Jesús, xkib'ij che: ¡Man qetam taj! —xecha che.

Ri Jesús xch'awik, xub'ij chke: Je k'u ri' ri in man kinb'ij tá chech alaq jachin ri yo'winaq chwe chi ri in kinb'an ronojel wa' we ri', —xcha chke.

12

Waral káqil wi ri k'utb'al chkiy ri ajchakib' ri man e utz taj

¹ Ri Jesús xuchaplej ki tzijob'exik ri winaq kuk' taq k'utb'al, xub'ij k'u chke: K'o jun achi ri xub'an jun tikb'al uvas, xukoralij rij, te k'u ri' xuk'ot jun jul ri kápitiz' wi ri uvas, xub'an xuquje' jun tak'atik'alaj ja ri kákoj che chajib'al re ronojel, xuya k'u kan pa qajomal chke jujun taq ajchakib', xe' naj pa jun tinimit chik, —kácha'.

² Xopan k'u ri q'ij ri káb'an ri cosecha rech uvas, ri ajchaq'el xutaq b'i jun patānil re kuk' ri ajchakib' chuk'amik re ru wächinik ri

tikb'al uvas. ³ Are k'u ri ajchakib' xkichap ri patānil, xkich'ayo, xkitaq b'ik, man k'o tá xkiya b'i che, —kácha'. ⁴ Ri ajchaq'el ri tikb'al uvas xutaq k'u b'i jun patānil chik kuk' ri ajchakib'. Ri e are' k'ut xka'n chi ab'aj ri patānil ri', xkisok chujolom, xa etzelal xka'n b'i che. ⁵ Xutaq chi k'u b'i jun patānil re, ri ajchakib' k'ut xkikāmisaj wa', je ri' xuquje' xka'n chke ri jule' u taqo'n chik. Jujun chke xekich'ayo. Jujun chik xekikāmisaj.

⁶ K'ä k'o na jun taqo'n chik ruk' ri ajchaq'el, are k'u ri u k'o'jol, ri sib'alaj loq' chuwäch. Chuk'isb'al ronojel xutaq b'i wa' kuk' ri ajchakib', xub'ij k'ut: “Qas nim kákil wi na ri nu k'o'jol,” —xcha ri ajchaq'el. ⁷ Ri ajchakib' xkitz'ijob'ej kib', xkib'ij: “Are wa' ri kechb'en ronojel. ¡Jo', qakāmisaj k'ut, rech káq'ax ronojel wa' pa q'a q'ab'!” —xecha'. ⁸ Xkichapo, xkikāmisaj, xkesaj k'u b'i ru cuerpo pa ri tikb'al uvas, —xcha ri Jesús chke.

⁹ Te k'u ri' ri Jesús xuta' chke, xub'ij: ¿Jas k'u kub'an na ri' ri ajchaq'el ri tikb'al uvas? —kácha ri Jesús. Kopan na kuk', keukāmisaj na ri ajchakib', kuya k'u na ru tikb'al uvas chke jule' chik, —kácha chke.

¹⁰ ¿A mat sik'im alaq wa' we tz'ib'am ri' pa ru Loq' Pixab' ri Dios? Je ri' kub'ij: Ri ab'aj ri man xkaj tá ri yakal taq ja,

are ab'aj wa' xkoj che toq'eb'al re ri ja.

¹¹ Je b'anom wa' rumal ri Qajaw Dios.

Qas kajmab'al k'u wa' chqawäch, —kácha', —xcha chke.

¹² Ri ki nimaqil ri winaq aj Israel xkitzukuj k'ut jas káka'n chuchapik ri Jesús rumal chi xkich'ob'o chi chkiy ri e are' xutzijoj wa' we k'utb'al ri'. Kákiex k'u kib' chkiwäch ri k'ialaj winaq, xa rumal ri' xkiya kan ri Jesús, xeb'e'k.

Káta' che ri Jesús we rajwaxik kátoj alkab'al

¹³ Xetaq k'u b'i jujun chke ri tata'ib' fariseos ruk' ri Jesús, xuquje' jujun chke ri rachi'l ri tat Herodes che rilik we k'o jas kekowin chub'anik rech káqaj ri Jesús pa ki q'ab'. ¹⁴ Aretaq xeopanik, xkib'ij che ri Jesús: Ajtij, qetam chi jikom anima' la, xuquje' chi man káxej tá ib' la chkiwäch ri winaq jas pu kákichomaj ri e are' chij la. Man nim tá k'u kil wi la jun winaq chuwäch ri jun chik, xane qas tzij káku't la u b'eyal ru rayinik ri Dios chkiwäch konojel. ¿A taqal chqe káqatoj alkab'al che ri César o a man taqal taj? —kecha'. ¿A rajwaxik k'ut káqatojo o a man rajwaxik taj? —xecha che.

¹⁵ Retam k'u ri Jesús chi xaq kieb' ki wäch, rumal ri' xub'ij chke: ¿Jas che káta' alaq wa' chwe? ¿A mat xa kaj alaq chi kinqaj pa

* 12:10 We ab'aj ri' ri xub'ij ri Jesús are ri Jesús mismo.

q'ab' alaq? —kächa'. K'amampe alaq loq jun puag chnuwäch rech kinwilo, —xcha chke.

¹⁶ Ri e are' xkik'am loq ri puag, xril k'u wa' ri Jesús, te ri' xub'ij chke: ¿Jachin k'u ajchaq'el we ka'yeb'al xuquje' we b'i'aj ri? —xcha chke.

Xkib'ij k'u che: Are rech ri César, —xecha che.

¹⁷ Xub'ij k'u ri Jesús chke: Ya b'a' alaq che ri César ri rech ri César. Ya k'u alaq che ri Dios ri rech ri Dios, —xcha ri Jesús chke.

Ri e are' xkikajmaj u wäch ri Jesús rumal ri xub'ij chke.

K'o jas käkita' ri tata'ib' saduceos che ri Jesús chrij ri ki k'astajib'al ri käminaqib'

¹⁸ Te ri' xeopan jujun tata'ib' saduceos ruk' ri Jesús. Ri winaq ri', ri saduceos, käkib'ij chi man kek'astaj tä chi na ri käminaqib'. Xkita' k'u che ri Jesús, xkib'ij: ¹⁹ ¡Ajti! Tz'ib'am kan chqerumal ri qa mam Moisés chi we käkäm ru chaq' jun achi, we käkäm ri ratz, k'o k'u kan ri rixoxil, we k'u man e k'o tä kan ralk'ual ruk' ri rixoxil, rajwaxik k'ut chi ri rachalal ri k'o kanoq, käk'uli ruk' ri ixoxi ri' ri malka'n rech kek'oji kan ralk'ual ruk'. Ri ak'alab' ri' je' ta ne e rech ri käminaq, —kecha che. ²⁰ E k'o k'u wuqub' achijab' e kachalal kib'. Ri nab'eal xk'uli'k, xkäm k'ut, man k'o tä k'u kan ralk'ual ruk' ri rixoxil. ²¹ Ri ukab' xk'uli' ruk' ri rixnam malka'n, xuquje' xkäm b'ik, man k'o tä kan ralk'ual. Je' xuquje' xub'an ri urox achi. ²² Je k'u ri' xka'n ri wuqub' achijab', kachalal kib', man xkiya tä kan kalk'ual. E käminaq chik konojel, xkäm k'u b'i' ri ixoxi. ²³ Aretaq k'ut kek'astaj na ri käminaqib', ¿jachin chke wa' we wuqub' achijab' ri' käk'amow ri ixoxi che rixoxil? Xk'oji k'u che kixoxil ri wuqub', —xecha che.

²⁴ Xch'aw k'u ri Jesús, xub'ij chke: Ri alaq xa sachinaq alaq rumal chi man etam tä alaq ru Loq' Pixab' ri Dios ri Tz'ib'talik. Man etam tä k'u alaq ru chuq'ab' ri Dios, —kächa chke. ²⁵ Aretaq ri käminaqib' kek'astajik, man kek'uli tä chik. Ri qa nan qa tat k'ut man käkiya tä chi ri kalk'ual che k'ulanem, xane e junam chi kuk' ri ángeles ri e k'o chikaj, —kächa'. ²⁶ Chrij k'u wa' chi kek'astaj na ri käminaqib', k'o na ri kwaj kinb'ij chech alaq: ¿A mat sik'im alaq pa ri wuj ri tz'ib'am rumal ri qa mam Moisés jawije' ri kub'ij wi chi ri Dios k'o chupam ri juwi' k'ix ri tajin käk'atik, xuch'ab'ej loq ri qa mam Moisés? Je wa' xub'ij: "In ri' ru Dios ri Abraham, ru Dios ri Isaac, ru Dios ri Jacob," —xcha ri Dios, —kächa'. ²⁷ Ri qa Dios man are tä Dios kech ri käminaqib', xane kech ri e k'ask'oj.

Je ri' q'alaj chi xa sachinaq alaq, —xcha ri Jesús chke.

Ri Jesús kutzijoj ri taqanik ri nim na u b'anik

²⁸ Xopan k'u jun chke ri tijonelab' re ri Pixab' ri tajin kätatab'enik aretaq xkichomala kib'. Retam k'ut chi ri Jesús utz u tzelexik u wäch ri ki tzij u b'anom, rumal ri' xuta' che: ¿Jas ri taqanik ri nim na u b'anik chkiwäch konojel? —xcha che.

²⁹ Ri Jesús xch'awik, xub'ij che: Are wa' ri tznim na u b'anik: "Winaq aj Israel, ¡chitatab'ej!" —kächa'. "Ri qa Dios ri Qajaw, xaq xuwi ri Are', are Qajaw," —kächa'. ³⁰ "Sib'alaj chiwaj ri i Dios ri Iwajaw, chijikib'a ri i k'ux, chijikib'a ri iwanima, chikojo ri i chomanik, chitija k'u ri i chuq'ab' chub'anik wa'," —kächa'. Tzare k'u wa' ri nab'e taqanik ri sib'alaj nim u b'anik. ³¹ Ri ukab' taqanik ri sib'alaj nim na u b'anik are wa': "Chiwaj ri iwach winaq jas ri ix kiwaj iwib'," —kächa'. Man k'o tä chi k'u jun taqanik ri nim na u b'anik chkiwäch wa', —xcha ri Jesús che.

³² Xub'ij k'u ri tijonel re ri Pixab' che ri Jesús: ¡Utz ri káb'ij la, Ajti! Qas tzij ri káb'ij la chi xa jun ri qa Dios, man k'o tä chi jun chuwxäch ri Are', —kächa che. ³³ Xuquje' rajwaxik chi jun winaq sib'alaj kraj ri Dios, kujikib'a ru k'ux, kujikib'a ri ranima', kukoj ru chomanik, kutij k'u u chuq'ab' chub'anik wa'. Xuquje' rajwaxik chi kraj ri rach winaq je' jas ri are' kraj rib'. Nim na u b'anik wa' chkiwäch konojel ri sipanik ri keporox cho ri Dios, xuquje' chkiwäch konojel ri awaj ri kekämisax che sipanik cho ri Dios, —xcha che.

³⁴ Aretaq ri Jesús xuto chi sib'alaj kána'w ri tata' chutzelexik u wäch u tzij, xub'ij che: Xaq jub'iq' kraj man kätaqan ri Dios puwi' la, —xcha che.

Te k'u ri' man k'o tä chi jun xuchajij anima' chi k'o jas xuta' che ri Jesús.

Ri Jesús kätzizon chrij ri ralk'ualaxik ri Cristo

³⁵ Ri Jesús tajin keutijoj ri winaq pa ri nimalaj rachoch Dios, käch'awik, kub'ij: ¿Jas che käkib'ij ri tijonelab' re ri Pixab' chi ri Cristo are xaq xuwi ralk'ual kan ri qa mam David? ³⁶ Tzare k'u ri qa mam David kub'ij rumal ri Loq'alaj Espíritu:

Xub'ij ri Qajaw ri qa Dios che ri Qajaw:

"Chatt'uyul pa ri nu wikiäq'ab',†
k'ä kinya na chawe chi katch'akanik
kattaqan pa ki wi' konojel
ri kaka'n ki k'ulel chawe,"

—kächa'. ³⁷ We ri qa mam David kub'ij: "Qajaw" che ri Cristo, ¿jas ta k'u che käkib'ij

† 12:36 Ri kät'uyi jun pu wikiäq'ab' jun nim taqanel, we are ri Dios o jachin jun ri k'o taqanik pu q'ab', kel kub'ij chi ri jun ri t'uyul pu wikiäq'ab', are käyi' nim taqanik pu q'ab' ri are' xuquje'.

ri e are' chi ri Cristo are xaq xuwi ralk'ual kan ri qa mam David? ¡Man je' tä ri'! —xcha chke.

Ri winaq k'ut, ri sib'alaj e k'ia chik ki mulim kib', kâkikot kanima' chutatab'exik ru tzij ri Jesús.

Ri Jesús kub'ij chi rajwaxik chi ri winaq kâkichajij kib' chkiwäch ri tijonelab' re ri Pixab'

³⁸ Ri Jesús tajin keutijoj ri winaq, kub'ij chke: Chajij ib' alaq chkiwäch ri tijonelab' re ri Pixab'. Ri e are' kâqaj chkiwäch keb'inikat pa charchâq taq katzi'iaq. Xuquje' kâqaj chkiwäch chi nim keil wi na, kâyi' k'u rutzil ki wäch pa taq ri k'ayib'al, pa taq ri b'e. ³⁹ Kâkitzujuk ri t'uylub'al ri nimaq ki b'anik pa taq ri rachoch Dios, xuquje' ri t'uylub'al ri nim keil wi pa taq ri ula'nem ri kewi wi, —kâcha chke. ⁴⁰ Xuquje' kâkitoqij taq ri kachoch ri malka'nib' taq ixoqib'. Te ri' kâkiyuq u tza'm ri ki tzij aretaq kâka'n orar rech man q'alaj tä ri etzelal ri tajin kâka'no. ¡Qas nim na ri k'âx kâkiriq ri tijonelab' re ri Pixab' aretaq kâq'at na tzij pa ki wi'! —xcha ri Jesús chke ri winaq.

Qas nim ri kusipaj jun malka'n chichu' cho ri Dios

⁴¹ T'uylub'al k'u ri Jesús pa ri nimalaj rachoch Dios chkiwäch taq ri kâxon ri kâyi' wi ri puqaj ri kâsipax cho ri Dios. Tajin kâka'y chke ri winaq ri kâkiya ri ki rajil chupam taq ri kâxon ri'. E k'ia k'u chke ri q'inomab' xekiya nimaq taq ki rajil. ⁴² Xopan k'u jun malka'n chichu' ri meb'a', xuya xa kieb' alaj taq puqaj, kraj ne xa jun centavo rajil ri kieb' puqaj ri'. ⁴³ Ri Jesús xeusik'ij ru tijoxelab', xub'ij k'u chke: Qas tzij ri kinb'ij chiwe, chi we meb'alaj malka'n chichu' ri', are nim na wa' ri xusipaj ri are' chkiwäch konojel ri nik'iaj winaq ri ki yo'm ki rajil pa taq ri kâxon ri k'olib'al puqaj. ⁴⁴ Ri e are' ki yo'm jub'iq' re ri k'ia ri k'o kuk'. Are k'u we malka'n chichu' ri' u yo'm ronojel ri k'o ruk', ronojel ri tzuqub'al re, —xcha chke.

13

Ri Jesús kuq'alajisaj chi kâwulix na ri nimalaj rachoch Dios

¹ Elem b'i re ri Jesús pa ri nimalaj rachoch Dios, jun chke ru tijoxelab' xub'ij che: ¡Ajtij, chilampe la we je'lalaj taq ab'aj ri', xuquje' taq we ja ri yakom ri' ri sib'alaj e kajmab'al! —xcha che.

² Xch'aw k'u ri Jesús, xub'ij che: ¿A kawil konojel we nimalaj taq ja ri e yakom ri'? —kâcha'. Man kâkanaj tä k'u kan jun ab'aj puwi' ri jun ab'aj chik ri mat kâwulix na, —xcha che.

Ri Jesús keutzijoj ri etal re ri k'isb'al taq q'ij

³ Xe' k'u ri Jesús, e rachi'l ru tijoxelab', pa ri Ujuyub'al Olivos ri k'o apan cho ri rachoch Dios. T'uylub'al k'u ri Jesús chila', ri tat Pedro, ri tat Jacobo, ri tat Juan, xuquje' ri tat Andrés xkita' che ri Are' pu tukiel wi, ⁴ xkib'ij: Kâqaj chi kâb'ij la chqe jampa' kâb'antaj na wa'. ¿Jas u wäch etal kâb'an na chuk'utik chqawäch chi xopan ri q'ij ri' ri keb'antaj na konojel taq wa' ri b'im la chqe? —xecha che.

⁵ Ri Jesús xch'awik, xub'ij chke: ¡Chichajij iwib' k'o jachin jun mixsub'uwik! —kâcha'. ⁶ E k'ia k'ut ri kepe na, kâkikoq na ri nu b'i', kâkib'ij: “¡in ri' ri Cristo!” —kecha na. E k'ia k'u ri' ri kekisub' na, —kâcha chke.

⁷ Aretaq kita nimalaj taq ch'oj, xuquje' kita u tzijoxik taq ch'oj jawije' taq chi', mixej iwib'. Rajwaxik chi kâb'antaj na wa'. K'a mäjoq k'u ri k'isb'al re ri q'ij junab' ri', —kâcha'. ⁸ Kâch'ojin k'u jun tinimit ruk' ri jun tinimit chik, xuquje' kâch'ojin jun nim taqanel ruk' jun nim taqanel chik. Kepe k'u na k'ia kâb'raqan jawije' taq chi', kâpe na wi'jal xuquje', ri winaq k'ut sib'alaj kâkitukij na kib'. Xaq k'u chapleb'al wa' re ronojel ri k'âx ri kâpe na pa ki wi' ri winaq, —kâcha chke.

⁹ ¡Chichajij b'a' iwib'! —kâcha'. Kixjach k'u na pa taq ki q'ab' ri ki nimaqil winaq ri ketaqan pa ki wi', xuquje' kixch'ay na chkiwäch ri ki nimaqil ri winaq pa taq ri rachoch Dios ri kâkimulij wi kib' ri winaq. Kixtak'ab'ax na chkiwäch q'atal taq tzij, xuquje' chkiwäch taqanelab' ri nimaq ki b'anik rumal wech in rech kiq'alajisaj na ri Utzalaj Tzij re ri Evangelio chkiwäch ri e are', —kâcha chke. ¹⁰ K'a mäjoq k'u kopan ri k'isb'al re ri q'ij junab' ri', rajwaxik kâtzijox na we Utzalaj Tzij ri' re ri Evangelio chke konojel ki wäch winaq cho ruwächulew, —kâcha'. ¹¹ Aretaq kixk'am na b'ik rech kixjach chkiwäch ri q'atal taq tzij, mixej iwib', michomaj b'ik jas ri kib'ij na chke, xane chib'ij ri kâyi' chiwe rumal ri Dios pa ri q'ij ri'. Man ix tä k'ut ri kixtzijon na, xane are ri Loq'alaj Espiritu. ¹² Ri winaq kekijach na ri kachalal pa kâmisaxik, ri nan tat kekijach na ri kalk'ual pa kâmisaxik. Ri alk'ualaxelab' kâkiyak na kib' chkiy ri ki nan ki tat, kekijach na pa kâmisaxik. ¹³ ¡Konojel ri winaq kâketzelaj na i wäch xa rumal wech in! —kâcha'. Are k'u ri kâch'ijowik k'â kâk'is na ronojel, kuriq na ri' ru tob'anik ri Dios, —kâcha chke.

¹⁴ Ri qa mam Daniel, jun chke ri q'alajisaj re ru Loq' Pixab' ri Dios, xutz'ib'aj ojer chrij ri “itzelalaj âwas ri ketzelan ronojel.” ¡Jachin ri kusik'ij wa', ri tz'ib'tal waral, chuch'ob'o' jas ri' ri âwas ri kub'ij chi'! Aretaq kiwil wa' kâk'oji chila' jawije' ri man ya'tal tä wi, rajwaxik chi ri winaq ri e k'o pa Judea keanimaj b'i pa taq ri juyub'. ¹⁵ Ri winaq

ri e k'o puwi' taq kachoch,* aninaq cheqaj loq, meb'ok chi b'i chupam ri ja chuk'amik b'i jun jasach. ¹⁶ Xuquje' ri e k'o pa ri juyub' mätzelej b'i cho ja chuk'amik ri ki q'u'. ¹⁷ Sib'alaj k'äx ke ri ixoqib' ri yawab' taq winaq chik pa taq ri q'ij ri', xuquje' ri e k'o alaj taq kal ri k'ä ketu'nik! ¹⁸ Chib'ana b'a' orar, chixb'ochi'n che ri Dios chi mäk'ulmataj ronojel wa' pa taq ri u q'ijol ri tew! ¹⁹ Je ri', rumal chi käpe na nimalaj k'äxk'ol pa taq ri q'ij ri', ri man k'olinaq tä ri' tzpa ru chaplexik loq ru b'anik ruwächulew rumal ri Dios k'ä pa taq we q'ij ri'. Te k'u ri' man k'o tä jumul ri kepe chi na k'äxalaj taq q'ij junam ruk' ri k'äxk'ol ri'. ²⁰ We ta ri Qajaw Dios mat kub'ano chi xaq q'atatal q'ij käk'oji we k'äxk'ol ri', mat k'o jun winaq ri' ri käk'asi kanog. Ri Dios k'ut u b'anom chi xaq q'atatal q'ij käk'oji wa' rumal chi keraj ri e cha'tal rumal ri Are'.

²¹ We k'u k'o jun ri kub'ij chiwe: “iChiwilampe', k'o ri Cristo chi ri'!” We kub'ij: “iChiwilampe', k'o jela'!” —we kächa'. iMikoj b'a'! —kächa chke. ²² Kepe na winaq ri kaka'n che kib' chi e are ri Cristo, xuquje' kepe chi na jule' chik ri kaka'n che kib' chi e q'alajisal taq re ru Loq' Pixab' ri Dios. Keka'n k'u na etal, xuquje' kajmab'al che ki sub'ik ri winaq ri e cha'tal rumal ri Dios we kekowinik, —kächa'. ²³ iChiwila b'a' iwib'! Nu b'im chi k'u apan ronojel wa' chiwe, —xcha ri Jesús chke.

Waral kätzijox wi jas ru petik ri Ralk'ual ri Dios ri Qas Winaq

²⁴ Pa taq ri q'ij ri' aretaq ok'owinaq chik ri nimalaj k'äx ri', ri q'ij käk'equmar na, ri ik' k'ut man kätunun tä chik. ²⁵ Ketzaq k'u na loq ri ch'imil cho ri kaj. Keslab'isax k'u na konojel ri k'o ki chuq'ab' ri e k'o cho ri kaj, je' jas ri q'ij, ri ch'imil, ri ik', xuquje' nik'iaj chik, —kächa'. ²⁶ Te k'u ri' kilitaj k'u na chi ri in, in ri' ri Ralk'ual ri Dios ri Qas Winaq, kinpe pa taq ri sutz' ruk' nimalaj nu chuq'ab', känimarisax k'u nu q'ij, —kächa'. ²⁷ Te ri' keintaq na b'i ri ängeles rech kekumulij ri winaq ri e cha'tal rumal ri Dios pa ri relb'al q'ij, pa ru qajb'al q'ij, pa ri u moxq'ab' ri relb'al q'ij, pa ru wikiäq'ab' ri relb'al q'ij, tzpa ronojel ri kajulew, —xcha chke.

²⁸ Chich'ob'o b'a' ri k'utb'al chrij ru che'al higos: Aretaq keräxar ru q'ab', ketuxin k'u ru xaq, iwetam ri' chi xaq jub'iq' chik man kopan ri q'alaj. ²⁹ Je ri' xuquje' ri ix aretaq kiwil ki k'ulmaxik ronojel wa', kiwetamaj na chi xaq jub'iq' chik man kopan ri q'ij ri kinpetik. Je' ta ne chi in k'o chi' ri uchib'e. ³⁰ Qas tzij ri kinb'ij chiwe chi keb'antaj na ronojel wa' ri xinb'ij chiwe k'ä

mäjoq kekäm ri winaq re we q'ij junab' ri', —kächa'. ³¹ Käsach na u wäch ri kaj, xuquje' ruwächulew, are k'u ri tzij ri nu b'im chiwe keb'antaj na wa', —xcha chke.

³² Man k'o tä k'u jachin jun ri retam jampa' kopan ri q'ij ri', o ri hora. Man ketam tä ri ängeles, man retam tä ru K'ojol ri Dios, xane xaq xuwi ri qa Tat Dios retam wa', —kächa'.

³³ Rumal wa', ichiwila b'a' iwib', chixk'ask'atoq, chib'ana orar! iMan iwetam tä k'ut jampa' kopan ri q'ij ri'! —kächa chke.

³⁴ Are je' jas jun achi b'enam kub'ano, naj ke' wi. K'ä mäja' kel b'ik cho ja, kuya kan ronojel pa ki q'ab' ri patänil taq re, xuquje' kuya kan ri ki chak chkiyujunal. Kätaqan kan che ri chajil uchib'e chi utz rilik ri ja kub'ano, —kächa chke. ³⁵ iChiwila b'a' iwib', chixk'ask'atoq! rumal chi man iwetam taj jampa' käpe ri ajchaq'el ja, we tajin kok ri aq'ab' aretaq käpetik, we pa nik'iaj aq'ab', we pa ri hora ri koq' ri ama' äk', we tajin käpe chi ru saqirik. ³⁶ Chiwila b'a' iwib' rech we xaq te'talik käpetik mixuluriqa ne tajin kixwarik. ³⁷ Ri kinb'ij chiwe, kinb'ij k'u chke konojel. iChiwila b'a' iwib', chixk'ask'atoq! —xcha chke.

14

Käkitzijob'ela kib' jas kaka'n chukämisaxik ri Jesús

¹ Xa kieb' q'ij chik kraj che ri nimaq'ij, Pascua* u b'i', xuquje' ri nimaq'ij re ri kaxlan wa ri man käyi' tä ch'äm ruk'. Ri ki nimaqil sacerdotes, xuquje' ri tijonelab' re ri Pixab' käkitzukuj jas kaka'n na chuchapik ri Jesús ruk' sub'unik rech käkikämisaj. ² Xkib'ij k'ut: iMächap pa ri nimaq'ij rech metukin ne ri winaq! —xecha'.

Jun ixoq kuya k'ok'alaj kunab'al pujolom ri Jesús

³ Are k'u ri Jesús k'o pa ri tinimit Betania cho rachoch ri tat Simón, jun tata' ri xk'oji itzel ch'a'k che. T'uyl k'u ri Jesús chi' ri mesa, xopan jun ixoq ruk'am jun k'olib'al kunab'al re alabastro, k'o k'ok'alaj kunab'al re qas nardo chupam. Sib'alaj paqal rajil wa' we kunab'al ri'. Ri ixoq xupaxij ri k'olib'al kunab'al, xutix k'u ri kunab'al pujolom ri Jesús. ⁴ E k'o k'u jujun chila' ri xa xpe koyowal, xkib'ij chb'il taq kib': iJas che xaq xtiw wa' we kunab'al ri? —xecha'. ⁵ iXk'iyix ta k'u wa' che oxib' cientos quetzales ruk' u wi', xyl' ta k'u ri puqaq chke ri meb'a'ib'! —xecha'.

Xeyoq'on k'u che ri ixoq.

⁶ Xub'ij k'u ri Jesús: iJas che kiya latz' che ri ixoq? iMib'an wa' che! iJun nimalaj utzil k'ut ru b'anom chwe! —kächa chke.

* 13:15 Pa taq ri q'ij ri' are l'lik ki wi' ri kachoch ri winaq. Chila' xeuxlan wi, xuquje' xechakunik.

Chawila' ri San Mateo 26:2, nota.

* 14:1 “Pascua”:

⁷ Amaq'el k'ut e k'o ri meb'a'ib' iwuk', kuya' k'ut kib'an utzil chke aretaq kiwaj u b'anik wa'. Are k'u ri in man in k'o tā iwuk' ronojel q'ij. ⁸ We ixoq ri' u b'anom jas ri xkowin chub'anik, ri xpe pa ranima'. U kojom k'u b'i ri k'ok'alaj kunab'al che ri nu cuerpo k'ä mäjoq kinmuqik. ⁹ Qas k'u tzij ri kinb'ij chiwe chi apawije' ta ne ri kätzijox wi na ri Utzalaj Tzij re ri Evangelio cho ronojel ruwächulew, ri u b'anom we ixoq ri' kätzijox na che na'tab'al re, —xcha chke.

Ri tat Judas kuchi'j u jachik ri Jesús

¹⁰ Te k'u ri' xel b'i ri tat Judas Iscariote, jun chke ri kab'lajuj tijoxelab', xe' ri are' kuk' ri ki nimaqil sacerdot chuchomaxik kuk' jas kub'an chujachik ri Jesús pa ki q'ab'. ¹¹ Aretaq xkito, xekikotik, xkib'ij k'u che ri tat Judas chi käkiya na puag che. Ri tat Judas k'ut tajin käreyej chi kopan jun utzalaj q'ij chujachik ri Jesús pa ki q'ab'.

Käb'an ri wi'm re ri Qajaw Jesús

¹² Pa ri nab'e q'ij re ri nimaq'ij re ri kaxlan wa ri man käyi' tā ch'äm ruk',[†] aretaq kākämisax ri chij che ri nimaq'ij Pascua, ru tijoxelab' ri Jesús xkib'ij che: ¿Jawije' kaj wi la chi kăqa'n wi ri wi'm re ri Pascua rech kätij la? —xecha che.

¹³ Xeutag k'u b'i kieb' chke ru tijoxelab', xub'ij k'u chke: jix pa ri tinimit! Kix-uriga na jun achi ruk'am jun q'eb'al joron. Chiterenej b'ik. ¹⁴ Jawije' k'u ri kok wi ri achi, chib'ij k'u che ri ajchaq'el ri ja: "Kuta' ri Qajtij che la, kub'ij: ¿Jawije' kinb'an wi ri wi'm re ri Pascua ri kintij junam kuk' ri nu tijoxelab'?" —kächa ri', —kixcha che. ¹⁵ Ri are' kuk'ut na chiwäch jun nim ja pa ru kawiq ja ri ya suk'umatal chik. Chib'ana u b'anik ri wi'm re ri Pascua chqe uj chila', —xcha chke.

¹⁶ Xeb'el k'u b'i ri tijoxelab', xeb'e' pa ri tinimit, xkiriqa ronojel jas ri xub'ij b'i ri Jesús chke. Xka'n k'u u b'anik ri wi'm re ri Pascua chila'.

¹⁷ Aretaq chaq'ab' chik xopan ri Jesús, e rach'il k'u ri kab'lajuj tijoxelab'. ¹⁸ E t'uyul chila' chi' ri mesa, tajin kewi'k aretaq ri Jesús xub'ij chke: Qas tzij ri kinb'ij chiwe chi k'o jun chiwe ri kinujach na, are jun ri tajin käwi' wuk', —xcha chke.

¹⁹ Ru tijoxelab' sib'alaj xeb'isonik. Chkijujunal k'ut xkichaplej u ta'ik che ri Jesús: ¿A man xa in ri'? —xecha che.

²⁰ Xch'aw k'u ri Jesús, xub'ij chke: Are jun chke ri kab'lajuj tijoxelab' ri kurub' ru wa wuk' pa ri laq, —kächa'. ²¹ Je' kinel na in jas ri tz'ib'tal pa ru Loq' Pixab' ri Dios chwij in, in ri' ri Ralk'ual ri Dios ri Qas Winaq. jK'äx k'u kuriq na ri achi ri kinjashow na in! jUtz

na re we achi ri' we ta mat xil u wäch! —xcha chke.

²² Aretaq tajin kewi'k, ri Jesús xuk'am ri kaxlan wa, xumaltioxij wa' che ri Dios, xub'an orar puwi' chutewchixik. Te ri' xupiro. Xuya chkiwäch ru tijoxelab', xub'ij: jChik'ama iwe! Je' ta ne are nu cuerpo wa', —xcha chke.

²³ Te k'u ri' xuk'am jun vaso, xumaltioxij k'u wa' che ri Dios. Xuya ri vaso chkiwäch, xkitij k'u ke konojel. ²⁴ Xub'ij k'u ri Jesús chke: Je' ta ne are nu kik'el wa' ri kujikib'a ri k'ak' trato ri u b'anom ri Dios kuk' ri winaq. Käturuw k'u na wa' ri nu kik'el rech kub'an utzil chke k'ia winaq, —kächa'. ²⁵ Qas tzij ri kinb'ij chiwe chi man kintij tā chi na we ri vino re uvas, k'ä pa ri q'ij ri kintij na ri k'ak' vino chila' jawije' ri kätapan wi ri Dios, —xcha chke.

Ri Jesús kutzijoj apanoq chi ri tat Pedro kub'ij chi man retam tā u wäch

²⁶ Te k'u ri' xkib'ixoj jun b'ix ri kuya u q'ij ri Dios, xeb'el b'ik, xeb'e' pa ri Ujuyub'al Olivos. ²⁷ Xub'ij k'u ri Jesús chke: Ri ix iwonojel kib'isoj na nu wäch, kiniya na kan kāmik chaq'ab'. Je' k'u tz'ib'am kanoq pa ru Loq' Pixab' ri Dios: "Kinsok na ri ajyuq', kejab'un k'u na ri chij," —kächa'. ²⁸ Aretaq k'u in k'astajinaq chik chkixol ri kāminaqib', kinnab'ej na b'i chiwäch, kine' na pa Galilea, —xcha chke.

²⁹ Xub'ij k'u ri tat Pedro che ri Jesús: jPune konojel käkiya la kanoq, ri in man je' tā ri' kinb'ano! —xcha'.

³⁰ Xub'ij k'u ri Jesús che: Qas tzij ri kinb'ij chawe chi tza we aq'ab' ri' kab'ij na at oxmul chi man awetam tā nu wäch mäjoq koq' kamul ri ama' äk', —xcha che.

³¹ Ri tat Pedro tzko na xch'awik, xub'ij: Pune rajwaxik chi kinkäm na uk' la, qas tzij chi man kinb'ij taj chi man wetam tā wäch la, —xcha che.

Je' k'u xkib'ij xuquje' konojel ri tijoxelab'.

Ri Jesús kub'an orar pa Getsemaní

³² Aretaq xeonan pa ri ch'äqap ulew, Getsemaní u b'i, xub'ij ri Jesús chke ru tijoxelab': Chixt'uyul kan chi' k'ä kinto'taj na chub'anik orar, —xcha'.

³³ Xeuk'am b'i ri tat Pedro, ri tat Jacobo, ri tat Juan ruk'. Xuchaplej k'u t'ujuwem ri ranima' ri Jesús, xk'äx'ob' k'u wa'. ³⁴ Xub'ij k'u chke: jXa are kuk'is rib' ri wanima' chupam ri b'is! Chixkanaj kan chi', chixk'ask'atoq, —xcha chke.

³⁵ Te ri' xb'in chi apan jub'iq' ri Jesús, xutzaq rib' pa ulew, tajin kub'an orar, xutz'onoj che ri Dios chi we ta k'o b'anom wi, mat kuriq we k'äx ri' ri petinaq chrij.

[†] 14:12 "Ri kaxlan wa ri man käyi' tā ch'äm ruk'": Chawila' Hechos 12:3, nota. [‡] 14:36 Ri tzij "Abba" kel kub'ij "nu tat" pa ri ch'ab'al arameo, ri ki ch'ab'al ri winaq aj Israel pa taq ri q'ij ri xk'oji ri Jesús cho ruwächulew.

³⁶ Aretaq xub'an orar, xub'ij: ¡Abba!† ¡Tat! Ri lal kākowin la che ronojel. Chesaj b'i la we vaso ri' chnuwäch. B'ana b'a' la chi man käpe tä we k'äx ri' chwij. Mäb'an k'u la xa jas ri kwaj in, xane jas ri kaj la käb'an la chwe, —xcha che ri Dios.

³⁷ Xtzelej k'u loq ri Jesús kuk' ru tijoxelab', xeuriga', tajin kewarik. Xub'ij k'u che ri tat Pedro: ¿A katwarik, Simón? ¿A mat katkowinik katk'asi jun hora wuk'? —kächa che. ³⁸ Chiwila b'a' iwib', chixk'ask'atoq, chib'ana orar rech man kixtzaq taj aretaq kixtaqchi'x che mak. Qas tzij ri iwanima' kraj u b'anik utzil, man k'o tä k'u u chuq'ab' ri i cuerpo chub'anik wa', —xcha chke.

³⁹ Xe' jumul chik ri Jesús, xub'ana orar, je' xub'ij jas ri xub'ij nab'e. ⁴⁰ Te k'u ri' xtzelej chi loq, xeuriga ru tijoxelab' chi jumul chik tajin kewarik rumal chi sib'alaj k'äx ki waram. Man xkiriq tä k'u ru tijoxelab' jas kākib'ij che ri Jesús. ⁴¹ Churoxmul xtzelej chi loq ri Jesús kuk', xub'ij k'u chke: Chixwar b'a', chixuxlanog, —xcha'. Te ri' xub'ij: ¡Ruk' wa'! —kächa'. Opaninaq k'u ri hora. Kinjach k'u na in, in ri' ri Ralk'ual ri Dios ri Qas Winaq, pa ki q'ab' ri ajmakib', —kächa'. ⁴² ¡Jo' b'a'! ¡Chixwalijjoq! Chiwilampe', xpe ri jachal we, —xcha chke.

Ri tat Judas kujach b'i ri Jesús

⁴³ K'ä tajin käch'aw ri Jesús aretaq xopan ri tat Judas, jun chke ri kab'lajuj u tijoxelab'. E petinaq ruk' ri are' k'ia winaq, kuk'am machetes, kuk'am che'. E taqom loq kumal ri ki nimaqil sacerdotes, kumal k'u taq ri tijoxelab' re ri Pixab', xuquje' ri ki nimaqil ri winaq. ⁴⁴ Ri tat Judas, ri jachal re ri Jesús, u yo'm k'u kan jun etal chke ri winaq, xub'ij: Ri kintz'umaj, are ri' ri Jesús. ¡Chichapa! Qas utz chib'ana b'i chujat'ixik, —xcha chke.

⁴⁵ Aretaq xopanik, chanim xqeb' ruk' ri Jesús, xub'ij: ¡Qajtij, Qajtij! —xcha che.

Xutz'umaj k'ut. ⁴⁶ Xkichap k'u ri Jesús, xkiyut b'ik.

⁴⁷ Jun chke ri e tak'atoj chila' xuk'am ru machete, xusok ri patänil re ri ki nimal sacerdotes, xuq'at apan ru xiklin. ⁴⁸ Xub'ij k'u ri Jesús chke ri winaq: ¿Jas lo wa' chi je' ta ne chrij jun elaq'om elinaq wi alaq loq? K'amom alaq loq ri machetes alaq, ri che' alaq che nu chapik, —kächa chke. ⁴⁹ Ronojel q'ij in k'o uk' alaq pa ri nimalaj rachoch Dios, tajin kinya tijonik chech alaq, man xinchap tä k'u alaq. Je' k'u käb'an na wa' chwe rech je' käb'an na jas ri tz'ib'am chwij pa ru Loq' Pixab' ri Dios, —xcha chke.

⁵⁰ Chanim k'ut konojel ru tijoxelab' xkiya kan ri Jesús, xeanimaj b'ik.

Jun ala kanimaj b'ik

⁵¹ K'o k'u jun ala teren chrij ri Jesús, xaq jun saq atz'iaq u q'u'm chrij. Xchap k'u ri kumal ri winaq. ⁵² Ri are' k'ut xuya kan

ri ratz'iaq pa ki q'ab', ch'analik xanimaj b'i chkiwäch.

Kopan ri Jesús chkiwäch ri ki nimaqil sacerdotes

⁵³ Te ri' xkik'am b'i ri Jesús cho ri qas ki nimal sacerdotes. Xkimulij k'u kib' konojel ri ki nimaqil sacerdotes, ri ki nimaqil ri winaq, xuquje' ri tijoxelab' re ri Pixab'. ⁵⁴ Ri tat Pedro k'ut xuterenej b'i ri Jesús chinaj, xopan k'u pa ri uwoja re ri rachoch ri qas ki nimal sacerdotes. Xt'uyi k'u ri tat Pedro chila' kuk' ri chajil taq re ri nimalaj rachoch Dios, tajin kumiq' rib' chrij ri q'aq'.

⁵⁵ Ri ki nimaqil sacerdotes kuk' konojel ri ki nimaqil ri winaq tajin käkitzukuj jas u wäch mak ri kāk'alajisax chrij ri Jesús rech kākāmisaxik. ¡Man xkiriq tä k'ut! ⁵⁶ E k'ia k'u ri xka'n tzij chrij aretaq xka'n q'alajisanik. Man xaq tä k'u jun u wäch ri xkib'ij. ⁵⁷ Te ri' xewalij jujun ri kākā'n tzij chrij ri Are', xkib'ij: ⁵⁸ Qa tom ri xub'ij: "Ri in kinwulij na we nimalaj rachoch Dios ri' ri b'anom kumal ri winaq, kinyak chi k'u na pa oxib' q'ij jun ri man b'anom tä wa' kumal winaq," —xcha ri', —xecha chke.

⁵⁹ Man ruk' tä wa' xjunamataj u wäch ri xkib'ij chrij.

⁶⁰ Xwalij k'u ri qas ki nimal sacerdotes, xtak'i chkiwäch konojel, xuta' che ri Jesús, xub'ij che: ¿A mat k'o jas jun tzij kab'ij chutzelexik u wäch ri tajin kāk'ix chawij? ¿Jas pu wa' we tajin kāk'iq'alajisaj we achijab' ri' chawij? —xcha che.

⁶¹ Man käch'aw tä k'u ri Jesús, man k'o tä wi jas kub'ij che. Ri qas ki nimal sacerdotes xuta' jumul chik che ri Jesús, xub'ij: ¿A qas at ri' ri Cristo, ru K'ojol ri Dios ri kākaya u q'ij? —xcha che.

⁶² Xch'aw k'u ri Jesús, xub'ij che: ¡In ri', tat! —kächa che. ¡Kinil k'u na alaq ri in, in ri' ri Ralk'ual ri Dios ri Qas Winaq, aretaq in t'uuyul pa ru wikiäq'ab' ri Dios ri sib'alaj k'o u chuq'ab', xuquje' kinil na alaq aretaq kinpe na kuk' taq ri sutz' chikaj! —xcha che.

⁶³ Are k'u ri qas ki nimal sacerdotes xu-raq'achij ru q'u' chuk'utik chi sib'alaj k'äx kuna' ri kub'ij ri Jesús. Xub'ij k'u ri tata: ¿Jas k'u che e rajwaxik chi nik'iaq q'alajisanelab' chrij? ⁶⁴ ¡I tom k'u ri ix chi xub'ij ri äwas u b'ixik chrij ri Dios! ¿Jas k'u kichomaj? —xcha chke.

Konojel k'ut xkiq'at tzij puwi', xkib'ij chi rajwaxik kākāmisaxik.

⁶⁵ E k'o k'u jujun xkichaplej u chub'axik. Xkich'uq ru palaj, xkich'ayo, xkib'ij k'u che: ¡Chach'ob'o ne jachin ri xatuch'ayo! —xecha che.

Xuquje' ri chajinelab' xkikoq q'ab' chupalaj.

Ri tat Pedro kub'ij chi man retam tä u wäch ri Jesús

⁶⁶ K'ä k'o ri tat Pedro ikim pa ri uwoja aretaq xpe jun chke ri alitomab', ri ajik' rech ri qas ki nimal sacerdotes. ⁶⁷ Aretaq xril ri tat Pedro chi tajin kumiq' rib' cho ri q'aq', ko xka'y che, xub'ij: ¡Ri at xuquje' xatk'oji ruk' ri Jesús aj Nazaret! —xcha che.

⁶⁸ Are k'u ri tat Pedro xresaj rib' chupam, xub'ij: ¡Man wetam tä u wäch ri', man kinch'ob' tä k'u ri' ri tajin kab'ij! —xcha che.

Xel k'u b'i chila', xopan chi' ri uchib'e. Are chi' xog' ri ama' äk'. ⁶⁹ Ri ali xril ri tat Pedro jumul chik, xuchaplej chi na u b'ixik chke ri e tak'atoj chunaqaj, xub'ij: ¡We achi ri' are jun chke ri e rachi'l ri Jesús! —xcha'.

⁷⁰ Ri tat Pedro xresaj chi k'u rib' jumul chik chupam, xub'ij chi man kuch'ob' tä u wäch ri Jesús. Man naj tä k'u ri' ri e tak'atoj chila' xkib'ij jumul chik che ri tat Pedro: Qas tzij at jun chke rumal chi at aj Galilea. Xuquje' xaq junam katch'awik jas ri winaq aj Galilea, —xecha che.

⁷¹ Ko k'u xch'aw ri tat Pedro, xub'an k'u jurar cho ri Dios, xub'ij: ¡Qas tzij ri' chi ri in man wetam tä u wäch ri achi ri' ri tajin kitzijoj! —xcha che.

⁷² Xog' chi k'u na ri ama' äk' chukamul. Xna'taj k'u che ri tat Pedro ru b'im ri Jesús che: “Kab'ij na at oxmul chi man awetam tä nu wäch mäjoq koq' kamul ri ama' äk',” —xcha che. Aretaq ri tat Pedro xna'taj wa' che, xutzogopij k'u oq'ej.

15

Ri Jesús k'o chuwäch ri tat Pilato

¹ Sib'alaj aq'ab' k'u ri' xkimulij kib' ri ki nimaqil sacerdotes, ri ki nimaqil ri winaq, xuquje' ri tijonelab' re ri Pixab' kuk' ri nik'iaj nimaq taq tata'ib'. Te k'u ri' konojel we nimaq taq tata'ib' ri' xkitala' ki no'j chuchomaxik jas kaka'no. Xkiyut k'u b'i ri Jesús, xkik'am b'ik, xkijacha k'u cho ri tat Pilato. ² Xuta' k'u ri tat Pilato che, xub'ij: ¿A at ri' ri kattaqan pa ki wi' ri winaq aj Israel? —xcha'.

Xch'aw k'u ri Jesús, xub'ij: Je ri' jas ri käb'ij la, —xcha che.

³ K'ia tzij k'ut xka'n ri ki nimaqil sacerdotes chrij ri Jesús. ⁴ Xuta' k'u ri tat Pilato jumul chik che ri Jesús, xub'ij: ¿A mat k'o jas ri kab'ij? ¡Chatampe' chi k'ia ri käkib'ij chawij! —xcha che.

⁵ Man k'o tä jun tzij chik xub'ij ri Jesús, je k'u ri' chi xukajmaj wa' ri tat Pilato, man xuriq tä chik jas kub'ano.

Käq'at tzij puwi' ri Jesús chi käkämisa na

⁶ Are k'u ri tat Pilato naq'atal wi chi pa ri nimaq'ij ri' ri are' kub'an jun toq'ob' chke ri winaq, kutzogopij b'i jun ajpache', apachin ta ne ri käkita' che. ⁷ K'o k'u jun achi,

Barrabás u b'i, yo'm pa che' junam kuk' ri rachi'l rumal chi xka'n kämisanik aretaq ri winaq re ri tinimit xkiwalijisaj kib' chkiq ri ketaqan pa ki wi'. ⁸ Xkimulij k'u kib' ri winaq chuwäch ri tat Pilato, xkichaplej u tz'onoxik che chi chub'ana toq'ob' chke, jas ri naq'atal wi ri are'. ⁹ Xch'aw k'u ri tat Pilato, xub'ij chke: ¿A kiwaj chi kinb'an toq'ob' chiwe, kintzogopij b'i ri tata' ri k'o u taqanik pi wi' ix ri winaq aj Israel? —xcha chke.

¹⁰ Kuch'ob' k'u ri tat Pilato chi xa rumal chi k'äx käkina' ri ki nimaqil sacerdotes che ri Jesús ki jachom ri Are' pu q'ab'. ¹¹ Ri ki nimaqil sacerdotes k'ut tajin kaka'no chi ri winaq käkikukij kib', xa käkib'ij chi más utz na are kub'an toq'ob' chke, kätzogopix b'i ri Barrabás. ¹² Xch'aw chi ri tat Pilato, xuta' k'u chke: ¿Jas k'u ri kiwaj chi kinb'an che ri achi ri kib'ij ix chi are k'o u taqanik pi wi' ix ri ix winaq aj Israel? —xcha che.

¹³ Ri winaq ko xkiraq ki chi', xkib'ij: ¡Chripoq! —xcha'.

¹⁴ Xch'aw k'u ri tat Pilato, xuta' chke: ¿Jas che? ¿Jas etzelal u b'anom wa' we achi ri'? —xcha che.

Ko k'u na xech'aw ri winaq, xkib'ij: ¡Chripoq! —xcha'.

¹⁵ Ri Pilato are k'u kraj u b'anik xa jas ri ki rayinik ri winaq. Xub'an chke ri toq'ob' ri xkita', xutzogopij k'u b'i ri Barrabás. Xtaqan k'ut chi käch'ay ri Jesús, te k'u ri' xujach b'ik rech käripik.

¹⁶ Xepe k'u ri soldados, xkik'am b'i ri Jesús pa ri uwoja re ri rachoch ri nim q'atal tzij, xekisik'ij ri nik'iaj soldados chik rech käkimulij kib' kuk'. ¹⁷ Xkikoj k'u jun atz'iaq morada chrij ri Jesús. Xuquje' xkikoj jun corona re kemom k'ix chujolom. ¹⁸ Chanim k'ut xkichaplej u raqik ki chi' chrij, xkib'ij: Lal ri' ri kätqaqan la pa ki wi' ri winaq aj Israel, ¡chnimarisax q'ij la! —xecha che.

¹⁹ Xkich'ay k'u chujolom ruk' jun aj, xkichub'aj, xexuki chuwäch, xaq kaka'n che kib' chi tajin käkik'ijilaj. ²⁰ Aretaq xeto'taj che retz'b'exik u wäch, xkijolij ru q'u ri morada chrij, xkikoj ri qas ratz'iaq ri Are' chrij, te k'u ri' xkik'am b'i churipik cho ri cruz.

Kärip ri Jesús cho ri cruz

²¹ K'o k'u jun achi aj Cirene, Simón u b'i, ki tat ri tat Alejandro, ri tat Rufo. Ri are' tajin kok'owik, u petik k'u ri' pa juyub'. Xkikoj ki chuq'ab' che rech kutelej b'i ru cruz ri Jesús.

²² Xkik'am k'u b'i ri Jesús chila' jawije' ri käb'ix Gógota che. Kel kub'ij wa' ri b'i aj ri': Ri Juyub' re ru B'aqil Jolomaj, —kuchixik.

²³ Xkiya k'u vino yujtal ruk' mirra* chuwäch ri Jesús rech kutijo. Man xutij tä k'ut.

* 15:23 Are ki chomanik ri winaq chi ri kunab'al "mirra", we yujtal ruk' ri vino, are kub'ano chi kätäni ri q'axom.

²⁴ Aretaq ki ripom chik cho ri cruz, ri soldados xkijach ri ratz'iaq ri Jesús chkiwäch, xkesaj k'u suerte chrij rech kākilo jas ri kākik'am b'i chkiujunal.

²⁵ Aq'ab' k'ut xrip ri Jesús pa ri u b'eley hora. ²⁶ Kojom k'u puwi' ri cruz jun tz'ib'talik ri kub'ij jas che käg'at tzij puwi' ri Jesús rech kārīpik, kub'ij k'ut: RI NIM TAQANEL PA KI WI' RI WINAQ AJ ISRAEL, —kächa'. ²⁷ Xerip k'u kieb' elaq'omab' ruk', jun pu wikiäq'ab', jun pu moxq'ab'. ²⁸ Xb'antaj k'u kan ri tz'ib'am chrij pa ru Loq' Pixab' ri Dios ri kub'ij: "Je' ta ne chi are jun chke ri b'anal taq etzelal ri xq'at tzij puwi'," —kächa'.

²⁹ Ri keok'owik kākīyoq'o, kākīsutisa' ri ki jolom, kākib'ij: ¡Aa! ¡At ri' ri kab'ij chi katkowinik kawulij ri nimalaj rachoch Dios, xa k'u pa oxib' q'ij kayak chi na wa' jumul chik! —kecha che. ³⁰ ¡Chato' b'a' awib', chatqaj k'u loq cho ri cruz! —xecha che.

³¹ Je' xuquje' ri ki nimaqil sacerdotes kuk' ri tijonelab' re ri Pixab' kākitez'j u wäch, kākich'ab'ej kib', kākib'ij: ¡Xtob' chke nik'iaj chik, man kākowin ta' k'u ri Are' chuto'ik rib'! —kecha'. ³² Chqaj b'a' loq cho ri cruz ri Cristo "ri Nim Taqanel kech ri winaq aj Israel" rech kākilo, ¡kujkojon k'u na che! —xecha'.

Ri e ripom ruk' ri Jesús xuquje' xkitze'j u wäch.

Käkäm k'u ri Jesús

³³ Aretaq xurij ri kab'lajuj hora, xq'equmar ronojel ruwächulew oxib' horas. ³⁴ Tzpa ri rox hora re ri b'enaq q'ij xuraq u chi' ri Jesús, ko xch'awik, xub'ij: Eloi, Eloi, ¿lama sabactani? —xcha'. Je' kel kub'ij wa': Nu Dios, nu Dios, ¿jas che in wonob'am la kanosq? —kächa'.

³⁵ Jujun k'u chke ri e tak'atoj chila' xkita wa', xkib'ij: ¡Chitampe'! —kecha'. Tajin kusik'ij ri qa mam Elías ri ojer q'alajisal re ru Loq' Pixab' ri Dios, —xecha ri'.

³⁶ Te k'u ri' jun chke ri winaq xutik anim, xe'k, xurub'u jun estropajo pa ch'am vino, xuya wa' puwi' jun aj, xuya aq'an chuwäch ri Jesús rech kutijo, xub'ij k'u apan chke ri winaq: ¡Chiweyej b'a'! Chqila na we kápe ri qa mam Elías chuqasaxik, —xcha chke.

³⁷ Sib'alaj ko xuraq u chi' ri Jesús, xel ranima', xkäm k'u ri Are'. ³⁸ Are k'u ri tasb'al u pam ri nimalaj rachoch Dios xjisjob'ik, kieb' xub'ano, xpe ajsik k'ä ikim. ³⁹ Ri ki nimal soldados aj Roma, ri tak'al cho ri Jesús, aretaq xuto xuraq u chi' ri Jesús, xuquje' xrilo jas xub'ano aretaq xkämik, xub'ij: ¡Qas tzij u K'ojol ri Dios wa' we achi ri'! —xcha'.

⁴⁰ E k'o k'u jujun ixoqib' ri tajin keka'y apan chinaj. Chkixol ri e are' k'o ri nan María aj Magdala, xuquje' ri nan María u nan ri tat Jacobo ri más k'ak'al na, ri xuquje'

are u nan ri tat José wa'. K'o xuquje' ri nan Salomé kuk'. ⁴¹ Aretaq ri Jesús xk'o'ji pa Galilea, we ixoqib' ri' xeb'in ruk', xepatänin che. Xuquje' e k'o chila' k'ia chke ri nik'iaj ixoqib' chik ri e opaninaq ruk' ri Jesús pa Jerusalén.

Kämuq ru cuerpo ri Jesús

⁴² B'enaq chi ri q'ij pa ri q'ij ri káb'an u b'anik ronojel che ri q'ij re uxlanem, are k'u vispera wa' re ri q'ij ri'. ⁴³ Xopan k'u ri tat José aj Arimatea, jun chke ri ki nimaqil ri winaq aj Israel ri tznim kil wi. Ri are' xuquje' ku'l u k'ux che reyexik chi kápe na ri Dios rech kátaqan na pa ki wi' ri winaq. Xuchajij k'u anima', xok cho ri tat Pilato chuta'ik chi káyi' ru cuerpo ri Jesús che. ⁴⁴ Xukajmaj wa' ri tat Pilato chi sib'alaj chanim xkäm ri Jesús. Xtaqan k'u chusik'ixik ri ki nimal ri soldados chuwäch, xuta' che we qas tzij kāmīnaq chik. ⁴⁵ Aretaq ri ki nimal soldados xub'ij chi qas tzij kāmīnaq chik ri Jesús, ri tat Pilato xuya ru cuerpo che ri tat José. ⁴⁶ Ri tat José k'ut xuloq' jun payu', xuqasaj ru cuerpo ri Jesús, xupis k'u chupam ri payu'. Te ri' xuya chupam jun muqub'al ri k'otom koq pa ri ab'aj. Xuwolqotij k'u jun ab'aj chuchi' ri muqub'al. ⁴⁷ Ri nan María aj Magdala ruk' ri nan María u nan ri tat José tajin kākilo jawije' ri káyi' wi kan ru cuerpo ri Jesús.

16

Kāk'astaj ri Jesús chkixol ri kāmīnaqib'

¹ Ok'owinaq chi k'u ri q'ij re uxlanem, ri nan María aj Magdala, xuquje' ri nan María u nan ri tat Jacobo ruk' ri nan Salomé, xkiloq' k'ok'alaj taq kunab'al rech kekib'ila chrij ru cuerpo ri Jesús. ² Sib'alaj aq'ab' k'ut pa ri nab'e q'ij re ri semana xeb'e' ri ixoqib' chuchi' ri muqub'al. Elinaq chi k'u loq ri q'ij aretaq xeoapanik. ³ Xkich'ab'ej k'u kib', xkib'ij: ¡Jachin ta k'u lo ri káwolqotin na apan ri ab'aj chqawäch? ¡Tzchuchi' ri muqub'al k'ut k'o wi! —xecha'.

⁴ Aretaq k'ut xeka'yik, k'ä te' xkilo chi wolqotim chi apan ri nimalaj ab'aj ri'. ⁵ Xeb'ok k'u b'i pa ri muqub'al, xkil jun ak'al achi t'uyul pa ru wikiäq'ab' ri muqub'al. Saqloloq' k'u ri ratz'iaq ri achi. ⁶ Xkixej k'u kib' ri ixoqib', xkikajmaj wa'! ⁷ Xub'ij k'u ri achi chke: ¡Míxex iwib'! Ri ix kitzukuj ri Jesús aj Nazaret, ri xrip cho ri cruz. K'astajinaq k'u b'i ri Are' chkixol ri kāmīnaqib', man k'o ta chik waral. Chiwilampe' jawije' ri xyl' wi, —kächa chke. ⁸ Jix b'a', chitzijoj k'u wa' chke ru tijoxelab', xuquje' che ri tat Pedro, chib'ij: "Nab'ejinaj ri Jesús chiwäch, b'enam re pa Galilea. Chila' kiwila wi na u wäch ri Are' je' jas ri xub'ij chiwe," —xcha chke ri ixoqib'.

⁸ Te ri' xeb'el b'i ri ixoqib', xeanimaj b'i chuchi' ri muqub'al. Sib'alaj xeb'irb'itik, ki

xib'im k'u kib'. Man k'o tä k'u jas käkib'ij che jachin jun rumal chi sib'alaj ki xem kib'.

Ri Jesús kuk'ut rib' cho ri nan María aj Magdala

⁹ K'astajinaq chi k'u ri Jesús chkixol ri käminaqib' sib'alaj aq'ab' pa ri nab'e q'ij re ri semana, xuk'ut rib' nab'e chuwäch ri nan María aj Magdala ri e resam b'i wuqub' itzel taq espíritus che. ¹⁰ Xe' k'u ri are', xutzijoj wa' chke ri nik'iaj chik ri xek'oji ruk' ri Jesús. Ri e are' sib'alaj keb'isonik, tajin keb'oq'ik. ¹¹ Aretaq xkito chi k'asal chi ri Jesús, chi ilom chi u wäch rumal ri nan María, iman xkikoj taj!

Ri Jesús kuk'ut rib' chkiwäch kieb' chke ru tijoxelab'

¹² Te k'u ri' jun chi wi u k'utik rib' ri xub'an ri Jesús chkiwäch kieb' chke ru tijoxelab' ri b'enam ke pa juyub'. ¹³ Xetzelej k'u b'i ri e are', xeb'e'k, xkitzijoj wa' chke ri nik'iaj chik. Man xkikoj tä k'u ri ki tzij ri e are'.

Ri Jesús kätäqan chutzijoxik ri Utzalaj Tzij re ri Evangelio

¹⁴ Chuk'isb'al ri Jesús xuk'ut rib' chkiwäch ri julajuj u tijoxelab', aretaq e t'uyul chi' ri mesa. Xeuyajo rumal chi man xekojon taj, chi xa ab'ajarinaq ri kanima'. Je' xub'an wa' rumal chi man xkikoj tä ri ki tzij ri winaq ri kilom u wäch ri Are' chi k'asal chik. ¹⁵ Xub'ij k'u ri Jesús chke: Jix cho ronojel ruwächulew, chitzijoj ri Utzalaj Tzij re ri Evangelio chke konojel ri winaq, —kächa'. ¹⁶ Apachin k'u ri käkojonik, käb'an k'u na u qasna', kuriq na ri' ru tob'anik ri Dios. Ri man käkojon taj, käq'at na tzij puwi' chi käk'äjisax na u wäch, —kächa'. ¹⁷ Ri kekojonik käka'n na wa' we kajmab'al taq etal ri': Pa ri nu b'i' kekesaj na b'i itzel taq espíritus, kech'aw k'u na pa jule' taq ch'ab'al chik. ¹⁸ Käkichap na kumätz, xuquje' we käkitij kämisanel kunab'al, man k'o tä k'äx käkiriqo. Käkiya na ki q'ab' pa ki wi' ri yawab'ib', keutzir k'u na kanog, —xcha ri Jesús chke.

Käpaqi ri Jesús chikaj

¹⁹ Te k'u ri', aretaq ri Qajaw Jesús xto'taj che tzijonem kuk' ru tijoxelab', xk'am b'i chikaj, xt'uyi k'u pa ru wikiäq'ab' ri Dios. ²⁰ Are k'u ru tijoxelab' xeb'el b'ik, xkitzijoj ri Utzalaj Tzij re ri Evangelio apawije' chi' ri xeopan wi. Tzare k'u ri Qajaw Jesús xtob' chke, xujikib'a chkiwäch ri winaq chi qas tzij ri tajin käkitzijoj rumal chi xuya chke chi käka'n kajmab'al taq etal junam ruk' ri tajin käkitzijoj. Amén.

RI UTZALAJ TZIJ RE RI EVANGELIO RI XUTZ'IB'AJ RI SAN LUCAS

¹ Loq'alaj tat Teófilo: E k'ia ri winaq ri xkaj xkitz'ib'aj pa cholaj ri tzijob'elil chrij ri qas xb'antaj waral chqaxol. ² Ri xb'antaj na are je' jas ri k'utum chqawäch kumal ri winaq ri xkil ronojel wa' qas pa ri u chaplexik loq. We winaq ri' e are' ri xetob' chutzijoxik ru Loq' Pixab' ri Dios. ³ Ri in xuquje' sib'alaj utz rilik wa' nu b'anom in rech kinwetamaj ronojel wa' qas pa ru chaplexik loq. Rumal rech wa' xinchomaj in chi are utz we ri in xuquje' kintz'ib'aj b'i pa ru cholajil ronojel ri xb'antajik. ⁴ Je ri' kinb'an na rech ketamaj la ri qas tzij chrij ri tijonik ri yo'm che la.

Jun ángel kub'ij loq chi kil na u wäch ri Juan Qasal Ja'

⁵ Aretaq ri tat Herodes are nim taqanel pa ki wi' ri winaq aj Judea, xk'oji jun tata' chik chila', Zacarías u b'i'. Ri tata' ri' are sacerdote* aj Israel ri jun kuk' ri juch'ob' sacerdotes aj re ri mam Abías. Ri rixoxil, Elisabet u b'i', are jun chke ri rachalaxik ri mam Aarón. ⁶ E utzalaj taq winaq wa' we juk'ulaj ri', jikom k'u kanima' cho ri Dios. Xeniman che ri Dios pa ronojel ri xtaqan wi, pa ronojel ru Loq' Pixab' ri Qajaw. Man k'o tá etzelal ri xka'no. ⁷ Man k'o tá k'u kalk'ual rumal chi ri nan Elisabet man kalk'ualan taj. E nimaq taq winaq chi k'ut ri kieb' ri'.

⁸ Pa jun q'ij ri tat Zacarías tajin kápatänin ri are' pa ri nimalaj rachoch ri Dios rumal chi kákirix u b'anik wa' ri achijab' ri e jun kuk' ri juch'ob' sacerdotes aj re ri mam Abías pa taq ri q'ij ri'. Ri u chak ri tat Zacarías are la' chi kách'aw pa ki wi' ri winaq ruk' ri Dios. ⁹ Je' jas ri ki naq'atísam wi kib' ri sacerdotes, xkicha' ri tat Zacarías rech kok b'i pa ri loq'alaj k'olib'al ri sib'alaj áwas chi kok b'i xa apachinoq chuporoxik ri incienso. ¹⁰ Konojel ri winaq xkimulij apan kib' cho ja chub'anik orar aretaq tajin káporox ri incienso. ¹¹ Te'talik k'ut xuk'ut rib' jun ángel cho ri tat Zacarías, ri taqom loq rumal ri Dios. Xtak'i k'u chuxkut ri káporox wi ri incienso. ¹² Aretaq ri tat Zacarías xril ri ángel, man xuriq taj jas xub'ano, xane sib'alaj xuxej rib'.

¹³ Xub'ij k'u ri ángel che ri tat Zacarías: Maxej awib'. Ri a b'ochi'nik xta'taj rumal ri Dios. Kil k'u na u wäch jun a k'ojol rumal ri nan Elisabet ri awixoxil. Kakoj k'u na a Juan che ru b'i', —kácha che. ¹⁴ Xuquje' xub'ij: Sib'alaj katkikot na rumal ri ak'al, xuquje' e k'ia chke ri jule' winaq chik ri

kekikot na aretaq kil u wäch, —kácha ri ángel che. ¹⁵ Känimar na u q'ij cho ri Qajaw Dios. Man kutij tá na vino, man kutij tá k'u tzam. Kátaqan na ri Loq'alaj Espiritu pa ranima' ri ak'al k'á májoq kil u wäch, —kácha'. ¹⁶ Kub'an k'u na ri a Juan chi k'ia chke ri winaq aj Israel ketzelej na ruk' ri Qajaw ri ki Dios, —kácha ri ángel che ri tat Zacarías. ¹⁷ Ri a Juan kánab'ej na cho ri Qajaw Jesús. Kák'oji k'u na ru no'j xuquje' ru chuq'ab' je' jas ri xk'oji che ri mam Elías, q'alajisal re ru Loq' Pixab' ri Dios ojer. Kub'an na chi ri nan tat ketzelejik keutzir kuk' ri kalk'ual, xuquje' chi ri winaq ri kákiyax kib' chrij ri Dios káki'ek na kanima', káki'ek ri ki chomanik, káketamaj na ri nimanik, ketzelej ki wäch kuk' ri utzalaj taq winaq, káka'n na ke ri e are'. Ri a Juan kub'an na chke ri winaq chi kekowin na chuk'ulaxik ri Qajaw, —xcha ri ángel che ri tat Zacarías.

¹⁸ Xuta' k'u ri tat Zacarías che ri ángel, xub'ij: ¿Jas ta kinb'an che retamaxik wa' chi qas tzij ri kátzijoq la chwe? Ri in, in ri'j achi chik, xuquje' ri wixoxil are nim winaq chik, —xcha che.

¹⁹ Xch'aw chi na jumul ri ángel, xub'ij che: In ri' ri Gabriel, in patänil re ri Dios. In taqom k'u loq che a tzijob'exik, che ki tzijoxik we utzalaj taq tzij ri' chawe, —kácha che. ²⁰ Tzche we kámik ri' man katkowin tá chik katch'awik k'á kopan na ri q'ij ri káb'antaj na wa' ri xinb'ij chawe, k'á kil na u wäch ri a k'ojol rumal rech wa' chi man xakoj tá ri nu tzij, —kácha ri'. Káb'antaj na wa' we nu tzijom ri' tzpa ru q'ijol, —xcha ri ángel che.

²¹ Ri winaq k'ut keye'm ri tat Zacarías. Xkikajmaj wa' chi sib'alaj xb'eytaj pa ri loq'alaj k'olib'al ri sib'alaj áwas chi kok b'i xa apachinoq. ²² Aretaq xel loq ri tat Zacarías, man xkowin tá chik che ki ch'ab'exik ri winaq. Xketamaj chi k'o jas ri xuk'ut rib' chuwäch ri tat Zacarías pa ri loq'alaj k'olib'al. Xaq pa memal chik xeuch'ab'ej, rumal chi xmemar kanoq.

²³ Aretaq xetz'aqat ri q'ij ri kápatänin ri tat Zacarías pa ri nimalaj rachoch Dios, xe' ri are' cho rachoch. ²⁴ Te k'u ri' ri nan Elisabet xkanaj yawab' winaq chik, xkanaj k'u job' ik' cho rachoch. Xub'ij ri nan Elisabet pa ranima': ²⁵ "Xka'y ri Qajaw Dios chwe, xutoq'ob'isaj k'u nu wäch rech man kinkiyox' tá chi ri winaq," —xcha ri nan Elisabet.

Jun ángel kub'ij loq chi kil na u wäch ri Jesucristo

²⁶ Chuwaq ik' chi k'ut ri Dios xutaq b'i ri ángel Gabriel pa ri tinimit Nazaret re Galilea. ²⁷ Xopan k'u ruk' jun q'apoj ali, María u b'i', ri tz'onom chik rumal jun achi,

* 1:5 "Sacerdote aj Israel": Chawila' ri versículo 8, xuquje' ri Diccionario, k'isb'al re we Nuevo Testamento.

José u b'i'. We achi ri' rachalaxik kan ri nim taqanel David ojer. ²⁸ Ri ángel xok b'i chila' jawije' k'o wi ri q'apoj al María, xub'ij che: ¿A utz a wäch, María? —kächa'. ¡At ri' ri at cha'tal rumal ri Dios! Qas k'o ri Qajaw Dios awuk', —kächa'. Ri at k'ut, at tewchim na rumal ri Dios chkiwäch konojel ixoqib', —xcha ri ángel che ri al María.

²⁹ Aretaq ri al María xril ri ángel, xutatab'ej ru tzij, xt'ujuw k'u ri ranima' rumal ri xb'ix che. Xuchomaj pa ranima', xub'ij: ¿Jas wa' ri kub'ij chwe? —xcha ri'. ³⁰ Xch'aw chi ri ángel, xub'ij che ri q'apoj al María: Maxej awib', María, —kächa che. Ri at sib'alaj at loq' cho ri Dios. ³¹ Ri at k'ut katkanaj kan yawab' winaq. Kawil na u wäch jun awal ala ri kakoj na "Jesús" che ru b'i', —kächa'. ³² Känimar na u q'ij ri a Jesús. Káb'ix na u K'ojol ri Dios aj Chikaj che. Ri Qajaw Dios kukoj na che nim taqanel je' jas ra mam David. ³³ Je ri' rech kátaqan na puwi' ri tinimit Israel pa taq ri q'ij ri junab' ri kepetik. Ru taqanik ri Are', man k'o tä u k'isik, —xcha ri ángel che ri al María.

³⁴ Te ri' ri al María xuta' che ri ángel, xub'ij: ¿Jas lo kink'ulmaj wa'? —kächa'. Mäja' kink'o'ji ruk' achi, —xcha che ri ángel.

³⁵ Xch'aw k'u ri ángel, xub'ij che: Käqaj na loq ri Loq'alaj Espíritu pa wi'. Ri Dios aj Chikaj károqxanej na wa' awuk' rumal ru chuq'ab'. Rumal ri' we loq'alaj ak'al ri' ri kil na u wäch káb'ix na u K'ojol ri Dios che, —kächa che. ³⁶ Xuquje' ri nan Elisabet ri awachalal are' káril na u wäch jun ak'al pune ri'j chik. Are k'u waqib' ik' wa' kámik yawab' winaq chik ri nan Elisabet pune xb'ix kanoq che chi man kákowin tä che ri alk'ualanik. ³⁷ Man k'o tä k'u jas ri mat kákowin ri Dios chub'anik, —xcha ri ángel.

³⁸ Xub'ij k'u ri q'apoj al María: In ri' ri patänil re ri Qajaw Dios. Chub'ana b'a' ri Are' chwe jas ri tzijom la chwe, —xcha che. Xel k'u b'i' ri ángel chuwäch.

Ri al María kopan cho rachoch ri nan Elisabet

³⁹ Pa taq ri q'ij ri' xel b'ik ri al María cho ja, xe' aninaq pa jun tinimit ri k'o pa taq ri u juyub'al ri Judea. ⁴⁰ Xok k'u b'ik pa rachoch ri tat Zacarias, xuya rutzil u wäch ri nan Elisabet ri rixoqil. ⁴¹ Ri nan Elisabet, aretaq xuta ru tzij ri al María, xslab' k'u ri ral pa ru k'ux. Xqaj ri Loq'alaj Espíritu puwi' ri nan Elisabet, xtaqan k'u pa ranima'. ⁴² Ko xch'aw ri nan Elisabet, xub'ij che ri al María: Ri at k'ut at tewchim na rumal ri Dios chkiwäch konojel ixoqib'. U tewchim na ri awal at xuquje', —kächa'. ⁴³ ¿Jas lo wa' chi ri Dios kub'an jun nimalaj utzil chwe in, chi ru nan ri Qajaw xpe wuk'? —kächa ri nan Elisabet. ⁴⁴ Chanim ri' aretaq xinto chi xatch'awik, ri wal xkikotik, xslab' pa nu

k'ux. ⁴⁵ Utz awe at ri xatkojon che ri Qajaw Dios, rumal chi gas tzij káb'antaj na ri xb'ix chawe rumal ri Dios, —xcha ri nan Elisabet che ri al María.

⁴⁶ Xub'ij ri q'apoj al María:

Kinnimarisaj u q'ij ri Qajaw Dios.

⁴⁷ Käkikot k'u ri wanima' rumal ri Dios ri To'l We.

⁴⁸ Kinkikotik rumal chi ri Dios

xka'y chwe in ru patäninel ri man nim tä nu b'anik.

Konojel winaq kākib'ij na chwe pa taq ri q'ij ri junab' ri kepetik chi utz we.

⁴⁹ Je ri' kākib'ij na rumal rech wa' chi ri Dios ri sib'alaj k'o u chuq'ab' u b'anom nimaq taq utzil chwe.

Sib'alaj loq' ri Dios, sib'alaj loq' ru b'i' ri Are', —kächa ri al María.

⁵⁰ Amaq'el ronojel q'ij kutoq'ob'isaj na ki wäch konojel winaq ri nim kākil wi ri Are', ri kākixej kib' chuwäch.

⁵¹ U k'utum ri nimalaj u chuq'ab' chkiwäch konojel. Xuqasaj ki q'ij ri winaq ri kākichomaj chi sib'alaj nim ki b'anik, —kächa'.

⁵² Xeresaj ri taqanik pa ki q'ab' ri nimaq ki b'anik, xuya k'u wa' chke ri winaq ri man nim tä keil wi.

⁵³ E k'ia ri utzil ri xub'an ri Dios chke ri meb'a'ib', ri winaq ri kenumik.

Ri Dios xub'ij chke ri q'inomab': Jix, man k'o tä iwe ix, —xcha chke, —kächa'.

⁵⁴ Xtob'an chke ri winaq aj Israel, ri patänil taq re ri Dios.

Man xsach tä pu jolom ri Dios ru toq'ob'isaxik ki wäch.

⁵⁵ Je' xub'an wa' rumal chi je' xuchi'j chke ri qati't qa mam,

che ri qa mam Abraham xuquje' ri rachalaxik ri are' amaq'el pa taq ri q'ij ri junab' ri kepetik, —xcha ri al María.

⁵⁶ Kraj oxib' ik' xkanaj na kan ri al María ruk' ri nan Elisabet. Te k'u ri' xtzelej b'ik, xe' cho rachoch.

Kil u wäch ri a Juan Qasal Ja'

⁵⁷ Aretaq xopan ri q'ij ri kutzir ri nan Elisabet, xril k'u u wäch jun ral ala. ⁵⁸ Ri u k'ul taq ja ri nan Elisabet xuquje' ri rachalaxik, aretaq xkito chi ri Qajaw Dios sib'alaj xutoq'ob'isaj u wäch ri nan Elisabet, xekich'ab'ej, xekikot k'u ruk'. ⁵⁹ Chuwajxaq q'ij k'ut xeb'e' chukojik ri retal ri ojer u

trato[†] ri Dios che ru cuerpo ri ak'al. Xkaj k'ut xkikoj Zacarías che ru b'i', junam ruk' ru b'i' ru tat. ⁶⁰ Xch'aw k'u ru nan, xub'ij chke: ¡No! —käch'a'. Ru b'i' ri káqakoj chrij ri ak'al are Juan, —xcha che.

⁶¹ Xkib'ij k'u che: ¿Jas che? Man k'o tá jun chke ri achalal la ri je' u b'i' wa', —xecha che.

⁶² Xaq pa memal xkich'ab'ej ru tat ri ak'al, xkita' che: ¿Jas u b'i' ri ak'al kákoj la? —xecha che. ⁶³ Ri tat Zacarías xuta' jun wuj rech kátz'ib'anik. Xutz'ib'aj k'u wa', xub'ij: "Juan ru b'i' ri ak'al," —xcha pa ri tz'ib'anik. Konojel xkikajmaj wa'. ⁶⁴ Xaq k'u te'talik xtzelej ru ch'ab'al ri tat Zacarías, xkowin chik kátz'ijonik. Xtzijon k'ut, xunimarisaj u q'ij ri Dios. ⁶⁵ Sib'alaj xkixej kib' konojel ri ki k'ul taq ja, xkikajmaj wa'. Ronojel ri xuk'ulmataj jela' xtzijox apan pa taq ronojel ri juyub' re Judea. ⁶⁶ Konojel ri winaq ri xetowik xechoman pa ke wi, xkib'ij: ¿Jas lo kub'an wa' we ak'al ri? —xecha'.

Je' xkib'ij wa' rumal chi q'alaj chi k'o ri Qajaw Dios ruk' ri ak'al.

Ri tat Zacarías kub'ixoj jun b'ix rech q'alajisanik

⁶⁷ Qajinaq ri Loq'alaj Espíritu puwi' ri tat Zacarías ru tat ri ala, xq'alajisanik, xub'ij:

⁶⁸ Kinya b'a' u q'ij ri Qajaw
ri qa Dios uj, uj ri' ri winaq
aj Israel, rumal chi xulik,
xpe che qa to'ik uj, uj k'u ri'

ri winaq re ri u tinimit.

⁶⁹ Xuya k'u chqe jun To'l Qe
ri sib'alaj k'o u chuq'ab'.

Are k'u wa' jun chke ri rachalaxik
ri qa mam David, patánil re ri Dios,
—käch'a ri'.

⁷⁰ Are wa' ri xuchi'j loq ri Dios
kumal ri loq'alaj taq q'alajisal taq
re ru Loq' Pixab'
pa ri ojer taq q'ij kanoq.

⁷¹ Xub'ij chi kujuto' na chkiwäch
ri qa k'ulel, che qa to'ik
pa ki q'ab',
xuquje' pa ki q'ab' konojel
ri keetzelan qa wäch,
—käch'a ri tat Zacarías.

⁷² Xuquje' xub'ij chi kutoq'ob'isaj na
ki wäch ri qati't qa mam,
xuquje' chuk'utik chkiwäch
chi xna'taj che ri Are' ri Loq'alaj Trato
ri xuchi'j chke.

⁷³ Are k'u wa' ri Qas Tzij ri u b'im
che ri qa mam Abraham,
—käch'a'.

⁷⁴ Je ri' rech aretaq uj esam chik
pa ki q'ab' ri qa k'ulel,
kuya' kujpatänin che ri Dios,
man káqaxej tá chi qib',

⁷⁵ xuquje' rech jikom ri qanima'

kujpatänin che, qa jachom qib'
pu q'ab' ri Dios pa taq ronojel
ri q'ij re ri qa k'aslemal,
—käch'a ri'.

⁷⁶ At k'ut, alaj ak'al, káb'ix na
q'alajisal re ru Loq' Pixab'
ri Dios aj Chikaj chawe,
rumal chi katnab'ej na chuwäch ri Qajaw
chub'anik jikom che ru b'e.

⁷⁷ At k'ut katyo'w na retamaxik
ri u tob'anik ri Dios chke ri winaq
re ri u tinimit, xuquje'
chi kásach na ri ki mak, —käch'a'.

⁷⁸ Ri qa Dios sib'alaj kel u k'ux chqe.
Rumal ri' kutaq na loq ri Qajaw Jesús
quk' uj. Sib'alaj je'l k'u ri Are' je'
jas ru saqilal ri q'ij aretaq kásaqirik.

⁷⁹ Kuya na saqilal pa kanima' ri winaq
ri je' ta ne e k'o pa ri q'equmal
rumal ri ki mak,
kákixej k'u kib' cho ri kámikal.
Kák'oji na che k'amal qa b'e
pa ri b'e ri kuxlan wi ri qanima',
—xcha ri tat Zacarías.

⁸⁰ Ri a Juan xk'iyik, sib'alaj k'o u chuq'ab'
ri xyl' che rumal ri Loq'alaj Espíritu. Xkanaj
kan pa taq ri juyub' ri sib'alaj kátz'inowik k'á
pa ri q'ij ri xuk'ut rib' chkiwäch ri winaq aj
Israel.

2

Kil u wäch ri a Jesús

¹ Pa taq ri q'ij ri', ri nimalaj taqanel
Augusto César xuya taqanik chke konojel
winaq chi kátz'ib'ax ri ki b'i'. ² Aretaq ri
tat Cirenio are q'atal tzij re ri tinimit Siria,
xb'antaj we nab'e tz'ib'an b'i'aj ri'. Are jun
censo wa'. ³ Xeb'e' k'u konojel ri winaq chki-
ijujunal pa taq ri ki tinimit rech kátz'ib'ax
ri ki b'i'. ⁴ Xa je ri' xel loq ri tat José pa ri
tinimit Nazaret re Galilea, xe'k, xopan pa
jun tinimit re Judea, Belén u b'i'. Chila' xe' wi
ri tat José rumal chi are rachalaxik ri mam
David. Ri tinimit Belén are u tinimit ri mam
David pa ojer taq q'ij kanoq. ⁵ Aretaq xe' ri
tat José rech kátz'ib'ax ru b'i', xuk'am b'xi ri
al María ri u to'm chik che rixoqil, yawab'
winaq chi k'ut. ⁶ Aretaq e k'o chila' pa Belén,
xopan ri q'ij ri kutzir ri al María. ⁷ Xril k'u u
wäch ru nab'eal, jun ala. Xukoj atz'iaq rech
nu'ch ak'al che. Xuq'oyob'a pa jun echa'b'al
rumal chi man k'o tá chi jawije' ri kek'oji wi
pa ri mesón.

Ri ángeles kákich'ab'ej ri ayyuq'ab'

⁸ E k'o k'o ayyuq'ab' pa taq ri juyub' chu-
naqaj ri tinimit Belén ri kekiwaraj ri kawaj
chila'. ⁹ Xaq te'talik k'ut jun ángel taqom
loq rumal ri Qajaw Dios xtak'i chkiwäch.
Xjuluw k'u ri je'lalaj u juluwem ri Dios pa ki
wi'. Sib'alaj k'u xkixej kib' ri ayyuq'ab'.

[†] 1:59 "Circuncisión": Chawila' Hechos 7:8, nota.

¹⁰ Xub'ij k'u ri ángel chke: Mixej iwib', —kächa'. Qas tzij kinb'ij na jun utzalaj tzij chiwe. Ri u patän wa' we utzalaj tzij ri' are chi kuya nimalaj kikitomal chke konojel winaq. ¹¹ Are kinb'ij chiwe chi kämik ri' xil u wäch jun To'l Iwe pa ru tinimit ri mam David. Are Cristo* wa' ri Qajaw, —kächa'. ¹² Are k'u retal wa' chiwe: Kiriq na jun alaj ne', kojom k'u atz'iaq rech nu'ch ak'al chrij, q'oyob'am pa jun echa'b'al, —xcha chke.

¹³ Xaq te'talik k'ut e k'o chik ruk' ri ángel k'lalaj taq ángeles ajchikaj. Käkinimarisaj k'u u q'ij ri Dios, käkib'ij:

¹⁴ ¡Qanimarisaj b'a' u q'ij ri Dios
ri k'o chikaj! ¡Chuxlan na kanima'
ri winaq cho ruwächulew, e are k'u
winaq wa' ri utz keril wi ri Dios!
—xecha ri ángeles.

¹⁵ Te k'u ri' aretaq xeb'e' ri ángeles chikaj, ri ajyuq'ab' xkitzijob'ela kib', xkib'ij: Jo' pa Belén, —kecha'. Jeqila na we xk'ulmatajik ri' ri u tzijom ri Qajaw Dios chqe, —xecha ri'.

¹⁶ Aninaq xeb'e'k. Xekiriqa k'u ri nan María, ri tat José ruk' ri alaj ne'. Q'oyob'am k'u ri ne' pa jun echa'b'al. ¹⁷ Aretaq xkilo, xkitzijoj ri xub'ij ri ángel chke chrij ri ak'al. ¹⁸ Xkikajmaj k'u wa' konojel ri winaq ri xetow ri ki tzij ri ajyuq'ab'. ¹⁹ Are k'u ri nan María xaq xuk'ol konojel we tzij ri' pa ranima', xchoman k'u chkij. ²⁰ Xetzelej k'u b'ik ri ajyuq'ab', tajin käkiya u q'ij, käkinimarisaj k'u u q'ij ri Dios rumal ri xb'ix chke, xuquje' rumal chi xkilo chi qas je' jas ri xutzijoj ri ángel chke.

Ri a Jesús käyi' chuwäch ri Dios

²¹ Chuwajxaq q'ij k'ut, xkikoj ri retal ri ojer trato che ru cuero ri ak'al, xkikoj k'u Jesús che ru b'i'. Are u b'i' wa' ri xukoj kan ri ángel aretaq mäjoq kalk'ualax chuk'ux ri q'apoj al María.

²² Xopan ri q'ij ri kesax ri rawasil ri nan María. Je' jas ri kub'ij chupam ru Pixab' ri mam Moisés, xkik'am loq ri ak'al chuyi'k chuwäch ri Qajaw Dios pa ri tinimit Jerusalén. ²³ Je ri' xka'no rumal chi tz'ib'am wa' pa ru Pixab' ri Qajaw Dios, kub'ij: "Ronojel nab'e'al ala kätas wa' chupatänixik ri Qajaw Dios," —kächa'. ²⁴ Xeb'e' k'u ri tat José, ri nan María pa Jerusalén chusipaxik ri käb'ix pa ru Pixab' ri Qajaw Dios: Are juk'ulaj ut wa'. We man k'o tä ri ut kuya' keyi' kieb' alaj taq tukumux che sipanik.

²⁵ Xk'oji k'u pa ri tinimit Jerusalén jun tata', Simeón u b'i'. We tata' ri' are utzalaj achi wa' ri käniman che ri Dios pa ronojel, jikom k'u ranima' chuwäch. Ri are' reye'm ri Dios chi keuto' ri winaq aj Israel. K'o k'u ri Loq'alaj Espíritu ruk'. ²⁶ Xq'alajisax che

ri tat Simeón rumal ri Loq'alaj Espíritu chi man käkäm tä na chanim, xane nab'e' käril na ri Cristo ri cha'tal rumal ri Qajaw Dios. ²⁷ Xuna' k'u ru rayinik ri Loq'alaj Espíritu pa ranima', xe' pa ri nimalaj rachoch Dios. Aretaq ru tat, u nan ri alaj a Jesús xkik'am b'ik, xeopan pa ri nimalaj rachoch Dios chub'anik che ri ak'al jas ri kub'ij pa ri Pixab' chi rajwaxik u b'anik wa'. ²⁸ Ri tat Simeón xuq'aluj ri ala, xuya u q'ij ri Dios. Xub'an orar, xub'ij:

²⁹ Qajaw Dios, ya la chwe kämik
chi ri in, ri in patänil e la,
chi kinkäm na, kuxlan ri wanima',
je' jas ri b'im la loq chwe,
—kächa'.

³⁰ Wilom k'u in ri To'l Qe,
³¹ ri taqom la loq chkiwäch konojel winaq.

³² Are je' jas jun chäj, jun candelä
ri kätununik. Kuya na ri saqil
re ri Pixab' la pa kanima' ri nik'iaj
winaq chik ri man e aj Israel taj.

Rumal wa' ri taqom la loq, känimarisax
na u q'ij ri tinimit la, ri Israel,
—xcha ri tat Simeón.

³³ Ri tat José ruk' ru nan ri ak'al xkikajmaj ronojel ri kätzijox chrij ri a Jesús.

³⁴ Ri tat Simeón xeutewchij, xub'ij che ri nan María, u nan ri ak'al: Chilampe la we ak'al ri', —kächa'. Käkoj na wa' rech ketzaq k'ia winaq aj Israel, käsach k'u na ki wäch. Keto' k'u na ri jule' winaq chik aj Israel rumal ri Are', kewalijisax na. Xuquje' we ak'al ri' käkoj na rumal ri Dios che etal chkiwäch ri winaq. Käketzelaj k'u na u wäch, —kächa' ri'. ³⁵ Kub'an na ri Qajaw Jesús chi käq'alajinik jas ri kechoman ri winaq pa kanima', —kächa chke. Ri lal, nan, käk'is na ib' la che oq'ej, —xcha che ri nan María.

³⁶ Xuquje' xk'oji chila' jun chichu' q'alajisanel, Ana u b'i'. Are u mia'l ri tat Fanuel re ri rachalaxik ri mam Aser. Sib'alaj nim winaq chik ri chichu' ri'. Xa wuqub' junab' xk'oji ruk' ri rachajil, xkäm k'u ri tata'. ³⁷ Jumuch' kiejeb' junab' malka'n kanoq. Man kel tä chi b'i' pa ri nimalaj rachoch Dios. Käpatänin k'u che ri Dios chila' chi paq'ij chi chaq'ab'. Kub'an orar, xuquje' kub'an ayunar. ³⁸ Xtak'atob' k'u wa' chkiwäch ri tat José, ri nan María pa we hora ri', xub'an maltioxinik che ri Dios. Xtzijon chrij ri a Jesús chkiwäch konojel ri winaq ri e eyeninaq che ri Dios chi kuto' ri tinimit Israel.

Ketzelej k'u b'ik, keb'e' pa ri tinimit Nazaret

³⁹ Ki b'anom k'u ronojel ri käb'ix pa ru Pixab' ri Qajaw Dios, xetzelej k'u b'ik, xeb'e' pa Galilea, pa ri ki tinimit Nazaret. ⁴⁰ K'iyem

* 2:11 Ri tzij "Cristo" o "Mesías" kel kub'ij "cha'tal rumal ri Dios".

re ri ak'al, tajin kâkowirik, sib'alaj k'o ru no'j. Ri Dios sib'alaj tajin kâteuwin ri a Jesús.

Ri a Jesús k'o pa ri nimalaj rachoch Dios kuk' ri ajtijab'

⁴¹ Ronojel junab' k'ut xeb'e' ru tat, ru nan pa ri tinimit Jerusalén che ri nimaq'ij ri kâb'ix Pascua[†] che. ⁴² Aretaq kab'lajuj u junab' chik ri a Jesús, xepaqi b'ik, xeb'e' pa Jerusalén jas ri ki naq'atisam wi kib' pa ri nimaq'ij ri'. ⁴³ Xk'is k'u ri nimaq'ij, tzelejem kâka'n b'ik ri tat José, ri nan María. Xkanaj kan ri alaj a Jesús pa Jerusalén, man k'o tä k'u ketam ru tat, u nan chrij wa'. ⁴⁴ Xkichomaj chi k'o kuk' ri kachi'l. E b'enaq jun q'ij pa ri b'e, xkitzujuk ri a Jesús chkixol ri kachalal, chkixol ri kachi'l. ⁴⁵ Man xkiriq tä k'ut. Xa je ri' xetzelej chik pa Jerusalén. Xkitzujuk ri ala chila'.

⁴⁶ Ki tzukum k'u oxib' q'ij, xkiriq k'u pa ri nimalaj rachoch Dios. T'uyul ri a Jesús chkixol ri tijonelab' re ri Pixab', tajin kutatab'ej ri ki tijonik. Kuk'ot k'u ki chi' ri tata'ib'. ⁴⁷ Konojel ri ketowik xkikajmaj chi utz kâchoman ri ala, chi retam jas kub'ij chke ri tijonelab'.

⁴⁸ Aretaq ru tat, u nan xkil u wäch ri ak'al, xkikajmaj wa'. Xub'ij ru nan che: Wal, ¿jas che je' a b'anom wa' chqe? —kâcha'. ¿A mat kawilo chi ra tat, ri in, uj elinaq ch'uj chatzukupik? —xcha che.

⁴⁹ Xub'ij k'u ri a Jesús chke: ¿Jas che kintzujuk alaq? ¿A mat etam alaq chi rajwaxik chi kinb'an ri u rayinik ri nu Tat? —xcha chke.

⁵⁰ Ri e are' man xkich'ob' tä k'u ri kub'ij ri ak'al chke.

⁵¹ Xe' k'u ri a Jesús ruk' ri tat José, ruk' ru nan pa ri tinimit Nazaret. U yo'm k'u rib' pa taqik chke. Ru nan xuk'ol pa ranima' ronojel ri xb'antajik. ⁵² Xk'i'y ri a Jesús, k'o na ru no'j, xuquje' xkowirik. Ri a Jesús sib'alaj utz kub'an cho ri Dios, xuquje' utz kâkil wi ri winaq.

3

Ri Juan Qasal Ja' kutzijoj ru Loq' Pixab' ri Dios

¹ Pa ri ro'lajuj junab' ri tajin kâtaqan ri tat Tiberio César ri nimalaj taqanel, aretaq ri tat Poncio Pilato are q'atal tzij puwi' ri Judea, ri tat Herodes k'ut are nim taqanel puwi' ri Galilea. Ri tat Felipe, rachalal ri tat Herodes, are q'atal tzij pa Iturea xuquje' pa Traconite. Ri tat Lisanias are q'atal tzij pa Abilinia. ² Ri tat Anás, ri tat Caifás e are' ki nimaqil sacerdotes kech ri winaq aj Israel. Pa taq ri q'ij ri' ri Dios xutzijob'ej ri tat Juan, ru k'ojol ri tat Zacarías. K'o k'u ri tat Juan pa taq juyub' ri kâtz'inowik. ³ Ri tat

Juan xub'inib'ej konojel taq ri juyub' ri e k'o chunaqaj ri nima' Jordán, kutzijoj k'u chke ri winaq chi rajwaxik kâkik'ex ki chomanik, kâk'ex k'u kanima', te k'u ri' kâb'an ki qasna' rech kâq'alajinik chi je' ki b'anom wa'. Xa je ri' kâsachtaj ri ki mak. ⁴ Je' jas ri kub'ij pa ri wuj ri tz'ib'am wi ru tzij ri ojer q'alajisal re ru Loq' Pixab' ri Dios, ri Isaias:

K'o jun ri ko kâch'aw pa taq ri juyub' ri ketz'inowik, kub'ij: "Chib'ana u b'anik ri nim b'e ri kâb'in wi ri Qajaw. Chib'ana sib'alaj jikom che ri alaj taq u b'e,"

—kâcha'.

⁵ "Kenojisax na konojel taq ri siwan, kelianisax na konojel taq ri juyub', ri nimaq xuquje' ri ch'utiq.

Ri b'e ri e kotakik kejikomisax na.

Ri b'e ri sib'alaj e k'âx na chelianisaxoq," —kâcha'.

⁶ "Konojel winaq kâkil k'u na jas kub'an ri Dios che ki to'ik ri winaq ajmakib'," —xcha ri mam Isaias.

—xcha ri mam Isaias.

⁷ Xub'ij k'u ri tat Juan chke ri k'ia winaq ri xeopan ruk' rech kâb'an ki qasna': ¿Alaq sub'anelab' taq winaq, kachalaxik tz'i'l? ¿Jachin k'u ri' ri xk'utuw chuwäch alaq chi rajwaxik kanimaj alaq b'i cho ri royowal ri Dios? —kâcha chke. ⁸ B'ana b'a' alaq ri taqal u b'anik ri kuq'alajisaj chi qas tzij xk'extaj anima' alaq. Mâchapej alaq u b'ixik xol taq alaq: "Utz qe rumal chi ri uj, uj rachalaxik ri qa mam Abraham," —mâcha ne alaq. Kinb'ij na chech alaq chi ri Dios kâkowin chub'anik chke taq we ab'aj ri' chi e rachalaxik chik ri qa mam Abraham, —kâcha'. ⁹ Chanim ri' tajin kâkoj ri ikiäj chke taq ri ki xera' ri che' rech ket'oyik. Ronojel che' ri man kuya tä utzalaj u wäch kât'oy na, kek'iaq k'u b'i pa ri q'aq', —xcha ri tat Juan chke.

¹⁰ Xkita' k'u ri k'ia winaq che, xkib'ij: ¿Jas ta k'u lo kâqa'n na? —xecha che.

¹¹ Xch'aw chi ri tat Juan, xub'ij chke: Apachin k'u ri k'o kieb' u q'u, chuya jun re che ri winaq ri man k'o tä re. Apachin ri k'o kutijo, chuya re ri winaq ri man k'o tä kutijo, —xcha'.

¹² Xeopan xuquje' jujun chke ri toq'il taq alfab'al rech kâb'an ki qasna', xkib'ij k'u che ri tat Juan: Qajtij, ¿jas kâqa'n na uj? —xecha che.

¹³ Xub'ij ri tat Juan chke: Mitoq'ij u wi' ri ix taqom wi chutoq'ixik, —xcha chke.

¹⁴ Xuquje' ri soldados xkita' che, xkib'ij: E k'u ri uj, ¿jas kâqa'n na? —xecha che.

Xub'ij ri tat Juan chke: Mib'an elaq' che jachin jun winaq, mib'ana k'u k'âx

[†] 2:41 "Pascua": Chawila' ri San Mateo 26:2, nota.

* 3:7 Ri mero tzij waral are "Ri alaq, alaq ralk'ual ri kumâtz".

chke. Mib'ij jalum q'ab'am chkiy ri winaq. Chiku'b'a k'u i k'ux ruk' ri tojb'aliwe, —xcha chke.

¹⁵ Ri winaq k'ut tajin kechoman pa kan-ima' chriy ri tat Juan, tajin keye'n che rilik we ne ri tat Juan are ri Cristo. ¹⁶ Xch'aw chi ri Juan Qasal Ja', xub'ij chke konojel: Petinaq jun achi ri k'o na u chuq'ab' chnuwäch in. Man taqal tä k'u chwe in chi kinkir ru k'amal u xajäb'. Ri are' kuya na ri Loq'alaj Espiritu chech alaq je' jas ri in kinb'an qasna' alaq ruk' joron. Kub'an k'u na qasna' alaq ruk' q'aq', —kächa chke.

¹⁷ Ri achi ri' kuk'am ru jopib'al rech kusoq'ij ri triko, xuquje' rech kumulij b'ik ru triko, kuya k'u pa taq ru k'uja. Xuquje' ne kuporoj ri pajo, kub'an jun q'aq' ri man käkowin tä jun chuchupik, —kächa'. Jas ri kub'an ri achi ajchak che ri triko, je ri' xuquje' kub'an na ri Qajaw Dios chke taq winaq, —xcha chke.

¹⁸ Je ri' xub'ij ri tat Juan, xuquje' xepixb'aj ri winaq kuk' k'ia pixab' chik, xutz-ijoj k'u ri Utzalaj Tzij re ri Evangelio chke. ¹⁹ Xuquje' ri tat Juan xuyaj ri q'atal tzij Herodes rumal chi ri tat Herodes xuch'ab'ej ri nan Herodías, rixoqil ri tat Felipe ru chaq' ri Herodes. Xuyaj k'u ri tat Herodes xuquje' kumal konojel ri etzelal ri u b'anom. ²⁰ Ri tat Herodes xa xunimarisaj u b'anik ri man utz taj puwi' ronojel ri u b'anom, chi xukoj ri tat Juan pa che'.

Käb'an u qasna' ri Jesús

²¹ Pa jun q'ij aretaq ri tat Juan tajin kub'an ki qasna' konojel ri winaq, xub'an u qasna' ri Jesús xuquje'. Pa ri qasna' ri Jesús tajin kub'an orar, xjaqtaq k'u ri kaj. ²² Xqaj k'u loq ri Loq'alaj Espiritu puwi' ri Jesús je' ta ne chi ri Loq'alaj Espiritu are jun palomäx. Te k'u ri' xch'aw loq jun chikaj, xub'ij: At ri' ri loq'alaj nu K'ojol. Sib'alaj käkikot ri wanima' awumal, —xcha ri'.

Waral kätzijox wi ri rachalaxik ri Jesús

²³ Kraj ne juwinaq lajuj u junab' ri Jesús aretaq xuchaplej patäninem cho ri Dios. Xkichomaj ri winaq chi ri Jesús are ralk'ual ri tat José. Ri tat José k'ut are rachalaxik ri tat Elí, ²⁴ ri tat Elí are ralk'ual ri tat Matat, ri tat Matat ralk'ual ri tat Levi, ri tat Levi are ralk'ual ri tat Melqui, ri tat Melqui are ralk'ual ri tat Jana, ri tat Jana ralk'ual ri tat José, ²⁵ ri tat José ralk'ual ri tat Matatías, ri tat Matatías ralk'ual ri tat Amós, ri tat Amós ralk'ual ri tat Nahum, ri tat Nahum ralk'ual ri tat Esli, ri tat Esli ralk'ual ri tat Nagai, ²⁶ ri tat Nagai ralk'ual ri tat Maat, ri tat Maat ralk'ual ri tat Matatías, ri tat Matatías ralk'ual ri tat Semei, ri tat Semei ralk'ual ri tat José, ri tat José ralk'ual ri tat Judá, ²⁷ ri tat Judá ralk'ual ri tat Joana, ri tat Joana ralk'ual ri tat Resa, ri tat Resa ralk'ual ri tat

Zorobabel, ri tat Zorobabel ralk'ual ri tat Salatiel, ri tat Salatiel ralk'ual ri tat Neri, ²⁸ ri tat Neri ralk'ual ri tat Melqui, ri tat Melqui ralk'ual ri tat Adi, ri tat Adi ralk'ual ri tat Cosam, ri tat Cosam ralk'ual ri tat Elmodam, ri tat Elmodam ralk'ual ri tat Er, ²⁹ ri tat Er ralk'ual ri tat Josué, ri tat Josué ralk'ual ri tat Eliezer, ri tat Eliezer ralk'ual ri tat Jorim, ri tat Jorim ralk'ual ri tat Matat, ³⁰ ri tat Matat ralk'ual ri tat Levi, ri tat Levi ralk'ual ri tat Simeón, ri tat Simeón ralk'ual ri tat Judá, ri tat Judá ralk'ual ri tat José, ri tat José ralk'ual ri tat Jonán, ri tat Jonán ralk'ual ri tat Eliaquim, ³¹ ri tat Eliaquim ralk'ual ri tat Melea, ri tat Melea ralk'ual ri tat Mainán, ri tat Mainán ralk'ual ri tat Matata, ri tat Matata ralk'ual ri tat Natán, ri tat Natán ralk'ual ri tat David, ³² ri tat David ralk'ual ri tat Isai, ri tat Isai ralk'ual ri tat Obed, ri tat Obed ralk'ual ri tat Booz, ri tat Booz ralk'ual ri tat Salmón, ri tat Salmón ralk'ual ri tat Naasón, ³³ ri tat Naasón ralk'ual ri tat Aminadab, ri tat Aminadab ralk'ual ri tat Aram, ri tat Aram ralk'ual ri tat Esrom, ri tat Esrom ralk'ual ri tat Fares, ri tat Fares ralk'ual ri tat Judá, ³⁴ ri tat Judá ralk'ual ri tat Jacob, ri tat Jacob ralk'ual ri tat Isaac, ri tat Isaac ralk'ual ri tat Abraham, ri tat Abraham ralk'ual ri tat Taré, ri tat Taré ralk'ual ri tat Nacor, ³⁵ ri tat Nacor ralk'ual ri tat Serug, ri tat Serug ralk'ual ri tat Ragau, ri tat Ragau ralk'ual ri tat Peleg, ri tat Peleg ralk'ual ri tat Heber, ri tat Heber ralk'ual ri tat Sala, ³⁶ ri tat Sala ralk'ual ri tat Cainán, ri tat Cainán ralk'ual ri tat Arfaxad, ri tat Arfaxad ralk'ual ri tat Sem, ri tat Sem ralk'ual ri tat Noé, ri tat Noé ralk'ual ri tat Lamec, ³⁷ ri tat Lamec ralk'ual ri tat Matusalén, ri tat Matusalén ralk'ual ri tat Enoc, ri tat Enoc ralk'ual ri tat Jared, ri tat Jared ralk'ual ri tat Mahalaleel, ri tat Mahalaleel ralk'ual ri tat Cainán, ³⁸ ri tat Cainán ralk'ual ri tat Enós, ri tat Enós ralk'ual ri tat Set, ri tat Set ralk'ual ri tat Adán, ri tat Adán are ralk'ual ri Dios.

4

Kätaqchi'x ri Jesús che mak

¹ Xel b'i ri Jesús pa ri nima' Jordán, xtzelej k'u loq qajinaq ri Loq'alaj Espiritu puwi'. Te ri' ri Espiritu xuk'am b'i ri Jesús pa taq juyub' ri kätz'inowik. ² Xk'oji k'u chila' kawinaq q'ij, kätaqchi'x k'u che mak rumal ri Itzel. Man k'o tä k'u jas xutij pa taq ri q'ij ri'. Te k'u ri' sib'alaj xnumik. ³ Xub'ij k'u ri Itzel che: We la ri' ri u K'ojol ri Dios, b'ij la che we ab'aj ri' chi kub'an na wa che la, —xcha che.

⁴ Ri Jesús xch'awik, xub'ij che: Tz'ib'am kan wa' pa ru Loq' Pixab' ri Dios ri Tz'ib'talik, kub'ij: “Man xaq tä xuwi rumal ri wa kek'asi na ri winaq, xane xuquje'

rumal ronojel ru Tzij ri Dios,” —kăcha ri’, —xcha ri Jesús che.

⁵ Te k’u ri’ ri Itzel xuk’am b’i ajsik puwi’ jun nimalaj juyub’. Xeuk’utuxtaj konojel ri tinimit re ruwăchulew chuwach. ⁶ Xub’ij k’u che ri Jesús: Kinya na che la chi kătaqan la pa ki wi’ konojel we tinimit ri’ xuquje’ chi kănimarisax q’ij la rumal wa’, —kăcha’. Yo’m k’u ronojel wa’ chwe in. Ri in k’ut kuya’ kinya wa’ che apachin ri kinwaj kinya wi, —xcha ri Itzel che. ⁷ We kăxuki la kinq’ijilaj la kinya wa’ che la, —xcha che.

⁸ Ri Jesús xch’awik, xub’ij: ¡Satanás! Chatel chnuwach, —xcha’. Rumal chi tz’ib’am pa ru Loq’ Pixab’ ri Dios, kub’ij: “Chatq’ijilan na chwe in ri Awajaw ri a Dios. Chatpatănin xaq xuwi chwe in,” —kăcha ri u Tzij ri Dios, —xcha ri Jesús che.

⁹ Ri Itzel xuk’am b’ik ri Jesús pa ri tinimit Jerusalén, xutak’ab’a puwi’ ri nimalaj rachoch Dios, xub’ij che: We lal ri’ ri u K’ojol ri Dios, k’iăqa b’i ib’ la ikim, —kăcha’.

¹⁰ Rumal chi ru Loq’ Pixab’ ri Tz’ib’talik kub’ij:

Keutaq na loq ri ángeles

che a chajixik,

—kăcha’, —xcha ri Itzel che. ¹¹ Xuquje’ kub’ij pa ru Loq’ Pixab’ ri Dios:

Katkichap na che ra q’ab’ che a to’ik

rech man kachăq’ij tă rawaqan

cho jun ab’aj,

—kăcha ri’.

¹² Xch’aw chi na jumul ri Jesús, xub’ij: Xuquje’ kub’ij pa ru Loq’ Pixab’ ri Dios ri Tz’ib’talik: “Mayak royowal ri Qajaw ri qa Dios,” —kăcha’, —xcha ri Jesús che.

¹³ Aretaq ri Itzel xto’taj chutaqchi’xik ri Jesús che mak, xel b’i ruk’. Kătzelej chi na loq jumul pa jun q’ij chik.

Ri Jesús kuchaplej tijonem

¹⁴ Xtzelej k’u b’i ri Jesús, k’o k’u ru chuq’ab’ ri Loq’alaj Espiritu ruk’. Xe’ pa Galilea. Ri winaq ajchila’ xetzijon chrij ri Jesús pa ronojel tinimit. ¹⁵ Ri Jesús xuya tijonik pa taq ri rachoch Dios ri kăkimulij wi kib’ ri winaq aj Galilea. Konojel xkinimarisaj u q’ij.

Ke’ ri Jesús pa ri tinimit Nazaret

¹⁶ Xtzelej b’i ri Jesús, xe’ pa ri tinimit Nazaret jawije’ xk’iyisax wi. Pa ri q’ij re uxlanem xok b’i pa ri rachoch Dios jas ru naq’atisam wi rib’, xtak’i k’ut chusik’ixik ru Loq’ Pixab’ ri Dios. ¹⁷ Xyi’ k’u ri wuj che ri xutz’ib’aj ri mam Isaias, q’alajisal re ru Loq’ Pixab’ ri Dios ojer. Aretaq xujaq ri wuj, xurigo jawije’ ri tz’ib’tal wi ri’, ri kub’ij:

¹⁸ Ri Espiritu rech ri Qajaw Dios k’o wuk’.

In cha’tal k’ut rech keintzijoj utzalaj

taq tzij chke ri meb’a’ib’.

In u taqom u loq che ki ku b’isaxik

kanima’ ri keb’isonik,

chutzijoxik ri ki tzoqopixik ri e tz’apim,

chub’anik k’ut chi keka’y ri moyab’,

xuquje’ che ki tzoqopixik

ri man e tzoqopim taj,

—kăcha’.

¹⁹ Xuquje’ in taqom loq chutzijoxik wa’

chi ri Qajaw Dios xucha’ we q’ij

junab’ ri’ chub’anik utzil

chke konojel winaq,

—kăcha ri qa mam Isaias, —xcha ri Jesús chke.

²⁰ Ri Jesús xutz’apij ri wuj, xutzelej wa’ che ri chajil re ri rachoch Dios, xt’uyi’k. Konojel ri winaq ri e k’o pa ri rachoch Dios naj ki wi’ che. ²¹ Xub’ij k’u chke: Kămik ri’ xb’antaj wa’ we Tz’ib’talik ri’ chuwach alaq, —xcha chke.

²² Konojel ri winaq utz kech’aw chrij ri Jesús, xuquje’ xkikajmaj ri je’lalaj taq tzij ri xutzijoj chke, xkib’ij: ¿A mat are ru k’ojol ri tat José? —xecha’.

²³ Xub’ij chke: Wetam ri kăb’ij na alaq chwe in: “Ajkun, kunaj ib’ la,” —kăcha na alaq chwe. “Ri qa tom chi xeb’an la pa ri tinimit Capernaum, cheb’ana k’u la waral pa ri tinimit la,” —kăcha na alaq, —xcha chke.

²⁴ Xuquje’ xub’ij chke: Qas tzij ri kinb’ij chech alaq chi sib’alaj nim kil wi ronojel q’alajisanel. Xaq xuwi pa ru tinimit ri are’ man nim tă kil wi wa’, —kăcha ri Jesús.

²⁵ Tz’ij ri’ ri kinb’ij chech alaq chi xek’oji k’ia ri chuchuib’ malka’nib’ pa ri tinimit Israel pa taq ru q’ij ri qa mam Elías, jun q’alajisal re ru Loq’ Pixab’ ri Dios ojer. Oxib’ junab’ ruk’ waqib’ ik’ man k’o tă jăb’ xub’ano. Xk’oji k’u jun nimalaj wi’jal pa ronojel ruwăchulew pa taq ri q’ij ri’. ²⁶ Man xtaq tă k’u b’i ri tat Elías kuk’ konojel ri malka’nib’, xane xaq xuwi ruk’ ri jun chichu’ malka’n pa ri tinimit Sarepta re Sidón, —kăcha’. ²⁷ Xuquje’ xek’oji k’ia yawab’ib’ ri k’o ri itzel taq ch’a’k chkiq pa ru q’ij ri Eliseo, jun q’alajisal re ru Loq’ Pixab’ ri Dios ojer. Man k’o tă k’u jun ri xkunaxik, xane xaq xuwi ri tat Naamán ri aj Siria, —xcha ri Jesús chke.

²⁸ Aretaq ri winaq xkita ri xub’ij chke, konojel ri e k’o pa ri rachoch Dios sib’alaj xpe koyowal che ri Jesús. ²⁹ Xewalij k’ut, xkesaj b’i pa ri tinimit. Xkik’am b’i chutz’a’m ri juyub’ ri yakom wi ri ki tinimit. Xkaj u k’iăqiq b’i ri Jesús ikim. ³⁰ Xq’atăn k’u b’i ri Jesús pa ki nik’iajal ri winaq, xe’k.

Ri Jesús kuriq jun achi ri k’o jun itzelalaj espíritu che

³¹ Xqaj b’i ri Jesús, xe’ pa Capernaum, jun tinimit re Galilea. Xeutijoj ri winaq chila’ ronojel q’ij re uxlanem. ³² Ri winaq xkikajmaj ru tijonik rumal chi xeutzijob’ej je’ jas ri kub’an jun ri kătaqan pa ki wi’.

³³ Xok k'u b'i pa ri rachoch Dios jun achi ri k'o jun itzelalaj espíritu che. Xuraq u chi' ri achi, ko xch'awik. ³⁴ Xub'ij k'ut: ¡Aa! ¿Jas qe uj uk' la, Jesús aj Nazaret? ¿A petinaq la chusachik qa wäch? In wetam wäch la, chi lal ri' ri Loq'alaj Achi ri taqom loq rumal ri Dios, —xcha che.

³⁵ Ri Jesús xuyajo, xub'ij: ¡Chatz'apij u pa chi', chatel che ri achi! —xcha che.

Te k'u ri' ri itzelalaj espíritu xuk'iaq ri achi cho ulew chkixol ri winaq, xel b'ik, man k'o tä k'äx xub'an kan che. ³⁶ Konojel xekajmanik. Käkitzijob'ela kib', käkib'ij: ¿Jas wa' we tzij ri' ri kukoj ri tata? ¡käkowin ri Are' che ki taqik ri itzel taq espíritu, keb'el chke ri winaq! —xecha'.

³⁷ Ketzijon k'u chrij ri Jesús pa ronojel k'olib'al chunaqaj ri tinimit ri'.

Ri Jesús kukunaj ruji' chichu' ri tat Simón Pedro

³⁸ Xel k'u loq ri Jesús pa ri rachoch Dios, xok b'ik pa ri rachoch ri tat Simón. Ru ji' chichu' ri tat Simón qajinaq che jun nimalaj q'aq', xeb'ochi'n k'u ri winaq che ri Jesús puwi' ri chichu'. ³⁹ Xnaqajin che ri chichu', xtak'i k'u chuxkut. Xuyaj ri q'aq', xtäni k'u che. Chanim xwalij ri chichu', xeupatänij k'ut.

Ri Jesús keukunaj k'ia yawab'ib'

⁴⁰ Aretaq qajem kub'an ri q'ij, konojel ri e k'o yawab'ib' kuk' xekik'am loq chuwäch ri Jesús. Pune k'ia u wäch ri yab'il ri e k'o chke ri winaq, xkowin ri Jesús che ki kunaxik. Xuya ru q'ab' pa ki wi' chkijujunal rech keutzirik. ⁴¹ E k'ia k'ut ri xeb'el itzel taq espíritu chke. Xkiraq ki chi', xkib'ij: Lal ri' ri u K'ojol ri Dios, —xecha che.

Keuyaj k'u ri Jesús, man kuya tä chke chi ketzijonik, rumal chi ketam u wäch chi are ri Cristo.

Ri Jesús kutzijoj ri Utzalaj Tzij re ri Evangelio pa Galilea

⁴² Aretaq xsaqirik, xel b'i ri Jesús pa ri tinimit, xe' pa juyub' jawije' ri xaq kätz'inowik. Ri winaq sib'alaj xkitzujuk, xkiriqo. Xkiq'atej k'ut rech man kel tä b'i chkixol. ⁴³ Ri Jesús xub'ij chke: Rajwaxik chi kine'k kintzijoj ri Utzalaj Tzij re ri Evangelio chrij ru taqanik ri Dios chke ri winaq pa taq ri nik'iaj tinimit chik, are k'u wa' ri in taqom wi loq, —xcha'.

⁴⁴ Xtzijon k'u ri Jesús pa taq ri rachoch Dios ri e k'o pa Galilea.

5

Waral kätzijox wi ri kajmab'al ri xb'an che ki chapik ri kär

¹ Aretaq ri Jesús k'o chuchi' ri nimalaj ja' re ri mar re Genesaret, xeopan k'ia winaq

ruk' chutatab'exik ru Tzij ri Dios. ² Ri Jesús xeril kieb' barcos ri e k'o chuchi' ri mar. E elinaq loq ri chapal taq kär pa ri barcos che ki ch'ajik ri ki k'at. ³ Xok k'u b'ik ri Jesús pa jun chke ri barcos, ri re ri tat Simón. Xt'uyi pa ri barco, xuta' toq'ob' che ri tat Simón chi kuqeb'isaj apan jub'iq' ri barco chuchi' ri ulew rech man kápitz' tä ri Are' kumal ri k'ia winaq. Chila' k'ut xuya loq tijonik chke ri winaq. ⁴ Aretaq xutänab'a ri u tijonem, xub'ij che ri tat Simón: Chaqeb'isaj ri barco pa ri mar. Chiqasaj ri i k'at che ki chapik kär, —xcha che.

⁵ Ri tat Simón xch'awik, xub'ij che: Qajtij, xujchakun ronojel ri jun aq'ab' mier. Man k'o tä k'u qa chapom, —kächa'. We k'u je' káb'ij la, kinb'an chi na wa', keinqasaj ri nu k'at, —xcha che.

⁶ Aretaq xb'antaj wa', xenoj k'u ri ki k'at chapäb'al kär, je ri' chi ket'oqopitaj chke taq ri kär. ⁷ Ri tat Simón kuk' ri to'l taq re xekisik'ij ri kachi'l ri e k'o pa ri jun barco chik, rech keopan che ki to'ik. Xeb'e' kuk' che ki to'ik, xekinojisaj k'u ri kieb' barcos, je ri' chi tajin kesach pa ri ja'. ⁸ Aretaq ri tat Simón Pedro xril ri xb'anik, xub'ij: Qajaw Jesús, man taqal tä chwe chi kák'oji la wuk' rumal chi ri in, sib'alaj in ajmak, —xcha che.

⁹ Xub'ij wa' rumal chi xuxej rib' ri tat Simón xuquje' ri e k'o ruk' rumal ri k'alaj kär ri xekichapo. ¹⁰ Xuquje' xekajman ri tat Jacobo, ri tat Juan, u k'ojol ri tat Zebedeo, kachi'l kib' ruk' ri tat Simón. Xub'ij ri Jesús che ri tat Simón: Maxej awib'. Jas ri kab'an chke taq ri kär, keamulij, je' kab'an na chke ri winaq, —xcha che.

¹¹ Xekesaj k'u loq ri ki barcos pa ri mar, xkiya cho ri ulew. Te ri' xkiya kan ronojel, xeb'e' ruk' ri Jesús.

Ri Jesús kukunaj jun achi ri k'o itzel ch'a'k che

¹² Aretaq ri Jesús k'o pa jun tinimit chik, xopan jun achi ruk', ri sib'alaj yawab', ri k'o itzel ch'a'k* che. Ri achi, aretaq xril ri Jesús, xupachb'a rib' chuwäch. Xuchap u b'ochi'xik, xub'ij: Tat, we kaj la kákowin la che nu kunaxik, —xcha'.

¹³ Ri Jesús xuyuj ru q'ab', xuchap koq. Xub'ij che: Kwaj, —kächa'. Chutzir b'a' la, —xcha che.

Chanim k'ut xel ri itzel ch'a'k che ri achi, xutzirik. ¹⁴ Xutaj k'u ri Jesús chi mutzijoj wa' che apachin jun winaq. Te ri' xub'ij che: ¡oj la! Jek'utu ib' la cho ri sacerdote. Ya b'a' la ri taqom kan rumal ri qa mam Moisés chi käyi' che u kunaxik jun ri k'o itzel ch'a'k che. Are k'u q'alajisab'al wa' chkiwäch ri winaq, —xcha che.

* 5:12 Ri itzel ch'a'k are jun yab'il ri sib'alaj k'äx ri kusipaj rib'.

¹⁵ Xesax k'u na u tziyoxik wa' pa ronojel tinimit. Käkimulij k'u kib' k'ialaj taq winaq chutatab'exik ru tijonik ri Jesús, xuquje' rech keukunaj chke taq ri ki yab'il. ¹⁶ Xel b'i ri Jesús chila', xe' pa taq juyub' ri ketz'inowik chub'anik orar.

Ri Jesús kukunaj jun achi ri käminaq u cuerpo

¹⁷ Pa jun q'ij ri Jesús tajin kuya tijonik. E t'uyut'oj k'u ri tata'ib' fariseos xuquje' ri tijonelab' re ri Pixab' chunaqaj ri Jesús. E elinaq k'u loq ri e are' pa ronojel tinimit re Galilea, re Judea, xuquje' e k'o jujun ri xepe pa Jerusalén. Are k'u ri Jesús, sib'alaj k'o ru chuq'ab' ri Dios ruk' che kunanik. ¹⁸ Xeopan k'u jujun achijab' kuk'am loq jun achi ri käminaq u cuerpo. Q'oyol cho jun alaj u ch'at. Ri achijab' xkitzujukuj ri rokisaxik b'i ri yawab' pa ri ja chuya'ik cho ri Jesús. ¹⁹ Man xkiriq' tä k'ut jawije' keb'ok wi b'ik kumal ri k'ialaj winaq. Xepaqi k'u puwi' ri ja. Xkesaj apan jub'iq' ru xo'til ri ja, xkib'an jun jul puwi' ri ja, xkigasaj k'u b'i ri achi pa ri alaj ch'at chxikol ri winaq cho ri Jesús. ²⁰ Aretaq ri Jesús xrilo chi qas kekojon che, xub'ij che ri achi ri käminaq u cuerpo: Tat, kesachtaj ri mak la, —xcha che.

²¹ Te k'u ri xpe koyowal ri fariseos xuquje' ri tijonelab' re ri Pixab'. Käkichomaj pa kanima', käkib'ij: "¿Jachin lo wa' we achi ri' ri kub'ij ri äwas u b'ixik chrij ri Dios?" —kecha'. "Xaq xuwi ri Dios kākowin chusachik u mak jun," —xcha'.

²² Ri Jesús chanim xuna' ri tajin kākichomaj pa kanima'. Xch'aw k'ut, xub'ij chke: Ri in wetam ri tajin kākichomaj alaq pa anima' alaq, —kächa che. ²³ Jachike ri man k'äx tä u b'ixik che ri yawab': "Ra maq xesachtajik", o ri u b'ixik: "Chatwalijjoq, chat'inoq"? —kächa ri Jesús che. (K'äx na u b'anik ri jun xuquje' ri jun chik.) ²⁴ Rech b'a' ketamaj alaq chi ri in, in ri' ri Ralk'ual ri Dios ri Qas Winaq, k'o nu taqanik pa ki wi' ri winaq cho ruwächulew chusachik ki mak, kinb'an na wa', —xcha che.

Xub'ij che ri achi ri käminaq u cuerpo: Kinb'ij che la, walij b'a' la. K'ama la b'i ri sok la, oj la cho ja, —xcha che.

²⁵ Chanim xwalij ri achi, xtak'i chkiwäch ri winaq. Xutelej b'i ri u sok ri q'oyol wi, xe' cho rachoch, tajin kunimarisaj u q'ij ri Dios. ²⁶ Konojel ri winaq sib'alaj xkikajmaj ri xub'ano, xkinimarisaj k'u u q'ij ri Dios. Sib'alaj kākixej kib' ri winaq, kākitzijob'ela kib', käkib'ij: Kämik ri' e k'o kajmab'al ri qilom, —xcha'.

Ri Jesús kusik'ij ri tat Leví rech ke' ruk'

²⁷ Te k'u ri' xel b'i ri Jesús chila', xril jun toq'il alkab'al, Leví u b'i, t'uyul jawije' kätöj wi alkab'al. Xub'ij k'u che: Sa'j la wuk', —xcha che.

²⁸ Ri tat Leví xwalijik, xuya kan ronojel, xe' ruk' ri Jesús.

²⁹ Ri tat Leví xub'an k'u jun nimalaj ula'nem che ri Jesús cho rachoch. Xeopan k'ia chke ri toq'il taq alkab'al, xuquje' nik'iaj taq winaq chik. Xe'tuyi k'u junam chi' ri mesa kuk' ru tijoxelab' ri Jesús. ³⁰ Xepe ri tijonelab' re ri Pixab' kachi'l ri fariseos. Xekiyaj ri tijoxelab', xkib'ij chke: ¿Jas che kixwi' kuk' toq'il taq alkab'al xuquje' kuk' ajmakib'? —xecha che.

³¹ Ri Jesús xch'awik, xub'ij chke: Ri winaq ri utz ki wäch ri k'o ki chuq'ab' man rawjaxik tä kunal ke. Xane are rawjaxik wa' chke ri yawab'ib', —kächa'. ³² Man in petinaq tä che ki sik'ixik ri utzalaj taq winaq rech kākik'ex kanima', kākik'ex k'u ki chomanik, xane che ki sik'ixik ajmakib', —xcha che.

Käkita' che ri Jesús chi jas che man kākā'n tä ayunar ru tijoxelab'

³³ Xkib'ij k'u che ri Jesús: Ru tijoxelab' ri tat Juan amaq'el kākā'n ri ayuno, amaq'el k'ut kākā'n orar. Je' k'u kākā'n ri ki tijoxelab' ri fariseos xuquje'. ¿Jas k'u che ri tijoxelab' la amaq'el kewi'k, man kākā'n tä k'u ri ayuno? —xecha che.

³⁴ Xub'ij k'u ri Jesús chke: ¿A kuya' lo ri e k'o pa jun k'ulanem kākā'n ayunar aretaq k'o ri jia'xel kuk'? —kächa'. ³⁵ Kopan k'u na ri q'ij ri man k'o tä chi ri jia'xel chxikol. Te k'u ri' kākā'n na ayunar pa ri q'ij ri', —xcha che.

³⁶ Xuquje' xukoj jun k'utb'al chkiwäch, xub'ij chke: Man k'o tä jun winaq ri kut'is jun k'ak' k'obj'al chrij ri q'el atz'iaq. We je ri', ri k'ak' kuteq'tob'isaj na ri' ri q'el, xuquje' ri k'obj'al ri esam che ri k'ak' atz'iaq man kuk'ulajij tä rib' ruk' ri q'el, —kächa'. ³⁷ Man k'o tä k'u jun winaq ri kuya k'ak' vino pa taq q'el taq q'eb'al re tz'um. We je ri', ri k'ak' vino keut'ub'ij ri' ri tz'um, kätix k'u na ri' ri vino, keetzeletaj kan ri' ri tz'um. ³⁸ Are ri k'ak' vino käyi' na pa k'ak' taq q'eb'al re tz'um. Je ri' man kāsach tä u wäch ri vino, o ri k'olib'al re. ³⁹ Man k'o tä jun winaq ri kraj kutij re ri k'ak' vino we nab'e u tijom re ri q'el vino. Kubi'j na ri' ri winaq chi are utz na ri q'el vino, —xcha ri Jesús che.

6

Ru tijoxelab' ri Jesús kekich'up ru jolom triko pa jun q'ij re uxlanem

¹ Pa jun q'ij re uxlanem ok'owem re ri Jesús pa taq ri tiko'n. Ru tijoxelab' tajin kekich'up ru jolom triko, kekich'ich pa ki q'ab', kekitijjo. ² Jujun tata'ib' fariseos xkib'ij: ¿Jas che káb'an alaq ri äwas u b'anik pa ri q'ij re uxlanem? —xecha che.

³ Ri Jesús xch'awik, xub'ij chke ri fariseos: ¿A mat ne sik'im alaq jas ri xub'an ri qa mam

David aretaq xnumik, xuquje' ri xka'n ri e k'o ruk'? —kächa'. ⁴ Xok k'u b'i ri qa mam David pa ri rachoch Dios, xuchap ri wa ri e yo'm cho ri Dios, xutijo, xuya ke ri e k'o ruk' xuquje'. Äwas k'u ne u tijik wa' kumal xaq jachinoq. Xane xaq xuwi chke ri sacerdotes ya'tal wi wa', —xcha chke.

⁵ Xuquje' xub'ij chke: Ri in, in ri' ri Ralk'ual ri Dios ri Qas Winaq,* k'o nu taqanik puwi' ri q'ij re uxlanem xuquje', —xcha chke.

Käkunax jun achi ri käminaq jun u q'ab'

⁶ Pa jun q'ij re uxlanem chik xok b'i ri Jesús pa ri rachoch Dios, xuchap k'u u ya'ik tijonik chke ri winaq. K'o jun achi chila' ri käminaq jun u q'ab', ri u wikiäq'ab'. ⁷ Kaluchi'x k'u ri Jesús kumal ri tijonelab' re ri Pixab', xuquje' kumal ri tata'ib' fariseos, che rilik we ri Are' kärutzirisaj ru q'ab' ri achi pa ri q'ij re uxlanem rech kuya' käkib'ij chi k'o u mak. ⁸ Ri Jesús xretamaxtaj ri ki chomanik. Xub'ij k'u che ri achi ri käminaq u q'ab': Walij b'a' la, tak'al la pa qa nik'iajal, —xcha che.

Xwalij k'ut, xtak'i chila'. ⁹ Xub'ij ri Jesús chke ri nik'iaj winaq ri e k'olik: K'o ri kwaj kinta' chech alaq. —kächa chke. ¿Jachike ri ya'tal u b'anik pa ri q'ij re uxlanem? ¿A are ri u b'anik utzil? ¿We ne are ri u b'anik etzelal! ¿A ya'tal ri u to'ik ru k'aslema jun o ri u kämisaxik? —xcha chke.

¹⁰ Ri Jesús ko xka'y chke konojel ri e k'o pa taq u xkut, xub'ij k'u che ri achi: Yuqu ri q'ab' la, —xcha che.

Je' xub'ano, xutzir k'u kan ru q'ab'. ¹¹ Ri u k'ulel ri Jesús sib'alaj xeqij' che ri koyowal, xkich'ab' la k'u kib' jas ri kekowin chub'anik chrij ri Jesús.

Kecha' ri kab'lajuj apóstoles rumal ri Jesús

¹² Pa ri q'ij ri' xe' ri Jesús pa jun juyub' chub'anik orar. Xrok'owisaj ronojel jun aq'ab' pa oración cho ri Dios. ¹³ Aretaq xsaqirik, xeusik'ij ru tijoxelab', xeucha' kab'lajuj, xub'ij apóstoles[†] chke (ri kel kub'ij "nu taqo'n"). ¹⁴ E are taq wa' ri xeucha' ri Jesús: Ri tat Simón ri xuquje' käb'ix Pedro che, ri tat Andrés u chaq' ri tat Pedro, ri tat Jacobo xuquje' ri tat Juan, ri tat Felipe xuquje' ri tat Bartolomé. ¹⁵ Xeucha' k'u ri tat Mateo xuquje' ri tat Tomás, ri tat Jacobo ru k'ojol ri tat Alfeo, xuquje' ri tat Simón ri käb'ix "u nimal tinimit" che. ¹⁶ Xuquje' xeucha' ri tat Judas ru chaq' ri tat Jacobo, xuquje' ri tat Judas Iscariote ri xjachow ri Jesús.

Ri Jesús kuya tijonik chke k'ia winaq

¹⁷ E rachi'lam ru tijoxelab', ri Jesús xqaj loq pa ri juyub', xtak'i k'u pa jun lianik. Sib'alaj e k'ia ri winaq ri xeb'el loq pa konojel taq ri tinimit re Judea, pa ri tinimit Jerusalén, xuquje' pa taq ri taq'aj re Tiro xuquje' re ri Sidón. Xeopan k'u ruk' ri Jesús chutatab'exik ri kub'ij, xuquje' rech kekunax che taq ri ki yab'. ¹⁸ Xuquje' xerutzirisaj ri winaq ri käkiriq k'äx kumal ri itzel taq espíritus. ¹⁹ Konojel ri winaq käkitzukuj käkichap koq ri Jesús rumal rech chi kel chuq'ab' ruk' che ki kunaxik konojel.

Ri Jesús kuya tijonik chrij jachin ri' ri kuriq ri qas utzil

²⁰ Xka'y k'u ri Jesús chke ru tijoxelab', xub'ij chke: Utz iwe ix ri ix meb'a'ib' rumal chi ri Dios kätaqan pi wi'.

²¹ Utz iwe ix ri kixnum kämik rumal chi sib'alaj k'o ri kitij na.

Utz iwe ix ri kixox' kämik rumal chi kixtze'n na ruk' kikitomal.

²² Utz iwe ix aretaq ketzelax i wäch kumal ri winaq, xuquje' aretaq kixkesaj b'i kuk', kixkiyoq'o, xuquje' aretaq ketzijon chiwij je' ta ne chi ix lawalo taq winaq. Utz iwe aretaq ri winaq käka'n ronojel wa' chiwe xa rumal wech in, in ri' ri Ralk'ual ri Dios ri Qas Winaq, —kächa ri Jesús. ²³ Sib'alaj chixkikot pa ri q'ij ri', chixtze'noq, rumal chi nim ri tojb'al iwe ri kiriq na pa ri kaj. Xuquje' ne ri kati't ki mam we winaq ri' je' xka'n chke ri q'alajisal taq re ru Loq' Pixab' ri Dios ojer, —xcha chke.

²⁴ Toq'ob' k'u i wäch ix, ri ix q'inomab', rumal chi ya xixkikot ix waral.

²⁵ Toq'ob' i wäch ix ri sib'alaj k'o kitij kämik rumal chi käpe ri q'ij ri sib'alaj kixnum na.

Toq'ob' i wäch ix ri xa kixtze'n ruk' kikitomal kämik rumal chi kixb'ison na, kixox'ik.

²⁶ Toq'ob' i wäch ix aretaq konojel ri winaq sib'alaj utz ketzijon chiwij, rumal chi je' xka'n ri kati't ki mam we winaq ri' ojer chke ri xkijaluj kib' chi e q'alajisal taq re ru Loq' Pixab' ri Dios, —xcha chke.

Cheiwaj ri winaq ri käka'n ki k'ulel chiwe

²⁷ Kinb'ij k'u chiwe ix ri tajin kitatab'ej ri nu tzij: Cheiwaj ri käka'n ki k'ulel chiwe. Chib'ana utzil chke ri keetzelan i wäch. ²⁸ Chib'ij: Ri Dios k'o pi wi', —kixchoq chke ri winaq ri käkitzaq itzel tzij pi wi'. Chib'ana orar pa ki wi' ri keyoq'on chiwe, —kächa'. ²⁹ We k'o jun katch'ayow che ri juperaj a palaj, chaya ri juperaj chik chuwach. We k'o jun kumaj ra chaket, chaya che chi kuk'am b'ik xuquje' ra kamixa'. ³⁰ Chaya che apachin ri k'o jas kuta' chawe. Mata' chi ri jastaq awe che ri jun ri xuk'am b'ik.

* **6:5** Ri Jesús xukoj we b'i'aj ri' chb'il rib' chuk'utik chi Are ri Cristo o ri Mesías ri tztz'ib'ax ojer pa ru Loq' Pixab' ri Dios chi käpetik. [†] **6:13** Ri tzij "apóstol" kel kub'ij "taqom". E kab'lajuj u taqo'n ri Jesús ri e cha'tal rumal.

³¹ Ri kiwaj chi kaka'n na ri winaq chiwe, je' chib'ana ix chke xuquje', —kacha'.

³² We xaq xuwi keiwaj ri winaq ri kixkaj ix, ¿jas ta k'u che kichomaj chi i b'anom jun nimalaj utzil? Xuquje' ne ri ajmakib' kākaj kib'. ³³ We xaq xuwi kib'an utzil chke ri winaq ri keb'anow utzil chiwe, ¿jas k'u che kichomaj chi k'o nimalaj utzil i b'anom? Are je' kaka'n ri ajmakib' xuquje', —kacha'. ³⁴ We xaq xuwi kiya ki jalomal ri ku'l i k'ux chkiy chi kākitezlej chi na wa', ¿jas ta che ri' kib'ij chi i b'anom utzil? Xuquje' ne ri ajmakib' kākij ri ki jalomal ri kach taq ajmakib' ri ku'l ki k'ux chkiy chi kākitezlej chi na wa'. ³⁵ Cheiwaj ri kaka'n ki k'ulel chiwe. Chib'ana utzil. Chiya jalomal, miku'b'a iwanima' chrij chi kātzelex chi na wa' jumul chik. Nim k'u ri tojb'al iwe, kāk'alajin k'u na chi qas ix ralk'ual ri Dios aj Chikaj, rumal chi sib'alaj utz kub'an ri Dios chke ri man kemaltioxin taj, xuquje' chke ri lawalo taq winaq. ³⁶ Chitog'ob'isaj ki wäch ri winaq je' jas ri Dios ri i Tat u toq'ob'isam i wäch ix, —xcha ri Jesús.

Miq'at tzij pa ki wi' nik'iaj winaq chik

³⁷ Miq'at tzij pa ki wi' nik'iaj winaq chik, man kāk'at tā k'u na tzij pi wi' ix rumal ri Dios. Mib'ij tzij chkiy ri winaq, man kāk'ix tā na tzij chiwij ix rumal ri Dios. Chisacha ri ki mak jule' chik, kāsach k'u na i mak ix. ³⁸ Chiya ix chke nik'iaj chik, ri Dios k'ut kuya na chiwe ruk' jun utzalaj pajanik, t'ikom, kānoj ra k'olib'al, kājat'jatik, —kacha'. Rumal chi jas ri pajanik ri kiya ix, je' ri pajanik ri kuya na ri Dios chiwe, —xcha ri Jesús chke.

³⁹ Ri Jesús xukoj chi na jun k'utb'al chik rech tijonik, xub'ij: ¿A kākowin lo jun winaq ri man kaka'y taj chuk'amik u b'e jun winaq chik ri man kaka'y taj? ¿A mat junam ri' ketzaq b'i pa jun loj? —kacha chke. ⁴⁰ Man k'o tā jun tijoxel ri nim na u b'anik chuwäch ri rajtij. Pune ta ne aretaq kätijotaj ri tijoxel, junam k'u na ruk' ri rajtij, —kacha'.

⁴¹ ¿Jas che k'o kab'ij chkiy nik'iaj winaq chik? Je' ta ne chi kaka'yej jun alaj mes ri k'o pa ru waq'äch ri awachalal, man kawil tā k'u ri a mak at ri je' ta ne jun tem ri k'o pa ri a waq'äch. ⁴² Je' ta ne chi kab'ij che ri awachalal: “Chaya chwe chi kinwesaj koq ri alaj mes ri k'o pa ra waq'äch,” —katcha che. ¿Xaq kieb' a wäch! Man kawil tā k'u ri tem ri k'o pa ra waq'äch at. Nab'e rajwaxik kasuk'umaj ri a k'aslemal at je' ta ne chi kawesaj b'i jun tem pa ra waq'äch. Te k'u ri' qas utz katka'y na che resaxik koq ri alaj mes pa ru waq'äch ri awachalal ri je' ta ne xa jun mak ri man nim taj, —xcha ri Jesús.

Are etamtal jun che' rumal ri u wächinik

⁴³ Man k'o tā jun che' ri man utz taj ri kuya utz u wächinik. Man k'o tā k'u jun utzalaj che' ri kuya u wächinik ri man utz

taj. ⁴⁴ Are etamtal ri jun che' rumal ru wächinik. Man ketam tā higos chrij ri k'ix, man ketam tā k'u uvas chkiy ri juwi' k'ix, —kacha'. ⁴⁵ Jun utzalaj winaq are kutzijoj ri utzil ri k'o pa ranima'. Jun winaq ri man utz taj are kutzijoj ri' ri lawaloyil ri k'o pa ranima'. Xaq xuwi kutzijoj jun winaq jas ri k'o pa ranima', —xcha ri Jesús.

Waral kätzijox wi ri kieb' u wäch tak'alib'al ja

⁴⁶ Jas che kib'ij chwe: “Qajaw, Qajaw,” —kixcha chwe. Man kinimaj tā k'u ri kinb'ij, —kacha'. ⁴⁷ Kink'ut na chiwäch jachin ruk' kinjunamaj wi ronojel winaq ri kape wuk' in, ri kutatab'ej ri kinb'ij xuquje' känimanik, —kacha'. ⁴⁸ Junam wa' we winaq ri' ruk' jun winaq ri kuyak rachoch. Kuk'ot ri ulew, naj kuqasaj. Kub'an ri tak'alib'al re ri ja puwi' ri ab'aj. Aretaq kape jun nimalaj u wo ja', ri ja' kupuk'ij rib' chrij ri ja ri', man kākowin tā k'u chuyiko' misaxik rumal chi yakom wa' puwi' ri ab'aj, —kacha'. ⁴⁹ Ri winaq k'ut ri ketatab'en ri nu tzij, man keniman tā k'u ri', e are' junam ruk' ri winaq ri kuyak ri rachoch puwi' ri ulew, man kub'an tā k'u ru tak'alib'al ri ja. Aretaq kāk'iy ri ja', kupuk'ij rib' chrij ri ja, chanim kätzaqik, kāyojyob' k'u ri ja, —xcha ri Jesús chke.

7

Ri Jesús kukunaj ri patänil re jun chke ri ki nimaqil soldados

¹ Aretaq xto'taj ri Jesús che ki tzijob'exik ri winaq, xe' ri Are' pa ri tinimit Capernaum. ² Chila' k'ut k'o jun achi ki nimal soldados. K'o jun patänil re ri tata' ri sib'alaj loq' chuwäch. Ri achi patäninel are sib'alaj yawab', kāmik kub'ano. ³ Aretaq ri tata' xuta u tzijol ri Jesús, xeutaq b'i jujun chke ri nimaq taq tata'ib' ke ri winaq aj Israel ruk' ri Are' rech kākib'ochi'j chi kopan ruk' chukunaxik ri patänil re. ⁴ Xeb'e'k, xeopan k'u ruk' ri Jesús, sib'alaj xeb'ochi'n che, xkib'ij: Taqal che ri tata' ri' chi kätö' la che, ⁵ rumal chi are jun winaq ri sib'alaj loq' keril ri qa winaqil uj, xub'an k'u ge ri rachoch Dios ri kākamulij wi qib', —xecha che.

⁶ Xe' ri Jesús, xerachi'aj b'ik. Naqaj chi k'ut k'o wi che ri rachoch ri ki nimal soldados, aretaq ri are' xeutaq b'i jujun taq rachi'l chub'ixik che ri Jesús: Tat, mākös ib' la. Man taqal tā chwe chi kok la loq pa ri wachoch. ⁷ Rumal ri' xinchomaj in chi man taqal tā chwe chi kinopan in uk' la. Xane xaq xuwi we káb'ij la loq ri tzij, kākunataj na ri patänil we, —kacha ri'. ⁸ Rumal rech chi ri in, in winaq ri k'o jun pa nu wi', ri in k'ut xuquje' kintaqan in pa ki wi' ri nu soldados. Kinb'ij che jun: ¡jat! —kincha che. Ke' k'ut. Kinb'ij che ri jun chik: ¡sa'j! —kincha che. Ri are'

käpetik. Kinb'ij che ri patänil we: ¡Chab'ana wa'! —kincha che. Kub'an k'ut, —xcha'.

⁹ Aretaq xuta wa' ri Jesús, sib'alaj xukaj-maj. Xutzolq'omij rib', xub'ij chke ri winaq ri e teretoj chrij: Tzij b'a' chi chxikol ri winaq aj Israel man k'o tä jumul nu riqom in jun achi junam ruk' ri tata' ri' ri sib'alaj käkojonik, —xcha chke.

¹⁰ Aretaq xetzelej b'ik ri u taqo'n ri tata' cho ja, xkiriq chi ri patänil re ri tata' ya utz chik ri are'.

Ri Jesús kuya chi ru k'aslema! ri ral ala jun chichu' malka'n

¹¹ Te k'u ri' xe' ri Jesús pa jun tinimit chik, Naín u b'i', xuquje' e b'enaq ruk' k'ia chke ru tijoxelab' kuk' nik'iaj winaq chik. ¹² Naqaj chik k'o wi ri Jesús che ri tinimit, te' xrilo chi k'o jun käminaq telem loq rech kāk'am b'i' pa muqik. Ri käminaq ri' are xa jun chi ala, ral jun malka'n chichu'. E k'o k'ia winaq re ri tinimit e teren chrij. ¹³ Aretaq ri Jesús xril ri malka'n, xel ranima' che, xub'ij: Man koq' tä chi la, nan, —xcha che.

¹⁴ Xqeb' ri Jesús ruk' ri käminaq, xuchap koq ri u käxon. Xetaki' k'ut ri e teleninaq. Xub'ij k'u ri Jesús: Ala, —xcha che. Kinb'ij chawe, ¡chatwalijoq! —xcha che ri käminaq.

¹⁵ Xwalij k'u ri ala ri xkām na, xuchap-lej ch'awem. Ri Jesús xujach kan che ru nan. ¹⁶ Sib'alaj xkixej kib' konojel ri winaq, käkinimarisaq k'u u q'ij ri Dios. Käbib'ij xuquje': K'o jun q'alajisal re ru Loq' Pixab' ri Dios ri sib'alaj nim u b'anik chqaxol.

Xuquje' xkib'ij: Petinaq ri Dios chub'anik utzil che ru tinimit, —xecha ri winaq.

¹⁷ Ri xub'an ri Jesús kätziox wa' kumal konojel ri winaq aj Judea xuquje' pa ronojel ri tinimit ri e k'o naqaj che ri Judea.

Ru taqo'n ri tat Juan Qasal Ja' keopan ruk' ri Jesús

¹⁸ Ru tijoxelab' ri tat Juan xkiya u tzijoxik ronojel wa' che. Are k'u ri tat Juan xech'ab'ej kieb' chke ru tijoxelab'.

¹⁹ Xeutaq b'i' ruk' ri Jesús rech kākita' che ri Are' we qas tzij Are ri Cristo ri kápe na, o we are rajwaxik chi kákeyej na Jun chik.

²⁰ Xeopan k'u ri achijab' ruk' ri Jesús, xkib'ij che: Ri tat Juan Qasal Ja' uj u taqom loq uk' la, chuta'ik che la we lal ri' ri Cristo ri kápe na, o we rajwaxik káqeyej na Jun chik, —xecha che.

²¹ Che we chanim ri', aretaq xeopanik, ri Jesús xerutzirisaj k'ia winaq che ri ki yab', xuquje' xeresaj b'i' ri itzel taq espíritus ri e k'o chke jujun winaq. Xub'an k'ut chi xeka'y k'ia moyab'. ²² Te ri' xch'aw ri Jesús, xub'ij chke ru tijoxelab' ri tat Juan: Jitzijoj che ri tat Juan ri iwilom, ri i tatab'em, chi ri moyab' keka'y chik, ri ch'okojib' keb'inik, ri winaq ri k'o itzel ch'a'k chke keutzirisaxik, ri so'rab' kākita

chik, ri käminaqib' kek'astajisaxik, xuquje' kätziox ri Utzalaj Tzij re ri Evangelio chke ri meb'a'ib'. ²³ Utz re ri winaq ri man kub'an tä kieb' u k'ux chwij, xane qas tzij käkojon chwe, —xcha chke.

²⁴ Aretaq xeb'e' ru taqo'n ri tat Juan, ri Jesús xuchaplej u tzijoxik ri tat Juan chke ri winaq, xub'ij: ¿Jas ri' ri xe' alaq che rilik pa taq ri juyub' ri ketz'inowik? —kächa'. ¿A xe' alaq che rilik jun winaq ri xa kākieblan ranima' je' ta ne chi are jun aj ri käslab'isax rumal ri kiäqij'? —kächa'. Man are taj, —kächa'. ²⁵ ¿Jas k'u ri xe' alaq che rilik? ¿A xe' alaq che rilik jun achi ri u kojom utzalaj taq ratz'iaq? Ri winaq ri k'o je'lalaj taq katz'iaq, ri kekikot ruk' ri ki q'inomal, kerigtaj wa' pa taq kachoch ri nimaq taq taqanelab', —kächa'. ²⁶ ¿Jas k'u lo ri xe' alaq che rilik? ¿A xe' alaq che rilik jun q'alajisal re ru Loq' Pixab' ri Dios? —kächa'. Je ri', —kächa'. Ri tat Juan k'ut, are nim na u b'anik chxikol ri q'alajisal re ru Loq' Pixab' ri Dios, —kächa'. ²⁷ Are wa' ri achi ri tz'ib'am chrij pa ru Loq' Pixab' ri Dios, kub'ij:

Kintaq b'ik ri nu taqo'n

ri kánab'ej k'u na chawäch, ri kusuk'umaj na ra b'e chawäch, —kächa ri Tz'ib'talik, —xcha ri Jesús. ²⁸ Kinb'ij chiwe chi man k'olinaq tä jun q'alajisal re ru Loq' Pixab' ri Dios ri qas nim na u b'anik cho ri tat Juan ri Qasal Ja' chxikol konojel ri winaq cho ruwächulew, —kächa'. Pune ta ne ri tat Juan are jun ki nimal winaq, ri man qas nim u b'anik jawije' kátaqan wi ri Dios, are nim na u b'anik wa' cho ri tat Juan.

²⁹ Aretaq xkita wa' ri toq'il taq alkaab'al xuquje' ri nik'iaj winaq chik ri b'anom ki qasna' rumal ri tat Juan, xkib'ij chi ri Dios qas tzij kub'an jikomal tzij. ³⁰ Are k'u ri tata'ib' fariseos xuquje' ri tijonelab' re ri Pixab' ri man b'anom tä ki qasna' rumal ri tat Juan, man nim tä xkil wi ri u Tzij ri Dios ri tzijom chke. ³¹ Xub'ij k'u ri Qajaw Jesús: ¿Jas k'u ruk' keinjunamaj wi ri winaq re we q'ij junab' ri'? ¿Jas k'u ruk' e junam wi? —kächa'. ³² Xaq e junam kuk' ri alab'om ri e tak'atoj pa taq ri k'ayib'al, ri kākich'ab'ela kib', kākib'ij: "Xqoq'esaj ri su' chiwe, man xixxojow taj. Xqab'an u q'ojom käminaq, man xixox' tä k'ut," —kecha ri'. ³³ Xul k'u ri tat Juan ri Qasal Ja' ri man wi'j taj, ri man kutij tä vino. Kixtzijon k'u chrij, kib'ij: Xa k'o jun itzelalaj espíritu che, —kixcha'. ³⁴ Xinpe k'u ri in, in ri' ri Ralk'ual ri Dios ri Qas Winag. Kinwi'k, kintij vino. Kixtzijon k'u chwij, kib'ij: Chiwilampe', are jun jiq'alaj achi, jun q'ab'arel ri kachi' toq'il taq alkaab'al xuquje' ajmakib', —kixcha chwe. ³⁵ Ri winaq k'ut ri kākā'n ronojel ruk' no'j, kākik'ut chqawäch chi qas utz ri' ri no'j ri kuya ri Dios, —xcha chke.

Ri Jesús káwi' ruk' jun tata' fariseo

³⁶ Jun chke ri tata'ib' fariseos xuta' toq'ob' che ri Jesús chi káwi' ruk'. Xok k'u b'i pa rachoch ri fariseo, xt'uuyi chi' ri mesa. ³⁷ Jun ixoq re b'e, ri kel pa ri tinimit, xuto chi tajin káwi' ri Jesús pa ri rachoch ri fariseo. Xe'k, xuk'am b'i jun k'olib'al kunab'al re alabas-tro nojinaq che k'ok'alaj kunab'al. ³⁸ Xk'o'ji k'u pa raqan ri Jesús, tajin koq'ik. Xuchaplej ki ja'xik ri raqan ruk' ri u wal u wäch, keusu' k'u che ru wi'. Xeutz'umaj ri raqan, xutix ri k'ok'alaj kunab'al chkij. ³⁹ Aretaq ri tata' fariseo ri xula'n ri Jesús xril ri xub'an ri ixoq, xchoman pa ranima', xub'ij: "We ta are q'alajisal re ru Loq' Pixab' ri Dios we achi ri', kuch'ob' ta ri Are' jachin ri ixoq ri'. Xuquje' kuch'ob' ta na jas u b'anik ri ixoq ri kächapow kog, chi are jun ixoq re b'e wa'," — xcha ri fariseo pa ranima'.

⁴⁰ Xch'aw ri Jesús, xub'ij che ri fariseo: Tat Simón, k'o ri kwaj kinb'ij na che la, —xcha'.

Xch'aw ri tat Simón, xub'ij che: Ajtij, b'ij b'a' la chwe, —xcha che.

⁴¹ Kub'ij k'u ri Jesús: E k'o kieb' winaq k'o ki k'as ruk' jun ya'l jalomal. Jun chke k'o jun ciento quetzales u k'as ruk' ri tata'. Ri jun chik xa lajuj quetzales u k'as, —käch'a'.

⁴² Rumal k'u rech chi man k'o tä ki rajil chutojik ri ki k'as, ri ya'l jalomal xub'ij chke chi utz la' we man kákitoj tä chik, —käch'a' ri chke. ¿Jachin k'u chke ri ajk'asib' ri qas loq' xril wi ri ya'l jalomal? —xcha ri Jesús.

⁴³ Xch'aw k'u ri tat Simón, xub'ij: Kin-chomaj in chi are ri jun ri nim na u k'as, ri man xutoj tä chik, —xcha'.

Xub'ij ri Jesús che: Utz u ch'ob'ik xb'an la, —käch'a che. ⁴⁴ Ri in xinok loq pa ri achoch la. Man xya tä la joron chwe che ki ch'ajik ri waqan. Ri ixoq ri' u ja'm ri waqan che ri u wal u wäch, xeusu' k'u che ru wi', —käch'a'. ⁴⁵ Man xintz'umaj tä la. Are k'u ri ixoq aretaq xinok loq, xuchap u b'anik wa' chwe, man u tänab'am tä ki tz'umaxik ri waqan. ⁴⁶ Man xya tä la aceite pa nu wi'. Ri are k'ut u yo'm k'ok'alaj kunab'al chkij ri waqan. ⁴⁷ Kinb'ij che la chi kesachtaj na ri k'alaj taq u mak rumal chi sib'alaj loq' kinrilo. Apachin k'ut ri kuna' pa ranima' chi man nim tä más ru mak ri kesachik, man loq' tä más ri Dios chuwäch, —xcha ri Jesús che.

⁴⁸ Xub'ij k'u che ri ixoq: Kesachtaj b'a' ra mak, —xcha che.

⁴⁹ Ri e k'o ruk' ri Jesús chi' ri mesa kákitz'job'ela kib', kákib'ij: ¿Jachin lo wa' we achi ri' ri kásachow mak? —xecha ri'.

⁵⁰ Xub'ij k'u ri Jesús che ri ixoq: Nan, a riqom ru tob'anik ri Dios rumal chi qas tzij katkojonik. Kuya' kate'k, chuxlan b'a' ri awanima', —xcha ri Jesús che.

8

Jujun ixoqib' ketob' ruk' ri Jesús

¹ Te k'u ri ri Jesús xusolij konojel ri tinimit xuquje' konojel ri nik'iaj k'olib'al ri e k'o wi winaq, xutzijoj ru Loq' Pixab' ri Dios chke. Kuya retamaxik ri Utzalaj Tzij re ri Evangelio chrij ru taqanik ri Dios pa ki wi' winaq. E k'o k'u ri kab'lajuj u taqo'n ruk'. ² E b'enaq ruk' xuquje' jujun ixoqib' ri e utzirisam chke itzelalaj taq espíritus xuquje' chke taq ri ki yab'. E are k'u wa': Ri nan Maria ri káb'ix Magdalena che. Esam k'u b'ik wuqub' itzelalaj taq espíritus che. ³ K'o ri nan Juana, rixoxil ri tat Chuza, ru mayor-domo ri tat Herodes. K'o k'u ri nan Susana, xuquje' k'ia ixoqib' chik ri xkikoj ri jastaq ke chuto'ik ri Qajaw Jesús.

Ri Jesús kuya tijonik chrij ri tikol ija'

⁴ Xkimulij k'u kib' k'ia winaq. Xeopan winaq ruk' ri Jesús ri xepe pa ronojel tinimit. Ri Are' xukoj jun k'utb'al chuya'ik tijonik chke, xub'ij: ⁵ Jun tikol ija' xel b'i cho ja, xe' k'u pa tikonijik. Aretaq xjopinik, xqaj jub'iq' ri ija' pa ri b'e, xtak'alexik. Xuquje' xeqaj loq ri chikop ajuwokaj, xkiti' b'i ri ija'. ⁶ Xqaj xuquje' jub'iq' ri ija' pa taq ab'aj. Xuchaplej k'iyem. Xchaq'jar k'ut rumal chi man k'o tä u raxil ri ulew. ⁷ Xqaj chi jub'iq' pa taq ri q'ayes ri k'o ki k'ixol. Xk'iy ri ija' junam ruk' ri q'ayes. Xjiq'isax k'u ri tiko'n rumal. ⁸ Xqaj chi jub'iq' pa utzalaj ulew, xeb'el k'u loq, xek'iyik. Xkiya jun ciento ki wäch chkiujunal chupam ru jolom triko, —xcha chke.

Aretaq ri Jesús xto'taj chutzijoxik wa', ko xch'awik, xub'ij: ¿Ri ix ri i jikib'am ri iwan-ima' chutatab'exik ri nu tzij, chitatab'ej b'a'! —xcha chke.

Ri Jesús kub'ij chke ru tijoxelab' jas ki patän ri k'utb'al ri kukojo

⁹ Ru tijoxelab' xkita' che ri Jesús, xkib'ij: ¿Jas kel kub'ij wa' we k'utb'al ri'? —xecha che. ¹⁰ Xch'aw chi ri Jesús, xub'ij chke: Yo'm chiwe ix ri retamaxik ri man ketam tä ri nik'iaj winaq chik chrij ri u taqanik ri Dios. Keinkoj k'u k'utb'al che ki tijoxik ri nik'iaj winaq chik rech pune keka'yik, je' ta ne chi man k'o tä kákilo, pune kákitatab'ej ri tzij, man kákich'ob' tä ri' ri ki tatab'em, —käch'a'.

Ri Jesús kutzijoj chke ru tijoxelab' jas kel kub'ij ri k'utb'al chrij ri tikol ija'

¹¹ Are k'u wa' ri kel kub'ij ri xintzijoj chiwe: Ri ija' are ru Tzij ri Dios. ¹² Ri ija' ri xeqaj pa ri b'e, e are junam jas ri winaq ri kákita ri Tzij. Kopan k'u ri Itzel, káresaj ri Tzij pa kanima' rech man kekojon taj, man kákiriq tä ru tob'anik ri Dios. ¹³ Ri ija' ri xqaj pa taq ab'aj, e are' junam jas ri winaq ri kákik'amowaj ri Tzij. Aretaq kákito, kekikotik. Man k'o tä k'u ri ki xera'. Xa

kieb' oxib' q'ij kākikojo. Aretaq k'ut kākichap u riqik k'āx, ketzelej kanoq, —kācha'. ¹⁴ Ri ija' ri xqaj pa taq ri q'ayes e are' junam jas ri winaq ri kākita ri Tzij. Te k'u ri' kākitaqej chi na jumul ri ki b'e. Sib'alaj ke' kanima' ruk' ri q'inomal ajuwächulew, ke' kanima' kuk' taq ri nimaq'ij, xuquje' ruk' ri ki chak. Kājiq'isax k'u ru Tzij ri Dios pa kanima', man kākia ta k'u ri ki wāchinik, —kācha'. ¹⁵ Ri ija' k'ut ri xqaj pa utzalaj ulew, kinjunamaj kuk' ri winaq ri utz kanima', ri kākā'n ronojel ruk' jikomal, kākijikib'a kanima' chrij ri Tzij ri xk-itatab'ej. Kākitaqej k'ut, sib'alaj kewāchinik, —xcha ri Jesús chke.

Man k'o tā jas ri k'u'talik ri mat kāq'alajin na

¹⁶ Xub'ij chi na ri Jesús: Man k'o tā jun winaq ri kutzij jun chāi o jun candela, te ri' kuch'uq wa' che jun laq. Man kuya tā k'u wa' chuxe' jun ch'at. Xane kuya wa' chikaj rech kilitaj ru saqil kumal ri winaq ri keb'ok b'i pa ja, —kācha'. ¹⁷ Ronojel ri k'u'talik kāq'alajin na. Ronojel ri ch'uq'tal u wi' kel na chi saq rech ketamaxik.

¹⁸ Qas chitatab'ej b'a' na ri kinb'ij, rumal chi apachin ri k'o k'o ruk' kāyi' na nik'iaj che. Apachin k'u ri man k'o tā k'o ruk', kesax na jas ri kuchomaj chi k'olik, —xcha chke.

Ri u nan xuquje' nik'iaj taq rachalal ri Jesús keopan ruk'

¹⁹ Xopan k'u ru nan ri Jesús, xuquje' taq ri u chaq', ri ranab'. Man kekowin tā k'ut keqeb' ruk' rumal kech ri l'alaj winaq. ²⁰ Xb'ix k'u wa' che ri Jesús: Ri nan la xuquje' ri achalal la e tak'atoj cho ja. Käch'ab'ex la kumal, —xecha che.

²¹ Xch'aw ri Jesús, xub'ij chke: Ri winaq ri kākitaq'ej ru Tzij ri Dios, kākā'n k'u ri kub'ij, e are' nu nan wa', xuquje' e are' wa' ri qas wachalal, —xcha chke.

Ri Jesús kub'ano chi kātāni ri kiāqiq'

²² Pa jun q'ij xok ri Jesús pa jun barco, e rachi'lam k'u ru tijoxelab'. Xub'ij ri Jesús chke: Chujq'ax jela' ch'āqap che ri mar, —xcha chke.

Xeb'e' k'ut. ²³ E b'enaq puwi' ri mar, xwar ri Jesús. Xpe k'u jun nimalaj kiāqiq' ri sib'alaj k'āx puwi' ri mar. Ri barco tajin kānoj che ja', je ri' chi xaq kieb' kub'ij pa ki wi'. ²⁴ Xeb'e' ri tijoxelab' ruk' ri Jesús, xkik'asuj. Xkib'ij che: ¡Qajtij, Qajtij, tajin kujkāmik! —xecha che.

Xk'astaj k'u ri Jesús, xuyaj ri kiāqiq' xuquje' ri nimaq taq uwoja'. Xtāni k'u ri kiāqiq', xillob' u wi' ri ja'. ²⁵ Xub'ij ri Jesús chke ru tijoxelab': ¿Jas che man kixkojon taj? —xcha chke.

Xkixej kib', xkikajmaj ri xub'ano, kākib'ila k'u chb'il kib': ¿jachin lo wa' ri k'o u taqanik puwi' ri kiāqiq' xuquje' ri ja' je ri' chi keni-man che? —xcha ri'.

Ru kunaxik jun aj Gadara ri e k'o itzelalaj taq espíritus che

²⁶ Xeopan k'u pa ri tinimit Gadara, ri k'o apan chuwach' ri Galilea chuchi' ri mar. ²⁷ Aretaq ri Jesús xel loq pa ri barco, xriq-taj rumal jun achi re ri tinimit. Tzk'ia junab' chik e k'o itzelalaj taq espíritus che ri achi. Man kukoj tā chi ratz'iaq. Man kājeqi tā cho rachoch, xane chkixol ri muqub'al kāk'oji wi we achi ri'. ²⁸ Aretaq xril apan ri Jesús, xuraq u chi', xutzaq rib' chuwach'. Ko xch'awik, xub'ij k'u che ri Jesús: ¿Jas kaj la chwe, tat Jesús? Lal ri' ri u K'ojol ri Nimalaj Dios aj Chikaj, —kācha che. ¡B'ana b'a' la toq'ob', mab'an la k'āx chwe! —xcha che ri Jesús.

²⁹ Xub'ij wa' rumal chi ri Jesús tajin kātajan che ri itzelalaj espíritus chi kel b'i che ri achi. Tzk'ia junab' k'o u taqanik ri itzelalaj espíritus puwi' ri achi. Pune kächajixik, kāxim k'u kuk' ximib'al re ch'ich', xuquje' chapb'al aqanaj, ri achi xa keut'oqopij wa', kel b'ik. Ri itzelalaj espíritus kāresaj b'i ri achi, kuk'am b'i pa taq juyub' ri ketz'inowik. ³⁰ Xuta' ri Jesús che, xub'ij: ¿Jas ri a b'i? —xcha che.

Xub'ij che ri Jesús: Ri nu b'i' are K'iyal, —xcha'.

Xub'ij wa' rumal chi sib'alaj e k'ia ri itzelalaj taq espíritus ri e okinaq che ri achi. ³¹ Ri itzelalaj taq espíritus xkib'ochi' ri Jesús chi meutaq b'i pa ri q'equmalaj jul. ³² E k'ia k'u ri aq ri tajin keyuq'ux apan pa ri juyub'. Xkib'ochi' chi chuya chke chi keb'ok chke ri aq. Je'ey, —xcha ri Jesús chke. ³³ Xeb'el k'u b'i ri itzelalaj taq espíritus che ri achi, xeb'ok chke taq ri aq. Konojel ri aq junam xkik'iaq b'i kib' chutza'm ri juyub', xetzaq b'i pa ri mar, xejij'ik.

³⁴ Aretaq ri ajuuq'ab' xkil ri xb'antajik, xeanimajik, xeb'e'k. Xkiya u tzijol wa' chke ri winaq pa ri tinimit, xuquje' pa taq ri juyub'. ³⁵ Xeb'el loq ri winaq che rilik ri xb'antajik. Xeopan ruk' ri Jesús. Xkiriq k'u ri achi ri xeb'el wi ri itzelalaj taq espíritus, kojom chi ri ratz'iaq, man ch'uj tā chik. T'uyl k'u ri are' chuwach' ri Jesús. Xkixej k'u kib' ri winaq. ³⁶ Ri winaq ri xelilow wa' ri xb'anik xkitzijoj wa' chke ri jule' winaq chik jas ri rutzirisaxik ri achi ri xek'oji na k'ia itzelalaj taq espíritus che. ³⁷ Te k'u ri' konojel ri winaq ri e jeqel wi jela' chrij ri tinimit Gadara, xkib'ochi' ri Jesús chi chel b'ik kuk' rumal chi sib'alaj xkixej kib'. Xok chi b'i ri Jesús pa ri barco, xtzelejik. ³⁸ Ri achi ri xeb'el wi ri itzelalaj taq espíritus sib'alaj xub'ochi' ri Jesús chi kuya che chi ke' ruk'. Ri Jesús xutaq b'i cho rachoch, xub'ij che: ³⁹ Chattzelej b'i cho awachoch, cheatzijoj konojel ri nimaq taq utzil ri u b'anom ri Dios chawe, —xcha che.

Xe' k'u ri achi, xuchap ki tzijoxik chke konojel ri winaq re ri u tinimit ri nimaq taq utzil ri u b'anom ri Jesús che.

Waral kâqil wi ri xub'an ri u mia'l ri tat Jairo xuquje' ri ixoq ri xuchap koq ri ratz'iaq ri Jesús

⁴⁰ Aretaq xtzelej b'i ri Jesús, e k'o k'ia winaq ri xlek'ulanog, xekikotik. Konojel keye'm ru tzelejik. ⁴¹ Xopan k'u jun achi ruk' ri Jesús, tat Jairo u b'i ri achi ri'. Are ki nimal ri winaq wa' pa ri rachoch Dios. Xupach b'a' rib' cho ri Jesús, xub'ochi'j chi kohan cho rachoch. ⁴² Xa jun chi u mia'l ri achi ri', kraj kab'lajuj u junab'. Kämik k'u kub'ano. Xe' ri Jesús ruk'. B'enaq k'u pa ri b'e, sib'alaj kâpitz' kumal ri k'alaj winaq.

⁴³ K'o k'u jun ixoq ri u riqom k'äx kab'lajuj junab' rumal ru kik'el ri xa kelik, man kätäni tä che. U sachom k'u ronojel ru rajil kuk' kunanelab'. Man k'o tä jun ri kowininaq che rutzirisaxik. ⁴⁴ Xqeb' k'u chrij ri Jesús, xuchap koq ru chi' ru q'u'. Chanim k'ut xtäni ru kik'el ri kelik.

⁴⁵ Xub'ij k'u ri Jesús: ¿Jachin ri' ri xinchapowik? —xcha'.

Konojel ri winaq xkib'ij chkijujunal: Man in tä ri', —xecha che. Xub'ij k'u ri tat Pedro xuquje' ri e k'o ruk': Qajtij, ja mat kil la chi e k'ia ri winaq ri e k'o chi'j la? Kâpitz' b'a' la kumal konojel. ¿Jas che kâb'ij la: “¿Jachin ri' ri xinchapowik?” —kächa la, —xcha ri tat Pedro che.

⁴⁶ Xub'ij k'u ri Jesús che: K'o jun winaq ri xinchapowik. Xinna' chi xel jub'iq' ri nu chuq'ab' chukunaxik jun winaq, —xcha chke.

⁴⁷ Aretaq ri ixoq xrilo chi man xk'u'taj taj, xqeb' ruk' ri Jesús, kâb'irb'itik. Xxuki chuwach. Xuq'alajisaj chkiwach konojel ri winaq jas che xuchap koq ri Jesús, xuquje' ri xk'unatajik. ⁴⁸ Xub'ij ri Jesús che: Nan, xkunataj la rumal chi käkojon la chwe, —kächa'. Kuya' ke' la, chuxlan b'a' anima' la, —xcha ri Jesús che.

⁴⁹ K'ä tajin kätzizon na ri Jesús, aretaq xopan jun ajuworachoch ri ki nimal ri winaq re ri rachoch Dios. Xub'ij che ri tat Jairo: Xkäm ri mia'l la, —kächa che. Xaq mäya chi la latz' che ri Ajtij, —xcha che.

⁵⁰ Aretaq ri Jesús xuta ri xb'ixik, xch'awik, xub'ij che ri tat Jairo: Mäxej ib' la, —kächa'. Xane konojon la chwe. Kutzir k'u na ri ali, —xcha che.

⁵¹ Aretaq xopan cho rachoch ri tat Jairo, man xraj tä ri Jesús chi k'o jachin kok b'i ruk', xaq xuwi ri tat Pedro, ri tat Juan, ri tat Jacobo, xuquje' ru nan tat ri ali. ⁵² Konojel ri e k'o chila' tajin keb'oq'ik, käkik'is kib' che oq'ej. Xub'ij ri Jesús chke: Man koq' tä chi alaq. Man käminaq tä ri ali, xane xaq käwarik, —xcha chke.

⁵³ Ri winaq k'ut xa käketze'j u wäch ri Jesús rumal chi ketam chi käminaq chi ri ali. ⁵⁴ Ri Jesús xuchap ri ali che ru q'ab', ko xch'awik, xub'ij: Ali, chatwalijog, —xcha che.

⁵⁵ Xtzelej k'u loq ri ranima'. Chanim xwal-ijik. Xtaqan k'u ri Jesús chke chi chkiya che ri kutijo. ⁵⁶ Xkikajmaj wa' ru tat u nan. Ri Jesús xeupixb'aj chi k'o mäkib'ij wi wa' ri xb'antajik.

9

Ri Jesús keutaq b'i ri kab'lajuj u tijoxelab' chutzijoxik ri Utzalaj Tzij re ri Evangelio, xuquje' che kunanik

¹ Ri Jesús xeusik'ij ri kab'lajuj u tijoxelab' ruk'. Xuya chke chi käk'o'ji ki taqanik pa ki wi' konojel ri itzelalaj taq espíritu rech kekesaj b'i chke ri winaq. Xuquje' xuya chke chi kekikunaj ri yawab'ib'. ² Xeutag b'ik chutzijoxik ru Loq' Pixab' ri Dios chrij ru taqanik ri Dios pa ki wi' ri winaq. Xeutag b'i xuquje' che ki kunaxik ri yawab'ib'. ³ Xub'ij ri Jesús chke: K'o mik'am b'ik che ri b'e. Mik'am b'i i ch'imiy, i chim, i wa, o ri i rajil. Xa jun iwatz'iaq chijujunal kik'am b'ik, —kächa chke. ⁴ Apachike ja ri kixok wi, chixkanaj kan chila' k'ä kitaqej chi na b'i jumul ri i b'e. ⁵ We k'o jun tinimit ri man kixk'ulax tä wi, chixel b'i chila', chitota' kan ri ulew ri k'o chke ri iwaqan chuq'alajisaxik chki' ri winaq re ri tinimit ri' chi man utz tä ri käka'no, k'o ki mak, —xcha chke.

⁶ Xeb'e' k'ut, xeb'e' pa taq konojel ri alaj taq tinimit. Xkitzijo' ri Utzalaj Tzij re ri Evangelio, xuquje' xka'n kunanik pa taq konojel ri tinimit.

Käkämiasax ri Juan Qasal Ja'

⁷ Ri nim taqanel Herodes xretamaj ronojel ri tajin kub'an ri Jesús. Man kuriq taj jas kub'ano rumal chi e k'o jujun käkib'ij chrij ri Jesús: Xk'astaj loq ri tat Juan Qasal Ja' chkirol ri käminaqib', —kecha'. ⁸ Xuquje' e k'o jule' chik käkib'ij chrij ri Jesús: Ri Elías, q'alajisal re ru Loq' Pixab' ri Dios ojer u k'utum rib' chqawäch, —kecha'. Käkib'ij k'u jujun winaq chik: Jun chik chke ri ojer taq q'alajisal taq re ru Loq' Pixab' ri Dios xk'astaj loq chkirol ri käminaqib', —xecha ri'. ⁹ Xub'ij k'u ri tat Herodes: In xintaqan che resaxik u jolom ri tat Juan. ¿Jachin ta k'u lo ri' ri je' taq wa' nu tom chrij? —xcha'.

Kutzukuj k'u rilik u wäch ri Jesús.

Ri Jesús kuya ki wajob' mil winaq

¹⁰ Aretaq xetzelej loq ri u taqo'n ri Jesús, xkib'ij che ri Are' ronojel ri ki b'anom. Ri Jesús xeuk'am b'ik, xeb'e' k'u ki tukiel wi pa jun tinimit, Betsaida u b'i'. ¹¹ Aretaq xketamaj ri winaq chi xel b'i ri Jesús, xeteri b'i chrij. Xeuk'ulaj k'u ri Jesús, xeutzijob'ej chrij ru taqanik ri Dios pa ki wi' ri winaq, xuquje' xeukunaj ri yawab'ib'.

¹² Qajem k'u kub'an ri q'ij, xegeb' ri kab'lajuj u tijoxelab' ruk' ri Jesús, xkib'ij che: Chetaqa la b'i ri winaq rech kebe'e pa taq ri tinimit, xuquje' cho taq ri kachoch ri winaq ri e k'o chunaqaj ri tinimit, che roqxanexik kib' churiq'ik ri kákitijo. Uj k'o k'u waral pa taq juyub' ri kätz'inowik, — xecha che.

¹³ Xub'ij ri Jesús chke: Chiya ix ri kákitijo, — xcha chke.

Xkib'ij k'u ru tijoxelab' che: Man k'o tä k'o quk' xane xa job' kaxlan wa kuk' kieb' kâr. ¿A kuje' ta k'u lo chuloq'ik ri ki wa konojel we winaq ri'? — xecha che.

¹⁴ Kraj k'u e k'o job' mil achijab'. Xub'ij ri Jesús chke ru tijoxelab': Chib'ij chke ri winaq chi keku'b'i pa taq mulaj re nik'iaj taq ciento, — xcha chke.

¹⁵ Je' xka'no, xeku'b'i k'u konojel ri winaq. ¹⁶ Ri Jesús xeuk'am ri job' wa kuk' ri kieb' kâr, xka'y k'u chikaj, xeutewchij. Te ri' xe-upiro, xeuya chke ru tijoxelab' rech kákijach wa' chkiwäch ri winaq. ¹⁷ Konojel xewi'k, xenojik. Xkimulij k'u ri ch'áqataq wa. Are kab'lajuj chikäch ri xek'oltajik.

Ri tat Pedro kuq'alajisaj chi ri Jesús are ri Cristo

¹⁸ Pa jun q'ij ri Jesús tajin kub'an orar. E k'o ru tijoxelab' ruk' pa ki tukiel wi. Ri Jesús xuchap u ta'ik chke, xub'ij: ¿Jas kákib'ij ri winaq chi jachin ri' ri in? — xcha chke.

¹⁹ Xech'awik, xkib'ij che: E k'o jujun kákib'ij chi lal ri' ri tat Juan Qasal Ja'. Jule' chik kákib'ij chi lal ri' ri Elías, q'alajisal re ru Loq' Pixab' ri Dios ojer. E k'o chi nik'iaj kákib'ij chi lal jun chik chke ri ojer taq q'alajisal taq re ru Loq' Pixab' ri Dios ri xk'astaj loq chkixol ri káminaqib', — xecha che.

²⁰ Xub'ij k'u ri Jesús chke: ¿Jas k'u kib'ij ix chi jachin ri in? — xcha chke.

Ri tat Pedro xch'awik, xub'ij: Lal ri' ri Cristo ri taqom la loq rumal ri Dios, — xcha che.

Ri Jesús kutzijoj chi kákäm na

²¹ Ri Jesús sib'alaj xeupixb'aj ru tijoxelab' chi k'o mäkib'ij wi wa' chi are ri Cristo.

²² Xub'ij chke: Rajwaxik chi ri in, in ri' ri Ralk'ual ri Dios ri Qas Winaq, kinriq na sib'alaj k'äx, kinxutux na kumal ri nimaq taq tata'ib', kumal ri ki nimaqil sacerdots aj Israel xuquje' kumal ri tijonelab' re ri Pixab', — kächä'. Xuquje' rajwaxik chi kinkämisax na. Te k'u ri' kink'astaj chi k'u na churox q'ij chkixol ri káminaqib', — xcha chke.

²³ Xub'ij k'u ri Jesús chke konojel: We k'o jun kraj käpe wuk' in, rajwaxik chi mub'an xa jas ru rayinik ri are'. Rajwaxik chi kutelej loq ru cruz ronojel q'ij, chpet wuk' in. ²⁴ Apachin ta ne ri nim kril wi ru

k'aslemal cho ru wächulew, käsach na u wäch wa'. Apachin ta ne ri kuya na ru k'aslemal rumal wech in, kák'oji na u k'aslemal ri man k'o tä u k'isik, — kächä chke. ²⁵ ¿Jas lo ri utzil kuriq jun winaq we kärechb'ej konojel ri jastaq ajuwächulew, kuya k'u ri ranima' che tojb'al ke, käsach k'u u wäch we winaq ri'? — kächä chke. ²⁶ Apachike winaq ri xa kák'ix chwe in, xuquje' che ri nu tzij, in ri' ri Ralk'ual ri Dios ri Qas Winaq, kink'ix na xuquje' che ri winaq ri' aretaq kintzelej loq ruk' nimalaj chuq'ab' jas ru petik jun nim taqanel. Känimarisax na nu q'ij pa ri q'ij ri' junam jas ru nimarisaxik u q'ij ri nu Tat xuquje' ri loq'alaj taq ángeles, — kächä'. ²⁷ Are gas tzij ri kinb'ij in chiwe chi e k'o jujun chke ri e k'o waral chnuwäch ri man kekäm tä na k'ä kákil na ru taqanik ri Dios pa ki wi' ri winaq, — xcha chke.

Käk'extaj ru ka'yeb'al ri Jesús

²⁸ Kraj xke' wajxaqib' q'ij u b'im chi kan wa' ri Jesús, te k'u ri' xeuk'am b'i ri tat Pedro, ri tat Juan xuquje' ri tat Jacobo, xepaqi k'u puwi' ri juyub' chub'anik orar. ²⁹ Aretaq tajin kub'an orar, xk'extaj ru ka'yeb'al ri Jesús. Sib'alaj xjuluw ri ratz'iaq, sib'alaj saqlolox xub'ano je' jas ri saq tew. ³⁰ Tzakajmab'al chik, e k'o k'u kieb' achijab' xetak'tob'ik, tajin ketzijon ruk' ri Jesús, e are ri mam Moisés rachi' ri mam Elías. ³¹ Sib'alaj je'l ru juluwem ki wäch. Käkitzijob'ej k'u ri Jesús chrij ri relik b'ik cho ru wächulew, are la' ru kämikal ri kuriq na pa Jerusalén. ³² Pune ri tat Pedro xuquje' ri e k'o ruk' sib'alaj k'äx ki waram, man xewar taj. Xkilo chi sib'alaj je'l ru juluwem ru wäch ri Jesús xuquje' ri ki wäch ri kieb' achijab' ri e k'o ruk'. ³³ Elem kaka'n b'i ri achijab', xub'ij ri tat Pedro che ri Jesús: Qajtij, isib'alaj utz chi uj kujk'oji na waral! Qa'na oxib' káb'al, jun che la, jun che ri qa mam Moisés, xuquje' jun che ri qa mam Elías, — xcha che.

Je' xub'ij wa' ri tat Pedro rumal chi man kuriq taj jas kub'ij. ³⁴ Je' tajin kub'ij wa' aretaq xqaj jun sutz' chkiq, xech'uqtaj k'ut. Xkixej kib' ri tijoxelab' aretaq ri sutz' xeuch'uqu. ³⁵ Xch'aw k'u loq jun chupam ri sutz', xub'ij: ¡Are loq'alaj nu K'ojol wa'! Chitatab'ej ri kub'ij, — xcha'.

³⁶ Aretaq xtäni ri ch'awem, xkanaj kan ri Jesús u tukiel. Man xech'aw tä chi k'u ru tijoxelab'. Xuquje' pa taq ri q'ij ri' man xkitzijoj tä che jachin jun winaq ri xkilo.

Ri Jesús kárutzirisaj jun ala ri k'o jun itzelalaj espíritu che

³⁷ Chukab' q'ij aretaq xeqaj loq puwi' ri juyub', e k'o k'ia winaq ri xeb'el loq churiq'ik ri Jesús. ³⁸ K'o k'u jun achi kuk' ri winaq, ko xch'awik, xub'ij: Qajtij, b'ana la toq'ob' chwe, — xcha'. Chilampe la ri nu k'ojol xa jun chi ala ri k'o wuk'. ³⁹ Amaq'el kächap

rumal jun itzelalaj espíritu. Kuraq u chi' ri ala. Ri itzelalaj espíritu kub'aq'atila', kupuluwisaj u pu chi', xuquje' kutota', —kácha'. Tzman kraj taj kel che ri ala, —xcha ri tata'.⁴⁰ Xeimb'ochi'j ri tijoxelab' la che resaxik ri itzelalaj espíritu, man xekowin tá k'u che, —xcha'.

⁴¹ Xch'aw ri Jesús, xub'ij: ¡Ay, winaq! Man alaq nimanlab' taq winaq taj, tzman kákojon tá alaq, —xcha chke. ¿A are kaj alaq chi xaq kink'o'ji in uk' alaq ronojel q'ij che to'ik alaq? Xke' k'ia ri q'ij nu kuyum ri mak alaq, —xcha chke. Xub'ij k'u che ri achi: K'ama la loq ri k'ojol la, —xcha che.

⁴² Aretaq tajin káqeb' ri ala ruk' ri Jesús, ri itzelalaj espíritu xuk'iaq pulew, xub'aq'atila'. Ri Jesús xuyaj ri itzelalaj espíritu, xrutzirisaj ri ala. Xujach b'ik che ru tat. ⁴³ Konojel ri winaq xkikajmaj ri nimalaj u chuq'ab' ri Dios.

Ri Jesús kutzijoj chi na jumul chi kákämik

Ri winaq sib'alaj tajin kákikajmaj ri xub'ano, xch'aw chi ri Jesús, xub'ij chke ru tijoxelab': ⁴⁴ Chikajo retal wa' ri kink'ij chiwe, —kácha chke. ¡Ri in, in ri' ri Ralk'ual ri Dios ri Qas Winag, kinjach na b'i pa ki q'ab' ri winaq! —xcha'.

⁴⁵ Man xkich'ob' tá k'u ru tijoxelab' jas ri xub'ij chke. Man xyl' tá chke chi kákich'ob' we tzij ri'. Xkixej k'u kib' chuta'ik che jas kel kub'ij wa' ri xub'ij chke.

Ri tijoxelab' kákichomala kib' chrij jachin chke are nim na u b'anik

⁴⁶ Te k'u ri' ri tijoxelab' xkichap u chomaxik kib' chrij jachin chke are ri nim na u b'anik chkixol. ⁴⁷ Aretaq ri Jesús xretamaj ri xkichomaj pa kanima', xuk'am apan jun ak'al, xutak'ab'a ruk'. ⁴⁸ Xub'ij k'u ri Jesús chke: Apachin jun winaq ri qas kák'amow we ak'al ri' rumal wech in, in ri' kinuk'amo xuquje'. Apachin k'u ri kink'amow in, kuk'am ri' xuquje' ri xintaqow loq. Apachin k'u chiwe ri man nim tá u b'anik, tzare wa' ri nim na kinwil in, —xcha chke.

Apachin jun winaq ri man kub'an tá u k'ulel chqe, are ri' kujuto' na

⁴⁹ Xub'ij k'u ri tat Juan che ri Jesús: Qajtij, qilom jun ri keresaj itzelalaj taq espíritus pa ri b'i' la. Xqaq'il k'u kanoq rumal chi man are tá jun quk', —xcha che.

⁵⁰ Xub'ij ri Jesús che: ¡Miq'ila chik! —xcha'. Apachin jun winaq ri man kub'an tá u k'ulel chqe, kujuto' na ri', —xcha chke.

Ri Jesús keuyaj ri tat Jacobo, ri tat Juan

⁵¹ Xqetet k'u loq ri q'ij re ru k'amik b'i ri Jesús chikaj, xujikib'a k'u ri ranima' che ru b'inem pa ri tinimit Jerusalén. ⁵² Ri Jesús xeutaq b'i u taqo'n rech kenab'ej b'i chuwäch pa ri b'e. Xeb'e' k'ut, xeopan pa

jun alaj tinimit re Samaria, xkitzujukuj jawije' ri káwar wi ri Are', xuquje' ri káwi' wi chila'. ⁵³ Ri winaq ajchila' man xkik'ulaj tá k'ut, rumal chi xkilo chi b'enam re ri Jesús pa Jerusalén. ⁵⁴ Aretaq ri tijoxelab', ri tat Jacobo, ri tat Juan xkil wa' jas ri xkib'an ri ajtinimit, xkib'ij: Qajaw, ¿a kaj la chi kujtaqan chuqasaxik q'aq' chikaj rech kák'is ki wäch we winaq ri', je' jas xub'an ri Elías, ri q'alajisal re ru Loq' Pixab' ri Dios ojer? —xecha che.

⁵⁵ Xutzolq'omij rib' ri Jesús, xeuyajo, xub'ij chke: ¿A xa man kich'ob' taj chi are ri Loq'alaj Espíritu rech ri Dios ri kátaqan pi wi'? Man are tá k'u ru rayinik ri Are' chi je' kib'an wa'. ⁵⁶ Ri in k'ut, in ri' ri Ralk'ual ri Dios ri Qas Winag, man xinpe tá chusachik ki wäch ri winaq, xane che ki to'ik, —xcha chke.

Xeb'e' k'u pa jun alaj tinimit chik.

Ri Jesús keupixb'aj oxib' winaq ri kákaj keb'ok che u tijoxelab' ri Are'

⁵⁷ E b'enaq k'u pa ri b'e, k'o jun achi xub'ij che ri Jesús: Qajaw, kine' uk' la apawije' ta ne ri ke' wi la, —xcha che.

⁵⁸ Xub'ij ri Jesús che: Ri yak e k'o taq ri ki jul, xuquje' e k'o ri ki sok ri chikop ajuwokaj. Are k'u ri in, in ri' ri Ralk'ual ri Dios ri Qas Winag, man k'o tá jawije' kinwar wi, —xcha'.

⁵⁹ Xub'ij ri Jesús che ri jun chik: Sa'j wuk', —xcha che.

Xub'ij ri are': Qajaw, ya la chwe chi nab'e kine'k, kinmuq na kan ri nu tat aretaq kákämik, —xcha che.

⁶⁰ Xch'aw chi ri Jesús, xub'ij che: Cheaya kan ri káminaqib' pa ri ki mak chekimuqu ri ki káminaq. Ri at k'ut, jatzijoj ru Loq' Pixab' ri Dios chrij ru taqanik ri Dios pa ki wi' ri winaq, —xcha ri Jesús che.

⁶¹ Jun achi chik xub'ij: Qajaw, kine' na uk' la, —kácha'. Nab'e k'ut ya la chwe chi kine'k, keinch'ab'ej na kan ri ajuwowachoch, —xcha che.

⁶² Xub'ij ri Jesús che: Jun winaq ri kuchap u b'anik taji'n, we kusaq'orij ru chak, man kuk'is taj, man k'o tá u patän wa'. Xuquje' jun winaq ri kraj kok che tijoxel we, ri xa kub'an kieb' ranima', man k'o tá k'u u patän wa' che ri Dios pa ru taqanik pa ki wi' ri winaq, —xcha chke.

10

Oxk'al lajuj u tijoxelab' ri Jesús ketaq b'ik

¹ Te k'u ri' ri Jesús xeucha' oxk'al lajuj u tijoxelab' chik. Pa kakab'il xeutaq b'ik rech kenab'ej b'i chuwäch. Xeb'e' k'u pa ronojel tinimit, xuquje' jawije' chi' ri rajwaxik ke' wi na ri Jesús. ² Xub'ij ri Jesús chke: Qas nim ri jach', xa k'u e kieb' oxib' ri ajchakib'. Chib'ochi'j b'a' ri Rajaw ri jach' chi cheutaqa

b'i ajchakib' pa ru jach', —kächä chke. ³ jix b'a! Kixintaq b'ik je' ta ne chi ri ix, ix alaj taq chij chixol ri utiw. ⁴ Miwuk'aj b'i i bolsä che ri i rajil. Mik'am b'i ri i chim, mik'am k'u b'i ri i xajäb'. Mixtak'i che tzij pa taq ri b'e rech man kixb'eytaj taj. ⁵ Apachike ja ri kixok wi, chib'ij nab'e: Chuxlan b'a' kanima' ri winaq ri e k'o pa we ja ri', —kixcha chke. ⁶ We k'o jachin jun winaq cho ri ja ri' ri qas kraj chi kuxlan ranima', kuk'amowaj na wa' ri i tzij re tewchib'al, kuxlan k'u na ranima'. Are k'u we man k'olik, man kakanaj tä kan ri tewchib'al pa ki wi' ri winaq re ri ja ri'. ⁷ Chixkanaj kan pa ri jun ja ri'. Xaq mixb'in chi' taq ja. Kitij na ri käyi' chiwäch, rumal chi ya'tal che ri ajchak chi kuk'am ri tojb'al re ru chak, —kächä chke. ⁸ Apachike tinimit ri kixopan wi, we kixkik'ulaj, chitija ri käkiya chiwäch. ⁹ Chikunaj ri yawab'ib' ri e k'olik, chib'ij k'u chke: "Naqaj ix k'o wi che ru taqanik ri Dios pa ki wi' ri winaq," —kixcha chke. ¹⁰ Apachike tinimit ri kixopan wi, ri man kixkik'ulaj tä wi ri winaq, chib'ij kan wa' chke aretaq kixel b'ik: ¹¹ "Xuquje' ne ri ulew re ri tinimit alaq ri nak'al chke ri qačan, kăqatota' na kan che q'alajisab'al chij alaq chi man utz tä ri kăb'an alaq. Chich'ob'o b'a' chi naqaj chech alaq k'o wi ru taqanik ri Dios pa ki wi' ri winaq," —kixcha chke. ¹² Kinb'ij k'u chiwe chi pa ri q'ij ri käpetik, ri kuq'at na tzij ri Dios, kătan na ri' ri k'ăjisab'al u wäch ri tinimit Sodoma* chuwäch ri k'ăjisab'al u wäch ri tinimit ri', —xcha ri Jesús.

Waral kătzijox wi ri kăka'n ri winaq ri man keniman taj

¹³ jK'ăx iwe, winaq re ri tinimit Corazín! jK'ăx iwe, winaq re ri tinimit Betsaida! We ta xeb'an ri kajmab'al ri' pa ri tinimit Tiro, pa ri tinimit Sidón, jas ri xeb'antaj iwuk' ix, k'extajinaq ta chi na ri kanima' ri winaq jela', ki kojom ta chi katz'iaq ri kuq'alajisaj chi keb'isonik. Xuquje' k'o ta b'anom wi ri kuq'alajisaj chi are ri ki mak ri keb'ison che, —kächä'. ¹⁴ Rumal ri' kătan na ri k'ăjisab'al ki wäch ri winaq aj Tiro, aj Sidón chuwäch ri k'ăjisab'al u wäch ix aretaq kăq'at na tzij pi wi'. ¹⁵ Ri ix k'ut, winaq re ri tinimit Capernaum, ri sib'alaj xinimarisaj iwib', k'ă pa ri q'aq' kixqasax wi na, —xcha chke.

¹⁶ Xch'aw chi ri Jesús, xub'ij: Apachike winaq ri kutatab'ej ri i tzij ix, in ri' ri kinutatab'ej. Apachin ri man nim tä kixrilo, in ri' ri man nim tä kinril wi xuquje'. Apachin k'u ri man nim tä kinrilo, man nim tä kăril wi ri' ri xintaqow loq, —xcha chke ru tijoxelab'.

Ketzelej loq ri oxk'al lajuj tijoxelab'

¹⁷ Ruk' kikitom k'ut xetzelej loq ri oxk'al lajuj tijoxelab' ruk' ri Jesús, xkib'ij: Qajaw,

xuquje' ri itzelalaj taq espíritus keniman chqe aretaq kăqakoj ri b'i' la, —xecha che.

¹⁸ Xub'ij ri Jesús chke: Ri in xinwil ri xub'an ri Satanás, aretaq xtzaq loq chikaj jas kub'an ri kaypa'. ¹⁹ Ri in nu yo'm ri i chuq'ab' rech kixkowinik kitak'alej taq kumătz xuquje' taq ixterix. Nu yo'm xuquje' ri i chuq'ab' chrij ronojel ri kub'an ri qa K'ulel, rech kixch'akan na puwi', man k'o tä k'u jas jun k'ăx ri kăkowin chub'anik chiwe ix, —kächä'. ²⁰ Mixkikot b'a' rumal chi ri itzel taq espíritus keniman chiwe, xane are chixkikot na rumal chi e tz'ib'am ri i b'i' chikaj, —xcha chke.

Kăkikot ri ranima' ri Jesús

²¹ Qas pa ri hora ri' sib'alaj xkikot ri Jesús rumal ri Loq'alaj Espiritu, xub'ij: Maltiox che la, Tat, lal Rajaw ri kajulew, chi xb'an la chi ri ajno'jab', xuquje' ri k'o ketamb'al man kăkich'ob' tä wa' we tzij ri'. Xane xek'ut la chkiwäch winaq ri man k'o tä ketamb'al je' ta ne e are' alaj taq ak'alab'. Je', Tat, je ri' ri utzalaj rayinik la, —xcha ri Jesús che.

²² Xub'ij xuquje': Ronojel ri k'olik are jachom chwe in rumal ri nu Tat. Man k'o tä jun ri qas retam jachin ri' ri u K'ojol ri Dios. Xaq xuwi ri qa Tat retam. Man k'o tä k'u jun ri qas retam jachin ri' ri Dios qa Tat, xane xaq xuwi ri u K'ojol. Apachin k'u chuwäch ri kraj ri u K'ojol ri Dios kuk'ut wi wa', xuquje' ri winaq ri' retam jachin ri' ri Dios qa Tat, —xcha ri Jesús.

²³ Ri Jesús xutzolq'omij rib' kuk' ru tijoxelab', xub'ij chke pa ki tukiel wi: Utz ke ri winaq ri kăkil ronojel wa' ri tajin kiwil ix, —kächä'. ²⁴ Je' kinb'ij chiwe chi e k'o k'ia chke ri ojer taq q'alajisal re ru Loq' Pixab' ri Dios, xuquje' nimaq taq taqanelab' ri xkirayij ri rilik jas ri kiwil ix, man xkil tä k'ut. Xkirayij u tatab'exik jas ri kitatab'ej ix, man xkita tä k'ut, —xcha ri Jesús chke.

Ri xb'an rumal ri utzalaj tata' aj Samaria

²⁵ Xtak'i k'u aq'an jun tijonel re ri Pixab' che resaxik u pu chi' ri Jesús, xuta' che, xub'ij: Ajtij, ŷas k'u kinb'an in rech kinriq na ri k'aslemal ri man k'o tä u k'isik? —xcha che.

²⁶ Xub'ij ri Jesús che: ŷas ri' ri tz'ib'am pa ri Pixab'? ŷas pu ri kăsik'ij la u wäch? —xcha'.

²⁷ Xch'aw chi ri tijonel re ri Pixab', xub'ij: "Sib'alaj chiwaj ri i Dios ri Iwajaw, chijikib'a ri i k'ux, chijikib'a ri iwanima' chrij, chikojo ri i chomanik, chitija k'u i chuq'ab' chub'anik wa'," —kächä'. "Chiwaj k'u ri iwach winaq jas ri ix kiwaj iwib'," —kächä ri Loq' Pixab', —xcha ri tata'.

* 10:12 Ri kieb' tzij "Sodoma" y "Gomorra" keriqtaj pa ri Diccionario, k'isb'al re we Nuevo Testamento.

²⁸ Xub'ij ri Jesús che ri tata': Qas tzij ri b'im la. B'ana b'a' la wa', k'o k'u na ri k'aslemal la, —xcha che.

²⁹ Are k'u ri tata' kraj kuq'alajisaj rib' chi jikom ranima', xub'ij k'u che ri Jesús: ¿Jachin ri' ri wach winaq? —xcha che.

³⁰ Xch'aw chi ri Jesús, xub'ij che: Jun achi xel b'i pa ri tinimit Jerusalén, b'enam k'u re pa ri tinimit Jericó. Xchap k'u kumal elaq'omab' pa ri b'e. Ri e are' xkesaj b'i ri ratz'iaq, xkich'ayo. Xeb'e' k'ut, xkiya kanoq. Xa k'u jub'iq' man xkäm ri achi, —kächa'.

³¹ Xqaj k'u b'i jun chke ri sacerdotes aj Israel pa ri b'e ri'. Aretaq xril ri achi, naj xok'ow wi che. ³² Xopan xuquje' jun tata' Levita jawije' k'o wi ri achi. Aretaq xril ri achi soktajinaq, ri are' naj xok'ow wi che xuquje'. ³³ B'enaq k'u jun tata' aj Samaria pa ri b'e ri'. Aretaq xril ri achi ri soktajinaq pol pa ri b'e, xel ranima' che, xutoq'ob'isaj u wäch. ³⁴ Xqeb' ruk' ri achi, xukoj kunab'al chke ru soktajik, xupiso. Te ri' xuya ri achi chrij ru kiej, xuk'am b'i pa jun ja warb'al, xrilij k'u chila', —kächa'. ³⁵ Chukab' q'ij aretaq xel b'ik ri tata' aj Samaria, xresaj loq ru rajil, xuya nik'iaj che ri rajaw ri warb'al, xub'ij che: "B'ana b'a' la toq'ob' chwe, chilij la we achi ri'. Ronojel ri käsach na la chrij, kintoj na che la aretaq kintzelej loq," —xcha che, —kächa ri Jesús. ³⁶ Ri Jesús xuta' che ri tijonel, xub'ij: ¿Jas ri chomanik la? ¿Jachin chke ri oxib' winaq ri' are ri qas rach winaq ri achi ri xchap kumal ri elaq'omab'? —xcha che.

³⁷ Xch'aw chi ri tijonel re ri Pixab', xub'ij: Ri xutoq'ob'isaj u wäch, are qas rach winaq, —xcha'.

Xub'ij k'u ri Jesús che: Ri lal, b'ana b'a' la junam jas ri xub'an ri tata' aj Samaria, —xcha che.

Ri Jesús kopan cho kachoch ri nan María, ri nan Marta

³⁸ Xutaqej ru b'e ri Jesús, e rachi'l k'u ru tijoxelab'. Xeopan pa jun alaj tinimit. Jun ixoq, Marta u b'i', xeuk'ulaj cho rachoch. ³⁹ Ri nan Marta k'o jun u chaq', María u b'i'. Xt'uyi k'u ri nan María chuwäch ri Jesús chutatab'exik ri kub'ij. ⁴⁰ Sib'alaj latz' k'u u wäch ri nan Marta rumal rech ri k'ia u chak. Xopan ruk' ri Jesús, xub'ij che: Qajaw, ¿a xaq kil la chi ri nu chaq' kinuya kan nu tukiel chub'anik ri chak? B'ij b'a la che chi chinuto', —xcha che.

⁴¹ Xch'aw ri Jesús, xub'ij che: Marta, Marta, sib'alaj are kachomaj ri a chak. Tzb'enaq awanima' ruk'. ⁴² K'o k'u ri qas rajwaxik. Are k'u ri María are xucha' ri utz na, man kesax tä k'u wa' che, —xcha ri Jesús che.

¹ Ri Jesús tajin kub'an orar pa jun k'olib'al chik. Aretaq xto'tajik, jun chke ru tijoxelab' xub'ij che: Qajaw, chujitijoj la chub'anik orar, je' jas ri tat Juan xuk'ut chkiwäch ru tijoxelab', —xcha che.

² Xub'ij ri Jesús chke: Aretaq kib'an orar, chib'ij:

Qa tat, ri lal k'o la pa ri kaj,
chnimarisax ta na u q'ij ri b'i' la.

Chtaqan ta na la pa ki wi'

konojel winaq.

Chb'an ta b'a' ri rayib'al la

cho ruwächulew,

jas ri káb'an'uk' la chila' chikaj.

³ Ya la ri qa wa ronojel q'ij.

⁴ Sacha la ri qa mak,

je' jas ri uj xuquje' käqasach

ri ki mak ri kâka'n k'äx chqe.

Mäya la chqe chi kujtaqchi'x che mak,

xane chujto' la cho ri Itzel,

—kixcha na, —xcha ri Jesús chke.

⁵ Xuquje' xub'ij ri Jesús chke: We k'o jun chiwe ri k'o jun awachi'l, kopan ta awuk' pa nik'iaj aq'ab', kub'ij chawe: "Wachi'l, kinjal ta na oxib' kaxlan wa chawe. ⁶ Xa k'o jun wachi'l chik petinaq pa ri b'e, opaninaq k'u wuk' cho wachoch. Man k'o tä k'u jas kinya che," —kächa'.

⁷ Are k'u ri at katch'aw ta loq, kab'ij che: "Maya latz' chwe. Tz'aptal chi ri uchib'e. Ri walk'ual k'ut e q'oyol chi wuk' in. Man kinkowin taj kinwalijik chutzukuxik jas kinya chawe," —katcha che. ⁸ Pune man kawaj katwalij ri' chuya'ik ri wa che rumal k'u rech chi are ri awachi'l ri kuta' toq'ob' chawe, qas katwalij na ri' rumal chi ri awachi'l man kutänab'a tä ru ta'ik toq'ob', kaya na ronojel ri rajwaxik che, —kächa'. ⁹ Je ri' kinb'ij chiwe: Chita' b'a', k'o k'u käya'taj na chiwe. Chitzukuj na, k'o na ri kiriqo. Chixk'ork'otoq, käjaqataj na ri uchija chiwäch. ¹⁰ Apachin k'u ri k'o jas kuta', kuk'am k'u na wa'. Ri winaq ri k'o kutzukuj, k'o na ri kuriqo. Ri winaq ri kâk'ork'otik, käjaqataj na ri uchija chuwäch, —xcha ri Jesús chke.

¹¹ ¿A k'o lo jun chiwe ix, ri ix tata'ib', we ta ri a k'ojol kuta' ru wa, ri at k'ut kaya jun ab'aj che? We ta kuta' jun u kär, ¿a kaya lo jun kumätz che chuk'exwäch ri kär? ¹² We kuta' jun u saqmol, ¿a kaya ne lo jun interix che? ¡Man je' taj! —kächa'. ¹³ We ri ix ri ix ajmakib' iwetam ri ki sipaxik utzalaj taq jastaq chke ri iwalk'ual, ¿a ma tä ne ri i Tat ri k'o chila' chikaj kuya na ri Loq'alaj Espíritu chke ri winaq ri kâkita' wa' che? —xcha ri Jesús chke.

Kâb'an tzijtal chrij ri Jesús chi k'o u chuq'ab' rumal ri Beelzebú

¹⁴ Ri Jesús tajin käresaj b'i jun itzelalaj espíritu ri kub'an memal. Aretaq xel b'i ri itzelalaj espíritu, xkowinik xch'aw ri achi ri

11

Ri Jesús kuk'utu jas u b'anik orar

mem nab'e. Xkikajmaj k'u wa' ri winaq.
¹⁵ E k'o jujun chke ri winaq xkib'ij: Wa' we
 achi ri' keresaj b'i ri itzel taq espíritus ruk'
 ru chuq'ab' ri Beelzebú* ri ki nimal ri itzel
 taq espíritus, —xcha'.

¹⁶ E k'o jule' chik ri xkikoj ki chuq'ab'
 che resaxik u pu chi' ri Jesús che rilik jas
 ri kub'ano. Xkita' che chi kub'an jun ka-
 jmab'al k'utb'al ajchikaj chkiwäch. ¹⁷ Ri
 Jesús retam ri ki chomanik, xub'ij chke: Jun
 tinimit ri u b'anom kieb', ri käch'ojin na ri
 juch'ob' chrii ri juch'ob' chik, kuk'is k'u na
 rib' ri tinimit ri'. Kewulix na konojel taq
 ri ja pa ri ch'oj. Xuquje' jun achalaxik ri
 u b'anom kieb', ri kech'ojinik, kusach k'u
 na rib' ki wäch. ¹⁸ Xuquje' we ri Satanás
 käch'ojin chrii chb'il rib', ¿jas k'u lo kub'an
 ri' chujeqb'axik ri u taqanik ri are'? —kächa
 ri Jesús. Kinb'ij wa' rumal chi ri ala q káb'ij
 ala q chi kinwesaj b'i ri itzel taq espíritus
 rumal ri Beelzebú. ¹⁹ We ri in kinwesaj
 b'i ri itzel taq espíritus ruk' ru chuq'ab' ri
 Beelzebú, ¿jachin k'u kuya ri ki chuq'ab' ri
 tijoxelab' ala q rech je' kaka'n wa' xuquje'?
 Ri e are' je' káik'ut na chi sachina q ri ala q.
²⁰ We ri in kinwesaj b'i ri itzel taq espíritus
 ruk' ru chuq'ab' ri Dios, kel kub'ij wa' chi
 kámik ri' ri Dios u chaplem taqanik waral, —
 xcha ri Jesús chke.

²¹ We k'o jun achi ri sib'alaj k'o u chuq'ab',
 utz k'u kub'an chuchajixik ri rachoch kuk'
 ch'ojib'al re ch'ich', man k'o tä ri káb'anow
 k'äx ri' chke ri jastaq re. ²² We kopan ne
 jun ri k'o na u chuq'ab' chuwäch ri achi
 ri', käch'akan k'u puwi', keresaj k'u b'i kono-
 jel ru ch'ojib'al taq ch'ich' ri xuku'b'isaj wi
 u k'ux chki. Keujach na b'i ri jastaq ri
 xeutogij chkiwäch ri rachi'l, —kächa'. (Je'
 xinch'akan in puwi' ri Satanás,) —xcha ri
 Jesús chke.

²³ Apachike winaq ri man kraj tä kub'ano
 jas ri kinb'ij, kub'an u k'ulel ri' chwe.
 Apachin k'u ri man kinuto' tä che ki mulixik
 ri nu chij, wa' we winaq ri' are junam ruk'
 jun winaq ri xa keujab'uj, —xcha chke.

*Waral kätzijox wi ri kub'an jun itzelalaj
 espíritu kätzelejik*

²⁴ Aretaq jun itzelalaj espíritu kel b'i che
 jun winaq, xaq káwakatalob' chi pa taq ri
 juyub' ri ketz'inowik ri man k'o tä wi joron,
 kutzukuj k'u ri kuxlan wi. Man kuriq tä
 k'ut, xa je ri' kuchomaj: “Kintzelej na b'i
 cho wachoch jawije' ri xinél wi loq,” —
 kächa'. ²⁵ Aretaq kopanik, kuriq k'u ri ran-
 ima' ri winaq je' ta ne jun ja ri ya mesom
 chik, ri ya b'anom chi u b'anik wa'. ²⁶ Ke'
 k'ut, keuk'ama chi loq wuqub' itzelalaj taq
 espíritus ri e k'äx na chuwäch ri are'. Konojel
 keb'okik, kejeqi k'u chila'. Chuk'isb'al ri u

b'antajik ri winaq ri' ri e k'o ri itzelalaj taq
 espíritus che, sib'alaj kánimataj na chuwäch
 ri nab'e u b'anik, —xcha chke.

Waral kätzijox wi jas ri' ri qas utzil

²⁷ Ri Jesús tajin kutzijoj wa' we tzij ri', ko
 xch'aw jun ixoq chkiol ri winaq, xub'ij:
 ¡Utz re ri chichu' ri xil wäch la rumal, ri
 xk'i'iyisan la! —xcha ri'.

²⁸ Xub'ij k'u ri Jesús: ¡Are utz na ke ri
 winaq ri ketow ru Tzij ri Dios, keniman k'u
 che! —xcha chke.

*Ri lawalo taq winaq kákita' jun etal ka-
 jmab'al che ri Jesús*

²⁹ Aretaq ri winaq xkimulij kib' cho ri
 Jesús, xuchaplej ki tzijob'exik, xub'ij chke:
 Xa e lawalo taq winaq ri winaq re ri q'ij
 junab' ri'. Xaq kákaj chi kinb'an jun etal ri
 kajmab'al chkiwäch. Man káb'antaj tä k'u na
 jun etal chkiwäch, xane xaq xuwi ri etal re
 ri qa mam Jonás, q'alajisal re ru Loq' Pixab'
 ri Dios ojer. ³⁰ Ri in, in ri' ri Ralk'ual ri Dios
 ri Qas Winaq, in ri' ri etal chke ri winaq re
 we q'ij junab' ri', je' jas ri qa mam Jonás are
 xok che jun etal chkiwäch ri winaq ri xek'oji
 pa ri tinimit Nínive, —kächa'. ³¹ Ri chichu'
 ri xk'oji che nim taqanel pa ki wi' konojel
 ri winaq aj Seba kátak'i na kuk' ri winaq re
 we q'ij junab' ri' pa ri q'atän tzij ri kápetik.
 Käch'aw k'u na ri ixoq ri' chiwij ix rumal chi
 xel loq ri are' pa ru tinimit ri sib'alaj naj k'o
 wi, xopan k'u ruk' ri nim taqanel Salomón
 ojer chutatab'exik ri nojib'al u tijonik. Chi-
 wilampe ix chi k'o Jun† waral ri nim na
 u b'anik chuwäch ri nim taqanel Salomón.
³² Ri winaq k'ut aj Nínive, ketak'i na junam
 kuk' ri winaq re we q'ij junab' ri' pa ri q'atän
 tzij. Kech'aw k'u na ri winaq aj Nínive chiwij
 ix rumal chi xkik'ex kanima', xkik'ex k'u ki
 chomanik rumal ri xutzijoj ri qa mam Jonás
 chke. K'o k'u jun waral ri nim na u b'anik
 chuwäch ri qa mam Jonás, —xcha ri Jesús.

Waral káqil wi ri tijonik chrii ri saqil

³³ Man k'o tä jun winaq ri kutzij jun chäj,
 o jun candela, te k'u ri' kuch'uqu, kuya wa'
 chuxe' jun chikäch. Xane kutzuk'ub'a wa'
 chikaj rech kuya saqil chkiwäch ri winaq ri
 keb'ok pa ja, —kächa'. ³⁴ Ri a waq'äch e are
 je' jas jun chäj ri kuya saqil chawe. We utz
 ri a waq'äch, q'alaj ri b'e chawäch. We man
 utz ri a waq'äch, man q'alaj tä ri b'e chawäch.
³⁵ Chawila b'a' chi ri saqil ri k'o awuk' man
 kák'extaj tä ri' pa q'equmal. ³⁶ We k'o ri saqil
 chawäch, man k'o tä ne jub'ig' ri q'equmal,
 kawil b'a' na ronojel pa saqil, je' jas ri kub'an
 jun chäj, o jun candela chawäch, kätununik,
 —xcha ri Jesús.

*Ri Jesús keuyaj ri tata'ib' fariseos xuquje'
 ri tijonelab' re ri Pixab'*

* 11:15 Ri tzij “Beelzebú” are jun chke ru b'i' ri Satanás.

† 11:31 Ri jun ri' are ri Jesús mismo.

³⁷ Aretaq ri Jesús xto'taj chub'ixik wa', xch'aw jun tata' fariseo, xub'ochi'j chi käwi' ruk' cho ja. Xe' k'u ri Jesús, xok b'i pa ri ja, xt'uyi chi' ri mesa. ³⁸ Ri fariseo xrilo chi aretaq xok ri Jesús che ri wi'm, man xub'an tä ri kub'ij pa ri ki pixab' ri fariseos, ri e naq'atal chub'anik aretaq käb'an ri ch'ajow q'ab'aj. Ri fariseo jun wi xrilo. ³⁹ Xub'ij ri Qajaw Jesús che: Ri alaq fariseos, käch'aj alaq ri rij ri laq xuquje' ri rij ri vaso. Are k'u pa anima' alaq k'o wi ri lawaloyil, k'o ri itzel rayinik alaq, —kächa'. ⁴⁰ Kon taq winaq! ¿A mat etam alaq chi ri Dios ri xb'anow ri rij jun winaq are ri' ri xb'anow ri ranima' xuquje'? ⁴¹ B'ana b'a' alaq utzil rech kel na ri etzelal pa ri anima' alaq. Je ri' ronojel kakanaj na kan ch'ajch'oj, —kächa'.

⁴² jK'äx ech alaq, fariseos! Ri alaq käya alaq ru lajujil ri q'eb'un, ri ruda, xuquje' ronojel u wäch ichaj. Käya k'u kan alaq ri u b'anik ri utzil, man qas tä k'u loq' ri Dios chuwäch alaq. Are k'u wa' ri rajwaxik käb'an na alaq, man käya tä k'u kan alaq ru b'anik ri jule' chik, —kächa'.

⁴³ jK'äx ech alaq, fariseos! Kaj alaq ri t'uyulib'al kech nimaq ki b'anik pa ri rachoch Dios, xuquje' kaj alaq chi nim kil wi alaq, chi utz ch'ab'exik alaq käb'an pa taq ri b'e, —kächa'.

⁴⁴ jK'äx ech alaq, fariseos, xuquje' ri alaq tijonelab' re ri Pixab'! Ri alaq onojel alaq xaq kieb' wäch alaq. Ri alaq junam alaq kuk' ri muqub'al ri man keilitaj taj. Keb'in k'u ri winaq pa ki wi' ri muqub'al, man ketam taj chi k'o q'ayinaq taq b'aq chupam, —xcha'.

⁴⁵ Jun chke ri tijonelab' re ri Pixab' xch'awik, xub'ij che: Ajtij, aretaq käb'ij la wa', uj xuquje' kujyoq' la, —xcha che.

⁴⁶ Xub'ij k'u ri Jesús chke: jK'äx ech alaq xuquje', alaq tijonelab' re ri Pixab'! Rimal chi käya alaq k'ia taq pixab' chke ri winaq je' ta ne chi e nimaq taq eqa'n ri käya alaq chkij. K'äx k'u ri keqa'xik kumal ri winaq. Ri alaq k'ut man k'o tä jas käb'an alaq che ki to'ik ri e are', —kächa'.

⁴⁷ jK'äx ech alaq! Keyak alaq ri muqub'al taq ja ri e muqum wi ri ojer taq q'alajisal re ru Loq' Pixab' ri Dios ri xekämisax kumal ri mam alaq. ⁴⁸ Qas tzij chi ri alaq, alaq q'alajisal taq ke ri xka'n ri mam alaq, xuquje' junam wäch alaq kuk' ri mam alaq. E are' xekämisanik, ri alaq k'ut keyak alaq ri muqub'al taq ja ri e muqum wi, —kächa'.

⁴⁹ Rimal rech wa' kub'ij ri Dios ruk' ru nojib'al: "Keintaq na b'ik q'alajisal taq re ri Loq'alaj nu Pixab', xuquje' jule' taq nu taqo'n chik. Ri winaq k'ut kekikämisaj na jujun chke ri nu taqo'n. Jujun k'ut käka'n na k'äx chke," —xcha ri Dios, —kächa'. ⁵⁰ U b'im wa' ri Dios rech ri winaq re taq we q'ij junab' ri' käk'äjisax ki wäch rumal ri ki kämisaxik konojel ri u q'alajisanelab' ri Dios

ri e kämisam tzpa ru b'anik ru wächulew petinaq loq. ⁵¹ Are k'u tze wa' ru kämisaxik ri tat Abel, xuquje' ru kämisaxik ri tat Zacarías ri xkäm chkixol ri ta'b'al toq'ob' ruk' ri loq'alaj k'olib'al ri sib'alaj äwas chi kok b'i xa apachi-noq, ri k'o pa ri nimalaj rachoch ri Dios. Je' kinb'ij wa' che alaq chi ri winaq re we q'ij junab' ri', e are wa' ri kekeqlej na wa', —xcha'.

⁵² jK'äx ech alaq, tijonelab' re ri Pixab'! Etam alaq jas u riqik ronojel u wäch no'j. K'u'm k'u alaq wa' we etamanik ri' chkiwäch ri jule' taq winaq chik. Ri alaq k'ut, man käb'an tä alaq jas u b'eyal ri etamanik ri', —xcha ri Jesús chke.

⁵³ Elem k'u kub'an b'i ri Jesús, ri tijonelab' re ri Pixab' xuquje' ri fariseos sib'alaj xpe koyowal che. Xkikoj ki chuq'ab'. Xkichap u k'otik u chi' chkij k'ia taq tzij. ⁵⁴ Xkik'ak'leb'ej k'u u ta'ik jun tzij pu chi' rech käka'n tzijtal chrij.

12

Ri Jesús kuya tijonik chrij ri kawächil

¹ Xkimulij k'u kib' sib'alaj k'ia winaq je ri' chi käkikat'alela kib'. Ri Jesús xeutzijob'ej ru tijoxelab' nab'e, xub'ij chke: Chichajij iwib' chuwäch ri ki ch'amil ri tata'ib' fariseos. Ri ch'am ri kinb'ij chiwe man qas tä ch'am wa', xane are ri ki no'j ri fariseos ri xaq kieb' ki wäch ri kinjunamaj ruk' ri ch'am, —kächa'. ² Man k'o tä k'u ri ch'uq'talik ri mat käq'alajin na. Man k'o tä k'u ri k'u'talik ri mat ketamataj na. ³ Ri i tzijom pa q'equm, kätatab'ex na wa' pa saqil. Ri i jasjatem xuquje' ri kib'an pa ri ja, kätzijox na wa' pa ri b'e, —xcha chke.

Waral kätzijox wi jachin chuwäch ri rajwaxik käqaxej wi qib'

⁴ Kinb'ij k'u chiwe ix, qachalal, chi mixej iwib' chkiwäch ri kekämisan ri cuerpo, te k'u ri' man k'o tä chi ri kekowin chub'anik chiwe. ⁵ Kink'ut na in jachin chuwäch ri rajwaxik kixej wi iwib'. Are chixej iwib' ri' chuwäch ri jun ri käkowinik kixuk'iaq b'i pa ri q'aq' aretaq ix u kämisam chik. Je' kinb'ij chiwe, are chixej iwib' chuwäch wa', —xcha chke.

⁶ ¿A mat kieb' centavos kek'iyix wi job' chi'ch? Man k'o tä k'u jun chke we alaj taq chikop ri' ri käsap pu jolom ri Dios. ⁷ Xuquje' retam ri Dios joropa' ri rismal i wi' e k'olik. Mixej b'a iwib'. Más ix loq' na ix chkiwäch k'ia taq chi'ch, —xcha ri Jesús chke.

Ri Jesús kutzijoj jas käka'n ri winaq ri kuq'alajisaj ri Are' chkiwäch nik'iaj winaq chik

⁸ Je' kinb'ij chiwe chi apachin ri kutzijoj chkiwäch ri winaq chi are wachi'l in, in ri' ri Ralk'ual ri Dios ri Qas Winag, kinb'ij na

chkiwäch ri ángeles re ri Dios chi wech in we winaq ri'. ⁹ Apachin k'u ri kub'ij chkiwäch ri winaq chi man retam tä nu wäch in, kinb'ij k'u na in chkiwäch ri ángeles re ri Dios chi man wetam tä u wäch we winaq ri', —kächa chke.

¹⁰ Apachike winaq ri käyoq'on chwe in, in ri' ri Ralk'ual ri Dios ri Qas Winaq, käsach na u mak wa'. Apachin k'u ri kub'ij ri äwas u b'ixik chrj ri Loq'alaj Espiritu re ri Dios, man käsach tä na u mak ri', —kächa'.

¹¹ Aretaq kixkichap ri winaq, kixkik'am b'i chkiwäch ri ki nimaqil ri winaq re ri rachoch Dios o chkiwäch ri q'atal taq tzij, xuquje' chkiwäch ri nik'iaj taq taqanelab', mixej iwib' che jas ri rajwaxik kib'ij o jas kito'b'ej iwib'. ¹² Are k'u ri Loq'alaj Espiritu kuya na chiwe pa we hora ri' jas ri rajwaxik u b'ixik iwumal, —xcha ri Jesús chke.

Waral kätzjox wi ri q'inomalaj achi ri kuchomaj ri man jikom taj

¹³ Jun chke ri winaq xub'ij che ri Jesús: B'ij la che ri wachalal chi kuya we ri echb'al, —xcha ri'.

¹⁴ Xch'aw ri Jesús, xub'ij che: Tat, man in kojom tä che q'atal tzij puwi' alaq. Xuquje' man in k'o tä che jachal echb'al, —xcha che.

¹⁵ Xub'ij k'u chke konojel: Chilampe alaq chi kächajij ib' alaq chuwäch ru rayixik k'ia u wäch jastaq ajuwächulew. Pune e k'o k'ia ri jastaq re jun winaq, man are tä ri' ri käyo'w ru k'aslemal, —xcha chke.

¹⁶ Ri Jesús xukoj chi na jun k'utb'al chkiwäch, xub'ij: K'o jun achi ri sib'alaj q'inom. Sib'alaj nim ru wächinik ri rulew xuya'. ¹⁷ Kächoman k'u ri achi pa ranima', kub'ij: „¿Jas kinb'an na? Man k'o tä chi k'olib'al jawije' kinya wi ri nu jal,” —kächa ri'. ¹⁸ Xuchomaj pa ranima', xub'ij: „Are wa' ri kinb'an na. Keinyojij na ri nu k'uja, keinyak na jujun chik más nimaq. Kinya na ri nu jal, xuquje' taq ri jastaq we chkipam wa'. ¹⁹ Te k'u ri' aretaq kinto'taj chub'anik wa' kinb'ij na chwe chb'il wib': Tuxlanog, two'q, chab'ana a nimaq'ij rumal chi e k'ia ri jastaq awe ri a k'olom. Kub'an na wa' che k'ia junab',” —kincha na in, —kächa ri Jesús. ²⁰ Xub'ij k'u ri Dios che: „¿Konalaj achi! Kämik chaq'ab' katkämik, kel na rawanima'. ¿Jachin lo ajchaq'el kan ri jastaq ri a k'olom?” —xcha ri Dios che, —kächa ri Jesús. ²¹ Je ri' ri kuk'ulmaj ri winaq ri kumulij q'inomal che chb'il rib', man q'inom tä k'u wa' cho ri Dios, —xcha ri Jesús chke.

Ri Dios keuchajij ri ralk'ual

²² Xub'ij k'u ri Jesús chke ru tijoxelab': Rumlal ri' kinb'ij chiwe chi mixok il che ri i k'aslemal, jas ri kitijo, jas ri iwatz'iaq kikojo. ²³ Nim k'u na u b'anik ri i k'aslemal chuwäch ri wa. Nim na u b'anik ri i cuerpo chuwäch ri atz'iaq, —kächa'. ²⁴ ¿Chewilampe ri joj! Man

käkitik tä ab'ix, man k'o tä k'u jach' käka'no. Man k'o tä jawije' kekik'ol wi ri jastaq ke, man k'o tä k'u ki k'uja. Are k'u ri Dios ket-zuquwik. Ri ix k'ut más ix loq' na chkiwäch ri chikop ajuwokaj, —kächa'. ²⁵ ¿Jachin ta k'u ne chiwe ix käkowinik kāk'asi na kieb' oxib' junab' chik xaq pa re wi? Man k'o taj, —kächa'. ²⁶ We man kixkowin tä chub'anik jun jasach ri nitz' na, ¿jas che kixok il chke ri jule' jastaq chik? —kächa'.

²⁷ Chiwilampe ri kotz'ij, jas käka'no kek'iyik. Man kechakun taj, man k'o tä k'u kiem käka'no. Pune ta ne je ri', kinb'ij chiwe chi ri nim taqanel Salomon ojer ruk' ronojel ru q'inomal man je' tä ratz'iaq wa' xukojo jas jun chke we kotz'ij ri'. ²⁸ We ri Dios je' kub'an wa' che katz'iaq ri q'ayes ri e k'o kämik pa juyub', chuweq k'ut keyi' pa ri q'ag', ¿a mat kāriliy ri' ri Dios ri iwatz'iaq ix? —kächa'. ¡Ay ri ix, ix achijab' ri xaq jub'iq' kixkojonik! ²⁹ ¡Mixok b'a' il che jas kitijo, mixej k'u iwib' rumal wa'! ³⁰ Konojel we jastaq ri' ronojel q'ij gas kākitzukuj ri nik'iaj winaq chik ajuwächulew. Ri i Tat k'ut retam jachike ri kajwata chuiwe ix, —kächa'. ³¹ Chixchakun b'a' nab'e chujikib'a'xik ru taqanik ri Dios, kiriq k'u na xuquje' ri nik'iaj jastaq chik ri e rajwaxik chiwe, —xcha ri Jesús chke.

K'o b'a' i q'inomal chikaj

³² Pune ri ix man ix k'ia taj, mixej b'a' iwib'. Rumlal chi kākikot ranima' ri qa Tat chuya'ik chiwe chi kixk'oji na pa ru taqanik ri Dios. ³³ Chik'iyij ri jastaq iwe, chispaj ri rajil chke ri meb'a'ib'. Je ri' käyi' na chiwe jun iwechb'al pa ri kaj ri man kāk'elob' taj. Käyi' na xuquje' jun q'inomal chikaj ri man k'o tä u k'isik. Man kopan tä k'u elaq'om chila', man kächikopir tä wa', —kächa'. ³⁴ Jun winaq are amaq'el kuchomaj ri jastaq re. We k'o ri iwech ix pa ri kaj, are kichomaj na ri k'o chikaj, man xuwi tä ri' ri k'o cho ruwächulew, —xcha ri Jesús chke.

Chiweyej na ru petb'al ri Jesucristo

³⁵ Chisuk'umaj b'a' iwib', chitzija k'u ri i candela chuk'ulaxik ri Iwajaw. ³⁶ Je' kib'ano jas ri käka'n ri patäninelab' ri keye'm u k'ulaxik ri ki patrón kätzelej loq pa jun k'ulanem, rech aretaq kulik, käch'aw chi' ri porta, chanim kākitor chuwäch. ³⁷ Utz ke ri patäninelab' ri' ri keriqtaj na rumal ri ki patrón chi e k'aslik aretaq kätzelej loq. Gas tzij kinb'ij chiwe chi ri ki patrón keut'uyub'a' na chi' ri mesa, kusuk'umaj na rib' rech kuya ke ri ki wa, —kächa'. ³⁸ Pune ta k'ä te' kul ri ki patrón pa nik'iaj aq'ab', pune sib'alaj aq'ab', we kārilo chi e k'aslik, utz ke ri patäninelab' ri', —xcha'. ³⁹ Chich'ob'o b'a' wa' chi we ta jun ajchaq'el ja käreтамaj jachike hora kopan ri elaq'om, kāk'ask'at na

ri', man kuya' tä ri' chi kokb'ex ri rachoch, —kächa'. ⁴⁰ Chiwila b'a' chi ri ix, ix suk'umatal chik rumal chi kätzelej na loq ri Ralk'ual ri Dios ri Qas Winaq pa ri hora ri man kichomaj taj, —xcha ri Jesús chke.

Ri utzalaj patäninel ruk' ri patäninel ri man utz taj

⁴¹ Te ri' xub'ij ri tat Pedro che: Qajaw, ¿a xtzijoj la wa' we k'utb'al ri' xaq xuwi chqe uj? ¿A mat chke konojel? —xcha che.

⁴² Xub'ij ri Qajaw Jesús: ¿Jachin lo ri jun utzalaj patäninel ri sib'alaj k'o u no'j? We patäninel ri' are käkoj na rumal ru patrón pa ki wi' ri nik'iaj patäninelab' chik rech kuya ri ki wa ronojel q'ij. ⁴³ Utz re ri patäninel ri' ri käriqtajik chi tajin kub'an ru chak aretaq kopan ru patrón, —kächa'. ⁴⁴ Are qas tzij ri kinb'ij chiwe chi ri patrón kukoj na ri patäninel ri' pa ki wi' konojel ri jastaq re. ⁴⁵ Qachomaj b'a' jas kuk'ulmaj na we man utz tä kub'an ri patäninel ri', xane ri are' kuchomaj chi xa käb'eytaj ru patrón, kuchaplej k'u ri u b'anik k'äx chke ri nik'iaj ajchakib' chik xuquje' chke ri ajik'ab', xuquje' ne kuchaplej u b'anik nimaq'ij. Xa sib'alaj käwi'k, xuquje' käq'ab'arik. ⁴⁶ Xaq te talik k'ut kul ru patrón pa jun q'ij ri man kuchomaj tä ri' ri patäninel, pa jun hora ri man retam taj. Qas tzij chi sib'alaj käk'äjisax na u wäch ri patäninel ri' rumal chi man jikom tä ri ranima' chub'anik ronojel ri xtaqan wi ri rajaw, —kächa'.

⁴⁷ Ri patäninel ri kuch'ob'o jas ru rayinik ru patrón, te k'u ri' man kujikib'a tä k'u rib', man käniman tä k'u che, are k'u wa' we winaq ri' sib'alaj käk'äjisax na u wäch. ⁴⁸ Ri patäninel k'ut ri man kuch'ob' tä ru rayinik ru patrón, kub'an k'ut jachike ri taqal wi u k'äjisaxik u wäch, kätan na ri' ri k'äjisab'al u wäch ri käb'an na che. We jun winaq kuya rib' pa k'olib'al re eqle'n, nim wa' ri käta' na che kumal ri nik'iaj winaq chik. We ri winaq ki jikib'am wi kanima' che jun winaq chik, k'ia k'u ri utzil käkita' che we winaq ri', —xcha ri Jesús chke.

Ri Jesús kutzijoj ri ch'oj ri käpe cho ruwächulew rumal

⁴⁹ Xinpe in rech kinya tijonik chke ri winaq ajuwächulew. We tijonik ri' are je' jas ru t'iqik q'aq' cho taq ri juyub'. Kwaj ta na chi ya tajin käk'at chi we q'aq' ri', —kächa chke. ⁵⁰ K'o na jun nimalaj k'äx ri rajwaxik kinriqo. Kwaj ta na chi xb'antaj ta kan ri k'äx ri', xinto'taj ta k'u che, —kächa ri Jesús. ⁵¹ ¿A kichomaj ix chi in petinaq rech xa käk'oji utzil chkixol ri winaq ajuwächulew? ¡Man je' taj! Xane xinpe in chub'anik ch'oj. ⁵² Tzäkämik ri' kächap na b'i u b'anik we ch'oj ri'. Job' winaq ri e k'o pa jun ja käkik'ulelaj na kib', ri oxib' chki ri kieb', ri kieb' chik chki ri oxib'. ⁵³ Käb'antaj na ch'oj,

jun tata' kuk'ulelaj na ru k'ojol, ru k'ojol k'ut kuk'ulelaj na ru tat, xuquje' ri chichu' kuk'ulelaj na ri ral ali, ri ali kuk'ulelaj na ru nan, xuquje' ne ri jun ali chik kuk'ulelaj na ri ralib' chichu', ri ralib' chichu' k'ut kuk'ulelaj na ri are', —xcha ri Jesús chke.

Ri Jesús kuya tijonik chri ri q'ij junab' ri'

⁵⁴ Xub'ij k'u ri Jesús chke ri k'alaj winaq: We kiwil ri sutz' ri käpaqi loq, chanim kib'ij: Kraj käpe jäb', —kixcha'. Je' k'u käk'ulmatajik, —kächa'. ⁵⁵ Aretaq käxuli ri kiäqiq', kib'ij: Käpe na ri saq'ij, —kixcha'. Je' käk'ulmatajik, —kächa'. ⁵⁶ ¡Ri alaq, xa kieb' wäch alaq! Kächob' alaq ri u wo ri kaj xuquje' ruwächulew. ¿Jas che man käch'ob' tä alaq jas u wäch wa' we q'ij junab' ri'? —xcha chke.

Rajwaxik chi jun winaq kärutzirisaj rib' ruk' ru k'ulel

⁵⁷ ¿Jas che man kächomaj tä alaq jas ri' ri qas jikom, jas ri' ri man qas jikom taj? ⁵⁸ Aretaq ke' alaq cho ri q'atal tzij achi'l alaq ri k'ulel alaq, tija' b'a' q'ij alaq che rutzirisaqib' ib' alaq pa ri b'e, rech man käk'am tä b'i alaq cho ri q'atal tzij. Are k'u ri q'atal tzij käjachow alaq pu q'ab' ri mayor. Ri mayor k'ut käyo'w kan alaq pa che'. ⁵⁹ Qas tzij ri kinb'ij chi man kel tä na alaq pa che' k'ä kätöj na alaq ri k'isb'al centavo re ri multa, —xcha ri Jesús chke.

13

Rajwaxik u k'exik ri ranima' jun rech man käsach tä u wäch

¹ Pa ri q'ij ri' e k'o jujun winaq chila' ri xkitzijob'ej ri Jesús chki ri winaq aj Galilea ri xeukämisaq ri tat Pilato, xuyuj k'u ri ki kik'el ruk' ri ki kik'el ri awaj ri xekämisaq che ki sipaxik cho ri Dios. ² Xch'aw chi ri Jesús, xub'ij chke: ¿A kächomaj alaq chi ri winaq aj Galilea xkiriq' wa' we nimalaj k'äx ri' xa rumal chi más e ajmakib' na chkiwäch ri nik'iaj ki winaqil chik? ³ Man je' ta wa', —kächa'. We ri alaq man käk'ex tä ri anima' alaq, xuquje' ri chomanik alaq, käsach na wäch alaq onojel alaq xuquje', —xcha chke. ⁴ Xuquje' e k'o ri wajxaq lajuj winaq ri xekäm pa Silóe rumal jun nimalaj ja ri xtaq pa ki wi'. ¿A kächomaj alaq chi más e lawalo na we winaq ri' chkiwäch ri nik'iaj winaq chik ri e k'o pa Jerusalén? ⁵ Man je' taj, —kächa'. We ri alaq man käk'ex tä anima' alaq, xuquje' man käk'ex tä chomanik alaq, käsach na wäch alaq onojel alaq xuquje', —xcha ri Jesús chke.

Ri Jesús kutzijoj ri k'utb'al chri ri u che'al higos ri man käwächin taj

⁶ Ri Jesús xutzijoj xuquje' we k'utb'al ri' chuya'ik tijonik chke, xub'ij: Jun achi, k'o jun u che'al higos ruk', tiktal k'ut pa ru

tikb'al uvas. Xe' k'u ri achi chutzukuxik ri u wäch ri che' ri', man k'o tä k'u xuriqo. ⁷ Xub'ij che ri chajil tikb'al uvas: "Chawilampe' chi xke' oxib' junab' kinpe chutzukuxik u wäch ri che' ri', man k'o tä k'u kinriqo," —xcha', —kächa ri Jesús. "Chat'oyo b'a'. Xaq k'u loq' käk'o'ji waral pa ri wulew," —kächa'. ⁸ Xch'aw chi ri chajinel, xub'ij che: "Tat, ya la kanoq xaq xuwi che we junab' chik ri'. Kink'ot na rij, kinmesaj na. ⁹ We ne käwächin ne pa we jun junab' chik ri', utz u b'anom. We k'u man käwächin taj, käqat'oy na apanoq," —xcha che ru patrón, —xcha ri Jesús chke.

Ri u kunaxik jun ixoq ru q'usum rib' pa ri q'ij re uxlanem

¹⁰ Pa jun q'ij re uxlanem ri Jesús tajin kuya tijonik pa jun chke ri rachoch Dios. ¹¹ K'o k'u jun chichu' chila' ri wajxaq laju junab' yawab' rumal jun itzelalaj espiritu. U q'usum rib' käb'inik, man käkowin tä chik chujikomisaaxik rib'. ¹² Aretaq ri Jesús xrilo, xusik'ij ri chichu', xub'ij che: Nan, kunam chi la che ri yab'il la, —xcha che.

¹³ Xuya ru q'ab' puwi' ri chichu'. Chanim k'ut xkowinik xujikomisaaj rib'. Xunimarisaaj k'u u q'ij ri Dios. ¹⁴ Ri ki nimal ri winaq pa ri rachoch Dios sib'alaj xpe royowal rumal chi ri Jesús xub'an kunanik pa ri q'ij re uxlanem. Xub'ij ri achi chke ri winaq: Xaq xuwi waqib' q'ij rajwaxik kixchakunik. Chixpet pa taq we q'ij ri' rech kixkunaxik, mixpe k'u pa ri q'ij re uxlanem, —xcha chke.

¹⁵ Xch'aw chi ri Jesús, xub'ij che: ¡Ri alaq xaq kieb' wäch alaq! Chjujunal alaq käkir alaq ri wakäx, ri burro pa ri recha'b'al pa ri q'ij re uxlanem, käk'am k'u b'i alaq rech kutija u joron. ¹⁶ Wa' we ixoq ri', rachalaxik ri qa mam Abraham, yututal k'u rumal ri Satanäs wajxaq laju junab'. ¿A mat rajwaxik u kirik wa' che we yab'il ri' pa ri q'ij re uxlanem? —xcha che. ¡je', je ri'!

¹⁷ Aretaq ri Jesús xub'ij wa', konojel ri kek'ulelanik xek'ixik. Are k'u konojel ri nik'iaj winaq chik sib'alaj xekikotik kumal taq ri kajmab'al ri tajin kub'an ri Jesús. Sib'alaj nim xekilo ri xub'an ri Jesús.

Ri Jesús kuya tijonik chrij jun ija' re mostaza

¹⁸ Xub'ij k'u ri Jesús: ¿Jas ruk' junam wi ru taqanik ri Dios pa ki wi' ri winaq? ¿Jas ta ruk' kinjunamaj wi wa'? —kächa'. ¹⁹ Are je' jas jun ija' re mostaza. Jun winaq kuk'am b'i ri ija' ri', kutik pa rulew. Käk'iyik, kub'an nim je' jas kub'an jun che' käk'iyik. Ri chikop ajuwokaj käka'n ri ki sok pa taq ri u q'ab' ri che' ri', —xcha chke.

Ri Jesús kuya tijonik chrij ri ch'am

²⁰ Xub'ij ri Jesús xuquje': ¿Jas ta ruk' kinjunamaj wi ru taqanik ri Dios? —kächa'.

²¹ Are je' jas ri ch'am ri kuya jun chichu' ruk' oxib' pajb'al k'äj re kaxlan wa, rech käch'amir ronojel ri q'or, —xcha chke.

Qatij b'a' qa chuq'ab' rech kujok b'i pa ri uchija ri latz' u wäch

²² B'enam re ri Jesús pa Jerusalén, xeusolij kan ronojel tinimit, ri nimaq xuquje' ri ch'utiq, xuya k'u tijonik chila'. ²³ K'o k'u jun ri xuta' che ri Jesús: Tat, ¿a xa e kieb' oxib' ri' ri winaq ri käkirij ri u tob'anik ri Dios? —xcha che.

Xch'aw chi ri Jesús, xub'ij chke ri winaq: ²⁴ Kätij chuq'ab' alaq rech kok alaq pa ri uchija ri sib'alaj latz' u wäch. Je' kinb'ij chi e k'ia ri käkitij na ki q'ij rech keb'okik, man kekowin tä k'ut, —xcha chke. ²⁵ Te k'u ri', aretaq ri ajchaq'el ja u tz'apim ri porta, ri alaq ri xaq tak'atoj alaq cho ri ja, käch'aw na alaq chuchi' ri ja, käb'ij na alaq: "Qajaw, Qajaw, toro la ri porta chqawäch," —kächa na alaq che. Käch'aw k'u na loq' ri ajchaq'el ja, kub'ij na: "Ri in man kinch'ob' tä wäch alaq, xuquje' man wetam taj jawije' kel wi alaq," —kächa ri'. ²⁶ Kächaplej k'u na alaq käch'aw alaq, käb'ij alaq che: "Uj woqinaq ya' uk' la, xuquje' ri lal yo'm la tijonik pa taq ri b'e re ri qa tinimit," —kächa na alaq. ²⁷ Kub'ij na ri ajchaq'el ja: "Xinb'ij chech alaq chi ri in man wetam taj jawije' ri kel wi alaq chi'. Chel b'i alaq, alaq b'anal taq etze-lal," —kächa na ri are'. ²⁸ Are chi' k'ut käb'an wi na alaq ri oq'ej, xuquje' ri quch'uch'em wareyaj rumal ri k'äx aretaq kil alaq chi ri qa mam Abraham, ri qa mam Isaac, ri qa mam Jacob, xuquje' konojel ri q'alajisal taq re ru Loq' Pixab' ri Dios e k'o chila' jawije' ri Dios kätaqan wi. Ri alaq k'ut, man k'o tä alaq kuk' rumal chi esam chi alaq apanoq. ²⁹ Keopan k'u na winaq ajrelb'al q'ij, aj u qajb'al q'ij, xuquje' winaq aj u wikiäq'ab' ri relb'al q'ij, aj u mox relb'al q'ij, ket'uyi na chi' ri mesa che wi'm jawije' kätaqan wi ri Dios, —kächa'. ³⁰ Jujun k'u chke ri winaq ri man nim tä keil wi kämik sib'alaj nim keil wi na pa ri q'ij ri'. Are k'u jujun chke ri winaq ri sib'alaj nim keil wi kämik, man nim tä chi na keil wi pa ri q'ij ri', —xcha ri Jesús.

Ri Jesús käroq'ej ki wäch ri winaq re ri tinimit Jerusalén

³¹ Pa ri q'ij ri' xeopan nik'iaj tata'ib' fariseos ruk' ri Jesús, xkib'ij che: ¡Chel b'i la waral! ¡Chanej la! Are ri q'atal tzij Herodes kraj kukämisaj la, —xecha che.

³² Xub'ij k'u ri Jesús chke: Jeb'ij alaq che we sub'anel Herodes chi kämik xuquje' chuweq kinwesaj na itzel taq espiritus, xuquje' kinkunanik. K'ä te' pa ri urox q'ij kinto'taj na che ri nu chak, —kächa', —kächa alaq che. ³³ Rajwaxik k'ut chi kämik, chuweq, käb'ij kinb'an na u b'anik ri nu chak, —kächa'. ¿A kuya lo käkämisaj jun

q'alajisal re ru Loq' Pixab' ri Dios pa jun tinimit chik, mat pa Jerusalén? Man je' taj, —xcha ri Jesús chke.

³⁴ ¡Ay, winaq aj Jerusalén! Are kekāmisaj alaq ri q'alajisal taq re ru Loq' Pixab' ri Dios, keb'an alaq che ab'aj ri ketaq b'i uk' alaq. ¡K'ia mul nu rayim ri mulixik alaq jas kub'an jun ati't äk' kumulij ri alaj taq ral chuxe' ru xik', man kaj tä k'u alaq! —kächa'. ³⁵ Tampe alaq, kákanaj na kan ri achoch alaq, käwonob'ax k'u na kanoq. Man kinil tä chi na alaq k'ä kopan na ri q'ij ri káb'ij alaq: "Nim b'a' ru q'ij ri Jun ri u taqom loq ri Qajaw Dios," —kächa na alaq, —xcha ri Jesús chke.

14

Ri Jesús kukunaj jun achi ri k'o sipoj che

¹ Pa jun q'ij re uxlanem xe' ri Jesús cho rachoch jun chke ri ki nimal ri winaq, jun tata' fariseo. Jela' xe' wi che wi'm, tajin k'u kaluchi'x kumal ri nik'iaj tata'ib' fariseos. ² Jun achi k'ut ri k'o sipoj che k'o chila' chuwäch ri Jesús. ³ Xch'aw ri Jesús, xeuch'ab'ej ri tijonelab' re ri Pixab' xuquje' ri fariseos, xub'ij: ¿A taqal u b'anik kunanik pa jun q'ij re uxlanem? We ne man taqal taj, —xcha chke.

⁴ Man xech'aw tä k'u ri e are'. Ri Jesús xuk'am b'i ri yawab' ruk', xukunaj, xutaq b'ik. ⁵ Xub'ij k'u chke ri tata'ib': We k'o ri burro alaq, ri wakäx alaq, ri kätzaq b'i pa jun k'ua' pa ri q'ij re uxlanem, ¿a mat kesaj alaq wa' chanim? —xcha chke. ¡je', je ri'!

⁶ Man xkiriq tä k'ut jas xkib'ij che.

Ri Jesús kuya tijonik chrij ru b'anik nimal

⁷ Xril ri Jesús jas xka'n ri winaq ri e ula'm, chi ri e are' xkicha' ri t'uylub'al kech ri nimaq ki b'anik chi' ri mesa. Xukoj jun k'utb'al chuyi'k tijonik chke, xub'ij: ⁸ We käsik'ix alaq che jun k'ulanem, mät'uyi wi alaq pa taq ri t'uylub'al kech ri nimaq ki b'anik. We ne käpe na jun winaq ri nim na u q'ij chuwäch alaq ri xuquje' ula'm rumal ri achi. ⁹ Kraj käpe ri tata' ri xerulaj alaq ri xuquje' xrulaj ri jun winaq chik, kub'ij che alaq: "Ya la ri t'uylub'al la che we achi ri," —kächa na. Ri alaq k'ut, pune sib'alaj kāk'ix alaq, kāk'ax na alaq ri' pa ri t'uylub'al ri man qas tä nim u b'anik, —kächa ri Jesús chke. ¹⁰ Xane aretaq kula'x alaq, tzukuj alaq ri t'uylub'al ri man qas tä nim u b'anik, t'uuyul alaq chila', rech we käpe ri tata' ri xerulaj alaq, kub'ij ta na ri' che alaq: "Wachi'l, k'o jun t'uylub'al ja le' ri utz na che la," —kächa na ri'. Qas känimarisax na q'ij alaq chkiwäch konojel ri e k'o uk' alaq chi' ri mesa. ¹¹ Ronojel winaq ri kunimarisaj rib', kāk'asax na u q'ij ri are'. Ri winaq ri man kunimarisaj tä rib', are k'u wa' känimarisax na u q'ij, —xcha chke.

¹² Xub'ij k'u ri Jesús che ri tata' ri xula'nik: Aretaq káb'an la jun ula'nem, we ne jun nimaq'ij, me'ulaj la xaq xuwi ri achi'l la, man xaq xuwi tä ri achalalla, o ri k'ul taq ja la ri e q'inomab'. We je ri' kraj ne je' kāk'a'n na wa' che la xuquje' chutojik u k'exel ri xb'an la chke. ¹³ Xane aretaq káb'an la jun ula'nem, che'ulaj la ri winaq meb'a'ib', ri winaq kutuqaj keb'inik, ri ch'okojib' xuquje' ri man keka'y taj. ¹⁴ Utz k'u na ri e la rumal chi man kekowin tä ri e are' chutojik u k'exel wa' che la. Käyi' k'u na u k'exel che la pa ri q'ij re ri ki k'astajik ri winaq ri jikom kanima' chkixol ri kāmīnāqib', —xcha ri Jesús che.

Ri Jesús kuya jun k'utb'al chrij jun nimalaj wi'm

¹⁵ Xuta k'u wa' jun chke ri e t'uuyul ruk' ri Jesús chi' ri mesa, xub'ij che: Utz re ri kok na che wi'm chila' jawije' ri kätāqan wi ri Dios, —xcha che.

¹⁶ Xch'aw chi ri Jesús, xub'ij che: Jumul ri' jun achi xub'an jun nimalaj ula'nem. E k'ia k'u ri xeusik'ij. ¹⁷ Pa ri hora re ri wi'm ri achi xutaq b'ik jun patānil re chub'ixik chke ri e sik'im: "Sa'j alaq, ya xutzir ronojel," —xcha chke. ¹⁸ Junam k'ut xkichaplej resaxik kib' konojel. Xub'ij ri nab'e winaq che ri patāninel: "Nu loq'om ch'äqap wulew," —kächa'. "Rajwaxik chi kine' che rilik. Chab'ij che ri a patrón chi chub'ana toq'ob' chwe, chusacha nu mak, man kine' taj," —xcha'. ¹⁹ Xub'ij jun winaq chik: "Nu loq'om job' k'ulaj wakäx, kin-wil na jas kāk'a'no kechakunik," —kächa'. "Chub'ana toq'ob' chwe, chusacha nu mak, man kine' taj," —kächa ri'. ²⁰ Xub'ij ri jun winaq chik: "Man kuya' taj kine'k rumal chi k'ä te' xink'uli'k," —kächa'. ²¹ Xtzelej b'i ri patāninel, xutzijoj ronojel wa' che ri u patrón. Xpe royowal ri u patrón, xub'ij k'u che ri patānil re: "Jat chanim pa taq ri b'e, pa taq ri k'ayib'al re ri tinimit, cheatzukuj ri winaq meb'a'ib', ri winaq kutuqaj, ri man kekowin taj keka'yik, xuquje' ri ch'okojib', cheak'ama k'u loq," —kächa che. ²² Te k'u ri' xub'ij ri patāninel che ri u patrón: "Xb'antaj kanoq ri xtaqan wi la. K'o k'u na k'olib'al chke nik'iaj," —kächa che. ²³ Xub'ij k'u ri patrón che ru patāninel: "Jat naj pa taq ri b'e, pa taq ri juyub', chakojo a chuq'ab' rech kepe ri winaq, kánoj k'u na ri wachoch. ²⁴ Kinb'ij chiwe ix ri ya ix k'o chik chi man k'o tä jun chke ri xewula'j nab'e ri kutij na jub'iq' re ri nu wi'm ri xinb'ano," —xcha chke.

K'o k'äx ri kuriq jun winaq we ke' ruk' ri Cristo

²⁵ E k'ia winaq k'ut e b'enaq ruk' ri Jesús. Xutzolq'omij rib' kuk', xub'ij chke: ²⁶ We k'o jun ri qas kraj kāk'o'ji wuk' in, nim k'u na keril ru tat u nan chnuwäch in, xuquje' ri

rixoqil, ri ralk'ual, ri ratz, ru chaq', we k'u ne ri ranab', man kuya' taj kok che tijoxel we, —kächä'. Xuquje' ne we nim na käril ru k'aslema! chb'il rib' chnuwäch in, man kuya' tä ri' kok che tijoxel we, —kächä ri Jesús. ²⁷ Ri winaq ri man kutelej tä ru cruz, te ri' käpe wuk' in, man kuya' taj kok che tijoxel we, —xcha chke.

²⁸ Ä k'o jun chiwe ri kraj kuyak jun nimalaj ja, ri mat nab'e kät'uyi na chub'anik raqan, kärajilaj ru rajil joropa' ri k'olik che rilik we kub'an ri puag chuk'isik u b'anik ri ja? —kächä'. ²⁹ Je ri' kub'ano rech aretaq kojom chik ri tak'alib'al re ri ja, käkowin k'u ri' chuk'isik ri xuchaplej. We ta mat je ri' konojel ri winaq ri keilowik käkichap na u tze'xik u wäch, ³⁰ kraj ne käkib'ij: "We achi ri' xuchaplej u yakik jun nim ja, man xkowin tä k'ut chub'anik ronojel," —kecha ne. ³¹ We k'u ne k'o jun nim taqanel ri ke' che ch'oj chrij ri nim taqanel re jun tinimit chik, ä mat nab'e kuta' u no'j che retamaxik we kub'an na ri u soldados? Kraj k'o xa lajuj mil u soldados. Ri jun nim taqanel chik kraj e k'o juwinaq mil u soldados. Ri tata' ri k'o xa lajuj mil u soldados kuchomaj na we kekowin ri e are' che ki ch'akik ri juwinaq mil soldados ri kepe na chrij. ³² We ne man käkowin tä che, aretaq k'ä naj e k'o wi ru k'ulel che, keutaq b'i ru taqo'n chutz'onoxik chi kutzir ruk', —kächä'. ³³ Je k'u ri' apachin chiwe ix ri man kuya' tä kan ronojel ri rech are', man kuya' tä ri' kok che tijoxel we, —xcha ri Jesús chke.

Man k'o tä chi u patän ri atz'am we käsach u tzayil

³⁴ Utz ri atz'am. Are k'u we man k'o chik ru tzayil ri atz'am, ä jas lo ruk' kätzayix wi ri rikil? —kächä'. ³⁵ Man k'o tä chi u patän. Man utz tä che ri ulew, man utz tä k'u chumesaxik. Ri winaq xa käkesaj na b'i pa mes, —kächä'. Apachin ri kujikib'a ranima' che nu tatab'exik, chutatab'ej, —xcha ri Jesús chke.

15

Ri Jesús kukoje che k'utb'al jun chij ri xtzaqik

¹ Xenaqajin k'u konojel ri toq'il taq alkab'al xuquje' ri nik'iaj ajmakib' ruk' ri Jesús chutatab'exik. ² Xewixwit k'u ri tata'ib' fariseos xuquje' ri tijonelab' re ri Pixab', xkib'ij: "We achi ri' keuk'ulaj ri ajmakib', käwi' k'u kuk', —xecha'.

³ Ri Jesús xukoj we k'utb'al ri' chuya'ik tijonik chke, xub'ij: ⁴ We k'o jun chech alač ri k'o jun ciento ru chij, kätzaq k'u jun chke, keuya na kan ri jumuch' b'elej lajuj pa taq ri juyub', ke' k'u chutzukuxik ri xtzaq kanoq k'ä kuriqa na wa', —kächä'. ⁵ Aretaq kuriqo, kuya na loq chrij u wi', käkikotik.

⁶ Aretaq kopan chik cho ja, keusik'ij na ri rachi'l xuquje' ru k'ul taq ja, kub'ij chke: "Chixkikot wuk', rumal chi xinriq ri nu chij ri xtzaq na kanoq," —kächä na chke. ⁷ Je k'u ri' kinb'ij chiwe chi k'o na kikitoma! chikaj rumal jun ajmak ri kuk'ex ranima', kuk'ex k'u u chomanik, chkiwäch ri jumuch' b'elej lajuj ri man kajwataj tä u k'exik kanima', —xcha ri Jesús chke.

Ri Jesús kutzijoj ri puag ri xtzaqik

⁸ We k'o jun ixoq ri e k'o lajuj quetzales ruk', kätzaq k'u jun quetzal, ri ixoq kutzij na jun u candela, kumes na ri upaja, kärilij na u tzukuxik k'ä kuriq na ri puag. ⁹ Aretaq kuriqo, keuch'ab'ej na ri rach taq ixoqib' xuquje' ri u k'ul taq ja, kub'ij chke: "Chixkikot wuk', rumal chi xinriq ri nu puag ri xtzaqik," —kächä na chke. ¹⁰ Je k'u ri' kinb'ij chiwe chi kekikot na ri ängeles re ri Dios aretaq jun ajmak kuk'ex ranima', kuk'ex k'u u chomanik, —xcha ri Jesús chke.

Kätzaq ru k'ojol jun tata'

¹¹ Ri Jesús xuquje' xutzijoj wa' chke: Jun achi e k'o kieb' u k'ojol. ¹² Ri ch'ut u k'ojol xub'ij che ru tat: "Tat, ya la ri kinwech'ej in re ri q'inomal la," —xcha che. Ri ki tat k'ut xujach ri jastaq re chkiwäch ri kieb' u k'ojol. ¹³ Xke' kieb' oxib' q'ij, ri ch'ut u k'ojol xumulij b'i konojel ri jastaq re, xe' naj pa jun tinimit chik. Chila' k'ut xaq xusachila wi il ri k'o ruk', xtzaq pa mak, man utz tä chik ru k'aslema! ¹⁴ Aretaq ronojel u sachom chik, xpe jun nimalaj wi'jal pa ri tinimit ri'. Xuriq k'äx ri ala, sib'alaj xnumik. ¹⁵ Xe'k, xutzukuj u chak ruk' jun chke ri winaq re ri tinimit ri'. Xyi' k'u u chak. Xtaq b'i ri ala rumal ri achi che ki yuq'uxik ri aq pa ri juyub'. ¹⁶ Sib'alaj xurayij u tijik re ri rij taq pru't ri käkitij ri aq. Man k'o tä k'u jun winaq ri k'o jas kuya che. ¹⁷ Xul k'u ri ala pa saq, xub'ij: "E k'o k'ia ri ajchakib' cho rachoch ri nu tat ri sib'alaj k'o ri ki wa. Ri in k'ut kinkäm waral rumal ri wi'jal. ¹⁸ Kinwalijik, kine' na ruk' ri nu tat, kinb'ij na che: Tat, ri in, in makuninaq chuwach ri Dios, xuquje' chuwach la, tat. ¹⁹ Ri in, man ya'tal tä chwe chi käb'an chi na la k'ojol la chwe. B'ana b'a' la chi kinok che jun ajchak la," —kincha na che, —kächä'. ²⁰ Xwalijik, xe' k'u ruk' ru tat.

Tajin käb'inik, naqaj chik k'o wi che ri rachoch. Ru tat xril apan chinaj. Xel ranima' ru tat che. Xutik anim, xe'k, xuq'aluj ri ala, xuquje' xutz'umaj. ²¹ Xub'ij k'u ru tat k'ojol che: "Tat, ri in, in makuninaq chuwach ri Dios, xuquje' chuwach la, tat. Man ya'tal tä chik chwe in chi käb'an la k'ojol la chwe," —xcha che ru tat. ²² Xub'ij k'u ru tat chke taq ri patänil re: "Chiwesaxtaj loq ri atz'iaq ri más utz na, chikojo che, chikojo xuquje' jun mulq'ab' che ru q'ab', xuquje' xajäb' chke ri raqan. ²³ Jik'ama loq xuquje' ri alaj ama'

wakäx ri sib'alaj chom, chipila b'a'," —xcha chke. "¡Chujwoq, qab'ana nimaq'ij! ²⁴ Rumal chi we nu k'ojol ri' je' ta ne chi xkämik, xk'astaj k'u loq jumul chik. Xtzaq na, xriqtaj k'ut," —xcha ri tata' chke. Xkichaple j k'u kikotem.

²⁵ Ri u k'ojol nab'eal ri tata' b'enaq pa juyub'. Tzelejem re cho ja, xnaqajin k'u che ri rachoch, xuta ri q'ojom xuquje' ri xojowem. ²⁶ Xusik'ij k'u jun patänil re ru tat, xuta' che: "¿Jas wa' ri kinto?" —xcha che. ²⁷ Xub'ij k'u ri patäninel che: "Ulinaq ri chaq' la. Ri tat la xtaqan k'u chupilik ri alaj ama' wakäx ri sib'alaj chom, rumal chi ulinaq ri ala utz u wäch," —xcha che. ²⁸ Te k'u ri' sib'alaj xpe royowal ri nab'eal, man xraj taj kok b'ik pa ri ja. Xel k'u loq ru tat chub'ochi'xik. ²⁹ Ri nab'eal xch'awik, xub'ij che ru tat: "Qas k'ia junab' in patäninaq che la. Ronojel q'ij nu nimam jas ri käb'ij la chwe. Man k'o tä k'u jumul ri yo'm la xa ta ne jun alaj k'isik' chwe in rech kinb'an nimaq'ij kuk' ri wachi'l," —kächa'. ³⁰ "Aretaq xul we k'ojol la ri', ri xusachila ri jastaq e la kuk' ixogib' re b'e, xkämisaj la ri alaj ama' wakäx ri sib'alaj chom chub'anik nimaq'ij che," —xcha che ru tat. ³¹ Xub'ij k'u ru tat che: "Nu k'ojol, ri at ronojel q'ij at k'o wuk' in, konojel k'u ri jastaq we xuquje' awech at wa'. ³² Rajwaxik u b'anik nimaq'ij, xuquje' kujkikotik rumal chi we a chaq' ri' je' ta ne käminaq chik, xk'astaj k'u loq jumul chik. Xtzaq na wa', xriqtaj k'ut," —xcha che ru k'ojol, —xcha ri Jesús chke.

16

Ri Jesús kutzijoj ri tata' mayordomo ri man utz taj

¹ Xuquje' xutzijoj wa' ri Jesús chke ru tijoxelab': K'o jun q'inom achi, ri k'o jun u mayordomo. Xb'ix k'u che ri q'inom chi ri u mayordomo tajin keuk'is b'i ri jastaq re. ² Ri q'inom achi xusik'ij ri tata' mayordomo, xub'ij che: "¿Jas wa' ri nu tom chawij? Chab'ana kuenta che ri a patäninik chnuwäch. Man kuya' tä chi k'ut katk'oji wuk' che ri nu mayordomo," —xcha ri tata' che. ³ Xuchomaj k'u ri mayordomo pa ranima', xub'ij: "¿Jas ta k'u ne kinb'ano?" —kächa'. "Man kraj tä chi ri nu patrón chi kinchakun na ruk'. Man k'o tä k'u nu chuq'ab' chub'anik taji'n. Kink'ix k'ut che ri molonik," —kächa'. ⁴ "Kinchomaj na ri kinb'ano rech kinkik'ulaj na ri winaq pa taq kachoch aretaq kesax ri nu chak chwe," —xcha'. ⁵ Ri mayordomo xeusik'ij ri rajk'asib' ri rajaw chkijujunal. Xub'ij che ri nab'e ajk'as: "¿Joropa' ri k'as la ruk' ri nu patrón?" —xcha che. ⁶ Xub'ij ri ajk'as che: "Are jun ciento toneles aceite nu k'as," —xcha'. Xub'ij k'u ri mayordomo che: "Waral k'o

wi ru wujil ri k'as la. T'uuyul b'a la chanim ri', tz'ib'aj la nik'iaj ciento," —xcha che. ⁷ Te ri' xub'ij ri mayordomo che jun ajk'as chik: "Ri lal, ¿joropa ri' ri k'as la?" —xcha che. Xch'aw ri ajk'as, xub'ij che: "Wajxaqib' quintales triko ri nu k'as," —xcha'. Xub'ij ri mayordomo che: "Waral k'o wi ru wujil ri k'as la. Tz'ib'aj la waqib' ruk' ri nik'iaj," —xcha che. ⁸ Ri u patrón ri mayordomo xub'ij chi sib'alaj k'o u no'j ri mayordomo ri man utz taj rumal chi xna'w chub'anik ronojel wa'. Are k'u ri winaq ajuwächulew, ri man e kojonelab' taj, k'o na ketam chkiq taj wa' we jastaq ri' chkiwäch ri kojonelab' ri k'o ri u saqil re ru Loq' Pixab' ri Dios pa kanima', —xcha ri Jesús.

⁹ Kinb'ij in chiwe: Chikojo b'a' ri i rajil ri ajuwächulew rech e k'o na iwachi'l. Aretaq käk'is ri i rajil, kixk'ulax pa taq jeqilib'al ri man kek'istaj tä ri', —xcha'.

¹⁰ Apachin jun winaq ri jikom ranima' chub'anik ri man nim tä u b'anik, xuquje' are jikom ranima' chub'anik ri nim na u b'anik. Apachin ri man jikom tä ranima' chub'anik ri man nim tä u b'anik, man jikom tä k'u ri' chub'anik ri nim u b'anik, —kächa'. ¹¹ We ri ix man jikom tä iwanima' ix chukojik ri q'inomal ajuwächulew, ¿jachin ta lo ri käyo'w ri qas q'inomal ajchikaj chiwe? Man k'o taj, —kächa'. ¹² We ri ix man jikom tä iwanima' ix churj ri rech jun winaq chik, ¿jachin ta lo käyo'w chiwe ri qas iwe ix? Man k'o taj, —xcha'.

¹³ Xub'ij xuquje': Man k'o tä jun patäninel ri käkowin che ki patänixik kieb' u patrón, —kächa'. Käretzelaj na u wäch ri jun, loq' k'u na käril na ri' ri jun chik. Utz kub'an na che ri jun u patrón, man nim tä k'u käril wi ri jun chik, —kächa'. Man kixkowin taj kipatänij ri Dios we b'enaq iwanima' ruk' ri puqaq, —xcha ri Jesús.

¹⁴ Xkita k'u ronojel wa' ri tata'ib' fariseos ri sib'alaj loq' käkil wi ri ki rajil. Xketze'j k'u u wäch ri Jesús. ¹⁵ Xub'ij k'u ri Jesús chke: Ri alaq käq'alajisaj ib' alaq chkiwäch ri winaq chi jikom anima' alaq. Are k'u ri Dios retam jas k'o pa anima' alaq, —kächa'. Ri sib'alaj nim kil wi kumal ri winaq, are xab'ib'al wa' cho ri Dios, —xcha chke.

Waral kätzijox wi ri ojer Pixab' xuquje' ru taqanik ri Dios pa ki wi' ri winaq

¹⁶ Xub'ij xuquje': Taqal chke ri winaq chi keniman che ri ojer Pixab' rech ri qa mam Moisés xuquje' chke ri ki tijonik ri q'alajisaj taq re ru Loq' Pixab' ri Dios k'ä mäja' xul ri tat Juan Qasal Ja'. Kämik k'ut ri xul ri tat Juan, xchaplex u tzijoxik ri Utzalaj Tzij re ri Evangelio chri ru taqanik ri Dios pa ki wi' ri winaq. Konojel ri winaq tajin käkitij ki chuq'ab' rech keb'okik.

¹⁷ Man k'äx tä ru sachik ki wäch ri kajulew chuwach ri u sachik jun tzij re ru Loq' Pixab' ri Dios rumal chi tzrajwaxik wi chi käb'antaj na ronojel ri kub'ij ru Loq' Pixab' ri Dios, — xcha ri Jesús.

Ri Jesús kuya tijonik chrij ri tasow ib'

¹⁸ Ronojel achi ri kujach b'i ri rixoqil, kuk'ama chi na jun ixoq chik, kub'an ri nimalaj mak ri äwas u b'anik cho ri Dios xuquje' chrij ri rixoqil. Xuquje' ri achi ri kuk'am jun ixoq ri jachom b'ik rumal ri rachajil kub'an ri' ri nimalaj mak ri äwas u b'anik cho ri Dios xuquje' chrij ri nab'e rixoqil, — xcha ri Jesús.

Waral käqil wi ri xub'an jun achi ri sib'alaj q'inom che ri tat Lázaro ri meb'a'

¹⁹ Xk'oji jun achi ri sib'alaj q'inom, ri kukoj je'lalaj taq atz'iaq ri sib'alaj paqalik. Ronojel q'ij k'ut xub'an k'ok'alaj taq wi'm ri sib'alaj nimag, —kächa'. ²⁰ K'o k'u jun winaq meb'a', tat Lázaro u b'i, q'oyol chuchi ri rachoch ri q'inom. K'o k'u k'ia ri itzel taq ch'a'k che. ²¹ Ri meb'a' kurayij u tijik ri ch'äqataq wa ri ketzaq chuxe' ru mesa ri q'inom. Kenaqajin k'u ri tz'i' ruk' ri tat Lázaro, kekiriq' ri u ch'a'k, —kächa'. ²² Xkäm k'u ri meb'a' tata'. Ri ángeles xkik'am b'ik, xkiya kan ruk' ri qa mam Abraham. Xkäm xuquje' ri q'inom achi, xmuq k'ut, —kächa'. ²³ K'o k'u ri q'inom pa ri k'olib'al ri keb'e' wi ri kanima' ri winaq aretaq kekämik. Sib'alaj k'äx tajin kuriqo. Xka'y apanoq, xril ri qa mam Abraham chinaj, xuquje' chi ri tat Lázaro k'o ruk'. ²⁴ Ko xch'awik, xusik'ij, xub'ij: "Tat Abraham," —kächa'. "Toq'ob'isaj la nu wäch, taqa la loq ri tat Lázaro, kurub' k'u u q'ab' pa joron rech käpetik, kuya jub'iq' chwe rech kinjororik. Xa kinel ch'uj pa we q'aq' ri," —xcha'. ²⁵ Xub'ij k'u ri qa mam Abraham: "Tat, chna'taj chawe chi xariq ri utzalaj taq jastaq at pa ri a'kaslema cho ruwächulew. Are k'u ri tat Lázaro, man k'o tä utzil xuriqo. Kämik k'ut are ku'b'isam ranima' wuk' in waral, ri at k'ut, at k'o pa k'äx'ol," —kächa'. ²⁶ "Kojom k'u jun nimalaj siwan chqaxol rech ri käkaj keq'ax b'i awuk' man kekowin tä che. Ri ajchila' k'ut ri e k'o awuk', man kekowin taj keq'ax loq quk'," —xcha che. ²⁷ Xub'ij ri q'inom tata' che ri tat Abraham: "Kinb'ochi'n b'a' che la, tat Abraham, chi kätaq la b'ik ri tat Lázaro cho rachoch ri nu tat. ²⁸ E k'o job' ri wachalal chila'," —kächa'. "Kwaj chi ri tat Lázaro kutzizoj wa' we k'äx'ol ri' chke rech man kepe tä waral ri sib'alaj käkiriq wi k'äx," —xcha che. ²⁹ Xub'ij k'u ri qa mam Abraham: "K'o ri tz'ib'am kan rumal ri qa mam Moisés, xuquje' ri tz'ib'am kumal ri ojer taq q'alajisal re ru Loq' Pixab' ri Dios. K'o ke ri wuj ri'. Chkitijoj kib' chkiq," —xcha che. ³⁰ Xub'ij k'u ri q'inom: "iQas

tzij, tat Abraham! Man kekojon tä k'u chke. We ta k'u k'o jun käminaq ri käk'astajik, ri ke' kuk', käkik'ex na ri' ri kanima', käkik'ex ri ki chomanik," —xcha'. ³¹ Xub'ij ri mam Abraham che: "We man käkinimaj tä ri qa mam Moisés xuquje' ri ojer taq q'alajisal re ru Loq' Pixab' ri Dios, man kekojon tä na ri' pune che jun winaq ri käk'astaj b'i chkixol ri käminaqib'," —xcha ri qa mam Abraham che, —xcha ri Jesús chke ri tata'ib' fariseos.

17

Ri Jesús kub'ij chi käqachajij qib' rech man kujtzaq tä pa mak

¹ Xub'ij ri Jesús chke ru tijoxelab': Tzk'o wi jachike ri kub'ano chi jun winaq chik kuriq ri b'e ri man utz taj, kätaqchi'x k'u che mak. iK'äx re ri winaq ri' ri rumal rech käb'antaj wa'! —kächa'. ² Are utz na we ta käxim jun ka' re molino chuqul ri winaq ri', käk'iaq ta k'u b'i pa ri mar, jutz k'u na ri' chuwach ru b'anik chi jun chke we alaj taq ch'utiq ri' kuriq ri b'e ri man utz taj! ³ Chiwila b'a' iwib', —xcha chke.

Xub'ij k'ut: We kämakun ri awachalal, kub'an jun k'äx chawe, chapixb'aj wa'. We kuk'ex ranima', kuk'ex k'u u chomanik, chasacha ru mak, —kächa'. ⁴ We kämakun chawij wuqub' mul pa jun q'ij, kätzelej k'u awuk', kub'ij: "Man kinb'an tä chik," —kächa'. Rajwaxik k'ut chi ri at kasach ru mak, —xcha ri Jesús chke.

Waral käqil wi ri käkowin jun winaq chub'anik we qas tzij käkojonik

⁵ Xkib'ij ri apóstoles che ri Qajaw Jesús: B'ana b'a' la chqe chi sib'alaj kujkojon na, — xecha che.

⁶ Xub'ij ri Qajaw Jesús chke: We ta kixkojonik xa ta ne jub'iq' je' jas ru nimal jun alaj ija' re mostaza, kuya kib'ij na ri' che we che' sicómoro ri': "Chab'oqo' awib', chatika awib' pa ri mar," —kixcha che. Käniman k'u na wa' we che' ri' chiwe, —xcha chke.

Waral käqil wi ri ki b'anik ri kepatäninik

⁷ We k'o jun chiwe ri k'o jun patänin ri kub'an taji'n, we ne ke' pa yuq', aretaq k'ut kätzelej loq iwuk' cho ja, ¿jas kib'ano? ¿A k'o lo jun chiwe ri kub'ij na che ri ajchak: "Tasa'j chanim, chatt'uyul chi' ri mesa, chatwoq"? —kixcha che, —kächa ri Jesús. ⁸ Man je' taj. Xane kib'ij ri' che ri patäninel: "Chab'ana ri kintijo. Chasuk'umaj awib', chaya ri nu wa rech kinwi'k. Te ri' kuya' katwi' at," —kixcha che, —kächa'. ⁹ ¿A k'o maltioxinik ri' che ri patäninel rumal chi xub'an ri xtaq wi? Man k'o taj, —kächa'. ¹⁰ Je ri' ri ix xuquje', aretaq i b'anom chik ronojel ri ix taqom wi, chib'ij na chb'il iwib': "Ri uj, uj patäninelab' ri man k'o tä qa patän, rumal chi xqa'n xaq xuwi ri' ri tzrajwaxik u b'anik," —kixcha na, —xcha ri Jesús.

Lajuj achijab' ri k'o itzel ch'a'k chkij kekunax rumal ri Jesús

¹¹ B'enaq k'u ri Jesús pa Jerusalén, ok'owem kub'an chkixol ri Galilea ruk' ri Samaria. ¹² Aretaq xopan pa jun alaj tinimit, xriqtaj ri Jesús kumal lajuj achijab' ri k'o itzel taq ch'a'k chkij. Xetak'i k'u chinaj. ¹³ Ko xech'awik, xkib'ij: ¡Tat Jesús! ¡Ajti! ¡Toq'ob'isaj la qa wäch! —xcha che.

¹⁴ Xerilo, xub'ij chke: Jik'utu iwib' chkiwäch ri tata'ib' sacerdots, —xcha che.

Pa ri ki b'ik k'ut, are chi' xekunaxik. ¹⁵ Aretaq jun chke xriilo chi kunam chik, xtzelejik, ko xch'awik, xunimarisaj u q'ij ri Dios. ¹⁶ Xuxuk rib' cho ri Jesús, sib'alaj xmaltoxik che. Aj Samaria k'ut we achi ri'. ¹⁷ Xub'ij k'u ri Jesús: ¿A mat ne e lajuj ri xekunaxik? E k'u ri b'elejeb', ¿jawiye' e k'o wi? —käch'a'. ¹⁸ Xaq xuwi wa' we achi ri' ri man qa winaqil taj xtzelej loq, kunimarisaj k'u u q'ij ri Dios, —xcha ri Jesús.

¹⁹ Xub'ij ri Jesús che: Chatwalijoq, kuya' kate'k. At kunam chik rumal chi xatkojonik, —xcha che.

Ri Jesús kub'ij jas kub'an ru taqanik ri Dios kápetik

²⁰ Aretaq ri tata'ib' fariseos xkita' che ri Jesús jampa' käpe ru taqanik ri Dios cho ruwächulew, xub'ij ri Jesús chke: Ri u petik ru taqanik ri Dios cho ruwächulew man kil-itaj tä ri', —käch'a che. ²¹ Man käb'ix tä na che: "Chawilampe", k'o chi ri'. Jawilampe', k'o chila', —käch'a'. Man je' taj rumal chi ya ulinaq chi ri Dios iwuk' che taqanik, —xcha che.

²² Xub'ij k'u ri Jesús chke ru tijoxelab': Kopan na ri q'ij ri sib'alaj kirayij chi ri in, in ri' ri Ralk'ual ri Dios ri Qas Winaq, k'o iwuk', man in k'o tä chik, —käch'a'. ²³ Ri winaq käkib'ij na chiwe: "Chiwilampe", k'o chi ri'. Jiwilampe', k'o chila', —kecha na. Mixe' k'ut, mixteri b'i kuk', —xcha ri Jesús chke. ²⁴ Je' jas ri kaypa' kusaqirisaxtaj ronojel ri kaj, q'alaj wa' chkiwäch konojel ri winaq, je ri' xuquje' ri q'ij aretaj chi ri in, in ri' ri Ralk'ual ri Dios ri Qas Winaq, kinpetik, —käch'a'. ²⁵ Rajwaxik k'ut chi nab'e sib'alaj kinriq na k'äx, ketzela na nu wäch kumal ri winaq re we q'ij junab' ri', —käch'a'. ²⁶ Jas ri xka'n ri winaq ojer pa ru q'ij ri qa mam Noé, je ri' xuquje' käb'antaj na pa taq ri q'ij ri kintzelej loq, in ri' ri Ralk'ual ri Dios ri Qas Winaq. ²⁷ Xewi' ri winaq, xka'n nimaq'ij, xek'uli'k, xkiya k'u ri kalk'ual pa taq k'ulanem k'ä pa ri q'ij ri xok b'ik ri qa mam Noé pa ri nimalaj barco. Xpe k'u ri nimalaj q'eqal jäb', xusach k'u ki wäch konojel, —käch'a'. ²⁸ Je ri' xuquje' jas ri xka'n ri winaq ojer pa ru q'ij ri qa mam Lot, xewi' ri winaq, xka'n nimaq'ij, xeloq'omanik, xek'iyinik, xetiko'nik, xkiyak taq kachoch. ²⁹ Pa ri q'ij ri xel b'ik ri qa

mam Lot pa ri tinimit Sodoma, xqaj loq q'aq' ruk' q'ol chikaj, xusach k'u ki wäch konojel ri winaq. ³⁰ Je' käb'an na wa' pa ri q'ij ri käq'alajin na jachin ri' ri Ralk'ual ri Dios ri Qas Winaq, —xcha che.

³¹ Pa ri q'ij ri', ri winaq ri k'o puwi' ri ja, mok chi b'ik che ki k'amik b'i ri jastaq re ri e k'o kan chupam ri ja. Xuquje' ne ri k'o pa juyub' mätzelej chi na cho ja, —käch'a'. ³² Chna'taj ri rixoqil ri mam Lot chiwe. ³³ Ri kutzukuj u chajixik rib', kutzaq na ronojel, käkäm k'u na wa'. Apachin k'u ri kutzaq ru k'aslemal, käto'taj na wa', —xcha che.

³⁴ Qas tzij kinb'ij chiwe chi pa ri aq'ab' ri', kek'oji na kieb' pa jun ch'at. Jun chke käk'am na b'ik, ri jun chik käyi' na kanoq. ³⁵ Kek'oji na kieb' ixoqib' ri tajin kek'e'n junam. Jun chke käk'am na b'ik, ri jun chik käyi' na kanoq. ³⁶ Kek'oji na kieb' achijab' kachi'l kib' pa taq juyub'. Jun chke käk'am na b'ik, ri jun chik käyi' na kanoq, —xcha ri Jesús chke.

³⁷ Xkib'ij k'u che ri Jesús: ¿Jawiye' käb'an wi wa', Qajaw? —xcha che.

Xch'aw chi ri Jesús, xub'ij: Ri käk'oji wi na ri ki b'aqil ri käminaqib', chila' k'ut käkimulij wi na kib' ri k'uch, —xcha che.

18

Waral kätzijox wi ri chichu' malka'n ruk' ri q'atal tzij ri man jikom tä ranima'

¹ Ri Jesús xutzijoj chi na jun k'utb'al chuya'ik tijonik chke ru tijoxelab' chuk'utik chkiwäch chi rajwaxik u b'anik orar amaq'el ronojel q'ij, mäk'istaj k'u ki k'ux. ² Xub'ij k'u che: Pa jun tinimit k'o wi jun q'atal tzij ri man kuxej tä rib' cho ri Dios, man nim tä k'u keril wi ri winaq. ³ Xuquje' k'o jun chichu' malka'n pa ri tinimit ri', ri amaq'el kopan ruk', kutz'onoj che: Chinto' la pu q'ab' ri nu k'ulel, —käch'a che. ⁴ Xke' k'ia ri q'ij ri q'atal tzij man kraj taj kuto' ri chichu'. Te k'u ri' xchoman pa ranima', xub'ij: "Pune man kinxej tä wib' cho ri Dios, man nim tä k'u kinwil wi jun winaq. ⁵ kinto' na we chichu' malka'n ri' rumal chi sib'alaj kuya latz' chwe. We man kinb'an q'atow tzij puwi' ruk' jikomal, käpe na ri chichu' amaq'el ronojel q'ij, sib'alaj kinukos na," —xcha ri'.

⁶ Xub'ij k'u ri Qajaw Jesús: Chitatab'ej b'a' jas ri xub'ij ri q'atal tzij ri man jikom tä ranima', —käch'a'. ⁷ ¿A mat ri Dios kub'an na q'atow tzij ruk' jikomal pa ki wi' ri winaq ri xeucha' che ki to'ik, ri keb'ochi'n che chi paq'ij chi chaq'ab'? ¿A mat chanim keuto' na wa'? —käch'a'. ⁸ Je', kinb'ij chiwe chi chanim kätob'an na chke, —käch'a'. Aretaq k'ut ri in, in ri' ri Ralk'ual ri Dios ri Qas Winaq, kintzelej na loq, ¿a keinriq ne lo winaq ri qas kekojon chwe? —xcha che.

Waral kätzijox wi ri tata' fariseo ruk' ri toq'il alkab'al

⁹ Xutzijoj k'u we k'utb'al rech tijonik ri' chke jujun winaq ri kechoman chikij chb'il kib' chi sib'alaj e utz na, ri kaketzelaj k'u ki wäch ri jule' chik.

¹⁰ Xub'ij chke: E k'o kieb' achijab'. Jun chke are jun tata' fariseo. Ri jun chik are toq'il alkab'al. Xeb'ok k'u b'i pa ri nimalaj rachoch Dios rech kaka'n orar. ¹¹ Tak'al k'u ri fariseo, xub'an orar chb'il rib', xub'ij: "O Dios, maltiox che la chi ri in man in tä junam kuk' ri nik'iaj winaq chik, ri elaq'omab', ri winaq ri man käkib'ij tä jikomal tzij, ri kaka'n nimalaj mak, man in junam tä k'u ruk' we jun toq'il alkab'al ri'. ¹² Ri in kinb'an ayunar kamul ronojel semana. Kinya k'u ru lajujil joropa' ri kinriqo, —xcha ri tata' fariseo. ¹³ Are k'u ri toq'il alkab'al, tak'al chinaj, man kraj tä k'u kaka'y chikaj, xane kut'ok u wo u k'ux chuk'utik chi káb'isonik, kub'ij: "¡Ay, Dios! We ne kápax k'ux la chwe in, in wa' sib'alaj in ajmak, —xcha'. ¹⁴ Qas tzij kinb'ij chiwe chi we achi ri' xe' cho rachoch jikom chik ri ranima' cho ri Dios. Man je' tä k'u ri jun chik, ri tata' fariseo. Are k'u ri winaq ri kunimarisaj rib' cho ri Dios, káqasax na u q'ij. Apachin k'u ri kub'an che chb'il rib' chi man nim tä u b'anik, kánimarisax na u q'ij wa', —xcha ri Jesús chke.

Ri Jesús keutewchij ri alaj taq ak'alab'

¹⁵ Xek'am k'u b'i ri ak'alab' cho ri Jesús rech kuya ru q'ab' pa ki wi'. Ru tijoxelab' xk-ilo, xekiyaj ri winaq. ¹⁶ Ri Jesús xeusik'ij ru tijoxelab', xub'ij chke: Chiya chke ri ak'alab' chi kepe wuk', meiq'atej, —kacha'. Xaq xuwi chke ri winaq ri e je' jas ri ak'alab' ri' käyi' wi chi kátaqan ri Dios pa ki wi'. ¹⁷ Qas tzij ri kinb'ij chiwe chi ri winaq ri man kákina' tä pa kanima' chi ri e are' je' ta ne ak'alab' cho ri Dios, man käkik'ulaj tä k'u ru taqanik ri Dios, man käyi' tä chke chi keb'okik, —xcha ri Jesús chke.

Jun ala sib'alaj q'inom kätzjon ruk' ri Jesús

¹⁸ K'o k'u jun chke ri ki nimaqil ri winaq xuta' che ri Jesús, xub'ij: Utzalaj Ajtij, ¿jas kinb'an in rech kinriq ri k'aslema' ri man kák'istaj taj? —xcha che.

¹⁹ Xub'ij k'u ri Jesús: ¿jas che kab'ij utz chwe? Man k'o tä jun ri qas utz, xane xaq xuwi ri Dios, —kacha ri'. ²⁰ Awetam k'u ru Loq' Pixab' ri Dios ri kub'ij: "Matkámisanik, mab'an ri nimalaj mak ri áwas u b'anik ruk' ri rixoqil jun winaq chik, mab'an elaq', mab'an tzij chrij jun winaq chik, nim cheawila wi ra tat, ra nan, —kacha ri Pixab', —xcha ri Jesús che.

²¹ Xub'ij ri achi che ri Jesús: Ronojel wa' nu nimam tzpa ri wak'alal, —xcha che.

²² Xuta wa' ri Jesús, xub'ij che: K'o na ri mája' kab'ano. Jak'iyij konojel ri jastaq awe, chaya ri rajil chke ri meb'a'ib'. Kák'oji k'u na ra q'inomal chila' chikaj, —kacha'. Te k'u ri kuya' katteri wuk'. Jo' b'a', —xcha che.

²³ Aretaq ri achi xuta wa', sib'alaj xk'extaj ru wäch pa b'is, xk'äxx'ob' ri ranima' rumal chi sib'alaj nim ru q'inomal k'olik. ²⁴ Ri Jesús xrilo chi sib'alaj káb'isonik, xub'ij: ¡Sib'alaj k'äx ri keb'okik ri q'inomab' ruk' ri Dios rech kátaqan pa ki wi'! —kacha'. ²⁵ Are man k'äx taj ri rok'owisaxik jun kiej camello* pa ri u julil jun t'isomb'al baq chuwäch ri rorik jun winaq q'inom ruk' ri Dios rech kátaqan puwi', —xcha chke.

²⁶ Ri winaq ri xetowik xkib'ij che ri Jesús: We je ri', ¿jachin ta k'u lo ri kákwon churiqik ru tob'anik ri Dios? —xcha che.

²⁷ Xub'ij k'u ri Jesús chke: Ri man kekowin tä ri winaq chub'anik, are k'u wa' kákwon ri Dios che, —xcha chke.

²⁸ Xub'ij ri tat Pedro: Qajaw, chilampe la chi ri uj qa yo'm kan ri jastaq qe rech kujk'oji uk' la, —xcha ri'.

²⁹ Ri Jesús xub'ij che: Qas tzij ri kinb'ij chiwe chi we k'o jun winaq ri u yo'm kan ri rachoch, ri rixoqil, ri rachalal, ru tat, u nan, ri ralk'ual rech kinuto' chutzijoxik ru taqanik ri Dios, ³⁰ kuriq na k'ia chuwäch wa' pa taq we q'ij junab' ri'. Kuriq k'u na ri k'aslema' ri man k'o tä u k'isik pa taq ri junab' ri kepe na, —xcha chke.

Ri Jesús kutzijoj chi na jumul ru kámikal

³¹ Ri Jesús xeut'kam b'i ri kab'lajuj u taq'o'n pa ki tukiél wi, xub'ij k'u chke: Kujpaqi na b'ik, kuje' na pa ri tinimit Jerusalén. Ronojel k'u ri tz'ib'am kan kumal ri ojer taq q'alajisal re ru Loq' Pixab' ri Dios chwij in, in ri' ri Ralk'ual ri Dios ri Qas Winaq, káb'antaj na wa' chwe, —kacha'. ³² Kinkijach k'u na b'ik pa ki q'ab' ri nik'iaj winaq chik. Káketz'b'ej na nu wäch, kinkiyog' na, xuquje' kákichub'aj na nu palaj. ³³ Kinkirapuj na, te k'u ri' kinkikámisaj. Churox q'ij k'ut kink'astaj na chkixol ri káminaqib', —xcha ri Jesús chke.

³⁴ Ri tijoxelab' man k'o tä k'u jun chke ri kuch'ob' ri u tzij ri Jesús. Xb'an k'u chke chi man keq'alajin tä wa' we tzij ri' chkiwäch. Are k'u ri xb'ix chke man kuya' taj kákich'ob'o.

Jun moy achi kaka'yik

³⁵ B'enam re ri Jesús, tajin kánaqajin che ri tinimit Jericó. K'o k'u jun moy achi t'uyul chuchi' ri b'e ri tajin kámolonik. ³⁶ Aretaq xuto chi k'ia winaq tajin keok'owik, xuta' jas tajin káb'anik, xub'ij: ¿jas ri? —xcha'.

* **18:25** Ri camello are jun awaj ri kuya' kákijejen jun chrij, más k'ut kákoj che taq eqa'n. Nim na ri' chuwäch jun kiej.

³⁷ Xkib'ij che: Are ri tat Jesús aj Nazaret ri tajin kok'owik, —xecha che. ³⁸ Ko xch'aw ri moy achi, xub'ij: ¡Tat Jesús! —kácha'. ¡Lal ri' ralk'ual kan ri qa mam David, toq'ob'isaj la nu wäch! —xcha che.

³⁹ Ri winaq ri e tak'atoj chuwäch xeyajon che, xkib'ij chi mäch'aw chik. Ri are' k'ut ko na xuraq u chi', xub'ij: ¡Tat, ri lal ralk'ual kan' ri qa mam David, toq'ob'isaj la nu wäch! —xcha che.

⁴⁰ Xtak'i k'u ri Jesús, xtaqan chuk'amik loq ri tata' ruk'. Aretaq ri moy achi k'o chi ruk' ri Jesús, xub'ij ri Are' che: ⁴¹ ¿Jas kaj la chi kinb'an che la? —xcha che.

Xub'ij k'u ri moy achi: Tat, kwaj kinka'y chik, —xcha che.

⁴² Xub'ij k'u ri Jesús che: ¡Ka'y b'a' la! —kácha che. Rumal chi kákojon la, xkunataj la kanog, —xcha che.

⁴³ Chanim k'ut ri moy achi xka'yik, xteri b'i chrij ri Jesús, kunimarisaj u q'ij ri Dios. Xuquje' konojel ri winaq xkinimarisaj u q'ij ri Dios aretaq xkilo ri xb'an che ri moy achi.

19

Ri Jesús kuriq rib' ruk' ri tat Zaqueo

¹ Opaninaq chi k'u ri Jesús pa Jericó, ok'owem tajin kub'an chupam ri tinimit. ² K'o jun achi, Zaqueo u b'i, jun chke ri ki nimaqil ri toq'il taq alkaab'al. Q'inom k'u wa' we achi ri'. ³ Xutzukuj rilik u wäch ri Jesús che retamaxik jachin ri'. Man kákowin tä k'ut rumal chi e k'ia ri winaq, xaq k'u ko'l raqan ri tat Zaqueo. ⁴ Xutik anim, xnab'ej b'i chkiwäch ri winaq, xpaqi k'u puwi' jun che' sicómoro che rilik ri Jesús, rumal chi chila' kok'ow wi na ri are'. ⁵ Xopan k'u ri Jesús pa ri k'olib'al ri', xka'y aq'an ajsik, xril ri tat Zaqueo, xub'ij che: Chanej la, qaj la loq. Rajwaxik chi kámik kinkanaj kan cho achoch la, —xcha che.

⁶ Te k'u ri' xqaj loq ri tat Zaqueo puwi' ri che'. Xuk'ulaj ri Jesús, sib'alaj xkikotik. ⁷ Xilitaj k'u wa' kumal konojel ri winaq, xewixwitik, xkib'ij: Ula'm ri tat Jesús rumal jun achi sib'alaj ajmak, xe' k'u ruk', —xecha ri'. ⁸ Xtak'i k'u ri tat Zaqueo, xub'ij che ri Jesús: Tampe la ri kinb'ano. Pa nik'iaj ri jas-taq we kinya na chke ri meb'a'ib'. Xuquje' we k'o jas nu q'ipom chrij jun winaq, kinka-jmulij na u tzelexik wa' che, —xcha'.

⁹ Xub'ij ri Jesús che: Kámik xriq la ru tob'anik ri Dios, xuquje' ri winaq ri e k'o cho achoch la, rumal chi káq'alajinik chi lal ri' are qas rachalal ri qa mam Abraham, —kácha'. ¹⁰ Ri in, in ri' ri Ralk'ual ri Dios ri Qas Winag, in petinaq che ki tzukuxik ri winaq ri e tzaqinaq, xuquje' che ki to'ik, —xcha ri Jesús.

Ri Jesús kutzijo ri k'utb'al chrij ri puaq ri jachom chke ri patäninelab'

¹¹ Ri winaq ki tatab'em we tzij ri', ri Jesús xuchaplej u tzijoxik jun k'utb'al chik re tijonik chke rumal chi kenaqajin chik che ri tinimit Jerusalén. Xkichomaj ri winaq chi ri Dios kuk'ut na rib' chkiwäch chanim, kuchaplej k'u taqanik pa ki wi'. ¹² Xub'ij k'u ri Jesús chke: K'o jun achi, nim u b'anik, ri xe' naj pa jun tinimit chik rech kok che nim taqanel pa ki wi' ri winaq re ri tinimit ri'. Kuchomaj ri tata' chi aretaq káto'taj chila', kátzelej chi na loq cho ja. ¹³ Ri achi k'ut xeusik'ij lajuj chke ri patänil re, xeuja juwinaq quetzales chke chkiujunal. Xub'ij k'u chke: “Chikojo wa' we puaq ri' rech k'o kich'ak na chrij. Chib'ana wa' k'a kopan na ri q'ij ri kintzelej loq,” —xcha chke. ¹⁴ Are k'u ri winaq re ri tinimit ri ke' wi, sib'alaj káketzelaj u wäch, xekitaq k'u b'i nimaq tata'ib' chrij chub'ixik: “Man káqaj tä wa' we achi ri' che nim taqanel pa qa wi',” —xecha che. ¹⁵ Pune je ri' xok k'u na che nim taqanel. Aretaq xtzelej loq cho ja, xtaqanik chi kesik'ix loq ri patäninel taq re, ri xek'amow ri puag, rech káretamaj na jas ri ki ch'akom chkiujunal. ¹⁶ Xopan k'u ri nab'e patänil re ruk', xub'ij: “Tat, ri rajil la xuch'ak chi lajuj mul je' jas ri xya la chwe,” —xcha'. ¹⁷ Xub'ij k'u ru patrón che: “Utz a b'anom, utzalaj patänil we,” —kácha'. “Katinkoj na che taqanel pa ki wi' lajuj tinimit rumal chi utz a b'anom at chrij ri jun alaj chak,” —xcha che. ¹⁸ Xopan k'u rukab' patänil re, xub'ij che: “Tat, ri rajil la u ch'akom chi job' mul je' jas ri yo'm la chwe,” —xcha che. ¹⁹ Xub'ij k'u ru patrón che: “Ri at k'ut katkoj na che taqanel pa ki wi' job' tinimit,” —xcha che. ²⁰ Xopan chi k'u jun chik patänil re, xub'ij: “Tat, ri' ri rajil la ri k'o wuk', nu k'olom k'u wa' pa jun su't,” —kácha'. ²¹ “Je' nu b'anom wa' rumal chi kinxej wib' chuwäch la. Ri lal k'ut sib'alaj k'a'n la. Kák'am la ri man ech tä la, káq'at k'u la ri man tikom tä la,” —xcha che. ²² Xub'ij k'u ri nim taqanel che: “¡Ay, patänil we ri sib'alaj man utz taj! King'at na tzij pa wi' ruk' ri tzij ri a b'im chwe. Awetam k'ut chi ri in sib'alaj in k'a'n, chi kink'am ri man wech taj, king'at k'u ri man nu tikom taj,” —kácha'. ²³ “¿Jas che man xaya tä ri nu rajil ruk' jun winaq ri káyo'w pa jalomal rech kintoq'ij ruk' ral aretaq kinulik?” —xcha che. ²⁴ Xub'ij k'u chke ri e tak'atoj chunaqaj: “Chiwesaj ri puag ri k'o ruk', chiya che ri patänil we ri k'o ri lajuj cientos quetzales ruk',” —xcha chke. ²⁵ Xkib'ij k'u che: “Tat, ya k'o chik lajuj cientos quetzales ruk',” —xecha che. ²⁶ Xub'ij k'u chke: “Kinb'ij chiwe chi ronojel jachin ri k'o k'o ruk', káyataj na

† 18:39 Ri “Ralk'ual kan ri qa mam David” kel kub'ij “To'l Qe”, junam jas ri tzij “Cristo” o “Mesías”.

más che. Apachin k'u ri man k'o tä k'o ruk', kesax na che ri jub'iq' ri k'olik," —kächa chke. ²⁷ "Are k'u ri nu k'ulel, ri man xkaj taj chi kintaqan pa ki wi', chik'ama loq, chikämisaq wa' chnuwäch," —xcha chke, —xcha ri Jesús chke ri winaq.

Kok ri Jesús pa ri tinimit Jerusalén

²⁸ Aretaq xb'itaj wa' rumal ri Jesús, xnab'ej chkiwäch, xutaqej ru b'e, xe' k'u pa ri tinimit Jerusalén. ²⁹ Naqaj chi k'u e k'o wi che ri tinimit Betfaqe, xuquje' ri tinimit Betania chuwach ri juyub' u b'i'am Ujuyub'al Olivos, xeutaq b'ik kieb' chke ru tijoxelab'. ³⁰ Xub'ij k'u chke: Jix pa ri alaj tinimit ri k'o apan chqawäch. Aretaq ix opaninaq chi chila', kiriqa na jun burro yuqulik, ri man k'o tä jumul jun winaq kiejeninaq chrij. Chikira wa', chik'ama loq, —kächa chke. ³¹ We k'o jun kuta' chiwe: ¿Jas che kikiro? —kächa ne. Je' kib'ij wa' che: Xa kajwataj wa' che ri Qajaw Jesús, —kixcha che, —xcha ri Jesús chke.

³² Xeb'e' k'u ri tijoxelab' ri xeutaq b'ik, je' xekirija qas ri xub'ij ri Jesús chke. ³³ Tajin käkikir ri burro aretaq ri ajchaq'el xkita' chke, xkib'ij: ¿Jas che tajin kikir ri burro? —xecha chke.

³⁴ Ri e are' xkib'ij: Xa kajwataj wa' che ri Qajaw Jesús, —xecha chke.

³⁵ Xkik'am k'u b'ik, xkiya k'u che ri Jesús. Xkikoq ri ki q'u' chrij, xkiya k'u ri Jesús chrij. ³⁶ Kiejeninaq ri Jesús, tajin käb'inik. Xkikil' ri ki q'u' pa ri b'e. ³⁷ Naqaj chi k'u e k'o wi che ri Jerusalén, xeopan pa ri xulanik re ri Ujuyub'al Olivos. Konojel ri k'alaj taq u tijoxelab' xkichaplej kikitom, ko xech'awik, xkinimarisaq u q'ij ri Dios rumal konojel ri nimaq taq kajmab'al ri kilom. ³⁸ Käkib'ij k'ut: jTewchim b'a' ri Nim Taqanel ri petinaq pa ru b'i' ri Qajaw Dios! —kecha'. Xuxlan na qanima' rumal ri Dios chikaj. jChnimarisax b'a' u q'ij ri Dios ajchikaj! —xecha ri winaq.

³⁹ Jujun chke ri tata'ib' fariseos ri e k'o chkixol ri k'alaj winaq xkib'ij che ri Jesús: Ajtij, cheyaja la ri tijoxelab' la, —xecha che.

⁴⁰ Ri Jesús xch'awik, xub'ij chke: Qas tzij, we ta mat kech'aw wa' we winaq ri', are ko kech'aw na ri ab'aj, —xcha chke.

⁴¹ Aretaq xenaqajin che ri tinimit, ri Jesús xoq' pa ki wi' ri winaq aj Jerusalén. ⁴² Xub'ij: Kwaj ta ne chi pa we q'ij ri' kiwetamaj jachin ri' ri käkowinik kuya utzil chixol. K'u'tal k'u wa' kämik chiwäch, —kächa'. ⁴³ Kepe k'u na ri q'ij chiwij aretaq ri k'alaj i k'ulel käka'n na jun k'otom chrij ri tinimit, käkisutij na rij, sib'alaj k'u kälilatz'ob'isaj na wa', —kächa'. ⁴⁴ Kekiwulij na kan ri iwachoch cho ulew, kixkikämisaq na. Man käkanaj tä k'u na kan jun ab'aj puwi' jun ab'aj chik, —kächa'. Are k'u rumal wa' chi man iwetam taj chi pa we q'ij ri' ri Dios xixusolij, —xcha chke.

Ri Jesús käresaj ri man utz taj pa ri nimalaj rachoch Dios

⁴⁵ Xok k'u b'ik ri Jesús pa ri nimalaj rachoch Dios, xuchaplej kesaxik b'ik ri ajk'ayib', xuquje' ri loq'omanelab'. ⁴⁶ Xub'ij k'u chke: Tz'ib'am k'ut pa ru Loq' Pixab' ri Dios: "Ri wachoch in are ja ri käb'an wi orar," —kächa ri Tz'ib'talik. Ri alaq k'ut, kachoch elaq'omab' b'anom alaq che, —xcha ri Jesús chke.

⁴⁷ Ronojel q'ij ri Jesús xuya tijonik pa ri nimalaj rachoch Dios. Are k'u ri ki nimaqil sacerdotes, ri tijonelab' re ri Pixab', xuquje' ri ki nimaqil ri winaq re ri tinimit xkitzujuk u kämisaxik. ⁴⁸ Man xkiriq tä k'ut jas käka'n che, rumal chi konojel ri winaq ki jikib'am kanima' chutatab'exik ri kub'ij chke.

20

Kätzijox ru taqanik ri Jesús

¹ Pa jun q'ij ri Jesús tajin keutijoj ri winaq pa ri nimalaj rachoch Dios, tajin kutzijoj ri Utzalaj Tzije ri Evangelio chke. Xeopan k'u ri ki nimaqil taq sacerdotes kuk' ri tijonelab' re ri Pixab' xuquje' ri ki nimaqil ri winaq. ² Xkib'ij k'u chke: jJachin xtaqow la chi ri lal käb'an la wa' we ri'? jJachin lo ri yo'winag taqanik pa q'ab' la chi je' käb'an la wa'? —xecha che.

³ Xch'aw ri Jesús, xub'ij chke: Ri in xuquje' k'o jas kinta' chech alaq, —kächa'. B'ij alaq chwe: ⁴ jJachin xtaqow ri tat Juan chub'anik qasna'? jA are ri Dios, o are ri winaq? jJachin xyo'w che chi je' kub'an wa'? —xcha chke.

⁵ Xkitzjob'ela kib', xkib'ij: We käqab'ij chi are ri Dios, ri are' kub'ij na chqe chi jas che man xqakoq tä wa', —kecha'. ⁶ We k'u käqab'ij chi xa are ri winaq, konojel ri winaq kujka'n na che ab'aj. Elinaq k'u chi saq chkiwäch ri winaq chi ri tat Juan are q'alajisal re ru Loq' Pixab' ri Dios, —xecha ri'.

⁷ Xech'aw chik, xkib'ij che ri Jesús chi man käkich'ob' tä wa' chi jachin ri' ri xyo'w che ri tat Juan chi kub'an qasna'. ⁸ Xub'ij k'u ri Jesús chke: Xuquje' ri in man kinb'ij tä in chech alaq jachin ri yo'winag chwe chi in kinb'an wa' we ri', —xcha ri Jesús chke.

Waral kätzijox wi ri k'utb'al chkiy ri ajchakib' ri man e utz taj

⁹ Ri Jesús xuchaplej u tzijoxik wa' we k'utb'al ri' re tijonik chke ri winaq: K'o jun achi ri xub'an jun tikb'al uvas. Xtikonijik, xuya k'u kan ri ulew pa qajomal chke jujun tajinelab'. Te k'u ri' xe' naj pa jun tinimit chik, naj xsachik. ¹⁰ Xopan k'u ri q'ij re ru yakik ri wächinik, xutaq b'i jun patänil re kuk' ri ajchakib' rech käkiya b'i nik'iaj re ri u wäch ri tikb'al uvas. Are k'u ri ajchakib' xkich'ayo, xkitaq b'ik, man k'o tä xkiya b'i che, —kächa'. ¹¹ Xutaq k'u b'i jun u patäninil

chik. Xuquje' wa' xkich'ayo, xketzelaj u wäch, xkitaq b'ik, man k'o tä xkiya b'i che, —kächa'. ¹² Churox mul xutaq b'ik jun patänil re kuk'. Xkisok wa', xuquje' xkesaj b'i pa ri tikb'al uvas, —kächa'.

¹³ Te k'u ri' xuchomaj ri rajaw ri tikb'al uvas, xub'ij: "¿Jas ta k'u lo kinb'ano?" —kächa'. "Kintaq na b'ik ri loq'alaj nu k'ojol. Kraj ne nim kākil wi ri are' aretaq kākilo," —xcha ri'. ¹⁴ Ri ajchakib', aretaq xkilo, xkich'ab'ej kib', xkib'ij: "¡Chawilampe! Are wa' ri kechb'en na ronojel," —kecha'. "Chixsa'j, qakāmisaj ri achi rech kāqechb'ej na wa' we ulew ri'," —xecha ri'. ¹⁵ Xkesaj k'u b'i ru k'ojol ri ajchaq'el ri tikb'al uvas, xkikāmisaj k'ut, —xcha ri Jesús chke.

Te ri' xuta' ri Jesús chke, xub'ij: ¿Jas k'u kub'an na ri rajaw ri tikb'al uvas chke? —kächa ri'. ¹⁶ Käpe na ri are', keukāmisaj na ri ajchakib' ri', kuya na ri rulew chke jule' chik, —xcha ri Jesús chke.

Aretaq xkita wa', xkib'ij ri winaq: ¡Ay, mǎb'antaj wa'! —xecha che.

¹⁷ Xka'y k'u ri Jesús chke, xub'ij: ¿Jas kel kub'ij wa' ri tz'ib'am kanoq pa ru Loq' Pixab' ri Dios? kub'ij:

Ri ab'aj ri man xkaj tä ri yakal taq ja, we ab'aj ri* are xkoj che toq'eb'al re ri ja,

—kächa ri Tz'ib'talík, —xcha ri Jesús. ¹⁸ Ronojel winaq jachin ri kätzaq puwi' ri ab'aj ri', käsoktaj na. We k'u kätzaq we ab'aj ri' chrij jun, kuk'äjij na, —xcha chke.

Waral kǎqil wi we rajwaxik u tojik ri alkab'al

¹⁹ Ri tijonelab' re ri Pixab' kuk' ri ki nimaqil sacerdots aj Israel xkichaplej u tzukuxik jas kāk'a'n chuchapik ri Jesús pa ri hora ri', xkixej k'u kib' chkiwäch ri winaq. Xkich'ob' k'ut chi ri k'utb'al ri', xtzijox wa' chkiy ri e are'. ²⁰ Xkaluchij ri Jesús, xekitaq b'i winaq chuyuxlexik. Ri winaq ri' xka'n che kib' chi e utzalaj taq winaq rech kākiriq jun tzij pu chi' ri Jesús rech kākijach b'i ri Are' pu q'ab' ri q'atal tzij, kǎq'at k'u na tzij puwi'. ²¹ Rumal wa' xkik'ot u chi' ri Jesús, xkib'ij: Ajtij, qetam chi utz wa' ri kätzijon la xuquje' ruk' jikomal kätzijon la. Qetam k'ut chi man nim tä kil la jun winaq chuwäch jun chik. Xane kāk'ut la ri gas u rayinik ri Dios, —kecha che. ²² ¿A rajwaxik kǎqatoj alkab'al che ri nimalaj taqanel aj Roma? We ne man rajwaxik taj, —xecha che.

²³ Xretamaxtaj k'u ri Jesús ri ki chomanik, xub'ij chke: ¿Jas che kǎta' alaq wa' chwe?

²⁴ K'utu b'a' alaq jun puaq chnuwäch, —kächa chke. ¿Jachin k'u rech we ka'yeb'al ri' xuquje' ri b'i'aj ri' ri k'o chuwäch ri puaq? —xcha ri Jesús.

Xech'aw chi na ri winaq, xkib'ij che: Are rech ri César ri nimalaj taqanel, —xecha che.

²⁵ Xub'ij k'u ri Jesús chke: Ya alaq che ri tat César ri rech ri César. Ya b'a' alaq che ri Dios ri rech ri Dios, —xcha chke.

²⁶ Man k'o tä k'u jun tzij xekowin churiqik pu chi' ri Jesús ri xqaj ta wi pa ki q'ab' chkiwäch ri winaq. Xane xkikajmaj ri xub'ij ri Jesús chke, man xech'aw tä k'u chik.

Waral kätzijox wi jub'iq' chrij ri k'astajib'al chkixol ri kāmīnaqib'

²⁷ Xeopan k'u jujun chke ri tata'ib' saduceos, ri kākib'ij chi man kek'astaj tä chi na ri kāmīnaqib'. Ri tata'ib' ri' xkik'ot u chi' ri Jesús.

²⁸ Xkib'ij che: Ajtij, tz'ib'am kan chqe rumal ri qa mam Moisés chi we kākām jun achi, k'o k'u kan rixoxil, man e k'o tä k'u kan ralk'ual chrij are', rajwaxik chi ri rachalal ri kāmīnaq kāk'uli ruk' ri ixoq malka'n ri' rech kek'oji kan ralk'ual ruk'. Ri ak'alab' ri kil ki wäch je' ta ne e rech ri kāmīnaq, —kecha'. ²⁹ Xkib'ij k'ut: E k'o wuqub' achijab' kachalal kib'. Ri nab'eal xk'uli'k, xkām k'ut, man xk'oji tä kan ralk'ual ruk' ri rixoxil. ³⁰ Ri ukab' xk'uli ruk' ri rixnam malka'n, xuquje' xkām b'ik, man xk'oji tä kan ralk'ual ruk'. ³¹ Ri urox xuquje' xk'uli ruk' ri malka'n. Je k'u ri' xka'n ri wuqub' achijab' chkiyujunal, xekāmik, man xek'oji tä kan kalk'ual. ³² K'isb'al k'ut xkām ri ixoq, —kecha'. ³³ Aretaq k'ut kek'astaj chi ri kāmīnaqib', jachin lo chke ri wuqub' achijab' ri' kāk'oji na che rachajil ri chichu'? Xok k'u che kixoxil ri wuqub', —xecha che ri Jesús.

³⁴ Xch'aw chi ri Jesús, xub'ij chke: Ri winaq ajuwächulew kek'uli'k, kākīya ri kalk'ual pa k'ulanem. ³⁵ Ri winaq ri ya'tal chke chi kek'astaj b'ik chkixol ri kāmīnaqib', xuquje' chi kāk'oji ki k'aslemal ri man kāk'is taj, man kek'uli tä chik, man keyi' tä k'u che k'ulanem, —kächa'. ³⁶ E junam chik jas ri ángeles. Man kekowin tä chik kekāmik. E are k'u ralk'ual ri Dios wa', ri e k'astajinaq chik chkixol ri kāmīnaqib', —kächa'. ³⁷ Ri qa mam Moisés xutzijoj chi ri kāmīnaqib' kek'astaj na, —kächa'. Are wa' ri kuq'alajisaj ri tzij ri xutz'ib'aj chrij ri k'ix ri kāk'atik. Chila' k'ut kub'ij wi xuquje' chi ri Qajaw Dios are ri u Dios ri qa mam Abraham, u Dios ri qa mam Isaac, u Dios ri qa mam Jacob, —kächa'. ³⁸ Ri Dios k'ut, man are tä Dios kech kāmīnaqib', xane kech ri winaq ri e k'ask'oj. Ri e k'ask'oj, e k'ask'oj k'u wa' rumal ri Dios, —xcha ri Jesús chke.

³⁹ Xech'aw chi na jujun chke ri tijonelab' re ri Pixab', xkib'ij: Ajtij, qas utz ri b'im la, —xecha che.

* 20:17 We ab'aj ri' ri xub'ij ri Jesús are ri Jesús mismo.

⁴⁰ Man xkichajij tä chi k'u anima' chuk'otik u chi' ri Jesús jumul chik.

Kätzijoχ chijachin ri' ru Tat ri Cristo

⁴¹ Xub'ij k'u ri Jesús chke: ¿Jas che káb'ixik chi ri Cristo are ralk'ual kan ri qa mam David? ⁴² Are k'u ri qa mam David kub'ij pa ri wuj Salmos:

Xub'ij ri Qajaw Dios che ri Wajaw:

“Chatt'uyul pa nu wikiäq'ab'

⁴³ k'ä kinya na chawe chi katch'akanik,

kattaqan k'u na pa ki wi'

ri káka'n ki k'ulel chawe,”

—kácha'. ⁴⁴ We ri qa mam David kub'ij Wajaw che, ¿jas ta k'u che káb'ij alaq chi are xa ralk'ual kan ri qa mam David? —xcha ri Jesús chke.

Ri Jesús keutzujuj ri tijonelab' re ri Pixab'

⁴⁵ Konojel ri winaq xetowik aretaq xub'ij wa' chke ru tijoxelab'. ⁴⁶ Je wa' xub'ij: Chichajij iwib' chkiwäch ri tijonelab' re ri Pixab'. Káqaj chkiwäch keb'ínikat pa charchäq taq katz'iaq. Xuquje' je'l kákilo, nim k'u keil wi ri käyi' rutzil ki wäch pa taq ri k'ayib'al. Käkitzukuj k'u ri t'uuyulib'al ri nim ki b'anik pa taq ri rachoch Dios, xuquje' ri t'uuyulib'al ri nim keil wi pa taq ula'nem, —kácha chke. ⁴⁷ Xuquje' kákitoqij taq ri kachoch ri ixoqib' malka'nib'. Te ri' kákuyuq raqan ri ki tzij aretaq káka'n orar rech man q'alaj tä ri etzelal ri káka'no. Qas nim na ri k'äx kákiriq na ri tijonelab' re ri Pixab' aretaq káq'at tzij pa ki wi', —xcha ri Jesús.

21

Waral káqil wi ri kusipajjun malka'n ixoq ri sib'alaj meb'a'

¹ Pa ri nimalaj rachoch Dios ri Jesús xeril ri q'ínomab' ri tajin kákia ri ki rajil pa ri k'olib'al ri käyi' wi ri kuchuj. ² Xril xuquje' jun chichu' malka'n ri sib'alaj meb'a'. Xeuya k'u kieb' puag ri man nim tä rajil pa ri k'olib'al kuchuj, kraj ne xa jun centavo rajil ri kieb' puag ri'. ³ Xub'ij k'u ri Jesús: Qas tzij ri kinb'ij chiwe chi we meb'a'alaj chichu' malka'n ri', are nim na wa' ri xuya ri are' chkiwäch konojel ri jule' winaq ri ki yo'm ke. ⁴ Ri jule' winaq chik ki yo'm jub'iq' che ri k'ia ri k'o kuk'. Are k'u we chichu' malka'n ri', pune sib'alaj meb'a', u yo'm ronojel ri tzuqub'al re, —xcha chke.

Ri Jesús kutzijoj chi káwulix na ri nimalaj rachoch Dios

⁵ E k'o k'u jujun chke ri winaq tajin ketzi-jon chrij ri nimalaj rachoch Dios chi wigtal kuk' je'lalaj taj ab'aj, xuquje' kuk' loq'alaj taq sipanik. Xub'ij k'u ri Jesús: ⁶ Kopan na ri q'ij ri man kákanaj tä na kan jun ab'aj puwi' jun ab'aj chik re we ja ri' ri kiwilo. Konojel kewulix na, —xcha chke.

Keilitaj na k'ia taq etal k'ä mäjoq ri k'isb'al re ronojel

⁷ Xkita' k'u che ri Jesús, xkib'ij: Qa-jtij, ¿jampa' káb'antaj na wa'? ¿A k'o etal ri kuq'alajisaj chqawäch chi are q'ij ri' ri káb'an na ri xb'ij la chqe? —xecha che.

⁸ Xub'ij ri Jesús: Chichajij iwib' rech mix-sub'tajik. E k'ia ri kepe na ri kákikoj na ri nu b'i', kákib'ij: “In ri' ri Cristo,” —kecha na. Xuquje' kákib'ij: “Qetetinaq chi loq ri q'ij,” —kecha ri', —kácha ri Jesús. Mixe' k'u kuk' ri e are', —kácha ri Jesús chke. ⁹ Aretaq kita u tzijol nimalaj ch'oj xuquje' chi kákialijisaj kib' ri winaq chkiq q'atal taq tzij, mixej iwib'. Rajwaxik chi nab'e káb'antaj na wa' we ri', —kácha chke. K'ä mäjoq ri k'isb'al re we q'ij junab' ri', —xcha ri Jesús.

¹⁰ Te ri' xub'ij chi ri Jesús chke: Kech'ojin na ri winaq, ri juch'ob' winaq kuk' ri juch'ob' chik. Xuquje' käch'ojin na jun tinimit ruk' jun tinimit chik, —kácha'.

¹¹ Käpe na nimalaj wi'jal pa taq jujun tinimit. Pa taq nik'iaj tinimit chik kepe na lawalo taq yab'il. Kepe k'u na nimaq taq káb'raqan. Keilitaj na xib'ib'alaj taq jastaq xuquje' nimalaj taq etal chikaj, —xcha chke.

¹² Nab'e k'ut chkiwäch wa' we jastaq ri' kixkichap na ri winaq, kixkijach na pa ki q'ab' ri ki nimaqil ri winaq, xuquje' kixkikoj na pa che'. Kixkik'am na b'i chkiwäch nimaq taq tata'ib' ri ketaqan pa ki wi' ri winaq, xuquje' chkiwäch q'atal taq tzij rumal wech in, —xcha chke. ¹³ Are q'ij wa' rech kiniq'alajisaj na in chkiwäch, —kácha'.

¹⁴ K'ol b'a' pa iwanima' chi michomaj na b'ik jas ri' ri kib'ij na chuto'ik iwib'. ¹⁵ Ri in kinya na chiwe ri rajwaxik u tzijoxik, xuquje' kinya ri i no'j. Ri i k'ulel man kákiriq tä chi na jas kákib'ij chiwe, man kech'akan tä pi wi', —kácha'. ¹⁶ Káb'an na tzijtal chiwij kumal ri i tat, i nan, ri iwachalal, ri iwachi'l rech kixjach b'ik. Kekámisax na jujun chiwe. ¹⁷ Konojel káketzelaj na i wäch xa rumal wech in, —kácha'. ¹⁸ Man kásach tä k'u na u wäch jun chiwe. ¹⁹ We kich'ij wa', kixto'taj na, k'o na ri i k'aslema' ri man k'o tä u k'isik, —xcha ri Jesús chke.

²⁰ Aretaq kiwil ri tinimit Jerusalén sutim rij kumal soldados, chich'ob'o' chi kásach na u wäch ri tinimit chanim. ²¹ Pa ri q'ij ri' ri winaq ri e k'o pa Judea cheanimaj b'i pa taq ri juyub'. Ri e k'o pa ri tinimit, cheb'el b'ik. Ri e k'o pa taq ri juyub', mebok'ok chi b'i pa ri tinimit, —kácha'. ²² Are k'u wa' ri q'ij ri kátoj na u k'exel ri ki mak ri winaq aj Jerusalén cho ri Dios. Káb'antaj na rono-jel ri tz'ib'am chrij we tinimit ri', —kácha'. ²³ Toq'ob' k'u ki wäch ri ixoqib' ri yawab' taq winaq chik, xuquje' ri e k'o alaj taq kal ri k'ä tajin ketu'nik pa ri q'ij ri'. Kák'oji k'u na nimalaj k'äx'ol cho ruwächulew. Are käpe na ri nimalaj royowal ri Dios pa ki wi' ri

winaq re ri tinimit ri', —kacha'. ²⁴ E k'ia ri kekämisax na kuk' taq ch'ich'. Kechap k'u nik'iaj, kek'am k'u na b'i naj pa taq ronojel tinimit. Ri tinimit Jerusalén káb'an na pa taq aqan kumal ri winaq ri man e aj Israel taj, k'ä kätz'aqat na ri q'ij ri yo'm chke we winaq ri' chi je' kaka'n wa', —xcha ri Jesús chke.

Waral käqil wi jas ru petik ri Ralk'ual ri Dios ri Qas Winaq

²⁵ Kek'oji na etal ajsik chrij ri q'ij, chrij ri ik', chkiq taq ri ch'imil. Sib'alaj k'äx käkiriq na ri winaq ri e k'o cho ruwächulew. Man käkiriq tä chik jas kaka'no, xane sib'alaj käkixej na kib' rumal ri nimalaj roq'eb'al ri kub'an ruwoja' re ri mar, —kacha'. ²⁶ Káb'irb'it na ri kanima' ri winaq rumal ri xib'rikil xuquje' rumal ru chomaxik wa' ri káb'antaj na cho ruwächulew. Keyikopisax na ri u chuq'ab' ri kaj, —xcha'. ²⁷ Te k'u ri' kilital na chi kinpetik, in ri' ri Ralk'ual ri Dios ri Qas Winaq, pa jun sutz' ruk' nimalaj nu chuq'ab', känimarisax k'u na nu q'ij, —kacha'. ²⁸ Aretaq kechap ki b'anik wa' we ri' ri nu b'im chiwe, chiwilampe', chixka'y chikaj. Käqetet chi k'u loq ri q'ij ri kixutor na ri Dios, —xcha chke.

²⁹ Xutzijoj k'u jun k'utb'al chik re tijonik chke, xub'ij: Chiwilampe ri u che'al higos, xuquje' ronojel u wäch che'. ³⁰ Aretaq kiwilo chi ketux ri ki xaq, kich'ob' pa iwe wi chi qetetinaq chi loq ri q'alaj. ³¹ Je ri' xuquje' ri ix aretaq kiwilo chi káb'antaj wa' ri nu tizjom chiwe, chich'ob'o' chi xaq jub'iq' kraj chi käpe ri Dios che taqanik pa ki wi' ri winaq, —xcha chke.

³² Qas tzij kinb'ij chiwe chi man kok'ow tä na we q'ij junab' ri' k'ä káb'antaj na ronojel. ³³ Käsach k'u na u wäch ri kaj, xuquje' ruwächulew, are k'u ri nu tizj ri nu b'im chiwe, keb'antaj na wa', —xcha ri Jesús chke.

³⁴ Chichajij b'a' iwib' rech man ke' tä iwanima' kuk' taq nimaq'ij, q'ab'arik, rech man ke' tä ne kuk' nik'iaj jastaq chik ajuwächulew pune are ri i chak, pune are ri ki tzuqik iwalk'ual. Te'talik k'ut käpe na ri q'ij ri' chiwij jas jun awanel. ³⁵ Je' u petik wa' ri q'ij ri' pa ki wi' konojel winaq ri e k'o cho ruwächulew, —kacha'. ³⁶ Chiwila b'a' iwib' amaq'el ronojel q'ij jas ri kib'ano, chib'ana orar amaq'el che ri Dios rech käyi' na chiwe chi kixresaj na chuwach ronojel wa' ri käpe na cho ruwächulew. Chib'ana wa' rech kuya' kixtak' na chnuwäch in pa utzil, in ri' ri Ralk'ual ri Dios ri Qas Winaq, —xcha ri Jesús chke.

³⁷ Ri Jesús xuya tijonik ronojel q'ij pa ri nimalaj rachoch Dios. Chaq'ab' k'ut xel b'ik, xkanaj kan pa ri juyub' ri kojom Ujuyub'al Olivos che ru b'i'. ³⁸ Sib'alaj aq'ab' käkimulij

kib' ri winaq chuwach ri Jesús pa ri nimalaj rachoch Dios chutatab'exik ru tzij.

22

Kätzukur u chapik ri Jesús

¹ Xqetet chik ri nimaq'ij re ri kaxlan wa ri man käyi' tä ch'am ruk'. "Pascua" u b'i' ri nimaq'ij ri'. ² Ri ki nimaqil ri sacerdots aj Israel, xuquje' ri tijonelab' re ri Pixab' tajin käkitzukur jas kaka'n chukämisaxik ri Jesús. Käkixej k'u kib' chkiwäch ri winaq.

³ Xok k'u ri Satanás pa ranima' ri tat Judas ri xuquje' käkoj Iscariote che ru b'i'. Are jun chke ri kab'lajuj apóstoles. ⁴ Xe' ri tat Judas, xeutzijob'ej k'u ri ki nimaqil sacerdots, xuquje' ri ki nimaqil soldados rech käri lo jas kub'an na chujachik ri Jesús pa ki q'ab'. ⁵ Xekikot k'ut, xkiya ki tzij chi käkiya na puq che ri tat Judas chutojik wa'. ⁶ Xuchi'j k'u ri tat Judas u jachik ri Jesús aretaq man e k'o tä k'ia winaq.

Káb'an u b'anik ri wi'm re ri Qajaw

⁷ Xopan k'u ri nimaq'ij re ri kaxlan wa ri man käyi' tä ch'am ruk'. Pa ri q'ij ri' rajwaxik u kämisaxik ri alaj chij re ri Pascua rech käkitijo. ⁸ Ri Jesús xeutaq b'i' ri tat Pedro, ri tat Juan, xub'ij chke: Jib'ana u b'anik ri wi'm re ri Pascua rech käqatijo.

⁹ Xkita' k'u che ri Jesús, xkib'ij: ¿Jawije' kaj wi la chi käqa'n wi ri wi'm? —xecha che.

¹⁰ Xub'ij ri Jesús chke: Aretaq kixopan pa ri tinimit, kiriqa na jun achi ruk'am jun q'eb'al joron. Chiterenej b'ik k'ä kixopan na pa ri ja ri kok wi. ¹¹ Chib'ij che ri rajaw ja: "Kuta' ri Qajtij che la: ¿Jawije' k'o wi ri cuarto ri kintij wi ri wi'm re ri Pascua kuk' ri nu tijoxelab'?" —kixcha che. ¹² Kuk'ut na chiwäch jun nimalaj cuarto suk'umatal chik pa ri kawiq ja. Chib'ana u b'anik ri wi'm re ri Pascua chila', —xcha chke.

¹³ Xeb'e' k'ut, xekiriqa ronojel je' jas ri u b'im b'i' ri Jesús chke. Xkichap u b'anik ri wi'm re ri Pascua.

¹⁴ Aretaq xopan ri hora, xt'uyi ri Jesús chi' ri mesa. E k'o ri kab'lajuj apóstoles ruk'.

¹⁵ Xub'ij chke: Sib'alaj nu rayim u tijik wa' we wi'm ri' re ri Pascua iwuk' k'ä mäja' kinriq k'äx. ¹⁶ Kinb'ij k'u chiwe chi man k'o tä chi na jumal ri kintij na wa' k'ä káb'antaj na wa' pa ru taqanik ri Dios, —xcha chke.

¹⁷ Xuk'am k'u ri vaso, xumaltioxij wa' che ri Dios, xub'ij chke ru tijoxelab': Chik'ama wa'. Chijacha wa' chiwäch, chitija b'a'. ¹⁸ Kinb'ij k'u chiwe chi man kintij tä chi na we ri u wa'l uvas k'ä käpe na ri Dios che taqanik pa ki wi' ri winaq, —xcha chke.

¹⁹ Aretaq ri Jesús xuk'am ri wa, xumaltioxij wa' che ri Dios. Xupiro, xuya chke ru tijoxelab', xub'ij: Are je' jas ri nu cuerpo ri käjach na rumal iwech ix. Chitija wa' che natab'al we, —xcha'.

²⁰ Aretaq e woqinaq chik, xuk'am xuquje' ri vaso junam jas ri xub'an che ri wa, xub'ij: Ri k'o chupam we vaso kinjunamaj ruk' ri nu kik'el ri käturuwisax na rumal iwech ix. Käb'an k'u na ri k'ak' trato rumal we nu kik'el ri', —kächa ri Jesús chke.

²¹ ¡Chiwilampe! Ri jachal we tajin käwi' wuk' chi' we mesa ri'. ²² Qas tzij kinkäm na in, in ri' ri Ralk'ual ri Dios ri Qas Winaq, je' jas u b'eyal ru chomanik ri Dios. ¡K'äx k'u re ri achi ri kinjachowik! —xcha chke.

²³ Te ri' xkichap u k'otik ki chi' chb'il kib' chrij jachin chke ri käb'anow na wa'.

Waral kätzjox wi ri ki chomanik ri kab'lajuj chrij jachin chke ri nim na u b'anik

²⁴ Te k'u ri' ri tijoxelab' xkichaplej u chomalaxik kib' chrij jachin chke ri nim na u b'anik. ²⁵ Xub'ij k'u ri Jesús chke: Ri q'atal taq tzij ketaqan wa' pa ki wi' ri winaq. Ri e k'o pa ki wi' ri winaq käb'ix "B'anal taq Utzil" chke. ²⁶ Man je' tä k'u wa' ri ix. Xane ri nab'eal chiwe are je' ta ne ri más ak'al. Are k'u ri nim u b'anik chixol are junam jas ri patänil iwe. ²⁷ ¿Jachin k'u ri nim na u b'anik? ¿A are ri kät'uyi chi' ri mesa, o are ri patänil iwe? ¿A mat are ri kät'uyi chi' ri mesa? Are k'u ri in, in k'o iwuk' je' jas ri patänil iwe, —xcha chke.

²⁸ Ri ix k'ut, ronojel q'ij xixk'oji wuk' in. I riqom k'äx junam wuk' in. ²⁹ Rumal wa' kinya na chiwe chi kixtaqan na je' jas ri xuya ri Dios ri nu Tat chwe in chi ri in kintaqanik. ³⁰ Kinb'an na wa' rech kixwi' wuk' in chi' ri nu mesa pa ri nu taqanik in. Ri ix k'ut käyi' na chiwe chi kiq'at na tzij pa ki wi' ri winaq re ri kab'lajuj juch'ob' winaq re ri tinimit Israel, —xcha chke.

Ri Jesús kutzijoj apanoq chi ri tat Pedro kub'ij na chi man retam tä u wäch

³¹ Xuquje' xub'ij ri Qajaw Jesús: Simón, Simón, chawila' chi ix iwonojel ix u tz'onom ri Satanás rech kixutaqchi' che mak che rilik we qas tzij kich'ij wa'. Junam kub'an na ri are' chiwe jas ri kub'an jun winaq kuseysa' ri triko rech kätzaq na kanoq ri man utz taj, —kächa'. ³² In b'ochi'm k'u ri Dios pa wi' at rech katkojon na, rech man kattzaq taj. Ri at k'ut, aretaq kak'ex awan-ima', katzelej awib', keato' b'a' ri awachalal, —xcha che.

³³ Xub'ij ri Simón Pedro che: Qajaw, nu jikib'am ri wanima' in chi kine' uk' la, pune b'a' pa che', pune b'a' kinkäm uk' la, —xcha che.

³⁴ Xub'ij ri Jesús che: Pedro, qas tzij kinb'ij chawe chi k'a mäjoq kätzintzirigin ri ama' äk' kämik, kab'ij na at oxmül chi man awetam tä nu wäch, —xcha che.

Käqetet k'u ri hora ri kuriq k'äx ri Jesús

³⁵ Xub'ij ri Jesús chke konojel: Aretaq xixintaq b'ik, man k'o tä i bolsa re puaq, man k'o tä i chim, man xik'am tä b'ik i xajäb'. ¿A k'o lo jas xajwataj chiwe? —xcha chke.

Man k'o taj, —xecha che.

³⁶ Xub'ij k'u chke: Kämik k'ut, apachin ri k'o u bolsa re puaq, chuk'ama b'ik, xuquje' chuk'ama b'i ru chim. We man k'o tä u machete, chuk'iyij ru q'u' chuloq'ik jun re, —kächa chke. ³⁷ Kinb'ij k'u chiwe chi tzra-jwaxik wi chi käb'antaj ri tz'ib'am chwij pa ru Loq' Pixab' ri Dios, —kächa'. Are wa' ri kub'ij: "Xb'ix che chi are jun chke ri itzel taq winaq," —kächa'. Ronojel k'u ri tz'ib'tal chwij, rajwaxik chi käb'antaj na wa', —xcha ri Jesús chke.

³⁸ Xkib'ij ru tijoxelab' che: Qajaw, ¡chil-ampe la! E k'o kieb' machetes waral, —xecha che.

Ruk' wa', —xcha chke.

Ri Jesús kub'an orar pa Getsemani

³⁹ Xel b'i ri Jesús, xe' pa ri Ujuyub'al Olivos je' jas ru naq'atisam wi rib'. Xuquje' ru tijoxelab' xeteri b'i chrij. ⁴⁰ Aretaq xeopan jela', xub'ij chke ru tijoxelab': Chib'ana orar rech man kixtaq taj aretaq kixtaqchi'x che mak, —xcha chke.

⁴¹ Ri Jesús k'ut xutas apan rib' chke. Je' xek'ol wi apanoq jas ru najil jun ab'aj ri kusirirej apan jun. Xxuki'k, xub'an orar. ⁴² Xub'ij: Tat, we kaj la, b'ana b'a' la chi man rajwaxik taj chi kinriq we nimalaj k'äx ri käpetik, —kächa'. Mäb'an k'u la ri nu rayib'al in, xane ri rayib'al la, —xcha ri Qajaw Jesús.

⁴³ Xuk'ut k'u rib' jun ängel ajchikaj chuwäch ri xyo'w u chuq'ab'. ⁴⁴ Ri Jesús, rumal chi sib'alaj nim ri k'äx ri tajin kuno', sib'alaj xukoj u chuq'ab' chub'anik orar. Sib'alaj xub'oq ja' je' ta ne chi are nimaq taq tz'uj re kik' ri käqaj cho rulew.

⁴⁵ Aretaq xto'taj ri Jesús chub'anik orar, xe' kuk' ru tijoxelab'. Xeuriga'. Tajin kewar rumal ri ki b'is. ⁴⁶ Xub'ij ri Jesús chke: ¿Jas che kixwarik? Chixwalijoj, chib'ana orar rech man kixtaq taj aretaq kixtaqchi'x che mak, —xcha chke.

Waral käqil wi ru chapik ri Jesús

⁴⁷ Tajin kätzjion ri Jesús aretaq xeopan k'ia winaq. Ri tat Judas, jun chke ri kab'lajuj u tijoxelab' ri Jesús u k'amom ri ki b'e. Xnaqajin ri tat Judas che ri Jesús chutz'umaxik. ⁴⁸ Xub'ij k'u ri Jesús che: Judas, —kächa'. ¿A kinatz'umaj che nu jachik b'ik? ¿A je' kab'an chwe in, in ri' ri Ralk'ual Dios ri Qas Winaq? —xcha ri Jesús che.

⁴⁹ Ri e sutininaq rij ri Jesús, aretaq xkil ri xuk'ulmaj, xkib'ij che: Qajaw, ¿a keqach'ay na che machete? —xecha che.

⁵⁰ Jun chke ri tijoxelab' xusok jun achi ri patänil re ri ki nimal sacerdotes aj Israel, xresaj k'u ru xikin re u wikiäq'ab'. ⁵¹ Xch'aw

chi ri Jesús, xub'ij: Ruk' wa', —xcha'. Chiya kan ri ch'oj, —xcha chke.

Xuchap k'u koq ru xikin ri achi, xukunaj.
⁵² Te ri' xch'aw ri Jesús jumul chik, xub'ij chke ri ki nimaqil sacerdots, xuquje' chke ri ki nimaqil soldados ri chajinelab' re ri nimalaj rachoch Dios, xuquje' chke ri ki nimaqil ri winaq, e are' k'u taq wa' ri e petinaq chrij chuchapik: Je' ta ne chrij jun elaq'om ri elinaq wi loq alaq kuk' machetes, kuk' che', —kacha'.
⁵³ In k'o k'u uk' alaq ronojel q'ij pa ri nimalaj rachoch Dios, man xinchap tä alaq. Are k'u hora wa' ri yo'm chech alaq chi káb'an alaq wa'. Ri chuq'ab' alaq are ri Itzel wa' ri kátaqan pa ri q'equm, —xcha ri Jesús chke.

Ri tat Pedro kub'ij chi man retam tä u wäch ri Jesús

⁵⁴ Xkichap k'u ri Jesús, xkik'am b'i cho rachoch ri ki nimal sacerdots aj Israel. Ri tat Pedro u terenem chinaj.
⁵⁵ Aretaq xkinuk' q'aq' pu nik'iajal ruwoja, konojel xkimulij kib' chrij, xet'uyi'k. Xuquje' ri tat Pedro xt'uyi chxixol.
⁵⁶ Te ri' jun ali ajik' xril ri tat Pedro t'uyul chrij ri q'aq'. Ko xka'y che, xub'ij: Ri achi ri' are jun ruk' ri Jesús xuquje', —xcha ri ali.

⁵⁷ Ri tat Pedro xresaj rib' chupam, xub'ij: Man je' taj, ali, —xcha'. Man wetam tä u wäch, —xcha ri'.

⁵⁸ Man naj tä chi k'ut, k'o jun chik xilow ri tat Pedro, xub'ij che: Ri at xuquje', at jun chke ri e k'o ruk' ri tat Jesús, —xcha che.

Xub'ij ri tat Pedro: Man in tä ri', tat, —xcha che.

⁵⁹ Kraj ok'owinaq jun hora chik, k'o chi jun xujikib'a u b'ixik, xub'ij: Qas tzij ri are' jun ruk' rumal chi are aj Galilea, —xcha'.

⁶⁰ Xub'ij k'u ri tat Pedro: Tat, man kinch'ob' taj jas ri káb'ij la, —xcha che.

K'a tajin kätzizon ri tat Pedro aretaq xtzintziririqin jun ama' äk'.
⁶¹ Te ri' xutzolq'omij rib' ri Qajaw Jesús, xka'y che ri tat Pedro. Xna'taj k'u ri tzij ri u b'im ri Qajaw Jesús che: "K'a mäjoq kätzintziririqin ri ama' äk', kab'ij na at oxmul chi man awetam tä nu wäch," —xcha ri Jesús.
⁶² Xel k'u apan ri tat Pedro chrij ri ja, xuk'is rib' che oq'ej.

Käketz'b'ej u wäch ri Jesús

⁶³ Ri achijab' k'ut, ri e chajininaq ri Jesús, käketz'b'ej u wäch, xuquje' käkich'ayo.
⁶⁴ Xkich'uq ru waq'äch, xkib'ij k'u che: ¡Chach'ob'o! ¡Jachin ri' ri xatch'ayowik? —xecha che.

⁶⁵ K'ia ri mälom taq tzij ri xkib'ij che, sib'alaj xkiyoq'o.

Käk'am b'i ri Jesús chkiwäch ri ki nimaqil ri winaq

⁶⁶ Aretaq xsaqirik, xkimulij kib' ri ki nimaqil ri winaq aj Israel, ri ki nimaqil sacerdots aj Israel, xuquje' ri tijonelab' re ri Pixab'. Xk'am b'i ri Jesús chkiwäch.
⁶⁷ Xkib'ij k'u che: ¿A la l' ri' ri Cristo? B'ij b'a' la chqe, —xecha che.

Xch'aw chi ri Jesús, xub'ij chke: Pune ta ne kinb'ij chech alaq, man kákoj tä alaq ri nu tzij, —kacha'.
⁶⁸ We ta k'u k'o jas kinta' chech alaq, man káb'ij tä alaq chwe jas ri kinta' chech alaq. Man kintzoqopij tä b'i alaq, —kacha'.
⁶⁹ Tzkämik ri', in ri' ri Ralk'ual ri Dios ri Qas Winag, kint'uyi na pu wikiäq'ab' ri Dios ri sib'alaj k'o u chuq'ab', —xcha chke.

⁷⁰ Chanim k'ut xkita' che, xkib'ij konojel: ¿A la l' ne lo ri' ru K'ojol ri Dios? —xecha che.

Xch'aw chi ri Jesús, xub'ij chke: Je ri' jas ri káb'ij alaq chwe chi in ri', —xcha chke.

⁷¹ Xkib'ij k'ut: ¿A kajwataj ta k'u lo jun q'alajisanel chik chqawäch? ¡Man rajwaxik taj! Ri uj k'ut, uj xujtow pu chi' jas ri kub'ij chb'il rib', —xecha ri tata'ib'.

23

Ri Jesús k'o cho ri q'atal tzij Pilato

¹ Te k'u ri' xewalij konojel ri winaq ri xkimulij kib'. Xkik'am b'i ri Jesús cho ri q'atal tzij Pilato.
² Xkichaplej u b'anik tzij chrij ri Jesús, xkib'ij: Qa riqom chi we achi ri' tajin kusach ki k'ux ri winaq, xuquje' xujutijoj chi man rajwaxik taj káqaya alkab'al che ri tat César. Kub'ij k'u chb'il rib' chi ri are', are ri Cristo, jun nim taqanel.

³ Xuta' k'u ri tat Pilato che: ¿A at ri' ri kattaqan pa ki wi' ri winaq aj Israel? —xcha ri'.

Xch'aw ri Jesús, xub'ij: Je ri' jas ri káb'ij la, —xcha che.

⁴ Xub'ij k'u ri tat Pilato chke ri ki nimaqil sacerdots, xuquje' chke ri nik'iaj winaq chik: Man k'o tä mak kinriq chrij we achi ri', —xcha chke.

⁵ Ko k'ut xkijikib'a u b'ixik wa' konojel, xkib'ij: Xa kusach ki k'ux ri winaq, kuya tijonik pa ronojel tinimit rech Judea. Xuchaplej loq tijonik pa Galilea, u tagem u b'anik wa', xul waral pa Jerusalén, —xecha che.

Ri Jesús kák'am b'i cho ri nim taqanel Herodes

⁶ Aretaq ri tat Pilato xuta wa', xuta' we ri achi ri' are aj Galilea.
⁷ Aretaq xretamaj chi jela' kel wi loq ri Jesús jawije' kátaqan wi ri tat Herodes, xutaq b'i ri Jesús cho ri are'. Ri tat Herodes k'o apan pa Jerusalén pa taq ri q'ij ri'.
⁸ Aretaq ri tat Herodes xril ri Jesús, sib'alaj xkikotik. Xke' k'u k'ia q'ij u rayim rilik u wäch. Kraj ta k'u na káril jun kajmab'al rumal ri Jesús, rumal chi k'ia taq tzijob'elil u tom chrij.
⁹ Ri tat Herodes sib'alaj xuk'ot u chi' ri Jesús. Man k'o tä k'u jas xub'ij ri Jesús che.
¹⁰ Ri ki

nimaqil sacerdotes aj Israel xuquje' ri ti-jonelab' re ri Pixab' sib'alaj xkitzukung jas kaka'n chub'anik tzij chrij. ¹¹ Are k'u ri tat Herodes xuquje' ru soldados xketzelaj u wäch ri Jesús. Xketz'b'ej k'u u wäch xuquje'. Xkikoj jun je'lalaj atz'iaq che ri' jas ri kukoj jun nim taqanel. Te ri' ri tat Herodes xutaq chi b'i ri Jesús ruk' ri tat Pilato. ¹² Xutzir k'u ri ki ch'oj ri tat Herodes ruk' ri tat Pilato pa we q'ij ri'. Xjunamataj k'u ki wäch. Xeb'ux kachi'l kib'.

Käq'at tzij puwi' ri Jesús chi kākāmisaxik

¹³ Te ri' ri tat Pilato xeusik'ij ri ki nimaqil sacerdotes, ri ki nimaqil ri winaq, xuquje' konojel ri winaq rech kākimulij kib' chuwäch. ¹⁴ Xub'ij k'u chke: Ri ix, i k'amom loq ri achi ri' chnuwäch. Xib'ij chi xa kusach ki k'ux ri winaq. Aretaq xink'ot u chi' chiwäch, man k'o tä mak xinriq chrij we achi ri' jas ri kib'ij ix. ¹⁵ Xuquje' ri tat Herodes man xuriq tä mak chrij. U taqom chi k'u loq quk'. Chiwilampe' chi man k'o tä jas u b'anom we achi ri' ri taqal u kāmīsaxik. ¹⁶ Kink'ājisaj b'a' u wäch. Te k'u ri' kintzoqopij b'ik, —xcha chke.

¹⁷ Ri q'atal tzij, jas ri ki naq'atisam wi ri winaq, ronojel nimaq'ij rajwaxik kutzoqopij b'i jun ajpache'. ¹⁸ Konojel ri winaq juntir xkiraq ki chi', xkib'ij: ¡Chesaj la b'i wa'! ¡Tzoqopij b'a' la ri tat Barrabás chqe! —xecha che.

¹⁹ Are k'u ri tat Barrabás k'o pa che' rumal chi u kāmīsam jun winaq, xuquje' xeumulij ri winaq re ri tinimit rech kākīyak kib' chrij ri q'atal tzij. ²⁰ Ri tat Pilato xeuch'ab'ej ri winaq jumul chik. Are k'u ri are' kra' kutzoqopij ri Jesús. ²¹ Ri winaq xkiraq ki chi' jumul chik, xkib'ij: ¡Chripoq! ¡Chripoq! —xecha'.

²² Churox mul xub'ij chke: ¿Jas etzelal u b'anom wa' we achi ri'? Man k'o tä jun mak nu riqom chrij rech kākāmisaxik. Kink'ājisaj b'a' u wäch, kintzoqopij k'u b'ik, —xcha chke.

²³ Ri winaq k'ut xkikoj ki chuq'ab' junam kuk' ri ki nimaqil sacerdotes aj Israel. Sib'alaj xkiraq ki chi' chub'ixik chi kārīp ri Jesús. Xekowinik, xech'akan che ri tat Pilato. Xyi' k'u chke jas ri xkirayij. ²⁴ Te k'u ri' ri tat Pilato xuq'at tzij chi káb'antaj na jas ri xkita' che. ²⁵ Xutzogopij k'u ri tata' ri xkita', are ri ajpache', ri achi kāmīsanel ri xeumulij ri winaq re ri tinimit rech kākīyak kib' chrij ri q'atal tzij. Are k'u ri Jesús xujach pa ki q'ab'.

Kārīp ri Jesús cho ri cruz, kākāmisaxik

²⁶ Aretaq tajin kāk'am b'i ri Jesús churipik, xkichap apan jun achi aj Cirene, Simón u b'i', ri petinaq pa juyub'. Xkiya k'u ri cruz chrij rech kutelej b'ik, kuterenej b'i ri Jesús.

²⁷ Xeteri k'u b'ik k'ialaj winaq, xuquje' jujun taq ixoqib' ri kākik'is kib' che oq'ej, kākōq'ej u wäch ri Jesús. ²⁸ Xutzolq'omij rib' ri Jesús, xerilo, xub'ij k'u chke: Ixoqib' aj Jerusalén, —kācha'. Moq'ej chi alaq nu wäch in, are k'u choq'ej ib' alaq, xuquje' cheoq'ej alaq ki wäch ri al alaq, —kācha chke. ²⁹ Kopan k'u na ri q'ij aretaq káb'ixik: "Utz ke ri chuchuib' ri man kealk'ualan taj, ri man kekowin tä che alk'ualanik. Utz ke ri chuchuib' ri man k'o tä kal ri ketu'nik," —kācha na. ³⁰ Pa ri q'ij ri' kākib'ij na ri winaq chke ri nimaq taq juyub': "Chixtaq loq pa qa wi'," —kecha na ri'. Xuquje' kākib'ij chke ri juyub': "Chujich'uqu," —kecha na chke. ³¹ We káb'an wa' we k'āx ri' aretaq rāx ri che', ¿Jas ta ne ri kākā'n na aretaq chaq'ij chik ri che'? —xcha chke.

³² Xuquje' xekik'am b'i ruk' ri Jesús kieb' b'anal taq etzelal rech kekāmisaxik. ³³ Aretaq xeopan pa ri k'olib'al ri kojom U B'aqil Jolomaj che ru b'i', chila' xkirip wi ri Jesús, xuquje' ri kieb' b'anal taq etzelal junam ruk', jun pu wikiāq'ab', ri jun chik pu moxq'ab' ri Jesús. ³⁴ Xub'ij k'u ri Jesús: Tat, sach la ki mak. Xa man kākich'ob' tä ri' jas ri tajin kākā'no, —xcha'.

Ri soldados k'ut xkesaj ki suerte chrij ri ratz'iaq ri Jesús, xkijach k'u wa' chkiwäch. ³⁵ E tak'atoj k'u ri winaq, tajin keka'y che ri Jesús. Ri ki nimaqil ri winaq xketz'b'ej u wäch, xkib'ij: Xuto' ri jule' winaq chik. We qas tzij are ri Cristo ri cha'tal rumal ri Dios, chuto' b'a' rib', —xecha'.

³⁶ Xuquje' ri soldados xketz'b'ej u wäch. Xegeb' ruk' ri Jesús, xkiya ch'ām vino chuwäch. ³⁷ Xkib'ij che: ¡We at ri' ri kattaqan pa ki wi' ri winaq aj Israel chato' b'a' awib'! —xecha che.

³⁸ Kojom k'u jun tz'ib'talik puwi' ri cruz ri xrip wi ri Jesús. Are tz'ib'am wa' pa ki ch'ab'al ri winaq aj Israel, ri winaq latinos, xuquje' ri winaq griegos, kub'ij: ARE NIM TAQANEL PA KI WT' RI WINAQ AJ ISRAEL, —kācha'.

³⁹ Jun chke ri b'anal taq etzelal, ri e tzāyeb'am ruk', xuyōq'o, xub'ij: We qas tzij lal ri' ri Cristo, chto' ib' la. Chujto' la uj xuquje', —xcha ri'.

⁴⁰ Xch'aw ri jun achi chik, xuyaj ri rachi'l. Xub'ij che: ¿A mat kaxej awib' at cho ri Dios, at k'ut junam tajin kariq k'āx ruk'? ⁴¹ Ri uj taqal chqe chi je' káb'an wa' chqe. Tajin kākatoj u k'exel ri qa'nom. Are k'u wa' we achi ri', man k'o tä etzelal u b'anom, —xcha che ri rachi'l.

⁴² Xub'ij che ri Jesús: Tat, chinnataj che la aretaq kächaple la taqanik, —xcha che.

⁴³ Xch'aw ri Jesús, xub'ij: Qas tzij ri kinb'ij chawe chi kāmik ri' katk'o'ji na wuk' in pa ri je'lalaj k'olib'al "paraíso" u b'i', —xcha che.

Käkäm ri Jesús

⁴⁴ Kraj pa ri kab'lajuj hora xq'equmar ruwächulew k'ä pa ri urox hora re b'enaq q'ij. ⁴⁵ Xatin k'u ri q'ij, xuquje' xjisjob' ri tasb'al u pam ri nimalaj rachoch Dios. ⁴⁶ Te ri' xuraqagej u chi' ri Jesús, ko xch'awik, xub'ij: ¡Tat! —xcha'. Kinjach ri wanima' pa q'ab' la, —xcha'.

U b'im wa', xel ranima'.

⁴⁷ Aretaq ri ki nimal soldados xril ri xb'antajik, xunimarisaj u q'ij ri Dios, xub'ij: Qas utzalaj achi wa' we achi ri', —xcha'.

⁴⁸ Konojel ri winaq xkimulij kib' che rilik. Aretaq xkil ri xb'antajik, xetzelejik, sib'alaj keb'isonik, keb'oq'ik. ⁴⁹ Konojel ri etamaninaq u wäch ri Jesús, xuquje' ri ixoqib' ri tereninaq u loq pa Galilea xekanaj kan chinaj che rilik ri xb'an che.

Kämuq ri Jesús

⁵⁰ Te ri' xopan jun achi, José u b'i'. Are jun chke ri ki nimaqil ri winaq, utzalaj achi k'u wa' ri jikom ranima'. ⁵¹ Ri are' are aj Arimatea, jun tinimit re Judea. Are jun achi ri kul' na u k'ux che reyxexik ru taqanik ri Dios pa ki wi' ri winaq. Man xuk'ul tä k'u re ri are' ri ka'nom ri nik'iaj ki nimaqil ri winaq chik. ⁵² Xopan k'u ri are' cho ri tat Pilato chuta'ik chi käyi' ru cuerpo ri Jesús che. ⁵³ Aretaq xuqajsaj, xub'olq'otij pa jun manta. Xuya k'u pa jun muqub'al ri mäja' k'o jun winaq yo'm chupam. Ri muqub'al ri' are jun pek'otom koq cho ri ab'aj. ⁵⁴ We q'ij ri' are ri wíspira wa' re ri Pascua. Xaq jub'iq' kraj chi kächaplex ri q'ij re uxlanem.

⁵⁵ Ri ixoqib' ri xeteri loq ruk' ri Jesús pa Galilea, xkiterenej b'ik, xkil ri muqub'al. Xkilo jas ri xb'an kan chuya'ik ri käminaq chupam. ⁵⁶ Aretaq xetzelej b'i' cho ja, xka'n u b'anik k'ok'alaj taq kunab'al. Xeuxlan k'u pa ri q'ij re uxlanem, je' jas ri kub'ij ri Pixab'.

24*Käk'astaj b'i' ri Jesús chkixol ri käminaqib'*

¹ Pa ri nab'e q'ij re ri semana, sib'alaj aq'ab' xeb'e' ri ixoqib', xeopan k'u chuchi' ri muqub'al. Xkik'am b'i' ri k'ok'alaj taq kunab'al ri ka'nom. ² Xkiriq ri ab'aj wolqotim chi apan jela' chuchi' ri muqub'al. ³ Xeb'ok b'ik, man xkiriq tä k'u ru cuerpo ri Qajaw Jesús. ⁴ Xkixej k'u kib', man xkiriq taj jas kaka'no rumal ri xb'antajik. Xaq te'talik k'ut zetax'ik kieb' achijab' chkinaqaj, ri sib'alaj käjuluw ri kat'iz'iaq. ⁵ Xkixej k'u kib' ri ixoqib', xkipachb'a kib' pulew. Xkib'ij k'u ri achijab' chke: ¿Jas che kitzukuj ri k'aslik chkixol ri käminaqib'? ⁶ Man k'o tä waral, xk'astaj b'i' ri', —kecha chke. Chna'taj chiwe jas ri xutzijoj kan ri Jesús chiwe aretaq k'ä k'o ri Are' pa Galilea, —kecha'. ⁷ Je' xub'ij wa' chiwe: "Rajwaxik chi ri in, in ri' ri Ralk'ual ri Dios ri Qas Winaq, kinjach na pa ki q'ab'

ajmakib', kinrip na cho ri cruz, kink'astaj k'u na b'i' chkixol ri käminaqib' churox q'ij," —xcha ri', —xecha chke ri ixoqib'.

⁸ Te k'u ri' xna'taj ru tzij ri Jesús chke ri ixoqib'. ⁹ Aretaq tzelejem loq ke, ki petik pa ri muqub'al, xkitzizoj chke ri tijoxelab', xuquje' chke ri nik'iaj kachi'l chik ronojel ri xkik'ulmaj. ¹⁰ Ri xkitzizoj ri tzij ri' chke ri apóstoles, ru taqo'n ri Jesús, e are' ri nan María Magdalena, ri nan Juana, ri nan María ru nan ri Jacobo, xuquje' ri jule' ixoqib' chik. ¹¹ Ri apóstoles man xkikoj tä ri ki tzij ri ixoqib'. Xel chkiwäch chi xaq kon taq tzij ri käkib'ij.

¹² Pune ta ne je ri', ri tat Pedro xwalij b'ik. Xutik anim, xe' chuchi' ri muqub'al. Xpachi'k, xka'y koq chupam. Xuwi ri manta xrilo. Xukajmaj k'u ri xk'ulmataj.

Ri xk'ulmataj pa ri b'e ri ke' pa ri tinimit Emaús

¹³ Pa we q'ij ri' e b'enaq pa ri b'e kieb' chke ri tijoxelab'. B'enam ke pa jun alaj tinimit, Emaús u b'i'. Kraj lulajuj kilómetros u xol ruk' ri tinimit Jerusalén. ¹⁴ Käkitzizoj'ela kib' chrij ri xb'antaj pa Jerusalén. ¹⁵ Tajin k'u käkich'ab'ej kib', käkik'otola taq ki chi' aretaq ri Jesús xuriq b'i' rib' kuk', xerachi'laj b'i' junam. ¹⁶ Xb'an k'ut chi man xkich'ob' tä u wäch. ¹⁷ Xub'ij k'u chke: ¿Jas ri kitzizoj'ela chb'l taq iwib' pa we b'e ri'? —kächa'. ¿Jas che kixb'isonik? —xcha chke.

¹⁸ Jun chke ri achijab', Cleofas u b'i', xch'awik, xub'ij che: ¿A xaq lal jun ok'owel pa Jerusalén? Kraj ne xaq xuwi ri lal man etam tä la ri xb'antaj jela' pa taq ri q'ij ri', —xcha che.

¹⁹ Xub'ij k'u chke: ¿Jas ri' ri xb'anik? —xcha ri Jesús chke.

Xkib'ij che: Are ri xb'an che ri Jesús aj Nazaret. We achi ri' are jun q'alajisal re ru Loq' Pixab' ri Dios, ri sib'alaj k'o u chuq'ab' ru tzij ri xuquje' kub'an kajmab'al. Nim k'u u b'anik cho ri Dios, xuquje' chkiwäch ri winaq, —kecha che. ²⁰ Xjach k'u b'ik, xq'at tzij puwi' chi käkämisaxik ri Are' kumal ri ki nimaqil sacerdotes aj Israel, xuquje' kumal ri ki nimaqil ri q'a winaq uj. ¡Xkiriq k'u cho ri cruz! —kecha'. ²¹ Are k'u ri uj xqachomaj chi are wa' ri kutor na ri q'a tinimit Israel. Ya xke' oxib' q'ij kämik ri xb'an wa', —kecha che. ²² Xqakajmaj k'ut jas ri xkitzizoj jujun taq ixoqib' chqaxol. Aq'ab' xeb'e' chuchi' ru muqub'al ri Jesús. ²³ Man xkiriq tä chi k'u ru cuerpo, —kecha'. Aretaq xetzelej b'ik, xkitzizoj chq'e chi xekil ángeles ri xkib'ij chi xk'astaj b'i' ri Jesús, —kecha'. ²⁴ Te ri' xeb'e' jujun chke ri qachi'l chuchi' ri muqub'al, je' xkilo jas ri xkib'ij ri ixoqib'. Man xkil tä chi u wäch ri Jesús, —xecha che.

²⁵ Te ri' xub'ij ri Jesús chke: ¡Ay, kon taq achijab'! ¡Man kixkojon tä che ri ki tzijom

kan ri ojer taq q'alajisal re ru Loq' Pixab' ri Dios! ²⁶ ¿A mat iwetam ix chi rajwaxik chi ri Cristo kuriq wa' we k'äx ri' k'ä mäjoq känimarisax u q'ij? —xcha chke.

²⁷ Xuchaplej k'u u q'alajisaxik chkiwäch ri u tzij ri mam Moisés xuquje' ri ki tzij ri ojer taq q'alajisal re ru Loq' Pixab' ri Dios jas ri ki tz'ib'am kan chrij ri Cristo.

²⁸ Xenaqajin k'u che ri alaj tinimit jawije' e b'enam wi ke. Ri Jesús xub'ano chi je' ta ne chi naj ri ke' wi na, man xtak'i taj. ²⁹ Ri tijoxelab' xkikoj ki chuq'ab' rech kakanaj kan kuk', xkib'ij che: Kanaj kan la quk'. Qajem k'u kub'an ri q'ij, kok k'u na ri aq'ab', —xecha che.

Xok k'u b'i ri Jesús, xkanaj kan kuk'. ³⁰ Aretaq xt'uyi kuk' chi' ri mesa, xuk'am ri wa. Xutewchij, xupiro, xuya chke. ³¹ Te k'u ri' xyi' chke chi xekowinik xkich'ob' u wäch. Xaq te'talik k'ut xsach ri Jesús chkiwäch. ³² Xkib'ila k'u ri jun che ri jun chik: ¿A mat k'o jas xqana' pa qanima' aretaq xujuch'ab'ej pa ri b'e, aretaq xuq'alajisaj ru Loq' Pixab' ri Dios ri Tz'ib'talik chqawäch? —xecha'.

³³ Pa ri hora ri' xewalijik, xetzelej b'i pa Jerusalén. Xekiriga ri julajuj tijoxelab' ki mulim kib' xuquje' ri nik'iaj kachi'l chik. ³⁴ Xkib'ij k'u chke: Qas tzij xk'astaj ri Qajaw Jesús, u k'utum k'u rib' chuwäch ri tat Simón, —xecha chke.

³⁵ Te ri' xkitzijoq ri xkik'ulmaj pa ri b'e, xuquje' xkitzijoq jas xketamab'ej u wäch ri Jesús aretaq xupir ri wa.

Ri Jesús kuk'ut rib' chkiwäch ru tijoxelab'

³⁶ Aretaq tajin kăkitzjob'ela kib' chrij ri xkik'ulmaj, xuk'ut rib' ri Jesús chkiwäch, xtak'i k'u chkixol. Xub'ij chke: Chuxlan b'a' ri iwanima', —xcha chke.

³⁷ Sib'alaj k'u xkixej kib'! Xkichomaj chi are jun xib'inel ri tajin kăkilo. ³⁸ Xub'ij k'u ri Jesús chke: ¿Jas che kixb'irb'it pa iwanima', kub'an k'u kieb' i k'ux? —kăcha'. ³⁹ Chiwila ri waqan xuquje' ri nu q'ab' chi qas in ri' ri Jesús. Chinina', chiniwila', —kăcha'. Jun xib'inel man k'o tä u tijal, man k'o tä k'u u b'aqil je' jas ri wech in ri kika'yej, —xcha chke.

⁴⁰ Aretaq xub'ij wa' xuk'ut ru q'ab' xuquje' ri raqan chkiwäch. ⁴¹ Kăkaj kăkikojo, kăkaj man kăkikoj taj rumal chi kıkajmam kib'. Jub'iq' kekikotik, jub'iq' k'u kăkixej kib'. Xub'ij k'u ri Jesús chke: ¿A k'o waral jas kintijo? —xcha chke.

⁴² Xkiya k'u jun ch'äqap b'olom kăr che. ⁴³ Xuk'amo, xutij chkiwäch. ⁴⁴ Xub'ij k'u chke: Aretaq ri in xink'oji iwuk', xintz-ijoj chiwe chi rajwaxik keb'antaj konojel ri tz'ib'am chwij pa ru Pixab' ri qa mam Moisés, xuquje' ri tz'ib'am kumal ri ojer taq

q'alajisal re ru Loq' Pixab' ri Dios, xuquje' pa taq ri salmos, —xcha ri Jesús chke.

⁴⁵ Te k'u ri' xuya chke chi xkich'ob' na ri Tz'ib'talik. ⁴⁶ Xub'ij chke: Je' tz'ib'am wa' chi kuriq na k'äx ri Cristo, kăk'astaj k'u na b'i chkixol ri kăminaqib' churox q'ij, —kăcha'. ⁴⁷ Xuquje' tz'ib'am chi rajwaxik u tzijoxik ru Tzij ri Dios chke konojel tinimit pa ri u b'i' ri Cristo chub'ixik chke chi rajwaxik kăkik'ex kanima', kăkik'ex k'u ki chomanik ri winaq rech kesachtaj na ri ki mak. Are kăchapletaj na b'i u tzijoxik wa' pa ri tinimit Jerusalén, —kăcha chke. ⁴⁸ Ri ix k'ut, ix q'alajisanelab' chrij ronojel wa' we ri'. ⁴⁹ Kintaqa na loq pi wi' jas ri xub'ij ri Dios ri nu Tat chi kuya na chiwe. Chixkanaj b'a' kan pa ri tinimit Jerusalén k'ä käyi' na chiwe ri i chuq'ab' ajchikaj.

Ri Jesús kăk'am b'i chikaj

⁵⁰ Te k'u ri' ri Jesús xeuk'am b'i apan chrij ri tinimit Betania. Chila' xuwalijisaj ru q'ab', xutewchij. ⁵¹ Aretaq tajin keutewchij, xel b'i chkiwäch, xk'am b'i chikaj. ⁵² Xnimarisax na u q'ij kumal chila'. Te ri' xetzelej loq pa Jerusalén, sib'alaj k'u kekikotik. ⁵³ Amaq'el ronojel q'ij e k'o pa ri nimalaj rachoch Dios, tajin kăkiya k'u u q'ij ri Dios. Amén.

RI UTZALAJ TZIJ RE RI EVANGELIO RI XUTZ'IB'AJ RI SAN JUAN

Ri Cristo, ri Loq'alaj u Tzij ri Dios, k'o wi ri Are' petinaq loq

¹ Aretaq mäjoq käb'an ri kajulew, ri Cristo, ri käb'ix "u Tzij ri Dios" che, ya k'o chik ri Are'. Ri Are' ri käb'ix "u Tzij ri Dios" che k'o chik ruk' ri Dios, are k'u gas Dios wa'. ² Ri Are' k'ut k'o ruk' ri Dios ojer tzaretaq xchap-taj loq u b'anik ronojel. ³ Rimal ri Are' ri Dios xub'an ronojel ri k'olik. Man k'o tä k'u jas ri k'olik ri mat xb'an rimal ri Are'. ⁴ Ruk' ri Are' k'o wi ri gas k'aslemal ri man k'o tä u k'isik. We k'aslemal ri' are wa' ri gas saqil chke konojel ri winaq cho ruwächulew. ⁵ Ri saqil ri' käjuluw pa ri q'equm, man käkowin tä k'u ri q'equm chusachik u wäch.

⁶ K'o jun tata' ri xtaq loq rimal ri Dios. Ri tata' ri' are Juan* u b'i'. ⁷ Xpe k'u ri are' chuq'alajisaxik ri saqil chkiwäch ri winaq rech konojel kekojon ta che ri saqil rimal ri u tzij ri are'. ⁸ Ri tat Juan man are tä ri saqil, xane xa taqom loq rech kuq'alajisaj ri gas tzij chrij ri saqil. ⁹ Ri gas saqil k'ut, ri käjuluw pa ki wi' konojel ri winaq, tajin käpe cho ruwächulew.

¹⁰ Ri Jun ri käb'ix "u Tzij ri Dios" che k'o chik cho ruwächulew. Pune k'u rimal ri Are' ri Dios xub'an ruwächulew, ri winaq k'ut ri e k'o cho ruwächulew man gas xkich'ob' tä u wäch. ¹¹ Xopan pa ru tinimit, ru winaqil k'ut man xkik'ulaj taj. ¹² Pune je ri' e k'o k'u jujun ri utz u k'ulaxik xka'no, xekojon che ri Are'. E are k'u taq wa' ri xyl' chke chi keb'ok che ralk'ual ri Dios. ¹³ Ri xekojonik, ri xeb'ok che ralk'ual ri Dios, man je' tä xb'an che kalk'ualaxik jas ri kalk'ual ri winaq ri xaq kil ki wäch rimal chi je wa' xkichomaj ri ki nan ki tat, o rimal ru rayib'al jun winaq. Xane ri Dios are ri gas ki Tat ri e are'.

¹⁴ Ri Jun ri käb'ix "u Tzij ri Dios" che xub'an winaq, xk'oji k'u chqaxol waral cho ruwächulew. Loq' xeril wi konojel winaq, xub'ij k'u ri gas tzij chke. Xqil ri kelik, q'alaj chiqas are ru K'ojol ri qat Tat ri sib'alaj nim u q'ij, ri xuwi wa' u K'ojol k'olik. ¹⁵ Ri tat Juan xuq'alajisaj ri gas tzij chrij ri Are', xub'ij: Are wa' ri xinb'ij, chi ri Jun chik ri käpe na, are nim na u q'ij chnuwäch in rimal chi ri Are' k'o chik aretaq ri in mäja' kil nu wäch, —xcha'.

¹⁶ Qonojel qa k'amom qe ri nimalaj u q'inomal, qa riqom k'u tewchib'al q'ij chi q'ij. ¹⁷ Ri qa mam Moisés xutz'ib'aj kan ri Pixab' ri xuya ri Dios che. Are k'u ri Jesu-cristo xuk'ut kan chqawäch chi gas kujraj ri Dios, xuq'alajisaj ri gas tzij chqawäch. ¹⁸ Man k'o tä wi jun winaq ilowinaq u wäch ri Dios. Xane xaq xuwi ru K'ojol ri Dios ri k'o ruk' ri qat Tat, ri xaq xuwi wa' u K'ojol k'olik, are ri Are' xulq'alajisan chqawäch ru b'anik ri Dios.

Ri Juan Qasal Ja' kuq'alajisaj ri gas tzij chrij ri Jesucristo

¹⁹ Ri winaq aj Israel pa Jerusalén xekitaj b'i sacerdotes xuquje' levitas[†] ruk' ri tat Juan chuta'ik che jachin ri are'. ²⁰ Ri are' gas xuq'alajisaj chkiwäch chi saqil, xub'ij: Ri in, man in tä ri Cristo, —xcha chke.

²¹ Xkita' chi k'u jumul che, xkib'ij: ¿Jachin k'u ri lal? ¿A lal ri' ri qa mam Elias ri q'alajisaj re ru Loq' Pixab' ri Dios? —xecha che.

Ri tat Juan xub'ij: Man in tä ri', —xcha chke.

Jumul chik xkita' che, xkib'ij: ¿A man lal k'u ri' ri q'alajisaj u Tzij ri Dios ri käb'ixik chi käpe na? —xecha che.

Ri are' xch'awik, xub'ij: Man in tä ri', —xcha chke.

²² Xkib'ij k'u che: ¿Jachin k'u ri lal? Rajwaxik chi kuje'k, k'o jas ri ke'qab'ij chke ri xuqtaqow loq. ¿Jas ri käb'ij la chqe chij ib' la? —xecha che.

²³ Ri tat Juan xch'awik, xub'ij: In ri' ri jun ri ko käch'aw pa taq ri juyub' ri kätz'inowik, kub'ij: "Chib'ana u b'anik ri nim b'e ri käb'in wi ri Qajaw, chib'ana jikom che," —kächa'. Je' jas ri xub'ij loq ri qa mam Isaías ri q'alajisaj re ru Loq' Pixab' ri Dios, —xcha chke.

²⁴ Ri achijab' ri' ri xeopan ruk' ri tat Juan chuch'ab'exik, e are' ki taqo'n ri tata'ib' fariseos[‡] wa'. ²⁵ Xkita' k'u che ri tat Juan: We ri lal, man lal tä ri' ri Cristo, man lal tä ri' ri qa mam Elias, man lal tä k'u ri' ri q'alajisaj re ru Loq' Pixab' ri Dios, ¿jas che käb'an la qasna? —xecha che.

²⁶ Ri tat Juan xub'ij chke: Ri in kinb'an qasna' ruk' joron. K'o k'u Jun chxol alaj ri man etam tä alaq u wäch ri Are'. ²⁷ Are k'u wa' ri Jun ri teren loq chwij, pune nim k'u na u b'anik chnuwäch in. Man taqal tä k'u chwe in kinkir ru k'amal u xajäb', —xcha chke.

²⁸ Ronojel wa' we ri' xkulmataj pa Betábara ri k'o chrelb'al q'ij che ri nima'

* 1:6 Ri Juan ri' man are tä ri Juan ri xutz'ib'aj we Evangelio, xane are ri Juan Qasal Ja' ri käb'ix waral. † 1:19 Ri levitas e are' aj re ri achalaxik sacerdotal re Leví ri xetob' chke ri sacerdotes pa ri nimalaj rachoch Dios. ‡ 1:24 Ri tata'ib' fariseos e are' winaq wa' aj Israel ri sib'alaj xkigatej u nimaxik ru Pixab' ri Moisés. Xka'n k'u nimal, xkichomaj k'ut chi e utz na chkiwäch konojel ri winaq. K'ia ki naq'atizam wi kib' ri man gas tä are ri kub'ij ru Tzij ri Dios.

Jordán jawije' ri tajin kub'an wi qasna' ri tat Juan.

Ri Jesús are ri Jun ri kākāmisax na cho ri Dios je' ta ne jun alaj chij

²⁹ Chukab' q'ij ri tat Juan xril ri Jesús tajin kánaqajin loq ruk', xub'ij: ¡Chilampe ala! — kácha'. Are wa' ri Jun ri kākāmisax na cho ri Dios je' ta ne jun alaj chij che resaxik b'i ri ki mak ri winaq ri e k'o cho ruwächulew, —kácha'. ³⁰ Chrij k'u ri Are' xintzijon wi aretaq xinx'ij: Kápe chi na Jun ri nim na u b'anik chnuwäch in. Je ri', rumal chi ri Are' ya k'o chik májoq kil nu wäch in. ³¹ Ri in xuquje' man wetam tá u wäch nab'e, tajin k'u kinb'an ki qasna' ri winaq rech konojel ri winaq aj Israel káketamaj u wäch, —xcha ri tat Juan.

³² Xuquje' xub'ij ri tat Juan: Xinwil ri Loq'alaj Espiritu xqaj loq chikaj je' u b'anik jun palomáx, xkanaj k'u kan puwi' ri Jesús. ³³ Ri in nab'e man wetam taj jachin ri Are', ri Dios k'ut ri xintaqowik chi kinb'an qasna' ruk' joron, are xub'ij chwe: "Jachin ri kawilo chi káqaj ri Loq'alaj Espiritu puwi', kákanajik, are ri' ri Jun ri kub'an na qasna' ruk' ri Loq'alaj Espiritu," —xcha chwe. ³⁴ Ri in wilom ri xuk'ulmaj, king'alajisaj k'ut jas ri xinwilo chi are wa' ru K'ojol ri Dios, —xcha ri tat Juan chke ri winaq.

Waral keqil wi ri nab'e taq u tijoxelab' ri Jesús

³⁵ Chukab' q'ij ri tat Juan k'o chila' jumul chik e rachi'l kieb' chke ru tijoxelab'. ³⁶ Aretaq ri tat Juan xrilo chi tajin kok'ow ri Jesús, xub'ij: ¡Chiwilampe! —kácha'. Are wa' ri Jun ri kākāmisax na cho ri Dios je' ta ne jun alaj chij, —xcha chke.

³⁷ Ri kieb' u tijoxelab' ri tat Juan, aretaq xkita ri xub'ij, xeb'e' ruk' ri Jesús. ³⁸ Ri Jesús xka'y kan chrij, xrilo chi terenem ri Are' kumal ri kieb' tijoxelab', xub'ij chke: ¿Jas tajin kitzukuj? —xcha'.

Ri e are' xkib'ij che: Ajtij, ¿jawije' jeqel wi la? —xcha che.

³⁹ Ri Jesús xch'awik, xub'ij chke: ¡Chixsajmpe! Jo' b'a', kiwila k'u na, —xcha ri' chke.

Xeb'e' k'u ruk' ri Are', xkil na jawije' ri jeqel wi. Chila' k'ut xekanaj wi kan pa ri q'ij ri', rumal chi kraj are ukaj hora ri' re ri b'enaq q'ij.

⁴⁰ Jun k'u chke ri kieb' achijab' ri xkita ri xub'ij ri tat Juan, ri xeb'e' ruk' ri Jesús, are ri tat Andrés ri ratz ri tat Simón Pedro. ⁴¹ Xe' ri tat Andrés chanim chutzukuxik ri tat Simón ru chaq', xub'ij k'u che: Xqariq ri Mesías, —xcha che. (Ri tzij ri' kel kub'ij "Cristo".)§

§ 1:41 Ri tzij "Cristo" o "Mesías" kel kub'ij "cha'tal rumal ri Dios". * 1:42 Ri kieb' tzij ri', "Cefas" pa ri ch'ab'al arameo, rachi'l ri jun chik, "Pedro" pa griego, kel kākib'ij "ab'aj". † 1:51 Ri Jesús xukoj we b'i'aj ri' chb'il rib' chuk'utik chi are ri Cristo o ri Mesías ri xtz'ib'ax ojer pa ru Loq' Pixab' ri Dios chi are ri To'l Qe ri kápetik.

⁴² Te k'u ri' ri tat Andrés xuk'am b'i ri tat Simón ruk' ri Jesús. Ri Jesús k'ut, aretaq xrilo, xub'ij che: At ri' ri tat Simón ru k'ojol ri Jonás. Cefas chik káb'ix na chawe (ri kel kub'ij Pedro),* —xcha che.

Ri Jesús keusik'ij ri tat Felipe rachi'l ri tat Natanael rech keb'e' ruk'

⁴³ Chukab' q'ij chik ri Jesús xuchomaj chi ke' pa Galilea. Xuriq k'u ri tat Felipe, xub'ij che: Tasa'j wuk', —xcha che.

⁴⁴ Ri tat Felipe jela' kápe wi pa ri tinimit Betsaida ri ki tinimit ri tat Andrés, ri tat Pedro. ⁴⁵ Ri tat Felipe xe' chutzukuxik ri tat Natanael, xub'ij che: Xqil u wäch ri achi ri k'o xutz'ib'aj ri qa mam Moisés chrij pa taq ri wuj re ri Pixab', xuquje' ri k'o xkitz'ib'aj ri q'alajisaj taq re ru Loq' Pixab' ri Dios chrij pa ri ki wuj. Are wa' ri Jesús ru k'ojol ri tat José aj Nazaret, —xcha che.

⁴⁶ Ri tat Natanael xub'ij che: ¿A k'o pu lo jun winaq nim u b'anik ri kápe pa Nazaret? —xcha che.

Ri tat Felipe xub'ij che: Tasa'j b'a', kawil k'u na at, —xcha che.

⁴⁷ Ri Jesús, aretaq xrilo chi petinaq ri tat Natanael, xub'ij: Xpe jun achi ri qas aj Israel, ri man k'o tá sub'unik pa ranima', —xcha'.

⁴⁸ Te ri' ri tat Natanael xuta' che ri Jesús: ¿Jas xb'an la che retamaxik nu wäch? —xcha che.

Ri Jesús xub'ij che: Xatinwilo aretaq mája' katsik'ix rumal ri tat Felipe, aretaq at k'o chuxe' ri jun u che'al higos, —xcha che.

⁴⁹ Ri tat Natanael xub'ij che: Ajtij, lal ri' ri u K'ojol ri Dios, ri Nim Taqanel pa ki wi' ri winaq aj Israel, —xcha che.

⁵⁰ Ri Jesús xch'awik, xub'ij che: E ri at, ¿a kakoj wa' xa rumal chi xinx'ij chawe chi xatinwilo aretaq ri at k'o chuxe' ru che'al higos? Kawil k'u na nimaq taq kajmab'al chuwäch wa' we ri', —xcha che.

⁵¹ Xuquje' xub'ij ri Jesús: Qas tzij ri kinb'ij chiwe chi kiwil na ri kaj jaqtalik. Kiwil k'u na ri ángeles rech ri Dios kepaqi'k, kexuli pa nu wi' in, in ri' ri Ralk'ual ri Dios ri Qas Winag,† —xcha ri Jesús chke.

2

Káb'an jun k'ulanem pa ri tinimit Caná re Galilea

¹ Churox q'ij xb'an jun k'ulanem pa ri tinimit Caná re Galilea. Ru nan ri Jesús k'o pa ri k'ulanem. ² Xuquje' ri Jesús e rachi'l ru tijoxelab' xesik'ix pa ri k'ulanem. ³ Xk'is k'u ri vino. Xpe ru nan ri Jesús, xub'ij che ri Are': Man k'o tá chi vino, —xcha che.

⁴ Ri Jesús k'ut xch'awik, xub'ij che: Nan, ¿jas che kab'ij wa' chwe in? Mäja' kuriq ri q'ij chwe, —xcha che ru nan.

⁵ Xub'ij k'u ru nan chke ri tajin kekojow ri vino: Chib'ana ronojel ri kub'ij na chiwe, —xcha chke.

⁶ K'o k'u waqib' nimaq taq q'eb'al re ab'aj chila', k'olib'al joron ri käkikoj ri winaq aj Israel che ch'ajb'al kib' aretaq kakesaj ri äwas chkij. Chkijujunal ri q'eb'al käkich'ij jumuch' o cien litros joron. ⁷ Ri Jesús xub'ij chke ri tajin kepatänin chke ri winaq: No-jisaj alaq we q'eb'al ri' che joron, —xcha chke.

Xkichap k'u ki nojisaxik ri nimaq taq q'eb'al k'a xenoj na. ⁸ Xub'ij k'u ri Jesús chke: Chesaj alaq b'i jub'iq', k'ama b'i alaq che ri k'amal b'e pa ri nimaq'ij, —xcha chke.

Je' k'u xka'no. ⁹ Aretaq ri k'amal b'e pa ri nimaq'ij xuna' ri joron ri k'extajinaq chi pa vino, man retam tä k'ut jawije' xe k'am wi. Xaq xuwi ri patäninelab' k'o ketam chik che ri vino jawije' kesam wi b'ik. Ri k'amal b'e xusik'ij ri ala (ri novio). ¹⁰ Xub'ij k'u che: Konojel ri winaq are käkikoj nab'e ri utzalaj vino. Aretaq k'ut e nojinaj ch'i ula', te k'u ri' kok ri vino ri man qas tä paqal rajil. Are k'u ri at a k'olom kan ri utzalaj vino rech k'a te' kok wa' k'isb'al, —xcha che.

¹¹ Ri xub'an ri Jesús pa Caná re Galilea, are wa' ri nab'e kajmab'al etal. Ruk' wa' xuk'utu chi sib'alaj nim u q'ij ri Are'. Xekojon k'u ru tijoxelab' che.

¹² Te k'u ri' xel b'i chila', xe' pa ri tinimit Capernaum, rachi'l ru nan, ru tijoxelab', xuquje' taq ru chaq'. Xekanaj k'u na kan kieb' oxib' q'ij chila'.

Ri Jesús keresaj b'i ri ajk'ayib' pa ri nimalaj rachoch Dios

¹³ Xa jub'iq' kraj man kuriq ri Pascua,* jun chke ri ki nimaq'ij ri winaq aj Israel. Rumlal ri' ri Jesús xe' pa ri tinimit Jerusalén. ¹⁴ Chila' pa ri nimalaj rachoch Dios xeuriq ajk'ay taq wakäx, ajk'ay taq chij, xuquje' ajk'ay taq palomäx. Xuquje' xeuriq ri k'exel taq ki rajil ri winaq t'uyut'oj pa taq ri ki tem. ¹⁵ Ri Jesús aretaq xeril wa', xub'an u b'anik jun kolob' che u ch'ayib'al, xuchaplej kesaxik b'i konojel ri winaq ri' pa ri nimalaj rachoch Dios, junam kuk' ri ki chij, ri ki wakäx. Xujab'uj ri ki rajil ri k'exel taq puaq, xupaqchij apan ri ki mesa. ¹⁶ Xub'ij chke ri ajk'ay taq palomäx: ¡Chesaj b'i alaq ronojel wa' waral! Mäb'an alaq jun k'ayib'al che ri rachoch ri nu Tat, —xcha chke.

¹⁷ Are k'u ru tijoxelab', xna'taj chke ru Loq' Pixab' ri Dios ri Tz'ib'talik, ri kub'ij: "Je' ta ne tajin kāk'at ri wanima' rumal ri u loq'al ri achoch la," —kācha'.

¹⁸ Te ri' ri winaq aj Israel xkita' che ri Jesús: ¿Jas etal kāk'ut la chqawäch rech kākilo chi k'o taqanik pa q'ab' la chub'anik ronojel wa'? —xecha che.

¹⁹ Xch'aw ri Jesús, xub'ij chke: We ta ri alaq kākulij alaq ri nimalaj rachoch Dios ri', xa oxib' q'ij kinsachi na chuyakik wa' jumul chik, —xcha chke.

²⁰ Xkib'ij k'u ri winaq aj Israel che: Kaw-inaq waqib' junab' xb'eytaj u b'anik wa' we nimalaj rachoch Dios ri', te k'u ri' kāk'ij la chi xa choxib' q'ij kāyak ta chi la jumul, —xecha che.

²¹ Are k'u ri nimalaj rachoch Dios ri xub'ij ri Jesús, are ru cuerpo ri Are'. ²² Rumlal ri' aretaq xk'astaj ri Jesús chkixol ri kāmīnaqib', xna'taj wa' we tzij ri' ri xub'ij ri Jesús chke ru tijoxelab', xkikoj k'ut ri kub'ij ru Loq' Pixab' ri Dios ri Tz'ib'talik, xuquje' xekojon che ru tzij ri Jesús.

Ri Jesús retam ri k'o pa taq ri kanima' konojel winaq

²³ Aretaq ri Jesús xk'oji pa Jerusalén pa ri nimaq'ij re ri Pascua, e k'ia xekojon che aretaq xkil ri kajmab'al taq etal ri xub'ano. ²⁴ Ri Jesús k'ut man xku'b'i tä u k'ux chkij rumal chi ri Are' retam ri k'o pa kanima' konojel winaq. ²⁵ Man rajwaxik taj chi k'o jachin jun kāk'in che ri käkichomaj ri winaq rumal chi ri Are' retam ri k'o pa taq ri kanima'.

3

Ri Jesús kätzizon ruk' ri tat Nicodemo

¹ K'o jun tata' fariseo, Nicodemo u b'i. Ri tata' ri' nim u b'anik chkixol ri winaq aj Israel. ² Ri tat Nicodemo xopan ruk' ri Jesús chaq'ab' chuch'ab'exik, xub'ij che: Ajtj, —xcha che. Qetam chi are ri Dios taqowinaq la loq che qä tijoxik rumal chi man k'o tä jun kākowin chuk'utik ri u chuq'ab' kuk' kajmab'al taq etal jas ri tajin kāk'an la we ta mat k'u ri Dios ruk', —xcha che ri Jesús.

³ Te ri' ri Jesús xub'ij che: Qas tzij kinb'ij che la chi we jun winaq man kil chi na u wäch jumul chik, man kuya' taj ke'rila' jawije' ri kätāqan wi ri Dios, —xcha che.

⁴ Ri tat Nicodemo xuta' che, xub'ij: ¿Jas ta k'u lo kub'an jun achi ri ri'j chik rech kil chi na u wäch jumul chik? ¿A kākowin ta k'u lo kok ri are' jumul chik chupam ru nan rech kil chi na u wäch chukamul? —xcha che.

⁵ Ri Jesús xch'awik, xub'ij che: Qas tzij kinb'ij che la chi ri winaq ri man kil tä na u wäch ruk' joron, xuquje' ruk' ri Loq'alaj Espiritu, man kuya' taj kopan chila' jawije' ri kätāqan wi ri Dios, —kācha che. ⁶ Ri winaq ri kalk'ualax kumal ru nan u tat, xaq winaq ri'. Are k'u ri winaq ri kalk'ualax rumal ri Loq'alaj Espiritu, ralk'ual ri Dios

* 2:13 "Pascua": Chawila' ri San Mateo 26:2, nota.

ri'. ⁷ Mākajmaj b'a' la chi kinb'ij che la: "Rajwaxik chi kil chi na u wäch jun winaq jumul chik," —kächa che. ⁸ Je' jas ri kiäqiq' xa apawije' käjich'ich' wi, kätataj ru jininem, man q'alaj tä k'ut jawije' ri käpe wi, o jawije' ri ke' wi. Are k'u je ri' ri winaq ri kil u wäch rumal ri Loq'alaj Espiritu, —xcha ri Jesús che.

⁹ Ri tat Nicodemo xuta' chi jumul che ri Jesús, xub'ij: ¿Jas k'u ru b'anik wa'? —xcha che.

¹⁰ Ri Jesús xch'awik, xub'ij che: Ri lal, lal jun nimalaj ajtij pa Israel. ¿A mat käch'ob' la wa' ri tajin kinb'ij? —kächa che. ¹¹ Qas tzij kinb'ij che la, chi ri uj käqab'ij ri qetam, käqaq'alajisaj k'u ri qilom. Are k'u ri alaq man käkoj tä alaq ri käqab'ij chech alaq. ¹² We man käkoj alaq ri kinb'ij chrij ri käk'ulmataj waral cho ruwächulew, ¿a are ta k'u lo käkoj alaq ri' we kintzizon chrij ri käk'ulmataj pa ri kaj? —kächa che.

¹³ Man k'o tä jun winaq paqalinaq b'i chila' chikaj, xane xaq xuwi ri qajinaq loq chikaj. Are k'u ri in, in ri' ri Ralk'ual ri Dios ri Qas Winaq, —kächa ri Jesús. ¹⁴ Jas ri xb'antaj pa ri juyub' ri kätz'inowik aretaq ri qa mam Moisés xuyak ri jun kumätz re ch'ich' bronze puwi' jun che' chkiwäch ri winaq, je k'u ri' käb'an na chwe in, in ri' ri Ralk'ual ri Dios ri Qas Winaq. Kinyak na in chkiwäch ri winaq. ¹⁵ Je ri' rech apachin ri käkojon chwe in man käsach tä u wäch, xane kuriq ri k'aslemal ri man k'o tä u k'isik, —xcha ri Jesús che ri tat Nicodemo.

Waral käqil wi ri nimalaj rutzil ranima' ri Dios chke konojel winaq

¹⁶ Ri Dios k'ut sib'alaj keraj ri winaq cho ruwächulew chi xusipaj loq ru K'ojol ri xaq xuwi wa' u K'ojol k'olik, rech apachin ri käkojon che ri Are' man käsach tä u wäch, xane kuriq ri k'aslemal ri man k'o tä u k'isik. ¹⁷ Ri Dios man xutaq tä loq ru K'ojol cho ruwächulew chuq'atik tzij pa ki wi' ri winaq chi k'äjisaxik ki wäch, xane che ki to'ik.

¹⁸ Jachin ri käkojon che ru K'ojol ri Dios, man käq'at tä tzij puwi' chi käk'äjisax u wäch. Jachin k'u ri man käkojon tä che, ya q'atom chi tzij puwi' chi käk'äjisax u wäch rumal chi man käkojon tä che ru K'ojol ri Dios ri xaq xuwi u K'ojol wa' k'olik. ¹⁹ Ri man kekojon taj q'atom chi tzij pa ki wi' chi käk'äjisax ki wäch rumal chi aretaq ri saqil xpe cho ruwächulew, ri winaq are utz xkil wi ri q'equm rumal chi man utz taj ri tajin käka'no. ²⁰ Konojel ri käka'n etzelal käketzelaj u wäch ri saqil. Man käkaj tä k'u keqeb' cho ri saqil rumal chi man käkaj taj chi käq'alajin ri etzelal ri tajin käka'no. ²¹ Jachin k'u taq ri käka'n ri qas tzij, keqeb' ri' cho ri saqil rech käq'alajinik chi ronojel ri tajin käka'no are wa' ri kraj ri Dios.

Ri Juan Qasalja' käch'aw chi jumul chrij ri Jesús

²² Te k'u ri' ri Jesús xel b'i chila', xe' pa Judea junam kuk' ru tijoxelab'. Naj k'ut xkanaj na chila' kuk' ri e are', xub'an k'u qasna'. ²³ Ri tat Juan xuquje' tajin kub'an qasna' pa Enón, chunaqaj ri Salim, jawije' k'o wi k'ia joron. Xeopan ri winaq ruk', xub'an k'u ki qasna'. ²⁴ Mäja' k'u kok ri tat Juan pa che' aretaq xb'antaj wa'.

²⁵ Te ri' xchaptaj jun ch'oj chkixol ru tijoxelab' ri tat Juan kuk' jujun aj Israel chrij ri resaxik ri äwas chki. ²⁶ Xe'kib'ij k'u che ri tat Juan: Ajtij, chilampe la chi ri Jun ri xk'oji uk' la chrelb'al q'ij che ri nima' Jordán, ri Jun ri xq'alajisaj la chqawäch, ri Are' tajin kub'an qasna' kämik, konojel k'u ri winaq tajin kebe' ruk', —xecha che.

²⁷ Ri tat Juan xub'ij chke: Man k'o tä jun winaq k'o jas käkowin chub'anik, we man yo'm che rumal ri Dios. ²⁸ Ri ix, qas xita ri' jas ri xinb'ij, chi man in taj ri Cristo, xane xa in taqom loq nab'e chuwäch ri Are'. ²⁹ Pa jun k'ulanem, ri k'amowinaq b'i ri ali are ri ala. Are k'u ri rachi'l ri ala ri k'o chila' kutatab'ej ri ala kätzjonik, käkikot k'u ruk' aretaq kuto. Je k'u ri' ri in kämik sib'alaj kinkikotik. ³⁰ Ri Are' rajwaxik are känimar na u q'ij, are k'u ri in, rajwaxik chi nojim man nim tä chik kinil wi, —xcha ri tat Juan chke ru tijoxelab'.

K'o Jun ri käpe chila' chikaj

³¹ Ri Jun ri käpe chila' chikaj are k'o pa ki wi' konojel. Are k'u ri jun ri xaq ajuwächulew, xuwi kutzizoj ri käb'antaj waral cho ruwächulew. Are k'u ri Jun ri käpe chila' chikaj are k'o pa ki wi' konojel. ³² Ri Are' k'ut, are kutzizoj ri rilom, ri u tom. Man k'o tä k'u jun kukojo jas ri kub'ij. ³³ Jachin k'u ri kukojo, ruk' wa' kujikib'a u b'ixik chi ri Dios kub'ij ri qas tzij. ³⁴ Ri Jun ri taqom loq rumal ri Dios, kutzizoj ru Tziz ri Dios, rumal chi ri Dios man xaq tä jub'iq' ri Espiritu rech Are' u yo'm che. ³⁵ Ri Dios qa Tat loq' ru K'ojol chuwäch, u yo'm k'u ronojel pu q'ab'. ³⁶ Jachin ri käkojon che ru K'ojol ri Dios k'o u k'aslemal ri man k'o tä u k'isik. Jachin k'u ri man kraj taj käkojon che ru K'ojol ri Dios, man k'o tä u k'aslemal ri', xane ri nimalaj royowal ri Dios käpe na puwi', käk'äjisax k'u na u wäch.

4

Ri Jesús kätzizon ruk' jun ixoq aj Samaria

¹ Ri tata'ib' fariseos xketamaj chi ri Jesús e k'ia na ru tijoxelab' ri Are', xuquje' e k'ia na ri xb'an ki qasna' rumal ri Are' chuwäch ri xb'an ki qasna' rumal ri tat Juan. ² Qas tzij k'ut, man are tä ri Jesús ri xb'anow ri qasna', xane e are ru tijoxelab' xeb'anowik. ³ Aretaq ri Jesús xuta wa', ri tajin käb'ixik, xel b'i pa Judea, xtzelej chik pa Galilea.

⁴ Pa ru tzelejik k'ut rajwaxik chi kok'ow pa taq ri juyub' re Samaria. ⁵ Xopan k'u pa jun tinimit re Samaria, Sicar u b'i, chunaqaj ri ulew ri u yo'm ri Jacob che rechb'al ri José ru k'ojol. ⁶ Chila' k'ut k'o wi ri k'ua' ri káb'ix "ru k'ua' ri Jacob" che. Ri Jesús kosinaq chik che ri b'inem, xt'uyi chuchi' ri k'ua'. Xa k'u jub'iq' man kuriq ri nik'iaj q'ij. ⁷ E b'enaq k'u ru tijoxelab' pa ri tinimit chuloq'ik ri kákitijo, ⁸ aretaq xopan jun ixoq aj Samaria chuchi' ri k'ua' chuk'amik u joron. Ri Jesús xub'ij che: Ya la jub'iq' nu joron, —xcha che.

⁹ Man kákich'ab'ej tá k'u kib' ri winaq aj Israel kub' ri winaq aj Samaria, rumal ri' ri ixoq xub'ij che ri Jesús: ¿Jas che ri lal káta' la joron la chwe in? Ri lal k'ut, lal aj Israel. Ri in, in aj Samaria, —xcha che. ¹⁰ Ri Jesús xch'awik, xub'ij che: We ta etam la jas ri kusipaj ri Dios, xuquje' we ta etam la jachin ri in ri tajin kinta' nu joron che la, ri lal qas tzij káta' la joron la ri' chwe in, kinya k'u na k'aslik joron che la, —xcha che.

¹¹ Ri ixoq xub'ij che: Tat, man k'o tá ne jas kákoj la che resaxik ri joron, sib'alaj naj k'ut qajinaq ri k'ua'. ¿Jawije' ta k'u ne ke k'ama wi la ri k'aslik joron ri káya la chwe? —kácha che. ¹² Ri Jacob ri qa mam ojer are yo'winaq kan wa' we k'ua' ri' chqe, ri xresaj wi u joron ri are', ri ralk'ual, xuquje' ri xresaj wi ki joron ri rawaj. ¿A lal ta k'ut ri nim na b'anik la chuwach ri are'? —xcha ri ixoq che ri Jesús.

¹³ Ri Jesús xch'awik, xub'ij che: Konojel ri kákitij ke we joron ri' káchaq'ij chi na ki chi' jumul chik. ¹⁴ Jachin k'u ri kutij re ri joron ri kinya in, man k'o tá chi na jumul káchaq'ij chi u chi'. Je ri', rumal chi ri joron ri kinya in che káb'ulb'ut na pa ranima' je' jas jun u k'i'yib'al ja' ri kuya k'aslemal ri man k'o tá u k'isik, —xcha che.

¹⁵ Ri ixoq xub'ij che: Tat, ya la we ri joron ri' rech man káchaq'ij tá chi nu chi', rech man rajwaxik tá chi kinpe chi waral chuk'amik nu joron, —xcha che.

¹⁶ Ri Jesús xub'ij che: Oj b'a' la, jesik'ij la loq ri achajil la, kápe chi k'u na la waral, —xcha che.

¹⁷ Ri ixoq xch'awik, xub'ij: Man k'o tá wachajil, —xcha che.

Xub'ij k'u ri Jesús che: Tziji ri káb'ij la chi man k'o tá achajil la. ¹⁸ E job' k'u ne ri achajil la e k'olinaq. Are k'u ri jun ri k'o uk' la kámik, man are tá qas achajil la. Qas tzij b'a' ri b'im la, —xcha ri Jesús che ri ixoq.

¹⁹ Aretaq xuta ri ixoq wa', xub'ij che ri Jesús: Tat, kinwilo chi lal jun q'alajisat re ru Loq' Pixab' ri Dios. ²⁰ Ri qa mam uj ojer, ri uj aj Samaria, xkiq'ijilaj ri Dios waral pa we juyub' ri'. Are k'u ri alaq, ri alaq aj Israel, káb'ij alaq chi pa ri tinimit Jerusalén rajwaxik káq'ijilax wi ri Dios, —xcha che.

²¹ Ri Jesús xch'awik, xub'ij: Nan, kojo b'a' la ri kinb'ij chi kopan na ri q'ij aretaq ri alaq káq'ijilaj na alaq ri qa Tat, man rajwaxik tá k'u na chi kápe alaq waral pa we juyub' ri' o chi ke' alaq pa Jerusalén chuo'ijilaxik ri qa Tat, —xcha che. ²² Ri alaq, alaq aj Samaria man gas etam alaq jachin ri káq'ijilaj alaq. Are k'u ri uj getam jachin ri káq'ijilaj, rumal chi ru tob'anik ri Dios kápetik kumal ri winaq aj Israel. ²³ Kuriq k'u na ri q'ij, are kámik k'ut, aretaq ri winaq ri qas tzij kákiq'ijilaj ri qa Tat, qas kákiq'ijilaj na ri Are' ruk' ru taqanik ri Loq'alaj Espiritu pa kanima'. Ri qa Tat k'ut, kraj chi je' káb'an wa' kumal ri winaq ri keq'ijilaj che. ²⁴ Ri Dios are Espiritu, jachin k'u taq ri keq'ijilaj che, rajwaxik qas tzij kákiq'ijilaj na ruk' ru taqanik ri Loq'alaj Espiritu pa kanima'.

²⁵ Ri ixoq xub'ij che: Ri in wetam chi kápe na ri Mesias ri xuquje' káb'ix Cristo che. Aretaq kápe ri Are', kuq'alajisaj na ronojel chqawäch, —xcha che.

²⁶ Ri Jesús xub'ij che: In ri', ri tajin kintzijo uk' la, —xcha che.

²⁷ Qas je' tajin kub'ij wa' ri Jesús aretaq xeopan ru tijoxelab'. Xkikajmaj k'ut chi tajin kátzijo ruk' jun ixoq. Man k'o tá k'u jun xukoch'o xuta' che ri Jesús jas ri kraj ri ixoq o jas ri tajin kub'ij che. ²⁸ Ri ixoq k'ut xuya kan ru q'eb'al, xe' pa ri tinimit, xub'ij chke ri winaq: ²⁹ Chixsajmpe', jiliwila k'u jun achi ri u b'im chwe ronojel ri nu b'anom. ¿A mat are wa' ri Cristo? —xcha chke ri winaq.

³⁰ Xeb'el k'u b'i ri winaq pa ri tinimit, xeb'e' jela' jawije' k'o wi ri Jesús. ³¹ Are k'u ri tijoxelab' tajin kákiq'ij che ri Jesús: Ajtij, woq b'a' la, —xcha che.

³² Ri Jesús k'ut xub'ij chke: Ri in k'o ri nu wa ri kintijo ri man iwetam tá ix jasach, —xcha chke.

³³ Ri tijoxelab' xkichaplej u ta'ik chb'il taq kib', xkib'ij: ¿A xa ta k'u lo k'o jachin xk'amow loq ri kutijo? —xcha'.

³⁴ Ri Jesús xub'ij chke: Ri nu wa are ru b'anik ru rayib'al ri jun ri xintaqow loq, ru k'isik k'ut ru chaplem loq u b'anik. ³⁵ Ri ix kib'ij: "Kraj na kiejeb' ik' ri cosecha." Ri in k'ut kinb'ij chiwe: Chika'yej taq ri tiko'n, e chaq'ij chi k'ut, e utz chik che ri cosecha. ³⁶ Ri káchakun pa ri cosecha, káyi' na ri tojb'al re. Are k'u ri cosecha ri kuyako are re k'aslemal wa' ri man k'o tá u k'isik, rech ri ketiko'nijik, xuquje' ri keyakowik, junam kekikotik. ³⁷ Qas tzij k'ut ri káb'ixik: "Jun winaq kátiko'nijik, are k'u jun winaq chik ri káyakowik," —kácha'. ³⁸ Ri in xixintaq b'ik rech kiyak u wäch ri tiko'n ri man xiriq tá k'áx chutikik. Jule' winaq chik ri xechakunik, are k'u ri ix xaq xuwi kixkikot chuyakik u wäch ri ki tiko'n, —xcha chke ru tijoxelab'.

³⁹ E k'ia k'u chke ri winaq pa ri alaj tinimit ri' re Samaria ri xekojo che ri Jesús rumal ri xub'an ri ixoq, xujikib'a k'u u b'ixik chke: "U b'im chwe ronojel ri nu b'anom," —xcha ri'. ⁴⁰ Je ri' chi aretaq xeopan ri winaq aj Samaria ruk' ri Jesús, xkib'ochi'j chi kakanaj na kan kuk'. Xkanaj k'u na kan kieb' q'ij kuk'. ⁴¹ E k'ia k'u na ri xekojojik aretaq xkita ri tzij ri xub'ij ri Jesús. ⁴² Xkib'ij k'u che ri ixoq: Kämik kâqakojo, man xuwi tä rumal ri xab'ij at chqe, xane rumal chi qa tom uj ri kub'ij. Qetam k'ut chi gas tzij are wa' ri Cristo ri To'l Ke ri winaq cho ruwächulew, —xecha che.

Ri Jesús kukunaj ru k'ojol jun tata' ri nim u b'anik

⁴³ Churox q'ij ri Jesús xel b'i pa Samaria, xutaqej ru b'e, xe' pa Galilea. ⁴⁴ Je ri', rumal chi jun q'alajisal re ru Loq' Pixab' ri Dios man nim tä kil wi ri are' pa ri gas u tinimit je' jas ri xub'ij ri Jesús. ⁴⁵ Aretaq xopan pa Galilea ri winaq chila' utz u k'ulaxik xka'no. Ri e are' k'ut e petinaq pa ri nimaq'ij Pascua ri kâb'an pa ri tinimit Jerusalén, kilom k'u ronojel ri u b'anom ri Are' chila' pa ri nimaq'ij.

⁴⁶ Te ri' ri Jesús xe' chi jumul pa ri tinimit Caná pa Galilea jawije' ri xuk'ex wi ri joron pa vino. K'o k'u jun tata' chila' ri nim u b'anik pa ri tinimit Capernaum. Jun to'l re ri nim taqanel wa'. Yawab' k'u ri u k'ojol. ⁴⁷ Aretaq ri tata' ri' xuto chi ri Jesús xpe pa Judea, xopan k'u pa Galilea, xe' ri are' che rilik. Xuta' toq'ob' che chi ke' cho rachoch chukunaxik ri u k'ojol, ri xa jub'iq' man kâkämik. ⁴⁸ Ri Jesús k'ut xub'ij che: Ri alaq man kâkojon tä alaq we ta mat kil alaq kajmab'al, xuquje' etal, —xcha ri Jesús.

⁴⁹ Xub'ij k'u ri tata' ri nim u b'anik che: Tat, sa'j la chanim cho wachoch mǎja' k'u kâkäm ri nu k'ojol, —xcha che.

⁵⁰ Xub'ij k'u ri Jesús che: jǫj la cho ja, kâk'asi k'u na ri k'ojol la! —xcha che.

Xukoj k'u ri tata' ri xb'ix che rumal ri Jesús, xe' k'ut. ⁵¹ Aretaq xa jub'iq' man kopan ri tata' cho rachoch, xepe ri patänil taq re chuk'ulaxik, xkib'ij k'u che: jK'asal ri k'ojol la! —xecha che.

⁵² Ri tata' xuta' chke jas hora xuchap rutzirik ri u k'ojol. Ri e are' xkib'ij che: Iwir pa ri nab'e hora re ri b'enaq q'ij xel ri q'aq' chrij, —xecha che.

⁵³ Ru tat ri ala xuch'ob'o chi pa ri hora ri' xub'ij ri Jesús che: "Ri k'ojol la kâk'asi na," —xcha ri Jesús. Xkojon k'u ri tata' che ri Jesús, xuquje' konojel ri e k'o pa rachoch.

⁵⁴ Are wa' ri ukab' kajmab'al etal ri xub'an ri Jesús aretaq xtzelej loq pa Judea, xopan k'u pa Galilea.

5

Ri Jesús kukunaj jun achi pa Betesda ri kâmina u cuerpo

¹ Te k'u ri' ri winaq aj Israel xka'n jun ki nimaq'ij chik pa Jerusalén. Ri Jesús k'ut xe' chi na jumul jela'. ² Pa ri tinimit Jerusalén chunaqaj ri uchib'e ri kâb'ix "Uchib'e ri Keb'ok wi Chij" che, k'o jun atinib'al ri kâb'ix Betesda che ru b'i' pa ri ch'ab'al hebreo. E k'o job' raqan ja chrij. ³ Pa taq ri raqan ja ri' e q'oyoq'oj k'ia yawab'ib'. E k'o moyab', ch'okojib', xuquje' winaq ri kâmina ki cuerpo. Tajin kâkeyej chi kâslab' ri joron. ⁴ Jun taq pa' k'ut kâqaj loq jun ángel pa ri atinib'al, kuslab'isaj k'u ri joron. Jachin ri nab'e kâqaj pa ri joron aretaq kâslab'taj kan rumal ri ángel kâkunataj che apachike u wäch yab'il ri k'o che. ⁵ K'o k'u jun achi chila' ri xke' juwinaq lajuj ruk' wajxaqib' junab' yawab'. ⁶ Aretaq ri Jesús xrló q'oyol cho ri ulew, xuquje' xretamaj chi k'ia junab' chik yawab', xuta' che: ¿A kaj la kutzir la? —xcha che.

⁷ Ri yawab' xch'awik, xub'ij che: Tat, man k'o tä jun kinqasan pa ri atinib'al aretaq kâslab' ri joron. Amaq'el aretaq kwaj kinqajik, jun chik kâqaj b'i nab'e chnuwäch in, —xcha che.

⁸ Ri Jesús xub'ij che: jWalij b'a' la, yaka la b'i ri sok la, b'in ya' la! —xcha ri Jesús che.

⁹ Chanim xutzir ri achi. Xuyak b'i ru sok, xuchaplej b'inem. Are k'u q'ij re uxlanem aretaq xb'antaj wa'. ¹⁰ Ri winaq aj Israel xkib'ij che ri achi ri xutzirik: Kämik k'ut are q'ij re uxlanem. Man ya'tal taj kaweqaj b'i ra sok, —xecha che.

¹¹ Ri achi xch'awik, xub'ij chke: Ri jun ri xinkunanik xub'ij chwe: "jYaca la b'i ri sok la, b'in ya' la!" —xcha ri' chwe, —xcha ri achi chke ri winaq.

¹² Ri e are' xkita' che, xkib'ij: jJachin ri' ri xb'in chawe: "jYaca la b'i ri sok la, b'in ya' la!" —xecha che.

¹³ Are k'u ri achi man xuch'ob' tä chi u wäch jachin ri xkunanik rumal chi ri Jesús xsach chkixol ri k'ialaj winaq ri e k'o chila'. ¹⁴ Te ri' ri Jesús xuriq' ri achi pa ri nimalaj rachoch Dios, xub'ij che: jChilampe la! —xcha'. Kämik ri lal utz chik. Mâmakun chi b'a' la, mǎpe chi ne jun k'âx chik chij la ri más nim na, —xcha ri Jesús che.

¹⁵ Xe' k'u ri achi, xub'ij chke ri winaq aj Israel chi ri xkunanik are ri Jesús. ¹⁶ Rumal ri' ri winaq aj Israel xkitzujuk u chapik ri Jesús rech kâkikâmisaj, rumal chi kub'an taq wa' we ri' pa ri q'ij re uxlanem. ¹⁷ Xub'ij k'u ri Jesús chke: Ri nu Tat amaq'el chakuninaq petinaq loq. Rajwaxik k'ut chi ri in xuquje' kinchakunik, —xcha chke.

¹⁸ Rumal ri' ri winaq aj Israel xa sib'alaj xpe na koyowal, xkaj xkikâmisaj ri Jesús

rumal chi man nim tä xril wi ri kub'ij ri Pixab' chrij ri q'ij re uxlanem. Man xuwi tä k'u ri', xane xuquje' xujunamaj rib' ruk' ri Dios aretaq xub'ij chi ri Dios Are ru Tat.

Ru K'o'jol ri Dios k'o taqanik pu q'ab'

¹⁹ Te ri' ri Jesús xub'ij chke: Qas tzij kinb'ij chech alaq chi ri u K'o'jol ri Dios man kākowin taj k'o jas kub'ano xaq pa re wi. Xuwi kub'ano jachike ri kārilo chi kub'an ri u Tat. Ronojel ri kub'an ri u Tat, kub'an k'u ri u K'o'jol xuquje'. ²⁰ Ri qa Tat sib'alaj loq' ri u K'o'jol chuwäch, kuk'ut k'u chuwäch jachike ri kub'an ri Are'. Kuk'ut k'u na nimaq taq kajmab'al chuwäch ru K'o'jol, ri sib'alaj kākajmaj na alaq. ²¹ Je' jas ri qa Tat keuk'astajisaj ri kāmīnaqib', kuya k'u ki k'aslemal, je ri' xuquje' ri u K'o'jol kuya k'aslemal chke jachin taq ri kraj kuya wi. ²² Ri qa Tat man kuq'at tä tzij puwi' jachin jun, xane u yo'm ronojel u wäch taqanik pu q'ab' ru K'o'jol rech ri Are' kāk'atow tzij. ²³ Je ri' rech konojel ri winaq kākīya u q'ij ri u K'o'jol ri Dios junam jas ri kāk'a'n chuya'ik u q'ij ri qa Tat. Jachin ri man kuya tä u q'ij ri u K'o'jol ri Dios, man kuya tä ri' u q'ij ri qa Tat ri xutaq loq ri Are'.

²⁴ Qas tzij kinb'ij chech alaq chi jachin ri kutatab'ej ri nu tzij, kākōjon k'u che ri Dios ri xintaqow loq, kuriq na ri' ri k'aslemal ri man k'o tä u k'isik. Man kāk'at tä k'u tzij puwi' chi kāk'ājisax u wäch rumal chi elinaq chik pa ri kāmīkal re ri ojer k'aslemal, k'o chik ri qas u k'aslemal. ²⁵ Qas tzij kinb'ij chech alaq chi kāpe na ri q'ij, kāmīk k'ut ri q'ij ri' aretaq ri kāmīnaqib' kākita na chi kinch'awik, in ri' ri u K'o'jol ri Dios. Jachin taq ri kākīnimaj ri kinb'ij kek'asi na. ²⁶ Ri qa Tat k'o kuinem pu q'ab' pa re wi chuya'ik k'aslemal, xuquje' u yo'm pa nu q'ab' in, in ri' ri u K'o'jol, chi kinkowinik kinya k'aslemal. ²⁷ Xuquje' u yo'm taqanik pa nu q'ab' rech king'at tzij rumal chi ri in, in ri' ri Ralk'ual ri Dios ri Qas Winag. ²⁸ Mākajmaj alaq wa' rumal chi kopan na ri q'ij aretaq konojel ri kāmīnaqib' kākita na chi kinch'awik. ²⁹ Keb'el na loq pa taq ri muqub'al. Ri ka'nom ri utzil kek'astajik rech kāk'oji na ki k'aslemal. Are k'u ri ka'nom ri man utz taj kek'astajik rech kāk'at na tzij pa ki wi' chi kāk'ājisax na ki wäch.

K'o ri kāk'utuwiw chi k'o taqanik pu q'ab' ri Jesús

³⁰ Ri in man k'o tä jas kinkowin chub'anik xaq pa we wi. Ri in king'at tzij xa jas ri kintaq wi. Jikom k'u kinb'an in chuq'atik tzij. Man are tä k'u kinb'an xa jas ri kwaj in, xane are kinb'an jas ri kraj ri nu Tat ri xintaqow loq. ³¹ We ri in king'alajisaj ri qas tzij chwij chb'il wib', man k'o tä u patān ri' ri kinb'ij. ³² K'o k'u Jun chik ri k'o jas kuq'alajisaj chwij, wetam k'ut chi ri kub'ij ri

Are' chwij are qas tzij. ³³ Ri alaq xtaq alaq u ta'ik che ri tat Juan. Ri xub'ij k'u ri are' chech alaq are qas tzij. ³⁴ Ri in k'ut man are tä ku'l nu k'ux chrij ri kuq'alajisaj jun winaq chwij. Xuwi kinb'ij wa' rech ri alaq kārīq na alaq ru tob'anik ri Dios. ³⁵ Ri tat Juan are junam ruk' jun chāj o jun candela ri kāk'atik, ri kājuluwik. Ri alaq k'ut xkikot alaq kieb' oxib' q'ij ruk' ri saqil ri'. ³⁶ K'o k'u na ri kāk'utuwiw chi qas tzij ri kinb'ij. Are utz na wa' chuwäch ri xuq'alajisaj ri tat Juan chwij. Ri tajin kinb'ano, are wa' ri xinutaq ri nu Tat chub'anik. Are k'u wa' ri kāk'utuwiw chi qas tzij are ri nu Tat ri in taqowinaq loq. ³⁷ Xuquje' ri nu Tat ri xintaqow loq kuq'alajisaj ri qas tzij chwij, pune ta ne ri alaq man tom tä alaq ri Are' kāk'awik, man ilom tä k'u alaq u wäch. ³⁸ Man qajinaq tä k'u ru Tzij ri Dios pa anima' alaq rumal chi man kākōjon tä alaq che ri Jun ri taqom loq rumal ri qa Tat. ³⁹ Ri alaq na'l kāsik'ij alaq u wäch ru Loq' Pixab' ri Dios ri Tz'ib'talik rumal chi kächomaj alaq chi chila' kārīq wi alaq ri kāyo'w ri k'aslemal ri man k'o tä u k'isik. Are k'u ru Loq' Pixab' ri Dios ri Tz'ib'talik ri kuq'alajisaj ri qas tzij chwij in. ⁴⁰ Pune je ri', ri alaq man kaj tä alaq kāpe alaq wuk' rech kārīq alaq we k'aslemal ri' ri man k'o tä u k'isik.

⁴¹ Ri in man kwaj taj chi kākīy' nu q'ij kumal ri winaq. ⁴² Wetam k'u in ri anima' alaq, wetam chi man kaj tä alaq ri Dios. ⁴³ Ri in, in petinaq chuk'exwäch ri nu Tat. Ri alaq k'ut man xink'ulaj tä alaq. Are k'u we ta kāpe jachin jun chik xaq pa re wi, jare ri are' kāk'ulaj na alaq! ⁴⁴ ¿A kākowin lo alaq ri' kākōjon alaq chwe we xa kätzukuj alaq u ya'ik q'ij alaq chb'il taq ib' alaq, man are tä kätzukuj alaq chi kākīy' q'ij alaq rumal ri Dios ri xaq xuwi Dios wa' k'olik? ⁴⁵ Mächomaj alaq chi ri in kinch'ap u b'ixik ri man utz taj chij alaq cho ri nu Tat. Ri kāk'in na wa' chij alaq are ri qa mam Moisés, ri ku'b'am k'ux alaq chrij. ⁴⁶ We ta ri alaq qas xkojon alaq che ri xub'ij ri qa mam Moisés, kākōjon ta k'u alaq ri' chwe in rumal chi ri qa mam Moisés k'o ri u tz'ib'am chwij in. ⁴⁷ We k'u man xkojon alaq che ri xutz'ib'aj ri are', ¿jas ta k'u lo kāk'an alaq chukojik ri kinb'ij in? — xcha ri Jesús chke.

6

Ri Jesús kuya ki wa job' mil winaq

¹ Te k'u ri' ri Jesús xq'ax ch'äqäp che ri mar ri kāk'ix "Mar re Galilea" che, ri xuquje' kākōj "Mar re Tiberias" che ru b'i'. ² E k'ia winaq k'ut xeteri b'i chrij ri Jesús rumal chi kilom ri kajmab'al taq etal ri xub'ano aretaq xeukunaj taq ri yawab'ib'. ³ Te ri' xpaqi ri Jesús puwi' jun juyub', chila' k'ut xt'uyi wi junam kuk' ru tijoxelab'. ⁴ Xa k'u jub'iq' kraj

man kuriq ri nimaq'ij ri káb'ix "Pascua" che, jun chke ri ki nimaq'ij ri winaq aj Israel. ⁵ Aretaq ri Jesús xeril ri k'ialaj winaq ri e b'enaq ruk', xub'ij che ri tat Felipe: ¿Jawije' ta ne keqaloq' wi ri wa ri káqaya chke ri k'ialaj winaq ri? —xcha che.

⁶ Xub'ij wa' ri Jesús xa rech kárido jas kub'ij ri tat Felipe. Qas retam k'u ri Are' jas ri kub'an na. ⁷ Xch'aw k'u ri tat Felipe, xub'ij: Kieb' cientos quetzales kaxlan wa man kub'an tá ri' rech k'o ju taq b'iq' ke konojel chkijujunal, —xcha che.

⁸ Are k'u ri tat Andrés, ratz ri tat Simón Pedro, jun chke ru tijoxelab' ri Jesús, xub'ij che: ⁹ Waral k'o wi jun ala ruk'am job' kaxlan wa re cebada ruk' kieb' kár. ¿Jas ta k'u lo u patán wa' che ki tzuqik ri k'ialaj winaq ri e k'olik? —xcha che.

¹⁰ Xub'ij wa' ri Jesús chke ru tijoxelab': Chib'ij chke konojel ri winaq chi ket'uyi'k, —xcha che.

Sib'alaj k'ia k'u ri rax q'ayes k'o cho ri juyub' ri', xet'uyi' k'ut. Kraj e k'o job' mil achijab'. ¹¹ Te ri' ri Jesús xeb'am ri kaxlan wa. Aretaq xetewchitaj wa' rumal, xeuya chke ru tijoxelab', ri tijoxelab' chik xekijach wa' chkiwäch konojel ri winaq ri e t'uyut'oj. Xuquje' je' xub'an chke ri kár, xeuya chke jampa' ri xkaj. ¹² Aretaq e nojinaq chik, ri Jesús xub'ij chke ru tijoxelab': Cheiyaka ri ch'áqataq ri xekanaj kanoq rech man xaq tá keb'e' pa mes, —xcha che.

¹³ Xekiyak k'ut, xekinojisaj kab'lajuj chikäch kuk' ri ch'áqataq ri xekanaj kan chke ri job' kaxlan wa re cebada. ¹⁴ Ri winaq, aretaq xkil we kajmab'al etal ri' ri xub'an ri Jesús, xkib'ij: Qas tzij are wa' ri q'alajisal re ru Loq' Pixab' ri Dios ri káb'ixik chi kápe na cho ruwächulew, —xecha ri'.

¹⁵ Ri Jesús k'ut xrilo chi kákaj kákikoj ki chuq'ab' chuk'amik b'ik rech kákikoj che nim taqanel pa ki wi', rumal k'u ri' xa xel b'i chkiwäch, xe' chi jumul puwi' ri juyub' rech kák'oji chila' u tukiel.

Ri Jesús káb'in puwi' ri ja'

¹⁶ Aretaq chaq'ab' chik, ru tijoxelab' ri Jesús xeqaj b'i chuchi' ri mar. ¹⁷ Xeb'ok k'u pa jun barco, xkichaplej b'inem puwi' ri mar rech keq'ax pa Capernaum. Sib'alaj q'equm chik, ri Jesús k'ut mája' kátzelej loq pa ri juyub'. ¹⁸ Xaq te'talik xpe jun nimalaj kiäq'iq'. Xewalij k'u nimaq taq uwoja' puwi' ri mar rumal. ¹⁹ Aretaq ki b'inib'em chi job' o waqib' kilómetros, xkil ri Jesús petinaq tajin káb'in puwi' ri ja'. Naqaj chik k'o wi che ri barco, xkixej k'u kib' che. ²⁰ Are k'u ri Jesús xub'ij chke: ¡In ri', mixej b'a' iwib'! —xcha ri' chke.

²¹ Te ri' ri e are' xekikotik, xkib'ij che ri Jesús chi kápaqi kuk' pa ri barco. Chanim

k'ut xeopan pa ri tinimit jawije' ri b'enam wi ke.

Ri winaq kákitzukuj ri Jesús

²² Chukab' q'ij ri winaq ri xekanaj kan ch'áqap che ri mar xkilo chi ri tijoxelab' xeb'e' pa ri jun barco ri xuwi barco wa' k'o chila', man xe' tá k'u ri Jesús kuk'. ²³ Xuriqa k'ut chi xeopan nik'iaj barcos chik ri ki petik pa ri tinimit Tiberias. Xeopan chila' chu-naqaj ri uwosaq jawije' ri winaq xkitij wi ri kaxlan wa aretaq xmaltoixitaj wa' rumal ri Qajaw Jesús. ²⁴ Je ri' chi ri winaq aretaq xkilo chi man k'o tá chi ri Jesús chila', xuquje' chi man e k'o tá chi ru tijoxelab', xeb'ok pa taq ri barcos, xeb'e' k'u pa ri tinimit Capernaum chutzukuxik ri Jesús.

Waral káqil wi chi ri Jesús, are ri Are' ri wa ri kuya ri qas k'aslemal

²⁵ Aretaq ri winaq xeopan ch'áqap che ri mar, xkiriq ri Jesús, xkita' k'u che, xkib'ij: Ajtij, ¿jampa' xul la waral? —xecha che.

²⁶ Xub'ij k'u ri Jesús chke: Qas tzij ri kinb'ij chech ala q' chi ri ala q' kintzukuj ala q' xa rumal chi xwi' ala q', xnoj k'u ala q'. Man kintzukuj tá ala q' rumal chi käch'ob' ala q' u b'eyal ri kajmab'al taq etal ri kinb'ano.

²⁷ Mokil ala q' chutzukuxik ri wa ri xa kásach u wäch, xane are rajwaxik chi kok il ala q' chutzukuxik ri wa ri man kásach tá u wäch, ri kuya chech ala q' ri qas k'aslemal ri man k'o tá u k'isik. Are wa' ri wa ri kinya na in chech ala q', in ri' ri Ralk'ual ri Dios ri Qas Winaq. Rumal wa' u k'utum ri Dios qa Tat chi ruk' Are' in petinaq wi, —xcha ri Jesús chke.

²⁸ Te ri' ri winaq xkita' che ri Jesús, xkib'ij: ¿Jas k'u ri' ri rajwaxik káqa'no rech kujkowinik káqa'no jachike ri kraj ri Dios? —xecha che.

²⁹ Ri Jesús xch'awik, xub'ij chke: Ri kraj ri Dios chi káb'an ala q' are la' chi kákojon ala q' che ri jun ri u taqom loq, —xcha che.

³⁰ Xkita' chi che ri Jesús, xkib'ij che: ¿Jas u wäch etal káb'an la chqawäch rech káqilo, kujkojon k'u che la? ¿Jas ri kákojin la chub'anik? —kecha che. ³¹ Ri qa nan qa tat ojer xkitij ri maná pa ri juyub' ri kátz'inowik, je' jas ri kub'ij ru Loq' Pixab' ri Dios ri Tz'ib'talik: "Ri Dios xuya chutijik ri ki wa ri xpe chila' chikaj," —xecha che ri Jesús.

³² Xch'aw k'u ri Jesús, xub'ij chke: Qas tzij ri kinb'ij chech ala q' chi man are tá ri qa mam Moisés ri xyo'w ri wa chke ri kápe chila' chikaj, xane are ri nu Tat ri káyo'w ri qas wa ri kápe chila' chikaj. ³³ Ri wa ri kuya ri Dios are wa' ri qajinaq loq chikaj, ri kuya ri qas k'aslemal chke konojel winaq, —xcha ri Jesús chke.

³⁴ Xkib'ij k'u che ri Jesús: Tat, ya la qe ri wa ri' amaq'el ronojel q'ij, —xecha che.

³⁵ Ri Jesús xub'ij chke: In ri' ri wa ri kuya ri gas k'aslemal. Jachin ri kápe wuk', man k'o tá jumul ri kánum chik. Jachin ri kákojon chwe man k'o tá jumul ri káchaq'ij chi u chi'. ³⁶ Nu b'im chi k'u chech alaq chi ri alaq man kákojon tá alaq chwe pune ilom alaq nu wäch. ³⁷ Konojel ri keyi' chwe rumal ri nu tat kepe na wuk' in. Apachin k'u ri kepe wuk' man keintzelejisaq tá b'ik. ³⁸ Ri in k'ut man xinpe tá chila' chikaj xa chub'anik jachike ri kwaj in, xane chub'anik ru rayib'al ri xintaqow loq. ³⁹ Ri u rayib'al ri nu Tat ri xintaqow loq are la' chi man k'o tá jun chke ri xeuya chwe ri kintzaqow, xane chi keink'astajisaq na chkixol ri káminaqib' pa ri k'isb'al q'ij. ⁴⁰ Ri u rayib'al ri xintaqow loq are la' chi konojel ri kákil nu wäch in, in ri' ri u K'ojol ri Dios, kekojon k'u chwe, kákirij ri k'aslemal ri man k'o tá u k'isik. Keink'astajisaq k'u na in chkixol ri káminaqib' pa ri k'isb'al q'ij, —xcha ri Jesús chke.

⁴¹ Ri winaq aj Israel, aretaq xkita wa' we tzij ri', xkichap u b'ixik k'äx taq tzij chrij ri Jesús rumal ri xub'ij: "In ri' ri wa ri kápe chila' chikaj," —xcha chke. ⁴² Xkib'ij k'ut: ¿A mat are wa' ri Jesús ru k'ojol ri tat José? Ri uj qetam ki wäch ru nan u tat. ¿Jas lo wa' ri kub'ij chi petinaq chila' chikaj? —xecha ri'.

⁴³ Are k'u ri Jesús xub'ij chke: ¡Tanal alaq che ri yog'onik! —kácha'. ⁴⁴ Man k'o tá jun ri kuya' kápe wuk' in we ta mat ká'am loq rumal ri nu Tat ri xintaqow loq. Ri in k'ut kink'astajisaq na chkixol ri káminaqib' pa ri k'isb'al q'ij, —kácha'. ⁴⁵ Kub'ij pa taq ri wuj ri xkitz'ib'aj ri q'alajisaq taq re ru Loq' Pixab' ojer: "Ri Dios kuya na tijonik chke konojel," —kácha ri'. Rumal ri' konojel ri kákitatab'ej ri kub'ij ri qa Tat, k'o k'u ri káketamaj na ruk', kepe na ri e are' wuk' in, —kácha chke.

⁴⁶ Are gas tzij chi man k'o tá jun winaq ilowinaq u wäch ri qa Tat. Ri Jun ri ilowinaq u wäch are xaq xuwi ri petinaq ruk' ri Dios, —kácha'. ⁴⁷ Qas tzij ri kinb'ij chech alaq chi jachin ri kákojon chwe in k'o na ru k'aslemal ri man k'o tá u k'isik. ⁴⁸ In ri' ri wa ri gas kuya k'aslemal, —kácha chke. ⁴⁹ Ri nan tat alaq ojer xkitij ri wa ri káb'ix "maná"* che pa ri juyub' ri kátz'inowik, konojel k'ut xekámik. ⁵⁰ Are k'u ri in tajin kintzijoq chech alaq jas ri' ri gas wa ri petinaq chila' chikaj. Jachin k'u ri kutij re we wa ri', man kákám tá ri', —kácha'. ⁵¹ In k'u ri' ri k'aslik wa, ri qajinaq loq chikaj. Jachin ri kutij re we wa ri', † kák'asi na pa taq ri q'ij ri junab' ri kepetik. Ri wa ri kinya in are ri nu cuerpo. Kinya wa' rech k'o ri ki k'aslemal konojel winaq cho ruwächulew, ‡ —xcha ri Jesús chke.

⁵² Ri winaq aj Israel xkichaplej u tzi-job'exik kib' chkixol, xkib'ij: ¿Jas ta k'u lo kub'an we achi ri' chuya'ik ru tijal chqe pa tijik? —xecha'.

⁵³ Ri Jesús xub'ij chke: Qas tzij ri kinb'ij chech alaq chi we ri alaq man kátij tá alaq ri nu cuerpo, in ri' ri Ralk'ual ri Dios ri Qas Winag, man kátij tá alaq ri nu kik'el, te k'u ri' man kák'o'ji tá na ri k'aslemal alaq ri'. ⁵⁴ Jachin ri kutij ri nu cuerpo xuquje' kutij ri nu kik'el, k'o k'u u k'aslemal ri man k'o tá u k'isik. Ri in k'ut kink'astajisaq na chkixol ri káminaqib' pa ri k'isb'al q'ij. ⁵⁵ Ri nu cuerpo k'ut are ri gas wa, ri nu kik'el are gas je' jas ri vino ri kátijowik. ⁵⁶ Jachin ri kutij ri nu cuerpo, xuquje' kutij ri nu kik'el gas kák'o'ji ri are' wuk' in, ri in xuquje' gas kink'o'ji ruk' are'. ⁵⁷ Ri nu Tat ri xintaqow loq k'o u k'aslemal. Ri in xuquje' in k'asal rumal ri Are'. Je ri' xuquje' jachin ri kutzuq rib' chwe in, kák'asi na wumal in. ⁵⁸ Are tajin kintzijoq chrij ri wa ri petinaq chila' chikaj. We wa ri' man junam tá ruk' ri maná ri xkitij ri nan tat alaq ojer, xekám k'u ri e are'. Are k'u ri kutij re we wa ri' kák'asi na pa taq ri q'ij ri junab' ri kepetik, —xcha ri Jesús chke ri winaq aj Israel.

⁵⁹ Ri Jesús xub'ij wa' we tzij ri' chke ri winaq ri ki mulim kib' pa ri rachoch Dios pa Capernaum che ki tijoxik.

Ri Jesús käch'aw chrij ri tzij ri kuya k'aslemal ri man k'o tá u k'isik

⁶⁰ Aretaq xkita wa' we tijonik ri', e k'ia chke ri winaq ri e k'o ruk' xkib'ij: Sib'alaj k'äx wa' ri tzij ri xub'ij. ¿Jachin ta lo ri kákowinik kutatab'ej? —xecha'.

⁶¹ Ri Jesús k'ut xretamaj chi k'äx tajin kech'aw chrij rumal ri tzij ri xub'ij, xuta' k'u chke: ¿A tzel káta alaq ri xinb'ij? —xcha chke. ⁶² ¿Jas k'u ri kák'ulmataj ri' we ta kinil alaq in, in ri' ri Ralk'ual ri Dios ri Qas Winag, kintzelejik kinpaqi k'u chikaj jawije' ri in k'o wi nab'e? ⁶³ Ri Loq'alaj Espiritu are ri káyo'w ri k'aslemal. Ri cuerpo xaq u tukil man k'o tá u patán. Ri tzij k'ut ri nu b'im chech alaq e are' gas tzij ri kepe ruk' ri Dios, xuquje' kákiya k'aslemal. ⁶⁴ E k'o k'u jujun chech alaq ri man kekojon taj, —xcha chke.

Qas k'u retam ri Jesús petinaq loq jachin taq ri man kekojon tá che, xuquje' jachin ri' ri kájachow na. ⁶⁵ Xub'ij k'ut: Rumal ri' nu b'im chech alaq chi man k'o tá jun ri kuya' kápe wuk' in we ta mat ká'am loq rumal ri nu Tat.

⁶⁶ Tzare chi' k'ut e k'ia chke ri e k'o ruk' ri Jesús xkiya kanoq, man xek'o'ji tá k'u ruk'. ⁶⁷ Te ri' ri Jesús xuta' chke ri kab'lajuj u

* 6:49 "Maná": Chawila' ri versículo 31 pa we capítulo. † 6:51 Kel kub'ij chi kákojon che ri Jesús (6:48). ‡ 6:51 Kel kub'ij wa' chi kuya rib' pa kámisaxik cho ri Dios che ki k'exwäch ri winaq.

tijoxelab', xub'ij: ¿A kiwaj ix xuquje' kixe' kuk'? —xcha chke.

⁶⁸ Xch'aw k'u ri tat Simón Pedro, xub'ij: Qajaw, ¿jachin chi ruk' kuje' wi? Ri tzij la e are tzij ri kákiya k'aslemal ri man k'o tá u k'isik. ⁶⁹ Ri uj, uj kojoninaq che la, qetam chi lal ri' ri Cristo, ru K'ojol ri k'aslik Dios, —xcha che.

⁷⁰ Ri Jesús xch'awik, xub'ij: ¿A mat ix kab'lajuj xixinch'a' rech kixk'o'ji wuk'? Pune je ri' jun chiwe are k'o ri Itzel pa ranima', —xcha chke.

⁷¹ Ri Jesús aretaq xub'ij wa' are tajin käch'aw chrij ri Judas Iscariote ru k'ojol ri tat Simón. Je ri', rumal chi ri tat Judas are ri kájachow na, pune are jun chke ri kab'lajuj u tijoxelab'.

7

Waral káqil wi chi ru chaq' ri Jesús nab'e man xekojon tá che

¹ Te k'u ri' ri Jesús xub'inib'ej ri Galilea. Man kraj taj kák'o'ji pa Judea rumal chi ri winaq aj Israel kákaj kákikámisaj. ² Xa k'u jub'ij kraj man kuriq ri nimaq'ij ke ri Káb'al,* jun chke ri ki nimaq'ij ri winaq aj Israel. ³ Ru chaq' ri Jesús xkib'ij che: Mat kanaj waral. Jat pa Judea rech xuquje' ra tijoxelab' ri e k'o chila' kákil na ri kajmab'al ri kab'ano. ⁴ We jun winaq kraj chi qas ketamax u wäch, man kub'an tá ri' chik'uyal ri kub'ano. We ri at kab'an taq ri kajmab'al ri', chab'ana wa' chkiwäch konojel ri winaq, —xecha che.

⁵ Q'alaj k'ut chi ru chaq' ri Jesús xa man xekojon tá che. ⁶ Te ri' xub'ij ri Jesús chke: Ri in mája' kuriq ri q'ij chwe, are k'u ri ix apachike q'ij utz chiwe kuya' kixe'k. ⁷ Ri winaq ajuwächulew man kekowin taj káketzelay i wäch ix. Are k'u ri in káketzelay nu wäch rumal chi kinq'alajisaj chkiwäch chi man utz tá ri káka'no. ⁸ Ri ix k'ut, jix pa ri nimaq'ij. Ri in man kine' taj, rumal chi mája' kuriq ri q'ij chwe.

⁹ Aretaq xb'itaj wa' we tzij ri' chke, xkanaj ri Are' pa Galilea.

Ri Jesús kopan pa ri nimaq'ij ke ri Káb'al

¹⁰ Aretaq k'ut e b'enaq chi ru chaq' ri Jesús pa ri nimaq'ij, ri Are' xuquje' xe' na pa ri nimaq'ij, pune man xuk'ut tá rib' chkiwäch ri winaq. Xane xaq chik'uyal xe' ri Are'. ¹¹ Ri winaq aj Israel xkitij u tzukuxik pa ri nimaq'ij, xkib'ij: ¿Jawije' k'o wi ri achi ri'? —xecha'.

¹² Chkixol k'u ri winaq, k'ia ri káb'ix chrij ri Jesús. Jujun kákib'ij: “Are jun utzalaq achi,” —kecha'. Nik'iaj chik kákib'ij: “Man

are tá utzalaq achi, rumal chi keusub' ri winaq,” —kecha'.

¹³ Man k'o tá k'u jun ri kukoch'o káresaj u tzijol ri Jesús rumal chi kákixej kib' chkiwäch ri ki nimaqil ri winaq aj Israel.

¹⁴ Nik'iajirinaq chi k'u ri nimaq'ij aretaq ri Jesús xok b'i pa ri nimalaj rachoch Dios, xuchaplej k'u ki tijoxik ri winaq. ¹⁵ Are k'u ri winaq aj Israel sib'alaj tajin kákikajmaj wa', xkib'ij: ¿Jas lo wa' chi sib'alaj k'ia retam we achi ri', man k'o tá k'u jawije' u tijom wi rib'? —xecha'.

¹⁶ Ri Jesús xch'awik, xub'ij chke: Ri tijonik ri kinya man wech tá in, xane rech ri Jun ri xintaqow loq. ¹⁷ We k'o jun qas kurayij u b'anik ri kraj ri Dios, káretamaj na we ri nu tijonik qas kápe ruk' ri Dios, o xaq pa we wi kintzijonik. ¹⁸ Ri winaq ri xaq pa re wi kátzijonik, xa are kraj ri' chi kánimarisax u q'ij kumal ri winaq. Jachin k'u ri kraj chi are kánimarisax u q'ij ri xtaqow loq, kub'ij ri' ri qas tzij, man are tá jun b'anal tzij, —xcha chke.

¹⁹ ¿A mat qas tzij chi ri qa mam Moisés xuya ri Pixab' chech alaq? Pune je ri', man k'o tá k'u jun chech alaq ri kunimaj ri Pixab' ri'. ¿Jas che kaj alaq kinkámisaj alaq? —xcha chke.

²⁰ Ri winaq xech'awik, xkib'ij: ¿Xa k'o jun itzel espíritu chawe! ¿Jachin lo ri kraj katkámisanik? —xecha che.

²¹ Ri Jesús xub'ij chke: Xa ruk' jun kajmab'al ri xinb'an pa ri q'ij re uxlanem, ri alaq sib'alaj kákajman alaq che. ²² Ri qa mam Moisés xunaq'atajisaj alaq chukojik retal ri ojer trato.† Pune ta ne man are tá ri are' xchapow loq u b'anik wa', xane are ki tijonik kan ri nan tat alaq ojer. Ri alaq k'ut kákoj alaq retal ri ojer trato che jun alaj ala pune pa ri q'ij re uxlanem. ²³ We k'u ri alaq rumal ri u nimaxik ri Pixab' ri xutz'ib'aj ri qa mam Moisés kákoj alaq retal ri ojer trato che ri ala pune pa ri q'ij re uxlanem, ¿jas k'u che xpe oyowal alaq chwe in aretaq xinkunaj ronojel ru cuerpo jun achi pa ri q'ij re uxlanem? —kácha'. ²⁴ K'o jas máb'ij alaq chrij ri winaq we utz kápetik o man utz tá kápetik. Aretaq k'o jas káb'ij alaq chrij jun winaq chik, qas chomaj na alaq jas ri káb'an alaq, b'ana k'u alaq wa' ruk' jikomal.

Ri Jesús kub'ij jawije' chi' petinaq wi ri Are'

²⁵ Te k'u ri' jujun chke ri winaq aj Jerusalén xkichapla u ta'ik, xkib'ij: ¿A mat are wa' we achi ri' ri tajin kátzukuxik rech kákámisaxik? —kecha'. ²⁶ Chiwilampe', kátzijon kuk' ri winaq, man k'o tá k'u jun k'o jas kub'ij che. ¿A xa ta k'u lo qas kákikoj ri q'atal taq tzij chi we achi ri' are ri Cristo?

* 7:2 “Nimaq'ij ke ri Káb'al”: Chawila' ri tzij “Káb'al” pa ri Diccionario, k'isb'al re we Nuevo Testamento. † 7:22 “Circuncisión”: Chawila' Hechos 7:8, nota.

—kecha'. ²⁷ Ri uj k'ut qetam jawije' petinaq wi wa' we achi ri'. Aretaq k'ut kápe ri' ri Cristo, man k'o tá jun ri' etamaninaq jawije' kápe wi, —xecha ri winaq.

²⁸ Aretaq ri Jesús, ri tajin kuya tijonik pa ri nimalaj rachoch Dios, xuta wa' ko xch'awik, xub'ij: Káb'ij alaq chi etam alaq nu wäch, xuquje' chi etam alaq jawije' chi kinpe wi. Man in petinaq tá k'ut xaq pa we wi, xane in taqom loq rumal ri Jun ri qas jikom ranima'. Ri alaq k'ut man etam tá alaq u wäch. ²⁹ Ri in wetam u wäch rumal chi in petinaq ruk', xuquje' are ri Are' in taqowinaq loq, —xcha chke.

³⁰ Xkaj k'ut xkik'am b'i pa che', man k'o tá k'u jun xchapowik rumal chi mája' kuriq ru q'ij. ³¹ E k'ia k'ut zekojon che, xkib'ij k'ut: Aretaq kápe ri Cristo, ¿a kub'an ta k'u lo más kajmab'al taq etal chik chuwäch ri u b'anom we achi ri'? —xecha'.

Ri tata'ib' fariseos kákitaq u k'amik b'i ri Jesús pa che'

³² Ri tata'ib' fariseos xkita ri kákib'ij ri winaq chrij ri Jesús. Xa je ri' ri e are' kuk' ri ki nimaqil sacerdotest xekitaq b'i jujun chajinelab' re ri nimalaj rachoch Dios chuk'amik b'i ri Jesús pa che'. ³³ Te ri' xub'ij ri Jesús: Xaq kieb' oxib' q'ij chik kink'o'ji na uk' alaq, te k'u ri' kintzelej na ruk' ri xintaqow loq. ³⁴ Ri alaq kintzukuj na alaq, man kinriq tá chi k'u alaq rumal chi man kákowin tá alaq kopan alaq chila' jawije' ri kinek'ol wi in, —xcha chke.

³⁵ Ri ki nimaqil ri winaq aj Israel k'ut, xkichaplej u ta'ik chb'il taq kib', xkib'ij: ¿Jawije' ta k'u ke' wi wa' we achi ri' chi man kujkowin tá uj keqariqa'? ¿A xa ta k'u lo ke' kuk' ri winaq aj Israel ri e jab'uninaq chikxol ri winaq aj Grecia che ki tijoxik ri winaq aj Grecia? ³⁶ ¿Jas kel kub'ij wa' ri xub'ij chqe: “Kintzukuj na alaq, man kinriq tá chi k'u alaq rumal chi man kákowin tá alaq kopan alaq chila' jawije' ri kinek'ol wi”? —xcha ri', —xecha'.

Ri Qajaw Jesús kub'ij chi Are je' ta ne joron ri kuya k'aslemal

³⁷ Pa ri k'isb'al q'ij re ri nimaq'ij, ri q'ij ri sib'alaj nim na u b'anik, ri Jesús xtak'i aq'anoq chikxol ri winaq, ko xch'awik, xub'ij: We k'o jun káchaq'ij u chi', chpet wuk', chutija u joron. ³⁸ Je' jas ri kub'ij ru Loq' Pixab' ri Dios ri Tz'ib'talik: Jachin ri kákojon chwe, kák'iy na loq pa ranima' joron ri kuya ri qas k'aslemal, —kácha', —xcha ri Jesús chke ri winaq.

³⁹ Ri Jesús k'ut, are tajin kách'aw chrij ri Loq'alaj Espíritu ri kákik'am na ri winaq ri kekojon che ri Are'. Mája' k'u káyi' loq ri

Loq'alaj Espíritu rumal chi mája' kátzelej ri Jesús chila' chikaj rech kánimarisax u q'ij.

Ri winaq jalajoj ri kákichomaj chrij ri Jesús
⁴⁰ Jujun chke ri winaq, aretaq xkita ri xub'ij ri Jesús, xkib'ij: Qas tzij we achi ri' are wa' ri q'alajisal re ru Loq' Pixab' ri Dios ri káb'ixik chi kápe na, —xecha'.

⁴¹ Nik'iaj chik xkib'ij: Are wa' ri Cristo, —xecha'.

Nik'iaj chi k'ut xkib'ij: ¿A xa ta k'u lo pa Galilea kápe wi ri Cristo? ⁴² Ru Loq' Pixab' ri Dios ri Tz'ib'talik kub'ij chi ri Cristo rajwaxik chikxol ri rachalaxik ri qa mam David ri nim taqanel kápe wi na. Pa Belén k'ut kápe wi na, ri tinimit ri xk'o'ji wi ri qa mam David, —xecha'.

⁴³ Je k'u ri' ri winaq xkitasala kib' rumal rech ri Jesús. ⁴⁴ E k'o jujun ri xkaj xkik'am b'i pa che', man k'o tá k'u jun xchapowik.

Ri q'atal taq tzij man kekojon tá che ri Jesús

⁴⁵ Xetzelej k'u ri chajinelab' re ri nimalaj rachoch Dios, xeopan chila' jawije' e k'o wi ri tata'ib' fariseos xuquje' ri ki nimaqil ri sacerdotest. Ri e are' k'ut xkita' chke: ¿Jas che man xik'am tá loq ri Jesús? —xecha'.

⁴⁶ Ri chajinelab' xech'awik, xkib'ij: ¡Man k'o tá jun achi qa tom je' kátzijonik jas ri kátzijon ri achi ri'! —xecha'.

⁴⁷ Are k'u ri tata'ib' fariseos xkib'ij chke: Ri ix xuquje' xa xiya iwib' pa sub'ik. ⁴⁸ ¿A k'o pu lo jun chke ri qa nimaqil ri kojoninaq che, o jun ne chke ri tata'ib' fariseos? ¡Man k'o taj! —xecha'. ⁴⁹ Xkik'iaq itzel tzij pa ki wi', xkib'ij: ¡We winaq ri' man ketam tá ri Pixab'! —xecha chke.

⁵⁰ Are k'u ri tat Nicodemo ri xopan ruk' ri Jesús chaq'ab', are jun chke ri tata'ib' fariseos. Xub'ij k'u chke: ⁵¹ Ri qa Pixab' kub'ij chi man kuya' taj káqaq'at tzij puwi' jun winaq chi kák'ajisax u wäch we ta mat nab'e káqata na jas ri kub'ij che retamaxik jas ri u b'anom, —xcha chke.

⁵² Te ri' xech'aw ri e are', xkib'ij che ri tat Nicodemo: E k'u ri lal, ¿a lal aj Galilea xuquje'? —xecha che. Na'l sik'ij la ru Loq' Pixab' ri Dios ri Tz'ib'talik, kil k'u na la chi man k'o tá jun q'alajisal re ru Loq' Pixab' ri Dios ri petinaq pa Galilea, —xecha che.

⁵³ Chkijujunal k'ut xeb'e' cho taq kachoch.

8

Waral káqil wi ri ixoq ri xub'an ri nimalaj mak chrij ri rachajil

¹ Are k'u ri Jesús xe' pa ri nimalaj juyub' ri káb'ix “Olivos” che. ² Aretaq xsaqir chukab' q'ij, ri Jesús xtzelej loq, xe' pa ri nimalaj rachoch Dios. Konojel ri winaq xkimulij kib' ruk'. Ri Are' k'ut xt'uyi'k, xuchaplej

† 7:32 “Sacerdote aj Israel”: Chawila' ri San Lucas 1:8, xuquje' ri Diccionario, k'isb'al re we Nuevo Testamento.

ki tijoxik. ³ Te ri' ri tijonelab' re ri Pixab' xuquje' ri tata'ib' fariseos xkik'am loq jun ixoq ri xkiriqo tajin kub'an ri nimalaj mak ri äwas u b'anik chrij ri rachajil. Xkiya k'u chxixol ri winaq ri e k'o chila'. ⁴ Xkib'ij k'u che ri Jesús: Aftij, we ixoq ri' xriqtajik tajin kub'an ri nimalaj mak ri äwas u b'anik chrij ri rachajil. ⁵ Ri Pixab' ri xutz'ib'aj ri qa mam Moisés kub'ij chi rajwaxik kâqakâmisaj chab'aj jun ixoq ri je' kub'an wa'. E ri lal, ¿jas k'u kâb'ij la? —xcha che.

⁶ Xkib'ij wa' che xaq rech kâqaj pa ki q'ab', je k'u ri' kekowinik kâkib'ij chi k'o u mak ri Jesús. Are k'u ri Jesús xa xpachik, xuchaplej tz'ib'anik cho ri ulew ruk' ri u wi' u q'ab'. ⁷ Xkitaqej k'u u k'otik u chi' ri Jesús. Xa je ri' ri Are' xujikomaj rib', xub'ij k'u chke: Apachin chech alaq ri man k'o tä u mak, chuk'iaqa ri nab'e ab'aj chrij we ixoq ri', —xcha che.

⁸ Xpachi chi jumul ri Jesús, xutaqej tz'ib'anik cho ri ulew. ⁹ Aretaq k'ut xkita ri xub'ij ri Jesús, xkina' kib' pa kanima' chi k'o ki mak. Chkijujunal k'ut xkichap elem b'ik. Nab'e xeb'el b'i ri ri'jab'. Aretaq konojel e elinaq ruk' b'ik, xaq xuwi chi ri Jesús k'o kanoq ruk' ri ixoq ri kanajinaq kan chila'. ¹⁰ Te ri' ri Jesús xujikomaj rib'. Man k'o tä k'u jun xrilo, xane xaq xuwi ri ixoq. Ri Are' xub'ij che: Nan, ¿jawije' e k'o wi ri kâkib'ij chi k'o mak la? ¿A mat k'o jun xkanaj kan chuq'atik tzij puwi' la chi kâk'âjisax wäch la? —xcha che.

¹¹ Ri ixoq xub'ij che ri Jesús: Man k'o tä jun, Tat, —xcha che.

Are k'u ri Jesús xub'ij che: Ri in xuquje' man king'at tä tzij puwi' la chi kâk'âjisax wäch la. ¡Oj b'a' la chanim, mämakun chi k'u la! —xcha che.

Ri Jesús are je' jas jun candela ri kuya saqil chke ri winaq cho ruwächulew

¹² Xtzijon chi jumul ri Jesús kuk' ri winaq, xub'ij chke: In ri', ri in kinya saqil chke ri winaq cho ruwächulew. Jachin ri kâpe wuk', kâk'oji na ri saqil ruk' ri kuya k'aslemal, man kâb'in tä chi k'u pa ri q'equm, —xcha che.

¹³ Te ri' ri tata'ib' fariseos xkib'ij che ri Jesús: Ri lal xaq tukiel la tajin kâq'alajisaj la ri utz chij ib' la. Rumlal ri' ri tajin kâq'alajisaj la man k'o tä u patän, —xcha che.

¹⁴ Ri Jesús xch'awik, xub'ij chke: Ri tajin king'alajisaj chwij in, qas tzij k'o u patän, pune xaq nu tukiel king'alajisaj ri utz chwij chb'il wib'. Wetam k'ut jawije' ri in petinaq wi, xuquje' jawije' ri kine' wi. Ri alaq k'ut man etam tä alaq jawije' ri kinpe wi, man etam tä k'u alaq jawije' ri kine' wi. ¹⁵ Ri alaq je' kâq'atow tzij alaq jas ri keq'atow tzij ri winaq ajuwächulew. Ri in k'ut man king'at tä tzij puwi' jachin jun. ¹⁶ We k'u king'at tzij, jikom kinb'an chuq'atik tzij. Je ri', rumal

chi man xaq tä nu tukiel king'at tzij, xane ri nu Tat ri xintaqow loq Are kuq'at tzij junam wuk'. ¹⁷ Pa ri Pixab' alaq tz'ib'tal wi chi aretaq kieb' winaq junam ri kâkib'ij chrij ri xkilo o chrij ri xkito, rajwaxik ri' kâkojik chi qas tzij ri kâkib'ij. ¹⁸ Ri in k'ut king'alajisaj ri qas tzij chwij chb'il wib', xuquje' ri nu Tat ri xintaqow loq kuq'alajisaj ri qas tzij chwij, —xcha ri Jesús chke.

¹⁹ Te ri' ri tata'ib' fariseos xkita' che ri Jesús: ¿Jawije' k'o wi ri tat la? —xcha che.

Ri Jesús xch'awik, xub'ij chke: Ri alaq man qas tä etam alaq nu wäch, xuquje' man etam tä alaq u wäch ri nu Tat. We ta qas etam alaq nu wäch in, etam ta alaq u wäch ri' ri nu Tat xuquje', —xcha che.

²⁰ Ri Jesús xub'ij wa' we tzij ri' aretaq tajin kuya tijonik pa ri nimalaj rachoch Dios chunaqaj ri k'olib'al re taq ri kuchuj. Man k'o tä k'u jun xk'amow b'i pa che' rumal chi mâja' kuriq ru q'ij.

Ri Jesús kub'ij chi ri Are' are ajchila' chikaj

²¹ Ri Jesús xch'aw chi jumul, xub'ij chke: Ri in kine'k. Ri alaq k'ut kintzukuj na alaq. Pa ri mak alaq k'ut kâkâm wi alaq, rumal chi man kâkowin tä alaq ke' alaq chila' jawije' ri kine' wi, —xcha che.

²² Te ri' ri winaq aj Israel xkib'ij: ¿A xa ta lo kukâmisaj rib', rumal k'u ri' kub'ij chi man kujkowin taj kuje' chila' jawije' ri ke' wi? —xcha ri e are'.

²³ Te ri' xub'ij ri Jesús chke: Ri alaq, xaq alaq ajwaral, are k'u ri in chila' chikaj kinpe wi. Ri alaq, xaq alaq ajuwächulew. Are k'u ri in man in ajuwächulew taj. ²⁴ Rumlal ri' xinx'ij chech alaq chi pa ri mak alaq kâkâm wi alaq. Rumlal chi we man kâkoj tä alaq chi in ri' ri tajin kinb'ij, pa ri mak alaq kâkâm wi na alaq, —xcha che.

²⁵ Te ri' xkita' che ri Jesús, xkib'ij: ¿Jachin k'u ri lal? —xcha che.

Ri Jesús xch'awik, xub'ij chke: Ojer ri' nu b'im chech alaq jachin ri in, —xcha che. ²⁶ K'ia ri kwaj kinb'ij chech alaq chrij ri tajin kinwilo chuq'atik tzij chrij ri kâb'an alaq. Are k'u ri xintaqow loq kub'ij ri qas tzij. Ri in k'ut, jachike ri nu tom chuchi' ri Are', are wa' ri kinb'ij chke ri winaq ajuwächulew, —xcha che.

²⁷ Ri e are' k'ut man xkich'ob' taj chi ri Jesús are tajin kâch'aw chrij ri qa Tat chila' chikaj. ²⁸ Rumlal ri' xub'ij chke: Aretaq ri in, in ri' ri Ralk'ual ri Dios ri Qas Winaq, kinyak na chikaj umal alaq chkiwäch ri winaq, ketamaj k'u na alaq chi In Ri'. Man k'o tä k'u jas kinb'ano xaq pa we wi, xane xaq xuwi kinb'ij ri u k'utum ri qa Tat chnuwäch, —xcha che. ²⁹ Are k'u ri xintaqow loq k'o wuk' in. Ri nu Tat man in u yo'm tä kan nu tukiel rumal chi amaq'el ronojel q'ij are

kinb'an ri utz käril wi ri Are', —xcha chke ri winaq aj Israel.

³⁰ Aretaq ri Jesús xub'ij wa' we tzij ri', e k'ia xekojon che ri Are'.

Ru K'ojol ri Dios kujresaj pu q'ab' ri Itzel

³¹ Xub'ij k'u ri Jesús chke ri winaq aj Israel ri xekojon che: We ri alaq kätatej alaq u b'anik ri nu b'im chech alaq, qas tzij alaq nu tijoxelab', —xcha chke. ³² Ketamaj k'u na alaq ri qas tzij, ri qas tzij k'ut kub'ano chi tzoqopital chi alaq, —xcha chke.

³³ Ri winaq aj Israel xech'awik, xkib'ij: Ri uj are qa mam ri Abraham ojer, man uj kojom tä k'u xaq che patänil re jun winaq. *¿Jas lo wa' chi käb'ij la chqe chi kujtzoqopital na?* —xecha che.

³⁴ Ri Jesús xub'ij chke: Qas tzij kinb'ij chech alaq chi konojel ri kemakunik e kojom ri' che patänil taq re ri mak. ³⁵ Jun ri kojom che patänin man are tä qas ajpaja. Are k'u ri u k'ojol ri rajaw ja qas ajpaja ri amaq'el ronojel q'ij. ³⁶ Je k'u ri', we ri in, in u K'ojol ri Dios kintzoqopin chech alaq, qas tzij ri' chi tzoqopital chi alaq, —xcha chke. ³⁷ Ri in wetam chi ri mam alaq are ri Abraham ojer. Kaj k'u alaq kinkämisaj alaq rumal chi man käkoj tä alaq ri kinb'ij chech alaq. ³⁸ Ri in are kinb'ij ri u k'utum ri nu Tat chnuwäch. Are k'u ri alaq are käb'an alaq jachike ri b'im chech alaq rumal ri tat alaq, —xcha ri Jesús chke.

³⁹ Ri e are' xech'awik, xkib'ij: Ri qa tat uj are ri qa mam Abraham ojer, —xecha'.

Ri Jesús xub'ij chke: We ta qas tzij are tat alaq ri qa mam Abraham, are ta käb'an alaq ri' jas ri xub'an ri are'. ⁴⁰ Pune nu b'im ri qas tzij chech alaq ri u k'utum ri Dios chnuwäch, ri alaq kaj alaq kinkämisaj alaq. Ri qa mam Abraham man k'o tä jumul ri je' xub'an wa'. ⁴¹ Ri alaq k'ut je' käb'an alaq jas ri kub'an ri tat alaq, —xcha ri Jesús chke.

Ri e are' k'ut xkib'ij che: Ri uj, man uj alk'ualaxelab' taj ri mat q'alaj u wäch qa tat. Ri qa Tat xa jun k'olik, are k'u ri Dios, —xecha'.

⁴² Ri Jesús k'ut xub'ij chke: We ta qas tzij chi ri Dios are Tat alaq, kinaj ta alaq ri' rumal chi ri in ruk' ri Dios in petinaq wi, waral k'ut in k'o wi. Man in petinaq taj xaq pa we wi, xane are ri Dios xintaqow loq. ⁴³ *¿Jas che ri alaq man käkowin tä alaq chuch'ob'ik ri kinb'ij? Xa rumal chi man kaj tä alaq kätatab'ej alaq ri nu tzij.* ⁴⁴ Ri tat alaq are ri Itzel. Ri alaq, alaq rech ri are', are k'u kaj alaq käb'an alaq jachike ri kraj ri are'. Ri Itzel are jun kämisanel ojer loq. Ri are' man kub'an tä ri qas tzij, man kub'ij tä k'u ri qas tzij. Aretaq kub'an tzij, are kub'ij ri u b'anik ri are'. Are jun b'anal tzij, ki tat

k'ut ri b'anal taq tzij. ⁴⁵ Ri in k'ut kinb'ij ri qas tzij, rumal k'u ri' ri alaq man käkoj tä alaq ri nu tzij. ⁴⁶ *¿Jachin chech alaq käkowinik kuq'alajisaj chi qas tzij k'o mak nu b'anom? We k'u kinb'ij ri qas tzij, ¿jas k'u che man käkoj tä alaq ri kinb'ij?* ⁴⁷ Apachin ri rech ri Dios kutatab'ej ri' ru Tzij ri Dios. Are k'u ri alaq man alaq tä rech ri Dios. Rumal ri' man kaj tä alaq kätatab'ej alaq ru Tzij ri Dios, —xcha ri Jesús chke ri winaq aj Israel.

Waral käqil wi chi ri Cristo k'o chik mäjoq käk'oji ri Abraham

⁴⁸ Ri winaq aj Israel xkib'ij che ri Jesús: Qas tzij ri xqab'ij aretaq xqab'ij chi ri lal, xa lal aj Samaria, * xuquje' chi ri lal k'o jun itzel espíritu che la, —xecha che ri Jesús.

⁴⁹ Ri Jesús xch'awik, xub'ij chke: Man k'o tä jun itzel espíritu chwe. Ri tajin kinb'ano, xa tajin kinya u q'ij ri nu Tat, are k'u ri alaq xa kesaj alaq nu k'ixb'al. ⁵⁰ Ri in k'ut man kwaj taj chi käyi' nu q'ij, pune ta ne k'o Jun ri kraj chi käyi' nu q'ij, kuq'at k'u na tzij ri Are' pa ki wi' ri käketzelaj nu wäch. ⁵¹ Qas tzij kinb'ij chech alaq chi jachin ri kunimaj ri kinb'ij, man käkäm tä na ri are', —xcha chke.

⁵² Te ri' ri winaq aj Israel xech'awik, xkib'ij: Kämik qas xel chi saq chqawäch chi xa k'o jun itzel espíritu che la, —xecha che ri Jesús. Ri qa mam Abraham, xuquje' konojel ri q'alajisal taq re ru Loq' Pixab' ri Dios xekämik, te k'u ri' käb'ij la: "Jachin ri kunimaj ri kinb'ij man käkäm taj," —kächa la. ⁵³ *¿A lal ta k'ut nim na ri q'ij la chuwäch ri qa mam Abraham? Ri are' xkämik, xuquje' xekäm ri q'alajisal taq re ru Loq' Pixab' ri Dios. ¿Jachin ta k'u ri lal ri käb'an che ib' la?* —xecha che.

⁵⁴ Ri Jesús xch'awik, xub'ij chke: We ta xaq in kinya nu q'ij chb'il wib', man k'o tä u patän ri'. Are k'u ri käyo'w nu q'ij are ri nu Tat, ri käb'ij alaq chi are Dios alaq. ⁵⁵ Ri alaq k'ut man etamam tä alaq u wäch. Ri in qas tzij wetam u wäch. We ta kinb'ij chi man wetam tä u wäch, in b'anal tzij ta ri' je' jas ri alaq. Ri in k'ut qas tzij wetam u wäch, kinnimaj k'ut ri kub'ij. ⁵⁶ Ri Abraham ri mam alaq xkikotik aretaq xuto chi käril na ri nu q'ij. Xril k'ut, qas k'u xkikotik, —xcha chke.

⁵⁷ Ri winaq aj Israel xkib'ij che ri Jesús: Mäja' ne nik'iaj ciento junab' la, te k'u ri' käb'ij la chi xil la u wäch ri qa mam Abraham, —xecha che.

⁵⁸ Ri Jesús xch'awik, xub'ij: Qas tzij kinb'ij chech alaq chi ri in, in k'o chik ojer, k'a mäjoq käk'oji ri Abraham, —xcha chke ri winaq aj Israel.

⁵⁹ Xepe k'u ri winaq aj Israel, xkik'am ab'aj rech käkik'iaq chrij ri Jesús. Ri Are' k'ut,

* **8:48** Ri winaq aj Israel sib'alaj xketzelaj ki wäch ri winaq aj Samaria. Ri u b'ixik ri tzij ri', "xa lal aj Samaria", che jun winaq are junam ruk' ru k'iaqik itzel tzij puwi'.

xuk'u' rib' chkiwäch, xel loq pa ri nimalaj rachoch Dios, xok'ow chkixol ri winaq, xe'k.

9

Ri Jesús kukunaj jun achi ri moy tzaretaq xil u wäch

¹ Ri Jesús b'enaq pa ri b'e aretaq xril jun achi ri moy tzaretaq xil u wäch. ² Ru tijox-elab' xkita' che ri Jesús: Ajtij, —xecha che. ¿Jas che moy we achi ri' tzaretaq xil u wäch? ¿A xa rumal ri ki mak ru nan u tat o xa rumal ru mak ri are'? —xecha che.

³ Ri Jesús xub'ij chke: Man rumal tä rech ru mak ri are', man rumal tä k'u rech ri ki mak ru nan u tat, xane rech rumal ri are' käq'alajin ri käkowin ri Dios chub'anik, —xcha chke. ⁴ Chanim ri' ri k'o na ri q'ij, rajwaxik chi kinb'an na ri xintaq chub'anik rumal ri xintaqow loq. Kok k'u na ri aq'ab' aretaq man k'o tä chi jun käkowinik kächakunik. ⁵ Pa taq we q'ij ri' aretaq in k'o cho ruwächulew, ri in kinya saqil chke ri winaq ajuwächulew, —xcha ri Jesús chke ru tijoxelab'.

⁶ Aretaq xb'itaj wa' we tzij ri' rumal ri Jesús, xutzaq u chub' pulew, xub'an jub'iq' xoq'ol ruk' ru chub', xub'il k'u chrij taq ru waq'äch ri moy. ⁷ Te k'u ri' xub'ij che: ¡Oj la! Ch'aja la ri wäch la pa ri atinib'al ri käb'ix "Siloé" che. (We b'i'aj ri' kel kub'ij "Taom".)

Ri moy achi xe'k, xuch'aj ru wäch. Aretaq xtzelej loq, xkowinik xka'y chik. ⁸ Are k'u ri u k'ul taq ja, xuquje' ri winaq ri ketamam u wäch chi moy nab'e, xkib'ij: ¿A mat are wa' we achi ri' ri kä't'uyi chi' taq ri b'e chuta'ik u limosna? —xecha'.

⁹ Jujun xkib'ij: Je', are wa', —xecha'.

Nik'iaj chik xkib'ij: Man are taj. Xaq k'u junam kel ruk', —xecha'.

Are k'u ri achi ri moy kan nab'e xub'ij: Je', in ri', —xcha chke ri winaq.

¹⁰ Te ri' ri winaq xkita' che ri achi: ¿Jas lo wa' chi katkowin chik katka'yik? —xecha che.

¹¹ Ri are' xch'awik, xub'ij chke: Ri achi ri Jesús u b'i' xub'an jub'iq' xoq'ol, xub'il chrij taq ri nu waq'äch, te k'u ri' xub'ij chwe: "Oj la chi' ri atinib'al ri käb'ix "Siloé" che, ch'aja la ri wäch la chila," —xcha chwe. Xine' k'ut. Aretaq xch'ajtaj ri nu wäch, xinkowinik xinka'yik, —xcha chke.

¹² Te ri' ri winaq xkib'ij: ¿Jawije' k'o wi ri achi ri'? —xecha che.

Ri are' xub'ij chke: Man wetam taj, —xcha chke.

Ri tata'ib' fariseos käkik'ot u chi' ri moy achi ri xutzirik

¹³ Te ri' xkik'am b'i' ri achi ri moy kan nab'e, xekiya chkiwäch ri tata'ib' fariseos. ¹⁴ Are k'u jun q'ij re uxlanem aretaq ri Jesús xub'an ri jub'iq' xoq'ol, xukunaj ri achi ri

moy. ¹⁵ Ri tata'ib' fariseos xuquje' xkita' che ri achi chi jas lo wa' chi käkowin chik käka'yik. Ri are' xub'ij chke: Xub'il xoq'ol chrij taq ri nu waq'äch, te k'u ri' xinch'aj ri nu wäch. Kinka'y chi k'u kämik, —xcha chke.

¹⁶ Te ri' jujun chke ri tata'ib' fariseos xkib'ij: Ri achi ri xb'anow wa' we kunanik ri' man rech tä ri Dios, rumal chi man nim tä käril wi ri q'ij re uxlanem, —xecha'.

Nik'iaj chi k'ut xkib'ij: ¿Jas ta k'u lo wa' chi käkowinik kub'an taq we kajmab'al etal ri' we ta qas tzij ajmak? —xecha'.

Je ri' chi man xjunamataj tä ri ki chomanik, xkitasala k'u kib'. ¹⁷ Xkita' chi k'u jumul che ri achi ri moy kan nab'e: E ri at, ¿jas kab'ij at chrij ri achi ri xkunan ra waq'äch? —xecha che.

Ri are' k'ut xub'ij: Ri in kinb'ij chi are jun q'alajisal re ru Loq' Pixab' ri Dios, —xcha chke.

¹⁸ Are k'u ri winaq aj Israel man xkikoj taj chi ri achi ri' are wa' ri moy kan nab'e, kämik k'ut käka'y chik. K'a te' xkikojo aretaq xesik'ix na loq ru nan u tat ri achi ri xkunatajik. ¹⁹ Xkita' k'u chke: ¿A are wa' ri alk'ual alaq ri käb'ij alaq chi moy xil u wäch? ¿Jas lo wa' chi kämik käkowin chik käka'yik? —xecha chke.

²⁰ Ru nan u tat xech'awik, xkib'ij: Qetam chi are wa' ri qalk'ual ri moy xil u wäch. ²¹ Man qetam tä k'ut jas wa' chi kämik käkowin chik käka'yik, man qetam tä k'u jachin ri xkunan ru waq'äch. Ta' alaq che ri are'. Achi chi ya', kub'ij k'u na chech alaq jas wa' chi käkowin chik käka'yik, —xecha chke.

²² Je wa' xkib'ij ru nan u tat rumal chi xa xkixej kib' chkiwäch ri winaq aj Israel. Ri e are' k'ut ki chomam chik junam chi jachin ri kukojo chi ri Jesús are ri Cristo käkesaj na b'i pa ri rachoch Dios. ²³ Rumal ri' ru nan u tat ri achi ri xkunax ru waq'äch xkib'ij: "Ta' alaq che ri are'. Achi chi ya'," —xecha ri'.

²⁴ Te k'u ri' ri winaq aj Israel xkisik'ij chi jumul ri achi ri moy kan nab'e, xkib'ij che: Chab'ij b'a' ri qas tzij chqe chuwäch ri Dios. Ri uj qetam chi ri achi ri' are jun ajmak, —xecha che.

²⁵ Ri achi xch'awik, xub'ij chke: Ri in man wetam taj we are jun ajmak o man are taj, xuwi wetam chi nab'e kanoq in moy, kämik k'ut kinka'y chik, —xecha chke.

²⁶ Xkita' chi k'u jumul che: ¿Jas xub'an chawe? ¿Jas xub'an chukunaxik ri a waq'äch? —xecha che.

²⁷ Xch'aw ri achi, xub'ij chke: Xinb'ij chech alaq, ri alaq k'ut xa man käta tä alaq. ¿Jas che kaj alaq chi kinb'ij wa' jumul chik? ¿A xa kaj alaq kok alaq che u tijoxel? —xcha chke.

²⁸ Te ri' ri e are' xkitze'j u wäch, xkib'ij k'u che: Ri at, at jun ruk' we achi ri', are k'u ri uj,

uj jun ruk' ri qa mam Moisés. ²⁹ Ri uj qetam chi ri Dios xch'aw ruk' ri qa mam Moisés. Are k'u we achi ri' man qetam taj jawije' ri kápe wi, —xecha che.

³⁰ Ri achi k'ut xch'awik, xub'ij chke: ¡K'o'! ta ne ri'! Ri alaqaq man etam tá alaqaq jawije' kápe wi, ri in k'ut xukunaj ri nu waq'äch.

³¹ Qas qetam chi ri Dios man kuta tá ri ki tz'onob'al toq'ob' ri ajmakib', xuwi kuta ri ki tz'onob'al toq'ob' ri winaq ri keq'ijilan che, ri káka'n ru rayib'al. ³² Man k'o tá jumul qa tom káb'ixik chi k'o jun kákowin chukunaxik ru waq'äch jun achi ri moy xil u wäch. ³³ We ta ri achi ri' mat ruk' ri Dios petinaq wi, mat k'o jas kákowin ri' chub'anik, —xcha chke.

³⁴ Te ri' xkib'ij che: Ri at, xa at ajmak xil a wäch. ¿A are kawaj kujatijoj? —xecha che.

Xkesaj k'u b'ik pa ri rachoch Dios.

E k'o ri keka'yik ri e moy chuwäch ri Dios

³⁵ Ri Jesús xretamaj chi xesax b'ik ri achi ri moy kan nab'e. Aretaq ri Jesús xuriqo, xub'ij che: ¿A kákojon la che ru K'ojol ri Dios? —xcha che.

³⁶ Ri achi xub'ij che: Tat, b'ij la chwe jachin ri' rech ri in kinkojon che, —xcha che.

³⁷ Ri Jesús xch'awik, xub'ij che: Ilom chi la u wäch wa'. In ri', ri tajin kintzijon uk' la, —xcha che.

³⁸ Te k'u ri' ri achi xxuki chuwäch ri Jesús, xub'ij che: Kinkojon che la, Qajaw, —xcha che.

³⁹ Xub'ij k'u ri Jesús: Ri in, in petinaq cho ruwächulew chuq'atik tzij, rech ri moyab' kájaqtaq ri ki waq'äch, xuquje' rech ri keka'yik kekanaj moy, —xcha'.

⁴⁰ Te ri' jujun chke ri tata'ib' fariseos ri e k'o chila' ruk' ri Are', aretaq xkita ri xub'ij ri Jesús, xkib'ij che: ¿A uj moy ta k'u lo uj xuquje'? —xecha che.

⁴¹ Ri Jesús xch'awik, xub'ij chke: We ta alaqaq moy, mat k'o mak alaqaq ri'. Rumal k'u rech chi káb'ij alaqaq chi káka'y alaqaq, k'o mak alaqaq, —xcha ri Jesús chke.

10

Waral káqil wi ri k'utb'al chrij ri ki corral chij

¹ Qas tzij kimb'ij chech alaqaq chi jachin ri man kok tá b'i chuchi' ri ki corral ri chij, xane xa kutzukuj jawije' kunim wi b'i rib', ri achi ri' xa jun elaq'om, jun t'orinel. ² Are k'u ri kok b'i chuchi' ri corral are ajuyuq' ri', ri chajil ke ri chij. ³ Ri chajil u chi' ri corral kujaq ri' chuwäch rech kokik. Ri chij k'ut kákich'ob' u wäch aretaq kách'awik. Ri ajuyuq' keusik'ij ru chij chkiijunal ruk' ri ki b'i', keresaj k'u b'i pa ri corral. ⁴ Aretaq e resam chi b'ik konojel ri chij pa ri corral, kánab'ej b'i chkiwäch, are k'u ri chij keteri b'i chrij rumal chi kákich'ob' u wäch aretaq kách'awik.

⁵ Man keteri tá k'u chrij jun winaq ri man ketam tá u wäch, xane xa keanimaj chuwäch rumal chi man kákich'ob' taj aretaq kách'aw jun winaq ri man ketam tá u wäch, —xcha ri Jesús chke ri winaq aj Israel.

⁶ Ri Jesús xukoj wa' we k'utb'al ri' chkiwäch, ri e are' k'ut man xkich'ob' taj jas ri xraj xub'ij chke.

Waral káqil wi chi ri Jesús are ri Utzalaj Ajuyuq'

⁷ Te ri' ri Jesús xub'ij chi jumul chke: Qas tzij kimb'ij chech alaqaq. Ri in, in ru chi' ri corral ri keb'ok wi b'i ri chij. ⁸ Konojel ri nab'e xeb'ul chnuwäch in, e elaq'omab' ri', e t'orinelab'. Ri chij k'ut man xkítatab'ej taj ri xkib'ij. ⁹ Ri in, in ru chi' ri corral. Jachin ri wumal in kok pa ri corral kuriq ru tob'anik ri Dios. Ri winaq ri' junam ruk' jun chij ri kok pa ri corral, te k'u ri' kel b'ik, kuriq utzalaj echa'.

¹⁰ Ri elaq'om xuwi petinaq rech kerelaq'aj b'i ri chij, keukámisaj, kusach ki wäch. Ri in k'ut in petinaq chuya'ik ki k'aslemal, rech k'o ki k'aslemal ri gas utz na. ¹¹ In ri' ri utzalaj ajuyuq'. Ri utzalaj ajuyuq' kuya ru k'aslemal pa kámikal rumal kech ri chij. ¹² Are k'u ri' ajuyuq' ri xuwi kuchomaj ri tojb'al re, aretaq kárido kápe ri utiw, keuya kan ri chij, kanimajik. Je ri' kub'ano rumal chi man are tá gas kajyuq' ri chij, xuquje' ri chij man e rech tá ri are'. Kápe k'u ri utiw keuchap ri chij, keujab'uj. ¹³ Ri achi ri' kanimajik rumal chi xuwi kuchomaj ri tojb'al re. Man kerilij tá ri chij.

¹⁴ In ri' ri utzalaj ajuyuq', wetam ki wäch ri nu chij, xuquje' ri e are' ketam nu wäch in. ¹⁵ Je' jas ri nu Tat retam nu wäch in, ri in xuquje' wetam u wäch ri nu Tat. Kinya k'u ri nu k'aslemal pa kámikal rumal kech ri chij. ¹⁶ Xuquje' e k'o chi nik'iaj nu chij ri man e k'o tá pa we corral ri'. Rajwaxik k'ut keink'ama na loq xuquje'. Ri chij ri' kákinimaj na ri kimb'ij. Xa k'u jumulaj chij kák'oji na, xuquje' xa jun ri kajyuq'.

¹⁷ Ri qa Tat kinraj in rumal chi kinya ri nu k'aslemal pa kámikal, kink'astaj chi k'u na rech kák'oji chik ri nu k'aslemal. ¹⁸ Man k'o tá jun kesian ri nu k'aslemal chwe, xane ri in pa wanima' kápe wi kinya ri nu k'aslemal. Pa nu q'ab' k'o wi ru ya'ik ri nu k'aslemal, xuquje' pa nu q'ab' k'o wi ru k'amik jumul chik. Are wa' ri xintaq wi rumal ri nu Tat, —xcha ri Jesús.

¹⁹ Aretaq ri winaq aj Israel xkita wa' we tzij ri', xkichapla u tasik kib' jumul chik. ²⁰ E k'ia chke xkib'ij: ¿Jas che kátatab'ej alaqaq ri kub'ij? We achi ri' k'o jun itzel espíritu che, xuquje' ch'ujarinaq wa', —xecha'.

²¹ Nik'iaj chi k'ut xkib'ij: Man k'o tá jun winaq ri k'o jun itzel espíritu che ri je' kátzijon wa' we ri'. ¿A kákowin pu lo jun itzel

espíritu kujaq ri ki waq'äch ri moyab'? — xecha'. ¡Man kuya' taj! — xecha ri'.

Ri winaq aj Israel man kekojon tä che ri Jesús

²² Pa taq ri q'ij ri' xuriq ri q'alaj. Are chi' tajin káb'an ri nimaq'ij pa ri tinimit Jerusalén, natab'al re ri q'ij ri xk'is u yakik ri nimalaj rachoch Dios, xjach k'u pu q'ab' ri Dios. ²³ Ri Jesús tajin káwakat pa ri nimalaj rachoch Dios, pa ri raqan ja re Salomón. ²⁴ Xepe k'u ri winaq aj Israel xkimulij kib' chrij, xkib'ij che: ¿K'ä jampa' kujya la pa saq? We lal ri' ri Cristo, b'ij b'a' la ri qas tzij kámik, — xecha che.

²⁵ Ri Jesús xch'awik, xub'ij chke: Ya nu b'im chik. Ri alaq k'ut man kákoj tä alaq ri xinb'ij. Ronojel ri u taqom ri nu Tat chwe chi kinb'ano, are kák'utuw na ruk' saqil. ²⁶ Ri alaq k'ut man kákojon tä alaq rumal chi ri alaq man jun tä kuk' ri nu chij, jas ri xinb'ij chech alaq nab'e. ²⁷ Ri nu chij ketam nu wäch aretaq kinb'awik. Ri in xuquje' wetam ki wäch, keteri k'u chwij. ²⁸ Ri in kinya k'aslema chke ri man k'o tä u k'isik. Man käsach tä ki wäch, man k'o tä k'u jachin keesan pa nu q'ab'. ²⁹ Ri nu Tat, ri nim na u q'ij chkiwäch konojel, are ri xeyow' chwe. Man k'o tä k'u jachin jun keesan pu q'ab' ri Are'. ³⁰ Ri in, xuquje' ri nu Tat, xa uj jun, — xcha che.

³¹ Te ri' ri winaq aj Israel jumul chik xkik'am ab'aj rech kákiq'iaq chrij ri Jesús. ³² Ri Jesús xub'ij chke: K'ia u wäch utzil nu b'anom chuwäch alaq rumal ru chuq'ab' ri nu Tat. ¿Rumal k'u jachike chke we utzil ri nu b'anom kink'iaq alaq chab'aj? — xcha che.

³³ Ri winaq aj Israel xech'awik, xkib'ij: Man káqak'iaq tä la chab'aj rumal jun chke ri utzil ri b'anom la, xane rumal chi b'im la ri áwas u b'ixik chrij ri Dios. Ri lal xaq lal jun achi, b'anom k'u ib' la chi lal Dios, — xecha che.

³⁴ Ri Jesús k'ut xub'ij chke: Pa ri Pixab' alaq tz'ib'tal wi ri xub'ij ri Dios: "Ri ix, ix dioses," — kácha', — xcha ri Are'. ³⁵ Qetam chi ri kub'ij ru Loq' Pixab' ri Dios ri Tz'ib'talik, man kuya' taj käsach u wäch. Ri Dios xub'ij "dios" chke ri winaq ri xekojon che ru Loq' Pixab'. ³⁶ We ri Dios xinucha' in, te k'u ri' xinutag loq cho we uwächulew, ¿jas lo wa' ri káb'ij alaq chi nu b'im ri áwas u b'ixik chrij ri Dios rumal chi xinb'ij chi in u K'ojol ri Dios? ³⁷ We man kinb'ano jachike ri kub'an ri nu Tat, ri alaq man rajwaxik taj kákojon alaq chwe. ³⁸ We k'u kinb'ano, pune b'a' man kákojon tä alaq chwe, kojon b'a' alaq che ri kinb'ano rech je ri' qas ketamaj alaq, xuquje' kákoj alaq chi ri qa Tat k'o pa wanima' in, xuquje' ri in, in k'o pa ranima' ri qa Tat.

³⁹ Jumul chik are ta xkaj xkik'am b'i pa che'. Ri Jesús k'ut xresaj rib' pa ki q'ab'.

⁴⁰ Te ri' ri Jesús xe' jumul chik ch'äqäp che ri nima' Jordán chrelb'al q'ij jawije' ri xub'an wi qasna' ri tat Juan nab'e, xkanaj k'u chila'. ⁴¹ E k'ia winaq k'ut xeb'e' che rilik, xkib'ij k'ut: Qas tzij ri tat Juan, pune man xub'an tä kajmab'al taq etal, ronojel ri xub'ij chrij we achi ri' are qas tzij, — xecha'.

⁴² E k'ia winaq k'ut xekojon che ri Jesús chila'.

11

Waral káqil wi ru kámikal ri tat Lázaro

¹ K'o jun achi yawab', Lázaro u b'i, ri kápe pa ri tinimit Betania, ri tinimit ri e jeqel wi ri nan María xuquje' ri nan Marta ri ratz. ² We nan María ri', ri ranab' ri tat Lázaro ri yawab', are wa' ri xq'ijow ri k'ok'alaj aceite chrij ri raqan ri Qajaw Jesús, ri xusu' k'u ruk' ru wi'. ³ We kieb' ixoqib' ri' ri kachalal kib', xkitaq u b'ixik che ri Jesús: Qajaw, ri Lázaro ri sib'alaj utz la ruk', yawab' ri are', — xecha b'ik.

⁴ Aretaq xuta ri Jesús wa', xub'ij: Ri kámikal ri kuk'am loq we yab'il ri' man are tä k'isb'al re ru k'aslema, xane xa rech káq'alajinik chi nim u q'ij ri Dios, xuquje' rech rumal we yab'il ri' kák'utunik chi nim u q'ij ru K'ojol ri Dios, — xcha'.

⁵ Ri Jesús, pune sib'alaj loq' ri nan Marta chuwäch, xuquje' ru chaq', xuquje' ri tat Lázaro, ⁶ aretaq xb'ix che chi yawab' ri tat Lázaro, xkanaj na kan kieb' q'ij chila' jawije' ri k'o wi'. ⁷ Te k'u ri' xub'ij chke ru tijoxelab': Jo' chi jumul pa Judea, — xcha che.

⁸ Xkib'ij k'u ru tijoxelab' che: Ajtij, mája' naj ri' ri winaq aj Israel ri e k'o chila' xkaj xkikámisaj la che ab'aj. ¿Te ri' are kaj la ke' chi la jumul jela'? — xecha che.

⁹ Ri Jesús xub'ij chke: ¿A mat kab'lajuj hora u pam ri jun q'ij? We jun winaq káb'in paq'ij, man kátzaq taj, rumal chi káril ru saqil ri q'ij ri káka'y puwi' ruwächulew. ¹⁰ We k'u ri winaq chaq'ab' káb'inik, kátzaqik, rumal chi man k'o tä ri saqil pa ru b'e, — xcha che.

¹¹ Te k'u ri' xub'ij chi ri Jesús chke: Ri tat Lázaro, ri sib'alaj uj utz ruk', xwarik, kine' k'ut kink'asuj na, — xcha che.

¹² Te ri' ri tijoxelab' xkib'ij che ri Jesús: Qajaw, we káwarik kel kub'ij wa' chi kutzir na, — xecha che.

¹³ Ri Jesús k'ut are tajin kub'ij chi ri tat Lázaro xkámik. Are k'u ri tijoxelab' xki-chomaj e are' chi are tajin kub'ij ri waram ri kub'an jun winaq. ¹⁴ Te ri' xub'ij ri Jesús chke chi saqil: Ri tat Lázaro ya xkámik, — xcha'. ¹⁵ Ri in kinkikotik chi man in k'o tä chila'. Are k'u utz na wa' chiwe ix rech kixkojonik. Jo' b'a' jeqila', — xcha che.

¹⁶ Are k'u ri tat Tomás ri "Gemelo" kuchixik, xub'ij chke ri nik'iaj tijoxelab' chik ri e rachi'l: Jo' uj xuquje' rech kujekäm ruk', —xcha chke.

Ri Jesús keuk'astajisaj ri käminaqib', kuya ki k'aslemal

¹⁷ Aretaq xopan ri Jesús, te' xuto chi xke' kiejeb' q'ij muqutal chi ri tat Lázaro. ¹⁸ Ri alaj tinimit Betania naqaj k'o wi che ri tinimit Jerusalén. Kraj k'o nik'iaj legua u najal. ¹⁹ E k'ia k'u chke ri winaq aj Israel e opaninaq cho rachoch ri nan Marta, ri nan María, chuku'b'isaxik ki k'ux rumal ru kämikäl ri ki xib'al. ²⁰ Aretaq ri nan Marta xretamaj chi opanem kub'an ri Jesús, xe' chuk'ulaxik, are k'u ri nan María xkanaj kan cho ja. ²¹ Ri nan Marta xub'ij che ri Jesús: Qajaw, we ta k'o la waral, mat xkäm ri nu xib'al, —xcha che. ²² Wetam k'ut chi ronojel ri käta' la che ri Dios, ri Are' kuya na wa' che la, —xcha che.

²³ Ri Jesús xub'ij che: Ri a xib'al käk'astaj na chkixol ri käminaqib', —xcha che.

²⁴ Ri nan Marta xub'ij che ri Jesús: Je', wetam chi käk'astaj na chkixol ri käminaqib' pa ri k'isb'al q'ij, —xcha che.

²⁵ Te ri' xub'ij ri Jesús che: Ri in, in ri' kink'astajisaj ri käminaqib' xuquje' kinya ki k'aslemal. Jachin ri käkojon chwe in, pune käkämik, käk'asi chi k'u na. ²⁶ Konojel k'u ri k'a e k'aslik ri kekojon chwe, man kekäm tä wi. ¿A kakoj wa'? —xcha che ri nan Marta.

²⁷ Ri nan Marta xub'ij che: Je', Wajaw, ri in kinkojo chi lal ri' ri Cristo, ru K'ojol ri Dios, ri ulinaq la waral cho ri uwächulew, —xcha che.

Ri Jesús koq' chuchi' ri muqub'al ri k'o wi ri tat Lázaro

²⁸ Aretaq xb'itaj wa' we tzij ri' rumal ri nan Marta, xe'k, xusik'ij loq ri nan María ru chaq'. Xaq chk'uyal xub'ij che: Ri Ajtij k'o waral, katusik'ij, —xcha che.

²⁹ Ri nan María, xuwi xuto ri xb'ix che, chanim k'u xwalijik, xe' chuch'ab'exik ri Jesús. ³⁰ Mäja' k'u qas kowan ri Jesús pa ri tinimit. K'a k'o chila' jawije' ri xk'ulax wi rumal ri nan Marta. ³¹ Ri winaq aj Israel, ri e k'o kuk' pa ja chuku'b'isaxik ki k'ux, aretaq xkilo chi aninaq xwalij b'i ri nan María, xeb'e' ri e are' ruk'. Xkichomaj chi jela' ke' chuchi' ri muqub'al che oq'ej.

³² Aretaq k'ut xopan ri nan María ruk' ri Jesús, xxuki chuwäch, xub'ij che: Wajaw, we ta k'o la waral, mat xkäm ri nu xib'al, —xcha che.

³³ Ri Jesús, aretaq xrilo chi xuchap oq'ej ri nan María, xuquje' ri winaq aj Israel ri e petinaq ruk', sib'alaj xb'isonik, k'ax xuna' pa ranima'. ³⁴ Xuta' k'u chke: ¿Jawije' ri muqutal wi? —xcha chke.

Ri e are' xkib'ij che: Qajaw, sa'jme la, je'ila la, —xcha che.

³⁵ Ri Jesús k'ut xoq'ik. ³⁶ Xkib'ij k'u ri winaq aj Israel: Chiwilampe' chi sib'alaj loq' chuwäch, —xcha'.

³⁷ Jujun k'u chke xkib'ij: We achi ri' ri xjaqow ru waq'äch ri moy, ¿a mat xkowin ta wa' chub'anik jun toq'ob' che ri tat Lázaro rech mat xkämik? —xcha'.

Käk'astaj ri tat Lázaro chkixol ri käminaqib'

³⁸ Ri Jesús, jumal chik sib'alaj k'ax tajin kuna' pa ranima', xnaqajin chuchi' ri jul ri muqutal wi ri tat Lázaro. Are jun pek, kojom k'un jun ab'aj che tz'apib'al re ru chi'. ³⁹ Ri Jesús xub'ij: Chesaj alaq ri ab'aj, —xcha chke ri winaq.

Are k'u ri nan Marta, ri ranab' kan ri käminaq, xub'ij che ri Jesús: Qajaw, k'o chi ruxlab' ri' rumal chi xke' kiejeb' q'ij wa' käminaq chik, —xcha che.

⁴⁰ Xub'ij k'u ri Jesús che: ¿A mat nu b'im chawe chi we katkojonik kawil na u nimarisaaxik u q'ij ri Dios? —xcha che.

⁴¹ Te ri' xkesaj ri ab'aj. Ri Jesús xka'y chikaj, xub'an orar, xub'ij: Tat, kinnal-tioxij che la chi xintatab'ej la. ⁴² Wetam chi ama'q'el ronojel q'ij kintatab'ej la. Xa k'u rumal kech we winaq ri' ri e k'o waral, kinb'ij wa' rech käkikojo chi are ri lal in taqowinaq la loq, —xcha'.

⁴³ Aretaq xb'itaj wa' rumal, ko xch'awik, xub'ij: ¡Lázaro, chatel loq! —xcha'.

⁴⁴ Xel k'u loq ri käminaq, b'otz'om ri raqan u q'ab' ruk' taq atz'iaq. Ru palaj pistol ruk' jun su't. Ri Jesús xub'ij chke ri winaq: Solo' alaq, tzoqopij alaq b'ik, —xcha chke.

Käkitzijob'ela kib' ri winaq aj Israel jas käka'n chukämisaaxik ri Jesús

⁴⁵ Ruk' wa' ri xb'antajik, e k'ia chke ri winaq aj Israel ri e opaninaq chuku'b'isaxik u k'ux ri nan María, xekojon che ri Jesús. Xkil k'u ri kajmab'al ri xub'ano. ⁴⁶ E k'o k'u jujun chke xeb'e' kuk' ri tata'ib' fariseos chub'ixik chke ri u b'anom ri Jesús. ⁴⁷ Are k'u ri tata'ib' fariseos, xuquje' ri ki nimaqil ri sacerdotes xe'kimulij kib' kuk' ri ki nimaqil ri winaq, xkib'ij: ¿Jas käqa'no? We achi ri' tajin kub'an k'ia kajmab'al taq etal, —kecha'. ⁴⁸ We käqaya kan xaq chi je ri', konojel ri winaq kekojon na che ri Are'. Kepe k'u na ri q'atal taq tzij aj Roma, käkiwulij na ri nimalaj rachoch Dios ri käqamulij wi qib', käkisach na u wäch ri qa tinimit, —xcha'.

⁴⁹ Are k'u ri tat Caifás, ri ki nimal ri sacerdotes pa ri junab' ri', xub'ij chke: Ri ix, xa man k'o tä iwetam, —kächa'. ⁵⁰ ¿A mat kich'ob'o chi are utz na chqe uj chi käkäm xa jun achi che ki k'exwäch ri winaq, chuwäch ri käsach u wäch ronojel ri tinimit? —xcha chke.

⁵¹ Man xaq tä k'u pa ru chomanik ri tat Caifás xpe wi wa' we tzij ri' ri xub'ij, xane rumal chi are ki nimal ri sacerdotes pa ri

junab' ri' ri Dios xyo'w wa' pa ranima' chi kub'ij chi ri Jesús kākām na rumal kech ri winaq aj Israel. ⁵² Man xuwi tā k'u rumal kech ri winaq aj Israel kākām na ri Jesús, xane che ki mulixik konojel ri ralk'ual ri Dios ri e jab'uninaq cho ronojel ruwächulew. ⁵³ Xa je ri' ri ki nimaqil ri winaq aj Israel tzpa ri q'ij ri' xkichap u chomaxik jas kākā'n chukāmisaxik ri Jesús.

⁵⁴ Rumal ri' ri Jesús ya man xuk'ut tā chi rib' chkiwäch ri winaq aj Israel. Xel b'i pa Judea, xe' jela' chunaqaj ri juyub' ri kätz'inowik, pa jun tinimit Efraín u b'i'. Chila' xk'oji wi kuk' ru tijoxelab'.

⁵⁵ Xa k'u jub'iq' kraj man kuriq ri Pascua, jun chke ri ki nimaq'ij ri winaq aj Israel. E k'ia winaq k'ut pa taq ri nik'iaj taq tinimit chik xeb'e' pa ri tinimit Jerusalén, mājōq ri Pascua, chuch'ajik kib' che resaxik ri āwas chkij. ⁵⁶ Tajin k'u kākitzukuj ri Jesús. Aretaq e k'o pa ri nimalaj rachoch Dios kākitala u tzijol chb'il taq kib', kākib'ij: ¿Jas kāk'ij alaq? ¿A kāpe ri' pa we nimaq'ij o man kāpe taj? —kecha'.

⁵⁷ Ri tata'ib' fariseos, xuquje' ri ki nimaqil ri sacerdotes, ki yo'm taqanik chi we k'o jun winaq retam jawije' k'o wi ri Jesús, chub'ij wa' chke rech kekowinik kekichapa loq.

12

Jun ixoq kuq'ij k'ok'alaj kunab'al chrij ri raqan ri Jesús

¹ Waqib' q'ij kraj na che ri nimaq'ij Pascua aretaq ri Jesús xe' pa Betania, ri tinimit ri jegel wi ri tat Lázaro ri xk'astajisax rumal ri Jesús chkixol ri kāmīnaqib'. ² Chila' k'ut xka'n u b'anik jun wi'm re b'enaq q'ij chuya'ik u q'ij ri Jesús. Ri nan Marta tajin kukoj ri wa puwi' ri mesa, are k'u ri tat Lázaro jun ri are' t'uuyul chi' ri mesa ruk' ri Jesús. ³ Te ri' xpe ri nan María ruk'am nik'iaj litro k'ok'alaj kunab'al re gas nardo. * Sib'alaj k'u paqal rajil wa' we kunab'al ri'. Xuq'ij chrij ri raqan ri Jesús, te k'u ri' xusu' ruk' ru wi'. Ronojel k'u ru pam ri ja xnoj che ru k'ok'al ri kunab'al. ⁴ Te ri' jun chke ru tijoxelab' ri Jesús, ri jun ri kājachow na, ri Judas Iscariote ru k'ojol ri tat Simón, xub'ij: ⁵ ¿Jas che man xk'i'yix ta wa' we k'ok'alaj kunab'al ri' che oxib' cientos quetzales, xyi' ta k'u ri puaq chke ri meb'a'ib'? —xcha'.

⁶ Man gas tzij tā k'ut chi ri tat Judas xa kutq'ob'isaj ki wäch ri meb'a'ib' chi je' xub'ij wa', xane rumal chi are jun elaq'om. Pu q'ab' k'u ri are' k'o wi ri k'olib'al puaq. Xa je ri' xkowinik xrelaq'aj ri puaq ri k'o ruk'. ⁷ Te ri' xub'ij ri Jesús che: ¡Mab'an wa' che ri ixoq! U k'olom k'u b'i ri k'ok'alaj kunab'al ri' k'a mājōq kinmuqik. ⁸ Amaq'el k'ut e k'o

ri meb'a'ib' iwuk', are k'u ri in man in k'o tā iwuk' amaq'el ronojel q'ij, —xcha chke.

Kākitzijob'ela kib' ri ki nimaqil ri winaq aj Israel jas kākā'n chukāmisaxik ri tat Lázaro

⁹ E k'ia k'u chke ri winaq aj Israel xkito chi ri Jesús k'o pa ri alaj tinimit Betania, xeb'e' k'u jela' man xuwi tā che rilik ri Jesús, xane xuquje' che rilik ri tat Lázaro ri xk'astajisax rumal ri Jesús chkixol ri kāmīnaqib'. ¹⁰ Are k'u ri ki nimaqil sacerdotes xjunamataj ri ki chomanik chukāmisaxik ri tat Lázaro xuquje'. ¹¹ Rumal k'u rech ri are' e k'ia chke ri winaq aj Israel tajin kākitas kib' chkij ri ki nimaqil sacerdotes rech kekojon che ri Jesús.

Kok ri Jesús pa ri tinimit Jerusalén

¹² E k'ia winaq e b'enaq pa ri tinimit Jerusalén che ri nimaq'ij Pascua. Chukab' q'ij xkito chi ri Jesús kopan na pa ri tinimit. ¹³ Te ri' xkijol u xaq taq palmas, xkik'am b'ik, xeb'e' k'u chuk'ulaxik ri Jesús. Ko xech'awik, xkib'ij: ¡Chnimarisax u q'ij ri Dios! ¡Utz re ri petinaq pa ru b'i' ri Qajaw Dios! ¡Tewchital b'a' ri nim taqanel pa ki wi' ri winaq aj Israel! —xecha'.

¹⁴ Ri Jesús xuriq jun burro, xkiejen k'u chrij, jas ri kub'ij ru Loq' Pixab' ri Dios ri Tz'ib'talik:

¹⁵ Mixej iwib', winaq aj Sión.

¡Chiwilampe! Petinaq ri Jun

ri kātāqan na pi wi',
kiejeninaq chrij jun burro,
—kācha'.

¹⁶ Pa taq ri q'ij ri' ru tijoxelab' ri Jesús man xkich'ob' tā ri tajin kāk'antajik. Te k'u ri' aretaq xnimarisax u q'ij ri Jesús, xna'taj chke chi ronojel wa' ri kilom are tz'ib'tal loq chrij ri Are', ronojel k'ut b'antajinaq.

¹⁷ Ri winaq ri e k'o ruk' ri Jesús aretaq xusik'ij loq ri tat Lázaro pa ri muqub'al, xuk'astajisaj k'u chkixol ri kāmīnaqib', xkitz-ijoj wa' ri xkilo. ¹⁸ Rumal ri' ri winaq xeb'el loq chuk'ulaxik ri Jesús, rumal chi xketamaj we kajmab'al etal ri' ri xub'ano. ¹⁹ Are k'u ri tata'ib' fariseos xkib'ij chb'il taq kib': Kil b'a' alaq chi man k'o tā jas kujkowin chub'anik. ¡Chilampe alaq! Konojel ri winaq keb'e' ruk', —xecha'.

Jujun winaq aj Grecia ketzukun che ri Jesús

²⁰ Chkixol ri winaq ri e b'enaq pa ri tinimit Jerusalén che q'ijlanik pa ri nimaq'ij, e k'o jujun winaq aj Grecia. ²¹ We winaq ri' xeopan ruk' ri tat Felipe ri aj Betsaida re Galilea, xkib'ochi'j, xkib'ij che: Tat, kāqaj kākil u wäch ri Jesús, —xecha che.

²² Ri tat Felipe xe'k, xub'ij che ri tat Andrés. Te k'u ri' ri kieb' chik xeb'e'k, xe'kib'ij che ri Jesús. ²³ Te ri' ri Jesús xub'ij chke:

* 12:3 "Nardo": Ru b'i' jun q'ayes ri xkoj chub'anik jun k'ok'alaj kunab'al ri sib'alaj paqal rajil.

Xuriq ri q'ij ri kânimarisax nu q'ij in, in ri' ri Ralk'ual ri Dios ri Qas Winaq. ²⁴ Qas tzij kinb'ij chiwe, chi we man kâqaj ri jun u waq'äch triko pa ri ulew rech kâq'ayik, tajin wi ri' xaq jun u waq'äch triko. We k'u kâq'ayik, kâtux na ri', kuya k'u na k'ia u wäch. ²⁵ Apachin ta ne ri loq' kâril wi ru k'aslemal, kâkâm na wa' ri winaq ri', kutzaq na ronojel. Apachin k'u ri man loq' taj kâril wi ru k'aslemal cho we uwächulew, kuto' na u wi' ri', kuriq k'u na ri k'aslemal ri man k'o tâ u k'isik. ²⁶ We k'o jun ri kraj kâpatânin chwe, chpet wuk'. Jawije' k'u ri kink'o'ji wi, chila' xuquje' kâk'o'ji wi na ri patânil we. We k'o jun ri kâpatânin chwe, kâyi' na u q'ij rumal ri nu Tat, —xcha chke.

Ri Jesús kutzijoj chi kâkâm na

²⁷ Sib'alaj k'âx kinna' pa wanima' kâmik. ¿Jas ta k'u lo ri kinb'ij na? ¿A kinb'ij ta k'ut: "Tat, chinto' la chuwäch ri kâpe na pa nu wi' kâmik"? Are k'u wa' nu patân in petinaq, —xcha ri Jesús. ²⁸ Tat, nimarisaq b'a' la u q'ij ri b'i' la, —xcha'.

Te k'u ri' k'o Jun ri xch'aw loq chikaj ri xub'ij: Nu nimarisaq u q'ij, kinnimarisaq k'u na u q'ij jumal chik, —xcha'.

²⁹ Are k'u ri winaq ri e k'o chila' ri tajin ketatab'enik xkib'ij chi are jun kiäqulja ri xtatajik. Nik'iaq chik xkib'ij: Are jun ángel ri xch'aw ruk', —xecha'.

³⁰ Te ri' ri Jesús xub'ij chke: Man rumal tâ wech in xtatajik chi k'o Jun ri xch'aw loq chikaj, xane rumal iwech ix. ³¹ Kâmik wa' ri q'ij ri kâq'at tzij puwi' we uwächulew ri'. Kâmik ri q'ij ri kâpaqchix apan ri jun ri kâtaqan puwi' we uwächulew. ³² Aretaq k'ut ri in kinwalijisax chikaj, konojel keka'y na chwe, sib'alaj kâkikajmaj k'u na nu wäch, —xcha ri Jesús chke.

³³ Xub'ij wa' we tzij ri' chuq'alajisaxik jas u wäch kâmikal kuriq na. ³⁴ Xech'aw k'u ri winaq, xkib'ij che: Ri uj qa tom u sik'ixik pa taq ri qa wuj re ri Pixab' chi ri Cristo kâk'asi na pa taq ri q'ij ri junab' ri kepetik. ¿Jas k'u che kâb'ij la chi ri Ralk'ual ri Dios ri Qas Winaq kâwalijisax na chikaj? ¿Jachin chi k'u ri ri Ralk'ual ri Dios ri Qas Winaq? —xecha chke.

³⁵ Te ri' ri Jesús xub'ij chke: Kâmik ri' k'â k'o na ri saqil iwuk', xa k'u kieb' oxib' q'ij chik k'olik. Chixb'in b'a' chanim ri k'â k'o ri saqil iwuk', rech man kixkanaj tâ kan pa q'equm. Jachin k'u ri kâb'in pa q'equm, man kuch'ob' tâ ri' jawije' ri ke' wi. ³⁶ Chixkojon che ri saqil kâmik, ri k'â k'o na ri saqil iwuk'. Je ri' rech ri ix, ix winaq chik rech ri saqil, —xcha ri Jesús chke.

Xuwi xb'itaj wa' we tzij ri' rumal ri Jesús, xe' ri Are', xuk'u' rib' chkiwäch.

Ri winaq aj Israel man kekojon tâ che ri Jesús

³⁷ Ri Jesús, pune xub'an k'ia kajmab'al taq etal chkiwäch ri winaq aj Israel, ri e are' man xekojon tâ che. ³⁸ Rajwaxik k'ut chi kâb'antaj na wa' jas ri u tz'ib'am kan ri qa mam Isaías ri q'alajisal re ru Loq' Pixab' ri Dios ri kub'ij:

Qajaw Dios, ¿jachin ta lo ri kojoninaq che ru Loq' Pixab' ri Dios ri qa b'im?

¿Jachin ta lo chuwäch u k'utum wi ri Qajaw Dios ru chuq'ab'?

—kâcha ri'. ³⁹ Rumal ri' man xekowin taj xekojonik, rumal chi xuquje' xutz'ib'aj kan ri qa mam Isaías:

⁴⁰ Ri Dios xub'an moy chke, xuquje' xub'ano chi xeab'ajir ri kanima', rech man kâkil tâ ruk' ri ki waq'äch, man kâkich'ob' tâ ruk' ri ki chomab'al, man ketzelej tâ k'u wuk' in

rech kekunatajik, —kâcha ri Dios, —kâcha'. ⁴¹ Ri qa mam Isaías xub'ij wa' we tzij ri' rumal chi ri are' xrilo xnimarisax u q'ij ri Jesús, xch'aw k'u chrij.

⁴² Pune je ri', e k'ia chke ri winaq aj Israel xekojon na che ri Jesús, xuquje' ne jujun chke ri nimaq ki b'anik. Man xkiq'alajisaj tâ k'u kib' chkiwäch ri winaq rumal chi xkixej kib' chkiwäch ri tata'ib' fariseos, rech man keesax tâ b'i pa ri rachoch Dios. ⁴³ Ri e are' k'ut are utz xkil na chi kâyi' ki q'ij kumal ri winaq chuwäch ri kâyi' ki q'ij rumal ri Dios.

Ru tzij ri Jesús are kâq'atow na tzij pa ki wi' ri winaq

⁴⁴ Ri Jesús sib'alaj ko xch'awik, xub'ij: Jachin ri kâkojon chwe in, man xuwi tâ chwe in kâkojon wi, xane xuquje' kâkojon ri' che ri qa Tat ri xintaqow loq. ⁴⁵ Jachin k'u ri kinril in, kâril ri' xuquje' ri xintaqow loq. ⁴⁶ In ri' ri kinya saqil, in petinaq cho ruwächulew rech jachin taq ri kekojon chwe, man kekanaj tâ kan pa ri q'equm. ⁴⁷ Jachin k'u ri kuta ri nu tzij, te k'u ri' man kunimaj taj, man in tâ ri' ri king'atow tzij puwi' chi kâk'âjisax u wäch. Je ri', rumal chi ri in man in petinaq tâ chuq'atik tzij pa ki wi' ri winaq ajuwächulew, xane in petinaq che ki to'ik. ⁴⁸ Jachin ri xa kâretzelaj nu wäch, man kunimaj tâ k'u ri nu tzij, k'o ri kâq'atow na tzij puwi' chi kâk'âjisax u wäch. Ri tzij ri nu b'im e are ri' ri keq'atow na tzij puwi' pa ri k'isb'al q'ij. ⁴⁹ Man xaq tâ k'u pa we wi in kinch'awik. Ri qa Tat ri xintaqow loq, are ri Are' u b'im chwe jachike ri kinb'ij xuquje' jachike ri kink'utu. ⁵⁰ Wetam k'ut chi ru taqanik ri nu Tat are re k'aslemal ri man k'o tâ u k'isik. Xa je ri', ri kinb'ij, are kinb'ij jas ri in taqom wi rumal ri qa Tat.

13

Ri Jesús kuch'aj ri kaqan ru tijoxelab'

¹ Xa k'u jun q'ij chik kraj che ri nimaq'ij, Pascua u b'i'. Retam chi k'u ri Jesús chi

xuriq ri q'ij ri kuya na kan ruwächulew, kätzelej k'u ruk' ru Tat. Ri Are' amaq'el ronojel q'ij sib'alaj loq' xeril wi ru tijoxelab' cho ruwächulew. Pa ri q'ij ri' tajin kuk'ut chkiwäch chi sib'alaj loq' kerilo, chi man k'o tä u k'isik ri ki loq'al chuwäch.

² Tajin kaka'n ri wi'm re b'enaq q'ij. Ri Itzel k'ut u yo'm chi pa ranima' ri tat Judas Iscariote ru k'ojol ri tat Simón chi pa ri aq'ab' ri' kujach na ri Jesús. ³ Retam k'u ri Jesús chi ronojel taqanik yo'm pu q'ab' rumal ru Tat. Retam chi ruk' ri Dios petinaq wi ri Are', xuquje' chi ruk' ri Dios kätzelej wi. ⁴ Xwalij k'u ri Jesús chi' ri mesa, xresaj ru q'u, xuk'am jun toalla, xuxim k'u wa' xe' ru pam. ⁵ Te ri' xuya joron pa jun palangana, xuchap u ch'ajik kaqan ru tijoxelab', xusu' k'u ruk' ri toalla ri ximital xe' ru pam.

⁶ Aretaq kraj kuch'aj raqan ri tat Pedro, ri are' xub'ij che ri Jesús: Wajaw, ¿a käch'aj k'u la ri waqan in? —xcha che.

⁷ Ri Jesús xch'awik, xub'ij che: Kämik ri' man kach'ob' taj jas ri tajin kinb'ano, k'a te' b'a' pa jun q'ij chik kach'ob' na, —xcha che.

⁸ Are k'u ri tat Pedro xub'ij che: Ri in, man k'o tä jumul kinya che la chi käch'aj la ri waqan in, —xcha che.

Ri Jesús xub'ij che: We man kinch'aj tä ri awaqan, man kuya' taj katk'o'ji wuk', —xcha che.

⁹ Ri tat Simón Pedro xub'ij che: Wajaw, man xuwi tä b'a' ri waqan, xane ch'aja la ri nu q'ab' xuquje' ri nu jolom, —xcha che.

¹⁰ Are k'u ri Jesús xub'ij che: Jachin ri te' xto'taj che ri atinem man rajwaxik tä chik kuch'aj rib', xane xaq xuwi chi ri raqan, rumal chi ronojel ru cuerpo ch'ajch'oj chik. Ri ix, ix ch'ajch'oj chik, pune man iwonojel taj, —xcha che.

¹¹ Ri Jesús ya retam chik jachin ri käch'achow na. Rumlal ri' xub'ij: "Man iwonojel tä ri ix, ix ch'ajch'oj," —xcha che.

¹² Aretaq ri Jesús xto'taj chuch'ajik ri kaqan ru tijoxelab', xuk'am ru q'u, xukoj chrij, xt'uyi chi k'u jumul chi' ri mesa. Xub'ij k'u chke: ¿A kich'ob'o jas kel kub'ij wa' ri xinb'an chiwe? —xcha che. ¹³ Ri ix kib'ij Qajtij, xuquje' Qajaw, —kixcha chwe. Qas tzij ri kib'ij, rumal chi in k'u ri. ¹⁴ We in, ri in Iwajtij, ri in Iwajaw nu ch'ajom ri iwaqan, ri ix xuquje' rajwaxik b'a' kich'aj ri iwaqan chb'il taq iwib'. ¹⁵ Ri in nu yo'm jun k'utb'al chiwäch rech ri ix xuquje' je' kib'ano jas ri nu b'anom in chiwe. ¹⁶ Qas tzij kinb'ij chiwe chi man k'o tä jun patäninel ri nim na u b'anik chuwäch ru patrón, xuquje' man k'o tä jun taqo'n ri nim na u b'anik chuwäch ri taqowinaq b'ik. ¹⁷ We kich'ob' wa' we ri,

kitagej k'u u b'anik, utz k'u iwe ri', —xcha chke.

¹⁸ Ri tajin kinb'ij chanim, man kinb'ij tä wa' chiwij iwonojel ri ix. Ri in wetam jachin taq ri e cha'tal wumal. Rajwaxik k'ut je' káb'antaj na jas ri kub'ij ru Loq' Pixab' ri Dios ri Tz'ib'talik: "Ri jun ri käwi' junam wuk' u b'anom u k'ulel chwe," —käch'a ri'. ¹⁹ Kinb'ij wa' chiwe chanim k'a mäja' káb'antaj, rech aretaq káb'antaj wa', ri ix kikojo chi In Ri'. ²⁰ Qas tzij kinb'ij chiwe, chi jachin ri kuk'ulaj ri kintaq b'ik, in ri' kinuk'ulaj. Jachin k'u ri kinuk'ulaj in, kuk'ulaj ri' ri xintaqow loq, —xcha ri Jesús chke ru tijoxelab'.

Ri Jesús kub'ij chi käch'achow na ri tat Judas

²¹ Aretaq xb'itaj wa' we tzij ri' rumal ri Jesús, sib'alaj xuna' k'ax pa ranima'. Qas chi saqil xub'ij chkiwäch ru tijoxelab': Qas tzij kinb'ij chiwe chi jun chiwe are kinjachow na, —xcha chke.

²² Te ri' ri tijoxelab' xkichap u ka'yexik kib' ri jun ruk' ri jun chik, man xkich'ob' tä k'u jachin ri tajin kub'ij ri Jesús. ²³ Jun chke ru tijoxelab' ri Jesús, ri jun ri sib'alaj loq' chuwäch* tajin käwi' chuxkut chi' ri mesa. ²⁴ Ri tat Simón Pedro xub'ij che rare' pa memal chi kuta' che ri Jesús jachin ri tajin kub'ij. ²⁵ Te ri' ri are' xqeb' ruk' ri Jesús, xuta' che: Wajaw, ¿jachin ri' ri káb'ij la? —xcha che.

²⁶ Xch'aw k'u ri Jesús, xub'ij che: Kinrub' na jun ch'äqap kaxlan wa. Jachin k'u che ri kinya wi wa', are ri are', —xcha che.

Xurub' k'u ri ch'äqap kaxlan wa, xuya che ri tat Judas Iscariote, u k'ojol ri tat Simón. ²⁷ Xuwi xk'amtaj ri ch'äqap kaxlan wa rumal ri tat Judas, xok ri Satanás pa ranima'. Xub'ij k'u ri Jesús che: Ri kachomaj kab'ano, chab'ana wa' chanim, —xcha che.

²⁸ Man k'o tä k'u jun chke ri tajin kewi' chi' ri mesa ri xuch'ob'o jas che ri Jesús xub'ij wa' we tzij ri' che. ²⁹ Ketam k'ut chi ri tat Judas pu q'ab' k'o wi ri k'olib'al puaq, rumal ri' jujun xkichomaj chi ri Jesús are tajin kub'ij che chi kuloq' ri rajwaxik chke che ri nimaq'ij o kuya jub'iq' puaq che ki to'ik ri meb'a'ib'. ³⁰ Xuwi k'u xk'amtaj ri ch'äqap kaxlan wa rumal ri tat Judas, xel b'i ri are'. Chaq'ab' chi k'u ri'.

Ri k'ak' taqanik ri xuya ri Jesús

³¹ Aretaq elinaq chi b'i ri tat Judas, xub'ij ri Jesús: Kämik käch'alajin na chi qas nim nu q'ij in, in ri' ri Ralk'ual ri Dios ri Qas Winaq. Rumlal k'u wech in känimarisax na u q'ij ri Dios. ³² We rumal wech in, in ri' ri Ralk'ual ri Dios ri Qas Winaq, känimarisax na u q'ij

* **13:23** Pa ri wuj ri' ri xt'ib'ax rumal ri San Juan, aretaq ri Juan käch'aw chrij chb'il rib', amaq'el kub'ij chi are "ri tijoxel ri sib'alaj loq' kil wi rumal ri Jesús" o "ri sib'alaj loq' chuwäch".

ri Dios, xuquje' ri Dios kunimarisaj na nu q'ij in. Chanim k'ut kub'an na wa'. ³³ Ix ri', ix je' ta ne alaj taq walk'ual, man naj tâ chik in k'o iwuk'. Ri ix kinitzujuk na. Jas k'u ri xinb'ij chke ri winaq aj Israel, je' xuquje' kinb'ij chiwe ix: Man kixkowin taj kixe' chila' jawije' ri kine' wi in. ³⁴ Kinya k'u kan we k'ak' taqanik ri' chiwe: Chiwaj iwib' chb'il taq iwib'. Je' jas ri in kixwaj, je' b'a' chib'ana ix, chiwaj iwib' chb'il taq iwib'. ³⁵ We kiwaj iwib' chb'il taq iwib', konojel ri winaq kâketamaj na chi ri ix, ix nu tijoxelab', —xcha ri Jesús chke.

Ri Jesús kutzijoj apanoq chi ri tat Pedro kub'ij na chi man retam tâ u wäch

³⁶ Ri tat Simón Pedro xuta' che ri Jesús: Qajaw, ¿jawije' ke' wi la? —xcha che.

Ri Jesús xch'awik, xub'ij che: Jawije' ri kine' wi, ri at man katkowin taj kate' wuk' kâmik. K'ä te k'u ri' kate' na wuk', —xcha che.

³⁷ Xub'ij k'u ri tat Pedro che: Wajaw, ¿jas che man kinkowin taj kine' uk' la kâmik? Ri in kinya nu tzij chi kinkâm rumal ech la, —xcha che.

³⁸ Ri Jesús xch'awik, xub'ij che: ¿A qas tzij kaya a tzij chi katkâm rumal wech in? —xcha che. Qas tzij kinb'ij chawe chi kab'ij na oxmul chi man awetam tâ nu wäch mäjöq koq' ri ama' äk', —xcha che.

14

Waral kâqil wi chi ri Jesús are je' jas jun b'e ri kopan ruk' ri qa Tat chila' chikaj

¹ Xaq mäq'oxow iwanima'. Chiku'b'a i k'ux chrij ri Dios, xuquje' chiku'b'a i k'ux chwij in. ² Cho rachoch ri nu Tat k'o k'ia ri je'l taq ja ri kuya' kixk'oji wi. We ta mat je ri', nu b'im ta ri' chiwe. Kine' b'a', kinb'ana u b'anik jun ja ri kuya' kixk'oji wi. ³ Aretaq in b'enaq chik, b'antajinaq chi u b'anik ri ja ri kixk'oji wi, kinpe chi na che i k'amik b'i wuk' rech ri ix kixek'ol chila' jawije' ri in k'o wi. ⁴ Ri ix iwetam jawije' ri kine' wi, xuquje' iwetam ri b'e ri kopan chila', —xcha ri Jesús chke ru tijoxelab'.

⁵ Ri tat Tomás xub'ij che: Qajaw, man qetam tajjawije' ri ke' wi la. ¿Jas ta k'u kâqa'n che retamaxik ri b'e? —xcha che.

⁶ Ri Jesús xch'awik, xub'ij che: In ri' kink'ut ri b'e, ri in kink'ut ri qas tzij, xuquje' ri in kinya na ri k'aslema!.* Xaq xuwi rumal wech in jun winaq kâkowinik kopan ruk' ri qa Tat. ⁷ We ta ri ix qas iwetam nu wäch, iwetam ta u wäch ri' ri nu Tat xuquje'. Iwetam chi k'u u wäch ri' kâmik rumal chi amaq'el tajin kiwil u wäch ri Are', —xcha che ri tat Tomás.

⁸ Te ri' xub'ij ri tat Felipe che: Qajaw, k'utu b'a' la ri qa Tat chqawäch, xuwi wa' rajwaxik chqe, —xcha che.

⁹ Ri Jesús xch'awik, xub'ij che: Felipe, ojer chi ri' in k'o iwuk', ¿te k'u ri' man awetam tâ nu wäch? Jachin ri rilom nu wäch in, rilom u wäch ri' ri nu Tat. ¿Jas che kata' chwe chi kink'ut ri qa Tat chiwäch? ¹⁰ ¿A mat kikojo chi ri in, in k'o ruk' ri qa Tat, xuquje' chi ri qa Tat k'o wuk' in? Ri tzij ri kinb'ij chiwe man xaq tâ in kinb'inik. Ri qa Tat ri kâjeqi wuk' in, are ri Are' ri kâb'anow ri chak. ¹¹ Chikojo' chi ri in, in k'o ruk' ri qa Tat, xuquje' chi ri qa Tat, Are k'o wuk' in. We man je ri', chixkojon b'a' chwe rumal ri kinb'ano. ¹² Qas tzij kinb'ij chiwe, chi jachin ri kâkojon chwe, kub'an na re xuquje' ri kajmab'al ri kinb'an in. Nimaq taq kajmab'al k'ut chuwäch wa' kub'an na rumal chi ri in kine'k jawije' ri k'o wi ri qa Tat. ¹³ Ronojel k'u ri kita' che ri qa Tat pa ri nu b'i', ri in kinb'an na rech ri in u K'ojol ri Dios kinq'alajisaj chi nim na u q'ij ri qa Tat. ¹⁴ Ri in kinb'an na apacheke ri kita' chwe pa ri nu b'i'.

Ri Jesús kub'ij chi kutaq na loq ri Loq'alaj Espiritu

¹⁵ We ri ix qas kiniwaj, kinimaj na ri' ri nu taqanik. ¹⁶ Ri in k'ut kinb'ochi'j na ri nu Tat chi kutaq loq Jun ri kixuto', ri kuwalijisaj na iwanima', rech kâk'oji iwuk' amaq'el ronojel q'ij. ¹⁷ Are wa' ri Loq'alaj Espiritu ri kub'ij ri qas tzij. Ri winaq ajuwächulew man kekowin taj kâkik'amo rumal chi man kilom tâ u wäch, xuquje' man ketam tâ u wäch. Are k'u ri ix iwetam u wäch rumal chi ri Are' k'o iwuk', kâjeqi k'u na pa ri iwanima' amaq'el ronojel q'ij. ¹⁸ Man kixinya tâ kanoq xaq i tukiel. Kintzelej na loq rech kink'oji iwuk'. ¹⁹ Xaq kieb' oxib' q'ij chik, ri winaq man kâkil tâ chi na nu wäch. Are k'u ri ix, ix kiwil na nu wäch. Ri ix k'ut kixk'asi na rumal chi ri in, in k'aslik. ²⁰ Pa ri q'ij ri' ri ix kiwetamaj na chi ri in, in k'o ruk' ri nu Tat, xuquje' chi ri ix, ix k'o wuk' in. Kiwetamaj na chi ri in, in k'o iwuk' ix. ²¹ Jachin ri retam ri nu taqanik xuquje' kunimaj wa', kuk'ut ri' chi qas tzij kinraj. Loq' k'ut kil wi na rumal ri nu Tat jachin ri kinraj. Ri in xuquje' loq' kinwil wi, kink'ut k'u na wib' chuwäch.

²² Ri tat Judas (man are tâ ri Judas Iscariote) xuta' che ri Jesús, xub'ij: Qajaw, ¿jas lo wa' chi chqawäch uj kâk'ut wi ib' la, man chkiwäch tâ k'u ri winaq ajuwächulew? —xcha che.

²³ Ri Jesús xch'awik, xub'ij che: Jachin ri kinraj kunimaj ri' ri kinb'ij. Loq' k'ut kil wi na ri are' rumal ri nu Tat. Ri nu Tat, xuquje' ri in kujpe na, kujjeqi' na ruk'. ²⁴ Jachin ri man kinraj taj man kunimaj tâ ri' ri kinb'ij.

* **14:6** Ri tzij pa griego are wa': "In ri' ri b'e, in ri' ri qas tzij, in ri' ri k'aslema!."

Ri tzij ri tajin kitatab'ej man are tä nu tzij in, xane u tzij ri nu Tat ri xintaqow loq.

²⁵ Tajin kinb'ij ronojel wa' we tzij ri' chiwe che taq ri q'ij ri' ri k'a in k'o iwuk'. ²⁶ Are k'u ri Loq'alaj Espiritu ri kutaq na loq ri nu Tat pa ri nu b'i' rech kixuto', rech kuku'b'isaj i k'ux, ri Are' k'ut kuk'ut na ronojel chiwäch. Kuna'taj k'u na chiwäch ronojel ri nu b'im chiwe.

²⁷ Ruk' utzil kixinya kanoq. Kinya chiwe chi kuxlan ri iwanima', man junam tä k'u wa' ruk' ri käkiya ri winaq ajuwächulew. Mäq'oxow b'a' iwanima', mixej k'u iwib'. ²⁸ Ri ix xito aretaq xinb'ij chi kine'k, kinpe chi k'u na jumul chik rech kin'oj'i iwuk'. We ta qas tzij kiniwaj, xixkikot ta ri' aretaq xinb'ij chi kine' ruk' ri nu Tat. Je ri', rumal chi ri nu Tat are nim na u q'ij chnuwäch in. ²⁹ Kinb'ij apan wa' we ri' chiwe k'a mäja' käb'antajik, rech aretaq käb'antaj wa', kixkojon na.

³⁰ Man k'o tä chi k'ia tzij kinb'ij chiwe. Käpe k'u ri jun ri k'o u taqanik puwi' we uwächulew. Man käkowin tä k'u ri are' kätaqan pa nu w' in. ³¹ Rajwaxik wi chi je' käb'antaj na wa', rech ri winaq käketamaj chi loq' ri nu Tat chnuwäch, kinb'an k'ut jas ri in u taqom wi. ¡Chixwalijoj! Chujel b'i waral, —xcha ri Jesús chke ru tijoxelab'.

15

Waral käqil wi ri k'utb'al chrij ri juwi' uvas

¹ In ri' ri juwi' uvas, ri qas utzalaj tiko'n. Ri nu Tat k'ut, Are ri ajchak ri keilow ri juwi' taq uvas. ² Konojel ri alaj taq u q'ab' ri juwi' uvas ri man käkiya tä ki wäch ke'resaj na apanoq. Are k'u ri käkiya ki wäch kerilo keub'an ki b'anik rech sib'alaj kewächin na. ³ Ri ix ch'ajch'oj chi ri iwanima' rumal ri tijonik ri nu yo'm chiwe. ⁴ Chib'ana b'a' xa jun wuk' in, jas ri in nu b'anom xa jun iwuk' ix. Je' jas jun alaj u q'ab' ri juwi' uvas man käkowin taj kuya u wäch xaq u tukiel we man tiqil che ri raqan, je ri' xuquje' ri ix, ix je' jas jun tiko'n ri man käwächin taj we man kib'an xa jun wuk' in.

⁵ In ri' ri juwi' uvas. Are k'u ri ix, ix ri alaj taq u q'ab' ri juwi' uvas. Jachin ri kub'an xa jun wuk' in, kinb'an k'u xa jun in ruk' ri are', are ri' sib'alaj käwächin na. Man k'o tä k'u jas kixkowin ix chub'anik we man in k'o in iwuk'. ⁶ Jachin ri man kub'an tä xa jun wuk' in, käk'iaq na apanoq, kächaq'i' k'u na je' jas ru q'ab' taq ri che' ri kemolik, keporox pa q'aq'.

⁷ We ri ix xa ix jun wuk' in, man käsach tä k'u ri nu tijonik chiwe, kuya' kita' jachike ri kiwaj, käya'taj k'u na wa' chiwe. ⁸ Ri nu Tat känimarisax na u q'ij aretaq ri ix je' kib'an wa' jas juwi' uvas ri sib'alaj käwächinik. Je

wa' ri' qas tzij kixok che nu tijoxelab'. ⁹ Ri in kixwaj ix jas ri nu Tat kinraj in. Chitaqej b'a' kiwaj iwib' jas ri nu b'anom in chiwe. ¹⁰ We kinimaj ri nu taqanik, kitaqej na ri' kiwaj iwib' jas ri nu b'anom in chiwe je' jas ri in kinimaj ru taqanik ri nu Tat, ri Are' k'ut tajin wi loq' kinrilo.

¹¹ Je' kintzijoq wa' chiwe rech kixkikot wuk', je k'u ri' qas käkikot na ri iwanima'. ¹² Ri nu taqanik are wa': Chiwaj iwib' chb'il taq iwib', je' jas ri in kixwaj ix. ¹³ Ri rutzil ranima' jun winaq ri más nim ri kuya' käk'oji pa ranima' are la' chi kuya' ri' ru k'aslemal che ki k'exwäch ri e utz ruk'. ¹⁴ Ri ix qas ix utz wuk' in we kib'ano jas ri kix-intaq wi. ¹⁵ Ya man kinb'ij tä patänil taq we chiwe, rumal chi ri patäninel man retam tä ri' jas ri kub'an ru patrón. Xane kinb'ij chiwe chi qas ix utz wuk' in rumal chi nu k'utum chiwäch ronojel ri u b'im ri nu Tat chwe. ¹⁶ Ri ix man xinicha' tä in, xane in ri' ri xixincha' ix. Xinya k'u pi q'ab' chi je' kib'ano jas juwi' uvas ri sib'alaj käwächinik. Ri wächinik ri kiya man käsach tä u wäch. Je k'u ri' ri nu Tat kuya na chiwe jachike ri kita' che pa ri nu b'i'. ¹⁷ Are b'a' wa' ri kixintaq wi: Chiwaj iwib' chb'il taq iwib' ri jun ruk' ri jun chik, —xcha chke.

Ri winaq ajuwächulew käketzelaj u wäch ri Jesús xuquje' ri e rech ri Are'

¹⁸ We ri winaq ajuwächulew käketzelaj i wäch, chiwetamaj chi in ri' xketzelaj nu wäch nab'e. ¹⁹ We ta ri ix, ix rech ruwächulew, ri winaq ajuwächulew kixkaj ta ri', je' jas ri e are' sib'alaj kekaj ri kachi'l. Ri in k'ut xixincha' chkixol ri winaq ajuwächulew, rumal k'u ri' ri winaq ajuwächulew käketzelaj i wäch rumal chi man ix jun tä chi kuk'. ²⁰ Chna'taj b'a' chiwe jas ri xinb'ij chiwe: "Man k'o tä jun patäninel ri nim na u b'anik chuwäch ru patrón." We ri in käb'an k'äx chwe kumal ri winaq, ri ix xuquje' käb'an na k'äx chiwe kumal. We k'u ki nimam ri nu tijonik in, xuquje' käkinimaj na ri i tijonik ix. ²¹ Ronojel wa' we k'äx ri' käb'an na chiwe kumal ri winaq rumal wech in, rumal chi man ketam tä u wäch ri xintaqow loq.

²² Mat k'o ki mak we winaq ri' we ta mat xinpe che ki tzijob'exik. Kämik k'ut man kuya' taj käkib'ij chi man k'o tä ki mak. ²³ Jachin k'u taq ri käketzelaj nu wäch in, käketzelaj u wäch ri' ri nu Tat xuquje'. ²⁴ Mat k'o ki mak ri' we ta mat k'o ri nu b'anom chkixol ri man k'o tä chi jun b'anowinaq. Ri e are' k'ut kilom ronojel ri nu b'anom. Pune je ri' käketzelaj nu wäch in, xuquje' käketzelaj u wäch ri nu Tat. ²⁵ Rajwaxik k'ut chi je' käb'antaj na wa' rumal chi qas je' kel na jas ri tz'ib'tal kan pa ri ki Pixab': "Xketzelaj nu

wäch, man k'o tä k'u mak xinb'an chkiy," — käch'a'.

²⁶ Aretaq k'ut käpe ri Jun ri kätob'an chiwe, ri kuwalijisaj iwanima', ri Loq'alaj Espiritu ri kub'ij ri qas tzij, ri kintaq na loq aretaq in k'o chi ruk' ri qa Tat, ri Are' kuq'alajisaj na ri qas tzij chwij. ²⁷ Ri ix xuquje' kiq'alajisaj na ri qas tzij chwij, rumal chi ri ix k'olinaq wuk' petinaq loq, —xcha ri Jesús chke ru tijoxelab'.

16

¹ Kinb'ij wa' we tzij ri' chiwe rech man kub'an tä kieb' i k'ux, kixtzaq k'ut. ² Kixesax k'u na loq pa taq ri rachoch Dios. Je ri' chi kopan na ri q'ij aretaq apachin ri kixkämisanik kuchomaj na chi tajin kápatänin che ri Dios. ³ Je' kaka'n na wa' rumal chi man k'o tä jumul ri qas xketamaj u wäch ri nu Tat, man k'o tä k'u jumul ri xketamaj nu wäch in. ⁴ Kinb'ij apan ronojel wa' chiwe, rech aretaq kuriq ri q'ij ri', kána'taj chiwe chi ri in nu b'im chi wa' chiwe, —xcha ri Jesús.

Waral káqil wi ri kub'an ri Loq'alaj Espiritu

Man xinb'ij tä wa' chiwe petinaq loq rumal chi ri in, in k'o iwuk'. ⁵ Kämik k'ut kine'k rech kinek'ol ruk' ri Jun ri xintaqow loq. Man k'o tä k'u jun chiwe kuta' chwe jawije' ri kine' wi. ⁶ Xa k'u xixb'isonik rumal chi xinb'ij wa' we tzij ri' chiwe. ⁷ Kinb'ij k'u ri qas tzij chiwe: Are utz na chiwe ix chi kine'k. We ta k'u man kine'k, man käpe tä ri' ri Jun ri kák'oji iwuk' che i to'ik, ri kuwalijisaj iwanima'. We k'u kine'k, kintaq na loq. ⁸ Aretaq käpe ri Are' kuya na pa kanima' ri winaq chi kákich'ob'o chi k'o ki mak, chi rajwaxik kaka'n ri jikomal pa ri ki k'aslemal, xuquje' chi ri Dios kuq'at na tzij pa ki wi'. ⁹ K'o ki mak rumal chi man kekojon tä chwe. ¹⁰ Káketamaj k'u na chi rajwaxik u b'anik ri jikomal pa ri ki k'aslemal rumal chi ri in kine' ruk' ri nu Tat, ri ix k'ut man kiwil tä chi na nu wäch. ¹¹ Káketamaj na chi ri Dios kuq'at na tzij pa ki wi' rumal chi ri jun ri kátaqan puwi' ruwächulew q'atom chi tzij puwi' chi kák'ajisax u wäch.

¹² K'ia na ri kwaj kinb'ij chiwe, man kixkowin tä k'u chuch'ob'ik wa' kämik. ¹³ Aretaq k'ut käpe ri Loq'alaj Espiritu ri kub'ij ri qas tzij, kuk'ut na ronojel ri qas tzij chiwäch. Man xaq tä k'u pa re wi käch'awik, xane are kub'ij ronojel ri kuto, kuk'ut k'u na chiwäch jas ri káb'antaj na. ¹⁴ Ri Are' kunimarisaj na nu q'ij in rumal chi kuk'am na ri wech in, kuk'ut k'u na wa' chiwäch ix. ¹⁵ Ronojel ri k'o ruk' ri nu Tat are wech in xuquje'. Rumal ri' xinb'ij chi ri Loq'alaj Espiritu kuk'am na ri wech in, kuk'ut k'u na wa' chiwäch ix.

Ri b'is kujala na pa kikotem

¹⁶ Xaq jub'iq' chik, te k'u ri' ri ix man kiwil tä chi na nu wäch. K'ä te k'u ri' kiwil chi na jumul nu wäch pa kieb' oxib' q'ij, rumal chi kine'k rech kinek'ol chila' jawije' ri k'o wi ri qa Tat, —xcha chke ru tijoxelab'.

¹⁷ Te ri' jujun chke ru tijoxelab' xkitala chb'il taq kib', xkib'ij: ¿Jas kel kub'ij wa'? Kub'ij chqe chi xaq jub'iq' chik, te k'u ri' man káqil tä chi u wäch. K'ä te k'u káqil chi na u wäch jumul chik pa kieb' oxib' q'ij rumal chi ke' jela' jawije' ri k'o wi ri qa Tat. ¹⁸ ¿Jas lo wa' ri kraj kub'ij chi "xaq jub'iq' chik"? Man káqach'ob' taj jas ri tajin kub'ij, —xecha'.

¹⁹ Ri Jesús xuch'ob'o chi k'o jas ri kákaj kákita' che, xub'ij k'u chke: Ri in xinb'ij chiwe chi xaq jub'iq' chik, te k'u ri' man kiwil tä chi nu wäch. K'ä te k'u kiwil chi na jumul nu wäch pa kieb' oxib' q'ij. ¿A are wa' ri tajin kitala chixol chb'il taq iwib'? ²⁰ Qas tzij kinb'ij chiwe chi ri ix kixox' na, kixb'ison na, are k'u ri winaq ajuwächulew kekikot na. Pune k'u je ri', chi ri ix kixb'ison na, ri i b'is kujala na pa kikotem. ²¹ Aretaq käpe ri q'ij ri kil na u wäch ri ral jun ixog, káb'isonik rumal chi xuriq ri q'ij re ri q'oxom. Aretaq k'ut rilom chi u wäch ri ral, man kána'taj tä chi ri q'oxom che rumal ri kikotemal ri kuna' chi ilom u wäch jun alaj ak'al cho ruwächulew. ²² Je k'u ri' ri ix, kämik kixb'isonik. Ri in k'ut kinwil chi na i wäch jumul chik, te k'u ri' kákikot k'u na ri iwanima'. Are jun kikotemal wa' ri man k'o tä jun kákowinik kesan chiwe.

²³ Pa ri q'ij ri' man k'o tä chi jas kita' na chwe. Qas tzij kinb'ij chiwe chi ri qa Tat kuya na chiwe ronojel ri kita' che pa ri nu b'i'. ²⁴ K'ä we kämik ri' ri ix man k'o tä jas ri i tom pa ri nu b'i'. Chita' b'a', káya'taj k'u na chiwe rech qas kákikot ri iwanima', —xcha chke.

Ri Jesucristo ch'akaninaq na puwi' ruwächulew

²⁵ Nu b'im wa' we tzij ri' chiwe kuk' taq k'utb'al. Kuriq k'u na ri q'ij aretaq man kintzijon tä chi iwuk' kuk' taq k'utb'al. Xane chi saqil chik kintzijon na iwuk' chrii ri qa Tat. ²⁶ Pa ri q'ij ri' k'o ri kita' na che ri Are' pa ri nu b'i'. Man kinb'ij tä k'u chiwe chi kinb'ochi'j ri nu Tat pi wi'. ²⁷ Je ri', rumal chi ri ix, ix loq' chuwäch ri nu Tat. Ix loq' chuwäch rumal chi ri in, in loq' chiwäch ix, kikoq k'ut chi ruk' ri Dios in petinaq wi. ²⁸ Xinél loq ruk' ri qa Tat rech kinpe waral cho we uwächulew, kämik chi k'ut tajin kinya kan ruwächulew rech kintzelej ruk' ri qa Tat, —xcha ri Jesús chke.

²⁹ Te ri' xkib'ij ru tijoxelab' ri Jesús: Kämik qas chi saqil tajin kátzijon la, man tajin tä kákoj la k'utb'al. ³⁰ Kämik qetam chik chi etam la ronojel. Man rajwaxik taj chi k'o jun

k'o jas kuta' che la. Rumal ri' kăqakojo chi ruk' ri Dios petinaq wi la, —xecha che.

³¹ Ri Jesús xch'awik, xub'ij chke: ¿A tziy ri' chi kămik qas kixkojonik? —kăcha'.
³² Petinaq k'u ri q'ij, kămik k'u ri' aretaq ri ix kixjab'un na. Chijujunal kitzukuj na jawije' kixe' wi, kiniya k'u na kan nu tukiel. Man kinkanaj tă k'u na kan nu tukiel rumal chi ri qa Tat are k'o wuk'.
³³ Kinb'ij wa' we tziy ri' chiwe rech kuxlan ri iwanima' rumal chi xa ix jun wuk'. Cho ruwăchulew kiriq na k'ăx. ¡Mixej b'a' iwib'! Ri in k'ut, in ch'akaninaq puwi' ruwăchulew.

17

Ri Jesús kub'an orar pa ki wi' ru tijoxelab'

¹ Aretaq xb'itaj wa' we tziy ri' rumal ri Jesús, xka'y chikaj, xub'ij: Tat, xuriq ri q'ij. Nimarisaj b'a' la u q'ij ri K'ojol la, rech xuquje' ri K'ojol la kunimarisaj ri q'ij la.
² Yo'm k'u la taqanik pu q'ab' ri K'ojol la pa ki wi' konojel winaq rech kuya ri k'aslemal ri man k'o tă u k'isik chke ri xeya la che.
³ Ri k'aslemal ri man k'o tă u k'isik are wa' chi kăketamaj wăch la chi xuwi ri lal, lal qas Dios, xuquje' chi kăketamaj u wăch ri Jesucristo ri xtaq la loq.

⁴ Ri in, nu nimarisam q'ij la waral cho ruwăchulew xuquje' nu k'isom u b'anik ri xintaq la chub'anik.
⁵ Kămik k'ut, Tat, ya la chwe chi kănimarisax nu q'ij uk' la jas ri nu b'anom nab'e aretaq măjoq xb'an ruwăchulew.

⁶ Ri winaq ri xecha' la chkixol ri winaq cho ruwăchulew rech keya la chwe, nu b'im chke jachin ri lal. E ech la wa', xeya k'u la chwe. Ri e are' k'ut ki nimam ri tziy la.
⁷ Kămik ri e are' ketam chi ronojel ri xya la chwe uk' la petinaq wi.
⁸ Nu yo'm k'u ri tziy la chke ri xya la chwe, xkikoj k'u pa kanima'. Xkich'ob'o chi qas tziy uk' la in petinaq wi, xuquje' xkikojo chi ri lal xintaqow la loq.

⁹ Kinb'ochi'n che la pa ki wi'. Man kinb'ochi'n tă che la pa ki wi' ri winaq ajuwăchulew, xane pa ki wi' ri winaq ri xeya la chwe, rumal chi e ech la wa'.
¹⁰ Ronojel ri wech in ech la wa', are k'u ri ech la wech in wa'. Kumal k'u ri e are' kăq'alajinik chi sib'alaj nim na nu q'ij.

¹¹ Ri in man kinkanaj tă chik cho ruwăchulew. Ri e are' k'ut kekanaj na kan cho ruwăchulew. Ri in kine'k rech kink'oji uk' la. Loq'alaj qa Tat, chechajij b'a' la ruk' ri chuq'ab' la ri winaq ri xeya la chwe, rech qas kăka'n xa jun, jas ri in, ri lal xa uj jun.
¹² Aretaq xink'oji kuk' ri e are' waral cho we uwăchulew, xeinchajij xuquje' xeinto' ruk' ri chuq'ab' la konojel ri xeya la chwe. Man k'o tă jun chke ri xsachik, xane xaq xuwi ri jun ri yo'm chrij chi kăsachik rech je' kăb'antajik jas ri kub'ij ri Loq' Pixab' la ri Tz'ib'talik.

¹³ Kămik k'ut kine' chila' jawije' ri k'o wi la. Che k'u we chanim ri' ri in k'o na cho ruwăchulew, kinb'ij kan wa' we tziy ri' chke rech ri e are' qas kăkina' pa kanima' ri kikotomal ri kinna' in pa ri wanima'.
¹⁴ Nu yo'm ri tziy la chke. Ketzelaq k'u ki wăch ri e are' kumal ri winaq ajuwăchulew, rumal chi ri e are' man e rech tă ruwăchulew je' jas ri in man in rech tă ruwăchulew.
¹⁵ Man kinta' tă che la chi keesaj la b'i cho ruwăchulew, xane kinb'ochi'n che la chi keto' la chu wăch ri Itzel.
¹⁶ Je' jas ri in man in rech tă ruwăchulew, ri e are' xuquje' man e rech tă ruwăchulew.
¹⁷ Chetasa la chrij ronojel u wăch mak ruk' ri qas tziy rech kăkijach kib' pa q'ab' la. Ri Loq' Pixab' la are ri qas tziy.
¹⁸ Jas ri lal xintaq la loq chkixol ri winaq ajuwăchulew, ri in xuquje' kintaq na b'i ri e are' chkixol ri winaq ajuwăchulew.
¹⁹ Rumal k'u kech ri e are' ri in kinjach wib' pa q'ab' la, rech ri e are' xuquje' kăkijach kib' pa q'ab' la rumal ri qas tziy, kăkitas k'u kib' chrij ronojel u wăch mak.

²⁰ Man kinb'ochi'n tă k'u che la xaq xuwi pa ki wi' ri e are', xane xuquje' pa ki wi' ri k'ă te' kekojon na chwe, aretaq kăkita ri tziy ri kăkitzijojo na ri e are'.
²¹ Kinb'ochi'n che la chi konojel ri e are' qas kăka'n na xa jun, chi qas kăka'n ta na xa jun junam kuk' uj, Tat, je' jas ri lal k'o la wuk' in, xuquje' ri in, in k'o uk' la. Qas tziy ta b'a' kăka'n xa jun rech ri winaq ajuwăchulew kăkikojo chi lal xintaqow la loq.
²² Ri in nu nimarisam ki q'ij jas ri u nimarisaxik nu q'ij in b'anom la, rech xa e jun, je' jas ri lal ri in xa uj jun.
²³ Ri in, in k'o kuk', ri lal k'ut k'o la wuk' in, rech ri e are' qas kăka'n na xa e jun, rech je ri' ri winaq ajuwăchulew kăkich'ob'o chi lal xintaqow la loq, xuquje' chi e loq' chu wăch la jas ri in, in loq' chu wăch la.

²⁴ Tat, lal xeyo'w la chwe, kwaj k'ut chi kek'ol na wuk' in jawije' ri kink'oji wi na in rech kăkilo chi yo'm la chwe chi sib'alaj nim nu q'ij in. Ojer k'ut in loq' chu wăch la tzaretaq măjoq kăb'an ruwăchulew.
²⁵ Tat, lal ri jikom anima' la, ri winaq ajuwăchulew man qas ketam tă wăch la, ri in k'ut wetam wăch la. Ri winaq k'ut ri e yo'm la chwe ketam chi lal ri' xintaqow la loq.
²⁶ Nu b'im chke jachin ri lal, kintaqej k'u na u b'ixik wa' chke, rech jas ri nu loq'al in chu wăch la, je' ki loq'al ri e are' chu wăch la. Je ri' rech ri in qas kink'oji na kuk', —xcha ri Jesús che ri qa Tat.

18

Kăchap ri Jesús kumal ri winaq

¹ Aretaq xb'itaj we tziy ri' rumal ri Jesús, xel b'i ri Are'. Junam kuk' ru tijoxelab' xe' ri Are' ch'ăqăp che ri b'inel ja', Cedrôn u b'i'. Chila' k'o wi jun ch'ăqăp ulew ri e tiktal wi ri che', chila' k'ut xok wi ri Jesús e rachil'

ru tijoxelab'. ² Ri tat Judas ri tajin kájachow ri Jesús xuquje' retam are' ri ch'äqap ulew ri' rumal chi ri Jesús k'ia mul k'olinaq chila' kuk' ru tijoxelab'. ³ Je ri' ri tat Judas xopan chila' e rachi'l jumulaj soldados, xuquje' jujun chajinelab' re ri nimalaj rachoch Dios ri e taqom b'i kumal ri ki nimaqil ri sacerdotes xuquje' ri tata'ib' fariseos. We winaq ri' kuk'am ki machetes, kuk'am ki lámpara, kuk'am k'u ki chäj. ⁴ Retam chi k'u ri Jesús ronojel ri káb'an na che. Rumal ri' xel apan chkiwäch ri winaq, xuta' chke: ¿Jachin ri kätzujuk alaq? —xcha chke.

⁵ Ri e are' xech'awik, xkib'ij che: Ri Jesús ri aj Nazaret, —xecha'.

Ri Jesús xub'ij: In ri', —xcha chke.

Ri tat Judas ri tajin kájachowik k'o chila' chxixol. ⁶ Aretaq ri Jesús xub'ij: "In ri'", pak'alik xeb'e'k, xetzaq k'u pulew. ⁷ Te ri' ri Jesús xuta' chi jumul chke: ¿Jachin ri kätzujuk alaq? —xcha chke.

Xkib'ij k'u ri e are': Ri Jesús ri aj Nazaret, —xecha'.

⁸ Te ri' xub'ij ri Jesús chke: Nu b'im chi chech alaq chi in ri', —kächa chke. We are ri in ri kintzujuk alaq, ya alaq chke we nik'iaj ri' chi keb'e'k, —xcha chke.

⁹ Je' xub'ij wa' ri Jesús rech je' káb'antajik jas ri xub'ij ri Are': "Ri xeuya ri nu Tat chwe, man k'o tä jun chke xsachik," —xcha'.

¹⁰ Te ri' ri tat Simón Pedro ri k'o ru machete xuk'amo, xuq'at k'u apan ru xikin ri tat Malco ri patänil re ri ki nimal sacerdotes.

¹¹ Xub'ij k'u ri Jesús che ri tat Pedro: Chaya chi jumul ri a machete pa ri k'olib'al re. We ri nu Tat kub'an chwe chi kintij ri k'a ri k'o pa ri vaso, ¿a mat rajwaxik wi chi käpe wa' we k'äx ri' chwij? —xcha chke.

Kopan ri Jesús chuwäch ri ki nimal sacerdotes

¹² Xepe k'u ri jumulaj soldados kachi'l ri ki nimal ri e are', xuquje' ri chajinelab' re ri nimalaj rachoch Dios ri aj Israel, xkichap ri Jesús, xkiyutu. ¹³ Te ri' xkik'am b'i cho rachoch ri tat Anás. Ri tat Anás are u ji' ri tat Caifás ri ki nimal sacerdotes pa ri junab' ri'. ¹⁴ Are ri tat Caifás wa' ri u b'im kan nab'e chke ri winaq aj Israel chi are utz na chke ri e are' chi kákam xa jun achi che ki k'exwäch konojel ri winaq.

Ri tat Pedro kub'ij chi man retam tä u wäch ri Jesús

¹⁵ Ri tat Simón Pedro, rachi'l jun tijoxel chik, e b'enaq ruk' ri Jesús. Ri jun tijoxel chik ri' etamtal u wäch rumal ri ki nimal sacerdotes, rumal k'u ri' xok b'i ri are' ruk' ri Jesús pa ri uwoja rech ri rachoch ri ki nimal sacerdotes. ¹⁶ Are k'u ri tat Pedro xkanaj kan chrij ri ja chi' ri uchib'e. Xa je ri' xel loq ri tijoxel ri etamtal u wäch rumal ri ki nimal sacerdotes, xch'aw ruk' ri chajil

uchib'e, xroksaj k'u b'i ri tat Pedro. ¹⁷ Ri chajil uchib'e xuta' che ri tat Pedro, xub'ij: ¿A mat lal jun chke ru tijoxelab' we achi ri? —xcha che.

Ri tat Pedro xch'awik, xub'ij: No, man in jun tä chke, —xcha che.

¹⁸ Sib'alaj k'äx tew tajin kub'ano. Rumal ri' ri patäninelab' xuquje' ri chajinelab' ki nuk'um jun q'aq'. E tak'atoj k'u chila', tajin kákimiq' kib'. Ri tat Pedro xuquje' k'o kuk', tajin k'u kumiq' rib' chrij ri q'aq'.

Ri ki nimal sacerdotes kuk'ot u chi' ri Jesús

¹⁹ Ri ki nimal sacerdotes xuchap u ta'ik che ri Jesús jachin taq ru tijoxelab', xuquje' jas ri tajin kuk'ut chkiwäch ri winaq. ²⁰ Ri Jesús xub'ij che: Ri in, in tzijoninaq chkiwäch konojel ri winaq chi saqil. Amaq'el nu yo'm tijonik pa taq ri rachoch Dios xuquje' pa ri nimalaj rachoch Dios jawije' ri kákimulij wi kib' konojel ri winaq aj Israel. Je ri' chi man k'o tä jun tzij nu b'im xaq chi k'uual, —kächa che. ²¹ ¿Jas che káta' la chwe in? Ta' la chke ri winaq ri ki tom ri nu tzij, chkib'ij k'ut jas chrij in tzijoninaq wi. Ri e are' ketam jas ri nu b'im, —xcha che.

²² Aretaq x'b'itaj wa' we tzij ri' rumal ri Jesús, jun chke ri chajinelab' rech ri nimalaj rachoch Dios ri k'o chila' xuya jun q'ab' chupalaj ri Jesús, te k'u ri' xub'ij che: ¿A je' u ch'ab'exik wa' ri ki nimal sacerdotes kab'ano? —xcha che.

²³ Ri Jesús xch'awik, xub'ij che: We k'o jun tzij xinb'ij ri man utz taj, b'ij la chwe jachike ri tzij ri man utz taj. We k'u utz ri xinb'ij, ¿jas che kinch'ay la? —xcha che.

²⁴ Yutum k'u ri Jesús, xpe ri tat Anás, xutaq b'i ruk' ri tat Caifás, ri ki nimal ri sacerdotes.

Ri tat Pedro kub'ij jumul chik chi man retam tä u wäch ri Jesús

²⁵ Are k'u ri tat Pedro tak'alik tajin kumiq' na rib' chrij ri q'aq'. Xkita' k'u che, xkib'ij: ¿A mat at jun chke ru tijoxelab' we achi ri? —xcha che.

Ri tat Pedro k'ut xresaj rib' chupam, xub'ij: ¡No, man in jun tä chke! —xcha chke.

²⁶ Te ri' xta' che rumal jun chke ri patänil taq re ri ki nimal sacerdotes, ri alaxik ruk' ri achi ri xq'at apan u xikin rumal ri tat Pedro, xub'ij che: ¿A mat xinwilo chi at k'o ruk' ri Are' pa ri ch'äqap ulew ri e tiktal wi ri che? —xcha che.

²⁷ Ri tat Pedro xresaj chi jumul rib' chupam, tzare chi' k'ut xoq' ri ama' äk'.

Ri Jesús k'o chuwäch ri tat Pilato

²⁸ Te k'u ri' xkik'am b'i ri Jesús cho rachoch ri tat Caifás, xeb'e' cho ri nimalaj ja re ri nim q'atal tzij. Xaq jub'iq' chik kraj man kásaqirik, ri winaq aj Israel k'ut man

xeb'ok tä pa ri nimalaj ja rech man kaka'n tä ri äwas u b'anik. We je ri' man kuya' tä ri' käkitij ri wi'm rech ri Pascua. ²⁹ Rumal ri' ri tat Pilato xel loq che ki tzijob'exik, xub'ij chke: ¿Jas u mak we achi ri' ri kib'ij ix? — xcha chke.

³⁰ Ri e are' xech'awik, xkib'ij: We ta mat are jun b'anal etzelal mat xqajach wa' pa q'ab' la, — xcha che.

³¹ Xub'ij k'u ri tat Pilato chke: Chik'ama b'i ix, chiq'ata tzij puwi'. Chib'ana' jas ri kub'ij ri i pixab' ix, — xcha chke.

Ri winaq aj Israel xech'awik, xkib'ij: Ri uj, ri uj aj Israel, man ya'tal tä chqe chi kākāmisaj jun winaq, — xcha che.

³² Je ri' xb'antajik jas ru b'im kan ri Jesús chrij ri káb'an na che chukāmisaxik. ³³ Ri tat Pilato xok chi b'i jumal pa ri nimalaj ja, xusik'ij ri Jesús, te k'u ri' xuta' che: ¿A at ri' ri kattaqan pa ki wi' ri winaq aj Israel? — xcha che.

³⁴ Ri Jesús xub'ij che: ¿A xaq lal káb'in la wa' o nik'iaj chik xeb'in che la chwij in? — xcha che.

³⁵ Ri tat Pilato xch'awik, xub'ij: ¿A in pu lo jun aj Israel? Ri awinaqil at, xuquje' ri ki nimaqil ri sacerdotes e are taq' wa' ri xatjachow pa nu q'ab'. ¿Jas k'u ri a b'anom? — xcha che.

³⁶ Te ri' xch'aw ri Jesús, xub'ij che: Ri nu taqanik man rech tä we uwächulew ri'. We ta rech ruwächulew, ri nu tijoxelab' xech'ojin ta ri' rech mat xinjach pa ki q'ab' ri winaq aj Israel. Ri nu taqanik k'ut man ajwaral taj, — xcha che.

³⁷ Xub'ij k'u ri tat Pilato che: Je ri' chi ri at, ¿a at nim taqanel? — xcha che.

Ri Jesús xch'awik, xub'ij: In nim taqanel, jas ri káb'ij la, — xcha che. Ri in xil nu wäch waral cho ruwächulew chub'ixik jas ri' ri gas tzij. Konojel k'u ri keniman che ri gas tzij kākītab'ej ri kinb'ij, — xcha che.

³⁸ Ri tat Pilato xub'ij che: ¿Jas k'u ri' ri gas tzij? — xcha che.

Kāq'at tzij puwi' ri Jesús chi kākāmisax na

Xuwi xta'taj wa' che ri Jesús rumal ri tat Pilato, ri are' xel chi loq jumal che ki tzi-job'exik ri winaq aj Israel, xub'ij chke: Ri in, man k'o tä jun mak kinriq chrij we achi ri', — kacha chke. ³⁹ Ri ix k'ut ix naq'atalik chi kinb'an toq'ob' chiwe, kintzoqopij b'i jun ajpache' pa ri nimaq'ij re ri Pascua. ¿A kiwaj chi kintzoqopij b'i ri tata' ri' ri k'o u taqanik pi wi' ix, ix winaq aj Israel? — xcha chke.

⁴⁰ Te ri' konojel ko xech'awik, xkib'ij: ¡Mätzoqopij la b'i ri are'! ¡Are tzoqopij la b'i ri Barrabás! — xcha'.

Are' k'u jun elaq'om wa' ri Barrabás.

19

¹ Te ri' ri tat Pilato xuk'am b'i ri Jesús, xtaqan k'u chuch'ayik. ² Ri soldados xkikoj jun corona re kemom k'ix chujolom ri Jesús, xkikoj k'u jun atz'iaq morada chrij. ³ Te k'u ri' xegeb' ruk', xkib'ij k'ut: Lal ri' ri kátaqan la pa ki wi' ri winaq aj Israel, ¡chnimarisax q'ij la! — xcha che.

Xkich'ay k'u chupalaj.

⁴ Ri tat Pilato xel loq jumal chik, xub'ij k'u chke ri winaq: Chiwilampe', kinwesaj loq we achi ri' chiwäch rech kiwetamaj chi man k'o tä jub'iq' mak kinriq in chrij, — xcha chke.

⁵ Xel k'u loq ri Jesús, kojom k'u ri corona re kemom k'ix chujolom, kojom xuquje' ri atz'iaq morada chrij. Te k'u ri' xub'ij ri tat Pilato chke: ¡Waral k'o wi ri achi! — xcha chke.

⁶ Aretaq ri ki nimaqil sacerdotes, xuquje' ri chajinelab' re ri nimalaj rachoch Dios xkilo, ko xech'awik, xkib'ij: ¡Chripoq! ¡Chripoq! — xcha'.

Ri tat Pilato xub'ij chke: ¡Chik'ama b'i ix, chiripa'! Ri in man k'o tä jub'iq' mak kinriq in chrij, — xcha chke.

⁷ Ri winaq aj Israel xech'awik, xkib'ij: Ri uj k'o jun qa pixab', ri qa pixab' k'ut kub'ij chi rajwaxik kākāmisaxik rumal chi xub'an che rib' chi are u K'ojol ri Dios, — xcha'.

⁸ Ri tat Pilato, aretaq xuta wa' ri xkib'ij, sib'alaj xuxej na rib'. ⁹ Xok chi b'i jumal pa ri nimalaj ja, xuta' che ri Jesús: ¿Jawije' ri katpe wi? — xcha che.

Are k'u ri Jesús man xch'aw taj, man k'o tä k'u jas xub'ij che.

¹⁰ Xub'ij k'u ri tat Pilato che: ¿Jas che man kinach'ab'ej taj? ¿A mat awetam chi k'o taqanik pa nu q'ab' che a ripik cho ri cruz o che a tzoqopixik b'ik? — xcha che.

¹¹ Ri Jesús xch'awik, xub'ij che: Man k'o tä jub'iq' taqanik la pa nu wi' we ta mat yo'm che la rumal ri Dios. Rumal ri', jachin ri xinjachow pa q'ab' la nim na u mak ri' chuwach la, — xcha che.

¹² Tzare chi' k'ut ri tat Pilato xutzukuj jas xub'ano rech kutzoqopij b'i ri Jesús. Are k'u ri winaq aj Israel ko xech'awik, xkib'ij: ¡We kätzoqopij la b'ik, man utz tä anima' la ri' ruk' ri nimalaj taqanel! ¡Jachin ri kub'an che rib' chi are nim taqanel, u k'ulel ri' ri nimalaj taqanel! — xcha che.

¹³ Ri tat Pilato aretaq xuta ri xkib'ij, xtaqan che resaxik loq ri Jesús. Ri are' k'ut xt'uyi cho ri q'atb'al tzij pa ri k'olib'al ri káb'ix "Gabata" che pa hebreo, ri kel kub'ij "Lajom Ab'aj". ¹⁴ Xa k'u chuweq chik ri nimaq'ij Pascua. Kraj are ri nik'iaj q'ij. Ri tat Pilato k'ut xub'ij chke ri winaq aj Israel: ¡Waral k'o wi ri tata' ri k'o u taqanik pi wi'! — xcha chke.

¹⁵ Ri e are' k'ut ko xech'awik, xkib'ij: ¡Chkāmisaño! ¡Chkāmisaño! ¡Chripoq! — xecha'.

Ri tat Pilato xub'ij chke: ¿A kinrip ta k'u cho ri cruz ri tata' ri k'o u taqanik pi wi? — xcha chke.

Are k'u ri ki nimaqil ri sacerdotes xech'awik, xkib'ij che: Ri uj man k'o tā chi jun achi chik ri kátaqan pa qa wi', xane xaq xuwi ri nimalaj taqanel, — xecha'.

¹⁶ Ri tat Pilato xuwi xuta wa', xujach b'i ri Jesús pa ki q'ab' rech kákirip cho ri cruz. Xkik'am k'u b'ik.

Kárip ri Jesús cho ri cruz chukāmisañik

¹⁷ Xel k'u b'i ri Jesús, xuk'am b'i ru cruz, xe' pa ri juyub' ri káb'ix U B'aqil Jolomaj che. (Pa ri ch'ab'al hebreo are káb'ix Gólgota che.) ¹⁸ Chila' xkirip wi cho ri cruz junam kuk' kieb' achijab' chik, jujun pa taq u xkut. Ri Jesús xkanaj pa ki nik'iajal. ¹⁹ Ri tat Pilato xtaqan chukojik jun tz'ib'talik puwi' ri cruz ri kub'ij: JESÚS AJ NAZARET RI NIM TAQANEL PA KI WI' RI WINAQ AJ ISRAEL. ²⁰ E k'ia chke ri winaq aj Israel xkisik'ij u wäch ri tz'ib'talik ri' rumal chi ri juyub' ri xrip wi ri Jesús naqaj k'o wi che ri tinimit Jerusalén. Ri tz'ib'talik, tz'ib'tal wa' pa ri hebreo, griego, xuquje' pa ri latín. ²¹ Rumal ri' ri ki nimaqil sacerdotes kech ri winaq aj Israel xkib'ij che ri tat Pilato: Mätz'ib'aj la: "Ri Nim Taqanel kech ri winaq aj Israel." Xane tz'ib'aj la: "Ri kub'ij che rib' chi are Nim Taqanel kech ri winaq aj Israel," — xecha che.

²² Are k'u ri tat Pilato xch'awik, xub'ij chke: Ri xintz'ib'aj, xaq je wa' kákanajik, — xcha chke.

²³ Te ri', aretaq xeto'taj ri soldados churipik ri Jesús cho ri cruz, xkik'am ri ratz'iaq, xka'n k'u kiejeb' che, jujun ke ri jujun soldados. Xuquje' xkik'am ri kamixa'. Man t'isom tā k'u wa', xane xa jun u b'anom, kemom petinaq ajsik k'a ikim. ²⁴ Ri soldados xkib'ij chb'il taq kib': Man káqaraq'atij taj. Chqesaj suerte chrij rech káqilo jachin kách'akowik, — xecha'.

Je ri' xb'antajik jas ri tz'ib'tal pa ru Loq' Pixab' ri Dios ri kub'ij: "Xkijach ri watz'iaq chkiwäch, xkesaj suerte chrij," — kácha'. Are wa' ri xka'n ri soldados.

²⁵ Chunaqaj ri cruz ri ripom wi ri Jesús k'o ru nan, k'o ru chaq' ru nan, k'o ri nan María ri rixoqil ri tat Cleofas, xuquje' k'o ri nan María ri aj Magdala. ²⁶ Aretaq ri Jesús xril ru nan xuquje' ri tijoxel ri sib'alaj loq' chuwach tak'al chuxkut, xub'ij che ru nan: Nan, chab'ana awal che we achi ri', — xcha che.

²⁷ Te k'u ri' xub'ij che ru tijoxel: Chab'ana a nan che ri nu nan, — xcha che.

Tzare chi' k'ut ri tijoxel ri' xuk'am b'i ru nan ri Jesús cho rachoch.

Käkäm ri Jesús

²⁸ Te k'u ri' rumal chi ri Jesús retam chi ronojel ri tz'ib'tal chrij b'antajinaq chik, xuquje' rech qas káb'antajik jas ri kub'ij ru Loq' Pixab' ri Dios, xub'ij: Káchaq'ij nu chi', — xcha'.

²⁹ K'o k'u apan jun laq nojinaq che ch'am vino. Xkirub' k'u jun estropajo chupam ri vino ri', xkiya puwi' jun aj, te k'u ri' xkiya aq'an chuchi' ri Jesús. ³⁰ Ri Jesús xutij ri ch'am vino, te k'u ri' xub'ij: Ronojel xb'antajik, — xcha'.

Xupachb'a k'u ru jolom, xel ranima'.

Jun chke ri soldados kujaq ru k'alk'ax ri Jesús ruk' ru lanza

³¹ Xa k'u chuweq chik ri nimaq'ij Pascua. Man kákaq tā k'u ri winaq aj Israel chi ri ki cuerpo ri winaq kekanaj kan cho taq ri cruz pa ri q'ij re uxlanem. Ri q'ij re uxlanem ri' are jun q'ij wa' nim u b'anik. Rumal ri' xkita' che ri tat Pilato chi kátaqan chuq'ajisaxik ri kaqan ri e ripil cho taq ri cruz, xuquje' chi káqasax ri ki cuerpo cho ri cruz. ³² Te ri' xeb'e' ri soldados, xkiq'ajisaj ri raqan ri nab'e xuquje' ri jun chik ri e ripom ruk' ri Jesús. ³³ Aretaq k'ut xegeq' ruk' ri Jesús, xkilo chi káminaq chik, xa je ri' man xkiq'ajisaj tā ri raqan ri Are'.

³⁴ Pune je ri' jun chke ri soldados xujaq ru k'alk'ax ri Jesús ruk' jun lanza, chanim k'ut xel loq' kik' xuquje' joron. ³⁵ Ri káb'in wa' we tzij ri', are jun ri qas xrillo, qas tzij k'u ri kub'ij. Ri are' kub'ij ri qas tzij ri retam rech ri ix xuquje' kixkojonik. ³⁶ Je k'u xk'ulmataj wa' rech káb'antajik jas ri tz'ib'tal pa ru Loq' Pixab' ri Dios ri kub'ij: "Man k'o tā jun b'aq xkiq'ajisaj che," — kácha'. ³⁷ Kub'ij xuquje' ru Loq' Pixab' ri Dios pa jun u xaq chik: "Kákil na ri xkisoko," — kácha'.

Kámuq ru cuerpo ri Jesús

³⁸ Te k'u ri' xpe ri tat José ri kel pa ri tinimit Arimatea, xuta' che ri tat Pilato chi káyi' che chi kuqasaj ru cuerpo ri Jesús. Ri tat José are jun u tijoxel ri Jesús, xa k'u chi k'uyal rumal chi kuxej rib' chkiwäch ri winaq aj Israel. Xyi' k'u che rumal ri tat Pilato. Xa je ri' xe' ri tat José, xuqasaj ru cuerpo ri Jesús, xuk'am k'u b'i pa muqik. ³⁹ Xpe xuquje' ri tat Nicodemo ri nab'e kanoq xopan ruk' ri Jesús chaq'ab' chutzijob'exik. Ri are' ruk'am jun kunab'al, are mirra ri yujtal ruk' áloes, ri kápajan cien libras. ⁴⁰ Je ri' ri tat José rach'il ri tat Nicodemo xkik'am b'i ru cuerpo ri Jesús, xkipsis k'u pa taq manta re lino ri yo'm ri k'ok'alaj taq kunab'al chrij. Je' xka'n che jas ri e naq'atal wi ri winaq aj Israel che ki muqik ri káminaqib'. ⁴¹ Pa ri juyub' ri xrip wi ri Jesús cho ri cruz, k'o jun ch'áqap

ulew ri e tiktal wi ri che'. Pa ri ulew ri' k'o jun k'ak' muqub'al ri mäja' yo'm jun käminaq chupam. ⁴² Chupam k'ut xkiya wi ru cuerpo ri Jesús, rumal chi ri muqub'al ri' naqaj k'o wi, xuquje' rumal chi xa jub'iq' kraj man kächaptaj ri q'ij re uxlanem chke ri winaq aj Israel.

20

Käk'astaj ri Jesús chkixol ri käminaqib'

¹ Pa ri nab'e q'ij re ri semana, sib'alaj aq'ab', q'equm na, ri nan María ri aj Magdala xe' chuchi' ri muqub'al. Xril k'ut chi esam chi apan ri ab'aj ri tz'apib'em u chi' ri muqub'al. ² Xa je ri' xutik anim, xe'k, xuriga ri tat Simón Pedro, xuquje' ri jun tijoxel chik ri sib'alaj loq' chuwäch ri Jesús, xub'ij chke: Ri Qajaw Jesús xesax b'i pa ri muqub'al, xk'am b'ik, man qetam tä k'ut jawije' ri xyi' wi, —xcha chke.

³ Te ri' ri tat Pedro rachi'l ri jun tijoxel chik xeb'el b'ik, xeb'e' chuchi' ri muqub'al. ⁴ Ri kieb' xk'itit anim, junam e b'enaq. Are k'u ri jun chik sib'alaj xutik na anim chuwäch ri tat Pedro. Ri are' xopan nab'e chi' ri muqub'al. ⁵ Man xok tä k'u pa ri muqub'al, xane xaq xuwi xpachi koq che rilik. Te' xrilo chi e k'o kan ri manta chila'. ⁶ Te k'u ri' xopan chi ri tat Simón Pedro, ri teren loq chrij. Ri are' k'ut xok b'i pa ri muqub'al. Xuquje' xeril ri manta ri e k'o kan chila'. ⁷ Xuquje' xrilo chi ri manta ri xpispex u jolom ri Jesús man junam taj k'o kuk' ri nik'iaj manta chik, xane b'otom wa', yo'm k'u apan jela'. ⁸ Te k'u ri' xok chi b'i ri jun tijoxel chik ri xopan nab'e chuchi' ri muqub'al. Xrilo ri b'antajinaq, xkojon k'u ri ri are'. ⁹ Mäja' k'u käkich'ob'o jas ri kub'ij ru Loq' Pixab' ri Dios ri Tz'ib'talik chi are rajwaxik chi ri Jesús käk'astaj na chkixol ri käminaqib'. ¹⁰ Te ri' xetzelej we kieb' tijoxelab' ri' cho kachoch.

Ri Jesús kuk'ut rib' cho ri nan María ri aj Magdala

¹¹ Are k'u ri nan María xkanaj kan chuchi' ri muqub'al, tajin koq'ik. K'ä tajin koq'ik aretaq xpachi'k rech käka'y koq chupam ri muqub'al. ¹² Te' xrilo chi e k'o kieb' ángeles, ri e t'uuyut'oj jawije' ri xyi' wi ru cuerpo ri Jesús, saqlolaj k'u ri katz'iaq. Ri jun t'uuyul pu jolom, ri jun chi k'ut t'uuyul pa raqan. ¹³ Ri ángeles xkita' che ri nan María, xkib'ij: Nan, ¿jas che tajin koq' la? —xecha che.

Ri nan María xub'ij chke: Rumal chi xkik'am b'i ri Wajaw Jesús, man wetam tä k'ut jawije' ri xyi' wi, —xcha chke.

¹⁴ Te' xb'itaj wa' rumal, aretaq xka'y chrij, xrilo chi k'o ri Jesús chila'. Man xuch'ob' tä k'ut chi are ri Jesús.

¹⁵ Xpe k'u ri Jesús, xuta' che, xub'ij: Nan, ¿jas che tajin katoq'ik? ¿Jachin k'u ri tajin katzukuj? —xcha che.

Ri nan María xuchomaj chi are ri chajinel re ri ulew ri', xub'ij che: Tat, we lal xk'amow la b'ik, b'ij la chwe jawije' ri xya wi la rech ri in kink'am b'ik, —xcha che.

¹⁶ Te ri' xub'ij ri Jesús che: ¡María! —xcha che.

Ri are' xka'y chrij, te k'u ri' xub'ij che pa hebreo: ¡Raboni! —xcha che. Ri tzij ri' kel kub'ij "Ajtiij".

¹⁷ Ri Jesús xub'ij che: Minachapo rumal chi k'ä mäja' kinpaqi chila' jawije' ri k'o wi ri nu Tat, —xcha'. Jat b'a', jab'ij k'u chke ri wachalal chi kinpaqi chila' jawije' k'o wi ri nu Tat, ri xuquje' ri i Tat ix, ri nu Dios k'ut, ri xuquje' are ri i Dios ix, —xcha che.

¹⁸ Te ri' xe' ri nan María ri aj Magdala, xub'ij k'u chke ri tijoxelab' chi ri are' xril u wäch ri Qajaw Jesús, xuquje' chi ri Jesús xub'ij wa' we tzij ri' che.

Ri Jesús kuk'ut rib' chkiwäch ru tijoxelab'

¹⁹ Qas pa ri q'ij ri', ri nab'e q'ij re ri semana, chaq'ab' chik ki mulim kib' ri tijoxelab'. Ki tz'apim k'u ri u chi' taq ja rumal chi xkixej kib' chkiwäch ri winaq aj Israel. Xok b'i ri Jesús, xtak'i k'u chkixol. Xuya rutzil ki wäch, xub'ij chke: Chuxlan b'a' ri iwanima', —xcha chke.

²⁰ Aretaq xb'itaj wa' we tzij ri' rumal, xuk'ut ru q'ab' chkiwäch xuquje' ru k'alk'ax. Ri tijoxelab' xekikotik aretaq xkil u wäch ri Qajaw Jesús. ²¹ Te k'u ri' ri Jesús xub'ij chi jumul chke: Chuxlan b'a' ri iwanima', —xcha'. Je' jas ri nu Tat xinutaq loq in, je ri' ri in xuquje' kixintaq b'i ix, —xcha chke.

²² Te k'u ri' xuya ri ruxlab' pa ki wi', xub'ij: Chik'ama ri Loq'alaj Espíritu, —xcha chke.

²³ Jachin taq ri kisach ri ki mak, käsachtaj na ri ki mak. Jachin taq ri man kisach tä ri ki mak, man käsachtaj tä na ri ki mak, —xcha chke.

Ri tat Tomás käril ri Qajaw Jesús k'astajinaq chi chkixol ri käminaqib'

²⁴ Ri tat Tomás, jun chke ri kab'lajuj u tijoxelab' ri Jesús ri käb'ix Gemelo che, man k'o tä ri are' aretaq xopan ri Jesús. ²⁵ Te k'u ri' ri nik'iaj tijoxelab' chik xkib'ij che ri tat Tomás: Xqil u wäch ri Qajaw Jesús, —xecha che.

Are k'u ri tat Tomás xub'ij chke: We man kinwil ri soktajinaq ri xub'an ri klawux pu q'ab', te k'u ri' kinnim ru wi' nu q'ab' pa taq ri jul, xuquje' kinnim ri nu q'ab' pa ru k'alk'ax, man kinkoj taj, —xcha chke.

²⁶ Ok'owinaq chi wajxaqib' q'ij. Ri tijoxelab' ki mulim kib' jumul chik pa jun ja, k'o chi k'u ri tat Tomás kuk' ri e are'. Te ri', pune e tz'apil ru chi' taq ja, ri Jesús xok b'ik, xtak'i

k'u chkixol. Xuya rutzil ki wäch, xub'ij: Chuxlan b'a' ri iwanima', —xcha chke.

²⁷ Te k'u ri' xub'ij che ri tat Tomás: Chaw-ilampe ri nu q'ab', chanima k'u b'i ru wi' a q'ab' waral. Chayuqu ra q'ab', chanima k'u b'i pa ri nu k'alk'ax. Mub'an chi kieb' a k'ux, xane chatkojon chwe, —xcha che.

²⁸ Te ri' xch'aw ri tat Tomás, xub'ij che: ¡Wajaw, nu Dios! —xcha che.

²⁹ Ri Jesús xub'ij che: Tomás, ri at kämik xatkojon chwe rumal chi xawil nu wäch. Utz k'u ke ri kekojon chwe pune man käkil nu wäch, —xcha che.

Waral käqil wi ru patän we wuj ri' xtz'ib'axik

³⁰ K'ia k'u kajmab'al taq etal xub'an na ri Jesús chkiwäch ru tijoxelab' ri man xetz'ib'ax tä pa we wuj ri'. ³¹ Xetz'ib'ax k'u wa' ri k'o waral rech ri ix kikojo chi ri Jesús are ri Cristo, ru K'ojol ri Dios, rech aretaq kixkojon che ri Are', kiriq na ri k'aslemal ri man k'o tä u k'isik, —xcha chke.

21

Ri Jesús kuk'ut rib' chkiwäch wuqub' chke ru tijoxelab'

¹ Te k'u ri' ri Jesús xuk'ut rib' jumul chik chkiwäch ru tijoxelab' chi' ri mar re Tiberias.* Je wa' xub'an chuk'utik rib': ² Konojel wa' junam e k'olik. Ri tat Simón Pedro, ri tat Tomás ri käb'ix Gemelo che, ri tat Natanael ri aj Caná re Galilea, ri kieb' u k'ojol ri tat Zebedeo, xuquje' kieb' chik chke ru tijoxelab' ri Jesús. ³ Ri tat Simón Pedro xub'ij chke: Kine' chuchapik kär, —xcha chke.

Ri e are' xkib'ij che: Ri uj xuquje' kuje' awuk', —xecha che.

Xeb'e' k'ut, xeb'ok pa jun barco, man k'o tä k'u kär xkichap pa ronojel ri jun aq'ab' ri'. ⁴ Aretaq tajin käpe ru saqirik, ri Jesús xuk'ut rib' chkiwäch chi' ri mar, are k'u ru tijoxelab' man xkich'ob' taj chi are ri Are'. ⁵ Te ri' xub'ij chke: ¡Ix achijab'! ¿A mat k'o ri i chapom? —xcha chke.

Ri e are' xech'awik, xkib'ij: Man k'o taj, —xecha'.

⁶ Te ri' xub'ij ri Jesús chke: Chik'iaqa ri k'at pa ru wikiäq'ab' ri barco, k'o k'u na ri kichapo, —xcha ri' chke.

Je' k'u xka'no. Te ri' man xekowin tä chi k'u che resaxik loq ri k'at chapäb'al kär pa ri ja' rumal chi sib'alaj xnoj ri k'at che taq kär. ⁷ Te ri' ri tijoxel ri sib'alaj loq' chuwäch ri Jesús xub'ij che ri tat Pedro: ¡Are ri Qajaw Jesús! —xcha che.

Xuwi xuta wa' ri tat Simón Pedro chi are ri Qajaw Jesús, xukoj ri ratz'iaq rumal chi resam wa'. Xuk'iaq k'u b'i rib' pa ri ja'. ⁸ Ri

nik'iaj tijoxelab' chik xeopan chi' ri ulew chupam ri barco, ki jururem ri k'at nojinaq che taq kär. Xa k'u cien metros xek'oji wi che ru chi' ri ulew. ⁹ Aretaq xeb'el pa ri barco, te' xkilo k'o jun q'aq' nuk'um, k'o k'u jun kär pa ri rachaq q'aq', xuquje' e k'o jujun kaxlan wa. ¹⁰ Ri Jesús xub'ij chke: Cheik'ama loq jujun chke ri kär ri k'a' te' xechaptaj iwumal, —xcha chke.

¹¹ Xpaqi k'u ri tat Simón Pedro pa ri barco, xresaj k'u loq ri jun k'at chapäb'al kär nojinaq che taq kär. Xujuurej k'u loq wa' chi' ri ulew. ¡Nojinaq k'u ri k'at! E k'o jun ciento ruk' kawinaq oxlajuj nimaq taq kär chupam. Pune sib'alaj e k'ia ri kär, ri k'at man xt'oqopin taj. ¹² Te ri' xub'ij ri Jesús chke: Chixsa'j, chixwoq b'a', —xcha chke.

Man k'o tä k'u jun chke ru tijoxelab' xuchajij anima' xuta' che jachin ri Are' rumal chi konojel ketam chi are ri Qajaw Jesús. ¹³ Te k'u ri' ri Jesús xqeb' kuk', xuk'am k'u ri kaxlan wa, xuya chke. Je' xuquje' xub'an ruk' ri kär.

¹⁴ Are urox mul wa' ri xuk'ut rib' ri Jesús chkiwäch ru tijoxelab' aretaq ya k'astajinaq chik chkixol ri käminaqib'.

Ri Jesús kätzizon ruk' ri tat Simón Pedro

¹⁵ Aretaq xtijtaj ri ki wa re aq'ab'il, ri Jesús xuta' che ri tat Simón Pedro, xub'ij che: Simón, u k'ojol ri tat Jonás, ¿a qas loq' na kinawil in chkiwäch konojel taq wa'? —xcha che.

Ri tat Pedro xch'awik, xub'ij: Je', je ri', Wajaw. Etam ya' la chi kwaj la, —xcha che.

Ri Jesús xub'ij che: Cheayuq'uj b'a' ri alaj taq nu chij, —xcha che.

¹⁶ Chukumul chik xuta' che: Simón, u k'ojol ri tat Jonás, ¿a qas loq' na kinawilo? —xcha che.

Ri tat Pedro xch'awik, xub'ij che: Je', Wajaw. Etam ya' la chi kwaj la, —xcha che.

Ri Jesús xub'ij che: Cheayuq'uj b'a' ri nu chij, —xcha che.

¹⁷ Churox mul chik xuta' che: Simón, u k'ojol ri tat Jonás, ¿a qas kinawaj? —xcha che.

Ri tat Pedro xb'isonik rumal chi xuta' che churox mul we qas loq' chuwäch, xub'ij k'u che: Wajaw, etam la ronojel. Etam ya' la chi qas kwaj la, —xcha che.

Ri Jesús xub'ij che: Cheayuq'uj b'a' ri nu chij, —xcha che. ¹⁸ Qas tzij kinb'ij chawe, chi aretaq at ala na, ri at xakoj ri awatz'iaq, xate'k jawije' ri xawaj xate' wi. Aretaq k'ut katrijow'ik, kayuq na ri a q'ab', jun chi k'ut käkajow na ri awatz'iaq chawij, katuk'am k'u na b'i chila' jawije' ri man kawaj tä wi, —xcha che.

¹⁹ Ri Jesús xub'ij wa' we tzij ri' chub'ixik che jas u wäch kämikal ri kuriq na ri tat

* 21:1 Xuquje' käb'ix "mar re Galilea" che we mar ri'.

Pedro, kunimarisaj k'u na u q'ij ri Dios. Te k'u ri' xub'ij che: ¡Tasa'j wuk'! —xcha che.

Waral k̄āqil wi ri tijoxel ri sib'alaj loq' kil wi rumal ri Jesús

²⁰ Aretaq xka'y ri tat Pedro chrij, xrilo chi teren ri tijoxel chkij ri sib'alaj loq' chuwäch ri Jesús, ri xt'uyi chuxkut ri Jesús chi' ri mesa aretaq xka'n ri k'isb'al wi'm re b'enaq q'ij, ri xuta' che ri Jesús, xub'ij: “Wajaw, ¿jachin ri' ri k̄ajachow na la?” —xcha ri'. ²¹ Aretaq ri tat Pedro xrilo, xub'ij che ri Jesús: Qajaw, wa' we jun ri', ¿jas ri kuk'ulmaj na ri are'? —xcha che.

²² Ri Jesús xch'awik, xub'ij che: We ri in kwaj chi k̄āk'asi na ri are' k'ä kintzelej na loq, ¿jas awe at che? Ri at tasa'j wuk', —xcha che.

²³ Xel k'u u tzijol wa' chkixol ri qachalal chi ri tijoxel ri' man k̄äkām taj. Man xub'ij tä k'u ri Jesús che chi man k̄äkām taj, xane xub'ij: “We kwaj chi k̄āk'asi na ri are' k'ä kintzelej na loq, ¿jas awe at che?” —xcha ri Jesús che ri tat Pedro.

²⁴ Are k'u wa' ri tijoxel ri xuq'alajisaj chi qas tzij wa' ri xutz'ib'aj kanoq. Qetam k'ut chi kub'ij ri qas tzij.

²⁵ Sib'alaj k'ia chi k'u na ri xub'an ri Jesús. We ta ketz'ib'ax wa' chkijujunal, kinchomaj chi man kub'ana tä ronojel ruwächulew che k'olib'al ke ri wuj ri ketz'ib'ax na. Amén.

RI WUJ RI KÄTZIJOX WI RI KI B'ANOM RI APÓSTOLES

Ri Jesús kub'ij chi käkeyej na ru petb'al ri Loq'alaj Espiritu

¹ Loq'alaj tat Teófilo: Pa ri nab'e nu wuj* ri xintz'ib'aj che la, xintzizon chrij ronojel ri xub'an ri Jesús, xuquje' chrij ronojel ri xuk'ut kanoq chkiwäch ri winaq aretaq xuchaplej u patänixik ri Dios waral chqaxol. ² Pa ri nab'e nu wuj xintzizon chrij nimalaj ronojel ri xub'an ri Are' k'ä xk'am na b'i chikaj. Aretaq mäja' ke' chikaj, xuya taqanik, xeuPIXb'aj kan ri apóstoles† ri xeucha'. Rumal ri Loq'alaj Espiritu ri k'o ruk', xub'ij kan chke jas ri rajwaxik kaka'no. ³ Xuriq k'äx ri Jesús, xkämisaxik, te k'u ri' xuk'ut rib' chkiwäch ri apóstoles chwinagil rech q'alaj chi k'astajinaq chik chxixol ri käminagib'. K'ia ri xub'an chkiwäch rech käkikojo chi qas tzij k'asal chik ri Are'. Kawinaq q'ij ri' xuk'ut na rib' chkiwäch amaq'el. Xuquje' xtzizon kuk' chrij ri kub'an na ri Dios aretaq kätapan na ki wi' ri winaq.

⁴ Aretaq ri Jesús k'ä k'o kuk' ri apóstoles, xub'ij chke chi mebel b'ik pa ri tinimit Jerusalén chanim, xane chi keye'nik. Je wa' xub'ij: Chiweyey na chi käyataj chiwe ri b'im loq rumal ri nu Tat, jas ri xinb'ij chiwe, — xcha chke. ⁵ Qas tzij, ri tat Juan xub'an ki qasna' ri winaq ruk' ja', are k'u ri ix xa pa kieb' oxib' q'ij káb'an na i qasna' ruk' ri Loq'alaj Espiritu, — xcha chke.

Käpaqi ri Jesús chikaj chkiwäch ri apóstoles

⁶ Are k'u ri apóstoles ki mulim kib' ruk' ri Jesús, xkita' k'u che ri Are', xkib'ij: Qajaw, za mat xopan ri q'ij ri käya la chke ri qa winagil chi ketaqan chi na jumul puwi' ri qa tinimit Israel rech man käkitaqej tä taqanik ri nik'iaj winaq chik pa qa wi'? — xcha che.

⁷ Xch'aw k'u ri Jesús, xub'ij chke: Ri q'ij, ri ajilab'al, man ya'tal tä chiwe ix chi kiwetamaj, xane xaq xuwi pu q'ab' ri qa Tat k'o wi ronojel wa'. ⁸ Aretaq k'ut käpe ri Loq'alaj Espiritu pi wi', käk'oji na i chuq'ab'. Te k'u ri' kixe'k, kitzijoj na jas ri i wilom chi xinb'an che ki to'ik ri winaq, jas ri xink'ulmaj aretaq xinkämisaxik, xuquje' aretaq xink'astaj chxixol ri käminagib'. Ronojel wa' kitzijoj na pa Jerusalén, pa taq konojel ri tinimit re Judea, re Samaria, xuquje' k'ä pa taq ri ki tinimit ri winaq ri sib'alaj naj e k'o wi cho ruwächulew, — xcha chke.

⁹ Aretaq ri Jesús xto'taj chub'ixik wa' we tzij ri' chke ri apóstoles, xyak b'i chikaj chkiwäch. Ri e are' tajin keka'y che aretaq xpaqi chikaj, xch'uqtaj k'u rumal jun sutz', man xekowin tä chik xkilo. ¹⁰ Ri e are' tajin keka'y chikaj che ri Jesús, xaq k'u te'talik xkik'ut kib' kieb' achijab' pa ki xkut ri sib'alaj saq ri katz'iaq.† ¹¹ We achijab' ri' xech'awik, xkib'ij chke ri apóstoles: Tata'ib', alaq ri' ri aj Galilea, zjas che xaq k'o alaq chi', tajin kaka'y alaq chikaj? — kecha chke. We Jesús ri' ri xyak b'i chxol alaq, xpaqi chikaj, käpe chi na ri Are' jumul chik. Je k'u wa' ru petik jas ri xub'ano, xe' chikaj, — xecha ri achijab' chke ri apóstoles.

Kächa' ri tat Matías chuk'exel ri apóstol Judas

¹² Te k'u ri' xeqaj loq ri apóstoles cho ri juyub' ri xek'oji wi, ri káb'ix Ujuyub'al Olivos che. Xetzelejik, xeb'e' pa ri tinimit Jerusalén. Naqaj k'o wi ri juyub' ri' che ri Jerusalén, man naj tä k'u ri káb'inib'axik, xuwi ri ya'talik chi káb'in jun pa ri q'ij re uxlanem (kraj are jun kilómetro wa'). ¹³ Aretaq xeopan pa ri tinimit, xepaqi pa ru kawij ja re ri ja ri e jeqel wi. Ri e k'olik e are' ri tat Pedro, ri tat Jacobo, ri tat Juan, ri tat Andrés, ri tat Felipe, ri tat Tomás, ri tat Bartolomé, ri tat Mateo, ri tat Jacobo u k'ojol ri tat Alfeo, ri tat Simón ri káb'ix "U Nimal Tinimit" che, rachi'l ri tat Judas, rachalal ri tat Jacobo. ¹⁴ Konojel wa' we apóstoles ri' junam ri ki chomanik xkimulij kib' amaq'el rech kaka'n orar junam kuk' jujun ixoqib' kojonelab', kachi'l ri nan María ru nan ri Jesús, xuquje' taq ri rachalal.

¹⁵ Pa taq ri q'ij ri' ki mulim kib' ri konojelab'. Kraj e are' jun ciento ruk' juwinaq ri' ri ki mulim kib'. Xwalij k'u ri tat Pedro, xtak'i chkiwäch ri qachalal che ki ch'ab'exik, xub'ij chke: ¹⁶ Qachalal, tzra-jwaxik wi chi káb'antajik jas ri kub'ij ru Loq' Pixab' ri Dios ri Tz'ib'talik, ri xub'ij loq ri Loq'alaj Espiritu chuchi' ri qa mam David ojer, — kächa'. Ri qa mam David xch'aw chrij ri Judas ri xk'amow ki b'e ri jumulij winaq ri xechapow ri Qajaw Jesús. ¹⁷ Ri Judas jun ri are' chqaxol nab'e, xyi' che chi kächakun junam kuk'. ¹⁸ Are k'u ri are' xulog' jun rulew ruk' ri puag, ri tojb'al re ri etzelal ri xub'ano. Ch'ikilik xqajik, xtaq pulew, xraq'atin ru pam, xel loq juntir ri rixko'l, — kächa'. ¹⁹ Xel k'u u tzijol wa' ri xuk'ulmaj ri Judas chxixol konojel ri winaq pa ri tinimit Jerusalén. Xa je ri' ri winaq xkikojo ri tzij Acéldama che ru b'i' ri ulew ri'. Ri tzij ri' pa

* 1:1 Ri "nab'e nu wuj" ri kub'ij waral are RI UTZALAJ TZIJ RE RI EVANGELIO RI XUTZ'IB'AJ RI SAN LUCAS (San Lucas 1:1-4). † 1:2 Ri tzij "apóstol" kel kub'ij "taqom". E kab'la'uj u taqo'n ri Jesús ri e cha'tal rumal. Jun "apóstol" rajwaxik ri' chi käkowin chuq'alajisaxik chi xk'astaj ri Jesús chxixol ri käminagib' (Hechos 1:21-26). ‡ 1:10 Ri "kieb' achijab'" ri', e are' ángeles wa' ri e taqom loq rumal ri Dios.

ri ki ch'ab'al ri winaq kel kub'ij Ulew re Kik'.
²⁰ Tz'ib'tal k'u pa ri wuj Salmos, kub'ij:

Chtoli' kan u pam ri rachoch, chwonob'ax
 kanog,

mat k'o chi na jun kāk'oji chupam, —kācha'.
 Xuquje' kub'ij:

Ri reql'e'n ri are', chyo'q che jun winaq chik,
 —kācha',

—xcha ri tat Pedro chke.

²¹ E k'o k'u achijab' chqaxol ri xujkachi'laj
 amaq'el aretaq xk'oji ri Qajaw Jesús guk'.

²² Tzaretaq ri xb'an u qasna' ri Jesús rumal
 ri tat Juan, k'ā aretaq xk'am b'i ri Are' chikaj
 chqaxol, e k'olinaq we achijab' ri' guk'.
 Tzrajwaxik k'ut chi jun chke ri e are' kok guk'
 chutzijoxik chi gas tzij xk'astaj b'i ri Qajaw
 Jesús chkixol ri kāmnaqib', —xcha ri tat Pedro
 chke.

²³ Xkichomaj k'u kij kieb' achijab': E are' ri
 tat José ri kāk'ix Barsabás che, ri xuquje' kāk'ix
 Justo che, rachi'l ri tat Matías. ²⁴ Xka'n orar,
 xkib'ij: Qajaw, etam la ri kanima' konojel ri
 winaq, k'utu b'a' la chqawäch jachin chke we
 kieb' achijab' ri' are cha'tal umal la, ²⁵ rech
 kok ri' che apóstol, kuk'am k'u ri egle'n ri xuya
 kan ri Judas aretaq xqaj pa mak, xe' k'u chila'
 jawije' ri ya'tal wi che, —xecha che ri Dios.

²⁶ Xkesaj k'u suerte che rilik jachin ri kākana-
 jik. Are k'u ri suerte xqaj chrij ri tat Matías.
 Xok k'u ri are' kuk' ri julajuj apóstoles.

2

*Ri Loq'alaj Espiritu kākaj pa ki wi' ri qachalal
 kojonelab'*

¹ Aretaq xuriq ri nimaq'ij ri kāk'ix Pentecostés*
 che, konojel ri kojonelab' junam ki wäch ki mulim
 kib' pa jun ja. ² Xaq te'talik xkita jun nimalaj
 jininem ri xpe chikaj, je' jas jun nimalaj kiäqiq'
 ri xjinin pa ronojel ri ja jawije' ri e t'uyul wi ri
 kojonelab'. ³ Te ri' k'o ri xkilo, je' ta ne jas jujun u
 xaq q'aq' ri xqaj pa ki jolom chkiujunal. ⁴ Je ri'
 ri Loq'alaj Espiritu xuchap kanima' konojel,
 xkichaplej ch'awem pa jule' taq ch'ab'al chik ri
 xeuya ri Loq'alaj Espiritu chke.

⁵ Pa taq ri q'ij ri' e jeqel pa ri tinimit Jerusa-
 len achijab' aj Israel ri keniman che ri Dios, ri e
 petinaq pa konojel taq ri tinimit cho ruwächulew.
⁶ Aretaq xkita wa' jas ri xkik'ulmaj ri
 kojonelab', xkimulij kib' k'ia winaq. Man xkiriq
 taj jas kāk'a'no rumal chi chkiujunal ri winaq
 xkito chi ri kojonelab' kech'aw pa ri jalajoj taq
 ki ch'ab'al ri e are'. ⁷ Xkixej k'u kib', sib'alaj
 xkikajmaj ri tajin kāk'anik. Xkitzijob'ela kib',
 xkib'ij: jChiwilampe'! ¿A mat aj Galilea konojel wa'

we winaq ri' ri tajin kech'awik? ⁸ ¿Jas lo u
 b'anik wa' chi kech'aw pa ri qa ch'ab'al uj ri
 qetamam loq tzpa ri qa ch'utinal? —kecha ri'.
⁹ K'ia u wäch ri tinimit ri uj petinaq wi.
 Chqaxol uj, ri uj k'o waral, e k'o winaq ri aj
 Partia, aj Media, aj Elam, aj Mesopotamia,
 aj Judea, aj Capadocia, aj Ponto, aj Asia.
¹⁰ Xuquje' e k'o guk' ri aj Frigia, aj Panfilia,
 aj Egipto. E k'o k'u nik'iaj chik ri ajchila' pa
 África, ri e petinaq jela' chrij ri tinimit Cirene.
 E k'o xuquje' winaq aj Roma chqaxol. Jujun
 chke ri e are' e gas aj Israel, ri gas winaq aj
 Israel ri ki nan ki tat. Jujun chik k'ut xa e
 okinaq kuk' ri aj Israel winaq, junam ri ki
 chomanik chrij ri Dios. ¹¹ Xuquje' e k'o winaq
 aj Creta, xuquje' aj Arabia, —kecha'. Qonojel
 k'ut keqato chi kākitzijoj tzpa ri qa ch'ab'al
 uj chqajujunal ri nimaq taq kajmab'al ri u
 b'anom ri Dios, —xecha'.

¹² Sib'alaj ki kajmab' kib' konojel ri winaq,
 man xkiriq tā k'u jas kāk'a'no. Xkitzijob'ela
 kib', xkitala chb'il taq kib', xkib'ij: ¿Jas lo u
 b'anik wa'? —xecha'.

¹³ E k'o jujun ri xa xkitze'j ki wäch ri ko-
 jonelab', xkib'ij k'ut: ¡Wa' we winaq ri' xa e
 q'ab'arelab'! —xecha ri'.

*Ri apóstol Pedro kutzijoj ru Loq' Pixab' ri
 Dios chke ri winaq*

¹⁴ Te k'u ri' ri tat Pedro, junam kuk' ri julajuj
 apóstoles chik, xwalijik, xtak'i chkiwäch ri
 winaq che ki ch'ab'exik. Ko xch'awik, xub'ij
 k'u chke konojel ri e k'olik: Tata'ib', alaq aj
 Judea, xuquje' onojel alaq ri jeqel alaq waral
 pa Jerusalén, tatab'ej na alaq ri kinb'ij,
 chetamaj alaq wa', —kācha chke. ¹⁵ Qonojel
 ri uj ri qa mulim qib' waral, man uj q'ab'arelab'
 taj jas ri kächomaj alaq. K'ā te ne u b'e-
 lej hora rech ri aq'ab'il chanim ri'. ¹⁶ Xane
 ri tajin kil alaq kāmik ri' are wa' ru b'im loq
 ri qa mam Joel ri q'alajisaj re ru Loq' Pixab'
 ri Dios. Are k'u wa' ri xub'ij: ¹⁷ Ri Dios kub'ij:
 Pa ri k'isb'al taq q'ij kintaq na b'i ri Loq'alaj
 Espiritu wech in pa ki wi' konojel winaq,
 —kācha'.

Ri i k'ojol xuquje' ri i mia'l kākik'alajisaj
 na ri tzij ri kinya chke.

Ri alab'om ri e k'o chixol k'o ri kākil na
 ri kink'ut chkiwäch, ri tata'ib' k'ut ri k'o
 chi ri ki junab' k'o ri kākil na pa ri kachik',
 —kācha'.

¹⁸ Xuquje' pa taq ri q'ij ri' kintaq na b'i ri
 Espiritu wech in pa ki wi' ri patānil taq we,
 chi achijab' chi ixoqib', kākik'alajisaj
 k'u na ri tzij ri kinya chke, —kācha'.

¹⁹ Kinb'an taq na kajmab'al cho ri kaj

* ²¹ Ri winaq aj Israel k'o jun ki nimaq'ij, Pentecostés u b'i'. Are ri q'ij ri ke'to'taj che ru molixik ri cebada (jun grano ri je' kelik jas ri trigo). Kāb'an u b'anik wa' aretaq ok'owinaq 50 q'ij ri nimaq'ij Pascua.

xuquje' cho ruwächulew.
 Ri kinb'ano e are' etal wa' chiwe.
 Xaq apawije' kilitaj wi na ri kik',
 ri q'aq', xuquje' nimaq taq sib'
 je' jas ri sutz', —kächä'.
²⁰ Ri q'ij kâq'equmar na,
 ri ik' kâkiäqar na je' jas ri kik',
 kâk'ulmataj k'u wa' k'ä mäjoq kuriqa na
 ri nimalaj u q'ij ri Qajaw Dios.
 Ri q'ij ri' qas tzij sib'alaj nim u b'anik.
²¹ Konojel k'u ri kâkita' na toq'ob'
 che ri Qajaw Dios, kâkiriq na
 ru tob'anik ri Are', —kächä',
 —xcha ri apóstol Pedro chke ri winaq.
²² Xutaqej tzij ri tat Pedro, xub'ij: Tata'ib',
 alaq aj Israel, tatab'ej na alaq ri kinb'ij, —
 kächä chke. Ri alaq, etam alaq chi ri Jesús
 aj Nazaret are wa' ri achi ri xyl' u q'ij rumal
 ri Dios chuk'utik chi are ri Are' taqowinaq
 loq. Q'alaj wa' chuwäch alaq kumal taq
 konojel ri kajmab'al ri xub'ano, ri nimaq
 taq k'utb'al, xuquje' ri etal ri xeb'an ri Dios
 chxol alaq rumal ri Are', —kächä'.²³ Pune
 ta ne je ri', aretaq xjach ri Jesús pa q'ab'
 alaq, xchap alaq, xya alaq pa ki q'ab' itzel
 taq achijab' chukâmisaxik, xkirip k'u cho ri
 cruz. Je' xb'an alaq wa' che rumal chi je
 wa' ru chomam loq ri Dios chrij ojer, —
 kächä ri tat Pedro chke.²⁴ Pune k'u je wa'
 ri xb'antajik, xpe ri Dios, xresaj pu q'ab'
 ri kâmikäl, xuk'astajisaj chi na ri Jesús chx-
 ixol ri kâminaqib', rumal chi man k'o tä jas
 kâkowin ri kâmikäl chub'anik che.²⁵ Qas ojer
 k'ut ch'awinaq loq ri qa mam David chrij ri
 Qajaw Jesús, xub'ij:
 Ri in amaq'el kinwil ri Qajaw k'o wuk'.
 K'o pa nu wikiäq'ab' rech man k'o tä
 jas ri kâkowin jun chub'anik chwe
 chi kinxej wib', —kächä'.
²⁶ Rumal ri' sib'alaj kâkikot ri wanima',
 amaq'el kintzijo'j tzij
 re kikotemal,
 ku'l k'u nu k'ux chrij ri Dios
 chi man k'o tä jun qas k'äx'ol
 kinriqo, kuxlan k'u ri wanima'.
²⁷ Man kinya tä la kan chxixol
 ri kâminaqib',
 man käya tä la chi kâq'ay
 ri nu cuerpo in,
 in ri' ri loq'alaj patânil e la.
²⁸ K'utum la ri b'e chnuwäch ri kâk'aman
 b'i pa ri qas k'aslemal,
 k'o k'u na nimalaj nu kikotemal
 aretaq ri in k'o chi uk' la, —kächä',
 —xcha ri tat Pedro.
²⁹ Qachalal, ri alaq aj Israel, tampe alaq
 ri kinb'ij: Q'alaj ri' chi ri qa mam David
 xkâm ri' ri are', xmuqtajik. Ri jul ri xmuq
 wi xaq are k'o waral quk' uj kâmik, —kächä'.
³⁰ Qetam k'ut chi ri qa mam David are jun

q'alajisal re ru Loq' Pixab' ri Dios, ri are
 k'ut xukoj ri tzij ri xub'ij ri Dios che ruk'
 juramento, chi jun chke ri rachalaxik ri kil
 na u wäch pa taq ri q'ij ri kepe na, are ri
 Cristo[†] ri käyi' na taqanik pu q'ab'. Kok
 che Nim Taqanel je' jas ri qa mam David.
³¹ Ri qa mam David je' ta ne chi ojer tajin
 kâril loq ri kuk'ulmaj ri Cristo, xch'aw chrij
 ru k'astajib'al. Xub'ij k'ut chi man kâkanaj
 tä kan chxixol ri kâminaqib', man kâq'ay tä
 na ru cuerpo, —kächä'.³² Are k'u wa' we
 Jesús ri' ri xk'astajisax rumal ri Dios, ri uj
 qonojel qas xqilo chi xk'astaj wa' chxixol
 ri kâminaqib'.³³ Xwalijisax rumal ri Dios,
 xnimarisax u q'ij aretaq xut'uyub'a pa ru
 wikiäq'ab'. Aretaq k'ut u k'amom chik pu
 q'ab' ru Tat ri Loq'alaj Espiritu ri xuchi'
 kanoq, xutaq loq pa qa wi', are k'u wa'
 ronojel ri tajin kil alaq, ri tajin kâta alaq, —
 kächä'.³⁴ Pune k'u man xpaqi ri qa mam
 David chikaj, jas ri xub'an ri Qajaw Jesús,
 tzare k'ut xb'inik:
 Xub'ij ri Qajaw ri qa Dios che ri Wajaw:
 "Chatt'uyul pa ri nu wikiäq'ab',
³⁵ k'ä kinya na chawe chi katch'akanik,
 kattaqan pa ki wi' konojel
 ri kâka'n ki k'ulel chawe," —kächä ri
 Dios,
 —xcha ri qa mam David.

³⁶ Qas rajwaxik chi konojel ri winaq aj
 Israel chketamaj chi we Jesús ri' ri xkâmisaj
 alaq cho ri cruz, are wa' xcha'ik, xb'an
 Cristo che rumal ri Dios, xok k'u che Rajaw
 ronojel, —xcha ri tat Pedro chke.

³⁷ Aretaq ri winaq xkita wa' we tzij ri',
 sib'alaj k'äx xkina' pa kanima', xkita' k'u
 che ri tat Pedro xuquje' chke ri nik'iaj
 apóstoles chik, xkib'ij: Qachalal, ¿jas ra-
 jwaxik kâqa'no? —xecha chke.

³⁸ Ri tat Pedro xub'ij chke: Chk'exa ri
 anima' alaq, xuquje' ri chomanik alaq. Ra-
 jwaxik chi kâb'an qasna' alaq chjujunäl alaq
 pa ru b'i' ri Jesucristo, xa je ri' kâsach mak
 alaq rumal ri Dios, ri Are' k'ut kusipaj ri
 Loq'alaj Espiritu chech alaq.³⁹ Are chech
 alaq ri Dios xuchi'j wi wa', chke ri alk'ual
 alaq, xuquje' chke ri winaq ri naj e k'o wi,
 chke k'u konojel ri kesik'ix na rumal ri Dios
 ri Qajaw rech kek'o'ji na ruk', —xcha chke.

⁴⁰ Ri tat Pedro k'ia xub'ij chke. Kuk' taq
 wa' we tzij ri' xech'ab'ej, xeuipix'aj, xub'ij
 chke: Chto' ib' alaq, ya' alaq kan ri itzel taq
 winaq re we q'ij junab' ri', ri man jikom tä ri
 ki k'aslemal, —xcha ri tat Pedro chke.

⁴¹ Konojel k'u ri xkik'am pa kanima' ru
 Loq' Pixab' ri Dios ri xutzijoj ri tat Pedro,
 xb'an k'u ki qasna'. Kraj e oxib' mil ri'
 ri xeb'ok kuk' ri kojonelab' pa ri q'ij ri'.
⁴² Konojel k'u ri xekojonik, xkitaqej u b'anik
 jas ri xkik'ut ri apóstoles chkiwäch, xkimulij

† 2:30 Ri tzij "Cristo" o "Mesías" kel kub'ij "cha'tal rumal ri Dios".

kib' ruk' kikutomal, junam xka'n orar, junam k'ut xkitij ri ki wa.

Wara! kâqil wi jas ri ki k'aslemal ri nab'e taq kojonelab'

⁴³ Sib'alaj xkixej kib' konojel ri winaq, rumal chi k'ia u wäch kajmab'al xuquje' taq etal xeb'an kumal ri apóstoles. ⁴⁴ Konojel ri e kojoninaq che ri Cristo xa jun ki chomanik, xkijachala ri jastaq ke chb'il taq kib'. ⁴⁵ Xkik'iyij ri kulew, xuquje' ri jastaq ke. Are k'u ri rajil xkijachala chkiwäch ri k'o ki rajwaxik. ⁴⁶ Ronojel q'ij xkimulij kib' pa ri nimalaj rachoch Dios, xuquje' xkimulij kib' cho taq kachoch ri kojonelab', xkijach ri wa chkiwäch konojel. Junam k'ut xewi'k, xekikotik, man k'o tä jun kuna' pa ranima' chi nim u b'anik. ⁴⁷ Xkiya k'u u q'ij ri Dios, nim xe'il wi kumal konojel ri winaq. Ri Dios xub'ano chi ronojel q'ij e k'o nik'iaj winaq chik ri kâkiriq ri tob'anik ri Are'. Xeuya k'u ri winaq ri' kuk' ri qachalal kojonelab'.

3

K'o jun achi ri man kâkowin taj kâb'inik, kâkumax kumal ri apóstoles

¹ Jun q'ij xepaqi'k, xeb'e' ri tat Pedro rachi' ri tat Juan pa ri nimalaj rachoch Dios pa ri u rox hora re ri b'enaq q'ij, ri hora ri kâb'an ri oración. ² Chila' k'ut k'o jun achi ri man xkowin taj xb'inik rumal ri k'äx ri k'o che ri raqan tzpa taq ri q'ij ri xil u wäch. Xyi' k'u wa' chuchi' ri nimalaj rachoch Dios chi' ri uchib'e' ri kojom Sib'alaj Je'lik che ru b'i'. Je' k'u xb'an wa' che ri achi ronojel q'ij rech kuta' u limosna chke ri winaq ri keb'ok b'i' pa ri nimalaj rachoch Dios. ³ Aretaq ri achi xeril ri kieb' apóstoles, ri tat Pedro, ri tat Juan okem ke pa ri rachoch Dios, xuta' jun u limosna chke. ⁴ Ri e are' k'ut ko xeka'y che, xub'ij k'u ri tat Pedro: Chatka'y chqe, —xcha che.

⁵ Ri achi ko xka'y chke, xuchomaj are' chi k'o jas käyi' kan che kumal. ⁶ Are k'u ri tat Pedro xub'ij che: Man k'o tä nu rajil, man k'o tä saq puag, man k'o tä q'an puag. Are k'u ri k'o wuk' kinya na chawe. Rumal ri Jesucristo aj Nazaret, pa ru b'i' ri Are', chatwalijog, chatb'inog, —xcha che.

⁷ Ri tat Pedro xuchap che ru wikiäq'ab', xuyako. Chanim k'ut xekowir ri raqan ri achi, xuquje' ru qul taq raqan. ⁸ Xa je ri' ri achi ri u b'anom k'äx ri raqan xuk'iaq rib', xtak'ik, xuchaplej b'inem. Xok k'u b'i' junam kuk' ri apóstoles pa ri nimalaj rachoch Dios, xb'inik, xuk'iaq rib', xuya u q'ij ri Dios. ⁹ Konojel k'u ri winaq xkilo chi tajin kâb'inik, xuquje' chi tajin kuya u q'ij ri Dios. ¹⁰ Sib'alaj k'u xkikajmaj wa' ri xuk'ulmaj ri achi, man xkiriq tä k'ut jas kâka'no rumal chi xketamaj u wäch ri achi chi are ri kât'uyi ronojel q'ij chuta'ik u limosna chuwäch ri

nimalaj rachoch Dios pa ri porta ri kojom Sib'alaj Je'lik che ru b'i'.

Ri apóstol Pedro kutzijo ru Loq' Pixab' ri Dios chuwäch ri nimalaj rachoch Dios

¹¹ Ri achi ri u b'anom k'äx ri raqan nab'e, ri xkunatajik, ri are' man xutzogopij tä ri tat Pedro, ri tat Juan. Konojel k'u ri winaq sib'alaj ki kajmam kib', xkitij anim, xkimulij kib' chkiij ri kieb' apóstoles pa ri raqan ja ru b'i' Raqan Ja re Salomón ri e k'o wi ri e are'. ¹² Aretaq ri tat Pedro xrilo chi xkimulij kib' ri winaq, xub'ij chke: Qachalal, alaq aj Israel, ¿jas che kâkajmaj alaq wa' ri xb'antajik? ¿Jas che ko kujka'yej alaq? ¿A xa kâchomaj alaq chi ruk' ri qa chuq'ab' uj o xa rumal chi sib'alaj uj nimanelab' che ri Dios xqa'no chi kâb'in we achi ri'? ¹³ Man je' ri', xane are ru Dios ri qa mam Abraham, ri qa mam Isaac, xuquje' ri qa mam Jacob, are Dios wa' xa xunimarisaq u q'ij ri Jesús, ri loq'alaj u K'ojol ri xjach alaq pa ki q'ab' ri q'atal taq tzij. Aretaq ri tat Pilato xuchomaj u tzoqopixik b'ik, ri alaq man xaj tä alaq. ¹⁴ Man xaj tä alaq chi kâtzoqopix ri loq'alaj u K'ojol ri Dios ri qas jikom ranima', xane xb'ij alaq chi are utz kâtzoqopix jun kâmisanel chuk'exwäch ri Are'. ¹⁵ Xaq je ri' xkâmisaj alaq ri Jesús, ri jun ri käyo'w ri qas k'aslemal chke ri winaq. Ri Dios k'ut xuk'astajisaj ri Are' chkixol ri kâminaqib'. Ri uj k'ut xqilo chi qas tzij xk'astajik. ¹⁶ Rumal k'u ri kojoniq che ru b'i' ri Jesús xutzir we achi ri' ri kil alaq, ri etam alaq u wäch. Ri kojoniq ri' che ri Jesús, are wa' xb'anowik chi xutzir kanoq we achi ri' chuwäch onojel alaq, —kâcha ri tat Pedro.

¹⁷ Wetam k'u in, qachalal, chi ri alaq, xuquje' ri k'amal taq b'e alaq, xkâmisaj alaq ri Jesús rumal chi man qas kâch'ob' alaq ri tajin kâb'an alaq. ¹⁸ Ri Dios k'ut xuya' chi je wa' xb'anik, rech je' kel wi ri u b'im loq ri Are' kumal konojel ri ojer taq q'alajisal re ru Loq' Pixab', chi ri Cristo ri cha'tal rumal ri Dios kuriq na k'äx. ¹⁹ Rumal ri' chk'exa anima' alaq, tzelej b'a' alaq ruk' ri Dios rech kesachtaj ri mak alaq, —kâcha'. We je' kâb'an alaq wa', ri Dios kub'ano chi kepe na q'ij re jororemal rech kuxlan anima' alaq. ²⁰ Xuquje' kutaq na loq ri Jesús ri ojer ri' cha'talik rech kok che Cristo che to'ik alaq. ²¹ Che we chanim ri' rajwaxik chi ri Jesucristo kâk'oji na kan pa ri kaj k'ä kutzirisax k'u na ronojel rumal ri Dios, kâb'an na u b'anik ronojel wa' jas ri u b'anom nab'e, je' jas ri xub'ij loq ri Dios chkichi' ri loq'alaj taq q'alajisal re ru Loq' Pixab' ojer, —kâcha ri tat Pedro. ²² Rumal ri' ri qa mam Moisés xub'ij chke ri qa nan qa tat ojer: “Ri Qajaw ri qa Dios kucha' na jun chke ri i winaqil, kutaq k'u na rech kok che q'alajisal re ru Loq' Pixab', je' jas ri xinutaq in. Rajwaxik

k'ut chi kinimaj ronojel ri kub'ij chiwe," —kächa'.²³ "Apachin k'u ri man kuta tä ri kub'ij ri q'alajisal re ru Loq' Pixab' ri Dios ri', kesax na b'i pa ri tinimit Israel, käsachisax k'u na u wäch," —xcha ri qa mam Moisés, —kächa ri tat Pedro.

²⁴ Konojel k'u ri q'alajisal re ru Loq' Pixab' ri Dios, kächapletaj loq ruk' ri qa mam Samuel, xuquje' ri k'ä te xepe chik, konojel wa' ri xeq'alajisanik, xkiya loq u b'ixik wa' ri tajin kāk'ulmataj kāmik, —kächa'.²⁵ Ronojel ri xuchi'j loq ri Dios kumal taq ri q'alajisal re ru Loq' Pixab' ri Are', ech alaqa wa'. Ri Dios k'ut xub'an jun trato kuk' ri qa mam ojer chub'anik utzil chech alaqa, aretaq xub'ij che ri qa mam Abraham: "Konojel ri winaq cho ruwächulew ketewchitaj k'u na kumal ri awachalaxik ri kil na ki wäch," —xcha ri Dios.²⁶ Aretaq ri Dios xuk'astajisaj ru K'ojol chxixol ri kāmīnaqib', nab'e xutaq b'i uk' alaqa, alaqa ri' ri winaq aj Israel, rech kätewchix na alaqa, rumal chi ri Are' kub'ano chi chjujunal alaqa kätas ib' alaqa chrij ri etze-lal, —xcha ri tat Pedro chke.

4

Ri tat Pedro rachi'l ri tat Juan xek'am b'ik chkiwäch ri q'atal taq tzij

¹ Ri tat Pedro rachi'l ri tat Juan k'ä tajin käkitzijob'ej ri winaq aretaq xepe ri sacer-dotes aj Israel,* kachi'l ri ki nimaqil ri chajil taq re ri nimalaj rachoch Dios, xuquje' ri tata'ib' saduceos,[†] xeopan k'u kuk'.² Sib'alaj yaktajinaq koyowal, rumal chi ri tat Pedro, ri tat Juan tajin kekitijoj ri winaq, kākib'ij chi qas tzij kek'astaj chi na ri kāmīnaqib'. Kākib'ij k'ut chi are k'utb'al wa' chke konojel chi xk'astaj ri Jesús chxixol ri kāmīnaqib'.³ Xekichapo, xekik'am b'ik, xekikoj k'u pa che' k'ä chukab' q'ij, rumal chi ya na tam chik.⁴ E k'ia chke ri xkita ru Loq' Pixab' ri Dios ri xekojonik. We keajilax xaq xuwi ri achijab', kraj e job' mil ri e are'.

⁵ Chukab' q'ij k'ut xkimulij kib' pa Jerusalén ri k'amal taq ki b'e ri winaq aj Israel, ri ki nimaqil ri winaq, xuquje' ri tijonelab' re ri Pixab'.⁶ Xkiriq kib' kuk' ri tat Anás rachi'l ri tat Caifás, ri qas ki nimaqil sacerdotes. E k'o ri tat Juan, ri tat Alejandro, xuquje' konojel ri kachalal ri ki nimaqil sacerdotes.⁷ Xkitak'ab'a k'u ri tat Pedro, ri tat Juan chkiwäch, xkik'ot ki chi', xkib'ij chke: ¿Jachin ri yo'winaga pa i q'ab' chi kib'an ri tajin kākilo? ¿Jas u b'i ri kikojo rech kixkowinik kib'an wa? —xecha chke.

⁸ Ri tat Pedro, qajinaq ri Loq'alaj Espiritu puwi', xub'ij chke: Tata'ib', alaqa ri k'amal

taq ki b'e ri winaq, alaqa ri' ri ki nimaqil ri winaq aj Israel,⁹ kāmik kāk'ot alaqa qa chi' rumal ri utzil ri xb'antaj che jun achi yawab' che retamaxik jas ri xb'an chuku-naxik.¹⁰ Chetamaj b'a' alaqa xuquje' konojel ri winaq aj Israel chik rumal ri Jesucristo aj Nazaret, pa ru b'i' ri Are', xkunataj wa' we achi ri' ri k'o chuwäch alaqa. Ri Jesús ri xkāmīsaj alaqa cho ri cruz, ri xk'astajisax rumal ri Dios chxixol ri kāmīnaqib', are ri Are' xkunan we achi ri'.¹¹ We Jesús ri' are wa' ri ab'aj ri man xaj tä alaqa, alaqa ri' ri yakal taq ja, are ab'aj wa' xkoj che toq'eb'al re ri ja.[‡]¹² Man kārīqtaj tä ru tob'anik ri Dios ruk' jachin jun winaq, xane xaq xuwi ruk' ri Jesús. Je ri', rumal chi ri Dios man u yo'm tä chqe ru b'i' jachin jun chik cho ronojel ruwächulew, ri ya'tal che chi rumal ri are' kuya' kākariq na ru tob'anik ri Dios, —xcha'.

¹³ Aretaq ri q'atal taq tzij xkilo chi ri tat Pedro, ri tat Juan man kākixej tä kib' kech'awik, xuquje' xkilo chi xaq e winaq ri man k'o tä ri k'ia ketamam chrij wuj, sib'alaj xkikajmaj wa'. Te k'u ri' xkixob'ob'o chi e are' taq wa' jujun chke ri xerachi'laj ri Jesús.¹⁴ Xuquje' xkilo chi k'o ri achi ri xkunatajik tak'al kuk' ri apóstoles, xa je ri' man xkiriq tä chik jas kākib'ij.¹⁵ Xkib'ij k'u chke ri apóstoles chi keb'el b'i chkiwäch, are k'u ri e are' xekanajik, xkitzijob'ela k'u kib'.¹⁶ Xkib'ij: ¿Jas kākā'n chke we achijab' ri'? Qas tzij k'ut etamtal chik kumal konojel ri winaq pa ri tinimit Jerusalén ri kajmab'al etal ri ka'nom. Man kuya' tä k'ut kākab'ij chi man qas tzij taj.¹⁷ Je b'a' qa'na wa', rech man kāk'in tä más u tzijol ri xb'antajik. Cheqaxib'ij rech man ketzijon tä chik chuweq kāk'ij chrij ri Jesús che jachin jun, —xecha'.

¹⁸ Xekisik'ij k'ut, xetaqan chke chi man k'o tä chi jumul käkitzijoj chik ri Jesús, man kākīya tä chi k'u tijonik pa ru b'i' chke ri winaq.¹⁹ Xech'aw k'u ri tat Pedro rachi'l ri tat Juan, xkib'ij: Qas chomaj alaqa ri', ¿a are utz lo kārīl ri Dios chi are kujniman chech alaqa chuk'exwäch ri kākānimaj ri Are'?²⁰ Ri uj k'ut man kujkowin taj ri mat kākab'ij chi na ri qilom xuquje' ri qa tom, —xecha chke.

²¹ Ri q'atal taq tzij xkaj xekixib'ij ri apóstoles, k'ia ri xkib'ij chke, xekitzogopij k'u b'ik. Man xkiriq taj jas kākā'n chuk'ājisaxik ki wäch, rumal chi konojel ri winaq tajin kākīya u q'ij ri Dios rumal ri xb'antajik.²² Ri achi ri xb'antaj wi ri kajmab'al kunanik k'o chi na kawinaq u junab' ruk' u wi'.

Ri kojonelab' kākita' che ri Dios chi kākī' ki

* **4:1** "Sacerdote aj Israel": Chawila' ri San Lucas 1:8, xuquje' ri Diccionario, k'isb'al re we Nuevo Testamento. † **4:1** Ri tata'ib' "saduceos" e are' winaq wa' aj Israel ri nim ki b'anik ri man kākikoj k'ut chi qas tzij kek'astaj na ri kāmīnaqib'.

‡ **4:11** We ab'aj ri' are ri Jesús mismo.

chuq'ab', xuquje' chi man kākixej tā kib'

²³ Aretaq ri tat Pedro, ri tat Juan e tzoqopital chik, xeb'e' kuk' ri nik'iaj kojonelab' chik, xkitzijo ronojel ri xb'ix chke kumal ri ki nimaqil ri sacerdotes xuquje' konojel ri ki nimaqil ri winaq. ²⁴ Aretaq xkita wa', junam xka'n orar, xkib'ij che ri Dios: Nimalaj Qajaw, lal ri' ri qas Dios ri xb'anow ri kaj, ri ulew, ri mar. Ronojel ri k'olik, xb'antaj k'u wa' umal la. ²⁵ Tzojer k'ut b'im la loq rumal ri Loq'alaj Espiritu chuchi' ri qa mam David ri patānil e la, xb'ij la:

¿Jas lo wa' chi ri winaq cho ruwächulew yaktajinaq koyowal, xaq ketontirik, kākā'n k'u nimal?

¿Jas che wa' chi ri winaq kākichomaj u b'anik ch'oj ri man k'o tā u b'eyal?

²⁶ Ri nimaq taq taqanelab' cho ri uwächulew junam xkiwalijisaj kib',

ri ki nimaqil ri winaq xkimulij kib'

rech kākīyak kib' chrij ri Qajaw Dios, xuquje'

chrij ri Cristo ri cha'tal rumal ri Dios,

—xcha la, —kecha ri kojonelab'.

²⁷ Xkitaqej oración, xkib'ij: Qas k'u tzij wi xkiriq kib' ri nim taqanel Herodes ruk' ri tat Poncio Pilato waral ri' pa we tinimit junam kuk' ri nik'iaj winaq chik kachi' ri winaq aj Israel, xkimulij k'u kib' chrij ri loq'alaj K'ojol la, ri Jesús, ri cha'tal umal la. ²⁸ Je' xka'n wa' rech je' káb'antajik jas ri chomam la loq chi rajwaxik káb'anik. ²⁹ Qajaw, chilampe la kāmik ri' chi k'ia ri tajin kākib'ij we winaq ri' chqij. Ya la chqe uj, ri uj patānil taq e la, chi kujkowinik káqatzijoj ri Loq' Pixab' la, man k'o tā kākaxej wi qib'. ³⁰ Xuquje' kākata' che la chi kāk'oji qe ri chuq'ab' la chub'anik kunanik chke ri yawab'ib', xuquje' che ki b'anik ri kajmab'al taq etal, xuquje' nimaq taq k'utb'al pa ru b'i' ri loq'alaj K'ojol la, ri Jesús, —xcha che ri Dios.

³¹ Aretaq xeto'taj chub'anik orar, ri ja ri e k'o wi xslab'isaxik, konojel k'ut xqaj ri Loq'alaj Espiritu pa ki wi', man xkixej tā kib' xkitzijo ru Loq' Pixab' ri Dios.

Konojel ri jastaq ke ri kojonelab' are kech konojel wa'

³² Ri k'ia winaq ri e kojoninaq che ri Cristo, xa jun ki chomanik konojel, kākina' pa kanima' chi xa e jun. Man k'o tā jun kub'ij chi xaq xuwi rech are' ri k'o ruk', xane konojel ri jastaq ke, are kech konojel wa'. ³³ Ri apóstoles ruk' nimalaj chuq'ab' xkitaqej u tzijoxik chi qas tzij xk'astaj ri Qajaw Jesús chkixol ri kāmīnaqib'. Ri Dios k'ut kuya nimalaj taq tewchib'al pa ki wi' konojel ri kojonelab'. ³⁴ Xa je ri' man k'o tā jun chkixol ri k'o u rajwaxik, rumal chi konojel ri k'o kulew o ri k'o kachoch xkik'iyij wa'. Are k'u ri rajil xkik'am b'i kuk' ri apóstoles. ³⁵ Kākīya wa' we puq ri' pa ki q'ab', ri e are' k'ut kākijach wa' chkiwäch ri

k'o ki rajwaxik. ³⁶ Xaq je ri', k'o jun tata', jun chke ri levitas, José u b'i', ri xil u wäch pa Chipre, jun ch'äqap ulew wa' ri k'o pa ri mar. Ri tata' ri' xuquje' káb'ix Bernabé che kumal ri apóstoles. Kel kub'ij wa' chi are jun ri kuku'b'isaj ki k'ux ri winaq. ³⁷ We achi ri' k'o jun ch'äqap rulew xuk'iyij, xuk'am k'u b'i ri rajil, xujach pa ki q'ab' ri apóstoles.

5

Ri tat Ananías rachi'l ri nan Safira ri rixoqil kākā'n jun mak re sub'unik cho ri Dios

¹ K'o k'u jun achi chik u b'i' Ananías, ri rixoqil are Safira u b'i'. Junam xkichomaj u k'iyixik jun ch'äqap kulew. ² Ri achi xresaj kan jub'iq' che ri puq ri rajil ri ulew, retam k'u wa' ri rixoqil. Je ri' xa nik'iaj ri puq xuk'am b'ik, xujach pa ki q'ab' ri apóstoles, je' ta ne chi are tz'aqat ri puq ri xyi' kumal. ³ Xpe k'u ri tat Pedro, xub'ij che ri tat Ananías: Ananías, ¿jas che xya la che ri Satanás chi kok pa ri anima' la, xb'an la tzij che ri Loq'alaj Espiritu ruk' ri sub'unik ri xb'an la, xesaj k'u la kan nik'iaj che ri rajil ri ulew ri xk'iyij la? ⁴ ¿A mat ech la ri ulew aretaq mäjoq kāk'iyij la? Aretaq xk'iyij la ri ulew, ¿a mat ech la ri puq? —kākā'. ¿Jas k'u che xchomaj la wa' pa anima' la? Man are tā chke ri winaq ri xb'an wi la tzij ruk' ri sub'unik, xane are che ri Dios ri xb'an wi la, —xcha ri tat Pedro che.

⁵ Aretaq ri tat Ananías xuta wa' we tzij ri', xtzaq pulew, xkāmik. Konojel k'u ri xetow ri xb'antajik sib'alaj xkixej kib'. ⁶ Xepe k'u ri alab'om, xkipis ru cuerpo pa jun payu', xkik'am b'ik, xe'kimuqu kanoq.

⁷ Kraj ok'owinaq chi oxib' horas xopan ri rixoqil ri tat Ananías. Man retam tā k'ut jas ri xb'antajik. ⁸ Xub'ij k'u ri tat Pedro che: B'ij la chwe, ¿a je' puq wa' ri xb'ij alaq chi xyi' che ri ulew ri xk'iyij alaq? —kākā'.

Xub'ij k'u ri ixoq: Je', jela' ri puq, —xcha che ri tat Pedro.

⁹ Ri tat Pedro xub'ij che ri ixoq: ¿Jas che xchomaj alaq junam chi kākowin alaq chub'anik ri sub'unik che ri Loq'alaj Espiritu rech ri Qajaw? —kākā'. Chilampe la, xaq chi' ri porta chik e k'o wi ri alab'om ri xe'kimuqu kan ri achajil la, kāk'am na b'i la xuquje' kumal ri e are', —xcha ri tat Pedro che.

¹⁰ Chanim xtzaq ri nan Safira pulew chuwach ri tat Pedro, xkāmik. Aretaq xeb'ok b'i ri alab'om, k'ä te xkilo kāmīnaq ri nan Safira. Xkik'am k'u b'ik, xe'kimuqu kan chuxkut ri rachajil. ¹¹ Konojel ri qachalal kojonelab', xuquje' konojel ri xkita wa' ri xb'antajik, sib'alaj xkixej kib'.

Ri apóstoles kākā'n k'ia u wäch taq kajmab'al

¹² Sib'alaj k'u k'ia u wäch taq kajmab'al, xuquje' nimaq taq k'utb'al tajin keb'antaj chkixol ri winaq kumal ri apóstoles. Konojel ri kojonelab' k'ut tajin kâkimulij kib' amaq'el pa ri raqan ja re ri nimalaj rachoch Dios, ri kâb'ix Raqan Ja re Salomón che. ¹³ Man k'o tä jun chke ri nik'iaj winaq chik kukoch'o kok kuk' ri kojonelab', pune sib'alaj nim ke'il wi kumal ri winaq re ri tinimit. ¹⁴ E k'ia k'u ri xekojon che ri Qajaw Jesús, chi achijab' chi ixoqib', je ri' chi sib'alaj xek'iar ri kojonelab'. ¹⁵ Xa kumal ri kajmab'al ri tajin kâka'n ri apóstoles, ri winaq xekesaj loq ri ki yawab' pa taq ri b'e, xekiya pa taq ch'at, cho taq pop rech aretaq kok'ow ri tat Pedro chkixkut, xuwi ta ne ru nanoch' kâqaj pa ki wi' rech keutzirik. ¹⁶ Xuquje' ne ri winaq ri keb'el pa taq ri tinimit ri e k'o chunaqaj ri Jerusalén, xkik'am loq ri ki yawab' kachi'l ri tajin kâkiriq k'âx kumal ri itzelalaj taq espíritus ri e k'o chke. Konojel k'ut xekunatajik.

Ri tat Pedro, ri tat Juan keoksax pa che'

¹⁷ Are k'u ri ki nimal sacerdotes, xuquje' konojel ri rachi'l, ri winaq ri kâb'ix saduceos chke, sib'alaj k'âx kâkina' chkiy ri apóstoles rumal chi sib'alaj nim ke'il wi kumal ri winaq. ¹⁸ Xekichapo, xekikoj pa che' jawije' e k'o wi ronojel u wäch ajpache'. ¹⁹ Xpe k'u jun ángel ri xtaq loq rumal ri Qajaw Dios, chaq'ab' k'ut xujaq ri porta rech ri che', xeresaj loq, xub'ij chke: ²⁰ Jix pa ri nimalaj rachoch Dios, chixtak'al chila' che ki tzijob'exik ri winaq chriy wa' we k'ak' k'aslema ri', —xcha ri ángel chke.

²¹ Xkita ri xb'ix chke rumal ri ángel. Je k'u ri' chukab' q'ij xeb'ok pa ri nimalaj rachoch Dios, xkichap k'u ki tijoxik ri winaq.

E k'o ri apóstoles chila' aretaq ri ki nimal sacerdotes kuk' ri rachi'l xekisik'ij konojel ri ki nimaqil ri winaq aj Israel xuquje' konojel ri nimaq taq tata'ib' rech kâkimulij kib'. E are' taq wa' xetaqan b'i che ki k'amik loq ri apóstoles pa che'. ²² Aretaq k'ut xeopan ri taq'on pa che', man xekiriq tä k'u ri apóstoles. Xetzelejik, xekiya u b'ixik wa'. ²³ Je wa' xkib'ij: Aretaq ri uj xujopanik xqilo chi ri che' utz b'anom che u tz'apixik, xuquje' chi ri chajinelab' e k'o chi' taq ri porta. Aretaq k'ut xqajaqo, k'ä te xqilo chi man k'o tä jun chupam, —xecha chke.

²⁴ Aretaq xkita wa' we tzij ri', ri gas ki nimal sacerdotes, xuquje' ri k'amal ki b'e ri chajil taq re ri nimalaj rachoch Dios, xuquje' ri ki nimaqil ri sacerdotes xkita'la chb'il taq kib', xkib'ij: ¿Jas ta lo ri kâk'ulmataj chi na? —xecha'. ²⁵ Chanim k'ut xopan jun achi, xub'ij chke: Ri achijab' ri xkoj alaq

pa che', chanim e k'o pa ri nimalaj rachoch Dios, tajin kekitiyoj ri winaq, —xcha chke.

²⁶ Chanim ri k'amal ki b'e ri chajil taq re ri nimalaj rachoch Dios, xe' che kilik ri apóstoles, xeuk'am k'u b'i ri chajinelab' che rachi'l. Xeuk'am loq ri tat Pedro, ri tat Juan ruk' utzil, man k'o tä k'u jas xub'an chke rumal chi kuxej rib' chkiwäch ri winaq, we ne ri are' kâb'an che ab'aj kumal. ²⁷ Aretaq xek'amtaq loq, xekiya chkiwäch ri ki nimaqil ri winaq ri ki mulim kib'. Xpe ri ki nimal sacerdotes, xuk'ot ki chi', xub'ij: ²⁸ ¿A mat xqab'ij chiwe ruk' pixb'enik chi man keitijoj tä chik ri winaq chriy ri Jesús? ¡Chiwilampe ri i b'anom! Kâmik k'ut i jab'um ri i tijonik pa ronojel we tinimit Jerusalén. Xuquje' kib'ij chi uj ri uj ajchaq' mak che ru kâmikal we achi ri' ri Jesús, —xcha chke.

²⁹ Ri tat Pedro, xuquje' ri nik'iaj apóstoles chik xech'awik, xkib'ij che: Tzrajwaxik wi are kâqanimaj ri kub'ij ri Dios nab'e chuwäch ri kâkib'ij ri winaq. ³⁰ Ri ki Dios ri qa mam ojer xuk'astajisaj ri Jesús ri xkâmisaj alaq, ri xrip alaq cho ri cruz. ³¹ Tzare wa' we Dios ri' xunimarisaj u q'ij ri Jesús, xut'uyub'a pa ru wikiäq'ab', xukoj che K'amal B'e chke ri winaq, xuquje' xukoj che To'l Ke. Je' xub'an wa' rech ri winaq aj Israel kâkik'ex kanima', kâkik'ex ki chomanik, kâkiriq k'u ri sachb'al ki mak. ³² Ri uj xqilo chi xk'astaj ri Jesús, rumal ri' ri Dios uj u kojom che q'alajisal taq re chkiwäch ri winaq junam ruk' ri Loq'alaj Espiritu ri u yo'm ri Dios chke ri keniman che, —xecha chke.

³³ Ri ki nimaqil ri winaq, aretaq xkita wa' sib'alaj xpe koyowal. Are kâqaj kekikâmisaj ri apóstoles. ³⁴ K'o k'u jun tata' chkixol ri ki nimaqil ri winaq, Gamaliel u b'i, are tijonel re ri Pixab', jun fariseo.* Nim kil wi ri are' kumal ri winaq. Ri are' xtak'i aq'anoq, xub'ij chi ke'esax na b'i jun rat ri apóstoles. ³⁵ Te k'u ri' xub'ij chke ri ki nimaqil ri winaq: Qachalal, alaq aj Israel, gas chomaj na alaq jas ri kâb'an alaq chke we achijab' ri'. ³⁶ Chna'taj chech alaq chi xke' kieb' oxib' junab' wa', xwalij jun achi, Teudas u b'i, ri xub'an che rib' chi nim u b'anik. E kiejeb' ciento achijab' ri xeb'ok ruk'. Xkâmisax k'u ri are', xa je ri' konojel ri e k'o ruk' xejab'unik, xk'is k'u u wäch juntir. ³⁷ B'antajinaq chi wa', xwalij chi jun tata', Judas u b'i, aj Galilea, aretaq tajin kâb'an ri censo, keajilax k'u ri winaq. E k'ia k'ut ri xeb'ok ruk'. Xkâmisax k'u ri are' xuquje'. Xa je ri' konojel ri e k'o ruk' xejab'unik. ³⁸ Rumal ri' kinb'ij chech alaq chi are utz na we kâya kan alaq we achijab' ri', mänim ib' alaq kuk'. We ri tajin kâkitzijo o ri tajin

* **5:34** Ri tata'ib' "fariseos" e are' winaq wa' aj Israel ri sib'alaj xkitaqej u nimaxik ru Pixab' ri Moisés. Xka'n k'u nimal, xkichomaj k'ut chi e utz na chkiwäch konojel ri winaq. K'ia ki naq'atisam wi kib' ri man gas tä are ri kub'ij ru Tzrij ri Dios.

käka'no are kech ri winaq, käsach na u wäch wa'.³⁹ We k'u ne rech ri Dios, man kākowin tä alač käsach alač u wäch. Chilampe alač chi māyak ne ib' alač chrij ri Dios, mäch'ojin alač ruk' ri Are', —xcha chke.

⁴⁰ Konojel ri ki nimaqil ri winaq xkinimaj ri xub'ij ri tat Gamaliel. Xekisik'ij k'u ri apóstoles, xekich'ayo, xekirapuj. Te k'u ri xkiya taqanik chke chi man k'o tä chi jumul käkitzijob'ej ri winaq pa ru b'i' ri Jesús. Te k'u ri' xekitzoqopij b'ik. ⁴¹ Ri apóstoles k'ut xeb'el b'i' chkiwäch ri ki nimaqil ri winaq, xekikotik rumal chi ri Dios xuya chke chi kākirič k'ixb'alalaj k'äxk'ol rumal ri Jesús. ⁴² Man xkitanab'a tä k'u u tzijoxik ri Utzalaj Tzij re ri Evangelio chrij ri Jesucristo ronojel q'ij. Xekitijoj k'u ri winaq pa ri nimalaj rachoch Dios, xuquje' cho taq ja.

6

*Ri apóstoles kekicha' wuqub' diáconos **

¹ Pa taq ri q'ij ri' sib'alaj xek'iar ri konojelab'. Are k'u ri konojelab' ri kech'aw pa griego xkichap u yakik tzij chkiy ri konojelab' ri kech'aw pa hebreo. Ri winaq ri kech'aw pa griego kākib'ij chi ri malka'nib' ri e k'o kuk' man junam tä káb'an che kilik aretaq kājach ri wa. ² Are k'u ri apóstoles xekimulij konojel ri konojelab', xkib'ij k'u chke: Uj ri', ri uj apóstoles, man utz taj chi mat káqataqej u tzijoxik ru Loq' Pixab' ri Dios mak rech uj kujjachow ri wa. ³ Qachalal, tzukuj b'a' alač wuqub' achijab' chxol alač. We achijab' ri' rajwaxik chi utz ri ki k'aslemal, q'alaj chi kátaqan ri Loq'alaj Espiritu pa kanima', k'o ketamb'al, káqaya k'u pa ki q'ab' ru jachik ri wa. ⁴ Are k'u ri uj káqataqej u b'anik orar, xuquje' káqataqej u tzijoxik ru Loq' Pixab' ri Dios, —xecha ri apóstoles chke ri konojelab'.

⁵ Konojel k'ut utz xkita ri xkib'ij ri apóstoles. Xkicha' k'u ri tat Esteban. Ri are' are jun tata' ri sib'alaj kákojon che ri Dios, xuquje' q'alaj chi ri Loq'alaj Espiritu kátaqan pa ranima'. Xuquje' xkicha' ri tat Felipe, ri tat Prócoro, ri tat Nicanor, ri tat Timón, ri tat Parmenas, xuquje' ri tat Nicolás ri aj Antioquia ri ojer okinaq kuk' ri winaq aj Israel, junam ru chomanik chrij ri Dios. ⁶ Te k'u ri' xekiya we achijab' ri' chkiwäch ri apóstoles. Ri e are' k'ut xkiya ki q'ab' pa ki wi', xka'n orar.

⁷ Are k'u ru Loq' Pixab' ri Dios xjab'un u wäch, sib'alaj xek'iar ri konojelab' pa ri tinimit Jerusalén. Xuquje' sib'alaj e k'ia chke ri sacerdotes aj Israel xeniman che ri Utzalaj Tzij re ri Evangelio.

Ri tat Esteban kächapik, kāk'am b'ik, käyi' k'u chkiwäch ri ki nimaqil ri winaq

⁸ Sib'alaj nim k'u ru toq'ob' ri Dios k'o puwi' ri tat Esteban, xuquje' yo'm nimalaj u chuq'ab' rech kub'an nimaq taq etal chki-xol ri winaq, xuquje' nimaq taq kajmab'al. ⁹ Xewalij k'u jujun achijab' ri kepe pa jun rachoch Dios ri kojom "Kech Tzooqopim Achijab'" che ru b'i', xkichap k'u tzij ruk' ri tat Esteban. Xepe chi k'u nik'iaj achijab' chik chrij. E k'o ri aj Cirene, aj Alejandria, aj Cilicia, xuquje' nik'iaj chik ri e petinaq pa taq ri tinimit re Asia. ¹⁰ Man xekowin tä k'ut xkiq'atej u wäch ru tzij ri tat Esteban, rumal chi ri are' k'o u noj, käch'aw k'u ruk' ri etamanik ri yo'm che rumal ri Loq'alaj Espiritu. ¹¹ Xekitoj k'u jujun achijab' rech kākib'ij chi qas tzij ki tom ri tat Esteban kub'ij ri áwas u b'ixik chrij ri qa mam Moisés xuquje' chrij ri Dios. ¹² Je ri' xka'no, xkikojola ki k'ux ri winaq xuquje' ri nimaq taq tata'ib' kachi'l ri tijonelab' re ri Pixab' rech kápe koyowal chrij ri tat Esteban. Xkimajij k'u ri tat Esteban, xkichapo, xkik'am b'i' chkiwäch ri ki nimaqil ri winaq. ¹³ Xuquje' xekitzukuj achijab' rech kākib'ij ri man qas tzij taj chrij ri tat Esteban. We winaq ri' kākib'ij: We achi ri' man kákos tä chub'ixik ri áwas u b'ixik chrij we loq'alaj rachoch Dios ri' ri qech uj, xuquje' chrij ru Pixab' ri qa mam Moisés. ¹⁴ Qa tom k'ut ri are' kub'ij chi we Jesús ri' ri aj Nazaret kusach na u wäch we nimalaj rachoch Dios ri', xuquje' kuk'ex na ronojel ri uj u naq'atajisam wi kan ri qa mam Moisés, —xecha ri'.

¹⁵ Te k'u ri' ri ki nimaqil ri winaq xuquje' konojel ri e t'uuyul pa ri q'atb'al tzij, aretaq xeka'y che ri tat Esteban, xkilo chi ru palaj are je' jas ru palaj jun ángel.

7

Ri tat Esteban kuq'alajisaj ru Loq' Pixab' ri Dios chkiwäch ri ki nimaqil ri winaq

¹ Xpe ri ki nimal sacerdotes, xuta' k'u che ri tat Esteban, xub'ij: ¿A qas tzij wa' ri tajin káb'ix chawij? —xcha che.

² Xch'aw k'u ri tat Esteban, xub'ij chke konojel: Loq'alaj taq qachalal, alač k'amal taq qa b'e, tampe alač ri kinb'ij, —kácha'. Ri qa Dios, ri sib'alaj nim u q'ij, xuk'ut rib' chuwäch ri qa mam Abraham ojer aretaq k'o pa taq ri juyub' re Mesopotamia, k'a mäjoq káq'ax are' pa ri tinimit Harán. ³ Xub'ij che: "Chaya kan ra tinimit, xuquje' konojel ri awachalaxik, rech kate' pa ri ulew ri kink'ut na chawäch," —xcha che. ⁴ Xel k'u b'i' ri qa mam Abraham pa ri ki tinimit ri winaq aj Caldea, xe'k, xk'o'ji pa Harán. Te k'u ri', aretaq káminač chi ru tat, xk'am loq rumal ri Dios waral pa we tinimit ri k'o wi alač kámik. ⁵ Man xyi' tä k'u ch'áqap ulew

* 6: Título: Ri diáconos e are' wa' k'o kegle'n che ki to'ik ri nik'iaj konojelab' chik (1 Timoteo 3:8-13).

che rechb'al ri qa mam Abraham pa we tinimit ri' rumal ri Dios, man k'o tä k'u ne jun alaj ch'äqap ri kuya' kāk'oji wi. Xub'ij k'u ri Dios che chi kāpe na ri q'ij aretaq ri are' kärechb'ej na ri ulew, kākanaj kan wa' we ulew ri' chke ri ralk'ual aretaq kākām ri are', pune ta ne māja' k'o ralk'ual ri qa mam Abraham pa taq ri q'ij ri'. ⁶ Xuquje' xub'ij ri Dios che chi ri ralk'ual ri kil na ki wäch kek'oji na pa jun tinimit chik, ri man ki tinimit taj. Kek'oji na pa ki q'ab' ri winaq jela', kepatānin na chke. Are kiejeb' ciento junab' kākiriq na k'äx chila', —xcha ri Dios. ⁷ Xuquje' xub'ij ri Dios che: "Ri in kinq'at na tzij pa ki wi' ri nik'iaj winaq chik ri kekojow na che patānil taq ke. Keb'el k'u na loq chila', kinkipatānij na waral ri'," —xcha ri Dios che. ⁸ Xuquje' xub'an jun trato ri Dios ruk' ri qa mam Abraham. Che retal ri trato xtaqan ri Dios chi kāk'at ru cuerpo jun achi o jun ala.* Rumal ri' ri qa mam Abraham, aretaq ilom chi u wäch ri alaj a Isaac ru k'ojol, chuwaqxaq q'ij xukoj ri etal che ru cuerpo. Xuquje' je' xub'an ri tat Isaac che ri a Jacob ru k'ojol, ri tat Jacob xuquje' xukoj ri retal ri trato chke ru k'ojol ri are', xq'at ri ki cuerpo. Ri kab'lajuj u k'ojol ri tat Jacob e are wa' ri ojer taq ki mam konojel ri winaq aj Israel kāmik, —kācha'.

⁹ Ri ralk'ual ri tat Jacob, ri qa mam ojer, k'äx xkina' che ri a José ri ki chaq',† xkik'iyij k'ut rech kāk'am b'i pa Egipto. Ri Dios k'ut, k'o ri Are' ruk' ri a José. ¹⁰ Xuto' k'ut pa konojel taq ri k'äx'ol ri xurigo. Xuya u no', xuya che chi utz kil wi rumal ri Faraón ri nim taqanel puwi' ri Egipto. Aretaq achi chik ri a José, ri Faraón xukoj ri are' che q'atal tzij puwi' ronojel ri Egipto, xuquje' xukoj ri are' che taqanel puwi' ri rachoch. Ronojel k'ut xuya pu q'ab', —kācha'.

¹¹ Xpe k'u wi'jal xuquje' nimalaj k'äx'ol puwi' ronojel ri Egipto, xuquje' puwi' ronojel ri Canaán. Ri qa nan qa tat ojer man k'o tä chi ri kākitiq. ¹² Are k'u ri tat Jacob, aretaq xuto chi k'o triko pa Egipto, xeutaq b'i ri u k'ojol jela'. Ri kab'lajuj u k'ojol ri tat Jacob, e are k'u wa' ri qa mam ojer. Are k'u nab'e mul wa' ri xeb'e' pa Egipto. ¹³ Chukamul chik ri xeb'e'k, are chi' ri tat José xuk'ut rib' chkiwäch ri rachalal, xretamaj k'u ri nim taqanel, ri Faraón, jachin taq ri rachalaxik ri tat José. ¹⁴ Xtaqan k'u ri tat José chuk'amik ri Jacob ru tat, xuquje' konojel ri nik'iaj rachalaxik. E oxk'al olajuj winaq k'u wa' chkonojel. ¹⁵ Je' u q'axik wa' ri tat Jacob pa Egipto junam kuk' ri rachalaxik, chila' k'ut xkām wi. Xuquje' chila' xekām wi ri kab'lajuj u k'ojol, ri ojer taq qa mam.

¹⁶ Xk'am k'u loq ri ki cuerpo pa Siquem rech kemuq pa ri muqub'al ri xuloq' ri qa mam Abraham chke ru k'ojol ri tat Hamor aj Siquem ruk' ru rajil ri are', —kācha'.

¹⁷ Aretaq k'ut xa jub'iq' kraj man kopan ri q'ij ri káb'antajik jas ru b'im ri Dios ruk' juramento che ri qa mam Abraham, ri tinimit Israel xnimarik, sib'alaj xek'iar k'u ri qa winaqil pa Egipto. ¹⁸ Are chi' k'ut xok chi na jun taqanel chik puwi' ri Egipto ri man retam tä u wäch ri tat José. ¹⁹ We nim taqanel ri' xna'w che ki sub'ik ri qa winaqil, xub'an k'u etzelal chke ri qa nan qa tat ojer. Xub'an k'äx chke, xeutaqo rech kekiwonäch a kan ri alaj taq kalk'ual ri te' xil ki wäch rech xaq kekāmik. ²⁰ Pa taq k'u ri q'ij ri' xil u wäch ri alaj a Moisés. Are sib'alaj utz xil wi rumal ri Dios. Ru nan u tat xekowinik xkik'iyisaj na oxib' ik' cho kachoch. ²¹ Aretaq k'ut xajwatajik chi xkiya kanog, xriqtaj rumal ru mia'l ri Faraón ri taqanel puwi' ri Egipto, xuk'am b'i cho rachoch, xuk'iyisaj, xub'an ralb'al che. ²² Je ri' ri a Moisés xk'ut ronojel u wäch etamb'al re Egipto chuwäch, xuquje' ronojel u wäch no'. Rumal wa' ri a Moisés xk'oji nimalaj u no'. Nim chi k'u u q'ij ri are'. Xq'alajin k'u wa' aretaq xch'awik, xuquje' pa ronojel ri xub'ano, —kācha'.

²³ Aretaq tz'aqat chik kawinaq u junab', xpe pa ranima' ri ki solixik ru winaqil, ri winaq aj Israel. ²⁴ Chila' xril jun chke ru winaqil ri tajin káb'an k'äx che rumal jun aj Egipto. Xe' k'ut, xuto', xukāmisaj k'u ri aj Egipto chutojik u k'exel ri k'äx ri xub'an che ri aj Israel. ²⁵ Xuchomaj k'u ri tat Moisés chi ru winaqil kākich'ob' na chi ri Dios kukoja na ri are' che ki tzoqopixik. Ri e are' k'ut man xkich'ob' tä wa'. ²⁶ Chukab' q'ij chik ri tat Moisés xeuriq kieb' winaq aj Israel ri tajin kech'ojinik, kraj k'ut kujach ki wäch, kuya utzil chkixol, xub'ij chke: "Ri alaq achalal ib' alaq. ¿Jas che k'äx káb'an alaq chb'il taq ib' alaq?" —xcha chke. ²⁷ Are k'u ri jun ri tajin kub'an k'äx che ri rachi'l, xupaqchij apan ri tat Moisés jela', xub'ij che: "¿Jachin xatkojow che taqanel xuquje' che q'atal tzij pa qa wi?" ²⁸ ¿A kawaj kinakāmisaj jas ri xab'an che ri jun aj Egipto iwir?" —xcha che. ²⁹ Aretaq ri tat Moisés xuta wa' we tzij ri', xanimaj b'ik, xel b'i pa Egipto, xe' pa Madián. Xk'oji k'u chkixol winaq ri man u winaqil taj. Chila' k'ut xk'uli'k. Xil ki wäch kieb' u k'ojol, —kācha'.

³⁰ Ok'owinaq chi k'u kawinaq junab', xuk'ut rib' jun ángel chuwäch pa ri juyub' ri kätz'inowik, naqaj che ri nim juyub', Sinaí u b'i. Ri ángel k'o pa ri q'aq' rech ri juwi' k'ix ri tajin kāk'atik. ³¹ Sib'alaj k'u xukajmaj wa'

* 7:8 Ri u kojik ri etal ri' che ru cuerpo jun ala o jun achi are wa' káb'ix "circuncisión" che, retal ri trato ri xub'an ri Dios ruk' ri Abraham ri ojer ki mam ri winaq aj Israel. † 7:9 Ri a José ri ki chaq' ru k'ojol ri Jacob, are xuquje' jun chke ri ojer ki mam ri winaq aj Israel kāmik.

ri tat Moisés aretaq xrilo. Aretaq xqeb' ruk' rech qas kãrilo, xuto chi xch'aw loq ri Qajaw Dios, xub'ij: ³² “In ri' ri ki Dios ri a mam ojer, ru Dios ri a mam Abraham, ru Dios ri a mam Isaac, ru Dios ri a mam Jacob,” —xcha'. Are k'u ri tat Moisés xuxej rib', xb'irb'itik, man xukoch' tã chik xrilo. ³³ Xub'ij k'u ri Qajaw Dios che: “Chewesaj ra xajãb', rumal chi ri ch'ãqap ulew ri at k'o wi are loq'alaj ulew wa'. ³⁴ Qas tzij wilom ri k'ãx ri tajin kãkiriq ri nu winaq pa Egipto. Nu tom ri koq'ej ri winaq, rumal k'u ri' in qajinaq loq che ki to'ik, rech ketzoqopitajik. ¡Tasa'jme'! Katintaq na b'i pa Egipto,” —xcha ri Qajaw Dios che, —kãcha ri tat Esteban.

³⁵ Are ri tat Moisés xetzelax u wãch kumal ri winaq aj Israel. Xkib'ij che: “¿Jachin xatkojow pa qa wi' che taqanel, xuquje' che q'atal tzij?” —xecha che. Pune je ri', are ri are' ri xutaq b'i ri Dios che taqanel pa ki wi' xuquje' che to'l ke. Je' xub'an ri Dios rumal ri ángel ri xuk'ut rib' chuwãch pa ri juwi' k'ix. ³⁶ Ri tat Moisés are ri are' ri xeresaj loq ri qa nan qa tat ojer pa Egipto. Xub'an nimaq taq k'uth'al xuquje' taq kajmab'al pa Egipto, pa ri Kiãq Mar, xuquje' pa taq ri juyub' ri kãtz'inowik. Kawinaq junab' k'ut xub'an wa'. ³⁷ Are wa' ri tat Moisés ri xub'ij chke ri winaq aj Israel: “Ri Dios kucha' na jun chke ri i winaqil, kutaq k'u na rech kok che q'alajisal re ru Loq' Pixab', je' jas ri xinutaq in. Rajwaxik k'ut chi kinimaj ronojel ri kub'ij chiwe,” —xcha chke. ³⁸ Tzare k'u ri' ri tat Moisés ri xk'o'ji chkixol ri winaq aj Israel ri ki mulim kib' pa ri juyub' ri kãtz'inowik, xuquje' xk'o'ji ri are' ruk' ri ángel ri xch'aw ruk' puwi' ri nim juyub', Sinai u b'i, † xuquje' kuk' ri qa nan qa tat ojer. Xuquje' xuta ri tzij ri kuya ri qas k'aslemal, xuk'am k'ut, xuya loq wa' chqe uj, —kãcha ri tat Esteban chke.

³⁹ Ri qa mam ojer k'ut, man xkaj taj xeniman che, xane xa xketzelaj u wãch. Xkipaqchij ri qa mam Moisés, xkirayij pa kanima' ri ki tzelejik jumul chik pa Egipto. ⁴⁰ Xkib'ij che ri tat Aarón: “Cheab'ana ju-jun qa tiox ri kenab'ej na chqawãch, rumal chi man qetam taj jas xuk'ulmaj we tat Moisés ri xujesan loq pa Egipto,” —xecha che. ⁴¹ Xka'n k'u jun ki tiox ri je' kãpe jun alaj ama' wakãx, xekikãmisaj taq awaj, xekisipaj k'u cho ri ki tiox ri xka'no. Xka'n k'u jun nimaq'ij, xekikot ruk' ri jun tiox ri xaq e are' xeb'anowik. ⁴² Rumal ri' ri Dios xutas rib' chkiq, xeutzogopij kanoq rech kekiq'ijilaj ri q'ij, ri ik', ri ch'imil, je' jas ri kãb'ix pa ri ki wuj ri q'alajisal taq re ru Loq' Pixab' ri Dios:

Winaq aj Israel, pa taq ri kawinaq junab' ri xixk'o'ji pa ri juyub' ri kãtz'inowik, ¿a

xeikãmisaj lo awaj che kisipaxik wa' chnuwãch in?

⁴³ Man je' taj xib'ano, xane are xeig'ijilaj nik'iaj taq dioses. Are xitelej ri rachoch ri dios, Moloc u b'i' (are jun carpa wa' ri rachoch ri ki dios Moloc), xuquje' ru ka'yeb'al ru ch'imil ri i dios, Renfán u b'i'.

Xaq e tiox ri' ri ix xixb'anowik rech keiq'ijilaj.

Xa rumal wa' xixinwesaj na b'i pa ri i tinimit ix, kixintaq k'u na b'i pa jun tinimit chik ri naj k'o wi, k'a jela' ch'ãqap che ri tinimit Babilonia,

—xcha ri Dios chke.

⁴⁴ Ri qa nan qa tat ojer, aretaq xkib'inib'ej ri juyub' ri kãtz'inowik, k'o ri rachoch Dios kuk'. § Are wa' ri b'anom ruk' manta, ri k'o wi ri tz'alam taq ab'aj re ri Pixab'. Je' k'u u b'anik wa' jas ri xub'ij ri Dios che ri qa mam Moisés, aretaq xub'ij che chi kub'an jun rachoch Dios ri je' u b'anik jas ri k'utum chuwãch. ⁴⁵ Ri qa nan qa tat ojer xkechb'ej wa' we rachoch Dios ri' pa ki q'ab' ri ki nan ki tat ri e are'. Aretaq k'ut ri winaq ri' rachi'l ri tat Josué xeb'okik, xek'o'ji pa ri kulew ri nik'iaj winaq chik ri esam b'i chkiwãch rumal ri Dios, xkik'am b'i ri rachoch Dios kuk'. Xe'q'ijilan k'u chupam k'ã pa ru q'ijol ri qa mam David ojer. ⁴⁶ Ri nim taqanel David nim xil wi rumal ri Dios, je' ri' chi xuriq nimalaj utzil pa ru k'aslemal. Rumal ri' are u rayinik kuyak jun qas rachoch ri Dios. Are Dios wa' ru Dios ri qa mam Jacob ojer xuquje'. ⁴⁷ Are k'u ri tat Salomón ru k'ojol ri tat David xyakow wa' we ja ri' che ri Dios aretaq xok che taqanel. ⁴⁸ Pune ri Nimalaj Dios aj Chikaj man kãk'o'ji tã pa jun ja ri xa b'anom kumal winaq, jas ri xub'ij ri q'alajisal re ru Loq' Pixab' ri Dios:

⁴⁹ Ri kaj are nu t'u'yulib'al ri kintagan wi puwi' ronojel, are k'u ri ulew je' ta ne ruxlanib'al ri waqan.

¿Jas k'u u wãch ri ja ri kiwaj kiyak chwe?

—kãcha ri Qajaw Dios, ¿o jawije' k'o wi ri uxlanib'al ri kinuxlan wi?

⁵⁰ ¿A mat are ri in ri xinb'anow ronojel ri k'olik?

—xcha ri Dios, —xcha ri tat Esteban.

⁵¹ Ri tat Esteban xutaqej u b'ixik chke ri ki nimaqil ri winaq: Ri alaq sib'alaj ab'ajarinaq ri anima' alaq. Ri anima' alaq man keniman tã che ri Dios, man kok tã k'u ru tzij pa jolom alaq. Alaq xaq junam kuk' ri man e kojonelab' taj. Ri alaq amaq'el

† 7:38 Ri nim juyub' Sinai are xuquje' kãkoj juyub' Horeb che ru b'i'.
Diccionario, k'isb'al re we Nuevo Testamento.

§ 7:44 Chawila' ri tzij “rachoch Dios” pa ri

käq'atej alaŋ u wäch ri Loŋ'alaj Espiritu. Junam alaŋ kuk' ri mam alaŋ ojer, —kächa'.⁵² ǂA k'o lo jun chke ri q'alajisaj taŋ re ru Loŋ' Pixab' ri Dios ri mat xb'an k'äx che kumal ri mam alaŋ ojer? Man k'o tä jun, xane xekikämisaŋ ri xeyo'w loŋ u b'ixik chi käpe na ri Cristo ri Jikomalaj Patänil re ri Dios.* Are k'u wa' ri xjach alaŋ pa ki q'ab' ri winaŋ, xkämisaŋ alaŋ.⁵³ Ru Pixab' ri Dios ri xyi' nab'e kanoŋ kumal ri ängeles che ri qa mam Moisés, are Pixab' wa' ri xyi' chech alaŋ. Pune je ri', ri xub'an ri Dios rech käyataŋ ri Pixab' pa q'ab' alaŋ, man känimaj tä alaŋ wa', —xcha ri tat Esteban chke.

Käkämisaŋ ri tat Esteban kumal ri winaŋ

⁵⁴ Ri winaŋ, aretaŋ xkita wa' we tzij ri', sib'alaj xpe koyowal che ri tat Esteban, xkimut'ut'eŋ ri ki ware chrij chuk'utik ri nimalaj koyowal.⁵⁵ Are k'u ri are' qajinaŋ ri Loŋ'alaj Espiritu puwi', xka'y chikaj, xril k'u ri je'lalaj u juluwem ri Dios, xuquje' xril ri Jesús, tak'al pa ru wikiäq'ab' ri Dios.⁵⁶ Xub'ij k'ut: ¡Chilampe alaŋ! —xcha'. Kinwil ri kaj jaŋtalik, xuquje' kinwil ri Ralk'ual ri Dios ri Qas Winaŋ[†] k'o pa ru wikiäq'ab' ri Dios, —xcha chke.

⁵⁷ Ri nimaŋ taŋ tata'ib' xkitz'apij ri ki xikin, sib'alaj ko xkiraqageŋ ki chi'. Xaq jun xkiyo' xeb'e' chrij ri tat Esteban.⁵⁸ Xkesaj b'i chrij ri tinimit, xkik'iaŋ k'u che ab'aj. Ri achijab' k'ut ri xeb'anow tzij chrij ri are' xkiya kan ri katz'iaŋ ruk' jun achi, Saulo u b'i'.⁵⁹ Aretaŋ tajin käkik'iaŋ che ab'aj, ri tat Esteban xub'an orar, xuta toŋ'ob' che ri Qajaw Jesús, xub'ij: Qajaw Jesús, k'ama la ri wanima', —xcha'.

⁶⁰ Te k'u ri' xxuki'k, ko xuraŋ u chi', xub'ij: Tat, mäya la wa' we mak ri' chkiŋ, —xcha ri tat Esteban.

Xuwi xb'itaj wa' rumal, xel ranima'.

8

Ri tat Saulo kub'an k'äx chke ri kojonelab'

¹ Ri tat Saulo utz xrilo chi xkämisaŋ ri tat Esteban.

Qas k'u pa ri q'ij ri xkäm ri are' xchap-taj u b'anik nimalaj k'äx chke ri qachalal kojonelab' pa ri tinimit Jerusalén. Konojel k'ut xejab'ux b'ik. E k'o xeb'e' pa taŋ ri tinimit re Judea, e k'o nik'iaŋ chik xeb'e' pa taŋ ri tinimit re Samaria. Xuwi ri apóstoles xekanaj kanoŋ.² Xepe k'u jujun achijab' ri qas keniman che ri Dios, xkik'am b'i ri tat Esteban, xe'kimuŋ kanoŋ. Sib'alaj xeb'oŋ' k'u chrij.³ Are k'u ri tat Saulo xutaŋeŋ u b'anik k'äx chke ri qachalal kojonelab'.

Xok cho taŋ ja, xeucharchateŋ b'i achijab', ixoŋib', xeukoj k'u pa che'.

Kätziox ri Utzalaj Tzij re ri Evangelio pa Samaria

⁴ Are k'u ri kojonelab' ri xeb'el b'i pa ri tinimit Jerusalén, xkitzijoŋ ri Utzalaj Tzij re ri Evangelio apawije' chi' ri xeb'e' wi.⁵ Ri tat Felipe xe' pa jun tinimit re Samaria, chilla' k'ut xuchaplej ki tzijob'exik ri winaŋ chrij ri Cristo.⁶ Ri winaŋ xkimulij kib' chrij ri tat Felipe. Sib'alaj xkitatab'eŋ ri tzij ri xub'ij. Xuquje' xkil ri kajmab'al taŋ etal ri tajin kub'ano.⁷ E k'ia k'u ri winaŋ ri e k'o itzelalaj taŋ espíritus chke. Xeutzir k'u wa' we winaŋ ri'. Ri itzelalaj taŋ espíritus, aretaŋ xeb'el chke ri winaŋ, xkiraŋ ki chi', xeb'e'k. E k'ia k'u ri käminaŋ ki cuerpo ri xekunataŋik, xuquje' e k'ia ri u b'anom k'äx ri kaŋan, ri man xekowin taj xeb'inik. Ri e are' xuquje' xekunataŋik.⁸ Je ri' chi konojel ri winaŋ pa ri tinimit ri' sib'alaj xekikotik.

⁹ K'o k'u jun tata' pa ri tinimit ri', Simón u b'i', ri nab'e kanoŋ xub'an ri itzinik, xesub' ri winaŋ aj Samaria rumal. Xub'an che rib' chi ri are' sib'alaj nim u b'anik pa ri tinimit.¹⁰ Konojel k'u ri winaŋ chi ak'alab' chi ri'jab' sib'alaj xkitatab'eŋ ri kub'ij ri achi ri', xkib'ij: We achi ri' are k'o ri nimalaj u chuŋ'ab' ri Dios ruk', —xecha'. Ri Nimalaj u Chuŋ'ab' ri Dios, —xuchix che ri are'.

¹¹ Ojer chi k'u ri' e sub'um loŋ ri winaŋ rumal ri itzinik ri tajin kub'ano. Rumal k'u ri' sib'alaj xkikoŋ ri xub'ij.¹² Aretaŋ k'ut ri winaŋ xkinimaj ri Utzalaj Tzij re ri Evangelio ri xutzijoŋ ri tat Felipe chke chrij ru taŋanik ri Dios, xuquje' chrij ri Jesucristo, xa je ri' e k'ia chke xb'an ki qasna', chi achijab' chi ixoŋib'.¹³ Xuquje' ne ri tat Simón xkojonik, xb'an u qasna', xuchaplej k'u rachi'laxik ri tat Felipe. Sib'alaj xuka-jmaj ri nimaŋ taŋ kajmab'al, xuquje' ri nimaŋ taŋ etal ri xeb'antajik.

¹⁴ Aretaŋ ri apóstoles ri e k'o pa ri tinimit Jerusalén xkito chi ri winaŋ pa Samaria xkinimaj ru Loŋ' Pixab' ri Dios, xekitaŋ b'i ri tat Pedro rachi'l ri tat Juan jela'.¹⁵ Aretaŋ xeopanik, xka'n orar pa ki wi' ri kojonelab' aj Samaria rech käqaj ri Loŋ'alaj Espiritu pa ki wi'.¹⁶ Je ri', rumal chi man k'o tä jun chke qajinaŋ ri Loŋ'alaj Espiritu puwi'. Xuwi b'anom ki qasna' pa ru b'i' ri Qajaw Jesús.¹⁷ Te ri' ri tat Pedro, ri tat Juan xkiya ri ki q'ab' pa ki wi' ri kojonelab', xqaj k'u ri Loŋ'alaj Espiritu pa ki wi'.

¹⁸ Ri tat Simón xrilo chi aretaŋ ri apóstoles xkiya ri ki q'ab' pa ki wi' ri kojonelab', xqaj ri Loŋ'alaj Espiritu pa ki wi', xpe k'u ri are', xuchi'j puaŋ chke.¹⁹ Xub'ij: Ya alaŋ we

* **7:52** Ri Jikomalaj Patänil re ri Dios are ri Cristo, ri To'l Qe, ri xkib'ij loŋ ri ojer taŋ q'alajisaj re ru Loŋ' Pixab' ri Dios.

† **7:56** Ri Jesús xukoj we b'i'aj ri' chb'il rib' chuk'utik chi are ri Cristo o ri Mesías ri xtz'ib'ax ojer pa ru Loŋ' Pixab' ri Dios chi käpetik.

chuq'ab' ri' chwe in xuquje', rech apachin ri kinya ri nu q'ab' puwi' kâqaj ri Loq'alaj Espîritu puwi', —xcha chke.

²⁰ Xub'ij k'u ri tat Pedro che: Utz na we ta ri rajil la kâsach u wâch wa' uk' la, rumal chi kâchomaj la chi ri kusipaj ri Dios kuya' kâloq' wa' ruk' puqa. ²¹ Man k'o tâ e la kuk' pa we chak ri', man ya'tal tâ k'u wa' che la, rumal chi man jikom tâ ri anima' la chuwwâch ri Dios. ²² Ya la kan wa' we etzelal ri' ri chomam la. B'ochi'j b'a' la ri Dios, ta' la toq'ob' che chi kâsachtaj ri mak la, are k'u ri' ri itzel chomanik ri xk'i'y pa anima' la. ²³ Q'alaj k'ut chi k'o ri k'âx ri t'uuyul pa ri anima' la. Are wa' ru xera' ri etzelal. Je' ta ne chi ri lal chaptajinaq la rumal we etzelal ri', —xcha ri tat Pedro che ri tat Simón.

²⁴ Xch'aw k'u ri tat Simón, xub'ij che ri tat Pedro: B'ana b'a' alaq orar pa nu wi' chuwwâch ri Qajaw Dios, rech man kinriq tâ ne jub'iq' ri k'âx ri xb'ij la chwe, —xcha che.

²⁵ Aretaq ri kieb' apóstoles xeto'taj chub'ixik ru b'anom ri Dios pa ri ki k'aslemal, xuquje' chutzijoxik ru Loq' Pixab' ri Dios, xetzelej b'i pa Jerusalén. Xkitzijojo kan ri Utzalaj Tzij re ri Evangelio pa taq ri alaj taq tinimit re Samaria ri xeok'ow wi.

Ri tat Felipe kâtzizon ruk' jun achi nim u b'anik aj Etiopia

²⁶ Te k'u ri' jun ángel xuch'ab'ej ri tat Felipe, xub'ij che: Chatwalij b'a', jat pa ru mox ri relb'al q'ij pa ri b'e ri kel b'i pa ri tinimit Jerusalén, kâxuli pa Gaza, —xcha che.

We b'e ri' are wa' ri kâq'atan pa ri juyub' ri kâtz'inowik. ²⁷ Xwalij k'u b'i ri tat Felipe, xe'k. Xuriq k'u jun tata' aj Etiopia pa ri b'e. Are jun tata' eunuco, * —kuchixik. We achi ri' sib'alaj nim u b'anik, are kilow ronojel ri jastaq re ri chichu' ri kâkoj Candace che ru b'i'. Ri ixoq ri' are ri nim taqanel pa ki wi' konojel ri aj Etiopia. Ri tata' ri' u petik pa ri tinimit Jerusalén ri xuq'ijilaj wi ri Dios. ²⁸ Tzelejem k'u re pa ru tinimit, t'uuyul pa ru carreta,† tajin kusik'ij ri wuj ri xutz'ib'aj ri qa mam Isaías, q'alajisal re ru Loq' Pixab' ri Dios ojer. ²⁹ Ri Espîritu rech ri Dios xub'ij che ri tat Felipe: Chatqeb' ruk' we jun carreta ri', chawachi' laj b'ik, —xcha che.

³⁰ Aretaq xqeb' ri tat Felipe, xuto chi ri tata' tajin kusik'ij ri wuj ri u tz'ib'am ri qa mam Isaías, xuta' k'u che: ¿A kâch'ob' la jas kel kub'ij ri tajin kâsik'ij la? —xcha che.

³¹ Ri tata' xub'ij che: ¿Jas ta kinb'an in chuch'ob'ik wa' we man k'o jachin ri kâb'in chwe jas kel kub'ij ri tajin kinsik'ij? —xcha che.

Xub'ij k'u che ri tat Felipe chi kâpaqi loq pa ri carreta, kât'uyi b'i ruk' are'.

³² Jawije' ri tajin kusik'ij wi ri tata' pa ru Loq' Pixab' ri Dios, je wa' kub'ij:

Je' jas ri kâb'an che jun chij
ri kâk'am b'i pa pilik,
je' xb'an che ri are'.

Je' jas jun alaj chij
ri man kuraq tâ u chi'
aretaq kâsokax ri rismal,
je' xub'an ri are', man k'o tâ
jas xub'ij.

³³ Xqasax u q'ij ri are'. Pune man k'o tâ u mak, xq'at tzij puwi'.
Man jikom tâ k'ut ri xb'an che,
man k'o tâ k'u jun ri xto'wik.

¿Jachin ta k'u ri kâkowin che
ki tzijoxik jas ki b'anik ri winaq
ri xil ta ne ki wâch rumal ri are'?

Man k'o tâ jun, rumal chi xesax b'i
pa ri tinimit, xk'am k'u b'ik
pa kâmisaxik,

—kâcha ru Loq' Pixab' ri Dios ri tajin kusik'ij ri tata'.

³⁴ Xub'ij ri tata' ri nim u b'anik che ri tat Felipe: B'ana b'a' la toq'ob', b'ij la chwe, ¿jachin chrij tajin kâch'aw ri q'alajisal re ru Loq' Pixab' ri Dios? ¿A are ri are' ri tajin kâch'aw chrij chb'il rib', o are jun chik ri kub'ij? —kâcha che.

³⁵ Xch'aw k'u ri tat Felipe. Ruk' we tzij ri' ri tajin kusik'ij ri aj Etiopia, xuchaplej u tzijoxik ri Utzalaj Tzij re ri Evangelio chrij ri Jesús. ³⁶ E b'enaq pa ri b'e, ok'owem kâka'n chuchi' jun ja', ri tata' aj Etiopia xub'ij che ri tat Felipe: K'o joron waral, ¿a mat kuya' kâb'an nu qasna' chi'? —xcha ri'.

³⁷ Ri tat Felipe xub'ij che: We qas tzij kâkojon la, kuya' kâb'an ri qasna' la, —xcha che.

Xch'aw k'u ri are', xub'ij: Kinkojo chi ri Jesucristo are ru K'ojol ri Dios, —xcha'.

³⁸ Xtaqan k'u chutak'b'axik ri carreta. Ri kieb' xe'qaj pa ri ja', xb'an k'u u qasna' ri tata' rumal ri tat Felipe. ³⁹ Aretaq xeb'el loq pa ri ja', ri Espîritu rech ri Qajaw Dios xuk'am b'i ri tat Felipe. Ri tata' ri nim u b'anik aj Etiopia man xril tâ chi u wâch. Xutaqej k'u ru b'e ri are', sib'alaj xkikot ranima'. ⁴⁰ Are k'u ri tat Felipe te' kârilo chi k'o ri are' pa ri tinimit Azoto. Xel b'ik jela', b'enam re pa ri tinimit Cesarea. Pa ronojel tinimit ri xok'ow wi xutzijojo ri Utzalaj Tzij re ri Evangelio chke ri winaq k'a xopan na pa Cesarea.

9

Waral kâqil wi ru k'exik ru k'aslemal ri tat Saulo

* **8:27** Ri eunuco are jun achi ri xtas chkiy ri nik'iaj achijab' rech kub'an na jun chak ri sib'alaj nim u b'anik. † **8:28** Ri carreta ri' are jas jun carruaje ri kâjik' kumal ri kiej, kek'oji k'u ri winaq chupam che ri b'inem.

¹ Are k'u ri tat Saulo sib'alaj royowal chkiy ri winaq ri e kojoniqan che ri Qajaw Jesús. Ri are' kraj keukāmisaj. ¡Xeuxib'ij k'ut! Rumal ri' xe' ri are', xtzijon ruk' ri ki nimal sacerdotes ri k'o pa ri tinimit Jerusalén.

² Xuta' che chi kuya b'i jujun taq wuj che, ri kub'ij wi chi yo'm taqanik pu q'ab' rech kok pa taq ri rachoch Dios pa ri tinimit Damasco. Je ri' rech keutzukuj ri keniman che ri Utzalaj Tzij re ri Evangelio, chi achijab' chi ixoqib', che ki chapik rech keuk'am loq che koksaxik pa che' pa ri tinimit Jerusalén. ³ B'enaq k'u pa ri b'e, k'o ri are' chunaqaj ri tinimit Damasco, xaq te'talik k'ut xtunun jun nimalaj saqil chrij ri xpe chikaj. ⁴ Xtzaq k'u pulew, te' xuto chi k'o jun ri xch'aw loq chikaj ri xub'ij: Saulo, Saulo, ¿jas che tajin kab'an we nimalaj k'ax ri' chwe? —xcha ri'.

⁵ Ri tat Saulo xub'ij: ¿Jachin ri lal, Tat? —xcha che.

Ri Jun ri xch'awik xub'ij: ¡in ri' ri Jesús! Ri k'ax ri tajin kab'ano, are chwe In ri tajin kab'an wi wa'. Xaq je ri' ri at tajin kariq k'ax jas ri kub'an ri wakāx ri kukoj aqan che ri jun che' t'ist'ik u wi', —xcha che.

⁶ Ri tat Saulo xuxej rib', xb'irb'itik, xub'ij: Tat, ¿jas kaj la chi kinb'ano? —xcha'.

Xub'ij k'u ri Qajaw Jesús che: Chatwalijoj, jat pa ri tinimit, káb'ix k'u na chawe jas ri rajwaxik kab'ano, —xcha che.

⁷ Ri achijab' ri e b'enaq pa ri b'e ruk' ri tat Saulo sib'alaj xkixej kib' rumal chi xkita ri ch'ab'al, man k'o tā k'u jachin xkilo. ⁸ Xwalij k'u ri tat Saulo, xujaq ru waq'āch, man xkowin tā k'ut xka'yik. Rumal ri' xa xyuqex b'i che ru q'ab', xk'am b'i pa ri tinimit Damasco. ⁹ Chila' k'ut xk'o'ji wi oxib' q'ij, man xkowin taj xka'yik. Man k'o tā k'u jas xutijo.

¹⁰ K'o k'u jun kojonel pa ri tinimit Damasco, Ananías u b'i'. Xuk'ut rib' ri Qajaw Jesús chuwāch, xub'ij che: ¡Ananías! —xcha che.

Ri are' xch'awik, xub'ij: In k'olik ri', Wa-jaw, —xcha che.

¹¹ Ri Qajaw Jesús xub'ij che: Chatwalij b'a', jat pa ri jun b'e ri káb'ix "Jikom" che. Aretaq katopan pa rachoch ri tat Judas, chata' che we k'o ri jun achi chila' aj Tarso, Saulo u b'i'. Chanim ri' tajin kub'an orar. ¹² K'o ri xuk'ut ri Dios chuwāch. Xril jun achi, Ananías u b'i', ri xok b'i' ruk', xuya ru q'ab' puwi' rech kākowinik kākā'y jumul chik, —xcha ri Qajaw Jesús che.

¹³ Xch'aw k'u ri tat Ananías, xub'ij: Qajaw, e k'ia ri ki b'im chwe chrij we achi ri' chi u b'anom k'ia u wāch k'ax chke ri winaq pa ri tinimit Jerusalén ri e kojoniqan che la. ¹⁴ Ulinaq k'u waral, yo'm loq taqanik pu q'ab' kumal ri ki nimaqil sacerdotes che ki chapik b'i' konojel ri kākikoj ri b'i' la aretaq kākā'n orar, —xcha che.

¹⁵ Xub'ij k'u ri Qajaw Jesús che: ¡jat b'a'! Are rumal chi we achi ri' cha'tal rumal rech kutzijoj ri Utzalaj Tzij chwij In chke ri winaq re ri nik'iaj taq tinimit chik, chke ri ketaqan pa ki wi', xuquje' chke ri winaq aj Israel. ¹⁶ Kink'ut k'u na chuwāch jas ri nimalaj k'ax ri rajwaxik kuriq na ri are' rumal wech in, —xcha ri Qajaw Jesús che ri tat Ananías.

¹⁷ Xe' k'u ri tat Ananías. Xok b'i' pa ri ja ri k'o wi ri tat Saulo, xuya ru q'ab' puwi', xub'ij k'u che: Wachalal Saulo, ri Qajaw Jesús, ri xuk'ut rib' chuwāch la pa ri b'e ri petinaq wi la, xinutaq loq uk' la rech kākowin la kākā'y chi na la, xuquje' rech kākaj ri Loq'alaj Espíritu puwi' la, —xcha che.

¹⁸ Chanim k'ut xetzaq loq je' ta ne jujun solot pu waq'āch ri tat Saulo. Je ri' xkowinik xka'y jumul chik ri are'. Xwalij k'ut, xb'an u qasna'. ¹⁹ Te k'u ri' xwi'k, xpe chi jumul ru chuq'ab'. Xk'o'ji k'u na kieb' oxib' q'ij kuk' ri kojonelab' ri e k'o pa ri tinimit Damasco.

Ri tat Saulo kutzijoj ru Loq' Pixab' ri Dios pa ri tinimit Damasco

²⁰ Te k'u ri' ri tat Saulo xuchaplej u tzijoxik ru Loq' Pixab' ri Dios pa taq ri rachoch Dios, kub'ij k'u chke ri winaq chi ri Jesús are ri u K'ojol ri Dios. ²¹ Konojel k'u ri xkita ru tzij sib'alaj xkikajmaj wa', xkib'ij: ¿A mat are wa' ri achi ri kub'an k'ax chke ri winaq pa Jerusalén ri kākikoj ru b'i' ri Jesús aretaq kākā'n orar? ¿A mat are ulinaq waral che ki chapik b'ik, che ki jachik pa ki q'ab' ri ki nimaqil sacerdotes? —xecha ri'.

²² Are k'u ri tat Saulo ruk' nimalaj chuq'ab' xch'awik, xuq'alajisaj k'ut chi ri Jesús qas tzij Are ri Cristo, ri To'l Qe, je ri' chi ri winaq aj Israel ri e k'o pa ri tinimit Damasco man xkiriq tā chik jas kākā'no.

Ri tat Saulo xa jub'iq' kraj chi kākāmisax kumal ri winaq aj Israel pa ri tinimit Damasco

²³ Ok'owinaq chi k'u k'ialaj taq q'ij, ri winaq aj Israel xkichomaj jas kākā'n chukāmisaxik ri tat Saulo. ²⁴ Ri are' k'ut xretamaj jas ri ki chomam u b'anik chukāmisaxik. Paq'ij chi chaq'ab' ri e are' xkiyuxlej ri tat Saulo chuchi' taq ri porta re ri tinimit chukāmisaxik. ²⁵ Are k'u ri kojonelab' xkik'am ri tat Saulo, xkiya pa jun nim chikāch. Chaq'ab' xkigasaj b'i' chrij ri tapya ri k'o chrij ri tinimit. Je' ri xka'n chuto'ik ri tat Saulo.

Ri tat Saulo kopan pa ri tinimit Jerusalén

²⁶ Aretaq xopan ri tat Saulo pa ri tinimit Jerusalén, xraj xk'o'ji kuk' ri kojonelab'. Konojel k'ut xkixej kib' che ri are' rumal chi man xkikoj taj chi are jun qas kojonel. ²⁷ Xpe k'u ri tat Bernabé, xuk'am b'i' ri tat Saulo chkiwāch ri apóstoles rech kāketa maj u wāch. Xutzijoj k'u chke jas xub'an ri tat

Saulo, xril ri Qajaw Jesús pa ri b'e, xuquje' chi xch'aw ri Qajaw Jesús ruk'. Xub'ij k'u chke chi ri tat Saulo man xuxej tä rib' che ki tzijob'exik ri winaq chrij ri Cristo pa ri tinimit Damasco. ²⁸ Je ri' ri tat Saulo xkanaj kan kuk' ri kojonelab' pa ri tinimit Jerusalén, xerachi'laj jawije' ri xeb'e' wi. ²⁹ Man xuxej tä rib' che ki tzijob'exik ri winaq chrij ri Cristo. Xuchap tzij kuk' ri winaq aj Israel ri kech'aw pa griego. Are k'u ri e are' xa xkitzujuk' jas kaka'n na chukämisaxik. ³⁰ Aretaq xketamaj wa' ri qachalal, xkik'am b'i ri tat Saulo pa ri tinimit Cesarea, xkitaq k'u b'i pa ri tinimit Tarso.

³¹ Xaq je ri' konojel ri qachalal kojonelab' ri e k'o pa Judea, pa Galilea, xuquje' pa Samaria, xuxlan ri kanima'. Tajin kekowirik, k'o k'u na ki chuq'ab'. Xkixej kib' chuwäch ri Dios, xeniman k'u che. Are ri Loq'alaj Espiritu ri tajin káb'anowik chi sib'alaj kek'iarik, chi kák'oji na ki chuq'ab'.

Waral kâqil wi ri u kunaxik ri tat Eneas

³² Pa jun q'ij ri tat Pedro tajin keusolij ri qachalal, xuquje' xe' che kilik ri qachalal kojonelab' ri e k'o pa ri tinimit Lida. ³³ Chila' xuriq wi jun achi, Eneas u b'i'. We achi ri' wajxaqib' junab' chik k'o pa ch'at, kâminaq k'u ru cuerpo. ³⁴ Ri tat Pedro xub'ij che: Tat Eneas, ri Jesucristo katkunanik. Chatwali-jog, chab'ana kan u b'anik ra ch'at, —xcha che.

Chanim k'ut xwalijik. ³⁵ Aretaq k'ut ri winaq ri e k'o pa ri tinimit Lida, xuquje' ri e k'o pa ri taq'aj re Sarón ri k'o wi ri Lida, xkilo chi ri tat Eneas xwalijik, xkiya kan ri ojer ki k'aslemaal. Rumal ri xb'antajik xekojon che ri Qajaw Jesús.

Waral kâtzijox wi jun chichu' kojonel ri xkämik, xk'astaj k'ut

³⁶ Pa taq ri q'ij ri' k'o jun chichu' kojonel pa ri tinimit Joje, Tabita u b'i', ri káb'ix Dorcas che pa ri ch'ab'al griego. We chichu' ri' amaq'el xub'an ronojel u wäch utzil chke ri winaq, xeuto' k'u ri k'o ki rajwaxik. ³⁷ Pa taq ri q'ij ri' xyaway ri nan Dorcas, xkämik. Aretaq xch'ajtaj ru cuerpo, xyi' pa ru kawiq ja. ³⁸ Naqaj k'ut k'o wi ri tinimit Joje che ri tinimit Lida ri k'o wi ri tat Pedro. Ri kojonelab' xkito chi ri tat Pedro k'o pa Lida, xekitaq b'i'kieb' achijab' chub'ixik che: B'ana b'a' la jun toq'ob', sa'j la kuk' chanim, —xecha b'ik.

³⁹ Ri tat Pedro xub'an k'u u b'anik rib', xe' kuk' ri achijab'. Aretaq xeopanik, xkik'am b'i ri tat Pedro pa ri kawiq ja ri k'o wi ri kâminaq. Xepe k'u konojel ri malka'nib' ixoqib', xemuli chrij ri tat Pedro, tajin keb'oq'ik, xkik'ut taq ri kamixa' xuquje'

nik'iaj atz'iaq chik ri xub'an ri nan Dorcas aretaq k'aslik. ⁴⁰ Ri tat Pedro xub'ij chke chi keb'el na b'i konojel, te k'u ri' xxuki'k, xub'an orar. Xka'y k'u che ri chichu' ri kâminaq, xub'ij: Nan Dorcas, walij b'a' la, —xcha che.

Ri nan Dorcas xka'y'ik, aretaq k'ut xril ri tat Pedro, xwalijik, xku'b'ik. ⁴¹ Ri tat Pedro xuchap che ru q'ab', xuyako. Xeusik'ij ri malka'nib' ixoqib', xuquje' konojel ri nik'iaj kojonelab' chik. K'asal chik xuya chkiwäch rech kâkilo. ⁴² Xel k'u u tzijol wa' pa ronojel ri tinimit Joje. E k'ia k'ut xekojon che ri Qajaw Jesús. ⁴³ Naj k'ut xk'oji na ri tat Pedro pa ri tinimit Joje cho rachoch jun tata' josq'il tz'um, Simón u b'i'.

10

Ri tat Pedro ke' cho rachoch jun tata', Cornelio u b'i', ri man aj Israel taj

¹ K'o k'u jun tata', Cornelio u b'i', pa ri tinimit Cesarea. Ri tata' ri' are jun ki nimal soldados ri k'o cien achijab' pu q'ab'. Ri soldados ri' káb'ix "Aj Italiano" chke. ² Ri are' xq'ijilan che ri Dios, junam kuk' konojel ri e k'o pa rachoch. Xniman che ri Dios, xuxej rib' chuwäch. K'ia ri u b'anom che ki to'ik ri meb'a'ib' winaq aj Israel, amaq'el k'ut xub'an orar chuwäch ri Dios. ³ Pa jun q'ij, kraj pa ri rox hora re ri b'enaq q'ij, k'o ri xuk'ut ri Dios chuwäch ri tat Cornelio. Are jun ángel ri taqom loq rumal ri qa Tat. Qas xrilo xok b'i ri ángel ruk', te k'u ri' ri ángel xub'ij che: ¡Tat Cornelio! —xcha che.

⁴ Ri are' sib'alaj xuxej rib', ko xka'y che ri ángel, xuta' che: ¿Jas kaj la, tat? —xcha che.

Are k'u ri ángel xub'ij che: Ri Dios retam jas a b'anom, chi sib'alaj kab'an orar chuwäch, xuquje' rilom ri utzil ri kab'an chke ri winaq. Man sachinaq tä wa' che ri Are'. ⁵ Cheataqa b'i' jujun achijab' pa ri tinimit Joje chusik'ixik loq jun tata', Simón u b'i', ri xuquje' káb'ix Pedro che, —kâcha'. ⁶ Ri are' k'o pa rachoch jun tata' ri xuquje' kâkoj Simón che ru b'i'. We tata' ri' are josq'il tz'um, ri k'o rachoch chuchi' ri mar, —kâcha'. Ri tat Pedro kub'ij k'u na chawe jas ri rajwaxik kab'ano, —xcha ri ángel che ri tat Cornelio.

⁷ Aretaq b'enaq chi ri ángel ri xtzijon ruk' ri tat Cornelio, ri are' xeusik'ij kieb' chke ri patänil taq re, xuquje' jun soldado ri sib'alaj ku'l u k'ux ri tat Cornelio chrij rumal qas tzij kâkojon ri soldado ri' che ri Dios. ⁸ Xutzijoj chke ronojel ri xrilo, te k'u ri' xeutaq b'i pa ri tinimit Joje.

⁹ Chukab' q'ij e b'enaq ri achijab' pa ri b'e, naqaj chik e k'o wi che ri tinimit Joje. Ri tat Pedro k'ut xpaqi puwi' ri ja ri k'o wi

* 10:9 Pa taq ri q'ij ri' are li'lik ki wi' ri kachoch ri winaq. Chila' xeuxlan wi, xuquje' xechakunik.

chub'anik orar,* kraj are ri u kab'lajuj hora chik. ¹⁰ Sib'alaj kånun chi ri u tat Pedro, kraj kãwi'k, māj'a' k'u kutzir ru wa re paq'ij. Ri Dios xub'an che ri tat Pedro chi xsachi'k, k'o k'u ri xuk'ut ri Dios chuwäch. ¹¹ Xril ri kaj tajin kãjaqjob'ik, te k'u ri' xrilo chi tajin kãqaj loq cho ruwächulew jun lik'ilik manta ri sib'alaj nim, ri ximital chke ri kiejeb' u tza'm. ¹² E k'o k'u ronojel u wäch awaj chupam ri manta. E k'o chikop ri kajaj kaqan, xuquje' e k'o chikop ri kãkijuruj kib', xuquje' nik'iaj chikop ri kerapapik. ¹³ Xuta k'u jun ri xch'aw loq chikaj ri xub'ij che: Chatwalijog, Pedro, chakãmisaj apachike chikop, chatwoq, —xcha che.

¹⁴ Xch'aw k'u ri tat Pedro, xub'ij che: ¡No, Wajaw! Man k'o tä k'u jumul nu tijom ri man ya'tal tä u tijik, ri äwas chwe kintijo, —xcha che.

¹⁵ Xch'aw jumul chik ri Jun ri xch'aw nab'e, xub'ij che ri tat Pedro: Ri kub'ij ri Dios chi ya'tal u tijik, mab'ij at che chi äwas u tijik wa', —xcha che.

¹⁶ Oxmul k'ut xb'antaj wa'. Te k'u ri' ri manta xpaqi chi jumul chikaj. ¹⁷ Ri tat Pedro tajin kuchomaj jas kel kub'ij wa' ri xrilo aretaq ri achijab' ri e taqom b'i rumal ri tat Cornelio xeopan chi' ri uchib'e chuta'ik we chila' ri rachoch ri tat Simón. ¹⁸ Ko xech'awik chuta'ik we chila' jejel wi jun tata', Simón u b'i, ri xuquje' kãb'ix Pedro che. ¹⁹ Tajin kãchoman k'u na ri tat Pedro chrij ri xuk'ut ri Dios chuwäch aretaq ri Loq'alaj Espiritu xub'ij che: Chawilampe', e k'o oxib' achijab' tajin katkitzujuk. ²⁰ Chatwalij b'a', chatqaj k'u na b'ik. Jat kuk', mub'an k'u kieb' a k'ux. Are ri in xinyo'w taqanik chke chi kepe che a ch'ab'exik, —xcha ri Loq'alaj Espiritu che ri tat Pedro.

²¹ Xqaj k'u loq ri tat Pedro, xopan chila' jawije' e k'o wi ri achijab' ri e taqom b'i rumal ri tat Cornelio, xub'ij chke: In ri' ri kintzujuk alaq. ¿Jas tajkil alaq wuk'? —xcha chke.

²² Ri e are' xech'awik, xkib'ij: Uj taqom loq rumal ri tat Cornelio, ri ki nimal jun ciento soldados. Are jun tata' ri jikom ranima', ri kãniman che ri Dios. Ri are' sib'alaj nim kil wi, xuquje' sib'alaj loq' chkiwäch konojel ri winaq aj Israel. Xb'ix k'u che rumal jun ángel ri xtaq loq rumal ri Dios, chi kutaq sik'ixik la rech ke' la cho rachoch, kuta k'u na ri tzij ri kãb'ij la, —xecha che.

²³ Xeoksax k'u pa ja rumal ri tat Pedro, xekanaj chila' che ri jun aq'ab'. Chukab' q'ij xewalijik, xe' k'u ri tat Pedro kuk' ri tata'ib'. E rachil' lujun qachalal aj Joqe.

²⁴ Chukab' q'ij xeopan pa ri tinimit Cesarea. Eyeninaq k'u ri tat Cornelio chke junam kuk' jujun chke ri rachalaxik, xuquje' ri winaq ri sib'alaj e utz ruk' ri are'. ²⁵ Aretaq xopan ri tat Pedro, xel loq ri tat

Cornelio chuk'ulaxik, xxuki k'u chuwäch chuq'ijilaxik. ²⁶ Xpe k'u ri tat Pedro, xuyaq, xub'ij che: ¡Walij la, tat Cornelio! Ri in, xaq in achi jas ri la!, —xcha che.

²⁷ Tajin ketzijonik, xeb'ok apan chi' ja. Xok k'u b'i ri tat Pedro, te' xrilo k'ia winaq ki mulim kib'. ²⁸ Xub'ij ri tat Pedro chke ri winaq: Ri alaq etam alaq chi man ya'tal tä che jun aj Israel kãrachi'laj o kok pa rachoch jun winaq ri man aj Israel taj. Ri Dios k'ut xuk'ut chnuwäch chi man kuya' taj kinb'ij chi are äwas ri kink'o'ji ruk' jun winaq ri man aj Israel o kinb'ij chi man ch'ajch'oj tä ri ranima' ri are' cho ri Dios. ²⁹ Rumlal ri' aretaq xtaqan alaq che nu sik'ixik, man k'o tä jas xinkoj pa nu tzij, xinpe chanim. Kwaj k'ut kinwetamaj jas che xtaqan alaq che nu sik'ixik, —xcha ri tat Pedro chke ri winaq.

³⁰ Xch'aw k'u ri tat Cornelio, xub'ij: Xke' ne lo kiejeb' q'ij, je' taq hora ri' tajin kinb'an ri ayuno. Pa ri u rox hora re ri b'enaq q'ij in k'o pa ja, tajin kinb'an orar. Xaq k'u te'talik xtak'atob' jun achi chnuwäch ri sib'alaj kãjuluw ri ratz'iaq. ³¹ Xub'ij k'u chwe: "Tat Cornelio, ri oración ri xab'ano xtataj rumal ri Dios, ri utzil ri tajin kab'an chke ri winaq ri k'o ki rajwaxik sib'alaj utz kãril wi ri Dios. ³² Chattaqan b'a' chusik'ixik loq ri tat Simón ri xuquje' kãb'ix Pedro che, ri k'o pa rachoch jun tata', Simón u b'i, ri k'o pa ri tinimit Joqe. We tata' ri' are josq'il tz'um ri k'o rachoch chi' ri mar. Aretaq kãpetik kub'ij na chawe jas ri rajwaxik kab'ano," —xcha chwe. ³³ Rumlal ri' chanim xintaqan che sik'ixik la, k'amow k'ut chi xpe la. Che k'u we chanim qonojel qa mulim qib' chuwäch ri Dios. Kãqaj k'ut kãqatatab'ej ronojel ri taqom la rumal ri Dios chub'ixik chqe, —xcha ri tat Cornelio che ri tat Pedro.

Ri tat Pedro kutzijoj ru Loq' Pixab' ri Dios cho rachoch ri tat Cornelio

³⁴ Xuchaplej k'u tzijonem ri tat Pedro, je wa' xub'ij: Kãmik qas xinwetamaj chi ri Dios xaq junam keril konojel ri winaq. ³⁵ Xa apachike tinimit ri kepe wi, ri Dios utz keril ri winaq ri kãkixej kib' chuwäch, ri keniman k'u che, ri kãka'n ronojel u wäch utzil. ³⁶ Ri Dios xch'aw kuk' ri winaq aj Israel rech kuya u b'ixik ri Utzalaj Tzij re ri Evangelio chke. Ri Evangelio ri' kub'ano chi keutzir ri winaq ruk' ri Dios, kuxlan k'u ri kanima'. Xub'an wa' rumal ri Jesucristo, ri Qajaw nimalaj qonojel. ³⁷ Ri alaq qas etam alaq ri xb'antaj pa ronojel ri Judea, xchaptaj b'i pa Galilea aretaq ri tat Juan xutzijoj ru Loq' Pixab' ri Dios chke ri winaq, xub'an k'u ki qasna'. ³⁸ Etam alaq chi ri Dios xuya u chuq'ab' ri Jesús aj Nazaret rumal ri Loq'alaj Espiritu, xb'in k'u pa taq ri tinimit, xub'an ronojel u wäch utzil chke ri winaq, xeukunaj konojel ri ki riqom k'äx

pu q'ab' ri Itzel. Je' xub'an wa' rumal chi ri Dios are ri Are' k'o ruk'. ³⁹ Ri uj k'ut qas xqil wa' ronojel ri xub'an ri Jesús pa taq ri juyub' re Judea xuquje' pa ri tinimit Jerusalén. Te k'u ri' xkámisaxik, xrip cho ri cruz. ⁴⁰ Ri Dios k'ut xuk'astajisaj churox q'ij chkixol ri káminaqib', xub'ano chi xuk'ut rib' chqawäch uj. ⁴¹ Man xuk'ut tä k'u rib' chkiwäch konojel ri winaq, xane xuwi chqawäch uj, ri ojer ri' uj cha'tal rumal ri Dios rech káqaq'alajisaj ru Tzij. Uj k'u ri' ri junam xujwi' ruk' ri Jesús aretaq k'astajinaq chik chkixol ri káminaqib'. ⁴² Xujutaj k'ut rech káqatzijoj ru Loq' Pixab' ri Dios chke ri winaq, xuquje' rech káqaq'alajisaj chi are wa' ri Jesús ri xoksax rumal ri Dios che Q'atal Tzij pa ki wi' ri e k'ask'oj, xuquje' pa ki wi' ri káminaqib'. ⁴³ Xuquje' konojel ri q'alajisaj taq re ru Loq' Pixab' ri Dios ojer ki b'im loq chi konojel ri kekojon che ri Jesús, rumal ri Are' käsachtaj na ri ki mak, —xcha chke.

Káqaj k'u ri Loq'alaj Espíritu pa ki wi' ri winaq ri man aj Israel taj

⁴⁴ K'ä tajin káztzijon ri tat Pedro aretaq xqaj ri Loq'alaj Espíritu pa ki wi' konojel ri tajin kákitatab'ej ru Loq' Pixab' ri Dios. ⁴⁵ Are k'u ri kojonelab' aj Israel ri e petinaq ruk' ri tat Pedro, sib'alaj xkikajmaj chi xuquje' xqaj ri Loq'alaj Espíritu pa ki wi' ri nik'iaj winaq chik ri man e aj Israel taj. ⁴⁶ Xkita k'ut chi kech'aw pa jule' taq ch'ab'al chik, xuquje' kákiya u q'ij ri Dios. ⁴⁷ Xub'ij k'u ri tat Pedro: ¿A k'o ne lo jun ri kuya' kub'ij chi man kuya' taj káb'an ki qasna' we winaq ri', ri ki k'amom ri Loq'alaj Espíritu, jas ri qa k'amom uj? Man k'o taj, —xcha chke.

⁴⁸ Xtaqan k'u ri tat Pedro chi káb'an ki qasna' pa ru b't' ri Qajaw Jesús. Ri kojonelab' k'ut xkib'ochi'j ri tat Pedro chi kákanaj na kan kieb' oxib' q'ij chik kuk'.

11

Ri tat Pedro kutzijoj ronojel wa' chke ri kojonelab' pa ri tinimit Jerusalén

¹ Xkita k'u ri apóstoles, xuquje' ri kojonelab' ri e k'o pa Judea, chi ri nik'iaj winaq chik ri man e aj Israel taj xkik'amowaj ru Loq' Pixab' ri Dios. ² Aretaq xtzelej ri tat Pedro pa Jerusalén, ri kojonelab' aj Israel ri xaq kákichomaj ri retal ri ojer trato, xkichap yoo'onik chrij ri are'. ³ Xkita k'u che: ¿Jas che xok la kuk' ri winaq ri man aj Israel taj, te k'u ri' xwi' la kuk'? —xecha che.

⁴ Are k'u ri tat Pedro xuchap u tzijoxik ronojel ri xb'antajik, xub'ij chke: ⁵ Pa jun q'ij in k'o pa ri tinimit Jope. Aretaq tajin kinb'an orar, k'o ri xuk'ut ri Dios chnuwäch. Xinwil jun nimalaj manta ri tajin káqaj loq chikaj, chapom che ri kiejeb' u tza'm, qajem kub'ano jawije' ri in k'o wi. ⁶ Aretaq qas xinka'y che, te ri' xinwilo e k'o awaj

kajkaj kaqan chupam, nimaq taq awaj, chikop ri kákijuruj kib', xuquje' chikop ri k'o ki xik'. ⁷ K'o k'u Jun ri xch'aw loq chikaj ri xub'ij chwe: “Chatwaliñoq, Pedro, chakámisaj apachike chikop, chatwoq.” —xcha chwe. ⁸ Ri in k'ut xinb'ij: “¡No, Wajaw! Man k'o tä jumul nu tijom ri man ya'tal tä u tijik, ri áwas chwe kintijo,” —xinchá che. ⁹ Xinuch'ab'ej chi jumul, xub'ij: “Ri kub'ij ri Dios chi ya'tal u tijik, mab'ij k'u che chi áwas u tijik wa',” —xcha chwe. ¹⁰ Oxmul wa' xuk'ut rib' chnuwäch, te k'u ri' ri manta ri e k'o wi ri awaj xpaqi chi jumul chikaj. ¹¹ Che we chanim ri' xeopan oxib' achijab' che nu tzukuxik, ri ki petik pa ri tinimit Cesarea. Xeb'ok k'u pa ri ja jawije' ri in k'o wi. ¹² Ri Loq'alaj Espíritu rech ri Dios xub'ij chwe chi mub'an kieb' nu k'ux kine' kuk'. Xeb'e' we waqib' qachalal ri' wuk'. Qonojel k'ut xujok b'i pa rachoch jun tata'. ¹³ Ri tata' ri' xutzijoj chqe chi xril jun ángel ri xtak'i chuwäch pa ri ja, ri xub'ij che: “Cheataqa b'i jujun achijab' pa ri tinimit Jope chusik'ixik loq jun tata', Simón u b'i, ri xuquje' káb'ix Pedro che. ¹⁴ Ri are' kub'ij na chawe jas ri rajwaxik kab'ano rech kariq ru tob'anik ri Dios, ri at xuquje' konojel ri awachalaxik,” —xcha che. ¹⁵ Aretaq k'ut tajin kinq'alajisaj ru Loq' Pixab' ri Dios chkiwäch ri winaq ri ki mulim kib' chila', xqaj ri Loq'alaj Espíritu pa ki wi', je' jas ri xqaj pa qa wi' uj nab'e. ¹⁶ Xna'taj k'u chwe ri tzij ri xub'ij ri Qajaw Jesús: “Ri tat Juan qas tzij xub'an qasna' ruk' ja', ri ix k'ut káb'an na i qasna' ruk' ri Loq'alaj Espíritu,” —xcha'. ¹⁷ Je k'u ri', we ri Dios xusipaj chke ri e are' je' jas ri xusipaj chqe uj ri uj kojoninaj che ri Qajaw Jesucristo, ¿jas ta ne nu b'anik in chi king'atej ri kub'an ri Dios? —xcha ri tat Pedro chke.

¹⁸ Aretaq ri qachalal kojonelab' aj Jerusalén xkita ri xub'ij ri apóstol Pedro, man k'o tä chi jas xkib'ij, xkiya k'u u q'ij ri Dios, xkib'ij: “Xuquje' b'a' ri nik'iaj winaq chik xyi' chke rumal ri Dios chi káik'ix kanima', káik'ix k'u ki chomanik rech kákirij ke ri k'aslemal ri man k'o tä u k'isik! —xecha ri'.

Waral káztzijox wi ri ropanik ri Utzalaj Tzij re ri Evangelio pa ri tinimit Antioquia

¹⁹ Konojel k'u ri kojonelab' xeanimaj chuwäch ri k'áx'ol ri xwalij chkiq pa Jerusalén pa ru q'ijol ri tat Esteban. E k'o ri xeb'e' pa Fenicia, pa Chipre, xuquje' pa ri tinimit Antioquia. Chila' k'ut xaq xuwi chke ri winaq aj Israel xkitzijoj wi ru Loq' Pixab' ri Dios. Man xkitzijoj tä wa' chke ri nik'iaj winaq chik. ²⁰ E k'o k'u jujun kojonelab' aj Chipre, aj Cirene ri xeopan pa Antioquia, e are k'u taq wa' xkitzijoj ri Evangelio rech ri Qajaw Jesús chke ri nik'iaj winaq chik ri man e aj Israel taj. ²¹ Xyi' k'u ki chuq'ab'

rumal ri Dios, je ri' chi e k'ia xekojonik, xkiya kan ri ojer ki k'aslemal, xkik'amowaj ri Qajaw Jesús pa kanima'.

²² Aretaq k'ut xopan u tzijol wa' kuk' ri qachalal kojonelab' ri e k'o pa ri tinimit Jerusalén, xkitaq k'u b'i ri tat Bernabé pa ri tinimit Antioquía. ²³ Aretaq xopan ri tat Bernabé, xrilo k'u chi konojel ki riqom ru toq'ob' ri Dios, sib'alaj xkikot ri are'. Xe-upixb'aj k'u konojel chi kákitajej ri konojel chríj ri Qajaw Jesús, jikom k'u ri kanima'. ²⁴ Ri tat Bernabé are jun utzalaj tata', yo'm u chuq'ab' rumal ri Loq'alaj Espíritu, xuquje' sib'alaj nim ru konojel. Xa je ri' e k'ia ri xekojon che ri Qajaw Jesús rumal ri are'.

²⁵ Te k'u ri' xe' ri tat Bernabé pa ri tinimit Tarso chutzukuxik ri tat Saulo. Aretaq xurigo, xuk'am b'i pa ri tinimit Antioquía. ²⁶ Jun junab' k'ut xek'oji chila' kuk' ri qachalal kojonelab', xe'kitijoj k'ia winaq. Are pa ri tinimit Antioquía ri xkoj wi Cristianos* che ki b'i' ri kojonelab' nab'e mul.

²⁷ Pa taq k'u ri q'ij ri' e k'o jujun q'alajisal taq re ru Loq' Pixab' ri Dios ri xeb'el b'i pa ri tinimit Jerusalén, xeb'e' pa ri tinimit Antioquía. ²⁸ Jun chke ri e are', are Agabo u b'i'. Xtak'i k'u aq'an chkixol ri qachalal. Xyi' che rumal ri Loq'alaj Espíritu chi kuya u b'ixik chi kápe na jun nimalaj wi'jal pa ronojel ri ulew ri e k'o wi winaq. Xub'an k'u ri nimalaj wi'jal ri' aretaq k'o ri tat Claudio César che nimalaj taqanel puwi' ri Roma. ²⁹ Are k'u ri kojonelab' ri e k'o pa ri tinimit Antioquía xkíchomaj u mulixik jujun taq quetzal rech kákitaj b'i chke ri kojonelab' ri e k'o pa Judea che ki to'ik. Xkiya k'ut jampa' ri xekowin chuya'ik. ³⁰ Xkimulij k'u ri kuchuj, xkijach b'i pa ki q'ab' ri tat Bernabé, ri tat Saulo rech káik'am b'i chke ri k'amal taq ki b'e ri kojonelab' aj Judea.

12

Waral káqil wi ru kámisaxik ri apóstol Jacobo xuquje' ri rokir ri apóstol Pedro pa che'

¹ Pa taq k'u ri q'ij ri' ri tat Herodes ri nim taqanel xuchap u b'anik k'ax chke jujun chke ri qachalal kojonelab'. ² Xutaq k'u u kámisaxik ri tat Jacobo ratz ri tat Juan ruk' machete. ³ Aretaq xrilo chi xqaj wa' ri xub'ano chkiwäch ri winaq aj Israel, xtaqan chuchapik ri tat Pedro. Xk'ulmataj wa' aretaq tajin ri nimaq'ij re ri kaxlan wa ri man ko tá ch'am ruk'.* ⁴ Aretaq u chapom chik, ri tat Herodes xukoj pa che', xujach pa ki q'ab' kiejeb' mulaj soldados rech kákichajij. E kajkaj ri soldados e k'o pa ri jujun mulaj. Are k'u u chomanik ri tat Herodes kuya ri tat

Pedro chkiwäch ri winaq aretaq ok'owinaq chi ri nimaq'ij. ⁵ Xa je ri' xchajix ri tat Pedro kumal ri soldados pa ri che'. Are k'u ri qachalal kojonelab' ruk' chuq'ab' xkitaqej u b'anik orar puwi' ri tat Pedro.

Ri Dios káresaj loq ri tat Pedro pa che'

⁶ Aretaq ri tat Herodes xraj xresaj loq rech kuya chkiwäch ri winaq, pa ri aq'ab' ri' ri tat Pedro warinaq chkixol kieb' soldados, ximom ruk' kieb' ximib'al re ch'ich'. E k'o chi k'u nik'iaj soldados chik ki chajim ru chi' ri che'. ⁷ Xaq te'talik xtak'atob' jun ángel taqom rumal ri Dios chuxkut ri tat Pedro, te k'u ri' xub'an saq che ru pam ronojel ri che', je' ta ne chi xetzij kieb' oxib' chäj. Ri ángel xuchap ri tat Pedro pu tolók', xuk'asuj, xub'ij che: ¡Chatwalijoj chanim! —xcha che.

Chanim xet'oqopin ri ximib'al re ch'ich' ri kojom che ru q'ab'. ⁸ Xub'ij k'u ri ángel che: Chakoj ri awatz'iaq, chaxima ri a xajäb', —xcha che.

Ri tat Pedro je' xub'ano. Te k'u ri' ri ángel xub'ij chi che: ¡Chakoj ra q'u! ¡Jo' b'a! Chinaterenej, —xcha che.

⁹ Xel k'u b'ik, xteri b'i ri tat Pedro chríj ri ángel. Man kuch'ob' tá k'ut we qas tzij chi are jun ángel ri tajin kárido. Kuchomaj ri are' chi xa achik' wa' ri tajin kub'ano. ¹⁰ Xeok'ow chkiwäch ri nab'e taq chajinelab', chkiwäch ri ukab' xuquje'. Aretaq xeopan ruk' ri porta re ch'ich' ri k'o chi' ri b'e, xujaj k'u rib' u tukiel. Xeb'el b'ik, xkiq'axaj jun b'e, xyi' k'u kan ri tat Pedro u tukiel rumal ri ángel. ¹¹ Are k'u ri tat Pedro xul pa saq, xub'ij: Kámik kinch'ob'o chi qas tzij ri Qajaw Dios u taqom loq jun ángel rech ri Are' che wesaxik pu q'ab' ri tat Herodes, xuquje' pa ki q'ab' ri winaq aj Israel ri e eyeninaq rech káka'n k'ax chwe, —xcha'.

¹² Je' tajin kuchomaj wa', xe' cho rachoch ri nan María ru nan ri tat Juan ri xuquje' káb'ix Marcos che. Chila' k'ut e k'o wi k'ia kojonelab' ri junam tajin káka'n orar. ¹³ Aretaq ri tat Pedro xch'aw chi' ri porta re uchib'e, xel loq jun ali u b'i' Rode che rilik. ¹⁴ Aretaq k'ut xuch'ob' ru ch'ab'al ri tat Pedro, xa rumal ri nimalaj u kikitomal xsach che chi rajwaxik u jaqik na ri uchib'e. Man xujaj tá k'ut, xane aninaq xe' chub'ixik chke ri e k'o pa ja chi ri tat Pedro k'o chi' ri b'e. ¹⁵ Ri e are' k'ut xkib'ij che: ¡Xa xatch'ujar ri! —xecha'.

Are k'u ri ali xujikib'a u b'ixik chke chi qas tzij are ri tat Pedro. Xkib'ij k'ut: ¡Man are taj! Xane are wa' ri ángel ri chajil re, —xecha'.

¹⁶ Are k'u ri tat Pedro xutaqej tzijonem chi' ri b'e. Aretaq xkijaj ri porta re ri uchib'e, te' xkilo chi qas are', xkixej k'u kib'.

* **11:26** Ri tzij "Cristiano" kel kub'ij chi are kákojon jun che ri Jesucristo, kutaqej k'u ru tijonik ri Are' xuquje' ronojel ru Loq' Pixab' ri Dios. * **12:3** Ri kaxlan wa ri man k'o tá ch'am ruk' are ri xkitij ri winaq aj Israel pa ri aq'ab' ri xeb'el loq pa Egipto. Xb'an nimaq'ij che rumal chi are natab'al re ri q'ij ri xetzoqopix rumal ri Dios.

¹⁷ Xub'ij k'u chke ruk' ru q'ab' chi mech'aw chik. Te ri' xub'ij chke jas xub'an ri Dios che resaxik loq pa che'. Xub'ij k'u chke chi kākib'ij wa' che ri tat Jacobo xuquje' chke ri nik'iaj qachalal chik.

Te k'u ri' xel b'ik, xe' pa jun k'olib'al chik.

¹⁸ Aretaq k'ut xsaqirik, konojel ri soldados xetontirik rumal chi man ketam taj jas xub'an ri tat Pedro. ¹⁹ Are k'u ri tat Herodes xtaqan chutzukuxik, man xuriq tā k'ut. Are xuya wa' chkiq ri chajinelab', xutaq k'u ki kāmiasaxik. Te k'u ri' ri tat Herodes xel b'i pa Judea, xe' pa ri tinimit Cesarea, chila' k'ut xkanaj wi.

Waral kätzijox wi jas xub'an ri tat Herodes, xkāmik

²⁰ Sib'alaj xpe royowal ri nim taqanel Herodes chke ri winaq ri e k'o pa ri tinimit Tiro, xuquje' ri e k'o pa ri tinimit Sidón. Xa je ri' xkichomaj konojel ri winaq re taq ri tinimit ri' xeb'e' ruk' ri tat Herodes. Xekowin k'ut xka'n utz ruk' ri tat Blasto, jun tata' ri nim u b'anik, patānil re ri tat Herodes ri kātajan puwi' ri rachoch ri are'. Rumal ri tat Blasto xkib'ij che ri tat Herodes chi kutzir kuk'. Konojel k'u ri winaq ri e k'o pa ri tinimit Tiro, ri tinimit Sidón xkesaj ri tzuqub'al ke pa rulew ri tat Herodes. ²¹ K'o k'u jun q'ij ri tat Herodes xeusik'ij konojel. Ri are' xukoj ri je'lalaj ratz'iaq ri nim kilik, xt'uyi pa ru t'uyulib'al ri kāt'uyi wi aretaq kuya taqanik, te k'u ri' xuya jun tzijonem chkiwäch. ²² Ri winaq k'ut xkichap u raqik ki chi', xkib'ij: ¡Are jun dios wa' ri tajin käch'awik, man are tā jun achi! —xecha'.

²³ Chanim k'ut xpe jun āngel rech ri Dios, xusok ri tat Herodes rumal chi man xuya tā u q'ij ri Dios. Xtij k'u kumal ixjut, xkāmik.

²⁴ Are k'u ru Loq' Pixab' ri Dios xjab'unik, pa ronojel tinimit k'ut kätzijox wi.

²⁵ Ri tat Bernabé rachi'l ri tat Saulo xb'antaj kan ri ki chak pa Jerusalén, xetzelej pa Antioquía, xkik'am k'u b'i ri a Juan kuk', ri xuquje' káb'ix Marcos che.

13

Ri tat Bernabé rachi'l ri tat Saulo kākichap ki b'inem chutzijoxik ru Loq' Pixab' ri Dios

¹ E k'o k'u q'alajisal taq re ru Loq' Pixab' ri Dios chkixol ri qachalal kojonelab' ri e k'o pa ri tinimit Antioquía, xuquje' e k'o tijonelab'. E are' ri tat Bernabé, ri tat Simón ri xuquje' káb'ix Negro che, ri tat Lucio ri aj Cirene, ri tat Manaén ri junam xk'iyisax ruk' ri tat Herodes ri nim q'atal tzij re Galilea, xuquje' k'o ri tat Saulo. ² Pa jun q'ij tajin keq'ijilan che ri Qajaw Dios, xuquje' tajin kaka'n ayunar, xch'aw k'u ri Loq'alaj Espiritu, xub'ij: Chitasa ri tat Bernabé rachi'l ri tat Saulo chub'anik ri chak ri e nu sik'im wi, —xcha chke.

³ Aretaq xeto'taj che ri ayuno, xka'n orar, xkiya ri ki q'ab' pa ki wi', te k'u ri' xekitaq b'ik.

Ri tat Bernabé, ri tat Saulo kākitzijoj ru Loq' Pixab' ri Dios pa Chipre

⁴ Xetaq k'u b'i ri tat Bernabé, ri tat Saulo rumal ri Loq'alaj Espiritu, xa je ri' xeb'e' pa ri tinimit Seleucia, kelik chi b'i chila' pa barco, xeq'ax pa Chipre, jun ch'āqap ulew wa' ri k'o pa ri mar. ⁵ Aretaq xeopan pa ri tinimit Salamina ri k'o chi' ri mar, xkitzijoj ru Loq' Pixab' ri Dios pa taq ri rachoch Dios ri kākimulij wi kib' ri winaq aj Israel. Kachi'l k'u ri a Juan ri xuquje' káb'ix Marcos che, kātob'an ri are' kuk' chutzijoxik ru Loq' Pixab' ri Dios. ⁶ Xkib'inib'ej k'u ronojel ri ch'āqap ulew ri', xeopan pa ri tinimit Pafos. Chila' xkiriq wi jun ajq'ij aj Israel, ri Barjesús u b'i'. Ri are' kub'an che rib' chi q'alajisal re ru Loq' Pixab' ri Dios, man qas tzij tā k'u ri kub'ij. ⁷ Ri ajq'ij ri' k'o ruk' ri nim q'atal tzij, Sergio Paulo u b'i', jun tata' wa' ri sib'alaj k'o u no'j. Xtaqan k'u ri are' chusik'ixik ri tat Bernabé rachi'l ri tat Saulo, rumal chi kraj kuta ru Loq' Pixab' ri Dios. ⁸ Are k'u ri ajq'ij ri káb'ix Elimas che pa ri ch'ab'al griego, xuq'atej ki wäch ri tat Bernabé, ri tat Saulo. Man kraj tā ri are' chi kākiojon ri nim q'atal tzij. ⁹ Are k'u ri tat Saulo ri xuquje' káb'ix Pablo che, qajinaq ri Loq'alaj Espiritu puwi', ko xka'y che ri ajq'ij. ¹⁰ Te k'u ri' xub'ij che: ¡Lal ri' jun nimalaj b'anal tzij, lal b'anal etzelal, lal ralk'ual ri ltzel, are k'ulel la ru b'anik ronojel u wäch utzil! ¡Jas che man kātāni tā la chujech'b'exik ri jikomajalaj u b'eyal ri qas u Tzij ri Dios? ¹¹ Cheyej b'a' na la, ¡ri Dios kuk'ājisaj na wäch la! Che kieb' oxib' q'ij man kaka'y tā chi na la, man kil tā chi na la ru saqil ri q'ij, —xcha che.

¡Chanim k'ut xmoyirik! Xaq kāmala chik pa taq u xkut, kutzukuj jachin kāyugen b'ik rumal chi man kaka'y tā chik. ¹² Aretaq k'ut ri nim q'atal tzij xril ri xb'antajik, xkojon k'u ri are'. Sib'alaj kukajmaj ri tijonik chrij ri Qajaw Jesús.

Ri tat Pablo rachi'l ri tat Bernabé keopan pa ri tinimit Antioquía re Pisidia

¹³ Xeb'el k'u b'i pa ri tinimit Pafos, ri tat Pablo xuquje' taq ri rachi'l xeopan pa ri tinimit Perge ri k'o pa Panfilia. Xkanaj k'u kan ri a Juan (ri xuquje' kukoq Marcos che ru b'i'), xtzelej kan pa Jerusalén. ¹⁴ Xeb'el chi b'i ri e are' pa Perge, xeopan pa ri tinimit Antioquía re Pisidia. Pa jun q'ij k'ut re uxlanem, xeb'ok pa ri rachoch Dios ri kākimulij wi kib' ri winaq aj Israel, xet'uyi k'ut. ¹⁵ Aretaq xsik'itaj chupam taq ri wuj re ru Pixab' ri Moisés, xuquje' chupam taq ri ki wuj ri q'alajisal taq re ru Loq' Pixab' ri Dios, ri tata'ib' k'amal taq ki b'e ri winaq

xekisik'ij ri tat Pablo, ri tat Bernabé, xkib'ij chke: Qachalal, we k'o jas kaj alaq káb'ij alaq che ki pixb'exik ri winaq, kuya' käch'aw alaq, —xecha chke.

¹⁶ Xwalij k'u ri tat Pablo, xuk'ut ruk' ru q'ab' chi mech'aw ri winaq, te k'u ri' xub'ij chke: Alaq tata'ib' aj Israel, xuquje' ri alaq ri nim kil wi alaq ri Dios, ¡tampe alaq! —käch'a'. ¹⁷ Ru Dios ri tinimit Israel xeucha' ri qa mam ojer, kumal k'u ri e are' xub'an jun nimalaj tinimit, pune xa kogxa'nim kib' pa Egipto. Ri Dios k'ut xukoj ri nimalaj u chuq'ab' che kesaxik loq chila'. ¹⁸ Ri Dios kawinaq junab' xukochi u wäch che ri ki k'aslemal ri winaq aj Israel pa ri juyub' ri kätz'inowik. ¹⁹ Xusach ki wäch wuqub' tinimit ri e k'o pa Canaán, xujach k'u ri kulew ri winaq ri' chke ri qa mam ojer. ²⁰ Te k'u ri' kiejeb' ciento junab' ruk' kawinaq lajuj chik xq'at tzij pa ki wi' kumal q'atal taq tzij. Ri qa mam Samuel k'ut, jun q'alajisal re ru Loq' Pixab' ri Dios, are k'isb'al ke ri q'atal taq tzij ri'. ²¹ Xkita' k'u ri winaq che ri Dios chi kukoj jun nim taqanel ri kátaqan pa ki wi'. Xukoj k'u ri tat Saúl ru k'ojol ri tat Cis che nim taqanel pa ki wi'. Ri tata' ri' are re ri rachalaxik ri qa mam Benjamín ojer. Kawinaq junab' k'ut xtaqan ri are' pa ki wi'. ²² Te k'u ri' ri Dios xresaj ri tat Saúl che taqanel, xukoj chi ri qa mam David che taqanel pa ki wi'. Chrij k'u wa' xub'ij wi: "Nu riqom ri a David ru k'ojol ri tat Isaí. Käkikot k'u ri wanima' rumal wa' we achi ri'. Kub'an k'u na ri are' ronojel ri kwaj." —xcha ri Dios. ²³ Ri Jesús k'ut are jun chke ri rachalaxik ri qa mam David, are k'u wa' ri xwalijisax rumal ri Dios rech keuto' ri winaq aj Israel, je' jas ri xuchi'j loq ojer. ²⁴ Mäjoq k'u kul ri Jesús, ri tat Juan xutzijoj chke konojel ri winaq aj Israel chi rajwaxik käkik'ex ki chomanik, käkik'ex kanima', káb'an k'u ki qasna'. ²⁵ Aretaq k'ut xa ko'l man kohan ru kámikal ri tat Juan, xub'ij ri are' chke ri winaq: "¿Jachin ri in kichomaj ix? Man in tä ri' ri Cristo, ri To'l Qe ri tajin keyej alaq. K'ä te kápe na ri Are'. Sib'alaj nim u q'ij, man taqal tä k'u chwe kinkir u k'amal ru xajäb'," —xcha chke, —käch'a ri tat Pablo.

²⁶ Je k'u ri', qachalal, ri alaq rachalaxik ri qa mam Abraham, xuquje' alaq ri kápe alaq pa nik'iaj taq tinimit chik ri nim kil wi alaq ri Dios: Ru Loq' Pixab' ri Dios ri kutzijoj ru tob'anik ri Are' are xtzijox chqe nimalaj qonojel ri uj. ²⁷ Konojel k'u ri winaq pa ri tinimit Jerusalén, xuquje' ri k'amal taq ki b'e, man xketamaj taj jachin ri' ri Jesús. Man xkikoj tä k'u pa kuenta ri tzij ri tz'ib'tal kan kumal ri q'alajisal re ru Loq' Pixab' ri Dios ri käsik'ix pa ri rachoch Dios pa taq ri q'ij re uxlanem. Ri e are' xkikámisaj ri Jesús, je' k'u xel wi jas ri ki b'im kan ri q'alajisal taq re ru Loq' Pixab' ri Dios. ²⁸ Pune man k'o tä jas

xkiriq chrij ri Jesús ri taqal wi kákámisaxik, ri e are' k'ut xkib'ij che ri tat Pilato chi kutaq u kámisaxik. ²⁹ Aretaq b'antajinaq kumal ronojel ri tz'ib'tal ojer chrij ri Jesús, xkiquasaj cho ri cruz, xkik'am b'i pa muqik. ³⁰ Ri Dios k'ut xuk'astajisaj ri Jesús chkixol ri káminaqib'. ³¹ Pa taq ri q'ij ri' k'ia mul xuk'ut rib' ri Jesús chkiwäch ri tijoxelab' ri xeb'e' ruk' aretaq xel b'i pa Galilea, xe' pa ri tinimit Jerusalén. Kámik k'ut are ri e are' ri tajin kákitzijoj chke ri winaq chrij ri Jesús jas ri u b'anom, —käch'a chke.

³² Xaq je ri' ri uj xuquje' káqatzijoj chech alaq ri Utzalaq Tzij re ri Evangelio: Are wa' ri xuchi'j ri Dios chke ri qa mam ojer, ³³ ri ya u yo'm chik chqe uj qonojel, ri uj kachalaxik kan ri ojer taq winaq. Je wa' xub'ano aretaq xuk'astajisaj ri Jesús chkixol ri káminaqib'. Je' xk'ulmatajik jas ri tz'ib'tal pa ri ukab' salmo, kub'ij: "Kámik ri' at nu yo'm chkiwäch ri winaq rech káketamaj chi at ri' ri qas nu K'ojol." —käch'a'. ³⁴ Ri Dios k'ut xub'ij chi kuk'astajisaj na chkixol ri káminaqib' rech man káq'ay tä ru cuerpo. Je ri' kub'ij ru Loq' Pixab' ri Dios jawije' ri tz'ib'tal wi: "Kintoq'ob'isaj na i wäch jas ri xinchij' che ri i mam David," —käch'a'. ³⁵ Rumal ri' kub'ij pa jun salmo chik: "Mäya la che ri Loq'alaj Patänil ech la chi káq'ay ru cuerpo," —käch'a ri'. ³⁶ Qas tzij k'ut ri qa mam David xeupatänij ri winaq ri e k'o pa taq ri q'ij ri k'asal ri are'. Xeupatänij je' jas ri xtaqan wi ri Dios. Xkám k'ut, xmuq kuk' ru mam, are k'u ru cuerpo xq'ayik. ³⁷ Are k'u ri Jesús ri xuk'astajisaj ri Dios chkixol ri káminaqib', man xq'ay tä ru cuerpo. ³⁸ Chetamaj b'a' alaq, qachalal, chi rumal ri Jesús káztijox ri sachb'al mak chech alaq. ³⁹ Rumal ri Jesús konojel ri kekojonik kásachtaj ri ki mak, ri ki mak ri man kuya' taj kásachik rumal ru Pixab' ri Moisés. ⁴⁰ Chila b'a' ib' alaq, máqaj ne chij alaq ri xkitz'ib'aj kan pa ri ki wuj ri q'alajisal taq re ru Loq' Pixab' ri Dios ri kub'ij:

⁴¹ Chiwilampe ix ri xa kitze'j u wäch ri qas tzij, chixkajmanoq, chsach b'a' i wäch.

Je ri', rumal chi ri in kinb'an na nimaq taq kajmab'al pa taq ri i q'ijol ri man kikoj tä k'u na we ta k'o jun winaq kutzijoj wa' chiwe, —käch'a', —xcha ri tat Pablo chke.

⁴² Aretaq ri tat Pablo, ri tat Bernabé xeb'el loq pa ri rachoch Dios ri kákimulij wi kib' ri winaq aj Israel, xepe ri winaq, xkita' toq'ob' chke chi keztelej chi jumul chila' wuqub'ix pa ri q'ij re uxlanem, rech kákitzijoj na ru Loq' Pixab' ri Dios. ⁴³ Aretaq xeto'taj ri winaq che ri mulin ib', e k'ia chke ri winaq aj Israel, xuquje' ri nik'iaj winaq chik ri keq'ijilan che ri Dios, xeb'e' kuk' ri tat Pablo, ri tat Bernabé. Ri e are' k'ut xekipixb'aj chi

käkitaqej ri kojoniq chrij ri Dios, ru b'anom toq'ob' chke nimalaj konojel.

⁴⁴ Wuqub'ix chik, aretaq xuriga ri q'ij re uxlanem, konojel ri winaq pa ri tinimit xkimulij kib' chutatab'exik ru Tzij ri Dios. ⁴⁵ Ri winaq aj Israel, aretaq xkil ri k'ialaj winaq, k'äx xkina' pa kanima', xkitze'j u wäch ri tat Pablo, xkik'ulelaj u wäch ru tzij. ⁴⁶ Are k'u ri tat Pablo rachi'l ri tat Bernabé ko xech'awik, man xkixej tä kib', xkib'ij: Chech alaq, ri winaq aj Israel, rajwaxik kätzjox wi nab'e ri Utzalaj Tzij re ri Evangelio. Rumal k'u chi man kāk'amowaj tä alaq, kána' ib' alaq chi man taqal tä chech alaq ri k'aslemal ri man k'o tä u k'isik, rumal ri kāmik kuje' kuk' ri nik'iaj winaq chik ri man e aj Israel taj. ⁴⁷ Rumal chi je' uj u taqom wi ri Qajaw Dios, xub'ij k'ut:

At nu kojom rech kaya saqil
chke konojel ri winaq
cho ruwächulew,

chi rumal awech at kuya' kākiriq na
ru tob'anik ri Dios, nimalaj konojel
ri winaq k'ä chuk'isb'al ruwächulew,
—xcha ri Dios, —xecha chke ri winaq.

⁴⁸ Ri nik'iaj winaq chik, aretaq xkita wa' we tzij ri', sib'alaj xekikotik. jXkichap u b'ixik chi ru Loq' Pixab' ri Qajaw Dios are sib'alaj utz! Konojel k'u ri e sik'im churiqik ri k'aslemal ri man k'o tä u k'isik xekojon che ri Cristo. ⁴⁹ Je ri' xtzijox ru Loq' Pixab' ri Dios pa konojel taq ri tinimit re ri k'olib'al ri'. ⁵⁰ Are k'u ri winaq aj Israel xkikoj ki k'ux jujun ixoqib' ri keq'ijilan che ri Dios, ri nimaq ki b'anik, xuquje' xkikoj ki k'ux ri tata'ib' ri nimaq ki b'anik ri e k'o pa ri tinimit. Je wa' xka'no rech kākiyak kib' chikij ri tat Pablo, ri tat Bernabé. Xekesaj k'u na b'i pa ri ki tinimit. ⁵¹ Ri tat Pablo, ri tat Bernabé xkitota' kan ri ulew che ri kaqan chkiwäch ri winaq chuq'alajisaxik chi man utz taj ri ki b'anom, k'o ki mak. Te k'u ri' xeb'e' pa ri tinimit Iconio. ⁵² Are k'u ri kojonelab' chila' pa ri tinimit Antioquia sib'alaj xekikotik, q'alaj k'ut chi ri Loq'alaj Espiritu tajin kätaqan pa kanima'.

14

Ri tat Pablo, ri tat Bernabé keopan pa ri tinimit Iconio

¹ Aretaq xeopan pa ri tinimit Iconio, ri tat Pablo, ri tat Bernabé xeb'ok pa ri rachoch Dios ri kākimulij wi kib' ri winaq aj Israel. Ru Loq' Pixab' ri Dios ri xkitzijoq xub'ano chi e k'ia chke ri winaq aj Israel xekojonik, xuquje' e k'ia chke ri nik'iaj winaq chik. ² Are k'u ri winaq aj Israel ri man kekojon tä che ru Loq' Pixab' ri Dios xkikoj ki k'ux ri nik'iaj winaq chik ri man e aj Israel taj, rech käketzelay ki wäch ri kojonelab'. ³ Rumal ri' ri tat Pablo, ri tat Bernabé naj xek'oji na chila'.

Man xkixej tä kib' chutzijoxik ru Loq' Pixab' ri Dios, ku'l k'u ki k'ux chrij ri Qajaw Jesús. Are ri Qajaw Jesús xuk'ut chkiwäch ri winaq chi are ri Are' yo'winaq ri tzij ri' chke. Are tzij wa' ri tajin käkitzijoj ri apóstoles chrij ru toq'ob' ri Dios. Xuya k'u ki chuq'ab' rech kāk'a'n nimaq taq etal, xuquje' nimaq taq kajmab'al chkiwäch ri winaq. ⁴ Are k'u ri winaq ri e k'o pa ri tinimit xub'an kieb' ki k'ux chikij ri apóstoles. Nik'iaj xkikoj kib' kuk' ri winaq aj Israel, nik'iaj chik xkikoj kib' kuk' ri apóstoles. ⁵ Te k'u ri' ri winaq aj Israel kuk' ri nik'iaj winaq chik ri man e aj Israel taj xjunamataj ki tzij kuk' ri k'amal taq ki b'e, xewalij k'u chikij ri apóstoles che ki k'ulelaxik, chi käkitzej ki wäch, kekib'an k'u che ab'aj. ⁶ Aretaq k'ut ri tat Pablo, ri tat Bernabé xketamaj wa', xeanimaj b'ik, xeb'e' pa Listra, pa Derbe. E are' tinimit wa' ri e k'o pa Licaonia. Xuquje' xeb'e' pa taq ri k'olib'al chikij taq we tinimit ri'. ⁷ Chila' k'ut xuquje' xkitzijoq wi ri Utzalaj Tzij re ri Evangelio.

Ri tat Pablo káb'an che ab'aj pa ri tinimit Listra

⁸ K'o k'u jun achi pa Listra ri man kākowin taj káb'inik. Xa t'uuyul qajoq chila'. Ri achi ri' man k'o tä jumul b'ininaq rumal chi k'äx u b'anom ri raqan tzpa taq ri q'ij ri xil u wäch. ⁹ We achi ri' u tatab'em ri tajin kutzijoq ri tat Pablo. Ri tat Pablo k'ut ko xka'y che, xrilo chi k'o u kojoniq rech kutzirik. ¹⁰ Ko k'u xuch'ab'ej, xub'ij che: jChatwalijjoq, chat-tak'aloq! —xcha che. Ri achi k'ut xaq jun xuya', xtak'ik, xuchap b'inem. ¹¹ Aretaq ri winaq xkil ri xub'an ri tat Pablo, xkiraq ki chi', xkib'ij pa ri ki ch'ab'al ri aj Licaonia: jE are' ri qa dios wa' ri je' kepe winaq ri e ulinaq quk'! —xecha'.

¹² Xkib'ij chi ri tat Bernabé are ri ki dios u b'i' Júpiter, are k'u ri tat Pablo are ri ki dios u b'i' Mercurio, rumal chi are ri are' ri sib'alaj kätzjionik. ¹³ Ri sacerdote ri kápatänin pa ri rachoch ri ki dios Júpiter ri k'o chuchi' ri tinimit, xeuk'am loq ama'ib' taq wakäx, xuquje' wigob'al re kotz'ij. Ri sacerdote ri' junam kuk' ri winaq, e are' ta xkaj xekiq'ijilaj ri apóstoles, xuquje' xekikāmisaj ta ri wakäx chuya'ik chkiwäch. ¹⁴ Aretaq k'ut ri kieb' apóstoles, ri tat Bernabé rachi'l ri tat Pablo, xkil ri tajin kāk'a'no, xkijis ri katz'iaq chikij. (Ri xka'n ri apóstoles, are kuk'ut chkiwäch ri winaq chi sib'alaj äwas ri tajin kāk'a'no.) Xkinim kib' chkixol ri winaq, xkiraq ki chi', xkib'ij: ¹⁵ jTata'ib'! jJas che je' tajin káb'an alaq wa'? Ri uj xaq uj winaq je' jas ri alaq. Ri uj k'ut, uj petinaq chutzijoxik ri Utzalaj Tzij re ri Evangelio chech alaq, rech käya kan alaq u b'anik wa' ri naq'atal wi alaq ri man k'o tä ki patän, rech kākōjon alaq che ri k'aslik Dios. Are Dios wa' ri b'anowinaq ri kaj, ri ulew, ri mar, xuquje'

konojel ri jastaq ri e k'o cho ri kaj, ri e k'o cho ri ulew, xuquje' ri e k'o pa ri mar. ¹⁶ Pa ri ojer taq q'ij ri Dios xuya chke ri winaq chi kaka'no jachike ri kākaj. ¹⁷ Amaq'el k'ut xuk'ut chkiwäch ri winaq jachin ri' ri Are' ruk' ri u b'anik utzil chke. Are ri Are' käyo'w ri jäb', kub'ano chi sib'alaj käwächin ri qa tiko'n, kuya ronojel ri káqatijo, kuya k'u kikotemal pa qanima', —xecha chke.

¹⁸ Pune je' xkib'ij wa' ri apóstoles, xajwataj chi xkikoj ki chuq'ab' chuq'atexik chi ri winaq mat xekikamisaj ri wakāx chuya'ik chkiwäch che ki q'ijilaxik.

¹⁹ Xeopan k'u jujun winaq aj Israel ri e petinaq pa ri tinimit Antioquia, xuquje' pa ri tinimit Iconio ri xkikoj ki k'ux ri winaq, xka'n k'u ri tat Pablo che ab'aj. Xkichomaj k'ut chi ya käminaq chik, xkichararej b'ik, xekiya k'u kan chutza'm ja. ²⁰ Aretaq k'ut xkimulij kib' ri kojonelab' chrij ri tat Pablo, ri are' xwalijik, xok chi na b'ik pa ri tinimit. Chukab' q'ij, rachi'l ri tat Bernabé, xe' pa ri tinimit Derbe.

²¹ Aretaq xeto'taj chutzijoxik ri Utzalaj Tzij re ri Evangelio pa ri tinimit Derbe ri xekojon wi k'ia winaq, xetzelej chi jumul pa Listra, pa Iconio, xuquje' pa Antioquia. ²² Pa taq we tinimit ri' xkiya k'u anima' chke ri kojonelab', xekipixb'aj k'ut chi kākitaqej ri kojoniq che ri Utzalaj Tzij re ri Evangelio. Xuquje' xkib'ij chke chi rajwaxik kujok'ow na pa taq k'ia u wäch k'äxk'ol k'ä mäjoq kujopan ruk' ri Dios rech kátaqan ri Are' pa qa wi'. ²³ Xekikoj k'u k'amal taq ki b'e ri qachalal kojonelab' pa ronojel tinimit. Xka'n orar, xka'n ri ayuno, te k'u ri' xekijach pu q'ab' ri Qajaw Dios ri e kojoniq chke.

Ri tat Pablo rachi'l ri tat Bernabé ketzelej b'ik pa ri tinimit Antioquia re Siria

²⁴ Pa ri ki tzelejik, xeok'ow pa Pisidia, xeopan k'u pa Panfilia. ²⁵ Xkitzijoj na ru Loq' Pixab' ri Dios pa ri tinimit Perge, te k'u ri' xeq'ax pa Atalia. ²⁶ Kelik chila' xkiya b'ik kib' pa ri barco, xeb'e pa Antioquia. Are tinimit wa' ri xejach wi pu q'ab' ri Dios rech kub'an toq'ob' chke che ki to'ik chub'anik ri chak ri k'ä te xk'is kumal. ²⁷ Aretaq xeopan pa Antioquia, xkimulij ri qachalal kojonelab'. Xkitzijoj k'u chke ri nimaq taq kajmab'al ru b'anom ri Dios kuk', xkitzijoj xuquje' jas xub'an ri Dios chuya'ik chke ri nik'iaj winaq chik ri man aj Israel taj chi ri e are' xuquje' kekojonik. ²⁸ Naj k'ut xek'oji na ri tat Pablo, ri tat Bernabé chila' kuk' ri kojonelab'.

15

Ri kojonelab' xkimulij kib' pa ri tinimit Jerusalén

¹ Pa taq ri q'ij ri' xeopan jujun achijab' pa ri tinimit Antioquia ri e petinaq pa Judea. Xkichap k'u ki tijoxik ri kojonelab' chila', xkib'ij k'u chke chi we kākaj kākiriq ru tob'anik ri Dios rajwaxik kākoi ri retal ri ojer trato che ri ki cuerpo ri alab'om, xuquje' ri achijab', je' jas ri taqaninaq wi ri qa mam Moisés.* ² Are k'u ri tat Pablo, ri tat Bernabé xekik'ulelaj ri achijab' ri'. Je ri' xchomaxik chi utz na keb'e' ri tat Pablo, ri tat Bernabé pa ri tinimit Jerusalén kachi'l nik'iaj kojonelab' chik rech kākichomaj wa' kuk' ri apóstoles, xuquje' kuk' taq ri k'amal taq ki b'e ri qachalal kojonelab' pa ri tinimit ri'.

³ Ri qachalal kojonelab' aj Antioquia xekitaq b'i ri tat Pablo, ri tat Bernabé kachi'l ri nik'iaj kojonelab' chik. B'enam ke pa Jerusalén, xeok'ow pa Fenicia, pa Samaria, kākitzijoj k'u chke ri kojonelab' chi ri nik'iaj winaq chik ri man e aj Israel taj tajin kākia kan ri ojer ki k'aslemal, tajin kākapatānij ri Dios. Ri kojonelab' pa taq ri k'olib'al ri' sib'alaj xekikotik aretaq xkita u b'ixik wa'.

⁴ Aretaq ri tat Pablo, ri tat Bernabé xeopan pa Jerusalén, utz ki k'ulaxik xb'an kumal ri qachalal kojonelab', pa apóstoles, xuquje' ri k'amal taq ki b'e ri kojonelab'. Xkitzijoj k'ut ronojel ru b'anom ri Dios kuk'. ⁵ E k'o k'u jujun tata'ib' fariseos ri e kojoniq chik che ri Cristo, xetak'i aq'anoq, xkib'ij: Rajwaxik kākoi ri retal ri ojer trato che ri ki cuerpo ri achijab', ri alab'om ri man e aj Israel taj, káb'ix k'u chke chi rajwaxik kākitaqej u b'anik jas ri kub'ij ru Pixab' ri qa mam Moisés, —xecha'.

⁶ Xkimulij k'u kib' ri apóstoles xuquje' ri k'amal taq ki b'e ri qachalal kojonelab' chuchomaxik rij we tijoniq ri'. ⁷ Naj k'ut xkichomala kib', te k'u ri' xwalij aq'an ri tat Pedro, xub'ij chke: Qachalal, etam ala q chi xke' kieb' oxib' junab' wa', ri Dios xinucha' in chxol ala q chutzijoxik ri Utzalaj Tzij re ri Evangelio chke ri nik'iaj winaq chik ri man e aj Israel taj, rech ri e are' xuquje' kākita ri Evangelio, kekojonik. ⁸ Ri Dios k'ut, ri retam ri k'o pa taq kanima' ri winaq, xuq'alajisaj chi keuk'amowaj ri e are' xuquje', aretaq xuya ri Loq'alaj Espíritu chke, je' jas ri u yo'm chqe uj. ⁹ Ri Dios man jalan tā xeril wi ri e are' ruk' ri uj, xane junam xub'an chqe. Xuch'aj k'u ri kanima' ri e are' xuquje', aretaq xekojon che ri Cristo. ¹⁰ Ri ala q k'ut, jas che kub'an kieb' k'ux ala q chrij ru b'anom ri Dios, kāya k'u ala q jun e qan chki we kojonelab' ri', jun e qan chi ri qa mam ojer man xekowin tā che reqaxik, junam kuk' ri uj? ¹¹ Ri uj k'ut kākakojo chi kākariq ru tob'anik ri Dios rumal ru toq'ob' ri Qajaw Jesucristo, xaq junam jas ri kākā'n ri nik'iaj

* 15:1 Ri retal ri ojer trato are ri "circuncisión" (Hechos 7:8).

winaq chik ri man e aj Israel taj, —xcha ri tat Pedro chke.

¹² Xa je ri' konojel ri winaq man k'o tä jas xkib'ij. Are xkitatab'ej na ri ki tzij ri tat Bernabé, ri tat Pablo. Xkitzizoj k'ut ri nimaq taq etal, xuquje' nimaq taq kajmab'al ru b'anom ri Dios chikxol ri nik'iaj winaq chik ri man e aj Israel taj rumal kech ri e are'. ¹³ Aretaq xeto'taj ri e are' che ri ki tzij, xch'aw chi ri tat Jacobo, xub'ij: Qachalal, tampe alaq ri kinb'ij: ¹⁴ Ri qachalal Simón Pedro u b'im chqe ri xub'an ri Dios aretaq nab'e mul xutoq'ob'isaj ki wäch ri nik'iaj winaq chik ri man e aj Israel taj, xeucha' k'u jumulaj winaq chikxol ri e rech ri Are'. ¹⁵ Are k'u wa' je' jas ri xkitz'ib'aj kan ri q'alajisal taq re ru Loq' Pixab' ri Dios ojer ri kub'ij:

¹⁶ Aretaq káb'antaj na wa', kintzelej loq, kintob'an na chiwe, kinkoj chi na jun nim taqanel pi wi', je' jas ri i mam David, —kub'ij ri Qajaw Dios.

Ri Are' kub'an na u b'anik ronojel, kub'an chi na utzil chiwe.

¹⁷ Je ri' kinb'ano rech konojel ri nik'iaj winaq chik kákitzujuk ri Qajaw Dios,

konojel ki wäch winaq cho ruwächulew ri kákina'taj ri nu b'i', kákita' ri nu tob'anik.

¹⁸ Are wa' ri kub'ij ri Qajaw Dios ri u yo'm loq u b'ixik ronojel wa' we tzij ri', ri u b'im kanoq pa taq ri ojer taq q'ij, —xcha ri'.

¹⁹ Ri tat Jacobo xutaqej tzijonem, xub'ij: Rumal ri' ri in kinchomaj chi man kuya' taj káqab'ij chke ri nik'iaj winaq chik ri man e aj Israel taj, ri tajin kákiaja kan ri ojer ki k'aslemal rech keniman che ri Dios, chi rajwaxik kákoj ri retal ri ojer trato che ri ki cuerpo. ²⁰ Xuwi káqatz'ib'aj b'i jun wuj, káqataq k'u b'i chke. Káqab'ij b'ik chi mákitij chi ri ti'j ri yo'm chkiwäch taq tiox ri xa e b'anom kumal winaq, chi man káka'n taj jas ri káka'n ri tz'i' ri xaq kákiriq kib', man k'o tä ki pixab'. Káqab'ij k'ut chi man kákitij tä chi u ti'jol awaj ri xa jitz'am wa' chukámisaxik, xuquje' chi man kákitij tä kik'. ²¹ Tzojer k'u loq wa' e k'o winaq pa ronojel tinimit ri kákitizoj ri Pixab' ri xutz'ib'aj kan ri qa mam Moisés. (Ronojel wa' ri káqatz'ib'aj b'i pa we carta, are tz'ib'tal pa ru Pixab' ri Moisés.) We Pixab' ri' kásik'ix pa taq ri rachoch Dios ri kákimulij wi kib' ri winaq aj Israel pa taq ri q'ij re uxlanem, —xcha ri tat Jacobo chke.

²² Xkichomaj k'u ri apóstoles, xuquje' ri k'amal taq ki b'e ri kojonelab', xuquje' konojel ri qachalal kojonelab' chi kekicha' jujun

achijab' rech kekitaq b'i pa ri tinimit Antioquia junam ruk' ri tat Pablo, ri tat Bernabé. Xkicha' k'u ri tat Judas ri xuquje' káb'ix Barsabás che, xuquje' ri tat Silas, ri nim ki b'anik chikxol ri kojonelab'. ²³ Xkiya k'u b'i we wuj ri' pa ki q'ab', kub'ij:

“Uj, ri uj apóstoles, xuquje' ri uj ri k'amal taq ki b'e ri kojonelab', xuquje' ri uj, uj ri' ri kojonelab' ri k'o pa ri tinimit Jerusalén, ri uj qonojel káqaya apan rutzil wäch alaq, qachalal, alaq ri' ri man aj Israel taj, ri k'o alaq pa ri tinimit Antioquia, pa Siria, xuquje' pa Cilicia. ²⁴ Qa tom chi e k'o jujun ri elinaq b'i chqaxol ri e opaninaq uk' alaq, ri man uj taj uj taqowinaq b'ik. Ki kojom k'ux alaq ruk' ri ki tzij, ki k'ákk'ob'isam anima' alaq, je ri' chi xub'an kieb' k'ux alaq. Ki b'im chech alaq chi rajwaxik kákoj alaq ri retal ri ojer trato, chi káq'at ru cuerpo jun achi o jun ala, xuquje' chi káb'an alaq jas ri kub'ij ru Pixab' ri Moisés. ²⁵ Rumal ri' xqachomaj, xjunamataj k'u ri qa chomanik chi keqatzujuk jujun achijab' chqaxol rech keqataq b'i uk' alaq junam kuk' ri loq'alaj taq qachalal, ri tat Bernabé, ri tat Pablo.

²⁶ Ri qachalal Pablo, ri qachalal Bernabé ki yo'm ri ki k'aslemal chupatánixik ri Qajaw Jesucristo, xaq k'u ko'l man xekám tä rumal. ²⁷ Xaq je ri' káqataq b'i ri qachalal Judas, xuquje' ri qachalal Silas, rech kákib'ij na chech alaq ri xchomaxik. ²⁸ Ri Loq'alaj Espíritu, xuquje' ri uj, utz xqilo chi man k'o tä chi jun eqa'n káqaya chij alaq, xane xuwi we taqanik ri' ri rajwaxik: ²⁹ Are wa' chi mátiq chi alaq ri ti'j ri yo'm chkiwäch taq tiox ri xa e b'anom kumal winaq, chi man káka'n tä alaq jas ri káka'n ri tz'i' ri xaq kákiriq kib', man k'o tä ki pixab', chi man kátiq tä alaq ri u ti'jol jun awaj ri xa jitz'am wa' chukámisaxik, xuquje' chi man kátiq tä chi alaq ri kik'. We kánimaj alaq wa', utz ri' ri káb'an alaq. Ri Dios b'a' káchajin alaq. Ch'ab'ej chi alaq,” —kácha ri' chupam ri wuj.

³⁰ Ri achijab' ri xetaq b'ik, xeb'e'k. Xkitaqej b'i ri ki b'e, xeb'e' pa Antioquia. Aretaq xeopaniq xekimulij ri qachalal kojonelab', xkijach k'u ri wuj pa ki q'ab'.

³¹ Aretaq xsik'ix u wäch ri wuj chkiwäch, sib'alaj xekikot ri qachalal, rumal chi sib'alaj xuku'b'isaj ki k'ux. ³² Ri tat Judas xuquje' ri tat Silas, xuquje' e q'alajisal re ru Loq' Pixab' ri Dios. Xkiku'b'isaj k'u ki k'ux ri kojonelab', xuquje' xkiya anima' chke kuk' taq ri tzij ri xkib'ij. Naj k'ut xetzijonik. ³³ Xek'oji k'u na kieb' oxib' q'ij chila', te k'u ri' xejach b'i ruk' utzil kumal ri qachalal kojonelab'. Xetzelej k'u kuk' ri qachalal ri e k'o pa Jerusalén ri e taqowinaq b'ik. ³⁴ Are k'u ri tat Silas xuchomaj chi kákanaj kan pa Antioquia. Je' k'ut xub'ano. ³⁵ Xuquje' ri tat Pablo rachi'l ri tat Bernabé xekanaj kan pa Antioquia. Junam kuk' k'ia qachalal chik,

xkitaqej ki tijoxik ri kojonelab', xuquje' xkitzizoj ru Loq' Pixab' ri Dios.

Ri tat Pablo kuchap ri ukab' u b'inem chutzijoxik ri Utzalaj Tzij re ri Evangelio

³⁶ Ok'owinaq chi kieb' oxib' q'ij aretaq ri tat Pablo xub'ij che ri tat Bernabé: Jeqasoli jumul chik ri qachalal pa taq ri tinimit jawije' qa tzijom wi ru Loq' Pixab' ri Qajaw Jesús, che kilik jas ri ka'nom, —xcha che.

³⁷ Are k'u ri tat Bernabé are kraj kuk'am b'i ri a Juan kuk', ri xuquje' káb'ix Marcos che. ³⁸ Are k'u ri tat Pablo man utz taj xrilo, rumal chi are wa' ri xutas kan rib' chkij ri e are' pa Panfilia. Man xutaqej tá ri chak kuk' chutzijoxik ru Loq' Pixab' ri Dios. ³⁹ Ri tat Pablo, ri tat Bernabé naj xkichomala kib', man xjunamataj tá k'u ri ki chomanik. Xa je ri' xkitas kib'. Ri tat Bernabé xuk'am b'i ri a Marcos che rachi'l, xe' pa Chipre. ⁴⁰ Are k'u ri tat Pablo, are xucha' ri tat Silas che rachi'l. Xejach k'u b'i pu q'ab' ri Dios kumal ri kojonelab' rech kub'an toq'ob' chke che ki to'ik chub'anik ri chak. ⁴¹ Xok'ow ri are' pa Siria, pa Cilicia, xuya k'u anima' chke ri qachalal kojonelab'.

16

Ri tat Pablo, ri tat Silas keachi'lax rumal ri a Timoteo

¹ Ri tat Pablo, ri tat Silas xeopan pa taq ri tinimit Derbe ruk' ri tinimit Lистра. Chila' k'ut xkiriq wi jun ala kojonel, Timoteo u b'i, ral jun ixoq kojonel aj Israel, are k'u ru tat are aj Grecia. ² Ri qachalal ri e k'o pa ri tinimit Lистра, xuquje' pa Iconio, xkib'ij chi ri a Timoteo sib'alaj utz ru k'aslemaal. ³ Ri tat Pablo xub'ij che ri a Timoteo chi ke' ruk', nab'e k'ut xukoj na ri retal ri ojer trato che ru cuerpo rech man kápe tá koy-owal ri winaq aj Israel ri e k'o pa taq ri tinimit ri'.* Konojel k'ut ketam chi ru tat ri a Timoteo are aj Grecia. ⁴ Pa konojel taq ri tinimit ri xeok'ow wi xkiya u b'ixik chke ri kojonelab' ri xchomax pa Jerusalén kumal ri apóstoles, xuquje' kumal ri k'amal taq ki b'e ri kojonelab'. ⁵ Je ri' ri qachalal kojonelab' xkijikib'a kanima' chrij ri Dios, xnimar na ri ki kononik. Ronojel q'ij k'ut tajin kek'iarik.

Jun achi aj Macedonia kuk'ut rib' chuwäch ri tat Pablo

⁶ Ri tat Pablo, ri rachi'l xkitaqej ri ki b'e, xeq'ax pa Frigia, xuquje' pa Galacia. Opaninaq k'ut pa Asia, man xyi' tá chke rumal ri Loq'alaj Espiritu chi kákitzizoj ru Loq' Pixab' ri Dios chila'. ⁷ Aretaq xeopan pa ri k'ulb'at re Misia, xkichomaj chi keb'e' pa Bitinia, man xyi' tá k'u wa' chke rumal

ri Loq'alaj Espiritu re ri Jesús. ⁸ Xaq k'u xeok'ow pa Misia, xeb'e' pa ri tinimit Troas ri k'o chi' ri mar. ⁹ Chila' k'ut k'o ri xuk'ut ri Dios chuwäch ri tat Pablo chaq'ab' pa ri rachik'. Are jun achi aj Macedonia ri tak'al chuwäch, kuta' k'u toq'ob' che ri tat Pablo, kub'ij: "Chok'ow la pa Macedonia, chujto' b'a'la," —xcha che. ¹⁰ Aretaq ri tat Pablo xril wa' we achi ri', chanim xujwalijik, xuje' pa Macedonia. Xqetamaj chi gas tzij chi ri Dios tajin kujusik'ij chutzijoxik ri Utzalaj Tzij re ri Evangelio chke ri winaq ri e k'o chila'.

Ri tat Pablo, ri tat Silas keopan pa ri tinimit Filipos

¹¹ Qelik b'i pa ri tinimit Troas, xujok pa jun barco, jikom xuje'k k'á xujopan pa ri ch'áqap ulew ri k'o pa ri mar, Samotracia u b'i'. Chukab' q'ij chik xujq'ax pa ri tinimit Neápolis. ¹² Qelik chi b'i chila' xuje' pa Filipos, ri nab'e tinimit re Macedonia. Jun tinimit wa' ri ki mulim wi kib' winaq ri e petinaq pa ri tinimit Roma xuquje' nik'iaj tinimit chik. Kieb' oxib' q'ij xujk'oji na chila'. ¹³ Pa jun q'ij re uxlanem xujel b'i chrij ri tinimit, xuje' chuchi' ri nima' ri e naq'atal wi ri winaq káka'n orar. Xujt'uyi chila', xqatzizoj ri Utzalaj Tzij re ri Evangelio chke ri ixoqib' ri ki mulim kib' jela'. ¹⁴ Jun chke ri ixoqib' ri e k'o chila', are Lidia u b'i', ri kápe pa ri tinimit Tiatira. Kuk'iyij jun u wäch atz'iaq morada káka'yik. Paqal rajil wa'. We ixoq ri' káq'ijilan che ri Dios. U tatab'em k'u ri tajin kub'ij ri tat Pablo, xaq je ri' xqaj ru Tzij ri Dios pa ranima', je ri' chi sib'alaj kraj kutatab'ej ru Loq' Pixab' ri Dios. ¹⁵ Xb'an k'u u gasna' ri are' xuquje' konojel ri e k'o pa rachoch. Te k'u ri' xujub'ochi', xub'ij chqe: We ilom alaq chi gas tzij in kojoninaq che ri Qajaw Jesús, jo' cho ja wuk', kákanaj kan alaq cho wachoch, —xcha chqe.

Sib'alaj k'ut xukoj u chuq'ab' chqe rech kujkanaj kan cho rachoch.

¹⁶ K'o jumul, b'enam qe chub'anik orar, xqariq jun ali ri k'o jun itzel espíritu re ch'ob'onik che. We ali ri' are jun ajik', kuch'ak k'u nim puaq rumal ri ch'ob'onik ri kub'ano. Are k'u ri puaq kuya chke ru patrón. ¹⁷ We ali ri' xteri b'i chqij ri tat Pablo xuquje' ri uj. Ko xuraq u chi', xub'ij: We achijab' ri' kákipatänij ri Dios ri k'o chikaj, are k'u kákitzizoj chiwe jas rajwaxik kib'ano rech kiriq na ru tob'anik ri Dios, —xcha ri'.

¹⁸ K'ia q'ij k'ut je' xub'an wa'. Xa je ri' xk'istaj u k'ux ri tat Pablo ruk', xka'y k'u chrij, xub'ij che ri itzel espíritu ri k'o che ri ali: Kintaqan chawe pa ru b'i' ri Jesucristo chi katel che we ali ri', —xcha che.

Chanim k'ut xel ri itzel espíritu che ri ali.

* **16:3** We ta mat kákoj ri retal ri ojer trato che ru cuerpo ri a Timoteo, ri winaq aj Israel man kákiya tá che chi kok kuk' rumal chi ketam chi ru tat ri a Timoteo, man are tá jun aj Israel.

¹⁹ Aretaq k'ut xkil ru patrón ri ali chi man kekowin tä chik kâkich'ak puaq chrij ri ali, xkichap ri tat Pablo xuquje' ri tat Silas. Xekik'am b'i pa ri k'ayib'al chkiwäch ri tata'ib' ri k'o taqanik pa ki q'ab'. ²⁰ Xekiya chkiwäch ri q'atal taq tzij, xkib'ij: We achijab' ri' ri aj Israel, tajin kâka'n k'âx che ri qa tinimit, je ri' chi kâsach ki k'ux ri winaq. ²¹ Kujkitijoj chub'anik ri man uj naq'atal tä wi. Ri ki tijonik man kuya' taj kâqak'amo rumal chi ri uj, uj aj Roma, —xecha'.

²² Xkiyak k'u kib' ri winaq chkiy ri tat Pablo, ri tat Silas. Ri q'atal taq tzij xetaqan che resaxik ri katz'iaq xuquje' chi kech'ay kuk' taq che'. ²³ Aretaq xech'aytaj k'ia mul, xekoksaj pa che'. Xb'ix k'u che ri chajinel re ri che' chi utz kub'an che ki chajixik. ²⁴ Ri chajinel, aretaq xya'taj we taqanik ri' che, chanim xeukoj b'i k'ä chupam ri che'. Te k'u ri' xukoj koj'b'al aqanaj che kaqan.

²⁵ Pa nik'iaq aq'ab' k'ut, ri tat Pablo, ri tat Silas tajin kâka'n orar, xuquje' tajin keb'ixon che ri Dios. Are k'u ri nik'iaq ajpache' chik tajin kâkitatab'ej. ²⁶ Xaq k'u te'talik xpe jun nimalaj kâb'raqan ri xuslab'isaj ru tak'alib'al ri che'. Chanim xejaqtaj konojel ri porta, ri ximib'al re ch'ich' ri ximib'em ke konojel ri ajpache' xet'oqopinik. ²⁷ Ri chajinel re ri che' xk'astajik. Aretaq xriilo chi e jaqtal chi ri porta, xuk'am ru machete, xraj xukâmisaj rib'. Xuchomaj ri are' chi xeanimaj b'i konojel ri ajpache'. ²⁸ Are k'u ri tat Pablo ko xuraq u chi', xub'ij che: Mâb'an k'âx che ib' la, uj qonojel ri uj, uj k'o waral, —xcha che.

²⁹ Ri chajinel re ri che' xuta' jun chäj, aninaq xok b'ik pa ri che'. Xb'ir'b'itik, xxuki chkiwäch ri tat Pablo, ri tat Silas. ³⁰ Te k'u ri' xeresaj loq chrij ri che', xub'ij chke: Tata'ib', çjas rajwaxik kinb'ano rech kinto' wib'? —xcha chke.

³¹ Ri tat Pablo, ri tat Silas xkib'ij che: Chkohon la che ri Qajaw Jesucristo, kâriq k'u na la ru tob'anik ri Dios, ri lal xuquje' konojel ri e k'o pa ri achoch la, —xecha che.

³² Xkitzizoj k'u ru Loq' Pixab' ri Dios che, xuquje' chke konojel ri e k'o pa rachoch. ³³ Tzpa ri aq'ab' ri' ri chajinel re ri che' xuch'aj ri soktajinaq che ri tat Pablo, ri tat Silas. Xb'an k'u u gasna' ri are' xuquje' xb'an ki gasna' konojel ri e k'o pa rachoch. ³⁴ Te k'u ri' xeuk'am b'i ri tat Pablo, ri tat Silas cho rachoch, xuya ri ki wa. Ri chajinel re ri che' sib'alaj xkikotik, xuquje' xkikot kanima' konojel ri e k'o pa rachoch rumal chi xekojon che ri Dios.

³⁵ Aretaq xsaqirik ri q'atal taq tzij xekitaq b'i jujun mayorib' chub'ixik che ri chajinel chi keutzogopij b'i ri tat Pablo, ri tat Silas. ³⁶ Ri chajinel re ri che' xub'ij che ri tat Pablo: Ri q'atal taq tzij xkitaq loq u b'ixik chwe chi kuya' kintzoqopin b'i chech alaq. Chel b'a' b'i alaq, oj alaq ruk' utzil, —xcha chke.

³⁷ Are k'u ri tat Pablo xub'ij chke ri mayorib': Ri alaq xujch'ay alaq chkiwäch ri winaq, man xil tä na alaq we k'o qa mak o man k'o taj. Te k'u ri' xujkoj alaq pa che', ri uj k'ut, uj jun kuk' ri winaq aj Roma. Kâmik k'ut chk'uyal kujesaj b'i alaq. Man utz taj je' kâb'an alaq wa', xane are chepet na ri q'atal taq tzij che qesaxik b'ik, —xcha ri tat Pablo chke ri mayorib'.

³⁸ Ri mayorib' xekiya u b'ixik wa' we tzij ri' chke ri q'atal taq tzij. Xkixej k'u kib' aretaq xkito chi ri tat Pablo, ri tat Silas e jun kuk' ri winaq aj Roma. ³⁹ Xepe k'u ri q'atal taq tzij, xkita' sachb'al ki mak chke ri tat Pablo rachi'l ri tat Silas, xekesaj k'u b'ik. Te k'u ri' xkita' toq'ob' chke chi keb'el b'i pa ri tinimit. ⁴⁰ Aretaq xeb'el b'i pa che', xeb'e' cho rachoch ri nan Lidia. Xuwi xekich'ab'ej kan ri qachalal, xkiku'b'isaj kan ki k'ux, te k'u ri' xeb'el b'i chila'.

17

Ri winaq pa ri tinimit Tesalónica kâkiyak kib' chrij ri tat Pablo

¹ Ri tat Pablo, ri tat Silas xkitaqej ri ki b'e, xeok'ow pa Anfípolis xuquje' pa Apolonia, xeopan k'u pa ri tinimit Tesalónica ri k'o wi jun rachoch Dios ri kâkimulij wi kib' ri winaq aj Israel. ² Ri tat Pablo, jas ri naq'atal wi, xok b'i pa ri rachoch Dios ri'. Oxib' semana k'ut xtizojon kuk' ri winaq, xkichomala kib' chrij ru Loq' Pixab' ri Dios ri Tz'ib'talik pa taq ri q'ij re uxlanem. ³ Ri tat Pablo xuq'alajisaj chkiwäch ri kub'ij ri Tz'ib'talik ri', chi ri Cristo tzrajwaxik wi kuriq k'âx, kâkâmisaxik, chi aretaq kâminaq chik kâk'astaj na chkixol ri kâminaqib'. Xub'ij k'u chke: We Jesús ri' ri kintzizoj chech alaq, are wa' ri Cristo, ri To'l Qe, —xcha chke.

⁴ E k'o k'u jujun chke ri winaq aj Israel xekojonik, xeb'ok k'u kuk' ri tat Pablo, ri tat Silas. Xuquje' e k'ia chke ri winaq aj Grecia ri keq'ijilan che ri Dios, xekojonik, kachi'l k'ia ixoqib' ri nimaq ki b'anik. ⁵ Are k'u ri winaq aj Israel ri man xekojon taj, xkuna' k'âx pa kanima', xpe koyowal. Xekimulij jujun itzel taq achijab' ri xaq kewakatik, xka'n k'u jun komon rech kâkiyak ch'oj, xk-isach ki k'ux ri winaq pa ri tinimit. Xeb'ok pa rachoch ri tat Jasón che kesaxik ri tat Pablo, ri tat Silas, rech kekijach pa ki q'ab' ri winaq. ⁶ Man xekiriq tä k'u chila'. Ja xe ri' are xkicharchatej b'i ri tat Jasón, xuquje' jujun kojonelab' chik, xekiya k'u chkiwäch ri q'atal taq tzij re ri tinimit. Xkiraq ki chi', xkib'ij: We achijab' ri' ri ki sachom ki k'ux ri winaq cho ronojel ruwächulew, e ulinaq chik waral. ⁷ Xek'ulax k'u rumal ri tat Jasón cho rachoch. Konojel wa' we winaq ri' kâkik'ulelaj u wäch ru pixab' ri César, ri nimalaj taqanel puwi' ri Roma. Kâkib'ij k'ut

chi k'o jun nim taqanel chik, Jesús u b'i, — kecha', — xecha ri winaq chke ri q'atal taq tzij.

⁸ Aretaq xkita wa', ri winaq xuquje' ri q'atal taq tzij xeb'el ch'uj. ⁹ Are k'u ri tat Jasón xuquje' ri e k'o ruk' xkiya ri puag ri rajwaxik u tojik rech ketzoqopixik. Xa je ri' xekitzoqopij b'ik.

Ri tat Pablo, ri tat Silas keopan pa ri tinimit Berea

¹⁰ Aretaq chaq'ab' chik, ri kojonelab' pa ri tinimit Tesalónica xekitaj b'i ri tat Pablo, ri tat Silas pa ri tinimit Berea. Xuwi k'u xeopanik, xeb'ok pa ri rachoch Dios ri kákimulij wi kib' ri winaq aj Israel. ¹¹ Are k'u ri winaq aj Israel ri e k'o pa Berea, are utz na xetow tzij chkiwäch ri winaq aj Israel ri e k'o pa Tesalónica. Xkaj xkita ru Loq' Pixab' ri Dios ri xtzijox chke. Ronojel q'ij k'ut xkisik'ij ru Loq' Pixab' ri Dios ri Tz'ib'talik che rilik we qas tzij ri kub'ij ri tat Pablo. ¹² E k'ia k'u chke ri winaq aj Israel ri e k'o pa ri tinimit Berea xekojonik. Y e k'ia chke ri winaq aj Grecia ri nimaq ki b'anik ri xuquje' xekojonik, chi ixoqib' chi achijab'. ¹³ Aretaq k'ut xketamaj wa' ri winaq aj Israel ri e k'o pa Tesalónica, chi tajin kätzijoq ru Loq' Pixab' ri Dios pa Berea rumal ri tat Pablo, xeb'e' jela', xkisach k'u ki k'ux ri winaq. ¹⁴ Chanim k'ut ri qachalal xkitaq b'i ri tat Pablo rech ke' pa ri taq'aj chi' ri mar. Ri tat Silas rachi'l ri a Timoteo xekanaj kan ri e are' pa ri tinimit Berea. ¹⁵ Ri e b'enaq ruk' ri tat Pablo, xkachi'laj k'u na b'ik k'a pa ri tinimit Atenas. Xetzelej k'u chanim, xkib'ij ri u b'im ri tat Pablo chke. Are wa' chi káikib'ij che ri tat Silas, ri a Timoteo chi káikowij b'ik rech kákirij kib' pa ri tinimit Atenas.

Ri tat Pablo k'o pa ri tinimit Atenas

¹⁶ Aretaq ri tat Pablo tajin keye'n chke ri tat Silas, ri a Timoteo pa Atenas, sib'alaj xb'isonik rumal chi xrilo chi k'ia ki wäch taq tiox ri xa e b'anom kumal winaq e k'o pa ri tinimit. ¹⁷ Xaq je ri' ri tat Pablo xuq'alajisaj ri kub'ij ru Loq' Pixab' ri Dios chkiwäch ri winaq aj Israel pa ri rachoch Dios ri kákimulij wi kib'. Sib'alaj xkichomala kib', xuquje' kuk' ri nik'iaj winaq chik ri e k'o chila' ri keq'ijilan che ri Dios. Je' xuquje' xub'an ronojel q'ij kuk' ri winaq pa ri k'ayib'al. ¹⁸ Jujun chke ri achijab' ri e k'o chila' xa ki yo'm kib' che retamaxik ri ki tijonik ri winaq ri káb'ix Epicúreos chke, xuquje' ri jule' chik ri káb'ix Estoicos chke. Ri e are' xkichap tzij ruk' ri tat Pablo. Jujun xkib'ij: ¿Jas lo wa' ri kub'ij we achi ri? Sib'alaj käch'awik pune man k'o tä retam, — xecha'.

Jujun chik xkib'ij: Je' ta ne chi are u tzijol wa' jule' taq dios chik, — xecha'.

Je' xkib'ij rumal chi ri tat Pablo xutzijoj chke ri Utzalaj Tzij re ri Evangelio chrij ri Jesús, xuquje' jas xub'ano xk'astaj b'i chkiwol ri káminaqib'. ¹⁹ Xkik'am k'u b'i ri tat Pablo pa ri Areópago, ri e naq'atal wi kákimulij kib' che chomanik, xkita' k'u che, xkib'ij: ¿A kuya' káqetamaj uj jas wa' we k'ak' tijonik ri' ri tajin kätzijoq la? ²⁰ Are k'u kätzijoq la jule' taq tzij chqe ri man qetam taj, káqaj k'ut káqetamaj jas kel kub'ij ronojel wa' ri tajin kätzijoq la, — xecha che.

²¹ Je' xkib'ij wa' rumal chi ri winaq aj Atenas, xuquje' ri winaq re nik'iaj tinimit chik ri e k'o chila', xuwi xkitzujuk u taik jun k'ak' tzij, xuquje' u b'ixik jun chik ri xkita jawije' chi'.

²² Ri tat Pablo xtak' i aq'anoq chkiwäch pa ri Areópago, xub'ij chke ri winaq: Tata'ib' aj Atenas, kinwilo chi sib'alaj káq'ijilan alaq chke taq dios. ²³ Je ri', rumal chi aretaq tajin kinb'inik, xinok'ow chkiwäch taq ri k'olib'al ri káq'ijilan wi alaq, xinriq k'u jun ta'b'al toq'ob' ri tz'ib'tal wi we tzij ri' chuwäch: “Che ri Dios ri man etamatl tä u wäch,” — kácha ri'. We Dios ri' ri káq'ijilaj alaq, ri man etam tä alaq u wäch, are ri Are' ri kintzijoq in chech alaq, — kácha chke.

²⁴ Ri Dios ri b'anowinaq ruwächulew, xuquje' ronojel ri k'o chuwäch, are wa' Rajaw ri kajulew. Man kák'oji tä ri Are' pa jun ja ri xa b'anom kumal winaq. ²⁵ Man rajwaxik tä u to'ik kumal ri winaq, man k'o tä k'u jas jun rajwaxik che. Are k'ut yo'winaq ri qa k'aslemal nimalaj qonojel, u yo'm ri kuxlab' konojel ri k'o ki k'aslemal. Xuquje' u yo'm juntir ri kajwataj chqe, — kácha'.

²⁶ Chrij xa jun winaq ri Dios xeresaj wi konojel ki wäch winaq rech kek'oji cho ronojel ruwächulew. Xuquje' xuchomaj janipa' junab' ri kek'asi'k, xuquje' jawije' ri kejeqi wi, u k'utum k'u ronojel wa' chkiwäch. ²⁷ Je' u b'anom wa' rech ketzukur che, pune xa kákimalma' u riqik. Qas tzij k'ut man naj taj k'o wi ri Dios chqe chqajujunal. ²⁸ Rumal k'u ri Dios uj k'aslik, uj k'olik, kujxulik, kujpaqik. Xkib'ij k'u jujun chke ri achijab' ri e k'o uk' alaq ri keb'anow taq ri b'ix: “Qonojel ri uj, uj ralk'ual ri Dios,” — xecha ri'. ²⁹ We uj ralk'ual ri Dios, mäqachomaj b'a' chi ri Dios are junam kuk' ri tiox re q'an puag, re saq puag, re ab'aj, ri xa e b'anom kumal winaq ri xaq e are' e chomaninaq wa'. ³⁰ Ojer kanoq ri Dios xaq xukuy ri ki mak ri winaq rumal chi man xkich'ob' taj jas ri tajin káka'no. Are k'u ri kámk kuya u b'ixik chke konojel ri winaq pa ronojel tinimit chi káik'ix kanima', káik'ix k'u ki chomanik. ³¹ Je ri', rumal chi ri Dios u chomam jun q'ij aretaq kuq'at na tzij pa ki wi' konojel ri winaq cho ruwächulew, jikom

k'ut kub'an na chke. Kub'an k'u na wa' rumal ri Achi ri cha'tal rumal. Xuq'alajisaj k'u wa' chqawäch qonojel aretaq xuk'astajisaj wa' we Achi ri' chkixol ri käminaqib', —xcha ri tat Pablo chke.

³² Aretaq ri winaq xkito chi ri tat Pablo kutzizij chi kek'astaj na ri käminaqib', jujun xa xkitze'j u wäch, nik'iaj chik xkib'ij: Käqaj käqata chi na jumul ri xb'itaj umal la pa jun q'ij chik, —xecha che.

³³ Xel k'u b'i ri ri tat Pablo chkixol. ³⁴ E k'o k'u jujun winaq ri xekojonik, xeb'e' k'u ruk' ri tat Pablo. Chkixol ri xekojonik k'o wi ri tat Dionisio. Are jun kuk' ri tata'ib' ri käkimulij kib' pa ri Areópago. Xuquje' k'o jun ixog, Dámaris u b'i'. E k'o chi k'u nik'iaj chik ri xekojonik.

18

Ri tat Pablo ke'pa ri tinimit Corinto

¹ Xel chi k'u b'i ri ri tat Pablo pa ri tinimit Atenas, xe' pa ri tinimit Corinto. ² Chila' k'ut xuriq jun achi aj Israel, Aquila u b'i', ri käpe pa Ponto. Ri tat Aquila rachi'l ri nan Priscila, ri rixoqil, te' kieb' oxib' q'ij e elinaq loq pa Italia, rumal chi ri tat Claudio César, ri nimalaj taqanel puwi' ri Roma, xtaqan chke konojel ri winaq aj Israel chi keb'el b'i pa ri tinimit Roma. Xopan k'u ri tat Pablo kuk' che ki ch'ab'exik. ³ Junam k'u ru chak ri tat Pablo kuk' ri ki chak ri e are', xa je ri' xkanaj kan na kuk'. Junam k'ut xechakunik, rumal chi ri ki chak ri tat Aquila, ri nan Priscila are ki b'anik carpa. ⁴ Ronojel q'ij k'ut re uxlanem xe' ri tat Pablo pa ri rachoch Dios ri käkimulij wi kib' ri winaq aj Israel. Ruk' chuq'ab' k'ut xutzizij ru Loq' Pixab' ri Dios chke konojel ri e k'o chila'. E k'o winaq aj Israel xuquje' winaq ri man aj Israel taj ri xkikojo chi gas tzij ri kub'ij ri tat Pablo chke.

⁵ Aretaq k'ut xeopan ri tat Silas rachi'l ri a Timoteo pa ri tinimit Corinto, kelik loq pa Macedonia, ri tat Pablo gas xuya ru q'ij, xutij k'u u chuq'ab' chutzizioxik ru Loq' Pixab' ri Dios. Xuq'alajisaj k'u chkiwäch ri winaq aj Israel chi gas tzij ri Jesús are wa' ri Cristo ri keye'm. ⁶ Are k'u ri e are' xa xkik'ulelaj u wäch ru tzij ri tat Pablo, xkib'ij taq tzij ri man utz taj chrij. Ri tat Pablo xutota' ri ratz'iaq chkiwäch chuk'utik chi kel b'ik, te k'u ri' xub'ij chke: Alaq ajchaq' mak we käsach wäch ala. Ri in man k'o tä nu mak chech ala. Tzäkämik ri' kine' kuk' ri nik'iaj winaq chik ri man e aj Israel taj chutzizioxik ru Loq' Pixab' ri Dios chke, —xcha ri tat Pablo.

⁷ Xel k'u b'i ri ri tat Pablo pa ri rachoch Dios ri käkimulij wi kib' ri winaq aj Israel, xe' cho rachoch jun tata' ri man aj Israel taj, Justo u b'i', ri käq'ijilan che ri Dios. Ri are' xa chuxkut ri rachoch Dios kel wi. ⁸ Ri

tat Crispo, ri k'amal ki b'e ri winaq pa ri rachoch Dios ri', xkojon ri are' che ri Qajaw Jesucristo, junam kuk' konojel ri e k'o pa rachoch. Xuquje' k'ia chke ri nik'iaj winaq chik aj Corinto, aretaq xkita ru Loq' Pixab' ri Dios, xekojonik, xb'an k'u ki gasna'. ⁹ Xch'aw k'u ri Qajaw Jesucristo ruk' ri tat Pablo chaq'ab' pa jun achik', xub'ij che: ¡Maxej b'a' awib'! Chataqej u tzizioxik ru Loq' Pixab' ri Dios, maya kan u b'anik wa'. ¹⁰ In k'ut, in k'o awuk', man k'o tä k'u jun winaq ri käkowinik katuchapo, kub'an k'äx chawe rumal chi e k'ia winaq ri kekojon na chwe waral pa we tinimit ri', —xcha ri Jesús che ri tat Pablo.

¹¹ Xa je ri' ri ri tat Pablo xkanaj na kan jun junab' ruk' nik'iaj pa ri tinimit Corinto. Xeutijoj k'u ri winaq che ru Loq' Pixab' ri Dios.

¹² Pa taq ri q'ij ri kätaqan ri nim q'atal tzij Galiön puwi' ri Acaya, ri winaq aj Israel xkiyak kib' chrij ri tat Pablo, xkik'am k'u b'i pa ri q'atb'al tzij. ¹³ Xkib'ij k'u che ri q'atal tzij: We achi ri' tajin kub'ij chke ri winaq chi rajwaxik u q'ijilaxik ri Dios, ri man je' tä k'u u b'anik jas ri kub'ij ri qa pixab', —xecha che.

¹⁴ Xa jub'iq' man xch'aw tä ri tat Pablo aretaq ri tat Galiön xub'ij chke ri winaq aj Israel: We ta are jun k'äx o jun nimalaj mak ri xub'an we achi ri', ri in kintatab'ej na jas ri käb'ij ala, ala aj Israel. ¹⁵ Xa b'a' chkiq taq tzij käch'ojin wi ala, xa chkiq taq winaq, xa k'u chrij ri pixab' ala. Chila b'a' ala jas käb'an ala che. Man kwaj taj king'at tzij puwi' wa' we tajin käb'ij ala ri', —xcha ri tat Galiön chke ri winaq aj Israel.

¹⁶ Xeresaj k'u b'i pa ri q'atb'al tzij. ¹⁷ Xepe k'u konojel ri winaq aj Grecia, xkichap ri tat Sóstenes, ri k'amal ki b'e ri winaq pa ri rachoch Dios, chila' k'ut sib'alaj xkich'ay wi chuwäch ri nim q'atal tzij. Man xok tä k'u il ri tat Galiön pune je wa' xka'no.

Ri tat Pablo kätzelej pa ri tinimit Antioquia, te k'uri' kuchaplej ru rox u b'inem chutzizioxik ru Loq' Pixab' ri Dios

¹⁸ K'ia q'ij k'ut xk'o'ji na ri tat Pablo pa ri tinimit Corinto. Te k'u ri' xeuya kan ri qachalal, xuya b'i rib' pa barco, xe' pa Siria, rachi'l ri nan Priscila, xuquje' ri tat Aquila. K'o pa ri tinimit Cnecrea. Mäjoq kel b'i pa ri barco, ri are' xresaj ronojel ru wi'. Retal k'u wa' chi k'o ri xuchi'j che ri Dios ri tzrajwaxik kub'an na. ¹⁹ Aretaq xeopan pa ri tinimit Éfeso, ri tat Pablo xeuya kan ri nan Priscila, ri tat Aquila, xe' ri are' pa ri rachoch Dios, xuchap k'u tzij kuk' ri winaq aj Israel ri käkimulij wi kib' chila'. ²⁰ Ri e are' xkib'ochi'j ri tat Pablo chi käkanaj kan na kuk' kieb' oxib' q'ij. Are k'u ri are' man xraj

taj. ²¹ Xeuya k'u kanoq, xub'ij kan chke: Rajwaxik kink'o'ji na pa ri tinimit Jerusalén che rok'owisaxik ri nimaq'ij ri kâpetik. Kintzelej chi k'u na loq che ilik ala q we are u rayinik ri Dios, —xcha kan chke.

Xok k'u b'i pa jun barco, xel b'i pa ri tinimit Éfeso. ²² Aretaq xopan pa ri tinimit Cesarea, xe' pa Jerusalén, xuch'ab'ej kan ri qachalal kojonelab' ri e k'o chila'. Te k'u ri' xe' pa ri tinimit Antioquía. ²³ Xk'o'ji k'u na kieb' oxib' q'ij pa Antioquía, te k'u ri' xel b'ik, xeusolij taq ri tinimit re Galacia, re Frigia, xuya kan anima' chke konojel ri kojonelab'.

Ri tat Apolos kutzizoj ru Loq' Pixab' ri Dios pa ri tinimit Éfeso

²⁴ Pa taq ri q'ij ri' xopan jun tata' aj Israel pa ri tinimit Éfeso. Ri tata' ri' Apolos u b'i'. Ri are' jela' kel pa ri tinimit Alejandria. Sib'alaj kâna'wik kâch'awik, xuquje' sib'alaj retam ru Loq' Pixab' ri Dios ri Tz'ib'talik. ²⁵ Ri are' k'ut yo'm tijonik che chrij ri Qajaw Jesucristo chi rajwaxik ri kojonik che. Ruk' ronojel ranima' kâtzijonik, jikom k'u kub'an chutzijoxik jas ri xub'an ri Jesús, pune ta ne xaq xuwi retam ri qasna' ri xub'an ri tat Juan. ²⁶ Ri tat Apolos xuchaplej u tzijoxik ru Loq' Pixab' ri Dios pa ri rachoch Dios, man kuxej tä rib'. Aretaq k'ut xkítatab'ej ri nan Priscila, ri tat Aquila, xkik'am b'i pa u tukiel wi, xkik'alajisaj k'u chu wäch jas ri gas tzij chrij ru b'eyal ri kojonik chrij ri Dios. ²⁷ Aretaq ri tat Apolos xuchomaj chi ke' pa Acaya, ri kojonelab' xetob'an b'i che, xkítz'ib'aj b'i jun wuj chke ri kojonelab' ri e k'o pa Acaya rech utz u k'ulaxik kâka'no. Aretaq xopan ri tat Apolos pa Acaya, sib'alaj xeuto' ri winaq ri e kojoninaq chik rumal ru toq'ob' ri Dios pa ki wi'. ²⁸ Ruk' nimalaj chuq'ab' ri tat Apolos xuq'alajisaj chkiwäch konojel ri winaq chi man gas tzij taj ri kâkib'ij ri winaq aj Israel. Ri e are' man jub'iq' taj xekowin che ri tat Apolos, rumal chi xuk'ut chkiwäch ri winaq jas ri kub'ij ru Loq' Pixab' ri Dios ri Tz'ib'talik, chi ri Jesús are wa' ri Cristo ri keye'm.

19

Ri tat Pablo kopan pa ri tinimit Éfeso

¹ Aretaq ri tat Apolos k'o pa ri tinimit Corinto, ri tat Pablo xok'ow pa taq ri alaj taq tinimit ri e k'o puwi' taq ri juyub', xopan k'u pa ri tinimit Éfeso. Chila' xeurig wi jujun kojonelab'. ² Xuta' k'u chke we kojonelab' ri', xub'ij: ¿A xqaj ri Loq'alaj Espiritu puwi' ala q aretaq xkojon ala q? —xcha chke.

Ri e are' xech'awik, xkib'ij che: Man jub'iq' taj qa tom u tzijol wa' chi k'o jun Loq'alaj Espiritu, —xecha che.

³ Ri tat Pablo xuta' chke, xub'ij: ¿Jas k'u u wäch qasna' ri b'anom chech ala q? —xcha chke.

Ri e are' xech'awik, xkib'ij che: Are ri qasna' ri xub'an ri tat Juan, —xecha che.

⁴ Ri tat Pablo xub'ij chke: Qas tzij ri tat Juan xub'an ki qasna' ri winaq ri xkik'ex kanima', xkik'ex k'u ki chomanik. Xub'ij k'u chke ri winaq chi rajwaxik kekojon na che ri Jun chik ri kâpetik, are k'u ri Jesús wa', ri Cristo, —xcha ri tat Pablo chke.

⁵ Aretaq xkita ri xub'ij, xb'an ki qasna' pa ru b'i' ri Qajaw Jesús. ⁶ Aretaq ri tat Pablo xuya u q'ab' pa ki wi', xqaj ri Loq'alaj Espiritu pa ki wi', xech'aw pa jule' taq ch'ab'al chik, xkítzizoj k'u ri tzij ri xeyi' chke rumal ri Dios. ⁷ Kraj e kab'lajuj achijab' wa' chkonojel.

⁸ Ri tat Pablo, oxib' ik' xutajej opanem pa ri rachoch Dios ri kâkimulij wi kib' ri winaq aj Israel, ri kutzizoj wi ru Loq' Pixab' ri Dios, man kuxej tä k'u rib'. Xukoj u chuq'ab' che ki tzijob'exik ri winaq chrij ru taqanik ri Dios, xuquje' chuk'utik chkiwäch chi are gas tzij ri tajin kub'ij chke. ⁹ E k'o k'u jujun ri man xkita tä ri xub'ij rumal chi xa ab'ajarinaq ri kanima'. Man xkaj taj xekojonik, xane xa k'âx xech'aw chrij ri Utzaj Tzij re ri Evangelio chkiwäch konojel ri winaq. Xutas k'u rib' ri tat Pablo chkiwäch we winaq ri', xeuk'am b'i ri kojonelab' pa jun escuela rech jun tata', Tiranno u b'i'. Chila' k'ut xeutijoj wi ronojel q'ij. ¹⁰ Kieb' junab' je' xutajej u b'anik wa'. Je ri' chi konojel ri e k'o pa Asia, winaq aj Israel xuquje' winaq ri man e aj Israel taj, xkita ru Loq' Pixab' ri Dios chrij ri Qajaw Jesucristo. ¹¹ Ri Dios k'ut xub'an nimaq taq kajmab'al rumal ri tat Pablo. ¹² Je ri' chi ri su't, ri atz'iaq ri kojom rumal ri tat Pablo, xekiya chkiwäch ri ki cuerpo ri yawab'ib', xekunatajik, xuquje' e k'o yawab'ib' ri xeb'el itzel taq espíritus chke.

¹³ E k'o k'u jujun winaq aj Israel ri xaq xeb'inik, xekesaj itzel taq espíritus chke ri winaq. Ri e are' xkaj xkikoj ru b'i' ri Qajaw Jesús chub'anik wa', xkib'ij k'u chke ri itzel taq espíritus: Pa ru b'i' ri Jesús ri kutzizoj ri tat Pablo, kujtaqan chiwe chi kixel b'ik, —xecha chke.

¹⁴ Jujun ri xeb'anow wa' e are' ri wuqub' u k'ojol jun tata', Esceva u b'i'. Ri tata' ri' are jun aj Israel, jun chke ri ki nimal sacerdotes. ¹⁵ Aretaq k'ut je' xka'no, ri itzel espíritu xub'ij chke: Wetam u wäch ri Jesús,

* 18:25 We tzij ri', "xuwi retam ri qasna' ri xub'an ri tat Juan", are kieb' oxib' ri kel kub'ij. Waral k'ut are kraj kub'ij chi mâja' retam jun jas kub'an ri Loq'alaj Espiritu, kok pa ranima' jun aretaq kâkojon che ri Qajaw Jesús (Hechos 19:1-6).

xuquje' wetam jachin ri' ri tat Pablo, are k'u ri ix, ¿jachin k'u ri ix? —xcha chke.

¹⁶ Ri achi k'ut ri k'o ri itzel espíritu che, ruk' nimalaj chuq'ab' xuk'iaq rib' chkiq. Xkowin k'u che ki ch'akik konojel. Ko xeuchapo, xub'an k'ia u wäch k'äx chke, je ri' chi man k'o tä chi katz'iaq chkiq. Soktajinaq chik xeb'el b'i pa ri ja, xanimaj k'u b'ik. ¹⁷ Xketamaj k'u wa' konojel ri winaq ri e k'o pa ri tinimit Éfeso, winaq aj Israel, xuquje' winaq ri man aj Israel taj, je ri' chi xkixej kib' konojel. Are k'u xkinimarisaj na u q'ij ri Qajaw Jesús.

¹⁸ Xuquje' e k'ia chke ri winaq ri xekojonik, xepetik, xkiq'alajisaj jachike ri man utz taj ri ka'nom nab'e. ¹⁹ Xuquje' e k'ia chke ri winaq ri nab'e kanoq kaka'n ri itzinik, xkik'am loq ri ki wuj ri xkikojo, xekiporoj k'u chkiwäch konojel ri winaq. Aretaq xkajilaj ri rajil taq ri wuj, xkilo chi are kawinaq lajaj mil quetzales chronojel. ²⁰ Rumlal konojel taq wa' we kajmab'al ri', xel u tzijol ru Loq' Pixab' ri Dios pa ronojel tinimit, e k'ia k'u ri winaq ri xekojonik.

²¹ Te k'u ri ri' ri tat Pablo xuchomaj chi utz la' we ke' che ki solixik taq ri tinimit re Macedonia, re Acaya, kutagej k'u ru b'e, kopan pa ri tinimit Jerusalén. Xub'ij k'ut chi aretaq kato'taj pa Jerusalén, rajwaxik xuquje' chi ke' pa ri tinimit Roma. ²² Xeutaq k'u b'i ri a Timoteo rachi'l ri tat Erasto, kieb' chke ri ketob'an ruk', rech keb'e pa Macedonia. Are k'u ri are' xk'o'ji na kan kieb' oxib' q'ij pa Asia.

Ri winaq käkiyak kib' chrij ri tat Pablo pa ri tinimit Éfeso

²³ Pa taq ri q'ij ri' xchaptaj jun ch'oj chkiq ri winaq pa ri tinimit Éfeso rumal ri Utzalaj Tziz re ri Evangelio. ²⁴ Are xchaptaj wa' rumal jun tata', Demetrio u b'i'. We tata' ri' are jun ch'ayal ch'ich' ri kub'an alaj taq ja re saq puag ri käkesaj u wäch ri rachoch ri ki dios ri winaq aj Éfeso, Diana u b'i'. Käkich'ak k'u nim puag ri achijab' ri kechakun ruk'. ²⁵ Ri tat Demetrio xeumulij k'u ri ajchakib', xuquje' nik'iaj achijab' chik ri junam ki chak ruk', xub'ij chke: Etam alaq chi nim jub'iq' ri tajin käqach'ak chrij we chak ri'. ²⁶ Kil b'a' alaq xuquje' käta alaq chi we achi ri', Pablo u b'i', kub'ij chi ri tiex ri xa e b'anom kumal winaq man e dios tä ri'. Man xuwi tä k'u ri winaq pa Éfeso u kojom ki k'ux, xane xuquje' ne ri winaq pa taq konojel ri tinimit ri e k'o pa Asia. ²⁷ We ne man nim tä chi kil wi ri rachoch ri nimalaj dios Diana, käsach k'u u wäch ri qa k'ay, are sib'alaj k'äx wa'. Je ri' man käyi' tä chi u q'ij we nimalaj dios ri' ri käq'ijilax kumal konojel ri winaq aj Asia, xuquje' kumal konojel ri winaq cho ruwächulew, —xcha chke.

²⁸ Aretaq xkita wa' we tzij ri', sib'alaj xpe koyowal, xkiraq ki chi', xkib'ij: ¡Nim u q'ij ri Diana ri ki dios ri aj Éfeso! —xecha'.

²⁹ Konojel k'u ri winaq pa ri tinimit xa xsach ki k'ux. Xaq jun xkiyo', xeb'e' chkiq ri tat Gayo, ri tat Aristarco. Kieb' tata'ib' wa' aj Macedonia e rachi'l ri tat Pablo. Xekichatej k'u b'i pa ri k'olib'al ri e naq'atal wi ri winaq käkimulij wi kib'. ³⁰ Ri tat Pablo, are ta xraj xok b'i kuk' rech keutzijob'ej ri winaq, are k'u ri kojonelab' xkiq'atej. ³¹ Xuquje' jujun tata'ib' ri k'o ki taqanik pa ri q'atb'al tzij re Asia, ri e utz ruk' ri tat Pablo, xkitaq u b'ixik che chi mok b'i jela' chkiq ri winaq. ³² Ri winaq ri ki mulim kib' xaq xkiraq ki chi', jun wi ri xkib'ij ri nik'iaj, jun chi wi ri xkib'ij ri nik'iaj chik, rumal chi xaq xeb'el ch'uj. E k'ia chke ri man ketam taj jas che ki mulim kib'. ³³ K'o k'u jun achi aj Israel chila', Alejandro u b'i'. Xesax k'u loq ri tata' ri' chkiq ri winaq. Are ri ch'ikimim loq kumal ri winaq aj Israel. E k'o k'u jujun xkib'ij che jas ri tajin käb'anik. Ri tat Alejandro xuyay ru q'ab' chub'ixik chke chi mech'aw chik. Are k'u kraj käkitzib'oj'ej ri winaq che ki to'ik ri kieb' tata'ib'. ³⁴ Aretaq k'ut xkich'ob' ri winaq chi ri are jun achi aj Israel, konojel xkiraq ki chi', xkib'ij: ¡Nim u q'ij ri Diana, ri ki dios ri aj Éfeso! —xecha ri'.

³⁵ Xpe k'u ri ajtz'ib' re ri tinimit. Aretaq xkowinik xub'ano chi ri winaq käkitatab'ej ri kub'ij, xub'ij chke: Alaq ri', alaq tata'ib' aj Éfeso, konojel ri winaq ketam chi we tinimit Éfeso k'o reqlen chuchajixik ri rachoch ri nimalaj qa dios Diana, xuquje' ri ab'aj, ru wächb'al ri ri are' ri xtxaq loq chikaj. ³⁶ Qetam k'ut chi man k'o tä jun ri mat retam wa'. ¡Xaq jun k'ol wi alaq! K'o jas mab'an alaq ri mat kächomaj na alaq ruk' utzil. ³⁷ We achijab' ri' ri k'amom alaq loq, man k'o tä jas jun äwas ri ka'nom, man e yoq'oninaq tä k'u che ri qa dios ri Diana. ³⁸ We ri tat Demetrio xuquje' ri kechakun ruk' ketam chi k'o jun k'äx ri u b'anom jun chke ri achijab' ri', are ki patän ri q'atal taq tzij xuquje' ri q'atb'al taq tzij ri e k'olik. Chila' je'kib'ij wi chkiq'ujunäl chub'ixik jachike ri k'o pa kanima'. ³⁹ We are jun chi wi ri kaj alaq, kuya' käb'ij alaq wa' aretaq käqamulij qib' rech käqachomaj wa' chnojimal. ⁴⁰ Xib'ib'al k'u wa' we käb'ix chqe chi xa käqayak qib' chkiq ri ketaqan pa qa wi' xa rumal ri xb'antaj waral kämik. Man k'o tä k'u jas kuya' käqab'ij chke we käta' chqe jas u b'anik ri ch'oj ri' ri xb'anik, —xcha'.

⁴¹ Xuwi xb'itaj wa' rumal ri ajtz'ib' re ri tinimit, xub'ij chke ri winaq: ¡Xujto'taj b'a'! —kächa'. Oj alaq cho ja, —xcha chke ri winaq.

Ri Pablo ke' pa Macedonia xuquje' pa Grecia

¹ Aretaq xtäni wa' we ch'oj ri', ri tat Pablo xeusik'ij ri kojonelab' rech keupixb'aj, kuku'b'isaj ki k'ux. Te k'u ri' xeuch'ab'ej kanog, xe' k'u pa Macedonia. ² Xeuch'ab'ej k'u ri qachalal ri e k'o pa taq ri tinimit ri xok'ow wi. Xaq je ri' sib'alaj xuya anima' chke ri kojonelab'. Te k'u ri' xopan ri are' pa Grecia. ³ Oxib' ik' xk'oji na chila'. Xaq jub'iq' man xok tä ri are' pa barco rech ke' pa Siria aretaq xuto chi ri winaq aj Israel tajin käkichomaj u b'anik k'äx che. Rumal wa' xuchomaj chi utz na kätzelej chrağan, kok'ow chi na jumul pa Macedonia. ⁴ Xachi'lax k'u b'i rumal ri tat Sópater aj Berea, ri tat Aristarco, ri tat Segundo aj Tesalónica, ri tat Gayo aj Derbe, ri a Timoteo, xuquje' nik'iaj kojonelab' aj Asia, ri tat Tiquico, xuquje' ri tat Trófilo. ⁵ We qachalal ri' xenab'ejik, xujkeyej k'u pa ri tinimit Troas. ⁶ Are k'u ri uj, aretaq xok'ow ri nimaq'ij re ri kaxlan wa ri man käyi' tä ch'äm ruk', xujel b'i pa ri tinimit Filipos pa barco. Ok'owinaq chi k'u job' q'ij, xeqariqa pa ri tinimit Troas. Wuqub' q'ij k'ut xujkanaj na kan chila'.

Waral kub'ij wi ri xub'an ri tat Pablo pa ri tinimit Troas

⁷ Pa ri nab'e q'ij re ri semana xqamulij qib' rech kujwi' junam, káqatij k'u ri wa natab'al re ru kámikal ri Qajaw Jesús. Are k'u ri tat Pablo xeutzijoj ru Loq' Pixab' ri Dios chke ri kojonelab'. Rajwaxik k'ut chi ri tat Pablo kel b'i chila' chukab' q'ij. Rumal ri' naj xtzijon na k'ä xuriq na ri nik'iaj aq'ab'. ⁸ Are pa ri u rox wiq ja qa mulim wi qib'. Chila' k'ut e k'o k'ia chäj tzijtalik. ⁹ K'o k'u jun ala, Eutico u b'i, t'uuyul pa ri ventana. Ri ala sib'alaj k'äx u waram, xtxaq k'u loq pulew tzipa ru rox wiq ja, káminaq chik xyakik. ¹⁰ Xqaj k'u loq ri tat Pablo, xjupi' puwi' ri ala, xulaq'puj, te k'u ri' xub'ij chke ri qachalal: Mäxej ib' alaq, qachalal, are k'asal chik ri ala, —xcha chke.

¹¹ Ri tat Pablo xpaqi chi jumul pa ri ja, xupir ri wa, junam xwi' ri are' kuk' ri kojonelab'. Xutagej k'u tzijonem k'ä xsaqir na. Te k'u ri' xel b'i chila'. ¹² Are k'u ri ala k'asal chik xkik'am b'ik. Konojel k'ut sib'alaj kekikot chik.

Ri tat Pablo kel b'i pa ri tinimit Troas, kopan k'u pa ri tinimit Mileto

¹³ Ri uj xujnab'ejik, xuje' pa barco, xujopan pa ri tinimit Asón. Jela' xuje' wi rech káqariq ri tat Pablo, xok k'u b'i quk' pa ri barco chila'. Je ri' xqa'no rumal chi ri tat Pablo xuchomaj chi ke' chrağan pa Asón. ¹⁴ Aretaq xqariq qib' ruk' ri tat Pablo, xok ri are' quk' pa ri barco. Junam chik xuje' pa ri tinimit Mitilene. ¹⁵ Pa barco xujel chi na b'i chila', xqataqej k'u ri qa b'e. Chukab'

q'ij k'ut xujopan chuwäch ri Quío. Che ri jun q'ij chik xujopan pa ri tinimit Samos chi' ri mar. Xujuxlan k'u pa ri tinimit Trogilio, te k'u ri', chukab' q'ij, xujopan pa ri tinimit Mileto. ¹⁶ Je ri' xqa'no rumal chi ri tat Pablo xuchomaj chi man kok'ow tä pa pa ri tinimit Éfeso rech man káb'eytaj tä pa Asia. Are k'u kraj kopan chanim pa ri tinimit Jerusalén we kákowinik rech károk'owisaj ri nimaq'ij re Pentecostés chila'.

Ri tat Pablo kätzjon kuk' ri k'amal taq ki b'e ri qachalal kojonelab' aj Éfeso

¹⁷ Aretaq uj k'o chi pa ri tinimit Mileto, ri tat Pablo xtağan che ki sik'ixik ri k'amal taq ki b'e ri qachalal kojonelab' ri e k'o pa ri tinimit Éfeso. ¹⁸ Aretaq xeopanik, xub'ij chke: Qachalal, etam alaq jas ri nu k'aslemal qas pa ri nab'e q'ij ri xinul uk' alaq waral pa Asia. ¹⁹ Ronojel q'ij ri xink'oji uk' alaq xinpatänij ri Qajaw Jesús, man xinnimarisaj tä wib'. Ruk' taq oq'ej xinn'an ri nu chak uk' alaq, xuquje' xinriq k'ia u wäch k'äx'ol ri xepe chwij rumal ronojel ri xka'n ri winaq aj Israel chwe. ²⁰ Pune je ri', man xinya tä kan u tzijoxik ru Loq' Pixab' ri Dios chech alaq, xuquje' ronojel u wäch tijonik ri kajwataj chech alaq rech káriq alaq ri utzil. Xane xintzijoj wa' chuwäch alaq cho taq ri achoch alaq, xuquje' chkiwäch konojel ri nik'iaj winaq. ²¹ Xinnb'ij chke ri winaq aj Israel, xuquje' ri nik'iaj winaq chik chi rajwaxik kákik'ex kanima', kákik'ex k'u ki chomanik cho ri Dios, xuquje' kákiya kan ri ki mak, kekojon k'u che ri Qajaw Jesucristo. ²² Kámik k'ut kine' pa ri tinimit Jerusalén. Rajwaxik k'ut kinniman che ri Loq'alaj Espiritu ri taqowinaq wa' chwe. Man wetam tä k'ut jas ri káb'an na chwe chila'. ²³ Xuwi wetam jas ri u b'im ri Loq'alaj Espiritu chwe pa taq konojel ri tinimit ri kine' wi, chi kinoksax na pa che', sib'alaj kinriq na k'äx. ²⁴ Man k'o tä k'u jun chke we k'äx'ol ri' ri kinok il rumal. Xuquje' ne ri nu k'aslemal man are tä qas nim kinwil wi. Are kwaj kin'is ri nu chak ri nu taqem rech kinopan pa ri k'isb'al re ri nu k'aslemal ruk' kikitom. Kwaj k'ut kink'is u b'anik ri yo'm pa nu q'ab' rumal ri Qajaw Jesús. Are wa' ru tzijoxik ri Utzalaj Tzij re ri Evangelio chke ri winaq, kinb'ij chke chi ri Dios sib'alaj kurayij kutoq'ob'isaj na ki wäch nimalaj konojel, —kácha ri tat Pablo.

²⁵ Kámik k'ut qas wetam chi man k'o tä jun chech alaq, ri nu tzijom ri Utzalaj Tzij re ri Evangelio che chrij ru taqanik ri Dios, ri káril chi na jumul nu wäch. ²⁶ Rumal ri' kinb'ij chech alaq pa we q'ij kámik chi ri in man k'o tä nu mak che jachin jun chech alaq we kásach u wäch. ²⁷ Je ri', rumal chi xinya u b'ixik chech alaq ronojel ri u chomam ri Dios pa qa wi'. Man k'o tä jas jun u wäch

tijonik ri mat xinya chech alaŋ. ²⁸ Chajij b'a' ib' alaŋ, chechajij k'u alaŋ ri qachalal kojonelab'. Kojom k'u alaŋ che k'amal taŋ ki b'e rech kechajij alaŋ konojel ri qachalal ri e kojoninaŋ che ri Qajaw Jesús. Xkäm k'u ri Are' cho ri cruz, xuya k'u ru kik'el rech käkiriŋ ru tob'anik ri Dios. ²⁹ Wetam k'ut chi aretaŋ in elinaŋ chi b'i uk' alaŋ, kepe na achijab' ri kaka'n na k'äx chke ri qachalal kojonelab', je' ta ne e k'alaj taŋ utiw wa' ri kekitij taŋ ri chij. ³⁰ Kek'oŋi k'u na jujun achijab', b'anal taŋ tzij, xol alaŋ, ri kekitijoj ri winaŋ che ri man qas tzij taŋ chuk'exwäch ri qas tzij rech keb'e' ri kojonelab' kuk'. ³¹ ¡Chila b'a' alaŋ wa', chk'ask'at alaŋ! Chna'taj chech alaŋ chi oxib' junab', chi paŋ'ij chi chaŋ'ab', man xintäni tä che pixb'exik alaŋ chjujunal alaŋ ruk' taŋ oŋ'eŋ, —kächa chke.

³² Are k'u ri kämik, qachalal, kinjach kan alaŋ pu q'ab' ri Dios rech man käsach tä chech alaŋ ru Loŋ' Pixab' ri Dios ri kuk'ut chqawäch chi sib'alaj nim ru toŋ'ob' ri Are' pa qa wi'. We tzij ri' käkowinik kub'ano chi käk'oŋi chuŋ'ab' alaŋ, xuŋuje' kub'ano chi käriŋ alaŋ ri echb'al alaŋ junam kuk' konojel ri e rech ri Dios. ³³ Man are tä saŋ puaŋ, man are tä q'an puaŋ, man are tä atz'iaŋ rech jachin chech alaŋ nu rayim u wäch. ³⁴ Qas etam alaŋ chi xinchakun chuch'akik ronojel ri xajwataŋ chwe, xuŋuje' ri xajwataŋ chke ri e k'o wuk'. ³⁵ Pa ronojel ri nu tijonik nu k'utum chuwäch alaŋ chi rajwaxik kujchakunik chuch'akik ri kajwataŋ chqe, rech xuŋuje' kujkowinik keŋato' ri k'o ki rajwaxik. Xinna'taj chech alaŋ ru tzij ri Qajaw Jesús ri kub'ij: "Are utz na re ri winaŋ ri k'o kusipaj che jun chik chuwäch ri jun ri xaq xuwi kuk'amo," —kächa, —xcha ri tat Pablo chke.

³⁶ Aretaŋ xb'itaj wa' we tzij ri' rumal ri tat Pablo, xxuki'k, xub'an orar junam kuk' konojel. ³⁷ Konojel k'ut xeb'oŋ'ik, xkik'iaŋ kib' chuŋul ri tat Pablo, xkitz'umaj. ³⁸ Sib'alaj xeb'isonik rumal ri xub'ij chke chi man k'o tä chi jumul ri kälil na u wäch. Xkachi'laj k'u b'ik, xekijacha kan chi' ri mar jawije' k'o wi ri barco.

21

Ri tat Pablo ke' pa ri tinimit Jerusalén

¹ Aretaŋ xeqaya kan ri qachalal, xujok pa ri barco, jikom xuŋe' pa Cos. Chukab' q'ij chik xujq'ax pa Rodas, te k'u ri' xuŋe' pa ri tinimit Pátara. ² Xqariŋ k'u jun barco pa Pátara ri ke' pa Fenicia, xujok k'u chupam, xqataŋeŋ k'u ri qa b'e. ³ Aretaŋ xujq'ax pa ri mar, xqil apan ri Chipre, xqaya k'u kan pa ri qa mox, xqataŋeŋ ri qa b'e, xujopan pa Siria. Xujok'ow k'u na pa ri tinimit Tiro rumal chi

ri barco xuya na kan eqa'n chila'. ⁴ Xeqariŋ jujun kojonelab' chila', xa je ri' xujkanaj kan wuqub' q'ij kuk'. K'o k'u ri xq'alajisax chkiwäch ri kojonelab' rumal ri Loŋ'alaj Espiritu rech käkib'ij che ri tat Pablo chi me' pa ri tinimit Jerusalén. ⁵ Aretaŋ xtz'aqat ri wuqub' q'ij kuk' ri kojonelab', xujel b'i pa ri tinimit Tiro. Konojel ri kojonelab', ri achijab' kachi'l ri kixoxil, xuŋuje' ri kalk'ual xuŋe'kijacha kanoŋ. Aretaŋ xujopan chi' ri mar xujxuki'k, xqa'n orar. ⁶ Te k'u ri' xqajach qib'. Xeqach'ab'eŋ kan ri qachalal, te ri' xujok pa ri barco, are k'u ri e are' xetzelej kan cho kachoch.

⁷ Ri uj xqataŋeŋ ri qa b'e pa ri mar, qelik loŋ pa ri tinimit Tiro, xujopan pa ri tinimit Tolemaida. Xqayala rutzil ki wäch ri qachalal ri e k'o chila', xujkanaj k'u na jun q'ij kuk'. ⁸ Chukab' q'ij chik xujel b'i pa Tolemaida, ri tat Pablo xuŋuje' ri uj, ri uj rachi'l, xuŋe' pa ri tinimit Cesarea. Chila' k'ut xuŋe' cho rachoch ri tat Felipe, tzijol re ri Utzalaj Tzije re ri Evangelio. Ri are' k'ut are jun chke ri wuqub' diáconos ri xecha' nab'e pa Jerusalén. ⁹ Ri tat Felipe, e k'o kieŋeb' u mia'l ri man e k'ulan taj. We alitomab' ri' tajin käk'iq'alajisaj ri tzij ri yo'm chke rumal ri Dios. ¹⁰ Ya xke' kieb' oxib' q'ij ri uj k'o chila', aretaŋ xopan jun q'alajisaj re ru Loŋ' Pixab' ri Dios ri petinaŋ pa Judea, Agabo u b'i'. ¹¹ Ri are' xopan che qa ch'ab'exik, xuk'am k'u ru pas ri tat Pablo, xuxim ri raŋan xuŋuje' ru q'ab' chb'il rib', xub'ij: Ri Loŋ'alaj Espiritu kub'ij chi aretaŋ kopan ri ajchaŋ'el we pas ri' pa ri tinimit Jerusalén, je wa' kaka'n na ri winaŋ aj Israel chuyutik. Te ri' käkijach na pa ki q'ab' ri nik'iaŋ winaŋ chik, ri man e aj Israel taj, —xcha ri tat Agabo.

¹² Aretaŋ xqata wa' we tzij ri', ri uj xuŋuje' ri winaŋ aj Cesarea ri e k'o kuk' xqab'ochi'j ri tat Pablo chi man ke' tä ri' pa Jerusalén. ¹³ Are k'u ri tat Pablo xch'awik, xub'ij chqe: ¿Jas che koŋ' alaŋ, käya alaŋ nimalaj b'is che ri wanima? Ri in nu yo'm wib', man xuwi taj chi kinyutik, xane xuŋuje' chi kinkämisax chila' pa ri tinimit Jerusalén rumal rech ri Qajaw Jesús, —xcha chke.

¹⁴ Rumal k'u chi man xujkowin taj xqaq'ateŋ, xaq xqaya kan chi je ri', xqab'ij k'ut: ¡Chub'ana b'a' ru rayinik ri Dios puwi' la! —xujcha che.

¹⁵ Ok'owinaŋ k'u kieb' oxib' q'ij, xqa'n k'u u b'anik ri jastaŋ qe. Te k'u ri' xuŋe' pa ri tinimit Jerusalén. ¹⁶ Xujkachi'laj k'u b'i jujun kojonelab' aj Cesarea. Jun chke ri kojonelab' are jun tata' aj Chipre, Mnasón u b'i'. Tzoŋer loŋ we tata' ri' are kojonel. Ruk' k'u ri are' qa chomam kujkanaj wi kanoŋ.

* 21:8 Ri "wuqub' diáconos": Chawila' wa' pa Hechos 6:1-6.

Ri tat Pablo kopan cho rachoch ri tat Jacobo

¹⁷ Aretaq xujopan pa ri tinimit Jerusalén, xujkik'ulaj ri qachalal, sib'alaj xekikot quk'. ¹⁸ Chukab' q'ij xe' ri tat Pablo quk', xuqe' k'u chuch'ab'exik ri tat Jacobo. Ki mulim k'u kib' konojel ri k'amal taq ki b'e ri qachalal kojonelab' chila'. ¹⁹ Ri tat Pablo xuya rutzil ki wäch konojel, te k'u ri' xutzizoj na ronojel jas ru b'anom ri Dios chxixol ri nik'iaj winaq chik ri man e aj Israel taj rumal ri chak ru b'anom kuk'. ²⁰ Aretaq ri e are' xkita ri xub'ij, xkiya u q'ij ri Dios. Xkib'ij k'u che ri tat Pablo: Je', qachalal. Pune ta ne je ri, e k'ia mil winaq aj Israel ri e kojoniñaq. Ri e are' k'ut käkib'ij chi tzrajwaxik wi käqataqej u b'anik ri kub'ij ru Pixab' ri Moisés, —kecha'. ²¹ B'im k'u che we winaq ri' chi ri lal tajin ketijoj la konojel ri winaq aj Israel ri e k'o chxixol ri nik'iaj winaq chik chi ya man rajwaxik tä chik keniman che ri xtaqan wi ri qa mam Moisés. Xuquje' käkib'ij chi käb'ij la chke chi man rajwaxik taj kok ri retal ri ojer trato che ri ki cuerpo ri ki k'ojol, xuquje' chi man rajwaxik tä käka'no jas ri uñ naq'atal wi. ²² ¿Jas ta k'u lo käqa'no? Käkimulij k'u na kib' ri winaq aretaq käkito chi lal ulinaq. ²³ Are utz na we käb'an la ri käqab'ij che la: E k'o quk' uj kiejeb' achijab' ri käka'n na jas ri xkichi'ij u b'anik cho ri Dios. ²⁴ Chek'ama b'i la we achijab' ri' uk' la, aretaq käkesaj ri äwas chki ri e are', b'ana la ri e la junam kuk'. Chya la ri puag ri rajwaxik chke rech kekowinik käkisokaj na ri ki wi'. Je ri' konojel käkil na chi man qas tzij tä ri' ri käb'ix chij la, xane ri lal xuquje' känimaj la ri kub'ij ru Pixab' ri Moisés. ²⁵ Are k'u ri winaq ri man e aj Israel taj ri e kojoniñaq, k'o wuj qa tz'ib'am b'i chke, qa b'im b'ik chi man keb'ok tä il, xane xaq xuwi rajwaxik chi man käkitij tä ri ti'j ri yo'm chkiwäch taq tiox ri xa e b'anom kumal winaq, chi man käkitij tä kik', chi man käkitij tä ri ki ti'jol awaj ri e jitz'am che ki kämisaxik, xuquje' chi man käka'n tä ke jas ri käka'n ri tz'i' ri xaq käkiriq kib', man k'o tä ki pixab', —kecha che ri tat Pablo.

Käkiyak kib' ri winaq chrij ri tat Pablo, kächap kumal, käch'ayik

²⁶ Xpe k'u ri tat Pablo, xeuk'am b'i ri kiejeb' achijab' ruk'. Chukab' q'ij xresaj ri äwas chrij junam kuk', te k'u ri' xok pa ri nimalaj rachoch Dios chub'ixik chke janipa' q'ij kraj na che resaxik ri äwas chki, aretaq chkiujunal käkiya ri rajwaxik käsipax cho ri Dios.

²⁷ Aretaq k'ut xa jub'iq' kraj chi kätz'aqat ri wuqub' q'ij, e k'o jujun winaq aj Israel ri e petinaq pa Asia ri xkil ri tat Pablo k'o pa ri nimalaj rachoch Dios. Xekimulij ri winaq, xkisach ki k'ux, xaq jun xkiyo' xeb'e' chrij ri are'. ²⁸ Xkiraq ki chi', xkib'ij: ¡Tata'ib' aj

Israel! ¡Chujto' alaq! Are achi wa' ri käb'in pa konojel taq ri tinimit. Kuya tijonik chke ri winaq, kub'ij ri man utz taj chki ri qa winaqil, chrij ru Pixab' ri Moisés, xuquje' chrij we loq'alaj ja ri'. E u k'amom k'u b'i jujun winaq aj Grecia ri man e qa winaqil taj pa ri nimalaj rachoch Dios, u b'anom ri äwas u b'anik pa we loq'alaj k'olib'al ri', —xecha'.

²⁹ Je' xkib'ij wa' rumal chi kilom ri tat Pablo k'o pa ri tinimit Jerusalén, rachi'l ri tat Tróximo aj Éfeso. Xkichomaj k'ut chi xuk'am b'i ri are' pa ri nimalaj rachoch Dios.

³⁰ Konojel ri winaq pa ri tinimit Jerusalén xeb'el ch'uj. Aninaq xkimulij kib', xkichap ri tat Pablo, xkicharchatej loq chupam ri nimalaj rachoch Dios, xekitz'apij k'u kan ri porta. ³¹ Tajin käkitzujuk jas käka'no chukämisaxik aretaq xyi' u b'ixik che ri tata', ri ki nimal ri soldados aj Roma, chi konojel ri winaq pa ri tinimit Jerusalén tajin keb'el ch'uj, sachinaq k'u ki k'ux. ³² Ri nim taqanel ri' xeumulij jujun u soldados, xuquje' jujun chke ri ki nimal taq ri soldados, sib'alaj aninaq xeb'e' jela' jawije' e k'o wi ri winaq. Aretaq ri winaq xkil ri nim taqanel e rachi'l ru soldados, xkitanab'a' u ch'ayik ri tat Pablo. ³³ Xpe k'u ri tata' ri' ri kätaqan pa ki wi' ri soldados, xe'k, xuchap ri tat Pablo. Te k'u ri' xtaqan chuyutik ruk' kieb' ximib'al re ch'ich'. Xuta' k'u chke ri winaq jachin ri tat Pablo, xuquje' jas ru mak. ³⁴ Are k'u ri winaq käkiraq ki chi', jun wi ri käkib'ij ri nik'iaj, jun chi wi ri käkib'ij ri nik'iaj chik. Ri tata' man xkowin tä chuch'ob'ik jas ri xk'ulmatajik rumal chi ri winaq xaq käkiraq ki chi'. Je ri' xtaqan chuk'amik b'i ri tat Pablo pa ri ja ri e jeqel wi ri soldados. ³⁵ Aretaq xeopan cho ri gradas rech ri ja, ri soldados ri ki k'amom b'i ri tat Pablo xajwataj na xkitelej, xkipaqaab'a', rumal chi konojel ri winaq sib'alaj kech'ikimij kib'. ³⁶ Konojel k'u ri winaq ri e teren chki käkiraq ki chi', käkib'ij: ¡Chkämisaxoq! —kecha'.

Ri tat Pablo keuch'ab'ej ri winaq chuto'ik rib'

³⁷ Aretaq tajin käk'am b'i ri tat Pablo chupam ri ja ri e jeqel wi ri soldados, ri are' xuta' che ri tata' ri kätaqan pa ki wi', xub'ij che: ¿A kuya' kintzizoj jun rat uk' la? —xcha che.

Ri tata' xuta' che, xub'ij: ¿A awetam katch'aw pa ch'ab'al griego? —kächa'. ³⁸ ¿A mat at ri' ri jun achi aj Egipto, ri xke' kieb' oxib' q'ij wa' xuyak rib' chrij ri q'atb'al tzij, te k'u ri' xeumulij kiejeb' mil achijab' kämisanelab', xeuk'am k'u b'i pa ri juyub' ri kätz'inowik? —xcha che.

³⁹ Xub'ij k'u ri tat Pablo che: Ri in, in jun chke ri winaq aj Israel, xil k'u nu wäch pa Tarso, jun tinimit wa' re Cilicia ri nim u

b'anik. Jela k'ut kinel wi. Kinta jun toq'ob' che la chi käya la chwe chi keinch'ab'ej ri winaq, —xcha ri tat Pablo che.

⁴⁰ Ri tata' xuya' che chi käch'awik. Ri tat Pablo xtak'i puwi' taq ri gradas, xuyak ru q'ab' chkiwäch ri winaq chub'ixik chke chi mech'aw chik. Aretaq xetäni ri winaq, ri tat Pablo xeuch'ab'ej pa ri ch'ab'al hebreo, xub'ij:

22

¹ Loq'alaj taq qachalal, alaq k'amal taq qa b'e, tampe alaq ri kinb'ij chuwach alaq chuto'ik wib', —kächa chke ri winaq.

² Aretaq ri winaq xkito chi ri tat Pablo keuch'ab'ej pa ch'ab'al hebreo, xaq jun xek'o'ji wi, xkitatab'ej na ri kub'ij. Kub'ij k'u ri tat Pablo chke: ³ Ri in, in winaqil alaq, in aj Israel. Xil nu wäch pa Tarso, tinimit wa' re Cilicia. Waral k'ut pa Jerusalén xink'iy wi. Qas utz nu tijoxik xb'an rumal ri nim tata' Gamaliel che ri ki pixab' ri qa mam ojer. Amaq'el ronojel q'ij xintij nu chuq'ab' chupatänixik ri Dios, jas ri käb'an alaq, onojel alaq kämik. ⁴ Nab'e kanoq ri in xinb'an na k'äx chke konojel ri e konojinag che ri Utzalaj Tzij re ri Evangelio, xintzukuj k'u ki kämisaxik. Xeinchap achijab', ixoqib', xeinkoj k'u pa che'. ⁵ Ri ki nimal sacerdots xuquje' konojel ri ki nimaqil ri winaq kekowinik käkiq'alajisaj chi are ri qas tzij. Ri e are' xkiya b'i jujun taq wuj chwe, tz'ib'am wa' chke ri qachalal aj Israel ri e k'o pa ri tinimit Damasco. Xaq je ri' xine' pa Damasco che ki tzukuxik ri kojonelab' rech keinchapo, keink'am loq waral pa Jerusalén, chuk'äjisaxik ki wäch, —xcha ri tat Pablo chke.

Ri tat Pablo kutzijoj jas xub'ano aretaq xkojon che ri Cristo

⁶ B'enam k'u we pa ri b'e, opanem kinb'an pa ri tinimit Damasco, qas pa ri nik'iaj q'ij, xaq te'talik k'ut xtunun jun nimalaj saqil chwij ri xpe chikaj. ⁷ Xintzaq pulew, te k'u ri' xinto k'o Jun ri xch'aw loq chikaj ri xub'ij chwe: "Saulo, Saulo, ¿jas che kab'an we nimalaj k'äx ri' chwe?" —xcha'. ⁸ Ri in k'ut xinb'ij che: "¿Jachin ri lal, Tat?" —xinha che. Ri Are' xub'ij chwe: "In ri' ri Jesús aj Nazaret. Ri k'äx ri tajin kab'ano, are chwe In tajin kab'an wi wa'," —xcha'. ⁹ Ri e k'o wuk' xkil ri saqil, sib'alaj k'u xkixej kib'. Man xkita tä k'u ru ch'ab'al ri jun ri tajin käch'aw wuk'. ¹⁰ Ri in k'ut xinb'ij: "Tat, ¿jas kaj la chi kinb'ano?" —xinha che. Xub'ij k'u ri Qajaw Jesús chwe: "Chatwali-joq, chatagej ri a b'e pa ri tinimit Damasco. Chila' k'ut käb'ix wi na chawe jas ri rajwaxik kab'ano," —xcha chwe. ¹¹ Man xinkowin tä k'ut xinka'yik rumal ri saqil, ri sib'alaj käjuluwik. Rumal ri' xa xinyuqex b'i che ri

nu q'ab' kumal ri wachi'l, xinkik'am b'i pa Damasco, —kächa'.

¹² K'o k'u jun tata' chila', Ananías u b'i'. Ri are' sib'alaj käkojon che ri Dios, kunimaj k'u ru Pixab' ri Moisés. Konojel ri winaq aj Israel ri e k'o chila' pa Damasco käkib'ij chi sib'alaj utz we tata' ri'. ¹³ We tata' ri' xopan che nu ch'ab'exik, xub'ij k'u chwe: "Wachalal Saulo, chka'y chi na la jumul chik," —xcha chwe. Chanim k'ut xutzir ri nu waq'äch, xinkowinik xinka'yik, xinwil k'u ri tata'. ¹⁴ Xub'ij k'u ri tata' chwe: "Cha'tal la rumal ri ki Dios ri qa mam ojer rech ketamaj la jas ru rayinik, xuquje' rech ketamaj la u wäch ri Jikomaj Patänil re ri Dios, xuquje' rech käta la ri qas u ch'ab'al ri Are'. ¹⁵ Kok k'u na la che q'alajisal re ri Are' chkiwäch ri winaq, kätzijoj na la ronojel ri tom la, xuquje' ri ilom la. ¹⁶ ¿Jas ta ne ri keyej na la? jjo' b'a'! Walij la, chb'an qasna' la, ku'b'a k'ux la chrij ri Qajaw Jesús, ta' la toq'ob' che rech käsachtaj ri mak la, kub'an k'u ch'ajch'oj ri anima' la," —xcha chwe, —xcha ri apóstol Pablo.

Ri tat Pablo kutzijoj ri xub'ano aretaq xtaq b'ichutzijoxik ru Loq'Pixab' ri Dios chke ri winaq ri man e aj Israel taj

¹⁷ Ri tat Pablo xutaqej tzijonem, kub'ij: Aretaq xintzelej loq pa we tinimit Jerusalén, xine' k'u pa ri nimalaj rachoch Dios. Tajin kinb'an orar chila', k'o k'u ri xuk'ut ri Dios chnuwäch. ¹⁸ Xinwil ri Qajaw Jesús, xub'ij k'u chwe: "Chakowij, chatel b'i chanim waral pa Jerusalén, rumal chi ri winaq ri e k'o waral man käkikoj tä na ri kab'ij chwij in," —xcha chwe. ¹⁹ Ri in k'ut xinb'ij che: "Qajaw, ri e are' ketam chi nab'e kanoq ri in xine' pa taq ri rachoch Dios ri käkimulij wi kib' ri winaq aj Israel, xeinchap konojel ri kekojon che la, xeinkoj pa che', xuquje' xeinch'ayo. ²⁰ Aretaq k'ut tajin käkikämisa' ri tat Esteban ri patänil e la, ri käq'alajisan chij la, ri in, in k'o kuk'. Sib'alaj utz k'ut xinwil chi käkämisa' xinha'ij k'u ri ki q'u' ri tajin kekämisa' che," —xinha che. ²¹ Ri Qajaw Jesús xub'ij chwe: "Jat, rumal chi rajwaxik katintaj b'i naj kuk' ri nik'iaj winaq chik ri man e aj Israel taj," —xcha ri Are' chwe, —xcha ri tat Pablo chke ri winaq.

Ri tat Pablo k'o pu q'ab' ri tata' ri kätajan pa ki wi' ri soldados

²² Xuwi chi k'u wa' we tzij ri' xkita ri winaq chuchi' ri tat Pablo, xkichap k'u u raqik ki chi', xkib'ij: ¡Chkämisa' we achi ri! ¡Man ya'tal tä che chi käk'asi na! —xecha ri winaq.

²³ Xkitaqej k'u u raqik ki chi', xkiroqij ri ki q'u' cho ri ulew, xkijopij ulew chikaj. (Je' xqa'no chuk'utik chi sib'alaj nim ri koyowal, man käqaj tä k'u chkiwäch ri tajin kub'ij ri tat Pablo.) ²⁴ Ri tata' ri kätajan pa ki

wi' ri soldados xuya taqanik chi koksax ri tat Pablo pa ri ja ri e jeqel wi ri soldados, xuquje' xuya taqanik chi ko käch'ayik, te k'u ri' kāk'ot u chi' rech kub'ij jas che ri winaq kākiraq ki chi' chrij. ²⁵ Aretaq k'ut yutum chik ri are' rech kākich'ayo, xub'ij ri tat Pablo che ri ki nimal soldados ri tak'al chila' che kilik: ¿A ya'tal chech alač käch'ay alač jun achi ri jun kuk' ri winaq aj Roma* we ta mat q'atom tzip puwi' nab'e? —xcha che.

²⁶ Aretač ri tata' ri' xuta ri xub'ij ri tat Pablo, xe'k, xub'ij che ri tata' ri kätäqan pa ki wi' ri soldados: ¿Jas ta k'u lo ri tajin káb'an la che we achi ri'? Ri are' are jun kuk' ri winaq aj Roma, —xcha che.

²⁷ Ri tata' ri kätäqan pa ki wi' ri soldados xe' ruk' ri tat Pablo, xuta' che, xub'ij: ¿A qas tzip chi at jun kuk' ri winaq aj Roma? —xcha che.

Ri tat Pablo xub'ij: Je', qas tzip, —xcha che.

²⁸ Ri nim taqanel xub'ij che ri tat Pablo: Ri in xintoj nimalaj puaq rech kinok che jun chke ri winaq aj Roma, —xcha che.

Ri tat Pablo xch'awik, xub'ij: Ri in, in jun chke rumal chi je' nu b'anik wa' xil nu wäch, —xcha che.

²⁹ Chanim ri soldados ri xa jub'iq' man xkich'ay ri tat Pablo xeb'el ruk', xkiya kanoq. Are k'u ri nim tata' ri kätäqan pa ki wi' ri soldados, aretaq xretamaj chi ri tat Pablo are jun kuk' ri winaq aj Roma, sib'alaj xuxej rib' chi xtaqan chuyutik rech käch'ayik.

Ri tat Pablo käyi' chkiwäch ri ki nimaqil ri winaq aj Israel

³⁰ Ri tata' ri kätäqan pa ki wi' ri soldados xraj xretamaj jas ri qas u mak ri tat Pablo ri tajin kākib'ij ri winaq aj Israel chrij. Xaq je ri' chukab' q'ij xresaj ri ximib'al re ch'ich' che ri tat Pablo, te k'u ri' xtaqan che ki mulixik ri ki nimaqil ri sacerdotes aj Israel, xuquje' konojel ri ki nimaqil ri winaq. Xresaj k'u loq ri tat Pablo, xutak'ab'a chkiwäch.

23

¹ Ri tat Pablo ko xka'y chke ri ki nimaqil ri winaq, xub'ij: Qachalal, ri in kinna' pa ri wanima' chi man k'o tä etzelal nu b'anom pa ri nu k'aslemaal cho ri Dios petinaq loq, —xcha chke.

² Are k'u ri tat Ananías, ri ki nimal sacerdotes, xuya taqanik chke ri winaq ri e k'o chuxkut ri tat Pablo chi kākich'ay pu chi' ruk' ri ki q'ab'. ³ Ri tat Pablo xch'awik, xub'ij che ri tat Ananías: ¡Qas tzip are ri Dios käch'ayow na la! ¡Ri lal xaq kieb' wäch la! Ri lal t'uyul la chila' rech kāk'at la tzip je' jas ri kub'ij ri Pixab'. ¿Jas lo wa' ri káb'an la, kätäqan k'u

la che nu ch'ayik? ¿A mat käniman la che ri kub'ij ri Pixab'? —xcha che.

⁴ Ri achijab' ri e k'o chunaqaj ri tat Pablo xkib'ij che: ¿A je' kab'ano chuch'ab'exik ri ki nimal sacerdotes rech ri Dios? —xecha che.

⁵ Ri tat Pablo xub'ij: Qachalal, man wetam taj chi are ri ki nimal sacerdotes. Kub'ij k'u pa ru Loq' Pixab' ri Dios ri Tz'ib'talik: “Mab'ij ri man utz taj chrij ri jun ri kätäqan puwi' ra tinimit,” —käch'a, —xcha chke.

⁶ Ri tat Pablo xrilo chi jujun chke ri ki nimaqil ri winaq ri e k'olik, e are' jun kuk' ri tata'ib' saduceos, ri nik'iaj chik e are' jun kuk' ri tata'ib' fariseos. Rumal ri' ko xch'awik, xub'ij chkiwäch ri ki nimaqil ri winaq: Qachalal, ri in, in fariseo, in u k'ojol jun fariseo. Tajin k'u kāk'at tzip pa nu wi' rumal chi kinkojo chi kek'astaj na ri käminaqib', ku'l k'u nu k'ux chrij wa', —xcha chke.

⁷ Aretač xb'itaj wa' we tzip ri' rumal ri tat Pablo, ri tata'ib' fariseos, ri tata'ib' saduceos xkichap u chomalaxik kib', xech'ojinik. Je ri' chi ri winaq ri ki mulim kib' xub'an kieb' ki chomanik, xkitasala kib'. ⁸ Je' xka'n wa' rumal chi ri tata'ib' saduceos man kākikoj taj chi kek'astaj na ri käminaqib', man kākikoj taj chi e k'o ángeles, chi e k'o espíritus. Je wa' ri ki tijonik ri e are'. Are k'u ri tata'ib' fariseos kākikoj chi kek'astaj na ri käminaqib', xuquje' chi e k'o ángeles, chi e k'o espíritus. Je ri' ri ki tijonik ri e are'. ⁹ Konojel k'ut, ko na xkaraq ki chi'. Xewalij k'u jujun chke ri tijonelab' re ri Pixab' ri e jun kuk' ri tata'ib' fariseos, xkib'ij: We achi ri' man k'o tä jun mak u b'anom. We ne jun espíritu, we ne jun ángel xuch'ab'ej, mäqaq'atej ne u wäch ri kub'an ri Dios, —xecha'.

¹⁰ Sib'alaj k'u nim ri ch'oj chkixol ri tata'ib'. Rumal ri' ri tata' ri ki nimal soldados aj Roma xuxej rib' we ne káb'an ch'äqataq che ri tat Pablo kumal ri e are'. Xa je ri' xtaqan chke ru soldados chi keb'e'k, kakesaj b'i ri tat Pablo chkixol rech kākik'am b'i jumul chik pa ri ja ri e jeqel wi ri soldados.

¹¹ Chukab' aq'ab' xuk'ut rib' ri Qajaw Jesús chuwäch ri tat Pablo, xub'ij che: ¡Pablo, chachajij anima! Rumal ri a b'anom, rumal chi a q'alajisam waral pa ri tinimit Jerusalén jachin ri in, jas k'u ri nu b'anom, xuquje' are je' rajwaxik kab'an na che nu q'alajisaxik pa ri tinimit Roma, —xcha che.

Ri winaq kākichomaj jas kākā'n chukāmisaixik ri tat Pablo

¹² Chukab' q'ij chi k'ut jujun chke ri winaq aj Israel xjunamataj ki tzip chi kākikāmisaixik ri tat Pablo. Xka'n juramento chi käpe na k'äx pa ki wi' we man kākā'no jas ri xkichomaj,

* 22:25 Ri tat Pablo are jun aj Roma rumal chi xil u wäch pa ri tinimit Tarso, ri ketaqan wi ri winaq aj Roma. Are xuquje' jun aj Israel rumal chi ru tat, ru nan e are' aj Israel.

chi man k'o tä jas käkitij na we ta mat nab'e käkikamisaj ri tat Pablo. ¹³ E k'o na más chkiwäch kawinaq achijab' ri xka'n wa' we juramento ri'. ¹⁴ Xeb'e' k'u wa' kuk' ri ki nimaqil ri sacerdotes xuquje' kuk' ri nik'iaj tata'ib' chik, ri ki nimaqil ri winaq aj Israel, xkib'ij k'u chke: Ri uj xqa'n juramento chi käpe na k'äx pa qa wi' we man käqa'no jas ri xqachomaj, chi man k'o tä jas käqatij na we ta mat nab'e käqakamisaj na ri tat Pablo. ¹⁵ Ri alaq k'ut, xuquje' ri nik'iaj ki nimaqil ri winaq, b'ij alaq che ri tata' ri kätaqan pa ki wi' ri soldados chi kuk'am loq ri tat Pablo chuwach alaq chuweq, b'ij alaq chi xa käk'ot alaq u chi' che retamaxik jas ri qas xub'ano. Are k'u ri uj, k'a mäjoq käpe ri are', kujkoji na apan chuyuxlexik rech käqakamisaj, — xecha chke.

¹⁶ Are k'u jun ala, ri ral ri ranab' ri tat Pablo, xuta wa', jas ri xkichomaj u b'anik, xe' k'u ri are' pa ri ja ri e jeqel wi ri soldados, xub'ij wa' che ri tat Pablo. ¹⁷ Xa je ri' ri tat Pablo xusik'ij jun chke ri tata'ib' ri ki nimal ri soldados, xub'ij che: K'ama la b'i we ala ri' chuwach ri tata' ri kätaqan pa ki wi' konojel ri soldados, k'o k'u ri kraj kub'ij che, — xcha che.

¹⁸ Ri ki nimal ri soldados xuk'am b'i ri ala chuwach ri tata' ri kätaqan pa ki wi' ri soldados, xub'ij che: Ri tat Pablo ri ajpache' xinusik'ij, te k'u ri' xuta' toq'ob' chwe chi kink'am loq we ala ri' chuwach la, k'o k'u ri kraj kub'ij che la, — xcha che.

¹⁹ Ri tata', ri nim taqanel, xuk'am b'i ri ala pu tukiel wi, xuta' k'u che: ¿Jas ri kawaj kab'ij chwe? — xcha che.

²⁰ Te ri' ri ala xub'ij che: Ri ki nimaqil ri winaq aj Israel xjunamataj ki tzij chi käkib'ij che la chi käk'am la b'i ri tat Pablo chkiwäch ri ki nimaqil ri winaq chuweq, käkib'ij k'u na chi xa käkik'ot u chi' che retamaxik jas ri qas xub'ano. ²¹ Mäkoj b'a' la ri käkib'ij, rumal chi e k'o na más chkiwäch kawinaq achijab' ri e yuxleninaq ri tat Pablo. Ri e are' ka'nom juramento chi käpe na k'äx pa ki wi' we ta mat käka'no jas ri ki chomam, chi man k'o tä jas käkitijo we ta mat nab'e käkikamisaj na ri tat Pablo. Ri e are' k'ut chanim ri' e k'o chik, xaq keye'm chi käya la chke jas ri käkib'ij, — xcha che.

²² Ri tata' k'ut ri kätaqan pa ki wi' ri soldados xub'ij che ri ala chi kel b'ik, xub'ij k'u che chi k'o jun mub'ij wi chi xub'ij wa' che.

Ri tat Pablo kätaq b'i chuwach ri tat Félix ri q'atal tzij

²³ Te k'u ri' ri nim tata' ri kätaqan pa ki wi' ri soldados xeusik'ij kieb' chke ri tata'ib' ki nimaqil soldados, xuya k'u taqanik chke chi kekimulij kieb' cientos soldados chkaqan, oxk'al lajuj chik ri kekiejenik, xuquje' kieb' cientos ri kekik'am b'i ki lanzas. Rajwaxik

k'ut käka'n u b'anik ri jastaq ke, xaq kek'oji na chila' pa ri u b'elej hora chaq'ab', rech keb'el b'ik, keb'e' pa ri tinimit Cesarea. ²⁴ Xuquje' xuya taqanik chi kekicha' jujun kiej, käb'an u b'anik jun rech k'o kukieje b'i ri tat Pablo, rech käkik'am b'ik, man k'o tä jas jun k'äx kuriqo, xane utz u wäch kopan ruk' ri q'atal tzij ri tat Félix. ²⁵ Te k'u ri' ri tata' ri kätaqan pa ki wi' konojel ri soldados xutz'ib'aj b'i jun wuj, xuya b'i chke. Je wa' xub'ij ri wuj:

²⁶ "In wa', ri in Claudio Lisias. Kintaq b'i rutzil wäch la, tat Félix, lal ri' ri nimalaj q'atal tzij. ²⁷ We achi ri' xchap na kumal ri winaq aj Israel, xaq k'u jub'iq' man xkikamisaj. Aretaq k'ut xinwetamaj in chi are jun aj Roma, xeinsik'ij ri nu soldados, xeintaq k'u che resaxik pa ki q'ab' ri winaq aj Israel. ²⁸ Xwaj k'ut xinwetamaj jas ri mak xub'ano, ri käkib'ij chrij. Rumal ri' xink'am b'i chkiwäch ri ki nimaqil ri winaq aj Israel. ²⁹ Xinwetamaj k'ut chi ru mak are wa' chi man kub'an taj jas ri kub'ij ri ki pixab' ri e are'. Man ya'tal tä k'ut chi käkikamisaxik, man ya'tal taj chi kok pa che' rumal wa'. ³⁰ Xinta k'ut chi xjunamataj ki tzij ri winaq aj Israel, ki chomam chi k'ut jas käka'n chukamisaxik we achi ri'. Xa rumal ri' xintaq b'ik uk' la, xinb'ij k'u b'i chke ri winaq ri käkib'ij chrij chi k'o u mak, chi rajwaxik käkioq'alajisaj chuwach la jas ri mak u b'anom ri käkib'ij chrij. Xuwi b'a' wa' ri xinb'ij che la. ¡ch'ab'ej chi la!" — xcha b'i pa ri wuj.

³¹ Ri soldados xkinimaj ri taqanik ri xyi' chke, xkik'am k'u b'i ri tat Pablo, xeb'e' chaq'ab' pa ri tinimit Antipatris. ³² Chukab' q'ij chik ri soldados ri e b'enaq chkaqan xetzelej loq jawije' k'o wi ri ja ri e jeqel wi. Are k'u ri soldados ri e b'enaq chrij kiej xkitaqej ri ki b'e ruk' ri tat Pablo. ³³ Aretaq k'ut xeopan pa ri tinimit Cesarea, xkiya ri wuj che ri nim q'atal tzij, xuquje' xkiya ri tat Pablo chuwach, xkijach k'u pu q'ab'. ³⁴ Ri q'atal tzij xusik'ij ri wuj, te k'u ri' xuta' che ri tat Pablo jawije' kel wi ri are'. Aretaq xretamaj chi are aj Cilicia, ³⁵ xub'ij che: Kinta na ri tzij la aretaq kepe ri winaq ri käkib'ij ri mak chij la, — xcha che.

Xeutaq k'u soldados chuchajixik ri tat Pablo pa ri nim ja ri sib'alaj je'lik, rachoch ri tat Herodes.

24

Ri tat Pablo kuto'rib' chuwach ri tat Félix, ri nim q'atal tzij, rumal ri käkib'ij ri winaq aj Israel chrij

¹ Xke' job' q'ij ri tat Pablo k'o pa ri tinimit Cesarea aretaq xopan ri tat Ananías ri ki nimal sacerdotes, e rachi'l jujun chke ri nimaq taq tata'ib' aj Israel, xuquje' jun kojol tzij ri xuquje' käch'aw pa ki wi' ri winaq. Ri tata' ri', Tértulo u b'i'. Xeb'ok k'u b'i chuwach ri

nim q'atal tzij chub'ixik ri mak chrij ri tat Pablo. ² Aretaq xk'am loq ri tat Pablo, ri tat Tértulo xuchap u b'ixik tzij chrij chuwäch ri nim q'atal tzij, je k'u ri' xub'ij che ri tat Félix: ¡Chäjin la, tat Félix, lal qa nan, lal qa tat! Sib'alaj maltiox che la chi rumal ech la k'o nimalaj utzil pa we qa tinimit, man k'o tä k'u je wa' je ri'. Rumal k'u ri nimalaj no'j la, sib'alaj utz b'anom la chuq'atik tzij puwi' ronojel. ³ Ronojel ri b'anom la käqil pa taq konojel ri tinimit, sib'alaj käqamaltioxij wa' che la, tat Félix. ⁴ Man käqaj tä k'ut käqaya nimalaj latz' che la. Xuwi käqaj käqab'ochi'j la rech käb'an la toq'ob', kujtatab'ej na la jun rat. ⁵ We achi ri', xqetamaj chi jawije' chi' ri kopan wi, xaq k'äx kub'an chkixol ri winaq, je' jas jun nimalaj yab'il. Pa ronojel ruwächulew kuyak ch'oj chkixol ri winaq aj Israel, je ri' chi xaq käkitasala kib'. Ri are' k'ut are jun k'amal ki b'e ri jule' winaq ri ki taqem ru tijonik ri Jesús aj Nazaret ri käb'ix Nazarenos chke. ⁶ Xuquje' xub'an ri äwas u b'anik pa ri nimalaj rachoch Dios. Ri uj k'ut xqachapo. Are ta xqaj xqaq'at tzij puwi', jas ri kub'ij ri qa pixab'. ⁷ Are k'u ri tata', Lisias u b'i', ri kätaqan pa ki wi' ri soldados, xunim rib' ri are'. Ruk' nimalaj chuq'ab' xresaj ri tat Pablo pa qa q'ab'. ⁸ Xub'ij k'ut chi ri winaq ri käkib'ij chrij ri tat Pablo chi k'o u mak, rajwaxik keopan uk' la. Ri lal k'ut kuya' käk'ot la u chi', käta' la che, rech ketamaj la chi qas tzij wa' ronojel ri tajin käqab'ij chrij, —xcha che ri tat Félix.

⁹ Xuquje' ri winaq aj Israel ri e k'o ruk' ri tat Tértulo xkib'ij chi ronojel wa' are qas tzij. ¹⁰ Ri nim q'atal tzij xuk'ut ruk' ru q'ab' chi kuya' käch'aw ri tat Pablo. Ri are' k'ut xub'ij: Wetam chi k'ia junab' chik k'o la che q'atal tzij pa ki wi' we winaq ri', rumal ri' käkikot wanima' kinb'ij kieb' oxib' tzij chuwäch la chuto'ik wib'. ¹¹ Käkowin k'u la ketamaj la chi k'ä te' kab'lajuj q'ij wa' in opaninaq pa ri tinimit Jerusalén chuq'ijilaxik ri Dios. ¹² Man k'o tä k'u ch'oj nu b'anom, man tajin tä kinchomala tzij ruk' jachin jun aretaq xinkiriq pa ri nimalaj rachoch Dios. Man tajin tä kinsach ki k'ux ri winaq pa taq ri rachoch Dios ri käkimulij wi kib' ri winaq aj Israel, o jawije' chi' ri xinkiriq wi pa ri tinimit. ¹³ Wa' we winaq ri' man kekowin taj käkikot chuwäch la chi qas tzij ri tajin käkib'ij chwij. ¹⁴ Kinq'alajisaj k'u chuwäch la, chi ri in are tajin kinpatänij ri ki Dios ri qa nan qa tat ojer. Je' tajin kinb'ano jas ri kub'ij ru tzij ri Jesús ri qas K'amal qa B'e*, ri käkib'ij ri winaq aj Israel chi are' jule' tijonik wa' ri man qas tzij taj. Kinkoj in xuquje' ronojel ri tz'ib'tal pa taq ri wuj re ru Pixab' ri Moisés, xuquje' ri tz'ib'tal pa taq ri ki wuj ri q'alajisaj taq re ru Loq' Pixab' ri Dios. ¹⁵ Jas ri e are',

je' k'u ri in. Ku'l nu k'ux chrij ri Dios chi kek'astaj na konojel ri käminaqib' ri ka'nom utzil pa ri ki k'aslemal, xuquje' ri ka'nom etzelal. ¹⁶ Rumal ri' ama'el ronojel q'ij kinkoj nu chuq'ab' rech man k'o tä etzelal kinna' pa ri wanima' chuwäch ri Dios, o chkiwäch ri winaq, —kächa ri tat Pablo.

¹⁷ Ok'owinaq chi kieb' oxib' junab' ri in b'ininaq pa taq nik'iaj tinimit chik, te k'u ri' xintzelej loq jumul chik pa ri nu tinimit, xine' pa Jerusalén chuya'ik ri puqaq, tob'anik chke ri meb'a'ib' chila', xuquje' chuya'ik sipanik cho ri Dios. ¹⁸ Tajin k'u kinya ri nu sipanik pa ri nimalaj rachoch Dios, wesam chi ri äwas chwij, aretaq xinkiriq jujun winaq aj Israel ri kepe pa Asia. Xa kieb' oxib' ri winaq k'olik, man k'o tä k'u k'äx tajin kinb'an kuk'. ¹⁹ Ri winaq ri kepe pa Asia, ri xinkiriq pa ri nimalaj rachoch Dios, e are wa' ri rajwaxik kepe chuwäch la, käkib'ij k'ut jas u wäch ri mak nu b'anom, we qas tzij k'o k'äx pa ki k'ux chwij. ²⁰ We man je ri', chkib'ij b'a' ri winaq ri e k'o waral chanim, we k'o jas jun mak xkiriq chwij aretaq xinok chkiwäch ri ki nimaqil ri winaq aj Israel. ²¹ We k'u ne are nu mak ri tajin käkib'ij chi aretaq in k'o chkixol, ko xinch'awik, xinb'ij: "Kämik tajin käq'at alaq tzij pa nu wi' rumal chi kinkojo chi kek'astaj na ri käminaqib'," —xinha', —xcha ri tat Pablo che ri tat Félix.

²² Ri tat Félix, aretaq xuta ri xub'ij ri tat Pablo, qas k'o retam chik chki' ri winaq ri ki taqem ru tijonik ri Jesús ri qas K'amal ki B'e. Xuya na kan ru chomaxik wa' pa jun q'ij chik, xub'ij k'u chke ri winaq: Aretaq käpe ri tat Lisias, ri tata' ri kätaqan pa ki wi' ri soldados, te k'u ri' qas kinwetamaj na jas u b'anik ronojel wa', —xcha chke.

²³ Xtaqan k'u ri tat Félix che ri ki nimal soldados, chajil re ri tat Pablo chi kutagej u chajixik. Xuquje' xub'ij che chi kuya che ri tat Pablo chi kuya' keopan ri e utz ruk' chuch'ab'exik, xuquje' chuya'ik ri rajwaxik che, man keuq'atej tä ri e are'.

²⁴ Ok'owinaq chi kieb' oxib' q'ij, xopan chi jumul ri tat Félix rachi'l ri nan Drusila ri rixoqil. Ri are' are jun aj Israel. Xtaqan k'u chusik'ixik ri tat Pablo rech kätzijon kuk' chrij ri kojoniq che ri Jesucristo. ²⁵ Aretaq k'ut ri tat Pablo xuchap u tzijoxik chi rajwaxik kub'an jikom jun che ru k'aslemal, man kub'an tä jun xaq jas ri kraj ri are', xuquje' xutzijoj chi ri Dios kuq'at na tzij pa ki wi' ri winaq pa ri k'isb'al q'ij, xuxej rib' ri tat Félix, xub'ij k'u che ri tat Pablo: Xaq je' na la, kuya' kate'k. Aretaq k'ut käb'antaj ri jastaq we, kintaqan chi na jumul che a sik'ixik, —xcha che.

²⁶ Are k'u kraj ri tat Félix chi ri tat Pablo kuya ptaq che rech kutzoqopij b'ik. Rumal

* 24:14 "K'amal qa B'e": Ri mero tzij pa griego are "ri B'e".

ri' amaq'el kátaqan chusik'ixik rech kátzjon ruk'. ²⁷ E ok'owinaq chi k'u kieb' junab', xaq je ri' ri xka'no. Te k'u ri' xk'extaj ri tat Félix che nim q'atal tzij. Are xkanaj kan ri tat Porcio Festo chuk'exel. Are k'u ri tat Félix, are kraj kub'an kanoq jachike ri káqaj chkiwäch ri winaq aj Israel. Rumal ri' xuya na kan ri tat Pablo pa che'.

25

Ri tat Pablo kok chuwäch ri tat Festo ri nim q'atal tzij ri te' xokik

¹ Xke' oxib' q'ij ri okinaq ri tat Festo che nim q'atal tzij. Te k'u ri' xel b'ik pa ri tinimit Cesarea, xe' k'u pa Jerusalén. ² Chila' k'ut ri ki nimaqil sacerdotes xuquje' ri winaq aj Israel ri más nimaq na ki b'anik xeb'ok chuwäch ri tat Festo chub'ixik jas u wäch mak ri xub'an ri tat Pablo, jas ri tajin káikib'ij chrij. ³ Xkib'ochi'ij ri tat Festo, xkita' k'u toq'ob' che chi kátaqan chuk'amik loq ri tat Pablo pa ri tinimit Jerusalén. Ri winaq aj Israel xjunamataj ki tzij, xkichomaj chi káikámisaj na ri tat Pablo pa ri b'e. ⁴ Xpe k'u ri ri tat Festo, xub'ij chke chi ri tat Pablo k'o pa che' jela' pa ri tinimit Cesarea. Xub'ij k'u chke chi kátzelej na ri are' jela' pa kieb' oxib' q'ij. ⁵ Xuquje' xub'ij chke: Jachin taq ri k'o chxol alaqa, ri k'o taqanik pa ki q'ab', rajwaxik keb'e' wuk' pa Cesarea. We k'u k'o u mak ri achi ri', kuya' káb'ij alaqa wa' chwe jela', —xcha ri tat Festo chke.

⁶ Xa k'u wajxaqib' q'ij, we k'u ne lajuj q'ij, xk'oji ri tat Festo pa ri tinimit Jerusalén, te k'u ri' xtzelej pa ri tinimit Cesarea. Chukab' q'ij xt'uyi pa ru t'uyulib'al pa ri q'atb'al tzij, te k'u ri' xtaqan chusik'ixik ri tat Pablo. ⁷ Aretaq xopan ri tat Pablo chuwäch ri tat Festo, xepe ri winaq aj Israel ri e petinaq pa Jerusalén, xkimulij kib' chrij ri are'. K'ia u wäch k'ax ri xkib'ij chi u b'anom, man xekowin tá k'ut xkik'utu chi qas tzij ri xkib'ij chrij. ⁸ Are k'u ri tat Pablo xub'ij we tzij ri' chuto'ik rib': Ri in man k'o tá jub'iq' mak nu b'anom. Man in makuninaq tá chrij ri ki pixab' ri winaq aj Israel, chrij ta ne ri nimalaj rachoch Dios, o chrij ri César ri nimalaj taqanel puwi' ri Roma, —xcha che ri tat Festo.

⁹ Are k'u ri tat Festo, are kraj kub'ano jachike ri káqaj chkiwäch ri winaq aj Israel, xa rumal ri' xuta' che ri tat Pablo, xub'ij: ¿A kawaj kate' pa ri tinimit Jerusalén rech chila' king'at wi tzij pa wi'? —xcha che.

¹⁰ Xch'aw k'u ri tat Pablo, xub'ij che: Chuwäch ru q'atb'al tzij ri César, ri nimalaj taqanel puwi' ri Roma, in k'o wi. Are waral rajwaxik káq'at wi tzij pa nu wi'. Qas etam k'u la chi man k'o tá jun k'ax nu b'anom chkiij ri winaq aj Israel. ¹¹ We k'u ne nu b'anom jun k'ax, we ne nu b'anom jun mak ri taqal

wi chi kinkámisaxik, man kinwesaj tá wib' chupam, kuya' kinkámisaxik. We k'u man k'o jas ri nu b'anom ri káikib'ij chwij, man k'o tá jun ya'tal che chi kinujach pa ki q'ab'. Kinta' b'a' chi ri César, ri nimalaj taqanel, chi ri are' káq'atow tzij pa nu wi', —xcha ri tat Pablo.

¹² Xtzijon k'u ri tat Festo kuk' ri ya'l taq u no'j ri ketob'an ruk', xub'ij che ri tat Pablo: Xab'ij chi are ri César, ri nimalaj taqanel puwi' ri Roma, káq'atow na tzij pa wi'. Kate' b'a' na ruk' ri nimalaj taqanel ri', —xcha che.

Ri tat Pablo kok chuwäch ri nim taqanel Agripa

¹³ Ok'owinaq chi kieb' oxib' q'ij, ri nim taqanel Agripa rachi'l ri nan Berenice xeb'e' pa ri tinimit Cesarea chuch'ab'exik ri tat Festo. ¹⁴ K'ia q'ij xek'oji na chila', are k'u ri tat Festo xub'ij che ri tat Agripa jas ri xb'an che ri tat Pablo. Je wa' xub'ij che: K'o jun achi waral ri yo'm kan pa che' rumal ri tat Félix aretaq xel b'ik. ¹⁵ Aretaq xink'oji pa ri tinimit Jerusalén, xepe ri ki nimaqil sacerdotes, xuquje' ri ki nimaqil ri winaq aj Israel, xkib'ij chi k'o mak u b'anom we achi ri'. Xkib'ij chwe chi king'at na tzij puwi' chi kák'ájisax u wäch we achi ri'. ¹⁶ Xinx'ij k'u chke ri e are' chi ri q'atb'al tzij re Roma, man u yo'm tá taqanik chi kákámisax jun winaq we man nab'e kopan na chkiwäch ri káikib'ij chrij chi k'o u mak rech kuto' rib' chuwäch ri káb'ix chrij. ¹⁷ Rumal ri' aretaq xepe ri e are' junam wuk' waral, man xinx'eytaj taj, xane chanim chukab' q'ij xint'uyi pa ri t'uyulib'al pa ri q'atb'al tzij, te k'u ri' xintaqan chusik'ixik ri achi ri'. ¹⁸ Aretaq k'ut xepe ri winaq ri káikib'ij chi k'o u mak xub'ano, man k'o tá jun etzelal ri xkib'ij chrij junam ruk' ri tajin kinchomaj in. ¹⁹ Xane xaq xuwi xkib'ij chi ri tat Pablo man kub'an tá ronojel ri e naq'atal wi ri winaq aj Israel, ri e kojoninaq wi che, xuquje' xkib'ij chi kutzijoj ru b'anik jun achi, Jesús u b'i', ri xkámik, kub'ij k'u ri are' chi k'asal chik. ²⁰ Man kinriq tá k'u in jas kinb'ano, rumal k'u ri' xinta' che ri tat Pablo we kraj ke' ri are' pa ri tinimit Jerusalén, rech chila' káq'at wi tzij puwi'. ²¹ Are k'u ri are' xub'ij chi rajwaxik káq'at tzij puwi' rumal ri tat Augusto César, ri nimalaj taqanel puwi' ri Roma. Rumal ri' xintaqan chuchajixik na pa che' k'a kintaq na b'i ruk' ri nimalaj taqanel, —xcha'.

²² Xub'ij k'u ri tat Agripa che ri tat Festo: Ri in xuquje' kwaj kinta ru tzij ri achi ri', —xcha'.

Ri tat Festo xub'ij che: Chuweq káta na la jas ri kub'ij we achi ri', —xcha che ri nim taqanel Agripa.

²³ Chukab' q'ij, aretaq xeopan ri tat Agripa rachi'l ri nan Berenice, sib'alaj nimaq

ka'nom che kib', ruk' nimal xeb'ok b'i pa ri nimalaj ja ri kăkimulij wi kib' ri winaq, kachi'l ri tata'ib' ri ketaqan pa ki wi' ri soldados, xuquje' kachi'l ri tata'ib' ri nimaq ki b'anik pa ri tinimit. Xtaqan k'u ri tat Festo ri nim q'atal tzij chusik'ixik loq ri tat Pablo. ²⁴ Te k'u ri' xub'ij ri tat Festo: Nim taqanel Agripa, xuquje' alaŋ onojel alaŋ ri e k'o quk' waral, k'o we achi ri' chuwăch alaŋ, chrij k'u wa' ri xkiraŋ wi ki chi' k'ia ri winaq aj Israel pa Jerusalén, xuquje' waral pa Cesarea. Kăkib'ij chi k'o mak u b'anom we achi ri', chi rumal k'u ri' rajwaxik kăkămisaxik, —kecha ri'. ²⁵ Ri in k'ut kinwilo chi man k'o tă jun mak u b'anom ri taŋal ta wi kăkămisaxik. Ri are' k'ut u b'im chi rajwaxik kăq'at tzij puwi' rumal ri tat Augusto César, ri nimalaj taqanel puwi' ri Roma. Rumal ri' nu chomam chi kintaŋ na b'i ruk' are'. ²⁶ Man k'o tă k'u jas ri kinkowinik kintz'ib'aj b'i che ri nimalaj taqanel ri kătaqan pa nu wi'. Rumal ri' xink'am loq ri achi chuwăch alaŋ, măs na chuwăch la, nim taqanel Agripa, rech kăk'ot na u chi'. Je ri' k'o ri kinkowinik kintz'ib'aj b'ik. ²⁷ Kinchomaj k'ut chi xaq loq kintaŋ b'i jun ajpache' we man kinb'ij b'ik jas ri mak u b'anom, —xcha chke.

26

Ri tat Pablo kuto' rib' chuwăch ri tat Agripa ri nim taqanel

¹ Ri tat Agripa xub'ij che ri tat Pablo: Kuya' katch'awik chuto'ik awib', —xcha che.

Ri tat Pablo xuyak ru q'ab', te k'u ri' xuchap ch'awem, xub'ij: ² Nim taqanel Agripa, sib'alaj kăkikot wanima' chi kuya' kinch'aw chuwăch la kămik chuto'ik wib' chuwăch ronojel ri kăkib'ij ri winaq aj Israel chwij. ³ Wetam k'ut chi qas etam la ronojel ri uŋ naq'atal wi, uŋ ri winaq aj Israel, xuquje' jachike taŋ ri tzij kujch'ojin chrij. Rumal ri' kinta' jun toq'ob' che la chi kăchajij la paciencia wuk' we na tatab'exik, —xcha ri tat Pablo che ri nim taqanel Agripa.

Ri tat Pablo kutzizoj ru k'aslemal nab'e aretaŋ măjoŋ kăkojonik

⁴ Xutagej tzijonem ri tat Pablo, xub'ij: Konojel ri winaq aj Israel ketam ri nu b'anom pa ri nu k'aslemal chkixol petinaŋ loq, rumal chi kuk' ri e are' xil wi nu wăch. Pa ri nu tinimit k'ut xink'iŋisax wi, xuquje' pa ri tinimit Jerusalén. ⁵ Ri e are' xuquje' ketam wa', kekowinik kăkiŋ'alajisaj wa' we kăkaj, chi ri in tzojer loŋ in jun kuk' ri winaq fariseos. E are' k'u wa' ri winaq aj Israel ri sib'alaj kăkikoj na ki chuŋ'ab' chub'anik ri kub'ij ru Pixab' ri Moisés. ⁶ Kămik k'ut tajin kăq'at tzij pa nu wi' rumal chi ku'l nu k'ux chrij ri xuchi'j kan ri Dios chke ri qa mam ojer, chi keuk'astajisaj na ri kăminaŋib'. ⁷ Are k'u wa' ri keye'm ri winaq aj Israel ri e

k'o che ri ki mam ojer ri kab'lajuj u k'ojol ri tat Jacob, chi je' kăb'antaj na. Rumal ri' keŋ'ijilan che ri Dios. Chi paŋ'ij chi chaŋ'ab' kepatănin che. Tat Agripa, are k'u rumal rech wa' chi ku'l nu k'ux chi kek'astaj na ri kăminaŋib', xa k'u rumal ri' k'o ri kăkib'ij ri winaq aj Israel chwij kămik. ⁸ ǂA mat kăkoŋ alaŋ chi ri Dios keuk'astajisaj ri kăminaŋib'? —kăcha ri tat Pablo chke.

Ri tat Pablo kutzizoj jas xub'ano chub'anik k'ăx chke ri winaq kojonelab' nab'e

⁹ Ri in, in xuquje' nab'e xincomaj in chi rajwaxik kinb'an k'ia u wăch k'ăx chke ri winaq ri ki taŋem ru tijonik ri Jesús aj Nazaret. ¹⁰ Je k'u ri' xinb'an in pa ri tinimit Jerusalén. E k'ia chke ri kojonelab' xeinkoj pa che' rumal ri taŋanik ri xyi' pa nu q'ab' kumal ri ki nimaŋil sacerdotess chi je' kinb'an wa'. Aretaŋ k'ut tajin kekămisax ri kojonelab', ri in sib'alaj utz xinwilo. ¹¹ K'ia mul xink'ăjisaj ki wăch ri kojonelab' pa taŋ ri rachoch Dios ri kăkimulij wi kib' ri winaq aj Israel. Je wa' xinb'ano rech kăkiya kan ri ki kojonik. Sib'alaj k'u xyaktaj woyowal chkiŋ, je' ta ne chi xinch'ujarik. Xine'k, xinb'an k'ăx chke k'ă pa taŋ ri nik'iaŋ tinimit chik, —kăcha'.

Ri Pablo kutzizoj jas xub'ano aretaŋ xkojonik

¹² Ri in b'enaŋ pa ri b'e, b'enam we chub'anik k'ăx chke ri kojonelab' pa ri tinimit Damasco. Ri in taŋom b'ik, xuquje' yo'm b'i taŋanik pa nu q'ab' kumal ri ki nimaŋil sacerdotess. ¹³ Nim taqanel Agripa, are qas pa ru nik'iaŋ q'ij ri', uŋ k'o pa ri b'e aretaŋ xaq te'talik xinwil jun saŋil ri xpe chikaj, ri sib'alaj kăjuluw na chuwăch ri q'ij, xtunun k'u chqij, ri in xuquje' konojel ri e b'enaŋ wuk'. ¹⁴ Ri uŋ qonojel k'ut xujtzaŋ cho ri ulew, te k'u ri' xinta jun ri xch'aw loŋ chikaj ri xub'ij chwe pa ch'ab'al hebreo: "Saulo, Saulo, ǂjas che tajin kab'an we nimalaj k'ăx ri' chwe?" —kăcha'. "Ri at k'ut tajin kariŋ k'ăx, jas ri kub'an ri wakăx ri kukoj aŋan che ri jun che' ri t'ist'ik u wi," —xcha chwe. ¹⁵ Ri in k'ut xinb'ij: "ǂJachin ri lal, Tat?" —xincha che. Ri Are' xub'ij chwe: "In ri' ri Jesús ri tajin kab'an wa' we k'ăx ri' chwe," —kăcha ri'. ¹⁶ "ǂChatwalij b'a'! Nu k'utum k'u wib' chawăch rech katok che patănil we, xuquje' rech katok che q'alajisal re ri awilom kămik chi are ri In, in awilom. Xuquje' kaŋ'alajisaj ri kink'ut na chawăch. ¹⁷ Katinto' na pa ki q'ab' ri a winaŋil, ri aj Israel, xuquje' pa ki q'ab' ri nik'iaŋ winaŋ chik ri katintaŋ wi b'i kămik. ¹⁸ Katintaŋ b'i kuk' rech kab'ano chi ri e are' qas keka'yik, rech keb'el b'i pa ri q'equm re ri mak, keŋ'ax na pa ri saŋil rech ri qas tzij, xuquje' rech man kăkitaŋej tă k'olem pu q'ab' ri Satanăs, xane keŋ'ax na pu q'ab' ri Dios, kekojon k'u

chwe In. Xaq je ri' kākiriq na ri sachb'al ki mak, xuquje' kek'oji na junam kuk' ri e rech ri Dios," —xcha ri Jesús chwe, —kācha ri tat Pablo.

Ri tat Pablo kunimaj ri xk'ut chuwäch rumal ri Dios

¹⁹ Tat Agripa, nim taqanel, rumal ri' ri in xinnimaj ri xuk'ut ri Dios chnuwäch, man xinx'an tä k'u negar. ²⁰ Xane xinchap u tzijoxik ru Loq' Pixab' ri Dios nab'e pa ri tinimit Damasco, te k'u ri' pa ri tinimit Jerusalén, pa ronojel ri Judea, xuquje' chke ri nik'iaj winaq chik ri man e aj Israel taj. Xinq'alajisaj chkiwäch chi rajwaxik kākik'ex kanima', kākik'ex ki chomanik, keniman k'u che ri Dios. Xuquje' xinx'ij chke chi rajwaxik kāka'n ronojel u wäch utzil rech q'alaj chi k'extajinaq ri kanima', k'extajinaq k'u ri ki chomanik. ²¹ Xa k'u rumal wa' ri winaq aj Israel xinkichapa loq pa ri nimalaj rachoch Dios, are ta xkaj xinkikāmisaj. ²² Rumal k'u ru tob'anik ri Dios nu taqem u tzijoxik ru Loq' Pixab' ri Are' kāmik. Nu tzijom ru Loq' Pixab' ri Dios chke nimalaj konojel ri winaq, chke ri man nim tä keil wi, xuquje' chke ri nimaq ki b'anik. Man k'o tä jun tzij ri nu b'im ri mat je' jas ri ki b'im kan ri q'alajisaj taq re ru Loq' Pixab' ri Dios, xuquje' jas ru b'im kan ri qa mam Moisés chi káb'antaj na. ²³ Are je' chi ri Cristo kuriq k'äx, kākāmisax k'u na. Te k'u ri' are ri Are' ri nab'e chkiwäch konojel ri kek'astaj na chxixol ri kāminaqib' rech kutzijoj na chi saq ri qas tzij chrij ru tob'anik ri Dios chke ri qa winaqil, xuquje' chke ri nik'iaj winaq chik ri man e aj Israel taj, —xcha ri tat Pablo chke.

Ri tat Pablo kukoj u chuq'ab' che ri nim taqanel Agripa rech kākōjonik

²⁴ Ri tat Pablo tajin kub'ij taq we tzij ri' chuto'ik rib' aretaq ri tat Festo ko xuraq u chi', xub'ij: ¡Pablo, xaq at elinaq ch'uj! Rumal ri ki sik'ixik k'ia taq wuj, katijoj k'u awib' chkiq, xatch'ujarik, —xcha che.

²⁵ Ri tat Pablo xch'awik, xub'ij: Man in ch'ujarinaq taj jas ri kächomaj la, tat Festo. Ri tajin kinb'ij are qas tzij. Ruk' utzalaj nu chomanik tajin kinb'ij ronojel wa'. ²⁶ Waral k'o wi we nim taqanel Agripa. Qas retam ri are' ronojel wa' ri tajin kinb'ij, rumal k'u ri' man kinxej tä wib' kintzijon chuwäch ri are'. Kinkojo chi ronojel wa' retam ri are', rumal chi ri tajin kinb'ij man b'anom tä wa' chi k'uyal. ²⁷ ¿A mat kākōj la, tat Agripa, lal ri' ri nim taqanel, ri xkib'ij kan ri q'alajisaj taq re ru Loq' Pixab' ri Dios? ¡Qas wetam chi kākōj la! —xcha che.

²⁸ Ri tat Agripa xub'ij che ri tat Pablo: Xa jub'iq' man katkowinik kab'an chanim chi ri in kinkojon na che ri Cristo, —xcha che.

²⁹ Ri tat Pablo xub'ij: We chanim, we na'tam, are ri nu rayinik chi man xuwü tä ri

lal, xane xuquje' konojel ri tajin kākītab'ej ri nu tzij kāmik, kāka'n ta k'u na jas ri nu b'anom in. Man kwaj tä k'ut chi are kuk' we ximib'al re ch'ich' ri', —xcha chke.

³⁰ Xuwi xb'itaj wa' we tzij ri' rumal ri tat Pablo, xwalij ri nim taqanel, xuquje' ri nim q'atal tzij rachi'l ri nan Berenice, xuquje' konojel ri e t'uyul chila'. ³¹ Xeb'e' chuchomaxik rij wa' pa ki tukiel wi. Xkitz-ijob'ela kib', xkib'ij: We achi ri', man k'o tä jun mak u b'anom ri taqal wi kākāmisaxik, o chi kāk'oji ri are' pa che', —xecha'.

³² Xpe ri tat Agripa, xub'ij che ri tat Festo: We achi ri', xqatzogopij ta b'i wa' we ta mat xub'ij chi kāk'at tzij puwi' rumal ri César, ri nimalaj taqanel puwi' ri Roma, —xcha ri tat Agripa che ri tat Festo.

27

Ri tat Pablo kätāq b'i pa ri tinimit Roma

¹ Aretaq xchomatajik chi kujaq b'i pa Italia ri k'o wi ri nimalaj tinimit Roma, ri tat Pablo kuk' nik'iaj chik ajpache' xejach b'i pu q'ab' jun ki nimal ri soldados, ri k'o pa ki wi' cien achijab'. Julio u b'i' ri tata' ri'. We tata' ri' are ri kätāqan pa ki wi' ri soldados ri káb'ix chke: "Rech ri Nimalaj Taqanel Augusto", —kuchixik. ² Xujok b'i pa jun barco pa Adramitio, jun tinimit ri k'o chi' ri mar. We barco ri b'enam re pa taq ri tinimit re Asia. Qachi'l k'u ri tat Aristarco ri kel pa ri tinimit Tesalónica, jun tinimit wa' re Macedonia. ³ Chukab' q'ij xujopan pa ri tinimit Sidón ri k'o chi' ri mar. Ri tat Julio sib'alaj utz xub'an ruk' ri tat Pablo, xuya che chi ke' che ki ch'ab'exik ri e utz ruk' rech kāyi' ri kajwataj che. ⁴ Xujel chi b'i pa ri tinimit Sidón, xqataqej ri qa b'e puwi' ri mar, xqaya kan ri Chipre pa ri qa mox, rumal chi ri kiāqiq' xa chqawäch kāpe wi. ⁵ Xujq'ax pa ri mar chuwäch ri taq'aj re Cilicia, xuquje' re Panfilia, xujopan k'u pa Mira, jun tinimit wa' re Licia.

⁶ Ri tat Julio, ri ki nimal ri soldados, xuriq jun barco chila' aj Alejandria ri b'enam re pa Italia, xujrokisaj chupam rech kākātaqej ri qa b'e. ⁷ K'ia q'ij ri' xaq nojimal ri qa b'inem pa ri barco, xa ruk' taq k'äx xujopan chuwäch ri tinimit Gnido. Rumal k'u rech chi kujuq'atej ri kiāqiq', xa je ri' xujok'ow chuwäch ri Salmón, xujok'ow chrij ri Creta, jun ch'āqap ulew ri k'o pa ri mar. ⁸ Xqataqej ri qa b'e chuchi' ri taq'aj, ruk' taq k'äx xujopan pa ri alaj tinimit ri káb'ix Buenos Puertos che, chunaqaj k'u wa' k'o wi ri tinimit Lasea.

⁹ K'ia q'ij chik uj b'eytajinaq. Sib'alaj xib'ib'al chi k'ut ri b'inem pa ri mar rumal chi kuchap ri q'alaj (ok'owinaq chi k'u ri

ayuno).^{*} Xa je ri' ri tat Pablo xuchap ki pixb'exik ri achijab'.¹⁰ Xub'ij chke: Tata'ib', kinwilo chi we b'inem ri' sib'alaj xib'ib'al, man xuwi taj kub'an na k'ax ri barco, xane xuquje' ri eqa'n ri k'o chupam, xuquje' ne ri uj, we ne kujkäm na, —xcha chke.

¹¹ Are k'u ri tata', ri ki nimal ri soldados, are' xunimaj ri kub'ij ri tata' ri káb'inisan ri barco, xuquje' ri ajchaq'el ri barco. Man xukoj tä pa kuenta ri xub'ij ri tat Pablo.¹² Are k'u ri tinimit ri e k'o wi man utz tä wa' rech kākōk'owisaj ri q'alaj chila', rumal ri' ri más achijab' xkichomaj chi are utz na chi keb'el b'i chila', keb'e' pa ri tinimit Fenice, we kekowinik. Are jun tinimit wa' pa Creta ri k'o chi' ri mar, chusik'el ru wikiäq'ab' u qajb'al ri q'ij, xuquje' chusik'el ru mox u qajb'al ri q'ij. Je ri' xkaj xka'no rech chila' kākōk'owisaj wi ri q'alaj.

Xwalij jun nimalaj q'eqal jäb' puwi' ri mar, sib'alaj nim k'u ri kiäq'iq' ri k'o chupam

¹³ Xpe k'u jub'iq' kiäq'iq' pa ru mox ri relb'al q'ij, ri man qas nim u chuq'ab', rumal ri' xkichomaj chi kekowinik käkitaqej ri ki b'e'. Xeb'el k'u b'ik, xkitagej ri ki b'e' puwi' ri mar chunaqaj ri taq'aj re Creta.¹⁴ Man naj tä más uj b'enaq pa ri mar aretaq xaq te talik xpe jun nimalaj kiäq'iq', ri káb'ix Nordeste che, ri petinaq pa Creta, xuchap k'u u slab'isaxik ri barco.¹⁵ Rumal chi man xujkowin taj xujb'in chqawäch rumal ri kiäq'iq', xa je ri' xaq xqaya che ri kiäq'iq' chi kujk'am b'i rumal.¹⁶ Xujok'ow chrij jun alaj ch'äqap ulew ri k'o pa ri mar, Clauda u b'i, ri man k'o tä wi más kiäq'iq'. Ruk' taq k'ax xujkowin chuyakik ri alaj barco ri qa chererem b'ik che to'b'al qib'.¹⁷ Aretaq k'o chi ri alaj barco chupam ri nim barco, xkixim ri nim barco ruk' kolob' chrij rech man kājaq'in taj. Käkixej k'u kib' we ne kunim rib' ri nim barco pa ri senyāb' ri káb'ix Sirte che, rumal k'u ri' xkiqasaj ri manta ri k'o puwi' ri barco.[†]¹⁸ Chukab' q'ij, rumal chi sib'alaj nim u chuq'ab' ri kiäq'iq' chupam ri q'eqal jäb', xkichap resaxik ri eqa'n pa ri barco, xkik'iäq b'i pa ri mar.¹⁹ Churox q'ij chik xeqak'iäq b'i ri chakub'al taq jastaq rech ri barco pa ri ja'.²⁰ K'ia q'ij chik man xqil tä chi u wäch ri q'ij o ri ch'imil, qa riqom k'u k'ax rumal ri nimalaj q'eqal jäb'. Xqachomaj k'ut chi kujkäm na, man ku'l tä chi qa k'ux chi kujk'asi'k.

²¹ Xke' k'u k'ia ri q'ij man k'o tä qa wa xqatijo, rumal ri' ri tat Pablo xtak'i aq'an chqaxol, xub'ij: Tata'ib', sib'alaj utz na we

ta xta alaq ri xinb'ij, mat xujel loq pa Creta, rech mat xqariq wa' we k'ax ri', we tzaqik ri'.²² Kämik k'ut chajij alaq anima', man k'o tä jun chech alaq ri kākäm na, xane xuwi ri barco käyojyob' na, käsach k'u u wäch.²³ Mier k'ut chaq'ab' xuk'ut rib' jun ängel chnuwäch ri taqom loq rumal ri Dios ri in ajchaq'el, xuquje' ri kinq'ijilan che.²⁴ Xub'ij k'u ri ängel chwe: "Pablo, maxej awib', rajwaxik katopan na ruk' ri César ri nimalaj taqanel puwi' ri Roma. Rumal k'u awech at ri Dios keuto' na chuwäch ri kämikal konojel ri e b'enaq awuk' pa ri barco," —xcha chwe.²⁵ Rumal ri', tata'ib', chajij alaq anima'. Ri in nu ku'b'isam nu k'ux chrij ri Dios, kinkoj k'u na chi qas tzij. Je' káb'antaj na jas ri xb'ix chwe rumal ri ängel.²⁶ Käqato' k'u na qib' pa jun ch'äqap ulew ri k'o pa ri mar aretaq ri kiäq'iq' kujuya kan chila', —xcha chke.

²⁷ Pa jun aq'ab' k'ut, chukab' semana re ri qa b'inem pa ri mar Adria, xuje' je ri', xuje' je wa' rumal ri kiäq'iq'. Are nik'iaj aq'ab' ri', aretaq ri achijab' ri e k'amowinaq b'i ri barco xkilo chi kujnaqajin chik che ri ulew.²⁸ Xketaj ru najal ru pam ri mar, xkilo chi are juwinaq waqlajuq metros qajinaq. Xujb'in chi apan jub'iq', te k'u ri' xketaj chi jumul, xkil k'ut chi are juwinaq wuqub' metros.²⁹ Käkixej k'u kib' we ne käjeqi ri barco cho taq ri ab'aj, rumal ri' xk-iqasaj b'i kiejb' nimaq taq ch'ich' ri káb'ix anclas chke chrij ri barco.[‡] Konojel are kākaj chi käsajir chanim, rumal chi sib'alaj käkixej kib'.³⁰ Ri achijab' ri e k'amowinaq b'i ri barco xkichomaj keb'el b'i pa ri barco chuto'ik kib'. Rumal ri' xkichap u qasaxik ri alaj barco pa ri mar, je' ta ne chi kekikasaj ri nik'iaj anclas chik chuwäch ri nim barco. jMan je' tä k'u ri' ri tajin kākā'no!³¹ Are k'u ri tat Pablo xub'ij che ri tata' ri kätajan pa ki wi' ri soldados, xuquje' chke ri soldados: We ri achijab' ri e k'amowinaq b'i ri barco man kekanaj tä kan chupam ri barco, man kākowin tä alaq kato' ib' alaq, —xcha chke.

³² Xepe k'u ri soldados, xekiquipij taq ri kolob' ri ximib'em re ri alaj barco, xkitzopopij k'u b'i pa ri mar.

³³ Aretaq xsaqirik ri tat Pablo xub'ij chke konojel chi utz we k'o jas käkitiyo, xub'ij k'u chke: Ya xke' kieb' semanas wa' man warinaq tä alaq, man k'o tä jas tijom alaq.³⁴ Kinta' toq'ob' chech alaq chi kawi' alaq. Are rajwaxik wa' rech k'o chuq'ab' alaq chuto'ik ib' alaq. Man k'o tä k'u ne jun u wi' jun chech alaq ri käsach na u wäch, —xcha chke.

^{*} 27:9 Ri tzij "ayuno", aretaq kākōj ch'i, kel kub'ij ri nimaq'ij ri káb'an kumal ri winaq aj Israel rech kána'taj chke ri sachb'al ki mak ojer rumal ri Dios. † 27:17 Ri nim manta ri' ri k'o pa ri barco, aretaq kākaj aq'an wa' rech kuriq ri kiäq'iq', are k'u ri kiäq'iq' kuk'am b'i wa' jas ri kub'an che jun barrilete. Käch'ikimix ri barco rumal ri kiäq'iq' ri kuriq ri manta ri ximital che (Hechos 27:40).

‡ 27:29 Ri nimaq taq ch'ich' ri káb'ix anclas chke, e k'o kolob' ri ximital chke. Ri ki patän ri ch'ich' ri' are chi kākā'no chi ri barco kātāk'i pa ri ja', man k'o tä ke' wi.

³⁵ Aretaq xb'itaj wa' rumal ri tat Pablo, xuk'am ri wa, xumaltioxij wa' che ri Dios chkiwäch konojel, te k'u ri' xupiro, xuchap-lej k'u wi'm. ³⁶ Te k'u ri' konojel xkichajij anima', xewi' k'ut. ³⁷ Ri uj, uj kieb' cientos ruk' oxk'al waqlajuj chqonojel ri uj k'o pa ri barco. ³⁸ Te k'u ri', aretaq kelem chik, xkesaj ri triko pa ri barco, xkik'iaq k'u kan pa ri mar rech man al tä más ri barco.

Käqaj ri barco chuxe' ri ja'

³⁹ Aretaq xsaqirik man xkich'ob' tä u b'i' ri ulew ri xkil apanoq, xkil k'u apan jun u q'ab' mar ri okinaq b'i chupam ri ulew, senyab' u chi'. Xkichomaj resaxik b'i ri barco jela' pa ri ulew we kekowinik. ⁴⁰ Xkiqupij ri kolob' ri ximib'em ke ri anclas, xkiya kan pa ri mar, xuquje' xekikir taq ri pala ri ketob' chub'inisaxik ri barco. Xkiyak aq'an ri manta ri k'o chuwäch ri barco rech kuriq ri kiäqiq', xkigeb'saj k'u ri barco chunaqaj ri senyab' chi' ri mar. ⁴¹ Are k'u ri barco xopan jela' jawije' e k'o wi kieb' b'inel ja', xch'api ri barco pa ri jutanaq senyab'. Ru tza'm ri barco ko xunim rib' pa ri senyab', are k'u ri rij ri barco xuchap u b'anik ch'äqataq rumal ru chuq'ab' ru woja' ri kub'an sib'alaj k'äx che. ⁴² Ri soldados xkichomaj ki kämisaxik ri ajpache', rech man k'o tä jun kämu'xanik, kanimaj b'ik. ⁴³ Are k'u ri tata' ri kätapan pa ki wi' ri soldados, are kraj kuto' kan ri tat Pablo, rumal ri' man xraj taj chi je' xka'no jas ri xkichomaj ri soldados. Xtaqan k'ut chi konojel ri achijab' ri kekowinik kemu'xanik, chkiq'iaq b'i kib' nab'e pa ri mar rech keb'el b'i cho ri ulew. ⁴⁴ Xtaqanik chi ri nik'iaj chik keb'e' chrij taq t'alam, chrij u ch'äqapil taq barco. Je ri' xka'n konojel, xeb'el b'i cho ri ulew, man xekäm taj.

28

Waral kätzijoq wi ri xub'an ri tat Pablo pa Malta, jun ch'äqap ulew ri k'o pa ri mar

¹ Aretaq qonojel utz qa wäch uj k'o chi cho rulew, xqetamaj chi ri ch'äqap ulew ri' ri k'o pa ri mar, are Malta u b'i'. ² Ri winaq ri e k'o chila' sib'alaj utz qa ch'ab'exik xka'no. Xka'n jun q'aq', te k'u ri' xujkisik'ij qonojel rech käqamiq' qib' rumal chi nim ri tew k'olik, xuquje' tajin käqaj ri jäh'. ³ Xpe ri tat Pablo, xuk'am apan kieb' oxib' chaqi'j si', tajin k'u kuya pa ri q'aq' aretaq xel loq chkirol ri si' jun kumätz. Xanimaj loq cho ri q'aq', xtzuyi' k'u che ru q'ab' ri tat Pablo. ⁴ Aretaq ri winaq ajchila' xkil ri kumätz tza-yal che ru q'ab' ri tat Pablo, xkib'ij chki'b'il taq kib': Wa' we achi ri' are jun kämisanel, pune man xkäm tä kan pa ri mar, kämik k'ut kutoj na ri etzelal u b'anom, käkäm k'u na, —xecha'.

⁵ Are k'u ri tat Pablo xutota' ru q'ab', xqaj k'u ri kumätz pa ri q'aq', are k'u ri are' man

k'o tä jas xub'ano. ⁶ Konojel ri winaq keye'm chi ri tat Pablo käsipojik, we ne xaq te'talik kätzaqik, käkäm k'ut. Naj ri' xaq xkeyej na jas kub'ano. Aretaq k'ut xkilo chi man k'o tä jas jun k'äx xuriqo, xkik'ex ki chomanik, xkib'ij chi ri tat Pablo are jun dios.

⁷ Chunaqaj ri k'olib'al ri' k'o ri rulew ri tata' ri ki nimal ri winaq ri e k'o chila' pa ri tinimit ri'. Ri tata' ri', Publio u b'i'. Are k'u wa' sib'alaj utz xub'an che qa k'ulaxik pa rachoch, oxib' q'ij k'ut xujriliq ruk' utzil. ⁸ Yawab' k'u ru tat ri tat Publio, k'o pa ch'at. K'o q'aq' chrij, xuquje' sib'alaj k'o pamaj che. Xe' k'u ri tat Pablo che rilik, xub'an orar ruk'. Te k'u ri' xuya ru q'ab' puwi', xukunaj k'u ri tata'. ⁹ Rumal wa' we xb'antajik ri', xepe konojel ri yawab'ib' ri e k'o chila' pa ri tinimit ri', xekunataq k'ut. ¹⁰ Konojel ri winaq sib'alaj nim xujkil wi, k'ia ri xkisipaj chqe. Te k'u ri', aretaq xujel b'i chila' pa jun barco chik, ri winaq xkiya b'i ronojel ri rajwaxik chqe che ri qa b'inem.

Ri tat Pablo kopan pa ri tinimit Roma

¹¹ Oxib' ik' xujk'o'ji na chila' pa Malta, te k'u ri' xujok pa jun barco aj Alejandria ri xrok'owisaj ri q'alaj chila'. We barco ri' k'o retal kojom che, are k'u ri ki wächb'al ri ki dios Cästor, ri ki dios Pölux. ¹² Xujopan k'u pa ri tinimit Siracusa ri k'o chi' ri mar. Chila' xujkanaj wi na kan oxib' q'ij. ¹³ Xujel chi b'i chila', xqataqej k'u ri qa b'e pa ri mar chunaqaj ri taq'aj k'ä xujopan na pa ri tinimit Regio. Che ri jun q'ij chik xpe jun kiäqiq' chqij pa ru mox ri relb'al q'ij, chukab' q'ij k'ut xujopan pa ri tinimit Puteoli. ¹⁴ Chila' k'ut pa Puteoli xeqariq wi jujun qachalal kojonelab'. Xkib'ij k'u chqe chi kujkanaj jun semana kuk'. Je' xqa'no, te k'u ri' xuje' pa ri tinimit Roma. ¹⁵ Ri qachalal pa Roma ki tom chik chi kujopanik, xepe che qa k'ulaxik pa b'e, xqariq k'u qib' pa ri alaj tinimit Foro de Apio, xuquje' jun k'olib'al ri käb'ix Tres Tabernas che. Aretaq ri tat Pablo xeril ri qachalal, xuya maltioxinik che ri Dios, sib'alaj xuchajij anima'. ¹⁶ Aretaq xujopan pa ri tinimit Roma, ri tat Julio ri tata' ri kätapan pa ki wi' ri soldados, xeujach ri ajpache' pu q'ab' ri tata' ri ki nimal ri soldados ri e k'o chila'. Are k'u ri tat Pablo xyi' che chi käk'o'ji pa jun ja u tukiel wi, xchajix k'u rumal jun soldado.

Ri tat Pablo kutzijoq ru Loq' Pixab' ri Dios pa ri tinimit Roma

¹⁷ Oxib' q'ij chik k'o ri tat Pablo pa Roma aretaq xtaqan che ki sik'ixik ri ki nimaqil ri winaq aj Israel ri e k'o pa Roma. Aretaq k'ut ki mulim chi kib', ri tat Pablo xub'ij chke: Qachalal, ri in man k'o tä jas jun k'äx xinb'an chke ri qa winaqil aj Israel, man k'o tä k'u nu b'im chrij ri e naq'atal wi ri qa mam ojer. Pune je ri' xinokisax k'u pa che' pa

ri tinimit Jerusalén, te k'u ri' xinjach loq pa ki q'ab' ri winaq aj Roma. ¹⁸ Aretaq xkik'ot nu chi' ri e are', are ta xkaj xinkitzoqopij rumal chi man k'o tä jas xkiriq chwij ri ya'tal ta wi kinkämisaxik. ¹⁹ Are k'u ri winaq aj Israel man xkaj taj chi xintzoqopixik. Rumal ri' rajwaxik wi xinb'ij chi are ri César, ri nimalaj taqanel puwi' ri Roma, käq'atow na tzij pa nu wi'. Rumal wa' in k'o waral, man are tä chi k'o ki mak ri nu winaqil ri kinb'ij chki. ²⁰ Rumal k'u ri' xintaqan che sik'ixik alaq, rech kinwil wäch alaq, xuquje' rech kintzijon uk' alaq. Rumal k'u rech ri ku'lb'al qa k'ux qonojel uj ri uj aj Israel, ri in, in ximital kuk' we ximib'al ri' re ch'ich', —xcha ri tat Pablo chke.

²¹ Ri e are' k'ut xkib'ij: Man k'o tä jun wuj ri petinaq pa Judea qa k'amom ri k'o jas kub'ij chij la. Xuquje' man k'o tä jun chke ri qachalal ri e petinaq jela', ri e ulinaq waral, ri u b'im ta ri man utz taj chij la. ²² Käqaj k'ut käqato jas ri kächomaj la, rumal chi qetam chi pa ronojel tinimit k'äx kech'aw ri winaq chrij we k'ak' tijonik ri', —xecha che ri tat Pablo.

²³ Xkicha' k'u jun q'ij rech ketzelej ruk' ri tat Pablo. E k'ia k'ut xeopan ruk' pa ja jawije' ri jeqel wi. Ri are' k'ut xtzijon kuk' chrij ru taqanik ri Dios pa ki wi' ri winaq. Xuwi xuchap aq'ab', are chaq'ab' chik aretaq xto'tajik. Xukoj u chuq'ab' chke ri winaq rech kekojon che ri Jesús. Xusik'ij chkiwäch ri kub'ij chrij ri Jesús pa taq ri wuj re ru Pixab' ri Moisés, xuquje' ri kub'ij chupam ri ki wuj ri q'alajisal taq re ru Loq' Pixab' ri Dios ojer. ²⁴ Jujun xkik'amo jas ri xub'ij ri tat Pablo, xkikojo, jujun chik k'ut man xkikoj taj. ²⁵ Man xjunamataj tä k'u ri ki chomanik konojel, xa je ri' nojim xkichaplej elem b'ik. Are k'u ri tat Pablo xub'ij chke: Qas tzij ri xub'ij ri Loq'alaj Espiritu chke ri qa mam ojer chuchi' ri qa mam Isaias ri q'alajisal re ru Loq' Pixab' ri Dios. Je wa' xub'ij:

²⁶ Jat, jab'ij chke we winaq ri':

Ri ix, pune qas tzij kitatab'ej,
man kich'ob' tä ri' ri kito.

Pune qas tzij kixka'yik,
man kixkowin tä chuch'ob'ik ri kiwilo.

²⁷ Je ri', rumal chi ri kanima'
we winaq ri' ab'ajarinaq chik.

Ki tz'apim ri ki xikin,
ki ch'uqum k'u ri ki waq'äch
rech man keka'y taj,
man kok tä tzij pa ki jolom,
man käkich'ob' tä k'ut.

Je ri' rech man käkitzelej tä kib'
wuk', keutzirik, käsach ta k'u na
ri ki mak,

—kächa', —xcha ri tat Pablo.

²⁸ Chetamaj b'a' alaq chi ri Utzalaj Tzij re ri Evangelio ri keuto' ri winaq, kätzijox na chke ri nik'iaj winaq chik ri man e aj Israel

taj. Ri e are' k'ut käkitatab'ej na, —xcha ri tat Pablo chke.

²⁹ Aretaq xb'itaj wa' we tzij ri' rumal ri tat Pablo, konojel ri winaq aj Israel xeb'el b'ik, sib'alaj xkichomala kib' chrij ri xub'ij ri tat Pablo chke.

³⁰ Kieb' junab' k'ut xk'oji na ri tat Pablo pa Roma pa jun qajomal ja. Utz xub'an che ki k'ulaxik konojel ri xeopan chuch'ab'exik.

³¹ Aretaq xk'oji chila' man xuxej tä rib' chutzijoxik ru taqanik ri Dios pa ki wi' ri winaq, xuquje' xeutijoj ri winaq chrij ri Qajaw Jesucristo, man k'o tä k'u jun ri xyo'w latz' che.

RI CARTA RI XUTZ'IB'AJ RI SAN PABLO CHKE RI KOJONELAB' AJ ROMA

Ri apóstol Pablo kuchap u tz'ib'axik jun carta chke ri qachalal kojonelab' aj Roma

¹ In wa', ri Pablo, in patánil re ri Jesucristo. Ri Dios xinusik'ij, xinucha' rech kinok che apóstol, jun chke ru taqo'n ri Are', rech kintzijoj ri Utzalaj Tzij re ri Evangelio.

² Ojer k'ut xub'ij loq ri Dios wa' we Utzalaj Tzij ri' chupam ri Loq'alaj u Tzij ri Tz'ib'tal kumal ri q'alajisal taq re ru Loq' Pixab' ri Are'. ³ Are k'u wa' ri Utzalaj Tzij chrij ri Qajaw Jesucristo ru K'ojol ri Dios, ri xil u wäch waral cho we uwächulew. Ri u mam k'ut, are ri nim taqanel David ojer. ⁴ Ruk' nimalaj chuq'ab' k'ut, aretaq xk'astaj chkixol ri kâminaqib', xq'alajisaxik chi are u K'ojol ri Dios rumal ri Loq'alaj Espíritu. ⁵ Rumal ri Jesucristo ri Dios xutoq'ob'isaj qa wäch, xuya chqe chi kujok che apóstoles,* u taqo'n ri Are', rech e k'o winaq ri kekojon che ri Are', ri xuquje' keniman che pa konojel taq ri tinimit cho ruwächulew. ⁶ Ri ix k'ut, ix jun chkixol ri winaq ri' ri kekojonik ri e sik'im rumal ri Dios rech keb'ok che rechb'al ri Jesucristo.

⁷ Kintz'ib'aj b'i wa' we wuj ri' chiwe ix, iwonojel ri ix kojonelab', ri ix k'o pa ri tinimit Roma. Sib'alaj ix loq' chuwäch ri Dios. Ix u sik'im k'ut rech kâb'an ch'ajch'oj che ri iwanima', kixq'ax k'u pu q'ab' ri Are'. Are ta b'a' ri Dios qa Tat xuquje' ri Qajaw Jesucristo kutoq'ob'isaj i wäch, kub'an k'ut chi kuxlan ri iwanima'.

Ri apóstol Pablo kraj kopan kuk' ri kojonelab' ri e k'o pa ri tinimit Roma

⁸ Nab'e kinya maltioxinik che ri nu Dios rumal iwech ix iwonojel pa ru b'i' ri Jesucristo. Je ri' kinb'ano rumal chi pa konojel taq ri tinimit kâtzijox wi chi qas tzij ix kojoni-naq. ⁹ Are k'u ri Dios ri tajin kinpatánij ruk' ronojel wanima', tajin k'u kintzijoj ri Utzalaj Tzij re ri Evangelio chrij ri u K'ojol. Retam k'u ri Are' chi qas tzij amaq'el kâna'taj chwe kinb'an orar pi wi'. ¹⁰ Amaq'el kinta' che ri Dios chi we are ru rayib'al kuya chwe chi kinopan na iwuk' pa jun q'ij. ¹¹ Are la' chi sib'alaj kwaj kinwil i wäch, kwaj k'ut kinya jun tob'anik chiwe che ri i k'aslemaal ruk' ri Dios, rech qas kâk'oji u chuq'ab' ri i kojonik. ¹² Are k'u kwaj chi kâqawalijisaj ri qanima' ri jun ruk' ri jun chik ruk' we kojonik ri' ri ix kojoni-naq wi ix. Are k'u wa' ri nu kojonik in xuquje'.

¹³ Qachalal, kwaj chi kiwetamaj chi k'ia mul nu rayim kinopan iwuk', man xyi' tä k'u chwe chi je' kinb'an wa'. Are kwaj kinb'ano chi jujun chiwe qas kâkijach na kib' pu q'ab' ri Cristo, je' jas ri nu b'anom kuk' ri winaq ri man e aj Israel taj pa nik'iaj tinimit chik. ¹⁴ Kinna' in chi je' ta ne k'o nu k'as kuk' kono-jel ri winaq. Rajwaxik wi kintzijoj ri Utzalaj Tzij re ri Evangelio chke ri winaq ri yo'm tijonik chke, xuquje' ri man yo'm tä tijonik chke, chke ri k'o ketam, xuquje' chke ri man k'o tä ketam. ¹⁵ Rumal ri' sib'alaj kwaj in kintzijoj ri Utzalaj Tzij re ri Evangelio chiwe ix xuquje', ri ix k'o pa Roma.

Waral kâqil wi chi k'o u chuq'ab' ri Utzalaj Tzij re ri Evangelio

¹⁶ Ri in man kink'ix tä chutzijoxik ri Utzalaj Tzij re ri Evangelio, rumal chi k'o ri nimalaj u chuq'ab' ri Dios ruk' che ki to'ik konojel ri winaq ri kekojonik, ri winaq aj Israel nab'e, te k'u ri' ri winaq ri man e aj Israel taj. ¹⁷ Ri Utzalaj Tzij re ri Evangelio kuq'alajisaj chqawäch chi xaq xuwi rumal ri kojonik che ri Cristo kuya' kâjikomataj ri qanima' cho ri Dios. Je' kub'ij ru Loq' Pixab' ri Dios ri Tz'ib'talik: "Ri winaq ri jikom ri ranima' cho ri Dios, kâk'asi na ri' rumal ri kojonik," —kâcha'.

Waral kâqil wi chi konojel ri winaq k'o ki mak

¹⁸ Q'alaj k'ut chi ri nimalaj royowal ri Dios kâpe ajchikaj pa ki wi' ri winaq chuk'ajisaxik ki wäch konojel ri kâka'n etzelal, ri man kâka'n tä ri jikom. Rumal k'u ri etzelal ri kâka'no e k'ia winaq ri man kâketamaj tä ri Qas Tzij. ¹⁹ Ri e are' qas k'o ketam chrij ri Dios rumal chi ri Are' u q'alajisam wa' chkiwäch. ²⁰ Pune ri Dios man kilitaj taj, etamtal k'ut chi k'olik. Q'alaj wa' kumal konojel ri jastaq ri e u b'anom. Etamtal loq wa' tzaretaq xb'an ruwächulew chi are Dios, chi ri nimalaj u chuq'ab' man k'o tä u k'isik. Rumal ri' ri winaq man kuya' taj kâkib'ij chi man k'o tä ki mak. ²¹ Ri e are', pune ketam chi k'o ri Dios, man xkinimarisaj tä u q'ij jas ri ya'tal che ri Dios, man xemaltioxin tä k'u che. Xane xa xkijach kib' chuchomaxik ri man k'o tä u patän. Jun wi ri ki chomanik, je' ta ne chi e sachinaq pa ri q'equm. Man xkich'ob' tä chik jas tajin kâka'no. ²² Pune ta ne kâkib'ij chi k'o ki no'j, xaq k'u e kon taq winaq wa'. ²³ Man kâkinimarisaj tä u q'ij ri Dios ri man kâkâm taj, xane are kâkinimarisaj ki q'ij ri ki wächb'al winaq ri xa kekâmik, xuquje' ri ki wächb'al taq chikop ri k'o ki xik', ri ki wächb'al taq kumätz, xuquje' ri nik'iaj awaj chik.

* 1:5 "Apóstol": Chawila' ri San Mateo 10:2, nota.

²⁴ Rumal ri' ri Dios xeujach chub'anik ronojel ri itzel taq ki rayinik ri b'enaq kanima' kuk', ri äwas u b'anik cho ri Are' xuquje' chkiwäch ri winaq. Xka'n k'u ri sib'alaj k'ixb'al u b'anik ri jun ruk' ri jun chik. ²⁵ Je ri', rumal chi xkikoj ri man gas tzij taj chuk'exwäch ri gas tzij chrij ri Dios. Are xekiq'ijilaj, xekipatanij ronojel ri b'anom rumal ri Dios. Man are tä xkiq'ijilaj ri Dios ri xb'anow ronojel, ri xaq xuwi che ri Are' ya'tal wi chi känimarisax u q'ij. Amén.

²⁶ Rumal ri' ri Dios xeujach chub'anik ri k'ixb'al u b'anik ri b'enaq kanima' ruk'. Xuquje' ne ri ixoqib' are kaka'n chi ri man taqal tä u b'anik chuk'exwäch ri gas taqal u b'anik. ²⁷ Xuquje' ri achijab' man kaka'n tä chi ri taqal u b'anik kuk' ixoqib', xane xa kaka'n ri itzel taq ki rayinik ri jun ruk' ri jun chik. Kaka'n k'u ri k'ixb'al u b'anik, achijab' kuk' achijab'. Tajin k'u kāk'äjisax ki wäch, are k'u wa' ri tojb'al re ri etzelal ri kaka'no.

²⁸ Rumal k'u rech chi man kākaj taj kākikoj ri Dios pa kuenta, ri Dios xeuya kanoq rech kākichomaj ri man utz taj, rech kaka'n ke ri man taqal tä u b'anik. ²⁹ Ki yo'm kib' chub'anik ronojel u wäch etzelal. Kaka'n ri man jikom taj, kaka'n k'u ke jas ri kaka'n ri tz'i' ri xaq kākiriq kib', man k'o tä ki pixab'. Kākirayij ri kech nik'iaj winaq chik, e b'anal taq etzelal. K'äx kākina' chrij jun chik, kekämisaniq, xaq ch'oj kākaj, kekisub' ri winaq, kākiryak k'u tzij chkij. Xa tzel u b'anik ri ki k'aslemal. ³⁰ Kākib'ij ri man utz taj chkij nik'iaj winaq chik. Käketzalaj u wäch ri Dios, man k'o tä k'u ki k'ixb'al. Kaka'n nimal, kākiniमारिसाज kib', kākichomaj u b'anik ri man utz taj, man keniman tä k'u chke ri ki nan ki tat. ³¹ Man kok tä tzij pa ki jolom, man kaka'n taj jas ri kākib'ij chi kaka'no, man kākitoq'ob'isaj tä ki wäch nik'iaj chik, man k'o tä sachb'al mak kuk', man kel tä k'u ki k'ux chke ri winaq. ³² Ketam k'ut ri kub'ij ru Loq' Pixab' ri Dios, chi ri winaq ri keb'anow taq we mak ri', are ya'tal chke chi kekämisaxik. Pune ta ne je ri', man xuwi taj kaka'n ri mak, xane je'l kākilo chi ri nik'iaj chik kaka'n ke.

2

Waral kākil wi chi ri Dios jikom ri ranima' chuq'atik tzij pa ki wi' ri winaq

¹ Rumal ri' man kuya' taj kab'ij chi man k'o tä a mak, at ri' ri kaq'at tzij puwi' jun winaq chik, apachin ta ne ri at. Je ri', rumal chi aretaq kaq'at tzij puwi' jun winaq chik, xa tajin kaq'at tzij pa wi' chb'il awib' chi kāk'äjisax a wäch at. Kab'an k'u awe ri man utz taj ri tajin kub'an ri winaq ri kaq'at tzij puwi'. ² Qetam k'ut chi ri Dios gas jikom kub'ano aretaq kuq'at tzij pa ki wi' chi kāk'äjisax ki wäch ri winaq ri je' kaka'n wa'. ³ Ri at k'ut ri kaq'at tzij pa ki wi' nik'iaj winaq

chik, te k'u ri' kab'an at jas ri kaka'n ri e are', äa kachomaj chi ri Dios man kuq'at tä tzij pa wi' at chi kāk'äjisax a wäch? jMan je' taj! ⁴ Xa kawetzalaj u wäch ri nimalaj rutzil ri Dios. Awetam k'ut chi u chajim paciencia awuk', u koch'om k'u u wäch chawe. äA mat kach'ob'o chi ri Dios u b'anom utzil chawe rech ri at kak'ex rawanima' xuquje' ra chomanik? ⁵ Ri at k'ut ab'ajarinaq ri awanima', man a k'exom tä wa', man a k'exom tä k'u ra chomanik. Rumal ri' xa tajin kab'an más nim che ri k'äjisab'al a wäch ri kape na chawij. Je' kāk'ulmataj wa' pa ri q'ij ri kuk'ut rib' ri Dios chuk'äjisax ki wäch ri winaq, kuq'at k'u na tzij pa ki wi' ruk' jikomaj. ⁶ Kuya k'u na ri tojb'al ke ri winaq chkijujunal je' jas ri taqal chke rumal ri k'nom. ⁷ Ri winaq ri kākitzukuj ri u nimarisaaxik ki q'ij rumal ri Dios, xuquje' ri u ya'ik ki q'ij rumal, xuquje' ri jastaq ri man kāsach tä ki wäch, amaq'el k'ut kaka'n ri utzil. Chke ri e are' ri Dios kuya na ri k'aslemal ri man k'o tä u k'isik. ⁸ Are k'u ri winaq ri xaq xuwi kākichomaj ri kech ri e are', ri man kākaj taj kākiniमारि ri gas tzij, xane are kākitaqej ri etzelal, ri Dios k'ut kuk'äjisaj na ki wäch ruk' nimalaj oyowal. ⁹ Nimalaj b'is, k'äx'ol kepe na pa ki wi' konojel ri winaq ri kaka'n etzelal. Kuchap na kuk' ri winaq aj Israel, te k'u ri' kape na pa ki wi' ri winaq ri man e aj Israel taj. ¹⁰ Are k'u ri winaq ri kaka'n ri utz, känimarisax na ki q'ij konojel, kāyi' na ki q'ij, kāk'an na chi kuxlan ri kanima' rumal ri Dios. Kuchap na wa' kuk' ri winaq aj Israel, te k'u ri' kuk' ri winaq ri man e aj Israel taj.

¹¹ Je ri', rumal chi ri Dios junam keril wi konojel ri winaq. ¹² Konojel ri kemakunik ri man k'o tä ke ri Pixab' ri xutz'ib'aj ri qa mam Moisés, kāsach na ki wäch pune man k'o tä ri Pixab' ri' kuk'. Konojel k'u ri kemakunik pune k'o ri Pixab' kuk' ri xutz'ib'aj ri qa mam Moisés, kāk'at na tzij pa ki wi' rumal we Pixab' ri'. ¹³ Ri xuwi kākitaab'ej ri Pixab', man e are tä ri' ri jikom ri kanima' cho ri Dios, xane ri kaka'no jas ri kub'ij ri Pixab', e are ri' ri jikom ri kanima' cho ri Dios. ¹⁴ Aretaq ri winaq ri man e aj Israel taj kaka'n jas ri kub'ij ri Pixab', pune man k'o ri Pixab' kuk', pa kanima' k'ut kape wi ri kaka'no. Ri e are' k'ut keb'anow ri ki pixab'. ¹⁵ Rumal ri kaka'no q'alaj chi tz'ib'tal ri Pixab' pa ri kanima'. Ri kākina' pa kanima' are kāk'alajisanik chi gas tzij wa'. Ri ki chomanik chkijujunal are kāk'alajisan na we utz o man utz taj ri tajin kaka'no. ¹⁶ Kāk'alajin k'u na wa' pa ri q'ij aretaq ri Dios kuq'at na tzij rumal ri Jesucristo puwi' ronojel ri man etamtal taj ri k'o pa kanima' ri winaq, je' jas ri kub'ij ri Utzalaj Tzij re ri Evangelio ri kintzijo.

Waral kākil wi chi ri winaq aj Israel

käka'n ki nimal che ri Pixab'

¹⁷ Ri at k'ut kab'ij chi at aj Israel, are kato'b'ej awib' ri Pixab' ri xutz'ib'aj ri qa mam Moisés, kab'an a nimal che ri a Dios. ¹⁸ Ri at awetam jachike ru rayib'al ri Dios, ri Pixab' k'ut kuk'ut chawäch jachike ri utz na. ¹⁹ Kana' pa rawanima' chi gas awetam kak'am ki b'e ri moyab', chi katkowinik k'ut kaya saqil chke ri e k'o pa q'equm. ²⁰ Kachomaj chi katkowinik keatijoj ri man k'o tä ketam, xuquje' chi katkowinik kaya ki no'j ri man nimaq tä ki b'anik rumal chi pa ri Pixab' kachomaj chi kariq wi ronojel u wäch etamanik xuquje' gas tzij. ²¹ We ri at keatijoj nik'iaj chik, ¿jas che man katijoj awib' at? We ri at katzijoj ru Loq' Pixab' ri Dios chi man kuya' taj käb'an elaq', ¿jas che kab'an elaq' at? ²² We ri at kab'ij chi man kuya' taj kub'an jun ri mak ri sib'alaj äwas u b'anik ruk' ri rixooqil o ri rachajil jun winaq chik, ¿jas che je' kab'an at? We ri at kawetzelaj ki wäch ri tiox ri xa e b'anom kumal winaq, ¿jas che kawelaj'aj ri jastaq ri e k'o pa taq kachoch ri tiox ri? ²³ Pune ri at kab'an a nimal che ri Pixab', ri at k'ut man nim tä kawil wi ri Dios aretaq man kanimaj tä ri kub'ij ri Pixab'. ²⁴ Rumal ri' kub'ij ru Loq' Pixab' ri Dios ri Tz'ib'talik: "Ri winaq ri man e aj Israel taj käkib'ij ri sib'alaj äwas u b'ixik chrij ri Dios xa rumal iwech ix ri aj Israel," —kächa ri Tz'ib'tal kanoq.

²⁵ Ri retal ri ojer trato ri käb'ix circuncisión che ri kojom che ra cuerpo,* gas tzij k'o u patän wa' chawe we kanimaj ri kub'ij ri Pixab'. We k'u man kanimaj ri kub'ij ri Pixab', man k'o tä u patän ri' ri retal ri ojer trato ri kojom chawe. ²⁶ We ri winaq ri man kojom tä ri retal ri ojer trato che, kunimaj ri kätaqan wi ri Pixab', ri winaq ri' je' ta ne kojom ri retal ri ojer trato che, pune man kojom taj. ²⁷ Ri winaq ri man kojom tä ri retal ri ojer trato che, ri kunimaj ri kub'ij ri Pixab', are ri' käq'atow na tzij pa wi' at ri man kanimaj tä ri kub'ij ri Pixab', pune k'o awe ri Pixab' ri Tz'ib'talik, pune kojom ri retal ri ojer trato che ra cuerpo. ²⁸ Ri gas winaq aj Israel man are tä ri' ri xa chrij kilitalj wi chi aj Israel. Ri kojom ri retal ri ojer trato che man are tä ri' ri xa käb'an chrij ru cuerpo. ²⁹ Xane ri winaq ri gas aj Israel are ri' ri aj Israel wi pa ranima'. Ri gas retal ri ojer trato are ri' ri b'anom pa ranima' ri winaq, man rumal tä jun taqanik ri tz'ib'talik, xane rumal ri u b'anom ri Loq'alaj Espíritu. Ri winaq ri je' u b'anik wa', man käyi' tä u q'ij kumal ri winaq, xane rumal ri Dios.

3

¹ We je ri', ¿jas ri utz na ri kuriq jun winaq we are winaq aj Israel? ¿A nim lo u patän

ri u kojik ri retal ri ojer trato che ru cuerpo jun winaq? ² Qas tzij nim ki b'anik ri winaq aj Israel, k'ia ri kuya' käqab'ij chkiq rumal chi chke ri e are' xuya wi ri Dios ru Loq' Pixab' nab'e. ³ ¿Jas k'u käb'antaj na we k'o jujun chke ri winaq aj Israel ri man jikom tä chi ri kanima' chrij ri Dios? ¿A rumal lo ri' ri Dios man jikom tä chi ri ranima' ri Are'? ⁴ ¡Man je' tä ri'! Xane ri Dios kub'an na ronojel ruk' gas tzij, pune konojel winaq e are' b'anal taq tzij. Kub'ij k'u ru Loq' Pixab' ri Dios ri Tz'ib'talik:

Rumal ri tzij la q'alaj wi chi jikom ri anima' la.

Aretaq käq'at tzij puwi' la,

käq'alajin k'u na chi utz ri käb'an la, —kächa ri Tz'ib'talik.

⁵ We ri qetzalal kuk'utu chi ri Dios gas kub'an ri jikomaj, ¿jas käqab'ij? ¿A xa lo man jikom tä ranima' ri Dios rumal chi kuk'äjisaj qa wäch? (Je' kinch'awik je' jas ri kech'aw ri winaq.) ⁶ ¡Man je' tä ri'! We ta ri Dios man jikom tä ranima', ¿jas lo kub'an ri Are' chuq'atik tzij pa ki wi' ri winaq cho ruwächulew? ¡man kuya' taj!

⁷ We k'u ri b'anow tzij ri kinb'ano kub'ano chi kanimarisax u q'ij ru gas tzij ri Dios, ¿jas che käq'at tzij pa nu wi' chi ri in, in, ajmak?

⁸ We je ri', ¿jas che man are tä käqa'n ri man utz taj rech käpe ri utzil? Are k'u wa' ri käkib'ij jujun rumal ri etzelal ri k'o pa kanima' chi are wa' ri keqatijoj ri winaq che. Taqal k'u wa' chke we winaq ri' käq'at tzij pa ki wi' chi käk'äjisax ki wäch.

Waral käq'il wi chi qonojel k'o qa mak

⁹ ¿Jas k'u kujkanaj wi? ¿A uj ri uj aj Israel uj utz na chkiwäch ri nik'iaj winaq chik? ¡Man je' tä ri'! Qa q'alajisam k'ut chi ri winaq aj Israel xuquje' ri winaq ri man aj Israel taj, konojel e k'o pu q'ab' ri mak. ¹⁰ Ru Loq' Pixab' ri Dios ri Tz'ib'talik kub'ij:

Man k'o tä jun winaq ri gas utz, man k'o tä wi jun.

¹¹ Man k'o tä jun winaq ri gas kraj kuch'ob' ri gas utz, man k'o tä jun ri kutzukuj ri Dios.

¹² Konojel ki jalom ki b'e, konojel b'enam ke jawije' ri xa käsach wi ki wäch.

Man k'o tä jun ri kub'an ri gas utz, man k'o tä wi jun.

¹³ Ru pa ki qul je' ta ne ru jul käminaj ri jaq'talik.

Ruk' ri ki tzij kekisub' ri winaq.

Je' ta ne ri u tiab'al kumätz k'o pa ki chi'.

¹⁴ Xaq xuwi ri yoq'onik käka'no, k'äx taq tzij kel pa ki chi'.

¹⁵ Käkitij anim chub'anik ri kämisanimik.

¹⁶ Ri käka'n pa ri ki k'aslemal

* 2:25 "Retal ri ojer trato": Chawila' Hechos 7:8.

kusach kan u wäch ronojel,
 kăkiya kan b'is pa kanima' ri winaq.
¹⁷ Man ketam taj jas kăka'no
 chuya'ik utzil chkixol ri winaq.
¹⁸ Man ketamam tă k'ut chi rajwaxik
 kăkixej kib' cho ri Dios,
 —kăcha ri Tz'ib'talik.

¹⁹ Qetam k'ut chi ronojel ri kub'ij ri ojer
 Pixab', kub'ij wa' chke ri e k'o pu q'ab' we
 Pixab' ri' rech man k'o tă jun k'o jas kub'ij,
 rech konojel ri winaq cho ruwăchulew kăq'at
 na tzij pa ki wi' rumal ri Dios. ²⁰ Man k'o
 tă k'u jun winaq ri kăjikomataj ranima' cho
 ri Dios rumal ru nimaxik ri kub'ij ri Pixab',
 rumal chi ri Pixab' xuwi u patân wa' kuk'ut
 chqawăch chi ri uj, uj ajmakib'.

*Xuwi rumal ri kojoni kăqariq ru tob'anik
 ri Dios*

²¹ Kămik k'ut ri Dios u q'alajisam
 chqawăch jas ri kub'an chujikomaxik ri
 qanima' chu wăch ri Are' man ruk' tă ri
 Pixab'. Q'alaj wa' chi qas tzij aretaq kusik'ij
 jun ri wuj re ri Pixab' ri xutz'ib'aj ri qa
 mam Moisés xuquje' ri wuj ri xkitz'ib'aj
 ri q'alajisal taq re ru Loq' Pixab' ri Dios.
²² Kăjikomataj k'u ri qanima' cho ri Dios
 rumal chi kujkojon che ri Jesucristo. Ri Dios
 k'ut kub'an wa' chke konojel ri kekojonik,
 man jalaŋ tă wi kub'an kuk' nik'iaj chik.
²³ Konojel winaq e makuninaq, naj k'u e
 k'o wi che ri Dios ri kraj keto'wik. ²⁴ Xa k'u
 rumal ri nimalaj u toq'ob' kub'an jikom che
 ri kanima' ri winaq. Man k'o tă kăkitoj che,
 rumal chi ri Cristo Jesús xeutoro. ²⁵ Ri Dios
 xukoj ri Cristo che sachb'al ki mak konojel ri
 winaq rumal ru kămikal cho ri cruz. Kăkiriq
 k'u ri sachb'al ki mak we kekojon che ri
 Cristo. Je' xb'antaj wa' rech q'alaj chi ri
 Dios are qas jikom ranima'. Xril ri ki mak ri
 winaq ri ka'nom kanoq, man k'o tă k'u jas
 xub'an chke rumal ri nimalaj u paciencia.
²⁶ Je' xb'antaj wa' xuquje' chuk'utik pa taq
 we q'ij kămik chi ri Dios are qas jikom
 ranima', kutagej k'u u b'anik ri jikom
 aretaq kub'an jikom che ri kanima' konojel
 ri kekojon che ri Jesús.

²⁷ ¿Jas k'u rumal kăka'n wi nimal ri winaq?
 ¡Man k'o taj! ¿Jas che? Rumlal chi we ta
 ri winaq kekowinik kăka'no jas ri kub'ij ri
 Pixab', kuya' ri' kăkinimarisa kib'. Are k'u
 ri winaq ri kăkojonik man kuya' taj kuni-
 marisaj rib'. ²⁸ Xqil b'a' chi ri Dios kub'an
 jikom che ri ranima' ri winaq ri kăkojonik,
 man are tă kăriło we u b'anom ri kub'ij ri
 Pixab' o man u b'anom taj.

²⁹ E ri Dios, ¿a xuwi lo ki Dios ri winaq aj
 Israel? ¿A mat xuquje' are ki Dios ri winaq ri
 man e aj Israel taj? Qas tzij chi are xuquje' ki
 Dios ri winaq ri man e aj Israel taj. ³⁰ Xa k'u
 jun ri Dios k'olik. Are k'ut kăb'anow jikom
 che ri kanima' ri winaq aj Israel xuquje' ri

winaq ri man e aj Israel taj ri kekojonik.
 Man kăril tă ri Are' we kojom retal ri ojer
 trato che ri ki cuerpo o man kojom taj. ³¹ ¿A
 kăqab'ij lo chi man k'o tă chi u patân ri Pixab'
 rumal chi xujkojonik? ¡Man je' tă ri! Xane
 kăqab'ij chi k'o na u patân ri Pixab'.

4

*Ri xub'an ri qa mam Abraham are jun
 k'utb'al chqawăch*

¹ ¿Jas k'u kăqab'ij chi xuriq ri qa mam
 Abraham ojer? ² Qas tzij we ta rumal ri utzil
 ri xub'an ri qa mam Abraham xjikomataj
 ri ranima' cho ri Dios, kuya' ri' kunimarisa
 rib'. Man kuya' tă k'ut kunimarisa rib' cho
 ri Dios. ³ ¿Jas pu kub'ij ru Loq' Pixab' ri
 Dios ri Tz'ib'talik? Kub'ij k'ut: "Ri Abraham
 xkojon che ri Dios, rumal k'u ri' xq'alajisax
 rumal ri Dios chi jikom ranima'," —kăcha'.
⁴ ¡Qachomajmpe! Jun winaq ri kub'an jun
 chak, ri tojb'al re ri kăyi'k man are tă sipanik
 ri' che, xane are k'asaj ruk'. ⁵ Are k'u ri
 winaq ri man k'o tă jas kub'ano, kăkojon k'u
 che ri Dios ri kuk'amowaj ri ajmak, ri winaq
 ri' rumal ru kojoni kăq'alajisax rumal ri
 Dios chi qas jikom ranima'. ⁶ Tzare k'u ri
 qa mam David xub'ij chi utz re ri winaq ri
 kăq'alajisax rumal ri Dios chi jikom ranima',
 man rumal tă k'u ri utzil ri xub'an ri winaq
 ri'. ⁷ Ri qa mam David je wa' xub'ij:

Utz ke ri winaq ri sachtajinaq
 rumal ri Dios ri etzelal ri ka'nom,
 ri xril ri ki mak,
 man k'o tă k'u k'ăx xub'an chke.

⁸ Utz re ri winaq ri man k'o tă mak
 kăyi' chriq rumal ri Qajaw Dios,
 —kăcha'.

⁹ ¿A xaq xuwi ta k'u lo utz ke ri winaq ri
 kojom retal ri ojer trato che ri ki cuerpo?
 ¡Man je' taj! Xuquje' utz ke ri man kojom
 taj. Qa b'im k'ut chi ri qa mam Abraham
 xq'alajisax rumal ri Dios chi jikom ranima'
 rumal chi xkojonik. ¹⁰ ¿Jampa' xq'alajisax
 rumal ri Dios chi jikom ranima'? ¿A xub'an
 wa' aretaq kojom chi ri retal ri ojer trato
 che o aretaq măja' xkojik? Man k'ă te tă
 xq'alajisax rumal ri Dios chi jikom ranima'
 aretaq kojom chi retal ri ojer trato che,
 xane aretaq măja' kăkojik. ¹¹ Te k'u ri' ri
 qa mam Abraham xok ri retal ri ojer trato
 che ru cuerpo ri are'. Are k'u wa' retal ri
 kăk'utuwik chi q'alajisam chi rumal ri Dios
 chi jikom ranima' rumal chi xkojonik. Je
 ri' ri Abraham xok che ki tat konojel ri
 kojonelab' ri man kojom tă ri retal ri ojer
 trato che ri ki cuerpo. Je wa ri' ri e are'
 xuquje' keq'alajisax rumal ri Dios chi jikom
 kanima'. ¹² Qas tzij ri qa mam Abraham are
 xok che ki tat ri kojom retal ri ojer trato che
 ri ki cuerpo, man xuwi tă k'u rumal wa',
 xane xuquje' rumal chi kekojonik junam jas

ri qa mam Abraham xkojonik aretaq mäjoq kok ri retal ri ojer trato che ru cuerpo.

Ri xuchi'j loq ri Dios käqechb'ej na we kujkojonik

¹³ Ri Dios xuchi'j che ri qa mam Abraham xuquje' chke ri rachalaxik ri kil na ki wäch chi käqechb'ej na ruwächulew, man rumal tä k'u rech chi xniman ri qa mam Abraham che ri Pixab' ri xutz'ib'aj ri qa mam Moisés,* xane rumal chi xkojonik, xq'alajisax k'u rumal ri Dios chi jikom ranima'. ¹⁴ We ta xaq xuwi ri keniman che ri Pixab' käkik'am na ke ri echb'al, man k'o tä b'a' u patän ri' chi kujkojonik. Xuquje' ri xuchi'j loq ri Dios chi kuya na man k'o tä chi u patän ri'. ¹⁵ Je ri', rumal chi ri Dios kuk'äjisaj ki wäch ri man keniman tä che ri Pixab'. Jawije' k'u ri man k'o tä wi pixab', man k'o tä mak ri' chrij ri pixab'.

¹⁶ Rech ri xuchi'j ri Dios che ri qa mam Abraham qas käqechb'ej na konojel ri rachalaxik ri kil na ki wäch, rajwaxik chi are jun sipanik ri kuya ri Dios chke ri kekojonik. Kel kub'ij chi ri xuchi'j ri Dios man xuwi tä chke ri keniman che ri Pixab', xane xuquje' chke konojel ri kekojonik jas ri xub'an ri qa mam Abraham. Ri are' k'ut are xok che qa tat uj qonojel ri ujojonelab' chuwäch ri Dios, ¹⁷ ri xuquje' xkojon ri qa mam Abraham che. Je' jas ri tz'ib'tal pa ru Loq' Pixab' ri Dios: "At nu kojom che ki tat k'ia u wäch winaq", —kächa'. Ri Dios k'ut are käyo'w ki k'aslemal ri käminaqib', xuquje' keub'an ri jastaq ri k'ä mäja' kek'oji'k.

¹⁸ Ri qa mam Abraham, pune man käkowin tä chik käk'oji ralk'ual, xukoj chi käk'oji na jun u k'ojol. Xku'b'i k'u u k'ux chrij ri Dios, je ri' xok che "ki tat k'ia u wäch winaq", jas ri b'im che rumal ri Dios: "Are je wa' ki k'ial ri awachalaxik ri kil na ki wäch," —xuchixik. ¹⁹ Ri qa mam Abraham man xub'an tä kieb' u k'ux, pune xa jub'iq' man kätz'aaq tä cien u junab'. Retam chi ri are' rachi'l ri Sara ri rixoqil xaq kämem chi ke, e nimaq taq winaq chik, man kekowin tä chik käk'oji kalk'ual. ²⁰ Man xub'an tä kieb' u k'ux chrij ri xb'ix che rumal ri Dios, xane xa sib'alaj xkojonik, xku'b'i u k'ux, xuya k'u u q'ij ri Dios. ²¹ Xujikib'a u k'ux chi ri Dios käkowin chub'anik ronojel ri kub'ij. ²² Rumal ri' xq'alajisax rumal ri Dios chi jikom ranima', rumal chi xkojonik.

²³ Man xaq xuwi tä ri qa mam Abraham xtz'ib'ax chrij chi xq'alajisax rumal ri Dios chi jikom ranima'. ²⁴ Ri uj xuquje' xtz'ib'ax chqij chi ri Dios kuq'alajisaj chi jikom qanima' rumal chi kujkojonik, qonojel ri uj, uj kojoninaq che ri Dios ri xk'astajisan ri Qajaw Jesús chxixol ri käminaqib'. ²⁵ Ri Qajaw

Jesús xjach pa kämisaxik rumal rech ri qa mak, xk'astaj k'u chxixol ri käminaqib' rech käjikomataj ri qanima' cho ri Dios.

5

Ri tewchib'al ri xqariqo aretaq xjikomataj ri qanima' cho ri Dios

¹ Kämik k'ut ri xjikomataj ri qanima' cho ri Dios rumal chi xujkojonik, k'o chi k'u utzil chqaxol ruk' Are' rumal ri Qajaw Jesucristo. ² Rumal k'u ri Cristo xtoq'ob'isax qa wäch rumal ri Dios rumal chi xujkojonik. Ri toq'ob' ri xqariqo man k'o tä kesian chqe, rumal ri' kujkikotik, ku'l qa k'ux chi käqariq na qe uj ri u nimarisaxik u q'ij ri Dios. ³ Man xuwi tä wa' kujkikot wi, xane xuquje' kujkikot chupam ri k'äxk'ol, rumal chi ri k'äxk'ol kub'an chqe chi käqachajij paciencia. ⁴ Ri paciencia kub'an chqe chi utz kujel na cho ri Dios. Aretaq utz chik uj k'olik, käku'b'i qa k'ux chrij ri Dios. ⁵ Aretaq käku'b'i qa k'ux chrij ri Dios man k'o tä b'is käqariqo rumal chi ri rutzil ranima' ri Dios k'o pa qanima' rumal ri Loq'alaj Espíritu ri u yo'm chqe.

⁶ Ri uj, aretaq man xujkowin taj xqato' qib' qa tukiél wi, qas pa ru q'ijol xpe ri Cristo, xkäm k'u rumal qech uj ri uj ajmakib'. ⁷ Man k'o tä jun winaq kuya u tzij käkämisax chuk'exwäch jun winaq chik, pune are jun winaq ri qas jikom ranima'. Kraj k'u ne k'o jun ri kuya u tzij käkämisax chuk'exwäch jun winaq ri sib'alaj utz. ⁸ Ri Dios k'ut xuk'ut chqawäch chi sib'alaj kujraj aretaq ri Cristo xkäm rumal qech, pune k'u uj ajmakib'. ⁹ Kämik k'ut ri ya jikom chi qanima' cho ri Dios rumal ru kämikal ri Cristo, qas kujuto' na ri Cristo chuwäch ri k'äjisab'al wächaj ri käpe na chuk'isb'al. ¹⁰ Ri uj nab'e kanog aretaq qa k'ulel na ri Dios, xujrutzirisaj ruk' Are' rumal ru kämikal ru K'ojol, rumal ri' kämik ri ya uj utz chi ruk' ri Dios, qas käqariq wi na ru tob'anik ri Dios rumal ru k'aslemal ri Cristo. ¹¹ Man xuwi tä wa', xane xuquje' kujkikot ruk' ri Are' rumal ri Qajaw Jesucristo. Rumal k'u ri Cristo uj utz chi ruk' ri Dios.

Waral kätzijox wi ri Adán xuquje' ri Cristo

¹² Je k'u ri', ri mak xok cho we uwächulew xa rumal jun winaq. Rumal k'u ri mak xpe ri kämikal pa ki wi' konojel ri winaq rumal chi konojel xemakunik. ¹³ Aretaq mäjoq käpe ri Pixab', ri mak ya k'o chik cho ruwächulew. Man käkoj tä k'u ri mak pa kuenta aretaq man k'o tä pixab'. ¹⁴ Pune je ri', xtaqan k'u ri mak pa ki wi' ri winaq ri xemakunik xchaptaj loq ruk' ri Adán k'ä xopan ru q'ij ri Moisés, pune man je' tä ki mak jas ru mak ri Adán ri man xunimaj tä ru Pixab' ri Dios.

* 4:13 K'ä mäja' k'o ri Pixab' ri' aretaq ri mam Abraham xil u wäch. Je ri', rumal chi ri mam Abraham are nab'eal chuwäch ri mam Moisés.

Ri Adán k'ut are jun k'utb'al chrij ri Cristo ri kápe na.

¹⁵ Man kuya' taj kájunamataj ri mak ri xub'an ri Adán ruk' ri sipanik ri kuya ri Dios. Rumal k'u ri mak ri xub'an xa jun winaq e k'ia xekámik. Are k'u ri tob'anik ri kusipaj ri Dios chqe rumal ri nimalaj u toq'ob' pa qa wi', sib'alaj nim na u b'anik wa'. Xuya wa' chqe rumal xa jun winaq, ri Jesucristo, chub'anik utzil chke k'ia winaq. ¹⁶ Ri mak ri xub'an xa jun winaq man kuya' taj kájunamataj wa' ruk' ri tob'anik ri kusipaj ri Dios. Je ri', rumal chi ri mak ri xub'an xa jun winaq xub'ano chi káq'at tzij pa ki wi' ri winaq chi kák'ájisax ki wäch. Are k'u ru tob'anik ri Dios xpetik rech kájikomataj ri kanima' ri winaq cho ri Dios, pune sib'alaj k'ia ri ki mak ka'nom. ¹⁷ We ri kámikal xk'oji u taqanik pa ki wi' ri winaq rumal ri mak ri xub'an xa jun winaq, sib'alaj nim k'u na u b'anik wa' chi ri winaq ri kájikomataj kanima' cho ri Dios rumal ru toq'ob' ketaqan na pa ri k'ak' ki k'aslemaal rumal xa jun winaq, ri Jesucristo.

¹⁸ Je' jas ru mak ri Adán xub'ano chi káq'at tzij pa ki wi' konojel ri winaq chi kák'ájisax ki wäch, je k'u ri' xuquje' ri jikomal ri xub'an ri Jesucristo kub'ano chi konojel ri winaq kákirij na ki k'aslemaal, man káq'at tá k'u tzij pa ki wi' chi kák'ájisax ki wäch. ¹⁹ Kel kub'ij chi rumal ri jun winaq ri man xniman tá che ri Dios e k'ia winaq xeb'ok che ajmakib', je ri' xuquje', rumal ri Jun ri xniman che ri Dios e k'ia winaq kájikomataj ri kanima' cho ri Dios.

²⁰ Xpe k'u ri Pixab' rech kel na ri mak chi saq. Aretaq k'ut xnimar u wäch ri mak, ru toq'ob' ri Dios xuquje' xnimar u wäch wa'. ²¹ Je k'u ri' jas ri mak xkowinik xuk'am loq ri kámikal pa ki wi' ri winaq, je ri' xuquje' aretaq ri uj kájikomataj ri qanima' cho ri Dios, ri nimalaj u toq'ob' ri Are' kákowinik kuya q'aslemaal ri man k'o tá u k'isik rumal ri Jesucristo ri Qajaw.

6

Waral káqil wi chi ri uj je' ta ne chi uj kámínaq chuwäch ri mak. Uj k'asal chi k'ut rumal ri Cristo

¹ ¿Jas k'u ri káqab'ij? ¿A káqataqej u b'anik ri mak rech ri Dios sib'alaj kuk'ut na ri nimalaj u toq'ob'? ² ¿Man je' tá ri! Ri uj, je' ta ne chi uj kámínaq chuwäch ri mak. Man k'o tá chi u chuq'ab' ri mak pa qa wi'. We je ri', ¿a kuya' ta k'u lo káqataqej u b'anik ri mak? ³ ¿A mat iwetam chi ri uj ri b'anom qa gasna' rech xa uj jun chik ruk' ri Jesucristo, je' ta ne ri junam xujkám ruk' ri Are'? ⁴ Rumal ri gasna' je' ta ne junam xujmuq ruk' ri Cristo, je' ta ne xujkámik rech kujk'astajisaxik, kák'oji k'u jun k'ak' qa k'aslemaal je' jas ru k'aslemaal ri

Cristo aretaq xk'astaj chkixol ri kámínaqib' rumal ri nimalaj u chuq'ab' ri qa Tat.

⁵ We k'u xqa'n jun ruk' ri Cristo rumal ri kámikal ri xurigo, je ri' xuquje' káqa'n na jun ruk' Are' rumal chi xk'astaj chkixol ri kámínaqib'. ⁶ Qetam chi ri ojer qa k'aslemaal xrip cho ri cruz junam ruk' ri Cristo, rech kásach u wäch ri u chuq'ab' ri qa rayib'al ajuwächulew ri man utz taj. Je ri' man uj k'o tá chi pu q'ab' ri mak, man kujpatánin tá chi che ri mak je' ta ne che jun patrón. ⁷ Je ri', rumal chi ri winaq ri kámínaq chik, man chaptal tá chi ri' rumal ri mak. ⁸ We ri uj, uj kámínaq chik junam ruk' ri Cristo, káku'b'i qa k'ux chi kujek'asal na ruk' ri Are'. ⁹ Je ri', rumal chi qetam chi ri Cristo k'astajinaq chik chkixol ri kámínaqib', man kákám tá chi wi. Ri kámikal man kátaqan tá chi puwi'. ¹⁰ Ri Cristo aretaq xkámik, xa jumul xkám chusachik u wäch ri mak, man xaq tá tajin wi kákámik. Aretaq k'u xk'astajik, xk'asi chunimarisaxik u q'ij ri Dios. ¹¹ Je k'u ri' ri ix, chichomaj chi ix kámínaq chik chuwäch ri mak. Man k'o tá chi u chuq'ab' ri mak pi wi'. Ix k'asal k'u kámik chunimarisaxik u q'ij ri Dios junam ruk' ri Cristo Jesús ri Qajaw.

¹² Rumal ri' miya b'a' chi ri mak kutaqej taqanik puwi' ri i cuerpo ri xa kákámik, mixutaj k'u ne chunimaxik ri i rayib'al ri man utz taj. ¹³ Mijach b'a' iwib' pu q'ab' ri mak chub'anik ri man utz taj. Xane chijacha iwib' pu q'ab' ri Dios, je' ta ne chi xixkám na, ix k'astajinaq chi k'ut. Chijacha iwib' pu q'ab' ri Dios chub'anik ri utzil. ¹⁴ Je ri', rumal chi ri mak man kátaqan tá chi pi wi'. Man ix k'o tá chi k'u pu q'ab' ri Pixab', xane ix k'o pu q'ab' ri Dios rumal ru toq'ob' pa qa wi'.

Uj patánil taq re ri Dios chub'anik ri utzil

¹⁵ ¿Jas k'u kujkanaj wi? ¿A kujmakunik rumal chi man uj k'o tá chi pu q'ab' ri Pixab', xane pu q'ab' ri Dios rumal ru toq'ob' pa qa wi'? ¿Man je' tá ri! ¹⁶ Ri ix qas iwetam chi we kijach iwib' chupatánixik jun patrón rech kixniman che, kixok k'u che patánil taq re ri patrón ri', tzrajwaxik k'u wi chi kixniman che. Are je ri', we are kixpatánin che ri mak je' ta ne are jun i patrón ri kuk'am loq kámikal pi wi', o are kixniman che ri Dios rech kájikomataj ri iwanima' chuwäch ri Are', kib'an k'u na ri utzil. ¹⁷ Maltiox k'u che ri Dios chi ri ix ri nab'e kanoq xipatánin na ri mak, kámik k'ut pa iwanima' xpe wi ru nimaxik ri qas tzij re ri tijonik ri xijach iwib' che retamaxik. ¹⁸ Aretaq xixel loq pu q'ab' ri mak ri ix chapowinaq, ri ix xijach iwib' chupatánixik ri Dios rech kib'an ri jikom pa ri i k'aslemaal. ¹⁹ Kínb'ij wa' chiwe pa ki tzij winaq, rumal chi ri ix i tukiel wi man qas kixkowin tá chuch'ob'ik wa' we chomanik ri'. Man je' tá kib'ano jas ri xib'an kan nab'e aretaq xijach iwib' chupatánixik ri mak rech

kib'an ri äwas u b'anik cho ri Dios xuquje' ri etzelal. Xane che we kämik, chijacha iwib' pu q'ab' ri Dios chub'anik ri jikom pa ri i k'aslemaal rech kixk'oji chuwäch ri Are' ch'ajch'oj ri iwanima'.

²⁰ Ri ix nab'e, aretaq tajin kipatänij na ri mak, man i yo'm tä iwib' chub'anik ri jikom pa ri i k'aslemaal. ²¹ ¿Jas k'u xich'ak che ri xib'an kan nab'e ri kik'ix chi che kämik? Xuwi k'u ri kämikal xirigo. ²² Kämik k'u ri ix, ix elinaq chi pu q'ab' ri mak, ix okinaq chi che patänil taq re ri Dios. K'o k'u xich'ak wa' che. Ri xich'ako are ru jachik iwib' pu q'ab' ri Dios, chuk'isb'al k'ut kiriq na ri k'aslemaal ri man k'o tä u k'isik. ²³ Ri tojb'al ri kuya ri mak are xaq xuwi ri kämikal, are k'u ri Dios kusipaj ri k'aslemaal ri man k'o tä u k'isik rumal ri Cristo Jesús, ri Qajaw.

7

Ri k'ulanem are jun k'utb'al chrij ri k'aslemaal ruk' ri Cristo

¹ Qachalal, ri ix ri iwetam ri Pixab' kich'ob'o chi ri Pixab' xuwi k'o chuq'ab' pu q'ab' puwi' jun winaq aretaq k'asal na. ² Kinkoj na jun k'utb'al chiwäch: Ri ixoq ri k'ulanik rajwaxik chi känim ri' che ri pixab' re ri k'ulanem aretaq k'ä k'asal na ri rachajil. We k'u käkäm ri rachajil, k'ä te ri' man rajwaxik tä chik käniman che we pixab' ri'. ³ Rumal ri', we ri ixoq käk'uli ruk' jun achi chik aretaq k'asal na ri rachajil, kub'an ri nimalaj mak ri äwas u b'anik chrij ri rachajil. We k'u käkäm ri rachajil, man rajwaxik tä chik käniman che ri pixab' re ru k'ulanem. Pune käk'uli ruk' jun achi chik, man kub'an tä ri' ri nimalaj mak ri äwas u b'anik.

⁴ Je k'u ri' ri ix, qachalal, ri ix u tz'aqatil ru cuerpo ri Cristo, man k'o tä chik ri Pixab' pi wi' rumal chi ix je' ta ne ix k'ulan chik ruk' ri Cristo. Ix rech chi ri Cristo ri xk'astaj chk-ixol ri käminaqib'. Je ri' rech ri q'a k'aslemaal kok wa' chupatänixik ri Dios. ⁵ Nab'e kanoq, aretaq ri q'a k'aslemaal are ru b'anik xaq jas ri käqaj uj, ri itzel taq qa rayinik xek'astaj rumal ri Pixab'. Ri ri' k'ut xa xujuk'am b'i pa ri kämikal. ⁶ Kämik k'ut uj käminaq chik chuwäch ri Pixab' ri xtaqan pa qa wi' nab'e. Je ri' man k'o tä chi ri Pixab' pa qa wi'. Kämik käqapatänij ri Dios pa ri k'ak' q'a k'aslemaal ri kuya ri Loq'alaj Espiritu. Ri ojer Pixab' ri tz'ib'talik man k'o tä chi pa qa wi'.

Ri apóstol Pablo käch'aw chrij ri mak ri k'o pa ri q'a k'aslemaal

⁷ ¿Jas k'u ri käqab'ij? ¿A käqab'ij lo chi mak ri' ri Pixab'? ¿Man je' taj! Rumal k'u ri kub'ij ri Pixab' xinwetamaj jas ri' ri mak. ¡Qachomajmpe! Mat xinwetamaj ri' chi ru rayixik ri jastaq ke nik'iaj winaq chik are mak, we ta mat xub'ij ri Pixab': "Marayij

u wäch ri jastaq ke nik'iaj winaq chik," — kächa'. ⁸ Ri mak k'ut xnimar u wäch rumal ri taqanik, xuk'asuj k'u pa ri wanima' ronojel u wäch itzel taq rayinik. Je ri', rumal chi we ta mat k'o ri Pixab', man q'alaj tä ri' chi k'o ri mak. ⁹ Ri in nab'e kanoq aretaq mäja' k'o wetam chrij ri Pixab' xinchomaj chi qas utz ri tajin kinb'an pa ri nu k'aslemaal. Aretaq k'ut xpe ri taqanik, xinch'ob' jas ri kub'ij ri Pixab'. Te ri' xk'astaj ri mak ri k'o pa wanima', are k'u ri in xinwetamaj chi in käminaq chuwäch ri Dios. ¹⁰ Je ri' ri taqanik ri xpe chuya'ik k'aslemaal, chwe in k'ut xa xuya kämikal. ¹¹ Rumal ri Pixab' ri kuko xukoj u chuq'ab' chwe, xinusub' k'ut. Xukoj ri taqanik che nu kämisaxik.

¹² Qas tzij k'ut, ri Pixab' ruk' ri taqanik man k'o tä ki mak, xane jikom xuquje' utz ri käkib'ij. ¹³ ¿A are ta k'u lo ri u b'anik utzil ri xb'anow chwe chi kinkämik? ¡Man are taj! Xane are ri mak ri kinkämisanik. Je ri' xub'ano rech käq'alajinik jas ri' ri mak. Are k'u xukoj ri utz chub'anik wa'. Je ri' ri taqanik xuq'alajisaj chi ri mak are sib'alaj man utz taj.

¹⁴ Qetam chi ri Pixab' ruk' ri Dios käpe wi, ri in k'ut xaq in winaq. In k'o pu q'ab' ri mak. ¹⁵ Man kinch'ob' tä k'ut jas ri tajin kinb'ano. Man are tä k'u kinb'an ri kwaj, xane ri tzel kinwilo are wa' ri tajin kinb'ano. ¹⁶ We k'u are kinb'an ri man kwaj taj kinb'ano, je ri' kinch'ob'o chi utz ri Pixab'. ¹⁷ Rumal k'u ri' man in tä chi ri' ri tajin kinb'anowik, xane are ri mak ri k'o pa ri wanima' ri tajin kub'an wa'. ¹⁸ Ri in wetam chi man k'o tä jub'iq' ri utz pa ri wanima' rumal chi xaq in winaq ajuwächulew. K'o nu rayinik chub'anik ri utz, xa k'u man kinkowin tä kinb'an wa'. ¹⁹ Man kinb'an tä ri utz ri kwaj kinb'ano, xane are kintagej u b'anik ri man utz taj ri man kwaj taj kinb'ano. ²⁰ We k'u are kinb'an ri man kwaj taj kinb'ano, man in tä chi ri' kinb'anowik, xane are ri mak ri k'o pa wanima'.

²¹ Ri kink'ulmaj k'ut are wa': Aretaq kwaj kinb'an ri utz, xuwi ri etzelal kuk'ut rib' chnuwäch. ²² Ri wanima' k'ut käkikot ruk' ru Pixab' ri Dios. ²³ Kinwil k'ut chi pa ri nu cuerpo k'o jun pixab' ri xa kuk'ulelaj u wäch ri pixab' ri k'o pa ri nu chomab'al. Are k'u wa' ri pixab' re ri mak ri k'o pa ri nu cuerpo, are wa' ri in chapowinaq.

²⁴ ¡K'äx wa' ri nu b'anik! ¿Jachin ta ri kinesi na pu q'ab' wa' we cuerpo ri' ri xa kinuk'am b'i pa ri kämikal? ²⁵ Xuwi ri Dios käkowin che nu to'ik rumal ri Qajaw Jesucristo. ¡Maltiox b'a' che ri Dios! Rumal ri' ri in kinch'ob'o chi rajwaxik kinnimaj ru Pixab' ri Dios, are k'u ri nu cuerpo kuya rib' pu q'ab' ri mak.

8

Waral kâqil wi ri k'aslemaal ri kuya ri Loq'alaj Espiritu

¹ Kâmik k'ut, ri winaq ri xa e jun chik ruk' ri Cristo Jesús, man kâq'at tâ na tzij pa ki wi' chi kâk'âjisax ki wâch. E are k'u taq wa' ri man kâka'n tâ ri ki rayib'al ri man utz taj, xane are kâka'no jas ri kraj ri Loq'alaj Espiritu. ² Ri pixab' k'ut ri rech ri Loq'alaj Espiritu ri kuya k'aslemaal rumal ri Cristo Jesús, are xinesan pu q'ab' ri pixab' re ri mak xuquje' re ri kâmikal. ³ Ri Dios xub'ano jachike ri man xkowin tâ chub'anik ri Pixab' ri xutz'ib'aj ri qa mam Moisés. Ri Pixab' ri' man k'o tâ u chuq'ab' chuk'exik ri ki k'aslemaal ri winaq. Ri Dios k'ut xutaq loq ru K'ojol ri ya winaq chik, xukoj k'u che sipanik chutujik ri qa mak. Xutaq loq je' ta ne are xa jun winaq ajmak. Je ri' ri Dios xuk'âjisaj u wâch ri mak rumal ru kâmikal ri Jesús. ⁴ Je' xub'an wa' ri Dios rech ri uj kujkowin chub'anik jas ri kâtaqan wi ri Pixab', man kâqa'n tâ chi k'ut xa jas ri kâqaj uj, xane are kâqa'no jas ri kraj ri Loq'alaj Espiritu.

⁵ Ri winaq k'ut ri kâka'no xaq jas ri kâkaj ri e are', are keb'ok il chub'anik ri ki rayib'al ajuwâchulew. Are k'u ri kâka'no jas ri kraj ri Loq'alaj Espiritu, are keb'ok il chub'anik jas ri kraj ri Are'. ⁶ Ri kok il jun chub'anik ri qa rayib'al ajuwâchulew kâk'aman b'i wa' pa ri kâmikal. Are k'u ri kok il jun chub'anik jas ri kraj ri Loq'alaj Espiritu kub'an chi kuriq na k'aslemaal, xuquje' kub'ano chi kuxlan ri ranima'. ⁷ Ri winaq ri xa kâkichomaj u b'anik ri ki rayib'al ajuwâchulew kâka'n ki k'ulel che ri Dios rumal chi man kekowin taj keniman che ru Pixab' ri Dios, xuquje' man kâkaj taj. ⁸ Rumal ri' ri winaq ri kâka'no xaq jas ri kâkaj ri e are', man kuya' taj kâqaj ri ki k'aslemaal chuwâch ri Dios.

⁹ Ri ix k'ut man b'enaq tâ iwanima' chub'anik xaq jas ri kiwaj ix, xane are kib'ano jas ri kraj ri Loq'alaj Espiritu, we gas k'o ri Espiritu rech ri Dios pa ri iwanima'. Jachin k'u ri man k'o tâ ri Espiritu rech ri Cristo pa ranima', man rech tâ ri Cristo ri'. ¹⁰ We ri Cristo k'o pa iwanima', pune b'a' kâkâm na ri i cuerpo rumal ri mak, kâk'asi k'u ri iwespiritu rumal chi xjikomataj ri iwanima' cho ri Dios. ¹¹ We pa ri iwanima' ix k'o wi ri Espiritu rech ri Dios ri xk'astajisan ri Jesús chkixol ri kâminaqib', ri Dios are kâyo'w na k'ak' u k'aslemaal ri i cuerpo ri xa kâkâmik. Je' kub'an wa' rumal ri Loq'alaj Espiritu rech ri Are' ri k'o pa iwanima'.

¹² Je k'u ri', qachalal, k'o ri rajwaxik kâqa'no, man are tâ k'u ru b'anik xaq jas ri kâqaj uj. ¹³ We k'u ri ix kib'an xaq jas ri kiwaj ix, kixkâm na. We k'u rumal ri Loq'alaj

Espiritu kikâmisaj ri i rayib'al ri man utz taj, kixk'asi na.

¹⁴ Konojel k'u ri k'amom ki b'e rumal ri Espiritu rech ri Dios, e are wa' ralk'ual ri Dios. ¹⁵ Ri Espiritu ri yo'm chiwe rumal ri Dios man are tâ jun espiritu ri xaq ix u kojom che taq patânelab' ri xuquje' kub'an chiwe chi kixej iwib', xane are ri Loq'alaj Espiritu ri xub'ano chi ix ralk'ual ri Dios. Ri Espiritu ri' kuya chqe chi kâqab'ij: "¡Qa Tat!" che ri Dios. ¹⁶ Tzare k'u we Espiritu ri' kub'ij pa ri qanima' chi uj ralk'ual chi ri Dios. ¹⁷ Rumal chi uj ralk'ual ri Dios, ya'talik chi kâyi' qe ri echb'al ri xuchi'j ri Dios, kâqak'am k'u na wa' junam ruk' ri Cristo. Je ri' we junam kâqariq k'âx ruk' ri Cristo, rech junam ruk' ri Are' kânimarisax na qa q'ij.

¹⁸ Ri in k'ut kinchomaj chi ri k'âx ri tajin kâqariq pa taq we q'ij kâmik, man kâjunamataj tâ wa' ruk' ri nimarisab'al qa q'ij ri kâyi' na chqe pa taq ri q'ij ri junab' ri kepe na. ¹⁹ Ronojel k'u ri b'anom rumal ri Dios xaq reye'm chi kâpe ri q'ij aretaq keq'alajisax na jachin taq ri e ralk'ual ri Dios. ²⁰ Je ri', rumal chi ronojel ri b'anom rumal ri Dios, xq'at tzij puwi' chi man k'o tâ u patân. Man are tâ k'u wa' ri u rayib'al, xane are ri Dios xb'anow che. Pune je ri', k'o jas ri kâreyej na. ²¹ Are la' chi kâpe na ri q'ij aretaq ronojel ri b'anom rumal ri Dios kâtzoqopitaj na, man kâkanaj tâ chi kan pu q'ab' ri kâmikal, kânimarisax k'u na u q'ij junam kuk' ri e ralk'ual ri Dios. ²² Kâmik ri', qetam chi ronojel ri b'anom rumal ri Dios kel ch'uj, k'o pa q'oxom, je' jas ru q'oxom jun yawab' ixoq. ²³ Man xuwi tâ k'u ri b'anom rumal ri Dios kel ch'uj, xane ri uj xuquje' ri yo'm ri Loq'alaj Espiritu chqe, ri nab'e qechb'al ri xuya ri Dios. Ri uj xuquje' kâq'oxow qanima', qeye'm k'ut jampa' kujq'alajisax chi uj qas ralk'ual ri Dios, rech kel ri qa cuerpo pu q'ab' ri kâmikal. ²⁴ Xqariq ru tob'anik ri Dios rumal chi k'o ri xku'b'i wi qa k'ux. We kâku'b'i u k'ux jun chrij ri tajin kâril chik, man ku'lb'al k'ux tâ ri'. Ri tajin kâril chik man rajwaxik tâ ri' chi kâreyej na. ²⁵ We k'u ri qeye'm are ri mâja' kâqilo, rajwaxik chi ruk' paciencia kujeyen na che.

²⁶ Ri uj man k'o tâ qa chuq'ab'. Tzare k'u ri Loq'alaj Espiritu kujto'wik. Man qetam taj kâqa'n orar, man kâqach'ob' tâ k'ut jas ri rajwaxik kâqata' che ri Dios, tzare k'u ri Loq'alaj Espiritu kâb'ochi'n che ri Dios pa qa wi' ruk' oq'ej ri man kujkowin tâ uj kâqab'ij ruk' ri qa tzij. ²⁷ Are k'u ri Dios ri kâka'y pa taq qanima', ri Are' retam jas ri kraj kub'ij ri Loq'alaj Espiritu, rumal chi ri Loq'alaj Espiritu kub'ochi'j ri Dios jas ru rayib'al ri Are' pa ki wi' ri winaq ri e rech.

Waral kâqil wi chi kujch'akan na puwi' ronojel

²⁸ Qetam k'ut chi ri Dios kub'ano chi utz kel na ronojel ri kâpe pa ki wi' ri winaq ri loq' kâkil wi ri Are'. E are k'u taq wa' ri winaq ri e sik'im rumal ri Are' jas ri u chomam loq. ²⁹ Konojel k'u ri xetamax ki wäch rumal ri Dios ojer, e are taq wa' xeucha' rech kejunamataj na ruk' ru K'ojol. Je ri' xub'ano rech ru K'ojol kok che nab'eal chkixol k'ia winaq ri kachalal kib'. ³⁰ Ri xeucha'taj rumal ri Dios ojer, e are taq wa' xeusik'ij, ri xeusik'ij e are' taq wa' ri xujikomaj kanima', ri xujikomaj kanima' k'ut, e are' taq wa' xunimarisaq ki q'ij junam ruk' ri Are'.

³¹ ¿Jas k'u ri kâqab'ij chrij wa'? Kâqab'ij k'ut: We ri Dios are k'o pa qa wi', man k'o tä jun ri kuya' kuyak rib' chqij. ³² Ri Dios man xuq'il tä rib' chuya'ik ri u K'ojol, xane xujach pa ri kâmikal rumal qech uj nimalaj qonojel. ¿A mat k'u kuya ri Are' junam ruk' ri u K'ojol ronojel ri kajwataj chqe? ¡Je', je ri'! ³³ ¿Jachin ta ri kâkownik kumol qa mak uj, ri uj cha'tal rumal ri Dios? Ri Dios k'ut u b'im chqij chi jikom qanima'. ³⁴ ¿Jachin ta lo ri kuya' kuq'at tzij pa qa wi' chi kâk'âjisax qa wäch? Are k'u ri Cristo xkâm che qa k'exwäch. Man xuwi tä wa', xane xuquje' xk'astaj chkixol ri kâminaqib'. T'uylul ri Are' kâmik pa ru wikiäq'ab' ri Dios, tajin k'u kâb'ochi'n pa qa wi' cho ri Dios. ³⁵ ¿Jachin ta lo ri kâkownik kujtasow chrij ri rutzil ranima' ri Cristo? ¡Man k'o taj! Pune k'u kâqariq ri k'âx, pune kâpe ri b'is, pune k'o winaq ri kâketzelaj qa wäch, pune kâqariq numik, pune man k'o tä chi qatz'iaq ri kâqajalb'ej, pune xa jub'iq' man kujkâmik, pune k'u kujkâmisaxik, man k'o tä ri kâkownik kujtasow chrij ri rutzil ranima' ri Cristo. ³⁶ Kub'ij k'u ru Loq' Pixab' ri Dios ri Tz'ib'talik:

Rumal ech la uj k'o cho ri kâmikal
amaq'el ronojel q'ij.

Je' kâb'an chqe jas ri kâb'an
chke ri chij ri kek'am b'i pa pilik,
—kâcha'. ³⁷ Pa ronojel k'u taq wa' ri k'âx ri kâqariqo, kujch'akan na, rumal ru tob'anik ri jun ri kujraj. ³⁸ Rumal ri' nu jikib'am nu k'ux chi man k'o tä jas ri kâkownik kujtasow chrij ri rutzil ranima' ri Dios. Man are tä ri kâmikal, man are tä ri k'aslemal, man are tä ri ângeles, man are tä k'u nik'iaj ri k'o taqanik pa ki q'ab', xuquje' ri k'o ki chuq'ab' ri man keilitaj taj. Man are tä ri k'o pa taq ri q'ij kâmik, o ri kâk'oji na pa taq ri q'ij ri kepetik. ³⁹ Man k'o tä jas ri k'o chikaj, man k'o tä jas ri k'o pulew, man k'o tä k'u jun jasach chik ri b'anom rumal ri Dios ri kâkownik kujtasow chrij ri rutzil ranima' ri Dios ri u k'utum chqawäch rumal ri Cristo Jesús ri Qajaw.

Waral kâqil wi chi ri winaq aj Israel e cha'tal rumal ri Dios

¹ Tajin kinb'ij ri qas tzij rumal chi in konjoninaq che ri Cristo. Man kinb'an tä k'u tzij. Kinna' pa wanima' chi qas tzij ri tajin kinb'ij rumal ri Loq'alaj Espiritu ri kâtaqan pa wanima'. ² Sib'alaj kinb'isonik, amaq'el k'ut kâq'oxow ri wanima' rumal ri k'âx ri ki riqom ri nu winaqil. ³ Kwaj ta ne in, pune b'a' kâpe k'âx pa nu wi' rumal ri Dios chi kintastaj in chrij ri Cristo we rajwaxik che ki to'ik ri nu winaqil. ⁴ Ri e are' e aj Israel, ri Dios k'ut xub'an ralk'ual chke. Ri Dios ri sib'alaj nim u q'ij xk'oji kuk', xuquje' xub'an taq tratos kuk'. Xuya ru Pixab' chke rumal ri Moisés, xub'ij k'u chke jas u b'anik ri q'ijilanik pa ri nimalaj rachoch Dios. K'o k'ia ri xuchi'j chke. ⁵ Konojel wa' we winaq ri' e kalk'ual kan ri qa mam aj Israel ojer, chkixol k'u ri e are' xil wi u wäch ri Cristo ri xk'oji cho ruwächulew. Ri Are' are Dios ri kâtaqan puwi' ronojel. ¡Amaq'el ronojel q'ij k'ut chyo'q u q'ij! Amén.

⁶ Man xa tä k'u mat je' xel wi ri xuchi'j loq ri Dios chke ri winaq aj Israel, xane rumal chi man konojel tä ri kalk'ual kan ri ojer qa mam aj Israel qas e rech ri Israel ru tinimit ri Dios. ⁷ Man konojel tä ri rachalaxik ri qa mam Abraham ri xil ki wäch qas e ralk'ual ri Dios. Xub'ij k'u ri Dios che: “Rumal ri Isaac kek'oji na uwi' taq a mam,” —xuchixik. ⁸ Kel kub'ij wa' chi man konojel taj e ralk'ual ri Dios, pune kâkib'ij chi e are' aj Israel. Xane jachin taq ri kâkioj pa kanima' ri xuchi'j loq ri Dios, e are wa' qas e ralk'ual ri Dios rumal ri xub'ij ri Dios che ri qa mam Abraham. ⁹ Ri xuchi'j ri Dios che ri qa mam Abraham are wa', xub'ij k'u che: “Pa ri q'ij ri' pa ri jun junab' chik kintzelej na loq. Are chi' k'ut ri Sara kâril na u wäch jun ral ala,” —xcha che.

¹⁰ Man xuwi tä k'u wa'. Ri kieb' ral ala ri Rebeca xa jun ri ki tat, are ri Isaac ri qa mam ojer. ¹¹⁻¹³ Aretaq mäjoq kil ki wäch we kieb' ak'alab' ri', mäjoq kâka'n jun utzil o jun etzelal, ri Dios xub'ij che ri Rebeca: “Ri nab'eal kok na che patânil re ru chaq',” —xcha che. Junam wa' ruk' ri kub'ij ru Loq' Pixab' ri Dios ri Tz'ib'talik: “Loq' xinwil wi ri Jacob, are k'u xinwetzelay u wäch ri Esau,” —kâcha'. Je ri' xujikib'a u b'ixik chi ri Dios kâchomanik jachin ri kraj kucha'. Keusik'ij jachin taq ri kraj, man rumal tä k'u ri kekowin chub'anik.

¹⁴ ¿Jas k'u ri kâqab'ij? ¿A kâqab'ij chi ri Dios man kub'an tä ri jikomal? ¡Man je' taj! ¹⁵ Xub'ij k'u ri Dios che ri qa mam Moisés: “Kel na nu k'ux che jachin ri kwaj kel wi nu k'ux, kintoq'ob'isaj k'u na u wäch jachin ri kwaj kintoq'ob'isaj u wäch,” —xcha che. ¹⁶ Rumal ri' man are tä kâcha' ri jun ri sib'alaj kraj kâcha'ik, o ri jun ri sib'alaj kukoj u chuq'ab', xane ri Dios

are kilowik jachin ri kraj kutoq'ob'isaj u wäch. ¹⁷ Kub'ij ru Loq' Pixab' ri Dios ri Tz'ib'talik chi ri Dios xub'ij che ri tat Faraón ri nim taqanel puwi' ri Egipto: "Xatinkoj che nim taqanel rech awumal at kink'ut ri nu chuq'ab' chkiwäch ri winaq, rech keta-max nu wäch cho ronojel ruwächulew," — xcha'. ¹⁸ Je ri' ri Dios kutoq'ob'isaj u wäch jachin ri kraj kutoq'ob'isaj u wäch, xuquje' kukowirisaj ri ranima' jachin ri kraj je' jas ri xub'an che ri tat Faraón.

¹⁹ Jun chiwe kub'ij k'u chwe: "We je ri', ¿jas che ri Dios kub'ij chi are ki mak ri winaq? ¿Jachin ta k'u lo ri kākowinik kuq'atej u wäch ri Dios?" — kacha na. ²⁰ E ri at, ¿jachin lo ri at chi ri at kak'ulelaj u wäch ri Dios? ¿A kub'ij lo ri b'o'j che ri xb'anowik: "¿Jas che je' xb'an la wa' chwe?" — ¿a kacha lo che? ¡Man je' taj! ²¹ ¿A mat are káb'an re ri b'anal b'o'j jas ri kraj kub'an che ri ulew? We kraj kub'an jun laq ri kākōj pa taq nimaq'ij, o we kraj kub'an jun laq ri kākōj ronojel q'ij, are ri' káb'an re.

²² Ri Dios k'ut xraj xuya jun k'utb'al chrij ri royowal xuquje' ru chuq'ab'. Rumal ri' xuchajij nimalaj paciencia kuk' ri winaq ri ya'tal chke chi kāk'ajisax ki wäch, ri xa kāsax na ki wäch. ²³ Je' xub'an ri Dios wa' rech qumal uj kuk'ut chkiwäch konojel chi sib'alaj nim u q'ij ri Are', qumal uj ri winaq ri xel u k'ux chqe, ri uj ri cha'tal rumal ojer loq rech känimarisax qa q'ij junam ruk' ri Are'. ²⁴ Ri Dios k'ut xujusik'ij, jujun chxixol ri winaq aj Israel, jujun chik chxixol ri winaq ri man e aj Israel taj. ²⁵ Je' jas ri kub'ij chupam ri wuj ri xutz'ib'aj ri Oseas, jun q'alajisal re ru Loq' Pixab' ri Dios:

Ri winaq ri man aj nu tinimit taj,
kinb'ij na "nu tinimit" chke.

Ri winaq ri nab'e man loq' taj xeinwil
wi, kinb'ij na chke:
"ix ri' ix nu loq'!"

—kincha na.

²⁶ Jawije' ri xub'ij wi chke:

"Ri ix man ix nu tinimit taj",

chila' káb'ix wi na chke

chi e ralk'ual ri k'aslik Dios,

—kacha na chke. ²⁷ Ri Isaías k'ut ri q'alajisal re ru Loq' Pixab' ri Dios xch'aw chki' ri winaq aj Israel, xub'ij: "Pune ta ne ri ki k'ial ri winaq aj Israel are junam ruk' ru k'ial ri senyāb' ri k'o' chi' ri mar, xaq k'u e kieb' oxib' chke ri kākiriq na ru tob'anik ri Dios. ²⁸ Je ri', rumal chi ri Dios kub'an na chanim jas ri xub'ij, kub'an k'u na wa' pa ki wi' konojel ri winaq ri e k'o cho ruwächulew," — xcha'. ²⁹ Je' jas ri u b'im kanoq ri qa mam Isaías ojer:

We ta ri Nimalaj qa Dios ri k'o u taqanik
puwi' ronojel mat xujuto' rech e k'o kan
qalk'ual,

xsach ta qa wäch ri' jas ri tinimit Sodoma,
uj junam ta ri' ruk' ri tinimit Gomorra,
—xcha'.

*Waral kâqil wi chi xuwi rumal ri kojoniq
kâjikomataj ri qanima' cho ri Dios*

³⁰ ¿Jas k'u ri kâqab'ij chrij wa'? Kâqab'ij chi ri winaq ri man e aj Israel taj, ri man xkitzujukuj taj chi xjikomataj ri kanima' cho ri Dios, e are' xjikomataj ri kanima' cho ri Dios rumal ri kojoniq. ³¹ Are k'u ri winaq aj Israel ri xku'b'i ki k'ux chrij jun pixab' rech rumal ri pixab' ri' kâjikomataj ri kanima' cho ri Dios, man e kowininaq tä k'ut chub'anik ri kub'ij ri pixab'. ³² ¿Jas che? Rumal chi ri e are' man xekojon taj. Xane xkichomaj chi rumal ru b'anik ri kub'ij ri Pixab' kâjikomataj ri kanima' cho ri Dios. Rumal ri' xa xetzaq puwi' ri "ab'aj ri kâkicha'ij kib' ri winaq chrij." ³³ Are k'u wa' ri ab'aj ri kub'ij ru Loq' Pixab' ri Dios ri Tz'ib'talik:

Ri in kinya na pa ri nu tinimit Siôn

Jun* ri je' jas jun ab'aj ri kâkicha'ij
kib' ri winaq chrij, jun nimalaj ab'aj wa'
ri xa ketzazq rumal,
—kâcha'.

Jachin ri kâkojon che ri Are'

man kâq'oxow tä na ri ranima',
—kâcha ri'.

10

¹ Qachalal, ri qas kinrayij pa wanima' aretaq kinb'an orar pa ki wi' ri winaq aj Israel, are la' chi ri e are' kākiriq ta na ru tob'anik ri Dios. ² Ri in kinb'ij ri wilom chki' ri winaq aj Israel, chi ri e are' sib'alaj kākaj kepatānin che ri Dios, xaq xuwi chi man qas tä kâkich'ob'o jas ri tajin kâka'no. ³ Man ketam tä k'ut jas ri kub'an ri Dios rech kâjikomataj ri kanima' ri winaq cho ri Are'. Xane ki tzukum jas kâka'n ri e are' pa ke wi chujikomaxik ri kanima' cho ri Dios. Man keniman tä k'u che ri taqaninaq wi ri Dios. ⁴ Ruk' ri Cristo k'ut kâk'is wi ronojel ri Pixab' ri xutz'ib'aj ri qa mam Moisés, rech konojel ri kekojon che ri Cristo kâjikomataj ri kanima' cho ri Dios.

⁵ Ri qa mam Moisés xch'aw chrij ri u jikomaxik ri ranima' jun winaq cho ri Dios rumal ru b'anik ri kub'ij ri Pixab'. Je wa' xutz'ib'aj: "Ri winaq ri kub'an ronojel ri kub'ij ri Pixab', are u k'aslemal wa'," — xcha'. ⁶ Are k'u we rumal ri kojoniq jun winaq kâjikomataj ri ranima' cho ri Dios, je wa' kub'ij: "Mab'ij pa rawanima: ¿Jachin kâpaqi chikaj?" We je' kab'ij wa', kel kub'ij chi kawaj kab'ano chi ri Cristo kâqaj loq cho ri ulew. ⁷ "Mab'ij k'ut: ¿Jachin ri kâqaj b'i pa ri nimalaj jul ri sib'alaj naj u pam?" We je' kab'ij wa', kel kub'ij chi kawaj kab'ano chi ri Cristo kâpaqi loq chxixol ri kâminaqib'.

* 9:33 Ri Jun ri' ri "je' jas jun ab'aj" are ri Jesucristo.

⁸ ¿Jas k'u ri kub'ij? “Ru Loq' Pixab' ri Dios naqaj k'o wi chawe, k'o pa ra chi', k'o pa awanima'.” We tzij ri' are wa' ru Loq' Pixab' ri Dios chrij ri kojoniq che ri Cristo. Are k'u wa' ri kâqatzijoj. ⁹ We kaq'alajisaj chi ri Jesús are Qajaw, xuquje' kakoj pa ri awanima' chi ri Dios xuk'astajisaj ri Jesús chxixol ri kâminaqib', kariq na ru tob'anik ri Dios. ¹⁰ Pa ri qanima' kujkojon wi rech kâjikomataj ri qanima' cho ri Dios, ruk' k'u ri qa chi' kâqaq'alajisaj chi kujkojon che ri Jesucristo rech kâqariq ru tob'anik ri Dios.

¹¹ Kub'ij k'u ru Loq' Pixab' ri Dios ri Tz'ib'talik: “Apachin ri kâkojon che ri Cristo man kâq'oxow tä na ri ranima',” —kâcha'. ¹² Man k'o tä ki jalb'em kib' ri winaq aj Israel kuk' ri winaq ri man aj Israel taj. Tzare k'u ri Qajaw Dios are Kajaw konojel. Ri Are' k'ut kuya nimalaj tewchib'al pa ki wi' konojel ri kâkita' toq'ob' che. ¹³ Je' jas ri kub'ij ri Tz'ib'talik: “Konojel ri kâkita' toq'ob' che ri Qajaw Jesús kâkiriq na ru tob'anik ri Dios,” —kâcha'. ¹⁴ ¿A kuya' ta k'u ri' kâkita' toq'ob' che ri Qajaw Jesús we mäja' kekojon che ri Are'? ¿A kuya' ta k'u lo ri' kekojon che we man ki tom u tzijol ri Are'? ¿A kuya' ta k'u ri' kâkita' u tzijol we man k'o tä jachin ri kâtzijon chke? ¹⁵ ¿A kuya' ta k'u ri' keb'e' chutzijoxik ru Loq' Pixab' ri Dios we ta mat e taqom b'ik? Kub'ij k'u ru Loq' Pixab' ri Dios ri Tz'ib'talik: “iSib'alaj je'l ri kopanik ri keyo'w ru Loq' Pixab' ri Dios ri kuya uxlanem pa kanima' ri winaq, ri kâkitzijoj ri Utzalaj Tzij re ri Evangelio!” —kâcha'.

¹⁶ Man konojel tä k'ut kâkitatab'ej ri Utzalaj Tzij re ri Evangelio. Are k'u wa' ri kub'ij ri qa mam Isaías: “Qajaw, ¿jachin ri kojoniq che ru Loq' Pixab' ri Dios ri qa tzijom?” —kâcha'. ¹⁷ Je' k'u ri' ri winaq kâkojonik aretaq kuta ri tzij. Are k'u ri tzij ri kuto are ru Loq' Pixab' ri Dios chrij ri Cristo.

¹⁸ Kinb'ij k'ut: ¿A xa man xkita tä ru Loq' Pixab' ri Dios? Ki tom, kub'ij ya' ru Loq' Pixab' ri Dios ri Tz'ib'talik: Ri ki ch'ab'al, elinaq u tzijol cho ronojel ruwâchulew, ri ki tzij opaninaq k'ä chuk'isb'al u tza'm ruwâchulew,

—kâcha'. ¹⁹ Kinb'ij chi k'u jumul: ¿A xa man k'o tä ketam chrij wa' ri winaq aj Israel? iKetam k'ut! Nab'e k'ut xub'ij ri qa mam Moisés:

Kinyak na iwoyowal rech kub'an k'äx ri iwanima' chxij ri winaq ri man are tä jun qas tinimit.

Kinb'an na chi käpe iwoyowal kumal ri winaq re jun tinimit ri man kâkaj taj kâkich'ob'o, —xcha'. ²⁰ Ri qa mam Isaías qas chi saqil xub'ij:

Xinriqtaj kumal ri winaq ri man xinkitzukuj taj.

Xink'ut wib' chkiwâch winaq ri man in taj ri tajin kinkitzukuj, —xcha'. ²¹ Kub'ij ri qa mam Isaías chxij ri winaq aj Israel: “Ronojel ri jun q'ij xinlik' ri nu q'ab' che ki sik'ixik ri winaq re jun tinimit ri man keniman tä chwe, ri xa kinkik'ulelaj,” —kâcha ri Dios.

11

Waral kâqil wi ri winaq aj Israel ri xkiriq ru tob'anik ri Dios

¹ Kinb'ij chi k'u che we chanim: Ri Dios k'ut, ¿a xa retzelam ki wâch ri winaq rech ru tinimit Israel? iMan je' taj! Ri in k'ut, in aj Israel. Are nu mam ri Abraham. In ri', in re ri rachalaxik ri qa mam Benjamín ojer. ² Ri Dios tzojer loq' xekicha' ri winaq rech ru tinimit Israel, man retzelam tä k'u ki wâch wa' kâmik. ¿A mat kâna'taj chiwe jas kub'ij ru Loq' Pixab' ri Dios ri Tz'ib'talik chrij ri qa mam Elías? Ri are' aretaq xub'an orar, xch'aw chxij ri winaq aj Israel, xub'ij: ³ “Qajaw Dios, ki kâmisam ri q'alajisaj taq re ri Loq' Pixab' la, ki wulim k'u taq ri ta'b'al toq'ob' ri kâq'ijilax wi la. Xuwi ri in chik in kanajinaq kanoq, are k'u kâkaj kinkikâmisaj in xuquje',” —xcha'. ⁴ Ri Dios k'ut xub'ij che: “E nu tasom kan wuqub' mil achijab' ri man xexuki tä chuwâch ri tiox Baal,” —xcha ri Dios. ⁵ Je' k'u wa' ri kâmik, e kanajinaq kan kieb' oxib' chke ri aj Israel ri xeucha' kan ri Dios rumal ri u toq'ob' pa ki wi'. ⁶ We xa rumal ru toq'ob' ri Dios xecha'tajik, man are tä rumal ri kâkowinik ri winaq chub'anik. We ta rumal ri kâkowin jun chub'anik, ru toq'ob' ri Dios man toq'ob' tä k'u ri'.

⁷ ¿Jas k'ut? Ri xkitzukuj ri winaq aj Israel, man xkiriq taj. Are xeriqow ri winaq ri xecha' rumal ri Dios. Are k'u ri nik'iaj winaq chik xa xkowirisax ri kanima'. ⁸ Jas ri kub'ij ru Loq' Pixab' ri Dios ri Tz'ib'talik: “Ri Dios xub'an chke chi man kâkina' tä chik. Pune k'o ki xikin, xub'an chke chi man kâkita taj. Pune k'o ki waq'âch, xub'an chke chi man keka'y taj. Je' k'u wa' ka'nom pa taq we q'ij kâmik,” —kâcha'. ⁹ Ri qa mam David ojer xuquje' xub'ij:

Ri nimaq taq wi'm ri kâka'no chub'an ta na chke chi are' chapâb'al, chi are' xuquje' k'amb'al, rech kâkichaq'ij kib', ketzaqik, kâk'âjisax k'u ki wâch, —kâcha'.

¹⁰ Chemoyir ta na ri e are' rech man keka'y tä chik, xuquje' chumej ta rib' ri kij, mat chjikomataj chik, —kâcha'.

Waral kâkil wi chi e k'o winaq ri man e aj Israel taj ri kâkirij na ru tob'anik ri Dios

¹¹ Kinb'ij k'ut: *ǵA tziij lo chi ri winaq aj Israel aretaq xkichaq'ij kib', xetzaqik, man xewalij tâ chik? ǵA xa xetzaq kanoq? ǵMan je' taj! Xane aretaq ri winaq aj Israel man xeniman taj, ri nik'iaj winaq chik, ri man e aj Israel taj, xkiriq ru tob'anik ri Dios, rech ri winaq aj Israel kâkikoj ta ki chuq'ab' chub'anik ke jas ri xka'n ri nik'iaj winaq chik.* ¹² Rumal k'u ri ki mak ri winaq aj Israel ri winaq cho ruwächulew xkiriq nimalaj utzil. Rumal ri ki tzaqik ri e are' xkiriq utzil ri winaq ri man e aj Israel taj. E ta k'u lo aretaq ketzelej chi loq jumul ri winaq aj Israel, *ǵa mat sib'alaj nim na ri utzil ri kâriqtajik? ǵJe', je ri'!*

¹³ K'o k'u ri kwaj kinb'ij chiwe ix ri man ix aj Israel taj. Rumal chi in apóstol ri taqom b'i rumal ri Dios kuk' ri winaq ri man e aj Israel taj, nim na kinwil wi ri nu chak. ¹⁴ Kwaj chi jujun chke ri nu winaq in, ri e aj Israel, chkirayij ta u b'anik ke jas ri i b'anom ix, rech kâkiriq ru tob'anik ri Dios. ¹⁵ We k'u aretaq xetzelax ki wäch ri winaq aj Israel rumal ri Dios, xk'oji utzil chkixol ri nik'iaj winaq chik ruk' ri Dios, *ǵjas ri kâk'ulmataj na aretaq ri winaq aj Israel kek'amowax chi na jumul rumal ri Dios? Are je' ta ne jun kâminaq wa' kâk'astaj chkixol ri kâminaqib'.* ¹⁶ We ri nab'e kaxlan wa ri kâb'an che ri q'or are jachom cho ri Dios, ronojel ri q'or jachom ri' che ri Dios. We ru xera' ri che' jachom che ri Dios, xuquje' ru q'ab' taq ri che' e jachom ri' che ri Dios.

¹⁷ Jujun k'u chke ri winaq aj Israel e are' je' ta ne ri qas u q'ab' ru che'al olivo. Pune je ri', xeesax k'u apanoq. Ri at k'ut, at je' jas ru q'ab' ru che'al olivo re juyub', xatkoj k'u che ki k'exwäch ri xeesaxik. Kat'asi k'u na rumal ru xera' ri qas che', xuquje' rumal ru raxal. ¹⁸ Machomaj k'ut chi nim na a b'anik at chkiwäch ri qas u q'ab' ri che'. We kachomaj chi nim na a b'anik, chna'taj chawe chi man at taj ri toq'aninaq ru xera' ri che', xane ru xera' ri che' are at toq'aninaq at.

¹⁹ Kraj ne kab'ij: "Xeesax k'u apan ru q'ab' ri che' rech kinnak' koq in che ru che'al olivo," —katcha'. ²⁰ Qas tziij, xa k'u rumal chi man xekojon taj xeesax apanoq, are k'u ri at xa rumal chi xatkojonik xatnak' koq. Manimarisaj b'a' awib', xane xa chaxej awib' cho ri Dios. ²¹ We ri Dios man xusach tâ ki mak ri winaq aj Israel ri je' ta ne e qas u q'ab' ri che', ri at xuquje' man kâsach tâ na a mak ri'. ²² Chawila b'a' chi ri Dios sib'alaj utz na, xuquje' k'ut sib'alaj k'a'n. Are k'a'n chke ri winaq ri xetzaqik, utz k'u chawe at. Rajwaxik k'ut chi ri at kataqej ri rutzil ranima', rech mâji' ri at xuquje' katresaj na apanoq. ²³ Ri winaq aj Israel k'ut, we

kekojon na ri e are', ketzelej na ruk' ri Dios, kenak' chi na koq jumul chik che ri che' rumal chi ri Dios kâkowinik keunak' chi na koq jumul chik. ²⁴ Ri at k'ut ri man at aj Israel taj, xa at je' ta ne u q'ab' olivo re juyub' xatesax k'u apanoq. Te k'u ri' xatnak' che ru che'al ri qas olivo ri man are tâ a che'al at. We je ri' ri winaq aj Israel ri je' ta ne u q'ab' ri qas olivo, man k'âx taj kenak' koq che ri qas ki che'al jumul chik.

Waral kâqil wi chi ri winaq aj Israel kâkirij na ru tob'anik ri Dios

²⁵ Qachalal, kwaj in chi kiwetamaj ru chomam loq ri Dios ojer ri man esam tâ chi saq, rech man kichomaj taj chi ri ix nim na i b'anik. Are wa': Ri winaq aj Israel xkowir jub'iq' ri kanima'. Ri Dios k'ut je' xub'an wa' chke rech kâk'is na kokik konojel ri nik'iaj winaq chik ri man e aj Israel taj ru chomam loq ri Are' ojer. ²⁶ Aretaq kâb'antaj wa', konojel ri winaq aj Israel kâkirij na ru tob'anik ri Dios. Kub'ij k'u ru Loq' Pixab' ri Dios ri Tz'ib'talik:

Pa ri tinimit Sión kel wi na loq

ri Torol Ke ri winaq,

kâresaj k'u na ri etzelal chkiq

ri ralk'ual kan ri qa mam Jacob,

—kâcha'.

²⁷ Are wa' ri trato ri kinb'an na kuk',

aretaq ri in kinwesaj ri ki mak,

—xcha'.

²⁸ Ri winaq aj Israel, rumal chi man xekojon tâ che ri Utzalaj Tziij re ri Evangelio, ri Dios xub'an u k'ulel chke. Je ri' xya'taj chiwe ix chi kixkojonik. Ri Dios k'ut keraj na ri winaq aj Israel rumal chi xeucha' ri ki mam ojer. ²⁹ Je ri', rumal chi ri Dios man kâresaj tâ chik ri kusipaj. Aretaq kusik'ij jun winaq, man kuk'ex tâ ru chomanik chrij. ³⁰ Ri ix nab'e kanoq man xixniman tâ che ri Dios. Kâmik ri' rumal chi man xeniman tâ ri winaq aj Israel, ri Dios xutoq'ob'isaj i wäch ix. ³¹ Je' xuquje' kâmik ri winaq aj Israel man e nimaninaq taj, xaq k'u rech ri Dios kutoq'ob'isaj ki wäch jas ri xub'an chiwe ix, ri ix man aj Israel taj. ³² Ri Dios k'ut junam xub'an chke konojel winaq chi man keni-man taj, rech xuquje' junam kutoq'ob'isaj ki wäch nimalaj konojel.

³³ ǵSib'alaj kajmab'al wa' ru b'antajik ri qa Dios! ǵSib'alaj nim na ru noj', ri re-tamb'al! Man kujkowin tâ chuch'ob'ik ru chomanik, man kujkowin tâ che retamaxik ri kuchomaj u b'anik. ³⁴ Je' jas ri kub'ij ru Loq' Pixab' ri Tz'ib'talik: "ǵJachin u ch'ob'om ru chomanik ri Dios? ǵJachin lo ri ya'tal che chi kuya ru noj' ri Are'? ǵMan k'o tâ jun! ³⁵ ǵJachin ri k'o jas xuya che ri Dios rech kâyi' rajil u k'exel che? ǵMan k'o tâ jun!" —kâcha ri Tz'ib'talik. ³⁶ Ronojel k'ut ri k'olik kâpe ruk' ri Dios. Ri Are' k'ut xeb'anow konojel

rech k'o kupatänij che. jChnimarisax ta b'a' u q'ij ri Dios amaq'el pa taq ri q'ij ri junab' ri kepetik! Amén.

12

Waral kâqil wi ri k'aslemal ri jachom pu q'ab' ri Dios

¹ Je k'u ri', qachalal, rumal chi ri Dios sib'alaj kel u k'ux chqe, kixinb'ochi'j chi kijach iwib' che ri Dios, je' jas jun sipanik ri k'aslik, ri jachom cho ri Dios, ri utz kâril wi ri Are'. We sipanik ri' are wa' ri qas q'ijilanik ri rajwaxik kib'an cho ri Dios. ² Mib'an chi iwe ix jas ri kâka'n ri winaq cho ruwächulew. Xane chik'exa ri i chomab'al rech kub'an k'ak' ri i k'aslemal. Je ri' qas kiwetamaj na jas ru rayib'al ri Dios. Are k'u wa' ri qas utz, ri kâqaj chuwäch, xuquje' ri jikom cho ri Dios.

³ Rumal ri xsipax chwe rumal ri Dios aretaq xutoq'ob'isaj nu wäch, k'o ri kinb'ij chiwe ix iwonojel: K'o jun chiwe muchomaj chi nim u b'anik, xane rajwaxik kichomaj iwib' chnojimal jas u b'eyal ri kojoniq ri xuya ri Dios chiwe chijujunal. ⁴ Ri q'a cuerpo e k'ia ru tz'aqatil k'olik, man konojel tä k'ut xa junam u wäch ri ki chak. ⁵ Je k'u ri' ri uj xuquje'. Pune uj k'ia, xa uj jun cuerpo rumal ri Cristo. Qonojel q'a nuk'um qib' je' jas ru tz'aqatil ri q'a cuerpo.

⁶ Ri Dios u yo'm jalajoj taq kuinem chqe, xa jas ri xraj ri Are' xuya chqe. Rajwaxik b'a' utz ki kojik taq we kuinem ri' kâqa'no. We yo'm chqe chi kâkowinik kâqaq'alajisaj tzij ri kuya ri Loq'alaj Espiritu, qa'na wa' ruk' ri q'a kojoniq ri k'olik. ⁷ We yo'm chqe chi kupatänin chke nik'iaj winaq chik, utz qa'na che ki patänixik. We yo'm che jun chi kâkowinik keutijoj nik'iaj chik, chutzaqa u q'ij chub'anik wa'. ⁸ We yo'm che jun chi kâkowinik kuwalijisaj kanima' nik'iaj chik, chutzaq u q'ij chub'anik wa'. We yo'm che jun chi kâsipanik, muya xa rumal chi k'o ri kraj. We yo'm che jun chi kuk'am ki b'e nik'iaj chik, chuna' na jas ri kub'ano. We k'u yo'm che jun chi keuto' ri k'o ki rajwaxik, chub'ana wa' ruk' kikotemal.

Waral kâqil wi ri rajwaxik kâka'n ri qachalal kojonelab' pa ri ki k'aslemal

⁹ Qas chiwaj iwib' ri jun ruk' ri jun chik, man kub'an tä k'u kieb' i k'ux. Chiwetzelaj u wäch ri man utz taj, chitajej k'u u b'anik ri utz. ¹⁰ Rajwaxik chi kiwaj iwib' ri jun ruk' ri jun chik je' ta ne chi qas iwachalal iwib'. Chiya i q'ij chb'il taq iwib', nim k'ut chiwila wi iwib', ri jun ruk' ri jun chik.

¹¹ Chikojo i chuq'ab' pa ronojel, xaq mixsaq'orinik. Chipatänij ri Qajaw Jesús ruk' nimalaj kikitomel.

¹² Chixkikot chrij ri ku'l wi i k'ux. Chichajij paciencia pa taq ri k'äx ri kiriqo. Chib'ana orar amaq'el ronojel q'ij.

¹³ Cheito' ri qachalal kojonelab' pa taq ri ki rajwaxik. Utz chib'ana che ki k'ulaxik ri keopan iwuk'.

¹⁴ Chib'ochi'j ri Dios pa ki wi' ri keyoq'on chiwe. Chita' toq'ob' pa ki wi', mita' k'u pa ki wi' chi xa k'äx kâkiriqo.

¹⁵ Chixkikot kuk' ri kekikotik. Chixoq' k'ut kuk' ri keb'oq'ik.

¹⁶ Chixok il chb'il taq iwib' ri jun che ri jun chik. Mib'an i nimal, xane chiwachilaj iwib' kuk' ri man nimaq tä ki b'anik. Michomaj chi k'o na iwetamb'al ix chkiwäch nik'iaj chik.

¹⁷ Miya rajil u k'exel ri k'äx ri kâb'an chiwe. Chikojo i chuq'ab' chub'anik ri utz chkiwäch konojel ri winaq. ¹⁸ Chib'ana ronojel ri kixkowin chub'anik rech kâk'oji utzil chixol kuk' konojel ri winaq. ¹⁹ Loq'alaj taq qachalal, miyak iwib' ix chkiq ri i k'ulel, xane chiya kan che ri Dios chi kuk'äjisaj ki wäch. Kub'ij ya' ru Loq' Pixab' ri Dios ri Tz'ib'talik: "In kink'äjsan na ki wäch, kintoj na rajil u k'exel ri k'äx ri kâb'an chiwe," —kâcha ri Qajaw Dios. ²⁰ Xuquje' kub'ij: "We kânum ri a k'ulel, chaya u wa. We kâchaq'ij u chi', chaya b'a' ri kutijo. We je' kab'an wa', ri a k'ulel sib'alaj kâk'ix na chawäch, kuna' k'ut chi k'äx ri xub'an chawe," —kâcha'. ²¹ Maya che ri etzelal chi kâch'akan pa wi', xane are chatch'akan at puwi' ri etzelal rumal ri utzil ri kab'ano.

13

¹ Rajwaxik chi konojel kâkiya kib' pa taqik chke ri k'o ki taqanik pa ri q'atb'al tzij. Man e k'o tä k'u q'atal taq tzij we ta mat u yo'm ri Dios wa' chke. Konojel ri q'atal taq tzij ri e k'olik are ri Dios e kojowinaq. ² Rumal ri' jachin ri kuyak rib' chrij ri q'atb'al tzij kub'an u k'ulel ri' che ri taqaninaq wi ri Dios. Ri je' kâka'n wa' xa kâkitzujukij ki mak ri', kâk'äjisax k'u na ki wäch. ³ Je ri', rumal chi ri q'atal taq tzij man e kojom taj rech ri winaq ri kâka'n utzil kâkixej kib', xane rech kâkixej kib' ri winaq ri kâka'n etzelal. We kawaj chi man kaxej tä awib' che ri q'atal tzij, chab'ana b'a' ri utz pa ri a k'aslemal. Ri q'atal tzij k'ut kuya na a q'ij at. ⁴ Je ri', rumal chi ri are' are patänil re ri Dios chub'anik ri utzil chawe. We k'u kab'an ri man utz taj, rajwaxik chi kaxej awib', rumal chi ri q'atal tzij ya'tal che chi kuk'äjisaj a wäch. K'o k'u ri are' chupatänixik ri Dios rech kâk'äjisax u wäch ri b'anal etzelal jas ri taqal che. ⁵ Rumal ri' rajwaxik chi kiya iwib' pa taqik chke ri q'atal taq tzij, man xaq tä rumal chi kixej iwib' chi kâk'äjisax i wäch, xane rumal chi kina' pa iwanima' chi rajwaxik je' kib'ano. ⁶ Xuquje' rumal wa' ri

ix kitoj ri alkab'al, rumal chi ri q'atal taq tzij e k'o chupatänixik ri Dios, ki yo'm k'u kib' chub'anik we chak ri'.

⁷ Chaya chke ri winaq chkijujunal ri ya'tal chke. Chatojo ri alkab'al che ri toq'il alkab'al, chatojo k'u ri a wuj che jachin ri rajwaxik kätoj wi. Nim chawila wi jachin ri rajwaxik nim kil wi, chaya k'u u q'ij jachin ri rajwaxik käyi' wi u q'ij. ⁸ We k'o a k'as ruk' jun winaq, chatojo. Chk'oji k'u ri utzalaj qa k'as chi käqaj qib' ri jun ruk' ri jun chik. Jachin k'u ri keraj ri rach taq winaq, u b'anom ri' jas ri kub'ij ri Pixab'. ⁹ Ri Pixab' k'ut kub'ij: "Mab'ana ri nimalaj mak ri äwas u b'anik ruk' ri rixoxil o ri rachajil jun winaq chik, matkämisanik, mab'ana ri elaq', mab'ana tzij chrij jachin jun, marayij u wäch ri jastaq re jun winaq chik," —kächa ri'. We taqanik ri' xuquje' konojel ri nik'iaj taq taqanik chik pa we kieb' oxib' tzij ri' e k'o wi: "Chawaj ri awach winaq jas ri at kawaj awib',"* —kächa'. ¹⁰ Jachin ri keraj ri rach taq winaq man kub'an tä k'äx ri' chke. Ri keraj ri rach taq winaq, qas kub'an ri' jas ri kub'ij ri Pixab'.

¹¹ Tajin kimb'ij wa' rech qas kichomaj jas taq ri q'ij ri uj k'o wi kämik. Chich'ob'o b'a' chi are taq q'ij wa' ri rajwaxik kujk'astajik, rumal chi xa jub'iq' kraj chi käpe ri q'ij pa qa wi' aretaq käqariq na ru tob'anik ri Dios. Man je' tä wa' nab'e aretaq k'a' te' xujkojon che ru Loq' Pixab' ri Dios. ¹² Ya xe' wa' ri aq'ab', na'tam chik, xa jub'iq' k'u man käsaqirik. Maqa'n chi b'a' ri man utz taj ri keb'an pa ri q'equm, xane qa'na ri utzil je' ta ne are to'b'al qib' wa' jas ri käkikoji ri soldados, kech'ojin k'u pa ri saqil. ¹³ Utz qa'na pa ri qa k'aslemal jas ri taqal u b'anik paq'ij. Mujq'ab'arik, mäqaya u wi' ri qa wi'm, mäqa'n qe jas ri käka'n ri tz'i' ri xaq käkiria qib', man k'o tä ki pixab', mäqa'n xaq jas ri käqarayij ri xa k'ixb'al u b'anik, mujch'ojinik, mäqarayij k'u ri jastaq ri rech jun winaq chik. ¹⁴ Mäqa'n wa', xane qakojo ri Qajaw Jesucristo, je' ta ne chi are to'b'al qib' ri kukoj jun soldado pa ri ch'oj. Michomaj k'u u b'anik ri i rayib'al ri man utz taj.

14

Cheito' ri qachalal, xaq miq'at tzij pa ki wi'

¹ We k'o jun qachalal ri mäja' k'o u chuq'ab' ru kojoniq, chik'ulaj. Xaq k'u mixch'ojin ruk' we man junam ri u chomanik iwuk'. ² Kimb'ij jun k'utb'al: Qab'ij na chi e k'o jujun qachalal ri käkichomaj chi ronojel kuya' kätijik, e k'o k'u jujun chik ri mäja' k'o u chuq'ab' ri ki kojoniq, ri xa ichaj käkitijo. ³ Ri jun ri ronojel u wäch kutijo, tzel b'a' märil wi ri jun chik

ri xaq q'alaj u wäch kutijo. Ri jun ri xaq q'alaj u wäch kutijo, muq'at tzij puwi' ri jun ri ronojel u wäch kutijo. Je ri', rumal chi ri Dios u k'amowam wa' we winaq ri'. ⁴ Jachin lo ri at chi ri at kaq'at tzij puwi' ri patänil re jun winaq chik? We utz kel na ri kub'ano o man utz taj are ru patrón ri' kilowik. Utz k'u kel na ru chak rumal chi ri Dios käkowinik kub'ano chi utz kelik.

⁵ Jun k'utb'al chik: E k'o jujun qachalal ri nim käkil wi jun q'ij chuwäch ri jun chik. E k'o k'u jujun qachalal ri xaq e junam taq ri q'ij chkiwäch. Chqajujunal k'ut rajwaxik qetam jas ri qas qa chomanik. ⁶ Ri jun ri nim käril wi jun q'ij, je' kub'an wa' chuya'ik u q'ij ri Qajaw Dios. Ri jun ri man nim tä käril wi ri jun q'ij, xuquje' kub'an wa' chuya'ik u q'ij ri Qajaw Dios. Ri jun ri ronojel u wäch kutijo, kutij ri' chuya'ik u q'ij ri Qajaw Dios rumal chi kumaltioxij wa' che ri Dios. Ri jun ri xaq q'alaj u wäch kutijo, kub'an ri' chuya'ik u q'ij ri Qajaw Dios, xuquje' kämaltioxin ri' che ri Dios.

⁷ Man k'o tä jun chqe ri k'asal xaq chi je ri', man k'o tä k'u jun chqe ri käkam xaq chi je ri'. ⁸ We kujk'asi'k, kujk'asi ri' chupatänixik ri Qajaw Jesús, we k'u kujkämik k'o u patän wa' cho ri Qajaw Jesús. Je ri', we kujk'asi'k o we kujkämik, uj rech ri Qajaw Jesús. ⁹ Rumal k'u ri' ri Cristo xkämik, xk'astaj k'u chkixol ri käminaqib' rech kok che Kajaw ri e k'aslik xuquje' ri e käminaq chik.

¹⁰ Ri at k'ut, jachin lo ri at chi ri at kaq'at tzij puwi' ri awachalal? Jäq che tzel kawil wi? jQonojel k'ut kujetak'al na chuwäch ri Cristo rech kuq'at tzij pa qa wi'! ¹¹ Kub'ij k'u ru Loq' Pixab' ri Dios ri Tz'ib'talik:

Kub'ij ri Qajwal Dios: Je' jas ri in qas tzij chi in k'asal in, je' xuquje' are qas tzij chi konojel ri winaq kexuki na chnuwäch.

Konojel k'ut käkiya nu q'ij, käkib'ij chkiwäch konojel chi xuwi ri in, in Dios,

—kächa na ri Qajaw Dios. ¹² Je k'u ri' qonojel ri uj chqajujunal käqab'ij na cho ri Dios jas ri qa'nom.

K'o jas mab'anori kub'ano chi ri awachalal kätzaq pa mak

¹³ Rumal ri', mäqaq'at b'a' tzij chb'il taq qib' ri jun ruk' ri jun chik. Xane chikojo i chuq'ab' rech man k'o tä jas k'o pa ri i k'aslemal ri kub'ano chi kätzaq ri iwachalal o kaqaj ne pa mak. ¹⁴ Ri in wetam, rumal chi in kojoniq che ri Qajaw Jesús, chi man k'o tä jun jasach ri äwas pa re wi. We k'u k'o jun kuchomaj chi äwas jun jasach, che ri are ri' tzäwas wi. ¹⁵ We k'u rumal ri katijo kub'an k'äx ri ranima' ri awachalal, man loq' tä kawil ri' ri awachalal. Mab'an b'a'

* 13:9 San Mateo 19:18-19.

chi jun winaq chik käqaj pa mak xa rumal chi ri at k'o jas kawaj katijo. Musach chawe chi rumal rech ri are' xuquje' xkäm ri Cristo. ¹⁶ K'o b'a' jas mib'ano ri kuya chke ri winaq chi käkib'ij ri man utz taj chrij ri utzil ri tajin kib'ano. ¹⁷ Je ri', rumal chi pa ru taqanik ri Dios man are tä nim u b'anik ri' ri kutij jun, xane are ru b'anik ri jikomal pa ri qa k'aslemal, chi kuxlan qanima', chi kujkikot k'u rumal ri Loq'alaj Espiritu. ¹⁸ Jachin ri je' kub'an wa' chupatänixik ri Cristo, käqaj ri' chuwaäch ri Dios xuquje' utz kil wi kumal ri winaq.

¹⁹ Qataqej b'a' u b'anik ronojel ri kub'ano chi kuxlan ri qanima'. Je ri' kujkowinik käqato'la qib' ri jun ruk' ri jun chik rech k'o u chuq'ab' ri qa kojonik. ²⁰ Mäsach u wäch ru b'anom ri Dios pa ranima' jun qachalal xa rumal ri katijo. Qas tzij ronojel ri k'olik ya'tal u tijik, are k'u man utz taj aretaq k'o jas kutij jun ri kub'ano chi nik'iaj chik keqaj pa mak. ²¹ Are utz na ri' man katij tä ti', man katij tä vino, man k'o tä k'u jas kab'ano ri kub'ano chi kätzaq ri awachalal o käqaj pa mak. K'o b'a' jas mab'ano ri kub'ano chi man k'o tä chi u chuq'ab' ru kojonik ri awachalal. ²² We kakojo chi utz ri tajin kab'an cho ri Dios, at wi ri'. Utz re ri winaq ri utz käril wi ri tajin kub'ano, we man kuna' tä k'äx pa ranima'. ²³ Jachin k'u ri xaq kub'an kieb' u k'ux che ri kutijo, we äwas o man äwas taj ru tijik, kämakun ri' aretaq kutijo. Ronojel k'u ri kub'an jun, we kub'an kieb' u k'ux che, are mak ri'.

15

Chab'ana ri käqaj chuwaäch ri awachalal, man xuwi tä ri käqaj chawaäch at

¹ Ri uj, ri k'o chi u chuq'ab' ri qa kojonik, rajwaxik käqachajij paciencia kuk' ri qachalal ri mäja' k'o u chuq'ab' ri ki kojonik, keqato' k'ut. Man are tä käqatzukuj xuwi ri utz käqil wi uj. ² Xane chqajujunal rajwaxik käqa'n ri käqaj chkiwaäch ri qachalal pa ronojel ri kub'an utzil chke. Je ri' käqa'no jachike ri kuya u chuq'ab' ri ki kojonik. ³ Are k'u ri Cristo man are tä xutzukuj ri utz käril wi ri Are'. Xane je' xuk'ulmaj jas ri kub'ij ru Loq' Pixab' ri Dios ri Tz'ib'talik: "Ri ki yoq'onik ri winaq ri keyoq'on che la, pa nu wi' in xqaj wi," —kächa'. ⁴ Ronojel ri xtz'ib'ax kan ojer pa ru Loq' Pixab' ri Dios ri Tz'ib'talik xtz'ib'ax kanoq che qa tijoxik rech käku'b'i qa k'ux chrij ri Dios rumal ri paciencia, xuquje' rumal ri ku'lb'al qa k'ux ri kuk'ut ru Loq' Pixab' ri Dios chqawäch. ⁵ Ri Dios k'ut ri kuya qa chuq'ab' rech käqach'ij ri k'äx, kuku'b'isaj k'u qa k'ux, are ta kixto'w ix iwonojel rech kina' pa iwanima' chi xa ix jun chik* jas ri xuk'ut kan ri Cristo Jesús

chqawäch. ⁶ Je ri' rech iwonojel junam, je' ta ne chi xa jun i ch'ab'al, kinimarisaj ta u q'ij ri Dios, ru Tat ri Qajaw Jesucristo.

Ri Utzalaj Tzij re ri Evangelio xtzijox chke ri winaq ri man e aj Israel taj

⁷ Chik'amowaj b'a' iwib', ri jun ruk' ri jun chik chunimarisaxik u q'ij ri Dios, je' jas ri xub'an ri Cristo xujuk'amowaj uj. ⁸ Je' kinb'ij chiwe rumal chi ri Cristo xpe che ki patänixik ri winaq aj Israel, rech je' kelik jas ri xub'ij kan ri Dios chke ri qa mam ojer, xuquje' chuk'utik chi qas jikom ranima' ri Dios chub'anik ri kub'ij. ⁹ Xuquje' ri Cristo xpetik rech ri nik'iaj winaq chik ri man e aj Israel taj käkiya u q'ij ri Dios rumal chi xel u k'ux chke. Je' jas ri kub'ij k'u ru Loq' Pixab' ri Dios ri Tz'ib'talik:

Rumal ri' kinnimarisaj na q'ij la chkixol

ri nik'iaj winaq ri man e aj Israel taj,

xuquje' kinb'ixoj na b'ix chuya'ik q'ij la, —kächa'. ¹⁰ Xuquje' kub'ij ri Tz'ib'talik pa jun u xaq wuj chik:

Ix ri' ri xaq ix winaq

ri man aj Israel taj,

chixkikot na kuk' ri winaq

ri e cha'tal rumal ri Dios,

—kächa'. ¹¹ Pa jun u xaq wuj chik kub'ij:

Ix ri', iwonojel ix ri xaq ix winaq,

ri man aj Israel taj,

chiya u q'ij ri Qajaw Dios.

Nimalaj iwonojel k'u ri ix,

ix winaq ajuwächulew,

chiya u q'ij ri Dios,

—kächa'. ¹² Ri Isaias, ri q'alajisal re ru Loq' Pixab' ri Dios, xuquje' xub'ij:

Käwalij na jun chkixol

ri rachalaxik kan ri qa mam Isai,

ru tat ri qa mam David,

ri kok na che taqanel pa ki wi'

konovel ki wäch winaq.

Konovel k'ut käku'b'i na

ki k'ux chrij ri Are',

—xcha'.

¹³ Are ta b'a' ri Dios ri käku'b'i na qa k'ux chrij kuya ta nimalaj kikitomal chiwe, kub'ano chi kuxlan ri iwanima' rumal chi ix kojoninaq che ri Cristo. Je ri' sib'alaj käku'b'i na i k'ux chrij ri Dios rumal ru chuq'ab' ri Loq'alaj Espiritu.

¹⁴ Qachalal, ri in wetam chi ri ix sib'alaj k'o utzil pa iwanima', xuquje' sib'alaj k'o ronojel u wäch etamb'al iwuk'. Je ri' chi iwetam kipixb'ela iwib' chb'il taq iwib'. ¹⁵ Man kinxej tä k'u wib' kintz'ib'aj b'i we wuj ri' chiwe. Kwaj chi man käsach tä wa' pa i jolom. Je wa' kinb'ano rumal chi ri Dios u toq'ob'isam nu wäch, u yo'm k'u we chak ri' pa nu q'ab'. ¹⁶ Are ru patänixik ri Jesucristo chkixol ri winaq ri man e aj Israel taj. Ri chak ri kinb'ano are ru tzijoxik ri Utzalaj

* 15:5 Hechos 2:1.

Tzij re ri Evangelio ri xuya ri Dios, rech keinya cho ri Dios ri winaq ri man e aj Israel taj, jun sipanik ri kāk'amowax rumal ri Are', tastal k'u wa' rumal ri Loq'alaj Espiritu.

¹⁷ Rumal k'u rech in kojoninaq che ri Cristo Jesús, kākikot ri wanima' chi tajin kinpatānij ri Dios. ¹⁸ Man kinkoch' tā k'ut kintzijo'j ri u Tzij ri Dios we man are tā kintzijo'j ru b'anom ri Cristo rumal wech in rech ri winaq ri man e aj Israel taj keniman che ri Dios. Ronojel wa' xb'antajik rumal ru Tzij ri Dios ri xintzijo'j chke xuquje' rumal chi xkilo jas ri nu chak ri xinb'an chxixol. ¹⁹ Xb'antaj wa' kuk' taq etal xuquje' kajmab'al ri xeb'antajik rumal ru chuq'ab' ri Loq'alaj Espiritu. Je ri' xintz'aqatisaj u tzijoxik ri Utzalaj Tzij re ri Evangelio chrij ri Cristo ri xinchap loq pa ri tinimit Jerusalén, xintaqej u tzijoxik pa taq ri nik'iaj tinimit chik, xink'is k'u u tzijoxik pa Ilirico. ²⁰ Je wa' nu b'anom, nu kojom nu chuq'ab' chutzijoxik ri Utzalaj Tzij re ri Evangelio jawije' ri man k'o tā jas ki tom chrij ri Cristo. Je ri' rech man kinb'an tā jun chak ri chaplem chi kan kumal nik'iaj chik. ²¹ Xane je' nu b'anom jas ri kub'ij ru Loq' Pixab' ri Dios ri Tz'ib'talik:

Ri winaq ri man k'o tā jumul
ki tom u tzijol ri Cristo
kākita na.

Ri man k'o tā jumul k'o
jas ki tom chrij ri Are',
k'o ri kāketa maj na,
—kācha'.

Ri apóstol Pablo kuchomaj ke' che kilik ri qachalal kojonelab' pa ri tinimit Roma

²² Xa rumal ri chak ri tajin kinb'ano man in kowininaq taj kine' che iwilik, pune k'ia mul nu rayim ri b'enam iwuk'. ²³ Are k'u ri kāmik in to'tajinaq chik che ri nu chak pa taq we tinimit ri', kuya' chik kine' iwuk'. Je ri', rumal chi k'ia junab' k'ut xaq nu rayim kinopan iwuk'. ²⁴ Kinchomaj kinok'ow iwuk' che iwilik aretaq kine' pa España, kinkikot k'ut che rilik i wäch. Kinweyey chi kinito' b'ik rech kinkowinik kintaqej ri nu b'inem pa España. ²⁵ Are k'u ri' kāmik kine' pa ri tinimit Jerusalén chuk'amik b'i jun tob'anik chke ri qachalal jela'. ²⁶ Je ri', rumal chi ri qachalal aj Macedonia, xuquje' ri aj Acaya xpe pa kanima' xkimulij jun kuchuj chke ri qachalal meb'a'ib' ri e k'o pa ri tinimit Jerusalén. ²⁷ Xkichomaj chi taqal u b'anik wa' rumal chi kākina' pa kanima' chi k'o ki k'as kuk' ri qachalal aj Jerusalén. Je ri', rumal chi ri kojonelab' aj Israel ki yo'm ri tewchib'al re ru Tzij ri Dios chke ri man e aj Israel taj. Utz k'ut we ri e are' kekito' ri kojonelab' aj Israel che ri ki rajwaxik ruk' jachike ri k'o kuk'. ²⁸ Aretaq k'ut b'antajinaq chik ri nu tajkil, ya'tajinaq chi kan ri kuchuj

chke ri qachalal pa ri tinimit Jerusalén, kine' na pa España, kinok'ow k'u iwuk' che iwilik. ²⁹ Qas wetam k'ut chi aretaq kinopan iwuk', kāpe na ri nimalaj u tewchib'al ri Cristo pa qa wi' junam iwuk'.

³⁰ Qachalal, kixinb'ochi'j chi kinito' chu-pam ri chak ri tajin kintij nu chuq'ab' chub'anik, chib'ana orar pa nu wi' cho ri Dios. Kinb'ij wa' chiwe rumal rech ri Qajaw Jesucristo, xuquje' rumal chi ri Loq'alaj Espiritu kuya pa qanima' chi kākaj qib' ri jun ruk' ri jun chik. ³¹ Chib'ana b'a' orar cho ri Dios chi kinuto' pa ki q'ab' ri winaq ri e k'o pa Judea ri man kekojon tā che ri Are', xuquje' rech ri kuchuj ri kink'am b'i chke ri qachalal pa ri tinimit Jerusalén kākik'am wa' ruk' kikitomel. ³² Chib'ana b'a' orar xuquje' rech kinopan iwuk' ruk' kikitomel we are u rayib'al ri Dios, kinuxlan k'u na kieb' oxib' q'ij aretaq in k'o iwuk'. ³³ Are ta b'a' ri Dios, ri kub'ano chi kuxlan ri qanima' kāk'o'ji pi wi' nimalaj iwonojel. Amén.

16

Ri apóstol Pablo kuya rutzil ki wäch ri kojonelab'

¹ Kwaj chi kiwetamaj u wäch ri qachalal Febe. Ri are' are jun chichu' diaconisa ri tajin kätob'an kuk' ri qachalal kojonelab' ri e k'o pa Cencrea. ² Kwaj k'ut chi aretaq kopan iwuk' kik'ulaj ruk' utzil pa ru b'i' ri Qajaw Jesús. Je' u k'ulaxik kib'ano jas ri rajwaxik káb'an amaq'el che ki k'ulaxik ri qachalal kojonelab'. Chito' che ru rajwaxik, rumal chi ri are' e k'ia e u to'm, xuquje' ne ri in, in u to'm.

³ Chiya rutzil u wäch ri Priscila xuquje' ri Aquila, ri e wach taq ajchak chupatānixik ri Cristo Jesús. ⁴ Ri e are' xa jub'iq' man xekāmik rumal ri nu to'ik in. Rumal ri' kinmaltioxin chke, man xuwi tā ri in, xane xuquje' konojel ri qachalal kojonelab' ri man e aj Israel taj. ⁵ Chiya rutzil ki wäch xuquje' ri qachalal kojonelab' ri kākimulij kib' pa kachoch ri Priscila, ri Aquila. Chiya rutzil u wäch ri Epeneto, ri loq'alaj wachi'l, ri nab'e kojonel che ri Cristo pa Acaya. ⁶ Chiya k'u rutzil u wäch ri María, ri sib'alaj chakuninaq che i to'ik. ⁷ Chiya rutzil ki wäch ri wach taq aj Israel, ri Andrónico ruk' ri Junias ri xuquje' e wach ajpache'. Ri e are' sib'alaj etamtal ki wäch chxixol ri apóstoles, e are k'u nab'e xekojon che ri Cristo chnuwäch in.

⁸ Chiya rutzil u wäch ri Amplias, ri loq'alaj wachi'l rumal ri Qajaw Jesús. ⁹ Chiya rutzil u wäch ri Urbano ri qachi'l pa ri chak chupatānixik ri Cristo Jesús. Chiya rutzil u wäch xuquje' ri Estaquis ri loq'alaj wachi'l. ¹⁰ Chiya rutzil u wäch ri Apeles ri k'ia mul u q'alajisam chi qas tzij kojoninaq che ri

Cristo. Xuquje' chiya rutzil ki wäch ri e k'o pa rachoch ri Aristóbulo. ¹¹ Chiya rutzil u wäch ri Herodiön ri wach aj Israel. Chiya rutzil ki wäch ri e k'o pa rachoch ri Narciso, ri e kojoni naq che ri Qajaw Jesús. ¹² Chiya rutzil ki wäch ri Trifena, xuquje' ri Trifosa. We kieb' ixoqib' ri' kepatänin che ri Qajaw Jesús. Xuquje' chiya rutzil u wäch ri loq'alaj qachalal chichu' Pérsida, ri sib'alaj chakuninaq chupatänixik ri Qajaw Jesús. ¹³ Chiya rutzil u wäch ri Rufo, jun kojonel che ri Qajaw Jesús ri nim u b'anik chkiwäch ri qachalal kojonelab'. Xuquje' ru nan chiya rutzil u wäch. We chichu' ri' are je' ta ne nu nan in. ¹⁴ Chiya rutzil u wäch ri Asíncrito, ri Flegonte, ri Hermas, ri Patrobas, ri Hermes xuquje' konojel ri qachalal ri e k'o kuk'. ¹⁵ Chiya k'u rutzil u wäch ri Filólogo, ri Julia, ri Nereo ruk' ri ranab', xuquje' ri Olimpas, xuquje' konojel ri qachalal kojonelab' ri e k'o kuk'.

¹⁶ Chiyala' rutzil i wäch chb'il taq iwib' ri jun ruk' ri jun chik. Aretaq je' kib'an wa', chitz'umaj iwib' chuwäch ri Dios chuk'utik chi qas kiwaj iwib'*. Konojel ri qachalal kojonelab' che ri Cristo käkiya rutzil i wäch.

¹⁷ Qachalal, kixinb'ochi'j chi kei wil ri winaq ri xaq kekitasala taq ri kojonelab', ri kaka'no chi ketzaqik. Man je' tä k'u wa' ri tijonik xiwetamaj. Chitasa b'a' iwib' chki j ri e je' taq wa'. ¹⁸ We winaq ri' man are tä käkipatänij ri Qajaw Jesucristo, xane xaq kākaj kaka'n ri itzel taq ki rayinik. Kekisub' k'u taq ri winaq ri man k'o tä ketam, kākikoj k'u ki k'ux kuk' je'l taq tzij. ¹⁹ Konojel k'ut ketam chi ri ix sib'alaj kixnimanik, rumal k'u ri' kinkikotik. Kwaj k'ut chi kāk'oji na i no'j chub'anik ri utz, man are tä k'u kiweta-maj u b'anik ri man utz taj. ²⁰ Ri Dios k'ut ri kub'ano chi kuxlan ri qanima', kuxaq'lej na ri Satanás chanim xe' ri iwaqan jas ri káb'an che jun kumätz ri kätio'nik. Are ta b'a' ri Qajaw Jesucristo kätöq'ob'isan i wäch nimalaj iwonojel.

²¹ Kuya rutzil i wäch ri Timoteo ri junam kächakun wuk', xuquje' ri Lucio, ri Jasón, ri Sosípater ri wach taq aj Israel käkiya rutzil i wäch.

²² In wa', ri Tercio, ri tajin kintz'ib'aj b'i we wuj ri',† kinya rutzil i wäch in xuquje' pa ru b'i' ri Qajaw Jesús.

²³ Kuya rutzil i wäch ri Gayo ri u yo'm nu k'olib'al pa rachoch, jawije' ri kākimulij wi kib' ri qachalal kojonelab'. Käkiya rutzil i wäch ri Erasto ri k'olol puag re ri tinimit, xuquje' ri qachalal Cuarto kuya rutzil i wäch.

²⁴ Are ta b'a' ri Qajaw Jesucristo kätöq'ob'isan i wäch nimalaj iwonojel. Amén.

Ri apóstol Pablo kuya u q'ij ri Dios

²⁵ Are k'u ri kāmik, qaya b'a' u q'ij ri Dios. Ri Are' kākowinik kub'ano chi k'o na más u chuq'ab' ri i kojonik jas ri kub'ij ri Utzalaij Tzij re ri Evangelio ri kintzizijoj, xuquje' jas ri kub'ij ri tijonik ri nu yo'm chrij ri Jesucristo. Je wa' jas ru q'alajisam loq ri Dios chrij ru chomam loq, ri man etamtal tä kan ojer tzaretaq mäjoq káb'an ruwächulew. ²⁶ Kāmik k'ut esam chi saq ru chomanik pa ru Loq' Pixab' ri Dios ri xkitz'ib'aj kan ri q'alajisal taq re ru Tzij ri Dios. Are k'u wa' ri xtaqan wi ri Dios ri man k'o tä u k'isik ru k'aslemal. Ri u chomam loq ri Dios ri man etamtal taj ojer esam wa' chi saq kāmik chkiwäch konojel winaq cho ruwächulew rech kekojon ta na, xuquje' kenimanik.

²⁷ ¡Ri Dios ri xuwi wa' Dios k'olik, ri xuquje' k'o u no'j che ronojel, chnimarisax b'a' u q'ij amaq'el pa taq ri q'ij ri junab' ri kepetik rumal ri u b'anom ri Jesucristo! Amén.

* **16:16** 1 Tesalonicenses 5:26. † **16:22** Ri apóstol Pablo xukoj jun qachalal che tz'ib'anel che ki tz'ib'axik ru wuj.

RI NAB'E CARTA RI XUTZ'IB'AJ RI SAN PABLO CHKE RI KOJONELAB' AJ CORINTO

Ri apóstol Pablo kuchap u tz'ib'axik jun carta chke ri qachalal kojonelab' aj Corinto

¹ In wa', ri Pablo, in sik'im rumal ri Dios rech kinok che apóstol, jun chke ru taqo'n ri Jesucristo. Je wa' nu b'anik rumal chi are u rayib'al ri Dios. Ri in, wachi'l ri qachalal Sóstenes, ² kintz'ib'aj b'i wa' we wuj ri' chke ri qachalal kojonelab' che ri Dios ri e k'o pa ri tinimit Corinto, ri e rech ri Dios rumal chi xa e jun ruk' ri Cristo Jesús. Ri Dios e u sik'im rech káb'an ch'ajch'oj che ri kanima', keq'ax k'u pu q'ab' ri Are' junam kuk' konojel ri káikib'ij chi e kojoniñaq che ri Qajaw Jesucristo ri e k'o pa ronojel tinimit. Ri Jesús are Kajaw ri e are', xuquje' ri Qajaw uj. ³ Are ta b'a' ri Dios qa Tat xuquje' ri Qajaw Jesucristo kutoq'ob'isaj i wäch, kub'ano chi kuxlan ri iwanima'.

Ri apóstol Pablo kumaltioxij che ri Dios chi u toq'ob'isam ki wäch ri kojonelab' aj Corinto

⁴ Ronojel q'ij kinya maltioxinik che ri Dios rumal iwech, rumal chi sib'alaj nim ri toq'ob' u yo'm ri Are' chiwe xa rumal ri Cristo Jesús. ⁵ Rumal k'u rech chi xa ix jun ruk' ri Cristo, ri Dios u yo'm chiwe ronojel u wäch je'lalaj taq tewchib'al ajchikaj. Ri Are' xuya chiwe ronojel u wäch etamanik, xuquje' xuya chiwe chi kixkowinik kitzijoj wa' we etamanik ri'. ⁶ Rumal ri', ri qa tzijom chiwe chrij ri Cristo, gas q'alaj wa' pa ri i k'aslemal kámik. ⁷ Je ri' man k'o tä jun u wäch tewchib'al ajchikaj ri mat yo'm chiwe rumal ri Dios, ix ri', ri ix eyeninaq che ri q'ij ri kápe na ri Qajaw Jesucristo, kuk'ut k'u rib' chqawäch. ⁸ Ri Are' kub'an na chi gas kijikib'a' ri iwanima' pa ri i kojoniñik k'ä kák'is na ronojel, rech man k'o tä mak káriqtaj chiwiji pa ri q'ij ri kápe na ri Qajaw Jesucristo. ⁹ Ri Dios amaq'el ronojel q'ij kub'an ri kuchi'j u b'anik. Are k'u ri Are' xixsik'inik rech xa junam i wäch ruk' ri u K'ojol Jesucristo ri Qajaw.

Waral káqasik'ij wi ri pixb'enik ri xuya ri apóstol Pablo chke ri kojonelab' ri xaq kákitasala kib'

¹⁰ Qachalal, kixinb'ochi'j pa ru b'i' ri Qajaw Jesucristo chi kib'an utzil chixol. Chi-junamaj b'a' i wäch, xa k'u mitasala iwib'. Xane rajwaxik chi junam ix k'o wi, chi ki-junamaj ri i chomanik, rech xa junam ri i rayib'al. ¹¹ Qachalal, kinb'ij wa' chiwe rumal chi jujun chke ri rachalaxik ri nan

Clóe ki b'im chwe chi k'o ch'oj chixol. ¹² Ri kwaj kinb'ij chiwe, are la' chi ri ix chijujunal jalan wi ri kib'ij. K'o jun ri kub'ij: "Ri in, in k'o ruk' ri Pablo," —kácha ri'. Jun chik kub'ij: "E ri in, in k'o ruk' ri Apolos," —kácha'. Jun chik kub'ij: "In ri', in k'o ruk' ri Pedro," —kácha b'a' ri jun. E k'u ri jun chik kub'ij: "iRi in k'ut, in k'o ruk' ri Cristo!" —kácha ri jun chik. ¹³ ¿A xa pu lo b'anom ch'áqataq che ri Cristo? ¿A are lo ri in Pablo ri xinrip cho ri cruz, xinkäm k'u rumal iwech? iMan je' taj! ¿A xb'an ne lo i qasna' pa nu b'i' in ri Pablo? iMan je' taj! ¹⁴ Xa maltiox che ri Dios chi man k'o tä jun chiwe nu b'anom u qasna', xane xaq xuwi ri Crispo, xuquje' ri Gayo. ¹⁵ Xaq je ri', man kuya' taj kub'ij jun chi xb'an u qasna' pa nu b'i' in. ¹⁶ Je', ya kána'taj chwe chi xinb'an ki qasna' ri e k'o pa rachoch ri Estéfanos, man kánataj tä k'u chwe we k'o chi na jun ri xinb'an u qasna'. ¹⁷ Man in taqom tä k'u rumal ri Cristo chub'anik ki qasna' ri winaq, xane chutzijoxik ri Utz'alaj Tzij re ri Evangelio chrij ri Jesucristo. Man xinkoj tä k'u je'lalaj taq tzij re nimaq taq etamb'al xa che ki ch'akik ri winaq. Je ri' rech man kinb'an tä che ru kámikal ri Cristo chi mat k'o u patän.

Ruk' ri Cristo káriqtaj ri nimalaj u chuq'ab' ri Dios, xuquje' ru no'j

¹⁸ Ru Loq' Pixab' ri Dios ri káztijox chrij ru kámikal ri Cristo, are je' ta ne tzij wa' ri man k'o tä ki patän chke ri winaq ri kásach na ki wäch. Chqe uj k'ut ri qa riqom chi ru tob'anik ri Dios, wa' we Tzij ri' k'o ri nimalaj u chuq'ab' ri Dios ruk' che qa to'ik. ¹⁹ Kub'ij k'u ru Loq' Pixab' ri Dios ri Tz'ib'alik: Kinsach na u wäch ri ki no'j

ri ajno'jab',
kinwesaj k'u na apan ri ketamb'al
ri winaq ri sib'alaj k'o ketam,
—kácha ri'.

²⁰ ¿A nim lo u b'anik ri k'o u no'j kámik? E ri winaq ri xa e okinaq che retamaxik ronojel u wäch chomanik, ¿a k'o ne lo ki patän ri'? iMan k'o taj! E k'o xuquje' ri ketam u chomaxik k'ia u wäch etamb'al chrij ri k'o cho ruwächulew. iMan gas tä k'o u patän wa'! ¿A mat iwetam chi ri Dios u b'anom chi man k'o tä u patän ri etamb'al ri xa ajuwächulew? iJe', je ri'! ²¹ Are k'u ri Dios ri k'o u no'j retam jas ri tajin kub'ano. Xub'ano chi ri winaq ajuwächulew man kekowin taj gas káketamaj u wäch ri Are' xaq ruk' ri ketamb'al. Xu-chomaj k'u ri Dios chi keto' na jachin taq ri kekojon che ri Are' rumal ri Loq'alaj u Tzij ri káztijox chke, pune k'u we tzij ri' je' ta ne u tzij jun winaq ri man k'o tä retam chke ri jule' winaq chik.

²² Ri winaq aj Israel are kákaj kákil kamab'al taq etal ri káb'an chkiwäch. Are k'u ri winaq aj Grecia xa kákitzujuk nimalaj

etamb'al. ²³ Ri uj k'ut are kâqatzijoj ri Cristo ri xripik, xkâmisax cho ri cruz. Ri winaq aj Israel xa tzel kâkita wa' we tzij ri'. Ri nik'iaj winaq chik ri man e aj Israel taj kâkib'ij chi we tzij ri' are ru tzij jun ri man k'o ta retam. ²⁴ Chkiwâch k'u konojel ri e sik'ital rumal ri Dios, we aj Israel o man e aj Israel taj, rumal ri Cristo kâq'alajin na ru chuq'ab' ri Dios, xuquje' ru no'j ri Dios. ²⁵ K'o k'u ri kub'an ri Dios ri kâkichomaj ri winaq chi xa man k'o ta u patân. Pune je ri', ri kub'an ri Dios nim na u no'j wa' chuwwâch ri ki no'j winaq. Xuquje' k'o ri kub'an ri Dios ri kâkichomaj ri winaq chi are wa' kâk'utuwik chi xa man k'o ta ri nimalaj u chuq'ab' ri Are'. Pune je' ri ki chomanik ri winaq, ri kub'an ri Dios are nim na u chuq'ab' wa' chuwwâch ri ki chuq'ab' winaq. ²⁶ Qachalal, rajwaxik b'a' kich'ob'o chi ri Dios xixusik'ij ix, pune man e k'ia ta chiwe ri k'o iwetamb'al jas ri ketamb'al ri nik'iaj winaq ajuwâchulew, man ix k'ia taj ri k'o taqanik pa i q'ab', man ix k'ia ta k'ut ri nimaq i b'anik. ²⁷ Xane ri man k'o ta ketamb'al chkiwâch ri winaq, e are k'u wa' ri xeucha' ri Dios che resaxik ki k'ixb'al ri k'o ki no'j. Ri winaq ri keilitajik chi xaq toq'ob' ki wâch, e are wa' ri xeucha' ri Dios che resaxik ki k'ixb'al ri k'o taqanik pa ki q'ab'. ²⁸ Xuquje' ri man k'o ta ki patân chkiwâch ri winaq, ri etzelam ki wâch, ri man k'o ta ki b'anik, e are wa' xeucha' ri Dios chusachik ki wâch ri nimaq ki b'anik cho ruwâchulew. ²⁹ Je ri' rech man k'o ta jun kunimarisaj rib' chuwwâch ri Dios. ³⁰ Tzare k'u ri Dios u b'anom chiwe chi xa ix jun chik ruk' ri Cristo Jesús. U b'anom chi rumal ri Cristo k'o chi ri qa no'j, xuquje' chi rumal ri Are' kâjikomataj ri qanima' chuwwâch ri Dios, uj jachom pu q'ab', qa riqom k'u ru tob'anik. ³¹ Je b'a' ri', rech qas je' kelik jas ri kub'ij ru Loq' Pixab' ri Dios ri Tz'ib'talik: "We k'o jas ri kraj jun kuya u q'ij, are chuya u q'ij ri Qajaw Jesús," —kâcha'.

2

Ri kâqatzijoj are chrij ri Cristo ri xrip cho ri cruz, xkâmisax chila'

¹ Qachalal, aretaq xinopan iwuk' chuq'alajisaxik ru Loq' Pixab' ri Dios, man xinkoj ta tzij ri nimaq ki b'anik, man xinkoj ta k'u tzij re nimaq taq no'j. ² Aretaq xink'o'ji iwuk', man k'o ta chi jas ri xinchomaj u tzijoxik chiwe, xane xaq xuwi xinchomaj ri Jesucristo ri xkâmisax cho ri cruz. ³ Aretaq xink'o'ji iwuk' man k'o ta nu chuq'ab', xane sib'alaj xinxej wib', ximb'irb'itik. ⁴ Aretaq xixintzijob'ej, xintzijoj ru Loq' Pixab' ri Dios chiwe, man xinkoj ta tzij ri xaq re ki no'j winaq che i ch'akik, xane xixinch'ak ruk' ru chuq'ab' ri Loq'alaj Espiritu. Are wa' ri xk'utuwwik chi ri tzij ri ximb'ij are rech ri

Dios. ⁵ Je ri' ximb'ano rech man kâku'b'i ta i k'ux chrij ri ketamb'al ri winaq, xane chrij ru chuq'ab' ri Dios.

Waral kâqil wi chi rumal ri Loq'alaj Espiritu k'o ri qetamb'al ri kâpe ruk' ri Dios

⁶ Pune je ri', kâqaya tijonik ruk' nojib'al chke ri kojonelab' ri k'o na más ketam. Are k'u we nojib'al ri' man ajuwâchulew taj, man are ta k'u ki nojib'al winaq ri k'o ki taqanik puwi' ruwâchulew, ri xa tajin kâsach ki wâch. ⁷ Are kâqatzijoj ri nojib'al ri kâpe ruk' ri Dios, ri k'u'tal chkiwâch ri winaq. Are wa' ru chomam loq' ri Dios tzaretaq mâja' kub'an ruwâchulew, rech ri uj kâqariq ru tob'anik ri man k'o ta u k'isik. Man etamtal ta k'u wa' nab'e pa ri ojer taq q'ij. ⁸ We etamanik ri' man k'o ta jun chke ri k'o ki taqanik cho ruwâchulew ri xkich'ob'o. We ta xkich'ob'o, mat xkirip ri' cho ri cruz ri Qajaw Jesús ri sib'alaj nim u q'ij. ⁹ Are je' ri kub'ij pa ru Loq' Pixab' ri Dios ri Tz'ib'talik:

Ri Dios k'o ri u b'anom u b'anik

ri k'olotal rech kâyi'

chke ri loq' kâkil wi ri Are'.

Man k'o ta jun ilowinawq wa',

man k'o ta jun ri towinawq u tzijol,

man k'o ta k'u jun u chomam ri',

—kâcha ri'. ¹⁰ Ri Dios k'ut xuk'ut wa' chqawâch uj rumal ri Loq'alaj Espiritu. Je ri', rumal chi ri Loq'alaj Espiritu kâkowinik kâretamaj ronojel, xuquje' ne ri k'o pa ranima' ri Dios.

¹¹ ¿A k'o pu lo jun chkixol ri winaq ri kuch'ob'o jas ri k'o pa ranima' jun winaq chik? ¡Man k'o taj! Xane xuwi ri espíritu rech ri are' retam ronojel wa'. Je k'u ri', xaq xuwi ri Espiritu rech ri Dios retam ri k'o pa ranima' ri Dios. ¹² Ri uj k'ut man are ta qa k'amom ri espíritu kech ri winaq ajuwâchulew, xane are qa k'amom ri Espiritu ri kâpe ruk' ri Dios, rech kâqetamaj ronojel ru yo'm ri Dios chqe rumal ri nimalaj u toq'ob'.

¹³ Ru yo'm ri Dios chqe man kâqatzijoj ta wa' ruk' ri no'j ajuwâchulew ri xa qa tijom qib' che ruk' ri ki tzij winaq, xane ruk' ri tzij ri k'utut chqawâch rumal ri Loq'alaj Espiritu. Je k'u ri' kâqatzijoj ri qas tzij rech ri Dios chke ri k'o ri Loq'alaj Espiritu pa kanima'.

¹⁴ Ri winaq ri man k'o ta ri Loq'alaj Espiritu pa ranima' man kuk'amowaj ta ru Loq' Pixab' ri Dios. Che ri are' xa man k'o ta u b'eyal wa' rumal chi man kâkowin taj kuch'ob'o. Rajwaxik k'ut chi k'o ri Loq'alaj Espiritu pa ranima' chuch'ob'ik wa'. ¹⁵ Are k'u ri winaq ri k'o ri Loq'alaj Espiritu pa ranima' kâkowin chuch'ob'ik ronojel, jachike ri utz, jachike ri man utz taj. Ri are' k'ut man k'o ta jun kâkowin chuch'ob'ik jas ri qas k'o pa ranima' ri are'. ¹⁶ Kub'ij k'u ru Loq' Pixab' ri Dios ri Tz'ib'talik: "¿Jachin lo etamaninawq ru chomanik ri Qajaw Dios? ¿Jachin ta k'u lo

ri kākowinik kuya u noj ri Are?" —kācha'. Pune ta ne je ri', ri uj k'o ru chomab'al ri Cristo quk'.

3

Ri uj qonojel qachi'l qib' kākapatānij ri Dios

¹ Qachalal, ri in, aretaq xink'oji iwuk', man xinkowin taj xixintzjob'ej je' jas ri winaq ri k'o ri Loq'alaj Espiritu pa kanima', xane xixintzjob'ej je' ta ne ix winaq ri māja' kixkojonik, je' ta ne chi ix ak'alab' ri māja' qas kich'ob' ri kojonik che ri Cristo. ² Man xinya tā tijonik chiwe ri man kich'ob' taj, xane xixintzjob' je' ta ne chi k'a ix ak'alab' ri kāyi' ri tu' chiwe chuk'exwāch ri qas wa, rumal chi je' ta ne ix ak'alab' ri man xixkowin tā chutijik ri qas wa. Māja' k'u ne kixkowin che kāmik. ³ Je ri', rumal chi ri ix are kib'ano xaq jas ri kiwaj je' ta ne ix winaq ri māja' kixkojonik. We ri ix k'ax kina' aretaq kuriq utzil jun winaq, aretaq xaq ch'oj kiwaj, kitasala taq iwib', ri ix je' ta ne ix winaq ri māja' kixkojonik. Je' kib'ano jas ri kāk'a'n konojel ri winaq ri man kekojon taj. ⁴ Aretaq jun kub'ij: "Ri in, in k'o ruk' ri Pablo," —kācha'. Ri jun chik kub'ij: "Ri in, in k'o ruk' ri Apolos," —kācha' ri'. Are je' ta ne ix winaq ri māja' kekojonik.

⁵ ¿Jas pu lo u b'anik ri Pablo? ¿Jas u b'anik ri Apolos? Ri uj xaq uj patānil taq re ri Dios, rumal k'u ri qa tzij ri ix xixkojonik. Chqajujunal ri uj xqa'no jas ri xuya ri Dios pa qa q'ab'. ⁶ Ri in xintik ri ija' pa ri iwanima', ri Apolos xuja', are k'u ri Dios xk'iyisanik. ⁷ Ri xtikowik rachi'l ri xja'nik man are tā nim ki b'anik chuwāch ri Dios ri xk'iyisanik. ⁸ Ri kätikow ri ija' xuquje' ri kaja'nik xaq e junam chuwāch ri Dios. Chkijujunal k'ut kāyi' na chke rumal ri Dios ri tojb'al re ri ka'nom ruk' ri xjach pa ki q'ab'. ⁹ Je ri', rumal chi ri uj, uj qachi'l qib' chupam ri chak chupatānixik ri Dios. Are k'u ri ix, ix je' ta ne ulew ri kätik u wāch rumal ri Dios.

Xuquje' ri ix, ix junam ruk' jun ja ri tajin kuyak ri Dios. ¹⁰ Ri in, in je' jas jun yakal ja ri qas retam ru chak. Ri Dios xuya pa nu q'ab' ri u kojik ru tak'alib'al ri ja. K'o k'u jun chik ri kulem ri xan puwi'. Chkijujunal k'u ri nik'iaj chik rajwaxik chi qas kākil na jas u lemik kāk'a'no. ¹¹ Man k'o tā chi jun ri kuya' kukoj jun tak'alib'al chik, rumal chi ri ya kojom rumal ri Dios, tzare ri Jesucristo. ¹² E k'o k'u winaq ri utz kāk'a'n na chulemik puwi' we tak'alib'al ri', je' ta ne chi kākikoj q'an puag, saq puag, xuquje' je'lalaj taq ab'aj. E k'o chi nik'iaj chik ri je' ta ne che', k'im, xuquje' patz'an ri kākikoj. ¹³ Kuriqa k'u na jun q'ij aretaq kuq'at tzij ri Cristo, kāk'alajin k'u na jas u wāch ri' ri xkilemo chkijujunal rumal chi ri q'ij ri' kape na ruk'

q'aq'. We q'aq' ri' are kāk'alajisan na jas u wāch ri xka'n chkijujunal. ¹⁴ We ru chak ri winaq ri xuyak puwi' ri tak'alib'al man kāsach tā u wāch rumal ri q'aq', kāyi' na ri tojb'al re. ¹⁵ We k'u ru chak ri winaq kāsach u wāch rumal ri q'aq', kutzaq na ri' ronojel ri xub'ano. Ri are' k'ut kuto' na rib' jas jun winaq ri xa jub'iq' man xk'atik, xkowin k'ut xresaj rib' pa ri q'aq'.

¹⁶ ¿A man iwetam chi ri ix, ix rachoch ri Dios, xuquje' chi ri Espiritu rech ri Dios k'o pa ri iwanima'? ¹⁷ We k'o jun kusach u wāch ri rachoch ri Dios, xuquje' ri Dios kusach na u wāch ri winaq ri'. Je ri', rumal chi ri rachoch ri Dios tastal wa' chrij ronojel u wāch etzelal, ix k'u ri' we rachoch ri Dios ri'.

¹⁸ K'o b'a' jun musub' rib'. We k'o jachin jun ri kuchomaj chi retam ronojel ri etamanik ri ketam ri winaq ajuwāchulew, chub'ana che rib' chi man k'o tā retam, rech je ri' qas kāk'oji na retamb'al. ¹⁹ Ri etamb'al ri xaq ajuwāchulew, man k'o tā u patān wa' cho ri Dios, kub'ij k'u ru Loq' Pixab' ri Dios ri Tz'ib'talik: "Ri Dios keuchap na ri k'o ketamb'al, keuqasaj na chupam ri k'ax pune k'o ri ki noj," —kācha'. ²⁰ Xuquje' kub'ij: "Ri Dios retam chi man k'o tā u patān ri ki chomanik ri k'o ketamb'al," —kācha' ri'. ²¹ Rumal ri' k'o b'a' jun munimarisaq rib' xa rumal rech jun winaq. Ronojel k'u ri k'olik are iwech ix: ²² Ri Pablo, ri Apolos, ri Pedro, ruwāchulew, ri k'aslemal, ri kāmikal, ri q'ij kāmik, ri q'ij ri kepe na, ronojel wa' are iwech ix. ²³ Ri ix k'ut, ix rech ri Cristo. Ri Cristo k'ut Are rech ri Dios.

4

Ri apóstol Pablo kutzijoq ri chak ri kāk'a'n ri apóstoles

¹ Chich'ob'o b'a' chi ri uj, xaq uj patānil taq re ri Cristo. Yo'm k'u chqe ru q'alajisaxik ru chomam loq ri Dios ri man etamtal tā kan nab'e. ² Rajwaxik k'ut chi jachin ri yo'm jun egle'n pu q'ab', chuk'utu chi jikom ranima'. ³ Are k'u ri in man qas tā kinok il we utz ri kib'ij chwij o man utz taj. Pune kink'am b'i pa q'atb'al tzij, kāk'at tzij pa nu wi', man kinok tā il chb'il wib'. ⁴ Pune k'u kinna' pa ri wanima' chi man k'o tā etzelal nu b'anom, man ruk' tā ri' kinb'ij chi man k'o tā nu mak. Ri Qajaw Jesús k'ut are kāk'atow na tzij pa nu wi'. ⁵ Miq'at b'a' tzij ix puwi' jachin jun k'a māja' k'u kuriq ri q'ij. Chiweyej na chi kape ri Qajaw Jesús, karesaj k'u na chi saq ri k'u'tal pa q'equm. Kuq'alajisaj na ri man etamtal taj ri k'o pa taq ri kanima' ri winaq. Chkijujunal k'ut kāyi' na chke ru nimarisaq ki q'ij rumal ri Dios xa jas ri taqal chke.

⁶ Qachalal, kinb'ij wa' we tzij ri' chiwe rech kiriq utzil. Xinkoj k'u wib' in, xuquje' ri Apolos che jun k'utb'al chiwāch. Kinb'ij

wa' chiwe rech kiwetamaj iwe guk' uj chi man kuya' taj kiya u wi' ri i chomanik chrij ru Loq' Pixab' ri Dios ri Tz'ib'talik, rech man k'o tā jun kunimarisaj rib' che jun chqe uj, kāretzelaj k'u u wäch ri jun chik. ⁷ Jachin pu ri káb'anow utz chawe chkiwäch nik'iaj winaq chik? ¿Jas ri k'o awuk' ri mat yo'm chawe rumal ri Dios? We k'u are ri Dios ru yo'm wa' chawe, ¿jas che kanimarisaj awib' je' ta ne ri xaq a tukiel a riqom wa' ri k'o awuk'?

⁸ Ri ix kichomaj chi ronojel chik k'o iwuk', je' ta ne chi ya ix q'inomab' chik. Kina' iwib' chi ix nimaq taq taqanelab' chik. Are k'u ri uj xaq uj yo'm kan jela' iwumal. Kwaj ta k'ut chi qas tzij ix nimaq taq taqanelab' rech ri uj xuquje' kujtaqan junam iwuk'. ⁹ Ri in kinchomaj chi ri uj, ri uj apóstoles, ri Dios uj u yo'm kan k'isb'al chke konojel ri winaq. Je' ta ne uj winaq ri q'atom tzij pa qa wi' chi kujukāmisaxik. Uj yo'm chi saq che ka'yib'al rech konojel ri winaq ri e k'o cho ruwächulew, xuquje' ri ángeles kujkilo. ¹⁰ Ri uj, chkiwäch ri winaq, man k'o tā qa patān xa rumal ru patānixik ri Cristo. Are k'u ri ix kina' chi k'o na i no'j chqawäch uj, k'o k'u ri qas iwetam chrij ri Cristo. Ri uj man k'o tā qa chuq'ab', are k'u ri ix kib'ano chi k'o na i chuq'ab' chqawäch uj. Ri uj ketzelax qa wäch kumal ri winaq, are k'u ri ix nim kixil wi. ¹¹ Kāmik ri' xaq are tajin kāqariq numik, kāchaq'ij qa chi', sib'alaj rajwaxik qatz'iaq. Kujyoq' k'u kumal ri winaq, xaq kujb'iniatik je' ta ne man k'o tā qachoch. ¹² Sib'alaj kāqakos qib' che ri chak ri rajwaxik kāqa'no. Kujkiyoq' ri winaq, are k'u ri uj man kāqatzelej tā u k'exel ri ki tzij ruk' yoq'onik, xane ruk' taq tzij re utzil. Aretaqa kāka'n k'āx chqe xaq kāqakuyu. ¹³ K'āx kech'aw ri winaq chqij. Are k'u ri uj ruk' utzalaj taq tzij kāqaqasaj u wäch ri koyowal. Kāmik xaq are ka'nom chqe chi ri uj je' ta ne uj mes, je' ta ne chi ri uj, uj winaq ri sib'alaj k'āx kujb'antajik, man k'o tā qa patān.

¹⁴ Man kintz'ib'aj tā wa' we tzij ri' chiwe che resaxik i k'ixb'al, xane che i pixb'exik, je' ta ne chi ri ix, ix loq'alaj taq walk'ual. ¹⁵ Pune e k'o lajuj mil winaq ri kixkitijoj chrij ri Cristo, xa jun ri i tat k'olik. In k'ut je' ta ne ri i tat, rumal chi xixkojon che ri Qajaw Jesús aretaq xintzijoq' ri Utzalaj Tzije ri Evangelio chiwe. ¹⁶ Rumal ri' kixinb'ochi'j chi kib'an iwe jas ri kinb'an in.

¹⁷ Rumal wa' tajin kintaq b'i ri Timoteo iwuk'. Ri are', rumal ri Qajaw Jesús, je' ta ne loq'alaj nu k'ojol wa' ri jikom ranima'. Kuna'taj k'u na chiwe jas ri nu b'anom pa ri nu k'aslemal, in kojoninaq che ri Cristo. Kuk'ut na chiwäch jas ri kink'utu jawije' taq kine' wi chkixol ri qachalal kojonelab'.

¹⁸ E k'o k'u jujun chiwe ri ki nimarisam kib', kākichomaj k'ut chi man k'o tā jumal kinopan iwuk'. ¹⁹ Kinweyey chi kinopan na iwuk' chanim, we je' ri' kraj ri Qajaw Jesús. Kinwil k'u na jas ri qas kekowin chub'anik we b'anal taq nimal ri', man xuwi tā k'u kinta ri kākib'ij. ²⁰ Je' ri', rumal chi ru taqanik ri Dios man xaq tā ruk' tzij kāq'alajinik, xane ruk' ru chuq'ab' ri Dios. ²¹ ¿Jas k'u kiwaj? ¿A kiwaj chi yajanik kinb'ana' aretaq kinopanik? ¿O a kiwaj chi aretaq kinopanik loq' kixinwil wi, ruk' utzil k'ut kixinch'ab'ej?

5

Waral kāqil wi jas káb'an chuq'atik tzij puwi' jun kojonel ri kāqaj pa mak

¹ Elinaq u tzijol chi k'o jun chiwe ri u b'anom rixoxil che ru nanab'al. Wa' we xb'anik ri', are je' jas ri kākā'n ri tz'i' ri xaq kākiriq kib', man k'o tā ki pixab'. ¿Sib'alaj āwas u b'anik wa'? Man kākā'n tā ne ri' chkixol ri nik'iaj winaq chik ri man qas ketam tā u wäch ri Jesús. ² ¿Jas lo wa' chi ri ix kinimarisaj iwib'? ¿A mat rajwaxik chi xa kixb'isonik? ¿je', je' ri'? Rajwaxik b'a' chi kiwesaj b'i chixol ri achi ri xb'anow we mak ri'. ³ Pune man in k'o tā iwuk' chwinaqil, k'o k'u ri wanima' iwuk'. Nu q'atom chi tzij puwi' ri xb'anow ri mak je' ta ne ri in k'o iwuk' chwinaqil. ⁴ Aretaqa kimulij iwib' pa ru b'i' ri Qajaw Jesús, pune ta ne man in k'o tā iwuk' chwinaqil, kāk'oji k'u na ri wanima' iwuk', xuquje' kāk'oji ru chuq'ab' ri Qajaw Jesucristo. ⁵ Ri achi ri' rajwaxik kājach pu q'ab' ri Satanás rech kāsach u wäch ru cuerpo. Je' ri' rech ri ranima' kuriq ru tob'anik ri Dios pa ri q'ij ri kāpe ri Qajaw Jesús.

⁶ Man utz taj chi kinimarisaj iwib' che ri tajin kib'ano. ¿A mat iwetam ri tzij ri káb'ixik: "Ri jub'iq' ch'ām kub'an ch'ām che ronojel ri q'or?" —kācha'. ⁷ Chiwesaj b'a' apan ri ojer ch'ām ri kāretzelaj i wäch, rech ix je' jas ri kaxlan wa ri man kāyi' tā ch'ām ruk', ri b'anom ruk' k'ak' q'or, ri kättijow pa ri nimaq'ij Pascua* u b'i'. Qas tzij k'ut je' i b'anik wa'. Je' ri', rumal chi ri Cristo are xkāmisaq che sipanik cho ri Dios rumal qech, je' jas ri alaj chij ri kākāmisaq pa ri nimaq'ij re ri Pascua. ⁸ Qa'na b'a' ri nimaq'ij re ri Pascua ruk' ri qas tzij, xuquje' ruk' jun qanima' ch'ajch'oj, jas ri kaxlan wa ri man kāyi' tā ch'ām ruk'. Māqa'n ri qa nimaq'ij ruk' ru b'anik ronojel u wäch mak, ruk' ru b'anik etzelal. Junam k'u wa' ruk' ri ojer ch'ām.

⁹ Pa ri jun wuj chik ri xintz'ib'aj b'i chiwe xinb'ij chi mixe' chi kuk' ri nik'iaj winaq ri je' kākā'no jas ri kākā'n ri tz'i' ri xaq kākiriq kib', man k'o tā ki pixab'. ¹⁰ Man kinb'ij

* 5:7 "Pascua": Chawila' ri San Mateo 26:2, nota.

taj chi mat kixch'aw chi chke ri winaq ri je' kâka'n wa' ri e k'o cho ruwächulew, ri kâkitzujuk xaq xuwi ri kech ri e are', ri elaq'omab', o ri kekiq'ijilaj taq tiox. We ta je ri', rajwaxik ri' chi kixel b'i cho ruwächulew. ¹¹ Xane xintz'ib'aj b'i wa' chiwe rech man kiwachi'laj tä chi ri winaq ri kâkib'ij chi e are' qachalal, kâka'n k'u ke jas ri kâka'n ri tz'i' ri xaq kâkiriq kib', man k'o tä ki pixab', o kâkirayij k'ia u wäch jastaq, o kekiq'ijilaj taq tiox, o kâkiyak tzijtal, o keq'ab'arik, o kâka'n ri elaq'. Jun ri je' u b'anik wa' man kuya' taj kiwachi'laj, man kixwi' tä k'u ruk' jun ri kub'ij chi are qachalal, kub'an k'u we mak ri'. ¹² Ri in man kuya' taj kinq'at tzij pa ki wi' ri winaq ajuwächulew. Are ri Dios ri kâq'atow na tzij pa ki wi'. ¹³ Are k'u ri ix, rajwaxik kiq'at tzij pa ki wi' ri qachalal kojonelab'. Rumal ri' rajwaxik kiwesaj b'i ri jun b'anal etzelal ri' ri k'o iwuk'.

6

Waral kâqil wi chi man ya'tal tä chqe chi kuje' chkiwäch ri q'atal taq tzij ri man e kojonelab' taj aretaq k'o qa ch'oj ruk' jun qachalal

¹ Ri ix, aretaq jun chiwe k'o u ch'oj ruk' jun qachalal chik, ¿jas che kik'am b'i wa' chkiwäch ri q'atal taq tzij ri man e kojonelab' taj? ¿jas che man kik'am tä b'i wa' chkiwäch ri winaq ri e rech ri Dios? ² ¿A mat iwetam chi ri winaq ri e rech ri Dios kâkiq'at na tzij pa ki wi' ri winaq ajuwächulew? We k'u ri ix kiq'at na tzij pa ki wi' ri winaq ri', ¿a mat taqal chiwe kiq'at tzij pa taq ri ch'oj ri' ri man nim tä ki b'anik? ³ ¿A mat iwetam chi kâq'at na tzij uj pa ki wi' ri ángeles? We je ri', ¿a mat k'u lo kujkowinik kâq'at tzij puwi' ri kâk'ulmataj pa ri qa k'aslemal waral cho ruwächulew? ¡je', qas tzij! ⁴ We k'o i ch'oj xa chrij ri kâk'ulmataj waral pa ri i k'aslemal, ¿jas che kixe' chkiwäch ri q'atal taq tzij ri man e jun tä kuk' ri qachalal kojonelab'? ⁵ Kinb'ij wa' chiwe rech kixk'ixik. ¿A xa man k'o tä jun chiwe ri k'o u no'j chuq'atik tzij pa jun ch'oj chxixol ri qachalal? ⁶ We ri qachalal k'o u ch'oj ruk' jun qachalal chik, ¿a rajwaxik lo ri' keb'e' chkiwäch ri q'atal taq tzij ri man e kojonelab' taj?

⁷ Qas tzij kinb'ij chiwe chi are jun nimalaj tzaqik wa' chi k'o u ch'oj ri jun ruk' ri jun chik. ¿A mat are utz na we xaq kikuyu ri k'äx ri kâb'an chiwe? ¿A mat are utz na we xaq kikuyu ri k'äx ri jastaq iwe? ⁸ Ri ix k'ut man je' tä wa' kib'ano. Man kib'an tä ri jikomal, xane xa kiwelaq'aj ri jastaq kech taq ri qas iwachalal, ri kojonelab'.

⁹ ¿A mat iwetam chi ri winaq ri man jikom tä kanima' man k'o tä ke ri e are' kuk' ri winaq ri kâtaqan ri Dios pa ki wi'? ¡Misub' iwib'! Ri winaq ri je' kâka'no jas ri kâka'n ri tz'i' ri xaq kâkiriq kib', man k'o tä ki pixab',

ri winaq ri kekiq'ijilaj taq tiox, ri winaq ri kâka'n ri nimalaj mak ri äwas u b'anik ruk' ri rixoxil o rachajil jun winaq chik, ri achijab' ri kâka'n ixox che jun kach achi, ¹⁰ xuquje' ri elaq'omab', ri winaq ri kâkirayij k'ia u wäch jastaq, ri keq'ab'arik, ri keyoq'onik, ri kâka'n taq k'äx chub'anik elaq', man k'o tä ke ri e are' kuk' ri winaq ri kâtaqan ri Dios pa ki wi'. ¹¹ Jujun chiwe je' i b'anik wa' nab'e, kâmik k'ut ch'ajch'oj chi ri iwanima', i jachom chi iwib' pu q'ab' ri Dios, b'anom chi jikom che ri iwanima' cho ri Dios rumal ri Qajaw Jesús, xuquje' rumal ri Espíritu rech ri qa Dios.

Waral kâqil wi chi ri ajchaq'el ri qa cuerpo are ri Dios

¹² Kraj ne kub'ij jun: "Jachike ri kwaj kinb'ano, kuya' kinb'an wa'," —kâcha ne lo. Pune qas tzij, man ronojel tä k'ut kuriq utzil jun rumal. Jun winaq kuya' kub'ano jachike ri kraj, man ya'tal tä k'ut chi jun winaq kok che patänil re ri kub'ano. ¹³ Qas tzij ri kâb'ixik chi ri wa are wa' che ri qa pam, ri qa pam k'ut are che ri wa. Käsach k'u na ki wäch wa' we kieb' ri' rumal ri Dios. Are k'u ri qa cuerpo man are tä u patän ri u b'anik jas ri kâka'n ri tz'i' ri xaq kâkiriq kib', man k'o tä ki pixab', xane ri u patän ri qa cuerpo are u patänixik ri Qajaw Jesús. Ri Qajaw Jesús k'ut rajwaxik ri Are' chuto'ik ri qa cuerpo. ¹⁴ Jas ri xub'an ri Dios xuk'astajisaj ri Qajaw Jesús chxixol ri kâminaqib', je' kub'an na chqe uj, kujuk'astajisaj na uj ruk' ru chuq'ab'.

¹⁵ ¿A mat iwetam chi ri i cuerpo ketob'an chub'anik tz'aqat che ri cuerpo ri Cristo? ¿A kik'am lo ch'äqap che ru cuerpo ri Cristo chukojik wa' che u tz'aqatil ru cuerpo jun ixox ri keuch'ab'ej achijab'? ¡Man kuya' tä ri'! ¹⁶ ¿A xa man kich'ob' taj chi jachin ri kuriq rib' ruk' jun ixox ri keuch'ab'ej taq achijab', are jun chi ri' ruk' ri ixox? Kub'ij k'u ru Loq' Pixab' ri Dios ri Tz'ib'talik: "Ri kieb' xa e jun chik," —kâcha'. ¹⁷ Jachin k'u ri kub'an xa jun ruk' ri Qajaw Jesús, xa jun chi ri espíritu ri' ruk'.

¹⁸ Chitasa b'a' iwib' chrij ri mak ri je' u b'anik jas ri kâka'n ri tz'i' ri xaq kâkiriq kib', man k'o tä ki pixab'. Apachike jun mak chik ri kub'an ri winaq man kub'an tä k'äx ri' che ru cuerpo. Are k'u ri winaq ri kub'an ri mak je' jas ri kâka'n ri tz'i' ri xaq kâkiriq kib', man k'o tä ki pixab', kub'an ri äwas ri' chrij ru cuerpo. ¹⁹ ¿A mat kich'ob'o chi ri i cuerpo are rachoch ri Loq'alaj Espíritu ri k'o pa ri iwanima', ri yo'm chiwe rumal ri Dios, chi ri ix man iwech tä iwib'? ²⁰ Paqal k'u ru loq'ob'em iwe rumal ri Dios. Rumal ri' rajwaxik chi kiya u q'ij ri Dios ruk' ri i cuerpo xuquje' ruk' ri espíritu iwech rumal chi e rech ri Dios wa'.

7

Ri apóstol Pablo keupixb'aj ri kojonelab' chrij ri k'ulanem

¹ Are k'u che we chanim, kinb'ij b'i chiwe ri xita' loq chwe chupam ri wuj ri xitz'ib'aj loq. Qas tzij are utz we ri achi man kāk'uli taj. ² Rech k'ut man kixtzaq tā pa ri mak ri je' u b'anik jas ri kāk'a'n ri tz'i' ri xaq kākiriq kib', man k'o tā ki pixab', rajwaxik chi chkijujunal ri achijab' k'o ri kixoqil, xuquje' chkijujunal ri ixoqib' k'o ri kachajil. ³ Rajwaxik k'ut chi ri achi kub'an ruk' ri rixoxil jas ri rajwaxik u b'anik, xuquje' ri ixoq kub'an ruk' ri rachajil jas ri rajwaxik u b'anik. ⁴ Man ya'tal tā che ri ixoq ru b'anik xa jas ri kraj ri are' ruk' ru cuerpo, xane rajwaxik kuchomaj ri' ri ya'tal che ri rachajil. Xuquje' ri achi man ya'tal tā che ri are' ru b'anik xa jas ri kraj ruk' ru cuerpo, xane rajwaxik kuchomaj ri' ri ya'tal che ri rixoxil. ⁵ Miq'atej b'a' i rayib'al chb'il iwib'. Xuwi we junam kichomaj chi man kiriq tā na iwib' kieb' oxib' q'ij rumal ru jachik iwib' chub'anik orar. Te k'u ri' are utz we kiriq chi iwib', mub'an ne ri Satanás chiwe chi kixqaj pa mak rumal chi man kich'ij tā chik ri mat kib'ano xa jas ri kiwaj ix.

⁶ Kinb'ij we tzij ri' chiwe xa rumal chi ya'talik kinb'ij wa'. Man are tā k'u jun taqanik ri kinya chiwe. ⁷ Kwaj ta ne in chi konojel je' kāk'a'no jas ri in. Chkijujunal k'ut k'o wi ri sipam chke rumal ru toq'ob' ri Dios. Ri jun, jun wi ri sipam che, ri jun chik jun chi wi ri sipam che ri are'.

⁸ Kinb'ij chke ri achijab' ri man e k'ulan taj, xuquje' chke ri malka'nib' ixoqib' chi utz we ta mat kixk'uli'k je' jas ri in. ⁹ We k'u man kich'ij tā chik ri mat kib'ano xa jas ri kiwaj ix, are utz na kixk'uli'k chuwäch ri xa kik'is iwib' rumal ri i rayib'al.

¹⁰ Are k'u ri e k'ulan chik, kinya we taqanik ri' chke, man xaq tā k'u in ri kinb'inik, xane are ri Qajaw Jesús. Are chi ri ixoq mujach kan ri rachajil. ¹¹ We k'u ri ixoq kujach kan ri rachajil, māk'uli chik. We ta mat je ri', are utz na we xa kutzir ruk' ri rachajil. Je ri' xuquje' ri achi mujach kan ri rixoxil.

¹² Kwaj k'ut kinb'ij jun nu chomanik in chke ri nik'iaj chik, man are tā k'u u taqanik ri Qajaw Jesús. We k'o jun qachalal ri k'o rixoxil ri man kojonel taj, kraj k'u ri ixoq kāk'oji ruk', ri achi ri' man utz tā ri' we kujach kan ri rixoxil. ¹³ We k'o jun ixoq kojonel ri k'o rachajil ri man kojonel taj, kraj k'u ri achi kāk'oji ruk', ri ixoq ri' man utz tā ri' we kujach kan ri rachajil. ¹⁴ Je ri', rumal chi ri achi ri man kojonel taj jachom chi ri' pu q'ab' ri Dios rumal chi k'ulan ruk' ri rixoxil kojonel, xuquje' ri ixoq ri man kojonel

taj jachom chi ri' pu q'ab' ri Dios rumal chi k'ulan ruk' ri rachajil kojonel. We ta mat je ri' ri iwalk'ual e je' ta ri' jas ri kalk'ual ri man e kojonelab' taj. Rumal k'u ri' ri iwalk'ual e jachom ri' pu q'ab' ri Dios. ¹⁵ We k'u ri achi ri man kojonel taj kraj kujach kan ri rixoxil, o ri ixoq ri man kojonel taj kraj kujach kan ri rachajil, chkijacha b'a' kib'. Ri qachalal achi o ri qachalal ixoq kuya' kub'ano jachike ri kraj. Ri Dios k'ut xujusik'ij rech k'o utzil chqaxol. ¹⁶ Ri at, ixoq, ri at k'ulanik, za mat awetam at chi awumal at ri awachajil kuya' kuriq ru tob'anik ri Dios? Xuquje' ri at, achi, ri at k'ulanik, za mat awetam chi awumal at ri awixoxil kuya' kuriq ru tob'anik ri Dios? jje', je ri'!

¹⁷ Chijujunal k'ut je' chib'ana pa ri i k'aslemal jas ri sipam chiwe rumal ri Dios, xuquje' jas ri i b'anik aretaq xixsik'ix rumal ri Dios. Are wa' ri taqanik ri kinya chke konojel ri qachalal kojonelab'. ¹⁸ We k'o jun chiwe ix ri kāsik'ix rumal ri Dios, ri kojom retal ri ojer trato che, * je' chkanajoq. We k'o jun ri kāsik'ix rumal ri Dios ri man kojom tā retal ri ojer trato che, māk'oj wa' che. ¹⁹ We kojom retal ri ojer trato che ri qa cuerpo o man kojom taj, man are tā ri' ri nim u b'anik, xane are la' chi kujniman chke taq ru taqanik ri Dios. ²⁰ Chijujunal jas ri i b'anik aretaq xixsik'ij ri Dios, je' chixkanajoq. ²¹ We at k'o pu q'ab' jun patrón aretaq xatsik'ixik, matok il rumal. We k'u kāyi' chawe chi kawesaj awib' pu q'ab' ri a patrón, chab'ana wa'. ²² Je ri', rumal chi ri winaq ri k'o pu q'ab' jun patrón aretaq xsik'ix rumal ri Dios rech kāk'ojon che, kāmik are jun winaq ri qas tzoqopital chik, k'o chi pu q'ab' ri Qajaw Jesús. Xuquje' ri winaq ri man k'o tā pu q'ab' jun patrón aretaq xsik'ixik, kāmik chik k'o chi pu q'ab' jun patrón, are k'u ri Cristo. ²³ Paqal xloq'b'ex iwe rumal ri Dios. Miya b'a' iwib' chi kixqaj pa ki q'ab' nik'iaj winaq chik rech ketaqan ri e are' pi wi' chuk'exwäch ri Cristo. ²⁴ Je ri', qachalal, chijujunal b'a' jas ri i b'anik aretaq xixsik'ij ri Dios, je' chixkanaj wa' chuwäch ri Are'.

²⁵ Are k'u ri māja' kek'uli'k, man k'o tā jun taqanik chke ri yo'm chwe rumal ri Qajaw Jesús. Kwaj k'ut kinb'ij ri kinchomaj in, in ri' jun winaq ri kāk'u b'i ki k'ux ri nik'iaj winaq chwij rumal chi ri Qajaw Jesús xel u k'ux chwe. ²⁶ In kinchomaj chi utz na chi ri achi xaq je' chkanaj ri' jas ri u b'anik rumal rech ri k'ax taq q'ij ri tajin kākil kāmik. ²⁷ We k'o awixoxil, matzukuj u jachik kanoq. We ta mat k'o awixoxil, matzukuj chi k'ut. ²⁸ We k'u katk'uli'k, man mak tā wa'. We jun q'apoj ali kāk'uli'k, man mak tā k'u ri' ri kub'ano. Are k'u ri kek'uli'k kākiriq na k'ax

* 7:18 "Circuncisión": Chawila' Hechos 7:8, nota.

pa ri ki k'aslemal cho ruwächulew. Ri in k'ut kwaj kixinto' rech man kiriq tä wa' we k'äx ri'.

²⁹ Qachalal, ri kwaj kinb'ij chiwe are wa': Ri q'ij ri k'o chqawäch xaq q'atatal q'ij chik. Rimal ri' ri achijab' ri e k'ulan chik rajwaxik kaka'no chi je' ta ne man k'o tä kixoxil rech kekowinik kepatänin che ri Dios. ³⁰ Ri keb'isonik, rajwaxik kaka'no chi je' ta ne kekikotik. Ri kekikotik rajwaxik kaka'no chi je' ta ne keb'isonik. Ri keloq'omik rajwaxik kaka'no chi je' ta ne man qas kech taj ri ki loq'om. ³¹ Ri kechakun kuk' ri jastaq rech ruwächulew, rajwaxik chi man xuwi tä käkichomaj wa' we jastaq ri'. Je ri', rumal chi ruwächulew ri kähilo xa tajin käk'is u wäch wa'.

³² Kwaj k'u in chi man k'o tä jas ri kixox wi il. Ri achi ri man k'ulan taj are kok na il ri' che ru patänixik ri Qajaw Dios chub'anik jachike ri utz kähil wi ri Are'. ³³ Are k'u ri achi ri k'ulan chik, are kok na il chke ri jastaq rech ruwächulew chub'anik jachike ri kähil chuwäch ri rixoxil. ³⁴ Xuquje' ri ixox ri k'ulan chik ruk' ri man k'ulan taj, man junam tä ri ki k'aslemal. Ri man k'ulan taj are kok il chupatänixik ri Qajaw Dios, rumal chi u jachom rib' pu q'ab' ri Dios, ru cuerpo xuquje' ri espíritu rech ri are'. Are k'u ri ixox ri k'ulanik are kok il che ri jastaq rech ruwächulew, chub'anik jachike ri kähil chuwäch ri rachajil.

³⁵ Ronojel wa' kinb'ij chiwe rech utz kixelik. Man xa tä kinkoj q'ateb'al iwe, xane rech kib'an ri taqal u b'anik pa ri i k'aslemal, qas kijach k'u iwib' chupatänixik ri Qajaw Dios.

³⁶ We k'o jun kuchomaj chi man utz taj xaq kähilob' ri q'apoj u mia'l, xane chi utz we käh'uli'k, chub'ana' jachike ri taqal u b'anik. Man kähakun tä ri' we käh'uli'k. ³⁷ We k'o jun chik ri man kuna' tä pa ranima' chi rajwaxik käh'uli' ri u mia'l, kuya' kub'ano jachike ri kraj. We kuchomaj chi qas utz chi ri q'apoj u mia'l man kuya' tä k'u che k'ulanem, utz ri' ri kub'ano. ³⁸ Je k'u ri' jachin ri kuya' ri u mia'l che k'ulanem, are utz ri'. Jachin k'u ri man kuya' tä ri u mia'l che k'ulanem, are utz na ri kub'ano.

³⁹ Ri ixox ri k'ulanik k'o ri' pu q'ab' ri rachajil rumal ri pixab' we k'asal na ri are'. We k'u kähäm ri rachajil, k'ä te ri' kuya' käh'uli ruk' jachin ri kraj ri are', xaq xuwi k'ut we kojonel ri' che ri Qajaw Jesús. ⁴⁰ Sib'alaj utz k'u na re ri ixox ri' we man käh'uli tä chik. Are wa' ri kinchomaj in, xuquje' chi are ri Espíritu rech ri Dios käh'o'w wa' pa wanima'.

chkiwäch ri tiox ri xa e b'anom kumal winaq

¹ Che we chanim are kintzijon chi chrij ri wa ri yo'm chkiwäch ri tiox ri xa e b'anom kumal winaq. Are qas tzij k'ut chi qonojel k'o ri qetam chrij wa'. Are k'u ri qetamb'al kub'ano chi xa kähanimarisaj qib', are k'u we kähaj qib' käh'o'ji na u chuq'ab' ri qa kojoni. ² We k'o jun winaq kuchomaj chi k'o ri retam, xa mäja' kähretamaj ri' ri rajwaxik kähretamaj. ³ Jachin k'u ri loq' kähil wi ri Dios, etamtal u wäch ri' rumal ri Dios.

⁴ Are k'u ri u tijik ri wa ri yo'm chkiwäch ri tiox ri xa e b'anom kumal winaq, kinb'ij chiwe chi jun tiox man qas k'o tä u b'anik wa' cho ruwächulew. Qetam k'ut chi xa jun qas Dios k'olik. ⁵ Pune ta ne e k'o jujun ri käh'ix dios chke pa ri kaj xuquje' cho ruwächulew, pune ta k'u e k'ia ri dios ri' e k'olik, xuquje' e k'ia ri k'o taqanik pa ki q'ab'. ⁶ Chqe uj xa jun Dios k'olik, are k'u ri qa Tat. Ri Are', are xb'anow kojoni ri jastaq. Ri uj k'ut, uj k'olik xa chupatänixik ri Are'. Xuquje' xa jun qas Qajaw k'olik, ri Jesucristo. Rimal k'u ri Are' e k'o kojoni ri jastaq, xuquje' ne ri uj.

⁷ Man kojoni tä k'ut ketam wa'. E k'o jujun kojonelab' ri nab'e kanoq e naq'atalik kekij'ijilaj taq tiox. K'ä kähitij k'u ri rikil ri yo'm chkiwäch taq tiox. Ri ri' kub'ano chi kähina' pa kanima' chi k'o äwas ri ka'nom rumal chi mäja' k'o u chuq'ab' ri ki kojoni.

⁸ Qas tzij k'ut chi ri kähitijo man are tä ri' ri käh'anow chqe chi utz kujilitaj rumal ri Dios. We kujwi'k man kub'an tä chqe chi uj utz na. We man kujwi' taj, man kub'an tä ri' chqe chi man uj utz taj. ⁹ Qas chiwila' chi mäqaj ne jun qachalal pa mak ri mäja' k'o u chuq'ab' ru kojoni xa rumal chi kuya' kib'ano jachike ri kiwaj. ¹⁰ We ne ri at ri awetam ronojel wa' ri xinx'ij, katt'uyi chi' ri mesa pa rachoch jun tiox, käh'e k'u jun qachalal ri mäja' k'o u chuq'ab' ru kojoni, katril chila', kuya' kuna' ri are' pa ranima' chi utz la' we kutij re ri wa ri yo'm chkiwäch ri tiox ri xa e b'anom kumal winaq. ¹¹ Je ri' ri at ri awetam ronojel wa' we ri' kab'ano chi käh'aj ri qachalal ri man k'o tä u chuq'ab' ru kojoni ri xuquje' rumal ri are' xähäm ri Cristo. ¹² Je ri', aretaq ri ix kib'ano chi kähiriq k'äx ri qachalal ri man k'o tä u chuq'ab' ri ki kojoni, pune kähina' pa kanima' chi tajin käh'an ri äwas u b'anik, käh'a'n k'u ke ri e are', are chrij ri Cristo tajin kixmakun wi. ¹³ Rimal ri', we ri kintijo kub'ano chi kähaj ri wachalal pa mak, are utz na we man k'o tä jumul kintij ti'j, rech man kinb'an taj chi käh'aj ri wachalal pa mak.

¹ Ri in, ya'tal chwe ri kuya' kub'an apachike kojonel, xuquje' pa nu q'ab' k'o wi ri taqal u b'anik rumal jun apóstol. Ri in wilom u wäch ri Qajaw Jesús. Ix k'ut ix kojonelab' chik rumal ri chak ri xinb'an chupatänixik ri Qajaw Jesús. ² Kraj ne nik'iaj winaq chik man käkikoj taj chi in apóstol, jun chke ru taqo'n ri Cristo. Are k'u ri ix rajwaxik kich'ob'o chi in apóstol, rumal chi ix, ix k'utb'al re ri nu chak. Rumal k'u wech in xixkojon che ri Qajaw Jesús.

³ Are wa' ri kinb'ij chkiwäch ri winaq ri tajin käkij'at tzij pa nu wi'. ⁴ Ri in gas ya'tal chwe chi kintijo jachike ri käyi' chnuwäch. ⁵ Ya'tal k'u chwe in chi kink'am jun qachalal ixoq che wixuqil jas ri kaka'n ri nik'iaj apóstoles chik, xuquje' taq ru chaq' ri Qajaw Jesús, xuquje' ri Pedro. ⁶ A kichomaj ix chi xaq xuwi ri in xuquje' ri Bernabé man ya'tal taj káqaya kan ri qa chak chutzijoxik ri Evangelio? ⁷ A k'o lo jun soldado ri tzare ri are' kätöjowik ri kutijo? A k'o lo jun winaq kutik uva ri mat kutij re ri ki wäch? A k'o lo jun aiyuq' ri mat kutij re ri ki leche ru chij? iMan k'o taj! ⁸ Michomaj k'ut chi xaq ki chomanik winaq ri tajin kinb'ij. Xane are je' kub'ij ru Pixab' ri Moisés. ⁹ Tz'ib'tal k'u pa ri Pixab' ri xutz'ib'aj ri qa mam Moisés, kub'ij: "Makoj chim chutza'm ri wakäx ri tajin kuyaq' ri triko," —kächa'. A xa lo e loq' ri wakäx cho ri Dios chi je' xub'ij wa? iMan are taj! ¹⁰ Xane xa jun k'utb'al wa' chqawäch uj. Rumal k'u qech uj xtz'ib'ax ri Pixab' ri', rumal chi ri winaq ri kutajij ri ulew, xuquje' ri käyaaq'ow ri triko, ya'tal chke chi ku'l ki k'ux chi käyi' ke ri q'atoj. ¹¹ We ri uj xqatik ru Loq' Pixab' ri Dios ri käpe chikaj pa taq ri iwanima', a nim ta k'u lo u b'anik we káqak'am uj chiwe ri kajwataj chqe? ¹² We e k'o nik'iaj chik ri käkik'am ri tzuqub'al ke chike, a ma'tal ya'tal na chqe uj chi je' káqa'no? je', je ri'!

Pune k'u ya'tal wa' chqe, man je' tä qa'nom wa', xane xa qa ch'ijom ronojel. Je ri' rech man káqaq'atej tä u wäch ru tzijoxik ru Loq' Pixab' ri Dios chrij ri Cristo. ¹³ Ri ix iwetam chi ri kepatänin pa ri nimalaj rachoch Dios käkij'at ke ri wa ri k'o chila'. Are la' chi ri kepatänin cho ri b'al'at toq'ob' jawije' ri käyi' wi ri sipanik käkik'am ke ri käyi' che sipanik cho ri Dios. ¹⁴ Je k'u wa' ri taqanik ru yo'm ri Qajaw Jesús, chi ri käkitzijoj ri Utzalaj Tzij re ri Evangelio, che wa' we chak ri' kákesaj wi ri tzuqub'al kib'. ¹⁵ Ri in k'ut pune ya'tal chwe, man k'o tä jas nu to'm chiwe, man nu tz'ib'am tä we wuj ri' chiwe rech kichap u ya'ik chwe ri rajwaxik, xane are utz chwe in kinkämik chuwäch ri kesax chwe ri kikotem ri kinna' pa ri wanima' rumal chi je wa' nu b'anom.

¹⁶ Man ya'tal tä chwe in kinb'an nimal rumal chi kintizijoj ri Utzalaj Tzij re ri Ewange-

lio rumal chi in taqom chutzijoxik wa'. iK'äx k'u we in we man kintizijoj tä ri'! ¹⁷ Rumal ri', we pa wanima' käpe wi chi je' kinb'ano, käyi' na ri' ri tojb'al we. We k'u xa in taqom chub'anik wa', jun egle'n k'u ri' ri yo'm pa nu q'ab' rumal ri Dios. ¹⁸ Ri tojb'al we are la' ri kikitomal ri kinna' pa ri wanima' chi aretaq kintizijoj ri Utzalaj Tzij re ri Evangelio, man k'o tä k'u rajil kinta' che jachin jun. Are la' chi man kintoq'ij tä ri ya'tal chwe rumal ru tzijoxik ri Evangelio.

¹⁹ Je k'u ri', pune man k'o jun patrón ri kätäqan pa nu wi', nu kojom k'u wib' che ki patänixik konojel, rech e k'ia ri keinch'ak na rech kekojon na che ri Cristo. ²⁰ Kinb'an che wib' chi in aj Israel aretaq in k'o chkirol ri winaq aj Israel che ki ch'akik ri e are'. Pune man in k'o pu q'ab' ri Pixab' ri xutz'ib'aj ri qa mam Moisés, kinb'an k'ut chi in k'o pu q'ab' rech keinch'ak ri e k'o pu q'ab' ri Pixab'. ²¹ Xuquje' kinb'ano chi man in k'o tä pu q'ab' ru Pixab' ri qa mam Moisés che ki ch'akik ri winaq ri man e k'o tä pu q'ab' we Pixab' ri'. Pune gas tzij in k'o pu q'ab' ru Pixab' ri Dios, kinniman k'u che ru Pixab' ri Cristo. ²² Aretaq in k'o chkirol ri man k'o tä u chuq'ab' ri ki kojoniq, kinb'an che wib' chi man k'o tä u chuq'ab' ri nu kojoniq in che ki ch'akik ri e are' xuquje'. Je ri' kinb'ano chi in junam kuk' chkiujunal ri winaq, rech kinkowinik kinb'ano chi jujun chke käkiriq ru tob'anik ri Dios. ²³ Ronojel wa' kinb'ano rumal ru tzijoxik ri Utzalaj Tzij re ri Evangelio, rech kinniq we ri utzil ri kuk'am loq' ri Utzalaj Tzij ri'.

²⁴ Ri ix iwetam chi pa jun etz'enem re tikow anim, konojel käkik anim, xa k'u jun ri käch'akanik, kuk'am ri tojb'al. Chitika b'a' anim ix rech kixch'akanik, kiriq ri tojb'al. ²⁵ Ronojel ajdeporte káresaj ronojel ri kuya latz' che, man kub'an tä k'u xa jas ri kraj ri are'. Ri e are' k'ut kaka'n wa' chuch'akik jun tojb'al ri xa jun corona ri b'anom ruk' u xaq che' ri xa kásach u wäch. Are k'u ri uj káqakoj qa chuq'ab' chuch'akik jun tojb'al ri man kásach tä u wäch. ²⁶ Je k'u ri', ri in man in je' taj jas jun ajdeporte ri xaq kieb' u k'ux kutik anim. Man in je' taj jas jun ajdeporte ri man retam taj käch'ojinik, ri man ma'n tä ri u q'ab'. ²⁷ Xane kinya chi káb'an k'äx che ri nu cuerpo, kinch'ij k'ut. Xuquje' kintaqan puwi' ri nu cuerpo rech ri in ri nu k'amom ki b'e k'ia winaq, man k'ä te tä kilitajik chi man k'o tä chi nu b'anik, kinesax k'u apanoq.

10

Ri apóstol Pablo keupixb'aj ri kojonelab' chi mekiq'ijilaj taq ri tiox

¹ Qachalal, kwaj in chi kána'taj chiwe chi konojel ri qa mam ojer xek'oji pa ri u mu'jal ri sutz' ri xuya ri Dios, konojel k'ut xeq'ax pa

ri “Kiäq Mar”. ² Je ri' konojel xb'an ki qasna' pa ri sutz' xuquje' pa ri mar chuk'utik chi e jun chik ruk' ri qa mam Moisés. ³ Konojel junam xkitij ke ri wa ri xyl' rumal ri Dios. ⁴ Xuquje' konojel xkitij ke ri joron ri xuya ri Dios ri xel loq pa ri ab'aj ri xyl' pa ri ki b'e rumal ri Dios. Ri ab'aj ri' are u k'exwäch ri Cristo ri xeachi'lan pa ri ki b'inem. ⁵ Pune je ri', e k'ia chke ri winaq ri' ri man utz tä xelilaj wi rumal ri Dios, rumal k'u ri' xekäm kan pa ri juyub' ri kätz'inowik.

⁶ Ronojel wa' xk'ulmatajik che jun k'utb'al chqawäch uj, rech man kâqarayij tä ri man utz taj jas ri xka'n ri e are'. ⁷ Rumal ri' meiq'ijilaj taq tiox jas ri xka'n jujun chke ri e are', ri tz'ib'tal pa ru Loq' Pixab' ri Dios ri kub'ij: “Xeku'b'i ri winaq, xeqaj che wi'm. Aretaq k'ut xeto'taj che ri wi'm, xewalijik, xkichaplej k'u u b'anik nimaq'ij,” —kächa'. ⁸ Mäqa'n k'u qe jas ri kâka'n ri tz'i' ri xaq kâkiriq kib', man k'o tä ki pixab'. Je k'u wa' xka'n jujun chke ri e are'. Xa pa jun q'ij k'ut xekäm juwinaq oxib' mil winaq. ⁹ Mäqayak ne royowal ri Dios jas ri xka'n jujun chke ri e are', xekäm k'ut rumal chi xetia' kumal ri kumätz. ¹⁰ Mib'ij k'äx taq tzij chrij ri Dios jas ri xka'n jujun chke ri e are', xekämisax k'u rumal ri ängel re ri kâmikäl.

¹¹ Ronojel wa' xkik'ulmaj ri qa mam ojer. Xtz'ib'ax k'u kan wa' pa ru Loq' Pixab' ri Dios che jun k'utb'al chqawäch che qa pixb'exik uj ri uj k'o kâmik pa ri k'isb'al taq q'ij. ¹² Rumal ri', jachin ri kuna' pa ranima' chi qas utz u b'anom pa ru k'aslemaal, chrila' b'a' chi mäztaq pa ri mak. ¹³ Ri k'äx'ol ri tajin kiriq ix, xa junam wa' ruk' ri tajin kâkiriq konojel. Kuya' k'ut kâku'b'i i k'ux chrij ri Dios chi ri Are' man kuya' tä chiwe chi kiriq na jun k'äx ri mat kixkowin chuch'ijik. Xane aretaq kâpe ri k'äx chiwij, ri Dios kixuto' na rech kixel chupam. Xa je ri' kixkowin chuch'ijik wa'.

¹⁴ Rumal k'u ri', loq'alaj taq qachalal, chitasa iwib' chrij ru q'ijilaxik taq tiox ri xa e b'anom kumal winaq. ¹⁵ Kintizijon iwuk' ix, ix winaq k'ut ri kâkich'ob'o. Ri ix kixkowinik kichomaj we utz o man utz taj ri tajin kinb'ij. ¹⁶ Aretaq kâqatij qe ri k'o chupam ri vaso ri tewchitalik ri kâqayab'ej maltioxinik che ri Dios, are je' ta ne ru kikel' ri Cristo ri junam qa wäch tajin kâqatijo. Aretaq kâqapir ri kaxlan wa, kâqatij k'u qe, are je' ta ne ru cuerpo ri Cristo ri junam qa wäch tajin kâqatijo. ¹⁷ Rumal chi xa jun u b'anik ri kaxlan wa ri k'olik, qonojel ri uj, pune uj k'ia, xa uj jun cuerpo rumal chi kâqatij qe ri jun u wäch kaxlan wa.

¹⁸ Chichomajmpe' ri kâka'n ri winaq aj Israel: Ri kâkitij ke ri sipanik ri yo'm cho ri Dios, konojel ri' junam ki wäch kâkitij ke ri sipanik ri yo'm cho ri Dios. ¹⁹ Man kinb'ij tä chi ri tiox ri xa e b'anom kumal winaq

k'o ki b'anik, o ri ti'j ri käyi' chkiwäch ri tiox k'o ta na u b'anik chuwäch apachike u wäch ti'j. ²⁰ Ri kinb'ij are la' chi aretaq ri winaq ri man ketam tä u wäch ri Dios kâkiya ri ki sipanik chuwäch jun tiox, chkiwäch ri itzel taq espiritus kâkiya wi wa', man chuwäch tä k'u ri Dios. Ri in k'ut man kwaj taj chi ri ix, ix jun kuk' ri itzel taq espiritus. ²¹ Man kuya' taj kitij iwe ri k'o chupam ri vaso ri kub'an xa jun chqe ruk' ri Qajaw Jesús, te k'u ri' kitij iwe ri k'o chupam ri ki vaso ri itzel taq espiritus. Man kuya' taj kitij iwe ri wa ri kub'an xa jun chqe ruk' ri Qajaw Jesús, te k'u ri' kitij iwe ri ki wa ri itzel taq espiritus. ²² ¿A are lo xa kiwaj kiyak royowal ri Qajaw Dios rumal ru q'ijilaxik jun tiox? ¿A k'o lo i chuq'ab' ix chuwäch ri Are'? [Man k'o taj!]

Waral kâqil wi jachike ri ya'talik kub'an ri konojel

²³ Qas tzij ri kâb'ixik: “Jachike ri kwaj kinb'ano, kuya' kinb'ano,” —kecha ri winaq. Man ronojel tä k'ut kuriq utzil rumal. Jun winaq kuya' kub'ano jachike ri kraj, man ronojel tä k'ut kuya u chuq'ab' ri qa konojel. ²⁴ Rajwaxik are kâqatzukuj ri u b'anik utzil chke nik'iaj chik, man xuwi tä ru b'anik utzil chqe uj chb'il qib'.

²⁵ Ronojel ri kâk'iyix pa ri k'ayib'al kuya' kitijo, mita' k'u che jachin jun we yo'm chkiwäch ri tiox rech man k'o tä jun chiwe kuna' pa ranima' chi mak ri' ri tajin kub'ano. ²⁶ Je ri', rumal chi ronojel ruwächulew, xuquje' ronojel ri k'o chuwäch rech ri Qajaw Dios wa'.

²⁷ We k'u ne k'o jun ri man konojel taj kub'ij chiwe chi kixwi' ruk', kiwaj k'ut kixe'k. Chitija ronojel ri kuya chiwäch, mita' k'u che we yo'm chkiwäch ri tiox rech man k'o tä jun chiwe kuna' pa ri ranima' chi mak ri' ri tajin kub'ano. ²⁸ We k'u k'o jachin jun kub'ij chiwe: “Ri ti'j ri' yo'm wa' chkiwäch ri tiox,” —kächa', mitijo, rech man kib'an tä k'äx che ri jun ri xb'inik, xuquje' rech man k'o tä jun chiwe kuna' pa ri ranima' chi mak ri' ri tajin kub'ano. ²⁹ Are tajin kinb'ij ri kuna' jun winaq chik pa ranima', man are tä k'u ri kana' at pa ri awanima'.

Kraj k'u ne k'o jun kub'ij: “¿Jas che kub'ij jun winaq chik chi k'o ri man kuya' taj kinb'ano xa rumal rech ri kuna' ri are' pa ranima'? ³⁰ We kinmaltioxij na che ri Dios jachike ri kintijo, ¿jas che kâb'ixik chi tajin kinb'an k'äx rumal rech ri kintijo?” —kächa ne lo. ³¹ Je b'a' ri' jachike ri kib'ano, we kixwi'k, we k'o jas kitijo, chib'ana ronojel wa' chunimarisaxik u q'ij ri Dios. ³² Mib'ano chi ketzaq nik'iaj chik, we ne e are' ri winaq aj Israel, we ne e are' nik'iaj winaq chik ri man e aj Israel taj, o e are' ri qachalal konojelab' che ri Dios. ³³ Ri in k'ut, kintij nu chuq'ab' rech utz kinilitaj kumal konojel

pa ronojel ri kinb'ano. Man xaq xuwi tä kintzukuj chi käb'an utzil chwe in, xane ri u b'anik utzil chke konojel rech e k'ia chke käkiriq na ru tob'anik ri Dios.

11

¹ Chib'ana b'a' iwe ri kinb'an in pa ri nu k'aslemal, je' jas ri in kinb'an we ri kub'an ri Cristo.

Ri apóstol Pablo keupixb'aj ri ixoqib' chrij ri q'ijilanik

² Sib'alaj kinkikot iwuk', qachalal, rumal chi amaq'el ronojel q'ij kinna'taj chiwe, kitagej k'u ri tijonik ri nu k'utum kan chiwäch. ³ Kwaj k'ut kich'ob'o chi ri Cristo are k'amal u b'e ri achi je' jas ri kub'an ri qa jolom k'o puwi' ri qa cuerpo. Ri achi k'ut are k'amal u b'e ri ixoq, je' jas ri Dios are k'amal u b'e ri Cristo. ⁴ We ri achi kuch'uq ru jolom aretaq kub'an orar, o aretaq kuq'alajisaj ri tzij ri yo'm che rumal ri Dios, xa k'ixb'al ri' che ri Cristo ri achi ri'. ⁵ Are k'u we ri ixoq man kuch'uq tä ru jolom aretaq kub'an orar o aretaq kuq'alajisaj ri tzij ri yo'm che rumal ri Dios, xa k'ixb'al ri' ri ixoq ri' che ri jun ri kätäqan puwi'. Xaq junam ri' we ta kusokaj ru wi'. ⁶ We ri ixoq man kuch'uq tä ru jolom, are utz na ri' kuqupij ru wi'. We k'u k'ixb'al ri' chi ri ixoq kuqupij ru wi' o kusokaj, are utz na kuch'uq ru jolom. ⁷ Are k'u ri achi man utz tä ri' we kuch'uq ru jolom, rumal chi are u wächb'al ri Dios xuquje' rumal ri are' käq'alajinik chi nim u q'ij ri Dios. Are k'u rumal ri ixoq käq'alajinik chi nim u q'ij ri achi. ⁸ Aretaq k'ut ri Dios xub'an ri achi, man xresaj tä ri are' che ri ixoq, xane are ri ixoq xesax che ri achi. ⁹ Ri ixoq xb'anik che rachi'l ri achi, man are tä k'u ri achi xb'anik che rachi'l ri ixoq. ¹⁰ Rumal k'u kech ri ángeles, ri ixoq rajwaxik käk'oji jun ch'uqb'al u jolom. Etal k'u wa' chi k'o jun ri kätäqan puwi'. ¹¹ Pa ri qa k'aslemal uj, ri uj kojonelab' che ri Cristo, ri achi man k'o tä u b'anik we man k'o tä ri ixoq, xuquje' ri ixoq man k'o tä u b'anik we man k'o tä ri achi. ¹² Pune qas tzij chi ri ixoq xesax che ri achi, xuquje' are qas tzij chi ri achi kil u wäch rumal ri ixoq. Ronojel k'ut petinaq wa' ruk' ri Dios.

¹³ Chichomaj b'a' ix we taqal che ri ixoq chi man kuch'uq tä ru jolom aretaq kub'an orar cho ri Dios. ¹⁴ Qetam k'u wa' pa qe wi chi k'ixb'al che ri achi we nimaq ru wi'. ¹⁵ Are k'u ri ixoq sib'alaj käyi' u q'ij we nimaq ru wi', yo'm k'u ri nimaq u wi' che ri are' rumal ri Dios che ch'uqb'al re ru jolom. ¹⁶ We k'u k'o jachin jun kraj käch'ojin chrij wa' we tijonik ri', chretamaj chi ri uj, xuquje' ri qachalal kojonelab' che ri Dios, man k'o tä chi jun tijonik chik ri uj naq'atal wi.

Ri apóstol Pablo kub'ij chke ri kojonelab' jachike ri man utz tä u b'anik chupam ri wi'm ri xuk'ut kan ri Qajaw Jesús

¹⁷ Pa we wuj ri' ri kintz'ib'aj chi b'i chiwe, man kinb'ij taj chi sib'alaj utz i b'anom. Aretaq k'ut kimulij iwib' man are tä chub'anik utzil chb'il taq iwib', xane xa k'äx kiriqo. ¹⁸ Ri nab'e are wa': Xb'ix chwe chi aretaq kimulij iwib' che taq ri i q'ijilanik, xa kitasala taq iwib'. Ri in k'ut kinkoj ne lo jub'iq' chi qas tzij je wa' kib'ano. ¹⁹ Qas k'u tzij ne lo chi rajwaxik kitasala taq iwib' pa taq mulaj rech keq'alajinik jachin taq ri qas tzij e kojonelab'. ²⁰ Ri käb'antaj rumal ri tasow ib' ri kib'ano, are la' chi aretaq kimulij iwib' che ri i wi'm, man are tä chik ri wi'm kib'ano ri xuk'ut kan ri Qajaw Jesús. ²¹ Rumal chi aretaq kixwi'k, chijujunal kixnab'ej chutijik ri i wa. Nik'iaj kekanaj kan pa numik. Are k'u ri nik'iaj chik käkiya u wi' k'a keq'ab'ar na pa ri wi'm. ²² ¿A xa lo man k'o tä iwachoch ri kixwi' wi? Aretaq je' kib'an wa', kiwetzelay ki wäch ri qachalal kojonelab' che ri Dios. Xa k'u kiwesaj ki k'ixb'al ri man k'o tä ki wa. ¿Jas ta k'u lo kichomaj chi kinb'ij na chiwe? ¿A utz lo ri' xa kinya i q'ij rumal ri kib'ano? ¡Man utz taj!

Ri apóstol Pablo käch'aw chrij ri wi'm ri xuk'ut kan ri Qajaw Jesús

²³ Tzare k'u ri Qajaw Jesús xyo'w wa' we tijonik chwe ri xinya in chiwe: Chi pa ri aq'ab' ri' ri xjach kan ri Qajaw Jesús, xuk'am ri kaxlan wa. ²⁴ Aretaq xmaltoixitaj rumal, xupiro, xuya k'u chkiwäch. Te k'u ri' xub'ij: "Chik'ama iwe, chitija'. Je' ta ne are nu cuerpo wa' ri käb'an na k'äx che rech kiriq utzil rumal. Amaq'el k'ut aretaq kitijo chib'ana wa' che na'tab'al we," — xcha'. ²⁵ Xuquje' aretaq xkelej xuk'am ri vaso, xub'ij: "We vaso ri' are k'utb'al re ri k'ak' trato ri käjikib'ax na rumal ri nu kik'el. Ronojel mul ri kitij ri k'o chupam ri vaso, chib'ana wa' che na'tab'al we," — xcha ri Are'. ²⁶ Je k'u ri', ronojel mul ri kitij we kaxlan wa ri', xuquje' ronojel mul ri kitij ri k'o pa ri vaso, are ru kämikal ri Qajaw Jesús tajin kitzijoj apanoq k'a käpe na ri Are' jumul chik.

Ri apóstol Pablo kub'ij ri rajwaxik u b'anik aretaq käb'an ri wi'm ri xuk'ut kan ri Qajaw Jesús

²⁷ Je k'u ri', apachin ri kutij ri kaxlan wa, xuquje' kutij ri k'o pa ri vaso, we man ch'ajch'oj tä ri ranima' cho ri Dios, kub'an ri äwas ri' chrij ru cuerpo ri Qajaw Jesús, xuquje' chrij ru kik'el. ²⁸ Rumal ri' chijujunal rajwaxik chiwila iwib' jas i b'anom pa ri i k'aslemal, xuquje' jas ri k'o pa ri iwanima'. Te k'u ri' kuya' kitij ri kaxlan wa, xuquje' ri k'o pa ri vaso. ²⁹ We k'o jun kutij ri kaxlan wa xuquje' ri k'o pa ri vaso, man kuchomaj

tä k'u na chi are je' ta ne ru cuerpo ri Qajaw Jesús ri kutijo, xuquje' je' ta ne are u kik'el kutijo, xa kutzukuj ri' chi käq'at na tzij puwi' chi käk'äjisax na u wäch. ³⁰ Rumal ri' e k'ia ri yawab'ib' chixol, e k'ia k'u ri man k'o tä ki chuq'ab', xuquje' e k'o jujun ri ya xekämik. ³¹ We ta k'u qas käqachomaj na jas ri tajin käqa'no, mat käq'at na tzij ri' pa qa wi' rumal ri Qajaw Dios. ³² Aretaq k'ut käq'at tzij pa qa wi' rumal ri Qajaw Dios, kuk'äjisaj qa wäch ri' rech man käq'at tä tzij pa qa wi' chi käsachisax qa wäch junam kuk' ri winaq ajuwächulew.

³³ Rumal ri', qachalal, aretaq kimulij iwib' che ri wi'm, chiweyey na iwib' rech junam kixwi'k. ³⁴ We k'o jun känumik, utz käwi' loq cho rachoch, rech man käk'äjisax tä i wäch rumal ri Dios rumal chi man utz tä ri kib'ano aretaq kimulij iwib'. Ri nik'iaj chik ri kwaj chi käb'anik, k'ä te' kinb'an u b'anik wa' aretaq kinopan iwuk'.

12

Waral käqil wi jas ri' ri kusipaj ri Loq'alaj Espiritu chqe chqajujunal

¹ Qachalal, k'o ri kwaj chi kiwetamaj chrij taq ri kuinem ri kusipaj ri Loq'alaj Espiritu chqe chqajujunal.

² Ri ix qas iwetam chi aretaq mäja' kixkoniq xaq utz chiwe kixk'am b'i je wa' je ri' kumal taq ri tiox ri man kech'aw taj ri xa e b'anom kumal winaq. ³ Rumal ri' kwaj chi kiwetamaj chi man k'o tä jun ri kuya' kub'ij ri äwas u b'ixik chrij ri Jesús rumal ru chuq'ab' ri Loq'alaj Espiritu rech ri Dios. Xuquje' man k'o tä jun ri kuya' kub'ij chi ri Jesús are ri Qajaw we ta mat rumal ru chuq'ab' ri Loq'alaj Espiritu.

⁴ K'o jalaloj taq kuinem ri kusipaj ri Loq'alaj Espiritu che jun winaq, xa k'u jun ri Espiritu ri käyo'wik. ⁵ K'o jalaloj taq u wäch patäninik, xa k'u jun ri Qajaw Jesús ri käqapatänij. ⁶ Xuquje' k'o jalaloj u wäch ki b'anik taq ri chak, xa k'u jun ri Dios k'olik. Tzare k'u wa' ri käyo'w ki no'j ri winaq chkiujunal chub'anik wa' we chak ri'. ⁷ Ri Dios kuya chke ri kojonelab' chkiujunal jas ri käk'utuwik chi k'o ri Loq'alaj Espiritu pa kanima'. Yo'm k'u wa' chke rech konojel käkiriq utzil. ⁸ Rumal ri Loq'alaj Espiritu jujun kojonelab' sipam chke chi kech'aw ruk' no'j, jujun chi k'ut sipam chke rumal ri Espiritu ri' chi kech'aw ruk' nimalaj etamb'al. ⁹ Jujun chik sipam chke rumal ri Loq'alaj Espiritu chi sib'alaj kekojon na, jujun chi k'ut sipam chke chi kekowinik che ki kunaxik ri yawab'ib'. ¹⁰ Jujun chik sipam chke chi kekowinik käkä'n taq kajmab'al, jujun chik sipam chke chi käkiq'alajisaj tzij ri yo'm chke rumal ri Dios. Jujun chi k'ut sipam chke chi kekowinik käkich'ob'o

jachike ri Espiritu ri qas rech ri Dios, jachike k'ut ri man e are' taj. Nik'iaj chik sipam chke chi kekowinik kech'aw pa jalaloj taq ch'ab'al, nik'iaj chi k'ut sipam chke chi kekowinik käkiq'alajisaj ri käb'ix pa ri jule' taq ch'ab'al ri'. ¹¹ Ronojel k'u wa' xa jun käb'anowik, tzare ri Loq'alaj Espiritu. Are k'u ri Are' ri käsipan chke ri kojonelab' chkiujunal ri jalaloj taq kuinem xa jas ri kraj kuya chke.

Waral käqil wi chi qonojel ri uj kojonelab' käqanuk' ru cuerpo ri Cristo

¹² Ri Cristo are je' jas jun cuerpo ri k'ia ru tz'aqatil k'olik. Pune k'u k'ia ru tz'aqatil k'olik, käkinuk' xa jun cuerpo. ¹³ Qonojel ri uj, we aj Israel, we man aj Israel taj, we k'o qa patrón, we man k'o tä qa patrón, aretaq xb'an qa qasna' xqanuk' xa jun cuerpo rumal ri jun Espiritu. Qonojel k'ut qa k'amom qe che ri jun Espiritu ri'.

¹⁴ Ri qa cuerpo man xa tä jun u wäch, xane k'ia ru tz'aqatil k'olik. ¹⁵ We ta käkowinik käch'aw ri qaqaan kub'ij: "Ri in man in rech tä ri cuerpo rumal chi man in q'ab'aj taj," —kächa ta ne. Man ruk' tä ri' mat rech ri cuerpo. ¹⁶ We ta käkowinik käch'aw ri qa xikin kub'ij: "Ri in man in rech tä ri cuerpo rumal chi man in waq'ächaj taj," —kächa ta ne. Man ruk' tä ri' mat rech ri cuerpo. ¹⁷ We ta ronojel ri qa cuerpo are waq'ächaj, ¿jas ta käqa'n ri' rech kujtatab'enik? We ta ronojel ri qa cuerpo are xikinaj, ¿jas ta käqa'n ri' rech kujsiqonik? ¹⁸ Ri Dios k'ut u kojom ru tz'aqatil ri qa cuerpo jawije' chi' ri xraj xukoj wi. ¹⁹ We ta ronojel ri qa cuerpo xa jun u wäch, ¿jas ta lo ri qa b'anik ri'? ²⁰ Man xa tä k'u jun u wäch ronojel ri qa cuerpo, xane k'ia u tz'aqatil k'olik. Pune je ri', xa k'u jun ri qa cuerpo.

²¹ We ta käkowinik käch'aw ri qa waq'äch, man kuya' taj kub'ij che ri qa q'ab': "Man at rajwaxik tä chwe," —kächa ne. Xuquje' ri qa jolom, we ta käkowinik käch'awik, man kuya' taj kub'ij che ri qaqaan: "Man ix rajwaxik tä chwe," —kächa ta ne. ²² Xane ru tz'aqatil ri qa cuerpo ri je' ta ne chi sib'alaj man k'o tä ki chuq'ab', e are wa' ri sib'alaj rajwaxik na chqe. ²³ Ru tz'aqatil ri qa cuerpo ri man qas tä nim keqil wi, are sib'alaj utz käqa'n na che ki chajixik. Ru tz'aqatil ri qa cuerpo ri käqilo chi man qas tä e je'lik, are sib'alaj loq' na keqil wi pune kech'uqik. ²⁴ Are k'u ru tz'aqatil ri qa cuerpo ri e je'lik, man rajwaxik taj kech'uqik. Ri Dios k'ut je wa' xub'an che ri qa cuerpo, rech ru tz'aqatil ri qa cuerpo ri man qas tä nim keqil wi, are nim na ki b'anik wa'. ²⁵ Je ri' xub'an ri Dios chqe rech man kutas tä rib' ri qa cuerpo, xane ru tz'aqatil ri qa cuerpo kechakun junam che ki to'ik kib' ri jun ruk' ri jun chik. ²⁶ We jun u tz'aqatil ri qa cuerpo kuriq k'äx, konojel

käkiriq k'äx junam ruk'. We jun u tz'aqatil ri qa cuerpo nim ki wi, are je' ta ne chi konojel kekikot ruk'.

²⁷ Ix k'u ri' i nuk'um ru cuerpo ri Cristo waral cho ruwächulew. Chijujunal ix, ix u tz'aqatil ru cuerpo ri Are'. ²⁸ Ri Dios k'ut u yo'm keqle'n jujun chke ri qachalal konojelab'. Ri nab'e e are' ri apóstoles, ri u kab' k'ut e are' ri kákiq'alajisaj tzij ri yo'm chke rumal ri Dios. Ri u rox e are' ri kákiya tijonik, te k'u ri' ri winaq ri káka'n taq kajmab'al, te k'u ri' ri kekikunaj yawab'ib', xuquje' ri gas ketob'an chke nik'iaj chik, ri k'amal taq b'e, xuquje' ri sipam chke chi kekowinik kech'aw pa jule' taq ch'ab'al chik. ²⁹ ¿A konojel k'ut e apóstoles? ¿A konojel kákiq'alajisaj tzij ri yo'm chke rumal ri Dios? ¿A konojel kákiya tijonik? ¿A konojel káka'n taq kajmab'al? ³⁰ ¿A konojel sipam chke ri kuinem chi kekunanik? ¿A konojel kech'aw pa jule' taq ch'ab'al? ¿A konojel kekowin chug'alajisaxik ru b'im pa jule' taq ch'ab'al? ¡Man je' tá ri! ³¹ Chikojo b'a' i chug'ab' che ki riqik ri kuinem ri keusipaj ri Dios ri gas e utz na. K'o k'u ri kink'ut in chiwäch ri nim na u b'anik chuwäch ronojel.

13

Waral káqil wi chi we káqaj qib' are qas nim u b'anik wa' cho ri Dios

¹ We ta ri in kinkowinik kinch'aw pa ri jalajoj taq ki ch'ab'al ri winaq cho ruwächulew, xuquje' pa ri ki ch'ab'al ri ángeles, te k'u ri' man keinwaj tá ri winaq, in je' jas jun tambor ri kátanlajik. In je' jas jun campana ri xa kách'arnajik. ² We ta kinq'alajisaj tzij ri yo'm chwe rumal ri Dios, we ta wetam ronojel ri man etamtal tá kumal ri nik'iaj winaq chik, xuquje' wetam ronojel u wäch no', we ta k'o nimalaj nu kojonik chi kinkowinik keinslab'isaj taq ri juyub', te k'u ri' man keinwaj tá ri winaq, man gas k'o tá nu b'anik ri'. ³ We ta kinjach konojel ri jastaq we chke ri meb'a'ib', we ta xuquje' kinjach ri nu cuerpo rech káporoxik xa rumal ri nu kojonik che ri Cristo, te k'u ri' man keinwaj tá ri winaq, man gas k'o tá u patán ri' chwe.

⁴ Ri winaq ri keraj nik'iaj winaq chik, kuchajij paciencia, kách'awik, man k'äx tá kuna' chrij jun winaq chik xa rumal ri jastaq re, man kuna' tá rib' chi nim u b'anik, man kub'an tá k'u nimal. ⁵ Man kub'an tá ri' ri man taqal tá u b'anik, ri xa kuya k'äx chke nik'iaj chik. Man kutzukuj tá xuwi ri utz che ri are', man xaq tá ruk' jub'iq' káyaktaj royowal, man kuk'ol tá k'u pa ranima' ri k'äx ri káb'an che. ⁶ Man kákikot tá ri' aretaq káril ri etzelal káb'anik, xane are kákikot ri' ruk' ru b'anik ri gas tzij. ⁷ Ronojel u wäch k'äx

kuch'ijo, kákojon che ri Dios, ku'l u k'ux chrij, kuchajij k'u paciencia pa ronojel.

⁸ Ri rutzil qanima' chb'il taq qib' man kák'is tá u wäch. Kápe k'u na ri q'ij aretaq man k'o tá chi jun kuq'alajisaj tzij ri káyi' che rumal ri Dios, man k'o tá chi jun kách'aw pa jule' taq ch'ab'al chik, xuquje' ri etamanik xa kák'is na u wäch wa'. ⁹ Ri qetam uj xa jub'iq' wa', xuquje' we káqaj'alajisaj tzij ri káyi' chqe rumal ri Dios, xa jub'iq' wa' ku-jkowin chug'alajisaxik. ¹⁰ Aretaq k'ut kápe ri q'ij ri káqetamaj na ronojel, ri jub'iq' ri qetam uj kásach na u wäch wa'.

¹¹ Ri in aretaq in ak'al na, je' xinch'awik jas jun ak'al, je' ri nu chomanik jas jun ak'al, je' xuquje' nu no'j are no'j rech ak'al. Aretaq k'ut in achi chik, xinya kan ri' ri kub'an jun ak'al. ¹² Je k'u ri' kámik ri' je' ta ne ri xaq pa jun espejo tajin kujka'y wi, xaq jub'iq' q'alaj, man q'alaj tá ronojel chqawäch. Kápe k'u na ri q'ij aretaq gas káqil na ronojel chi saq. Kámik ri' xaq jub'iq' wetam, kápe k'u na ri q'ij aretaq gas kinwetamaj na ronojel je' jas ri Dios retamam nu wäch in. ¹³ Je b'a' ri' ri qa kojonik, ri ku'lb'al qa k'ux, xuquje' ri rutzil qanima' chb'il taq qib' man k'o tá ki k'isik wa'. Are k'u ri nim na u b'anik chke we oxib' ri', are ri rutzil qanima' chb'il taq qib'.

14

Waral káqil wi jas ri' ri ch'awem pa jule' taq ch'ab'al chik

¹ Chikojo b'a' i chug'ab' rech kiwaj iwib', xuquje' chirayij chi ri Dios keuya na ri kuinem chiwe ri keusipaj ri Loq'alaj Espíritu. Are k'u sib'alaj utz na chi káya'taj chiwe chi kiq'alajisaj tzij ri yo'm rumal ri Dios. ² Ri winaq ri kách'aw pa jule' taq ch'ab'al chik, are ruk' ri Dios ri kách'aw wi, man kuk' tá ri winaq, rumal chi man k'o tá jun kách'ob'ow ri kub'ij. Are k'u ri Loq'alaj Espíritu ri' káyo'w ri tzij ri kub'ij, ri man etamtal tá kumal ri winaq. ³ Are k'u ri jun ri kuq'alajisaj tzij ri yo'm che rumal ri Dios, kuk' ri winaq ri' kách'aw wi. Ri are kuya u chug'ab' ri ki kojonik, kuwalijisaj ri kanima', kuku'b'isaj k'u ki k'ux. ⁴ Ri winaq ri kách'aw pa jule' taq ch'ab'al, xaq u tukiel ri' kuto' rib' pa ru kojonik. Are k'u ri jun ri kuq'alajisaj tzij ri káyi' che rumal ri Dios, are kuya u chug'ab' ri ki kojonik ri qachalal konojelab'.

⁵ Kwaj ta ne in chi iwonojel sipam chiwe chi kixkowinik kixch'aw pa jule' taq ch'ab'al. Are k'u sib'alaj kwaj chi iwonojel kixkowinik kiq'alajisaj tzij ri káyi' chiwe rumal ri Dios. Je ri', rumal chi are nim na u b'anik wa' chuwäch ri kách'aw jun pa jule' taq ch'ab'al. Are utz k'u na ri' we k'o jun káq'alajisan pa qa ch'ab'al ri kub'ij pa jule' ch'ab'al rech kuya u chug'ab' ri

ki kojoniq ri qachalal kojonelab'. ⁶ Rumal ri', qachalal, we kinopan in iwuk', te k'u ri' kixinch'ab'ej pa jule' taq ch'ab'al, ɜa k'o lo kupatānij ri' chiwe ri kinb'ij? Man k'o tā ri' we man kinb'ij tā chiwe ri kub'ij ri Dios, we man kinb'ij tā jun tziij chiwe ri rajwaxik kiwetamaj. We man kinq'alajisaj tā chiwāch ri tziij ri yo'm chwe rumal ri Dios, we man kinya jun tizonik chiwe, man k'o tā kupatānij wa' chiwe.

⁷ Qesajmpe' qa no'j chkiq taq ri q'ojom ri man e k'asal taj, we ne are ri su', we ne are jun arpa. We man k'o u b'eyal ri q'ojom ri kesax chupam, ɜa käch'ob'taj lo ri' jas u wäch b'ix? ⁸ Man käch'ob'taj tā ri! ⁸ Aretaq koq'sax ri trompeta che ki sik'ixik ri winaq che ri ch'oj, we man k'o u b'eyal käch'an che, ɜa k'o lo jun winaq ri' kuyak rib' che ri ch'oj? ⁹ Man k'o taj! ⁹ Je' k'u käch'ulmataj wa' iwuk' ix. We man kikoq ri iwaq' che ki b'ixik tziij ri kech'ob'tajik, ɜa käch'ob'taj lo ri' ri kib'ij? ¹⁰ Man käch'ob'taj taj! Xane xaq pa ri kiäq'q' ri' käsach wi ri i tziij. ¹⁰ Cho ruwächhulew, qas tziij k'ia u wäch ri kech'aw wi ri winaq, chkijujunal k'ut k'o ri kel kub'ij ri ki tziij. ¹¹ We k'u ri in man kinch'ob' tā ru ch'ab'al jachin ri tajin kätzizon wuk', man junam tā ri qa tinimit ri' ruk'. Jun wi ri' ru tinimit ri are', xuquje' jun wi ri' ri nu tinimit ri. ¹² Je k'u ri' we ri ix sib'alaj kel i k'ux che taq ri kuinem ri keusipaj ri Loq'alaj Espiritu, chikojo b'a' i chuq'ab' rech käya'taj chiwe ri kuinem ri käkiya u chuq'ab' ri ki kojoniq ri qachalal kojonelab'.

¹³ Rumal ri' jachin ri käch'aw pa jule' taq ch'ab'al chuta' che ri Dios chi käyi' ri kuinem che ri are' chuq'alajisaxik ri kel kub'ij ri tziij. ¹⁴ We ri in kinb'an orar pa jule' ch'ab'al, are ri wanima' ri' käch'aw ruk' ri Dios. Are k'u ri tziij ri tajin kinb'ij man kuch'ob' tā nu jolom. ¹⁵ Jas k'u ri rajwaxik kinb'ano? Rajwaxik kinb'an orar ruk' ri wanima' xuquje' kinb'an orar ruk' ri nu chomab'al. Rajwaxik kinb'ixon ruk' ri wanima' xuquje' kinb'ixon ruk' ri nu chomab'al. ¹⁶ We ri at tajin kaya u q'ij ri Dios xaq ruk' ri awanima', ri jun chik ri man k'o tā retam ri tajin kutatab'ej man kākowin tā ri' kuya maltioxinik junam awuk' rumal chi man kuch'ob' tā ri kab'ij. ¹⁷ Pune ta ne qas utz tajin kab'an chuya'ik ri maltioxinik, are ru kojoniq ri jun chik man kuriq tā chuq'ab'. ¹⁸ Kinmaltioxij che ri Dios chi kinkowin na kinch'aw pa jule' taq ch'ab'al chiwäch ix iwonojel. ¹⁹ Are k'u chkiwäch ri qachalal kojonelab', are utz na chwe kinb'ij kieb' oxib' tziij ri käch'ob'tajik rech ki tijoxik nik'iaj chik, chuwäch ri kinb'ij lajuj mil tziij pa jun ch'ab'al ri man käch'ob'taj taj.

²⁰ Qachalal, mixchomanik je' jas ri kechoman ri ak'alab' ri man k'o tā ketam. Are k'u chib'ana iwe jas ri kākā'n ri ak'alab'

ri man ketam taj kākā'n ri etzelal. Chixchoman k'ut jas ri ri'jab' chub'anik ri utzil. ²¹ Kub'ij k'u pa ru Loq' Pixab' ri Tz'ib'talik: "Pa jule' taq ch'ab'al keinch'ab'ej na we winaq ri', keinkoj k'u na winaq ri man ki winaqil taj che ki tziijob'exik. Pune k'u je ri' man kākita tā wi ri kinb'ij, kub'ij ri Qajaw Dios," —kächā'. ²² Je k'u ri' ri ch'awem pa jule' taq ch'ab'al are jun k'utb'al chke ri man e kojonelab' taj, man are tā ri' chke ri kojonelab'. Are k'u ru q'alajisaxik tziij ri yo'm rumal ri Dios are jun k'utb'al wa' chke ri kojonelab', man are tā ri' chke ri man e kojonelab' taj. ²³ Aretaq ki mulim kib' konojel ri qachalal kojonelab', we k'u konojel tajin kech'aw pa jule' taq ch'ab'al, keb'ok k'u b'i jujun ri man k'o tā ketam, we ne jujun ri man e kojonelab' taj, ɜa mat kākib'ij na ri e are' chi xa ix ch'ujarinaq chik? ²⁴ Je', je ri'! ²⁴ We k'u konojel tajin kākik'alajisaj tziij ri yo'm chke rumal ri Dios, aretaq kok b'i jun ri man konojel taj, we ne jun ri man k'o tā retam, kuch'ob' rib' ri' chi ajmak, kuna' ri' pa ranima' ri mak ru b'anom aretaq kutatab'ej ri tajin kākib'ij konojel. ²⁵ Je ri' ri' k'o pa ranima' ri man ketam tā nik'iaj winaq chik kel na wa' chi saq. Kākuxi k'u na, kāk'ijilan na che ri Dios, kub'ij k'u na chi qas tziij k'o ri Dios iwuk'.

Ronojel ri kib'ano, chib'ana pa cholajil, utz k'u u b'anik wa' kib'ano

²⁶ Je k'u ri', qachalal, ri u b'eyal are je wa': Aretaq kimulij iwib' e k'o jujun chiwe ri kākib'ixoj salmos, nik'iaj chik käkiya tijonik, e k'o k'u jujun kākik'alajisaj tziij ri yo'm chke rumal ri Dios. Jujun chik käkiya tziionem pa jule' ch'ab'al, jujun chi k'ut kākik'alajisaj ri b'im pa ri jule' ch'ab'al ri'. Ronojel b'a' ri kib'ano, chib'ana wa' chuya'ik u chuq'ab' ri ki kojoniq ri qachalal kojonelab'. ²⁷ Aretaq kixch'aw pa jule' taq ch'ab'al, ruk' kieb' kech'awik, we ne oxib', xaq xuwi ri'. Rajwaxik k'ut chijujunal kixch'awik, te k'u ri' rajwaxik chi jun chik kuq'alajisaj ri kib'ij. ²⁸ We k'u man k'o tā jun ri kākowin chuq'alajisaxik ri tziij ri kib'ij pa jule' taq ch'ab'al, k'o jas mib'ij pa jule' taq ch'ab'al chikxol ri ki mulim kib', xane chijujunal chitziijob'ej iwib', xuquje' chixch'aw ruk' ri Dios. ²⁹ Je ri' xuquje' ri kākik'alajisaj tziij ri yo'm chke rumal ri Dios, xa kieb', we ne oxib' kech'awik, are k'u ri nik'iaj chik kitatab'ej we utz ri kāk'ixik. ³⁰ We k'u k'o jas ri kuq'alajisaj ri Dios chu wäch jun chik ri t'uuyulik, ri jun ri tajin käch'awik rajwaxik ri' kutānab'a ch'awem. ³¹ Je ri' iwonojel ix ri kiq'alajisaj tziij ri yo'm chiwe rumal ri Dios, kixkowinik kixch'aw chijujunal rech konojel k'o kāketa maj xuquje' kälajisax ri kanima'. ³² Ri kākik'alajisaj tziij ri yo'm chke rumal ri Dios rajwaxik chi kenimanik, man

käka'n tä k'u xa jas ri käkaj ri e are'. ³³ Je ri', rumal chi ri Dios are kub'an ronojel pa ru cholajil, man xa tä kub'an jech' che.

Chitagej u b'anik jas ri käka'n ri qachalal kojonelab' pa konojel taq ri tinimit. ³⁴ Ri ixoqib', mech'aw ri' pa ri q'ijilanik aretaq käkimulij kib' ri qachalal kojonelab' rumal chi man ya'tal tä chke. Rajwaxik kenimanik jas ri kätapan wi ru Pixab' ri Dios. ³⁵ Ri ixoq we k'o jas kraj käretamaj, chuta' wa' che ri rachajil cho ja, rumal chi k'ixb'al wa' chi käch'aw jun ixoq pa ri q'ijilanik.

³⁶ Rajwaxik kich'ob'o chi ru Loq' Pixab' ri Dios man iwuk' ix taj chaptaj wi u tzijoxik, xuquje' man xaq xuwi tä ri ix ri i k'amom wa'. ³⁷ We k'o jun kuchomaj chi käkowinik kuq'alajisaj tzij ri yo'm che rumal ri Dios, o kuchomaj chi are ri Loq'alaj Espiritu ri käch'aw ruk' pa ranima', rajwaxik kuch'ob'o chi ri tajin kintz'ib'aj b'ik chiwe are u taqanik ri Qajaw Jesús. ³⁸ We k'u man kuch'ob' tä ri' chi are u taqanik ri Qajaw Jesús, utz la' we man kätatab'ex tä ri kub'ij ri are'.

³⁹ Je k'u ri', qachalal, chikojo i chuq'ab' chuq'alajisaxik tzij ri yo'm chiwe rumal ri Dios, meiq'atej k'u ri kech'aw pa jule' taq ch'ab'al chik. ⁴⁰ Ronojel k'u ri kib'ano, chib'ana wa' pa cholajil, utz k'u u b'anik kib'ano.

15

Ri apóstol Pablo kujikib'a u b'ixik chi ri Cristo qas tzij xk'astaj chkixol ri käminaqib'

¹ Qachalal, che we chanim are kwaj chi käna'taj chiwe ri Utzalaj Tzij re ri Evangelio ri nu tzijom chiwe. Are k'u wa' ri tzij ri i k'amom pa ri iwanima', ri qas i taqem u b'anik. ² Xuquje' rumal we Tzij ri' ri ix i riqom ru tob'anik ri Dios, we kitagej u b'anik ri nu tzijom chiwe, we man xaq tä loq' ix kojoninaq che rumal chi man qas tä xich'ob'o.

³ Ri nu yo'm chiwe are ri tijonik ri nim na u b'anik ri yo'm chwe in. Xink'ut chiwäch chi ri Cristo xkämisax cho ri cruz rumal rech ri qa mak, jas ri kub'ij ru Loq' Pixab' ri Dios ri Tz'ib'talik. ⁴ Xinx'ij chi xmuqtajik, te k'u ri' xk'astaj churox q'ij chkixol ri käminaqib', jas ri xuquje' kub'ij ru Loq' Pixab' ri Dios ri Tz'ib'talik. ⁵ Xuk'ut k'u rib' chuwäch ri Pedro, te k'u ri' chkiwäch konojel ri kab'la'uj apóstoles. ⁶ Te k'u ri' xuk'ut rib' chkiwäch más na chkiwäch job' cientos qachalal ri ki mulim kib'. E k'ia k'u chke wa' e k'asal na kämik, pune nik'iaj chi k'ut e käminaq chik. ⁷ Te k'u ri' xuk'ut rib' chuwäch ri Jacobo, te k'u ri' chkiwäch konojel ri apóstoles.

⁸ K'isb'al re, aretaq u k'utum chi rib' chkiwäch konojel ri nik'iaj chik, xuk'ut rib' chnuwäch in je' ta ne in jun ak'al ri jun chi wi rilik nu wäch xb'anik. ⁹ Je ri', rumal chi ri

in man nim tä nu b'anik chkixol ri apóstoles, man taqal tä k'ut käb'ix apóstol chwe rumal chi xinx'an k'äx chke ri qachalal kojonelab' rech ri Dios. ¹⁰ Xa k'u rumal ru toq'ob' ri Dios pa nu wi' je wa' nu b'anik. Man xaq tä k'u loq' u toq'ob'isam nu wäch ri Dios, xane utz xelik rumal chi sib'alaj in chakuninaq na chkiwäch konojel. Man in tä k'ut nu tukiel wi xinx'anow ronojel wa', xane are ri Dios ru toq'ob'isam nu wäch are k'olinaq wuk'. ¹¹ Man k'o tä k'u we in che, we rumal ri nu tzij in ix kojoninaq, we k'u ne rumal ri ki tzij ri nik'iaj chik. Are wa' ru Loq' Pixab' ri Dios ri käqatzijoj, are k'u wa' ri ix kojoninaq che.

Waral käqil wi chi kek'astaj na ri käminaqib'

¹² We k'u ri käqatzijoj are la' chi ri Cristo xk'astaj chkixol ri käminaqib', zjas che e k'o jujun chiwe käkib'ij chi man kek'astaj tä chi ri käminaqib'? ¹³ We k'u man kek'astaj ri käminaqib', mat b'a' xk'astaj ri' ri Cristo chkixol ri käminaqib'. ¹⁴ We ta k'u mat xk'astaj ri Cristo chkixol ri käminaqib', mat b'a' k'o u patän ri' ru Loq' Pixab' ri Dios ri käqatzijoj, xuquje' mat k'o u patän ri' chi ix kojoninaq che ri Cristo. ¹⁵ We ta qas tzij je ri', q'alaj ri' chi xaq uj b'anal taq tzij chrij ri Dios, rumal chi qa b'im chi ri Dios xuk'astajisaj ri Cristo chkixol ri käminaqib'. We man qas tzij chi kek'astaj na ri käminaqib', man qas tzij tä ri' chi ri Dios xuk'astajisaj ri Cristo chkixol ri käminaqib'. ¹⁶ We k'u man kek'astaj tä chi ri käminaqib', mat k'u xk'astaj ri' ri Cristo chkixol ri käminaqib'. ¹⁷ We ta k'u mat xk'astaj ri Cristo chkixol ri käminaqib', man k'o tä u patän ri' chi ix kojoninaq. K'ä ix sachinaq ri' rumal ri i mak. ¹⁸ We ta k'u je ri', xuquje' kel kub'ij chi ri kojonelab' che ri Cristo ri e käminaq chik, xuquje' xsach ta ki wäch ri'. ¹⁹ We ta xaq xuwi pa ri qa k'aslema cho ruwächulew k'o u patän chi käku'b'i qa k'ux chrij ri Cristo, uj ta ri' ri sib'alaj b'isob'al qa wäch chkiwäch konojel ri winaq.

²⁰ Kämik k'ut qetam chi qas tzij xk'astaj ri Cristo chkixol ri käminaqib'. Are k'utb'al re wa' chi qas tzij kek'astaj na ri käminaqib'. ²¹ Xa k'u rumal jun winaq xpe ri kämikal pa ki wi' konojel ri winaq, je ri' xuquje' rumal jun winaq kek'astaj na konojel ri käminaqib'. ²² Rumal k'u ri Adán konojel ri winaq kekämik, je ri' xuquje' konojel ri e rech ri Cristo käkiriq na ri qas k'aslema ri man k'o tä u k'isik. ²³ Ronojel k'u wa' käk'ulmataj na pa ru cholajil: Nab'e xk'astaj ri Cristo chkixol ri käminaqib'. Te k'u ri' ri e rech ri Cristo kek'astaj na aretaq käpetik. ²⁴ Aretaq b'antajinaq chi wa', käpe na ru k'isb'al ronojel. Are chi' ri Cristo kusach na ki wäch ri k'o ki taqanik, ri q'atal taq tzij, xuquje' ri nik'iaj taqanelab' ajchikaj.

Kujach k'u na ronojel u wäch taqanik pu q'ab' ri Dios qa Tat. ²⁵ Tzrajwaxik k'ut chi kätäqan na ri Cristo, k'ä käy'i' na che rumal ri Dios chi käch'akanik, qas k'u kätäqan pa ki wi' ronojel ri käkä'n ki k'ulel che. ²⁶ Ri k'isb'al k'ulel ri käsach na u wäch, are ri kämikal. ²⁷ Ronojel k'ut u jachom ri Dios pu q'ab' ri Cristo rech kätäqan puwi'. Aretaq kub'ij ru Loq' Pixab' ri Dios ri Tz'ib'talik chi ronojel jachom pu q'ab' ri Cristo, q'alaj chi man kok tä ri Dios pa kuenta rumal chi are ri Are' ri xjachow ronojel pu q'ab'. ²⁸ Aretaq ronojel jachom chi pu q'ab' ri Cristo rech kätäqan puwi', te k'u ri' ri Are' k'ut, ri u K'ojol ri Dios, kujach na rib' pu q'ab' ru Tat ri xjachow ronojel pu q'ab' ri Are'. Je ri' ri Dios are ri Are' ri kätäqan na puwi' ronojel ri k'olik.

²⁹ We ta mat k'o ri k'astajib'al chxixol ri käminaqib', çjas che e k'o jujun ri käb'an ki qasna' che ki k'exwäch ri ya e käminaq chik? Çjas che je' käkä'n wa'? We man kek'astaj tä chi ri käminaqib', çjas u patän wa' chi käb'an ki qasna' che ki k'exwäch ri käminaqib'? ¡Man k'o taj!

³⁰ Çjas k'u che ri uj ronojel q'ij xa uj k'o cho ronojel u wäch k'äx? ³¹ Ri in ronojel q'ij xaq in k'o cho ri kämikal. Are qas tzij ri kinb'ij, qachalal, pune je ri' nim k'u ri kikotemal ri kinna' pa ri wanima' iwumal ix rumal chi ix kojononag chik che ri Qajaw Jesucristo. ³² Ri in je wa' ri kinb'ij chi xintij nu chuq'ab' kuk' ri winaq aj Éfeso. Je' ta ne kuk' awaj aj pa taq juyub' xinch'ojin wi. Çjas k'u xinch'ak che wa'? We qas tzij chi man kek'astaj tä chi ri käminaqib', qas tzij ta ri' ri käkib'ij ri winaq: "Chujwoq, qatija' k'u jachike ri käqaj rumal chi chuweg kujkämik," —kecha ri'.

³³ K'o jachin jun winaq mixsub'uwik. Je' jas ri kub'ij ri tzij: "Ri jun ri kerachi'laj ri itzel taq winaq, ketzeletaj na ri utzalaj u no'j kumal," —kächa'. ³⁴ Chik'exa ri i chomanik, chib'ana k'u ri jikom pa ri i k'aslemaal, mix-makunik. E k'o k'u jujun chiwe ri man qas ketam tä u wäch ri Dios. Kinb'ij wa' chiwe rech kixk'ixix.

Waral käqil wi jas ki b'anik ri käminaqib' aretaq kek'astajik

³⁵ We k'u ne k'o jun kuta' chqe, kub'ij: "Çjas käb'antaj na rech ri käminaqib' kek'astajik? Çjas lo u b'anik ri' ri ki cuerpo?" —kächa ri'. ³⁶ Jachin ri je' kuta' wa' xa kon ri'. Rumal chi aretaq jun ija' kätikik, ri ija' ri' rajwaxik käq'ay ri rij rech kätuxik, käk'iy k'u ri tiko'n. ³⁷ Ri kämuq kan pa rulew man are tä ri tiko'n ri k'iyinaq chi loq, xane xa are ri ija', we are triko, o we ne are jun u wäch ija' chik jas ri ixim. ³⁸ Ri Dios k'ut kub'an na che ri ija' ri' jas ru b'anik ri kraj, chkiujunal k'ut keuk'iyisaj jas ri kraj kub'an chke. ³⁹ Man konojel tä ri cuerpas xaq junam ki wäch. Xane jun wi ri ki cuerpo

ri winaq, jun wi ri ke ri awaj, jun wi ri ke ri kär, xuquje' jun chi wi ri ke ri chikop ajuwokaj. ⁴⁰ Je ri' xuquje' e k'o cuerpas ajchikaj, e k'o k'u cuerpas ajuwächulew. Jun chi wi ri ki je'lal ri cuerpas ajchikaj, jun chi wi k'ut ri ki je'lal ri cuerpas ajuwächulew. ⁴¹ Ru juluwem ri q'ij man junam tä ruk' ru juluwem ri ik', xuquje' man junam tä ruk' ri ki juluwem ri ch'imil. Chxixol ri ch'imil k'ut jalajoj wi ri ki juluwem ri jun ruk' ri jun chik. ⁴² Are k'u je wa' käk'ulmataj na aretaq kek'astaj ri käminaqib'. Kämuq kan jun cuerpo ri käq'ayik, käk'astaj k'u na jun cuerpo ri man käq'ay tä chik, ri man käkä'm taj. ⁴³ Kämuq kan jun cuerpo ri tzel kilitajik, käk'astaj k'u na jun cuerpo ri je'lik, ri nim na u q'ij. Kämuq kan jun cuerpo ri man qas k'o u chuq'ab', käk'astaj k'u na jun cuerpo ri qas k'o u chuq'ab'. ⁴⁴ Kämuq kan jun cuerpo ajuwächulew, käk'astaj k'u na jun cuerpo ajchikaj. We k'o ri' ri cuerpo ajuwächulew, xuquje' k'o ri' ri cuerpo ajchikaj.

⁴⁵ Je' jas ri kub'ij ru Loq' Pixab' ri Dios ri Tz'ib'talik: "Ri nab'e achi, ri Adán, xb'an che chi are jun winaq ri k'o u k'aslemaal," —kächa'. Are k'u ri k'isb'al Adán are ri Espíritu ri kuya k'aslemaal. ⁴⁶ Man are tä k'u xpe ri ajchikaj nab'e, xane are nab'e xpe ri ajuwächulew. Te k'u ri' xpe chi ri ajchikaj. ⁴⁷ Ri nab'e achi ri xb'an ruk' ulew are jun ajuwächulew. Ri ukab' achi, ri Qajaw Jesús, pa ri kaj xpe wi. ⁴⁸ Ri cuerpas ajuwächulew, e are je' jas ru cuerpo ri nab'e winaq ri xb'an ruk' ulew. Are k'u ri cuerpas ajchikaj e are je' jas ru cuerpo ri Jun ri xpe chikaj. ⁴⁹ Ri qa b'anik kämik are je' jas ri achi ri xb'an ruk' ulew, kopan k'u na ri q'ij aretaq je' kujb'antaj na jas ri Jun ri ajchikaj.

⁵⁰ Ri kel kub'ij ri tajin kinb'ij chiwe, qachalal, are la' chi uj ruk' ri qa cuerpo ri' ri xa re ti'j, re b'aq man kuya' taj kujopan chila' chikaj jawije' ri kätäqan wi ri Dios pa qa wi'. Ri xa käq'ayik man kuya' taj chi mat k'o u k'isik. ⁵¹ Kwaj k'ut chi kiweta-maj ri man etamtal taj. Man qonojel tä ri uj kujkä'm na, qonojel k'ut käk'extaj na ri qa b'anik. ⁵² Xa k'u pa jun rat käk'ulmataj wa', je' jas ri kub'an jun winaq kuyub'a' u waq'äch, aretaq käb'an ri k'isb'al trompeta. Kätataj k'u na chi koq'sax ri trompeta. Te k'u ri' kek'astaj na ri käminaqib' rech man kekäm tä chik. Are k'u ri uj, qonojel käk'extaj na ri qa b'anik. ⁵³ Rajwaxik k'ut chi we qa k'aslemaal ri' ri xa käk'is u wäch, are käk'extaj wa', käk'oji k'u na ri qa k'aslemaal ri man k'o tä u k'isik. We qa cuerpo ri' ri xa käkä'mik käk'extaj na wa' rech käk'oji na jun qa cuerpo ri man käkä'm taj. ⁵⁴ Aretaq we qa k'aslemaal ri' ri xa käk'is u wäch are k'extajinaq chik, käk'oji k'u ri qa k'aslemaal ri man k'o tä u k'isik. Aretaq we cuerpo ri' ri xa käkä'mik k'extajinaq chik rech käk'oji na jun

cuerpo ri man kākām taj, je' kel na wa' jas ri kub'ij ru Loq' Pixab' ri Dios ri Tz'ib'talik: “jSachinaq u wäch ri kāmikal, tz'aqat k'u ri ch'akanik!” —kācha'.⁵⁵ “Ri at, kāmikal, jman ya'tal tā chik chawe ru b'anik k'āx chqe! Kāmikal, kab'ij chi katkownik katch'akan pa qa wi', man katch'akan tā k'u na,” —kācha ri'.⁵⁶ Ri kāyo'w u chuq'ab' ri kāmikal chub'anik k'āx chqe, tzare ri mak. Are k'u ri kāyo'w u chuq'ab' ri mak tzare ri ojer Pixab'.⁵⁷ Maltiox k'u che ri Dios chi kuya chqe chi kujch'akan na rumal ri Qajaw Jesucristo.

⁵⁸ Rumal k'u ri', loq'alaj taq qachalal, chib'ana jikom che ri iwanima', chijikib'a k'u i k'ux rech kitaqej na u patānixik ri Qajaw Jesús amaq'el ronojel q'ij. Je ri', rumal chi ri ix iwetam chi ri chak ri kib'an chupatānixik ri Qajaw Jesús, man xaq tā loq' kib'an wa'.

16

Waral kāqil wi jas kāb'an chumulixik ri puaq che ki to'ik ri qachalal kojonelab'

¹ Aretaq kimulij ri puaq che ki to'ik ri qachalal kojonelab', chib'ana ix jas ri xinx'ij chke ri qachalal kojonelab' ri e k'o pa taq ri tinimit re Galacia.² Pa taq ri nab'e q'ij rech ronojel semana chijujunal rajwaxik kitas kan jub'iq' che ri xich'ako. Jampa' ri kixuto' wi ri Dios chutasik are ri' kik'ol kanoq, rech aretaq kinopan in iwuk' man rajwaxik taj chi k'o puaq kāmulik.³ Aretaq in k'o chi iwuk', keintaq na b'i pa Jerusalén jachin taq ri e cha'tal chi iwumal. E are wa' kek'amow na b'i ri puaq ri i mulim ruk' ri wuj ri kinya b'i pa ki q'ab'.⁴ We k'u kāqachomaj chi rajwaxik kine' in, keb'e' na junam wuk'.

Ri apóstol Pablo kuchomaj jas kub'ano aretaq kopan pa ri tinimit Corinto

⁵ Aretaq kinopan iwuk' chila' pa Corinto, rajwaxik chi nab'e kinok'ow pa Macedonia. Te k'u ri' kinopan iwuk' ix.⁶ We ne kink'o'ji na kieb' oxib' ik' iwuk', we k'u ne kink'o'ji na chila' ronojel ri saq'ij. We je ri' kinb'ano, ri ix kixkowinik kinito' che ri nu b'inem jaw-ije' ri rajwaxik kine' chi wi na.⁷ Man kwaj tā k'ut chi xaq jun rat kinwil i wäch, xane are kwaj kink'o'ji na kieb' oxib' ik' iwuk', we are wa' kraj ri Dios.⁸ Kinkanaj k'u na pa ri tinimit Éfeso k'ā kuriqa na ri nimaq'ij re Pentecostés.^{*}⁹ Je ri' kinb'an na rumal chi kinwilo chi yo'm chwe chi kuya' kintzijo' ru Loq' Pixab' ri Dios rech k'ia kekojon na, pune k'u e k'ia xuquje' ri kākā'n ki k'ulel chwe.

¹⁰ We kopan ri Timoteo iwuk', chito' pa ronojel rech kākikot na iwuk', man k'o tā k'u jas kub'isoj. Je' chib'ana wa' che rumal chi ri are' kächakun chutzijoxik ru Loq'

Pixab' ri Dios je' jas ri kinb'an in.¹¹ K'o jun chiwe märetzelaj u wäch. Xane chito' rech kākowinik kutagej ru b'e ruk' utzil, rech kätzelej chi na loq' wuk' rumal chi ri in weye'm ri are' junam kuk' ri nik'iaj qachalal chik.

¹² Ri in sib'alaj xinx'ochi'j ri qachalal Apolos chi ke' ri are' junam kuk' ri nik'iaj qachalal che rilik jas i b'anom. Ri are' k'ut man xraj taj xe' kāmik. Ke' k'u na ri are' aretaq kākowinik.

Ri apóstol Pablo kuya apan rutzil ki wäch ri kojonelab'

¹³ Chk'astaj b'a' ri i chomanik, chijikib'a ri iwanima' rech kitaqej ri kojoni'k chrij ri Cristo. Mixej k'u iwib', xane chiwila' chi k'o i chuq'ab'.¹⁴ Ronojel ri kib'ano, chib'ana wa' rumal chi keiwaj konojel.

¹⁵ Qachalal, ri ix iwetam chi ri rachalaxik ri Estéfanos, e are' ri nab'e chke ri winaq chila' pa Acaya ri xekojon che ri Utzalaj Tzij re ri Evangelio. Ri e are' k'ut ki jachom kib' che ki patānixik ri qachalal kojonelab'.¹⁶ Kwaj k'ut chi ri ix keinimaj ri winaq ri je' kākā'no jas ri e are', xuquje' chi keinimaj konojel ri ketob'anik, ri kechakunik jas ri e are'.¹⁷ Kinkikotik rumal chi xepe ri Estéfanos, ri Fortunato, xuquje' ri Acaico. Ri e are' xka'no jachike ri man xixkowin tā ix chub'anik rumal chi man ix k'o tā waral.¹⁸ Ri e are' xkwalijisaj ri wanima' in xuquje' ri iwanima' ix. Nim b'a' cheiwila wi ri winaq ri e je' jas ri e are'.

¹⁹ Ri qachalal kojonelab' ri e k'o pa taq ri tinimit re Asia kākya b'i rutzil i wäch. Ri Aquila ruk' ri Priscila, xuquje' ri kojonelab' ri kākimulij kib' cho kachoch, kākya b'i nimalaj rutzil i wäch pa ru b'i' ri Qajaw Jesús.²⁰ Konojel ri qachalal kākya b'i rutzil i wäch. Chiya b'a' rutzil i wäch ix chb'il taq iwib'. Chitz'umaj iwib' chuwäch ri Dios. Retal k'u wa' chi gas kiwaj iwib'.

²¹ In wa', ri Pablo, kintz'ib'aj b'i wa' we rutzil i wäch ri' ruk' ri nu q'ab' in.

²² Jachin ri man loq' tā kār'il wi ri Qajaw Jesucristo, chpe ta na k'āx puwi' rumal ri Dios. jChpeta na la, Qajaw Jesús!

²³ Are ta b'a' ri Qajaw Jesucristo kätöq'ob'isan i wäch.²⁴ Pa ru b'i' ri Qajaw Jesús, kintaq b'i u b'ixik chiwe chi kixwaj ix nimalaj iwonojel. Amén.

* 16:8 “Pentecostés”: Chawila' Hechos 2:1, nota.

RI UKAB' CARTA RI XUTZ'IB'AJ RI SAN PABLO CHKE RI KOJONELAB' AJ CORINTO

Ri apóstol Pablo kuchap u tz'ib'axik jun carta chik chke ri qachalal kojonelab' aj Corinto

¹ In wa', ri Pablo, in apóstol. In jun chke ru taqo'n ri Jesucristo. Je wa' nu b'anik rumal chi are u rayib'al ri Dios. Ri in, wachi'l ri qachalal Timoteo, kintz'ib'aj b'i wa' we wuj ri' chke ri qachalal kojonelab' che ri Dios ri e k'o pa ri tinimit Corinto, xuquje' chke konojel ri e rech ri Dios ri e k'o pa taq ri tinimit re Acaya. ² Are ta b'a' ri Dios qa Tat xuquje' ri Qajaw Jesucristo kutoq'ob'isaj i wäch, kub'ano chi kuxlan ri iwanima'.

Ri apóstol Pablo kuku'b'i u k'ux chrij ri Dios chupam ri k'äx'ol

³ Qaya b'a' u q'ij ri Dios ru Tat ri Qajaw Jesucristo. Ri Are' are qa Tat ri kel u k'ux chqe, are ri qa Dios ri amaq'el kuku'b'isaj qa k'ux. ⁴ Ri Dios kuku'b'isaj qa k'ux chupam ronojel ri k'äx ri kâqariqo rech ri uj xuquje' kujkownik kâqaku'b'isaj ki k'ux ri tajin kâkiriq k'äx. Jas ru ku'b'isaxik qa k'ux uj u b'anom ri Dios, je' kâqa'n uj chuku'b'isaxik ki k'ux ri e are'. ⁵ Je' jas ri uj sib'alaj tajin kâqariq qe ri k'äx ri xuriq ri Cristo, are k'u rumal ri Cristo xuquje' sib'alaj kâku'b'isax na qa k'ux uj. ⁶ Rumal ri' we ri uj kâqariq k'äx, kâqariq wa' rech ri ix kâku'b'isax i k'ux, xuquje' kiriq ru tob'anik ri Dios. We k'u kâku'b'isax qa k'ux rumal ri Dios, je' k'u ri' kâb'an chqe rech ri ix xuquje' kâku'b'isax i k'ux, kiriq k'u na ru tob'anik ri Dios. Je' ri' kixkownik kich'ij ri k'äx'ol ruk' paciencia junam jas ri k'äx'ol ri tajin kâqariq uj. ⁷ Sib'alaj ku'l qa k'ux chiwij rumal chi qetam chi jas ri ix tajin kiriq iwe ri k'äx'ol, je' ri' xuquje' kiriq na iwe ri ku'lb'al k'ux ri kuya ri Dios.

⁸ Qachalal, kâqaj chi kiwetamaj chi sib'alaj nim ri k'äx ri xqariq pa Asia. Sib'alaj nim k'ut ri k'äx ri xqariqo chi man k'o tä chi qa chuq'ab' chuch'ijik wa'. Ri uj man ku'l tä chi qa k'ux chi kujk'asi'k, xane xqachomaj chi kujkâm wi na. ⁹ Xqana' chi je' ta ne q'atom tzij chqij chi kujkâmisaxik. Xqak'ulmaj k'u wa' we k'äx ri' rech kâqetamaj kâku'b'i qa k'ux chrij ri Dios ri keuk'astajisaj ri kâminaqib'. Man kâku'b'i tä k'u qa k'ux chb'il qib' uj. ¹⁰ Ri Dios xujuto' chuwach ri k'äxalaj kâmikal, xuquje' kujuto' na. Qa ku'b'am qa k'ux chrij ri Are' chi kutaqej na qa to'ik. ¹¹ Je' wa' kub'an na chqe we ri ix kujito' ruk' ri oración ri kib'an pa qa wi'. We e k'ia ri kâka'n orar pa qa wi', e

k'ia ri' xuquje' ri kemaltioxin na che ri Dios rumal ri nimaq taq u tewchib'al pa qa wi'.

Ri apóstol Pablo kub'ij jas che man xe' tä chik pa ri tinimit Corinto

¹² K'o ri sib'alaj kuya kikotemal chqe. Are la' chi kâqana' pa qanima' chi ch'ajch'oj ri qa k'aslemal xuquje' chi qas utz ri qa chomanik waral cho we uwächulew. Más k'u na je' ri qa b'anik wa' chixol ix xuquje'. Man xaq tä k'u ruk' ri qa no'j uj je' qa'nom wa', xane are ri Dios uj u to'm ruk' ri nimalaj u toq'ob'. ¹³ Ri qa tz'ib'am b'i chiwe chupam taq ri qa wuj are xaq xuwi ri kixkownik kisik'ij, ri kixkownik kich'ob'o. Ku'l k'u nu k'ux chi qas kixkownik kich'ob' na ronojel ri qa tz'ib'am b'ik, ¹⁴ je' jas ri i ch'ob'om jub'iq' kâmik, rech pa ri q'ij ri kâpe ri Qajaw Jesús, ri ix kixkownik kixkikot na qumal uj, je' jas ri uj kujkikot na iwumal ix.

¹⁵ Xku'b'i k'u nu k'ux chrij ronojel wa', je' ri' chi ri in nab'e kanoq xinchomaj kinopan iwuk' ix, rech je' ri' qas kixkikotik rumal chi kamul kinopan iwuk'. ¹⁶ Xinchomaj chi kinopan iwuk' aretaq kine' pa Macedonia. Xinchomaj k'ut chi aretaq kintzelej loq pa Macedonia kinopan chi na iwuk' jumul chik. Je' ri' ri ix xixkowni ta xinuto' rech kintaqej chi ri nu b'e, kine' pa Judea. ¹⁷ ¿A xa lo man qas utz tä u chomaxik xinb'ano aretaq xinchomaj u b'anik wa'? ¿A kichomaj ix chi xaq kinb'an ri nu chomanik jas ri kub'an jun winaq ajuwächulew ri kub'ij: "Je' ri' kinb'ano," te k'u ri' kub'ij chik: "Man je' taj?" —kâcha ri'. ¹⁸ Ri Dios k'ut kilowik chi ri uj man kâqab'ij tä chiwe: "Je' ri' kâqa'no," te k'u ri' kâqab'ij chik: "Man je' taj," —mujcha ne lo. ¹⁹ Je' ri', rumal rech ri Cristo Jesús ru K'ojol ri Dios ri kâqatzijoj uj chiwe, ri in, ri Silvano xuquje' ri Timoteo. Ri Are' k'ut man k'o tä jumul ri kub'ij: "Je'," te k'u ri' kub'ij chik: "Man je' taj," —man kâcha tä ri'. Ru Loq' Pixab' ri Dios rumal ri Cristo amaq'el ronojel q'ij are ri qas tzij. ²⁰ Ronojel k'u ri u b'im ri Dios, je' kel na rumal ri Cristo. Rumal ri' aretaq kâqaya u q'ij ri Dios kâqab'ij: "¡Amén!" —kujcha', rumal ri Cristo Jesús. ²¹ Tzare k'u ri Dios ri xb'anow chqe chi ri ix xuquje' ri uj qa jikib'am ri qanima' chrij ri Cristo, xuquje' xujutaso rech kâqajach qib' pu q'ab' ri Are'. ²² Xukoj qetal chi ri uj rech ri Are'. Ri Loq'alaj Espiritu k'ut ri xuya pa qanima', are k'utb'al wa' chi qas tzij kuya na ronojel ri xuchi'j chqe.

²³ K'ä mäja' k'u kinopan iwuk' pa Corinto jas ri xinchomaj nab'e. Are ri Dios ri kilowik, retam k'u ri Are' ri qas k'o pa wanima', chi xa rumal chi kintoq'ob'isaj i wäch man xinopan taj. ²⁴ Man xa tä k'u kâqaj kujtaqan pi wi' rech kikojo jachike ri kâqaj uj. Qilom

k'ut chi i jikib'am iwanima', qas ix kojoni-naq. Xane ri uj xa kâqaj kujtob'an iwuk' rech qas kixkikotik.

2

¹ Rumal ri' xinchomaj in chi man kinopan tä iwuk' jumul chik ri xa ta b'is kinya chiwe aretaq kinopanik. ² We k'u ri in kinya b'is chiwe, ¿jachin ta chik ri kuya kikitomel chwe in? Xaq xuwi ri ix ri' ri xa nu yo'm b'is chiwe kixkowin chub'anik wa'. ³ Rumal ri' xintz'ib'aj b'i ri jun wuj chik chiwe. Are la' chi man kwaj taj kine'k rech xa kin-riqa b'is iwumal, xane rajwaxik kib'ano chi kâkikot wanima'. Ku'l k'u nu k'ux chi are-taq kinkikot na in, ri ix xuquje' kixkikot na wuk'. ⁴ Aretaq k'ut xintz'ib'aj b'i ri jun wuj chik chiwe, sib'alaj in okinaq il, sib'alaj xinb'isonik, tajin k'u kinoq'ik. Man xintz'ib'aj tä k'u b'ik rech xa kixb'isonik, xane are kwaj chi kiwetamaj chi sib'alaj kixwaj nimalaj iwonojel.

Ri apóstol Pablo kusach u mak ri jun ri b'anowinaq k'âx chkixol ri kojonelab'

⁵ We k'o jun chiwe u yo'm b'is chwe, man xuwi tä chwe in ri' u yo'm wi, xane u yo'm jub'ig' ri' chiwe ix iwonojel. "Jub'ig'," — kincha'. Je' kinb'ij wa' rech man kinb'an tä sib'alaj nim ri k'âx che ri ajmak. ⁶ Ri k'âjisab'al u wäch ri achi ri' ri xiya che aretaq ximulij iwib', xaq ruk' b'a' la'. ⁷ Kâmik k'ut, xa chisacha u mak, chiku'b'isaj k'u u k'ux. We ne man kuch'ij tä chik, kuya k'u kan ronojel rumal ri nimalaj u b'is. ⁸ Rumal ri' kixinb'ochi'j chi kik'ut chi jumul ri utzil iwanima' che ri are' jas ri i b'anom petinaq loq. ⁹ Xa k'u rumal wa' xintz'ib'aj b'i ri nab'e wuj chiwe chrij wa'. Je' ri' xinb'ano che rilik, xuquje' che retamaxik we ri ix qas tzij kinimaj ronojel ri kinb'ij chiwe. ¹⁰ Jachin k'u ri kisach u mak ix, che apachike mak ru b'anom, ri in xuquje' kinsach u mak. We k'o jun nu sachom u mak, nu sachom u mak ri' chuwwäch ri Cristo rumal chi kintoq'ob'isaj i wäch ix, we qas tzij k'o mak ri rajwaxik kinsacho. ¹¹ Je' qa'na wa' rech ri Satanás man kujuch'ak taj. Qas qetam k'ut jas ri tajin kuchomaj u b'anik ri are'.

Ri apóstol Pablo xb'isonik aretaq xopan pa ri tinimit Troas rumal chi man xuriq tä ri Tito

¹² Aretaq xinopan pa ri tinimit Troas chutzijoxik ri Utzalaj Tzij re ri Evangelio chrij ri Cristo, xyi' chwe chi kuya' kintzijo na ru Loq' Pixab' ri Dios chila'. ¹³ Pune je ri', sib'alaj xinok il rumal chi man xinriq tä ri qachalal Tito. Rumal ri' xinell b'i kuk' ri qachalal kojonelab' chila', xine' k'u pa Macedonia.

Waral kâqil wi chi kujch'akan na rumal ri Cristo

¹⁴ Maltiox b'a' che ri Dios ri kuya chqe chi amaq'el ronojel q'ij kujch'akan na rumal ri Cristo Jesús. Rumal k'u qech uj kel u tzijol ru Loq' Pixab' ri Are' je' jas jun k'ok'alaj kunab'al ri kâjab'un ri ruxlab'. ¹⁵ Je ri', rumal chi ri uj je' qa b'anik jas u k'ok'al ri incienso ri käyi' che sipanik cho ri Dios rumal ri Cristo. Kâjab'un k'u ri ruxlab' chkixol ri winaq ri kâkiriq ru tob'anik ri Dios, xuquje' chkixol ri winaq ri xa kâsach na ki wäch. ¹⁶ Chke ri winaq ri xa kâsach na ki wäch we incienso ri' are je' jas ri ruxlab' jun kunab'al ri kâkâmisaniq. Chke k'u ri winaq ri kâkiriq ru tob'anik ri Dios are je' jas ri ruxlab' jun k'ok'alaj kunab'al ri kuya k'aslemal. ¿Jachin ta k'u lo ri qas kâkowin chub'anik wa' we chak ri' chutzijoxik ru Loq' Pixab' ri Dios? ¹⁷ Ri uj man xa tä ch'akoj tajin kâqa'n chrij ru Loq' Pixab' ri Dios, jas ri kâka'n k'ia winaq, kâkiyuj k'ut ruk' ri man qas tzij taj. Xane ruk' ri jikomal qanima' kâqatzijoj ri qas tzij chuwwäch ri Dios rumal chi uj u taqo'n ri Are', uj patânil taq re ri Cristo.

3

Ri uj are kâqatzijoj ri k'ak' trato ri xub'an ri Dios quk' uj

¹ Aretaq je' kâqab'ij wa', ¿a kichomaj ix chi xa tajin kâqachaplej chi jumul u ya'ik qa q'ij chb'il qib'? ¿A rajwaxik ne lo kâqaya jujun taq wuj chiwe ri kub'ij wi chi uj utz? ¿A rajwaxik chi kâqata' b'i jujun taq qa wuj chiwe ri kub'ij wi chi uj utz, junam jas ri kâka'n jujun winaq chik? ² Man je' tä ri', rumal chi xaq xuwi ix ri' ri ix ri wuj ri kajwataj chqe. Ix je' ta ne jun wuj ri tz'ib'tal pa taq ri qanima'. Konojel k'u ri winaq kekowinik kâketamaj wa', kâkisik'ij k'u u wäch. ³ Ri ix, ix je' jas jun wuj ri tz'ib'am rumal ri Cristo ri jachom qumal uj. We wuj ri' man tz'ib'am tä u wäch ruk' tinta, xane ruk' ri Loq'alaj Espiritu rech ri k'aslik Dios. Man e are tä tz'ib' ri xa cho tz'alam taq ab'aj e tz'ib'am wi, xane pa taq ri kanima' winaq.

⁴ Ku'l k'u qa k'ux chrij ri Dios rumal ri Cristo chi qas tzij wa' ri kâqab'ij. ⁵ Man xaq tä k'u uj pa qe wi kujkowin chub'anik ri kâqa'no, xane ronojel ri kujkowin chub'anik, are ri Dios ri käyo'w chqe chi kujkowinik chub'anik wa'. ⁶ Tzare k'u ri Dios xyo'w chqe chi kujkowinik kujpatânin che ri Are' ruk' jun k'ak' trato. Man are tä ru nimaxik jun taqanik ri xa tz'ib'talik, xane jun k'aslemal wa' ri kuya ri Loq'alaj Espiritu chqe. Ri Pixab' ri Tz'ib'talik kuq'at tzij puwi' jun chi kâkâmisaxik. Are k'u ri Loq'alaj Espiritu kuya k'aslemal.

⁷ We Pixab' ri' ri xutz'ib'aj ri qa mam Moisés, xtz'ib'ax wa' cho tz'alam taq ab'aj. Xpe k'u ruk' ri je'lalaj u juluwem ri Dios ri sib'alaj k'o u chuq'ab', je ri' chi ri winaq aj

Israel man xekowin tä chik xeka'y chupalaj ri qa mam Moisés, rumal chi sib'alaj käjuluw ru palaj. Pune je ri', nojim k'ut xtäni wa' we juluwem ri'. We ri Pixab' ri' ri kuq'at tzij puwi' jun chi käkamisaxik, sib'alaj nim u q'ij wa' xpetik, ⁸ ja mat k'u sib'alaj nim chi na u q'ij wa' ru Loq' Pixab' ri Dios ri kuya ri Loq'alaj Espiritu chqe? je', je ri' ⁹ Kel kub'ij wa': We ri Pixab' ri xa xuk'am loq kämik'al pa qa wi' sib'alaj xnimar u q'ij, ja mat sib'alaj nim chi na u q'ij wa' ru Loq' Pixab' ri Dios ri kub'ij chi kuya käjikomataj ri qanima' cho ri Dios? ¹⁰ Je ri', rumal chi ri Pixab' ri sib'alaj xnimar u q'ij nab'e, kämik man nim tä chi u q'ij wa'. Are sib'alaj nim chi na u q'ij we jun chik ri' chuwäch ri jun ri k'o nab'e. ¹¹ We k'u sib'alaj xnimar u q'ij ri ojer trato ri xa kieb' oxib' q'ij xub'an u patän, sib'alaj nim chi b'a' na u q'ij wa' ri k'ak' trato ri man käk'is tä na u wäch.

¹² Rumal k'u rech chi chrij wa' ku'l wi qa k'ux, xa je ri' man käqaxej tä qib' kujch'awik. ¹³ Man je' taj käqa'no jas ri xub'an ri qa mam Moisés ri xukoj jun ch'ugb'al u palaj rech ri winaq aj Israel man käkil taj aretaq kätäni ri juluwem ri sib'alaj kätunun chupalaj, ri juluwem ri xa tajin käsach u wäch. ¹⁴ Are k'u ri winaq aj Israel man xkich'ob' taj. Mäja' k'u käkich'ob' wa' kämik. Rumal ri' aretaq käkisik'ij ri ojer trato, ri ch'ugb'al ri xukoj ri qa mam Moisés are b'anowinaq chke chi man käkich'ob' taj, man esam tä k'u ri ch'ugb'al ri' chkiwäch. Xuwi k'u rumal ri Cristo are kesax na wa'. ¹⁵ K'a pa we q'ij kämik ri', aretaq käkisik'ij taq ri wuj ri xutz'ib'aj ri qa mam Moisés, je' ta ne k'o jun ch'ugb'al ri kub'an jech' che ri ki chomanik. ¹⁶ Aretaq k'ut jun winaq kätezej ruk' ri Qajaw Jesús, are je' ta ne kesax ri ch'ugb'al ri', kul k'u ru chomanik pa saq. ¹⁷ Ri Qajaw Jesús k'ut, are ri Espiritu. Jachin k'u ri k'o ri Loq'alaj Espiritu rech ri Qajaw Jesús pa ranima' man k'o tä chi ri' pu q'ab' ri ojer Pixab'. ¹⁸ Rumal k'u ri' qonojel ri uj man ch'uq'tal tä chi ri qa palaj, xane uj je' jas jun espejo ri käq'alajin wi ri je'lalaj u juluwem ri Qajaw Jesús. Je ri' ri uj nojim je' tajin kujel na jas ri Cristo, rumal chi ronojel q'ij käq'alajin na jub'iq' chik che ri je'lalaj u juluwem pa ri qa k'aslema. Are wa' ri kub'an ri Loq'alaj Espiritu re ri Qajaw Dios.

4

¹ Man käk'istaj tä b'a' qa k'ux rumal chi ri Dios u yo'm pa qa q'ab' chi käqatzijoj ru Loq' Pixab' ri Are' chrij ri k'ak' trato rumal chi xel u k'ux chqe. ² Qetzelam u wäch ri k'ixb'al u b'anik xuquje' ri xa käb'an chi k'uyal. Man keqasub' tä ri winaq, man käqak'ex tä ru Loq' Pixab' ri Dios, xane xuwi

käqab'ij ri qas tzij. Je ri' käqa'no rech konojel ri winaq kuya' käkina' na pa kanima' chi utz ri käqa'n cho ri Dios. ³ We k'u ri Utzalaj Tzij re ri Evangelio ri käqatzijoj are ch'uq'talik, xaq xuwi chkiwäch ri winaq pa xa käsach na ki wäch are ch'uq'tal wi. ⁴ Rumal chi man kekojon taj, ri dios re we uwächulew ri* are b'anowinaq chke chi sachinaq ri ki chomab'al, je' ta ne chi man kekowin taj keka'yik. Je ri' u b'anom chke rech man käkil tä ri saqil re ri Utzalaj Tzij re ri Evangelio chrij ri Cristo ri sib'alaj nim u q'ij. Are k'u ri Cristo, are ri qas u wächb'al ri Dios. ⁵ Aretaq käqatzijoj ru Tzij ri Dios, man uj taj käqatzijoj qib', xane are käqatzijoj ri Jesucristo chi are Qajaw. Are k'u ri uj xuwi käqaq'alajisaj qib' chi uj patänil taq iwe rumal chi loq' käqil wi ri Jesús. ⁶ Ri Dios k'ut ri xtaqanik chi kätunun ri saqil pa ri q'equm, are k'u wa' ri xub'ano chi kätunun ru saqil ri Are' pa taq ri qanima' rech ruk' we saqil ri' käqetamaj chi sib'alaj känimarisax u q'ij ri Dios. Q'alaj wa' chupalaj ri Jesucristo.

Chujkojon che ri Dios pa ronojel

⁷ We q'inomal ri' ajchikaj k'o pa ri qa cuerpo ri je' ta ne e b'o'j b'anom ruk' ulew. Je ri' rech q'alaj chi we nimalaj chuq'ab' ri' ri k'o kuk', ruk' ri Dios käpe wi, man qech tä k'u uj. ⁸ Pune käqariq k'äx je wa' je ri', amaq'el kujel chupam. Pune sib'alaj kujok il, man käk'istaj tä kan qa k'ux. ⁹ Pune käb'an k'äx chqe kumal ri winaq, man uj wonob'am tä kanoq. Pune kujgasax cho rulew, kujsoktaj k'ut, man käsach tä wäch. ¹⁰ Apawije' ta ne ri kuje' wi k'o ri retal ru kämik'al ri Jesús che ri qa cuerpo, are wa' ri k'äx ri tajin käqariqo. Je ri' rech xuquje' q'alaj ru k'aslema ri Jesús pa taq ri qa k'aslema uj. ¹¹ Ri uj ri k'a uj k'asal na, ronojel q'ij uj k'o cho ri kämik'al rumal rech ri Jesús, rech ru k'aslema ri Jesús käq'alajin pa taq ri qa cuerpo uj ri xa käsach ki wäch. ¹² Ri uj, rumal ru tzijoxik ru Loq' Pixab' ri Dios, xa jub'iq' man käpe ri kämik'al pa qa wi'. Are k'u ri ix xa tajin kiriq na ri k'aslema.

¹³ Ru Loq' Pixab' ri Dios ri Tz'ib'talik kub'ij: "Xinkojon che ri Dios. Rumal k'u ri' xintzijonik," —kächa'. Ri uj xuquje' je' käqa'no. Kujkojon che ri Dios, rumal k'u ri' kujtzijonik. ¹⁴ Qetam k'ut chi ri Dios ri xuk'astajisaj ri Qajaw Jesús chxixol ri käminaqib', ri uj xuquje' kujuk'astajisaj na chxixol ri käminaqib' junam ruk' ri Jesús. Kujuk'am k'u na b'i chuwäch ri Are' junam iwuk' ix. ¹⁵ Ronojel wa' xb'antajik chub'anik utzil chiwe. Je ri' rech we e k'ia ri käkiriq ri nimalaj u toq'ob' ri Dios, e k'ia xuquje' ri käkiya na maltioxinik che ri Are' rech känimarisax k'u na u q'ij ri Dios.

* 4:4 "Ri dios re we uwächulew ri" kel kub'ij ri Itzel, ri Satanás.

¹⁶ Rumal ri' man kāk'istaj tā qa k'ux. Pune we qa cuerpo ri' xa tajin kārijob'ik, ri qanima' k'ut tajin kub'an na k'ak' ronojel q'ij. ¹⁷ Ri k'āxk'ol ri kākariq pa we k'aslemal ri' man nim tā wa', xane xa re kieb' oxib' q'ij. Kuya k'u chqe chi kākariq na qe ri nimarisab'al u q'ij ri Dios ri man k'o tā u k'isik, ri sib'alaj nim na chuwäch ri k'āxk'ol. ¹⁸ Mäku'b'i b'a' qa k'ux chkij ri jastaq ri keilitajik, xane are ku'l qa k'ux chkij ri man keilitaj taj, rumal chi ri jastaq ri keilitajik xa kāsach ki wäch, are k'u ri man keilitaj taj man k'o tā ki k'isik.

5

¹ Qetam k'ut chi we kāsach u wäch ri qa cuerpo ri je' jas jun ja ri man naj taj kuch'ijo, k'o chi na jun qachoch ri u b'anom u b'anik ri Dios pa ri kaj ri man kāsach tā u wäch. Are jun ja ri man xa tā b'anom kumal winaq. ² Qas tzij ri uj, ri k'ā uj k'o na pa ri qa cuerpo ri', kujel ch'uj rumal chi are sib'alaj kākaj kujq'ax pa ri qachoch ri k'o chila' chikaj. ³ Ri qachoch jela' are jun k'ak' cuerpo wa' ri je' ta ne jun atz'iaq ri kujuch'uq na rech man kujch'ani tā kanoq. ⁴ Ri uj, ri k'ā uj k'asal na pa we qa cuerpo ri je' ta ne jun ja, kujel ch'uj, kākana' k'u k'āx pa qanima'. Man are tā chi kākaj chi kāsach u wäch ri qa cuerpo ajuwächulew, xane are kākaj jun qa cuerpo chik ri kujuch'uqu je' jas jun k'ak' atz'iaq rech ri qa cuerpo ri xa kāsach u wäch kāk'extaj na wa' rumal ri jun k'aslemal chik ri man k'o tā u k'isik. ⁵ Are k'u ri Dios xb'anow chqe chi je' qa b'anik wa'. U yo'm k'u ri Loq'alaj Espíritu pa qanima'. Are k'utb'al wa' chi qas tzij kuya na ronojel ri xuchi'j chqe.

⁶ Rumal ri' amaq'el ronojel q'ij kākub'i qa k'ux chrij ri Dios. Qetam chi ri uj, ri k'ā uj k'o pa we cuerpo ri', je' ta ne man uj k'o tā cho qachoch rumal chi māj'a' uj k'o ruk' ri Qajaw Jesús. ⁷ Ri kākana' ronojel q'ij, kākana' wa' ruk' kojoni. Man are tā kākub'i qa k'ux chrij ri kākilo. ⁸ Sib'alaj kākub'i k'u qa k'ux chrij ri Dios. Kākaj ta ne chi mat uj k'o chi waral pa we qa cuerpo ri' rech kuya' kujek'ol cho ja ruk' ri Qajaw Jesús. ⁹ Rumal ri' are kākaj kākana' ronojel q'ij jachike ri utz kāril wi ri Qajaw Jesús, we uj k'o waral pa ri qa cuerpo o man uj k'o tā chi waral. ¹⁰ Qonojel k'ut rajwaxik kujetak'al na chuwäch ri Cristo rech kuq'at tzij pa qa wi'. Chqajujunal k'ut kākak'am na ri tojb'al re ri xqa'n pa ri qa k'aslemal waral cho we uwächulew, we are utz o man utz tā ri' ri xqa'no.

Waral kākil wi chi ru Loq' Pixab' ri Dios ri kākatzijoj kuya utzil chkixol ri winaq ruk' ri Dios

¹¹ Rumal k'u ri' ri uj ri qetam chi rajwaxik kākaxej qib' cho ri Dios, kākakoj qa chuq'ab' rech kākikoj ri winaq chi qas tzij ri kākab'ij.

Ri Dios k'ut retam jas ri qa b'anik. Kwaj ta na chi ri ix xuquje' kina' pa iwanima' chi utz qa b'anik. ¹² Man xa tā tajin kākaya qa q'ij chb'il qib' jumul chik, xane tajin kākaya chiwe ix chi k'o jas che kuya' kākub'i i k'ux chqij pa ronojel. Je ri' rech k'o ri kib'ij chuto'ik iwib' chkiwäch ri kākana' nimal xa rumal ri ki b'anik ri winaq, man rumal tā ri k'o pa ri kanima'. ¹³ We kichomaj ix chi xa kujel ch'uj chupam ri kākana', are chuya'ik u q'ij ri Dios ri'. We k'u kichomaj chi man kujel tā ch'uj, utz ri qa chomanik, are chub'anik utzil ri' chiwe ix. ¹⁴ Are k'u ri rutzil ranima' ri Cristo kātqaan pa qanima'. Qetam k'ut chi xa jun ri xkām che qa k'exwäch qonojel. Rumal ri' are je' ta ne chi ri uj qonojel xujkāmik aretaq xkām ri Are' rumal qech. ¹⁵ Ri Cristo xkām rumal kech konojel ri winaq, rech ri e k'aslik man kākana' tā chik xa jas ri kākaj ri e are', xane are kākana' jas ri kraj ri Cristo ri xkāmik, ri xuquje' xk'astaj chkixol ri kāmīnagib' rumal kech. ¹⁶ Rumal ri' ri qa chomanik uj kāmik chkij ri winaq man junam tā chi ruk' ri ki chomanik ri winaq ajuwächulew. Pune nab'e kanoq je' qa chomanik wa' chrij ri Cristo jas ri ki chomanik ri winaq ajuwächulew, man je' tā chi k'u qa chomanik wa' chrij ri Are' kāmik. ¹⁷ Je k'u ri' ri winaq ri xa jun chik ruk' ri Cristo, je' ta ne chi xil na u wäch jumul chik. Jun chi wi ru k'aslemal. Ri ojer u k'aslemal xsach u wäch, kāmik k'ut ronojel are k'ak' chik.

¹⁸ Ronojel wa' are ri Dios kāk'anowik, ri xuya utzil chqaxol ruk' Are' rumal ri Cristo. Xuya k'u pa qa q'ab' ru tzijoxik chi kuya' keutzir ri winaq ruk' ri Are'. ¹⁹ Kel kub'ij chi rumal ri Cristo ri Dios tajin kerutzirisaj konojel ri winaq ruk' ri Are' rech man kukoj tā chi pa kuenta ri ki mak. Xuya k'u pa qa q'ab' uj ru tzijoxik ru Loq' Pixab' chke ri winaq rech keutzir ruk' ri Dios. ²⁰ Rumal ri' uj petinaq, uj u taqo'n ri Cristo, je' ta ne chi are ri Dios tajin kāk'ochi'n chiwe rumal qech uj. Kixqab'ochi'j b'a' rumal ri Cristo: jChixutzir ruk' ri Dios! —kujcha'. ²¹ Ri Cristo man k'o tā jun mak xub'ano. Xa k'u rumal qech uj xb'an che rumal ri Dios chi je' ta ne ajmak, rech ri uj rumal chi xa uj jun chik ruk' ri Cristo kākikomataj na ri qanima' cho ri Dios.

6

¹ Je k'u ri' ri ix ri junam kixchakun quk' chupatānixik ri Dios, kixqab'ochi'j chi nim chiwila wi ri toq'ob' ri xub'an ri Dios chiwe, miwetzelay k'u u wäch wa'. ² Kub'ij k'u ri Are' pa ru Loq' Pixab' ri Tz'ib'talik: Xinto aretaq xab'an orar pa jun q'ij ri gas utz chub'anik wa'.

Pa ri q'ij ri xak'am ri nu tob'anik xinto ri xab'ij, xatinto' k'ut,

—kächa'. Kämik k'ut are wa' ri utzalaj q'ij ri', kämik k'u ri' ri q'ij ri kixkowinik kiriq ru tob'anik ri Dios.

³ K'o b'a' jas mäqa'no ri xa kub'ano chi jun chik kätzaqik, rech man käb'ix tä ri man utz taj chrij ri kăqa'no chupatänixik ri Dios.

⁴ Xane kăqaj kăqaj'alajisaj qib' pa ronojel chi uj patänil taq re ri Dios. Q'alaj wa' aretaq sib'alaj kăqachajij paciencia chuch'ijik ri k'ăx, ri meb'a'il, xuquje' k'ia u wăch k'ăxk'ol.

⁵ Uj ch'ayom, xuquje' uj kojom pa che'. Ki walijisam kib' ri winaq chqij, xuquje' qa'nom k'ăx taq chak. K'ia mul elinaq qa waram, xuquje' qa riqom numik. ⁶ Xuquje' qa q'alajisam chi uj patänil re ri Dios rumal chi ch'ajch'oj ri qa k'aslemal, rumal chi qetam ri qas tzij, k'o qa paciencia, kăqa'n utzil, xuquje' rumal chi k'o ri Loq'alaj Espiritu pa qanima', qas k'u keqaj nimalaj konojel.

⁷ Xuquje' q'alaj wa' aretaq kăqatzijoj ri qas tzij, k'o k'u ru chuq'ab' ri Dios pa qanima'. Ri qanima' ri jikom ru yo'm ri Dios chqe are wa' kăqakoj pa ri ch'oj ruk' ri Itzel, xuquje' che qa to'ik qib'. ⁸ K'o jutaq mul ri käyi' qa q'ij, k'o k'u jutaq mul ri xa tzel kujil wi. K'o jutaq mul ri utz qa tzijoxik käb'anik, k'o k'u jutaq mul ri xa kujyoq'ik. Xuquje' k'o jutaq mul ri käb'ix chqe chi xa uj b'anal taq tzij, k'o k'u jutaq mul ri käb'ix chqe chi kăqab'ij ri qas tzij. ⁹ K'o jutaq mul ri käb'ix chqe chi man etamtal tä qa wăch, pune qas tzij etamtal qa wăch. K'o jutaq mul ri kujopan cho ri kămikal, xaq k'u are uj k'asal na. Pune kăk'ăjisax qa wăch, man uj kămisam tä k'ut. ¹⁰ Pune k'o ri kuya b'is chqe, kujkikot amaq'el ronojel q'ij. Pune uj meb'a', e k'ia k'ut ri e q'inomarinaq gumal. Pune are je' ta ne chi man k'o tä ri jastaq qe, ronojel k'ut tz'aqat u wăch k'o quk'.

¹¹ Qachalal aj Corinto, qa b'im ronojel chiwe chi saqil. Qas qa q'alajisam chiwăch ix ronojel ri k'o pa qanima'. ¹² Ri uj man k'o tä chi jas ri mat qa b'im chiwe ri k'o pa qanima'. Ix k'u ri' k'o na jas ri man i b'im tä chqe ri k'o pa iwanima'. ¹³ Kixinb'och'i', je' jas ri kub'an jun tata' chke ri ralk'ual. Chiq'alajisaj chnuwăch ri qas k'o pa ri iwanima' je' jas ri xinb'an in iwuk' ix.

Ri apóstol Pablo kub'ij chi uj ri' ri nimalaj rachoch ri Dios

¹⁴ Mib'an iwachi'l chke winaq ri man e kojonelab' taj, mixk'uli k'u kuk'. We je ri' kib'ano, man junam tä i wăch ri' kixk'oji'k. ¿A kărachi'laj lo rib' ri jikomal ruk' ri etzelal? ¿A rachi'l lo rib' ri saqil ruk' ri q'equmal? ¿Man je' tä ri'! ¹⁵ ¿A kăjunamataj lo u wăch ri Cristo ruk' ri Satanás? ¿A kăjunamataj lo u wăch ri kojonel ruk' ri man kojonel taj? ¿Man je' taj! ¹⁶ ¿A kuya' lo kuk'ulaj rib' ri nimalaj rachoch Dios kuk' ri tiox ri xa e b'anom kumal winaq? ¿Man kuya' taj! Ix k'u ri' ri

ix nimalaj rachoch ri k'aslik Dios, je' jas ri xub'ij ri Are':

Kink'oji na kuk', kinwakat k'u na chkixol.

Kinok na che ri ki Dios,

ri e are' k'ut keb'ok na che ri nu winaq in, —kächa'.

¹⁷ Rumal' ri' xuquje' kub'ij ri Qajaw Dios:

Chixel kuk' we winaq ri',

chitasa k'u iwib' chkiq.

K'o jas michapo ri äwas u chapik chiwe,

kixink'ulaj k'u na.

¹⁸ Kinok k'u na che ri i Tat,

ri ix k'ut kixok na che taq

ri nu k'ojal, nu mia'l,

—kächa ri Qajaw Dios ri k'o ronojel u wăch chuq'ab' ruk'.

7

¹ Je k'u ri', loq'alaj taq qachalal, are wa' ri kuchi'j ri Dios chqe. Rumal ri' rajwaxik kăqatas qib' chrij ronojel äwas ri kutz'illoj ri qa cuerpo, xuquje' ri qanima'. Qas qajacha ri qa k'aslemal pu q'ab' ri Dios, nim qila wi ri Are', qaxej k'u qib' chuwăch.

Ri apóstol Pablo kăkikot kumal ri kojonelab' aj Corinto

² ¿Qas chujk'ol b'a' pa iwanima'! Man k'o tä ya' jun ri qa'nom k'ăx che, man k'o tä jun ri mat qa'nom ri utz ruk', man k'o tä k'u jun ri qa sub'um. ³ Man kinb'ij tä wa' chiwe chub'ixik chi k'o i mak. Nu b'im k'u chiwe nab'e kanoq chi ix k'ăx pa wanima'. We kujk'asi'k, junam kujk'asi'k, we k'u kujkămik, junam kujkămik. ⁴ Kăku'b'i nu k'ux chiwij. Sib'alaj kinkikot iwumal. Chupam ronojel ri k'ăx ri kăqariqo xa sib'alaj kăwalijisax ri wanima', nim k'u ri kikotemal kinna' iwumal.

⁵ Tzaretaq xujopan pa Macedonia man k'o tä jub'iq' uxlanem qa riqom, xane qa riqom k'ăx pa ronojel. K'ăxk'ol je ri', k'ăxk'ol je wa', xuquje' xpe ch'oj kuk' nik'iaj chik. Xaq k'u qa xe'm qib'. ⁶ Are k'u ri qa Dios ri kuwalijisaj kanima' ri keb'isonik, xuwalijisaj ri qanima' uj rumal ri ropanik ri Tito. ⁷ Man xuwi tä k'u rumal ri ropanik ri are', xane xuquje' rumal chi ri ix iwalijisam ri ranima' ri are'. Ri are' xutzijoj chqe chi sib'alaj kiwaj kiwil qa wăch. Xuquje' xub'ij chqe chi sib'alaj kixb'isonik, chi sib'alaj kixok il wumal in. Rumal k'u ri' sib'alaj xinkikot na.

⁸ Pune k'u ri wuj ri xintz'ib'aj b'ik xuya b'is chiwe, man kinb'ison tä k'u in kămik chi xintz'ib'aj wa' chiwe. We k'u xinb'ison jub'iq', man naj tä ri', rumal chi xinwilo chi man naj taj xixb'ison ix rumal ri wuj. ⁹ Kămik k'ut kinkikotik, man rumal tä rech chi xinya b'is chiwe, xane rumal chi ri b'is ri xina' xub'ano chi xik'ex ri i chomanik, xik'ex k'u ri iwanima'. Ri ix xich'ij ri b'is, je

ri' chi utz xilitaj wa' cho ri Dios. Je ri' man xa tä are jun k'äx ri xqa'n uj chiwe. ¹⁰ Ri b'is ri kuch'ij jun ri utz kilitaj cho ri Dios kub'ano chi jun winaq kuk'ex ru chomanik, kuk'ex ri ranima', kuriq k'u ru tob'anik ri Dios. Man kuya' tä k'u käqab'isoy wa'. Are k'u ri b'is ri kuya ruwächulew xa kuk'am loq ri kämikal. ¹¹ Ri ix xich'ij ri b'is je ri' chi utz xilitaj wa' cho ri Dios. ¡Chiwilampe k'ut ri xuk'am loq wa' pa ri i k'aslemal! Xub'ano chi xichomaj rij ri xb'anik, xiq'alajisaj k'ut jas ri i b'anom. Xub'ano chi xpe iwoyowal che ri ajmak, xuquje' xixej iwib'. Xub'ano chi kiwaj kiwil nu wäch. Xiya k'u i tzij chuk'äjisaxik u wäch ri xb'anow ri mak. Pa ronojel wa' xiq'alajisaj chi man k'o tä i mak ix che ronojel ri xb'antajik. ¹² Je k'u ri', aretaq xintz'ib'aj b'i ri wuj chiwe, man qas tä are tajin kinchomaj ri winaq ri xmakunik, man are tä k'u ri xuriq k'äx rumal, xane are kwaj chi qas kiwetamaj chuwäch ri Dios chi sib'alaj kixok il chqe. ¹³ Rumal ri' ku'l qa k'ux kämik.

Man xuwi tä wa' ri ku'l wi qa k'ux, xane sib'alaj kujkikot na aretaq käqilo chi nim ri kikitomel ri k'o pa ranima' ri Tito. Ri ix iwonojel sib'alaj xito' rech man k'o tä b'is xuna' aretaq xk'o'ji iwuk'. ¹⁴ Man xaq tä k'u loq' ri xinb'ij che ri Tito chi sib'alaj kinkikot iwumal. Xane ronojel ri qa b'im chiwe ix are qas tzij, je' k'ut xuquje' ri xqab'ij chiwij che ri Tito are qas tzij. Are la' chi sib'alaj kujkikot iwumal. ¹⁵ Más ix loq' k'u na chuwäch ri Tito aretaq käna'taj che ki iwonojel ix xib'ano jas ri xixutaj wi, xuquje' chi nim xiwil wi aretaq xopan iwuk', xik'ulaj, man xib'an tä k'u nimal chuwäch. ¹⁶ Sib'alaj kinkikot na rumal chi kuya' qas käku'b'i nu k'ux chiwij.

8

Chiya ri kajwataj chke ri qachalal meb'a'ib'

¹ Kämik k'ut, qachalal, käqaj käqab'ij chiwe jas u b'anom ri nimalaj u toq'ob' ri Dios pa ki wi' ri qachalal kojonelab' pa taq ri tinimit re Macedonia. ² Ri e are', pune sib'alaj ki riqom k'äx, sib'alaj k'ut xeb'ok il rumal, nim ri kikitomel k'o pa kanima'. Pune sib'alaj e meb'a', ki yo'm k'ia sipanik ri xpe pa kanima' je' ta ne e q'inomab'. ³ Kinb'ij ri xinwilo, chi ronojel ri xekowin chuya'ik, are pa kanima' xpe wi. Man xuwi tä k'u xkiya jampa' ri xekowin che, xane xkikoj ki chuq'ab' chuya'ik jub'iq' chik. ⁴ Sib'alaj xujkib'ochi'j chi käqaya chke chi ri e are' xuquje' ketob' chke ri qachalal ri k'o ki rajwaxik. ⁵ ¡Nim na ri xka'no chuwäch ri xqachomaj uj chi kekowin che! Nab'e xkijach kib' pu q'ab' ri Qajaw Dios, te k'u ri' xkijach kib' chqe uj chunimaxik ri xqab'ij chke

junam jas ru rayib'al ri Dios. ⁶ Rumal ri' xqata' toq'ob' che ri Tito chi kutagej u b'anik ru chaplem loq, are ru mulixik chixol ri tob'anik ri käpe pa iwanima'. ⁷ Ri ix k'ut nim ri i b'anom pa ronojel: sib'alaj kixkojonik, sib'alaj kixna'wik keitijoj ri winaq, sib'alaj k'o iwetamb'al, sib'alaj kixok il che ronojel, xuquje' sib'alaj kujiwaj. Rumal ri' rajwaxik b'a' xuquje' chi nim chib'ana che ki to'ik ri qachalal ri k'o ki rajwaxik.

⁸ Man are tä jun taqanik wa' ri tajin kinya chiwe. Xuwi kwaj chi kiwetamaj ri tajin käka'n nik'iaj kojonelab' chik ri sib'alaj käkaj ketob'anik rech käq'alajinik we qas tzij keiwaj ix ri qachalal. ⁹ Iwetam chi k'u ix ri nimalaj toq'ob' ri xub'an ri Qajaw Jesucristo chiwe. Ri Are' q'inom, xub'an k'u meb'a' che rib' chub'anik utzil chiwe, rech rumal ru meb'a'il ri Are' ri ix kixq'inomarik.

¹⁰ Chub'anik utzil chiwe kinya ri nu chomanik chrij ronojel wa'. Ri ix junab'ir utz xib'ano xichap loq u b'anik we utzil ri'. Man xaq tä k'u xichap u b'anik wa', xane ruk' nimalaj kikitomel xib'an wa'. ¹¹ Kämik k'ut chitagej u b'anik wa' k'ä kik'is na u wäch ruk' nimalaj kikitomel jas ri i b'anom petinaq loq. Chiya b'a' jas ri kixkowin che, jas ri k'o iwuk'. ¹² We jun winaq qas k'o ru rayib'al chuya'ik ri tob'anik, ri Dios kuk'amowaj ri' ri sipanik joropa' ri k'o ruk'. Ri Are' man kuta' tä ri man k'o tä ruk' jun.

¹³ Man are tä kwaj chi xa ix kixkanaj kan pa meb'a'il rumal ri ki to'ik nik'iaj chik. ¹⁴ Ri kwaj in are la' chi junam ri jastaq iwe k'olik. Kämik ri ix k'o ri jastaq iwe che ki to'ik nik'iaj chik chupam ri ki rajwaxik. Käpe k'u na ri q'ij aretaq k'o na ri i rajwaxik ix. Ri e are' k'ut kixkito' na ix aretaq k'o i rajwaxik. Je ri' junam ri tewchib'al kirigo. ¹⁵ Are je w' jas ri kub'ij ru Loq' Pixab' ri Dios ri Tz'ib'talik: "Ri jun ri k'ia xuriqo, man xok'ow tä u wi' ri xkanaj ruk'. E k'u ri jun ri man k'ia taj xuriqo, xaq are xub'ana che," —kächa'.

Waral käqil wi jachin taq ri xetaq b'i che rachi'l ri Tito

¹⁶ Maltiox che ri Dios rumal chi xuya pa ranima' ri Tito chi sib'alaj kok il chiwe jas ri kinb'an in. ¹⁷ Ri are k'ut xunimaj jas ri xintaq wi. Rumal chi ri are' xuquje' sib'alaj kok il chiwe, are kraj käril chi na i wäch. Rumal ri' kämik pa ranima' käpe wi ri ke'k, kopan na iwuk'.

¹⁸ Junam ruk' ri Tito tajin käqataq b'i jun qachalal chik. Ri qachalal ri' sib'alaj utz kech'aw konojel ri qachalal kojonelab' chrij rumal chi sib'alaj utz u b'anom chutzijoxik ri Utzalaj Tz'ij re ri Evangelio. ¹⁹ Man xuwi tä wa', xane xuquje' are ri are' ri xkicha' ri qachalal kojonelab' che qachi'l pa ri qa b'inem che qa to'ik pa we chak ri' ri tajin käqa'no chunimarisaxik u q'ij ri Dios xuquje'

chuk'utik chi sib'alaj kixkikot chub'anik ri utzil. Wa' we chak ri' are ru ya'ik ri kápe pa ranima' jun che ki to'ik ri k'o ki rajwaxik. ²⁰ Je ri' tajin káqa'no rech man k'o tá jun kub'ij tzij chqij rumal rech we nimalaj sipanik ri' ri tajin káqamulij. ²¹ Tajin káqakoj qa chuq'ab' chub'anik ri qas taqal u b'anik, man xuwi tá chuwäch ri Dios, xane xuquje' chkiwäch ri winaq.

²² Kuk' ri e are' tajin káqataq b'i jun qachalal chik ri qilom chi sib'alaj kok il chub'anik ronojel. Kámik k'ut sib'alaj káikotik rumal chik qas káku'b'i u k'ux chiwij. ²³ We k'o jachin jun k'o jas kuta' chrij ri Tito, chib'ij che chi are wachi'l ri junam káchakun wuk' che i patánixik ix. We k'o jun k'o jas kuta' chikij taq ri nik'iaj qachalal chik, chib'ij che chi ri e are' e taqowinaq b'i ri qachalal kojonelab', xuquje' chi kákinimarisaj u q'ij ri Cristo. ²⁴ Rumal ri', chik'utu b'a' chi qas tzij keiwaj ri e are'. Je ri' rech káketamaj konojel ri qachalal kojonelab'. Xuquje' rech ketam chi man xaq tá loq' káqab'ij chi kujkikot uj iwuk'.

9

Ri kojonelab' aj Corinto ketob' chke ri qachalal ri k'o ki rajwaxik

¹ Chrij k'u ri puaj ri kámulix che ki to'ik ri qachalal kojonelab', qas tzij chi man rajwaxik tá chi k'o na ri kintz'ib'aj b'i chiwe. ² Je ri', rumal chi wetam chik chi k'o ri utzalaj i rayinik che ki to'ik. Amaq'el k'ut kinkikot chub'ixik wa' chke ri kojonelab' aj Macedonia chi ri ix, ri ix aj Acaya, sib'alaj kiwaj kixtob'anik. Junab'ir k'ut i chaplem loq u b'anik wa'. E k'ia k'ut chke ri aj Macedonia ri sib'alaj xyaktaj kanima' rumal ri nimalaj kikitomel ri k'o pa iwanima' ix. ³ Pune je ri', e nu taqom k'u b'i ri qachalal ri' iwuk' rech qas je' kelik jas ri utz ri nu b'im chiwij chrij we tob'anik ri'. Kel kub'ij chi qas tzij kib'an u b'anik iwib' che ki to'ik ri qachalal jas ri nu b'im kanoq. ⁴ We ne e k'o jujun aj Macedonia keb'e' wuk' in, te k'u ri' aretaq kujopanik mája' kimulij we tob'anik ri'. We je ri', xa kel na qa k'ixb'al uj ri' rumal chi sib'alaj qa ku'b'am qa k'ux chiwij. E ta k'u lo ri ix, za mat kel na i k'ixb'al ri? ⁵ Rumal ri' tzrajwaxik wi xinta' toq'ob' chke ri qachalal chi keopan iwuk' nab'e rech kixkito' chumulixik apan ri sipanik ri i b'im chi kiya petinaq loq. Je ri' ri sipanik ri kimulij k'o chik aretaq kujopanik, q'alaj k'ut chi xpe pa ri iwanima', man xa tá káqatoq'ij na chiwe.

⁶ Chna'taj wa' chiwe: Jachin ri man nim taj kutiko, man nim tá ri' ri kuyako. Jachin k'u ri nim kutiko, nim na ri' ri kuyako. ⁷ Chijujunal b'a' chiya jampa' ri kápe pa iwanima', man ruk' tá b'is, man xa tá kátoq'ix chiwe, rumal chi ri Dios loq' káril wi jachin ri kuya ruk' kikitomel. ⁸ Ri Dios

kákowinik kuya ronojel u wäch nimaq taq tewchib'al chiwe rech je ri' amaq'el k'o ronojel ri kajwataj chiwe, xuquje' rech sib'alaj k'o na iwe ronojel ri rajwaxik chub'anik ronojel u wäch utzil. ⁹ Ru Loq' Pixab' ri Dios ri Tz'ib'talik kub'ij:

U yo'm k'ia u wäch tob'anik

chke ri meb'a'ib'.

Ri utzil ri kub'ano man k'o tá u k'isik, —kácha'. ¹⁰ Ri Dios ri kuya ri ija' ri kátikik, ri kuya ronojel u wäch ri kátikik, kuya na ronojel ri kajwataj chiwe che taq ri i tiko'n, xuquje' keuk'iyisaj na rech sib'alaj kewáchinik. Je ri' rech kixkowinik kib'an ronojel u wäch utzil. ¹¹ Je ri' ri ix k'o na ronojel u wäch q'inomal iwuk' rech kixkowinik kisipaj ri kápe pa iwanima'. Rumal k'u qech uj ri kujk'amow b'i ri puaj, ri qachalal ri káik'am na ri sipanik ri kitaq b'ik sib'alaj kákiya na maltioxinik che ri Dios. ¹² Je ri', rumal chi aretaq káqaya we tob'anik ri' chke ri qachalal man xuwi taj káqaya ri rajwaxik chke, xane rumal wa' tajin káqa'no chi ri e are' sib'alaj kákiya na maltioxinik che ri Dios. ¹³ Ri e are' kákiya na u q'ij ri Dios. We tob'anik ri' kuk'ut chkiwäch ri e are' chi ri ix sib'alaj kixniman che ri Utzalaj Tzij re ri Evangelio ri káztijox chrij ri Cristo. Xuquje' kákinimarisaj na u q'ij ri Dios rumal ri tob'anik ri xpe pa iwanima' chke ri e are', xuquje' chke konojel. ¹⁴ Káka'n k'u na orar pi wi', sib'alaj loq' k'ut kixkil na rumal chi q'alaj ri nimalaj u toq'ob' ri Dios ri i riqom. ¹⁵ Qamaltioxij b'a' che ri Dios ri i sipam chqe, ri sib'alaj loq', ri man k'o tá je' wi, ri man káqariq tá tzij chumaltioxixik.

10

Ri apóstol Pablo kub'ij chi yo'm taqanik pu q'ab' rumal ri Qajaw Dios

¹ In wa', ri Pablo, kixinb'ochi' rumal ri nimalaj u toq'ob' ri Cristo, xuquje' rumal ri nimalaj rutzil ranima'. Káb'ixik chi aretaq in k'o iwuk' sib'alaj man kinb'an tá nimal. Káb'ix k'ut chi aretaq man in k'o tá iwuk' ko kixinch'ab'ej b'i pa taq ri nu wuj ri kintz'ib'aj b'i chiwe. ² Kixinb'ochi' b'a' chi aretaq kinopan iwuk', mikoj i chuq'ab' chwe rech k'áx kinch'aw chke jujun chiwe ix ri káib'ij chi man utz tá ri káqa'n pa ri qa k'aslemal. Káib'ij chi xa are káqa'no jas ri káka'n ri winaq ajuwächulew. Kinya k'u nu tzij in chi kintak'ab'a' wib' chkiwäch wa' we winaq ri'. ³ Qas tzij chi ri uj xaq uj winaq. Man kujch'ojin tá k'ut jas ri winaq ajuwächulew. ⁴ Je ri', rumal chi aretaq kujch'ojinik man je' tá kujch'ojinik jas ri kech'ojin ri winaq, xane are káqakoj ri chuq'ab' ri u yo'm ri Dios chqe chusachik u wäch apachike ri káikoj ri winaq che ki to'ik kib'. ⁵ Je ri' kujkowinik káqasach

u wäch apachike tzijtal ri käkiyak ri winaq chqij, xuquje' apachike u wäch q'ateb'al ri ruk' nimal käkikojo rech ri winaq man qas tä käketamaj u wäch ri Dios. Käqachap na ronojel ri ki chomanik ri winaq, käqaya k'u pu q'ab' ri Cristo rech keniman che ri Are'.⁶ Aretaq k'ut ri ix iwetam chik jas ri' ri qas kojoniq, käqaya qa tzij chuk'äjisaxik ki wäch ri man keniman taj.

⁷ Ri ix are keiwil ri winaq jas ri ki b'antajik. We k'o jun kuna' pa ranima' chi qas rech ri Cristo, qas kuchomaj b'a' chi jas ri are' rech ri Cristo ri uj xuquje' uj rech ri Cristo. ⁸ Pune b'a' kinya jub'iq' u wi' ri taqanik ri k'o pa qa q'ab', man kink'ix taj. Yo'm k'u we taqanik ri' pa qa q'ab' rumal ri Qajaw Dios rech käk'oji u chuq'ab' ri i kojoniq. Man are tä k'u chusachik i wäch. ⁹ Man kwaj taj chi kichomaj chi xa kixinxib'ij kumal taq ri nu wuj. ¹⁰ Käb'ixik chi sib'alaj k'äx kinch'aw chiwe pa taq ri nu wuj, chi sib'alaj k'äx kätaq ri tzij ri k'o chupam. Käb'ix k'ut chi aretaq in k'o iwuk' man k'o tä nu chuq'ab', xuquje' ri nu tzij xa tzel kätatajik. ¹¹ Jachin k'u ri käb'in wa' we tzij ri' rajwaxik käretamaj chi jas ri kujch'aw pa taq ri qa wuj ri qa taqom b'i chiwe aretaq naj uj k'o wi, je ri' xuquje' kujch'aw na aretaq uj k'o iwuk' chwinaqil.

¹² Man kukoch' tä qanima' käqajunamaj qib' kuk' jujun ri xa käkiya ki q'ij chb'il kib' o käqa'n qe jas ri käka'n ri e are'. We winaq ri' xa ki konil käka'no aretaq xaq e are' keb'inik chi utz ri tajin käka'no, aretaq käkijunamaj kib' ri jun ruk' ri jun chik. ¹³ Ri uj man käqa'n tä nimal che jachike ri man ya'tal tä chqe. Ri Dios are käk'utuw na chqawäch jawije' rajwaxik kujtani wi chutzijoxik ru Loq' Pixab' ri Are'. Are k'u yo'winaq chqe chi kujopan iwuk' ix pa Corinto. ¹⁴ Rumal ri' man xujel tä chrij ri ya'tal chqe. Are ta je ri', we ta mat uj ri' ri uj k'olinaq chik iwuk'. Are k'u ri uj ri xujopan iwuk' nab'e chutzijoxik ri Utzalaj Tzij re ri Evangelio chrij ri Cristo. ¹⁵ Man käqa'n tä nimal che ri chak ri ka'nom nik'iaj chik, ri je' ta ne ri uj, uj b'anowinaq wa'. Xane käqayeji chi ri ix kixkojon na más. Rumal chi we je ri' kib'ano, kujkowinik kujchakun na más chixol. Man kujel tä k'u chrij ri ya'tal wi chqe. ¹⁶ Te k'u ri' käqachomaj kujel chi na apan rech käqatzijoj na ri Utzalaj Tzij re ri Evangelio pa taq ri nik'iaj tinimit chik ri e k'o apan jela' chiwe ix. Man käqa'n tä k'u nimal che ri chak ri u b'anom jun chik.

¹⁷ Jachin ri qas kraj kunimarisaq rib', are chunimarisaj rib' rumal ri u b'anom ri Qajaw Dios. ¹⁸ Je ri', rumal chi ri winaq ri utz kilital wi man are tä ri' ri utz käch'aw chrij chb'il rib', xane are ri käyi' u q'ij rumal ri Dios.

11

Ri apóstol Pablo käch'aw chkij ri jule' winaq ri käka'n che kib' chi e apóstoles

¹ jKwaj ta ne in chi kinikuy na jub'iq', pune b'a' je' kinch'awik jas jun konalaj winaq! Chib'ana b'a' toq'ob', chinikuyu b'a'.² Sib'alaj kinna' k'äx pa wanima' chiwe. Are k'u ri Dios yo'winaq wa' we k'äx ri' pa wanima'. Je ri', rumal chi ri ix, ix nu yo'm chi che k'ulanem ruk' ri Cristo. Are k'u kwaj kixintak'ab'a chuwäch ri Are' je' jas jun q'apoj ali ri xuwi ruk' Are' käk'uli wi. ³ Kinxej k'u wib' we ne je' kib'ano jas ri xub'an ri Eva ri xsub' rumal ri kumätz ruk' ri itzel u no'j. We ne ruk' jub'iq' kiya iwib' pa sub'ik, man ruk' tä k'u ri i chomanik, man ruk' tä ronojel iwanima' kixpatänin che ri Cristo. ⁴ Ri ix k'ut sib'alaj utz kib'an che ki k'ulaxik ri winaq ri käkitzijoj jun Jesús chik ri man junam tä ruk' ri käqatzijoj uj chiwe. Xuquje' sib'alaj utz u k'amik jun espíritu chik kib'ano ri man junam tä ruk' ri i k'amowam chik. Xuquje' kixkojon che jun evangelio chik ri man junam tä ruk' ri Utzalaj Tzij re ri Evangelio chrij ru tob'anik ri Dios ri qa tzijom uj chiwe. ⁵ Kinchomaj k'ut chi man are tä nim na ki b'anik chnuwäch in we jule' apóstoles ri' ri man qas e apóstoles, ri ix teren chkij. ⁶ Pune b'a' ri in man qas tä ruk' utzil kinch'awik, ri wetamanik k'ut man je' tä ri'. Qa k'utum k'u wa' chiwäch ix amaq'el pa ronojel ri qa'nom.

⁷ ¿A xa ta k'u lo man utz tä xinb'ano aretaq xintzijoj ri Utzalaj Tzij re ri Evangelio chiwe, man k'o tä jas xintog'ij chiwe? jMan je' taj! Xinqasaj k'u nu q'ij in chb'il wib' chub'anik utzil chiwe, rech känimar i q'ij ix. ⁸ Xink'am puaq chke nik'iaj qachalal kojonelab' chik aretaq xintoj kumal rech kinkoj wa' che i patänixik ix. ⁹ Aretaq xink'oji iwuk', man k'o tä latz' xinya che jachin jun chiwe aretaq k'o nu rajwaxik. Ri xajwataj chwe are k'u xeyo'w ri qachalal ri xepe pa Macedonia. Je ri' xinchajij wib' rech man k'o tä latz' xinya chiwe. Je' k'u kintaqej na u b'anik wa'. ¹⁰ Qas jikil ri wanima', je' jas ri qas tzij chrij Cristo ri wetaman, chi pa taq ri tinimit re ri Acaya man k'o tä jun ri käkowinik kesan na chwe ri kikotemal ri' ri kinna' pa ri wanima'. ¹¹ ¿Jas che je' kinb'ij wa'? ¿A xa lo man kixwaj taj? jMan je' tä ri'! Ri Dios retam chi sib'alaj kixwaj.

¹² Ri tajin kinb'ano, kintaqej k'u na u b'anik wa', rech man kinya tä chke ri nik'iaj winaq chik ri te' xinb'ij chiwe chi käka'n ke jas ri käqa'n uj. Je ri' rech man k'o tä käka'n wi nimal, rech man kekikot tä na jas ri kujkikot wi uj. ¹³ E are k'u taq wa' ri xaq käkib'ij chi e apóstoles, winaq ri xaq kekisub' nik'iaj chik, ri käka'n che kib' chi e apóstoles, chi e are' u taqo'n ri Cristo. ¹⁴ Man kajmab'al

tä k'u wa', rumal chi ri Satanás kub'an che rib' chi are jun ángel re saqil. ¹⁵ Rumal ri' man kajmab'al tä ri' chi ri patänil taq re ri Satanás xuquje' káka'n che kib' chi e b'anal taq utzil. Aretaq k'ut kápe ri k'isb'al re ri ki k'aslemal we winaq ri', ri tojb'al re ri káka'no are kok na chkij.

Ri apóstol Pablo kutzijoj ri k'áx ri u riqom rumal ru patänixik ri Dios

¹⁶ Jumul chik kinb'ij chiwe: K'o jun mu-chomaj chi xa in elinaq ch'uj. We k'u je wa' kichomaj, chiya b'a' chwe chi kinch'aw iwuk' je' jas jun ch'uj achi, rech ri in kuya' kinnimarisaj jub'iq' wib'. ¹⁷ Ri tajin kinb'ij chanim ri' man are tä ri Dios in taqowinaq chub'ixik, xane ruk' nu ch'ujlal tajin kinb'ij wa', je' ta ne chi qas tzij xa tajin kinnimarisaj wib'. ¹⁸ Rumal chi e k'ia ri kákinimarisaj kib' che ri jastaq rech ruwächulew, ri in xuquje' kinnimarisaj na wib'. ¹⁹ Rumal chi ri ix sib'alaj k'o ri i no'j, utz k'u kib'an che ki k'ulaxik ri winaq ri xa e ch'uj. ²⁰ Ri ix sib'alaj utz kib'an che ki k'ulaxik ri winaq ri kixkitaq che ki patänixik, ri xaq kákich'ak puag chiwij, ri kesub'un chiwe ruk' nimal rech káka'n ke chiwe, ri tzel kixkil wi, ri xuquje' kixkich'ay chipalaj. ²¹ Pune b'a' kink'ixik, kinb'ij chi ri uj man k'o tä ri qa k'a'nal chub'anik wa'.

Apacheke k'u ri man kákiex tá wi kib' ri e are' che, ri in xuquje' man kinxej tá wib' che. Xa b'a' kinch'aw jas jun ch'uj. ²² ¿A hebreos ri e are'? Ri in xuquje' in hebreo. ¿A e winaq aj Israel ri e are'? Ri in xuquje' in aj Israel. ¿A are ri Abraham ki mam ri e are'? Ri in xuquje' are nu mam ri Abraham. ²³ ¿A e patänil taq re ri Cristo ri e are'? Ri in sib'alaj kinpatänij na ri Cristo chkiwäch ri e are', pune b'a' je' kinch'aw jas jun ch'uj aretaq je' kinb'ij wa'. Nim na ri chak nu b'anom chkiwäch ri e are', k'ia mul k'ut nu riqom ch'ayik chkiwäch ri e are', k'ia mul in kojom pa che' chkiwäch ri e are', k'ia mul k'ut tzukum nu kámisaxik kumal ri winaq. ²⁴ Job' mul xintij ri juwinaq b'elejlajuj ch'ayik kumal ri winaq aj Israel. ²⁵ Oxmul in ch'ayom ruk' che' kumal ri romanos, jumul k'ut xinx'an chab'aj. Oxmul xqaj ri barco ri in b'enaq wi chuxe' ri ja'. Jumul ri' xink'oji jun q'ij ruk' jun aq'ab' puwi' ri nimalaj uwoja' re ri mar. ²⁶ K'ia mul nu b'anom b'inem. Xa jub'iq' k'ut man in káminaq pa taq nimaq taq ja', xa jub'iq' man in káminaq kumal taq elaq'omab', kumal ri nu winaqil in o kumal estranjerab'. Xa jub'iq' man in káminaq pa taq tinimit, pa taq juyub', pa ri mar, xuquje' kumal ri winaq ri xaq káki'ij chi e qachalal. ²⁷ Sib'alaj nu riqom k'áx pa taq chak ri kuya nimalaj kosik, k'ia mul k'ut elinaq nu waram. Nu

riqom numik, xuquje' chaq'ij chi'. K'ia mul man k'o tä nu wa. Nu riqom k'áx rumal ri tew, man xub'an tä k'u ri watz'iaq.

²⁸ Man xuwi tä k'u wa' ri k'áx ri nu riqom, xane ronojel q'ij sib'alaj kinok il chke taq konojel ri qachalal kojonelab'. ²⁹ We k'o jachin jun ri man k'o tä u chuq'ab', kinna' wa' pa wanima' chi je' ta ne in ri' man k'o tä nu chuq'ab'. We k'o jachin jun ri xb'an che chi kátzaqik xa rumal ri kub'an jun chik, ri in kink'ixik, xuquje' kápe woyowal. ³⁰ We rajwaxik kinnimarisaj wib', kinnimarisaj na wib' rumal ri kák'utuwik chi man k'o tä nu chuq'ab'. ³¹ Ri Dios, ru Tat ri Qajaw Jesucristo, ri taqal che chi káyi' u q'ij ama'q'el ronojel q'ij pa taq ri q'ij ri junab' ri kepetik, ri Are' retam chi qas tzij ri kinb'ij. ³² Aretaq xink'oji pa ri tinimit Damasco, ri q'atal tzij ri kápatänin che ri tat Aretas ri nim taqanel xeukoj chajinelab' chi' ri u chi' taq b'e re ri tinimit Damasco che nu k'amik b'i pa che'. ³³ Xinqasax k'u b'i pa jun chikäch ruk' jun kolob' pa jun ventana ri k'o pa ri tapya ri k'o chrij ri tinimit. Xa je ri' man xinqaj tá pa ki q'ab'.

12

Ri apóstol Pablo kutzijoj ri k'utum chuwäch rumal ri Dios

¹ Man k'o tä kuch'ak jun we kunimarisaj rib'. Pune je ri', rajwaxik wi chi kintzijon chrij ri xuk'ut ri Qajaw Jesús chnuwäch, ri xq'alajisax rumal. ² Wetam u wäch jun achi' ri kojonel che ri Cristo, xke' kajlajuj junab' wa' xk'am b'i k'a pa ri urox kaj. Man wetam tä k'ut we xk'am b'i chwinaqil o man chwinaqil taj. Xuwi ri Dios retam. ³ Wetam k'ut chi ri achi ri' xk'am b'i chikaj. We chwinaqil xk'am b'ik o man chwinaqil taj, man wetam tä wa'. Xuwi ri Dios retam. ⁴ Xk'am k'u b'i we achi ri' pa ri je'lalaj k'olib'al "paraíso" u b'i', jawije' xeuta wi tzij ri man etamtal taj, ri man ya'tal tä che jun winaq kub'ij. ⁵ Ri in kinkowinik kinnimarisaj wib' che jun achi jas ri achi ri', ri in k'ut man kinnimarisaj tä wib', xane xaq xuwi kinnimarisaj wib' che ronojel ri kák'utuwik chi man k'o tä nu chuq'ab'. ⁶ Pune ta k'u ri in kwaj kinnimarisaj wib', man xa tä k'u jun konil ri' rumal chi xuwi are tajin kinb'ij ri qas tzij. Man kinb'an tä k'ut rech man k'o tä jun kuchomaj chi sib'alaj nim na nu b'anik chuwäch ri kánilo kinb'ano o ri kuto chi kinb'ij.

⁷ Rech man kinnimarisaj tä wib' che ri xuq'alajisaj ri Dios chnuwäch, ri sib'alaj e kajmab'al wa', xyataj jun k'áxalaj yab'il chwe ri je' ta ne jun k'ix ri ch'ikil che ri nu cuerpo. Jun yab'il wa', ru taqom loq ri Satanás chub'anik k'áx chwe. ⁸ Oxmul nu

* 12:2 Ri achi ri' are ri Pablo mismo.

b'ochi'm ri Dios. Xinta' che chi käresaj wa' we k'äx ri' pa ri nu cuerpo. ⁹ U b'im k'u ri Dios chwe: "Ri nu toq'ob' ri k'o pa wi' xuwi wa' ri rajwaxik chawe. Qas q'alaj k'u na ri nu chuq'ab' aretaq ri winaq man k'o tä u chuq'ab' ri are'," —xcha chwe. Rumal ri' kinkikotik chi man k'o tä nu chuq'ab', rech käq'alajin ru chuq'ab' ri Cristo pa ri nu k'aslemal. ¹⁰ Rumal ri' kinkikotik chi man k'o tä nu chuq'ab', kinkikotik pune kinyoq'ik, pune man k'o ri kajwataj chwe, pune käb'an k'äx chwe kumal ri winaq, pune kinriq k'äxk'ol rumal ru patänixik ri Cristo. Je ri', rumal chi aretaq man k'o tä nu chuq'ab' are chi' kinna' chi qas k'o nu chuq'ab'.

Ri apóstol Pablo sib'alaj kok il chke ri qachalal kojonelab' aj Corinto

¹¹ Je' xinb'antaj jun ch'uj aretaq xinnimarisaj wib' chb'il wib'. Ix k'ut xinitaqchi'j chi je' kinb'ano. Are k'u ix ri' ri rajwaxik kinimarisaj nu q'ij. Man are tä k'u nim na ki b'anik chnuwäch in ri jule' taq apóstoles ri' ri i terenem ix, pune b'a' man nim tä nu b'anik in chiwäch ix. ¹² Ri chak ri xinb'an iwuk' ruk' nimalaj paciencia, are xb'antaj wa' kuk' nimaq taq k'utb'al, etal, xuquje' kajmab'al ri xk'utuwiw ch' qas tzij in apóstol. ¹³ Man are tä k'u nim na xeinwil wi ri nik'iaj taq qachalal kojonelab' chik chiwäch ix. ¹⁴ A xa k'äx kina' ix chwe rumal chi man xinta' tä ri nu rajwaxik chiwe? We k'u are je ri', xa b'a' chisacha nu mak che ri k'äx ri xinb'an chiwe.

¹⁴ Kämik k'ut nu b'anom chi u b'anik wib' rech kinopan iwuk' churoxmul. Man kinya tä k'u latz' chiwe. Man are tä k'u kintzujuk' ri k'o iwuk', xane ix ri' ri kintzujuk'. Are k'u ri nan tat ri rajwaxik käkich'ak puaq che ki tzuqik ri kalk'ual, man are tä ri alk'ualaxelab' ri rajwaxik käkich'ak puaq che ri ki nan ki tat. ¹⁵ Ri in ruk' k'ikotemal kinsach na ri k'o wuk'. Kinya k'u nu tzij, kinriq na in apachike u wäch k'äx chub'anik utzil chiwe. Pune b'a' kinwilo chi aretaq sib'alaj kixwaj na, ri ix man qas tä kiniwaj in.

¹⁶ E k'o k'u jujun ri pune käkich'ob'o chi man xinya tä latz' chiwe, käkib'ij chi xa xix-insub'u rech kixqaj pa nu q'ab'. ¹⁷ A xa ta k'u xixinsub' rumal jun chke ri xeintaq b'i iwuk'? ¹⁸ Man je' taj! Xinta' toq'ob' che ri Tito chi kopan na iwuk', xuquje' xintaq b'i ri jun qachalal chik ruk'. ¹⁹ A xa ta k'u xixinsub' ri Tito? A mat qas tzij chi junam qa no'j ri uj kieb', xuquje' junam ri qanima? ²⁰ Je', je ri'!

¹⁹ We ne ri ix kichomaj chi xa tajin käqato' qib' chiwäch. ²⁰ Man je' tä k'u ri'! Xane chuwäch ri Dios tajin kujtzijon wi pa ru b'i' ri Cristo. Loq'alaj taq qachalal, ronojel k'u wa' ri käqa'no, käqa'n wa' rech ri ix käk'oji u

chuq'ab' ri i kojoniq. ²⁰ Kinok il chiwe chi aretaq kinopan iwuk' kinriqo chi man je' tä i b'anom jas ri kwaj in, xuquje' chi ri in man je' tä nu b'anik in jas ri kiwaj ix. Kinok il chiwe chi kinriq ne chi k'o ch'oj chixol, chi k'äx kina' chb'il taq iwib', chi k'o iwowal, chi kinriq ne chi xuwi kitzujuk' ri utz chiwe ix, man kitzujuk' tä k'u ri utz chke nik'iaj chik, chi kiyaq tzijtal, chi kib'ij tzij chb'il taq iwib', chi kib'an i nimal, chi i tukim k'u iwib'. ²¹ Kinok il chiwe chi aretaq kinopan chi jumul iwuk', ri nu Dios käresaj nu k'ixb'al rumal iwech, kinoq' k'u ri' rumal chi e k'ia chiwe ri tzojer loq' e makuninaq, man ki yo'm tä k'u kan u b'anik ronojel u wäch mak ri äwas u b'anik cho ri Dios xuquje' chkiwäch ri winaq, xane xaq are käka'n na jas ri käka'n ri tz'i' ri xaq käkiriq kib', man k'o tä ki pixab', käka'n k'u ke ronojel u wäch etzelal jachike ri utz käkil wi.

13

Ri apóstol Pablo keupixb'aj ri kojonelab', kuya k'u b'i rutzil ki wäch

¹ Are b'a' urox mul wa' ri kinopan iwuk'. Ronojel ri kächomax rij rajwaxik kächomax wa' ruk' ri ki tzij kieb' o we ne oxib' qachalal ri käkiq'alajisaj ri xb'anik (je' jas ri kub'ij ru Loq' Pixab' ri Dios ri Tz'ib'talik). ² Chke ri e makuninaq kan nab'e, xuquje' chke konojel, kämik ri naj in k'o wi, kinb'ij chi na jumul ri pixab' ri xinya chiwe aretaq xinopan iwuk' chukamul, chi we kinopan chi jumul iwuk' man kintoq'ob'isaj tä na i wäch. ³ Te k'u ri' kiwil na ri tajin kitzujuk', chi ri Cristo, are käch'aw iwuk' rumal wech in. Ri Cristo k'ut man are tä jun winaq ri man k'o tä u chuq'ab' aretaq käch'aw iwuk', xane ri Are' kuk'ut na ru chuq'ab' chixol. ⁴ Pune qas tzij chi ri Cristo xkämisax cho ri cruz je' ta ne chi man k'o tä u chuq'ab', k'asal ri Are' kämik rumal ru chuq'ab' ri Dios. Ri uj xuquje', pune ta ne man k'o tä qa chuq'ab' junam jas ru b'anik ri Cristo, uj k'asal k'ut junam ruk' ri Are' rumal ru chuq'ab' ri Dios rech kujkowinik kujpatänin chiwe ix.

⁵ Chichomaj b'a' pa ri iwanima' we qas ix kojoniq na che ri Cristo. Qas china' iwib' jas ri i b'anik. ⁶ A mat kich'ob'o chi ri Jesucristo k'o pa ri iwanima', o we ne xaq kib'ij chi ix kojoniq na? ⁷ Kwaj k'ut chi kiwetamaj chi ri uj man xaq tä käqab'ij chi uj kojoniq na. ⁸ Käqa'n k'u orar pi wi' cho ri Dios rech ri ix man kib'an tä ri man utz taj. Man are tä k'u käqaj kujilitajik chi ri uj k'o qa no'j, xane xaq are käqaj chi ri ix kib'an ri qas utz, pune käb'ixik chi xa man k'o tä qa no'j uj. ⁹ Man k'o tä k'u jas kujkowinik käqa'n chrij ri qas tzij, xane xuwi are käqato' u wi' ri qas tzij. ¹⁰ Rumal ri' ri uj kujkikotik aretaq man k'o tä qa chuq'ab', rech ri ix käk'oji i chuq'ab'. Käqataqej k'u u b'anik orar pi

wi' rech qas je' kixel na jas ri kraj ri Dios.
¹⁰ Kintz'ib'aj k'u b'i we wuj ri' chiwe mäjoq
 kinopan iwuk', rech aretaq kinopanik man
 rajwaxik taj kinyajan chiwe aretaq kinkoj
 ri taqanik ri k'o pa nu q'ab'. Are taqanik
 wa' ru yo'm ri Qajaw Dios chwe chuya'ik u
 chuq'ab' ri i kojoniq, man are tä chusachik i
 wäch ix.

¹¹ jCh'ab'ej chik, qachalal! Chuk'isb'al
 ronojel kinb'ij chiwe chi chikojo i chuq'ab'
 rech qas je' kixel na jas ri kraj ri Dios,
 chiku'b'isala i k'ux, xa jun chixchomanoq,
 k'ol utzil chixol. We je ri' kib'ano, ri Dios
 ri kuya uxlanem che ri iwanima', ri xuquje'
 sib'alaj kixraj, käk'oji na iwuk'. ¹² Chiyala
 rutzil i wäch chijujunal. Chitz'umaj iwib'
 chuwäch ri Dios chuk'utik chi kiwaj iwib'.
¹³ Konojel ri qachalal kojonelab' käkiya b'i
 rutzil i wäch.

¹⁴ Are ta b'a' ri Qajaw Jesucristo ku-
 toq'ob'isaj i wäch. Chk'ol ta na ri rutzil
 ranima' ri Dios iwuk', chku'b'isax ta k'u i
 k'ux iwonojel rumal ri Loq'alaj Espíritu ri
 k'o iwuk' amaq'el ronojel q'ij. Amén.

RI CARTA RI XUTZ'IB'AJ RI SAN PABLO CHKE RI KOJONELAB' AJ GALACIA

Ri apóstol Pablo kuchap u tz'ib'axik jun carta chke ri qachalal kojonelab' aj Galacia

¹ In wa', ri Pablo, in apóstol. In jun chke ru taqo'n ri Jesucristo. Man in kojom tá kumal winaq, man in taqom tá kumal winaq, xane rumal ri Jesucristo, xuquje' rumal ri Dios qa Tat ri xk'astajisan ri Jesucristo chkixol ri káminaqib'. ² Ri in, wachi'l konojel ri qachalal ri e k'o wuk', kintz'ib'aj b'i wa' we wuj ri' chiwe ix, ix ri' ri qachalal kojonelab' ri ix k'o pa taq ri tinimit re Galacia. ³ Are ta b'a' ri Dios qa Tat, xuquje' ri Qajaw Jesucristo kutoq'ob'isaj i wäch, kub'ano chi kuxlan ri iwanima'. ⁴ Ri Qajaw Jesucristo xujach rib' rech kákámisax rumal qech chutojik ri qa mak, che qa torik pu q'ab' we uwächulew ri' re etzelal. Je' xub'an wa' rumal chi are wa' u rayib'al ri Dios qa Tat. ⁵ ¡Chnimarisax ta b'a' u q'ij ri Dios kámik, xuquje' pa taq ri q'ij ri junab' ri kepe na! Amén.

Rajwaxik chi xa jun u wäch ri Utzalaj Tzij re ri Evangelio kätzijoxik

⁶ Sib'alaj kinkajmaj wa' chi chanim tajin kiya kan ri Dios, ri xixusik'ij rumal ri toq'ob' ri xub'an Cristo chqe, tajin k'u kitajej u tzijoxik jun "evangelio" chik ri jun chi wi. ⁷ Man kinb'ij taj chi qas tzij k'o chi jun qas "evangelio" chik, xane xa e k'o jujun ri kixk-isacho. E are' kákaj kákik'ex ri Utzalaj Tzij re ri Evangelio chrij ri Cristo. ⁸ Pune ta ne jun chqe uj, we ne jun ángel ri kápe chikaj ri kutzijoj chiwe jun evangelio chik ri man junam tá ruk' ri Utzalaj Tzij re ri Evangelio ri qa tzijom uj chiwe, kák'at ta na tzij puwi' rumal ri Dios chi kák'ájisax u wäch ri are'. ⁹ Jas ri qa b'im nab'e, xuquje' kámik kinb'ij chi jumul: We k'o jun kutzijoj jun evangelio chik chiwe ri man junam tá ruk' ri Utzalaj Tzij re ri Evangelio ri ix kojoninaq wi, kák'at na tzij puwi' rumal ri Dios chi kák'ájisax u wäch ri are'.

¹⁰ ¿A are lo kwaj chi utz kinil wi kumal ri winaq chi je' kinb'ij wa? ¡Man are taj! Ri kwaj in are la' chi utz kinil wi rumal ri Dios. ¡We ta qas tzij wa' chi are kwaj chi nim kinil wi kumal ri winaq, man in tá b'a' jun qas patánil re ri Cristo!

Ri apóstol Pablo kutzijoj ri xub'ano aretaq xok che apóstol

¹¹ Chiwetamaj b'a', qachalal, chi ri Utzalaj Tzij re ri Evangelio ri kintzijoj chiwe, man are tá ki chomanik winaq. ¹² Man xa tá jun winaq xyo'w wa' chwe, man xa tá xintjiox

che rumal jachin jun, xane are ri Jesucristo xq'alajisan wa' chnuwäch.

¹³ Ri ix i tom jas je' ri xinb'an pa ri nu k'aslemal nab'e kanoq, aretaq xintajej na ri e kojoninaq wi ri winaq aj Israel. Iwetam chi sib'alaj xinb'an k'äx chke ri winaq ri e rech ri Dios, e are k'u wa' ri qachalal kojonelab'. Are ta xwaj xinsach ki wäch. ¹⁴ Aretaq xintajej na ri e kojoni-naq wi ri winaq aj Israel, ri in k'o na más nu no'j chrij wa' we kojoni' ri' chkiwäch k'ia chke ri nu winaqil ri junam ki junab' wuk' pa taq ri q'ij ri'. Je ri', rumal chi sib'alaj xinkoj nu chuq'ab' in chub'anik ri ki naq'atisam wi kib' ri nu mam ojer. ¹⁵ Are k'u ri Dios xinucha' tzaretaq mäjoq kil nu wäch, xinusik'ij chupatanixik rumal chi xutoq'ob'isaj nu wäch. ¹⁶ Aretaq xuchomaj chi utz je' kub'ano, xub'ano chi kinwetamaj u wäch ri u K'ojol pa wanima', rech kintzijoj ru Loq' Pixab' chrij ru tob'anik ri Are' chke ri nik'iaj winaq chik ri man e aj Israel taj. Aretaq je' xb'antaj wa', man xinta' tá u no'j jachin jun winaq chik. ¹⁷ Man xine' tá pa Jerusalén chuta'ik ki no'j ri xeb'ok che taq apóstoles nab'e chnuwäch in, xane chanim xine' pa Arabia, te k'u ri' xintzelej chi jumul pa ri tinimit Damasco.

¹⁸ Ok'owinaq chi oxib' junab', te k'u ri' xine' pa ri tinimit Jerusalén. Are chi' xinwetamaj u wäch ri Pedro, olajuj q'ij k'ut xink'oji na ruk' ri are'. ¹⁹ Man k'o tá k'u jun apóstol chik xinwil u wäch chila', xane xuwi ri Jacobo ru chaq' ri Qajaw Jesús.* ²⁰ Kinjikib'al u b'ixik cho ri Dios chi ri tajin kintz'ib'aj b'i chiwe are ri qas tzij.

²¹ Aretaq xinél b'i pa Jerusalén, xine' pa taq ri juyub' re Siria xuquje' re Cilicia. ²² Man etamtal tá k'u nu wäch kumal ri qachalal kojonelab' che ri Cristo ri e k'o pa taq ri tinimit re Judea pa taq ri q'ij ri'. ²³ Ri e are' xuwi ki tom u tzijol: "Ri achi ri xub'an k'äx chqe nab'e, kámik kutzijoj ru Loq' Pixab' ri Dios chrij ri kojoni' ri xraj xusach u wäch nab'e," —xecha ri'. ²⁴ Xkiya k'u u q'ij ri Dios rumal wech in.

2

Ri apóstol Pablo kák'ulax kumal ri nik'iaj apóstoles chik

¹ Ok'owinaq chi kajlajuj junab', te k'u ri' xine' chi jumul pa ri tinimit Jerusalén, wachi'l ri Bernabé. Xuquje' xink'am b'i ri Tito wuk'. ² Xine' pa Jerusalén rumal chi ri Dios xuk'ut chnuwäch chi rajwaxik kine' jela'. Chila' pa Jerusalén xeintzijob'ej ri k'amal taq ki b'e ri kojonelab' pa ki tukiel wi, xink'ut k'u ri Utzalaj Tzij re ri Evangelio chkiwäch jas ri kintzijoj in chke ri nik'iaj

* 1:19 Ri Jacobo ri' are k'amal ki b'e ri qachalal kojonelab' pa Jerusalén.

winaq chik ri man e aj Israel taj. Je wa' xinb'ano rech kákilo chi man xaq tá loq' ri chak nu b'anom o ri kinb'an na chutzijoxik ru Loq' Pixab' ri Dios. ³ Utz b'a' xkita ri xinb'ij! Che ri Tito ri k'o wuk' man xkikoj tá ki chuq'ab' chub'ixik chi rajwaxik kok retal ri ojer trato che ru cuerpo, pune ri are' man aj Israel taj. ⁴ E k'o k'u jujun ri káka'n che kib' chi e kojonelab' ri xaq chk'uyal xeb'ok chqaxol. Are ta xkaj chi xok retal ri ojer trato che ri Tito. Ri e are' xeb'ok chqaxol xaq che rilik jas káqa'n uj, ri uj tzoqopital chi rumal ri Cristo pu q'ab' ri ojer Pixab'. Are k'u káka' chi kujq'ax chi jumul pu q'ab' wa'. ⁵ Man jub'iq' tá xqaya qib' pa sub'ik chke, rech ri ix kuya' kitaqej ri Qas Tzij re ri Evangelio.

⁶ Ri tata'ib' k'amal taq ki b'e ri kojonelab' ri e k'o pa Jerusalén, man k'o tá jun tijonik chik ri xkiya chwe in. Ri e are', pune nimaq ki b'anik, man k'o tá we in chke. Ri Dios k'ut xaq junam keril wi konojel ri winaq. ⁷ Man k'o tá jun tijonik chik ri xkiya chwe, xane xkich'ob'o chi qas tzij yo'm pa nu q'ab' ru tzijoxik ri Utzalaj Tzij re ri Evangelio chke ri nik'iaj winaq chik ri man e aj Israel taj, je' jas ri Pedro yo'm pu q'ab' ru tzijoxik ri Utzalaj Tzij re ri Evangelio chke ri winaq aj Israel. ⁸ Are k'u ri Dios ri xtaqow b'i ri Pedro rech kok che apóstol chkixol ri winaq aj Israel, are ri Are' xintaqow b'i in xuquje' rech kinok che apóstol chkixol ri nik'iaj winaq chik ri man e aj Israel taj.

⁹ Ri Jacobo, ri Pedro, ri Juan, ri ki nimaqil ri qachalal kojonelab', aretaq xkich'ob'o chi qas tzij ri Dios u yo'm wa' pa nu q'ab' we chak ri' ri nim u b'anik, xkichap ri qa q'ab', ri in wachi' ri Bernabé, chuk'utik chi kujkaj, xuquje' chuk'utik chi utz kákilo chi ri uj káqatzijoj ri Utzalaj Tzij re ri Evangelio chke ri nik'iaj winaq chik ri man e aj Israel taj. Are k'u ri e are' kákitzijoj na wa' we Evangelio ri' chke ri winaq aj Israel. ¹⁰ Xuwi xkib'ij chi rajwaxik kena'taj ri meb'a'ib' chqe. Are k'u wa' xuquje' ri nu kojom nu chuq'ab' chub'anik.

Ri apóstol Pablo kuyaj ri apóstol Pedro pa ri tinimit Antioquía

¹¹ Aretaq k'ut xopan ri Pedro pa Antioquía, xajwataj na chi xinyaj chkiwäch konojel rumal chi qas tzij man utz tá ri tajin kub'ano. ¹² Ri are' káwi' kuk' ri nik'iaj winaq chik ri man e aj Israel taj. Aretaq xeopan jujun winaq aj Israel ri e taqom b'i rumal ri Jacobo, ri apóstol Pedro xutas rib' chki' ri nik'iaj winaq, man xwi' tá chi kuk'. Je' xub'ano rumal chi xuxej rib' chkiwäch ri winaq aj Israel ri e naq'atalik chi kok retal ri ojer trato che ri ki cuerpo.* ¹³ Xuquje' ri nik'iaj kojonelab' chik aj Israel xka'n ke

ri xub'an ri Pedro, xaq kieb' chi ki wäch xka'no. Xuquje' ne ri Bernabé xuta ri xkib'ij, xub'an re ri xka'n ri e are'. ¹⁴ Aretaq k'ut xinwilo chi ri Pedro kuk' ri nik'iaj kojonelab' chik man qas tá utz káka'no, chi man je' tá káka'no jas ri kub'ij ri Qas Tzij re ri Evangelio, xinb'ij che ri Pedro chkiwäch konojel ri e k'olik: "We ri at, at ri' qas at jun winaq aj Israel, kab'an awe jas ri káka'n ri nik'iaj winaq chik ri man e aj Israel taj, ri man je' taj jas ri káka'n ri winaq aj Israel, ¿jas che kakoj a chuq'ab' chub'ixik chke ri nik'iaj winaq chik chi káka'n ke jas ri e naq'atal wi ri winaq aj Israel?" —xinha che.

Waral káqil wi chi ri winaq aj Israel kákiriaq na ru tob'anik ri Dios rumal ri kojonik je' jas ri nik'iaj winaq chik

¹⁵ Ri uj, uj winaq aj Israel rumal chi je' qa b'anik wa' xil qa wäch. Ri uj, pune ta ne uj ajmakib', man uj ajmakib' taj je' jas ri nik'iaj winaq chik ri man e aj Israel taj ri kepe pa nik'iaj tinimit chik. ¹⁶ Pune ta ne je ri', qetam chi jun winaq man jikom tá ri ranima' ri' cho ri Dios rumal ru b'anik ri kub'ij ri Pixab' ri xutz'ib'aj ri qa mam Moisés, xane xuwi kájikomataj ri ranima' rumal chi kákojon che ri Jesucristo. Rumal ri' ri uj xuquje' uj kojoninaq che ri Jesucristo rech kájikomataj ri qanima' cho ri Dios xa rumal chi uj kojoninaq che ri Cristo, man rumal tá ru b'anik ri kub'ij ri Pixab'. Man k'o tá k'u jun winaq ri kájikomataj ri ranima' cho ri Dios rumal ru b'anik ri kub'ij ri Pixab'.

¹⁷ We k'u aretaq káqaj chi kájikomataj ri qanima' cho ri Dios rumal ri Cristo, kel k'u chi saq chi ri uj, uj ajmakib', ¿a kel kub'ij lo ri' chi ri Cristo are káb'anow ajmakib' chqe? ¡Man je' tá k'u ri'! ¹⁸ We k'u ri in kinyak chi loq' jumul ri tijonik ri xinsach u wäch, keintijoj chi jumul ri winaq che, mak ri' ri kinb'ano. ¹⁹ Ri in k'ut, je' ta ne in káminaq chik chuwach ri u Pixab' ri Moisés. ¡Tzare ri Pixab' xinkámisanik! Je' xink'ulmaj rech qas kink'asi na chupatanixik ri Dios. ²⁰ Je' ta ne in káminaq chik, in ripil cho ri cruz junam ruk' ri Cristo. We je ri', man in tá chik in k'aslik, xane are ri Cristo k'asal chi pa ri wanima'. Ri nu k'aslemal kámik cho we uwächulew, are wa' ri k'aslemal ri xinriqo rumal chi xinkojon che ri Cristo ru K'ojol ri Dios, ri xinraj, ri xujach rib' pa ri kámikal rumal wech. ²¹ Ri in sib'alaj nim kinwil wi chi ri Dios xutoq'ob'isaj qa wäch. Qas tzij man kwaj taj kinwetzelay wa'. We ta kuya' kájikomataj ri qanima' cho ri Dios rumal ru b'anik ri kub'ij ri Pixab', xaq ta b'a' loq' ri' xkámisax ri Cristo.

* 2:12 "Circuncisión": Chawila' ri Hechos 7:8, nota.

3

Xuwi rumal chi kujkojonik k'o ri Loq'alaj Espíritu rech ri Dios pa qanima'

¹ Ri ix, ix aj Galacia, ¡sib'alaj man kita tä tzij! Jachin lo ri xub'an sub'unik chiwe, ri xixsub'uwik rech man kinimaj tä ri Qas Tzij? Aretaq xqatzijoj ru Loq' Pixab' ri Dios chiwe, qas utz xqa'n chuq'alajisaxik wa' chiwäch jas ri xub'an ri Jesucristo, jas ri xkámisax ri Are' cho ri cruz. ² Xuwi b'a' kwaj chi kib'ij chwe: ¿A k'o ri Loq'alaj Espíritu pa iwanima' rumal ru b'anik ri kub'ij ri Pixab' ri xutz'ib'aj ri q'a mam Moisés? ¡Man je' tä ri! ¿A mat rumal chi xikoj ri Utzalaj Tzij re ri Evangelio ri xito? ¡je', je ri! ³ ¿A are k'u kichomaj u k'isik xaq ruk' ri i chuq'ab' ix ri xichaplej u b'anik ruk' ru chuq'ab' ri Loq'alaj Espíritu? ¡Sib'alaj b'a' man kok tä tzij ri' pa i jolom! ⁴ ¿A xaq loq' i ch'ijom k'ia k'äx'ol pa ri i k'aslemaal? Kwaj b'a' chi qas tzij k'o u patän wa' chiwe. ⁵ Aretaq ri Dios kuya ri Loq'alaj Espíritu chiwe xuquje' kub'an taq kajmab'al chixol, ¿jas che je' kub'an wa'? Man kub'an tä ri' xa rumal chi kib'ano jas ri kub'ij ri Pixab' ri xutz'ib'aj ri q'a mam Moisés, xane rumal chi kita ri Utzalaj Tzij re ri Evangelio, xuquje' kikojo.

⁶ Ri q'a mam Abraham xkojon che ri Dios, rumal k'u ri' xq'alajisax rumal ri Dios chi jikom ranima' ri are'. ⁷ Qas rajwaxik b'a' chi kiwetamaj chi ri qas ralk'ual ri q'a mam Abraham, e are' wa' konojel ri kekojonik. ⁸ Chupam ru Loq' Pixab' ri Dios ri Tz'ib'talik u b'im loq' ri Dios ojer chi kub'an na jikom che ri kanima' ri nik'iaj winaq chik ri man e aj Israel taj we kekojonik. Rumal ri' xuya u b'ixik we utzalaj tzij ri' che ri q'a mam Abraham: "Ronojel ki wäch winaq ri e k'o cho ruwächulew ketewchitaj na rumal awech," —xcha che. ⁹ Ri q'a mam Abraham xkojonik, xuriq k'u ru tewchib'al ri Dios. Xaq je ri' konojel ri kekojonik ketewchitaj na junam jas ri xb'an che ri are'.

¹⁰ Konojel ri ki jikib'am ki k'ux chriy ri Pixab' ri xutz'ib'aj ri q'a mam Moisés, käq'at na tzij wa' pa ki wi' rumal ri Dios chi käk'äjisax ki wäch. Tz'ib'tal k'u pa ru Loq' Pixab' ri Dios, kub'ij: "Jachin ri man kub'an tä ronojel ri tz'ib'tal chupam ri wuj re ri Pixab' amaq'el ronojel q'ij, käk'äjisax na u wäch wa'," —kächa'. ¹¹ Qas elinaq k'u chi saq chi man k'o tä jun winaq ri käjikomataj ri ranima' cho ri Dios rumal ru b'anik ri kub'ij ri Pixab' ri xutz'ib'aj ri q'a mam Moisés. Kub'ij k'u pa ru Loq' Pixab' ri Dios ri Tz'ib'talik: "Ri winaq ri jikom ranima' cho ri Dios kuriq na ri k'aslemaal ri man k'o tä u k'isik rumal chi käkojonik," —kächa ri'. ¹² Are k'u ri

Pixab' ri xutz'ib'aj ri q'a mam Moisés man kub'ij taj chi rajwaxik käkojon jun, xane kub'ij: "Jachin ri kunimaj ronojel we Pixab' ri' käk'oji na ri' ru k'aslemaal rumal wa'," —kächa'.

¹³ Ri Cristo xujutoro, xujuto' rech man kuya' taj käq'at tzij pa q'a wi' chi käk'äjisax q'a wäch xa rumal rech ri Pixab'. Ri Are' xuriq wa' we k'äx ri' rumal qech uj. Tz'ib'tal k'u pa ru Loq' Pixab' ri Dios, kub'ij: "Käk'äjisax na u wäch ronojel winaq ri käxekb'ax cho jun che'," —kächa'. ¹⁴ Je ri' xub'an ri Dios rech rumal ri Cristo Jesús käya'taj chke ri winaq ri man aj Israel taj ri tewchib'al ri xuchi'j ri Dios che ri q'a mam Abraham. Je ri' rech qonojel ri kujkojonik käk'oji pa qanima' ri Loq'alaj Espíritu ri xuchi'j ri Dios.

Waral käqil wi ru jalb'em rib' ri Pixab' ruk' ri tewchib'al ri xuchi'j ri Dios

¹⁵ Qachalal, qesajmpe q'a no'j chriy ri käka'n ri winaq: Aretaq jun winaq kub'an jun trato o jun testamento,* kutz'ib'aj kan ru b'i' chupam, man k'o tä k'u jun winaq chik ri käkowinik käturuwik, o kuya u wi'. ¹⁶ Je k'u ri' ri Dios xub'ij chi kutewchij na ri q'a mam Abraham xuquje' jun rachalaxik ri kil na u wäch pa taq ri q'ij ri kepe na. Man kub'ij tä ru Loq' Pixab' ri Dios ri Tz'ib'talik: "Keutewchij na xuquje' ri rachalaxik ri kil na ki wäch," je' tä ne e k'ia ri tajin kub'ij, xane kub'ij: "Jun rachalaxik ri kil na u wäch," ri kel kub'ij wa' chi are "xa jun". Are k'u ri Cristo wa'. ¹⁷ Ri kwaj kinb'ij are wa': Ri Dios xub'an jun trato ruk' ri q'a mam Abraham, xujikib'a k'u u b'ixik wa'. Rumal wa' ri Pixab' ri xutz'ib'aj ri q'a mam Moisés ri k'ä te xpe wa' ok'owinaq chi kiejeb' cientos ruk' juwinaq lajuj junab', man käkowin tä chusachik u wäch wa' we trato ri'. Man käkowin tä k'u wa' kub'ano chi mat k'o chi u patän ri xuchi'j loq' ri Dios. ¹⁸ We ta je ri' ri kuya ri Dios chqe, Are kuya wa' xa rumal chi kujniman che ri Pixab' ri xutz'ib'aj ri q'a mam Moisés, man xa tä b'a' are rumal chi ri Dios xuchi'j loq' wa'. Ri Dios k'ut xa rumal chi xuchi'j wa' che ri q'a mam Abraham, Are xusipaj wa' che.

¹⁹ We je ri', ¿jas k'u u patän ri Pixab' ri xutz'ib'aj ri q'a mam Moisés? Are xyi' wa' chuk'utik ri ki mak ri winaq. Xuwi k'u k'o xupatänij wa' k'ä xpe na ri Cristo ri rachalaxik ri q'a mam Abraham ri xb'ixik chi kil na u wäch rumal chi che ri Are' xyi' wi ri xuchi'j ri Dios. Ri Dios k'ut xtaqan chuya'ik ri Pixab' kumal ri ángeles pu q'ab' jun ri käch'aw pa ki wi' ri winaq ruk' ri Are'. Are wa' ri q'a mam Moisés. ²⁰ Aretaq ri Dios k'o ri xuchi'j che ri q'a mam Abraham, xaq xuwi

* 3:15 Pa ru Loq' Pixab' ri Dios xaq e junam ri kieb' tzij "trato" ruk' "testamento". † 3:20 Kel kub'ij wa' chi nim na u b'anik ri xuchi'j ri Dios che ri mam Abraham chuwäch ri Pixab' ri xutz'ib'aj ri mam Moisés.

che ri are' xub'ij wi wa'. Man k'o tä jun q'axal tzij xukojo, man k'o tä jun ángel, man k'o tä k'u jun winaq.[†]

Waral kâqil wi ru patân ri Pixab' ri xtz'ib'ax rumal ri qa mam Moisés

²¹ ¿A kel lo kub'ij wa' chi ri Pixab' ri xutz'ib'aj ri qa mam Moisés kuk'ulelaj ri xuchi'j loq ri Dios? ¿Man je' tä ri! We ta ri Pixab' ri xyi'k kâkownik kuya k'aslemal, te k'u ri' qas kâjikomataj na ri ri qanima' cho ri Dios rumal ru b'anik ri kub'ij ri Pixab'.
²² Are k'u ru Loq' Pixab' ri Dios ri Tz'ib'talik kub'ij chi konojel ri e k'o cho ruwâchulew je' ta ne e tz'aptal pa che' xa rumal ri ki mak. (Kel kub'ij wa' chi e k'o pu q'ab' ri ki mak.) Je ri' rech ri winaq ri kekojon che ri Jesucristo kuya' kâyi' na chke ronojel ri xuchi'j ri Dios xa rumal ri ki konojel.

²³ Aretaq mâja' kâpe ri Jun ri kujkojon na che, je' ta ne chi uj tz'aptal pa che' rumal ri Pixab', qeye'm k'ut chi kâpe ri Are', kuk'ut rib' chqawâch. ²⁴ Je ri' ri Pixab' are chajil qe petinaq loq chuk'amik qa b'e k'â xpe na ri Cristo, rech aretaq kujkojon che ri Are' kâjikomataj na ri qanima' cho ri Dios.
²⁵ Kâmik k'ut rumal chi petinaq ri Jun ri kujkojon na che, ya man uj k'o tä chi pu q'ab' ri Pixab' ri chajil qe ri xuk'am qa b'e.

²⁶ Iwonojel k'ut, ix ralk'ual ri Dios rumal chi ix konojinâq che ri Cristo Jesús.
²⁷ Iwonojel ri ix b'anom i qasna' rech xa ix jun chik ruk' ri Cristo, ch'uqtal k'u iwij rumal ri Are' je' jas ri kib'ano kich'uq iwib' ruk' ri i q'u'. ²⁸ Man nim tä u b'anik kâmik we jun winaq are aj Israel, o are jun u wâch winaq chik, we kâchakunik, k'o pu q'ab' jun u patrón o we ne man k'o tä u patrón. Man nim tä u b'anik we are achi o are ixoq, rumal chi iwonojel xa ix jun chik ruk' ri Cristo Jesús. ²⁹ We ri ix, ix rech ri Cristo, qas tzij b'a' ri' ix rachalaxik kan ri qa mam Abraham, kiwechb'ej k'u na ru b'im ri Dios chi kuya na.

4

¹ Ri kwaj kinb'ij are wa': Aretaq ri ralk'ual jun winaq k'â ak'al na, kâyi' k'u kan rechb'al, xaq junam ri' ruk' jun chke ri patâninelab' ri e k'o pa ri ja, pune k'u are rajaw konojel ri jastaq. ² We ak'al ri', e k'o winaq ri kechajinik, ri xuquje' keillow ri jastaq re ri are' k'â kel na pa ki q'ab' ri chajil taq re pa ri q'ij ru b'im kan ru tat ri ak'al. ³ Je k'u ri' ri uj xuquje'. Aretaq je' ta ne uj ak'alab', uj k'o pu q'ab' ri ki taqanik ri winaq ajuwâchulew, jas ri xkichomaj ri e are'. ⁴ Aretaq k'ut xopan ri q'ij, ri Dios xutaq loq ru K'ojol ri xil u wâch rumal jun ixoq. Are ri Are' jun aj Israel xk'iyik, xunimaj k'u ri ki Pixab' ri winaq ri'. ⁵ Je ri' xub'ano rech

ri uj, ri uj k'o pu q'ab' ri Pixab' ri', kujtzoqopitajik, kujok k'u che ralk'ual ri Dios.

⁶ Chuk'utik k'ut chi ix ralk'ual chi ri Dios, ri Are' xutaq loq ri Espiritu rech ri u K'ojol pa ri iwanima'. Ri Loq'alaj Espiritu ko kuraq u chi', kub'ij: "¡Abbal!" ri kel kub'ij: "¡Nu Tat!" —kâcha'. ⁷ Rumal k'u ri' ri ix, ix ralk'ual chi ri Dios, man xaq tä ix patâninel chik. Rumal chi ix ralk'ual ri Dios, ri Are' kuya na ri iwechb'al rumal ri Cristo.

Ri apóstol Pablo kok il chke ri kojonelab'

⁸ Ri ix nab'e kanoq aretaq man qas tä iwetam u wâch ri Dios, xa i kojom iwib' che ki patânixik taq tiox ri man qas e dios taj. ⁹ Are k'u ri kâmik qas iwetam chi u wâch ri Dios, o ri jikom na u b'ixik are chi ri ix qas etamtal chi i wâch rumal ri Dios. ¿Jas k'u che kiwaj kixtzelej chi jumul ruk' ri ojer taq i chomanik ri man k'o tä ki patân, ri man k'o tä kâch'ak chki? ¿Jas k'u che kiwaj kiya chi jumul iwib' chunimaxik ri ojer taq i chomanik, je' ta ne chi ix patânil taq ke? ¹⁰ Ri ix xaq are kib'an nimaq'ij, kichajij jujun taq q'ij, jujun taq ik', jujun taq ajilab'al, xuquje' jujun taq junab'. (Kichomaj chi are wa' kub'ano chi ix utz kixil wi rumal ri Dios.)
¹¹ Kinxej wib' we ne xaq loq' in chakuninâq chixol chutzijoxik ru Loq' Pixab' ri Dios.

¹² Qachalal, kixinb'ochi' chi kib'an iwe jas ri nu b'anom in, miya k'u iwib' pu q'ab' ri Pixab'. Ri in xuquje' nu b'anom we jas ri ix (ri man ix aj Israel taj, man ix k'o tä k'u pu q'ab' ri Pixab'). Ri ix, man k'o tä jumul i b'anom k'âx chwe. ¹³ Ri ix k'ut iwetam chi xa rumal jun yab'il xinkanaj iwuk', xintzijo ri Utz'alaj Tzije ri Evangelio chiwe nab'e mul. ¹⁴ Sib'alaj k'âx k'u ri yab'il ri xinriqo. Man ruk' tä k'u ri' chi k'o k'âx chwe xiwetzela ta nu wâch, xinipaqchij ta apanoq. Xane xinik'ulaj je' ta ne in jun ángel rech ri Dios, je' ta ne chi in, in ri' ri Jesucristo. ¹⁵ ¿Jas xib'ano chi man k'o tä chik ri kikitomal ri xina' nab'e? Kuya' kinb'ij chi qas tzij xinwilo jas ri rutzil iwanima' chwe aretaq xink'oji iwuk'. We ta xixkowinik xiwesaj ta ri' ri i waq'âch, xiya ta ri' chwe che nu to'ik. ¹⁶ ¿A xa ta k'u xinb'an nu k'ulel chiwe rumal chi xinb'ij ri qas tzij?

¹⁷ E k'o jule' winaq ri je' ta ne sib'alaj kixkaj, man utzil tä k'ut ri kâkaj chiwe. Are kâkaj kixkitas chqij, rech ri ix ke' iwanima' kuk' ri e are'. ¹⁸ Utz k'ut aretaq e k'o ri kâkaj kâka'n utzil chiwe ruk' ri rutzil kanima', man xuwi tä k'u aretaq in k'o iwuk', xane rajwaxik wa' amaq'el. ¹⁹ Ix, ri ix je' ta ne alaj taq walk'ual, jumul chik kinna' k'âx iwumal, je' jas ri k'âx ri kuriq jun yawab' ixoq. Kintaqej k'u na u ch'ijik ri k'âx ri' rech je' kixel na jas ri Cristo, qas kâtaqan k'u na ri Are' pa iwanima'. ²⁰ Kwaj ta na chi in k'o iwuk' chanim ri' rech jun chi wi ri i

ch'ab'exik kuya' kinb'ano. ¡Sib'alaj k'u kinok il rumal ri tajin kib'ano!

Ri kieb' u trato ri Dios kejunamax kuk' ri nan Sara rachi'l ri nan Agar ojer

²¹ Chib'ijmpe chwe, ix ri kiwaj kixk'oji pu q'ab' ri Pixab' ri xutz'ib'aj ri qa mam Moisés, ¿a mat k'o jumul ri xok pa i jolom jas ri kub'ij ri Pixab' ri? ²² Tz'ib'tal chupam chi ri qa mam Abraham xek'oji kieb' u k'ojol, jun ruk' ri ajik', ri ixoq ri u kojom che patänil re, ri jun chik ruk' ri qas rixoqil ri man xaq tä patänil re. ²³ Ri ral ala ri ajik' xil u wäch ri are' je' jas ri kil u wäch apachike ak'al. Are k'u ri ral ala ri qas rixoqil ri qa mam Abraham xil u wäch ri are' rech je' kelik jas ri xuchi'j loq ri Dios. ²⁴ Are k'u jun k'utb'al wa' chqawäch uj kämik. We kieb' ixoqib' ri' kinjunamay kuk' kieb' trato. Ri nan Agar, ri ajik', kinjunamay ruk' ri trato ri xub'an ri Dios ruk' ri qa mam Moisés puwi' ri nim juyub', Sinaí u b'i'. Ri winaq ri kil ki wäch chupam we trato ri', je' ta ne chi xa e kojom che patäninelab' jas ri nan Agar. ²⁵ Ri nan Agar kinjunamay ruk' ri ojer trato ri xb'antaj chila' puwi' ri nim juyub' Sinaí ri k'o pa Arabia. Ri winaq ri e k'o pu q'ab' wa' we trato ri', e are je' jas ri ka'nom ri winaq aj Jerusalén kämik. Ri e are' kachi'l ri kalk'ual je' ta ne e kojom che patäninelab' rumal chi e k'o pu q'ab' ru Pixab' ri Moisés. ²⁶ Are k'u ri uj, uj ri' rech ri k'ak' Jerusalén ajchikaj, man uj k'o tä chi pu q'ab' ri ojer Pixab' ri'. Are k'u ri qas qa ünimil wa'. ²⁷ Kub'ij k'u ru Loq' Pixab' ri Dios ri Tz'ib'talik:

Chatkikotoq, nan, at ri'

ri man katalk'ualan taj,

ri man k'o tä awal.

Sib'alaj chatkikotoq, ko karaq a chi'

rumal ri a kikitomal,

pune man k'o tä jumul a riqom

ri k'äx ri kuriq jun yawab' ixoq.

Je ri', rumal chi kek'iar na

ri ral ri ixoq ri xjach canoq

chuwäch ri ixoq ri k'o rachajil,

—kächa ri tz'ib'tal canoq.

²⁸ Je k'u ri', qachalal, je' jas ri qa mam Isaac ri xuchi'j ri Dios chi kil na u wäch, je ri' ri uj, uj ri' ri ralk'ual ri Dios rumal ri xuchi'j ri Are'. ²⁹ Je' jas ri xk'ulmataj ojer, ri ala ri xil u wäch je' jas ri kil u wäch apachike ak'al kub'an k'äx che ri jun ri xil u wäch rumal ru chuq'ab' ri Espiritu rech ri Dios. Are k'u je wa' tajin käk'ulmataj kämik. ³⁰ ¿Jas k'u kub'ij ru Loq' Pixab' ri Dios ri Tz'ib'talik? Kub'ij: “Chawesaj b'i ri ajik' ri kojom che patäninel rachi'l ri ral, rumal chi ri ral ri ixoq ajik' ri' man käyi' tä rechb'al junam ruk' ri ral ri ixoq ri qas k'o rachajil,” —kächa'. ³¹ Je ri', qachalal, man uj je' taj jas ri ral ri ixoq ajik' ri xaq kojom che patäninel, xane uj junam

jas ri ral ri qas rixoqil ri qa mam Abraham ri man xaq tä patänil re.

5

Miya chi iwib' jumul pu q'ab' ri ojer Pixab' re ri qa mam Moisés

¹ Man uj k'o tä chi pu q'ab' ri ojer Pixab'. Ri Cristo k'ut Are xujesan pu q'ab' wa'. Chitajej b'a' ri u b'anom ri Jesucristo chiwe. Chiwila b'a' chi miya chi iwib' jumul chik pu q'ab' ri ojer Pixab' je' ta ne chi xaq ix kojom chik che patäninelab'.

² ¡Chitampe ri kinb'ij! In wa', ri Pablo, kintzijon iwuk'. Kinb'ij chiwe chi we ri ix kiya iwib' chi kok retal ri ojer trato che ri i cuerpo jas ri kaka'n ri winaq aj Israel, man k'o tä u patän ri' chi ix kojoninaq che ri Cristo. ³ Jumul chik kwaj kinb'ij chke konojel ri achijab', chi we käkiya kib' chi kok ri retal ri ojer trato chke, tzrajwaxik wi ri' kaka'n ronojel ri kub'ij ri Pixab' ri xutz'ib'aj ri qa mam Moisés. ⁴ Ix ri kikojo chi rumal ru b'anik ri kub'ij ri Pixab' käjikomataj ri iwanima' cho ri Dios, i tasom chi iwib' chrij ri Cristo. I yo'm kan ri nimalaj u toq'ob' ri Dios. ⁵ Ri uj k'ut, rumal ri Loq'alaj Espiritu qa ku'b'am qa k'ux chi ri Dios kub'an na jikom che ri qanima' rumal chi uj kojoninaq che ri Cristo. ⁶ We k'u xa uj jun chik ruk' ri Cristo Jesús, man k'o tä u patän ri' we kákoj ri retal ri ojer trato che ri qa cuerpo o we man kákoj tä ri'. Ri k'o u patän are la' chi uj kojoninaq che ri Cristo. Are k'u wa' káb'anow chqe chi qas keqaj konojel ri winaq.

⁷ Ri ix utz i b'anom petinaq loq. ¿Jachin lo ri xkojow i k'ux rech man kinimaj tä chi ri qas tzij? ⁸ Man are tä ri Dios ri xb'anow wa' rumal chi are ri Are' ri xixusik'ij rech kixk'oji ruk'. ⁹ Iwetam k'ut chi “xa ruk' jub'iq' ch'am käch'amirisax juntir ri q'or re kaxlan wa, käwalij k'u u wäch,” —kächa'. (Je ri' xuquje' ri jub'iq' tijonik ri man utz taj käreztelaj na u wäch ronojel ri utzalaj tijonik.) ¹⁰ Ri in k'ut ku'l nu k'ux chrij ri Qajaw Jesús, chi ri ix man kik'ex tä ri i chomanik. Are kák'ajisax k'u na u wäch rumal ri Dios jachin ri' ri tajin kub'ano chi käsach i k'ux, apachin ta ne ri are'.

¹¹ Ri in, qachalal, we ta xaq are tajin kintaqej u tzijoxik chi rajwaxik kok ri retal ri ojer trato che ri ki cuerpo ri achijab', mat kätzukux u b'anik k'äx chwe in kumal ri winaq aj Israel. We ta je ri', mat tzel kákita ri winaq ri' ri u tzijoxik ru kämikal ri Cristo cho ri cruz. ¹² Jachin k'u taq ri kákikoj ki chuq'ab' chiwe rech kok ri retal ri ojer trato che ri i cuerpo, b'anom ta wi chi kákiq'at apan ri ki cuerpo ri e are'.

¹³ Ri ix k'ut, qachalal, ix sik'im rech kixtzoqopitaj pu q'ab' ri ojer Pixab'. We je

ri', xuwi b'a' michomaj chi kuya' kib'an ri xaq i rayib'al ix, xane chito'la iwib' rumal chi kiwaj iwib'. ¹⁴ Je ri', rumal chi ronojel ri kub'ij ri Pixab' kub'an tz'aqat wa' rumal we taqanik ri': "Chawaj ri awach winaq jas ri at kawaj awib'," —kächä'. ¹⁵ We k'u je' kib'ano jas ri kaka'n ri tz'i' xa kákipaq' kib', chiwila b'a' iwib' chi mik'is ne iwib' pa taq ri ch'oj.

Ri qa rayib'al ri man utz taj kuk'ulelaj u wäch ri Loq'alaj Espiritu

¹⁶ Ri kwaj kinb'ij in chiwe, are wa': Chiya che ri Loq'alaj Espiritu chi kátaqan ri Are' pa ri iwanima' rech man kib'an tá ri i rayib'al ri man utz taj. ¹⁷ Ri qa rayib'al ri man utz taj kuk'ulelaj u wäch ri Loq'alaj Espiritu rech ri Dios. Ri Loq'alaj Espiritu k'ut kuk'ulelaj u wäch ri qa rayib'al ri man utz taj. We kieb' ri' kákiq'ulelaj kib'. Rumal ri' ri ix man kixkowin taj kib'ano jachike ri kiwaj. ¹⁸ We k'u are ri Loq'alaj Espiritu kátaqan pa ri iwanima', man ix k'o tá ri' pu q'ab' ri Pixab' ri xutz'ib'aj ri qa mam Moisés.

¹⁹ Q'alaj ri kaka'n ri winaq ri ki jachom kib' chub'anik xaq jas ri ki rayib'al ri e are'. Je' kaka'no jas ri kaka'n ri tz'i' ri xaq kákiq' kib', man k'o tá ki pixab'. Kaka'n k'u ri etzelal ri sib'alaj áwas u b'anik cho ri Dios xuquje' chkiwäch ri winaq. Kaka'n k'u ronojel u wäch ri man utz taj ri kákirayij, ri xa k'ixb'al u b'anik. ²⁰ Man xuwi tá wa', xane kákiq'ijilaj taq tiox, xuquje' kaka'n itzinik. Kaka'n ki k'ulel chb'il taq kib', amaq'el k'ut kákiyak taq ch'oj. K'áx kákina' chkiq' nik'iaj winaq chik, chanim kápe koyowal. Xuwi kákitz'ukuj ri kech ri e are', man kákiichomaj tá ri kech nik'iaj chik. Man kuriq' tá rib' ri ki chomanik, xane xaq kákitasala kib' chb'il taq kib'. ²¹ Xuquje' kákirayij ri kech nik'iaj winaq chik, kekámisanik, keq'ab'arik, kákiya u wi' ri kákitijo. Xuquje' k'o nik'iaj chik ri junam ruk' wa' ri kaka'no. Kinb'ij chi k'u apan chiwe jas ri nu b'im kan nab'e, chi ri keb'anow wa' we ri' man keopan tá na ruk' ri Dios rech kátaqan ri Are' pa ki wi'.

²² Are k'u ri Loq'alaj Espiritu kub'ano chi káqaj qib', chi gas kujkikotik, chi kuxlan na ri qanima', chi káqachajij paciencia, chi kujch'awik, káqa'n utzil chke nik'iaj, chi utz ri qa k'aslemal, chi jikom ri qanima', man xaq tá kieb' qa chomanik. ²³ Ri Loq'alaj Espiritu xuquje' kub'ano chi man káqanimarisaj tá qib', chi man káqa'n tá xa jas ri káqaj uj. Man k'o tá k'u jun pixab' ri kub'ij chi man kuya' taj keb'an wa' we ri'. ²⁴ Ri e rech ri Cristo, je' ta ne ki ripom cho ri cruz ronojel ri ki rayinik ri man utz taj, ronojel ri man utz taj ri kraj ri kanima'. ²⁵ We yo'm ri qa k'aslemal rumal ri Loq'alaj Espiritu, qaya b'a' chi ri Are' kátaqan pa qa wi' pa ronojel ri káqa'no.

²⁶ Man kuya' taj káqanimarisaj qib', rumal chi we je ri' káqa'no, xa káqayak qoyowal

chb'il taq qib'. Mäqana' k'u k'áx chrij jun konojel chik aretaq kuriq' utzil pa ru k'aslemal.

6

Rajwaxik káqato'la qib' ri jun ruk' ri jun chik

¹ Qachalal, we k'o jun konojel káriqtaj pa mak, ix ri' ri gas kátaqan ri Loq'alaj Espiritu pa ri iwanima', rajwaxik kito' wa' we konojel ri' ruk' jun utzalaj iwanima' rech kub'an chi na ri gas utz pa ru k'aslemal. Aretaq kib'an wa', are minimarisaj b'a' iwib', xane china' pa iwanima' chi man nim tá i b'anik. Chiwila k'u iwib' chijujunal chi mixqaj ne ix pa mak xuquje'. ² Chito'la iwib' ri jun ruk' ri jun chik je' jas ri kub'an jun winaq kuto' ri rachi'l che ri reqa'n. We je' kib'an ix, kinimaj ri' ru Pixab' ri Cristo.

³ We k'o jun kuchomaj chi gas nim u b'anik, qetam chi man gas tzij tá k'u ri'. Ri winaq ri' xa tajin kusub' rib'. ⁴ Rumal ri' rajwaxik chi chiwila iwib' chijujunal jas ri i b'anom pa ri i k'aslemal. We i b'anom ri gas utz, te k'u ri' káku'b'i na i k'ux rumal ri i b'anom ix. Man are tá kiwilo jas ri ka'nom nik'iaj chik. ⁵ Chijujunal k'ut rajwaxik kich'oqob'ej ronojel ri kápe na pa ri i k'aslemal.

⁶ Ri tajin kátijox che ru Loq' Pixab' ri Dios, rajwaxik ri' kuya jub'iq' re jas ri k'o ruk', kub'an k'u ronojel u wäch utzil che ri tajin kuya ri tijonik.

⁷ Misub' iwib'! Ri Dios man kuya tá chke ri winaq chi xa káketz'b'ej u wäch ri Are'. Ronojel k'u ri kutik jun winaq, káyak na ru wäch wa' rumal. ⁸ We jun winaq xa are kub'an ri etzelal ri k'o pa ri ranima', are je' ta ne ri tajin kutik jun itzel tiko'n ri man utz tá u wäch, kuyak k'u na ri' jun cosecha re kámikal. We k'u jun winaq are kub'ano jachike ri kraj ri Espiritu rech ri Dios, are je' ta ne chi tajin kutik jun utzalaj tiko'n ri'. Ri Loq'alaj Espiritu kub'ano chi kuyak na jun cosecha ri man kásach tá u wäch, are wa' ri k'aslemal ri man k'o tá u k'isik. ⁹ Mujkos b'a' chub'anik ri utzil. Kuriq' k'u na jun q'ij ri káqayak na ru wäch ri qa'nom we man kák'istaj tá qa k'ux ruk', káqaya k'u kan u b'anik wa'. ¹⁰ Rumal ri', joropa' mul ri kujkowinik, qa'na utzil chke konojel winaq, más k'u na chke ri qach taq konojelab'.

Ri apóstol Pablo kuya ri k'isb'al u pixb'enik, xuquje' kuya rutzil ki wäch ri konojelab'

¹¹ Chiwilampe ri nimaq taq tz'ib' ri kinb'ano aretaq kinkoj ri nu q'ab' in chutz'ib'axik wa' we tzij ri' chiwe. ¹² Konojel ri kákiq' ki chuq'ab' chiwe rech kok ri retal ri ojer trato che ri i cuerpo, kaka'n wa' xa rumal chi are káqaj chi utz keil wi kumal ri winaq, rech man k'o tá jun k'áx káb'an chke

pune kákitzijoj ru kámikal ri Cristo cho ri cruz. ¹³ Xuquje' ne ri winaq ri kojom ri retal ri ojer trato che ri ki cuerpo, man kekowin taj káka'n ronojel ri kub'ij ri Pixab'. Are xa kákaj chi kok ri retal ri ojer trato chiwe rech kákinimarisaj kib' chiwij chub'ixik chi xekowinik xka'no chi xixniman che ri kákib'ij. ¹⁴ Are k'u ri in, man kwaj taj kinnimarisaj wib' xaq pa we wi, xane xuwi rumal ru kámikal ri Qajaw Jesucristo. Rumal k'u ru kámikal ri Are' cho ri cruz, je' ta ne káminaq chi ruwächulew chwe in, xuquje' ri in, je' ta ne in káminaq chik chuwäch ruwächulew. ¹⁵ We qas tzij xa uj jun chik ruk' ri Cristo Jesús, pune kojom retal ri ojer trato che ri qa cuerpo o man kojom taj, man are tä ri' ri nim u b'anik, xane ri qas nim u b'anik are we b'anom k'ak' taq winaq chqe rumal ri Dios. ¹⁶ Konojel b'a' ri káka'no jas ri kub'ij we taqanik ri', chub'an ta ri Dios chke chi kuxlan ri kanima', xuquje' chi kel ta u k'ux chke ri e are', xuquje' chke konojel ri qas e rech ri Are'.

¹⁷ Xuwi chi b'a' wa' we kámik, are k'u ri chuweq káb'ij man kwaj tä chik chi k'o jun kuya latz' chwe, o kub'an jun u wäch k'äx chwe, rumal chi ri yuk ri e k'o che ri nu cuerpo qas kákik'utu chi in patänil re ri Qajaw Jesús.

¹⁸ Qachalal, are ta b'a' ri Qajaw Jesucristo kätöq'ob'isan na i wäch ix nimalaj iwonojel. Amén.

RI CARTA RI XUTZ'IB'AJ RI SAN PABLO CHKE RI KOJONELAB' AJ ÉFESO

Ri apóstol Pablo kuchap u tz'ib'axik jun carta chke ri qachalal kojonelab' aj Éfeso

¹ In wa', ri Pablo, in apóstol. In jun chke ru taqo'n ri Jesucristo. Je wa' nu b'anik rumal chi are u rayib'al ri Dios. Kintz'ib'aj b'i wa' we wuj ri' chke ri winaq ri e rech ri Dios, ri e k'o pa ri tinimit Éfeso, ri kojonelab' ri gas jikom ri kanima', ri xa e jun ruk' ri Cristo Jesús. ² Are ta b'a' ri Dios qa Tat xuquje' ri Qajaw Jesucristo kutoq'ob'isaj i wäch, kub'ano chi kuxlan ri iwanima'.

Ri Dios uj u tewchim rumal chi xa uj jun ruk' ri Cristo

³ Qaya b'a' u q'ij ri Dios, ru Tat ri Qajaw Jesucristo, rumal chi uj u tewchim. U b'anom k'ia u wäch toq'ob' chqe rumal chi xa uj jun ruk' ri Cristo. U yo'm chqe ronojel u wäch utzil ri käpe chila' chikaj. ⁴ Tzojer loq uj cha'tal rumal ri Dios, uj ri uj k'o pu q'ab' ri Cristo, k'ä mäjoq käb'an ruwächulew rumal. Xujucha' rech ch'ajch'oj ri qanima' chuwäch ri Are', rech man k'o tä etzelal pa ri qa k'aslemal. ⁵ Xa k'u rumal chi uj loq' chuwäch, rumal ri' xuchomaj loq ojer chi kujukoj che ralk'ual rumal ri Jesucristo. Pa ranima' k'ut xpe wi chi je' kub'ano, rumal chi are ru rayinik. ⁶ Rumal k'u ri' kämik käqaya u q'ij ri Dios rumal ru toq'ob' ri sib'alaj nim u q'ij ri xub'an chqe. Rumal k'u we nimalaj toq'ob' ri', ri uj, xa uj jun chik ruk' ri loq'alaj u K'ojol. ⁷ ¡Ri Dios sib'alaj nim ri toq'ob' ri xub'an chqe aretaq xujutoro, xujutzogopij pu q'ab' ri Itzel! Are k'u xa rumal ru kämikal ru K'ojol chi ri Dios xkowinik xusach ri qa mak. ⁸ Sib'alaj man k'o tä k'u je' ri toq'ob' ri xub'an ri Dios chqe, xuya k'u ronojel u wäch qetamb'al, xuquje' xuya ri qa no'j. ⁹ Xuq'alajisaj chqawäch jas ri k'o pa ranima' ojer, ri u chomam loq pa re wi, ri man k'o tä jun retam nab'e. ¹⁰ U chomam loq chi aretaq kopan ri q'ij, kub'an na ri xuchi'j loq. Are la' chi kub'an na xa jun che ronojel, are ronojel ri k'o chila' chikaj xuquje' ri k'o cho ruwächulew, kuya k'u na pu q'ab' ri Cristo rech kätaqan ri Are' puw'i.

¹¹ Tzojer loq uj cha'tal rumal ri Dios, uj ri uj k'o pu q'ab' ri Cristo rech käqariq qe ri echb'al junam ruk' ri Are'. Are ri u chomam loq chi kuya na chqe. Je wa' xub'an ri Dios ri kub'an ronojel. Are je' jas ru chomam petinaq loq, ri utz käriolo. ¹² Je ri' xub'an ri

Are' rech ri uj, ri xqajikib'a ri qanima' chrij ri Cristo nab'e, käqaya na u q'ij ri Dios rech sib'alaj känimarisax na u q'ij. ¹³ Ri ix xuquje', aretaq xita ri Qas Tzij, ri Utzalaj Tzij re ri Evangelio ri xtzijox chiwe rech rumal wa' kiriq na ru tob'anik ri Dios, xixkojon che ri Cristo. Are chi' xkoj iwetal chi ix rech ri Dios ruk' ri Loq'alaj Espiritu ri xuchi'j loq nab'e. ¹⁴ Aretaq ri Loq'alaj Espiritu kätaqan pa ranima' jun kojonel, are k'utb'al chi gas tzij kuya na ri Dios ronojel ri xuchi'j chke ri winaq ri e rech ri Are' aretaq gas kätz'aqat ki torik. Je ri' rech käqaya na u q'ij ri Dios, rumal chi sib'alaj nim u q'ij ri Are'.

Ri apóstol Pablo kuta' che ri Dios chi kuya ketamb'al ri kojonelab'

¹⁵ Ri in xinta u tzijol chi sib'alaj kixkojon che ri Qajaw Jesús, xuquje' chi sib'alaj keiway konojel ri winaq ri e rech ri Dios. ¹⁶ Rumal k'u ri', aretaq xinta wa', xintagej u ya'ik maltioxinik che ri Dios iwumal. Amaq'el ronojel q'ij kixna'taj chwe, kinb'an k'u orar pi wi'. ¹⁷ Je ri' kinb'ano rech ru Dios ri Qajaw Jesucristo, ri qa Tat ri sib'alaj nim u q'ij, kub'an ta na chiwe chi ri Loq'alaj Espiritu kuya na ri i no'j, xuquje' kuq'alajisaj ri Dios chiwäch rech gas kiwetamaj na u wäch ri Are'. ¹⁸ Kinta' che ri Dios chi kuya na saqil pa ri i chomab'al rech gas kiwetamaj jas ri' ri kiku'b'a wi i k'ux ri xixusik'ij wi. Je' kinta' che rech kiwetamaj chi sib'alaj nim, sib'alaj je'lik ri käkechb'ej na konojel ri winaq ri e rech ri Are'. ¹⁹ Xuquje' kinta' wa' che ri Dios rech kiwetamaj chi sib'alaj nim ru chuq'ab' ri Are', man k'o tä k'u käjunamataj wi wa'. Are wa' ri chuq'ab' ri u yo'm chqe uj ri uj kojoninaq che. ¡Wa' we ri' are ri nimalaj u chuq'ab' ri gas kajmab'al! ²⁰ Qas are k'u wa' ri chuq'ab' ri xuk'ut ri Are' aretaq xuk'astajisaj ri Cristo chkixol ri käminaqib', xut'uyub'a k'u pa ru wikiäq'ab' chila' chikaj.* ²¹ Are ri Cristo, ri xyi' che chi kätaqan pa ki wi' konojel ri k'o taqanik pa ki q'ab', pune ta ne e ängeles. Xuquje' xyi' che chi kätaqan pa ki wi' konojel ri taqanelab' ri sib'alaj k'o ki chuq'ab', ri q'atal taq tzij, ri k'amal taq ki b'e ri winaq, xuquje' puwi' ronojel u wäch taqanik, man xuwi tä pa taq we q'ij ri', xane pa taq ri q'ij ri junab' ri kepe na. ²² Ri Dios xub'ano chi ri Cristo kätaqan puwi' nimalaj ronojel ri k'olik, xuquje' xukoj ri Are' pa ki wi' ri qachalal kojonelab' che Kajaw ri e are', junam jas ri qa jolom k'o puwi' ri qa cuerpo. ²³ Konojel ri qachalal kojonelab' e are' kenuk'uw ru cuerpo ri Cristo waral cho we uwächulew. Je ri' chi kumal ri kojonelab'

* **1:20** Ri kä'tuyi jun pu wikiäq'ab' jun nim taqanel, we are ri Dios o jachin jun ri k'o taqanik pu q'ab', kel kub'ij chi ri jun ri t'uyul pu wikiäq'ab', are käyi' nim taqanik pu q'ab' ri are' xuquje'.

ri Cristo qas tz'aqat chik. Ri Are' k'ut qas kub'an tz'aqat che ronojel ri k'olik.

2

Xa rumal ru toq'ob' ri Dios k'o ri tob'anik chqe

¹ Ri ix nab'e kanoq je' ta ne ix käminaq rumal ri iwetzelal, rumal ri i mak. Xpe k'u ri Dios, xuya ri qas k'aslemal chiwe junam ruk' ri Cristo. ² Nab'e kanoq xib'an iwe ri mak jas ri käka'n ri winaq cho ruwächulew, xib'an k'u u rayib'al ri jun ri käb'in pa ri sutz' mayul, ri k'o u taqanik pa ki wi' ri itzel taq espíritu. Are wa' ri Itzel ri xa kub'an u rayib'al pa kanima' ri winaq ri man keniman tä che ri Dios. ³ Qonojel ri uj xuquje' je' xqa'n wa' nab'e kanoq, xqa'no jachike ri xqaj, xqanimaj ronojel ri xraj ri qanima' rech käqa'n ri man utz taj, xuquje' xqa'n apachike ri xqachomaj u b'anik. Rumal ri' nab'e kanoq are ya'tal chqe uj chi käpe ri nimalaj royowal ri Dios pa qa wi', käk'äjisax na qa wäch jas ri ya'tal chke ri nik'iaj winaq chik. ⁴ Are k'u ri Dios, rumal ri nimalaj rutzil ranima', sib'alaj xel u k'ux chqe. ⁵ Sib'alaj loq' xujrilo, pune ta ne nab'e kanoq ri uj je' ta ne uj käminaqib' chuwäch ri Dios rumal ri qa mak. Xuya chqe ri qas k'aslemal junam ruk' ri Cristo. Xa rumal ri nimalaj u toq'ob' ri Dios qa rigom ru tob'anik ri Are'. ⁶ Man xuwi tä k'u wa' ru b'anom ri Dios chqe, xane xuquje' xujuk'astajisaj junam ruk' ri Cristo Jesús, xuquje' xuya chqe chi kujtaqan junam ruk' Are' chila' chikaj. ⁷ Je ri' xub'an chqe rech pa taq ri q'ij ri kepe na kuya' kuk'utu chi sib'alaj nim ru toq'ob' pa qa wi'. Kub'an k'u na ronojel wa' ruk' ri nimalaj rutzil ranima' ri xuk'ut chqawäch rumal ri Cristo Jesús. ⁸ Xa rumal ru toq'ob' ri Dios ix to'tajinaq, rumal chi xixkojon che ri Cristo. Man rumal tä ri utzil ri i b'anom ix, xane xa u sipam ri Dios wa' chiwe. ⁹ Man are tä rumal ri utzil ri kib'ano chi ri Dios xub'an toq'ob' chiwe. Je ri' rech man k'o tä jun ri kuya' kunimarisaj rib'. ¹⁰ Ri Dios k'ut, Are xujb'anowik. Rumal ri Cristo Jesús xub'an k'ak' che ri qa k'aslemal rech käqa'n ronojel u wäch utzil. Ojer k'u wa' xuchomaj loq chi je' käqa'no.

Rumal ru kämikal ri Cristo k'o utzil chqaxol

¹¹ Chna'taj b'a' chiwe jas ri i b'anik nab'e. Ri ix man ix aj Israel taj, rumal k'u ri' ri winaq aj Israel ri kojom ri retal ri ojer trato chke käkib'ij chb'il kib': "Uj wa', uj rech ri circuncisión," —kecha.* Käkib'ij k'u chiwe chi ri ix man ix jun tä kuk', man kojom tä ri retal ri ojer trato chiwe, —kecha ri'. ¹² Nab'e kanoq man ix kojoninaq tä che ri Cristo.

Man ix jun tä kuk' ri winaq aj Israel. Man k'o tä iwetam chrij ri xuchi' ri Dios chke ri winaq ri e cha'tal rumal ri Are', man k'o tä k'u iwe che ri xub'ij ri Dios pa taq ri ojer taq tratos ri xub'an kuk'. Man na'tal tä ri Dios chiwe, man k'o tä ri ku'l wi i k'ux waral cho we uwächulew. ¹³ Kämik k'ut ri ix xa ix jun ruk' ri Cristo Jesús, ix ri nab'e naj ix k'o wi che ri Dios. B'anom chiwe chi naqaj chik ix k'o wi che ri Are' kämik xa rumal ru kämikal ri Cristo. ¹⁴ Ri Cristo Are käyo'w utzil chqaxol. Xub'an xa jun tinimit chke ri kieb' tinimit, ri winaq aj Israel kachi'l ri winaq ri man e aj Israel taj. Xresaj ri q'ateb'al ri tasowinaq ki xo'l, je' ta ne jun tapyä. ¹⁵ Aretaq xuya rib' pa kämikal cho ri cruz are chi' xusach u wäch ri kujk'ulelanik. Ri kujk'ulelanik are ri ki Pixab' ri winaq aj Israel ri kujutaq chub'anik k'ia jastaq. Ri Are' k'ut xuya utzil chkixol ri kieb' tinimit. Xub'an xa jun tinimit chke, jun k'ak' tinimit ri xa jun ruk' ri Cristo Jesús. ¹⁶ Rumal ru kämikal cho ri cruz xerutzirisaj ri kieb' tinimit ruk' ri Dios, xub'an chke chi xa e jun chik, xusach k'u u wäch ri ch'oj chkixol.

¹⁷ Xpe k'u ri Cristo, xutzijoj ri Utzalai Tziz re ri Evangelio ri kub'ano chi k'o utzil, kub'an k'ut chi kuxlan ri kanima' konojel. Xutzijoj wa' chiwe ix ri man ix aj Israel taj ri naj xixk'oji wi che ri Dios nab'e, xuquje' xutzijoj wa' chke ri winaq aj Israel ri más naqaj xek'oji wi che. ¹⁸ Rumal k'u ri Cristo ri uj nimalaj qonojel, we uj aj Israel o man uj aj Israel taj, junam kuya' kujok cho ri Dios qa Tat xa rumal ri Espiritu rech ri Are'. ¹⁹ Rumal ri', ri ix ri man ix aj Israel taj, kämik ix ajtinimit chik, man xaq tä ix aj ke nik'iaj tinimit, man ix estranjerab' tä chik, xane ix ajtinimit junam kuk' konojel ri e rech ri Dios. Ri ix, nimalaj iwonojel ri ix, ix achalaxik chik rech ri Dios. ²⁰ Ix je' jas jun ja. Ix yakom puwi' ri tak'alib'al ri xkikoj ri apóstoles xuquje' ri q'alajisal taq re ru Loq' Pixab' ri Dios. Ri ab'aj ri xkoj rumal ri Dios che toq'eb'al re ri esquina rech ri ja, are ri Jesucristo. Are wa' we ab'aj ri' sib'alaj nim u b'anik. ²¹ Puwi' k'u wa' we tak'alib'al ri', ri Cristo, tajin käyak wi wa' we ja ri' rumal ri Dios. Utz k'u u b'anik tajin käb'an che ki nutik ru tz'aqatil. Rumal ri Cristo konojel ri kojonelab', je' ta ne e xan, tajin käkinuk' kib' chub'anik jun nimalaj ja ri tastalik rech chila' kuya' käq'ijilax wi ri Qajaw Jesús. ²² Ri ix xuquje', ri xa ix jun ruk' ri Cristo, tajin kinuk' iwib' kuk' ri nik'iaj kojonelab' chik chub'anik jun ja jawije' käjeqi wi na ri Dios rumal ri Loq'alaj Espiritu rech ri Are'.

3

Ri apóstol Pablo kutzijoj ri Utzalai Tziz re

* 2:11 Che retamaxik jub'iq' na chrij ri circuncisión, chawila' Hechos 7:8, nota.

ri Evangelio chke ri winaq ri man e aj Israel taj

¹ Xa rumal wa', ri in Pablo, chanim ri' in k'o pa che' xa rumal chi xintzijoq ri Utzalaj Tzij chrij ri Cristo Jesús chiwe ix, ri man ix aj Israel taj. Tajin k'u pa nu kinb'an orar pi wi' cho ri Dios. ² Ri ix iwetam chi wa' chi ri Dios xel u k'ux chwe, xutoq'ob'isaj nu wäch, xuya k'u pa nu q'ab' rutzijoxik ru Loq' Pixab' chiwe. ³ Ri Dios xuk'ut chnuwäch ri u chomam loq, ri man etamtal tä nab'e. Nu tz'ib'am chi k'u wa' chiwe ruk' kieb' oxib' tzij. ⁴ Aretaq kisik'ij u wäch ri xintz'ib'aj chiwe, kiwetamaj na ri' jas ru chomanik ri Dios chrij ri Cristo ri man etamtal tä nab'e, ri te' xq'alajisax chnuwäch. ⁵ Are k'u wa', ri man xyl' tä kan retamaxik wa' chke ri winaq ojer, kämik k'ut q'alajisam chik rumal ri Dios chkiwäch ri loq'alaj taq apóstoles, ri u taqo'n ri Are', xuquje' chkiwäch ri loq'alaj taq q'alajisal taq re ru Loq' Pixab' rumal ri Espiritu rech ri Dios. ⁶ Are k'u wa' ri man etamtal tä nab'e: Rumal ri Utzalaj Tzij re ri Evangelio, ri winaq ri man e aj Israel taj junam käkechb'ej ke ri kuya ri Dios chke ri winaq aj Israel. Xuquje' xa e jun chi kuk', käkik'am k'u na ke ri xuchi'j ri Dios rumal ri Cristo Jesús.

⁷ Pune man taqal tä chwe, xel u k'ux ri Dios chwe. Rumal ri nimalaj u toq'ob' ri Are', xuya pa nu q'ab' chi kinpätänin che, kintzijoq ru Loq' Pixab' ri Are'. Je ri' ri xub'an chwe rumal ri nimalaj u chuq'ab'. ⁸ Ri in gas man nim tä nu b'anik chuwach apachike kojonel ri man nim tä u q'ij chkiwol konojel ri winaq ri e cha'tal rumal ri Dios. Pune ta ne je ri', ri Dios xutoq'ob'isaj nu wäch, xuya chwe chi kintzijoq chke ri winaq ri man e aj Israel taj ri Utzalaj Tzij re ri Evangelio ri kub'ij ri nimaq taq utzil ri sib'alaj kajmab'al na ri keriqtaj na ruk' ri Cristo. ⁹ Yo'm k'u chwe chi kinq'alajisaj chkiwäch konojel ri winaq ru chomam loq ri Dios ri b'anowinaq konojel ri jastaq. Man etamtal tä k'u wa' nab'e pa ri ojer taq q'ij. ¹⁰ Je ri' xb'antajik rech kämik kumal ri qachalal kojonelab' ketamax ri k'ia u wäch u no'j, u chomab'al ri Dios. Rumal ri' konojel ri k'o taqanik pa ki q'ab' pune ta ne e ángeles, xuquje' konojel ri q'atal taq tzij ri k'o ki taqanik chikaj käketamaj na wa'. ¹¹ Petinaq loq ri Dios xuchomaj wa' rech je' käb'an na ri' rumal ri Cristo Jesús ri Qajaw. ¹² Rumal chi xa uj jun ruk' ri Cristo kuya' kujok cho ri Dios, man käqaxej tä qib', ku'l k'u qa k'ux chi je ri' rumal chi uj kojoninaq che ri Are'. ¹³ Rumal ri' kinb'ij chiwe chi mixb'ison rumal ri k'äx ri tajin kinriq rumal iwech. Are tajin kinriq wa' xa rech ri ix kiriq utzil, rumal chi känimar na i q'ij rumal.

Waral ri apóstol Pablo kuk'ut chqawäch

nimalaj qonojel chi sib'alaj uj loq' cho ri Dios

¹⁴ Rumal k'u ri' kinxuki chub'anik orar chuwach ru Tat ri Qajaw Jesucristo. ¹⁵ Chrij k'u ri qa Tat esam wi ki b'i' konojel ri e k'o pa ri kaj, xuquje' ronojel achalaxik ri k'o cho ruwachulew. ¹⁶ Kinta' che ri Dios chi ruk' ri k'ialaj u wäch tewchib'al ri k'o ruk' ri Are' ri kenimarisax u q'ij, kuya ta na ri nimalaj i chuq'ab', kuwalijisaj ta k'u na ri iwanima' rumal ri Loq'alaj Espiritu. ¹⁷ Je ri' rech gas käjeqi na ri Cristo pa taq ri iwanima' rumal chi kixkojon che, rech ri ix gas jikom ri iwanima' kiwaj iwib' nimalaj iwonojel, kitagej k'u na u b'anik wa'. ¹⁸ We je ri' kib'ano, gas kixkowin na kich'ob' junam kuk' konojel ri kojonelab' chi ri Cristo sib'alaj kujraj, chi sib'alaj nim ri rutzil ranima' ri Are'. Man k'o tä je' wi, rumal chi sib'alaj je'lik. Man k'o tä jun chik ri junam ruk', man kuya' taj käch'ob'taj wa' gumal uj ri xa uj winaq. ¹⁹ Kwaj ta b'a' chi gas kiwetamaj ri rutzil ranima' ri Cristo ri sib'alaj nim na wa' chuwach ronojel ri kujkowinik käqachomaj. Je ri' rech are ri Dios ri gas kätaqan pa ri iwanima', man k'o tä chi jun chik.

²⁰ Chnimarisax ta b'a' u q'ij ri Dios ri k'o nimalaj u chuq'ab' chub'anik ronojel ri käqata' che. Man xuwi tä k'u wa' ri käqata' che käkowin ri Are' chub'anik, xane xuquje' käkowin ri Are' chub'anik más na chuwach ri kujkowin uj käqachomaj. Rumal ri nimalaj u chuq'ab' ri Loq'alaj Espiritu ri k'o pa ri qan-ima' kub'an na ronojel wa'. ²¹ Chnimarisax ta b'a' u q'ij ri Dios kumal ri qachalal kojonelab' amaq'el ronojel q'ij, gumal uj nimalaj qonojel ri ya uj jun ruk' ri Cristo Jesús, man xaq xuwi tä kämik, xane xuquje' pa taq ri q'ij ri junab' ri kepe na! Amén.

4

Ri Loq'alaj Espiritu kub'an xa jun chqe

¹ Rumal wa' in k'o pa che' rumal chi tajin kintzijoq ri Utzalaj Tzij chrij ri Qajaw Jesús. Kixinb'ochi'j chi kib'an ri utzil ri taqal u b'anik pa ri i k'aslemal jas ri rajwaxik käka'n ri winaq ri e sik'im rumal ri Dios je' jas ri ix. ² Minimarisaj iwib', xane kixch'awik, utz k'u iwanima' kuk' konojel. Chichajij paciencia, chisacha k'u i mak chb'il taq iwib'. Chik'utu' chi kiwaj iwib' ruk' ru to'ik ri jun ruk' ri jun chik. ³ Chikojo i chuq'ab' rech k'o utzil chixol, rech xa ix jun chik rumal ru tob'anik ri Loq'alaj Espiritu. ⁴ Xa uj jun nimalaj qonojel, xa k'u jun ri Loq'alaj Espiritu. Je ri' xuquje' are xa jun ri käku'b'i qa k'ux chrij, ri uj sik'im wi rumal ri Dios. ⁵ Xa jun ri Qajaw k'olik, xa k'u jun ri kujkojon che, xuquje' xa jun ri qa qasna'. ⁶ Xa jun ri qa Dios k'olik, are k'u qa Tat nimalaj qonojel. Ronojel k'o pu q'ab' ri Are'. Kujukoj k'u

chub'anik ronojel ri kraj ri Are', xuquje' ri Are' k'o pa qanima' nimalaj qonojel.

⁷Yo'm chqe rumal ri Cristo jas ri kujkowin chub'anik. Are je' jas ri u chomam ri Are' pa qa wi' uj chqajujunal. ⁸Rumal ri' kub'ij ru Loq' Pixab' ri Dios ri Tz'ib'talik:

Aretaq xpaqi chikaj, xeuk'am b'i

ruk' Are' ri xeutoro,

xeuya k'u kan sipanik

chke ri winaq waral,

—käch'a'.

⁹¿Jas kel kub'ij wa' chi xpaqi chikaj? Kel kub'ij chi nab'e xqaj b'i k'a chuxe' ri ulew ri sib'alaj naj qajinaq. ¹⁰Ri xqaj b'i xe' ri ulew, are wa' ri xpaqi b'i sib'alaj chikaj, más jela' puwi' ronojel ri kaj chuk'utik chkiwäch konojel chi ri Are', man k'o tä k'olib'al ri mat käriqtaj wi. ¹¹Tzare k'ut xyo'w ri ki chak ri kojonelab' chkiujunal. Jujun xeukoj che apóstoles, jujun chik xeukoj che q'alajisal taq re ru Loq' Pixab' ri Dios, jujun chik xuya chke chi käkitzijoj ri Utzalaj Tz'ij re ri Evangelio. Nik'iaj chik xeukoj che k'amal taq ki b'e ri kojonelab', jujun chi k'ut xeukoj che ajtijab'. ¹²Je ri' xub'an chke ri kojonelab' rech e k'o ri kepatänin che ri Dios ruk' ri kekowin chub'anik. E are wa' ri keb'anow ri chak che ki k'iyisaxik ri kojonelab' ri kenuk'uw ru cuerpo ri Cristo waral cho we uwächulew. ¹³Je ri' rech nimalaj qonojel käjunamataj qa wäch rumal ri qa kojoniq, qas käqetamaj k'u na u wäch ri Cristo ru K'ojol ri Dios. Qas kätz'aqat na ri qa chomab'al, utz kel na ri qa k'aslemaal cho ri Dios, rech kujel ta na junam ruk' ri Cristo. ¹⁴Man uj je' tä chik jas ri ak'alab' ri man xaq tä jun kek'oji wi, keb'e' je wa' je ri'. Man käqaj tä ri' chi xaq kujk'am b'i jawije' chi' kumal nik'iaj winaq ri kek'utuw jule' taq tijoniq chik ri xaq kech achijab'. We winaq ri' xaq käka'n sub'unik, k'o ri itzel taq ki no'j, käkitzukuj jas käka'no chi ri winaq käkikoj ri ki tijoniq ri man qas tzij taj. ¹⁵Chuk'exwäch wa' are rajwaxik chi käqatzijoj ri qas tzij, käqaj qib' nimalaj qonojel. Jas ri ak'alab' kek'iyik, je' rajwaxik käqa'n uj pa ronojel. Kätz'aqat k'u na ri qa chomab'al cho ri Dios, rech kujel ta na jas ri Cristo ri xa uj jun ruk'. Are k'u ri Are' kätaqan pa qa wi' je' jas ri qa jolom k'o puwi' ri qa cuerpo. ¹⁶Rumal ri Cristo utz käka'n konojel ru tz'aqatil ru cuerpo che ki riqik kib'. Konojel käkito'la kib', käka'n k'u ri ki chak chkiujunal. Je ri' chkiujunal ru tz'aqatil ri cuerpo kek'iyik, konojel kākaj kib', kākito'la kib'. (E are wa' ri qachalal kojonelab' ri kenuk'uw ru cuerpo ri Cristo waral cho we uwächulew.)

Waral käqil wi ri k'ak' k'aslemaal ri kuya ri Cristo chke ri kojonelab'

¹⁷Pa ru b'i' ri Qajaw Jesús are kinb'ij wa' chiwe, kixinpixb'aj k'ut chi mib'an chi iwe

jas ri käka'n ri nik'iaj winaq chik ri man e konojinatä che ri Dios. Ri e are' xa käkichomaj u b'anik ri man k'o tä u patän. ¹⁸Jun wi ri ki chomab'al, je' ta ne chi e sachinaq pa ri q'equm. Man k'o tä k'u ke ri k'aslemaal ri kuya ri Dios rumal chi man k'o tä ketam. Ab'ajarinaq ri kanima', man kok tä k'u tzij pa ki jolom. ¹⁹We winaq ri' man k'o tä chi ki k'ixb'al chkipalaj, ki jachom kib' chub'anik ronojel u wäch etzelal, jachike ri utz käkil wi. Ruk' sak'ajil xeqaj chub'anik ronojel u wäch mak, pune äwas u b'anik wa' cho ri Dios, xuquje' chkiwäch ri winaq. ²⁰Ri ix k'ut man je' tä wa' ri xiwetamaj ruk' ri Cristo. ²¹We qas xita ri xb'ix chiwe chrij ri Are', iwetam k'u ri qas tijoniq. Are wa' ri tijoniq chrij ri qas tzij ri käriqtaj xaq xuwi ruk' ri Cristo. ²²Mib'an chi b'a' jas ri xib'an kan ojer. Chiya kan ri ojer i k'aslemaal, ronojel ri man utz taj ri ix naq'atal wi nab'e aretaq ix sachinaq rumal ru b'anik ri itzel taq i rayinik. ²³Chiya b'a' chi käb'an k'ak' che ri iwanima', xuquje' ri i chomab'al. ²⁴Chik'exa ri i k'aslemaal je' ta ne ri kikoj jun k'ak' atz'iaq. Are wa' ri k'ak' i k'aslemaal ri yo'm chiwe rumal ri Dios rumal chi are u rayib'al ri Are'. Jun k'aslemaal wa' ri qas jikom, xuquje' ch'ajch'oj.

²⁵Chiya b'a' kan u b'anik ri b'anow tzij, chib'ij ri qas tzij chb'il taq iwib' rumal chi ri uj nimalaj qonojel, uj kojonelab' ri kujnuk'uw ru cuerpo ri Cristo, kämik k'ut xa uj jun chik.

²⁶We käpe iwoyowal, miya' chi kub'an chiwe chi kixmakunik. Chok'ow ri iwoyowal chanim, k'a mäja' ke' ri q'ij. ²⁷Miya che ri Itzel chi k'o jas ri kākowin chub'anik chiwe.

²⁸Kinb'ij chke ri käka'n ri elaq' chi mäkib'an chi wa', xane chkitzukuj ki chak. Chkikojo ri ki q'ab', ri ketamb'al chub'anik jun chak rech käkich'ak ri käkijito, xuquje' rech k'o ri käkiya chke ri k'o ki rajwaxik.

²⁹Mib'ij tzij ri man utz taj, xane chikojo ri tzij ri utz kätatajik, ri ketob' chke jachin taq ri ketowik, xuquje' kuya utzil pa ri ki k'aslemaal. ³⁰Miya b'is che ri Loq'alaj Espiritu rech ri Dios. Are k'u ri Loq'alaj Espiritu, are ri k'utb'al chi ri ix qas tzij ix rech ri Dios, chi kätz'aqat k'u na ri q'ij aretaq kixtor na rumal ri Are'.

³¹Chiwesaj ronojel ri k'äx ri k'o pa taq ri iwanima', ronojel ri oyowal, ri k'a'nal, ri yajanik, ri yoq'onik, xuquje' ronojel u wäch etzelal. ³²Xane chich'ab'ej iwib' ruk' utzil, chel i k'ux chb'il taq iwib', chusachala rib' i mak chb'il taq iwib', jas ri Dios xusach i mak ix rumal ri Cristo.

5

Ri apóstol Pablo kub'ij jas ri rajwaxik pa ri ki k'aslemaal ri kojonelab'

¹ Rumal chi ri ix, ix ralk'ual ri Dios, ix loq' chuwäch, rajwaxik chi kitiy i chuq'ab' chub'anik iwe jas ri kub'an ri Are'. ² Chiwaj b'a' iwib' jas ri Cristo kujraj uj, xujach k'u rib' pa ri kämikal che qa k'exwäch, jas jun alaj chij ri kākāmisax cho ri Dios che sipanik, ri sib'alaj je'l kuna' wi ri Are', jas ri ruxlab' ri k'ok'alaj kunab'al ri kăporox chuwäch.

³ Mib'an iwe jas ri kăka'n ri tz'i' ri xaq kăkiriq kib', man k'o tā ki pixab'. Mib'an apachike u wäch mak ri äwas u b'anik cho ri Dios, o chkiwäch ri winaq, mirayij k'ia u wäch jastaq ajuwächulew. Mok wa' we chomanik ri' pa ri i jolom. Man taqal tā wa' chiwe rumal chi ri ix, ix ralk'ual ri Dios. ⁴ Mikojtzel taq tzij ri k'ixb'al ki b'ixik, mib'ij tzij ri man k'o tā ki patän, o ri tzij ri man utz taj ri yakb'al tze'. Man yatal tā k'u wa' chiwe, xane are utz na ri kib'ij tzij re maltioxinik che ri Dios. ⁵ Iwetam k'ut chi konojel ri je' kăka'no jas ri kăka'n ri tz'i' ri xaq kăkiriq qib', man k'o tā ki pixab', konojel ri kăka'n ri etzelal ri xa kub'an tz'il che ri ki k'aslemal, xuquje' konojel ri kăkirayij k'ia u wäch jastaq ajuwächulew ri e junam kuk' ri jule' winaq chik ri keq'ijilaj ri tiox ri xa e b'anom kumal winaq, wa' we winaq ri' man kuya' taj keopan ruk' ri Dios rech kătaqan ri Cristo, ri Dios pa ki wi'. ⁶ K'o b'a' jun mixsub'uwik ruk' taq tzij ri man k'o tā ki patän. Rumal k'u wa' kăpe na ri nimalaj royowal ri Dios pa ki wi' ri winaq ri man keniman tā che, kăk'äjisax k'u na ki wäch ri e are'. ⁷ Mib'an b'a' iwe jas ri kăka'n wa' we winaq ri'.

⁸ Nab'e kanoq jun wi ri i chomab'al, je' ta ne chi ix sachinaq pa ri q'equm. Kämik chi k'ut ix rech ri Qajaw Jesús. Rumal wa' i k'exom ri i chomanik, kixkowin chik kixka'yik. Je' ta ne chi xsaqirik, ix k'o chi pa ri saqil. Chib'ana b'a' jas ri taqal u b'anik kumal ri winaq ri e k'o chik pa ri saqil. ⁹ Je' jas ri q'ij kuya ri saqil, kub'an saq che ronojel, xuquje' ri ranima' jun winaq ri ya k'exom chik, kub'an ri' ri utzil, ri jikomal, ri gas tzij. ¹⁰ Chikojo i chuq'ab' che retamaxik jachike ri utz kăril wi ri Qajaw Jesús. ¹¹ Mib'an iwe ri man k'o tā u patän, jas ri kăka'n ri winaq ri je' ta ne e sachinaq pa ri q'equm, ri jun wi ri ki chomab'al. Cheipixb'aj k'u ri winaq ri je' kăka'n wa', chiq'alajisaj chkiwäch chi man utz taj ri tajin kăka'no. ¹² K'ixb'al k'u u b'ixik chi saq ri kăka'n we winaq ri' chik'uyal. ¹³ Aretaq k'ut kesax chi saq ronojel, gas kăq'alajin na wa'. Je ri', rumal chi ri saqil kuq'alajisaj na ronojel. ¹⁴ Rumal ri' kăb'ixik: At ri' ri je' ta ne katwarik, chatk'astajoj,

chatwalij chkixol ri winaq
ri je' ta ne e kăminaqib'
rumal ri ki mak,

ri Cristo k'ut kuya na saqil chawe,
—kăcha'.

¹⁵ Rumal ri' gas chiwila na jas ri kib'ano. Mib'an iwe jas ri kăka'n ri winaq ri man k'o tā ketam, xane gas kichomaj na jas kib'ano, je' jas ri kăka'n ri ajno'jab'. ¹⁶ Xaq mitzaq ri i q'ij, rumal chi k'äx taq q'ij chik uj k'olik. ¹⁷ Man xaq tā ix kon, mäsach k'u ri i chomanik, xane gas chitzukuj u ch'ob'ik jas ru rayib'al ri Dios. ¹⁸ Mixq'ab'arik rumal chi xaq kixuk'am b'i wa' pa ri k'äx. Xane chiya che ri Loq'alaj Espiritu chi kătaqan pa ri iwanima'. ¹⁹ Chitzijjob'ela iwib' ruk' taq tzij ri e k'o pa taq ri salmos, ri e k'o pa taq himnos, ri kăkiya u q'ij ri Dios, xuquje' ruk' taq ronojel u wäch taq b'ix ri kuya ri Dios chiwe. ¡Chixb'ixon che ri Dios! Chiya b'a' u q'ij ri Qajaw Jesús pa taq ri iwanima'. ²⁰ Amaq'el chimaltioxij ronojel che ri Dios qat Tat pa ru b'i' ri Qajaw Jesucristo.

Waral kăqil wi jas ri rajwaxik pa ri ki k'aslemal ri kojonelab' pa taq ri kachoch

²¹ Chixniman chb'il taq iwib' rumal chi nim kiwil wi ri Cristo.

²² Ri ixoqib' ri e k'ulan chik cheniman b'a' chke ri kachajil, junam jas ri kăka'no, keniman che ri Qajaw Jesús. ²³ Je ri', rumal chi ri achi are k'amal u b'e ri ixoq, je' jas ri qa jolom k'o puwi' ri qa cuerpo, kuk'am k'u ri qa b'e. Ri Cristo are k'o pa ki wi' konojel ri kojonelab' ri kenuk'uw ru cuerpo waral cho we uwächulew. Are To'l Qe nimalaj qonojel ri uj kojonelab' ri kujnuk'uw ru cuerpo. ²⁴ Je' jas ri qachalal kojonelab' keniman che ri Cristo, je ri' xuquje' ri ixoqib' ri e k'ulan chik rajwaxik keniman chke ri kachajil pa ronojel.

²⁵ Ri achijab' ri e k'ulan chik loq' chkila wi ri kixoqil je' jas ri Cristo loq' keril wi ri qachalal kojonelab', xujach k'u rib' pa ri kämikal rumal kech. ²⁶ Je ri' xub'ano rech kub'an ch'ajch'oj che ri ki k'aslemal, keutas k'ut rech keuya pu q'ab' ri Dios. Je' ta ne ruk' joron xeuch'aj wi aretaq xub'an saq che ri ki k'aslemal ruk' ru Loq' Pixab' ri Dios. ²⁷ Je ri' rech keuya ri qachalal kojonelab' chuwäch ri Are' chb'il taq kib', sib'alaj je'l na keb'elik, ch'ajch'oj ri kanima', man k'o tā ki mak, man k'o tā jas jun u wäch etzelal, xane sib'alaj je'l ri ki k'aslemal. ²⁸ Je k'u wa' ri rajwaxik kăka'n ri achijab' ri e k'ulanik, loq' kăkil ri kixoqil, jas ri kub'an jun winaq loq' kăril rib'. Jachin ri loq' kăril wi ri rixoqil, loq' k'u kăril rib' ri are' chb'il rib'. ²⁹ Man k'o tā k'u jun winaq ri tzel kăril wi ru cuerpo, xane kutzuqu, kărilij. Je k'u wa' kub'an ri Cristo chke ri qachalal kojonelab'. ³⁰ Je ri', rumal chi ri uj kujnuk'uw ru cuerpo ri Are' waral cho we uwächulew. Je' ta ne uj u ti'jal, uj u b'aqil. ³¹ Jas ri kub'ij ru Loq' Pixab' ri Dios ri Tz'ib'talik: "Rumal wa' jun achi keuya kan ru nan u tat, kătuni k'u ruk' ri rixoqil. Ri kieb' ri' xa e jun chik," —kăcha'. ³² Ri

tajin kinb'ij sib'alaj nim u b'anik wa'. Man k'o tā jun etamaninaq wa' nab'e. Are k'u ri kinb'ij, are kinb'ij chrij ri Cristo xuquje' ri qachalal kojonelab'. ³³ Xuquje' kel kub'ij wa' chi chijujunal ix rajwaxik loq' chiwila wi ri iwixogil jas ri kib'an che iwib'. Xuquje' b'a' ri ixog nim chrila wi ri rachajil.

6

¹ Ri ix, ak'alab', chixniman chke ri i nan i tat rumal chi ix kojoninaq che ri Qajaw Jesús. Taqal k'u wa' chi je' kib'ano. ² Ri nab'e taqanik ri kub'ij ri Dios chi k'o kuya chqe we káqanijam are wa': "Nim cheawila wi ra nan a tat, ³ rech kariq utzil, xuquje' naj katk'asi na cho we uwächulew," —kácha ri' pa ru Loq' Pixab' ri Dios ri Tz'ib'talik.

⁴ Xuquje' ri ix, nan tat, xaq miyak koyowal ri iwalk'ual, xane cheipixb'aj loq pa ri ki nuch'al, chik'utu utzalaj no'j chkiwäch rech kekojon che ri Qajaw Jesús.

⁵ Ri ix, ajchakib', chixniman chke ri i patrón waral cho we uwächulew. Nim cheiwila wi junam jas ri kib'ano, kixej iwib' cho ri Dios. Mub'an kieb' ri iwanima' chub'anik ri i chak, xane chib'ana' jas ri kib'an chupatänixik ri Cristo.

⁶ Man xuwi tā utz kib'an che ki patänixik aretaq kixkilo rech utz kixkil wi, xane chich'ob'o' chi ix patänil re ri Cristo. Chib'ana ru rayib'al ri Dios ri kápe pa iwanima'. ⁷ Cheipatänij k'u ri i patrón ruk' kikitomal, man xaq tā kik'eyo. Chib'ana wa' je' ta ne are kipatänij ri Qajaw Jesús, man are tā ri winaq. ⁸ Iwetam k'ut chi ri Qajaw Jesús kuya na ru k'exel ri utzil ri kub'an jun winaq, we ri are' kub'an ru chak, k'o pu q'ab' jun patrón, o káchakun jawije' ri kraj wi, ruk' apachinoq.

⁹ Ri ix xuquje', ri ix patrón, chib'ana ri utz kuk' ri patänil taq iwe. Xaq mib'an k'äx chke. Chna'taj chiwe chi ri Kajaw ri e are' xuquje' Are ri Iwajaw ix. K'o chila' chikaj, kátaqan k'u pa qa wi' uj nimalaj qonojel. Ri Are' k'ut junam keril wi konojel ri winaq.

Waral káqil wi ronojel ri kuya ri Dios chqe, ri káqakoj pa ri ch'oj chrij ri Itzel

¹⁰ Kämik, qachalal, are chitzukuj ri i chuq'ab' ruk' ri Qajaw Jesús rech k'o iwe ri nimalaj u chuq'ab' ri Are'. ¹¹ Chikojo ri to'b'al iwib' ri kuya ri Dios, junam jas ri kikojo jun atz'iaq, rech man kixtzaq tā rumal ri sub'unik ri kub'an ri Itzel chiwe. ¹² Man uj k'o tā che ch'oj chkiw winaq, xane are chkiw itzel taq espíritu ajuwokaj ri keb'in pa ri sutz' mayul, ri k'o taqanik pa ki q'ab'. E are' ri nimaq taq q'atal taq tzij, ri nimaq taq taqanelab', ri ketaqan puwi' ruwächulew. E are' itzel taq espíritu wa' ri tajin ketaqan pa taq we q'ij ri' re q'equm. ¹³ Rumal ri' chik'ama b'a' ronojel ri to'b'al iwib' ri kuya

ri Dios kämik, jas ri kub'an jun soldado kukoj ri atz'iaq re ch'ich' chuto'ik rib' pa ri ch'oj. Je ri' rech kixkowinik kito' iwib' chuwach ri qa k'ulel pa ri k'axalaj taq q'ij aretaq kápe ri ch'oj. Je wa ri', aretaq kok'ow ronojel ko kixjeqi na kanoq. ¹⁴ ¡Ko b'a' chixjegeloq! Chikojo ri Qas Tzij je' ta ne chi are ri pas ri ximib'al i pam. Chib'ana ri jikomai pa ri i k'aslemal je' ta ne jun to'b'al uwo i k'ux wa' kikojo. ¹⁵ Chib'ana b'a' u b'anik iwib' chutzijoxik ri Utzalaj Tzij re ri Evangelio ri kuya utzil, je' ta ne jun chik u wäch i xajáb' ri kikojo. ¹⁶ Rajwaxik b'a' xuquje' chi sib'alaj kixkojonik, rumal chi are wa' je' ta ne jun nimalaj perepik ch'ich' ri to'b'al iwib' ri kiwuk'aj. Ruk' wa' kixkowinik kichup na ronojel ri k'iaqb'al ri kenikowik ri kuk'iaq ri Itzel chiwij. ¹⁷ Ru tob'anik ri Dios are wa' chikojo che to'b'al i jolom. Ru Loq' Pixab' ri Dios are chikojo je' ta ne are jun espada (machete) ri kuya ri Loq'alaj Espiritu chiwe. ¹⁸ Chib'ana ronojel wa' ruk' oración. Chita' ru tob'anik ri Dios, chib'ochi' k'u ri Dios amaq'el ronojel q'ij, junam jas ri u k'amik i b'e ri kub'an ri Loq'alaj Espiritu. Rech kixkowin chub'anik wa', chixk'ask'atog, mixej b'a' iwib'. Chitaqej k'u u b'anik oración. Chib'ana orar pa ki wi' ri winaq ri e rech ri Dios, ri kojonelab'. ¹⁹ Chib'ana orar pa nu wi' in xuquje', rech aretaq kinch'awik ri Dios kuya ru tzij pa ri wanima', man kinxej tā k'u wib' king'alajisaj ri Utzalaj Tzij re ri Evangelio ri man etamtal tā kan nab'e. ²⁰ In taqom rumal ri Dios, in petinaq chuk'exel ri Are' rech kintzizoj ri Evangelio, pune ta ne in k'o pa che' kämik ri' xa rumal wa'. Chib'ana b'a' orar rech man kinxej tā wib' kintzizoj wa' we tzij ri' jas ri rajwaxik kinb'ano.

Ri apóstol Pablo kuya apan rutzil ki wäch ri kojonelab'

²¹ Ronojel ri nu b'anom xuquje' ri tajin kinb'ano, are ri qachalal Tíquico kub'ij na wa' chiwe. Ri are', are jun loq'alaj qachalal, utz kub'an chupatänixik ri Qajaw Jesús pa ru chak ri Are'. ²² Rumal ri' tajin kintaq b'i ri are' iwuk' rech kuq'alajisaj na ronojel chiwe. Je ri' qas kiwetamaj jas ri qa'nom uj waral, káwalijisax ta k'u na ri iwanima' ix rumal wa'.

²³ Are ta b'a' ri Dios qa Tat xuquje' ri Qajaw Jesucristo käyo'w uxlanem che ri kanima' ri qachalal, kub'ano chi kákaj kib', chi qas tzij kekojonik. ²⁴ Are ta b'a' ri Dios kátoq'ob'isan ki wäch konojel ri qas kákaj ri Qajaw Jesucristo ruk' ri rutzil ranima' ri man kák'extaj taj, are la' chi sib'alaj loq' kujril wi ri Are'. Amén.

RI CARTA RI XUTZ'IB'AJ RI SAN PABLO CHKE RI KOJONELAB' AJ FILIPOS

Ri apóstol Pablo k'o pa che', kuchap u tz'ib'axik b'i jun carta chke ri qachalal kojonelab' aj Filipos

¹ In wa', ri Pablo, wachi'l ri Timoteo, uj patānil taq re ri Jesucristo. Kāqatz'ib'aj b'i wa' we wuj ri' chke konojel ri qachalal ri e rech ri Dios ri e k'o pa ri tinimit Filipos, ri xa e jun ruk' ri Cristo Jesús. Kāqatz'ib'aj b'i wa' we wuj ri' chiwe ix iwonojel junam kuk' ri k'amal taq i b'e, ri obispos* xuquje' ri diáconos.† ² Are ta b'a' ri Dios qa Tat xuquje' ri Qajaw Jesucristo kutoq'ob'isaj i wäch, kub'ano chi kuxlan ri iwanima'.

Ri apóstol Pablo kub'an orar pa ki wi' ri kojonelab'

³ Amaq'el aretaq kixna'taj chwe, kinya maltioxinik che ri Dios. ⁴ Aretaq kinb'an orar, amaq'el kinb'ochi'j ri Dios pi wi' ix nimalaj iwonojel ruk' kikitomal. ⁵ Je ri' kinb'ano rumal chi ri ix, ix chakuninaq wuk' chutzijoxik ri Utzalaj Tzij re ri Evangelio tzpa ri q'ij ri xinchap u b'anik wa' k'ä xopan na we kāmik ri'. ⁶ Qas wetam in chi ri Dios ri xuchap u b'anik we qas utzil ri' pa ri iwanima' kutaqej na u b'anik wa' k'ä kopan na ri q'ij ri kätzelej loq ri Qajaw Jesucristo. ⁷ Ya'talik chi je wa' ri nu chomanik chiwuj rumal chi sib'alaj ix loq' chnuwäch in, xuquje' rumal chi junam tajin kākakochij ronojel u wäch u toq'ob' ri Dios pa qa wi'. Je ri' pune ta ne in k'o pa che', pune ta ne in k'o chkiwäch ri q'atal taq tzij chuq'alajisaxik chi ri Utzalaj Tzij re ri Evangelio are ri qas tzij. ⁸ Cho ri Dios k'o wi' wa' chi sib'alaj kixwaj nimalaj iwonojel, je' jas ri Jesucristo kujraj uj. ⁹ Aretaq kinb'an orar pi wi' kinta' che ri Dios chi sib'alaj kiwaj na más iwib', xuquje' chi kāk'oji na nimalaj i no'j, nimalaj iwetamb'al, rech kixna'w chub'anik ronojel. ¹⁰ Je ri' ri kinta' che ri Dios rech kixkowin chucha'ik jachike ri utz na u b'anik cho ri Dios. We je ri' kib'ano, utz na ri i k'aslemaal, ch'ajch'oj ri', man k'o tä etzelal chupam. Aretaq k'ut kape ri Cristo, man k'o tä mak ri' kārqiut na chiwuj. ¹¹ We je ri' kib'ano, ri Jesucristo kub'an na chi ri i k'aslemaal are je' ta ne jun utzalaj jach' ri sib'alaj k'ia chomaq taq jal keyak na chrij. Je ri' ri i k'aslemaal we k'o k'ia u wäch utzil i b'anom. Kānimarisax b'a' u q'ij ri Dios, kāyi' k'u na u q'ij iwumal.

Ri nu k'aslemaal are kinkoj na chu patānixik ri Cristo

¹² Qachalal, kwaj chi kiwetamaj chi ri k'ax ri nu riqom in, qas tob'aninaq wa' chuq'alajisaxik ri Utzalaj Tzij re ri Evangelio chkiwäch ri nik'iaj winaq chik. ¹³ Je ri', rumal chi konojel ri soldados re ri nimalaj q'atb'al tzij, xuquje' ri nik'iaj winaq chik ri e k'o waral ketam chi in k'o pa che' xa rumal chi kinpatānin che ri Cristo. ¹⁴ Rumal k'u rech wa' xa jub'iq' man konojel ri qachalal ki jikib'am ki k'ux chrij ri Qajaw Jesús rech man kākixej tä chi kib', xane kākikoj ki chuq'ab' chutzijoxik ru Loq' Pixab' ri Dios.

¹⁵ Qas tzij e k'o jujun ri kākitzijoj ri Utzalaj Tzij re ri Evangelio chrij ri Cristo xa rumal chi k'ax kākina' chwe, kākaj kākimarisaj kib' chnuwäch. Xa ch'oj kākaj ri e are'. Jule' chik kākā'n wa' ruk' utzalaj ki chomanik. ¹⁶ E k'o jujun chik ri kākitzijoj ri Utzalaj Tzij chrij ri Cristo xa rumal chi ki tasom kib' chqij, xa k'u k'o ri kākaj ri e are' chb'il taq kib', man utz tä k'u ri ki chomanik. Xaq are kākaj chi kinriq chi na nik'iaj b'is chik waral pa che'. ¹⁷ Are k'u ri jule' qachalal chik sib'alaj kinkaj, kākitzijoj ri Utzalaj Tzij re ri Evangelio rumal chi ketam chi ri in, in k'o waral pa che' chuq'alajisaxik chi ri Evangelio are ri qas tzij. ¹⁸ ¿Jas ta k'u ne ri kāk'anik? Ri in kinb'ij: Utz la' chi kätzijox ri Utzalaj Tzij re ri Evangelio chrij ri Cristo chkiwäch ri winaq, —kincha'. We utz ri ki chomanik, we man utz taj, ¡kinkikot k'u rumal wa', chi kätzijox ri Evangelio!

Xuquje' sib'alaj kintaqej na kikitomal. ¹⁹ Je ri', rumal chi wetam in chi utz kinel na pa ronojel, xuquje' chi kintzoqopix na. Je ri', rumal chi tajin kib'an orar pa nu wi', xuquje' rumal chi ri Loq'alaj Espíritu rech ri Qajaw Jesús kinuto na pa ronojel. ²⁰ Je ri', rech kāk'antaj ri kinweyey, ri qas nu rayinik. Are la' chi man kink'ix tä che ri Cristo, xane chi kintzizoj ru b'anik ri Are' waral junam jas ri nu b'anom amaq'el, man kinxej tä wib'. Je ri' kwaj kinb'ano rech kānimarisax na u q'ij ri Cristo wumal in. Je ri' we ri Dios kuya na ri nu k'aslemaal, we k'u ne xa kinkāmik. ²¹ Ri nu k'aslemaal kāmik, are kinkoj che ru patānixik ri Jesucristo. We kinkāmik, man k'ax tä ri' rumal chi xa utzil kinriqo. ²² We k'u k'o na ri nu k'aslemaal waral cho we uwächulew, are utz ri' rech kinkoj wa' che ru tzijoxik ri Utzalaj Tzij re ri Evangelio. Man wetam taj jachike ri utz na u cha'ik, we are ri kinkāmik, we k'u ne are ri kink'asi'k. ²³ K'ax chwe ru cha'ik jachike ri utz na. Kwaj kink'oj na iwuk', xuquje' kwaj kinkāmik, kinel cho ruwächulew rech kinek'ol ruk' ri Cristo. ¡Are sib'alaj utz na kinwil wa'! ²⁴ Pune ta ne je ri', are utz na chiwe ix we k'o na nu k'aslemaal waral, kinkanaj k'u na iwuk'. ²⁵ Wetam in chi qas

* 1:1 "Obispo": Chawila' ri Tito 1:7, nota. † 1:1 "Diácono": Chawila' ri 1 Timoteo 3:8, nota.

tzij kinkanaj na kanog, kink'oji na iwuk' cho we uwächulew che i to'ik rech kitaqej na ri i kojoniq che ri Cristo, xuquje' rech kixkikot na rumal wa'. ²⁶ Aretaq kinopan na iwuk' jumul chik, kuya' kinimarisaj na u q'ij ri Cristo Jesús rumal wech in.

²⁷ Chiwila b'a' iwib' rech ri i k'aslemaal ronojel q'ij qas kuq'alajisaj chi i kojom ri Utzalaj Tzij re ri Evangelio, rech ya'talik chi káb'ix chiwe chi ix kojoniq che ri Cristo. Je ri', we kinopan na iwuk' jela' che iwilik, we ne naj in k'o wi chiwe, kwaj kinta u tzijol chi jikom ri iwanima' chrij ri Cristo, man kub'an tá kieb' i k'ux, man k'o tá k'u ch'oj chixol. Kwaj kinta u tzijol chi ri ix junam tajin kixchakunik chutzijoxik ri Qas Tzij re ri Evangelio. ²⁸ Xuquje' kwaj chi man kixej tá iwib' chkiwäch ri winaq ri káka'n ki k'ulel chiwe. Je ri' kiq'alajisaj chkiwäch ri e are' chi xa kásach na ki wäch. We je ri' kib'ano, man kixej tá iwib', are etal wa' chiwe rumal ri Dios chi kiriq na ru tob'anik ri Are'. ²⁹ Ya'tal k'u chiwe ix rumal ri Cristo chi kixkojon che ri Are', kixpatānin che. Man xuwi tá k'u wa', xane xuquje' chi kiriq k'ax rumal rech ri Are'. ³⁰ Ri ix, ri in, junam tajin kujchakunik, tajin kujch'ojin ruk' ri Itzel. Iwilom ix petinaq loq jas ri nu b'anom, nu tijom nu chuq'ab' kinchakunik, kinch'ojinik. Kámik k'ut tajin kitatab'ej u tzijol chi k'a tajin kinriq k'ax pa we ch'oj' ri in k'o wi.

2

Ri Cristo man nim tá xril rib', nimarisam k'u u q'ij rumal ri Dios

¹ Je k'u ri' iwetamam b'a' jas ri kub'an ri Cristo kuwalijisaj ri iwanima', kuku'b'isaj i k'ux, rumal chi ix loq' chuwäch. Iwetam xuquje' chi ri Loq'alaj Espíritu rech ri Cristo k'o pi wi'. We qas iwetamam chi qas kápax u k'ux ri Cristo chiwe, kutoq'ob'isaj i wäch, ² chib'ana b'a' chi sib'alaj kinkikotik. Chiwaj b'a' iwib'. Chixchakun junam rech man k'o tá ch'oj chixol, rech kina' pa ri iwanima' chi xa ix jun, xa jun ri i chomanik. Xa je ri' kiya kikitomel chwe. ³ Mitzukuj xaq xuwi ri iwe ix, minimarisaj b'a' iwib'. Nim k'u cheiwila wi ri nik'iaj chik. Chib'ana ix chi man nim taj kiwil wi iwib'. ⁴ K'o jun chiwe mutzukuj xaq xuwi ri utz che ri are', xane are chutzukuj u b'anik utzil chke ri nik'iaj chik.

⁵ Chk'ol ta iwuk' ri chomanik ri xk'oji ruk' ri Qajaw Jesucristo. ⁶ Ri Are' man xuchomaj tá u b'anik che rib' chi junam ruk' ri Dios, pune je' qas tzij chi ri Are' junam ruk'. ⁷ Xane xuya kan ri qas u b'anik, xil u wäch junam jas jun winaq ajwaral, xok che patānil ke ri winaq ajuwächulew. ⁸ Aretaq qas winaq chi ri Are', ri Jesús man nim tá

xril rib'. Xniman che ri Dios ru Tat pa ronojel, xuriq k'u ri k'ixb'al kámikal cho ri cruz je' ta ne chi are jun b'anal etzelal. ⁹ Rumal wa' ri Dios xuya che ri Jesús chi nim na u q'ij chkiwäch konojel, xuquje' xuya che chi nim kil wi na ru b'i' ri Are' chuwäch ri ki b'i' konojel. ¹⁰ Je' xub'ano rech aretaq kákito chi káb'ix ru b'i' ri Jesús, konojel kexuki'k, konojel ri e k'o chila' chikaj, konojel ri e k'o cho ruwächulew, xuquje' konojel ri e k'o chuxe' rulew. ¹¹ Je ri' rech konojel kákich'ob'o, kákib'ij chi ri Jesucristo are ri Qajaw, je ri' k'ut kánimarisax na u q'ij ri Dios qa Tat.

Ri kekojon che ri Cristo kákiya saqil cho we uwächulew

¹² Je ri', loq'alaj taq qachalal, jas ri i b'anom amaq'el aretaq in k'o iwuk', chixniman chwe pa ronojel, pune naj in k'o wi chiwe kámik. Chib'ana b'a' ri kuq'alajisaj chi qas tzij i rigom ru tob'anik ri Dios. Je' chib'ana wa', nim chiwila wi ri Dios, chixej iwib' chuwäch. ¹³ Minimarisaj b'a' iwib'! ¹³ Je ri', rumal chi are ri Dios ri tajin kuya ri loq'alaj u rayib'al pa ri iwanima'. Tajin kub'ano chi kiwaj kib'an utzil, kixuto' k'u na rech kixkowin chub'anik jas ri u chomam loq.

¹⁴ Chib'ana ronojel ruk' utzil, man ruk' tá ch'oj, man ruk' tá oyowal. ¹⁵ Je ri' rech ri winaq man xa tá ne jub'iq' mak kákiriq ch'iwij. We je ri' kib'ano, q'alaj chkiwäch chi qas tzij ix ralk'ual ri Dios ri kib'an utzil chixol ri winaq ri káka'n etzelal, ri man keniman tá che ri Dios. We kib'an ronojel ruk' utzil, kiya na saqil chke ri winaq jas ri ch'imil ri kejuuw chaq'ab' pa ri q'equm. ¹⁶ Je wa ri' kik'ut na chkiwäch ri winaq ri Utzalaj Tzij re ri Evangelio ri kuya ki k'aslemaal. We je' kib'ano, kinkowinik kinkikot na in iwumal pa ri q'ij ri kápe na ri Qajaw Jesucristo. Je ri' kinwetamaj na chi man xaq tá loq' xinchakun iwuk', man xaq tá k'u loq' xinya ri tijonik re ri evangelio chiwe. ¹⁷ Pune kinkámisaxik, káturuwisax ne ri nu kik'el cho ri Dios, kinkikot na. Kinkikot iwuk' ix iwonojel we ri nu k'aslemaal kákoj na chub'anik tz'aqat che ri patāninik ri tajin kib'an ix cho ri Dios je' ta ne chi are jun sipanik ri kiya che rumal chi kixkojonik. ¹⁸ Kwaj k'ut chi xuquje' kixkikot ix wuk' in we ri Dios kuya chwe chi je ri' nu kámisaxik káb'anik.

Waral káqil wi jas ri ki b'anik ri Timoteo rachi'l ri Epafrodito

¹⁹ We are ru rayinik ri Qajaw Jesús, kwaj kintaq b'i ri Timoteo iwuk' kámik ri'. Kinkikot k'u na aretaq ri are' kutzijoj chwe ronojel ri i b'anom jela'. ²⁰ Kwaj kintaq b'i ri Timoteo rumal chi man k'o tá chi jun ri junam u chomanik wuk' in, ri qas kok il chiwe. ²¹ Konojel ri nik'iaj chik xaq xuwi

käkitzukuj ri kech ri e are', man käkichomaj tä ri' ru rayinik ri Qajaw Jesucristo. ²² Iwetam k'ut ri utzalaj chak ri u b'anom ri Timoteo. Ri are' chakuninaq wuk' in chutzijoxik ri Utzalaj Tzij re ri Evangelio. Qas kächakun ri are' wuk' jas ri kub'an ri u k'ojol jun tata' kätob' che ru tat. ²³ Rumal wa' kwaj kintaq b'i ri are' iwuk' aretaq kinwetamaj jas ri káb'antaj na wuk' in waral pa ri che'. ²⁴ Nu jikib'am k'u nu k'ux chrij ri Qajaw Jesús chi kuya chwe chi qas kine' in, kinopan iwuk' jela'. Kraj xa kieb' oxib' q'ij chik kinb'an in waral.

²⁵ Kinchomaj in chi xuquje' rajwaxik kintaq b'i ri qachalal Epafrodito iwuk'. Are ri are' kächakun wuk' jas jun wachi'l pa ri ch'oj, ri xitaq loq rech kätob' wuk' chupam ri nu rajwaxik. ²⁶ Ri are' k'ut sib'alaj káb'ison chiwe, kraj käril i wäch ix iwonojel. Kok il chiwe rumal chi xito chi xyawajik. ²⁷ Tzij ri' chi sib'alaj xyawajik, xaq jub'iq' xraj man xkämik. Ri Dios k'ut xel u k'ux che, xutoq'ob'isaj u wäch. Xel u k'ux ri Dios chwe in xuquje', rech man rajwaxik taj kinriq nik'iaj b'is chik ruk' ri k'äx ri nu riqom in waral. ²⁸ Rumal wa' kwaj kintaq b'i ri Epafrodito iwuk', rech kixkikot na che rilik u wäch jumul chik. Kinuto' wa' che ri nu b'is in xuquje' aretaq ri in wetam chi kixkikot chik. ²⁹ Chik'amowaj ri are' ruk' nimalaj kikitomal pa ru b'i' ri Qajaw Jesús. Nim chiwila wi ri are', xuquje' konojel ri qachalal ri kub'an junam jas ri kub'an ri are'. ³⁰ Je ri', rumal chi xa jub'iq' xraj man xkäm ri Epafrodito. Xuriq k'äx chupatanixik ri Cristo. Xuya ranima' churiqik k'äx chuya'ik ri tob'anik chwe ri man xixkowin tä ix chub'anik.

3

Waral käqil wi jas ri' ri qas utzil, ri qas jikomal

¹ Kämik k'ut, wachalal, chixkikot rumal ri Qajaw Jesús. Man kinkos tä in chub'ixik wa' chiwe jumul chik, jas ri nu tz'ib'am, rumal chi xaq are utz chiwe ru tatab'exik wa'. ² Chichajij iwib' chkiwäch ri lawalo taq winaq, ri je' kepe "ch'uj tzi'", ri käkaj käkisok ri qachalal, käkikoj ri retal ri ojer trato che ri ki cuerpo. (Are wa' ri káb'ix "circuncisión" che).^{*} ³ Uj ri' qas b'anom ri qas "circuncisión", rumal chi kujq'ijilan che ri Dios pa qanima' ruk' ri chuq'ab' ri käyi' chqe rumal ri Loq'alaj Espíritu. Uj ri' kujkikotik rumal chi uj rech ri Cristo, man käku'b'i tä qas k'ux chrij ri käqa'n uj pa ri qas k'aslemal. ⁴ We k'o jun ri qas taqal che chi käku'b'i u k'ux chrij ri u b'anom pa ru k'aslemal, in ri' ri winaq ri taqal chwe. Man k'o tä jun winaq chik ri más u b'anom tz'aqat

che ri ojer Pixab' chnuwäch in. ⁵ Aretaq xil nu wäch, chuwajxaq q'ij xkoj ri retal ri ojer trato che ri nu cuerpo. In qas winaq aj Israel re ri juch'ob' winaq ri xk'oji ri qa mam Benjamín che ki nimal pa ojer taq q'ij. In ri' jun qas hebreo rumal chi ri nu tat, nu nan e are' hebreos. Xintijox chrij ri ki Pixab' ri winaq aj Israel je' jas ri kaka'n ri tata'ib' fariseos. ⁶ Xinya ri wanima' che ri tijonik chrij ri Pixab', je ri' chi sib'alaj k'äx xinb'an nab'e chke ri qachalal kojonelab'. Xinni-man che ronojel ri Pixab', man k'o tä jun ri kuya' kub'ij chi man xinniman taj. ⁷ Ronojel k'u wa' ri xinb'ano, man utz tä chik kinwil kämik, rumal chi loq' na kinwil ri Cristo chuwäch ronojel wa'. ⁸ Je wa' kinwil ronojel ri nu b'anom, konojel ri jastaq we xuquje', chi man k'o tä chi k'u ki patän chnuwäch rumal chi qas xinwetamaj u wäch ri Qajaw Jesucristo. Rumal ri Cristo nu tzaqom kan ronojel. Kinwil in chi xa mes chik ri jastaq we ri xek'oji nab'e, xuquje' ronojel ri ojer nu k'aslemal. Je ri' ri nu chomanik rumal chi ri Cristo Are wech in, loq' k'u na kinwil wi ri Are' chuwäch ronojel. ⁹ Kwaj kink'oji junam ruk' ri Cristo. Man kwaj taj chi káb'ix chwe chi in utz, chi jikom ri wanima' xa rumal ri nu b'anom in, o rumal chi nu nimam ri Pixab'. Xane kwaj ri qas utzil, ri qas jikomal ri kuya ri Dios chwe rumal chi kinkojon che ri Qajaw Jesucristo. Are ri Dios ri kub'ij na chi in utz, chi jikom ri wanima' rumal chi kinkojon che. ¹⁰ Ri kwaj in kämik, are chi qas tzij kinwetamaj na u wäch ri Cristo, xuquje' chi kāk'oji na ri nu chuq'ab' junam jas ri xukoj ri Dios aretaq xuk'astajisaj ri Jesucristo chkixol ri käminaqib'. Kwaj kinriq k'äx junam ruk' ri Cristo. Kwaj chi junam ri wanima' in ruk' ri ranima' ri Cristo aretaq xkäm ri Are' rumal wech. ¹¹ Ku'l nu k'ux chi kink'astaj na b'i chkixol ri käminaqib', jas ri xub'an ri Cristo.

Qakojo qa chuq'ab' churiqik ri yo'm chqawäch rumal ri Cristo

¹² Man kinb'ij taj chi ya nu riqom chi ronojel, chi ya in tz'aqat chik, chi man k'o tä chi ri rajwaxik chwe. K'o ri kraj na chwe. Kintaqej k'u na u ternexik ri Cristo rumal chi ku'l nu k'ux chi je' kinel na jas ri utzalaj achi ri xuchomaj ri Cristo Jesús aretaq xinuto' pu q'ab' ri Itzel. ¹³ Qachalal, man kinb'ij taj chi ya nu b'anom chik ronojel ri kraj ri Dios chwe. Ri kinb'an kämik are ru sachik kan ronojel wa' ri ya xok'owik, kintij nu chuq'ab' chub'anik ri k'ä k'o na chnuwäch, ri mäja' kinb'ano. ¹⁴ Je' kinb'ano, kintij nu chuq'ab' rech kinriqa ri k'ä k'o na chnuwäch, kinch'akanik. Ri Dios kusipaj na chwe ri käyi' chke ri kech'akanik, ri

* 3:2 Che retamaxik jub'iq' na chrij ri circuncisión, chawila' Hechos 7:8, nota.

k'aslemal pa ri kaj ri man k'o tä u k'isik. Are la' ri käyi' chqe uj, ri uj rech ri Cristo Jesús.

¹⁵ Qonojel ri uj, ri uj kojonelab' ri k'o chi ri qa no'j ri yo'm rumal ri Cristo, rajwaxik chi je' käqachomaj wa'. We jun chi wi ri i chomanik ix, ri Dios kub'an na chiwe chi käq'alajin na ri qas tzij chiwäch. ¹⁶ We k'o k'ia ri qetam, we k'u ne xa jub'iq' ri qa no'j, tzrajwaxik wi chi kujniman che ri Dios pa ronojel jas ri u k'utum chqawäch, ri ya qetam chik.

¹⁷ Qachalal, chib'ana' jas ri kinb'an in. Chitajej u b'anik xaq xuwi ri käka'n ri winaq ri je' käka'no jas ri käqa'n uj, jas ri qa k'utum chiwäch. ¹⁸ Jas ri nu b'im chiwe k'ia mul, kinb'ij chi na jumul kämik, rumal k'u wa' sib'alaj kinb'isonik kinb'ij chi e k'o k'ia winaq ri xa käka'n ki k'ulel che ri Cristo, tzel k'ut käkil wi ri Utzalaj Tzij re ri Evangelio ri kutzijoj wi ru kämikal ri Cristo cho ri cruz. ¹⁹ Chuk'isb'al ronojel käsach na ki wäch wa' we winaq ri'. Nim k'u käkil wi ri itzel ki rayinik, käkikoj wa' che ri ki dios. Käkinimarisa kib' rumal ri k'ixb'al ri ki b'anom, je'l k'u käkilo. Käkichomaj xaq xuwi ri ajuwächulew. ²⁰ Ri uj k'ut, jela' pa ri kaj k'o wi ri qas qa tinimit. Rumal wa' tajin kujeyen che ri To'l Qe, ri Qajaw Jesucristo, ri käpe na pa ri kaj. ²¹ Ri Jesucristo kuk'ex na ri qa cuerpo ri käqarij wi k'äx amaq'el. Kub'an na che ri qa cuerpo chi sib'alaj je'l na kelik junam jas ri rech ri Are'. Je' kub'an na ruk' ri nimalaj u chug'ab' ri yo'm che rech kätaqan na pa ki wi' konojel, k'o k'u ri kajulew pu q'ab'.

4

Chixkikot amaq'el ronojel q'ij rumal ri Qajaw Jesús

¹ Je ri', loq'alaj taq wachalal, ri sib'alaj kwaj kinwil i wäch, chijikib'a i k'ux chrij ri Qajaw Jesús. Sib'alaj kinkikot iwumal. Ix ri' ri tojb'al re ri nu chak. Mäsach chiwe chi sib'alaj ix loq' chnuwäch.

² Kinb'ochi'n che ri nan Evodia xuquje' che ri nan Sintique chi xaq jun e k'ol wi pa ri ki chomanik, man k'o tä k'u ch'oj chkixol, rumal chi e kachalal kib' rumal ri Qajaw Jesús. ³ Xuquje' kinta' toq'ob' chawe, wach ajchak, rumal chi jikom ri awanima' pa ronojel, chi kattob' chke we qachalal ixoqib' ri'. Xechakun wuk', xinkito' chutzijoxik ri Utzalaj Tzij re ri Evangelio junam ruk' ri Clemente, xuquje' ri nik'iaj chik ri xechakun wuk'. Tz'ib'am k'u ri ki b'i' pa ri wuj re k'aslemal rumal ri Dios.

⁴ Chixkikot amaq'el ronojel q'ij rumal ri Qajaw Jesús. Kinb'ij chi na wa' jumul chik chiwe: ¡Chixkikotoq! —kincha'. ⁵ Chib'ana' chi konojel ketam chi kixch'awik, chi loq'

keiwil wi konojel ri winaq. Mäsach pa iwanima' chi xa jub'iq' man käpe ri Qajaw Jesús.

⁶ Mixej b'a' iwib' chuwäch apachike ri käpetik. Xane xa chib'ana orar, chib'ij ronojel wa' che ri Dios. Chixb'ochi'n che ri Dios amaq'el ruk' maltioxinik. ⁷ We je' kib'ano, ri Dios kub'an na chi kuxlan ri iwanima'. Je ri' chi ri winaq käkikajmaj na wa' chi man kixej tä iwib'. Ri uxlanem ri' ri kuya ri Dios chiwe kuchajij na ri iwanima' xuquje' ri i chomanik, rumal chi käku'b'i na i k'ux chrij ri Cristo Jesús.

Chichomaj b'a' xaq xuwi ri qas utz

⁸ Qachalal, chuk'isb'alil ronojel kwaj kinb'ij chiwe chi pa ronojel ri kichomaj, chixchoman chrij ri qas tzij, xuquje' chrij ri qas utzil. Chixchoman chrij ri qas jikom, xuquje' chrij ri man äwas tä u b'anik. Chixchoman na chrij ri je'lik xuquje' chrij ri utz käkita wi ri winaq, ri utz u b'anik, ri nim kil wi kumal.

⁹ Chib'ana ri nu k'utum chiwäch, ri nu b'im chiwe chi rajwaxik kib'ano. Chib'ana ronojel ri i tom pa nu chi', xuquje' ri iwilom chi kinb'ano. We kib'an ronojel wa' ri qa Dios ri kub'ano chi kuxlan ri iwanima' käk'oji na iwuk'.

Waral käqil wi ri xkiya ri Filipenses chuto'ik ri apóstol Pablo

¹⁰ Sib'alaj kinkikot rumal ri Qajaw Jesús chi ya xixchoman chi na jumul chik chwij. Man kinb'ij taj chi xa xinsach chiwe. Wetam chi xa man xixkowin tä che nu to'ik, pune xixok il wumal. ¹¹ Man are tä rumal chi k'o rajwaxik chwe chi kinb'ij wa' chiwe. Kinkowinik kinkikot ruk' ri jub'iq' ri k'o wuk'. ¹² Wetam in ri meb'a'il, ri xaq jub'iq' k'olik. Wetam xuquje' ri q'inomal, ri k'o k'ia jastaq we. Ri in wetamam ronojel u wäch k'aslemal, we are k'o ri nu wa, we ne are la' chi kinnumik, man k'o tä nu wa. Xinwetamaj jas kinb'ano we k'o k'ia ri jastaq we, xuquje' we k'o meb'a'il, k'o k'u ri kajwataj chwe. ¹³ Kinkowin chuch'ijik ronojel rumal ri Cristo ri kuya nu chug'ab'. ¹⁴ Pune je ri', utz i b'anom che nu to'ik pa ri k'äx ri nu riqom.

¹⁵ Je' jas ri iwetam ix, ri ix aj Filipos, xaq xuwi ri ix k'o ri xitaq b'i chwe chumaltioxixik ri tob'anik ri xinya chiwe. Man k'o tä xkiya ri nik'iaj kojonelab' chik. Are wa' ri xib'an chwe aretaq xinchap u tzijoxik ri Utzalaj Tzij re ri Evangelio, xine' pa ri tinimit Macedonia. ¹⁶ Xuquje' aretaq in k'o pa ri tinimit Tesalónica, k'o ri xitaq b'i che nu to'ik. Man xaq xuwi tä jumul xitaq b'i ri rajwaxik chwe. ¹⁷ Ri in k'ut man xa tä kintzujuk ri käsipax chwe, xane kintzujuk ru b'anik utzil chiwe, rech k'o na ri kutz'ib'aj ri Dios pa ri i kuenta chikaj. ¹⁸ Nu kochim b'a' ronojel. Man qas tä rajwaxik ronojel

wa' ri xitaq loq chwe rumal ri Epafrodito. Tzij ri' chi k'ia wa' ri xiya ix chwe. Kinna' in chi je' ta ne are jun k'ok'alaj kunab'al sipam cho ri Dios. Wetam chi ri Dios sib'alaj je'l kārīl wa'. ¹⁹ Ri Qajaw Dios k'ut kuya na ronojel ri rajwaxik chiwe, rumal chi k'ia ri je'lalaj u q'inomal k'olik rumal ri Cristo Jesús. ²⁰ Chnimarisax ta b'a' u q'ij ri Dios qa Tat kāmīk, xuquje' pa taq ri q'ij ri junab' ri kepe na! Amén.

K'isb'al re ri carta

²¹ Chiya rutzil ki wäch konojel ri kekojon che ri Qajaw Jesucristo, ri e rech ri Dios. Ri qachalal ri e k'o wuk' in waral kākitaq b'i rutzil i wäch ix nimalaj iwonojel. ²² Konojel ri nik'iaj kojonelab' chik ri e k'o waral, ri e rech ri Dios, xuquje' kākitaq b'i rutzil i wäch, más na ri e k'o pa rachoch ri César, ri nimalaj taqanel.

²³ Are ta b'a' ri Qajaw Jesucristo kätewchin chiwe, kutoq'ob'isaj ta na i wäch ix nimalaj iwonojel. Amén.

RI CARTA RI XUTZ'IB'AJ RI SAN PABLO CHKE RI KOJONELAB' AJ COLOSAS

Ri apóstol Pablo kuchap u tz'ib'axik jun carta chke ri qachalal kojonelab' aj Colosas

¹ In wa', ri Pablo, in apóstol. In jun chke ru taqo'n ri Jesucristo. Je wa' nu b'anik rumal chi are u rayib'al ri Dios. ² Ri in, wachi'l ri qachalal Timoteo, kintz'ib'aj b'i wa' we wuj ri' chke ri winaq ri jikom kanima', ri e rech ri Dios, ri qachalal rumal ri Cristo ri e k'o pa ri tinimit Colosas. Are ta b'a' ri Dios qa Tat kutoq'ob'isaj i wäch, kub'ano chi kuxlan ri iwanima'.

Ri apóstol Pablo kub'an orar pa ki wi' ri kojonelab'

³ Amaq'el aretaq käqa'n orar pi wi', käqaya maltioxinik che ri Dios ru Tat ri Qajaw Jesucristo. ⁴ Je ri' käqa'no rumal chi qa tom u tzijol chi gas ix kojoninaq che ri Cristo Jesús, xuquje' chi gas keiwaj konojel ri e rech ri Dios. ⁵ Je' kib'an wa' rumal chi ku'l i k'ux chi k'o ri k'olotal chiwe chila' chikaj. Are xku'b'i i k'ux chrij wa' aretaq xita ri gas tzij. Are wa' ri Utzalaj Tzij re ri Evangelio ri xtzijox chiwe. ⁶ We Utzalaj Tzij ri' re ri Evangelio tajin kub'ano jas ri kub'an jun che' käk'iyik, ri kuya u wäch pa ronojel ruwächulew je' jas ri xb'antaj na iwuk' ix, tzpa ri q'ij ri xita u tzijol wa', xiwetamaj k'ut chi gas tzij ri Dios kutoq'ob'isaj ki wäch konojel. ⁷ Are k'u wa' ri xuk'ut ri loq'alaj qachalal Epafra chiwäch. Ri are', are jun qach ajchak ri k'o quk', jun patänil re ri Cristo ri gas jikom ranima'. ⁸ Ri are' u yo'm u tzijol chqe chi gas kiwaj iwib' rumal ri Loq'alaj Espiritu.

⁹ Rumal ri' ri uj, tzpa ri q'ij ri xqata u tzijol ri tajin kib'ano, man kujtän tä chub'anik orar pi wi'. Käqata' che ri Dios chi kuq'alajisaj ru rayib'al chiwäch, chi kuya ronojel u wäch no'j chiwe, xuquje' ronojel u wäch etamanik ri kuya ri Loq'alaj Espiritu. ¹⁰ Je ri' rech je' kib'an na pa ri i k'aslemal jas ri taqal u b'anik kumal ri e kojoninaq che ri Qajaw Jesús, xuquje' rech amaq'el kib'an na ri utz käril wi ri Are' pa ronojel, chi kib'an na ronojel u wäch utzil, rech xuquje' käk'o'i na más ri iwetamb'al chrij ri Dios. ¹¹ Käqata' che ri Dios chi kuya na iwe ru chuq'ab' ri Are', ri sib'alaj nim u q'ij. Je ri' rech ruk' paciencia kich'ij na ronojel u wäch k'äx ri käpe pi wi', kixkikotik, ¹² xuquje' kixmaltioxin ta na che ri Dios rumal chi u yo'm chqe chi käqak'am qe ri kuya na chke konojel ri e rech ri Are' ri e k'o pa ri saqil re ru taqanik. ¹³ Ri Dios xujuto' pu q'ab' ri Satanás ri kätaqan pa ri q'equm, xujuq'axaj k'u jawije' ri kätaqan wi ri loq'alaj u K'ojol.

¹⁴ Rumal k'u ru kämikal ru K'ojol xujutoro, xusach k'u ronojel ri qa mak.

Ru kämikal ri Cristo kub'ano chi kuya' keutzir ri winaq ruk' ri Dios

¹⁵ Ru K'ojol ri Dios ri xpe waral cho we uwächulew, are je' u b'anik wa' jas ri Dios ri man kilitaj taj. Ri Are', k'ä mäjoq käb'an ronojel ri k'olik, nab'e k'o ri Are'. ¹⁶ Rumal k'u ri Are' ri Dios xub'an ronojel ri k'o chikaj xuquje' ronojel ri k'o cho ruwächulew. Xb'an k'u ronojel ri kilitajik, xuquje' ri man kilitaj taj. Konojel ri k'o taqanik pa ki q'ab', pune ta ne e ángeles, ronojel u wäch taqanik ri nim u b'anik, konojel ri q'atal taq tzij, nimalaj konojel ri xyi' chke chi k'o ki taqanik, konojel taq wa' xeb'an rumal ri Cristo. Xeb'an k'u wa' che ri Are' rech känimarisax u q'ij. ¹⁷ Ri Cristo, tzk'o wi ri Are' k'ä mäjoq käb'an ronojel ri k'olik. Rumal k'u ri Are' ronojel ri xb'anik k'o ki k'olib'al, k'o ki chola-jil. ¹⁸ Xuquje' ri Cristo are Kajaw konojel ri qachalal kojonelab' ri kenuk'uw ru cuerpo waral cho we uwächulew, junam jas ri kub'an ri qa jolom k'o puwi' ri qa cuerpo. Are ri Are' käyo'w ri qa k'aslemal. Are k'u wa' ri nab'e chkixol konojel ri käminaqib' ri xek'astajik, rech nim na u q'ij ri Are' pa ronojel. ¹⁹ Are k'u wa' ru rayib'al ri Dios ri xuchomaj ri Are', chi are xaq junam ri Cristo ruk' ri Are' pa ronojel. ²⁰ Xuquje' xuchomaj ri Dios chi rumal ri Cristo kärutzirisaj ta na ronojel ri k'olik, ronojel ri k'o cho ruwächulew, xuquje' ronojel ri k'o chikaj. Ri Dios k'ut xrutzirisaj ronojel ri k'olik ruk' ri Are' rumal ru kämikal ri Cristo cho ri cruz.

²¹ Ri ix nab'e kanoq i xutum kan ri Dios, i b'anom k'u i k'ulel che pa ri iwanima' rumal ri man utz taj ri xib'an na, xuquje' ri xichomaj. Kämik k'ut ri Dios ix rutzirisam chik ruk' ri Are'. ²² Xixrutzirisaj ruk' ri Are' rumal ri kämikal ri xuriq ri Cristo cho ri cruz waral cho we uwächulew. Je' xub'an wa' ri Cristo rech kixuya chuwäch ri Dios, ch'ajch'oj ri i k'aslemal, man k'o tä chi etzelal kib'ano, man k'o tä k'u i mak chuwäch ri Are'. ²³ Rajwaxik k'ut chi gas tzij kixkojonik. Ri ix je' jas jun ja ri utz b'anom chuyakik, ri man käslab'taj taj, ri ko jeqelik. Man kiya tä k'u kan ri ku'l wi i k'ux. Are k'u wa' ri Tzij ri xito aretaq xtzijox ri Utzalaj Tzij re ri Evangelio chiwe. Are k'u wa' we Tzij ri' ri tajin kätzijox kämik cho ronojel ruwächulew. In wa', ri Pablo, in jun chke ri ketob'an chutzijoxik wa' we Utzalaj Tzij ri'.

Käyi' che ri apóstol Pablo chi käpatänin chke ri qachalal kojonelab'

²⁴ Kämik k'ut kinkikotik rumal ri k'äx ri tajin kinriqo rumal iwech. Xaq je ri' ri in kintob'an chub'anik tz'aqat che ri k'äx ri rajwaxik käkiriq na ri qachalal kojonelab' ri kenuk'uw ru cuerpo ri Cristo waral cho we

uwächulew. ²⁵ Ri in, in jun chke ri e kojom che patänil taq ke ri qachalal kojonelab'. Are ri Dios ri xyo'w wa' pa nu q'ab', ru b'anik wa' we chak'ri' che i patänixik ix, rech gas tz'aqat kinb'an chuq'alajisaxik ru Loq' Pixab' ri Dios chiwäch. ²⁶ Are k'u wa' ri man etamtal tä kan nab'e, ri man u yo'm tä retamaxik ri Dios pa taq ri q'ij ri junab' ri e ok'owinaq, aretaq e k'asal ri ojer taq winaq. Kämik k'ut q'alajisam chi wa' chkiwäch ri e rech ri Dios, e are' konojel ri kekojon che. ²⁷ Utz k'u xril wi ri Dios chi chkiwäch ri e rech ri Are' kuq'alajisaj wi ri man etamtal tä kan nab'e, ri sib'alaj nim u q'ij, ri xuquje' sib'alaj je'lik. Are k'u wa' ru chomam loq chi kuya na chke konojel winaq, ri winaq aj Israel xuquje' ri winaq ri man e aj Israel taj. Ri man etamtal taj are wa' chi ri Cristo kāk'oji na pa ri iwanima'. Tzare k'u wa' ri je'lalaj ku'lb'al i k'ux ri sib'alaj nim u q'ij.

²⁸ Ri uj kăqatzijoj ri Utzalaj Tziz chrij ri Cristo. Keqapixb'aj konojel winaq, xuquje' keqatijoj rech gas kākich'ob'o, rech gas tz'aqat ri ki chomanik ri kojonelab' ri xa e jun chik ruk' ri Cristo. ²⁹ Rimal k'u ri kinchakunik, kintij nu q'ij, kinkoj ronojel ri nu chuq'ab' ri yo'm chwe rumal ri Cristo.

2

¹ Kwaj k'ut chi kiwetamaj chi sib'alaj kintij nu q'ij rumal iwech, sib'alaj kinok il chiwe, xuquje' chke ri e k'o pa ri tinimit Laodicea, xuquje' chke konojel ri māj'a' ke-tam nu wäch. ² Je ri' kinb'ano rech ri e are' kăwalijisax ri kanima', xuquje' rech kākaj kib' nimalaj konojel, xa e jun chik ri e are'. Are kinb'an wa' rech gas kākich'ob' na ri kub'an ri Dios, je ri' chi gas kākū'b'i ki k'ux chrij ri Are'. Are más utz na wa' chuwäch apachike q'inomal ri k'olik. Kintij nu q'ij rech gas kăketamaj u wäch ri Cristo. Are k'u wa' ri man etamtal tä kan nab'e, ri māj'a' kăq'alajisax rumal ri Dios. ³ Ruk' k'u ri Are' sib'alaj k'o wi ronojel u wäch etamanik xuquje' ronojel u wäch no'j ri sib'alaj je'lik. ⁴ Kinb'ij wa' chiwe rech man k'o tä jun kăkowin che i sub'ik ruk' je'lalaj taq tzij ri xaq kākib'ij chiwe rech kixqaj pa ki q'ab'. ⁵ Pune ta ne man in k'o iwuk' chwinajil, ri ix k'ut ix k'o pa wanima' je' ta ne gas tzij in k'o iwuk'. Kinkikotik aretaq kinwilo chi utz kib'ano, kib'an ronojel pa cholajil, chi gas tzij ix kojoninaq che ri Cristo, man i tasom tä k'u iwib' chrij ri Are'.

⁶ Je k'u ri', jas ri xib'ano, xik'amowaj ri Jesucristo che Iwajaw, xa jun chixk'ol ruk' ri Are'. ⁷ Je' chib'ana' jas jun che' ri ko tikil pa ri ulew, man k'o tä jas kixslab'isanik. Rajwaxik chi gas kixkojon che ri Qajaw Jesús jas ri k'utum chiwäch. Je' chib'ana

wa', xuquje' sib'alaj chiya maltioxinik che ri Dios amaq'el ronojel q'ij.

Waral kăqil wi chi ri Cristo kub'an k'ak' che ri q'a k'aslemal

⁸ Chiwila iwib' mixqaj pa ki q'ab' ri winaq ri kākaj kixkisub' ruk' ri je'lalaj taq ki tzij chkiy ri ki naq'atisam wi kib' ri e are', ruk' k'u ri ki chomanik ri man k'o tä u patän chrij ri kajulew. Man are tä ru tijonik ri Cristo, xane are ri ki tijonik winaq, ri xaq ajuwächulew wa'.

⁹ Ronojel k'u ru b'anik ri Dios kăriqtaj wa' ruk' ri Cristo ri xil u wäch waral cho we uwächulew, rumal chi ri Cristo, are gas Dios. ¹⁰ Ri ix k'ut k'o ri Dios pa ri iwanima' rumal chi xa ix jun ruk' ri Cristo. Ri Are' k'ut kătaqan pa ki wi' konojel ri k'o ki taqanik, pa ki wi' konojel ri ángeles, xuquje' kătaqan pa ki wi' konojel ri nimaq ki b'anik ri yo'm chke chi k'o taqanik pa ki q'ab'. ¹¹ Xuquje' rumal chi xa ix jun ruk' ri Cristo, kojom ri retal ri k'ak' trato pa taq ri iwanima'. Man are tä k'u wa' ri kăb'an che ru cuerpo jun winaq, xane are wa' ri xub'an ri Cristo aretaq xixuto' pa ri ojer i k'aslemal, ri k'aslemal rech etzelal. Je ri' xub'ano rech man kib'an tä chik ri man utz taj ri kraj ri iwanima'. ¹² Aretaq xb'an i qasna', je' ta ne ri xixmuq junam ruk' ri Cristo, xuquje' junam xixk'astaj ruk'. Je ri', rumal chi xixkojon che ri nimalaj u chuq'ab' ri Dios ri xk'astajisan ri Cristo chkirol ri kăminaqib'. ¹³ Ri ix nab'e kanoq je' ta ne ri ix kăminaq rumal ri i mak, xuquje' rumal chi ri ix man ix aj Israel taj, man i nimam tä k'u ri ojer Pixab'. * Xpe k'u ri Dios, xuya ri gas i k'aslemal junam ruk' ri Cristo, xusach ronojel ri i mak. ¹⁴ Ri Dios xusach ri nimalaj qa k'as ri k'o chqij, ri u q'atom tzij pa qa wi' chi kāk'ăjisax qa wäch, rachi'l k'u ri pixab' ri kujutaq chub'anik k'ia jastaq. Xresaj chqij, xusach u wäch wa' rumal ru kămikal ri Cristo cho ri cruz. ¹⁵ Ri Cristo, aretaq xkâm cho ri cruz, xch'akan ri Are' puwi' ri jun ri kăb'in pa ri sutz' mayul, xuquje' pa ki wi' konojel ri nimaq ki b'anik, ri k'o ki taqanik. Xresaj ri ki chuq'ab', xuqasaj ki q'ij chkiwäch konojel, xeqaj k'u pu q'ab' ri Cristo.

Rajwaxik chi ri kojonelab' kăkitzujuk ri utzil ri kăpe chikaj chuk'exwäch ri jastaq ajuwächulew

¹⁶ K'o b'a' jun mukoj jun pixab' chrij ri kitijo, o chrij apachike u wäch nimaq'ij. Mub'an wa' chrij ri nimaq'ij rech ri k'ak' ik'. Mub'an k'u wa' chrij ri q'ij re uxlanem. ¹⁷ Konojel taq wa' e are' xa jujun k'utb'al re ri gas kăpe na, jas ri u nanoch' jun winaq ri kăsachik. Ri gas xuk'ut loq, ri gas kilitajik, are k'u wa' ri Cristo. ¹⁸ Chiwila b'a' chi māmaj ri tojb'al iwe kumal ri winaq

* **2:13** Ri mero tzij waral are "...man kojom tä ri retal ri ojer trato che ri i cuerpo". Chawila' Hechos 7:8, nota.

ri kâka'n che kib' chi man kâka'n tä nimal. Xaq are sub'unik wa'. Are winaq wa' ri xuquje' kek'ijilaj taq ri ängeles. We winaq ri' xaq kâkinim kib' chupam ri man ketam taj, chupam ri man kâq'alajin taj. Kâka'n k'u nimal xa rumal ri k'ia u wäch ki chomanik ri e are'. ¹⁹ We winaq ri' ki tasom kib' chrij ri Cristo. Ri Cristo kâtaqan pa qa wi' je' jas ri kub'an ri qa jolom k'o puwi' ri qa cuerpo. Are ri Are' ri kâyo'w ki chuq'ab' ri qachalal kojonelab' ri kenuk'uw ru cuerpo waral cho we uwächulew, are k'u ri Are' ri xuquje' kek'iyisanik. Je ri' chkijujunal ru tz'aqatil ru cuerpo kek'iyik, utz kâka'n konojel che ki riqik kib', je' jas ru chomam ri Dios pa ki wi'.

²⁰ Ri ix, ix kâminaq chik junam ruk' ri Cristo. Kel kub'ij wa' chi man junam tä chik ri i no'j jas ri ki no'j ri nik'iaj winaq chik ri xaq ajuwächulew. Jas k'u che kib'an na ri kâka'n ri nik'iaj winaq chik ajuwächulew je' ta ne chi ri ix k'ä ix jun kuk' ri e are'? Jas che kinimaj na ri ki pixab' ri e are' ri man utz taj? ²¹ Ri winaq ri' kâkib'ij: "iMichap wa'!" —kecha'. "iMittij wa', miwuk'aj wa' pa i q'ab'!" —kecha ri'. ²² Ronojel wa' we pixab' ri' xa are ki taqanik, ki tijonik ri winaq chkij jastaq ri xa kâsach na ki wäch. ²³ Qas tzij k'ut, je' ta ne chi nim u b'anik wa' we kânimax ri kâkib'ij, xa rumal chi kek'ijilan chke taq ri ängeles. Kâka'n che kib' chi man kâka'n tä nimal, man gas tzij tä k'ut. Xuquje' kâka'n k'äx che ri ki cuerpo. Are k'u ri ki tijonik man kâkowin tä che resaxik ri itzel taq ki rayinik ri winaq.

3

¹ Ri ix, ix k'astajinaq chik chkixol ri kâminaqib' junam ruk' ri Cristo. (Kel kub'ij wa' chi b'anom k'ak' che ri i k'aslemal rumal ri Are'.) We je ri', rajwaxik chi kitzukuj ri utzil ri kâpe chila' chikaj ri t'uuyul wi ri Cristo pa ru wikiäq'ab' ri Dios. ² Chichomaj apan ri k'o chila' chikaj, man xaq xuwi tä k'u ri k'o cho ruwächulew. ³ Ri ix, ix kâminaq junam ruk' ri Cristo. (Kel kub'ij wa' chi ri i k'aslemal kâmik man junam tä ruk' ri ojer i k'aslemal.) Ri i k'aslemal kâmik k'olotal ruk' ri Cristo pu q'ab' ri Dios. ⁴ K'o ri gas qa k'aslemal rumal ri Cristo ri k'o pa qanima'. Aretaq k'ut kâpe chi ri Are', are chi' ri kililitaj na i wäch ruk' ri Are', kânimarisax k'u na i q'ij junam ruk'.

Waral kâqil wi ru jalb'em rib' ri ojer qa k'aslemal ruk' ri k'ak' qa k'aslemal

⁵ Chisacha b'a u wäch ronojel ri man utz taj rech ruwächulew ri k'o pa ri iwanima'. Mib'an iwe jas ri kâka'n ri tz'i' ri xaq kâkiriq kib', man k'o tä ki pixab'. Mib'an ri etzelal ri sib'alaj äwas u b'anik cho ri Dios, me' k'u iwanima' chub'anik ri man utz taj, ri itzel

taq i rayinik. Mirayij k'ia u wäch jastaq ri xaq rech ruwächulew rumal chi junam wa' ruk' ri ki q'ijilaxik taq tiox ri xa e b'anom kumal winaq. ⁶ Rumal k'u wa' kâpe na ri nimalaj royowal ri Dios pa ki wi' ri winaq ri man keniman tä che. ⁷ Ri ix k'ut nab'e kanoq xib'an konojel taq wa' we mak ri' pa ri ojer i k'aslemal. ⁸ Are k'u ri kâmik chiya kan u b'anik ronojel wa' we ri'. Xaq mäpe iwoyowal, me' iwanima' chub'anik ri man utz taj, ri itzel taq i rayinik, mib'an k'u ri etzelal. Mixyoq'onik, mib'ij ri itzel taq tzij ri k'ixb'al ki b'ixik. ⁹ Mib'an tzij chixol, ri jun ruk' ri jun chik, rumal chi i yo'm kan ri ojer i k'aslemal, xuquje' ronojel ri man utz taj ri xib'an nab'e. ¹⁰ Kâmik ri' are jun chi wi ri i k'aslemal, je' ta ne i kojom jun k'ak' atz'iaq. Tajin kub'an na k'ak' wa' we i k'aslemal ri' ronojel q'ij rumal ri Dios ri tajin kuk'ex ri i no'j, tajin kuk'ex ri iwanima' rech kixel na junam ruk' ri Are'. Je ri' gas kiwetamaj na u wäch ri Dios pa ri iwanima'. ¹¹ Man nim tä u b'anik kâmik we aj Israel jun winaq o we man aj Israel taj, we kojom retal ri ojer trato che jun o we man kojom taj. Man nim tä u b'anik we estranjer jun winaq o we man estranjer taj, we k'o retam jun o we man k'o tä retam, we kub'an ri u chak k'o pu q'ab' jun u patrón o we ne man k'o tä u patrón. Ri gas nim u b'anik kâmik, are ri Cristo. Rajwaxik chi ri Cristo nim na u b'anik ri Are' chuwach ronojel, kâtaqan k'u ri Are' pa qanima' nimalaj qonojel.

¹² Ri ix, ix u loq' ri Dios, ix cha'tal k'u rumal, rech ix rech ri Are'. Rumal ri' chib'ana ronojel u wäch utzil pa ri i k'aslemal. Chitoq'ob'isaj ki wäch nik'iaj winaq chik, chib'ana utzil kuk' konojel. Mib'an nimal, xane rajwaxik kixch'awik. Mikoj i k'a'nal, xane chichajij paciencia. ¹³ We ruk' jub'iq' k'o k'äx ri kub'an jun che ri jun chik, chikuyu wa', xuquje' chita' ri sachb'al i mak we k'o jun chiwe k'o jas k'o pa ranima' chrij jun chik. Jas xub'an ri Cristo chiwe xusach ri i mak, je' chib'ana ix xuquje'. ¹⁴ Man xuwi tä wa', xane rajwaxik sib'alaj kiwaj iwib'. Are k'u wa' ri gas kâb'anow chiwe chi xa ix jun. Kub'an k'u tz'aqat che ronojel. ¹⁵ Ri utzil ri kuya ri Dios chixol, are chtaqaqan wa' pa ri iwanima'. Are k'u wa' ri ix sik'im wi rumal ri Dios rech xa ix jun chik, ix ri kinuk' ru cuerpo ri Cristo waral cho we uwächulew. Chiya b'a' maltioxinik pa ronojel.

¹⁶ Chiya che ru Loq' Pixab' ri Cristo chi gas kâjeqi pa ri iwanima', chtaqaqan k'u wa' pa ronojel ri kib'ano. Chittijola iwib' ruk' ronojel u wäch utzalaj no'j, chivalijisaj k'u ri iwanima' chb'il taq iwib'. Chib'ixoj salmos, himnos, xuquje' ronojel u wäch b'ix ri kuya ri Loq'alaj Espíritu chiwe. Chib'ixoj wa' che

* 3:1 "Pa ru wikiäq'ab'": Chawila' ri Efesios 1:20, nota.

ri Dios ruk' ri maltioxinik ri käpe pa ri iwan-ima'. ¹⁷ Ronojel ri kib'ano, ronojel k'u ri kib'ij, chib'ana wa' pa ru b'i' ri Qajaw Jesús. Rumal k'u ri Are' chiya b'a' maltioxinik che ri Dios qa Tat.

Ri apóstol Pablo kub'ij jas ri rajwaxik pa ri ki k'aslemal ri kojonelab'

¹⁸ Ri ix ixoqib', ri ix k'ulan chik, chixniman chke ri iwachajil rumal chi are rajwaxik chi je' kib'an ix, ri ix kojoninaq che ri Qajaw Jesús. ¹⁹ Ri ix achijab', ri ix k'ulan chik, loq' cheiwila ri iwioxqil, xaq mäk'istaj i k'ux kuk'. ²⁰ Ri ix alab'om, alitomab', chixniman chke ri i nan i tat pa ronojel, utz k'u käril wa' ri Qajaw Jesús aretaq je' kib'ano. ²¹ Ri ix, tat nan, xaq miyak koyowal ri iwalk'ual rech man keb'ison taj. ²² Ri ix ajchakib', chixniman chke ri i patrón waral cho we uwächulew pa ronojel. Man xuwi tä utz kib'an che ki patänixik aretaq kixkilo rech utz kixkil wi, xane chib'ana ri käpe pa ri iwanima', mub'an kieb' i k'ux. Je ri' chib'an na rumal chi kixej iwib' cho ri Dios. ²³ Ronojel ri kib'ano, chib'ana wa' ruk' kikotemal je' ta ne are tajin kipatänij ri Qajaw Jesús, man are tä k'u ri winaq. ²⁴ Iwetam k'ut chi ri Qajaw Jesús kuya na chiwe chi kiwechb'ej ru tob'anik ri Are' che tojb'al iwe, rumal chi are ri Cristo ri qas i Patrón ri tajin kipatänij. ²⁵ Jachin k'u ri kub'an ri man utz taj, kuk'am na ri rajil u k'exel ri man utz taj ri kub'ano, rumal chi ri Dios junam keril wi konojel ri winaq.

4

¹ Ri ix xuquje' ri ix patrón, chib'ana ri taqal u b'anik, ri jikomal kuk' ri patänil taq iwe. Chna'taj chiwe chi ri ix xuquje' k'o jun i Patrón ri k'o chila' chikaj.

² Amaq'el ronojel q'ij chib'ana orar, chixok il chub'anik wa', chiya k'u maltioxinik che ri Dios. ³ Aretaq kib'an orar, chib'ana orar pa qa wi' uj xuquje', rech ri Dios kuya na chqe chi kuya' käqatzijoj ru Loq' Pixab' ri Are'. Je ri' kujkowinik käqaya u b'ixik ri xub'an ri Cristo ri man etamtal tä kan nab'e. Rumal k'u rech ru tzijoxik wa' in k'o pa che'. ⁴ Chib'ana orar rech qas utz kinb'an chuq'alajisaxik wa' we tzij ri' jas ri taqal u b'anik wumal.

⁵ Qas chiwila na jas ri kib'an kuk' ri man e kojonelab' taj, xaq mitzaq ri i q'ij. ⁶ Utz chixtzijon kuk' ri winaq, chib'ij ri qas k'o u patän chke. Qas chichomaj na ri' ri kib'ij aretaq k'o jas ri käkita' ri winaq chiwe.

Ri apóstol Pablo kuya b'i' rutzil ki wäch ri qachalal

⁷ Ronojel ri nu b'anom kub'ij na ri loq'alaj qachalal Tíquico chiwe. Ri are' are jun qachalal ri jikom ranima' ri kätob'an wuk' chupatänixik ri Qajaw Jesús. ⁸ Nu taqom k'u

b'i iwuk' chub'ixik chiwe jas ri qa'nom uj waral, xuquje' rech kuwalijisaj na ri iwan-ima' ix. ⁹ Xuquje' nu taqom b'i' ri Onésimo junam ruk'. Ri are' are jun loq'alaj qachalal ri jikom ranima', xuquje' are jun wa' iwuk'. Käkitzijoj k'u na chiwe ronojel ri tajin käk'ulmataj waral.

¹⁰ Ri Aristarco, ri wach ajpache', rachi'l ri Marcos ru primo ri Bernabé, käkiya b'i rutzil i wäch. Ri in, ya nu b'im chik chiwe chrij ri Marcos, chi we kopan iwuk' rajwaxik kik'ulaj ruk' utzil. ¹¹ Xuquje' ri Jesús, ri käb'ix Justo che, kuya b'i rutzil i wäch. Xuwi k'u taq wa' chkixol ri winaq aj Israel ri e kojoninaq che ri Qajaw Jesús tajin kinkito' chutzijoxik ru taqanik ri Dios, sib'alaj k'u ki ku'b'isam nu k'ux. ¹² Ri Epafras kuya b'i rutzil i wäch. Are' patänil re ri Cristo, xuquje' are jun wa' iwuk'. Ri are' amaq'el kub'an orar pi wi', kub'ochi'j ri Dios rech qas jikom ri iwanima' kixkojonik, qas k'u kijach iwib' chub'anik ru rayib'al ri Dios. ¹³ Qas tzij wilom in chi ri Epafras sib'alaj kok il chiwe, xuquje' chke ri kojonelab' ri e k'o pa ri tinimit Laodicea, kachi'l ri kojonelab' ri e k'o pa ri tinimit Hierápolis. ¹⁴ Ri Lucas ri loq'alaj kunanel xuquje' kuya b'i rutzil i wäch, rachi'l ri Demas.

¹⁵ Chib'ana toq'ob', chiya rutzil ki wäch ri qachalal ri e k'o pa ri tinimit Laodicea, xuquje' ri Ninfas kuk' konojel ri qachalal kojonelab' ri käkimulij kib' cho rachoch. ¹⁶ Aretaq käsik'itaj u wäch wa' we wuj ri' chiwäch ix, chitaqa b'i kuk' ri qachalal kojonelab' aj Laodicea rech käsik'ix u wäch wa' chkiwäch ri e are' chila' xuquje'. Are k'u ri wuj ri ki k'amom ri kojonelab' aj Laodicea, ri käkitaq na b'i iwuk', ri ix kisik'ij na u wäch wa' we wuj ri' xuquje'. ¹⁷ Chib'ij wa' we tzij ri' che ri Arquipo: "Chawila' chi qas utz kab'an chub'anik ri chak ri xyi' chawe chupatänixik ri Qajaw Jesús," —chixcho'q che.

¹⁸ In wa', ri Pablo, kintz'ib'aj b'i wa' we rutzil i wäch ri' ruk' ri nu q'ab' in. Chna'taj chiwe chi ri in, in k'o pa che'. Are ta b'a' ri Dios kätöq'ob'isan i wäch. Amén.

RI NAB'E CARTA RI XUTZ'IB'AJ RI SAN PABLO CHKE RI KOJONELAB' AJ TESALÓNICA

Ri apóstol Pablo kuchap u tz'ib'axik jun carta chke ri qachalal kojonelab' aj Tesalónica

¹ In wa', ri Pablo, wachi'l ri Silvano ruk' ri Timoteo, tajin kintz'ib'aj b'i we wuj ri' chiwe ix, qachalal, ix ri' ri kojonelab' ri k'o pa ri tinimit Tesalónica, ri xa ix jun ruk' ri Dios qa Tat xuquje' ri Qajaw Jesucristo. Are ta b'a' ri Dios qa Tat xuquje' ri Qajaw Jesucristo kutoq'ob'isaj i wäch, kub'ano chi kuxlan ri iwanima'.

Waral kãqil wi chi ri kojonelab' aj Tesalónica qas tzij xekojonik

² Amaq'el aretaq kujxuki'k kixna'taj chqe kãqa'n orar pi wi', kãqaya maltioxinik che ri Dios rumal iwech ix iwonojel. ³ Je' kãqa'n wa' rumal chi amaq'el kãna'taj chqe chuwäch ri Dios qa Tat chi qas tzij ix kojoni-naq che ri Cristo. Q'alaj wa' rumal ri chak ri tajin kib'ano. Kãna'taj chqe xuquje' ri rutzil iwanima' chke nimalaj konojel. Q'alaj wa' rumal chi i yo'm iwib' chupatänixik ri Dios. Xuquje' kãna'taj chqe chi man elinaq tä ri ku'lb'al i k'ux chrij ri Qajaw Jesucristo pune k'ãx kirigo. ⁴ Qetam k'ut, qachalal, chi kixraj ri Dios, xuquje' chi ix cha'tal rumal. ⁵ Aretaq xqatzijoj ri Utzalaj Tzij re ri Evangelio chiwe, man xuwi tä ri uj xujtzijonik, xane xuquje' are ri Loq'alaj Espiritu xuk'ut ru chuq'ab' chiwäch rumal ri qa tzij. Qas qetam chi ri kãqatzijoj are ri qas tzij. Ri ix iwetam chi aretaq xujk'oji iwuk', man are tä xqatzukuj jachike ri utz chqe uj, xane are xqatzukuj jachike ri utz chiwe ix.

⁶ Ri ix k'ut xib'ano jas ri xqa'n uj, xuquje' jas ri xub'an ri Qajaw Jesucristo. Xuquje', pune sib'alaj xiriq k'ãx aretaq xixkojonik, xix'amowaj ri Utzalaj Tzij re ri Evangelio ruk' ri kikitomal ri xuya ri Loq'alaj Espiritu pa ri iwanima'. ⁷ Je ri' xik'ut chkiwäch konojel ri kojonelab' aj Macedonia, xuquje' ri kojonelab' aj Acaya, jas ri rajwaxik kãka'n ri e are'. ⁸ Chila' k'ut xchapletaj wi b'i u tzijoxik ru Loq' Pixab' ri Qajaw Dios iwumal, man xuwi tä chke ri aj Macedonia, ri aj Acaya, xane xuquje' chke ri winaq pa rono-jel tinimit. Xuquje' konojel ki tom u tzijol chi xixkojon che ri Dios. Je ri' chi ri uj man k'o tä chik jas rajwaxik kãqab'ij. ⁹ Xane ri winaq ri ki tom u tzijol chi xixkojonik, kãkitzijoj jas ri xib'an che qa k'ulaxik aretaq xujopan iwuk'. Kãkitzijoj jas ri xib'ano, xiya kan ri jule' taq dios chik ri b'anom kumal winaq,

xixkojon che ri Dios qa Tat. Xichaplej k'u u patänixik ri qas Dios ri k'aslik. ¹⁰ Xuquje' kãkitzijoj chi sib'alaj ku'l i k'ux che reyexik ri Jesús, ri kãtzelej loq pa ri kaj. Are k'u wa' ru K'ojol ri Dios ri xk'astajisax b'i chxixol ri kãminaqib' rumal ri Dios. Are Jesús wa' ri kujto'w chuwäch ri nimalaj royowal ri Dios ri kãpe na pa ki wi' ri winaq.

2

Ri apóstol Pablo kuna'taj chke ri kojonelab' aj Tesalónica jas ri xub'an che ki patänixik

¹ Ri ix, qachalal, qas iwetam chi man xaq tä loq' xujk'oji iwuk', xane nim xixqato' wi. ² Pune k'u xqariq k'ãx aretaq uj k'o pa ri tinimit Filipos, xuquje' xuyjoq'ik, je' jas ri iwetam ix, ri Dios xuya qa chuq'ab' rech man kãqaxej tä qib' chutzijoxik ri Utzalaj Tzij re ri Evangelio chiwe, pune e k'o ri sib'alaj kek'ulelan chqe, ri kãkiq'atej qa wäch. ³ Je ri', rumal chi qas jikom ri kãqatzijoj, man k'o tä etzelal chupam, man xqatzijoj tä k'u jastaq che ki sub'ik ri winaq. ⁴ Ri Dios k'ut qas utz xril na ri qanima', rumal ri' xuya pa qa q'ab' ru tzijoxik ri Utzalaj Tzij re ri Evangelio, je' jas ri kãqatzijoj. Man k'o tä kãqesaj che, man kãqaya tä k'u u wi'. Man are tä kãqatzijoj jachike ri utz kãkita wi ri winaq, xane jachike ri kãqaj chuwäch ri Dios ri kãka'y pa qanima'. ⁵ Ri ix iwetam chi man ruk' tä je'lalaj taq tzij xixqach'ako, man xqatzukuj taj jas xqab'ij chiwe rech kãqach'ak puqaj chiwij. Chuwäch ri Dios k'o wi chi man je' tä wa' xqa'no. ⁶ Man qa tzukum taj chi kãyi' qa q'ij kumal ri winaq, we are iwumal ix, o are rumal jachin jun chik, pune taqal chqe chi k'o jas kãqata' chiwe. We je ri' kãqa'no, rajwaxik chi kinimaj ri kãqab'ij rumal chi uj apóstoles, uj taqom rumal ri Cristo. ⁷ Man je' tä k'u wa' xqachomaj, xane je' xqa'n chiwe jas ri kub'an jun chichu' che ki chajixik ri ral, sib'alaj uj utz iwuk'. ⁸ Sib'alaj nim na ri rutzil qanima' chiwe chi man xuwi tä ru Loq' Pixab' ri Dios xqaj xqaya chiwe, xane xuquje', we ta rajwaxik, xqaya ta ri qa k'aslemaal rumal chi sib'alaj ix loq' chqawäch. ⁹ Qachalal, za mat kãna'taj ri' chiwe chi aretaq xujk'oji iwuk', xujchakunik, sib'alaj xujkosik? Xujchakunik chi paq'ij chi chuq'ab' chuch'akik ri qa wa rech man kãqaya tä latz' che jachin jun chiwe. Je' xqa'n wa' aretaq xqatzijoj ri Utzalaj Tzij re ri Evangelio rech ri Dios chila' iwuk'.

¹⁰ Ri ix qas xiwilo, xuquje' ri Dios qas xriilo chi xqa'n ri jikomai iwuk', man k'o tä etzelal xriqtaj chqij, ch'ajch'oj ri qa k'aslemaal aretaq xujk'oji chila' iwuk' ix ri ix kojonelab'. ¹¹ Qas iwetam k'ut chi qa wali-jisam iwanima' chijujunal, qa ku'b'isam i

k'ux, xuquje' qa yo'm pixb'enik chiwe. Je' xqa'n chiwe jas ri kub'an jun tata' chke ri ralk'ual. ¹² Xixqab'ochi'j chi je' kib'ano jas ri ya'tal chke ri e rech ri Dios ri xixusik'ij rech kixk'o'ji ruk', kâtaqan k'u ri Are' pi wi', xuquje' rech kuya ri je'lalaj juluwem chiwe.

¹³ Ri uj man kujtâni tâ chuya'ik maltioxinik che ri Dios rumal chi aretaq xitatab'ej ru Loq' Pixab' ri Dios ri xqatzijoj chiwe, qas xik'amowaj, xikoj pa qas tzij, man xichomaj taj chi xaq u tzij jun achi, xane are ru Loq' Pixab' ri Dios. Tzij k'u ri' chi are ru Loq' Pixab' ri Dios ri kâkowin chuk'exik ri i k'aslemal ix ri ix kojonelab'. ¹⁴ Ri k'âx ri xik'ulmaj ix, qachalal, are je' jas ri xkik'ulmaj ri e kojoninaq che ri Dios ri e k'o pa Judea ri xa e jun ruk' ri Cristo Jesús. Xb'an k'âx chiwe kumal ri iwinajil, je' xb'an chiwe jas ri xb'an chke ri kojonelab' aj Judea kumal ri ki winaqil aj Israel. ¹⁵ E are k'u wa' ri winaq aj Israel ri xekâmisari ri Qajaw Jesús, jas ri xka'n chke ri q'alajisal taq re ru Loq' Pixab' ri Dios ri xetaq b'i kuk' nab'e. Are k'u ri uj xuquje' xujkesaj loq. We winaq ri' man kâka'n tâ ri kâqaj chuwäch ri Dios, xane kâka'n ki k'ulel chke konojel winaq. ¹⁶ Aretaq ri uj kâqaj kâqatzijoj ri Utzalaj Tzij re ri Evangelio chke ri man e aj Israel taj, rech ri e are' xuquje' kâkiriq ru tob'anik ri Dios, ri winaq aj Israel xa kâkiq'atej qa wäch. Je' ri' ki b'anom, ki nimarisan ri ki mak cho ri Dios. Kâmik k'ut petinaq chik ri nimalaj royowal ri Dios pa ki wi' konojel.

Waral kâqil wi chi ri apôstol Pablo kraj keusolij chi na jumal chik ri kojonelab' aj Tesalónica

¹⁷ Qachalal, pune xke' kieb' oxib' q'ij ri uj elinaq loq iwuk', pune ta ne man kâqil tâ i wäch, man ix sachinaq tâ chqe, ix k'o pa qanima'. Sib'alaj kâqaj kâqil i wäch jumal chik. ¹⁸ Rumal ri' xqatzukuj jas xqa'no rech kujopan iwuk' che iwilik. In wa', ri Pablo, k'ia mul xintzukuj jas kinb'ano rech kujopan iwuk'. Are k'u ri Satanás xujuq'atej. ¹⁹ ¿Jas k'u chrij ku'l wi qa k'ux, kujkikotik? ¿Jas ri' ri kub'ano chi kâku'b'isax qa k'ux, kuya kikitomal chqe? Ix ri', qachalal, rumal chi jikom ri iwanima' cho ri Dios. Are ri ix ri kixb'anowik chi kujkikot na cho ri Qajaw Jesús aretaq kâpetik rumal chi xujch'akanik. ²⁰ Are je' iwumal ix chi kâku'b'isax qa k'ux, kujkikotik.

3

¹ Rumal k'u rech chi man xqach'ij tâ chi na ri mat qetam jas i b'anom, xqachomaj kujkanaj kan qa tukiel pa ri tinimit Atenas. ² Je' xqa'n wa', xqataq k'u b'i ri qachalal Timoteo iwuk'. Ri Timoteo are jun utzalaj patânil re ri Dios ri chakuninaq quk' chutzijoxik ri Utzalaj Tzij re ri Evangelio chrij ri

Cristo. Xqataq k'u b'i iwuk' rech kuwalijisaj ri iwanima', kixupixb'aj rech k'o na mäs u chuq'ab' ri i kojonik. ³ Je' ri' rech man k'o tâ jun chiwe kub'an kieb' u k'ux kumal taq we k'âkk'ol ri'. Ri ix k'ut iwetam chi tzrajwaxik wi chi kâqariq k'âx. ⁴ Je' ri', rumal chi xqab'ij wa' chiwe aretaq xujk'o'ji iwuk', chi kâqariq na ri k'âkk'ol. Je' ri' qas ya' iwetam ri xqak'ulmaj uj qonojel. ⁵ Ri in man xinch'ij tâ chi na ri mat kinwetamaj jas i b'anom. Rumal ri' xintaq b'i ri Timoteo chuta'ik u tzijol jas u b'anom ri i kojonik. Xinxej wib' chi we ne ruk' jub'iq' xixch'aktaq rumal ri Itzel, xaq b'a' loq' ri' ri qa chak ri xqa'n iwuk'.

⁶ Kâmik k'ut tzelejeninaq loq ri Timoteo pa Tesalónica, xuya ri utzalaj tzij chqe chrij ri i kojonik, xuquje' chi sib'alaj kiwaj iwib', utz iwanima' chke konojel. Kutzijoj chqe chi ama'el kujna'taj chiwe, utz i chomanik chqij, xuquje' chi sib'alaj kiwaj kiwil qa wäch. Je' ri' qe uj xuquje', sib'alaj kâqaj kâqil i wäch. ⁷ Xa je' ri', qachalal, chupam ronojel ri qa rajwaxik, xuquje' ri k'âkk'ol ri tajin kâqariqo, kâku'b'i qa k'ux rumal iwech, aretaq kâqato chi qas tzij ix kojoninaq che ri Cristo, jikom ri iwanima'. ⁸ Xqana' uj chi je' ta ne xub'an k'ak' ri qa k'aslemal, man k'o tâ chi jas kâqab'isoj, rumal chi qas i jikib'am i k'ux chrij ri Qajaw Jesús. ⁹ Rumal k'u ri', sib'alaj nim ri maltioxinik kâqaya che ri Dios rumal iwech ix, rumal ri nimalaj kikitomal ri kâqana' pa qanima' chuwäch ri Dios. ¹⁰ Xuwi b'a' kâqa'n orar pi wi' chi paq'ij chi chaq'ab', man kujq'iytaj taj. Kâqata' che ri Dios chi kuya chqe chi kâqil i wäch. Je' ri' kâqaya na chiwe ri k'â kraj na che ri i kojonik.

¹¹ Are ta b'a' ri Dios qa Tat junam ruk' ri Qajaw Jesucristo kâto' chqe, kuk'am qa b'e rech kujkowinik kujopan iwuk'. ¹² Ri Qajaw Dios chub'an ta b'a' chiwe chi kâk'iy na ri rutzil iwanima', chuya ta na chiwe chi sib'alaj kiwaj iwib' chb'il taq iwib', xuquje' keiwaj konojel ri nik'iaj winaq, je' jas ri uj xuquje' sib'alaj kixqaj. ¹³ Xuquje' chub'ana chiwe chi sib'alaj jikom iwanima' rech man k'o tâ mak kâriqtaj chiwij, ch'ajch'oj ri i k'aslemal chuwäch ri Dios qa Tat aretaq kâpe ri Qajaw Jesucristo e rachi'l konojel ri e rech ri Are'.

4

Waral kâqil wi jas u wäch ri k'aslemal ri kâqaj chuwäch ri Dios

¹ Je' k'u ri', qachalal, kixqab'ochi'j, kixqapixb'aj rumal ri Qajaw Jesús chi kitaqej u b'anik pa ri i k'aslemal jas ri xqak'ut kan chiwäch, je' jas ri tajin kib'an kâmik. Rumal chi are wa' ri kâqaj chuwäch ri Dios, kâqata' chiwe chi kânimar u b'anik wa' iwumal.

² Iwetam chi k'ut ri tijonik ri qa yo'm chiwe, ri xujtaq chuya'ik rumal ri Qajaw Jesús. ³ Are k'u wa' ri kraj ri Dios: chi kitas iwib' chrij ronojel u wäch etzelal, ch'ajch'oj k'u ri i k'aslemal, chi man kib'an tä iwe xa jas ri kaka'n ri tz'i' ri xaq käkiriq kib', man k'o tä ki pixab'. ⁴ Xane ri Dios kraj chi ri ix, ri ix achijab' chijujunal utz chib'ana chucha'ik jun iwixoxil, kixk'oji ruk', nim chiwila wi, je' jas ri taqal chiwe ix, ix k'ut rech ri Dios. ⁵ Mib'ana xa jas ri kiwaj ix ruk' ri itzel i rayinik jas ri kaka'n ri nik'iaj winaq chik ri man e kojoninaq tä che ri Dios. ⁶ K'o b'a' jun mub'an k'äx, man kusub' tä jun qachalal, man kusub' tä k'u na jun winaq chik che wa' we ri' ri nu b'im chiwe, rumal chi ri Dios sib'alaj kuk'äjisaj na u wäch jachin ri je' kub'an wa'. ¡Chiwilampe! Qa b'im chi k'u wa' chiwe, qa q'alajisam chi wa' chiwäch. ⁷ Man uj u sik'im tä k'u ri Dios rech kâqatz'iloj ri qa k'aslemal, xane rech kâqatas qib' chrij ronojel u wäch etzelal, kâqajach qib' pu q'ab' ri Are'. ⁸ Je k'u ri' jachin ri kâretzelaj u wäch we tijonik ri', man kâretzelaj tä u wäch jun winaq, xane are kâretzelaj u wäch ri Dios ri u yo'm ru Loq'alaj Espiritu pa qanima'.

⁹ Man rajwaxik tä k'ut kintz'ib'aj jun wuj chiwe, qachalal, chub'ixik chi rajwaxik sib'alaj kiwaj iwib', rumal chi are ri Dios u k'utum wa' chiwäch chi rajwaxik kiwaj iwib' chb'il taq iwib'. ¹⁰ Xuquje' qetam chi amaq'el keiwaj konojel ri qachalal ri e k'o pa ronojel ri Macedonia. Kixqab'ochi'j k'ut, qachalal, chi sib'alaj kiwaj ta na más iwib'. ¹¹ Chib'ana xuquje' chi kâjoror ri i k'aslemal, chib'ana taq ri i rajwaxik chijujunal, xaq minim iwib' pa taq ri kech nik'iaj chik. Chix-chakun ruk' ri i q'ab', chito' b'a' iwib', je' jas ri taqanik ri qa yo'm chiwe. ¹² Je ri' rech ri man e kojonelab' taj utz kâkil wi ri i k'aslemal, nim kixkilo, xuquje' rech k'o ronojel ri kajwataj chiwe.

Waral kâqil wi ri kâk'ulmataj na aretaq kâpe ri Qajaw Jesucristo

¹³ Man kâqaj tä k'ut, qachalal, chi mat kiwetamaj ri kâkik'ulmaj na ri kâminaqib', rech man je' tä ri i b'is jas ri ki b'is ri nik'iaj winaq chik ri man k'o tä ku'l wi ki k'ux. ¹⁴ Rumal chi kâqakojo chi ri Jesús xkâmik xuquje' xk'astaj b'i chixol ri kâminaqib', kâqakoj ri' chi pa ri k'astajib'al kech ri kâminaqib', aretaq kâpe ri Jesús, keuk'am na loq junam ruk' ri kanima' ri winaq ri e kojoninaq che, xekâmik.

¹⁵ Rumal ri' kâqaya wa' we tijonik ri' chiwe, ri yo'm chqe rumal ri Qajaw Jesús, chi ri uj ri k'ä uj k'asal na, ri k'ä uj kanajinaq waral aretaq kâpe ri Are', man kujnab'ej tä k'u na chkiwäch ri qachalal ri e kâminaq chik. ¹⁶ Tzare k'u ri Qajaw Jesús kâqaj na loq chikaj, kâtataj jun ri ko kâch'awik,

kuya taqanik, je' jas ri kâch'aw jun arcángel, xuquje' kâtataj na ru ch'ab'al ri trompeta re ri Dios. Are k'u ri e kojoninaq che ri Cristo, ri e kâminaq chik, e are' kek'astaj na b'ik nab'e. ¹⁷ K'ä te ri' ri uj ri k'ä uj k'aslik, ri uj kanajinaq kanoq, kujyak na, kujk'am na b'ik junam kuk' ri e are' pa ri sutz' churiqik ri Qajaw Jesús chila' chikaj. Kujk'oji k'u na ruk' ri Qajaw Jesucristo amaq'el ronojel q'ij. ¹⁸ Chiwalijisaj b'a' iwanima' chb'il taq iwib' ruk' we tzij ri' ri nu b'im chiwe.

5

¹ Are k'u ri q'ij, qachalal, ri ajilab'al ri kâb'antaj na ronojel wa', man rajwaxik taj chi kintz'ib'aj b'i chiwe. ² Je ri', rumal chi ri ix qas kich'ob'o chi man k'o tä jun retam ri q'ij ri kâpe ri Qajaw Jesús, xane je' kâk'ulmataj wa' jas ri kub'an jun elaq'om kok pa jun ja chaq'ab', man kuna' tä jun. ³ Aretaq ri winaq kâkib'ij: "Ronojel xaq kâjoror chik, man k'o tä chi je wa' je ri'," — kecha ri'. Are chi' k'ut kâpe na ri nimalaj k'äx pa ki wi' ri xaq k'ä te' kâpetik, jas ri q'oxom ri kuna' jun yawab' ixoq aretaq kâril u wäch ri ral. Man kekowin tä k'u ri winaq kâkito' kib'. ⁴ Are k'u ri ix, qachalal, man ix k'o tä pa ri q'equm ri e sachinaq wi ri man keniman tä che ri Dios. Ri q'ij ri kâpe ri Qajaw Jesús man je' taj kub'an ri' chikwe jas ri kub'an jun elaq'om ri man kina' taj kok pa ja, rumal chi ri ix tajin kiweyey ru petb'al ri Jesús. ⁵ Iwonojel ix k'o pa ri saqilal, ix rech ri paq'ij, je' jas ri uj xuquje'. Man uj rech tä ri chaq'ab', man uj sachinaq tä k'u pa ri q'equm. ⁶ Rumal ri' mäqa'n b'a' jas ri kaka'n ri nik'iaj winaq chik, je' ta ne chi xa e warinaq, xane chujk'ask'atoq. Mäqa'n xaq jas ri kâqaj uj, xane nab'e qas kâqachomaj na ri kâqa'no. ⁷ Ri kewarik, chaq'ab' ri' kewarik. Ri keq'ab'arik, chaq'ab' ri' keq'ab'arik. ⁸ Are k'u ri uj, ri uj rech ri paq'ij, mäqa'n xaq jas ri kâqaj uj, xane nab'e qas utz u chomaxik na ri kâqa'no. Rajwaxik chi kâqakoj na ri kojoniq xuquje' ri rutzil qanima', je' jas jun atz'iaq re ch'ich' ri kukoj jun soldado chuto'ik rib' pa ri ch'oj. Xuquje' rajwaxik chi kâku'b'i qa k'ux chi kâqariq na ru tob'anik ri Dios, je' ta ne chi are jun casco ri kukoj jun soldado che to'b'al u jolom. ⁹ Ri Dios k'ut man xujucha' taj rech xa kuk'äjisaj qa wäch, xane rech kujkojon che ri Qajaw Jesucristo, kâqariq na ru tob'anik ri Are'. ¹⁰ Ri Jesucristo xkâm rumal qech, rech amaq'el kujk'asi na junam ruk' Are'. We k'ä uj k'aslik aretaq kâpetik, we ne uj kâminaq chik, xaq junam. ¹¹ Rumal ri' chiwalijisaj iwanima' chb'il taq iwib', xuquje' chito'la iwib' ri jun ruk' ri jun chik jas ri tajin kib'ano.

Ri apóstol Pablo keupixb'aj ri qachalal kojonelab'

¹² Qachalal, kăqab'ij na chiwe chi nim kei-wil wi ri kechakun iwuk', ri kek'amow i b'e, xuquje' kăkiya i no'j ri yo'm chke ri e are' rumal ri Qajaw Dios. ¹³ Je', qachalal, sib'alaj nim cheiwila wi, loq' cheiwila xuquje', rumal ri utzil ri tajin kăka'no. Chk'ol b'a' utzil chixol iwonojel, ri jun ruk' ri jun chik.

¹⁴ Qachalal, xuquje' kixqab'ochi'j chi cheipixb'aj ri man kăkaj taj kechakunik, chiwalijisaj ri kanima' ri xaq keb'isonik, ri kăkixej kib', cheitoq'aj ri man k'o tă chi ki chuq'ab', chichajij paciencia kuk' konojel.

¹⁵ Chichajij iwib', k'o jun muya k'ăx che rajil u k'exel jun k'ăx ri b'anom che, xane amaq'el chitaqej u b'anik ri utzil chb'il taq iwib', xuquje' chke konojel winaq.

¹⁶ Amaq'el chixkikotoq. ¹⁷ Mitănab'a u b'anik orar. ¹⁸ Chiya maltioxinik che ri Dios pa ronojel, rumal chi are wa' ri kraj ri Dios chi je' kib'an ix, ri ix kojoninaq che ri Cristo Jesús.

¹⁹ Miq'atej u wăch ri Loq'alaj Espiritu che ri kraj kub'an iwuk'. ²⁰ Miwetzela'j u wăch ri tzij ri kuya ri Loq'alaj Espiritu chke ri qachalal ri keq'alajisan chiwăch. ²¹ Na'l kib'an che rilik ronojel, jachike ri utz, ri qas tzij, jachike ri man utz taj. Chitaqej b'a' ri utz. ²² Chitasa iwib' chrij ronojel u wăch etzelal.

²³ Tzare ta b'a' ri Dios, ri xuwi ri Are' kăkownik kuya utzil chkixol ri winaq, kub'an ch'ajch'oj che ri i k'aslemal pa ronojel, kuchajij ta na ri iwespirit, ri iwanima', xuquje' ri i cuerpo, rech man k'o tă etzelal kăriqtaj chiwij aretaq kăpe ri Qajaw Jesucristo. ²⁴ Ri Dios k'ut ri xixusik'ij, jikom ri ranima', qas kub'an na jas ru b'im chiwe.

Ri apóstol Pablo kutaq b'i rutzil ki wăch ri qachalal, xuquje' kuta' u tewchib'al ri Dios pa ki wi'

²⁵ Qachalal, chib'ana orar pa qa wi'.

²⁶ Chiya rutzil ki wăch konojel ri qachalal je wa'. Chitz'umaj iwib' chb'il taq iwib' chuwăch ri Dios. Retal k'u wa' chi qas loq' kiwil iwib'.

²⁷ Kinb'ij chiwe chuwăch ri Qajaw Jesús chi kisik'ij u wăch we wuj ri' chkiwăch konojel ri qachalal kojonelab'.

²⁸ Are ta b'a' ri Qajaw Jesucristo kătoq'ob'isan i wăch. Amén.

RI UKAB' CARTA RI XUTZ'IB'AJ RI SAN PABLO CHKE RI KOJONELAB' AJ TESALÓNICA

Ri apóstol Pablo kuchap u tz'ib'axik jun carta chik chke ri qachalal kojonelab' aj Tesalónica

¹ In wa', ri Pablo, wachi'l ri Silvano ruk' ri Timoteo, tajin kintz'ib'aj b'i we wuj ri' chiwe ix, qachalal, ix ri' ri kojonelab' ri k'o pa ri tinimit Tesalónica, ri xa ix jun ruk' ri Dios qa Tat xuquje' ri Qajaw Jesucristo. ² Are ta b'a' ri Dios qa Tat xuquje' ri Qajaw Jesucristo kutoq'ob'isaj i wäch, kub'an k'ut chi kuxlan ri iwanima'.

Waral käqil wi chi ri Dios kuq'at na tzij pa ki wi' ri ajmakib' aretaq käpe ri Cristo

³ Qachalal, rajwaxik b'a' chi ama'el kuj-maltioxin che ri Dios rumal iwech. Ya'talik chi je' käqa'n wa' rumal chi gas tzij tajin käk'iy ri i kojoniik, xuquje' rumal chi ri ix chijujunäl sib'alaj loq' na kiwil wi iwib' nimalaj iwonojel, ronojel q'ij k'ut tajin känimar ri rutzil iwanima' chb'il taq iwib'. ⁴ Je ri' chi ri uj sib'alaj kujkikotik, käqatzijoj ri i b'anik jawije' ri keriqtaj wi ri e kojoniinaq che ri Dios. Kujkikot chub'ixik jas ri tajin kib'ano, kich'ij ri k'äx ri käb'an chiwe kumal nik'iaj winaq chik, xuquje' kich'ij ri b'is ri kiriqo. Käqatzijoj k'ut chi sib'alaj k'o ri i kojoniik che ri Dios, jikom k'u iwanima' pa ronojel ri kik'ulmaj. ⁵ Ronojel war' wa' k'äx ri' ri tajin kiriqo kuk'ut chqawäch chi jikom kub'an ri Dios chuq'atik tzij. Je ri', rech taqal chiwe kixk'o'ji ruk' ri Dios, kätaqan k'u ri Are' pi wi'. Rumal k'u rech wa' tajin kiriq k'äx.

⁶ We winaq ri' ri tajin keb'anow k'äx chiwe, taqal k'ut chi käk'äjisax na ki wäch wa' rumal ri Dios. Kub'an k'u na ri Are' chi käkiriq k'äx chuk'exel ri xka'n chiwe. ⁷ Are k'u ri ix ri i riqom k'äx, kub'an na ri Dios chi kuxlan ri iwanima' junam jas ri kub'an chqej uj. Aretaq kuk'ut na rib' ri Qajaw Jesús, sutim rij ruk' u xaq q'ac' käqaj loq chikaj, e rachi'l ri ängeles rech Are' ri sib'alaj k'o ki chuq'ab'. ⁸ Aretaq käpetik, kuya na ri tojb'al ke ri winaq ri man xekojon tä che ri Dios, ri man xeniman tä che ri Utzalaj Tzije ri Evangelio chrij ri Qajaw Jesucristo. ⁹ We winaq ri' käkitoj na ru k'exel ri ki mak, käsach na ki wäch, sib'alaj nim ri k'äx ri käkiriqo, man k'o tä k'u u k'isik. Kesax b'i ri e are' chuwaäch ri Qajaw Jesús, naj keyi' wi na che ri Are'. Xuquje' naj kek'o'ji wi che ri je'lalaj juluwem rech ri nimalaj u chuq'ab' ri Jesús. ¹⁰ Je' käkik'ulmaj na wa' pa ri q'ij ri käpe ri Jesús rech känimarisax u q'ij kumal ri

e rech ri Are', xuquje' käkajmax na u wäch kumal ri e kojoniinaq che, käyi' k'u u q'ij. Ri ix xuquje', rumal chi ix kojoniinaq che ri tzij ri qa q'alajisam chiwäch, kixk'o'ji na kuk' ri nik'iaj kojonelab'.

¹¹ Xa k'u rumal wa' ama'el käqa'n orar pi wi', käqata' che ri qa Dios chi kub'ano chi gas taqal chiwe chi ix sik'im rumal ri Are'. Xuquje' käqata' che ri Dios chi ru chuq'ab' kuya ta na chiwe chi kixkowinik kib'an ronojel u wäch utzil ri i chomam u b'anik, xuquje' ronojel utzalaj chak ri tajin kib'ano rumal chi gas kixkojon che ri Dios. ¹² Je ri', rech rumal iwech ix käyi' na u q'ij ri Qajaw Jesucristo, xuquje' ri ix käyi' na i q'ij rumal ri Are'. Je' käb'an na wa' chiwe rumal chi toq'ob'isam i wäch rumal ri qa Dios, rumal ri Qajaw Jesucristo.

2

Waral käqil wi ri kub'an ri itzelalaj achi ri kuyak rib' chrij ri Dios

¹ Qachalal, käqaj käqab'ij chiwe ri käk'ulmataj na aretaq kuriq ru petb'al ri Qajaw Jesucristo, aretaq käpe che ga mulixik b'i ruk'. ² Kixqab'ochi'j chi mat ruk' jub'iq' kik'ex i chomanik, kub'an kieb' i k'ux, kixej iwib' rumal jun winaq ri kub'ij chi käch'aw ri Loq'alaj Espiritu pa ranima', k'o k'u jas kub'ij chiwe, o rumal ri kito chi kätzijoxik, o rumal jun wuj ri je' ta ne uj ri uj taqowinaq b'ik, ri kub'ij chi ri q'ij ri käpe ri Qajaw Jesús petinaq chik pa qa wi'. ³ K'o b'a' jachin jun winaq mub'ano chi kixsub'tajik. Nab'e k'ut chuwaäch ru petb'al ri Jesús käkiyak na kib' ri winaq chrij ri Dios, kuk'ut na rib' ri achi ri b'anal etzelal ri kub'an u k'ulel che ri Dios. We achi ri' q'atom tzij puwi' chi käsach na u wäch. ⁴ Ri achi ri' kuyak na rib', kub'an na k'ulel che ronojel ri käna'tab'ex wi ri Dios, o käq'ijilax wi. Käku'b'i na pa ri nimalaj rachoch Dios, je' ta ne chi are Dios. Kub'an na chb'il rib' chi are Dios.

⁵ Ä mat käna'taj chiwe chi aretaq xink'o'ji iwuk' xinb'ij wa' chiwe? ⁶ Kämik k'ut iwetam jas ri' ri q'ateninaq, je ri' chi man gas u k'utum tä rib' we itzelalaj achi kämik ri'. K'ä te k'u ri' gas kuk'ut na rib' ri b'anal etzelal aretaq kuriq ru q'ijol. ⁷ Q'alaj chi k'ut chi ri itzelalaj u chomanik ri itzel ri k'u'talik tajin kächakun chik pa taq ri kanima' ri winaq kämik. Xuwi reye'm chi kesax ri q'ateninaq rech gas kuk'ut rib'. ⁸ Aretaq k'ut esam chik ri q'ateninaq, kuk'ut na rib' ri achi ri b'anal etzelal ri kuyak na rib' chrij ri Dios. Käkämisax na rumal ri Qajaw Jesús ruk' ri ruxlab', käsachisax na u wäch ruk' ru k'utik rib' ri Jesús aretaq käpetik. ⁹ We achi ri', are ri Satanäs kätaqow na loq. Käpe na ruk' nimalaj chuq'ab', kub'an na nimaq taq

k'utb'al, xuquje' kajmab'al. Man gas tzij tä k'ut ri kub'ano. ¹⁰ Kuko'j na ronojel u wäch itzel taq sub'unik che ki sub'ik ri winaq ri käsach na ki wäch. Käsach na ki wäch rumal chi man xkaj tä ri gas tzij, man xkik'amowaj tä k'u wa' rech käkiriq ru tob'anik ri Dios. ¹¹ Rumal ri' ri Dios kuya na chke chi ke-sub'taj rumal ri man gas tzij taj, chi ri e are' kekojon chke ri b'anow tzij. ¹² Je ri' rech käk'at na tzij pa ki wi' chi käk'äjisax na ki wäch konojel ri man e kojoninaq tä che ri gas tzij, xane are b'enaq kanima' ruk' ru b'anik ri etzelal.

Waral káb'ix wi chke ri qachalal chi e cha'talik rech käkiriq ru tob'anik ri Dios

¹³ Qachalal, ri ix sib'alaj kixraj ri Qajaw Jesucristo. Ri uj k'ut káqana' pa qanima' chi rajwaxik káqaya maltioxinik amaq'el che ri Dios rumal iwech, rumal chi tzojer loq ix k'o chkixol ri xecha' nab'e rumal ri Dios rech kiriq ru tob'anik. Kiriq k'u ru tob'anik ri Dios rumal ri Loq'alaj Espíritu ri xub'an ch'ajch'oj che ri iwanima', xuquje' rumal chi xixkojon che ri gas tzij. ¹⁴ Ri Dios k'ut xixusik'ij rech kiriq ru tob'anik ri Are' rumal ri Utzalaj Tzij re ri Evangelio ri xqatzijoj chiwe, rech kixk'o'ji junam ruk' ri Qajaw Jesucristo aretaq kánimarisax u q'ij ri Are', kiriq k'u na iwe ix we nimarisab'al q'ij ri'.

¹⁵ Rumal ri', qachalal, jikom chib'ana' chitagej ri tijonik ri qa k'utum chiwe petinaq loq. Are wa' ri qa tzijom chiwe, xuquje' ri qa tz'ib'am b'i pa taq wuj. ¹⁶ Tzare ta b'a' ri Qajaw Jesucristo, junam ruk' ri Dios qa Tat, ru k'utum ri rutzil ranima' chqe, kixuto' pa ronojel. Ri Are' xuquje' xuya ku'lb'al qa k'ux ri man k'o tä u k'isik, xuya xuquje' chqe chi kaku'b'i qa k'ux chrij ri Jesús rumal ri toq'ob' ri kub'an pa qa wi'. ¹⁷ Tzare ta b'a' ri Are' chuwaljisaj ri iwanima', xuquje' chub'ana ta na jikom chiwe, rech xa utz ronojel ri kib'ij, xuquje' ronojel ri kib'ano.

3

Ri apóstol Pablo kuta' chke ri qachalal chi káka'n orar puwi' ri are'

¹ Je k'u ri', qachalal, chib'ana orar pa qa wi' rech ru Loq' Pixab' ri Dios aninaq kájab'un u wäch pa ronojel tinimit, käyi' k'u u q'ij kumal ri winaq jas ri xk'ulmataj iwuk' ix. ² Xuquje' chib'ana orar pa qa wi' chi ri Dios kujuto' pa ki q'ab' ri itzel taq winaq, ri e b'anal taq etzelal, rumal chi man konojel taj kekojon che ru Loq' Pixab' ri Dios.

³ Ri Dios k'ut, gas jikom ranima'. Kub'an na chiwe chi k'o na i chug'ab' rech gas jikom ri iwanima' ix xuquje'. Kixuchajij na chuwach ri Itzel. ⁴ Kaku'b'i k'u qa k'ux chrij ri Qajaw Jesús chi tajin kib'an ri xixqataq wi, xuquje' amaq'el kitagej na u b'anik wa'. ⁵ Are ta b'a' ri Qajaw Jesús käyo'w pa ri

iwanima' chi keiwaj konojel, je' jas ri Dios keraj konojel ri winaq. Xuquje' chuya ta chiwe chi kich'ij ronojel ri kápe chiwij, chi k'o iwe ri paciencia ri k'o ruk' ri Cristo.

Waral káqil wi chi rajwaxik kujchakunik chuch'akik ri káqatjo

⁶ Káqaya k'u taqanik chiwe, qachalal, rumal ri Qajaw Jesucristo, chi kitas iwib' chrij apachin jun qachalal ri kub'ano xa jachike ri kraj, man káchakun taj, ri man kunimaj tä ri tijonik ri qa yo'm chiwe petinaq loq. ⁷ Ri ix iwetam chik jas ri rajwaxik kib'ano rech kib'an iwe jas ri xqa'n u aretaq xujk'o'ji iwuk'. Aretaq xujk'o'ji iwuk' man are tä xqa'no xa jachike ri xqaj, xane xujchakunik. ⁸ Man xqab'ij tä che jachin jun chi chusipaj ri qa wa, xane xqatojo. Sib'alaj xqatij qa chuq'ab' che ri qa chak, xujkosik. Chi paq'ij chi chag'ab' xujchakunik rech man káqaya tä latz' che jachin jun chiwe. ⁹ Pune ta ne ya'tal chqe káqata' ri qa wa chiwe, man je' taj xqa'no, xane xujchakunik rech kiwesaj i no'j chqij, kib'an k'u iwe jas ri xqa'n u. ¹⁰ Xuquje' xqab'ij wa' chiwe aretaq xujk'o'ji iwuk': "Jachin jun ri man kraj taj káchakunik, mäyi' che chi káwi'k," —xujcha chiwe. ¹¹ Qa tom k'u u tzijol chi e k'o jujun chiwe ri tajin káka'no xa jachike ri kákaj, ri man k'o tä jub'iq' chak káka'no, xane xa keb'e' je wa' je ri', kákinim kib' pa taq ri tajin káka'n ri nik'iaj winaq chik. ¹² Are k'u taq wa' káqab'ij chke ri kojonelab' ri je' káka'no, keqapixb'aj rumal ri Qajaw Jesucristo chi chechakunoq, mák'a'n chik ri k'áx chkixol ri winaq rech káyoron na ronojel, chchik'aka ke ri kákitiyo.

¹³ Ri ix k'ut, qachalal, mixq'iytaj chub'anik ronojel u wäch utzil. ¹⁴ We k'o jachin jun ri man kunimaj tä ri xqab'ij pa we wuj ri', chikojo retal jachinoq, miwachi'laj chik rech kák'ixik. ¹⁵ Mib'an k'u i k'ulel che, xane chipixb'aj je' jas ri kib'an che jun iwachalal.

Ri apóstol Pablo kuta' ru tewchib'al ri Dios pa ki wi' ri qachalal

¹⁶ Tzare ta b'a' ri Qajaw ri xuwi ri Are' kákowinik kuya utzil chkixol ri winaq, chuya ta chiwe chi amaq'el k'o utzil iwuk' ix, xuquje' chi kuxlan ri iwanima' pa ronojel. Are ta b'a' ri Qajaw Jesucristo k'o iwuk' ix nimalaj iwonojel.

¹⁷ In wa', ri Pablo, kintz'ib'aj b'i wa', kintaq k'u b'i rutzil i wäch. Chiwilampe' chi are wa' ri nu tz'ib'. Je wa' ri kinb'an chutz'ib'axik ri nu b'i' pa taq konojel ri nu wuj ri kintaq b'ik. ¹⁸ Are ta b'a' ri Qajaw Jesucristo kátoq'ob'isan i wäch ix nimalaj iwonojel. Amén.

RI NAB'E CARTA RI XUTZ'IB'AJ RI SAN PABLO CHE RI TIMOTEO

Ri apóstol Pablo kuchap u tz'ib'axik jun carta che ri qachalal Timoteo

¹ In wa', ri Pablo, in apóstol. In jun chke ru taqo'n ri Jesucristo. Je wa' nu b'anik rumal chi je ri' ru taqanik ri Dios ri To'l Qe, xuquje' ri Qajaw Jesucristo ri ku'l wi qa k'ux. ² Ri at, Timoteo, kintz'ib'aj b'i we wuj ri' chawe, je' ta ne chi gas at nu k'ojol rumal chi rumal ri nu tzij xatkojonik. Are ta ri Dios qa Tat xuquje' ri Qajaw Jesucristo kel u k'ux chawe, kutoq'ob'isaj a wäch, kub'ano chi kuxlan rawanima'.

Mak'ulaj jule' taq tijonik chik

³ Kinna'taj chawe jas ri ximb'ij aretaq xine' pa Macedonia. Ximb'ij chawe chi katkanaj kan pa ri tinimit Éfeso. Xinya we taqanik ri' chawe chi kab'ij chke ri jule' winaq, ri tajin käkiya tijonik ri man tzij taj chke ri kojonelab', chi mäkiya chik we tijonik ri'. ⁴ Chab'ij chke chi mäkitzijo chik ri xaq puk, xuquje' ri tzijob'elil ri kätzijo chik ri qa nan qa tat ojer. Ronojel wa' kuk'am loq ch'oj. Man k'o tä k'u ki patän wa' we ri', man kujkito' tä chuch'ob'ik ru chomanik ri Dios ri xuwi ketamax rumal ri kojonik che ri Cristo.

⁵ Ru patän we taqanik ri' ri kinya chawe, are wa' chi ri uj, ri uj kojonelab' gas keqaj konojel. Rajwaxik chi käk'iy loq wa' pa qanima' ri ch'ajch'oj, ri käqana' wi chi man k'o tä etzelal qa'nom, ri q'alaj wi chi gas tzij kujkojonik. ⁶ E k'o k'u jujun ri xkisach ru b'eyal we taqanik ri', xetzaq k'ut. Xkijach kib' chub'ixik tzij chb'il taq kib' ri man k'o tä ki patän. ⁷ Ri winaq ri' käkaj keb'ok che ajtijab', kekittijoj ri winaq chrij ri Pixab' ri xutz'ib'aj ri qa mam Moisés. Man käkich'ob' tä k'ut ri tzij ri käkib'ij, man käkich'ob' tä k'u ri käkik'utu. Xaq käkib'ij chi are ri gas tzij.

⁸ Tzij la' chi utz ri Pixab' ri xutz'ib'aj ri qa mam Moisés. Rajwaxik k'ut chi käkojik jas ri gas ya'tal wi. ⁹ Etamtal wa' chi ri Pixab' man xyl' tä chke ri winaq ri tajin käkä'n ri utzil, xane chke ri man käkiya tä kib' pa taqik, chke ri man keniman taj, chke ri man kekojon tä che ri Dios, chke ri ajmakib', chke ri man nim tä käkil wi ri Dios, ri man k'o tä äwas chkiwäch, chke ri kekikämisaj ki nan ki tat, chke ronojel ki wäch kämisanelab'. ¹⁰ Xuquje' ri Pixab' xyl' chke ri winaq ri xaq käkiriq kib' jas ri käkä'n ri tz'í, man k'o tä ki pixab'. Are k'u xyl' ri Pixab' chke ri käkä'n ixoq che jun kach achi, xuquje' chke ri ixoq-qib' ri käkä'n achi che jun kach ixoq, chke ri kekelaj'aj taq winaq, chke ri b'anal taq

tzij, xuquje' chke ri käkä'n juramento, man gas tzij tä k'ut ri käkib'ij, rech käkä'n k'äx che jun winaq chik. Are k'u ri Pixab' xyl' chke konojel winaq ri käkik'ulelaj u wäch ri utzalaj tijonik ri man k'o tä etzelal chupam. ¹¹ We utzalaj tijonik ri' käriqtaj chupam ri Utzalaj Tzij re ri Evangelio ri sib'alaj nim u q'ij. Ri qa Dios ri ya'tal che chi känimarisax u q'ij, are ri Are' yo'winaq wa' pa nu q'ab' rech kintzijo chke ri winaq.

Ri apóstol Pablo kumaltioxij che ri Dios chi xel u k'ux che, xukoj chutzijoxik ri Utzalaj Tzij re ri Evangelio

¹² Kinmaltioxin che ri Qajaw Jesucristo ri u yo'm nu chuq'ab', rumal chi nim xrilo chi jikom ri wanima', xinukoj che patänil re chutzijoxik ru Loq' Pixab'. ¹³ Je wa' xub'an chwe pune ri in nab'e xinyoq'on che ri Jesús, xintze'j u wäch, ximb'an k'äx chke ri e kojoni-naq che. Ri Dios k'ut xel u k'ux chwe rumal chi aretaq ximb'an wa' k'ä mäja' kinkojon che ri Cristo, man kinch'ob' tä k'ut chi man utz taj ri kinb'ano. ¹⁴ Sib'alaj nim k'u ri' ri toq'ob' ri xinkochij che ri Qajaw Jesús. Xuya nu kojonik, xuya pa wanima' chi kinwaj ri Dios, xuquje' chi kewaj ri winaq xa rumal ri Cristo Jesús.

¹⁵ Ri kinb'ij chanim are gas tzij. Rajwaxik k'ut chi konojel winaq käkikoj wa': chi ri Cristo Jesús xpe cho we uwächulew che ki to'ik ri ajmakib'. Ri in k'ut, sib'alaj in ajmak na chkiwäch konojel. ¹⁶ Pune je' nu b'anik wa', xel u k'ux ri Dios chwe, xutoq'ob'isaj nu wäch rech ri Jesucristo kuk'ut na jas modo kuchajij nimalaj paciencia wuk' in, in ri nab'e ajmak chkiwäch konojel. Je ri' kink'oiji che k'utb'al chkiwäch ri mäja' kekojonik, käketamaj na chi ri Cristo kutoq'ob'isaj ki wäch ri winaq. Käku'b'i k'u na ki k'ux chi käkiriq na ri k'aslemal ri man k'o tä u k'isik we kekojonik. ¹⁷ Rumal ri' qaya b'a' u q'ij ri Jun ri kätaqan pa qa wi', ri man käk'extaj taj, ri man käkäm taj, ri man kilittaj tä u wäch, ri xuwi wa' Dios k'olik. K'o k'u u no'j che ronojel. Qanimarisaj b'a' u q'ij amaq'el pa taq ri q'ij ri junab' ri kepetik. Amén.

¹⁸ Ri at, Timoteo, je' ta ne chi at nu k'ojol. Kinya wa' we taqanik ri' chawe. Chatija a q'ij pa ri chak chutzijoxik ru Loq' Pixab' ri Dios, xuquje' chupatanixik pa ronojel. Je' chab'ana' jas ri xkij'alajisaj loq ri qachalal chawij rumal ri Loq'alaj Espíritu. ¹⁹ Chataqej ri kojoniq, rajwaxik chi kana' pa rawanima' chi man k'o tä etzelal a b'anom. E k'o k'u jujun ri man xeniman taj aretaq xch'aw ri Dios pa ri kanima', rumal ri' xetzaqik, man kekojon tä chik. ²⁰ Qesajmpe' qa no'j chrij ri xuk'ulmaj ri Himeneo xuquje' ri Alejandro, ri xejnach pu q'ab' ri Satanás rech käketamaj chi man utz tä ri' ri käkib'ij ri äwas u b'ixik chrij ri Dios.

2

Waral käyi' tijonik chrij ri rajwaxik
kâqa'no aretaq kâqa'n orar

¹ Nab'e kwaj kinb'ij chawe chi kaya we tijonik ri' chke ri kojonelab'. Rajwaxik u b'anik orar pa ki wi' konojel ri winaq. Rajwaxik kâta' toq'ob' pa ki wi', xuquje' kâb'ochi'x ri Dios pa ki wi'. Xuquje' rajwaxik u b'anik maltioxinik che ri Dios aretaq kâb'antaj orar. ² Rajwaxik u b'anik orar pa ki wi' ri q'atal taq tzij, pa ki wi' konojel ri k'o ki taqanik pa qa wi', rech man k'o tâ ch'oj, utz ri qa k'aslemal. Je ri' rech kâqapatânij ri Dios, xuquje' nim kâqil wi' qib' pa ronojel. ³ Sib'alaj utz k'u u b'anik wa', xuquje' kâqaj wa' chuwäch ri Dios ri To'l Qe. ⁴ Are k'u kraj ri Dios chi konojel ri winaq kâkiriq ru tob'anik, xuquje' kâketamaj jas ri' ri qas tzij. ⁵ Xa jun ri Dios k'olik, xuquje' xa jun ri kâch'aw pa qa wi' ruk' ri Dios. Are ri Jesucristo ri xub'an qach winaq. ⁶ Ri Jesucristo xuya rib' pa kâmisaxik chutojik ri qa mak, rech ri uj nimalaj gonojel kujel pu q'ab' ri Itzel. Pa ri qas u q'ijol k'ut, ri Dios xuk'ut wa' chkiwäch konojel winaq chi qas tzij kraj keuto'. ⁷ Rumlal wa' xinoksax che apóstol, jun chke ru taqo'n ri Jesucristo, rech kintzijoje we saqalaj tzij ri' chrij ri qas tzij, chrij ri kojonik. Je ri' keintijoj ri man e aj Israel taj, rech kekojon ri e are'. Ri in, in kojoninaq che ri Cristo, qas tzij ri kinb'ij, man xaq tâ k'u kinb'an tzij.

⁸ Kwaj chi ri achijab' pa ronojel tinimit kâka'n orar, achijab' ri qas jikom ri kanima' che ri Dios. Are achijab' wa' ri kuya' kâkiyak ri ki q'ab' cho ri Dios, man k'o tâ ch'oj, man k'o tâ oyowal, man k'o tâ k'u jun k'âx chik pa kanima'. ⁹ Xuquje' kwaj chi ri ixoqib' kâkikoj atz'iaq ri qas taqal chke, utz u kojik kâka'no, man kâka'n tâ nimal ruk'. Rajwaxik utz u b'anik ri ki wi' kâka'no jas ri qas taqalik. Man xaq tâ kâkiwiq kib' ruk' q'ân puag, ruk' chachal ri paqal rajil, o ruk' atz'iaq ri sib'alaj paqalik. ¹⁰ Ri ixoq konojel man kuwiq tâ rib' xa kuk' taq jastaq, xane ruk' ru b'anik ri utzil. Are wa' ri rajwaxik kâka'n ri ixoqib' ri ki jachom kib' pu q'ab' ri Dios. ¹¹ Rajwaxik chi ri ixoqib' kâkitatâb'ej ri tijonik ri tajin kâtziroxik, xaq jun chek'ol wi, chkiya kib' pa nimanik. ¹² Ri in man kinya tâ che jun ixoq chi keutijoj achijab', chi kâtaqan pa ki wi', xane rajwaxik xaq jun kek'oji wi ri ixoqib'. ¹³ Are k'u rumal chi nab'e xb'an ri Adán rumal ri Dios, kâ te ri' xb'an chi ri Eva. ¹⁴ Xuquje' man are tâ ri Adán ri xsub' rumal ri Itzel, xane are ri Eva. Aretaq xsub'ik xqaj pa ri mak. ¹⁵ Ri ixoqib' kojonelab' kâkiriq k'u na ru tob'anik ri Dios, we utz kâka'n che

ki k'iysisaxik ri kal, we kâkitaqej ri kojonik, we kekaj ri winaq, we utz ri ki k'aslemal, man k'o tâ etzelal kâka'no, xuquje' we utz kechomanik.

3

Waral kâb'ixik jas ri k'aslemal ri rajwaxik
che jun ri kok che obispo

¹ Qas tzij wa': jachin jun ri kraj kok che obispo,* utzalaj patâninik ri' ri kraj kub'ano. ² Rajwaxik k'ut chi we kojonel ri' utz ru k'aslemal rech man kuya' taj kâyak tzijtal chrij. Rajwaxik xa jun ri rixoxil, muya u wi' ri kutijo, o apachike ri kub'ano, xane utz ri kâchomanik, man kub'an taj xa jas ri kraj ri are', xuquje' nim kil wi' kumal ri winaq. Rajwaxik utz kub'an che ki k'ulaxik ri winaq ri keopan cho rachoch. Rajwaxik kâna'w che ki tijoxik ri winaq che ru Loq' Pixab' ri Dios. ³ Mâq'ab'arik, mâch'ojinik, man kurayij tâ u ch'akik puag ri k'ixb'al u k'amik, xane rajwaxik utz kuk' ri winaq, man kuyak tâ ch'oj, xuquje' man loq' tâ kâril wi ri puag. ⁴ Rajwaxik kerilij konojel ri e k'o pa rachoch, keupixb'aj ri ralk'ual rech kenimanik, nim kekil wi ri winaq. ⁵ We jun kojonel man retam taj kerilij konojel ri e k'o pa rachoch ja kâkowin lo ri' kuk'am ki b'e ri e kojoninaq che ri Dios? Man kâkowin taj. ⁶ Man kuya' taj jun k'ak' kojonel kok che obispo, rech man kunimarisaj tâ rib'. We je ri', kâq'at na tzij ri' puwi' chi ke' pa ri q'aq' jas ri xb'an che ri Itzel. ⁷ Jun obispo rajwaxik utz kub'an pa ru k'aslemal chkixol ri winaq ri man e kojonelab' taj, rech man k'o tâ yoq'b'al re. Je ri' man kel tâ u k'ixb'al, man kâqaj tâ k'u pa ru chapâb'al ri Itzel.

Waral kâqil wi jas ri k'aslemal ri ra-
jwaxik che jun ri kok che diácono

⁸ Ri diáconos† xuquje', rajwaxik man xaq tâ kexi'ninik, rech nim ke'il wi, kâkib'ij ri qas tzij, man kek'ab'ar taj, man kâkiriayij tâ k'u u ch'akik puag ri k'ixb'al u k'amik. ⁹ Rajwaxik qas jikom ri kanima' chrij ri qas tzij re ri Evangelio ri uj kojoninaq wi, ri q'alajisam chqawäch. Xuquje' rajwaxik kâkina' pa kanima' chi man k'o tâ etzelal ri ka'nom. ¹⁰ Nab'e rajwaxik ke'il na we utz ri ki k'aslemal. We k'u man k'o tâ jas kâriqtaj chikij, kuya' ri' keb'ok che diáconos. ¹¹ Xuquje' ri diaconisas rajwaxik man xaq tâ kexi'ninik, rech nim ke'il wi, man e yakal tâ tzijtal, mâkiya u wi' ri kâkittijo, o apachike ri kâka'no, jikom k'u ri kanima' pa ronojel. ¹² Ri kok che diácono rajwaxik xa jun ri rixoxil. Xuquje' rajwaxik chi utz kub'an che kilixik konojel ri e k'o pa rachoch, keupixb'aj ri ralk'ual rech kenimanik. ¹³ Ri diáconos ri

* 3:1 Ri tzij "obispo" kel kub'ij "pastor" o apachin jun ri käyi' che chi kuchajij ri jumulaj kojonelab'. † 3:8 Ri diáconos (xuquje' ri diaconisas, 3:11) e are' ri k'o keqle'n che ki to'ik ri nik'iaj kojonelab'.

utz kepatäninik, nim ke'il wi ri'. Man xuwi taj nim ke'il wi, xane xuquje' man kâkixej tâ kib' chutzijoxik ri ki kojoniq chrij ri Cristo Jesús.

Nim u b'anik ri uj kojoniq che

¹⁴ Timoteo, ku'l nu k'u x chi xaq pa kieb' oxib' q'ij kinopan na awuk'. We k'u ne ruk' jub'iq' kinb'eytajik, kintz'ib'aj b'i we tzij ri' chawe nab'e. ¹⁵ Je wa' xinchomaj rech awetam chik jas ri utz kub'an jun kojoniq chixol ri qachalal. E are wa' ri winaq rech ri k'aslik Dios. We winaq ri' e are wa' ri kâkijeqeb'a', xuquje' kâkito' u wi' ri qas tzij. ¹⁶ Qas q'alaj wa' chi nim u b'anik ri qas tzij re ri Evangelio ri uj kojoniq wi, jas ri kub'ij we tzij ri'.

Ri Dios xul cho we uwächulew

je' jas jun winaq,

xq'alajisax rumal ri Loq'alaj Espiritu

chi jikom ru k'aslemal,

xilitaj k'u ri Are' kumal ri ángeles.

Xtzijox wa' chke ri winaq,

xekojon ri winaq che cho ruwächulew,

xk'am chi na b'ik pa ri kaj,

xnimarisax u q'ij,

—kâcha'.

4

E k'o kojoniq lab' ri kâkitas na kib' chrij ri qas kojoniq

¹ Ri Loq'alaj Espiritu qas chi saqil kub'ij chi pa ri k'isb'al taq q'ij jujun kojoniq lab' kâkitas na kib' chrij ri qas kojoniq. Ke' na kanima' ruk' ri itzel no'j ri kesub'taj rumal. Ronojel wa' xaq are' ki tijoniq itzel taq espiritus. ² Kâkitatab'ej na ri ki tijoniq achijab' ri e b'anal taq tzij, ri xaq kâkesaj ki wäch ri ketzijon ru Loq' Pixab' ri Dios. We winaq ri' man kâkina' tâ chik pa kanima' ri etzelal ri kâka'no, je' ta ne chi ab'ajarinaq chi ri kanima'. ³ Kâkib'ij na chke ri winaq chi man kuya' taj kek'uli'k, kâkib'ij na xuquje' chi e k'o jujun taq u wäch ri kâqatijo ri áwas u tijik, pune ri Dios u k'iyisam ronojel wa' rech kâqatijo. Ri uj, ri uj kojoniq lab', ri qetam ri qas tzij kuya' kâqatij wa' ruk' maltioxinik. ⁴ Je ri', rumal chi utz ronojel ru k'iyisam ri Dios, man kuya' tâ k'ut kâqetzelaj u wäch, xane rajwaxik kâqak'amo, kâqamaltioxij wa' che ri Dios. ⁵ Kâteuwxitaj k'u wa' rumal ru Tzij ri Dios, xuquje' rumal ri oración ri kâqa'no. Je ri' ri kâqatijo man áwas taj.

Waral kâqil wi jas u b'anik jun utzalaj patânil re ri Jesucristo

⁶ Ri at, Timoteo, we kak'ut wa' we nu b'im chawe chkiwäch ri qachalal, at jun utzalaj patânil re ri Jesucristo. Kâk'oji k'u na a chuq'ab' rumal ru Loq' Pixab' ri Dios ri at kojoniq wi, rumal ri utzalaj tijoniq ri a taqem. ⁷ Me' awanima' kuk' taq ri puk ri man k'o tâ ki patân ri kâkitzijoj ri winaq.

Are chakojo a chuq'ab' chupatänixik ri Dios. ⁸ Ru kojik qa chuq'ab' ruk' ri qa cueroq xaq jub'iq' kujuto' wi. Are k'u ru patänixik ri Dios kujuto' na pa ronojel. K'o utzil kâqariq rumal wa' pa we k'aslemal ri' cho ruwächulew, xuquje' pa ri k'aslemal ri kâpe na. ⁹ Qas tzij wa' ri kinb'ij, rajwaxik k'ut chi konojel winaq kâkikojo. ¹⁰ Xa rumal wa' sib'alaj kâqatij qa q'ij kujchakunik, kâqariq yoq'b'al qe, rumal chi ku'l qa k'u x chrij ri k'aslik Dios, ri To'l Ke konojel winaq. Jachin k'u taq ri kekojon che, e are' ri qas kâkiriq ru tob'anik.

¹¹ Chak'utu b'a' ri nu b'im chawe chkiwäch ri qachalal kojoniq lab'. Chab'ij chke chi chketamaj. ¹² Metzelaq a wäch kumal ri winaq rumal chi at ak'al na. Rech man ketzelaq tâ a wäch, chak'utu jun utzalaj k'aslemal chkiwäch ri kojoniq lab', rech kâkito chi utz katch'awik, kâkilo chi utz ri kab'an pa ronojel, keawaj ri winaq, utz awanima' chke konojel, q'alaj chi qas tzij at kojoniq che ri Cristo, utz ra k'aslemal. ¹³ Chasik'ij apan ru Loq' Pixab' ri Dios ri Tz'ib'talik chkiwäch ri qachalal k'â kinopan na iwuk'. Cheapixb'aj, cheatijoj. ¹⁴ Nim chawila wi ri kuinem ri xsipax chawe rumal ri Dios aretaq ri Loq'alaj Espiritu xch'aw pa kanima' ri k'amal taq ki b'e ri kojoniq lab'. Xkiq'alajisaj k'u wa' aretaq xkiya ri ki q'ab' pa wi'. Chakojo wa' we kuinem ri', maya k'u kanoq.

¹⁵ Chakojo a chuq'ab' chub'anik ri nu b'im chawe. Chatija a q'ij chub'anik wa' rech konojel kâkilo chi utz na ri tajin kab'ano. ¹⁶ Chachajij awib'. Xuquje' qas kawil na jas u wäch tijoniq ri kaya'. Chataqej u b'anik ronojel wa', jikom rawanima'. We je' kab'an wa', kato' na awib' at xuquje' ri ketatab'en ri a tzij.

5

Jas ki ch'ab'exik ri qachalal rajwaxik kâqa'no

¹ Mayaj jun tata' ri nim winaq chik, xane chapixb'aj je' ta ne chi are ra tat. Cheapixb'aj ri alab'om je' ta ne chi e are' ra chaq'. ² Ri chuchuib' cheapixb'aj je' ta ne chi are ra nan ri kapixb'aj. Ri alitomab' cheapixb'aj je' ta ne chi e are' ra wanab', utz ra chomanik chkiq.

³ Nim cheawila wi ri malka'nib' ixoqib', chab'ana k'u toq'ob' chke ri qas k'o ki rajwaxik. ⁴ Are k'u ri malka'n ixoq ri e k'o ral, xuquje' we ne e k'o u wi' taq u mam, nab'e ri' rajwaxik chi ri ak'alab' nim kekil wi ri ki nan xuquje' ri kati't. Ri alk'ualaxelab' rajwaxik kâketamaj u tojik u k'exel chke ri ki nan ki tat ri utzil ri xb'an chke aretaq xek'iyisaxik, rumal chi utz kâril wi ri Dios wa', xuquje' kâqaj wa' chuwäch. ⁵ Are k'u

ri ixoq ri qas tzij malka'n, ri kanajinaq kan u tukiel, ri man k'o tä käch'aw u k'ux che, ku'l k'u u k'ux wa' chrij ri Dios. Kub'an orar ri', kuta' ru tob'anik ri Dios pa ru k'aslemal ronojel q'ij chi paq'ij chi chaq'ab'. ⁶ Are k'u ri malka'n ixoq ri kujach rib' chub'anik xaq jachike ri utz käril wi, pune k'aslik, chuwäch k'u ri Dios are jas jun käminaq, rumal chi man k'o tä chik ru rayinik chupatänixik ri Dios. ⁷ Cheataqa we qachalal ri' chunimaxik wa' we nu b'im chawe rech man k'o tä tzij káb'ix chikij chi qas tzij k'o ri man utz taj ri kaka'no. ⁸ We k'u k'o jun kojonel ri man kok tä il che ki to'ik ri rachalaxik, o ri ralk'ual, man qas tzij tä ri' chi kojonel. Nim na ru mak ri' chuwäch jun ri man k'o tä jumul ri kojoninaq.

⁹ Xuwi ri malka'n ixoq ri k'o chi oxk'al u junab', ri xa jun ri rachajil k'olinaq, xuwi ri' kuya' kätz'ib'ax u b'i' pa ri wuj ri tz'ib'tal wi ki b'i' ri malka'nib'. ¹⁰ Rajwaxik chi we chichu' ri' etamtalik chi u b'anom utzil, utz ki k'iyisaxik ri ral u b'anom, utz u b'anom che ki k'ulaxik ri keopan cho rachoch, u ch'ajom kaqan ri e rech ri Dios, e are wa' ri kojonelab'. Xuquje' u b'anom toq'ob' chke ri käkiriq k'äx, u b'anom k'u ronojel u wäch utzil.

¹¹ Are k'u ri malka'nib' ixoqib' ri k'ä e ak'alab' na, matz'ib'aj ri ki b'i' pa ri wuj ri tz'ib'tal wi ki b'i' ri malka'nib' rumal chi aretaq ketaqchi'x rumal ri ki rayinik, käkitas kib' chrij ri Cristo, man käkinimaj tä chik, käkaj kek'uli chi na jumul chik. ¹² Kemakun k'u ri' rumal chi man xka'n taj jas ri xkichi'j u b'anik, xkiya k'u kan ri ki kojoniq. ¹³ Man xuwi tä wa' kaka'n ri malka'nib' ixoqib' ri k'ä e ak'alab' na, xane xuquje' xaq kesaq'orinik, xaq kewakatalob' chi taq ja. Man xuwi taj kesaq'orinik, xane xuquje' käkiyak taq tzijtal, käkinim kib' pa ronojel, käkib'ij taq tzij ri man ya'tal tä ki b'ixik. ¹⁴ Rumal ri' kwaj chi ri malka'nib' ixoqib' ri k'ä e ak'alab' na kek'uli chi na jumul chik, kekik'iyisaj kal, käkiliy ri kachoch, rech ri winaq ri kujik'ulelaj man käkiriq taj jas käkib'ij chqij. ¹⁵ E k'o k'u jujun malka'nib' ri ki tasom chi kib' chrij ri Cristo, xeb'e' ruk' ri Satanás.

¹⁶ We k'o jun kojonel, we achi we ixoq, ri e k'o malka'nib' ixoqib' chikxol ri rachalaxik, rajwaxik kuya ri kajwataj chke, man kuya tä wa' chikij ri nik'iaj kojonelab' chik, rech ri qachalal kojonelab' kekowinik kekito' ri malka'nib' ixoqib' ri qas tzij k'o rajwaxik chke.

¹⁷ Ri k'amal taq ki b'e ri kojonelab' ri utz kaka'n chuk'amik ki b'e ri qachalal, taqal ri' chke chi sib'alaj nim ke'il wi. Are k'u más nim ke'il wi na ri käkitzijo ru Loq' Pixab' ri Dios, käkiya tijonik chke ri qachalal. ¹⁸ Je ri', rumal chi kub'ij ru Loq' Pixab' ri Dios ri Tz'ib'talik: "Makoj chim chutza'm ri wakäx

aretaq tajin kuyaq' ri triko," —kächa ri'. Xuquje' kub'ij: "Taqal che ri ajchak chi kätojik," —kächa'.

¹⁹ Matatab'ej ri tzij ri káb'ix chrij jun k'amal ki b'e ri kojonelab' we man e k'o kieb', we man e k'o oxib' ri keq'alajisanik chi k'o jas ri man utz taj ri sub'ano. ²⁰ Are k'u ri käkitaqej makunik, cheayaja' chkiwäch konojel ri kojonelab', rech xuquje' ri nik'iaj chik käkina' kib'. ²¹ Chuwäch ri Dios, chuwäch ri Qajaw Jesucristo, xuquje' chkiwäch ri ángeles rech ri Dios ri e cha'talik, katinpixb'aj chi kataqej ri nu b'im chawe. Aretaq kab'an wa', junam cheawila wi ri winaq, k'o jun más loq' mawil wi. ²² Aretaq kaya ra q'ab' puwi' jun ri kok che k'amal ki b'e ri kojonelab', mab'an wa' xaq ruk' aninaqil. Mab'an ne awe ri mak ri kub'an jun chik. Chachajij awib', matqaj pa mak.

²³ Xuwi joron matijo, xane xuquje' chatija jub'iq' vino, rumal rech ri a pam ri amaq'el kayawajij.

²⁴ E k'o jujun ri qas q'alaj chik ri ki mak k'ä mäjoq keb'e' pa q'atb'al tzij. E k'o jujun chik ri man q'alaj tä ri ki mak chanim, xane k'ä te käq'alajin wa'. ²⁵ Je k'u wa' ru b'anik ri utzil. Q'alaj wa' chanim chkiwäch konojel. Pune ta ne man q'alaj chanim ri utzil ri kaka'no, qas kopan na ri q'ij ri käq'alajinik.

6

¹ Konojel ri patäninelab' kojonelab', rajwaxik nim kekil wi ri ki patrón rech man káb'ix tä ri äwas chrij ri Dios, o chrij ri qa tijonik. ² We e kojonelab' ri ki patrón ri patäninelab', man rumal tä ri' chi e qachalal mat nim kekil wi. Xane rajwaxik utz na kaka'n che ki patänixik rumal chi ri kekipatänij e kojonelab', e loq'alaj taq qachalal. Chak'utu we tijonik ri' chkiwäch ri kojonelab', chab'ij chke chi käkinimaj wa'.

Waral käqil wi jas u riqik ri qas q'inomal

³ We k'o jachin jun keutijoj ri kojonelab' che jun tijonik chik ri man junam tä ruk' ri utzalaj u tzij ri Qajaw Jesucristo, ri tijonik ri uj kojoninaq wi, ri kuk'ut chqawäch chi rajwaxik kujniman che ri Dios, ⁴ ri winaq ri' xa nimal ri' kub'ano, man k'o tä retam. K'amaninaq che we winaq ri' amaq'el k'o jas kukoj pu tzij, xuquje' käch'ojin chikij taq tzij. Rumal k'u wa' ri kojonelab' käkirayij jastaq ri man kech taj, kech'ojinik, käkib'ij tzij ri äwas u b'ixik chb'il taq kib', xaq kieb' ki k'ux chik käkich'ab'ela kib'. ⁵ Ri winaq ri' xaq ch'oj käkiliy kuk' winaq ri k'o itzel taq ki chomanik, ri man ketam tä chi ri qas tzij. Käkichomaj chi ri winaq kekojoniq xaq rech käkich'ak puaq. Timoteo, chatasa awib' chikij ri winaq ri je' ki no'j wa'. ⁶ Qas tzij k'ut, ri kojoniq are jun nimalaj q'inomal che ri winaq ri käkikot ruk' jampa' ri k'o ruk'.

⁷ Man k'o tä jas quk'am loq aretaq xujul cho we uwächulew, man k'o tä k'u jas kâqak'am b'ik aretaq kujkâmik. ⁸ Xuwi ta k'u ne we k'o qa wa, we k'o qatz'iaq, chujkikot ruk' wa'. ⁹ Are k'u ri kâkaj keq'inomarik, ketaqchi'x na pa ri mak. Keqaj pa ru chapâb'al ri Itzel. Kâkichaplej ki rayixik jastaq ri man k'o tä ki patân, ri xa keuya pa k'âx, kâretzelaj u wäch ri ki k'aslemal, kusach k'u ki wäch. ¹⁰ Are k'u ri winaq ri ke' kanima' ruk' ri puag kâk'iy na ronojel u wäch etzelal pa ri ki k'aslemal. E k'o k'u jujun ri xkirayij u wäch ri puag, xa je ri' xkiya kan ri ki kojoniq, xkiya k'u kib' pa k'âxk'ol.

Chakojo a chuq'ab' pa ri kojoniq

¹¹ Ri at k'ut, Timoteo, at rech ri Dios. Chatasa awib' chkiy we itzel taq no'j ri'. Are chataqej jun k'aslemal ri jikom. Chapatânij ri Dios, chatkojon che, cheawaj konojel ri winaq, chk'ol a paciencia, maya k'olib'al che ri k'a'nal. ¹² Chakojo a chuq'ab' pa ri ch'oj chrij ri Itzel rech q'alaj chi a taqem ri kojoniq. Chak'utu' chi a riqom chik jun a k'aslemal ri man k'o tä u k'isik. Are k'u wa' ri xatsik'ix wi rumal ri Dios. Utz k'u xab'an chuq'alajisaxik ri qas tzij ri at kojoniq che chkiwäch k'ia winaq ri xkita ra tzij. ¹³ Kâmik k'ut, chuwäch ri Dios ri k'iyisaninaq konojel ri jastaq, xuquje' chuwäch ri Qajaw Jesucristo ri utz xub'an chuq'alajisaxik ri qas tzij chuwäch ri Poncio Pilato, kinya we pixb'enik ri' chawe. ¹⁴ Chanimaj b'a' ri kat-intaq wi, k'o jub'iq' mak'ex che, rech man kuyuj tä rib' ruk' ri man utz taj, xuquje' rech man k'o tä jas kâriqtaj chawij ri katyaj wi. Je wa' kataqej u b'anik k'ä kâpe na ri Qajaw Jesucristo. ¹⁵ Ru petb'al ri Jesús kâb'antaj na rumal ri Dios aretaq kopan ri qas u q'ijol. Ri qa Dios, ri ya'tal che chi kânimarisax u q'ij, xaq xuwi ri Are' k'o u chuq'ab' che taqanik pa ki wi' konojel. Are Q'atal Tzij pa ki wi' ri q'atal taq tzij, xuquje' are Kajaw konojel ri ketaqan pa ki wi' ri winaq. ¹⁶ Xaq xuwi ri Are' ri qa Dios man kâkâm taj, jeqel k'ut pa saqil jawije' ri man kuya' taj kopan wi jun winaq. Man k'o tä jun winaq ri ilowinaq u wäch, man kâkowinik tä k'u kâril u wäch. Chnimarisax b'a' u q'ij, amaq'el k'ut chtaqan ri Are' puwi' ronojel pa taq ri q'ij ri junab' ri kepetik. Amén.

¹⁷ Ri winaq ri e q'inomab' pa taq we q'ij ri', chab'ij chke chi mâka'n nimal, xuquje' mâku'b'i ki k'ux chrij ri q'inomal ri xa kâsach na u wäch. Xane are kâku'b'i ki k'ux chrij ri k'aslik Dios, ri kâyo'w ronojel ri jastaq ri kajwataj chqe rech kujkikot na kuk'. Man xa tä jub'iq' kuya', xane k'ia. ¹⁸ Chab'ij chke ri q'inomab' chi kâka'n ronojel u wäch utzil. Chab'ij chke chi jas ru k'iyal ri jastaq ke, are ta k'u je' u k'iyal ri toq'ob' ri kâka'no. Chesipanoq, chekijacha jutaq b'iq' ri jastaq

ke chkiwäch ri k'o rajwaxik chke. ¹⁹ Je ri' tajin kâkimulij jun ki q'inomal pa ri kaj ri man kâsach tä u wäch, rech kâkiriq ke ri qas k'aslemal ri man k'o tä u k'isik che taq ri q'ij ri kepe na. We q'inomal ri' are je' jas jun ja ri ko jeqelik.

Käyi' ri k'isb'al taq pixb'enik che ri Timoteo

²⁰ Ri at, Timoteo, chak'olo', chachajij ri oqxanim pa ra q'ab' at rumal ri Dios. Matatab'ej taq ri puk, ri tzijob'elil ri man k'o tä kâch'ak che, man kanim tä k'u awib' pa taq ch'oj chrij tijoniq ri kâb'ix che chi are qas etamanik, man qas tzij tä k'ut. ²¹ E k'o k'u jujun ri xe' kanima' ruk' we etamanik ri', ki yo'm k'u kan ri qas kojoniq.

Are ta b'a' ri Dios kâtoq'ob'isan a wäch at, Timoteo. Amén.

RI UKAB' CARTA RI XUTZ'IB'AJ RI SAN PABLO CHE RI TIMOTEO

Ri apóstol Pablo k'o pa che' aretaq xutz'ib'aj b'i we carta ri' che ri qachalal Timoteo

¹ In wa', ri Pablo, in apóstol. In jun chke ru tago'n ri Jesucristo. Je wa' nu b'anik rumal chi are u rayinik ri Dios chi kintzijo'j ri k'aslemal ri man k'o tä u k'isik, ri xuchi'j loq chqe. Ri k'aslemal ri' kâqariq na rumal chi xa uj jun ruk' ri Cristo Jesús. ² Loq'alaj Timoteo, kintz'ib'aj b'i we wuj ri' chawe, je' ta ne chi at nu k'ojol. Are ta b'a' ri Dios qa Tat xuquje' ri Qajaw Jesucristo kel u k'ux chawe, kutoq'ob'isaj a wäch, kub'ano chi kuxlan rawanima'.

Rajwaxik u tzijoxik ri nimalaj toq'ob' ru b'anom ri Jesucristo

³ Ri in kinya maltioxinik che ri Dios ri tajin kinpatänij jas ri xka'n ri qa nan qa tat ojer, kinna' pa wanima' chi man k'o tä etzelal nu b'anom. Amaq'el aretaq katna'taj chwe, wachalal, chi paq'ij chi chaq'ab' kinb'an orar pa wi' ruk' maltioxinik. ⁴ Aretaq kâna'taj chwe ri oq'ej ri xab'ano, aretaq xatinya kan a tukiel, sib'alaj kinrayij kinwil a wäch rech kâkikot chi na más ri wanima'. ⁵ Kâna'taj chwe chi gas tzij at kojoninaq, man kub'an tä k'u kieb' a k'ux. Je ri' ri ki kojoni'k ri nan Loida ri awati't, xuquje' ri Eunice ra nan ri xeko'jon nab'e chawäch at. Tzij la' in kinkojo chi je' kab'ano jas ri xka'n ri e are', xeko'jonik, je' kab'an at xuquje', katko'jonik.

⁶ Rumal wa' ri in kwaj kinna'taj chawe chi rajwaxik kak'asuj ri kuin'em ri sipam chawe rumal ri Dios aretaq xinya ri nu q'ab' pa wi'. ⁷ Je' kinb'ij wa' chawe rumal chi ri Espiritu ri u yo'm ri Dios chqe man kub'an taj chi kuxej rib' ri qanima'. Xane ri Espiritu ru yo'm chqe kuya u chuq'ab' ri qanima', kub'ano chi kâqaj qib', xuquje' kub'ano chi utz ri ku-jchomanik, man kâqa'n taj xa jas ri kâqaj uj. ⁸ Rumal wa' matk'ix b'a' chutzijoxik ronojel ri utzil ru b'anom ri Qajaw Jesús pa ri qa k'aslemal. Matk'ix chwe in xuquje' chi in k'o pa che' rumal chi tajin kintzijo'j ri utzalaj tzij chrij ri Qajaw Jesús. Chach'ija b'a' awe ri k'âk'ol ri kâriq'taj rumal ru tzijoxik ri Utzalaj Tzij re ri Evangelio. Chab'ana wa' ruk' ri chuq'ab' ri yo'm chawe rumal ri Dios. ⁹ Ri Dios are xujto'wik xuquje' xujusik'ij rech kujk'oji ruk' ri Are', utz k'u ri qa k'aslemal chuwäch. Je' u b'anom ri Dios wa' chqe, man rumal tä ri utzil ri qa'nom, xane rumal chi u chomam ri Are' chi kutoq'ob'isaj qa wäch. Je ri' ru chomanik ri Dios pa qa wi'

pa ri ojer taq q'ij, aretaq mäjoq kâb'antaj ri kajulew rumal, chi kutoq'ob'isaj qa wäch rumal ri Cristo Jesús. ¹⁰ Kâmik k'ut k'utum chqawäch chi ri Dios kub'an toq'ob' rumal ru petik ri Cristo Jesús ri To'l Qe. Ri Cristo xresaj u chuq'ab' ri kâmikal, xuq'alajisaj k'u chqawäch ri k'aslemal ri man k'o tä u k'isik. Je' xub'an wa' rumal ri Utzalaj Tzij re ri Evangelio.

¹¹ Are ri Dios xinkojow chutzijoxik we Utzalaj Tzij ri' rech ri Evangelio, xuquje' xinukoj che apóstol, jun chke ru tago'n ri Jesucristo, rech kinya we tijoni'k ri' chke ri nik'iaj winaq chik. ¹² Tzrumal wa' tajin kinriq ronojel wa' we k'âx ri'. Jikom k'ut ri wanima' chrij ri Dios, man kink'ix taj rumal chi ri in wetam jachin che in kojoninaq wi. Qas tzij k'ut wetam chi k'o u chuq'ab' ri Dios chuchajixik ri oq'xan ru yo'm chwe, xuquje' ri oq'xan ri xinjach in pu q'ab' ri Are' k'a kopan na ri q'ij aretaq kâtzelej loq ri Jesús.

¹³ Ri at, Timoteo, aretaq kaya tijoni'k, chatzijo'j ri utzalaj tijoni'k ri man k'o tä etzelal chupam, junam jas ri a tatab'em wumal. Chak'utu pa ra k'aslemal chi gas at kojoni'naq che ri Evangelio, loq' chawila wi ri Dios, xuquje' konojel winaq rumal chi xa uj jun ruk' ri Cristo Jesús. ¹⁴ Ruk' ru chuq'ab' ri Loq'alaj Espiritu ru yo'm ri Dios pa qanima', chachajij k'u ri oq'xan ri nim u b'anik, ri yo'm chawe rumal ri Dios.

¹⁵ Je' jas ri awetam, in wonob'am kanoq kumal konojel ri kojonelab' ri e k'o pa taq ri tinimit re Asia. Ri Figelo xuquje' ri Hermógenes e are' jujun chke ri xka'n wa' chwe. ¹⁶ Are ta b'a' ri Qajaw Jesús chetewchun na ri e k'o pa rachoch ri Onesiforo, chutoq'ob'isaj ta na ki wäch rumal chi k'ialaj mul ri are' u b'anom utzil chwe, u yo'm jororemal che ri wanima'. Man xk'ix tä k'u chwe chi ri in, in k'o pa che', in ximom ruk' ximib'al re ch'ich'. ¹⁷ Xane aretaq ri are' xul pa ri tinimit Roma, xel ch'uj che nu tzukuxik, k'a xinuriq na. ¹⁸ Ri at awetam chi sib'alaj xujuto' pa ri tinimit Éfeso. Chuya ta b'a' ri Qajaw Jesús che ri Onesiforo chi kel u k'ux ri Dios che, chutoq'ob'isaj ta na u wäch pa ri q'ij ri kuq'at tzij.

2

Chab'ana' jas ri kub'an jun utzalaj sol-dado rech ri Jesucristo

¹ Ri at k'ut, Timoteo, at je' ta ne nu k'ojol. Rumal wa' kinb'ij chawe: Chakojo ri chuq'ab' ri yo'm chawe rumal ru toq'ob' ri Dios ri xariq ruk' ri Cristo Jesús. ² Ri tijoni'k ri a tom aretaq kintzijon chkiwäch k'ialaj winaq, chaya wa' pa ki q'ab' achijab' kojonelab' ri jikom kanima', ri kekowin che ki tijoxik nik'iaj chik.

³ Timoteo, chach'ija awe ri k'äxk'ol junam wuk' in jas ri rajwaxik kub'an jun utzalaj soldado rech ri Jesucristo. ⁴ Man k'o tä jun utzalaj soldado kunim rib' chub'anik jas ri kaka'n ri nik'iaj winaq chik ri man e soldados taj we gas tzij kraj kub'an ru rayinik ri ki nimal soldados ri kätäqan puwi'. ⁵ Je' ri xuquje' ri jun ajdeporte. Man kuch'ak tä ri' ri premio we man kub'ano jas ri kätäqan wi ri k'amal b'e rech ri deporte. ⁶ Xuquje' ri jun ajchak pa juyub' ri sib'alaj kutij u q'ij che ru chak, che ri are' ya'tal wi chi kuyak nimalaj cosecha chkiwäch konojel ri nik'iaj chik. ⁷ Chatchoman b'a' chrij ri tajin kinb'ij chawe. Are k'u ri Qajaw Jesucristo kuya na utzalaj a chomanik chuch'ob'ik ronojel.

⁸ Amaq'el chna'taj ri Jesucristo chawe. (Ri nim taqanel David are u mam ri Are' ojer.) Ri Jesucristo xk'astaj chxixol ri käminaqib'. Are wa' ri Utzalaj Tzij re ri Evangelio ri kintzizijoj in. ⁹ Rumal ru tzijoxik ri Evangelio nu rigom k'äx. In ximom ruk' ximib'al re ch'ich'. Je' ki b'anom chwe jas jun b'anal etzelal. Pune in ximom in, in tz'aptalik, are ru Loq' Pixab' ri Dios man tz'aptal taj, kel u tzijol pa ronojel tinimit. ¹⁰ Rumal k'u wa' kinch'ij ronojel u wäch k'äx xa rumal kech ri e cha'tal rumal ri Dios, rech xuquje' ri e are' käkiriq ru tob'anik ri Dios, ri käkiriqo we xa e jun ruk' ri Cristo Jesús. Käkiriq k'u na ri je'lalaj juluwem rachi'l ri k'aslema ri man k'o tä u k'isik.

¹¹ Qas tzij we tzij ri' ri keb'ixoxik:

We ri uj je' ta ne uj käminaq junam ruk' ri Cristo, man uj k'o tä k'u pa ri ojer qa k'aslema, käqariq na ri utzalaj qa k'aslema ruk' ri Are'.

¹² We käqach'ij ri k'äx ri petinaq chqij, kujtaqan na ruk' ri Are'.

We käqab'ij chi ri uj, man uj kojoni naq tä che ri Cristo, xuquje' kub'ij na ri Are' chi qas tzij man uj kojoni naq tä che.

¹³ Pune ta ne man jikom ri ranima' ri Jesús, rumal chi ri Are' man kuya' taj chi mat kub'ij rib' chi qas tzij Are ri Dios.

Chab'ana' chi utz ra chak cho ri Dios

¹⁴ Timoteo, k'o ri rajwaxik kana'taj chke ri qachalal kojonelab'. Cheapixb'aj cho ri Dios chi mech'ojin chkiq taq tzij, chkiq taq tijonik, chkiq ri ki chomanik ri winaq rumal chi we ch'oj ri' man k'o tä käch'ak che, xane xa ketzaq ri qachalal rumal. ¹⁵ Chakojo a chuq'ab' rech utz kel ra chak cho ri Dios. Chab'ana jun utzalaj ajchak chutzijoxik ri Utzalaj Tzij re ri Evangelio, ri man k'o tä jas katk'ix wi rumal chi jikom kab'an chuk'utik ri qas tzij chrij ru Loq' Pixab' ri Dios. ¹⁶ Mab'ij awe ri k'ialaj taq tzij ri man k'o tä ki patän, ri man e rech tä ri Dios. Chab'ij chke ri kojonelab'

chi mäki'b'ij ke wa' rumal chi we je' kaka'no, man keniman tä chi che ru Loq' Pixab' ri Dios, xane ketzaq na. ¹⁷ We kekikoj ri tzij ri man e utz taj che ki tijoxik nik'iaj chik, man utz tä k'u ri'. Xa kek'iyar wa' chxixol ri kojonelab' je' jas jun k'äxalaj yab'il ri sib'alaj kusipaj rib', jas ri kub'an ri itzel taq ch'a'k ri man keutzir taj. Jujun chke ri winaq ri tajin käkik'ut ri itzel taq tzij ri', e are' ri Himeneo rachi'l ri Fileto. ¹⁸ We tata'ib' ri', e tzaqinaq, ki yo'm kan ri qas tzij rech ru Loq' Pixab' ri Dios, käkib'ij chi ya xk'ulmataj ri ki k'astajib'al ri käminaqib'. Rumal k'u wa' jujun chke ri kojonelab' tajin kub'an kieb' ki k'ux, jun chi wi ri ki chomanik. ¹⁹ Pune k'u käk'ulmataj wa', ri Dios u b'anom chi ri kojonelab' e je' ta ne jun tak'alib'al o jun cimientio ri sib'alaj ko k'olik, ri man k'o tä jun ri käkowinik kuslab'isaj. Qetam chi ru b'anom ri Dios are gas tzij, rumal wa' u kojom we t'iqb'al ri' chrij ri cimientio. Are wa' we tzij ri': "Ri Qajaw Dios kuch'ob' ki wäch ri winaq ri e rech ri Are'," —kächa ri'. K'o jun chik ri kub'ij: "Ronojel winaq ri kub'ij chi kojoni naq che ri Qajaw Dios, chuya kan u b'anik ri etzelal," —kächa'.

²⁰ Pa jun nimalaj ja e k'o k'ia jastaq ri k'o ki patän che ri ajchaq'el ja. E k'o jastaq ri e b'anom re q'än puaq xuquje' ri e b'anom re saq puaq. E k'o k'u nik'iaj chik ri e b'anom xa ruk' che', xuquje' ri e b'anom xa ruk' ulew. Ri jastaq ri nimaq na ki q'ij e tasom wa' rumal ri ajchaq'el ja rech kekoj xaq xuwi pa taq nimaq'ij. Are k'u ri nik'iaj chik ri man nimaq tä mä's ki q'ij, e are wa' ri kekoj ronojel q'ij. ²¹ We k'o jun winaq kraj chi nim kil wi rumal ri Dios rech k'o u patän chke konojel ri utzalaj taq chak ri kub'an ri qa Tat, ri winaq ri' rajwaxik chi ch'ajch'oj ri ranima', man kub'an tä ri etzelal. Je' ri' k'o u patän chub'anik apachike u wäch utzil.

²² Ri at, Timoteo, chaya b'a' kan ri man utz taj ri käkaj kaka'n ri alab'om, ri alitomab' ri mäja' käk'oji ki chomanik. Ri at k'ut, chataqej u b'anik ri utz pa ra k'aslema cho ri Dios. Chatkojon che ri Dios, cheawaj ri winaq, chab'ana ri utzil kuk' konojel. Match'ojin kuk' rech kuxlan rawanima'. Chab'ana wa' junam kuk' konojel ri kojonelab' ri tajin käkita' toq'ob' che ri Qajaw Jesús, ch'ajch'oj k'u ri kanima'. ²³ Maya k'olib'al chke taq ri tzij, ri chomanik ri man k'o tä ki patän, kuk' winaq ri man kok tä tzij pa ki jolom. Awetam k'ut chi ru b'anik wa' kuwalijisaj ch'oj. ²⁴ Ri patänil re ri Qajaw Jesús, man ya'tal tä che chi käch'ojinik, xane rajwaxik käch'awik, kub'an utzil chke konojel ri winaq. Xuquje' rajwaxik kána'w che ki tijoxik, kuchajij paciencia kuk'. ²⁵ Rajwaxik chi ri are' man kunimarisaj tä rib' aretaq kusuk'ub'a' ri ki chomanik ri xa kek'ulelanik. Kraj ne ri Dios

kuya pa kanima' chi kâkich'ob' ri qas tzij, kâkik'ex k'u na ri ki chomanik. ²⁶ We je ri' kâka'no, keb'ul na pa saq, kâkich'ob' na. Keb'el na chupam ri chapâb'al ru kojom ri Itzel chke. Are wa' ri diablo ri e u chapom, u b'anom k'u chke chi are kâka'n ronojel jas ri kraj ri are'.

3

Waral kâqil wi jas ri ki b'anik ri winaq pa ri k'isb'al taq q'ij

¹ Timoteo, chach'ob'o wa' xuquje', chi pa ri k'isb'al taq q'ij kepe na q'ij ri sib'alaj kâkiriq k'âx ri winaq. ² Ri winaq xa kâkaj na kib' chb'il kib', man kel tâ ki k'ux chke ri kach winaq. Mâs loq' na kâkil wi ri puag, xuquje' ri q'inomal. Kâka'n nimal, nim kâkina' kib' pa kanima'. Kâkitze'j u wâch ri Dios, xuquje' kâkitze'j ki wâch ri winaq. We itzel taq winaq ri' man keniman tâ chik chke ri ki tat ki nan, man k'o tâ ne jub'iq' ri maltioxinik pa kanima'. Man nim tâ kâkil wi ri Dios, man nim tâ k'u kâkil wi ri taqaninaq ri Are'. ³ Tzare wa' ri ki b'anik ri winaq pa we k'isb'al taq q'ij ri'. Man kel tâ na ki k'ux, man kâkitoq'ob'isaj tâ u wâch jachin jun, xane xaq xuwi kâka'no jas ri kâkaj ri e are'. Kâkiyak tzijtal, man kekowin taj kâkiq'il kib' che ri itzel taq rayinik ri k'o pa kanima'. Sib'alaj e k'a'n, xuquje' tzel kâkil wi ronojel u wâch utzil, kek'ulelan na che. ⁴ Kâka'n na k'âx chke taq ri kachi'l, kekijach na kan pa ki q'ab' ri ki k'ulel. Man kâkichomaj tâ na jas ri tajin kâka'no, xa kâka'n ri kâkaj ri e are'. Sib'alaj kâkinimarisaj na kib', kâkichomaj chi xuwi ri e are' k'o ketamb'al. Ke' na kanima' kuk' ri jastaq rech ri uwâchulew. Are k'u ri Dios, man kâkaj taj. ⁵ We winaq ri' kâkesaj na ki wâch ri qas e kojonelab' che ri Cristo. Xaq chkich'i' kâka'no chi e kojonelab'. Tzpa ri kanima' k'ut kâkib'ij wi chi man k'o tâ u patân ri kojoniq, man k'o tâ k'u u chuq'ab'. Chatasa b'a' awib' chkiq' we winaq ri', matk'oji kuk'.

⁶ Kinb'ij wa' chawe rumal chi jujun chke we winaq ri' keb'ok na pa taq ja che sub'unik, kekowin k'u na che ki sub'ik ri ixoqib' ri man e jikom taj, ri k'âx kanima' rumal chi k'ia ri ki mak. Tzare k'u ri itzel taq ki rayinik k'amowinaq ki b'e. ⁷ We ixoqib' ri' ronojel q'ij kâkitzujuk' ki no'j chuku'b'isaxik ki k'ux, rumal k'u wa' xa kâkitatab'ej ri ki tzij apachinoq. Man kekowin tâ k'u jub'iq' kâketamaj na ri qas tzij. ⁸ We winaq ri' ri xinb'ij, ri e are' je' kâka'no jas ri xka'n ri ajq'ijab' ri Janes rachi'l ri Jambres ri xkiq'atej u wâch ri qa mam Moisés. Je ri' xuquje' we winaq ri' kâkiq'atej na u wâch ri qas tzij rumal chi sachinaq ri ki no'j, ri ki chomanik. Man k'o tâ k'u ki patân we winaq ri', rumal chi man jikom tâ chi ri kanima'

chrij ri Dios, man k'o tâ ki kojoniq. ⁹ Man utz tâ k'ut kel wi ri kâka'no rumal chi konojel ri winaq kâketamaj na chi xa e konab', man k'o tâ kâkich'ob'o. Je' kâkik'ulmaj na jas ri xkiq'ulmaj ri tata'ib' ri xkiq'atej u wâch ri qa mam Moisés.

Ri apóstol Pablo kuya ri k'isb'al u pixb'enik che ri Timoteo

¹⁰ Ri at k'ut, Timoteo, qas a taqem u b'anik ri nu k'utum chawâch, xuquje' ronojel jas ri nu b'anom pa ri nu k'aslemaal. Awetam ri nu chomanik, xuquje' jas ri nu kojoniq. Awetamam ri nu b'anik, chi kinchajij paciencia kuk' ri winaq, xuquje' chi loq' kewilo. Awetam xuquje' chi jikom ri wanima' chuch'ijik ronojel u wâch k'âx. ¹¹ We k'âx ri' are ri nu riqom kumal ri winaq, xuquje' k'o chi nik'iaj k'âx'ol chik nu riqom in. Awetam ronojel ri k'âx ri xinriq pa ri tinimit Antioquia, ri xinriq pa ri tinimit Iconio, xuquje' ri xinriq pa ri tinimit Lистра. Xinch'ij na ronojel we nimalaj k'âx ri' ri xka'n ri winaq chwe. Ri Qajaw Jesús k'ut xinresaj pa ki q'ab' konojel. ¹² Qas tzij b'a' chi konojel winaq ri e kojoniq che ri Cristo Jesús, konojel ri qas kâkaj kâka'n ru rayinik, keniman che, kâb'an na k'âx chke ri e are' xuquje'. ¹³ Are k'u ri itzel taq winaq ri kekisub' ri nik'iaj winaq chik, keb'ux na mâs lawalo, xa kenimataj na pa ri etzelal. Kâka'n na mâs ri sub'unik chke ri winaq, kesub'taj k'u na ri e are' xuquje'.

¹⁴ Ri at k'ut, Timoteo, chataqej ri utzalaj tijoniq ri awetamam, ri qas tzij at kojoniq che. Tzawetam k'ut jachin taq ri' ri xkiya we tijoniq ri' chawe. ¹⁵ Xuquje' kâna'taj chawe chi k'â na nu'ch na aretaq tajin kawetamaj ru Loq' Pixab' ri Dios ri Tz'ib'talik. Are k'u wa' ri k'â tajin kawetamaj kâmik, ri kâkowin chuk'utik chawâch jas modo ri winaq kâkiriq ru tob'anik ri Dios aretaq kekojon che ri Cristo Jesús. ¹⁶ Ronojel ru Loq' Pixab' ri Dios ri Tz'ib'talik, yo'm wa' chqe uj, ri uj winaq, rumal ri Dios. Ru Loq' Pixab' ri Dios kujutijoj che ri qas tzij, kuk'ut chqawâch ri qa mak, kujusuk'ub'a' che ri tajin kâqa'no, xuquje' kuya qa no'j chub'anik ri jikom pa ri qa k'aslemaal rech utz kâqa'no. ¹⁷ Je ri' rech k'o ronojel ri rajwaxik chke ri winaq ri kepatânin che ri Dios, rech kâk'oji na ki no'j chub'anik ronojel u wâch utzil.

4

¹ Timoteo, ri in katinpixb'aj cho ri Dios, xuquje' cho ri Cristo Jesús ri kuq'at na tzij pa ki wi' konojel winaq, ri e k'ask'oj xuquje' ri e kâminaq, aretaq kâzelej loq, kâtaqan k'u na pa qa wi' nimalaj qonojel. ² Chatzizoj b'a' ru Loq' Pixab' ri Dios. Apawije' ta ne ri rajwaxik kâtzijox wi, jatzizoj b'a' chila'. We are jun utzalaj q'ij chub'anik tzijonem,

we ne man are tä jun utzalaj q'ij, chatzijoq wa'. Chak'utu chkiwäch ri winaq chi gas tzij ri kab'ij, chatyajon chke we man utz ri kaka'no. Cheatijoj konojel, chachajij paciencia kuk'. Matkos b'a' chub'anik ronojel wa'. ³ Chab'ana wa' rumal chi kâpe na ri q'ij aretaq ri winaq man kâkaj tä chik kâkita ri utzalaj tijonik ri man k'o tä etzelal chupam, xane kekitzukuj na k'ia achijab' ri ketijox kumal. We achijab' ri' kâkiya na tijonik ri utz kâkita ri winaq, xa jas ri kâqaj chkiwäch, jas u b'eyal ri ki rayinik. ⁴ Kâkiya k'u na kan ri gas tzij. Are kâkitzukuj na u tatab'exik ri ki tzij ri achijab' ri xaq kepukanik. ⁵ Ri at k'ut, Timoteo, chachajij b'a' awib', gas chachomaj na jas ri kab'ano, chach'ija na ri k'äxx'ol. Chatzijoq ri Utzalaj Tzij re ri Evangelio chke konojel winaq, utz chab'ana chupatânixik ri Dios, xuquje' chab'ana utzil chke konojel winaq.

⁶ Ri in k'ut, Timoteo, xa jub'iq' man kâpe tä ri q'ij ri kinkâmik. Je' jas ri nu b'anom petinaq loq, amaq'el tajin kinya ri nu k'aslemal rumal kech nik'iaj winaq chik. ⁷ Jas ri kub'an jun utzalaj ajdeporte, je' nu b'anom in xuquje'. Nu tijom nu chuq'ab' pa ri chak chutzijoxik ru Loq' Pixab' ri Dios, in opaninaq k'u pa ri k'isb'al re ri nu k'aslemal. Man xintzaq taj, xane xinchajij wib' pa ri nu kojonik. ⁸ Kâmik k'ut xuwi weye'm ri tojb'al ri k'olom chwe. Are ri gas jikomallil, ri gas utzil ri kâyi' na chwe rumal ri Qajaw Jesucristo, ri nimalaj Q'atal Tzij ri jikom kub'an na chuq'atik tzij pa ki wi' konojel winaq. Are ri Are' kâyo'w na we tojb'al ri' chwe pa ri q'ij ri kuq'at tzij. We tojb'al ri' kâyi' na man xuwi tä chwe in, xane xuquje' chke konojel ri gas kojonelab', rumal chi sib'alaj kâkirayij ru petb'al ri Jesús, sib'alaj loq' k'u wa' chkiwäch.

K'o na ri rajwaxik kub'ij ri apóstol Pablo che ri Timoteo

⁹ Timoteo, chakowij, chatpet wuk' chanim. ¹⁰ Ri Demas xinuya kanoq xa rumal chi más utz na kâril wi ri are' ri jastaq rech ri uwächulew, xe' k'u pa ri tinimit Tesalónica. Ri Crescente, b'enaq ri are' pa Galacia. Are k'u ri Tito b'enaq ri are' pa Dalmacia. ¹¹ Xaq xuwi ri Lucas k'o wuk' in kâmik. Chatzukuj ri Marcos jawije' k'o wi, chak'ama loq che awachi'l rumal chi ri are' kâkowin che nu to'ik pa ronojel. ¹² Are k'u ri Tíquico, nu taqom b'i pa ri tinimit Éfeso. ¹³ Aretaq katpetik, chab'ana toq'ob', chak'ama loq ri nu q'u' ri xinya kan pa ri tinimit Troas cho rachoch ri Carpo. Cheak'ama loq ri nu wuj, más na ri ojer taq tz'um ri tz'ib'tal ki wäch, ri sib'alaj nim ke'il wi.

¹⁴ Ri tat Alejandro ri ch'ayal ch'ich', sib'alaj k'ia u wäch k'äx u b'anom chwe, nim k'u ri tzijtal u yakom chwij. Ri Qajaw Dios k'ut, are kâyo'w na che ri are' ri rajil u k'exel ri k'äx u b'anom chwe. ¹⁵ Ri at k'ut, chachajij awib' chuwach we tata' ri', rumal chi ri are' sib'alaj u k'ulelam u wäch ru Loq' Pixab' ri Dios ri qa tzijom.

¹⁶ Aretaq xinsik'ix pa q'atal tzij che ri nab'e mul, xa nu tukiel xinto' wib'. Man k'o tä jun winaq chik ri xk'o'ji wuk' che nu to'ik, xane konojel xinkiya kanoq. Kwaj k'ut chi ri Dios mat kuya wa' we mak ri' chki. ¹⁷ Are k'u ri Qajaw Jesús xk'o'ji wuk' che nu to'ik. Are ri Are' xyo'w ri nu chuq'ab' rech kinkowinik kintzijoq na ronojel ri Utzalaj Tzij re ri Evangelio je' ri' chi kâkita wa' konojel ri nik'iaj winaq chik ri man e are tä aj Israel. Je' wa' xub'an ri Dios che nu to'ik pa ki q'ab' ri nu k'ulel, je' ta ne chi xinresaj pu chi' jun nimalaj koj. ¹⁸ Ri Qajaw Jesús kinresaj na pa ronojel u wäch k'äx ri kâpe chwij, kinuchajij na rech kinopan jawije' ri kâtaqan wi ri Are' pa ri kaj. iChnmarisax ta b'a' u q'ij ri Qajaw Jesucristo amaq'el pa taq ri q'ij ri junab' ri kepe na. Amen.

Ri apóstol Pablo kutaq b'i rutzil ki wäch jun chke ri kojonelab', xuquje' kuta' ri k'isb'al tewchib'al pa ki wi'

¹⁹ Chaya rutzil ki wäch ri Aquila ruk' ri Prisca,* xuquje' konojel ri e k'o pa rachoch ri Onesíforo. ²⁰ Ri Erasto xkanaj kan pa ri tinimit Corinto. Are k'u ri Trófilo, xinya kan ri are' pa ri tinimit Mileto rumal chi yawab' ri are'. ²¹ Chakowij loq, Timoteo, rech katul waral k'ä mäja' kepe ri q'ij ri sib'alaj k'o ri tew. Ri Eubulo, ri Pudente, ri Lino, ri Claudia xuquje' konojel ri nik'iaj qachalal chik kâkitaq b'i rutzil a wäch.

²² Are ta b'a' ri Qajaw Jesucristo k'o pa wi', kana' ta k'u wa' pa rawanima' ru k'olem awuk'. Are ta b'a' ri Dios kutoq'ob'isaj i wäch, kätewchin chiwe ix iwonojel. Amén.

* 4:19 Ri b'iaj "Prisca" kel kub'ij "Priscila" (Hechos 18:2, 18).

RI CARTA RI XUTZ'IB'AJ RI SAN PABLO CHE RI TITO

Ri apóstol Pablo kuchap u tz'ib'axik jun carta che ri qachalal Tito

¹ In wa', ri Pablo, in patänil re ri Dios. Xuquje' in apóstol, jun chke ru taqo'n ri Jesucristo. Ri Are' xintaqowik rech kintob'an chke ri winaq ri e cha'tal rumal ri Dios rech kekojonik. Je ri' xuquje' rech kaketamaj na ri qas u b'anik ri kojonik che ri Cristo, xuquje' rech kekowin che retamaxik jas ri qas u q'ijilaxik ri qa Dios. ² We kaketamaj ri qas kojonik, kaku'b'i na ki k'ux chi ya k'o chik ki k'aslema' ri man k'o tä u k'isik. Ri Dios ri man kub'an tä tzij xuchi'j loq we k'aslema' ri' k'a mäja' kuchap u b'anik ri kajulew ojer. ³ Kämik k'ut, are wa' ri qas q'ij ri xuchomaj ri Dios chi kuk'ut na ru Loq' Pixab' chqawäch. Are k'u ri Dios ri To'l Qe, are yo'winaq wa' pa nu q'ab'. In u taqom k'u chutzijoxik we tzij ri'. ⁴ Kintz'ib'aj b'i we wuj ri' chawe, Tito, je' ta ne chi qas at nu k'o'jol rumal chi ri uj junam uj kojoninaq che ri Qajaw Jesucristo. Are ta ri Dios qa Tat xuquje' ri Qajaw Jesucristo ri To'l Qe, kutoq'ob'isaj a wäch, kub'ano chi kuxlan rawanima'.

Ri kub'an ri Tito pa ri Creta

⁵ Ri in xatinya kan pa Creta rech kak'is u b'anik ri k'a kraj na, kab'an u b'anik ronojel, xuquje' rech keakoj na k'amal taq ki b'e ri kojonelab' pa kojonel taq ri tinimit, junam jas ri taqanik ri nu yo'm chawe. ⁶ We jun kraj kok che k'amal ki b'e ri kojonelab', tzrajwaxik ri' chi man käriqtaj tä etzelal chrij, xuquje' chi xa jun ri rixoqil k'olik. Rajwaxik chi kojonel ri ralk'ual e kojonelab', keniman chke ri ketaqan pa ki wi', xuquje' man k'o tä tzij käb'ix chkiq chi qas tzij k'o ri man utz taj ri kaka'no. ⁷ Apachin jun ri kok che obispo,* tzrajwaxik wi chi jikom ru k'aslema', man k'o tä etzelal kub'ano, rumal chi yo'm pu q'ab' ri rilik, xuquje' ru b'anik ri ketaqan wi ri Dios. Munimarisaj rib', mub'an k'a'nal, mäq'ab'arik, man kutzujuk tä u b'anik ch'oj, man kurayij tä k'u u ch'akik puaq ri k'ixb'al u k'amik. ⁸ Xane rajwaxik chi käch'awik, utz kub'an che ki k'ulaxik ri winaq ri keopan ruk', amaq'el kurayij u b'anik utzil. Xuquje' rajwaxik chi utz u chomanik, jikom ri ranima', xuquje' utz u k'aslema' cho ri Dios. Rajwaxik chi kuchajij paciencia, man kub'an taj xa jas ri kraj ri are'. ⁹ Rajwaxik chi qas jikom ranima' ri are' chrij ru Loq' Pixab' ri Dios junam jas ri k'utum chuwäch, rech ri are' käkowinik kuwalijisaj ri kanima' ri qachalal, keupixb'aj ruk' ri utzalaj tijonik ri

man k'o tä etzelal chupam, xuquje' rajwaxik kána'w chuk'utik chi are ri qas tzij ri tajin kuk'ut chkiwäch ri winaq ri xa kek'ulelanik.

¹⁰ Je wa' kinb'ij rumal chi e k'ia ri man keniman taj, más k'u na chxikol ri kojonelab' aj Israel, ri ketoq'in che ki b'anik jastaq ri man k'o tä ki patän. K'ia ri käkib'ij, kesub'taj k'u ri winaq kumal. ¹¹ We winaq ri' rajwaxik kätz'apix u pa ki chi' rumal chi tajin kekitukij ri qa nan qa tat kachi'l ri kalk'ual ruk' tijonik ri man taqal taj. Xa kaka'n wa' rech käkich'ak puaq ri k'ixb'al u k'amik.

¹² K'o jun chke ri winaq aj Creta, jun achi ri käb'ix che chi are q'alajisanel, ri xub'ij chkiq ru winaqil aj Creta: "Ri e are' xaq kaka'n tzij, e itzel taq winaq, e jig'ab', xuquje' e saq'orib'," — xcha ri'. ¹³ Ri xub'ij ri achi ri' are ri qas tzij. Rumal wa' rajwaxik chi ko keapixb'aj, cheayaja' rech qas tzij kekojonik, jikom ri kanima', ¹⁴ rech man käkikoj tä ri ki pukanik ri winaq aj Israel ri xaq pa ki jolom kepe wi, xuquje' rech man keniman tä che ri ki taqanik ri winaq ri ki yo'm kan ri qas tzij re ru Loq' Pixab' ri Dios.

¹⁵ Qas utz ronojel chke ri winaq ri käkichomaj xaq xuwi ri utzil. Are k'u ri winaq ri man utz tä ri käkichomaj, ri man e kojonelab' taj, man k'o tä jub'iq' ri qas utz chke ri e are'. Rumal chi man utz tä ri käkichomaj, man utz tä k'u ri kákina' pa kanima'. ¹⁶ We winaq ri' käkib'ij chi k'o nimalaj ketamb'al chrij ri Dios. Are k'u rumal ri ki k'aslema', xuquje' ronojel ri kaka'no, q'alaj chi man käkib'ij tä ri qas tzij. Etzeltajinaq ri ki k'aslema' chuwäch ri Dios. Man e nimanelab' taj, man kekowin tä k'ut kaka'n ri utzil.

2

Rajwaxik ri utzalaj tijonik ri man k'o tä etzelal chupam

¹ Ri at k'ut, Tito, ronojel ri katzijoj, rajwaxik je' jas ri k'o chupam ri utzalaj tijonik ri man k'o tä etzelal chupam. ² Cheatijoj ri achijab' ri ya k'o chi ki junab' chi mäkiya u wi' ri käkitijoj, o apachike ri kaka'no, chi man xaq tä kexi'ninik, rech nim ke'il wi, xuquje' utz ri kechomanik, man kaka'n taj xa jas ri kaka'j ri e are'. Rajwaxik chi jikom ri kanima' pa ronojel, chi e are' utzalaj taq kojonelab', kekaj ri winaq, xuquje' nim ri ki paciencia chuch'ijik ronojel ri käpe pa ki wi'. ³ Xuquje' cheatijoj ri ixoqib' ri ya k'o chi ki junab' chi rajwaxik utz ri ki k'aslema' cho ri Dios, chi mäkiyak tzijtal, meq'ab'arik, xane rajwaxik käkik'ut ri utzalaj no'j chkiwäch ri nik'iaj chik. ⁴ Rajwaxik käkik'ut chkiwäch ri ak'al taq ixoqib' chi kekaj ri kachajil, xuquje' kekaj taq ri kal. ⁵ Ri ixoqib' ri k'o chi

* 17 "Obispo": Chawila' ri 1 Timoteo 3:1.

ki junab' rajwaxik kăkiya ki no'j ri ak'al taq ixoqib' rech utz ri kechomanik, man kăka'n taj xa jas ri kăkaj ri e are', ch'ajch'oj k'u ri kanima', utz kăka'n che rilixik ri kachoch, kăka'n utzil chke konojel, xuquje' keniman chke ri kachajil. Je ri' rech ri nik'iaj winaq chik, pune kăkib'ij tzij ri man utz taj chrij ru Loq' Pixab' ri Dios, q'alaj chi man tzij tā ri' ri kăkib'ij.

⁶ Cheapixb'aj ri alab'om xuquje', rech utz ri ki chomanik, man kăka'n tā k'u xa jas ri kăkaj ri e are'. ⁷ Chak'utu jun utzalaj no'j chkiwăch ri qachalal pa ronojel ri kab'ano. Aretaq keatijoj, xaq xuwi utzalaj tijonik kak'ut chkiwăch, xaq matxi'ninik. ⁸ Cheatzijob'ej ruk' utzalaj taq tzij rech man k'o tā jun katyajowik. Je ri' kel na u k'ixb'al apachin ri kraj katuk'ulelaj, rumal chi man kăriqtaj tā ri man utz tā u b'ixik chkiy ri kojonelab'.

⁹ Cheapixb'aj ri patăninelab' chi kăkinimaj ronojel ri ketaq wi, mek'ulelanik, xane utz kech'awik, rech utz ke'il wi rumal ri ki patrón. ¹⁰ Man kuya' taj kăka'n elaq', xane rajwaxik chi qas jikom ri kanima' pa ronojel. Rumal k'u ri utzalaj ki k'aslemaal kăq'alajin chkiwăch ri winaq chi qas tzij je'l na u nimaxik ru Loq' Pixab' ri Dios ri To'l Qe.

¹¹ Ri Dios u k'utum chi kujraj, u b'anom k'u toq'ob' chqe che qa to'ik nimalaj qonojel ri uj winaq. ¹² Rumal chi ri Dios xutoq'ob'isaj qa wăch, je ri' xqetamaj chi rajwaxik kăqaya kan ri ojer k'aslemaal ri xujk'oji wi aretaq man xujniman tā che ru Loq' Pixab' ri Dios, xuquje' kăqaya kan ri itzel taq qa rayinik. Je ri' kujkowinik kăqa'no jachike ri utz, ri jikom, man kăqa'n tā xa jas ri kăqaj uj, xane kujpatănin che ri Dios pa ri qa k'aslemaal waral cho we uwăchulew. ¹³ Kujejen k'u che ri je'lalaj q'ij ri ku'l wi qa k'ux, ri b'im kan chqe, aretaq kăpe ri nimalaj qa Dios, ri Jesucristo, ri xuquje' are To'l Qe. Kănimarisax k'u na u q'ij aretaq kăpetik. ¹⁴ Ri Qajaw Jesús xuya rib' rech kăkămisax rumal qech che qesaxik chupam ri etzelal, xuquje' rech kub'an qa ch'ajch'oj che ri qanima', kujok k'u na che u winaqil ri Dios, amaq'el k'ut kăqatij qa q'ij chub'anik ronojel u wăch utzil.

¹⁵ Are wa' ri rajwaxik keatijoj ri kojonelab' che, xuquje' rajwaxik kawalijsaj ri kanima'. Cheapixb'aj rech q'alaj ri man utz taj ri kăka'no. Chak'utu' chi k'o a taqanik pa ki wi' rech man k'o tā k'u jun ri mat nim katril wi.

3

Waral kăqil wi ri rajwaxik pa ri ki k'aslemaal ri kojonelab'

¹ Chana'taj chke ri kojonelab' chi kăkiya kib' pa taqik chke ri q'atal taq tzij, xuquje' chke konojel ri winaq ri yo'm pa ki q'ab'

chi ketaqan pa ki wi'. Chenimanoq. Rajwaxik xuquje' chi amaq'el k'o pa kanima' ri rayinik chub'anik ronojel u wăch utzil. ² Chab'ij chke chi măkiyak tzijtal chrij apachin jun winaq. Rajwaxik chi kech'awik, man kăkitzujukuj tā ch'oj, xane utz kanima' chke konojel ri winaq, kăkitoq'ob'isaj k'u ki wăch.

³ Je ri' kinb'ij rumal chi ri uj nimalaj qonojel, nab'e kanoq ri uj xuquje' man xujniman tā che ri Dios, man xok tā tzij pa qa jolom, jech' ri qa chomanik, man utz tā ri qa k'aslemaal. Xqa'n ronojel u wăch ri man utz taj ri xqarayij, xa jas ri xqaj chqawăch. Aretaq k'ă măja' uj kojonelab', xqa'n ri etzelal, xqarayij jastaq ri man qech taj. Tzel na xeqil nik'iaj winaq chik, xuquje' tzel xujkil uj ri e are'. ⁴ Are k'u ri Dios ri To'l Qe, xuk'ut ri rutzil chqawăch, xuquje' xuk'ut chqawăch chi sib'alaj kujraj nimalaj qonojel ri uj winaq. ⁵ Je ri' ri Are' xujuto'. Man xub'an tā k'u wa' rumal chi jikom qa'nom chub'anik jujun taq utzil, xane xaq xuwi rumal chi xel u k'ux chqe. Xuch'aj ri qanima', xresaj ri etzelal, xub'an k'ak' che ri qa k'aslemaal rumal ri Loq'alaj Espiritu, je' ta ne chi xil chi na qa wăch jumul chik. ⁶ Ri Dios u yo'm ri Loq'alaj Espiritu pa qanima' rumal ri Jesucristo ri To'l Qe. Sib'alaj nim k'u ri utzil qa riqom rumal. ⁷ Je ri' xub'ano, xutoq'ob'isaj qa wăch rech kăjikomataj na ri qa k'aslemaal cho ri Dios, kujutzir k'u na ruk', rech kăqechb'ej na qe ri k'aslemaal ri man k'o tā u k'isik. Are wa' ri qeye'm.

⁸ Ri kinb'ij are wa' ri qas tzij. Kwaj k'ut chi ko keapixb'aj ri winaq ruk' we tzij ri' ri kinb'ij chawe, rech ri winaq ri kekojon che ri Dios kăkitij na ki q'ij chub'anik ronojel u wăch utzil. Ri utzil ri kăka'n ri qachalal, e utz na, k'o ki patăn chke konojel ri winaq. ⁹ Chaya kan ri mox taq chomanik, xuquje' ri puk ri kătzijox chkiy ri qa nan qa tat ojer. Chab'ij chke ri qachalal chi mech'ojin chrij ru Pixab' ri Moisés. Wa' we ri' man k'o tā ki b'eyal, man k'o tā k'u ki patăn.

¹⁰ We k'o jun ri tajin kukoj ki k'ux ri qachalal rech kăkitasala kib', chayaja', chab'ij che chukamul oxmul chi mub'ana wa'. We k'u man kok ri tzij pu jolom, man kăniman tā chawe, chawesaj b'i ri winaq ri'. ¹¹ Aretaq jun winaq je' kub'an wa' awetam chi qas tzij sachinaq ri are'. Ri etzelal ri tajin kub'ano, are kăk'utuwik chi are jun ajmak ri sachinaq.

Ri apóstol Pablo kuya ri k'isb'al pixb'enik che ri Tito

¹² Aretaq kintaq b'i ri Artemas o ri Tíquico awuk', chatzujukuj jas kab'ano rech katopan che wilik pa ri tinimit Nicópolis, rumal chi nu chomam kinkanaj kan chila' pa taq ri q'ij ri sib'alaj k'o tew. ¹³ Chab'ana ronojel ri katkowin che chuto'ik ri Zenas ri kojol

tzij, xuquje' chuto'ik ri Apolos. Chaya ronojel ri rajwaxik chke rech kăkitaqej ri ki b'e, xuquje' rech k'o ronojel ri kajwataj na chke.

¹⁴ Cheapixb'aj ri qachalal chi chketamaj u b'anik ronojel u wăch utzil, xuquje' rech kăketamaj ki to'ik nik'iaj qachalal chik, rech k'o u patăn ri ki k'aslemal, man xaq tă loq' kek'oji'k.

Ri apóstol Pablo kutaq b'i rutzil ki wăch ri kojonelab', xuquje' kuta' tewchib'al pa ki wi'

¹⁵ Konojel ri e k'o wuk' waral kăkitaq b'i rutzil a wăch. Chaya rutzil ki wăch konojel ri loq'alaj taq qachi'l kojonelab'. Are ta b'a' ri Dios kătoq'ob'isan i wăch ix iwonojel. Amén.

RI CARTA RI XUTZ'IB'AJ RI SAN PABLO CHE RI FILEMÓN

Ri apóstol Pablo kuchap u tz'ib'axik jun carta che ri qachalal Filemón

¹ In wa', ri Pablo, in k'o pa che' rumal chi tajin kintzijoq ri utzalaj tzij chrij ri Cristo Jesús. Loq'alaj Filemón, qach ajchak chutzijoxik ru Loq' Pixab' ri Dios, kintz'ib'aj b'i we wuj ri' chawe, wachi'l ri qachalal Timoteo. ² Xuquje' kintz'ib'aj b'i we wuj ri' chke ri qachalal kojonelab' ri kákimulij kib' cho awachoch, che ri qachalal chichu' ri nan Apia, xuquje' che ri Arquipo ri jun quk' pa ri chak chutzijoxik ru Loq' Pixab' ri Dios. ³ Are ta b'a' ri Dios qa Tat xuquje' ri Qajaw Jesucristo kutoq'ob'isaj na i wäch, kub'ano chi kuxlan iwanima'.

Ri apóstol Pablo käch'aw chrij ru k'aslemal ri Filemón

⁴ Ri at, Filemón, amaq'el aretaq kinxuki'k, katna'taj chwe kinb'an orar pa wi', kinya maltioxinik che ri qa Dios. ⁵ Je ri' kinb'ano rumal chi nu tom u tzijol chi qas tzij at kojoninaq che ri Cristo Jesús, xuquje' chi sib'alaj kawaj ri Are', man xuwi tä k'u ri Are', xane xuquje' keawaj ri e rech ri Dios. E are wa' ri e kojoninaq che ri Cristo Jesús. ⁶ Aretaq kinb'an orar, kinta' che ri Dios chi ri e kojoninaq che ri Jesús rumal ri a kojoniq man xuwi tä kákiriq na ke ri tewchib'al ru yo'm ri Cristo Jesús pa ri qa k'aslemal, xane xuquje' qas kákich'ob' na más jas ri' ri utzil ri yo'm chqe uj ri uj kojonelab'. ⁷ Loq'alaj wachalal, sib'alaj kinkikotik, sib'alaj walisam ri wanima' rumal ri rutzil awanima' at chke konojel, xuquje' rumal chi a yo'm jororemal che ri kanima' ri kojonelab'.

Ri apóstol Pablo kuta' toq'ob' che ri Filemón puwi' ri Onésimo

⁸ Ri in, pune in apóstol, jun chke ri taqo'n ri Jesucristo, pune k'o taqanik pa nu q'ab' che a taqik che jachike ri rajwaxik kab'ano, ⁹ xa k'u jun toq'ob' kinta' chawe rumal ri rutzil wanima' chawe. In wa', ri Pablo, in nim winaq chik, kámik k'ut in k'o pa che' rumal ru tzijoxik ri Cristo Jesús. ¹⁰ Kinta' jun toq'ob' chawe puwi' ri Onésimo. Ri Onésimo je' ta ne chi are qas nu k'ojol. Je ri', rumal chi ri are' xkojon che ri Cristo waral pa che' rumal ri xintzijoq che.

¹¹ Nab'e kanoq ri Onésimo xk'oqi che patänil awe, man k'o tä k'u jas ri qas xatuto' wi. Kámik chi k'ut sib'alaj nim kätob' wi, man xuwi tä chawe at, xane xuquje' chwe in. ¹² Kintaq chi b'i jumul awuk'. Chak'ulaj b'a' je' ta ne chi are ri in kinak'ulaj rumal chi

ke' wanima' ruk'. ¹³ Ri in k'ut, are ta kwaj chi kákanaj kan na wuk', rech kinupatänij na che a k'exwäch waral pa ri che' jawije' in tz'aptal wi rumal ru tzijoxik ri Utzalaj Tzij re ri Evangelio. ¹⁴ Man kwaj tä k'ut kinb'ij chi rajwaxik kinato' we ta mat junam ra chomanik wuk'. Je ri' rech ri toq'ob' ri kab'an chwe, man xaq tä at toq'le'm che, xane kab'an na ri toq'ob' ri kápe pa rawan-ima'. ¹⁵ Kraj ne ri Onésimo xatuya na kanoq kieb' oxib' q'ij rech aretaq kätzelej chi na b'ik, kájeqi na awuk' amaq'el, man kel tä chi na b'ik. ¹⁶ Man kák'oqi tä chi na awuk' xa jas jun patäninel, xane kák'oqi awuk' rech k'o na ri katuto' wi chuwäch jun patäninel. Je' kub'an na jas jun loq'alaj qachalal kojonel. Ri in, sib'alaj loq' ri Onésimo chnuwäch, ri at k'ut xuquje' rajwaxik sib'alaj loq' kawil wi. Man xaq tä jun winaq ri Onésimo, xane xuquje' jun qas qachalal rumal chi junam uj kojoninaq che ri Qajaw Jesucristo.

¹⁷ Je k'u ri', ri at awetam ya' chi in awachi'l. Rumal ri' chak'ulaj b'a' ri Onésimo, je' ta ne chi are ri in kinak'ulaj. ¹⁸ We k'o jun k'äx u b'anom chawe, we ne k'o u k'as awuk', chatq'ij chwe in. Ri in kintoj na wa'. ¹⁹ In wa', ri Pablo, kintz'ib'aj b'i we wuj ri' chawe. Chawilampe' chi are wa' ri nu tz'ib'. In kintojowik. Xuquje' kuya' kinna'taj chawe, chi ri at xuquje' k'o a k'as pa nu q'ab'. Ri a k'as are ra k'aslemal ruk' ri Dios, rumal chi xintzijoq ru Loq' Pixab' ri Dios chawe, xatkojonik. ²⁰ Je', wachalal, chab'ana we toq'ob' ri' chwe, at kojoninaq q'u che ri Qajaw Jesucristo. Chaya jororemal che ri wanima', at wachalal ya' rumal ri Cristo.

²¹ Kintz'ib'aj b'i we wuj ri' chawe, wetam k'ut chi katnimanik. Wetam chi nim na ri toq'ob' kab'ano chuwäch ri nu b'im chawe. ²² Xuquje' kinb'ij apanoq: Chab'ana toq'ob', chab'ana u b'anik jun k'olib'al ri kink'oqi wi. Ku'l nu k'ux chrij ri Dios chi rumal ri oración ri kib'an pa nu wi', ri Are' kuya na chiwe chi kinopan chi na iwuk'.

Ri apóstol Pablo kuya rutzil ki wäch ri qachalal, kuta' tewchib'al pa ki wi'

²³ Kutaj b'i rutzil a wäch ri Epafra, ri wach ajpache' rumal chi tajin kutzijoq ri Utzalaj Tzij chrij ri Cristo Jesús. ²⁴ Xuquje' ri Marcos, ri Aristarco, ri Demas, ri Lucas kákitaq b'i rutzil a wäch. E are taq wa' ketob' chwe chutzijoxik ru Loq' Pixab' ri Dios.

²⁵ Are ta b'a' ri Qajaw Jesucristo kätöq'ob'isan i wäch ix iwonojel. Amén.

RI CARTA RI XT'Z'IB'AX CHKE RI WINAQ HEBREOS

*Ri Dios uj u tzijob'em petinaq loq rumal
ri u K'ojol*

¹ Ri Dios k'ia mul xeutzijob'ej ri qa mam ojer, k'ia xub'an che ki tzijob'exik kumal ri q'alajisal taq re ru Loq' Pixab'. ² Kämik k'ut pa we k'isb'al taq q'ij ri' ri uj k'olik, uj u tzijob'em uj rumal ri u K'ojol. Rumal k'u ri Are' ri Dios xub'an we uwächulew, ri kaj, ri q'ij, ri ik', ri ch'amil, pu q'ab' k'u ri u K'ojol xujach wi ronojel wa'. ³ Che ri Cristo käqil wi ri nimalaj u q'ij ri Dios. Ri Are' k'ut qas je' u b'anik jas ri Dios. Are u k'aninaq ronojel ri k'olik ruk' ru Tzij ri k'o u chuq'ab'. Aretaq u ch'ajom chik ri qanima' che ronojel ri qa mak rumal ru kik'el, xt'uyi k'u pa ru wikiäq'ab' ri Dios chila' chikaj.

*Ri u K'ojol ri Dios nim na u q'ij chkiwäch
ri ángeles*

⁴ Ri u K'ojol ri Dios xnimar na u q'ij chkiwäch ri ángeles rumal chi k'o ri xrechb'ej ri nim na u b'anik chkiwäch ri e are'. Are la' chi käb'ix "u K'ojol ri Dios" che. ⁵ Man k'o tä k'u jumul ri xub'ij ri Dios che jun ángel:

Ri at, at ri', at nu K'ojol.

Kämik xinok che ra Tat,

—man xcha tä che. Man k'o tä k'u jumul ri xub'ij chrij jun ángel:

Ri in kinok na che ru Tat,

ri are' k'ut kok na che nu K'ojol,

—man xcha tä che jun ángel. ⁶ Aretaq k'ut xutaq loq ri nab'eal u K'ojol cho we uwächulew, xub'ij:

Chq'ijilax ta ri Are' kumal konojel

ri ángeles rech ri Dios,

—xcha ri'. ⁷ Xub'ij k'u ri Dios chkij ri ángeles:

Ri Dios kub'an chke ri ángeles rech

chi je' ta ne e kiäqiq'.

Kub'an chke we patänil taq re

chi e je' ta ne u xaq q'aq',

—xcha ri'. ⁸ Are k'u chrij ri u K'ojol kub'ij:

Nimalaj Dios, ri taqanik la

man k'o tä u k'isik

pa taq ri q'ij ri junab' ri kepetik.

Ri taqanik la are jun taqanik

ri qas jikom.

⁹ Loq' kil wi la ri jikomal,

etzelam k'u la u wäch ri etzelal.

Rumal k'u ri' ri Dios, ri Dios la,

xuya nimalaj kikotemal pa anima' la,

kikotemal k'ut ri nim na

chuwäch ri kikotemal ri xyi'

chke ri achi'l la,

—kächa ri Dios. ¹⁰ Xuquje' kub'ij ri Dios:

Ri lal, Qajaw, tzaretaq

xchaptaj loq ronojel,

xb'an la u b'anik we uwächulew,
xjegb'a la kanoq.

Ruk' ri q'ab' la xb'an la ri kaj.

¹¹ Ronojel wa' xa käsach na u wäch.

Are k'u ri lal, man k'o tä k'isik la.

Ronojel wa' xa käq'elob' na
jas ri kub'an jun atz'iaq.

¹² Xa käb'us na la wa' je' jas jun atz'iaq,
käjal na la apanoq jas ri käb'an

che jun kamixa'.

Are k'u ri lal xaq je' wi la.

Ri k'aslemal la man k'o tä u k'isik,

—kächa ri'. ¹³ Man k'o tä k'u jumul ri xub'ij

ri Dios che jun chke ri ángeles:

Chatt'uyul pa ri nu wikiäq'ab',

k'ä kinya na chawe chi katch'akanik,

kattaqan k'u na pa ki wi' ri käka'n

ki k'ulel chawe,

—man xcha tä che. ¹⁴ Konojel ri ángeles e
are' espíritus ri e k'o chupatänixik ri Dios,
ri e taqom loq che ki to'ik ri käkiriq na ru
tob'anik ri Dios.

2

*Qila b'a' chi mäqatzag ru tob'anik ri Dios
ri kraj kuya chqe*

¹ Rumal k'u ri', sib'alaj rajwaxik kujok il chunimaxik ru Loq' Pixab' ri Dios ri qa tom rech man käqatas tä qib' chrij wa'. ² Ru Loq' Pixab' ri Dios ri xtizijox nab'e kanoq kumal ri ángeles xq'alajinik chi are ri Qas Tzij. Konojel k'u ri xemakunik, ri man xeniman tä wa', xk'äjisax ki wäch jas ri taqal chke. ³ E k'u ri uj, ça kujto'taj lo ri' we ta mat kujok il chutzukuxik ri nimalaj u tob'anik ri Dios?

¡Man je' taj! Are k'u xtizijox wa' rumal ri Qajaw Dios nab'e. Te k'u ri' xjikib'a' u b'ixik chi are ri Qas Tzij kumal ri xetowik, xkitzizijoj chi k'u wa' chqe uj. ⁴ Ri Dios xuquje' xujikib'a' chi qas tzij ri tajin käkitzizijoj. Je' xub'an wa' ruk' nimaq taq k'utb'al, etal, xuquje' k'alaj taq kajmab'al ri xub'an chkiwäch. Xuquje' xub'an wa' rumal ri Loq'alaj Espiritu ri xuya jalajoj taq kuinem chqe chqajujunal jas ri xraj ri Are'.

Ri Jesucristo xjunamataj kuk' ri rachalal

⁵ Ri Dios man xuya tä chke ri ángeles chi ketaqan puwi' ri k'ak' uwächulew ri kāk'oji na, ruwächulew ri tajin käqatzizijoj. ⁶ Xane pa jun u xaq wuj re ru Loq' Pixab' ri Dios ri Tz'ib'talik k'o jun ri xuq'alajisaj, xub'ij:

Qajaw Dios, ¿jas u b'anik jun winaq
chi ri lal kok la il che ri are'?

¿Jas lo u b'anik ri winaq

ri xa kākämik chi kächajin la che?

—kächa'.

⁷ Xa kieb' oxib' q'ij xqasaj la

u q'ij ri are' chkiwäch ri ángeles.

Pune ta ne je ri', xya chi na la u q'ij,

nim xil wi la.

Xya k'u la taqanik pu q'ab' puwi' ronojel

ri b'anom la.

⁸ Xya la taqanik pu q'ab'
puwi' nimalaj ronojel ri k'olik,
—xcha ri'.

Je k'u ri', aretaq ri Dios xuya chke ri winaq
chi ketaqan puwi' ronojel, man k'o tä ri
xutas kanoq ri mat ketaqan puwi'. Pune k'u
je ri', käqilo chi k'ä e k'o na jastaq ri mäja'
ketaqan ri winaq pa ki wi' kämik. ⁹ Käqil k'u
ri Jesús ri xqasax u q'ij chkiwäch ri ängeles
kieb' oxib' q'ij rumal ri Dios. Je ri' rech
käkämisax ri Are' rumal qech uj qonojel. Te
k'u ri' xyi' u q'ij, nim xil wi rumal chi xuriq
ri kämikal. Je k'u wa' ri u rayib'al ri Dios
che rumal chi ri Dios sib'alaj xutoq'ob'isaj
qa wäch.

¹⁰ Ronojel ri k'olik are xb'an rumal ri Dios,
xuquje' chuya'ik u q'ij ri Are' k'o ronojel ri
k'olik. Ri Dios k'ut kraj chi konojel ri ralk'ual
känimarisax ki q'ij junam ruk' ri Are'. Rumal
wa' xuriq k'äx ri Cristo ri To'l Ke konojel ri
winaq, rech qas je' kel ri Are' jas ri kraj ri
Dios. ¹¹ Je ri', rumal chi ri jun ri kub'ano
chi ri ralk'ual ri Dios käkijach kib' pu q'ab' ri
Are', xuquje' ri ki jachom kib', xa jun ri ki
Tat k'olik. Rumal ri' ri u K'ojol ri Dios man
käk'ix tä ri' chub'ixik "qachalal!" chke. ¹² Je
wa' kub'ij ri Are' pa ru Loq' Pixab' ri Dios ri
Tz'ib'talik:

Kintzijon na chij la
chke taq ri wachalal,
kinb'ixoj k'u himnos chuya'ik q'ij la
chkiwäch konojel ri ki mulim kib',
—kächa'. ¹³ Xuquje' kub'ij ri Are':
Ri in kinjikib'a' na ri wanima'
chrij ri Dios,
—kächa'. Kub'ij xuquje':
Waral in k'o wi kuk' ri alk'ualaxelab'
ri xuya ri Dios chwe,
—kächa ri Are'.

¹⁴ Uj ri' ri ralk'ual ri Dios, qonojel ri uj, uj
winaq. Je ri' xuquje' xub'an ri Jesús. Ri Are'
xil u wäch jas jun winaq, junam käka'yik.
Ri Are' xok che winaq rech kuya' käkämik.
Je' xb'anik rech käkowin ri Are' chusachik u
wäch ri Itzel ri k'o taqanik pu q'ab' che ri
kämisaniq. ¹⁵ Je ri' xeutzoqopij konojel ri je'
ta ne e chaptalik xa rumal chi pa ronojel ri
ki k'aslemal ki xem kib' cho ri kämikal. ¹⁶ Qas
tzij k'ut chi ri Cristo man xpe tä che ki to'ik ri
ängeles, xane che ki to'ik ri winaq ri k'o ri qa
mam Abraham che ri ki mam ojer. ¹⁷ Rumal
ri' ri Cristo xjunamataj kuk' ri rachalal pa
ronojel. Je ri' rech kel u k'ux chke ri winaq.
Kuya' k'ut kok che ki nimal sacerdotes ri qas
jikom ranima' cho ri Dios rech käsachtaj ki
mak ri winaq rumal chi xuya rib' che jun
sipanik cho ri Dios. ¹⁸ Ri Are' k'ut xuriq k'äx,
xtaqchi'x chub'anik ri mak. Je ri' käkowin
che ki to'ik ri winaq ri ketaqchi'x chub'anik
ri mak.

3

*Ri Jesús are nim na u b'anik chuwäch ri qa
mam Moisés*

¹ Je k'u ri', qachalal, ix ri' ix rech ri Dios,
ix jun chkixol ri e sik'im rumal ri Dios. Qas
chixchoman b'a' chrij ri Cristo Jesús ri qas
apóstol, ri qas ki nimal sacerdotes re ri ko-
jonik ri käqatzijoj. ² Ri Cristo Jesús, Are' qas
jikom ranima' cho ri Dios, ri xkojow che we
patäninik ri'. Je' k'u xub'an ri qa mam Moisés
xuquje', are' qas jikom ranima' xpatänin cho
ri Dios chkixol ri alk'ualaxelab' rech ri Dios.
³ Ya'tal k'u che ri Jesús chi känimarisax na u
q'ij chuwäch ri qa mam Moisés je' jas jun
yakal ja ya'talik chi käyi' na u q'ij chuwäch
ri ja ri xuyako. ⁴ Ronojel ja rajwaxik käb'an
na rumal jun winaq. Are k'u ri b'anowinaq
ronojel ri k'olik are ri Dios. ⁵ Qas tzij
k'ut, ri qa mam Moisés qas jikom ranima'
xpatänin che ri Dios pa ronojel chkixol ri
alk'ualaxelab' rech ri Dios. Ri patäninik ri
xub'ano are u q'alajisaxik ri kub'an na ri
Dios. ⁶ Are k'u ri Cristo qas jikom ranima'
je' jas jun alk'ualaxel ri qas k'o u taqanik
pa ki wi' ri rachalaxik ri Dios. Uj k'u ri'
ri achalaxik ri' rech ri Dios, we käqataqej ri
kojonik che ri Cristo, man kub'an tä k'u kieb'
qa k'ux k'ä käk'is na ronojel. Je ri' we qas
kujkikot ama'q'el ruk' ri ku'l wi qa k'ux.

*Waral käqil wi chi käkiriq na uxlanem ru
winaqil ri Dios*

⁷ Rumal k'u ri' je' jas ri kub'ij ri Loq'alaj
Espíritu chupam ru Loq' Pixab' ri Dios ri
Tz'ib'talik:
Kämik, we kita ri kub'ij ri Dios,
⁸ mib'an b'a' che ri iwanima'
chi xa kab'ajarik
jas ri xka'n ri winaq
ri xkiwalijisaj kib' chrij ri Dios,
xkiyak k'u royowal ri Are'
pa ri juyub' ri kätz'inowik.
⁹ Chila', pa ri juyub' ri kätz'inowik
ri i nan tat ojer xa xkiyak woyowal,
pune kawinaq junab'
xkil ronojel taq ri xinb'ano,
xuquje' taq ri kajmab'al,
—kächa ri Dios.
¹⁰ Rumal ri' xyaktaj woyowal chkiq
ri winaq ri',
xinb'ij k'ut: "We winaq ri'
xaq kub'an kieb' ki k'ux,
man käkaj tä k'ut keniman
chke taq ri nu taqanik,"
—xinha pa wanima'.
¹¹ Rumal ri' xyaktaj woyowal chkiq,
xinb'an k'u juramento, xinb'ij:
"We winaq ri' man käkiriq tä na
ke ri uxlanem wuk' in,"
—xinha ri'.
¹² Chichajij b'a' iwib', qachalal, k'o jun
chiwe mäk'iy etzelal pa ranima', ri xa kutas

kan rib' chrij ri k'aslik Dios, ri mat käkojon chi che ri Are'. ¹³ Xane chiwalijisaj ri iwanima' chb'il taq iwib' ronojel q'ij, kämik ri' ri k'a k'o na ri q'ij. Je ri' rech k'o jun chiwe mäsub'taj rumal ri mak, kuwalijisaj ta k'u rib' chrij ri Dios. ¹⁴ We käqataqej ri qa konjonik chrij ri ku'l wi qa k'ux petinaq loq, k'a käk'is na ronojel, käqariq na qe ronojel u wäch tewchib'al junam ruk' ri Cristo.

¹⁵ Je ri' kub'ij ru Loq' Pixab' ri Dios, Kämik ri' we kita ri kub'ij ri Dios, mib'an b'a' chi ri iwanima'

xa kab'ajarik

je' jas ri xka'n ri winaq

ri xkiwalijisaj kib' chrij ri Dios,

—kächa ri'. ¹⁶ Jachin k'u taq ri' ri winaq ri xkita ru ch'ab'al ri Dios, te k'u ri' xa xkiwalijisaj kib' chrij? E are' konojel ri winaq ri xeb'el loq pa Egipto ri xk'am ki b'e rumal ri qa mam Moisés. ¹⁷ Jachin taq chkij xyaktaj wi royowal ri Dios kawinaq junab'? Chkij konojel ri xemakunik. Xekäm k'u kan ri e are' pa ri juyub' ri kätz'inowik. ¹⁸ Jachin taq chkij xub'an wi juramento ri Dios chi man käkiriq tä na ke ri uxlanem ruk'? Chkij ri winaq ri man xeniman taj. ¹⁹ Käqilo chi man xekowin taj xkiriq ke ri uxlanem rumal chi man xekojon taj.

4

¹ Kämik k'ut, ri tajin käb'ix chqe rumal ri Dios chi käqariq qe ri uxlanem ruk', qila b'a' qib' k'o ne jun chiwe mel kanoq ri mat kuriq re ri uxlanem ri'. ² Are xuquje' xtzijox ri Utzalaj Tzij re ri Evangelio chqe uj je' jas ri xtzijox chke ri e are'. Man k'o tä k'u xupatänij ri Tzij ri xtzijox chke, rumal chi aretaq xkito, man xekojon taj. ³ Ri uj k'ut, ri uj kojoninaq, uj ri' ri käqariq na qe ri uxlanem ruk' ri Dios, jas ri u b'im ri Are':

Xa je ri' xyaktaj woyowal chkij,

xinb'an juramento, xinb'ij:

We winaq ri' man käkiriq tä na ke ri uxlanem wuk' in,

—xcha'. Je' xub'ij ri Dios wa' pune ta ne xk'is na ru chak ri xub'ano tzaretaq xb'antaj we uwächulew. ⁴ Pa jun u xaq ru Loq' Pixab' ri Dios ri Tz'ib'talik käb'ix wi chrij ri uwuq q'ij: Ri Dios xuxlan che ronojel ru chak

pa ri uwuq q'ij,

—kächa'. ⁵ Jumul chik kub'ij ru Loq' Pixab' ri Dios ri Tz'ib'talik:

We winaq ri' man käkiriq tä na ke ri uxlanem wuk' in,

—kächa'. ⁶ E k'o k'u jujun ri mäja' käkiriq ke we uxlanem ri'. Ri nik'iaj, ri nab'e xtzijox ri Utzalaj Tzij re ri Evangelio chke, man xkiriq tä ke ri uxlanem rumal chi man xeniman taj. ⁷ Rumal k'u ri' ri Dios xuch'ik jun q'ij chik, kämik k'u ri'. Ri Dios kujutzijob'ej

rumal ri xub'ij ri qa mam David pa jun u xaq ru Loq' Pixab' ri Dios ri Tz'ib'talik ri ya xqab'ij. Are wa' ri xub'ij ri Dios ok'owinaq chi k'ia junab':

We kita ri kub'ij ri Dios kämik,

mib'an b'a' chi ri iwanima'

xa kab'ajarik,

—kächa'. ⁸ We ta ri qa mam Josué xuya ta ri qas uxlanem chke ri winaq aj Israel, mat xch'aw ri Dios ri' chrij jun q'ij chik re uxlanem. ⁹ Kämik k'ut k'o na kan jun je'lalaj uxlanem chik chke ru winaqil ri Dios. ¹⁰ Jachin k'u ri kuriq re ri uxlanem ri kuya ri Dios, kuxlan ri' che ronojel ru chak, je' jas ri Dios xuxlan ojer che ronojel ru chak ri Are'. ¹¹ Qakojo b'a' qa chuq'ab' rech käqariq na qe we uxlanem ri', k'o ne jun chqe mub'an re jas ri xka'n ri nik'iaj ri man xekojon taj.

¹² Ru Loq' Pixab' ri Dios are k'aslik, xuquje' k'o u chuq'ab'. Are je' ta ne jun espada ri sib'alaj käsokon na chuwäch apachike espada ri kieb' u pu chi'. Käjuch'uch'ik kopan pa ri ranima' ri winaq, kuriqa ri espíritu, kopan pa ri b'aq, ke' pu k'ux ri winaq. Käresaj loq chisaq ronojel ri k'o pa ru chomab'al, ri k'o pa ranima' ri winaq. ¹³ Man k'o tä k'u jun jasach ri k'olik ri kuya' käk'u'taj chuwäch ri Dios. Xane ronojel ri k'olik are käq'alajinik, saq k'u chuwäch ri Dios ri käqajach wi na qa kuenta.

Waral käqil wi chi ri Jesús are ri ki nimal sacerdotes ri sib'alaj nim u q'ij

¹⁴ Qataqej b'a' ri qa konjonik, rumal chi ri Jesús, ru K'ojol ri Dios, are qa sacerdote. Are k'u ki nimal sacerdotes wa' ri sib'alaj nim u q'ij ri xopan chuwäch ri Dios chila' chikaj. ¹⁵ Ri nimalaj qa sacerdote käkowinik kel u k'ux chqe uj ri man k'o tä qa chuq'ab', rumal chi ri Are' xtaqchi'x che ronojel u wäch mak jas ri käb'an chqe uj, man xqaj tä k'u pa mak. ¹⁶ Rumal ri' mäqaxej b'a' qib', chujqeb' chuwäch ri je'lalaj u t'uyulib'al ri Dios ri kutoq'ob'isaj ki wäch konojel. Je ri' rech kel u k'ux chqe, kutoq'ob'isaj qa wäch uj, kujuto' pa ri q'ij ri k'o qa rajwaxik.

5

¹ Ronojel ki nimal sacerdotes* are cha'tal chikxol ri winaq. Kojom k'u ri are' che ki k'exwäch ri winaq chuwäch ri Dios, xuquje' che ki ya'ik sipanik, che ki kämisaxik awaj cho ri Dios rech käsachtaj ri ki mak ri winaq. ² Ri sacerdote k'ut are jun winaq ri kuya' kätaqchi'x che mak rech ri are' käkowinik kutoq'ob'isaj ki wäch ri winaq ri man k'o tä ketam, ri ki sachom ri ki b'e. ³ Rumal chi xa winaq, rajwaxik keukämisaj awaj cho ri

* 5:1 "Sacerdote aj Israel": Chawila' ri San Lucas 1:8, xuquje' ri Diccionario, k'isb'al re we Nuevo Testamento.

Dios rech käsachtaj ru mak ri are' junam jas ri kub'ano rech käsachtaj ki mak ri winaq.

⁴ Man k'o tä k'u jun ri kākowinik kukoj rib' che ki nimal sacerdotes xaq pa re wi, xane are ri Dios käsik'inik, kuya k'u ri reqlen' ri' ri nim u q'ij jas ri xub'an che ri qa mam Aarón. ⁵ Je k'u ri' ri Cristo, ri Are' man xa tä xukoj rib' che ki nimal sacerdotes, xane are ri Dios xyo'w ri reqlen' ri' ri nim u q'ij, je' jas ri xub'ij che:

Ri at ri', at nu K'ojol,

kämik xinok che ra Tat,

—xuchixik. ⁶ Xuquje' pa jun u xaq ru Loq' Pixab' ri Dios chik, kub'ij:

Ri at ri', at sacerdot

ri man k'o tä awelik,

je' jas ru b'anik ri Melquisedec,

—kächa'. ⁷ Ri Cristo aretaq xk'asi waral cho we uwächulew, ri Are' ko xch'awik, xub'an orar, xel k'u u wa'l u wäch aretaq xuta' toq'ob' che ri Dios ri kākowin chuto'ik cho ri kāmikal. Ri Dios k'ut xutatab'ej ri xub'ij ri Cristo rumal chi xujach rib' pu q'ab' ri Are'. ⁸ Je k'u ri' ri Cristo, pune Are u K'ojol ri Dios, rumal k'u ri k'äx ri xuriqo xretamaj ri nimanik. ⁹ Je ri' gas xujach rib' chub'anik ronojel ru rayib'al ri Dios. Rumal k'u ri Are' xpe ri tob'anik ri man k'o tä u k'isik ri kuya ri Dios chke konojel ri keniman che. ¹⁰ Xoksax k'u rumal ri Dios che ki nimal sacerdotes, jas ru b'anik ri Melquisedec.

Waral kâqil wi ri k'äx ri kuriq jun winaq we kuya kan ri kojoniq

¹¹ Sib'alaj k'o na ri kâqaj kâqab'ij chrij wa' ri tajin kâqatzijoj. K'äx k'u u q'alajisaxik wa' chiwe, rumal chi ri ix man kiwaj taj kich'ob'o'. ¹² Ri ix ya ojer chik ix kojoniq, rajwaxik k'ut chi ix chik keitijoj nik'iaj chik. Man je' tä k'u ri'. Xane xa rajwaxik i tijoxik chi na ix che ri nab'e taq tijonik ri man k'äx tä u ch'ob'ik rech ru Loq' Pixab' ri Dios. Xa man k'o tä i chuq'ab', je' ta ne chi k'ä ix ak'alab' na, rajwaxik k'u na ri tu' chiwe chuk'exwäch ri wa. ¹³ Konojel ri xaq leche kâkitijo, e je' ta ne ak'alab' ri k'ä ketu' na. Mäja' kekowin ri' kâkich'ob'o' jas ri' ri u b'anik ri jikomal pa ri ki k'aslemal. ¹⁴ Are k'u ri wa are chke ri ya e ri'jab' chik, ri kekowin chik kechomanik, ri kekowin chik kâkich'ob'o' jachike ri utz, jachike ri man utz taj.

6

¹ Je k'u ri', qaya b'a' kan ri nab'e taq tijonik chrij ri Cristo rech kâqataqej k'iyem, kâtz'aqat k'u ri qa chomab'al. Mâqatzijoj chik jas ri xqatzijoj kan nab'e, chi rajwaxik kâkik'ex kanima' ri winaq, kâkik'ex k'u ki chomanik rech kâkiya kan u b'anik ri etzelal ri kâk'aman b'i pa ri kāmikal. Mâqatzijoj chik xaq xuwi ri kojoniq chrij ri Dios. ² Mâqatzijoj

chik xaq xuwi ri tijonik chrij ri qasna', o chrij ru ya'ik q'ab'aj pa ki jolom ri kojonelab', chrij ri ki k'astajik ri kâminaqib', xuquje' chrij ri q'atow tzij, tojb'al ri man k'o tä u k'isik ri kuya ri Dios chke ri winaq. ³ Qataqej b'a' k'iyem pa ri kojoniq ruk' ru tob'anik ri Dios pa qa wi'.

⁴ Je ri', rumal chi ri winaq ri e k'o chi pa ri saqil rech ri Utzalaj Tzij re ri Evangelio, man kuya' tä chik ketzelej chikij we ketzaq chi na pa mak, rumal chi ki k'amowam chik ri tewchib'al ri kuya ri Dios, k'o chik ri Loq'alaj Espiritu. ⁵ Ri winaq ri' xuquje' ki k'amowam ri je'lalaj u Loq' Pixab' ri Dios, xuquje' ru chuq'ab' ru taqanik ri Dios pa taq ri q'ij ri junab' ri kepe na. ⁶ We winaq ri', we ketzaqik, man kuya' tä chik kâb'ix chke chi kâkik'ex chik ri kanima', kâkik'ex k'u ki chomanik, rumal chi ri e are' ruk' ri tajin kâka'n pa ri ki k'aslemal xa tajin kâkirip chi jumul ri u K'ojol ri Dios, xa tajin kâkesaj u k'ixb'al chkiwäch konojel ri winaq. ⁷ E junam wa' ruk' ri ulew ri kub'iq' ri jâb' ri kâqaj amaq'el. We ri ulew ri' kuya utzalaj tiko'n ri kewächinik chke ri ketajinik, k'o ru tewchib'al ri Dios puwi'. ⁸ We k'u xa k'ix kek'iy chuwäch xuquje' q'ayes, man k'o tä u patân ri'. Kâpe na k'äx puwi' rumal ri Dios, chuk'isb'al k'ut kâporox na.

Waral kâqil wi jas ri' ri kâku b'i wi qa k'ux chrij

⁹ Loq'alaj taq qachalal, pune k'u je' kujtz-ijon wa', qas qetam chi ri ix kiriq na ri nimalaj u tewchib'al ri Dios rumal chi i rigom chik ru tob'anik ri Are'. ¹⁰ Je ri', rumal chi ri Dios gas kub'an ri jikomal. Man käsach tä na pu jolom ri i b'anom, ri rutzil iwanima' ri i k'utum che ri Are' aretaq kiya tob'anik chke ri qachalal kojonelab', are k'u wa' ri tajin kib'an na kâmik. ¹¹ Kâqaj k'ut chi chijujunal kitaqej u b'anik wa' ruk' kikotemal ri kâpe pa iwanima' k'ä kik'is na u b'anik ronojel, rech gas je' kel wi na ri iweye'm. ¹² Man kâqaj taj chi kixsaq'orinik, xane chi kib'an iwe jas ri xka'n ri nik'iaj ri rumal chi xekojonik xuquje' xkichajij paciencia xkechb'ej ri echb'al ri xuchi'j ri Dios chke.

¹³ Aretaq ri Dios xuchi'j che ri qa mam Abraham chi kutewchij na, xukoj rib' ri Are' che u juramento rumal chi man k'o tä chi jun ri nim na u q'ij chuwäch ri Are'. ¹⁴ Xub'ij k'u che ri qa mam Abraham: "Qas tzij sib'alaj katintewchij na, kinb'an na chi e k'ia ri awachalaxik ri kil na ki wäch pa taq ri q'ij ri junab' ri kepetik." —xcha'. ¹⁵ Ri qa mam Abraham xuchajij paciencia, xreyej na. Je ri' xuk'amo jas ri xchi'x che rumal ri Dios. ¹⁶ Ri winaq, aretaq kâka'n juramento, kâkikoj ru b'i' jun ri nim na u b'anik chkiwäch ri e are' chub'anik ri ki juramento. Aretaq kâkikijab'a ki tzij ruk' juramento, man

k'o tä chi jas chrij kech'ojin wi. ¹⁷ Rumal ri' ri Dios xujikib'a u b'ixik ri xuchi'j ruk' juramento. Je ri', rumal chi xraj xuq'alajisaj chkiwäch ri keechb'en na ri xuchi'j chi ri Are' man kuk'ex tä ru chomanik, xane qas kub'an na jas ri xub'ij. ¹⁸ Je k'u ri' e k'o kieb' ri man kuya' taj kek'exik, ri xuchi'j ri Dios, xuquje' ri u juramento. Kumal k'u wa' ri Dios man kuya' taj ri mat kub'an ri xub'ij. Kumal k'u wa' xuquje' ri Dios qas xuku'b'isaj qa k'ux uj ri qa tzukum ru tob'anik. Qa jikib'am k'u qa k'ux chrij ri xuchi'j ri Dios chqe, chrij k'u ri u yo'm chqawäch. ¹⁹ We kul'b'al qa k'u ri' qas kuchap ri qanima', je' jas ri kub'an ri jun nimalaj ch'ich' ri käb'ix ancla* che ri kuchap ri jun barco. Ri uj xuquje' k'o jun qa ancla ri ko ximalat chrij ri tasb'al u pam ri Loq'alaj K'olib'al rech ri nimalaj rachoch Dios ri k'o chila' chikaj. ²⁰ Chila' xok wi ri Jesús che qa k'exwäch chupakik jun b'e chqawäch. Je ri' ri Jesús xok che qa nimal sacerdotes ri man k'o tä relük jas ru b'anik ri Melquisedec.

7

Waral käqil wi chi ri Jesús are sacerdote jas ru b'anik ri Melquisedec

¹ We Melquisedec ri' are wa' ri xk'oji che nim taqanel pa ri tinimit Salem,* xuquje' are sacerdote rech ri nimalaj qa Dios aj Chikaj. Aretaq ri qa mam Abraham xtzelej loq pa ri ch'oj ri xechb'ak wi ri nimaq taq taqanelab', ri Melquisedec xel loq chuk'ulaxik, xutewchij k'ut. ² Xuya k'u ri qa mam Abraham che ri Melquisedec ru lajujil ronojel ri xutoqij loq pa ri ch'oj. Ri b'i'aj Melquisedec nab'e kel kub'ij "nim taqanel ri jikom ranima". Xuquje' kel kub'ij "nim taqanel ri kuya utzil chxixol ri winaq", rumal chi are nim taqanel puwi' ri Salem. Ri Salem kel kub'ij "ri kuya utzil chxixol ri winaq". ³ Man k'o tä käb'ix chxij ru nan u tat ri Melquisedec, o chxij taq ru mam. Man k'o tä käb'ix chrij jampa' xil u wäch, xuquje' jampa' xkämik. Je ri' are jun k'utb'al chrij ru K'ojol ri Dios. Are jun sacerdote wa' ri man k'o tä relük.

⁴ Q'alaj b'a' chi ri Melquisedec are jun taqanel ri nim u b'anik, rumal chi ri qa mam Abraham xuya che ru lajujil ronojel ri xutoqij loq chke ri nimaq taq taqanelab' pa ri ch'oj. ⁵ Kub'ij ru Pixab' ri Moisés chi ri rachalaxik ri Levi ri keb'ok che taq sacerdotes yo'm taqanik pa ki q'ab' rech käkitoq'ij ru lajujil ronojel chke ri winaq, pune ri winaq e are' kachalal, pune ri e are' xuquje' e rachalaxik ri qa mam Abraham. ⁶ Ri Melquisedec, pune man rachalaxik tä ri Levi, xutoq'ij k'u ru lajujil ronojel che ri qa

mam Abraham, ru k'amom ri xuchi'j ri Dios. Xaq je ri' ri Melquisedec xutewchij ri qa mam Abraham. ⁷ Man k'o tä k'u jun ri mat kukojo chi ri jun ri kätewchirik are nim na u q'ij chuwäch ri jun ri kätewchirik. ⁸ Konojel ri kek'amow ri lajujil waral chqaxol uj e winaq wa' ri xa kekämik. Are k'u ru Loq' Pixab' ri Dios ri Tz'ib'talik man kub'ij tä chi ri Melquisedec xkämik. ⁹ Kuya' käqab'ij chi ri Levi xuquje' ri rachalaxik ri are' ri keb'ok che sacerdotes, ri käkitoq'ij ru lajujil ronojel chke ri winaq kämik, je' ta ne chi ri e are' xuquje' xkiya ri' ru lajujil ronojel che ri Melquisedec aretaq xuya re ri qa mam Abraham. ¹⁰ Je ri', rumal chi ri qa mam Abraham je' ta ne e ruk'am na pa ru cuerpo ri rachalaxik ri mäja' xil ki wäch aretaq ri Melquisedec xel b'ik chuk'ulaxik ri are'.

¹¹ Ri winaq aj Israel xyi' ri Pixab' chke kumal ri sacerdotes aj Levi ri e rachalaxik kan ri qa mam Aarón. We ta ri sacerdotes ri' ruk' ri Pixab' qas xekowinik xka'n utz che ri ki k'aslema' ri winaq cho ri Dios, mat rajwaxik ri' chi xwalij jun sacerdote chik jas ru b'anik ri Melquisedec, ri mat junam ruk' ri qa mam Aarón. ¹² Are k'u we käk'extaj ri sacerdote, rajwaxik ri' xuquje' käk'extaj ri Pixab'. ¹³ Are k'u ri Qajaw Jesús, ri käch'aw ru Loq' Pixab' ri Dios ri Tz'ib'talik chrij, ri Are' are aj re jun tinimit chik re Israel. Man k'o tä k'u jumul okinaq jun re ri tinimit ri' che sacerdote. ¹⁴ Qas q'alaj k'ut chi ri Qajaw Jesús are aj Judá, are k'u ri qa mam Moisés, aretaq xch'aw chxij ri sacerdotes, man k'o tä jas xub'ij chxij ri winaq aj Judá.

¹⁵ Qas q'alaj k'u wa' rumal chi ri k'ak' sacerdote ri xwalijik are je' jas ru b'anik ri Melquisedec. ¹⁶ Man xok tä k'u wa' che sacerdote rumal ri ki pixab' winaq ri kub'ij jachin taq ri rachalaxik, xane rumal ru chuq'ab' jun k'aslema' ajchikaj ri man käsach tä u wäch. ¹⁷ Are k'u wa' ri xch'aw ri Dios chrij aretaq xub'ij:

At ri', at sacerdote

ri man k'o tä awelik

je' jas ru b'anik ri Melquisedec, —kächa'. ¹⁸ Je k'u ri' ri ojer taqanik xaq xyi' kanoq rumal chi man k'o tä u chuq'ab', xuquje' man käkowin tä ri' che ki to'ik ri winaq. ¹⁹ Ri Pixab' ri xutz'ib'aj ri qa mam Moisés man xkowin taj xub'an utz che ru k'aslema' ri winaq cho ri Dios. Chuk'exwäch ri Pixab' k'o ri qas utz na ri käku'b'i qa k'ux chrij. Rumal k'u wa' kuya' kujqeb' ruk' ri Dios.

²⁰ Ri Dios k'ut xub'an ronojel wa' ruk' juramento. ²¹ Ri nik'iaj sacerdotes chik man ruk' tä juramento xekojik. Are k'u ruk' juramento xok ri Jesús che sacerdote. Kub'ij k'u ru Loq' Pixab' ri Dios ri Tz'ib'talik:

* 6:19 "Ancla": Chawila' Hechos 27:29, nota.

* 7:1 Ri tinimit Salem are ri tinimit Jerusalén ojer.

Ri Qajaw Dios xub'an juramento,
man kuk'ex tä k'u ru chomanik:

“At ri', at sacerdote

ri man k'o tä awelik

je' jas ru b'anik ri Melquisedec,”

—kächa'. ²² Rumal ri' ri Jesús are jun kojol tziy ri qas kujikib'a ri jun trato, ri utz na chuwach ri nab'e. ²³ Ri nik'iaj sacerdotes chik xek'iarik. Rumal chi xa xekämik man xekowin taj xkitagej u b'anik ri ki chak. ²⁴ Are k'u ri Jesús man käkäm taj. Rumal ri' man k'o tä relik che sacerdote. Man kok tä jun chik che u k'exel. ²⁵ Rumal k'u ri' ronojel q'ij käkowinik keuto' ri winaq ri keopan ruk' ri Dios rumal ri Are'. Je ri', rumal chi man käk'is tä ru k'aslemal, xane k'o ronojel q'ij chuta'ik toq'ob' che ri Dios pa ki wi'.

²⁶ Je k'u ri' ri Jesús are wa' ri ki nimal sacerdotes ri qas rajwaxik chqe. Ri Are' tastal chrij ronojel u wäch etzelal, man k'o tä k'u jub'iq' ru mak. Man u b'anom tä etzelal, man xub'an tä re ri kaka'n ri ajmakib'. Xk'am b'i sib'alaj chikaj, nim k'u na u q'ij chuwach ronojel ri u b'anom ri Dios. ²⁷ Ri Are' man je' taj jas ri nik'iaj taq ki nimal sacerdotes chik ri ronojel q'ij kekikämisaj awaj che ki sipaxik cho ri Dios. Kaka'n wa' rech käsach ri ki mak ri e are' nab'e, te k'u ri' rech käsach ri ki mak ri winaq. Ri Jesús k'ut xa jumul ri' xuya jun sipanik cho ri Dios aretaq xujach rib' pa ri kämikal. ²⁸ Ri Pixab' ri xutz'ib'aj ri qa mam Moisés kukoj taq achijab' ri xa e ajmakib' che ki nimal sacerdotes. Are k'u ri juramento ri xub'an ri Dios aretaq k'o chi ri Pixab', are xukoj ru K'ojol ri Dios che ki nimal sacerdotes. Are ki nimal sacerdotes wa' ri jikom ranima', ri man k'o tä u mak, ri k'o ronojel q'ij.

8

Waral käqil wi chi ri Jesús are kojol tziy ri xub'an jun k'ak' trato

¹ Are k'u ri nim na u b'anik che ri tajin käqab'ij, are wa': Ri Jesucristo, ri ki nimal sacerdotes ri k'o pa qa wi' uj, t'uyul ri Are' pa ru wikiäq'ab' ri Dios chila' chikaj. ² Are sacerdote wa' ri käpatänin pa ri qas Loq'alaj Ja ri xb'an rumal ri Qajaw Dios, man kumal tä ri winaq. ³ Ronojel ki nimal sacerdotes are kojom chuya'ik sipanik xuquje' che ki kämisaxik awaj ri kesipax cho ri Dios, rumal k'u ri' ri Jesucristo rajwaxik chi ri Are' xuquje' k'o jas kuya che sipanik cho ri Dios. ⁴ We ta ri Cristo xaq are k'o waral cho we uwächulew, mat okinaq ri' che sacerdote rumal chi k'a e k'o na sacerdotes ri käkiya sipanik cho ri Dios jas ri kätäqan wi ri Pixab' ri xutz'ib'aj ri qa mam Moisés. ⁵ We sacerdotes ri', aretaq kepatäninik kekikoj jastaq

ri e k'utb'al chikij ri jastaq ri qas e k'o chila' chikaj. Qetam chi xa e k'utb'al, rumal chi ri Dios xub'ij che ri qa mam Moisés aretaq xuchomaj u yakik ri rachoch Dios.* “Qas chawila', je' kab'an na che ronojel jas ri xink'ut chawäch pa ri nimalaj juyub',† — xcha che. ⁶ Are k'u ri qa sacerdote uj ri kojom che ki nimal sacerdotes, are utz na ri patäninik ri kub'ano rumal chi are kojol tziy ri xub'an ri jun k'ak' trato ri utz na chuwach ri nab'e, rumal chi kuchi'j wi ri Dios nimaq taq tewchib'al ri qas e utz na.

⁷ We ta qas utz xel ri nab'e trato, mat rajwaxik ri' xb'an chi jun trato chik. ⁸ Ri Dios k'ut xrilo chi man utz tä ri ki k'aslemal ri winaq aj Israel, je' jas ri xub'ij pa ru Loq' Pixab' ri Tz'ib'talik:

Ri Qajaw Dios kub'ij: Käpe na ri q'ij aretaq kinb'an na jun k'ak' trato

kuk' ri winaq aj Israel,

kuk' ri winaq aj Judá,

—kächa ri Qajaw Dios.

⁹ Man junam tä k'u ri' ruk' ri trato

ri ximb'an kuk' ri ki mam ojer

pa ri q'ij ri xink'am ki b'e

rech keinwesaj loq

pa ri nim tinimit Egipto.

Man xka'n tä k'ut

jas ri kub'ij ri trato ri ximb'an kuk',

rumal k'u ri' xeinya kanoq,

kub'ij ri Qajaw Dios,

—kächa ri'.

¹⁰ Ri trato ri kinb'an na

kuk' ri winaq aj Israel

pa taq ri q'ij ri kepetik

are wa', kub'ij ri Qajaw Dios:

Kinya na ri nu Pixab'

pa taq ri ki chomab'al,

kintz'ib'aj k'u na wa'

pa taq ri kanima'.

Kinok chi na che ki Dios,

are k'u ri e are' keb'ok na

che ri nu winaq in.

¹¹ Man k'o tä na jun winaq rajwaxik

kuya tijonik che jun winaq chik.

Man kuya tä tijonik che ri rachi'l,

man kuya tä k'u tijonik che ri rachalal

rech qas käretamaj u wäch ri Dios

rumal chi konojel winaq

käketamaj na nu wäch,

chi ak'alab', chi ri'jab'.

¹² Kinkuy na ri etzelal ri ka'nom,

man k'o tä k'u jub'iq' ri ki mak

ri kána'taj chi na chwe,

—kächa ri Qajaw Dios. ¹³ Aretaq kub'ij ri Dios chi k'o chi jun k'ak' trato, kel kub'ij chi ri nab'e trato ya xok'owik, man k'o tä chi u patän. Ri ojer trato ri ya xok'owik, käsach na u wäch chanim.

* 8:5 Chawila' ri tziy “Rachoch Dios” pa ri Diccionario, k'isb'al re we Nuevo Testamento. † 8:5 Ri nimalaj juyub' ri' are ri käb'ix “juyub' Sinai” che.

9

Waral kâqil wi ru jalb'em rib' ri Loq'alaj Ja ri k'o chikaj ruk' ri rachoch Dios ri k'o cho we uwächulew

¹ Ri nab'e trato k'o ri u taqanik ri kub'ij jas ri rajwaxik chub'anik taq ri q'ijilanik. Are k'u jun q'ijilanik ri xa chupam jun rachoch Dios waral cho we uwächulew kâb'an wi. ² Ri rachoch Dios ri' are je wa' u b'anik: Pa ri nab'e u tas ri kâb'ix Loq'alaj K'olib'al che, chila' k'o wi ri tak'alib'al kantela re q'an puaq xuquje' ri mesa ri k'o wi ri wa ri yo'm cho ri Dios. ³ Ri ukab' u tas ri rachoch Dios are ri k'o chrij ri tasb'al u pam, are k'u wa' ri kâb'ix che: K'olib'al ri Sib'alaj Loq' na, — kuchixik. ⁴ Chila' k'o wi ri ta'b'al toq'ob' re q'an puaq ri kâporox wi ri incienso, xuquje' ri kaxa ri ch'uqum rij che q'an puaq, ri k'olotal wi ri trato. Chupam ri kaxa ri' k'o jun xaro re q'an puaq ri k'o maná* chupam, k'o k'u ru ch'imiyi ri qa mam Aarón ri xtuxik, xuquje' e k'o ri tz'alam taq ab'aj chupam ri xetz'ib'ax wi ri taqanik re ri trato. ⁵ Puwi' ri kaxa e k'o kieb' ángeles ri kâb'ix querubines chke ri kâkik'exwâchij ru k'olem ri Dios. E are k'u wa' ki lik'om ri ki xik' puwi' ri tz'apib'al u wi' ri kaxa ri kâb'an wi ri sachb'al mak. Man kujkowin tâ k'ut kâqatzijoi chi na más chrij ronojel wa' che we chanim ri'.

⁶ Je ri' e b'anom ri jastaq pa ri rachoch Dios. Ri sacerdotes k'ut ronojel q'ij keb'ok pa ri nab'e u tas ri rachoch Dios chub'anik ronojel ri kajwataj che ri q'ijilanik. ⁷ Are k'u pa ri ukab' u tas ri rachoch Dios xuwi kok ri ki nimal sacerdotes xa jumul che ri jun junab'. Aretaq kokik rajwaxik kuk'am b'i kik' kech awaj rech kuya cho ri Dios che sipanik che sachb'al u mak ri are' xuquje' che sachb'al ki mak ri winaq aj Israel. ⁸ Ruk' wa' we ri' ri Loq'alaj Espiritu kuq'alajisaj chqawâch chi aretaq tajin kâkoj ri nab'e u tas ri rachoch Dios che ri q'ijilanik, mâja' k'o ri okb'al chke ri winaq rech keopan pa ri K'olib'al ri Sib'alaj Loq' na. ⁹ Ronojel k'u wa' xa are jun k'utb'al chqawâch uj kâmik. Ri sipanik k'ut, xuquje' taq ri awaj ri kekâmisax che ki ya'ik cho ri Dios, man kekowin taj kâka' no chi ri winaq ri kâka' no che resaxik ri âwas chki, are k'u xaq e taqanik wa' ri xuwi k'o kâkipatânj k'â kâk'ex na ronojel rumal ri Dios.

¹¹ Kâmik k'ut ya xul ri Cristo. Are ki nimal sacerdotes wa' ri kuya chqe chi keqariq nimaq taq tewchib'al kâmik ri'. Kâpatânin k'u chupam ri qas Loq'alaj Ja ri utz na, ri

gas je'lik, ri man xa tâ b'anom kumal winaq, ri man rech tâ k'ut we uwächulew ri'. ¹² Xa jumul xok ri Cristo pa ri K'olib'al ri Sib'alaj Loq' na chutojik ri qa mak. Man are tâ chuya'ik ki kik'el taq k'isik', ki kik'el alaj taq wakâx cho ri Dios, xane tzare ru kik'el ri Are'. Ruk' wa' xub'ano chi xqariq ru tob'anik ri Dios ri man k'o tâ u k'isik'. ¹³ Qas tzij k'ut chi ri ki kik'el taq ri ama'ib' wakâx, ri ki kik'el taq ri k'isik', ru chajil ri alaj ati't wakâx ri kâporox puwi' ri ta'b'al toq'ob', ri kâchikox pa ki wi' ri winaq ri k'o ri âwas chki, qas kâkowin wa' che resaxik ri âwas chrij ri ki cuerpo. ¹⁴ We je ri', ¿a mat k'u sib'alaj k'o na u chuq'ab' ru kik'el ri Cristo? ¡je!, je ri'! Ri Cristo, rumal ri Loq'alaj Espiritu ri man kâkam taj, xujach rib' ri Are' cho ri Dios che jun sipanik ch'ajch'oj. Ru kik'el kâresaj ri etzelal pa qanima'. Te k'u ri' man kâqa'n tâ chik ri uj naq'atal wi nab'e ri man k'o tâ u patân. Je ri' utz kâqana' pa qanima' cho ri Dios, rech kujkowinik kâqapatânj ri k'aslik Dios.

¹⁵ Rumal ri' ri Jesucristo are kojol tzij re ri k'ak' trato. Ri Cristo xkâmisaxik rech kesachtaj ri mak ri xka'n ri winaq pa ru q'ijol ri nab'e trato, xuquje' rech ri e sik'im rumal ri Dios kâkiriq na ri echb'al ri man k'o tâ u k'isik ri xuchi' loq ri Dios chke. ¹⁶ Je ri', rumal chi we kâb'an jun wuj ri kâk'utuw ru rayib'al jun winaq, rajwaxik ri' kâq'alajisaxik chi qas kâminaq chik ri winaq ri xb'anow kanoq ri wuj ri' rech qas k'o u patân. ¹⁷ Ri wuj ri' xuwi k'o u patân aretaq kâminaq chik ri xb'anowik. We k'â k'asal na ri jun ri xb'anow ri wuj, man k'o tâ u patân ri'. ¹⁸ Rumal ri' aretaq xb'an ri nab'e trato, xekâmisax na jujun awaj, xtix k'u ri ki kik'el. ¹⁹ Ri qa mam Moisés xub'ij konojel taq ri taqanik re ri Pixab' chke konojel ri winaq aj Israel. Te k'u ri' xuk'am jun ch'âqap rismal chij ri b'anom kiâq che, xuquje' jun u q'ab' che', hisopo u b'i', xurub' pa ri ki kik'el ri alaj taq wakâx xuquje' ri ki kik'el ri k'isik', yuja'm k'u joron ruk', xuchikoj puwi' ri wuj re ri Pixab' xuquje' pa ki wi' ri winaq. ²⁰ Te k'u ri' xub'ij chke: "Are wa' ri kik' ri kujikib'a ri trato ri xub'an ri Dios iwuk'," — xcha chke. ²¹ Xuquje' ri qa mam Moisés xuchikoj kik' chrij ri rachoch Dios, xuquje' chki konojel ri jastaq ri xekoj pa ri q'ijilanik. ²² Je' jas ri kub'ij ri Pixab': Are rajwaxik chi ruk' kik' kesax ri âwas chrij ronojel. Man kâsachtaj tâ ri' ri mak ri b'anom kumal ri winaq, we man kâtix tâ ri kik'.

Waral kâqil wi chi ru kâmikal ri Cristo kâresaj ri qa mak

²³ Rajwaxik k'ut chi xtix ri ki kik'el taq ri awaj ri xesipax cho ri Dios che resaxik ri

* 9:4 "Maná": Are ri wa ajchikaj tzuqub'al ke ri winaq aj Israel aretaq xeb'in pa taq ri juyub' ri ketz'inowik. † 9:16 Are jun u wâch "pacto" o "trato" wa'.

äwas chkij ri jastaq ri' ri xa e k'utb'al chkij ri jastaq ri e k'o chila' chikaj. Are k'u ri jastaq ri e k'o chila' chikaj, rajwaxik chi k'o ri utz na chuwach ri ki kik'el ri awaj ri käsipax cho ri Dios chub'anik qas ch'ajch'oj chke. ²⁴ Ri Cristo man xok tä chupam ri rachoch Dios ri xa b'anom kumal winaq, ri xa jun k'utb'al ri' chrij ri qas rachoch Dios chikaj, xane qas chila' pa ri kaj xok wi ri Are'. Chila' k'ut k'o wi kämik cho ri Dios chuta'ik toq'ob' pa qa wi'. ²⁵ Ri ki nimal sacerdotes aj Israel rajwaxik chi kok ronojel junab' pa ri K'olib'al ri Sib'alaj Loq' na chujachik kik' ri man rech tä ri are' cho ri Dios. Are k'u ri Cristo man kujach tä rib' k'ia mul che sipanik cho ri Dios. ²⁶ We ta je ri', are k'ia mul ta na chi ri Cristo käminaq petinaq loq tzaretaq xb'antaj ruwachulew. Man je' taj xub'ano, xane kämik, ri tajin kepe ri k'isb'al taq q'ij pa qa wi', ri Cristo xpetik. Ri Are' xa jumul ri' xujach rib' che sipanik cho ri Dios che resaxik ri qas cho ri Dios. ²⁷ Rajwaxik chi konojel winaq xa jumul kekäm na cho we uwächulew, te k'u ri' käq'at na tzij pa ki wi' rumal ri Dios. ²⁸ Je k'u ri' xuquje' ri Cristo xa jumul xkämisaxik che resaxik ri ki mak ri winaq. Käpe chi k'u na jumul chik che ki to'ik konojel ri tajin keye'n che. Man käpe tä chi k'u che resaxik ri ki mak ri winaq.

10

¹ Ri Pixab' k'ut ri xutz'ib'aj ri qa mam Moisés man are tä jun qas k'utb'al ke ri utzalaj taq tewchib'al ri kepe na. Man are tä k'u wa' ri qas kilitaj na. Ri Pixab' man käkowin taj kub'an utz che ri ki k'aslemal ri winaq ri keb'ok cho ri Dios rumal ri ki kämisaxik awaj che ki sipaxik cho ri Dios ronojel junab'. ² We ta ri Pixab' käkowinik kub'an utz che ri ki k'aslemal ri winaq cho ri Dios, mat rajwaxik kutagej ki kämisaxik awaj che ki sipaxik cho ri Dios. We ta je ri', aretaq sachtajinaq chi ri ki mak ri winaq ri kejachow ri awaj cho ri Dios, käkina' ta na ri' pa kanima' chi man k'o tä chi ki mak. ³ Man je' tä k'u ri! Xane ri awaj ri kekämisax cho ri Dios xa e na'tab'al re ri ki mak ri winaq ronojel junab'. ⁴ Je ri', rumal chi ri ki kik'el taq ri ama' wakäx, ri ki kik'el taq ri k'isik' man käkowin tä wi käresaj ri mak.

⁵ Rumal ri' ri Cristo, aretaq xpe cho we uwächulew, xub'ij che ri Dios:

Man kaj tä la awaj
ri kekämisax chuwach la,
man kaj tä k'u la sipanik kech awaj,
xane xa xb'an la u b'anik
jun nu cuerpo (rech kinkämisax
chuwach la).

⁶ Ri sipanik kech awaj ri keporoxik,
ri awaj ri kekämisax chuwach la

che resaxik ri mak,
man utz taj kil wi la,
—xcha ri'.

⁷ Te ri' xinb'ij: "In k'olik ri', nu Dios.

In petinaq chub'anik ri rayib'al la,
je' jas ri tz'ib'tal chwij
chupam ri wuj re ri Pixab',"

—xcha ri'. ⁸ Nab'e kub'ij chi ri Dios man käqaj tä k'u chuwach ri sipanik kech taq awaj, man kraj tä k'u ri awaj ri keporox chuwach, ri kejach che resaxik ri mak, pune k'u taqaninaq ri Pixab' chi je wa' käb'anik. ⁹ Te k'u ri' kub'ij: "In k'olik ri', nu Dios, in petinaq chub'anik ri rayib'al la," —kächa'. Kel kub'ij wa' chi ri Dios xresaj ri sipanik kech awaj, xukoj k'u ru kämikal ri Cristo che sipanik chuk'exwach wa'. ¹⁰ Ri Dios xujatas chrij ronojel u wäch etzelal rumal chi ri Cristo xub'an ru rayib'al ri Are' aretaq xa jumul xujach rib' che sipanik cho ri Are'.

¹¹ Ronojel sacerdote aj Israel kok che patäninik ronojel q'ij. K'ia mul k'ut xaq tajin wi keukämisaj awaj che ki sipaxik cho ri Dios, pune we ri' man kekowin taj kekesaj ri mak. ¹² Are k'u ri Jesucristo xa jumul xujach jun sipanik cho ri Dios ri xaq xuwi wa' rajwaxik che resaxik ri mak pa taq ri q'ij ri junab' ri kepetik. Te k'u ri' xt'uyi pa ru wikiäq'ab' ri Dios. ¹³ Xaq reye'm chik chila' chi käyi' che chi käch'akanik, kätaqan k'u pa ki wi' konojel ri käka'n ki k'ulel che. ¹⁴ Je ri', rumal chi ruk' ri jun sipanik ri xyi' cho ri Dios xub'ano chi man k'o tä chi jas rajwaxik chke ri winaq ri tajin kesax chrij ronojel u wäch etzelal. ¹⁵ Ri Loq'alaj Espiritu kujikib'a u b'ixik wa' chqe. * Nab'e k'ut kub'ij:

¹⁶ Ri trato ri kinb'an na kuk'

pa taq ri q'ij ri kepe na
are wa', kub'ij ri Qajaw Dios:

Kinya na ri nu pixab'

pa taq ri kanima',

kintz'ib'aj na wa'

pa taq ri ki chomab'al,

—kächa'. ¹⁷ Te ri' kub'ij:

Man k'o tä jub'iq' ri ki mak

ri k'ana'taj chi na chwe.

Je ri' xuquje' ri etzelal ri ka'nom,

—kächa'. ¹⁸ Je k'u ri', aretaq e sachtajinaq chi konojel taq ri qa mak, man rajwaxik tä chi ri' keyi' nik'iaj sipanik chik cho ri Dios che resaxik ri mak.

Rajwaxik chi kujok cho ri Dios

¹⁹ Rumal ri', qachalal, mäqaxej b'a' qib'. Kämik k'ut kuya' kujok pa ri K'olib'al ri Sib'alaj Loq' na rumal ru kik'el ri Jesucristo.

²⁰ Käqak'am b'i ri k'ak' b'e, ri b'e ri kujuk'am b'i pa ri k'aslemal. Are wa' ri xujaj chqawäch aretaq xjisjob' ri tasb'al u pam ri rachoch Dios. Are kel kub'ij wa' chi rumal

* **10:15** Are ri Loq'alaj Espiritu ri xuya ru Tzij ri Dios che taq ri q'alajisal re ru Loq' Pixab' ri Dios ojer.

ru cuerpo ri Jesús kuya' kujokik. ²¹ Ri Jesús are nimalaj qa sacerdoti ri kátaqan puwi' ri rachoch Dios. ²² Rumlal ri' rajwaxik kujok cho ri Dios ruk' jikomalaj qanima' ri man k'o tá wi etzelal. Qas k'u kujkojon che, man kub'an tá kieb' qa k'ux. Ri Are' k'ut u b'anom ch'ajch'oj che ri qanima' rech man káqana' taj chi k'o qa mak, ch'ajom chi k'ut ri qa cuerpo ruk' saq joron. ²³ Qataqej b'a' ri qa kojonik chrij ri ku'l wi qa k'ux, máqak'exo, rumlal chi ri Dios qas kub'an na ri xuchi'j chqe. ²⁴ Xuquje' rajwaxik káqatzukuj u to'ik qib' ri jun ruk' ri jun chik rech loq' káqil qib', káqa'n k'u ri utzil chke konojel. ²⁵ Máqaya b'a' kan ru mulixik qib', jas ri káka'n jujun ri xa k'amaninaq chke, xane qawalijisaj ri qanima' chb'il taq qib', más na kámik rumlal chi qetam chi naqaj chik k'o wi ri q'ij ri kápe ri Qajaw Jesús.

²⁶ We káqatzukuj u b'anik ri mak aretaq ya qetam chi ri qas tzij, man k'o tá chi jun sipanik chik ri kuya' káyi' cho ri Dios che resaxik ri qa mak. ²⁷ Xane xuwi káqayej ri xib'ib'alalaj q'ij aretaq káq'at tzij pa ki wi' ri winaq, xuquje' ri nimalaj q'aq' ri keuporoj na ri káka'n ki k'ulel che ri Dios. ²⁸ Ri winaq ri man kunimaj tá ri Pixab' ri xutz'ib'aj ri qa mam Moisés, ri e k'o k'u kieb' o we ne oxib' ri keq'alajisanik chi qas k'o u mak, káq'at na k'ij puwi' ri winaq ri' chi kákámisaxik. Man kátoq'ob'isax tá k'u na u wách. ²⁹ We je ri', za mat kichomaj ix chi sib'alaj taqalik kák'ájisax na ki wách wa' jachin taq ri xa káketzelaj u wách ru K'ojol ri Dios, tzel k'u kákil wi ru kik'el, xuquje' kákiyoq' ri Loq'alaj Espíritu rech ri Dios ri kutoq'ob'isaj ki wách? ¡je!, je ri'! Ri kik' ri' are wa' ri kujikib'a ri k'ak'trato, ruk' k'u wa' ketastaj ri winaq chrij ronojel u wách etzelal. ³⁰ Qetam k'ut chi ri Qajaw Dios u b'im: "In kinyo'w na ri k'ájisab'al wáchaj, in kintojow na ri rajil u k'exel ri k'áx ri xb'anik," —xcha'. Xuquje' kub'ij pa ru Loq' Pixab': "Ri Qajaw Dios kuq'at na tzij pa ki wi' ri winaq ri e rech ri Are'," —kácha'. ³¹ ¡Sib'alaj k'áx k'ut we jun winaq kuyak royowal ri k'aslik Dios, káqaj k'u pu q'ab' ri Are'!

³² Chena'taj b'a' chiwe ri ojer taq q'ij aretaq k'á mája' naj xixkojon che ru Tzij ri Dios, ri je' ta ne jun saqil wa' pa ri i k'aslema. Ruk' k'u nimalaj paciencia xich'ij ri nimalaj k'áx ri xpe pi wi'. ³³ Jujun k'u chiwe xixyoq'ik, xb'an k'u k'áx chiwe chkiwách konojel ri winaq. Jujun chik chiwe xeito' ri tajin kákirij k'áx. Rumlal k'u ri' xiriq iwe ri k'áx ri xkiriq ri e are'. ³⁴ Ri ix xitoq'ob'isaj ki wách ri xek'oji pa taq che'. Pune k'u xmaj ri jastaq iwe, ruk' k'ikotemal xikuyu rumlal chi iwetam chi k'o jun iwechb'al ri utz na chila' chikaj ri man k'o tá u k'isik. ³⁵ Mixb'ison b'a', xane chiku'b'a i k'ux chrij ri Dios rumlal chi we je ri' kib'ano, nim na ri tojb'al ri káya'taj

na chiwe. ³⁶ Ri ix rajwaxik kichajij paciencia chub'anik ru rayib'al ri Dios, xuquje' churiqik ri xuchi'j ri Are' chi kuya na chiwe. ³⁷ Ru Loq' Pixab' ri Dios ri Tz'ib'talik kub'ij:

Xa jub'iq' kraj chi
kápe na ri jun ri rajwaxik kápetik,
man káb'eytaj tá k'u na,

—kácha'.

³⁸ Ri winaq ri jikom ranima'
cho ri Dios kák'asi na
rumlal chi kákojonik.

We k'u kátzelej chrij,
man kákikot tá ri wanima' ruk',
—kácha'. ³⁹ Are k'u ri uj man uj jun tá kuk' ri nik'iaj ri xa ketzelej chkiq, kásach k'u ki wách, xane ri uj, uj jun kuk' ri kekojonik. Je ri' káqariq ru tob'anik ri Dios, kujk'asi k'u na.

11

Waral káqil wi jas ri' ri kojonik

¹ Ri kojonik are ri u jikib'axik qa k'ux chi qas tzij káya'taj na chqe jas ri qeye'm. Xuquje', pune man káqil tá u wách ri qeye'm, káqakoj pa qanima' chi qas k'olik. ² Ri qa mam ojer qas xekojonik. Rumlal ri' ri Dios utz xril wi ri ki k'aslema.

³ Rumlal ri kojonik qetam chi ri Dios ruk' ru tzij xub'an ri uwáchulew, ri kaj, ri q'ij, ri ik', xuquje' ri ch'imil. Je ri' chi ri man keilitaj taj, are xb'amb'ex ke konojel ri keqil kámik.

⁴ Rumlal ri kojonik ri qa mam Abel xuya jun sipanik cho ri Dios ri utz na chuwách ri sipanik ri xuya ri Caín. Rumlal ri' xq'alajisax rumlal ri Dios chi jikom ranima' ri qa mam Abel, xuk'amowaj k'u ru sipanik. Je ri', pune káminaq chik ri qa mam Abel, je' ta ne chi tajin kátzjon na kámik rumlal chi xkojonik.

⁵ Rumlal ri kojonik ri qa mam Enoc xk'am b'i chikaj, man xril tá k'u u wách ri kámikal. Man xriqtaj tá chik rumlal chi xk'am b'i rumlal ri Dios. Ru Loq' Pixab' ri Dios ri Tz'ib'talik kub'ij chi aretaq májoq kák'am b'i ri qa mam Enoc, ri Dios xkikot ruk' ru k'aslema ri are'. ⁶ We man qas kujkojonik, ri qa k'aslema man káqaj tá ri' cho ri Dios. Je ri', rumlal chi jachin ri kraj kok cho ri Dios rajwaxik ri' kukojo chi qas k'olik, xuquje' chi ri Are' kub'an ri utzil chke ri ketzukun che.

⁷ Rumlal ri kojonik ri qa mam Noé xniman che ri Dios aretaq xb'ix che chi k'o jas ri kák'ulmataj na pune k'u mája' kilitajik. Xqaj k'u chub'anik ri arca che ki to'ik ri e k'o pa rachoch chuwách ri k'áx ri kápe na. Rumlal ru kojonik xuq'at tzij pa ki wi' ri nik'iaj winaq chik chi kák'ájisax ki wách. Xq'alajisax k'u rumlal ri Dios chi jikom ranima' rumlal chi xkojonik.

⁸ Rumlal ri kojonik ri qa mam Abraham xnimanik aretaq xsik'ix rumlal ri Dios, xe' k'u pa ri ulew ri xyi' che rumlal ri Dios che

rechb'al. Xe'k, xel b'i pa ru tinimit, man retam tä k'ut jawije' chi' kopan wi. ⁹ Rumal chi qas xkojon ri qa mam Abraham, xk'o'ji chila' pa ri ulew ri' ri xchi'x che rumal ri Dios, je' ta ne chi are jun estranjer winaq. Xaq pa taq carpa xk'o'ji wi. Je' k'u xub'an ri qa mam Isaac, ri qa mam Jacob ri xuquje' xchi'x chke rumal ri Dios jas ri xub'ij che ri qa mam Abraham. ¹⁰ Je ri', rumal chi ri qa mam Abraham xku'b'i u k'ux chi kopan na pa ri jun tinimit ri man käsach tä u wäch, ri xuchomaj u b'anik ri Dios, ri xuquje' Are' xyakowik.

¹¹ Rumal ri kojoniq ri qa mam Sara, pune ri are' man k'o tä ral kek'o'ji'k, xyi' k'u u chuq'ab' rumal ri Dios rech kāk'o'ji ral pune nim winaq chik. Je ri' xril u wäch jun ral ala, rumal chi xukojo chi ri Dios kub'ano jas ri xub'ij che. ¹² Je ri' ri qa mam Abraham, pune xa jub'iq' man kākāmik, e k'ia k'u ri rachalaxik ri xil na ki wäch, ri je' ki k'ial jas ri ch'imil ri e k'o chikaj, je' jas ri senyāb' ri k'o chuchi' ri mar ri man k'o tä jun kākowin che kajilaxik.

¹³ Konojel wa' we winaq ri' xekāmik. Man xkiriq tä k'u b'ik jas ri xuchi'j ri Dios chke. Rumal k'u rech chi qas xekojonik, je' ta ne chi tajin kākil apan wa' chi naj, xkikojo chi k'olik, xekikot k'u chuchomaxik ri xchi'x chke. Xkig'alajisaj k'ut chi ri e are' xaq e estranjerab', xaq e ok'owel cho we uwächulew. ¹⁴ Ri winaq ri kākib'ij chi xaq e ok'owel cho we uwächulew, qas q'alaj wa' chi xa tajin kākizukuz na ri qas ki tinimit. ¹⁵ We ta are tajin kākichomaj apan ri ulew ri xeb'el wi loq, xekowin ta ri' xetzelej jela'. ¹⁶ Man je' tä k'ut, xane ri e are' kākaj jun ki tinimit ri utz na, are k'u wa' ri tinimit ri k'o chila' chikaj. Rumal ri' ri Dios man kāk'ix taj aretaq kāk'ix che chi are ki Dios ri winaq ri', rumal chi u b'anom u b'anik jun tinimit ri kuya na chke.

¹⁷ Rumal ri kojoniq ri qa mam Abraham xuk'am b'i ri Isaac ru k'ojol chuya'ik che sipanik cho ri Dios aretaq ri Dios xuta' wa' che. Pune xaq xuwi wa' u k'ojol k'olik man xub'an tä kieb' u k'ux chuya'ik ri are' che sipanik, pune ta ne ri Dios xuchi'j che: ¹⁸ "Rumal ri a k'ojol, ri Isaac, kil na ki wäch ri awachalaxik, —xcha ri' che. ¹⁹ Ri qa mam Abraham qas xukojo chi ri Dios kākowinik keuk'astajisaj ri kāminaqib'. Chuwäch ri are' k'ut, je' ta ne xkām na ru k'ojol, te k'u ri' xk'astaj chik chkixol ri kāminaqib', xk'o'ji chi na ruk'.

²⁰ Rumal ri kojoniq ri qa mam Isaac xuchi'j che ri a Jacob xuquje' che ri a Esaú chi ketewchix na pa taq ri q'ij ri junab' ri kepe na. ²¹ Rumal ri kojoniq ri qa mam Jacob aretaq xa jub'iq' man kākāmik, xuchi'j chke ri u k'ojol ri a José chkijujunal chi

ketewchix na pa taq ri q'ij ri junab' ri kepetik. Xuq'ijilaj ri Dios xutoq'aj k'u rib' che ru tza'm ru ch'imiy. ²² Rumal ri kojoniq ri qa mam José aretaq xa jub'iq' man kākāmik, xub'ij kanoq chi kāpe na ri q'ij aretaq keb'el na b'i ri winaq aj Israel pa Egipto. Xuquje' xub'ij kanoq jas ri kāk'an na che ru b'aqil.

²³ Rumal ri kojoniq ri a Moisés, aretaq xil u wäch, oxib' ik' xk'u' na kumal ru nan u tat. Je ri', rumal chi xkilo chi are jun ak'al je'lik. Man xkixej tä k'u kib', xane man xkinimaj tä ri taqanik ri xuya ri nim taqanel chi rajwaxik kākikāmisaj ri ak'al. ²⁴ Rumal ri kojoniq ri a Moisés aretaq nim ala chik, man xraj taj xub'an u nan che ru mia'l ri nim taqanel pa Egipto. ²⁵ Xane ri are' mäs je'l na xril ru riqik k'äx kuk' ri winaq ri e rech ri Dios chuk'exwäch ri kākikot na kieb' oxib' q'ij chub'anik ri mak ri je'l kākil wi ri nik'iaj winaq chik. ²⁶ Are xub'an u q'inomal che ri k'äxk'ol ri xuriqo rumal ru patānixik ri Cristo, chuk'exwäch ri ki q'inomal ri winaq aj Egipto. Je ri', rumal chi tajin kuchomaj apan ri tojb'al ri kāyi' na che rumal ri Dios. ²⁷ Rumal ri kojoniq ri qa mam Moisés xel b'i pa Egipto. Man xuxej tä rib' chuwäch ri royowal ri nim taqanel, man xub'an tä k'u kieb' u k'ux rumal chi je' ta ne tajin kārīl apan ri Dios ri man kilitaj taj.

²⁸ Rumal ri kojoniq ri qa mam Moisés xuchap loq u b'anik ri nimaq'ij Pascua,* aretaq xtaqanik chi kächikox kik' chuchi' taq ri ja. Je' xka'n ri winaq aj Israel wa' rech ri ángel re ri kāmikal man keukāmisaj tä ri nab'eal taq ki k'ojol. ²⁹ Rumal ri kojoniq xeq'ax ri winaq aj Israel pa ri nimalaj ja' rech ri Kiāq Mar, je' ta ne chi pa chaq'ij ulew xeq'ax wi. Aretaq k'ut ri winaq aj Egipto je' xkaj xeq'axik, xexiq' kan ri e are' pa ri mar.

³⁰ Rumal ri kojoniq xetzaq ri pimaq taq tapya ri e k'o chrij ri tinimit Jericó, aretaq e b'ininaq chi wuqub' q'ij ri winaq aj Israel chrij. ³¹ Rumal ri kojoniq ri Rahab ri ixoq ri keuch'ab'ej achijab' man xkām tä junam kuk' ri winaq ri man xeniman tä che ri Dios, rumal chi utz xub'an che ki k'ulaxik ri achijab' aj Israel ri e taqom b'i che rilik ri tinimit.

³² ¿Jas chi k'u ri kinb'ij na? Xa k'u man kub'an tä ri q'ij chutzijoxik ri' ri xub'an ri qa mam Gedeón, ri qa mam Barac, ri qa mam Sansón, ri qa mam Jefe'te, ri qa mam David, ri qa mam Samuel xuquje' ri ri xka'n ri q'alajisaj taq re ru Loq' Pixab' ri Dios. ³³ Rumal ri kojoniq ri e are' xekich'ak taq tinimit, utz xka'n chuq'atik tzij, xya'taj k'u chke ri tob'anik ri xuchi'j ri Dios. Xkiz't apij k'u u pa ki chi' taq ri koj. ³⁴ Xkichup nimaq

* 11:28 "Pascua": Chawila' ri San Mateo 26:2, nota.

taq q'aq', xa jub'iq' k'u man xekämisax tä kumal winaq ri k'o espada pa ki q'ab'. Ri man k'o tä ki chuq'ab' xyi' ri ki chuq'ab'. Te k'u ri' sib'alaj xech'akan pa ri ch'oj, xekich'ak k'u ri soldados ri e taqom b'ik kumal ri ki k'ulel. ³⁵ E k'o k'u ixoqib' ri xkil chi na ki wäch ri ki käminaqib' rumal chi xek'astaj chi na chkixol ri käminaqib'.

Nik'iaj winaq chik xb'an k'äx chke, xekämisaxik, man xkil'am tä k'u ri torb'al ke. Je ri' xka'no rech käkiriq jun k'aslemal ri utz na aretaq kek'astaj na chkixol ri käminaqib'. ³⁶ Nik'iaj chik xesax ki k'ixb'al, xech'ay k'ut. Man xuwi tä wa', xane xuquje' xeyut ruk' tiqom taq ch'ich', xeoksax k'u pa che'. ³⁷ Xekämisax chab'aj, xeq'at che sierra, xb'an kieb' chke, xb'an k'u k'ia u wäch k'äx chke che rilik we gas e kojoneleb', xuquje' e k'o ri xekämisax ruk' machete. Xexulik, xepaqik. Xa ki tz'umal chij xuquje' ki tz'umal k'isik' xkikoq che katz'iaq. E meb'a', xyak ki b'is, xetzexax k'u ki wäch kumal ri winaq. ³⁸ Ri winaq re ri uwächulew man taqal tä chke chi kek'oji we winaq ri' kuk'. Xeb'e' k'u je wa', xeb'e' je ri' pa taq ri juyub' ri ketz'inowik, pa taq ri k'ache'laq. Xaq pa taq pek, xaq pa taq ri jul ri e k'o pa taq ri ulew xek'oji wi. ³⁹ Konojel wa' we winaq ri', pune xilitajik chi utz xka'n pa ri ki k'aslemal rumal ri ki kojoniq, man xkiriq tä k'u b'ik ri xuchi'j ri Dios chke. ⁴⁰ Je ri', rumal chi ri Dios xuchomaj jun tewchib'al ri nim na chqe uj, rech man xuwi tä ri e are' käqariq ri utzil ri u chomam ri Are', xane ri uj xuquje' junam kuk'.

12

Waral käqil wi chi rajwaxik kujchoman chrij ri Jesús je' ta ne chi tajin käqil u wäch

¹ Rumal k'u rech chi ri uj sutim qij kumal k'ialaj winaq ri ki q'alajisam ri ki kojoniq, qaya b'a' apan jela' ri kuya latz' chqe, xuquje' ri mak ri kajuq'atej. Qachajij paciencia pa ri qa b'inem ri k'o na chqawäch. ² Chujchoman chrij ri Jesús ri käyo'w chqe chi kujkoniq, kub'an k'ut chi qas je' kel na. Ri Are' xuch'ij ri kämikal cho ri cruz, man nim tä xril wi wa', pune xel u k'ixb'al. Je ri', rumal chi retam chi aretaq kot'ow ri k'äx, kuriq na nimalaj kikitomal. X'tuyi k'u pa ru wikiäq'ab' ri Dios chila' chikaj.

³ Chixchoman b'a' chrij wa' ri k'utb'al ri xuya kan ri Jesús. Ri Are' xuriq nimalaj k'äx pa ki q'ab' ri ajmakib'. Je ri' chixchomanoq rech man kixkos tä ix, man kixb'ison taj, kub'an ta k'u kieb' i k'ux. ⁴ Ri ix k'ut man ix opaninaq tä cho ri kämikal pa ri ch'oj ri tajin kib'an chrij ri mak. ⁵ Ä sachinaq pa i jolom ri pixb'enik ri u yo'm ri Dios chiwe rumal chi ix ralk'ual ri Are'? Je wa' kub'ij pa ru Loq' Pixab' ri Dios ri Tz'ib'talik: Walk'ual, k'äx mana'

aretaq käk'äjisax a wäch

rumal ri Qajaw Dios.

Xa k'u che a tijoxik wa'.

Matb'isonik aretaq katuyajo.

⁶ Je ri', rumal chi ri Qajaw Dios

kuk'äjisaj u wäch

jachin ri loq' käril wi,

kuyaj k'u na jachin ri kuk'am

che ralk'ual,

—kächa'. ⁷ Chich'ija b'a' ix aretaq ri Dios kuk'äjisaj i wäch, rumal chi are k'utb'al chi ri Are' u b'anom ralk'ual chiwe. Je ri', rumal chi man k'o tä jun alk'ualaxel ri mat käk'äjisax u wäch rumal ru tat. ⁸ Are k'u we ri Dios man kuk'äjisaj tä i wäch, je' jas ri kub'an chke konojel ri ralk'ual, xa man qas ix alk'ualaxel tä ri', xane xa man q'alaj tä u wäch ri' jachin ri i tat. ⁹ Nab'e kanoq, aretaq uj ak'alab' na, ri qa nan qa tat waral cho we uwächulew xkil'äjisaj qa wäch. Nim k'ut xeqil wi. Ä mat utz na ri' we ta käqaya qib' pa nimaxik che ri qa Tat ri k'o chila' chikaj rech k'o ri qa k'aslemal? ije', je ri'. ¹⁰ Ri qa nan qa tat waral cho ruwächulew xkil'äjisaj qa wäch kieb' oxib' junab' jas ri utz xkil wi ri e are' rech utz kujel pa we k'aslemal ri' ri xa käk'isik. Are k'u ri Dios kuk'äjisaj qa wäch rech qas utz kujelik, che qa tasik chrij ri etzelal, je' jas ri Are' tastal chrij ronojel u wäch etzelal. ¹¹ Qas tzij k'ut chi aretaq käk'äjisax qa wäch man k'o tä jumul ri' ri xa ta kujkikotik, xane xa k'äx käqana'. Pune je ri', we k'u rumal chi käk'äjisax qa wäch käqetamaj u b'anik ri jikomaj pa ri qa k'aslemal, käqana' na ronojel u wäch utzil ri', kuxlan k'u na ri qanima'.

Waral käqil wi ri k'äx ri kuriq jun we käretzelaj u wäch ru toq'ob' ri Dios

¹² Je k'u ri', mixb'ison b'a', mub'an kieb' i k'ux je' ta ne chi xa kosinaq ri i q'ab', sikirinaq k'u ri iwaqan. ¹³ Are chitzukuj ri b'e ri jikom rech chila' kixb'in wi. Je ri' rech ri jun ri kub'an kieb' u k'ux, ri xaq káb'isonik, käkikot na, junam jas ri jun winaq ri u b'anom k'äx ri raqan kutzir na, man kub'an tä chi k'äx.

¹⁴ Chikojo i chuq'ab' rech k'o utzil chixol nimalaj iwonojel. Chitasa iwib' chrij ronojel u wäch etzelal, rumal chi we man ch'ajch'oj ru k'aslemal jun cho ri Dios, man käril tä ri' u wäch ri Qajaw Jesús. ¹⁵ Chiwila iwib' rech k'o ne jun chiwe ri mat kuriq ri nimalaj u toq'ob' ri Dios. K'o ne jun chiwe mub'ano je' jas jun itzel tiko'n ri kuya latz', ri kub'an k'äx chke konojel ri nik'iaj tiko'n chik. ¹⁶ K'o b'a' jun chiwe je' mub'ano xa jas ri kaka'n ri tz'i' ri xaq käkiriq kib', man k'o tä ki pixab', o kub'an na ri äwas u b'anik, jas ri xub'an ri Esaü ri xa rumal jun rikil xuk'ayij ri tewchib'al ri ya'tal che ri nab'eal ala. ¹⁷ Iwetam k'u ix chi te ri' aretaq ri Esaü

xraj xtwexchixik, man xkowin tä chi ru tat xutewchij. Pune sib'alaj xoq' ri Esaü, man xuriq tä chi ri are' jas xub'an chuk'exik ri xb'antaj rumal.

¹⁸ Ri ix man ix opaninaq taj cho ri juyub' Sinaj u b'i' ri gas k'o wi, ri sib'alaj kânikowik, ri k'o wi q'equm, q'eqmuj, xuquje' nimalaj q'eqal jäb', jawije' ri xeopan ri winaq aj Israel ojer. ¹⁹ Ri ix man i tom tä ru ch'ab'al ri trompeta, man i tom tä k'u ru ch'ab'al ri Dios ri xch'aw loq puwi' ri juyub' kuk' ri winaq. Ri xetow ru ch'ab'al ri Dios xkita' toq'ob' chi mech'ab'ex chik. ²⁰ Je ri', rumal chi sib'alaj xkixej kib' aretaq xkita ri taqanik ri kub'ij: "Jachin ri kâpaqi loq, pune ta ne xa jun awaj, we kâpaqi loq puwi' we juyub' ri', kâkâmisax na chab'aj o käjut na che lanza," —kächa'. ²¹ Sib'alaj xib'ib'al ri xilitajik! Je ri' chi ri qa mam Moisés xub'ij: "Kinb'irb'itik rumal chi sib'alaj kinxej wib'," —xcha'.

²² Ri ix k'ut ix opaninaq cho ri nimalaj juyub' Sión, cho ru tinimit ri k'aslik Dios, ri Jerusalén ri k'o chila' chikaj, jawije' e k'o wi k'ia mil ángeles. ²³ We ángeles ri' ki mulim kib' chuq'ijilaxik ri Dios. Ix opaninaq k'u ix kuk' ri ralk'ual ri Dios ri tz'ib'tal ri ki b'i' chila' chikaj. Ri ix opaninaq cho ri Dios ri Q'atal Tzij ri k'o pa ki wi' konojel. I mulim k'u iwib' kuk' ri kanima' ri utzalaj taq winaq ri b'anom utz che ri ki k'aslemal rumal ri Dios. ²⁴ Ri ix k'ut, ix opaninaq ruk' ri Jesús ri kojol tzij ri xub'an ri k'ak' trato. Are ku'l i k'ux chrij ru kik'el ri xuchikoj ri Are'. Are kik'el wa' ri kuq'alajisaj ri utz na chuwäch ri kuq'alajisaj ru kik'el ri qa mam Abel.

²⁵ Chiwila b'a' iwib', miwetzelay u wäch ri Jun ri tajin käch'awik, xane chitatab'ej. Man k'o tä jun chke ri winaq aj Israel ri xkowinik xuto' rib' aretaq xketzelaj u wäch ri Dios ri xeupixb'aj waral cho we uwächulew rumal ri qa mam Moisés. We je ri', za kujkowin ne lo uj käqato' qib' we käqetzelay u wäch ri Jun ri kujpoxb'aj loq chila' chikaj? ¡Man kujkowin taj! ²⁶ Ru ch'ab'al ri Dios ri xtataj pa ri ojer taq q'ij xuyakya' ruwächulew. Kâmik k'ut kub'ij ri Dios: "Jumul chik man xuwi tä chi ruwächulew kinyakya', xane xuquje' ri kaj," —kächa'. ²⁷ Aretaq kub'ij "jumul chik", kel kub'ij wa' chi ri Dios kusach na ki wäch ri jastaq ri e u b'anom ri kuya' keslab'ik, kâkanaj k'u na kanoq ri man kuya' taj käslab'isaxik. ²⁸ Ru taqanik ri Dios ri kâpe na pa qa wi', man k'o tä jun kâkoxinik kelsanik. Rumal ri', qaya b'a' maltioxinik che ri Dios, qaq'ijilaj k'ut. Qaxej b'a' qib' chuwäch, nim k'u qila wi. Are k'u wa' ri käqaj chuwäch ri Are'. ²⁹ Je ri', rumal chi ri qa Dios are je' jas jun q'aq' ri kusach u wäch ronojel.

Waral kâqil wi ri rajwaxik kâqa'n uj, ri uj kojonelab', rech kâkikot ranima' ri Dios

¹ Qachalal, chitagej u b'anik ri tajin kib'ano, kiwaj iwib' ri jun ruk' ri jun chik rumal chi iwachalal iwib'. ² Mäsach b'a' pa i jolom ru b'anik utzil chke ri winaq ri keopan cho iwachoch. E k'o k'u jujun ri rumal ri u b'anik ri utzil ri', xekik'ulaj ángeles cho ri kachoch, man xkix'ob' tä k'ut.

³ Chena'taj chiwe ri e k'o pa taq che', je' ta ne chi ri ix xuquje' ix k'o pa che' junam kuk'. Chichomaj ki wäch ri tajin kâb'an k'äx chke, je' ta ne chi ix ri' ri tajin kiriq k'äx junam jas ri e are'.

⁴ Nim chiwila wi ri k'ulanem nimalaj iwonojel. Ri ixoq me' chi ruk' jun achi chik, ri achi k'ut me' chi ruk' jun ixoq chik. Ri Dios k'ut kuq'at na tzij pa ki wi' jachin taq ri je' kâka'no jas ri kâka'n ri tz'i' ri xaq kâkiriq kib', man k'o tä ki pixab', xuquje' kuq'at na tzij pa ki wi' ri kâka'n ri nimalaj mak ri äwas u b'anik ruk' ri rixoqil o ri rachajil jun winaq chik.

⁵ Mirayij u wäch ri puqaq, xane chixkikot ruk' jampa' ri k'o iwuk' rumal chi ri Dios u b'im: "Man katinya tä kanoq. Man katin-wonob'a tä k'u kanoq," —xcha'. ⁶ Je ri' man rajwaxik taj käqaxej qib', kuya' k'ut käqab'ij: Ri Qajaw Dios are' kinto'wik, man kinxej tä k'u wib'.

chuwäch ri kâkowin jun winaq
kub'ano chub'anik k'äx chwe,
—kujcha na.

⁷ Chena'taj chiwe ri k'amal taq i b'e ojer, ri xkitzijoq ru Loq' Pixab' ri Dios chiwe. Chixchoman chrij ronojel ri utzil ri ki b'anom petinaq loq pa ri ki k'aslemal. Jas ri xka'n ri e are' xekojonik, je' k'u chib'ana ix.

⁸ Ri Jesucristo xaq je' u wäch. Are k'o ojer, are k'o kâmik, are kâk'oji na pa taq ri q'ij ri junab' ri kepe na. ⁹ Xaq mixsub'taj kumal winaq ri kâkik'ut jule' taq tijonik chik ri jalan chi wi. Are utz na we käqajikib'a ri qanima' chrij ri nimalaj u toq'ob' ri Dios, man chrij taq tä ri taqanik ri xuwi käkib'ij jas u wäch ri kâtijik. We jalajoj taq taqanik ri' man k'o tä kâto'bi wi chke ri tajin kâkinimaj wa'.

¹⁰ Ri uj k'o jun qa sipanik ri jalan chi wi ri yo'm cho ri Dios ri man ya'tal taj kâkitij ke ri sacerdotes ri kepatänin pa ri rachoch Dios. ¹¹ Ri ki nimal sacerdotes aj Israel kuk'am b'i' ri ki kik'el ri awaj pa ri K'olib'al ri Sib'alaj Loq' na, kuya k'u wa' che sipanik cho ri Dios che resaxik ri mak. Are k'u ri ki cuerpo ri awaj ri' keporox chrij ri tinimit. ¹² Je k'u ri' xub'an ri Jesús. Ri Are' xkâmisax chrij ri tinimit chub'anik ch'ajch'oj che ri kanima' ri winaq cho ri Dios ruk' ru kik'el ri Are'. ¹³ Chujel b'a' apan ruk' ri Jesús chrij ri tinimit rech käqariq qe uj ri k'ixb'al ri xuriq ri Are'. ¹⁴ Waral k'ut cho we uwächulew man

k'o tä jun qa tinimit ri man käsach tä u wäch, xane are qeye'm ri qa tinimit ri kāk'oji na.

¹⁵ Rumal ri' rajwaxik b'a' qaya u q'ij ri Dios amaq'el rumal ri Jesucristo. Ri ya'b'al u q'ij ri Dios ri kākaya', are wa' sipanik ri rajwaxik kākaya cho ri Are'. iQaya b'a' u q'ij ruk' ri tzij ri kāpe pa qanima'! ¹⁶ Xuquje' mäsach pa i jolom ru b'anik ronojel u wäch utzil, xuquje' ri ki to'ik nik'iaj chik ruk' jampa' ri k'o iwuk'. Are k'u taq wa' ri sipanik ri kākaj cho ri Dios.

¹⁷ Chixniman chke ri k'amal taq i b'e, chiya iwib' pa taqik chke. Je ri', rumal chi ri e are' keb'ok il che ri iwanima', ketam k'ut chi kākijach na kuenta cho ri Dios. Chib'ana wa' rech ri e are' kechakun ruk' kikotemal, man k'o tä k'āx kākina' pa kanima' chiwij. We man je ri', ri ix xuquje' man k'o tä kich'ak na.

¹⁸ Chib'ana orar pa qa wi'. Ri uj k'ut qas qetam chi man k'o tä k'āx kākana' pa qanima'. Je ri', rumal chi kākaj kākana' ri utz pa ronojel ri kākana'. ¹⁹ Sib'alaj kinta' toq'ob' chiwe chi kib'an orar pa nu wi', rech ri Dios kuya chwe chi kinopan chi na iwuk' jumul chik chanim.

Ri xtz'ib'an we wuj ri' kuya rutzil ki wäch ri kojonelab', kuta' ru tewchib'al ri Dios pa ki wi'

²⁰ Ri Dios ri kub'ano chi kuxlan ri qanima' xuk'astajisaj ri Qajaw Jesucristo chkixol ri kāminaqib'. Ri Jesucristo are ri nimalaj Ajyuq' ri keuchajij ru chij. Xujikib'a k'u ri trato ri man k'o tä u k'isik ruk' ru kik'el.

²¹ Are ta ri Dios kuya chiwe ronojel ri rajwaxik chub'anik ri utz pa ri i k'aslemal rech kixkowinik kib'an ru rayib'al. Chub'an ta k'u na pa ri qa k'aslemal rumal ri Jesucristo jachike ri kub'ano chi kākikot ri ranima' ri Are'. iChnimarisax ta b'a' u q'ij ri Cristo kāmik, xuquje' pa taq ri q'ij ri junab' ri kepetik! Amén.

²² Qachalal, kinb'ochi'n chiwe chi kichajij paciencia chutatab'exik we pixb'enik ri', xaq k'u kieb' oxib' tzij nu tz'ib'am b'i chiwe pa we carta. ²³ Kwaj chi kiwetamaj chi ri qachalal Timoteo ya xelloq pa che'. We kāpe chanim, ke' na wuk' aretaq kine' che iwillik.

²⁴ Chiya rutzil ki wäch konojel ri k'amal taq i b'e, xuquje' konojel ri qachalal kojonelab'. Ri qachalal aj Italia kākia b'i rutzil i wäch.

²⁵ Are ta b'a' ri Dios kätöq'ob'isan i wäch nimalaj iwonojel. Amén.

RI CARTA RI XUTZ'IB'AJ RI SANTIAGO

Ri Santiago kuchap u tz'ib'axik jun carta chke ri kojonelab' ri e jab'uninaq cho ronojel ruwächulew

¹ In wa', ri Santiago, in patänil re ri Dios xuquje' ri Qajaw Jesucristo. Kinya b'i rutzil ki wäch ri kojonelab' ri e rech ri tinimit Israel, ri e jab'uninaq cho ronojel ruwächulew.

Waral kâqasik'ij wi jub'iq' chrij ri k'äx'ol ri kâqariq na, xuquje' jas kâqa'no rech k'o ri qa no'j ri kâpe ruk' ri Dios

² Ri ix, wachalal, rajwaxik chi xa sib'alaj kixkikotik aretaq kepe k'ia u wäch k'äx'ol chijij. ³ Iwetam chi k'ut chi aretaq kâpe k'äx'ol chijij che rilik we qas tzij ix kojoni-naq che ri Dios, xa kiwetamaj na jas kib'ano rech qas jikom ri iwanima' chuch'ijik ronojel. ⁴ Chikoyo b'a' i chuq'ab' rech qas tzij kiwetamaj jas kib'ano rech qas jikom ri iwanima' chuch'ijik ronojel ri kâpe pi wi'. Xa je ri' qas kâtz'aqat na ri i chomab'al, utz kib'an na pa ronojel, man k'o tä chi k'u jas ri kajwataj chiwe chu wäch ri Dios.

⁵ We k'o jun chiwe ri kuna' chi k'o ri kraj na che ri u no'j, chuta' wa' che ri Dios. Are k'u ri Dios kuya na ri rajwaxik che. Man xa tä jub'iq' kuya ri Are', xane kuya chke konojel jas ri ki rajwaxik. Ri Are' man k'o tä kub'ij, man kâpe tä royowal. ⁶ Rajwaxik k'ut chi aretaq kuta' ru no'j che ri Dios, kukojo chi qas kâya'taj na che, man kub'an tä k'u kieb' u k'ux. Ri winaq ri kub'an kieb' u k'ux junam ri' ruk' jun nimalaj uwoja' ri kâpe puwi' ri mar, ri kâk'am b'i je wa' je ri' rumal ri kiäqia'. ⁷ Ri winaq ri je' u b'anik wa', muchomaj chi k'o jas kâyi' che rumal ri Dios. ⁸ Man k'o tä jas kâyi' ri' che rumal chi xa kieb' u k'ux, man kâkowin tä k'u ri' chub'anik jikom che ru k'aslema.

Waral kâqil wi ru jalb'em rib' ru k'aslema ri qachalal meb'a' ruk' ri qachalal q'inom

⁹ Ri qachalal ri man nim tä u b'anik rajwaxik ri' kâkikotik aretaq kânimarisax na u q'ij rumal ri Dios. ¹⁰ Xuquje' ri qachalal ri q'inom rajwaxik ri' kâkikotik aretaq kâqasax u q'ij rumal ri Dios, rumal chi ri q'inom xa je' jas ru kotz'ijal ri q'ayes, man naj tä k'ut kuch'ijo. Are je ri' ru k'aslema cho we uwächulew. ¹¹ Aretaq kel loq ri q'ij, kâpe ru chuq'ab', sib'alaj kub'an q'aq', kâchaqil'jar k'u ri q'ayes. Kâpulpub' ru kotz'ijal, kâsach k'u u wäch ru je'la'. Je wa' kuk'ulmaj na ri q'inom. Xaq te'talik kâkâm na ri are' aretaq tajin kub'an ronojel u wäch chak chumulixik ru q'inomal.

Ri kojonel kuriq k'äx, xuquje' kâtaqchi'x chemak

¹² Utz re ri winaq ri jikom ranima' chuch'ijik ri k'äx. Je ri', rumal chi ri winaq ri', aretaq kilittajik chi je wa' kub'ano chuch'ijik ri k'äx, kâyi' k'u na ri tojb'al re. Are k'u wa' ri qas k'aslema ri man k'o tä u k'isik ru b'im ri Dios chi kuya na chke ri winaq ri loq' kâkil wi ri Are'. ¹³ Aretaq jun winaq kuna' pa ranima' chi kâtaqchi'x chub'anik ri man utz taj, muchomaj ri' chi are ri Dios tajin kâtaqchi'nik. Ri Dios man k'o tä jumul kutaqchi'j jun winaq chub'anik ri etzelal, man kâtaqchi'x tä k'u ri Are' chub'anik wa'. ¹⁴ Xane ri winaq kâtaqchi'x che mak aretaq kâniman che ri itzel taq u rayinik. Xaq je ri', ri winaq kâqaj na pa mak. ¹⁵ Ri itzel taq u rayinik ri winaq are ri' ri kâtaqchi'n chub'anik ri mak. Aretaq ri winaq kutaqej u b'anik ri mak, chuk'isb'al kuriq na ri kâmikal.

¹⁶ Loq'alaj taq wachalal, imisub' iwib' ¹⁷ Ronojel ri qas utzil ri kâqariq, ronojel k'u ri man k'o tä etzelal ruk' kâpe chila' chikaj. Kâpe ri' ruk' ri Dios ri b'anowinaq ronojel u wäch saqil. U b'anom k'u ri q'ij, ri ik', xuquje' ri ch'imil. Man je' tä ri Are' jas ri q'ij, ri ik', ri ch'imil, man kujuya tä k'u pa ri q'equm. Xaq je' wi ri Dios, man kâk'extaj tä k'u ri Are'. ¹⁸ Ri Dios xuya ri qas qa k'aslema, xub'an k'ak' taq winaq chqes rumal ru Loq' Pixab' ri kub'ij ri Qas Tzij. Jas ri kib'an che ri ija', kicha' chkixol ri jal, ri nab'e taq u wäch ri ab'ix, are k'u je' xub'an ri Dios chqej u. Xujucha' chkixol konojel ri u b'anom ri Are' rumal chi are wa' ru rayib'al.

Waral kâqil wi jas ri' ri qas kojoni ri kraj ri Dios

¹⁹ Loq'alaj taq qachalal, chna'taj wa' chiwe. Chijujunal b'a' rajwaxik chi qas ix sak'aj chutatab'exik na ri kâkib'ij nik'iaj chik. Man chanim taj kixch'awik, xane utz kib'an chuchomaxik ri kib'ij. Man xaq tä chanim kâpe ri iwoyowal. ²⁰ Ri winaq ri xaq kâpe royowal, man kub'an tä ri' ri qas jikom, ri qas utz ri kraj ri Dios. ²¹ Chiya b'a' kan ronojel u wäch etzelal rumal chi äwas u b'anik wa' cho ri Dios xuquje' chkiwäch ri winaq. Chiya kan xuquje' ronojel u wäch ri sib'alaj itzel u b'anik. Mib'an nimal, xane chixnimanoq. Chik'amowaj k'u ru Loq' Pixab' ri Dios ri u tikom ri Are' pa ri iwanima'. Are k'u wa' ri kâkowiinik kub'ano chi kiritq ru tob'anik ri Dios, man kâsach tä k'u u wäch ri iwanima'.

²² Rajwaxik k'ut chi qas kib'ano jas ri kub'ij ru Loq' Pixab' ri Dios. Man xuwi taj kitatab'ej. We xaq xuwi kitatab'ej, man kib'an tä k'u ri kub'ij, xaq tajin kisub' iwib' ri'. ²³ Jachin ri xaq xuwi kutatab'ej ru Loq' Pixab' ri Dios, man kunimaj tä k'u ri kub'ij,

junam ri' ruk' jun winaq ri na'l kuka'yej rib' pa jun espejo, kâril na jas ri qas u b'anik ri u wäch. ²⁴ Xuwi kârilo jas u b'anik ri are', te k'u ri' ke'k, kâsach k'u pu jolom jas ri xrilo, jas ri qas u b'anik ri are'. ²⁵ Ru Loq' Pixab' ri Dios are jas jun espejo. Jachin jun ri kutagej kâka'y chupam, kusik'ij, man kâsach tä k'u pu jolom ri kub'ij ri Loq' Pixab' ri' ri qas tz'aaq, ri xujresaj pa ri mak ri xujk'oji wi nab'e. Xane qas kunimaj wa', kub'an k'ut jas ri kub'ij. Utz re ri winaq ri', kâtwexchix na rumal ri Dios pa ronojel ri kub'ano.

²⁶ We k'o jun kuchomaj chi are utzalaj kojonel, man retam tä k'ut kujik' ri raq', wa' we winaq ri' xaq tajin kusus' rib'. Ri kojoni-naq wi ri are', man k'o tä k'u u patän wa' che. ²⁷ Ri qas kojoniq ri ch'ajch'oj chuwäch ri Dios qa Tat, ri man k'o tä etzelal ruk', are ru b'anik utzil chke ri menorib' xuquje' chke ri malka'nib' ri tajin kâkiriq k'äx, kerigtaj k'u pa b'is. Xuquje' are ru chajixik rib' jun chkiwäch ri itzel taq jastaq ajuwächulew.

2

Rajwaxik chi man nim taj kâqil wi jun winaq chuwäch ri jun chik

¹ Wachalal, ix ri ix kojoni-naq che ri Qajaw Jesucristo ri sib'alaj nim u q'ij, man kuya' taj ri mat junam keiwil wi ri winaq. ² Qa'na che chi kok b'i chixol jun achi ri q'inom, u kojom k'u jun u mulq'ab' re q'an puag, xuquje' u kojom jun je'lalaj ratz'iaq ri paqal rajil. Xuquje' kok b'i jun achi chik ri meb'a' ri q'el ri ratz'iaq u kojom. ³ Jas lo kel ri' we are nim kiwil wi ri achi ru kojom jun je'lalaj ratz'iaq, kib'ij k'u che: "T'uyul la waral pa we utzalaj tem," —kixcha che, are k'u ri meb'a', kib'ij che: "Xaq chattak'al na at chila', o chatt'uyul qaj waral cho ri ulew?" —kixcha che. ⁴ We je' kib'an wa', man junam tä ri' kiwil wi iwib', xane jun ri' ri más nim kiwil wi, are k'u ri jun chik xa kiwetzelaq u wäch. Ix je' ta ne q'atal taq tzij ri je' kib'an wa' xa rumal ri itzel i chomanik.

⁵ Loq'alaj taq wachalal, chitampe wa': Ri meb'a'ib' cho we uwächulew, e cha'tal rumal ri Dios rech qas kekojon na che ri Are', xuquje' rech kâyi' na chke ri echb'al ru b'im ri Dios chi kuya chke ri loq' kâkil wi ri Are'. Are wa' chi keopan ruk' ri Dios rech kâtaqan ri Are' pa ki wi'. ⁶ Are k'u ri ix xa kiwetzelaq ki wäch ri meb'a'ib', kiwesaj ki k'ixb'al. ¿A mat pu e are' ri q'inomab' ri ketaqan pi wi', keb'anow k'äx chiwe, kixkik'am k'u b'i chkiwäch ri q'atal taq tzij? j'e', je ri! ⁷ ¿A mat pu are ri e are' ri kâkib'ij ri äwas u b'ixik chrij ri loq'alaj u b'i' ri Cristo ri kojom chiwij chuk'utik chi ix rech ri Are'? j'e', je ri!

⁸ We qas kib'ano jas ri kub'ij ri Pixab' ri nim na u b'anik pa ru taqanik ri Dios, jas ri kub'ij ri Loq' Pixab' ri Tz'ib'talik: "Chiwaj

ri iwach winaq jas ri ix kiwaj iwib'," —kâcha', are utz ri' ri kib'ano. ⁹ We k'u k'o jun ri más nim kiwil wi, are k'u ri jun chik kiwetzelaq na u wäch, mak ri' ri kib'ano. Ru Pixab' ri Dios kub'ij chi qas tzij ix makuni-naq chuwäch ri Are'. ¹⁰ Jachin jun ri kub'ij chi u nimam ronojel ri kâtaqan wi ri Pixab', te k'u ri' kutzaq jun chke ru taqanik, kel ri' chi man qas tzij tä ri kub'ij. Man u nimam tä ri' ri Pixab' rumal chi ri Pixab' xa jun ruk'am rib'. ¹¹ Are ri Dios k'ut ri u b'im: "Mab'an ri nimalaj mak ri äwas u b'anik ruk' ri rixo-qil o ri rachajil jun winaq chik," —kâcha'. Xuquje' u b'im: "Matok che kâmisanel," —kâcha' ri'. Je ri', pune ta ne jun winaq man kub'an tä ri nimalaj mak ri äwas u b'anik, kukâmisaj ta k'u jun rach winaq, mak ri' ri u b'anom. Man u nimam tä ri' ru Pixab' ri Dios. ¹² Chiwila b'a' iwib' jas ri kib'ij, xuquje' jas ri kib'an na pa ri i k'aslemaal ama'el ronojel q'ij. Iwetam k'ut chi kâq'at na tzij pa qa wi' junam jas ri kub'ij ru Pixab' ri Cristo ri xujresaj pa ri mak ri xujk'oji wi nab'e. ¹³ Jachin taq ri man xkitoq'ob'isaj tä ki wäch nik'iaj winaq chik, man kâtoq'ob'isax tä na ki wäch ri e are' rumal ri Dios aretaq kâq'at na tzij pa qa wi'. Are k'u ri xkitoq'ob'isaj ki wäch nik'iaj winaq chik, kâtoq'ob'isax na ki wäch ri e are' rumal ri Dios. Utz k'u keb'el na pa ri q'ij ri kâq'at na tzij pa qa wi' uj qonojel.

Ri utzil ri kâqa'no kuk'utu chi qas tzij uj kojoni-naq che ri Jesüs

¹⁴ Wachalal, ¿jas lo u patän wa' we jun kub'ij chi kojoni-naq che ri Cristo, te k'u ri' man k'o tä utzil kub'ano? jMan k'o taj! ¿A u riqom lo ri' ri qas kojoniq ri kub'ano chi kuriq na ru tob'anik ri Dios? jMan je' tä ri! ¹⁵ Qa'na che chi k'o jun qachalal achi o jun qachalal ixoq ri sib'alaj rajwaxik ri ratz'iaq, man k'o tä chi k'u ri kutij che ri jun q'ij. ¹⁶ Kâpe ta k'u jun chiwe, kub'ij che: "jNojim kate'k, are ta k'u ri Dios katto'wik! jChamiq'isaj b'a' awib', chatwoq!" —kâcha' ri' che. We k'u man kuya tä b'ik jachike ri kajwataj che, ¿a k'o lo u patän wa' ri kub'ij b'i che? jMan k'o taj! ¹⁷ Je k'u ri' xuquje' ri kojoniq. We ta ri winaq man kuk'ut tä ruk' ri utzil ri kub'ano chi qas kojoni-naq, ri kojoniq ri' man are tä qas kojoniq, rumal chi man k'o tä utzil kub'ano. jMan k'o tä k'u u patän ri! jJe' ta ne chi xa kâminaq wa'!

¹⁸ Kraj k'u ne k'o jun kub'ij: "Ri at k'ut kab'ij at chi at kojoni-naq, are k'u ri in, xuwi kinb'an ri utzil," —kâcha'. We katkowinik, chak'utu chnuwäch chi at kojonel, pune man kab'an ri utzil. Ri in k'ut, kink'ut na chawäch chi in kojonel ruk' ri utzil ri kinb'ano. ¹⁹ Ri at sib'alaj k'o a kojoniq, kakojo chi xa jun ri Dios, utz k'u ri' ri kab'ano. Xuquje' k'u ne ri itzel taq espíritus kâkikoj wa', keb'irb'itik rumal chi kâkixej kib'

chuwäch ri Are'. ²⁰ ¡Xaq at kon! ¿A mat kach'ob'o chi ri winaq ri kub'ij chi kákojonik, man kub'an tä k'u ri utzil, man are tä ri' ri qas kojonik? ¡Man k'o tä k'u jub'iq' u patän we kojonik ri! ¡Je' ta ne chi xa káminaq wa! ²¹ ¡Qilampe ri qa mam Abraham ojer! Ri Dios xuq'alajisaj chi qas jikom ri ranima' rumal ri xub'ano, xuya k'u ru k'ojol rech kákämisax che sipanik cho ri Dios. ²² ¿A mat kawilo chi ri qa mam Abraham xq'alajinik chi qas kákojonik ruk' ri xub'ano? Rumal ri xub'an ri are' qas xub'an tz'aqat ru kojonik. ²³ Je' xb'antajik jas ri kub'ij ru Loq' Pixab' ri Dios ri Tz'ib'talik ri kub'ij: "Ri qa mam Abraham xkojon che ri Dios. Rumal k'u ru kojonik xilitaj rumal ri Dios chi qas jikom ri ranima'," —kácha'. Xb'ix k'u chrij ri qa mam Abraham chi sib'alaj utz ri are' ruk' ri Dios.

²⁴ ¿A kich'ob'o? Ri Dios kárido chi jikom ranima' jun winaq rumal ri kub'ano, man xuwi tä rumal chi kákojonik. ²⁵ Je' xb'antaj wa' ruk' ri Rahab xuquje', ri ixoq ri keuch'ab'ej achijab'. Ri Dios k'ut xuq'alajisaj chi jikom ranima' ri are' rumal ri utzil ri xub'ano aretaq xeuk'ulaj ri achijab' aj Israel ri e taqom b'ik, xuya chke chi kewi'k, kewar chila'. Te k'u ri' xeuto' churiqik jun b'e chik rech keanimaj b'i chkiwäch ri ki k'ulel. ²⁶ Je' jas ri cuerpo ri elinaq chi ranima', káminaq ri'. Je' ri' xuquje' ri kojonik. We ta ri winaq man kuk'ut tä ruk' ri utzil ri kub'ano chi qas kojoninaq, man k'o tä u patän we kojonik ri'. ¡Je' ta ne chi xa káminaq wa'!

3

Ri winaq ri qas kojoninaq che ri Cristo kákojonik kujik' ri raq'

¹ Wachalal, mek'oji k'ia chiwe ri xaq kákikoj kib' che ki tijoxik ri qachalal. Iwetam k'ut chi k'äx na ri q'atow tzij pa qa wi' uj ri káqaya tijonik chuwäch ri q'atow tzij pa ki wi' nik'iaj chik. ² Ri uj qonojel kujmakunik. K'ia mul kajsach che ri káqa'no. We k'u k'o jun ri man k'o tä jub'iq' kásach wi che ri kub'ij, are jun winaq ri' ri qas tz'aqat ru chomanik. Kákojon ri' chuq'ilik rib' che ronojel ri kraj ri ranima'. ³ Ri uj kujkowin che ki jik'ik ri kiej ruk' jun alaj jik'b'al ri káqakoj pa ki chi'. Pune ta ne sib'alaj k'o ki chuq'ab', kujkinimaj k'u na ri'. ⁴ Qesajmpe qa no'j xuquje' chkiq ri nimaq taq barcos. Pune sib'alaj k'o u chuq'ab' ri kiäqiq' ri käch'ikminik, ri achi ri k'amowinaq b'ik kákojonik kuk'am u b'e ri barco ruk' ri alaj u timón jawije' chi' ri kraj ke' wi'. ⁵ Je' k'u ri' xuquje' ri qaq'. Ri qaq', pune are xa jun alaj ti'j ri sib'alaj ch'utin ri k'o

pa qa chi', k'ia k'u ri kákojon chub'anik. ¡Sib'alaj nim ri k'ache'laj ri kákojon jun alaj q'aq' chuporoxik! ⁶ Ri qaq' junam ruk' jun u xaq q'aq'. Je' ta ne ri uwächulew ruk' ronojel ri etzelal ri k'o chupam k'o pa qa cuerpo, kutz'iloj ri k'o ronojel. Ri qaq' je' ta ne tzijtal wa' rumal ri q'aq' rech ri infierno. Ronojel q'ij k'ut kub'an nimalaj k'äx che ri qa k'aslemal, je' ta ne chi kujk'atik. ⁷ Ri winaq kákojonik káresaj ri u k'a'nal apachike u wäch chikop cho ruwächulew, je' k'u u b'anom wa'. Kákojon ri are' chub'anik wa' chke taq awaj aj pa taq juyub', chke ri chikop ajuwakaj, chke ri kumätz, xuquje' chke ronojel ki wäch chikop ri e k'o pa taq ri nimalaj ja' rech ri mar, pa taq ri nima'. ⁸ Man k'o tä k'u jun winaq kákojonik kujik' ri raq', káresaj ru k'a'nal. Ri qaq' are sib'alaj itzel wa' ri man kuya' taj qas kájik'ik. Are je' ta ne chi sib'alaj k'o u veneno ri kákojonik kákämisanik. ⁹ Ruk' ri qaq' káqaya u q'ij ri Qajaw Dios ri qa Tat. Ruk' ri qaq' xuquje' keqayoq' ri winaq ri e b'anom rumal ri Dios ri xaq jub'iq' man e junam tä ruk'. ¹⁰ Jun winaq ruk' ru chi' kuya u q'ij jun, xuquje' káyoq'onik. Wachalal, ¡man ya'tal tä wa' chi je' káqa'no, man utz tä k'u ri! ¹¹ ¿A kel lo loq utzalaj joron xuquje' k'alaj joron xa pa jun u k'iyib'al ja'? ¡Man je' taj! ¹² Wachalal, ¿a kuya lo alanxäx jun u che'al oj? ¿A kuya lo oj jun u k'amal kinaq'?† ¡Man je' taj! Je' k'u ri' man kuya' taj kel loq joron ri tza, xuquje' joron ri qas utz xa pa jun u k'iyib'al ja'.

Waral káqil wi jas ri' ri utzalaj no'j ri kápe ruk' ri Dios

¹³ We k'o jachin jun chixol ri sib'alaj k'o retam xuquje' k'o u no'j, chuk'utu b'a wa' ruk' ri utzalaj u k'aslemal, ruk' k'u ri utzil ri kub'ano ri man k'o tä nimal ruk', xane qas rajwaxik kukoj ri utzalaj u no'j chuk'utik wa'. ¹⁴ We k'u ne k'äx kina' chrij jun winaq chik pa ri iwanima', k'o k'u k'äx pa i k'ux chrij, we pa ronojel ri kib'ano kib'an wa' xaq rech utz kixil wi, man kuya' tä ri' kib'an nimal che ri iwetam. We je' ri' kib'ano, xaq kib'an tzij ri', man kib'ij tä k'u ri qas tzij. ¹⁵ Wa' we nojib'al ri' man are tä ri Dios káyo'wik, xane xaq ajuwächulew. Kápe wa' xaq pa ri ki chomanik ri winaq, are k'u ri Itzel ri káyo'wik. ¹⁶ We k'äx kina' chb'il taq iwib', we ri kib'ano, kib'an wa' xaq rech utz kixil wi, are wa' ri kub'ano chi k'o ch'oj chixol, xuquje' chi k'o ronojel u wäch etzelal chixol. ¹⁷ Are k'u ri no'j ri kápe chila' chikaj ruk' ri Dios, ri qas nab'e ri kub'ano, are kub'an ch'ajch'oj che ri q'a k'aslemal. Kuya utzil ri' chqaxol, kub'ano chi kujch'awik, chi

* 3:4 Je' ri' jas ri kub'an jun alaj timón ruk' jun nim camión.

† 3:12 Pa ri versículo ri' qa tz'ib'am frutas aj Guatemala che ki k'exwäch ri frutas ri man kerigtaj tä waral. Ri mero tzij e are' "higuera", "aceitunas", "planta de uva", e "higos".

utz kujchomanik. Xuquje' kub'ano chi uj nimanlab', chi kâqatoq'ob'isaj ki wâch nik'iaj chik, kâqa'n k'u ri utzil. Kub'ano chi junam keqil wi konojel, man xaq tâ kieb' qa wâch. ¹⁸ Ri winaq ri kuxlan ki k'ux, ri k'o utzil pa kanima', kâkitik na ri' ri utzil chikxol nik'iaj winaq chik, kâkiyak k'u na jun kosecha rech utzil pa taq ri kanima' ri e are', xuquje' pa ri ki k'aslemal.

4

We sib'alaj loq' kâqil wi ri jastaq rech ri uwâchulew, xa kâqa'n qa k'ulel ri' che ri Dios

¹ ¿Jas che xaq amaq'el kixch'ojinik? ¿Jas che kib'an i k'ulel chb'il taq iwib'? ¿A mat kâpe wa' rumal ri itzel taq rayinik ri kâkikoj ki chuq'ab' pa taq ri iwanima'? ¡Je', rumal wa'! ² Ri ix k'o ri kiwaj, rumal k'ut chi man kiriq taj, kixkâmisani. Ri ix k'o ri kirayij, rumal k'ut chi man kâya'taj tâ chiwe, kixel ch'uj, xaq kixch'ojinik. Man kiriq taj jas ri kiwaj rumal chi man kita' tâ wa' che ri Dios. ³ We k'u kita' wa' che ri Dios, ri Are' man kuya tâ chiwe, rumal chi man gas utz ri iwanima' chuta'ik ri kita' che. Are k'u kiwaj chi kâyi' chiwe ri xaq kiko chupam jachike ri kiwaj. ⁴ ¡Ri ix, ix winaq ri man jikom tâ iwanima'! ¿A mat kich'ob'o chi we ke' iwanima' kuk' ri jastaq rech ri uwâchulew, are kib'an i k'ulel ri' che ri Dios? Apachin ri kujach rib' chub'anik ronojel ri kâka'n ri winaq ajuwâchulew, kub'an u k'ulel ri' che ri Dios. ⁵ Man xaq tâ k'u loq' kub'ij ru Loq' Pixab' ri Dios ri Tz'ib'talik: "Ri Loq'alaj Espiritu ru yo'm ri Dios pa qanima' sib'alaj kok il chge, sib'alaj kujraj," —kâcha'. ⁶ Ri Dios k'ut sib'alaj kujuto' na ruk' ri nimalaj u toq'ob' je' jas ri kub'ij ru Loq' Pixab' ri Tz'ib'talik: "Ri Dios kuq'atej ki wâch ri winaq ri xa kâkinimarisaj kib'. Are k'u ri man nim tâ kâkil wi kib', keuto' na ri Are', kutoq'ob'isaj ki wâch," —kâcha'. ⁷ Minimarisaj b'a' iwib', xane chixniman che ri Dios. Ko b'a' kix-jegeloq, chiq'atej u wâch ri Itzel, kanimaj k'u na b'i ri are' chiwâch. ⁸ Chixgeb' ruk' ri Dios, ri Are' k'ut kâqeb' na iwuk' ix. Ri ix ajmakib', chiya b'a' kan u b'anik ri man utz taj, je' ta ne ri kich'aj ri i q'ab' rumal ri tz'il ri i chapom. Ri ix ri xaq kieb' kub'an ri i chomanik ix, kiwaj kib'an ri kâka'n ri winaq ajuwâchulew, xuquje' kiwaj kib'an ri kraj ri Dios. Rajwaxik b'a' kib'an ch'ajch'oj che ri iwanima'. ⁹ Rajwaxik chi sib'alaj kixb'isonik, kiraq i chi' che oq'ej, kel k'u na u wa'l i wâch rumal rech ri mak ri i b'anom. Chik'exa ri i tze' pa oq'ej, chik'exa k'u ri i kikitomal pa b'is. ¹⁰ China' iwib' chi man nim tâ i b'anik chuwâch ri Dios. Ri Are' k'ut kuya na i q'ij.

Man utz taj kâqaaq'at tzij pa ki wi' ri qachalal chub'anik k'âx chke

¹¹ Qachalal, mib'ij k'âx taq tzij chb'il taq iwib'. Jachin ri kuq'at tzij puwi' jun rachalal, kub'ij ri man utz taj chrij chub'anik k'âx che, wa' we winaq ri' xa k'âx kub'ij ri' chrij ru Pixab' ri Dios, xa k'u tajin kukoj rib' ri' che q'atal tzij. We ri at je' kab'an wa' ruk' ri Pixab', man kanimaj tâ k'ut jas ri kâtaqan wi, at ri' xa tajin kakoj awib' che q'atal tzij, kab'ij k'u ri man utz taj chrij ru Pixab' ri Dios. ¹² Xa jun ri Dios k'olik ri yo'winaq ri Pixab', xuwi k'u ri Are' are gas Q'atal Tzij pa qa wi'. Xuwi ri Are' kâkownik kujuto', kâkown k'ut chusachik qa wâch. Are k'u ri at, jachin lo ri at chi ri at kaq'at tzij puwi' ri awach winaq?

Man xaq tâ qech uj ru b'ixik jas ri kâqa'n na chuweg kâb'ij

¹³ Chitampe ri kinb'ij, ix ri' ri je' kib'ij wa': "Kâmik o chuweg kuje' na jela' pa ri tinimit ri'. Kujkanaj k'u na kan jun junab' chila' chub'anik ri k'ayij, kâqach'ak k'u na qa rajil," —kixcha na. ¹⁴ ¡Man iwetam tâ k'ut jas ri kik'ulmaj na chuweg! ¿Jas pu u b'anik ri qa k'aslemal? Ri qa k'aslemal are junam ruk' ri jub'iq' sutz' ri xaq jun rat kâq'alajinik, chanim k'ut kâsachik. ¹⁵ Ri kib'ij, rajwaxik are je wa': "We kraj ri Dios, we kuya na qa k'aslemal, kâqa'n na ri', kâqa'n na la'," —kixcha na. ¹⁶ Are k'u ri ix ruk' nimal kixch'awik, xaq kinimarisaj iwib'. Man utz tâ ri' ri kib'ano, kinimarisaj iwib'. ¹⁷ Jachin ri retam chi utz u b'anik ri utzil jas ri xinb'ij, te k'u ri' man kub'an taj, we winaq ri' gas k'o u mak.

5

Ri Santiago kuya u b'ixik ri k'âx ri kâkiriq na ri q'inomab'

¹ ¡Ri ix q'inomab', chitampe wa' Chixoq'oq, chiraqa i chi' rumal ri nimalaj k'âx ri kâpe na pi wi'. ² Ri i q'inomab' ri k'o kâmik ri xaq i k'olom, je' ta ne q'ayinaq chi wa'. Ri je'lalaj taq iwatz'iaq, xaq chikopirinaq chi wa' xuquje'. ³ Ri q'ân puag, ri saq puag ri i k'olom, xaq u chulum chi rib'. Ronojel k'u wa' kuq'alajisaj na chiwij ri k'âx ri i b'anom. Kâsach na i wâch ix rumal ronojel wa', je' ta ne jun q'aq' wa' ri kuporoj ri i cuerpo. ¿Jas che xaq i mulim k'ia q'inomal che taq we q'ij ri? ¡Iwetam chi are ri k'isb'al taq q'ij wa'! ⁴ ¡Chitampe! Ri ajchakib' ri xeyakow ri i kosecha kâkoq'ej ri ki rajil ri iwelaq'am kan chke. Kel kub'ij wa' chi man i yo'm tâ ri tojb'al ke. Opaninaq k'u ri koq'ej chuwâch ri Qajaw Dios ri k'o u taqanik puwi' ronojel. ¡Ri Are' k'ut u tom ri ki tzij! ⁵ Waral cho we uwâchulew xaq i nimarisam iwib' kuk' taq ri k'alaj taq jastaq iwe. I tzoqopim iwib' chub'anik ronojel ri kiwaj, xaq rech kixkikot ix. Xuquje' i chomarisam iwib' je' ta ne ix wakâx, xa

k'u jub'iq' man kopan ri q'ij ri kixk'am b'i pa kāmīxaxik rech kixpilik. ⁶ Ri ix i q'atom tzij pa ki wi' ri winaq ri man k'o tā ki mak rech kāk'ājisax ki wäch, i kāmīsam k'u wa'. Ri e are' k'ut man k'o tā jas ri ka'nom chiwe, man kākīq'atej tā i wäch.

Rajwaxik kichajij paciencia xuquje' ki-tajej u b'anik orar

⁷ Qachalal, chichajij b'a' paciencia k'ā kāpe na ri Qajaw Jesús. Chib'ana iwe jas ri kub'an ri tikol ab'ix, ruk' paciencia kereyej na ri nab'e taq jāb' xuquje' ri k'isb'al taq jāb' rech kāk'iy ru tiko'n, kuyak k'u na jun utzalaj kosecha. ⁸ Je wa' xuquje' rajwaxik kib'an ix, kichajij paciencia. Chiwalijisaj b'a' ri iwanima' rumal chi man naj tā chik k'o wi ri q'ij ri kāpe ri Qajaw Jesús. ⁹ Wachalal, xaq mixch'ojinik, ri jun ruk' ri jun chik, rech man kāk'at tā tzij pi wi'. Ri Dios k'ut, ri nimalaj Q'atal Tzij, ya mero kuchaplej u q'atik tzij pa ki wi' ri winaq. Je' ta ne chi ya tak'al chik chi' ri ja. ¹⁰ Qachalal, chiwesaj i no'j chki'j ri q'alajisaj taq re ru Loq' Pixab' ri Dios ri xek'o'ji ojer. Ri e are' qas xk'o'ji ki paciencia chuch'ijik ri k'āx ri xkiriqo. E taqom k'u rumal ri Qajaw Dios, xech'aw pa ru b'i' ri Are'. ¹¹ Ri uj qetam chi sib'alaj utz ke ri xkich'ij ri k'āx. Ri ix i tom chi ri tat Job sib'alaj xuchajij paciencia chuch'ijik ri nimalaj k'āx ri xuriqo. Xuquje' iwetam jas ri xub'an ri Qajaw Dios chuto'ik aretaq xto'taj chupam ronojel ri nimalaj k'āx ri xuriqo. Ri Qajaw Dios sib'alaj kel u k'ux chqe, xuquje' kutoq'ob'isaj qa wäch.

¹² Ri nim na u b'anik chke taq we tijonik ri', wachalal, are wa': Man xaq tā amaq'el kiko'j juramento pa taq ri i tzij. Man kiko'j tā ru b'i' ri Dios, o ruwächulew, man kiko'j tā k'u jun u wäch juramento chik. We kib'ij: “Je'!” —kixcha na, man xaq tā kieb' i k'ux kib'ij wa'. Xuquje' we kib'ij: “iMan je' taj!” —kixcha', man xaq tā kieb' i k'ux kib'ij rech man kāk'at tā tzij pi wi' chi kāk'ājisax na i wäch rumal ri Dios.

¹³ We k'o jun chiwe ri kəriqtaj pa k'āxk'ol, chub'ana orar. We k'o jun chiwe ri kākikotik, chb'ixonoq, chuya u q'ij ri Dios. ¹⁴ We k'o jun chiwe ri kāyawajik, cheusik'ij ri k'amal taq ki b'e ri qachalal kojonelab' rech kāk'a'n orar puwi'. Kākikoj k'u na jub'iq' aceite puwi' ri yawab' pa ru b'i' ri Qajaw Jesús. ¹⁵ We aretaq kāk'a'n orar ri k'amal taq ki b'e ri kojonelab' puwi' ri yawab', qas kākikoj chi kākunatajik, kākunataj na ri', kāwalijisax k'u na ri are' rumal ri Qajaw Dios. We makuninaq ri yawab', kāsachtaj na u mak rumal ri Dios. ¹⁶ Rumal ri' rajwaxik chi kiq'alajisaj jas u wäch mak ri i b'anom chb'il taq iwib'. Te k'u ri' chib'ana orar pi wi' chb'il taq iwib' rech kixkunatajik. Ri oración ri kub'an jun winaq ri qas jikom ranima',

sib'alaj k'o na u chuq'ab' wa' chub'anik utzil. ¹⁷ Ri qa mam Elías, ri q'alajisaj re ru Loq' Pixab' ri Dios ojer, are xaq jun winaq je' jas ri uj. K'o jumul ri xub'an orar, xuta' che ri Dios chi man kākaj tā na ri jāb'. Oxib' junab' k'ut ruk' nik'iaj man k'o tā jāb' xqajik. ¹⁸ Aretaq k'ut xub'an orar jumul chik, xuta' che ri Dios chi kākaj ri jāb'. Xqaj k'u ri jāb', ri tiko'n k'ut xuya jun utzalaj kosecha.

¹⁹ Wachalal, qa'na che chi jun chiwe kutas rib' chrij ri Qas Tzij, k'o k'u jun chik ri kutij u chuq'ab' che rech kätzelej chi na jumul. ²⁰ Chiwetamaj b'a' chi jachin ri kākowinik kub'ano chi jun ajmak kuya kan ru b'e ri man utz taj, are jun winaq ri' ri xresaj ri ranima' jun ajmak pu q'ab' ri kāmikal. Ri je' kub'an wa' kub'ano chi kāsachtaj na ri k'ialaj u mak ri winaq ri'.

RI NAB'E CARTA RI XUTZ'IB'AJ RI SAN PEDRO

Ri apóstol Pedro kuchap u tz'ib'axik jun carta chke ri kojonelab' ri e jab'uninaq cho ruwächulew

¹ In wa', ri Pedro, in apóstol. In jun chke ru taqo'n ri Jesucristo. Kintz'ib'aj b'i wa' we wuj ri' chiwe ix, ix ri' ri ix jab'uninaq cho ruwächulew, ri ix ri k'o pa Ponto, pa Galacia, pa Capadocia, pa Asia, xuquje' ri ix ri k'o pa Bitinia. ² Ix ri', ri ix cha'tal rumal ri Dios qa Tat rumal chi je wa' ru chomam ri Are' petinaq loq. Ri ix sik'im rumal ri Loq'alaj Espiritu rech kub'an ch'ajch'o'j che ri iwanima' ruk' ri u kik'el ri Jesucristo rech kixok chunimaxik ri Are'. Are ta b'a' ri Dios sib'alaj kutoq'ob'isaj i wäch, kub'ano chi qas kuxlan ri iwanima'.

Waral käqil wi jas ri ku'l wi qa k'ux pa ri qa k'aslemaal waral cho we uwächulew

³ Qaya b'a' u q'ij ri Dios ru Tat ri Qajaw Jesucristo rumal chi sib'alaj xel u k'ux chqe, xub'an k'ak' che ri qa k'aslemaal rumal chi xk'astajisax ri Jesucristo chkixol ri käminaqib'. Are k'u wa' ri ku'l wi qa k'ux pa we k'aslemaal ri'. ⁴ Je' xub'an wa' chqe rech käqechb'ej ri nimalaj utzil ri man kuya' taj käsach u wäch, ri man kätz'ilob' taj, man je' tä kub'ano jas ri kub'an ri kotz'ij ri xa kächaq'ijik. Ronojel wa' are k'olotal chqe chila' chikaj rumal ri Dios. ⁵ Rumal chi ri ix qas ix kojoniinaq che ri Dios, ri Are' kixuchajij na ruk' ri nimalaj u chuq'ab' rech kiriq na ru tob'anik ri i chomam loq chi kuq'alajisaj na pa ri k'isb'al taq q'ij.

⁶ Rumal k'u wa' ri ix qas kixkikotik, pune ta ne rajwaxik chi kiriq na k'äx kämik ri', kixok'ow k'u na pa jalajoj u wäch taq k'äx'ol. Xaq k'u q'atetal q'ij kiriq wa' we k'äx ri'. ⁷ Tajin kiriq wa' we k'äx ri' rech käq'alajinik chi qas tzij ix kojoniinaq. Jas ri käb'an che ri q'an puag käyi' pa ri q'aq' che rilik we qas utz, je k'u ri' ri ix. We kixkowinik kich'ij ri k'äx, q'alaj ri' chi qas tzij ix kojoniinaq. Más loq' k'u wa' ri i kojoniik chuwach ri q'an puag ri xa käsach u wäch. Utz k'u kixil na chi qas ix kojoniinaq, käyi' na i q'ij, nim kixil wi na aretaq käpe ri Jesucristo, kuk'ut na rib' chqawäch.

⁸ Ri ix kiwaj ri Jesucristo, pune man iwilom tä u wäch. Kämik k'u ri' ri ix i ku'b'am i k'ux chrij, qas kixkikot k'u na ruk' nimalaj kikitomal ri man k'o tä je wi, ri man kiriq taj jas kib'an chub'ixik. ⁹ Je ri', rumal chi i riqom ru tob'anik ri Dios. Are k'u wa' ri tajin kik'amo rumal chi kixkojonik.

¹⁰ Ri q'alajisal taq re ru Loq' Pixab' ri Dios ojer, xech'aw loq chrij ri nimalaj toq'ob' ri

kub'an na ri Are' chiwe. Ri e are' sib'alaj xkitzujukj retamaxik wa', xkitzujukj k'u u ch'ob'ik jas ri kub'an na ri Dios che i to'ik. ¹¹ Xkitala u tzijol jachin ri käpe na xuquje' jampa' käpetik. Xq'alajisax k'u wa' chkiwäch rumal ri Espiritu rech ri Cristo ri k'o pa kanima'. Tzare k'u wa' xuquje' ri xyo'w loq u b'ixik ri k'äx'ol ri kuriq na ri Cristo, xuquje' xub'ij loq chi känimarisax na u q'ij aretaq ok'owinaq chi ronojel. ¹² Xq'alajisax k'u chkiwäch rumal ri Dios chi ri tajin käkiya u b'ixik man are tä chke ri e are', xane chqe uj kämik. Are k'u wa' ri tzijom chiwe ix kumal ri winaq ri xkitzijo'j ri Utzalaj Tziji re ri Evangelio ruk' ru chuq'ab' ri Loq'alaj Espiritu ri taqom loq chikaj. Are sib'alaj käkaj ta na ri ängeles käketamaj ronojel wa'.

Ri Dios kujusik'ij rech käqatas qib' chrij ri etzelal

¹³ Rumal ri' rajwaxik chi qas utz chixchomanoq, chichomaj na jas ri kib'ano, chikojo k'u ri utzalaj i chomab'al. Qas chiku'b'a i k'ux chrij ri nimalaj toq'ob' ri kuya na ri Dios chiwe aretaq käpe na ri Jesucristo, kuk'ut k'u na rib' chqawäch. ¹⁴ Chixnimanog, mib'an chi k'ut ri xa i rayib'al ix ri xib'an kan nab'e aretaq mäja' qas kiwetamaj u wäch ri Dios. ¹⁵ Xane jas ri Dios ri xixusik'ij Are' tastal chrij ronojel u wäch etzelal, je' chib'ana ix xuquje' pa ronojel ri i k'aslemaal, chijacha k'u iwib' pu q'ab' ri Dios. ¹⁶ Kub'ij k'u ru Loq' Pixab' ri Dios ri Tz'ib'talik: "Chijacha iwib' pa nu q'ab', chitasa iwib' chrij ronojel u wäch etzelal, rumal chi ri in, in tastal chrij ronojel u wäch etzelal," —kächa ri tz'ib'tal kanoq.

¹⁷ We kib'ij "qa Tat" che ri Dios ri junam kub'an chuq'atik tzij pa ki wi' ri winaq rumal ri ki b'anom chkijujunal, rajwaxik b'a' chi nim kiwil wi ri Are', chixej k'u iwib' chuwach amaq'el ronojel q'ij pa ri i k'aslemaal waral cho we uwächulew. ¹⁸ Iwetam k'ut chi ri Dios xixutoro, xixresaj chupam ri k'aslemaal ri man utz taj, ri man k'o tä u patän, ri k'aslemaal ri xik'am kan chke ri i nan i tat ojer. Iwetam xuquje' chi man are tä ri q'an puag, man are tä k'u ri saq puag ri xa käsach ki wäch kuya' käyi' wa' che rajil we tob'anik ri' ri xiriqo. ¹⁹ Xane ri xtorb'ex iwe are ri loq'alaj u kik'el ri Cristo ri xyl' che sipanik cho ri Dios je' jas ru kik'el jun alaj chij ri qas utz na, ri man k'o tä u yab'. ²⁰ Ri Cristo cha'tal chi ri Are' rumal ri Dios tzaretaq mäja' kub'an ruwächulew. Q'alajisam k'u wa' pa taq we k'isb'al taq q'ij ri' rech kub'an utzil chiwe. ²¹ Rumal k'u ri Cristo ri ix kixkojon che ri Dios ri xk'astajisan ri Are' chkixol ri käminaqib', xunimarisaj k'u u q'ij. Rumal k'u ri' ri ix kixkojon che ri Dios, chrij k'u ri Are' käku'b'i wi i k'ux.

²² Rumal ri nimanik che ri Qas Tzij i ch'ajom ri iwanima' rumal ri Loq'alaj Espiritu rech qas tzij kiwaj iwib' chb'il taq iwib' nimalaj iwonojel. Qas rajwaxik b'a' kiwaj iwib' chb'il taq iwib'. Chijikib'a ri iwanima', chitija k'u i chuq'ab' chub'anik wa'. ²³ Yo'm k'u jun k'ak' i k'aslemal je' ta ne chi xil chi na i wäch jumul chik. Are je' i b'anik wa' man kumal tä k'u ri i nan i tat ri xa kekämik, xane rumal ru Loq' Pixab' ri Dios ri qas k'aslik, ri man käsach tä u wäch pa taq ri q'ij ri junab' ri kepetik. ²⁴ Kub'ij k'u ru Loq' Pixab' ri Dios ri Tz'ib'talik: Konojel ri winaq e je' jas ri q'ayes, ri ki je'lal k'ut are junam ruk' ru kotz'ijal ri q'ayes.

Ri q'ayes kub'an chaq'ij,
ru kotz'ijal xa käpulpub'ik.

²⁵ Are k'u ru Loq' Pixab' ri Dios

käk'oji na amaq'el,
man käsach tä u wäch wa',

—kächa ri tz'ib'tal kanoq. Ri Tzij ri' are ri Utzalaj Tzij re ri Evangelio ri xtzijox chiwe.

2

¹ Rumal k'u ri' chiya b'a' kan u b'anik ronojel u wäch etzelal, mixsub'un chik, mib'an xaq kieb' i wäch, k'äx mina' chikij nik'iaj winaq chik aretaq käkiriq utzil, man kiyak tä k'u tzij. ² Chib'ana' jas ri kub'an jun alaj ak'al ri te' kil u wäch, kutzukuj ru tu' ru nan. Rajwaxik chi sib'alaj ke' iwanima' ruk' ru Loq' Pixab' ri Dios ri je' ta ne qas leche ri man k'o tä yujtal ruk', rech rumal wa' kixk'i'yik, kiriq k'u na ru tob'anik ri Dios. ³ Je' chib'ana wa' we qas xich'ob'o chi qas tzij sib'alaj utz ri Qajaw Jesús.

Waral käqil wi chi ri Cristo are junam jas jun nimalaj ab'aj ri käkoj che toq'eb'al re ri ja

⁴ jChixsa'j ruk' ri Qajaw Jesús! Pune k'asal ri Are', are junam ruk' jun kowilaj ab'aj. (Are utz na ri' we käkoj wa' che toq'eb'al re jun nim ja.) Qas tzij k'ut, ri Are' etzelam u wäch kumal ri winaq. Chuwäch k'u ri Dios are ri ab'aj ri más utz na, ri nim na u q'ij, cha'tal k'u rumal ri qa Tat. ⁵ Ri ix xuquje', pune ix k'aslik, je' ta ne ix ab'aj. Chiya b'a' che ri Dios chi kixukoj chuyakik jun loq'alaj ja ri käq'ijilax wi ri Are'. Ri ix k'ut, ix juch'ob' sacerdotes ri i jachom iwib' pu q'ab' ri Dios, ix tastal k'u chrij ronojel u wäch etzelal. Rumal k'u ri Jesucristo, ri ix kiya sipanik cho ri Dios xa jas ri käqaj chuwach ri Are', ri kuk'amowaj, jas ri kuya ri Loq'alaj Espiritu pa ri iwanima'. ⁶ Rumal ri' xuquje' kub'ij ru Loq' Pixab' ri Dios ri Tz'ib'talik:

jChiwilampe'! K'o Jun ri kinya pa ri Siön,
je' ta ne chi kincha' jun ab'aj ri sib'alaj
nim u q'ij,

kinkoj k'u ri Are' che toq'eb'al re ri ja.

Jachin k'u ri käkojon che, man käb'ison tä ri',

xane käkikot na ranima',
—kächa ri tz'ib'tal kanoq. ⁷ Sib'alaj loq' k'u na ri Are' chiwäch ix, ri ix kojoniñaq che. Are k'u ri man kekojon taj, je' käb'antaj na jas ri kub'ij ru Loq' Pixab' ri Dios ri Tz'ib'talik: Ri ab'aj ri man xkaj tä ri yakal taq ja, are ab'aj wa' xkoj che toq'eb'al re ri ja, —kächa'. ⁸ Xuquje' je' käb'antaj na jas ri kub'ij:

Are jun ab'aj ri käkicha'ij wi kib',
jun nimalaj ab'aj ri xa ketzaq rumal,
—kächa ri' ri tz'ib'tal kanoq. Ketzaq k'u ri winaq we man keniman tä che ru Loq' Pixab' ri Dios. Je' k'u u chomam loq' ri Dios wa' chkiij.

Waral käqil wi jachin taq ri e rech ri Dios

⁹ Ri ix k'ut, ix juch'ob' winaq ri cha'talik, ix juch'ob' sacerdotes ri kixpatänin che ri Nim Taqanel, ix winaq ri i jachom iwib' pu q'ab' ri Dios, i tasom iwib' chrij ronojel u wäch etzelal, ix k'u ri' ri u tinimit ri Dios. Je wa' i b'anik rech kitziqoj ri nimaq taq kajmab'al ri tajin kub'an ri Dios ri xixusik'ij rech kixel pa ri q'equm ri ix sachinaq wi, kixq'ax k'u pa ri saqil ri sib'alaj kajmab'al ri kuya ri Dios. ¹⁰ Ri ix nab'e kanoq man qas ix tä jun tinimit, are k'u ri kämik ix ri' ri u tinimit ri Dios. Nab'e kanoq man k'o tä jun ri kel u k'ux chiwe. Kämik k'ut sib'alaj kel u k'ux ri Dios chiwe.

Chikojo ri i k'aslemal chupatänixik ri Dios

¹¹ Loq'alaj taq qachalal, kintzizoj iwuk' rumal chi ri ix, ix winaq ri naj ix k'o wi che ri i tinimit. Kixinx'ochi'j chi man kib'an tä chi ri man utz taj ri kraj ri iwanima', ri itzel taq i rayinik ri kech'ojin chiwij rech kixtzaq na pa mak. ¹² Chib'ana ri qas utz pa ri i k'aslemal chkixol ri winaq ri mäja' qas ketam u wäch ri Dios. Je ri', pune ri e are' kämik kixkiyoq'o, käkib'ij chiwij chi ix b'anal taq etzelal, käkinmarisaj k'u na u q'ij ri Dios rumal ri utzil ri kib'ano aretaq käpe ri Are', kuk'ut k'u ri nimalaj u chuq'ab' pa ki wi' ri winaq.

¹³ Chiya b'a' iwib' pa taqik chke ri winaq ri yo'm pa ki q'ab' chi ketaqan pi wi' ix rech nim käkil wi ri Qajaw Jesús. Je' k'u kib'an wa' che ri nimalaj taqanel, ri tata' ri más k'o na taqanik pu q'ab' chkiwäch konojel. ¹⁴ Je ri' kib'an ix xuquje' chke ri winaq, ri u taqo'n ri q'atal tzij, ri e taqom b'i chuk'äjisaxik ki wäch ri b'anal taq etzelal, xuquje' chuya'ik ki q'ij ri käkä'n utzil. ¹⁵ Are k'u u rayib'al ri Dios chi kib'an ri utzil rech kiq'atej u wäch ri konalaj taq ki tzij ri winaq ri man k'o tä ketam. Je ri' man käkiriq tä chik jas käkib'ij chiwij.

¹⁶ Ri ix, ix winaq ri ix tzoqopital chi pu q'ab' ri Itzel, man rumal tä k'u rech chi ix tzoqopitalik kib'an ta ri man utz taj, xane chib'ana' jas ri kub'an jun ri kojom che patänil re jun winaq chik, chipatänij ri Dios.

¹⁷Nim cheiwila wi konojel. Cheiwaj konojel ri qachalal kojonelab'. Nim kiwil wi ri Dios, chixej k'u iwib' chuwäch. Nim chiwila wi ri nimalaj taqanel xuquje'.

Ri Cristo, ruk' ri k'äx ri xuriqo, xuk'ut kan chaqawäch jas ri utz kâqa'no

¹⁸Ix ri', ri ix kojom che patänelab', chiya iwib' pa taqik chke ri i patrón, nim k'ut cheiwila wi. Man xuwi tä chke ri utz ki chomanik, ri kech'awik, xane je' xuquje' chib'ana chke ri e k'a'n. ¹⁹Utz k'u na ri' we jun kuch'ij k'äx, pune man taqal tä che chi kuriqo, we ri are' kuna' pa ranima' cho ri Dios chi man k'o tä etzelal u b'anom. ²⁰We k'u rumal ri u b'anik ri man utz taj kâk'äjisax i wäch ix, äa nim k'u lo u b'anik wa' chi kich'ij ri k'äx ruk' paciencia? ¡Man je' taj! We k'u ne kiriq k'äx xa rumal ru b'anik utzil, kich'ij k'u wa' ruk' paciencia, are utz kil na wa' rumal ri Dios. ²¹Are k'u wa' ri ix sik'im wi rumal ri Dios rumal chi ri Cristo xuriq k'äx rumal qech uj, xuya k'u kan jun utzalaj k'utb'al chiwäch rech kib'an iwe jas ri xub'an ri Are'. ²²Ri Cristo man k'o tä mak xub'ano, man xub'an tä k'u tzij che ki sub'ik ri winaq. ²³Ri Are' aretaq xyoq'ik, man xutzelej tä u k'exel ri ki tzij ri winaq ruk' yoq'onik. Aretaq xb'an k'äx che kumal ri winaq, man xub'ij taj chi käpe na k'äx chkij ri e are', xane xuya kan ronojel pu q'ab' ri Dios ri jikom kub'an chuq'atik tzij. ²⁴Ri Cristo xuk'am b'i ri qä mak pa ri u cuerpo aretaq xrip cho ri cruz rech ri uj, je' ta ne uj käminaq chi ruk' Are', man käqataqej tä chi makunik, xane käqachap u b'anik ri qas jikom, ri qas utz. Xsoktaj k'u ri Cristo rech ri ix kixutzirik, kiriq na ri k'aslemal ri qas utz. ²⁵Ri ix nab'e kanoq ix sachinaq, je' ta ne ix chij ri i jab'um iwib'. Kämik k'ut ix tzelejinaq chi loq ruk' ri Cristo. Ri Are' kixuchajij junam jas jun ajuqu' keuchajij ru chij. Kuchajij k'u na ri iwanima'.

3

Waral käqil wi jas ri rajwaxik pa ri ki k'aslemal ri e k'ulan chik

¹Ri ix ixoqib', ri ix k'ulan chik, chixniman chke ri iwachajil. Je ri' we ne e k'o jujun chke ri iwachajil ri man käkikoj tä ru Loq' Pixab' ri Dios, kekojon ta k'u ne rumal ri utzalaj i k'aslemal ix, ri ix ixoqib', pune ta ne man kätzijox tä ru Loq' Pixab' ri Dios chke. ²Are k'u ri ix kixkilo chi ch'ajch'oj ri iwanima', nim kiwil ri Dios, kixej k'u iwib' chuwäch. ³Ri ix ixoqib' rajwaxik kiko atz'iaq ri qas taqal chiwe, rajwaxik k'ut chi utz u b'anik ri i wi' kib'ano jas ri qas taqalik. Man xuwi tä kiwiq iwib' ruk' q'an puaq, ruk' chachal ri paqal rajil, man ruk' tä k'u atz'iaq ri sib'alaj paqalik. ⁴Xane ri qas wiqob'al iwib' are ri k'o pa ri iwanima'. Ri qas je'lal

ri man käsach tä u wäch are ri utzalaj iwanima' ri sib'alaj käjororik. We wiqob'al ri' are sib'alaj loq' na wa' chuwäch ri Dios. ⁵Je' k'u wiqob'al wa' xkikoj ri ixoqib' ojer ri xkijach kib' pu q'ab' ri Dios. Ri e are' xku'b'i ki k'ux chrij ri Dios, xuquje' xeniman chke ri kachajil. ⁶Je' jas ri nan Sara ojer xniman che ri qä mam Abraham, xub'ij k'u che: "At wajaw," —xcha che. Ri ix, ix je' jas ri nan Sara we kib'an ri utzil, man k'o tä k'u jas kixej wi iwib'.

⁷Ri ix xuquje', ri ix achijab', ri ix k'ulan chik, rajwaxik qas kichomaj na jas kib'an kuk' ri iwi xoqil. Nim cheiwila wi, man xaq xuwi tä rumal chi ri ixoqib' man junam tä ki chuq'ab' iwuk' ix, xane rumal chi ri e are' xuquje' käkechb'ej na ri k'aslemal ri kuya ri Dios chiwe ix rumal ri nimalaj u toq'ob'. Je' chib'ana wa' rech ri Dios kuto aretaq kib'an orar.

Utz ke ri käkiriq k'äx xa rumal ri u b'anik ri utzil

⁸Mäs k'u na, china' pa iwanima' chi xa ix jun, ri ix nimalaj iwonojel. Chel i k'ux chb'il taq iwib', chiwaj iwib' junam jas ri käka'n ri winaq ri qas e kachalal kib'. Min-imarisaq iwib', xane chich'ab'ela iwib' ruk' utzil. ⁹Mitzelej u k'exel ri k'äx ri käb'an chiwe, man kixyoq'on tä k'u chke ri winaq ri kixkiyoq'o. Xane jas ri Dios ri kixtewchirik, chixtewchirik ix xuquje' chke ri keb'anow k'äx chiwe. Iwetam k'ut chi ix u sik'im ri Dios rech kiriq tewchib'al. ¹⁰Je ri' ri kub'ij ru Loq' Pixab' ri Dios ri Tz'ib'talik:

Jachin ri kraj jun utzalaj k'aslemal,

käkikot na amaq'el ronojel q'ij,

chujik'a b'a' ri raq',

mub'ij ri k'äx u b'ixik,

xane chutz'apij ru pu chi'

rech man kub'an tä tzij,

—kächa'.

¹¹Chutasa rib' chrij ri etzelal, chub'ana k'u ri qas utz.

Chutzukuj ru b'anik utzil chkixol ri winaq, qas k'u kutaqej u b'anik wa'.

¹²Je ri', rumal chi ri Qajaw Dios

keuchajij ri winaq ri jikom kanima',

xuquje' kuto aretaq käka'n orar,

kutatab'ej ri käkib'ij che.

Are k'u ri Dios kub'an u k'ulel chke ri b'anal taq etzelal,

—kächa ri' ri tz'ib'tal kanoq.

¹³Jachin ta k'u ne kub'an k'äx chiwe we ri ix qas kutaqej u b'anik ri utzil? ¡Kraj man k'o taj! ¹⁴Pune b'a' rumal ru b'anik ri utzil kiriq k'äx, utz k'u iwe ri'. Rumal ri' mixej iwib' chkiwäch ri keb'anow k'äx chiwe, mixok il kumal. ¹⁵Xane nim chiwila wi ri Cristo ri Iwajaw pa taq ri iwanima'. Jachin taq ri ketow chiwe jas che kiku'b'a i k'ux chrij ri Cristo, ruk' utzil chib'ij wa' chke. Nim

chiwila wi ri Dios, chixej b'a' iwib' chuwäch, minimarisaj k'u iwib'. ¹⁶ Chib'ana utz pa ronojel rech kina' pa ri iwanima' chi man k'o tä etzelal i b'anom. Je ri' ri winaq ri keyoq'on chiwe, ri käkib'ij chi ix b'anal taq etzelal, ri xa käkitez' i wäch rumal chi ri ix kojoninaq che ri Cristo, xa kel na ki k'ixb'al rumal ri käkib'ij. ¹⁷ We je ri' kraj ri Dios chiwe, are utz na kiriq k'äx rumal ri u b'anik utzil chuwäch ri kiriq k'äx xa rumal ru b'anik etzelal.

¹⁸ Are je wa' rumal chi ri Cristo xuquje' xuriq k'äx. Rumal ri qa mak xkäm ri Are' xa jumul rech man k'o tä chi rajwaxik. Ri Are' man k'o tä u mak, xane xuriq k'äx rumal qech uj, ri uj itzel taq winaq, che qoksaxik ruk' ri Dios. Qas tzij xkäm ru cuerpo, are k'u ri ranima' man xkäm tä wa'. ¹⁹ Xe' k'u chutz-ijoxik ri Utzalaj Tziz re ri Evangelio chke ri anima'aj ri e tz'apitz'oj. ²⁰ E are taq wa' ri anima'aj kech ri winaq ri man xeniman tä che ri Dios ojer pa ru q'ijol ri qa mam Noé. Ri Dios xuchajij paciencia, xereyey chi käkik'ex kanima', käkik'ex ki chomanik aretaq ri qa mam Noé tajin kub'an ri nimalaj barco ri káb'ix "arca" che. Man e k'ia tä k'ut ri xkiriq ru tob'anik ri Dios, xane xa e wajxaqib' wa' ri man xejig' tä pa ri ja'. ²¹ Ri nimalaj q'eqal jäb' ri xub'an pa ri u q'ijol ri qa mam Noé, are k'utb'al chrij ri ja' re ri qasna' kämik ri käk'utuwiw chi qa riqom chi ru tob'anik ri Dios. Ri ja' ri' man kâresaj tä k'u ru tz'ilol ri qa cuerpo, xane kub'ano chi kâqata' che ri Dios chi ri Are' kub'an chqe chi utz kâqana' pa qanima' chuwäch. Are wa' kub'ano chi kâqariq ru tob'anik ri Dios rumal chi xk'astajisax ri Jesucristo chkixol ri kâminaqib'. ²² Aretaq xk'astaj b'ik, ri Are' xpaqi chikaj, xt'uuyi k'u pa ru wikiäq'ab' ri Dios. Konojel ri ängeles, xuquje' konojel ri nimaq taq q'atal taq tziz ajuwokaj, konojel k'u ri k'o taqanik pa ki q'ab' rajwaxik keniman na che.

4

Chqajujumal, jas ri u sipam ri Dios chqe, rajwaxik kâqakoj wa' che ki to'ik nik'iaj chik'

¹ Je k'u ri', qachalal, we ri Cristo xuriq k'äx, ri ix xuquje' rajwaxik chi je' i chomanik wa', chi kiriq na k'äx. Jachin chi ri qas u riqom k'äx, man kutagej tä chi makunik ri'. ² Ronojel k'u ri q'ij ri käk'asi na cho ruwächulew, man kukoj tä chi ru k'aslemal chub'anik xaq jas ri kraj ri are', xane chub'anik ru rayib'al ri Dios. ³ Chub'ana k'u ri' chiwe ri xib'an kan pa ri ojer taq q'ij. Are k'u xib'an ri ki rayinik ri winaq ri man e kojonninaq tä che ri Dios. Pa taq ri q'ij ri' xib'an ronojel u wäch etzelal, xa jachike ri utz xiwil wi, pune äwas u b'anik wa' cho ri Dios, xuquje' chkiwäch ri winaq. Xib'an ri itzel taq i rayinik, xib'an nimalaj

q'ab'arik, xib'an nimaq taq wi'm ri xixwojko'r wi, sib'alaj xiya k'u u wi' ru tijik ri ja'. Xuquje' xeiq'ijilaj jujun taq tiox ri sib'alaj tzel keb'elik, ri man taqal tä chiwe chi je' kib'ano. ⁴ Ri winaq k'ut ri man e kojonninaq taj, jun wi utzälaj chi ri ix xa man kiriq tä chi iwib' kuk' chub'anik ri kâka'n ri e are' pa ri itzelalaj ki k'aslemal ri sib'alaj man utz tä u b'anik. Xa rumal ri' kâketzelaj i wäch, kixkiyoq'o. ⁵ We winaq ri' kâkijach k'u na ki kuenta chuwäch ri Jun ri kâpe na chuq'atik tzij pa ki wi' ri e k'ask'oj, xuquje' pa ki wi' ri kâminaqib'. ⁶ Xa rumal wa' xuquje' xtzijox ri Utzalaj Tziz re ri Evangelio chke ri kâminaqib', rech pune xek'asi waral cho ruwächulew, xq'at k'u tzij pa ki wi' junam jas ri kâb'an chke konojel ri winaq, ri kanima' k'ut kuriq na ri qas k'aslemal ri man k'o tä u k'isik, junam jas ru k'aslemal ri Dios.

⁷ Xa jub'iq' kraj chi man kopan ri q'ij ri kujto'tajik, ri käk'is na ronojel. Mib'an xaq jas ri kiwaj ix, xane chichomaj b'a' jas ri kib'ano. Qas chixok il chub'anik orar. ⁸ Man xuwi tä k'u wa', xane xuquje' sib'alaj chiwaj iwib' chb'il taq iwib' rumal chi we je ri' kib'ano, kiwaj iwib', kisachala na ri i mak chb'il taq iwib' pune sib'alaj k'ia ri i mak. ⁹ Utz chib'ana che ki k'ulaxik ri keopan cho taq iwachoch. K'o b'a' jas mib'ij pa iwanima' chki. ¹⁰ Chijujunal, jas ru sipam ri Dios chiwe, chikojo wa' che ki to'ik ri qachalal. Utz chib'ana chukojik ri jalajoj taq tewchib'al ru sipam ri Dios chiwe rumal ri nimalaj u toq'ob'. ¹¹ Jachin ri kâtzijonik, chutzijoj jas ri kub'ij ri Dios pa ru Loq' Pixab' ri Are'. Jachin ri kok che ki to'ik nik'iaj chik, chub'ana wa' ruk' ri chuq'ab' ri yo'm che rumal ri Dios. Ronojel ri kib'ano, chib'ana wa' chuya'ik u q'ij ri Dios rumal ri Jesucristo. Chnimarisax b'a' u q'ij ri Are', chk'ol ta b'a' u taqanik amaq'el pa taq ri q'ij ri junab' ri kepetik. Amén.

Utz qe we kâqariq k'äx rumal chi uj kojonninaq che ri Cristo

¹² Loq'alaj taq qachalal, mikajmaj iwib' aretaq kâpe ri nimalaj k'äx pi wi' je' ta ne chi jun wi ri tajin kik'ulmaj. ¹³ Xane chixkiko-toq aretaq kiriq iwe ri k'äx junam jas ri xuriq ri Cristo. Je ri' rech sib'alaj kixkikot na aretaq kâpe ri Are', kâq'alajin ri je'lalaj u juluwem, kânimarisax k'u na u q'ij. ¹⁴ We xa rumal ri Cristo ketzelax na i wäch, kixyoq'ik, utz k'u iwe ix. Je ri', rumal chi ri Loq'alaj Espiritu rech ri Dios qajinaq pi wi'. Qas tziz chi ri Cristo kâyoq' kumal ri winaq, are k'u ri ix xa kiya u q'ij ri Are'. ¹⁵ Man utz tä ri' we k'o jun chiwe kuriq k'äx rumal chi ri are' kâkämisanik, rumal chi kub'an elaq', rumal chi kuxalq'atij ri pixab', o rumal chi kunnim rib' chupam ri kech nik'iaj winaq chik. ¹⁶ We k'u k'o jun kuriq k'äx xa rumal chi

kojoninaq che ri Cristo, káb'ix “Cristiano” che, mäk'ix ri' ri are', xane chuya u q'ij ri Dios rumal wa'.

¹⁷ Xuriq k'u ri q'ij ri kächapletaj ru q'atik tzij pa qa wi' uj, qachalal, uj ri' ri uj rech ri Dios. We k'u ru q'atik tzij kächapletaj nab'e pa qa wi' uj, ¿jas lo ri käkiriq na ri winaq ri man keniman tä che ri Utzalaj Tzij ri tzijom loq rumal ri Dios? ¹⁸ We ruk' k'äx ri winaq ri jikom kanima' cho ri Dios käkiriq ru tob'anik ri Are', ¿jas lo ri käkiriq na ri winaq ri man kekojon tä che ri Dios, ri xaq e ajmakib'? ¹⁹ We k'u e k'o ri tajin käkiriq k'äx rumal chi je wa' kraj ri Dios, chkitagej b'a' u b'anik ri utzil, xa chkiya k'u na kib' pu q'ab' ri Dios ri xeb'anowik. Ri Are' k'ut jikom ranima', qas kub'an na ri kub'ij.

5

Ri apóstol Pedro keupixb'aj ri kojonelab'

¹ Keinpixb'aj konojel ri k'amal taq ki b'e ri qachalal kojonelab' ri ix k'o wi. Ri in xuquje' in k'amal b'e junam kuk', xuquje' qas xinwil in ri k'äx'ol ri xuriq ri Cristo. Ri in, je' jas ri e are' junam kinriq na we ri u nimarisaxik u q'ij ri Cristo ri käch'alajinik aretaq käpetik. ² Cheichajij ri qachalal kojonelab' ri e yo'm pa i q'ab', junam jas ri kub'an jun utzalaj ajuuq' che ki chajixik ru chij. Chib'ana wa' ruk' jun utzalaj iwanima', xa jas ri kraj ri Dios, man xaq tä rumal chi ix taqom chub'anik wa'. Man keichajij tä k'u ri e are' xaq xuwi rech kich'ak puag, xane chib'ana wa' rumal chi are ri qas kiwaj kib'ano. ³ Mib'an iwe chke ri keichajij, xa kixtaqan pa ki wi', xane chikoj o i chuq'ab' rech ri i k'aslemal are jun utzalaj k'utb'al chkiwäch. ⁴ Je ri', aretaq käpe ri nimalaj Qajyuq', ri Qajaw Jesús, ri ix kik'am na jun je'lalaj tojb'al iwe ri man junam tä ruk' ri corona re u xaq che', re kotz'ij ri xa kächaqi'jik.

⁵ Xuquje' ri ix, alab'om, chinimaj ri ki taqanik ri k'amal taq i b'e. Chiyala iwib' pa taqik chb'il taq iwib' nimalaj iwonojel, minimarisaj k'u iwib'. Kub'ij k'u ru Loq' Pixab' ri Dios ri Tz'ib'talik:

Ri Dios kuk'ulelaj ki wäch ri winaq
ri kaka'n nimal,

keuto' k'u ri man kakinimarisaj tä kib'

ruk' ri nimalaj u toq'ob' ri Are',

—kächa ri tz'ib'tal kanoq. ⁶ Qas china' pa iwanima' chi man nim tä i b'anik, chiya k'u iwib' pu q'ab' ri qa Dios ri k'o nimalaj u chuq'ab' rech ri Are' kunimarisaj na i q'ij ix aretaq kuriq ri q'ij. ⁷ Ronojel ri xaq kixok wi il, chiya kan wa' pu q'ab' ri Dios. Ri Are k'ut kel u k'ux chiwe, kixuto' k'u na.

⁸ ¡Chk'ol b'a' i no'j, chixk'ask'atoq! Je' chib'ana wa' rumal chi ri i k'ulel ri Itzel, are je' jas jun koj ri kuraq u chi', ri

sib'alaj kätio'nik, ri kutzukuj jachin ri kutijo. ⁹ ¡Chiq'atej u wäch ri Itzel, qas chixkojonoq! Iwetam k'ut chi ri k'äx'ol ri tajin kiriq ix, je' xuquje' tajin käkiriq konojel ri qachalal cho ronojel ruwächulew. ¹⁰ Aretaq k'ut i riqom chi kieb' oxib' q'ij k'äx'ol, ri Dios ri sib'alaj kutoq'ob'isaj qa wäch, ri xujusik'ij rech känimarisax qa q'ij junam ruk' ri Jesu-cristo, kub'ano chi kijikib'a na ri iwanima' chrij, kub'an na tz'agat chiwe. Kuya na ri i chuq'ab', xuquje' kub'ano chi qas ko kixjeqi na pa ri i kojoniq. ¹¹ Chnimarisax b'a' u q'ij ri Are', chk'ol k'u u taqanik amaq'el pa taq ri q'ij ri junab' ri ketetik. Amén.

Ri apóstol Pedro kuya rutzil ki wäch ri qachalal

¹² Nu tz'ib'am b'i we kieb' oxib' tzij ri' chiwe ruk' ru tob'anik ri qachalal Silvano, ri wilom chi qas jikom ri ranima'. Ruk' k'u we wuj ri' kixinpixb'aj, kinq'alajisaj k'u chiwäch chi qas tzij ri ix i riqom ri nimalaj u toq'ob' ri Dios. ¡Chijikib'a b'a' i k'ux chrij wa'!

¹³ Ri qachalal kojonelab' ri e k'o pa ri tinimit Babilonia, ri e cha'tal rumal ri Dios junam iwuk' ix, käkia b'i rutzil i wäch. Xuquje' ri qachalal Marcos, ri je' ta ne nu k'o'ol, kuya b'i rutzil i wäch. ¹⁴ Chitz'umaj iwib' chb'il taq iwib' aretaq kiyala rutzil i wäch. Je ri' kib'ano chuk'utik chi qas kiwaj iwib' chb'il taq iwib'.

Chuxlan ta b'a' ri iwanima' nimalaj iwonojel ri ix, ix rech ri Jesucristo. Amén.

RI UKAB' CARTA RI XUTZ'IB'AJ RI SAN PEDRO

Ri apóstol Pedro kuchap u tz'ib'axik ri ukab' u carta chke ri qachalal kojonelab'

¹ In wa', ri Simón Pedro, in patänil re ri Jesucristo, xuquje' in apóstol, jun chke ru taqo'n ri Are'. Kintz'ib'aj b'i wa' we wuj ri' chiwe ix iwonojel ri i rigom ri kojoniq ri sib'alaj loq' na ri qa rigom uj. Je ri', rumal chi ri qa Dios Jesucristo ri To'l Qe are jikom ranima' quk'. ² Are ta b'a' ri Dios sib'alaj kutoq'ob'isaj i wäch, xuquje' kub'an ta na chi sib'alaj kuxlan ri iwanima' rumal chi iwetam u wäch ri Dios, iwetam k'u u wäch ri Qajaw Jesús.

Waral käqil wi ri rajwaxik pa ru k'aslemal ri kojonel

³ Ri Dios ruk' ri nimalaj u chuq'ab' u sipam chqe ronojel ri rajwaxik pa ri qa k'aslemal, xuquje' ri rajwaxik chqe rech kujkowinik käqataqej u patänixik ri Are'. Je ri' xub'ano aretaq xuya chqe chi qas käqetamay u wäch ri Jesús. Are ri Are' ri xujusik'ij rech k'o jub'iq' qe ri qas rutzil ri Are', xuquje' ri nimalaj u q'ij ri Are'. ⁴ Ruk' ronojel wa' we ri' u yo'm chqe chi käqariq na konojel ri nimaq taq u tewchib'al ri sib'alaj loq' na ri xuchi'j kanog, rech ri uj kujkowinik kujel chupam ri itzelalaj k'aslemal ajuwächulew ri xa kusachisaj u wäch ronojel. Are k'äx na wa' we k'aslemal ri' rumal ri itzel taq ki rayib'al ri winaq. Je ri' xub'an chqe rech kuya' käqariq qe ri qas k'aslemal ri k'o ruk' ri Dios. ⁵ Rumal wa' rajwaxik chi ri ix kikoj i chuq'ab' rech man xuwi tä kixkojonik, xane xuquje' kib'an ri qas utzil pa ri i k'aslemal. Ruk' ri qas utzil ri kib'ano rajwaxik xuquje' chi käk'oji na ri utzalaj iwetamb'al. ⁶ Ruk' ri utzalaj iwetamb'al rajwaxik xuquje' chi kiwilo chi man kib'an tä xaq xuwi jas ri kiwaj ix chiwe chb'il taq iwib'. Rajwaxik xuquje' chi kichajij paciencia chuch'ijik ronojel ri käpe pi wi'. Ruk' we paciencia ri' rajwaxik xuquje' chi qas kixpatänin che ri Dios. ⁷ Man ruk' tä k'u ri' chi kixpatänin che ri Dios, xane rajwaxik xuquje' chi kiwaj iwib' nimalaj iwonojel ri ix ri iwachalal iwib' rumal ri Cristo. Man ruk' tä k'u wa' chi kiwaj iwib', xane rajwaxik xuquje' chi loq' kiwil konojel winaq.

⁸ We k'u kikoj i chuq'ab' rech k'o ronojel wa' pa ri i k'aslemal amaq'el ronojel q'ij, qas k'o u patän ri' ri i k'aslemal, man xaq tä k'u loq' ri' iwetam u wäch ri Qajaw Jesucristo. ⁹ Apachin k'u ri man k'o tä ronojel wa' pa ru k'aslemal, je' ta ne moy ri are', man käkowin tä k'ut käka'yik. Sachinaq chik pa u jolom chi ch'ajtajinaq chi ri ranima' che taq ru mak ri

xub'an kan pa ru k'aslemal ojer. ¹⁰ Rumal ri', qachalal, chikojo na i chuq'ab' pa ronojel rech qas iwetam chi ix jun kuk' ri e cha'tal rumal ri Dios, ri e sik'im rumal ri Are' rech kek'oji ruk'. We je' kib'an wa', man kixtzaq tä chik pa mak. ¹¹ Je ri' qas käya'taj na chiwe chi kixopan na ruk' ri Qajaw Jesucristo ri To'l Qe rech kätaqan ri Are' pi wi'. Aretaq kuchap taqanik ri Qajaw Jesús, man k'o tä u k'isik wa' we taqanik ri'.

¹² Rumal k'u ri' kintaqej na u na'taxik chiwe ronojel wa', ri ya nu b'im chik, pune ta ne ri ix iwetam chi wa', qas k'u tajin kitaqej ri qas tzij ri k'utum chiwäch. ¹³ Ri in kinchomaj chi taqal chwe chi kinwal-ijisaj ri iwanima' ruk' we pixb'enik ri' ri kinna'taj chiwe chuweq käb'ij ri in k'asal na. ¹⁴ Wetam k'ut chi xa jub'iq' kraj chi kinkämik, je' jas ri k'utum chnuwäch rumal ri Qajaw Jesucristo. ¹⁵ Sib'alaj k'ut kinkoj na nu chuq'ab' rech aretaq in käminaq chik, k'o ri käk'oji na kan iwuk' ri käna'tan na chiwe ronojel wa' we tzij ri'.

Waral käqil wi chi e k'o ri xeilow ri Cristo k'aslik, chi qas nim u q'ij

¹⁶ Man xaq tä k'u molom taq tzij re sub'unik ri pa ki jolom winaq kepe wi ri qa tzijom chiwe chuk'utik chi qas tzij käpe chi na jumul ri Qajaw Jesucristo ruk' nimalaj u chuq'ab'. ¹⁷ Are ri uj, uj ri' ri xujilowik! Are ruk' ri qa waq'äch uj ri xqil ri Qajaw Jesús chi sib'alaj je'l ri Are', sib'alaj nim u q'ij. ¹⁸ Ri uj, uj k'o jela' ruk' ri Are' aretaq xnimarisax u q'ij rumal ri Dios qa Tat, aretaq ri Dios xuya u q'ij, xch'aw loq chikaj, xub'ij: "iAre loq'alaj nu K'ojol wa'! Sib'alaj käkikot ri wanima' rumal," —xcha ri Jun ri sib'alaj nim u q'ij. ¹⁹ Ri uj, uj ri' qas xqata ri Jun ri xch'aw loq chikaj aretaq junam uj k'o ruk' ri Qajaw Jesús puwi' ri loq'alaj juyub'.

¹⁹ Xuquje' ri ki tzij ri q'alajisal taq re ru Loq' Pixab' ri Dios ri xkitz'ib'aj kan ojer k'o kan quk' uj. We tzij ri' man käk'extaj taj. Sib'alaj utz we kixok il chutatab'exik we tzij ri', rumal chi are je' jas jun chäj, jun candelä ri kätununik, ri käjuluw jawije' ri sib'alaj q'equm wi k'ä käsaqir na, kel k'u na loq' ri nimalaj ch'imil re ri u saqirib'al ri kätunon na chiwäch. Ri u q'alajisaxik ri Qajaw Jesús pa ri iwanima' are je' jas ri kub'an ri nimalaj ch'imil ri'. ²⁰ Rajwaxik k'ut kiwetamaj chi man k'o tä jun tzij re ru Loq' Pixab' ri Dios ri Tz'ib'talik ri käkowin jun winaq xaq pa re wi kuq'alajisaj ri kel kub'ij. ²¹ Je ri', rumal chi ri xeq'alajisan ru Loq' Pixab' ri Dios ojer man xkib'ij taj xaq jas ri xkaj ri e are'. Xane ri Dios xyo'w ri tzij, ri chomanik chke rumal rech chi xkijach kib' pu q'ab' ri Are'. Are k'u ri Loq'alaj Espiritu xtaqan pa kanima', xuk'am ki b'e.

2

Waral kâqil wi chi e k'o winaq ri kâkik'ut ri man qas tzij taj

¹ Xek'oji k'u b'anal taq tzij chxixol ri winaq aj Israel ojer ri xkib'ij chi qas e q'alajisal taq re ru Loq' Pixab' ri Dios. Xuquje' kek'oji na winaq ri e b'anal taq tzij chixol ix ri kâkik'ut na ri man qas tzij taj. Ri e are' chx'uyal kekitiyoj na ri winaq che ri xaq ki chomanik ri e are' ri man qas tzij taj. Xa k'u kâsachisax ki wâch ri winaq rumal wa' we tijonik ri'. Je ri', rumal chi ri e are' man kekojon tâ che ri Qajaw Jesús ri xkâm cho ri cruz che ki to'ik. Rumal wa' xaq te'talik kâpe na k'âx pa ki wi', kâsach k'u na ki wâch. ² Pune ta ne je ri', e k'ia ri kâkitaqej u b'anik ri kâka'n ri e are' pa ri itzelalaj ki k'aslemaal ri sib'alaj man utz tâ u b'anik. Rumal k'u kech ri e are' ri winaq kâkib'ij na ri âwas u b'ixik chrij ri Utzalaj Tzij re ri Evangelio, ri qas b'e ri kopan ruk' ri Dios. ³ Xa rumal ri rayixik k'ia u wâch jastaq, ri b'anal taq tzij ri' kixkisub' na ruk' tijonik ri man qas tzij taj che resaxik ri k'o iwuk'. Qas ya'talik chi kâsach na ki wâch we winaq ri' ri ojer k'ut q'atom loq tzij pa ki wi' chi kâk'âjisax na ki wâch.

⁴ Ri Dios man xusach tâ ki mak ri ângeles ri xemakunik, xane xeuk'iaq b'i pa ri jul jawije' kâk'âjisax wi ki wâch. Chila' k'ut e tz'aptal wi kâmik pa ri q'equm. Sib'alaj utz u b'anom che kichapik, k'â kopan na ri nimalaj q'ij aretaq kâq'at na tzij pa ki wi'. ⁵ Ri Dios man xusach tâ ki mak ri winaq ri xek'oji kan ojer cho we uwâchulew, xane xutaq loq ri nimalaj q'eqal jâb' pa ki wi' ri b'anal taq etzelal ri'. Xuwi xuto' kan ri qa mam Noé ri xutzijoj chi rajwaxik chi ri winaq kâka'n jikom che ri ki k'aslemaal cho ri Dios. Xuwi ri are' rachi'l wuqub' winaq chik xeto' rumal ri Dios rech man kekâm taj. ⁶ Ri Dios xuquje' xuq'at tzij chi kâk'âjisax ki wâch ri winaq ri e k'o pa taq ri tinimit Sodoma, ri tinimit Gomorra.* Xusach ki wâch we tinimit ri' ruk' ri q'aq' k'â xechajir na. Wa' we xb'antajik ri' are jun k'utb'al chkiwâch konojel ri itzel taq winaq ri k'â te' xepetik, xuquje' chkiwâch ri kek'oji na chi qas tzij kâpe na ri q'ij aretaq kâq'at na tzij pa ki wi'. ⁷ Xuto' k'u kan ri qa mam Lot, jun utzalaj tata' wa' ri sib'alaj xb'isonik rumal ri tajin kâka'n ri itzel taq winaq pa ri itzelalaj ki k'aslemaal. ⁸ We utzalaj tata' ri' ri xk'oji chxixol ri itzelalaj taq winaq sib'alaj xb'isonik. Ronojel q'ij k'ut xuna' k'âx pa ri ranima' rumal ri etzelal ri xuto, ri xuquje' xrilo chi tajin kâka'n ri winaq. ⁹ Ri Qajaw Dios retam jas kub'an che ki to'ik ri winaq ri ki jachom kib' pu q'ab' ri Are'. Keuto' cho ri k'âx ri kâkiriq na pa ri ki k'aslemaal, xuquje'

aretaq ketaqchi'x che mak. Are k'u ri itzel taq winaq xa e u k'olom apanoq, kuk'âjisaj k'u na ki wâch pa ri q'ij ri kâpe na aretaq kâq'at tzij pa ki wi'.

¹⁰ Ri Dios sib'alaj kuk'âjisaj k'u na ki wâch ri winaq ri xa kâkitaqej u b'anik ri ki rayib'al ri sib'alaj man utz taj, ri xa kâketz'b'ej u wâch ri Are', kâketzelaj k'u u wâch ru Pixab'. We winaq ri' man kâkixej tâ kib' cho ri Dios. Man keniman taj, xane xa kâkinimarisaj kib'. Man kâkixej tâ k'u kib' chub'ixik ri âwas u b'ixik chxij ri qas nimaq ki q'ij ri k'o taqanik pa ki q'ab'. ¹¹ Ri ângeles ri k'o na ki chuq'ab' chkiwâch we itzel taq winaq ri', ri xuquje' k'o taqanik pa ki q'ab', man k'o tâ ne jun chke ri e are' ri kâkikoch'o kâkib'ij k'âx taq tzij cho ri Qajaw Dios chxij ri nimaq ki q'ij chuq'atik tzij pa ki wi' chi kâk'âjisax na ki wâch.

¹² Are k'u we achijab' ri' kâkib'ij tzij ri âwas u b'ixik chrij ri man kâkich'ob' taj. E je' ta ne awaj aj pa taq juyub', rumal chi man k'o tâ ki chomab'al. Chapik kij we awaj ri', kâmisaxik kij, are k'u wa' ki patân e k'olik. Je' k'u u sachik na ki wâch we itzel taq winaq ri' junam jas ri awaj. ¹³ Kâkiriq na k'âx, tojb'al re ri k'âx ri ki b'anom chke nik'iaj winaq chik. Kekikot ri e are' aretaq kekowinik kâka'n ri itzelalaj taq ki rayib'al chkiwâch konojel winaq. We winaq ri' xaq e esal taq k'ixb'al chixol pa taq ri i nimaq'ij aretaq kewi' iwuk' rumal ri kâka'no ri kâqaj chkiwâch. Kekikot k'u na chub'anik ri itzel taq ki rayib'al ri xa kesub'taj ri winaq rumal.

¹⁴ Amaq'el aretaq kâkil jun ixoq, kâkirayij u wâch. Man kekos tâ chub'anik ri mak. Kekisub' ri winaq ri man qas tâ ki jikib'am ri kanima' chrij ri Dios, xuquje' k'amaninaq chke ru rayixik k'ia u wâch jastaq. E winaq wa' ri q'atom tzij pa ki wi' rumal ri Dios chi kâk'âjisax na ki wâch. ¹⁵ E sachinaq rumal chi ki yo'm kan ri qas b'e ri jikom. Xuquje', xaq rech kâkiriq puag, kâka'n ri etzelal je' jas ri xub'an ri tat Balaam ru k'ojol ri tat Beor ojer. ¹⁶ Jun burro k'ut ri man kâch'aw taj xyajow ri tat Balaam rumal ri mak ri tajin kub'ano. Xch'aw k'u ri burro jas ri kâch'aw jun winaq, xuq'atej u wâch ri konil ri kraj kub'an ri tat Balaam ri je' ta ne ch'ujarinaq chik.

¹⁷ We achijab' ri' e junam ruk' jun k'ua' ri ya chaq'ij chik, man k'o tâ joron chupam, xuquje' e junam kuk' ri sutz' ri kek'am b'i jawije' chi' rumal ri kiâqiq'. Q'atom k'u tzij pa ki wi' rumal ri Dios chi keb'e' na pa ri qas q'equm ri man kok tâ wi jub'iq' ri saqil, jawije' ri man k'o tâ chi kelik wi loq. ¹⁸ Je ri', rumal chi ruk' nimal kâkib'ij taq tzij ri man k'o tâ ki patân. Ruk' ru b'anik ri itzel taq ki rayinik, ri etzelal ri kâka'n pa ri ki

* 2:6 Chawila' ri Sodoma y ri Gomorra pa ri Diccionario, k'isb'al re we Nuevo Testamento.

k'aslemal, kākikoj ki k'ux ri winaq. Kekisub' na ri winaq ri qas ki tasom chi kib' chkiij ri nik'iaj winaq ri e sachinaq. ¹⁹ Kākib'ij chke ri winaq chi kuya' kāk'a'n xa jas ri kākaj kāk'a'no, man rajwaxik tā k'ut keniman chik che ri Pixab'. Je' kākib'ij pune ta ne ri e are' tajin keniman chke ri itzel taq ki rayinik ri kātāqan pa kanima'. Ri e are' k'ut, je' ta ne e kojom che patāninēlab'. Apachike ri ch'akaninaq puwi' jun winaq, wa' we winaq ri' are patānil re ri ch'akaninaq puwi'. ²⁰ Ri winaq ri xkito' kib', ri ya e elinaq chik chupam ri etzelal re ri uwächulew rumal ri retamaxik u wäch ri Qajaw Jesucristo ri To'l Qe, ri xketamaj u wäch pa kanima', te k'u ri' ketzelej chi chupam ri etzelal, kech'aktaj k'u rumal, ri k'isb'al re ri ki k'aslemal we winaq ri' sib'alaj k'āx na chuwäch ri nab'e. ²¹ Are k'u utz na chke we ta mat xketamaj jas ri qas u b'eyal ri kākikomataj ri kanima' ri winaq cho ri Dios chuwäch ri ka'nom ri e are' kāmik. Are la' chi xketamaj ri qas b'e, te k'u ri' xetzelej chi jumul chkiij. Xkitas k'u kib' chriij ri Loq'alaj Tzij, ru Loq' Pixab' ri Dios ri yo'm chke. ²² Je' xb'antaj pa ri ki k'aslemal ri qas tzij ri kās'ixik: "Ri tz'i' kätzelej chutijik ri kuxab'aj. Are k'u ri aq ri ch'ajtajinaq chik, kuwolqotij rib' jumul chik pa ri xoq'ol," —kācha ri'.

3

Waral kākil wi chi qas tzij kāpe chi na jumul ri Qajaw Jesús

¹ Loq'alaj taq qachalal, are wa' we wuj ri' ri ukab' wuj ri nu tz'ib'am b'i chiwe. Pa taq ri kieb' wuj ri' nu tijom nu chuq'ab' chub'anik chi qas utz kixchomanik. Rumal ri' kixinpixb'aj, kintagej k'u u na'taxik chiwe ronojel ri ya nu b'im chik. ² Chna'taj ri tzij chiwe ri b'im kan ojer kumal ri loq'alaj taq q'alajisal taq re ru Loq' Pixab' ri Dios, xuquje' ru taqanik ri Qajaw Jesús ri To'l Qe ri k'utum kan chiwäch qumal uj, ri uj apóstoles ru taqo'n ri Are'.

³ Nab'e k'ut qas rajwaxik chiwetamaj chi pa ri k'isb'al taq q'ij kepe na winaq ri xa kākitze'j ki wäch konojel ri keq'ijilan che ri Dios, xuquje' ronojel ri qas utz, ri qas loq' cho ri Dios. We winaq ri' are xa kākitagej na u b'anik ri itzel taq ki rayib'al. ⁴ Kākitze'j na i wäch, kākita' na chiwe, kākib'ij: "¿A mat xub'ij kan ri Cristo chi kāpetik? We je ri', ¿jawije' chi' k'o wi ri Are' kāmik?" —kecha na. "Ri qa nan tat ojer e kāmīnaq chi ri'. Ronojel k'u ri k'olik are xaq je wi petinaq loq tzaretaq ri xb'an u b'anik ruwächulew," —kecha na ri e are'. ⁵ Qas tzij chi ri e are' xa man kākaj taj kāketaqan chi ojer ri' xb'antaj ri kaj xuquje' ri ulew rumal ru taqanik ri Dios.

K'o ri chagi'j ulew ri xel loq pa ri ja', xuquje' k'o ri ulew ri xkanaj kan pa ri ja'. ⁶ Xuquje' are rumal ri ja' re ri q'eqal jāb' chi xsach ki wäch ri winaq ojer cho ruwächulew. ⁷ Are k'u ri kaj xuquje' ri ulew ri e k'o kāmik, are rumal ru taqanik ri Dios e k'olom wa' rech xa keporoxik. Keporox k'u na rumal ri q'aq' pa ri q'ij ri kāk'at na tzij rumal ri Dios, aretaq kāsachisax na ki wäch ri itzel taq winaq ri man kekojon tā che ri Dios.

⁸ Man xuwi tā k'u wa', loq'alaj taq qachalal, xane rajwaxik chi man kāsach tā pijolom chi chuwäch ri Dios ri jun q'ij are junam jas ri jun mil junab', ri jun mil junab' k'ut are junam jas ri jun q'ij chuwäch ri Are'. ⁹ Ri Dios man xa tā kāk'eytaj chub'anik ri kuchi'j, je' jas ri kākichomaj jujun winaq, xane xa u chajim paciencia quk' uj nimalaj qonojel. Man kraj tā ri Are' chi k'o jun kāsach u wäch, xane are kraj chi konojel kākik'ex kanima', kākik'ex k'u ri ki chomanik.

¹⁰ Man k'o tā k'u jun retam ri qas q'ij ri kāpe na ri Qajaw Jesús, xane je' kāk'ulmataj na wa' jas ri kub'an jun elaq'om kok pa jun ja chaq'ab', ri man kuna' tā jun. Pa ri q'ij ri' kāsach u wäch ri kaj, kājnin k'u na jas ru jininem jun nimalaj kāk'raqan kāpetik. Ronojel k'u ri k'o chikaj, ri q'ij, ri ik', ri ch'imil, ronojel ri k'olik keporox na, kāsach k'u ki wäch rumal ri q'aq'. Ruwächulew, xuquje' ronojel ri k'o cho ruwächulew keporox na, kāsach k'u na ki wäch.

¹¹ We k'u ronojel ri k'olik je' u sachik u wäch wa' kāk'an na, [sib'alaj b'a' rajwaxik chi kijach iwib' pu q'ab' ri Dios, kitas iwib' chriij ronojel etzelal, kipatānij k'u ri Dios pa ri i k'aslemal kāmik! ¹² Chixok b'a' il che reyexik ru q'ij ri Dios,* chib'ana k'u ri kixkowin che chub'anik chi kāpe chanim. Pa ri q'ij ri' kāporox na ri kaj, kāsach k'u na u wäch wa' rumal ri q'aq'. Ronojel ri k'o chila' cho ri kaj kenikow na ri', keja'r k'u na wa'. ¹³ Are k'u ri uj, ri uj qeye'm rilik ri k'ak' kaj, ri k'ak' uwächulew jas ru b'im kan ri Dios chqe. Chila' k'ut kāk'oji wi na xaq xuwi ri utzil, ri jikomal.

¹⁴ Je k'u ri', loq'alaj taq qachalal, ri ix ri tajin kiweyēj chi ronojel wa' kāk'antaj na, chikojo b'a' i chuq'ab' rech k'o utzil chixol ix ruk' ri Dios, ch'ajch'oj ri iwanima', man k'o tā k'u i mak cho ri Dios aretaq kopan ri q'ij. ¹⁵ Chich'ob'o b'a' chi ri Dios u chajim paciencia quk' xa rumal chi kraj chi qonojel kākariq na ru tob'anik ri Are'. Je' xuquje' ri loq'alaj qachalal Pablo u tz'ib'am b'i wa' chiwe ruk' ri no'j ri yo'm che rumal ri Dios. ¹⁶ Pa konojel taq ri wuj ri u tz'ib'am are tzi-joninaq chriij ronojel wa' ri nu b'im chiwe. Qas tzij chi e k'o jujun chke ru tzij ri k'āx ki ch'ob'ik. Are k'u ri winaq ri man k'o tā

* 3:12 "Ru q'ij ri Dios": Are ri q'ij ri kāk'an na ri k'isb'al q'atanik pa ki wi' ri winaq rumal ri Dios.

ketam, xuquje' ri kojonelab' ri xa kieb' kan-
ima' kekojonik, e are' kākijechb'a' ri kākib'ij
we wuj ri', junam jas ri kākā'n che ri nik'iaj
chik re ru Loq' Pixab' ri Dios ri Tz'ib'talik.
Aretaq je' kākā'n wa', xa k'āx tajin kākik'am
loq pa ki wi', kāsach k'u na ki wäch.

¹⁷Are k'u ri ix, loq'alaj taq qachalal, rumal
chi iwetam chi ronojel wa', chichajij b'a'
iwib'. Mixch'akta ne rumal ri ki sub'unik
ri b'anal taq etzelal, miya k'u kan ri qas tzij
ri i taqem, ri ix kojoninaq wi, je' ta ne chi
kixtzaq b'i pa jun siwan. ¹⁸Xane are qas
chiwetamaj na u wäch ri Qajaw Jesucristo,
ri To'l Qe, kāk'oji k'u na i chuq'ab' rumal
ri nimalaj u toq'ob' ru yo'm chiwe. ¡Chni-
marisax ta b'a' u q'ij ri Are' kāmik xuquje' pa
taq ri q'ij ri junab' ri kepe na, ri man k'o tä
ki k'isik! Amén.

RI NAB'E CARTA RI XUTZ'IB'AJ RI SAN JUAN

Ri apóstol Juan käch'aw chrij ri Jun ri kākowin chuya'ik ri qas k'aslemal

¹ Kāqatz'ib'aj b'i wa' we wuj ri' chiwe chrij ri Jun* ri kāyo'w ri Tziji ri kākowin chuya'ik ri qas k'aslemal. Ri Are' ya k'o chik aretaq mājoq kāk'an ri kajulew. Qa tatab'em ri xub'ij, qilom k'u ri Are' chwināqil. Qas qa ka'yem ri Are', qas k'u qa chapom ruk' ri qa q'ab'. ² Ri uj qilom ri Jun ri kāyo'w wa' we k'aslemal ri'. Ri Are' xuk'ut rib' chqaxol. Qa q'alajisam k'u wa', xuquje' qa tzijom wa' chiwe chi ruk' Are' k'o wi we k'aslemal ri' ri man k'o tā u k'isik. Ri kāyo'w we k'aslemal ri', ruk' ri qa Tat k'o wi ri Are' nab'e, xuluk'utu k'u rib' chqawāch uj. ³ Kāqatzijoj k'u chiwe jachike ri qilom, jachike ri qa tom, rech ri ix xa ix jun chik quk' uj, je' jas ri uj qas tzij xa uj jun ruk' ri Dios qa Tat, xuquje' ruk' ri Jesucristo ru K'ojol. ⁴ Kāqatz'ib'aj b'i wa' we tzij ri' chiwe rech qas kākikot ri iwanima'.

Ri Dios are kāyo'w ri qas saqil

⁵ Are wa' ru Loq' Pixab' ri Dios ri xuk'ut ri Jesucristo chqawāch, ri kāqatzijoj uj chiwe ix: Je' jas ri q'ij kuya saqil pa qa wi', je' ri' ri Dios kuya ri saqil re ri Qas Tziji pa qanima'. Ruk' Are' man k'o tā jub'iq' ri q'equm ri kub'ano chi kāsach ri winaq. ⁶ Rimal ri' we kākab'ij chi xa uj jun ruk' ri Dios, te k'u ri' jun wi ri qa chomab'al je' ta ne chi uj sachinaq pa ri q'equm, xaq uj b'anal taq tzij ri', man kākā'n tā ri' jas ri kākab'ij. ⁷ We q'alaj pa ri qa k'aslemal chi kujb'in pa ri saqil, je' jas ri Dios k'o pa ri saqil, xa uj jun ri' nimalaj qonojel ri kākanimaj ri Qas Tziji. Are k'u ru kik'el ri Jesucristo ru K'ojol ri Dios kuch'aj ri qanima', kāresaj ronojel ri qa mak.

⁸ We kākab'ij chi man k'o tā qa mak, xa kākasub' qib' ri', man qas tzij tā ri' chi uj kojonoelab'. ⁹ We k'u kākab'ij cho ri Dios chi ri uj, uj ajmakib', xuquje' kākab'ij jas u wāch mak qa'nom, kuya' kākakojo chi qas jikom ri kub'an na ri Dios quk'. Kusach k'u ri qa mak, kuch'aj ri qanima', kāresaj ronojel u wāch etzelal pa ri qa k'aslemal. ¹⁰ We k'u kākab'ij chi man k'o tā mak qa'nom, kākā'n ri' chi ri Dios xaq Are jun b'anal tzij, man qas qa kojom tā ri' ru Loq' Pixab' ri Are'.

2

Ri Cristo are käch'aw pa qa wi' ruk' ri Dios

¹ Ix ri', ri ix je' ta ne alaj taq walk'ual, kintz'ib'aj b'i wa' we tzij ri' chiwe che i pixb'exik rech man kixmakun taj. We k'u

k'o jun chiwe ri kāmakunik, k'o Jun ri käch'aw pa qa wi' ruk' ri Dios qa Tat. Are ri Jesucristo, ri jikom ranima' pa ronojel. ² Ri Jesucristo are ri xkāmisa rumal qech rech kāsachtaj ri qa mak, man xuwi tā k'u ri qa mak uj, xane xuquje' ri ki mak konojel ri winaq cho ruwāchulew.

³ Q'alaj ri' chi qas tzij qetam u wāch ri Dios, we kākanimaj ru Pixab' ri Are'. ⁴ We k'u ne k'o jun kub'ij: "Qas wetam u wāch ri Dios," —kācha ri', man kunimaj tā k'u ru Pixab', are b'anal tzij wa', man k'o tā k'u ri qas tzij pa ranima'. ⁵ Jachin k'u ri kunimaj ru Pixab', tzij ri' chi qas kraj ri Dios. Xaq je' ri' kujkowinik kāketa maj na chi xa uj jun ruk' ri Are'. ⁶ Jachin ri kub'ij chi xa jun ri are' ruk' ri Dios, rajwaxik ri' chi je' ru k'aslemal jas ru k'aslemal ri Jesucristo.

Ri k'ak' taqanik ri uyo'm kan ri Cristo

⁷ Qachalal, man k'ak' tā wa' we taqanik ri' ri tajin kintz'ib'aj b'i chiwe, xane are wa' ri xyi' chiwe petinaq loq. We ojer taqanik ri' tzare wa' ru Loq' Pixab' ri Dios ri ya i tom chik. ⁸ Pune i tom chi wa' ri kintz'ib'aj b'i chiwe, are je' ta ne k'ak' wa' we Pixab' ri' rumal chi qas b'antajinaq wa' pa ru k'aslemal ri Cristo, xuquje' pa ri i k'aslemal ix. Tajin kok'ow ri q'equm ri kub'ano chi kāsach ri winaq. Je' ta ne chi xsaqirik, kāk'alajin chi loq ri saqil re ri qas tzij.

⁹ Jachin ri kub'ij chi kāk'in pa ri saqil re ri qas tzij, kāretzelaj k'u u wāch ri rachalal, k'ā sachinaq wa' we winaq ri' je' ta ne chi kāk'in pa ri q'equm. ¹⁰ Ri winaq ri kraj ri rachalal k'o ri' pa ri saqil re ri qas tzij. Man k'o tā k'u jas k'o pa ranima' ri kākowin chub'anik chi jun chik kātzaq pa ri mak. ¹¹ Are k'u ri jun ri kāretzelaj u wāch ri rachalal je' ta ne chi k'o ri' pa ri q'equm, xuquje' pa ri q'equm kāk'in wi. Man kuch'ob' tā ri' jawije' ke' wi rumal chi man kārīl tā ru b'e rumal ri q'equm.

¹² Ix ri', ri ix je' ta ne alaj taq walk'ual, kintz'ib'aj b'i wa' we wuj ri' chiwe rumal chi ri Dios u sachom ri i mak rumal ri Jesucristo. ¹³ Nan tat, kintz'ib'aj b'i wa' we wuj ri' chiwe rumal chi qas iwetam u wāch ri Cristo. Are ri Jun ri k'olinaq loq tzaretaq xchaptaj loq ronojel. Kintz'ib'aj b'i wa' we wuj ri' chiwe ix, ri k'ā ix ak'al na rumal chi ix ch'akaninaq pa ri ch'oj chrij ri Itzel.

Nu tz'ib'am b'i wa' we wuj ri' chiwe ix, ri ix je' ta ne alaj taq walk'ual, rumal chi qas iwetam u wāch ri qa Tat ri k'o chila' chikaj. ¹⁴ Nan tat, ri ya k'o chi i junab', nu tz'ib'am b'i wa' we wuj ri' chiwe rumal chi qas iwetamam u wāch ri Cristo. Are wa' ri Jun ri k'olinaq loq tzaretaq xchaptaj loq ronojel. Nu tz'ib'am wa' we wuj ri' chiwe ix, ri k'ā ix ak'al na, rumal chi k'o i chuq'ab' ri kuya ri Dios, i kojom k'u ru Tziji ri Are' pa ri

* 1:1 Ri Jun ri kub'ij waral Are ri Jesucristo.

iwanima', xuquje' rumal chi ix ch'akaninaq pa ri ch'oj chrij ri Itzel.

¹⁵ Me' iwanima' ruk' ruwächulew, kuk' ri jastaq ri e k'o cho ruwächulew. Jachin ri ke' ranima' ruk' ruwächulew, man qas kraj tä ri' ri Dios qa Tat. ¹⁶ Ronojel k'u ri xaq ajuwächulew man ruk' tä ri Dios qa Tat käpe wi, xane xaq ajwaral wa'. Ri itzel taq u rayinik jun winaq, ri ki rayixik k'ia ki wäch jastaq ri utz käril wi jun, xuquje' ru b'anik nimal kuk' ri jastaq ajuwächulew, ronojel wa' xaq ajuwächulew wa'. Man ruk' tä ri Dios käpe wi. ¹⁷ Ri uwächulew xa tajin käsach u wäch wa', xuquje' konojel ri jastaq ri utz käkil wi ri winaq. Jachin k'u ri kub'an ru rayib'al ri Dios, ri are' k'o na u k'aslemal ri man k'o tä u k'isik.

Kepe na winaq ri käka'n ki k'ulel che ri Cristo

¹⁸ Ix ri', ri ix je' ta ne alaj taq walk'ual, uj k'o chik pa ri k'isb'al taq q'ij. Ri ix i tom chi käpe na jun ri kub'an u k'ulel che ri Cristo. Kämik k'ut ki k'utum chi kib' k'ia ri käka'n ki k'ulel che ri Cristo, rumal k'u ri' qetam chi uj k'o chik pa ri k'isb'al taq q'ij. ¹⁹ We winaq ri' quk' uj xeb'el wi b'ik, man qas ajuk' tä k'u wa'. We ta qas tzij e ajuk' mat xeb'el b'i ri' chqaxol. Xeb'el k'u b'ik rech qas käq'alajinik chi man jun tä chke are ajuk'.

²⁰ Ri ix k'ut, ri Cristo u yo'm ri Loq'alaj Espiritu pa ri iwanima'. Rumal k'u wa' iwonojel ri ix kich'ob'o jachike ri qas tzij. ²¹ Kintz'ib'aj b'i wa' we wuj ri' chiwe rumal chi iwetam ri qas tzij ri kub'ij ru Tziji ri Dios, man rumal tä chi mat iwetam, xane rumal chi iwetam chi man käriqtaj tä jun b'anal tzij ri kub'ij ri qas tzij.

²² Jachin k'u ri b'anal tzij? Are ri' ri kub'ij chi ri Jesús man are tä ri Cristo, ri To'l Qe. Are wa' ri kub'an u k'ulel che ri Cristo. Man käkojon tä che ri Dios qa Tat, man käkojon tä k'u che ri Cristo ru K'ojol. ²³ Jachin ri man käkojon tä che ru K'ojol ri Dios, man käkojon tä ri' che ri qa Tat. Jachin k'u ri kuq'alajisaj rib' chi kojoninaq che ru K'ojol ri Dios, kojoninaq ri' che ri qa Tat Dios xuquje'.

²⁴ Chik'olo b'a' ix pa ri iwanima' ri Tziji ri i tom petinaq loq. We ri Tziji ri' ri i tom petinaq loq käk'oji kan pa ri iwanima', qas kixkanaj na kan xa jun ruk' ri Dios qa Tat xuquje' ruk' ru K'ojol. ²⁵ Ri xuchi'j ri Cristo chi kuya chqe, are ri k'aslemal ri man k'o tä u k'isik.

²⁶ Tajin kintz'ib'aj b'i wa' we tzij ri' chiwe chki'j ri winaq ri käkaj kixkisub'u. ²⁷ Ri ix k'ut pa ri iwanima' k'o wi ri Loq'alaj Espiritu ri xuya ri Jesucristo chiwe. Je ri' man rajwaxik taj chi k'o jun chik ri kuk'ut wa' we tzij ri' chiwäch, rumal chi tzare ri Loq'alaj Espiritu kuk'ut na ronojel chiwäch. Ri tijonik ri kuya ri Are' chiwe tzare qas tzij

rumal chi ri Loq'alaj Espiritu man käkowi' taj kub'an tzij. Chitaqej b'a' u b'anik jas ri i b'anom ix, ri xa ix jun ruk' ri Cristo. Are wa' ri tijonik ru yo'm ri Loq'alaj Espiritu chiwe.

²⁸ Je k'u ri', ix ri', ri ix je' ta ne alaj taq walk'ual, chitaqej u b'anik jas ri i b'anom ix, xa ix jun ruk' ri Cristo, rech käku'b'i i k'ux chrij ri Are', man kixk'ix tä k'u chuwäch aretaq käpetik. ²⁹ Ri ix iwetam chi ri Jesucristo jikom ranima'. We je ri' xuquje' iwetam ri' chi jachin ri kub'an ri qas utz, jikom k'u ri ranima', are ri' ralk'ual ri Dios.

3

Waral käqil wi ri käretamaj jun we qas ralk'ual ri Dios

¹ jChiwilampe'! Ri Dios qa Tat sib'alaj kujraj je ri' chi jun yo'm chqe chi käb'ix ralk'ual ri Dios chqe. Are k'u qas tzij wa'. Rumal ri' ri winaq ajuwächulew man käkich'ob' taj jas qa b'anik rumal chi man qas ketam tä u wäch ri Dios. ² Loq'alaj taq qachalal, ya uj ralk'ual ri Dios, mäja' k'u q'alaj jas ri kujel na. Qetam k'ut chi aretaq käpe ri Jesucristo, kuq'alajisaj k'u rib' chqawäch, kujjunamataj na ruk' ri Are' rumal chi käqil na u wäch ri Jesús jas ri qas u b'anik. ³ Jachin k'u ri ku'l u k'ux chrij ri Cristo chi je wa' kel na aretaq käpe ri Are', kub'an na ch'ajch'oj che ri ranima', je' jas ri Jesucristo qas ch'ajch'oj ranima' ri Are'.

⁴ Jachin k'u ri kämakunik, man käniman tä ri' che ru Loq' Pixab' ri Dios, are ajchak' mak ri' rumal chi ri mak are ru xalq'atixik ri Pixab'. ⁵ Ri ix iwetam chi ri Jesucristo xpe waral cho we uwächulew che resaxik ri qa mak. Ri Are' k'ut, man k'o tä jub'iq' u mak. ⁶ Apachin k'u ri xa jun ruk' ri Cristo, man kutagej tä makunik ri'. Apachin jun ri kutagej makunik, man kojoninaq tä ri' che ri Cristo, man qas retam tä u wäch ri Are'. ⁷ Jix ri', ri ix je' ta ne alaj taq walk'ual, chiwila' chi k'o jun mixsub'uwik! Jachin k'u ri kub'an ri qas jikom, ri qas utz pa ru k'aslemal, qas jikom ranima' ri winaq ri', je' jas ri Cristo, are jikom ranima' ri Are'. ⁸ Jachin k'u ri kutagej kämakunik, ralk'ual ri Itzel wa'. Makuninaq k'u ri Itzel petinaq loq. Xa k'u rumal wa' xpe ri Cristo ru K'ojol ri Dios cho we uwächulew chusachik u wäch ru b'anom ri Itzel.

⁹ Ri qas ralk'ual ri Dios man kutagej tä ri' ru b'anik ri mak rumal chi yo'm u k'aslemal rumal ri Dios. Man käkowi' tä ri' kutagej u b'anik ri mak, rumal chi qas tzij are ralk'ual ri Dios. ¹⁰ Q'alaj ri' jachin taq e ralk'ual ri Dios, jachin k'u taq e ralk'ual ri Itzel. Ri winaq ri man kub'an ri qas utzil, ri man kraj tä ri rachalal, man ralk'ual tä ri Dios ri'.

Rajwaxik käqaj qib' ri jun ruk' ri jun chik

¹¹ Are k'u wa' ru Loq' Pixab' ri Dios ri i tom petinaq loq, chi kâqaj qib' ri jun ruk' ri jun chik. ¹² Je' mâqqa'no jas ri xub'an ri a Caïn. Rumal chi are ralk'ual ri Itzel, xukâmisaj ru chaq'. ¿Jas k'u che xukâmisaj? Je ri' xub'ano rumal chi are ri a Caïn tajin kub'an ri etzelal, are k'u ru chaq' tajin kub'an ri utzil.

¹³ Qachalal, mikajmaj wa' we ketzelax i wäch kumal ri winaq ajuwächulew. ¹⁴ Ri uj qetam chi uj elinaq chik pa ri kâmikal re ri ojer qa k'aslemal, uj k'o chi k'u pa ri qas k'aslemal ri kuya ri Dios. Q'alaj wa' rumal chi qas tzij keqaj ri qachalal. Jachin k'u ri man kraj tä ri rachalal k'ä k'o ri' pa ri ojer u k'aslemal, je' ta ne käminaq ri'. ¹⁵ Apachin ri kâretzelaj u wäch ri rachalal, are jun kämisanel ri' cho ri Dios. Ri ix k'ut iwetam chi man k'o tä jun kämisanel k'o ri k'aslemal ri man k'o tä u k'isik pa ranima'. ¹⁶ Ri uj qetam ri' jas u b'anik aretaq jun winaq qas kraj jun winaq chik, rumal chi ri Cristo sib'alaj xujraj, xuya k'u rib' pa kâmikal rumal qech uj. Je ri' ri uj xuquje' rajwaxik kâqaya qib' pa kâmikal rumal kech ri qachalal. ¹⁷ Je k'u ri', jachin ri k'o ri kajwataj che ru k'aslemal waral cho we uwächulew, käril k'u ri rachalal chi k'o u rajwaxik, te k'u ri' man kuya tä jub'iq' re ri rajwaxik che, ¿a tzij lo ri' chi qas kraj ri Dios ruk' ronojel ranima'? ¡Man qas tzij tä ri'! ¹⁸ ¡Ix ri', ri ix je' ta ne alaj taq walk'ual, meqaj ri qachalal xaq chqachi'! Xane rajwaxik kâqak'ut ruk' ru b'anik utzil chi qas tzij keqaj ri qachalal.

Mâqaxej qib' kujok chuwäch ri Dios

¹⁹ Je ri' kuya' käqetamaj chi ri uj qas tzij ri kâqatzijoj, xuquje' chi ri uj, uj rech ri Qas Tzij, man rajwaxik tä k'ut kâqaxej qib' kujok chuwäch ri Dios: ²⁰ We kâqana' pa qanima' chi k'o mak ri qa'nom, man rajwaxik taj kâqaxej qib' rumal chi ri Dios k'o na u chuq'ab' chuwäch ri qanima', retam k'u ronojel ri qa chomanik, ronojel ri kâqa'no. ²¹ Je ri', loq'alaj taq qachalal, we kâqana' pa ri qanima' chi man k'o tä mak ri qa'nom, man rajwaxik tä ri' kâqaxej qib' kujok chuwäch ri Dios. ²² Ri Are' k'ut kuya na chqe apachike ri kâqaj kâqata' che, rumal chi tajin keqanimaj ru taqanik, xuquje' tajin kâqa'no jachike ri utz käril wi ri Are'. ²³ Are k'u wa' ru taqanik ri Dios, chi kujkojon che ri Jesucristo ru K'ojol, xuquje' chi kâqaj qib' ri jun ruk' ri jun chik jas ri uj u taqom wi. ²⁴ Jachin taq ri kâkinimaj ri kâtaqan wi ri Are', xa e jun ri' ruk' ri Dios, xuquje' ri Dios qas k'o pa kanima' ri e are'. Rumal k'u ri Loq'alaj Espiritu ru yo'm chqe, qetam chi ri Are' k'o pa ri qanima'.

4

Rajwaxik käqetamaj jachike ri Espiritu rech ri Dios xuquje' jachike ri espiritu ri

kub'an u k'ulel che ri Cristo

¹ Loq'alaj taq qachalal, mikoj ri ki tzij konojel ri winaq ri kâkib'ij chi ri espiritu ri k'o kuk' yo'm chke rumal ri Dios, xane chiwila na we ri espiritu ri k'o kuk' qas rech ri Dios o man rech taj. Je ri', rumal chi tajin kek'iar cho ruwächulew ri b'anal taq tzij ri kâkib'ij chi qas e q'alajisal taq re ru Loq' Pixab' ri Dios. ² Are k'u wa' kiwetamab'ej re jachin ri qas tzij k'o ri Espiritu rech ri Dios ruk'. Jachin ri kukojo, xuquje' ri kuq'alajisaj chi ri Jesucristo qas tzij xpe waral cho ruwächulew chwinagil, are ri' ri k'o ri Espiritu rech ri Dios ruk'. ³ Jachin k'u ri man kâkojon taj, man kuq'alajisaj tä k'ut chi qas tzij xpe ri Jesús waral cho we uwächulew chwinagil, man are tä ri Espiritu rech ri Dios ri k'o ruk' ri winaq ri', xane are ri espiritu ri kub'an u k'ulel che ri Cristo. I tom k'ut chi kâpe na wa' we espiritu ri', k'o chi k'u kâmik cho ruwächulew.

⁴ Ix ri', ri ix je' ta ne alaj taq walk'ual, ri ix, ix rech ri Dios. Ix ch'akaninaq k'u pa ki wi' we winaq ri' ri xaq e b'anal taq tzij rumal chi ri Loq'alaj Espiritu ri k'o pa ri iwanima' k'o na u chuq'ab' chuwäch ri espiritu ri k'o pa kanima' ri winaq ajuwächulew. ⁵ We winaq ri' e ajuwächulew, rumal k'u ri' xuwi kâkitzijoj ri ki chomanik ri winaq ajuwächulew. Ri winaq k'ut ajuwächulew utz kâkita ri kâkib'ij. ⁶ Ri uj, uj rech ri Dios. Apachike winaq ri qas retam u wäch ri Dios kuta ri' ri qa tzij. Jachin k'u ri man rech tä ri Dios man kuta tä ri'. Je ri' kujkowinik käqetamaj jachin ri k'o ri Espiritu pa ranima' ri kub'ij ri Qas Tzij, käqetamaj k'ut jachin ri k'o ri espiritu pa ranima' ri kub'an sub'unik.

Waral kâqil wi chi ri Dios kujraj nimalaj qonojel

⁷ Loq'alaj taq qachalal, rajwaxik chi kâqaj qib' ri jun ruk' ri jun chik, rumal chi ri Dios kujraj. Jachin ri kraj ri rachalal, ralk'ual ri Dios ri', xuquje' qas retam u wäch ri' ri Dios. ⁸ Jachin k'u ri man kraj tä ri rachalal, man qas retam tä u wäch ri Dios ri'. Je ri', rumal chi ri Dios kujraj nimalaj qonojel. ⁹ Ri Dios xuk'ut chqawäch chi kujraj aretaq xutaq loq ru K'ojol, ri xa jun K'olik, cho ruwächulew rech rumal ri Are' k'o ri qa k'aslemal. ¹⁰ Je ri' kuya' kâqilo chi qas tzij kujraj ri Dios. Man are tä chi ri uj kâqaj ri Dios, xane chi ri Are' kujraj uj, xutaq k'u loq ri u K'ojol rech kâkâmisax ri Are' rumal qech, rech kâsachtaj ri qa mak.

¹¹ Loq'alaj taq qachalal, we je wa' u b'anom ri Dios chqe rumal chi sib'alaj kujraj, ri uj xuquje' rajwaxik kâqaj qib' ri jun ruk' ri jun chik. ¹² Man k'o tä jun winaq ilowinaq u wäch ri Dios. We k'u ri uj kâqaj qib' ri jun ruk' ri jun chik, ri Dios qas k'o ri' pa qanima'. Qas kub'an k'u na tz'aqat

ri rutzil ranima' ri Dios pa ri qa k'aslemal.
¹³ Q'alaj chi xa uj jun ruk' ri Dios, xuquje' chi ri Are' gas k'o pa qanima' uj rumal chi u yo'm chqe ri Loq'alaj Espiritu rech ri Are'.
¹⁴ Ri uj k'ut qilom, xuquje' kâqaj'alajisaj chi ri Dios qa Tat xutaq loq ru K'ojol rech kok che To'l Ke ri winaq ri e k'o cho ruwächulew.
¹⁵ Apachin ri kukojo, xuquje' kuq'alajisaj chi ri Jesús are ru K'ojol ri Dios, we winaq ri' xa jun ri' ruk' ri Dios. Xuquje' ri Dios gas k'o pa ranima' ri are'.

¹⁶ Je ri' ri uj qetamam, xuquje' qa kojom chi gas kujraj ri Dios. Ri Dios keraj konojel ri winaq. Jachin k'u ri amaq'el keraj ri winaq, xa jun ri' ruk' ri Dios, xuquje' ri Dios gas k'o ri' pa ranima'.
¹⁷ Je ri' gas kub'an na tz'aqat ri rutzil ranima' ri Dios pa ri qanima' uj, man k'o tä k'u jas kâqaxej wi qib' pa ri q'ij ri kâq'at na tzij pa ki wi' ri winaq. Jas k'u ri u b'anik ri Jesucristo waral cho we uwächulew, are je' ri qa b'anik uj xuquje'.
¹⁸ We qetam chi ri Dios kujraj, man kâqaxej tä qib' ri'. Xane ri rutzil ranima' ri Dios kub'ano chi man kâqaxej tä qib'. We jun kuxej rib', kuriq k'äx je' ta ne chi tajin kuk'äjisaj u wäch ri' chb'il rib'. Xaq je' ri', we jun kuxej rib' man gas kraj tä ri' ri Dios.

¹⁹ Ri uj kâqaj ri Dios rumal chi ri Are' xujraj uj nab'e.
²⁰ We k'o jun kub'ij: "Ri in kwaj ri Dios," —kâcha ri', te k'u ri' kâretzelaj u wäch ri rachalal, are jun b'anal tzij ri'. We jun man kraj tä ri rachalal ri rilom u wäch, man kâkown tä ri' kraj ri Dios ri man rilom tä u wäch.
²¹ Ri Are' u yo'm we Pixab' ri' chqe ri kub'ij: Jachin ri kraj ri Dios, rajwaxik ri' xuquje' chi kraj ri rachalal, —kâcha'.

5

We kujkojonik, kujch'akan na puwi' ronojel ri man utz taj re ruwächulew

¹ Jachin ri kukojo chi ri Jesús are ri Cristo ri To'l Qe, ralk'ual ri Dios ri'. Jachin ri loq' ri ki tat jujun ak'alab' chuwäch, xuquje' e loq' ri' chuwäch ri ralk'ual ri tata'.
² Aretaq kâqaj ri Dios, xuquje' kâqanimaj ru Pixab', kâqetamaj k'u ri' chi keqaj ri ralk'ual ri Dios.
³ We jun winaq kraj ri Dios, kel kub'ij wa' chi kunimaj ru Loq' Pixab' ri Are'. Ru taqanik ri Dios k'ut, man k'äx tä ki nimaxik.
⁴ Jachin k'u ri gas ralk'ual ri Dios kâch'akan na puwi' ronojel ri man utz taj rech ruwächulew. We gas kujkojon che ri Dios, kujkowinik kujch'akan na puwi' ronojel ri man utz taj ajuwächulew.
⁵ Xaq xuwi ri jun ri kukojo chi ri Jesús are u K'ojol ri Dios, kâkownik kâch'akan na puwi' ronojel ri man utz taj re ruwächulew.

Ri Loq'alaj Espiritu kuq'alajisaj chi ri Jesús are u K'ojol ri Dios

⁶ Ri Jesucristo xpe cho ruwächulew, xq'alajin k'u wa' chi are u K'ojol ri Dios

aretaq xb'an u qasna', xuquje' aretaq xkâmisaxik, xel k'u u kik'el. Man xuwi taj xq'alajin wa' aretaq xb'an u qasna', xane rumal ri joron re ri qasna' xuquje' rumal ru kik'el ri xelik aretaq xkâmisaxik. Ri Loq'alaj Espiritu are xq'alajisan wa' rumal chi ri Loq'alaj Espiritu xaq xuwi kub'ij ri gas tzij.
⁷ E oxib' ri e k'o pa ri kaj ri kâkiq'alajisaj ri gas tzij: ri qa Tat, ri u Tzij, xuquje' ri Loq'alaj Espiritu rech ri Dios. We oxib' ri' xa jun ri kâkiq'alajisaj.
⁸ Xuquje' oxib' ri e k'o cho ruwächulew ri kâkiq'alajisaj ri gas tzij: ri Loq'alaj Espiritu rech ri Dios, ri joron re ri qasna', xuquje' ru kik'el ri Cristo. We oxib' ri' junam ri ki q'alajisanik.
⁹ Ri uj kâqako ri ki tzij ri winaq chrij ri xkilo, xuquje' chrij ri xkito. Nim k'u na u b'anik ri xuq'alajisaj ri Dios chrij ri Cristo ru K'ojol.
¹⁰ Jachin ri kâkojon che ru K'ojol ri Dios, u kojom ri' pa ranima' jas ri xub'ij ri Dios chrij ri Cristo ri u K'ojol. Jachin k'u ri man kâkojon tä che ri Dios u b'anom ri' chi ri Dios xaq Are' b'anal tzij rumal chi man u kojom tä ri xuq'alajisaj ri Dios chrij ri Cristo ru K'ojol.
¹¹ Are wa' ri xuq'alajisaj ri Dios, chi ri Are' u yo'm qa k'aslemal ri man k'o tä u k'isik. We k'aslemal ri' kâqariq na wa' ruk' ri u K'ojol ri Are'.
¹² Jachin ri k'o ru K'ojol ri Dios pa ranima' k'o u k'aslemal ri'. Jachin k'u ri man k'o tä ru K'ojol ri Dios pa ranima' man k'o tä u k'aslemal ri'.

Are wa' ri k'isb'al re ri carta jawije' ri apóstol kuya wi jujun taq pixb'enik chik

¹³ Nu tz'ib'am b'i wa' we wuj ri' chiwe, ix ri' ri ix kojoninaq che ru K'ojol ri Dios, rech gas kiwetamaj chi k'o na i k'aslemal ri man k'o tä u k'isik.

¹⁴ Ku'l k'u qa k'ux chrij ri Dios chi apachike ri kâqaj kâqata' che, kutatab'ej na wa' ri kâqab'ij che, we are u rayib'al ri Are'.

¹⁵ We qetam chi ri Dios kujuto aretaq kâqa'n orar, qetam ri' chi kuya chqe ri kâqata' che.

¹⁶ We k'o jun kâril ri rachalal kâqaj pa jun mak ri man kâk'aman tä b'i pa ri kâmikal, rajwaxik ri' kub'an orar puwi'. Je ri' ri Dios kuya na u k'aslemal ri qachalal. Are wa' ri kâb'an chke ri keqaj pa ri mak ri man kâk'aman tä b'i pa ri kâmikal. K'o k'u mak ri kâk'aman b'i pa ri kâmikal, man kinb'ij tä k'ut chi kib'an orar rech kâsachtaj wa' we mak ri'.
¹⁷ Ronojel u wäch etzelal, are mak ri'. K'o k'u mak ri man kâk'aman tä b'i pa ri kâmikal.

¹⁸ Qetam chi jun gas ralk'ual ri Dios man kutaqej tä makunik, rumal chi ru K'ojol ri Dios are kâchajin che, man kâkown tä ri Itzel chub'anik k'äx che.

¹⁹ Ri uj qetam chi uj rech ri Dios, konojel k'u ri winaq ajuwächulew e k'o pu q'ab' ri Itzel.

²⁰ Qetam k'ut chi ri u K'ojol ri Dios petinaq cho ruwächulew, u yo'm k'u ri qa no'j rech

käqetamaj u wäch ri qas Dios. Ri uj, xa uj
jun ruk' ri Dios. Kel kub'ij wa' chi xa uj jun
ruk' ri Jesucristo ru K'ojol. Are k'u wa' ri qas
Dios, kuya k'u ri k'aslemal ri man k'o tä u
k'isik. ²¹Ix ri', ri ix je' ta ne alaj taq walk'ual,
¡chitasa iwib' chkij taq ri dioses ri man qas e
Dios taj! Amén.

RI UKAB' CARTA RI XUTZ'IB'AJ RI SAN JUAN

Ri apóstol Juan käch'aw chrij ri Qas Tzij re ru Loq' Pixab' ri Dios

¹ In wa', in k'amal ki b'e ri kojonelab', ri ya in nim winaq chik. Kintz'ib'aj b'i wa' we wuj ri' chawe at, wachalal, at ri' ri qachalal chichu' ri cha'tal rumal ri Dios, xuquje' chke taq ri awal at. Qas tzij sib'alaj ix loq' chnuwäch, man xuwi tä k'u chnuwäch in, xane xuquje' chkiwäch konojel ri ketam ri Qas Tzij. ² Sib'alaj kixwaj rumal rech ri Jun ri käyo'w ri Qas Tzij ri k'o pa qanima' uj nimalaj qonojel. Käk'oji k'u na wa' pa qanima' uj ama'el ronojel q'ij. ³ Are ta ri Dios qa Tat xuquje' ri Qajaw Jesucristo ru K'ojol ri Are' kel u k'ux chiwe, kutoq'ob'isaj i wäch, kub'an k'ut chi kuxlan ri iwanima' rumal chi i taqem ri Qas Tzij, ama'el k'ut kiwaj iwib'.

⁴ Sib'alaj käkikot wanima' rumal chi nu riqom jujun chke ri awal ri tajin käkitaqej ri Qas Tzij re ru Loq' Pixab' ri Dios, junam jas ri taqanik ri yo'm chqe rumal ri Are'. ⁵ Kämik ri', wachalal, katinb'ochi'j chi nimalaj qonojel kâqaj qib' chb'il taq qib', ri jun ruk' ri jun chik. Wa' we taqanik ri' ri kintz'ib'aj b'i chawe, man k'ak' tä ri'. Xane are wa' ri yo'm loq' chqe uj nab'e kanoq. ⁶ Wa' we taqanik ri' chi kâqaj qib', are wa' kel kub'ij chi rajwaxik chi kujniman che ri Dios pa ronojel ri kâtaqan wi ri Are'. Ru taqanik ri Are', jas ri i tom petinaq loq, are chi kâqaj qib' chb'il taq qib' ri jun ruk' ri jun chik.

Waral kâqil wi jas ri ki b'anik ri winaq ri kekisub' nik'iaj winaq chik

⁷ E k'ia chi k'ut ri winaq ri kesusb'unik ri e k'o cho ruwächulew, ri man käkikoj taj chi ri Jesucristo xpe waral cho we uwächulew chwinaqil, ri man kâkiq'alajisaj tä wa'. Jachin jun winaq ri je' u b'anik wa', are qas kâsub'unik, xuquje' are jun chke ri xinb'ij chi kepetik, ri qas kâka'n na ki k'ulel che ri Cristo. ⁸ Chiwila b'a' iwib' ix chi mat kâsach u wäch ronojel ri utzil ri i b'anom, xane qas kiriq na tz'aqat ri rajil u k'exel wa'.

⁹ Apachin jun winaq ri man kâku'b'i tä u k'ux ruk' ru tijonik ri Cristo, xane kutzukuj nik'iaj tijonik chik ri man are taj, man k'o tä ri Dios ruk'. Ri winaq ri kutagej ru tijonik ri Cristo, are wa' we winaq ri' k'o ri Dios qa Tat ruk', xuquje' ri Cristo ru K'ojol ri Dios. ¹⁰ We k'o jun winaq ri kopan iwuk', man are tä k'u ru tijonik ri Cristo ri kuk'utu, mik'ulaj wa' we winaq ri' cho iwachoch, mib'ij ne che: "iAre ta ri Dios ke' uk' la!" —mixcha che. ¹¹ Je ri', rumal chi ri kojonel ri je' kub'ij wa', kub'an re ri etzelal ri kub'an we winaq ri'.

Waral kâqariq wi ri k'isb'al re we carta ri'

¹² Are ri in k'ut, k'o k'ia ri kwaj kinb'ij b'i chiwe. Man kwaj tä k'ut xaq kintz'ib'aj b'i wa' cho jun wuj. Chuk'exwäch wa', kinweyey na chi kinopan iwuk' che iwilik. Je ri' kuya' kintzizon na iwuk' chwinaqil rech qas kujkikot na junam.

¹³ Ri ral ri loq'alaj awachalal ri xuquje' e cha'tal rumal ri Dios kâkiya b'i rutzil a wäch. Amén.

RI UROX CARTA RI XUTZ'IB'AJ RI SAN JUAN

Ri apóstol Juan káikotik rumal ri utzil ri kub'an ri loq'alaj rachi'l Gayo

¹ In wa', in k'amal ki b'e ri kojonelab', ri ya in nim winaq chik. Kintz'ib'aj b'i wa' we wuj ri' chawe at, loq'alaj wachi'l Gayo, rumal chi qas tzij at loq' chnuwäch.

² Loq'alaj wachalal, tajin kinb'an orar, kinta' k'u che ri Dios chi man xaq tá katyawajik, xane chi utz kab'an na pa ronojel, junam jas ri utzalaj a k'aslemal chuwäch ri Dios. ³ Sib'alaj xinkikotik aretaq xeb'ul jun qachalal wuk' waral, xkitzijoj k'u chwe chi sib'alaj jikom ri awanima' chunimaxik ri Qas Tzij, chi qas kataqej u b'anik ri kub'ij ru Loq' Pixab' ri Dios pa ronojel ri kab'ano. ⁴ Man k'o tá k'u jas ri kuya nimalaj kikitomal chwe je' jas ri u tzijol ri kinto chi ri kojonelab', ri je' ta ne e walk'ual in, tajin kákitaqej ri Qas Tzij pa ri ki k'aslemal.

⁵ Loq'alaj wachalal, sib'alaj utz ri' ri tajin kab'an che ki to'ik ri qachalal, che ki patánixik pa ronojel, más k'u na chke ri qachalal ri kraj naj kepe wi, ri man awetam tá ki wäch. ⁶ We qachalal ri' ki b'im chke ri qachalal kojonelab' ri e k'o waral chi sib'alaj e loq' chawäch. Chab'ana b'a' toq'ob', chaya b'i ronojel ri kajwataj chke che ri ki b'inem rumal chi utz káril wi wa' ri Dios. Je ri' kekowinik kákitaqej ri ki b'e. ⁷ Ri e are' k'ut e elinaq b'ik chupatánixik ri Jesucristo. Man k'o tá k'u jas ki k'amom chke ri winaq ri man e kojonelab' taj che ki to'ik káb'. ⁸ Rumal ri' rajwaxik chi ri uj káqaya ri rajwaxik chke. Je ri' tajin kegato' chutzijoxik ri Qas Tzij re ru Loq' Pixab' ri Dios.

Waral káqil wiri itzelalaj u no'j ri Diótrefes

⁹ Ri in xintz'ib'aj b'i jun wuj chke ri qachalal kojonelab' chila' iwuk', are k'u ri Diótrefes man kunimaj tá ri kujtaqan wi rumal chi ri are' kub'an nimal, kraj chi xaq xuwi ri are' kok che k'amal ki b'e ri qachalal kojonelab'. ¹⁰ Rumal ri', aretaq kinopan iwuk', kinb'ij na ronojel ri tajin kub'an ri are' chkiwäch ri qachalal kojonelab'. Ri are' kub'ij ri man utz taj, xaq b'anal tzij ri' ri kuyak tzij chqij. Man káku'b'i tá u k'ux ruk' wa', xane xuquje' man keuk'ulaj tá ri qachalal ri keopan che ki solixik ri kojonelab'. Jachin k'u taq ri kek'ulanik, kub'ij chke chi man kuya' taj kekik'ulaj ri qachalal, te k'u ri' keresaj b'i chkixol ri qachalal kojonelab'.

¹¹ Loq'alaj wachalal, mab'an awe ri itzel taq ki no'j nik'iaj chik, xane chab'ana awe ri utzalaj taq no'j. Jachin ri kub'an ri qas utzil, are rech ri Dios wa'. Jachin k'u ri kub'an ri

man utz taj, man qas retam tá u wäch ri Dios ri'.

Waral káqil wi chi ri Demetrio kub'an ri qas utzil

¹² Konojel káikib'ij chi ri Demetrio are utzalaj winaq. Je ri' xuquje' ri Qas Tzij re ru Loq' Pixab' ri Dios je' kuq'alajisaj wa' chrij. Ri uj xuquje' káqaq'alajisaj chi qas tzij ronojel wa'. Ri ix k'ut iwetam chi ri káqab'ij are ri qas tzij!

Ri apóstol Juan kuya b'i rutzil ki wäch ri qachalal

¹³ Ri in k'ut, k'o k'ia ri kwaj kinb'ij chawe, man kwaj tá k'ut xaq kintz'ib'aj b'i wa' cho jun wuj. ¹⁴ Je ri', rumal chi kinweyej na chi kinwil a wäch chanim. Aretaq káqariq qib' kuya' kujtzijon na chwinaqil chrij ronojel.

¹⁵ Chuxlan b'a' ra wanima'. Ri awachi'l ri e k'o waral wuk' in ri ketam a wäch kákiya b'i rutzil a wäch. Chab'ana b'a' toq'ob' chwe, chaya rutzil ki wäch chkiujunal ri e k'o chila' ri qas e utz quk'.

RI CARTA RI XUTZ'IB'AJ RI SAN JUDAS

Ri apóstol Judas kuchap u tz'ib'axik jun carta chke konojel ri kojonelab'

¹ In wa', ri Judas, in patánil re ri Jesucristo, xuquje' in u chaq' ri Jacobo. Kintz'ib'aj b'i wa' we wuj ri' chke konojel ri e sik'im rumal ri Dios qa Tat, ri kojonelab' ri u b'anom rech chke, ri xuquje' e u chajim rumal chi xa e jun ruk' ri Jesucristo. ² Are ta b'a' ri Dios sib'alaj kel u k'ux chiwe, kutoq'ob'isaj na i wäch, kub'ano chi qas xuxlan ri iwanima', xuquje' kub'ano chi kina' pa ri iwanima' chi ri Are' sib'alaj kixraj nimalaj iwonojel.

Waral käqil wi jas ki wäch ri achijab' ri käkiya tijonik xa che ki sub'ik ri winaq

³ Loq'alaj taq qachalal, nim ri rayinik ri k'o pa wanima' petinaq loq chi kintz'ib'aj b'i chiwe chrij ri xub'an ri Dios che qa to'ik nimalaj qonojel. Kämik k'ut kinchomaj chi sib'alaj rajwaxik na kintz'ib'aj b'i wa' we wuj ri' chiwe che i pixb'exik, rech kikoj i chug'ab' chuto'ik u wi' ri ix kojoninaq wi, ri xa jumul xyi' wa' rumal ri Dios chke ri winaq ri e rech ri Are'. ⁴ Je ri', rumal chi e k'o jujun achijab' e okinaq chixol chk'uyal. We achijab' ri' tzojer loq u b'im ru Loq' Pixab' ri Dios ri Tz'ib'talik chi ya'tal chke chi käq'at na tzij pa ki wi' chi käk'äjisax ki wäch. Itzel taq achijab' wa' ri käkib'ij chi we jun winaq käkojon che ru toq'ob' ri Dios, kuya' kub'ano jachike ri kraj, we utz, we man utz taj. Man kekojon tä che ri Dios, man kekojon tä k'u che ri Jesucristo ri xuwi ri Are', are Qajaw ri k'o u taqanik pa qa wi'.

⁵ Kwaj k'ut kinna'taj chiwe ri xk'ulmataj ojer, pune iwetam chi wa'. Are chi ri Qajaw Dios xeresaj loq ri winaq aj Israel pa ri tinimit Egipto, te k'u ri' xusach ki wäch ri winaq ri man xekojon tä che, ri e k'o chxixol. ⁶ Xuquje' taq ri ángeles ri xemakunik, ri xkitzukuj ki taqanik ri man ya'tal tä chke, xkiya k'u kan ri qas ki k'olib'al. We ángeles ri' e tz'aptal kämik rumal ri Dios pa ri q'equm. Sib'alaj utz u b'anom che kichapik, k'a kopan na ri nimalaj q'ij aretaq käq'at na tzij pa ki wi', man k'o tä k'u kitzoqopitajik. ⁷ Xuquje' ri winaq ri xek'oji ojer pa ri tinimit Sodoma, ri tinimit Gomorra* kachi'l ri winaq ri xek'oji pa taq ri tinimit chkinaqaj, je' xka'no jas ri xka'n ri ángeles ri xemakunik. Xuquje' xkijach kib' chub'anik ronojel u wäch etzelal. Je' xka'no jas ri käka'n ri tz'i' ri xaq käkiriq kib', man k'o tä k'u ki pixab'. Xkiya k'u kib' chub'anik ri itzel taq ki rayinik, xuquje' ronojel u wäch ri man

utz taj ri man taqal tä u b'anik. Konojel k'u wa' tajin käk'äjisax ki wäch, e k'o kan pa ri q'aq' ri man kächuptaj taj. Wa' we xb'antajik ri' are jun k'utb'al wa' chqawäch uj kämik nimalaj qonojel, chi qas tzij käpe na ri q'ij aretaq käk'äjisax na ki wäch ri ajmakib'.

⁸ Pune k'o we k'utb'al ri' chkiwäch ri achijab' ri käkik'ut jech' taq tijonik, are ki yo'm u q'ij ri ki chik', käkitz'iloj ri kanima' xuquje' ri ki cuerpo ruk' ri ki mak, käketzelaj u wäch ru taqanik ri Qajaw Dios, xuquje' kekiyoq' ri k'o taqanik pa ki q'ab' ri qas nimaq ki q'ij, käkib'ij k'u ri áwas u b'ixik chkiy ri e are'. ⁹ Ri arcángel Miguel, aretaq tajin käch'ojin ruk' ri Itzel chrij ri u cuerpo ri qa mam Moisés, man xukoch' taj chub'ixik k'äx taq tzij che ri are' chuq'atik tzij puwi' chi käk'äjisax na u wäch, xane xaq xuwi xub'ij che: "¡Are ta ri Qajaw Dios katyajowik!" —xcha che. ¹⁰ Are k'u we achijab' ri' ri e okinaq chixol chk'uyal käkib'ij ri áwas u b'ixik chrij apachike ri man käkich'ob' taj. Are k'u ri xaq ketam pa ke wi, je' jas ri xaq ketam ri awaj aj pa taq juyub' ri man k'o tä ki chomab'al, käkikoj wa', je' ri' chi xa käsach ki wäch rumal.

¹¹ ¡Toq'ob' k'u ki wäch wa' we winaq ri'! Rumal chi käka'n ke jas ri xub'an ri a Cain ojer ri xukämisaj ru chaq'. Xuquje' ri e are', xaq rech käkiriq puag, ki jalom ri ki b'e jas ri xub'an ri tat Balaam ojer, xub'an sub'unik chke ri winaq. Je' k'u käka'n na we achijab' ri', käsach na ki wäch jas ri xub'an ri tat Coré ojer, ri xkämisax rumal ri Dios rumal chi xuwalijisaj rib' chrij ri qa mam Moisés. ¹² We achijab' ri' sib'alaj k'äx ri käka'no. Xaq e esal taq k'ixb'al pa taq ri i nimaq'ij aretaq kimulij iwib' ruk' kikitomal rumal chi kiwaj iwib', kixwi' k'u ruk' utzil. Ri e are' kewi' iwuk', käkitij ronojel ri käkaj, xaq k'u tze' käkilij. Man kek'ix taj, man k'o tä k'u nim chkiwäch. Xuwi ri e are' käkilij kib'. E je' ta ne ayyuq'ab' ri man kena'taj tä ri ki chij chke. E junam ruk' ri sutz' ri man kuk'am tä jäb', ri kek'am b'i rumal ri kiäq'iq'. E junam kuk' ri che' ri man kewächin taj, pune are u q'ijol ri käkiya ki wäch. E je' ta ne ri che' ri xexchaq'ijik, ri e b'oqom chi apanoq, ri ya e käminaq chik. ¹³ E junam ruk' ri nimalaj ja' re ri mar aretaq kepe ri nimaq taq uwoja' ri kewoqow puwi'. Ri kewoqow k'u ri achijab' ri', are ri käka'no, ri qas are k'ixb'al chkiwäch konojel. E je' ta ne ch'imil ri ki sachom ri ki b'e cho ri kaj. We achijab' ri' q'atom tzij pa ki wi' rumal ri Dios chi kek'äjisaxik, keb'e k'u na pa ri qas q'equm ri man käk'oji tä na saqil, jawije' ri man k'o tä chi kelik wi loq.

¹⁴ Xuquje' ri qa mam Enoc, ri uwuq ki tat tinimit chxixol ri winaq re ri uwächulew ri xechaptaj ruk' ri qa mam Adán ojer, xub'ij ri b'im che ri are' rumal ri Dios chrij ri

* 1:7 Chawila' ri Sodoma y ri Gomorra pa ri Diccionario, k'isb'al re we Nuevo Testamento.

käka'n na we itzel taq winaq ri'. Are wa' ri xub'ij: "iChiwilampe!" —kächa'. "Ri Qajaw Jesús käpetik e rachi'l jujun mil ri loq'alaj taq ángeles rech ri Are'.¹⁵ Käpe ri Are' rech kuluq'ata tzij pa ki wi' konojel ri winaq. Kuq'at k'u na tzij pa ki wi' ri b'anal taq etzelal chi käk'äjisax na ki wäch rumal ri itzel taq k'äx ri ka'nom, xuquje' rumal ri k'ia u wäch taq tzij ri äwas ki b'ixik ri ki b'im chrij ri Dios," —xcha ri'.¹⁶ We winaq ri' xaq amaq'el käkich'a' kib', keyoq'on chkiq nik'iaq chik, xuwi k'u käkitzujuk u b'anik ri itzel taq ki rayinik ri e are'. Käkib'ij taq tzij xa chub'anik nimal, utz k'u ki ch'ab'exik ri winaq käka'no xaq rech k'o ri käkik'am na chkiq.

Käb'ix chke ri kojonelab' jas ri rajwaxik chi käka'no

¹⁷ Are k'u ri ix, loq'alaj taq qachalal, chna'taj chiwe ri tzij ri b'im kan ojer kumal ri apóstoles, ri u taqo'n ri Qajaw Jesucristo.¹⁸ Xkib'ij k'u kan chiwe: "Pa ri k'isb'al taq q'ij kepe na winaq ri xa käkitze'j ki wäch konojel ri keq'ijilan ri Dios, xuquje' ronojel ri qas utz, ri qas loq' cho ri Dios. Ri e are' xuwi käkilij na u b'anik ri itzel taq ki rayinik," —xecha ri'.¹⁹ E are taq wa' ri kekojow ki k'ux ri qachalal rech käkitasala kib'. Utz käkil wi ri winaq ri' ru b'anik xaq jas ri käkaj ri e are', man k'o tä k'u ri Espiritu rech ri Dios pa kanima'.

²⁰ Ri ix k'ut, loq'alaj taq qachalal, jqas chixkojonoq! Qas chixkojon che ru Loq' Pixab' ri Dios. Chib'ana b'a' orar ruk' ri chuq'ab' ri käyi' chiwe rumal ri Loq'alaj Espiritu.²¹ Chiwilij b'a' iwib' rech qas kina' pa ri iwanima', xuquje' qas kich'ob'o chi ri Dios sib'alaj kixraj. Chiweyej b'a' ri q'ij aretaq ri Qajaw Jesucristo qas kutoq'ob'isaj na qa wäch, kuya chqe ri k'aslemal ri man k'o tä u k'isik.

²² Ri qachalal ri xaq kieb' ki k'ux kekojonik, chitoq'ob'isaj ki wäch, cheipixb'aj k'ut rech qas jikom ri kanima'.²³ Cheito' b'a', cheiwesaj chuwäch ru q'aq'al ri k'äjisab'al ki wäch ri man keniman tä che ri Dios. Rajwaxik chi kel i k'ux chke ri jule' chik, pune k'u qas rajwaxik chi kiwil na iwib' chi man kixtzaq tä ix chupam ri ki mak. jTzel b'a' chiwilla ri etzelal ri tajin käka'no! Xa k'u michap koq ri katz'iaq ri tz'ilob'tajinaq rumal ri itzelalaj ki k'aslemal, xane chixej iwib' chuwäch wa'.

Che ri Dios ri xa jun k'olik ya'tal wi chi känimarisax u q'ij

²⁴ Ri Dios are xa jun k'olik, ri qas k'o u no'j che ronojel. Käkowin k'u ri Are' che qa to'ik. Are wa' ri qa Dios ri k'o u chuq'ab' che i chajixik rech man kixtzaq tä pa mak. Ri Are' kub'an na chi ch'ajch'oj ri iwanima' ix, rech kixkowinik ruk' nimalaj kikotemal kixopan

chuwäch ri Are' ri sib'alaj känimarisax u q'ij, ri k'o je'lalaj u juluwem.²⁵ Che k'u ri Dios ri xa jun k'olik, ri käkowin che qa to'ik, che ri Are' taqal wi chi känimarisax na u q'ij, taqalik chi nim na u b'anik ri Are' chkiwäch konojel, chi k'o na ri nimalaj u chuq'ab' pa ki wi' konojel, xuquje' chi xuwi ri Are' k'o taqanik pu q'ab' rumal ri Qajaw Jesucristo tzpa ru chaplexik loq ronojel ri k'olik k'ä we kämik ri', xuquje' pa taq ri q'ij ri junab' ri kepe na ri man k'o tä ki k'isik. Amén.

RI XQ'ALAJISAX CHUWÄCH RI SAN JUAN

*Waral käqil wi ri xuq'alajisaj ri Jesucristo
chuwäch ri apóstol Juan*

¹ Are wa' ri xuq'alajisaj ri Dios chuwäch ri Jesucristo rech ri Are' kuq'alajisaj chi chkiwäch ri patänil taq re chrij ri káb'antaj na chanim. Ri Jesucristo xuq'alajisaj wa' chuwäch ri Juan ri patänil re rumal jun ángel ri xutaq loq. ² Are k'u ri Juan xub'ij ri qas tzij chrij ronojel ri xrilo. Xutzijoj kan ri qas tzij chrij ru Loq' Pixab' ri Dios ri xuq'alajisaj ri Jesucristo.

³ Utz re jachin ri kusik'ij u wäch we wuj ri', xuquje' utz ke jachin taq ri käkitatab'ej u sik'ixik ri tzij ri yo'm rumal ri Loq'alaj Espiritu ri tz'ib'tal chupam we wuj ri', käkinimaj k'u ri kub'ij rumal chi naqaj chik k'o wi ri q'ij aretaq káb'antaj na ronojel wa'.

Ri apóstol Juan kuchap u tz'ib'axik b'i jun carta chke taq ri qachalal kojonelab' ri e k'o pa taq ri wuqub' tinimit ri e k'o pa Asia

⁴ In wa', ri Juan, kintz'ib'aj b'i we wuj ri' chiwe ix, qachalal kojonelab', ri ix k'o pa ri wuqub' tinimit re Asia. Are ta b'a' ri Dios xuquje' ri wuqub' espíritus ri e k'o chuwäch ri je'lalaj u t'uylub'al kätoq'ob'isan i wäch, kub'ano chi kuxlan ri iwanima'. Are wa' ri Dios ri k'o kämik, ri k'o ojer, ri käpe na. ⁵ Xuquje' ri Jesucristo kutoq'ob'isaj ta na i wäch, kub'an ta na chi kuxlan iwanima'. Ri Are' are ri q'alajisaj re ri Tzij ri Dios ri jikom ranima', ri nab'e xk'astaj chikxol ri käminaqib', ri k'o u taqanik pa ki wi' ri nimaq taq taqanelab' cho we uwächulew. Ri Cristo kujraj, xujuch'aj k'u che ri qa mak ruk' ru kik'el. ⁶ Xujukoj che nimaq taq taqanelab', xuquje' che sacerdotes chupatänixik ri Dios, ru Tat. iChnmarisax ta b'a' u q'ij, chtaqaq ta k'ut amaq'el pa taq ri q'ij ri junab' ri kepetik! Amén.

⁷ iChiwilampe', ri Cristo petinaq pa ri sutz'! Konojel winaq käkil na wa', xuquje' ri xeb'anow k'äx che käkil na u wäch. Ronojel ki wäch winaq cho ruwächulew keb'oq' na aretaq käkil ri Are' käpetik. Je', qas je' kel wi na.

⁸ "Ri in, in je' jas ri nab'e letra xuquje' ri k'isb'al letra re ri alfabeto, ri "A" ruk' ri "Z". In k'ut ri chapleb'al, in ri' ri k'isb'al re ronojel." Je wa' kub'ij ri Qajaw Dios ri k'o ronojel u wäch chuq'ab' ruk', ri k'o kämik, ri k'o ojer, ri xuquje' käpe na.

Ri apóstol Juan xril ri Cristo nimarisam chi u q'ij

⁹ In wa' ri Juan, in iwachalal ri tajin kinriq k'äx junam iwuk' ix. Yo'm k'u chwe rumal ri Jesucristo chi kinchajij paciencia, je' jas ri yo'm chiwe ix. Je ri' junam kujek'ol na chila' jawije' ri kätqaq wi ri Dios. Ri in, in ajpache', in k'o pa jun alaj ch'äqap ulew, Patmos u b'i, ri k'o pa ri mar, xa rumal ru tz-ijoxik ru Loq' Pixab' ri Dios ri xuq'alajisaj ri Jesucristo. ¹⁰ Xk'ulmataj pa jun q'ij domingo (ri káb'ix "u q'ij ri Qajaw" che) chi xchaptaj ri wanima' rumal ru chuq'ab' ri Loq'alaj Espiritu. Te' xinto k'o jun ri sib'alaj ko xch'aw loq chwij, je' ta ne ru ch'ab'al jun tun. ¹¹ Ri xch'awik, je wa' xub'ij: Ri in, in je' jas ri nab'e letra xuquje' ri k'isb'al letra re ri alfabeto, ri "A" ruk' ri "Z". In k'ut ri chapleb'al, in ri' ri k'isb'al re ronojel. Chatz'ib'aj pa jun wuj ri kawilo, te k'u ri' kataq b'i chke ri qachalal kojonelab' ri e k'o pa taq ri wuqub' tinimit ri e k'o pa Asia, ri tinimit Éfeso, ri Esmirna, ri Pérgamo, ri Tiatira, ri Sardis, ri Filadelfia, xuquje' ri tinimit Laodicea, —xcha ri' chwe.

¹² Xinka'y k'u chwij che rilik jachin ri xch'awik. Aretaq je wa' xinb'ano, xinwil wuqub' u tak'alib'al kantela re q'an puag. ¹³ Te k'u ri' pa ki nik'ajal ri wuqub' u tak'alib'al kantela xinwil Jun ri junam ruk' ru k'ojol jun winaq. U kojom k'u jun atz'iaq ri kopan k'ä chuqul raqan, ximital cho u k'ux ruk' jun pas re q'an puag. ¹⁴ Ri u wi' are sib'alaj saqloloj je' jas ri ch'ajch'oj rismal chij, junam jas ri saq tew. Ri u waq'äch k'ut, kenikowik je' jas ri u xaq q'aq'. ¹⁵ Ri raqan kejuluwik junam jas ri ch'ich' bronce ri porom pa horno, ri ch'ajch'ob'isam k'ut. Ri käch'awik are junam ruk' ri ki chojojem k'ia nimaq taq ja'. ¹⁶ Ruk'am ri Are' wuqub' ch'imil pa ru wikiäq'ab', elinaq q'u loq jun machete pu chi' ri t'ist'ik u wi' ri xuquje' kieb' u pu chi'. Ru palaj sib'alaj käjuluwik je' jas ru juluwem ri q'ij aretaq man k'o tä jub'iq' ri sutz' cho ri kaj.

¹⁷ Aretaq xinwilo, xintzaq chuwäch je' ta ne ri xinkämik. Ri Are' k'ut xuya ru wikiäq'ab' pa nu wi', te k'u ri' xub'ij chwe: iMaxejawib'! In ri' ri nab'e, in ri' ri k'isb'al re ronojel. ¹⁸ Ri in, in k'aslik. Pune xinkämik, in k'asal chik kämik, man k'o tä k'u u k'isik ri nu k'aslemal. Pa nu q'ab' k'o wi ri lawe re ri kämik xuquje' ri lawe re ri k'olib'al ri e k'o wi ri käminaqib'. ¹⁹ Chatz'ib'aj b'a' ri awilom, xuquje' ri k'o chanim ri tajin kawilo. Chatz'ib'aj xuquje' ronojel ri káb'antaj na aretaq e ok'owinaq chi wa' we ri'. ²⁰ Are wa' ri kel kub'ij ri tijonik ri man etamtal taj chkiq ri wuqub' ch'imil ri xawilo ri wuk'am pa ri nu wikiäq'ab', xuquje' ri wuqub' u tak'alib'al kantela re q'an puag: Ri wuqub' ch'imil e are' käkik'exwächij ri k'amal taq

* 1:20 Ri tzij "k'amal ki b'e" are wa' ri tzij "ángel" pa castellano.

ki b'e* ri qachalal kojonelab' ri e k'o pa ri wuqub' tinimit re Asia. Are k'u ri wuqub' u tak'alib'al kantela e are taq wa' ri qachalal kojonelab' ri e k'o pa ri wuqub' tinimit, — xcha ri Are' chwe.

2

Waral kâqil wi ri tzij ri xtz'ib'ax b'i chke ri qachalal kojonelab' ri e k'o pa ri tinimit Êfeso

¹ Te k'u ri' xub'ij: Chatz'ib'aj b'i wa' we tzij ri' che ri k'amal ki b'e ri qachalal kojonelab' ri e k'o pa ri tinimit Êfeso: “Ri Jun ri ruk'am ri wuqub' ch'imil pa ru wikiäq'ab', ri kâb'in chkixol ri wuqub' u tak'alib'al kantela re q'an puaq, je' kub'ij wa'.” ² Ri in wetam ronojel ri tajin kab'ano, wetam chi sib'alaj tajin katchakunik, xuquje' chi kachajij paciencia pa ronojel. Wetam chi man kakoch' tä a wäch chke ri itzel taq winaq. Wetam chi gas awilom ri ki k'aslemal ri winaq ri kâka'n che kib' chi e apóstoles, man gas e are' tä k'ut. Awilom k'ut chi xaq e b'anal taq tzij. ³ Pune a rigom k'äx, a chajim paciencia. Pune nim ri chak a b'anom rumal wech in, man at kosinaq taj. ⁴ K'o k'u ri tajin kinwil chawij, chi man je' tä chi ri nu loq'al chawäch jas ri nab'e. ⁵ Chna'taj b'a' chawe jawije' ri at qajinaq wi, chak'exa k'u ra chomanik, chak'exa rawanima'. Chachaplej chi na ri tajin kab'an nab'e. We ta man je' kab'an wa', chanim kine' che awilik, kinwesaj na ru tak'alib'al a kantela pa ru k'olib'al we ta mat at tzelejinaq ruk' ri Dios. ⁶ Pune je ri', utz kinwil ri tajin kab'ano chi tzel kawil wi ri kâka'n ri jule' winaq nicolaítas. Ri in xuquje' kinwetzelaj u wäch ri tajin kâka'no. ⁷ Apachin ri u jikib'am ranima' chutatab'exik ri nu tzij, chutatab'ej ri kub'ij ri Loq'alaj Espiritu chke taq ri qachalal kojonelab': Jachin ri käch'akan puwi' ri itzel, kinya na re ru wäch ri che' re k'aslemal ri k'o pa ri je'lalaj k'olib'al jawije' k'o wi ri Dios ri kâb'ix “Paraíso” che, —kâcha ri'.

Waral kâqil wi ri tzij ri xtz'ib'ax b'i chke ri qachalal kojonelab' ri e k'o pa ri tinimit Esmirna

⁸ Chatz'ib'aj b'i we tzij ri' xuquje' che ri k'amal ki b'e ri qachalal kojonelab' ri e k'o pa ri tinimit Esmirna: “Ri Jun ri k'o nab'e, ri xuquje' are ri k'isb'al, ri xkâm na kanoq, te k'u ri' xk'astaj chkixol ri kâminaqib', je' kub'ij wa'.” ⁹ In wetam chi tajin kariq k'äx, wetam chi at meb'a', pune ta ne we ta k'olib'al ri gas tzij, at q'inom. Wetam chi katyoq' kumal ri winaq ri kâkib'ij chi e aj Israel. Man e aj Israel tä k'ut, xane e jun komon winaq ri e rech ri Satanás. ¹⁰ Maxej awib' rumal ri k'äx ri kariq na. ¡Tampe! Ri Itzel kub'an na chi e k'o jujun chiwe ri keb'ok pa che' che rilik

we gas tzij iwonojel ix, ix kojonelab'. Lajuj q'ij kâb'an na k'äx chiwe. Chatagej b'a' ri kojoniq k'ä katkâm na. Ri in k'ut kinya na ri k'aslemal chawe che tojb'al awe je' ta ne are jun corona ri kakoj chajolom. ¹¹ Apachin ri u jikib'am ranima' chutatab'exik ri nu tzij, chutatab'ej ri kub'ij ri Loq'alaj Espiritu chke taq ri qachalal kojonelab': Jachin ri käch'akan na puwi' ri itzel man kuriq tä na k'äx rumal ri ukab' kâmikal,” —kâcha ri Are'.

Waral kâqil wi ri tzij ri xtz'ib'ax b'i chke ri qachalal kojonelab' ri e k'o pa ri tinimit Pérgamo

¹² Chatz'ib'aj b'i we tzij ri' xuquje' che ri k'amal ki b'e ri qachalal kojonelab' ri e k'o pa ri tinimit Pérgamo: “Ri Jun ri ruk'am ri machete t'ist'ik u wi', ri kieb' u pu chi', je' kub'ij wa'.” ¹³ Ri in wetam ronojel ri tajin kab'ano, xuquje' wetam chi at k'o chila' jawije' ri kâtaqan wi ri Satanás. Pune je ri' tajin kataqej nu patânixik, at kojoniq aretaq xkâmisax ri Antipas ri patânil we ri jikom ranima' chila' pa ri tinimit jawije' kâtaqan wi ri Satanás. ¹⁴ K'o k'u ri man utz taj ri tajin kinwil chawij, chi e k'o jujun winaq awuk' ri man kâkaj taj kâkiya kan ru tijoniq ri tat Balaam ri xukoj u k'ux ri tat Balac rech keutaqchi'j ri winaq aj Israel che mak chutijik ri yo'm chkiwäch taq tiox ri xa e b'anom kumal winaq, xuquje' chub'anik ke jas ri kâka'n ri tz'ri ri xaq kâkiriq kib', man k'o tä ki pixab'. ¹⁵ Xuquje' e k'o jujun winaq awuk' ri man kâkaj taj kâkiya kan ri ki tijoniq ri jule' winaq nicolaítas, ri tzel kinwil wi. ¹⁶ Rumal ri' chak'exa ri awanima', chak'exa ri a chomanik. We ta mat je' kab'an wa', chanim kinopan na iwuk', kinch'ojin na kuk' ri winaq ri' ruk' ri machete ri kel pa nu chi'. ¹⁷ Apachin ri u jikib'am ranima' chutatab'exik ri nu tzij, chutatab'ej ri kub'ij ri Loq'alaj Espiritu chke taq ri qachalal kojonelab': Jachin ri käch'akan puwi' ri itzel kinya na re ri maná* ri k'u'talik, xuquje' kinya na che ri are' jun alaj saq ab'aj ri tz'ib'tal wi jun k'ak' b'i'aj, ri man k'o tä jun etamaninaq, xane xaq xuwi ri kâk'amowik,” —kâcha ri'.

Waral kâqil wi ri tzij ri xtz'ib'ax b'i chke ri qachalal kojonelab' ri e k'o pa ri tinimit Tiatira

¹⁸ Chatz'ib'aj b'i we tzij ri' xuquje' che ri k'amal ki b'e ri qachalal kojonelab' ri e k'o pa ri tinimit Tiatira: “Ru K'ojol ri Dios, ri kânikow ru waq'äch je' jas ri u xaq q'aq', ri xuquje' kejuuw ri raqan junam ruk' ri ch'ich' bronce ri ch'ajch'ob'isam, je' kub'ij wa'.” ¹⁹ Ri in wetam ronojel ri tajin kab'ano, wetam ri rutzil awanima', wetam k'ut chi

* 2:17 “Maná”: Are ri wa ajchikaj tzuqub'al ke ri winaq aj Israel aretaq xeb'in pa taq ri juyub' ri ketz'inowik.

k'o a kojoniik, chi kachajij paciencia, xuquje' chi tajin kinapatänij. Wetam k'ut chi ri tajin kab'an kämik nim na chuwäch ri xab'an kan nab'e. ²⁰ K'o k'u ri man utz taj ri tajin kinwil chawij: chi xaq utz kawil wi k'o ri ixoq Jezabel awuk', ri kub'ij chi kuq'alajisaj tzij ri yo'm che rumal ri Dios, ri keusub' k'u ri patänil taq we ruk' ri tijoniik ri kuya chke rech kaka'n ke jas ri kaka'n ri tz'i' ri xaq käkiriq kib', man k'o tä ki pixab'. Ri are' kub'ij chke chi kuya' käkitij ke ri wa ri yo'm chkiwäch taq tiox ri xa e b'anom kumal winaq. ²¹ Ri in xaq weye'm chi kuk'ex u chomanik, kuk'ex k'u ranima' we ixoq ri'. Man kraj tä k'ut kuya kan u b'anik ri nimalaj mak ri tajin kub'ano. ²² Ri in kintaq na b'i jun k'äxalaj yab'il chrij we ixoq ri', xuquje' kinb'an na chi sib'alaj käkiriq na k'äx ri tajin kaka'n ri nimalaj mak ruk' we ixoq ri' we ri e are' man käkiya tä kan u b'anik ri mak ri tajin kub'an ri ixoq. ²³ Ri ral ri ixoq keinkämisaj na, je ri' konojel ri qachalal kojonelab' käketamaj na chi in wetam ri ki chomanik ri winaq xuquje' ri k'o pa kanima'. Kinya k'u na chiwe chijujunal ri tojb'al re ronojel ri i b'anom. ²⁴ Are k'u ri nik'iaj iwachalal chik ri e k'o pa Tiatura, ri ix ri man kitaqej tä we tijoniik ri', ri man k'o tä iwetamam chrij ru tijoniik ri Satanás ri man etamtal taj ri käkib'ij ri nik'iaj chi sib'alaj k'äx u ch'ob'ik wa', kinb'ij chiwe chi man k'o tä chi na jas jun eqa'n chik kinya na chiwi. ²⁵ Qas utz b'a' chib'ana chuk'olik ri k'o iwuk' k'ä kinopan na iwuk'. ²⁶ Jachin taq ri kech'akan na puwi' ri itzel, ri xuquje' käkitaqej u b'anik jachike ri kwaj chi käb'anik k'ä chuk'isb'al ronojel, kinya na taqanik pa ki q'ab' pa ki wi' konojel ki wäch winaq ri e k'o cho ruwächulew. ²⁷ Je' jas ri in yo'm taqanik pa nu q'ab' rumal ri nu Tat, ketaqan k'u na pa ki wi' konojel ki wäch winaq ruk' jun vara re ch'ich', kekixapix k'u na je' ta ne chi e t'uy re ulew. ²⁸ Xuquje' kinya na ri ch'imil re ri u saqirib'al chke. ²⁹ Apachin ri u jikib'am ranima' chutatab'exik ri nu tzij, chutatab'ej ri kub'ij ri Loq'alaj Espiritu chke taq ri qachalal kojonelab', —kächa ri Are'.

3

Waral käqil wi ri tzij ri xtz'ib'ax b'i chke ri qachalal kojonelab' ri e k'o pa ri tinimit Sardis

¹ Chatz'ib'aj b'i we tzij ri' xuquje' che ri k'amal ki b'e ri qachalal kojonelab' ri e k'o pa ri tinimit Sardis: "Ri Jun ri k'o ri wuqub' espíritus rech ri Dios ruk', xuquje' ri ruk'am ri wuqub' ch'imil, je' kub'ij wa': Ri in wetam ronojel ri tajin kab'ano. Pune elinaq u tzijol chi at k'aslik, at käminaq k'ut pa ri a mak. ² Chatk'astajoq, chab'ana ru b'anik ri k'ä k'o awuk' ri xa jub'iq' man käsach u wäch.

Wilom k'ut ri tajin kab'ano chi man jikom tä ri' cho ri nu Dios. ³ Chna'taj chawe ri tijoniik ri a tom. Chataqej jas ri kub'ij, chak'exa ri awanima', chak'exa k'u ri a chomanik. We man katk'astajik, kinopan na awuk' je' jas jun elaq'om, man awetam tä k'ut jachike hora kinopanik. ⁴ Pune je ri' e k'o k'u jujun winaq chila' pa Sardis ri man ki tz'ilom tä ri katz'iaq, xane ch'ajch'oj ri ranima'. E are taq wa' keb'in na junam wuk', ki kojom saq katz'iaq rumal chi taqal wa' chke. ⁵ Jachin taq ri kech'akan na puwi' ri itzel käkikoj na saq katz'iaq. Man kinchup tä k'u ri ki b'i' pa ri wuj re k'aslemal, xane kinq'alajisaj na ri ki b'i' chuwäch ri nu Tat, xuquje' chkiwäch ri ángeles ri e k'o ruk'. ⁶ Apachin ri u jikib'am ranima' chutatab'exik ri nu tzij, chutatab'ej ri kub'ij ri Loq'alaj Espiritu chke taq ri qachalal kojonelab', —kächa ri'.

Waral käqil wi ri tzij ri xtz'ib'ax b'i chke ri qachalal kojonelab' ri e k'o pa ri tinimit Filadelfia

⁷ Chatz'ib'aj b'i we tzij ri' xuquje' che ri k'amal ki b'e ri qachalal kojonelab' ri e k'o pa ri tinimit Filadelfia: "Ri Jun ri sib'alaj loq' ri kub'ij ri qas tzij, ri k'o ri lawe ruk' rech ri qa mam David ri nim taqanel, ri aretaq kujaq ri porta man k'o tä jun käkowin chutz'apixik, aretaq k'u kutz'apij wa' man k'o tä jun käkowin chujaqik, je' kub'ij wa': ⁸ Ri in wetam ronojel ri tajin kab'ano. Nu yo'm k'u jun porta chawäch ri jaqtalik, ri man k'o tä jun käkowin kutz'apij. Pune b'a' xa jub'iq' ri a chuq'ab' k'olik, a nimam ri nu tzij, man katk'ixtaj tä k'u chub'ixik chi at kojoniinaq chwe. ⁹ ¡Chatampe! Are k'u ri jun komon winaq ri e rech ri Satanás, ri b'anal taq tzij ri' ri käkib'ij chi qas e aj Israel, pune man qas tzij tä ri', ri in kinb'ano chi ri e are' keb'e' na, kezuki k'u na chawäch rech käketamaj chi at loq' chnuwäch. ¹⁰ A nimam ri nu taqanik chi rajwaxik kachajij paciencia, rumal k'u ri' katinto' na chuwäch ri nimalaj k'äx'ol ri käpe na pa ki wi' konojel ri winaq cho we uwächulew che rilik we utz o man utz taj ri kaka'no. ¹¹ Chanin kinopan na. Qas utz b'a' chab'ana chuk'olik ri k'o awuk' rech man k'o tä jun kämajow ri tojb'al awe. ¹² Jachin taq ri kech'akan na puwi' ri itzel, keinkoj na che raqan ja pa ri nimalaj rachoch ri nu Dios. Man käpe tä k'u ri q'ij ri keb'el na chila'. Kintz'ib'aj k'u na ru b'i' ri nu Dios chkiq, xuquje' ru b'i' ru tinimit ri nu Dios, ri k'ak' Jerusalén ri käqaj na loq chila' chikaj ruk' ri nu Dios. Xuquje' kintz'ib'aj na ri k'ak' nu b'i' chkiq. ¹³ Apachin ri u jikib'am ranima' chutatab'exik ri nu tzij, chutatab'ej ri kub'ij ri Loq'alaj Espiritu chke taq ri qachalal kojonelab', —kächa ri Are'.

Waral käqil wi ri tzij ri xtz'ib'ax b'i chke ri qachalal kojonelab' ri e k'o pa ri tinimit

Laodicea

¹⁴ Chatz'ib'aj b'i we tzij ri' xuquje' che ri k'amal ki b'e ri qachalal kojonelab' ri e k'o pa ri tinimit Laodicea: "Ri Jun ri ajchaq'el ri Qas Tzij, ri q'alajisanel ri jikom ranima' chub'ixik ri qas tzij, ri Jun ri xkoj rumal ri Dios chub'anik ronojel ri k'olik, je' kub'ij wa'; ¹⁵ Ri in wetam ronojel ri tajin kab'ano, wetam chi man qas tä jorob'inaq ra wanima', xuquje' chi man qas tä miq'inaq. Are ta kwaj in chi qas ta at jorob'inaq o qas ta at miq'inaq. ¹⁶ Rumal k'u rech chi xaq saql'il ri awanima', man are tä joron, man are tä k'u k'atän, xa katinwupij na loq pa nu chi'. ¹⁷ Ri at kab'ij chi at q'inom, chi a riqom utzil. Kab'ij chi man k'o tä jas rajwaxik chawe. Man kana' tä k'u pa rawanima' chi sib'alaj k'äx ri a b'antajik. jToq'ob' a wäch! Man k'o tä ri katel wi, at meb'a', at moy, xuquje' at ch'analik. ¹⁸ Rumal ri' katinpixb'aj chi chaloq'o awe ri q'an puag ri k'o wuk', ri b'anom ch'ajch'oj che pa q'aq' rech qas tzij at q'inom. Xuquje' chaloq'o awe ri saq atz'iaq ri k'o wuk' rech kakojo, je ri' käch'uqtaj ri awij ri ch'analik ri xa käresaj a k'ixb'al. Xuquje' chaloq'o awe ri kunab'al ri k'o wuk' ri kukunaj ri a waq'äch rech katkowinik katka'yik. ¹⁹ Ri in keinyajo xuquje' kink'äjisaj ki wäch konojel ri e loq' chnuwäch. Chatok b'a' il, chak'exa ri awanima', chak'exa k'u ri a chomanik. ²⁰ jChatampe'! Ri in tajin kinch'aw chi' ri uchija, xaq k'u in tak'al chila'. Jachin ri kuto chi kinch'awik, kujaq k'u ri uchija, kinok na ruk' pa ja, kinwi' na junam ruk', ri are' k'ut käwi' na junam wuk' in. ²¹ Jachin taq ri kech'akan na puwi' ri itzel, kinya na chke chi ket'uyi wuk' pa ri je'lalaj nu t'uyulib'al, je' jas ri in xinch'akan puwi' ri itzel, xint'uyi k'u ruk' ri nu Tat pa ri je'lalaj u t'uyulib'al ri Are'. ²² Apachin ri u jikib'am ranima' chutatab'exik ri nu tzij, chutatab'ej ri kub'ij ri Loq'alaj Espiritu chke taq ri qachalal kojonelab', —xcha k'u ri Are'.

4

Waral käqil wi ri q'ijilanik ri käb'an chila' chikaj

¹ Aretaq xb'antaj ronojel wa', te' xinwilo k'o jun porta jaqtal pa ri kaj, te k'u ri xinta ri Jun ri xinuch'ab'ej loq nab'e ri je' ta ne u ch'ab'al jun nimalaj tun, xub'ij k'u chwe: Chatpaqal loq je wa', kink'ut k'u na chawäch ri rajwaxik käb'antaj na aretaq e b'antajinaq chi ronojel wa' we ri', —xcha chwe.

² Chanim k'ut xchaptaj ri wanima' rumal ru chuq'ab' ri Loq'alaj Espiritu. Te' xinwilo k'o jun je'lalaj t'uyulib'al kojom pa ri kaj. K'o k'u jun t'uyul chila'. ³ Ri Jun ri t'uyul pa ri je'lalaj t'uyulib'al ri' je' u b'antajik jas

jun je'lalaj ab'aj re jaspe,* o junam ruk' jun ab'aj re cornalina ri sib'alaj käjuluwik. K'o jun räxkiäq'ab' ri sib'alaj käjuluwik chrij ri je'lalaj t'uyulib'al je' jas jun ab'aj re esmeralda. ⁴ Xuquje' chrij ri je'lalaj t'uyulib'al ri' e k'o chi juwinaq kiejeb' je'lalaj taq t'uyulib'al chik ri e t'uyut'oj wi juwinaq kiejeb' k'amal taq ki b'e ri kojonelab'. Ri tata'ib' ki kojom saq katz'iaq, k'o jujun corona re q'an puag chkijolom. ⁵ Che ri nab'e je'lalaj t'uyulib'al kel loq kaypa', wojojem, xuquje' kiäqulja. Chuwäch ri je'lalaj t'uyulib'al e k'o wuqub' chäj ri kenikowik. E are k'u wa' ri wuqub' espíritus rech ri Dios. ⁶ Chuwäch ri je'lalaj t'uyulib'al xuquje' k'o jun mar ri je' ta ne vidrio ri kuya' kaka'y jun chupam.

Pu nik'iajal ronojel, jawije' k'o wi ri je'lalaj t'uyulib'al xuquje' chrij ri t'uyulib'al e k'o kiejeb' ri je' kepe ángeles, ri k'o k'ia ki waq'äch chkiwäch xuquje' chki. ⁷ Ri nab'e chke je' käpe jun koj. Ri ukab' je' käpe jun ama' wakäx. Ri urox junam u ka'yeb'al ruk' jun winaq. Ri ukaj je' käpe jun nimalaj xik ri tajin kärapapik. ⁸ Ri kiejeb' awaj k'o waqib' ki xik' chkiujunal, nojinaq k'u ri rij xuquje' ri u xe' ri ki xik' che waq'ächaj. Paq'ij chi chaq'ab' man ketäni tä chub'ixik: Loq'alaj Dios, loq'alaj Dios, loq'alaj

Dios,

ri Qajaw Dios ri k'o ronojel u wäch chuq'ab' ruk',

ri k'o ojer, ri k'o kämik,

ri xuquje' käpe na,

—kecha ri'.

⁹ Amaq'el aretaq ri kiejeb' ri je' kepe ángeles käkinimarisaj u q'ij, käkiya u q'ij, käkiya k'u maltioxinik che ri Jun ri t'uyul pa ri je'lalaj t'uyulib'al ri xaq tajin wi k'asal pa taq ri q'ij ri junab' ri kepetik, ¹⁰ are chi' kexuki ri juwinaq kiejeb' k'amal taq ki b'e ri kojonelab' chuwach ri Jun ri k'o pa ri je'lalaj t'uyulib'al, käkesaj ri ki corona chuwach ri t'uyulib'al, käkiq'ijilaj k'ut, käkib'ij:

¹¹ Qajaw xuquje' qa Dios,

taqalik chi känimarisax q'ij la,

chi käyi' q'ij la, chi käb'ix che la

chi k'o nimalaj chuq'ab' la

rumal chi lal b'anowinaq la

ronojel ri k'olik,

xaq k'u rumal ri rayib'al la e k'olik

xuquje' xeb'anik,

—kecha ri e are'.

5

Waral käqil wi ri jun b'otom wuj ri xusol ri Alaj Chij

¹ Te k'u ri' xinwilo chi ri Jun ri t'uyul pa ri je'lalaj t'uyulib'al ruk'am jun b'otom wuj pa ru wikiäq'ab', ri tz'ib'tal rij xuquje' ru pam. Tz'apim wa' ruk' wuqub' t'iqb'al. ² Te' xinwil

* 4:3 Konojel ri ab'aj ri keb'ix waral, e are' ab'aj wa' ri paqal kajil.

jun ángel ri sib'alaj k'o u chuq'ab' ri ko xuraq u chi', xub'ij: ¿jachin ya'tal che chi kuch'ol apan ri t'iqb'al chrij ri b'otom wuj, kusol k'ut? —xcha'.

³ Man k'o tä k'u jun. Man k'o tä pa ri kaj, man k'o tä cho ruwächulew, man k'o tä k'u chuxe' ri ulew pa ri k'olib'al ri e k'o wi ri kāmīnaqib'. Man k'o tä jun ri kākowinik kusol ri b'otom wuj che rilik ri k'o chupam. ⁴ Ri in k'ut sib'alaj xinoq'ik rumal chi man xriqtaj tä jun ri ya'tal che chi kusol ri b'otom wuj, kārīl ri k'o chupam, kusik'ij k'u u wäch. ⁵ Jun k'u chke ri k'amal taq ki b'e ri kojonelab' xub'ij chwe: Matoq' chik. Chawilampe' ri Koj rech ru tinimit ri Judá,* jun chke ri rachalaxik ri qa mam David ri nim taqanel ojer. Ri Are' ch'akaninaq puwi' ronojel, rumal k'u ri' ya'tal che chi kuch'ol apan ri wuqub' t'iqb'al chrij ri b'otom wuj, kusol k'u na wa', —xcha chwe.

⁶ Te k'u ri' xinwil jun Alaj Chij pu nik'iajal ronojel, jawije' k'o wi ri je'lalaj t'uyulib'al, chkixol ri kiejeb' ri je' kepe ángeles, xuquje' chkixol ri k'amal taq ki b'e ri kojonelab'. Ri Alaj Chij ri' Are chakalik, pune k'o etal chrij chi xkāmīsaḡaxik, xyi' che sipanik cho ri Dios. K'o wuqub' ru k'a', xuquje' k'o wuqub' u waq'äch. Are k'u wa' ri wuqub' espíritus rech ri Dios ri e taqom b'i cho ronojel ruwächulew. ⁷ Ri Alaj Chij k'ut, xqeb' ruk' ri jun chik ri t'uyul pa ri je'lalaj t'uyulib'al ri ruk'am ri b'otom wuj pa ru wikiäq'ab'. Xuk'am k'u ri b'otom wuj pu q'ab'. ⁸ Aretaq xuk'am ri b'otom wuj, ri kiejeb' ri je' kepe ángeles xuquje' ri juwinaq kiejeb' k'amal taq ki b'e ri kojonelab' xexuki chuwačh ri Alaj Chij. Konojel k'o ki q'ojom, arpa u b'i', xuquje' kuk'am junun laq re q'än puaq nojinaq che incienso. ⁹ Ri incienso are ri oración ri kākā'n ri winaq ri e rech ri Dios. ⁹ Xkib'ixoj k'u we k'ak' b'ix ri':

Che la ya'tal wi ru k'amik ri b'otom wuj, kech'ol k'u la ri t'iqb'al chrij

rumal chi xkāmīsaḡax la, xyi' k'u la che sipanik cho ri Dios.

Xujloq' la ruk' ri k'ik'el la chkixol konojel ki wäch winaq

cho ronojel ruwächulew
rech uj rech chi ri Dios,
chkixol winaq ri jalajoj keka'yik,
ri jalajoj kech'awik,
chkixol k'u winaq
ri jalajoj taq ki tinimit.

¹⁰ Xujkoj la che nimaq taq taqanelab', che sacerdots chupatānīxik ri qa Dios. Kujtaqan k'u na puwi' ruwächulew.

¹¹ Te ri' xinka'yik, xinta k'u ri ki ch'ab'al k'ialaj taq ángeles ri ki sutim rij ri je'lalaj t'uyulib'al, ki sutim kij ri je' kepe ángeles, xuquje' ri k'amal taq ki b'e ri kojonelab'.

Sib'alaj e k'ia ri ángeles k'olik chi man kea-jilitaj taj. ¹² Ko xech'awik, xkib'ij:

Ri Alaj Chij ri xkāmīsaḡaxik
ri xyi' che sipanik cho ri Dios

taqalik káb'ix che chi k'o
u taqanik puwi' ronojel
xuquje' chi k'o nimalaj u q'inomal,
chi k'o nimalaj u no'j,
xuquje' chi k'o nimalaj u chuq'ab'.

Taqal k'ut chi nim kil wi,
kāyi' u q'ij, xuquje' kāk'ijilaxik.

¹³ Te k'u ri' xinto xech'aw konojel ri e b'anom rumal ri Dios, ri e k'o pa ri kaj, ri e k'o cho ruwächulew, ri e k'o chuxe' ri ulew pa ri k'olib'al ri e k'o wi ri kāmīnaqib', ri e k'o pa ri mar, konojel k'u ri e k'o pa ri kajulew, xkib'ij k'ut:

Che ri Jun ri t'uyul pa ri je'lalaj t'uyulib'al
xuquje' che ri Alaj Chij,

chke ri e Are' taqal wi
chi kāmīmarisaḡax ki q'ij,
nim keil wi, kāyi' ki q'ij,
taqal k'ut káb'ixik chi k'o nimalaj
ki chuq'ab' puwi' ronojel

amaq'el pa taq ri q'ij ri junab' ri kepe na,
—xecha'.

¹⁴ Are k'u ri kiejeb' ri je' kepe ángeles xkib'ij: ¡Je' ta chel wi! —xecha ri'.

Ri juwinaq kiejeb' k'amal taq ki b'e ri kojonelab' xexuki'k, xkij'ijilaj ri Jun ri man k'o tä u kāmīk pa taq ri q'ij ri junab' ri kepetik.

6

Waral kākīl wi chi ri Alaj Chij kuchap ki ch'olik ri wuqub' t'iqb'al

¹ Te k'u ri' xinwil ri Alaj Chij xuch'ol apan ri nab'e chke ri wuqub' t'iqb'al. Xinta k'ut xch'aw jun chke ri kiejeb' ri je' kepe ángeles. Ru ch'ab'al junam ruk' jun kiäqulja, xub'ij k'ut: ¡Tasa'j, chawilampe'! —xcha chwe.

² Xinka'yik, xinwil k'u jun kiej saq rij, ri jun ri kiejeninaq chrij ruk'am jun k'iaqb'al ch'ab' pu q'ab'. Te k'u ri' xyi' jun u corona. Xel k'u b'i' chuch'akik ronojel, xutajej k'u ch'akanik.

³ Aretaq ri Alaj Chij xuch'ol chi apan ri ukab' t'iqb'al, xinto xch'aw ri ukab' chke ri je' kepe ángeles, xub'ij: ¡Tasa'j, chawilampe'! —xcha chwe.

⁴ Xel loq jun kiej chik, kiäq rij. Are k'u ri jun ri kiejeninaq chrij xyi' taqanik pu q'ab' che resaxik ri utzil chkixol ri winaq cho ruwächulew, rech kākīkāmīsaḡala kib'. Xyi' k'u jun nimalaj machete che.

⁵ Aretaq ri Alaj Chij xuch'ol chi apan ri urox t'iqb'al, xinto xch'aw ri urox chke ri je' kepe ángeles, xub'ij: ¡Tasa'j, chawilampe'! —xcha chwe.

* 5:5 “Ri Koj rech ru tinimit ri Judá” are jun chke ru b'i' ri Cristo, o ri Mesías ri xyi' che ojer.

Xinka'yik, xinwil k'u jun kiej q'eq rij, ri jun ri kiejeninaq chrij ruk'am jun pajb'al pu q'ab'. ⁶ Te k'u ri' xinto k'o jun ri xch'aw loq chxixol ri kiejeb' ri je' kepe ángeles, xub'ij: Xa rajil kieb' libra triko, xa rajil waqib' libra cebada, ri puq' ri kuch'ak jun ajchak che ri jun q'ij. Xaq b'a' mab'an k'áx che ri aceite o ri vino, —xcha'.

⁷ Aretaq ri Alaj Chij xuch'ol chi apan ri ukaj t'iqb'al, xinto xch'aw ri ukaj chke ri je' kepe ángeles, xub'ij: ¡Tasa'j, chawilampe! — xcha chwe.

⁸ Xinka'yik, te' xinwil jun kiej q'an rij, ri jun ri kiejeninaq chrij, "Kámikal" u b'i, ternetal k'u rumal jun ri kuk'exwächij ri ki k'olib'al ri káminaqib' (ri káb'ix "Hades" che). Te k'u ri' xyi' taqanik pu q'ab' puwi' ri ukaj u tz'aqatil ruwächulew rech keukámisaj ri winaq ruk' ch'oj, ruk' wi'jal, ruk' yab'il, xuquje' kuk' k'anajal taq awaj aj pa taq juyub'.

⁹ Aretaq ri Alaj Chij xuch'ol chi apan ri uro' t'iqb'al, xinwil ri kanima' ri kojonelab' ri xekámisax rumal ru tzijoxik ru Loq' Pixab' ri Dios, e k'olotal k'u chuxe' ri ta b'al toq'ob'. ¹⁰ Ri e are' ko xech'awik, xkib'ij: Qajaw, loq'alaj qa Dios ri jikom anima' la, ¿jampa' káq'at la tzij pa ki wi' ri winaq ajuwächulew ri xujikámisaj, káya k'u la rajil u k'exel ri qa kámikal chke? —xecha'.

¹¹ Te k'u ri' xyi' jujun saq ki q'u' chxijujunal, xb'ix chke chi keuxlan chi na kieb' oxib' q'ij k'a kátz'aqat na ri kajilb'alil ri kachalal ri kekámisax na rumal ru patánixik ri Cristo, junam jas ri e are'.

¹² Aretaq ri Alaj Chij xuch'ol chi apan ri uwaq t'iqb'al, xinka'yik, te' xinwilo xub'an jun nimalaj káb'raqan. Ri q'ij k'ut xub'an q'eq ru wäch je' jas jun q'eq atz'iaq, ri ik' xub'an kiäq ru wäch je' ta ne kik'. ¹³ Ri ch'imil cho ri kaj xetzaq loq puwi' ri ulew, jas kub'an ri u che'al higos ketzaq loq ri räx taq u wäch aretaq kásalab'isax rumal jun nimalaj kiäqiaq'. ¹⁴ Ri kaj xsax u wäch jas kub'an jun wuj aretaq kuk'ol rib', konojel k'u taq ri juyub', xuquje' konojel ri ch'aqataq taq ulew ri e k'o pa ri mar xk'extaj taq ri ki k'olib'al'. ¹⁵ Ri nimaq taq taqanelab' cho ruwächulew, xuquje' ri nimaq ki b'anik, ri q'inomab', ri ki nimaqil soldados, ri winaq ri k'o nimalaj keqle'n, ri winaq patáninelab' xuquje' ri winaq ri man e k'o ta pu q'ab' jun patrón, konojel xkik'u' kib' pa taq ri pek, xol taq ri nimaq taq ab'aj ri e k'o pa taq ri juyub'. ¹⁶ Xkib'ij k'u chke taq ri juyub' xuquje' chke ri nimaq taq ab'aj: Chixtzaq loq chqij, chujik'u' chuwäch ri Jun ri t'uylul pa ri je'lalaj t'uylulib'al, xuquje' chuwäch ri nimalaj k'ájisab'al qa wäch ri kápe rumal ri Alaj Chij, —xecha'.

¹⁷ Xopan k'u ri nimalaj q'ij rech kák'ájisax qa wäch. ¿Jachin ta k'u lo kákowinik kuch'ijo? —xecha'.

7

Käkoj ketal chukrusil ri ki palaj ri jun ciento ruk' kawinaq kiejeb' mil winaq aj Israel

¹ Aretaq xb'antaj wa', te' xinwil kiejeb' ángeles ri e tak'atoj pa ri kiejeb' u tza'm ruwächulew, ri ki q'atem ri kiejeb' kiäqiaq' rech man k'o ta chi kiäqiaq' kub'an puwi' ri ulew o puwi' ri mar o pa ki wi' taq ri che'. ² Xuquje' xinwil jun ángel chik ri petinaq chrelb'al q'ij, ruk'am ri t'iqb'al ri yo'm che rumal ri k'aslik Dios. We ángel ri' ko xch'aw apan chke ri kiejeb' ángeles ri yo'm taqanik pa ki q'ab' chub'anik k'áx che ri ulew xuquje' che ri mar. Xub'ij chke: ³ Mib'an na k'áx che ri ulew, mib'an k'áx che ri mar, mib'an k'u k'áx chke taq ri che' k'a kákojtaj na ketal ri patánil taq re ri qa Dios ruk' jun t'iqb'al chukrusil ri ki palaj, —xcha chke.

⁴ Xinta k'ut jampa' ri xkoj ketal: E jun ciento ruk' kawinaq kiejeb' mil ri xecha' chxixol konojel taq ri tinimit re Israel. ⁵ E kab'lajuj mil xkoj ketal chke ri aj Judá, e kab'lajuj mil chke ri aj Rubén, e kab'lajuj mil chke ri aj Gad. ⁶ E kab'lajuj mil chke ri aj Aser, e kab'lajuj mil chke ri aj Neftalí, e kab'lajuj mil chke ri aj Manasés. ⁷ E kab'lajuj mil chke ri aj Simeón, e kab'lajuj mil chke ri aj Levi, e kab'lajuj mil chke ri aj Isacar. ⁸ E kab'lajuj mil chke ri aj Zabulón, e kab'lajuj mil chke ri aj José, e kab'lajuj mil k'ut chke ri aj Benjamín.

Waral káqil wi ri jumalaj winaq ri ki konoj saq taq ki q'u'

⁹ Aretaq xb'antaj wa', xinka'yik, te' xeinwilo k'ialaj winaq ki konoj saq taq ki q'u' e tak'al cho ri je'lalaj t'uylulib'al chuwäch ri Alaj Chij, ruk'am k'u jujun u xaq tut pa ki q'ab'. Sib'alaj e k'ia chi man k'o ta jun kákowin che kajilaxik, winaq ri jalajoj kech'awik, ri jalajoj keka'yik, ri jalajoj taq ki tinimit, konojel ki wäch winaq ri e petinaq cho ronojel ruwächulew. ¹⁰ Konojel ko kech'awik, káki b'ij:

Ruk' ri qa Dios ri t'uylul

pa ri je'lalaj u t'uylulib'al,

xuquje' ruk' ri Alaj Chij

qa riqom wi ri to'b'al qib',

—kecha'. ¹¹ Konojel k'u ri ángeles e tak'atoj ki sutim rij ri je'lalaj t'uylulib'al, ki sutim kij ri k'amal taq ki b'e ri kojonelab' xuquje' ri kiejeb' ri je' kepe ángeles. Xkimej kib' cho ri je'lalaj t'uylulib'al, xkij'ijilaj k'u ri Dios. ¹² Je' xkib'ij wa':

¡Amén! Ri qa Dios taqal che chi

kánimarisax u q'ij, káyi' u q'ij,

käyi' ri maltioxinik che,
nim k'u kil wi.
Ru no'j, ru taqanik puwi' ronojel,
ri nimalaj u chuq'ab',
man k'o tä u k'isik ronojel wa'
amaq'el pa taq ri q'ij ri junab'
ri kepetik. Amén,
—xecha'.

¹³ Te k'u ri' jun chke ri k'amal taq ki b'e ri
kojonelab' xch'awik, xuta' chwe: ¿Jachin taq
wa' we winaq ri' ri ki kojom saq taq ki q'u'?
¿Jawije' kepe wi? —xcha chwe.

¹⁴ Ri in xinb'ij che: Tat, lal etam la, —
xinha che.

Ri are' k'ut xub'ij chwe: Wa' we winaq ri'
e are wa' ri xeok'ow pa ri nimalaj k'äxk'ol,
ki ch'ajom k'u ri ki q'u', ka'nom saqloloj
che pa ru kik'el ri Alaj Chij. ¹⁵ Rumal ri' e
k'o chuwach ri je'lalaj u t'uyulib'al ri Dios,
kepatänin k'u che ri Are' paq'ij chi chaq'ab'
pa ri nimalaj rachoch Dios. Ri Jun ri t'uyul
pa ri je'lalaj t'uyulib'al kāk'o'ji na kuk' che ki
to'ik. ¹⁶ Man käpe tä chi na ri q'ij ri kākiriq
ri numik, o ri chaq'ij chi', man kek'at tä ru-
mal ri q'ij, man kākina' tä chi nimalaj q'aq'.
¹⁷ Je ri', rumal chi kechajix na rumal ri Alaj
Chij ri k'o pu nik'iajal ri je'lalaj t'uyulib'al,
kuk'am in k'u na ki b'e chi' u k'iyib'al taq ja'
ri kel wi loq joron ri kuya k'aslemal jas ri
kub'an jun ajyuq' chke ri u chij. Ri Dios
kusu' k'u na ronojel ri u wa'l ki wäch.

8

*Waral kääqil wi ri käch'ol apan ri uwuq
t'iqb'al, xuquje' kääqil ri porob'al incienso re
q'än puag*

¹ Aretaq ri Alaj Chij xuch'ol chi apan ri
uwuq t'iqb'al chrij ri wuj ri b'otom, kraj
nik'iaj hora ri' man k'o tä jas xtataj pa ri
kaj. ² Te ri' xeinwil ri wuqub' ángeles ri e
tak'al chuwach ri Dios, xyi' k'u wuqub' tun
chke. ³ Xpe k'u jun ángel chik ri u tzayem
jun porob'al incienso re q'än puag, xtak'i k'u
chuwach ri ta'b'al toq'ob'. Xyi' k'ä' incienso
che rech kujach wa' cho ri Dios junam kuk'
taq ri oración ri kāk'a'n ri winaq ri e rech ri
Dios puwi' ri ta'b'al toq'ob' re q'än puag ri
k'o chuwach ri je'lalaj t'uyulib'al. ⁴ Xpaqi k'u
ru sib'el ri incienso chuwach ri Dios ri xel b'i
pu q'ab' ri ángel junam kuk' taq ri oración
ri kāk'a'n ri winaq ri e rech ri Dios. ⁵ Te k'u
ri' xpe ri ángel, xuk'am ri porob'al incienso,
xunojisaj k'u wa' che racha q'aq' ri k'o
puwi' ri ta'b'al toq'ob', xuk'iaq k'ut puwi'
ruwachulew. Xub'an k'u kiäqulja, nimalaj
wojojem xtatajik, xub'an kapp'a, xuquje'
xub'an jun nimalaj káb'rajan.

Keoq'isax ri wuqub' tun

* **8:11** Ri tzij "Ajenjo" kel kub'ij "k'a".

⁶ Te k'u ri' ri wuqub' ángeles ri kuk'am
ri wuqub' tun xka'n u b'anik kib' che
roq'isaxik ri ki tun.

⁷ Aretaq ri nab'e ángel xroq'isaj ru tun,
k'o saqb'äch xuquje' q'aq' yujtal ruk' kik'
ri xek'iaq puwi' ruwachulew. Ri urox u
ch'aqapil ruwachulew xk'atik junam ruk' ri
urox mulaj chke taq ri che'. Xuquje' ri urox
mulaj che ri räx q'ayes ri e k'o chuwach
xek'atik.

⁸ Aretaq ri ukab' ángel xroq'isaj ru tun, jun
jasach ri je' u b'anik jun juyub' ri känikowik
xk'iaq b'i pa ri mar. Ri urox u tz'aqatil ri
mar k'ut xub'an kik'. ⁹ Ri urox mulaj chke
ri chikop ri e k'o pa ri mar xekämik, ri urox
mulaj k'ut chke ri barcos xeyojyob'ik.

¹⁰ Aretaq ri urox ángel xroq'isaj ru tun, jun
nimalaj ch'imil ri känikowik jas jun nimalaj
chäj xqaj loq chikaj puwi' ri urox mulaj chke
taq ri nima', xuquje' ru k'iyib'al taq ja'. ¹¹ Ri
ch'imil Ajenjo u b'i'.* Ri urox mulaj chke
taq ri ja' xka'n k'a. E k'ia k'u chke ri winaq
xekäm rumal ri joron rumal chi sib'alaj k'a
chik.

¹² Aretaq ri ukaj ángel xroq'isaj ru tun,
xub'an k'äx ri urox u tz'aqatil ri q'ij. Xuquje'
ri ik' xub'an k'äx ri urox u tz'aqatil. Ri urox u
tz'aqatil ri ch'imil xuquje' xub'an k'äx. Je ri'
chi ri urox u tz'aqatil chke wa' man xejuluw
tä chik. Man xka'y tä ri q'ij, ri ik', ri ch'imil
che ri urox u tz'aqatil ri jun q'ij ruk' ri jun
aq'ab'.

¹³ Te' xinwil jun ángel kárapap pu nik'iajal
ri kaj, xuquje' xinto chi ko käch'awik, kub'ij:
¡Ay, ay, ay! ¡Toq'ob' ki wäch ri winaq ri e k'o
cho ruwachulew rumal ri kākiriq na aretaq ri
oxib' ángeles chik kāk'oq'isaj ri ki tun! —xcha'.

9

¹ Ri uro' ángel xroq'isaj ru tun, xinwil k'u
jun ch'imil ri tzaqinaq loq chikaj, qajinaq
k'u puwi' ruwachulew. Xyi' k'u ri lawe che
ri ch'imil ri', ri lawe ri jaqb'al re ri u chi'
ri nimalaj jul ri sib'alaj naj u pam. ² Xpe ri
ch'imil, xujaq ri u chi' ri nimalaj jul, xel k'u
loq sib' chupam je' jas ru sib'el jun nimalaj
horno. Ri sib' ri', ri xel loq pa ri nimalaj jul,
xub'an q'equm che ronojel. Man q'alaj tä
chi ri q'ij. ³ Chupam ri sib' xeb'el loq sak'
ri xejab'un cho ronojel ruwachulew. Ri sak'
ri' xyi' ki kuinon junam jas ri ki kuinon ri
ixterix ri e k'o cho ruwachulew. ⁴ Xb'ix k'u
chke chi māk'a'n k'äx chke ri q'ayes ri k'o
cho ruwachulew, chi māk'a'n k'äx che jun räx
tiko'n, chi māk'a'n k'äx che taq ri che', xane
xaq xuwi kāk'a'n k'äx chke taq ri winaq ri
man kojom tä t'iqb'al chke rumal ri Dios che
ketal chukrusil ri ki palaj. ⁵ Xb'ix k'u chke
chi man kekikämisaj tä ri winaq, xane xaq
xuwi kāk'iya q'axom chke job' ik'. Ri q'axom

ri kăkiya are junam ruk' ri q'axom ri kuna' jun winaq aretaq kătia' rumal jun interix. ⁶ Pa taq ri q'ij ri' ri winaq qas kăkitzujukun na ri kămikal, man kăkiriq tă k'ut. Pune sib'alaj kăkaj kekămik, ri kămikal xa kel chkiwăch.

⁷ Ri sak' je' kepe kiej ri b'enam ke pa ch'oj. K'o jun jasach pa ki jolom chkiujunal ri je' jas jun corona re q'ăn puaq. Ri ki palaj k'ut je' kăpe u palaj winaq. ⁸ Ri ki wi' je' kăpe u wi' ixoq. Ri ki ware k'ut je' kăpe u ware koj. ⁹ Ch'uqutal ri u wo ki k'ux ruk' to'b'al ib' ri je' ta ne ch'ich'. Ru jininem ri ki xik' je' jas ri ki jininem k'ia carruaje ri e chararem kumal kiej b'enam ke pa ch'oj. ¹⁰ Ri ki je' junam ruk' ri ki je' ri interix, ri k'o u wi' t'ist'ik. Yo'm ki chuq'ab' chupam ri ki je' chub'anik k'ăx chke ri winaq job' ik'. ¹¹ Ri sak' ri' k'o k'u jun ri kătaqan pa ki wi', are ri ângel ri kătaqan pa ri nimalaj jul. Ri u b'i' pa hebreo are Abadôn, pa griego are Apoliôn. We b'i'aj ri' kel kub'ij "Sachal Wăchaj".

¹² Xok'ow ri nab'e nimalaj k'ăxk'ol. Kraj chi k'u na kieb' chik.

¹³ Ri uwaq ângel xroq'isaj ru tun, xinta k'u jun ri xch'aw loq chkixol ri kiejeb' ru k'a' ri ta'b'al toq'ob' re q'ăn puaq ri k'o chuwăch ri Dios. ¹⁴ Xub'ij k'u che ri uwaq ângel ri ruk'am ri tun: Cheakira ri kiejeb' ângeles ri e yututal chuchi' ri nimalaj nima' Eufrates, —xcha'.

¹⁵ Xekirtaj k'u ri kiejeb' ângeles, ri xaq keye'm jampa' kuriq ri hora, ri q'ij, ri ik', ri junab' rech kekikămisaj ri urox mulaj chke ri winaq cho ruwăchulew. ¹⁶ Xinta ri kajilab'al ri ki soldados ri e kiejeninaq chkiij kiej, e are k'u kieb' ciento millones.

¹⁷ Are je' kilik wa' ri kiej xeinwilo ri xuk'ut ri Dios chnuwăch. Ri e kiejeninaq chkiij ki kojom to'b'al uwo ki k'ux re ch'ich' ri kiăq, răx, q'ăn kăka'yik. Ri ki jolom ri kiej are je' jas ri ki jolom ri koj. Kel k'u loq q'aq', sib', xuquje' azufre pa ki chi'. ¹⁸ Xekămisax ri urox mulaj chke ri winaq cho ruwăchulew rumal we oxib' nimaq taq k'ăxk'ol ri'. Are ri q'aq', ri sib', ri azufre ri xel loq pa ki chi' ri kiej. ¹⁹ Je ri' rumal chi ri ki kuinim ri kiej ri' pa ki chi' k'o wi xuquje' chupam ri ki je'. Ri ki je' k'ut, je' kepe kumătz ri k'o ki jolom, ruk' k'u wa' kăka'n k'ăx chke ri winaq.

²⁰ Are k'u ri nik'iaj winaq chik ri man xekăm tă rumal ri nimaq taq k'ăxk'ol ri', man xkiya tă kan u b'anik ri etzelal ri kăka'no. Man xkiya tă k'u kan ki q'ijilaxik ri itzel taq espîritus, o ri tiox re q'ăn puaq, re saq puaq, re ri ch'ich' bronze, re ab'aj, o re che' ri man keka'y taj, ri man kăkita taj, ri man kekowin taj keb'inik. ²¹ Man xkiya tă k'u kan u b'anik ri kămisaniq, ri itzinik, xuquje' ri elaq'. Man xkiya tă k'u kan u b'anik ke jas ri kăka'n ri tz'i' ri xaq kăkiriq kib', man k'o tă ki pixab'.

10

Waral kăqil wi ri ângel ri ruk'am jun alaj b'otom wuj

¹ Te k'u ri' xinwil jun ângel chik ri sib'alaj k'o u chuq'ab' ri xqaj loq chikaj, ri je' ta ne kojom jun sutz' che ratz'iaq, k'o k'u jun răxkiăq'ab' puwi' ru jolom. Ru palaj kăjuluwik junam ruk' ri q'ij, ri raqan k'ut kenikowik je' jas ri q'aq'. ² Ruk'am pu q'ab' jun alaj b'otom wuj ri soltajinaq. Xuya ri raqan re u wikiăq'ab' puwi' ri mar, are k'u ri u mox xuya puwi' ri ulew. ³ Te ri' ri ângel ko xch'awik jas ri kub'an jun koj aretaq kuraq u chi'. Aretaq ko xch'aw ri ângel xetataj wuqub' kiăqulja ri sib'alaj xetililik. ⁴ Te k'u ri' aretaq xtataj ri wuqub' kiăqulja, xa jub'iq' man xintz'ib'anik. Xinta k'u jun ri xch'aw loq chikaj, xub'ij chwe: Matz'ib'aj ri xkib'ij ri wuqub' kiăqulja, man ya'tal tă k'u retamaxik wa', —xcha chwe.

⁵ Te ri' ri ângel ri xinwilo ri tak'al puwi' ri mar xuquje' puwi' ri ulew xuyak ru wikiăq'ab' chikaj. ⁶ Te k'u ri' xub'an jurar pa ru b'i' ri jun ri man kăkăm taj, ri xb'anow ri kaj, ri ulew, ri mar, xuquje' ronojel ri k'o chkipam, xub'ij k'ut: Ya xopan ri k'isb'al q'ij, man kăb'eytaj tă k'u na, —kăcha'. ⁷ Aretaq kopan ri q'ij ri kăroq'isaj ru tun ri uwuq ângel, b'antajinaq chi ri' rumal ri Dios jas ru chomam u b'anik ri man etamtal taj, je' jas ri xub'ij chke ri patănil taq re, ri q'alajisal taq re ru Loq' Pixab', —xcha ri'.

⁸ Ri jun ri xch'aw loq chikaj xch'aw chi na jumul wuk', xub'ij chwe: Jat, jak'ama ri alaj b'otom wuj ri soltajinaq, ri k'o pu q'ab' ri ângel ri tak'al puwi' ri mar xuquje' puwi' ri ulew, —xcha chwe.

⁹ Xine' ruk' ri ângel, xinta k'u che chi kuya ri alaj b'otom wuj chwe. Ri are' k'ut xub'ij chwe: Chak'ama, chatija k'ut. Sib'alaj ki' kub'an na pa ra chi' je' jas ri u wa'l che'. Aretaq k'ut kăqaj b'i chapam sib'alaj k'a chik kub'ano, —xcha chwe.

¹⁰ Xink'am k'u ri alaj b'otom wuj pu q'ab' ri ângel, te k'u ri' xintijo. Aretaq xintijo, sib'alaj ki' xub'an pa nu chi' je' jas ri u wa'l che', aretaq k'ut nu b'iq'om chi b'ik sib'alaj k'a xub'an chnupam. ¹¹ Te ri' xb'ix chwe: Rajwaxik kab'ij chi na jumul ri kub'ij ri Dios chkiij ri k'ialaj taq tinimit, chkiij k'ia ki wăch winaq, chkiij k'ia winaq ri jalajoj kech'awik, xuquje' chkiij k'ia nimaq taq taqanelab', —xcha chwe.

11

Waral kăqil wi ri kieb' q'alajisanelab' ri kekămisax na

¹ Te ri' xyi' jun aj chwe ri junam ruk' jun etăb'al, xb'ix k'u chwe: Chatwalijoq, chawetaj k'u ri retab'alil ri nimalaj rachoch Dios, ri ta'b'al toq'ob', xuquje' cheawajilaj janipa'

ri keq'ijilan chila'. ² Mawetaj k'u ri uwoja ri k'o chrij ri nimalaj rachoch Dios, rumal chi yo'm wa' chke ri winaq re nik'iaj tinimit chik. Ri e are' k'ut kākixaq'lej na ri loq'alaj tinimit kawinaq kieb'ik'. ³ Ri in k'ut keintaq na b'i ri kieb' nu q'alajisanelab' ri kākitzijoj na ri nu Tzij. Mil kieb' ciento ruk' oxk'al q'ij kākitzijoj na ri nu Tzij, ki kojom k'u atz'iaq re b'is.

⁴ We kieb' q'alajisanelab' ri' e are' ri kieb' che' re olivos, ri kieb' u tak'alib'al kantela ri e yo'm chuwäch ri Rajaw ruwächulew. ⁵ We k'o jun kraj kub'an k'äx chke, ri e are' kākēsaj loq' q'ag' pa ki chi' ri kusach ki wäch ri ki k'ulel. Je ri' kākāmisax na apachin ri kraj kub'an k'äx chke. ⁶ We q'alajisanelab' ri' k'o taqanik pa ki q'ab' chutz'apixik ri kaj, rech man kākaj tä jäb' aretaq tajin kākitzijoj ru Tzij ri Dios. Xuquje' kekowin chub'anik kik' che taq ri ja', xuquje' chub'anik k'äx che ruwächulew ruk' ronojel u wäch k'äxk'ol janipa' mul ri kākaj. ⁷ Aretaq k'ut keto'taj chutzijoxik ru Tzij ri Dios, ri xib'ib'alalaj awaj ri kel loq pa ri nimalaj jul ri sib'alaj naj u pam käch'ojin na kuk', keuch'ak k'u na, keukāmisaj na. ⁸ Ri ki cuerpo kälili na kan pa taq ri b'e xol taq ri ja rech ri nimalaj tinimit ri xrip wi ri Qajaw Jesús, xkāmisaixik. Kāb'ix Sodoma xuquje' Egipto che taq we tinimit ri' rumal ri quetzalal ri winaq. ⁹ Oxib' q'ij k'ut ruk' nik'iaj kilitaj na ri ki cuerpas kumal winaq ri jalajoj taq ki tinimit, winaq ri jalajoj keka'yik, winaq ri jalajoj kech'awik, konojel k'u ki wäch winaq cho ronojel ruwächulew. Man käyi' tä k'u na chi kemuq ri ki cuerpo. ¹⁰ Ri winaq cho ruwächulew kekikot na rumal ri ki kāmikal. Kāka'n k'u na nimaq'ij, xuquje' kākitaqala na b'i sipanik chb'il taq kib'. Je ri', rumal chi ri winaq xkina' nimalaj k'äx rumal ri ki tzij we kieb' q'alajisanelab' ri' ri e taqom loq rumal ri Dios. ¹¹ Aretaq k'ut ok'owinaq chi ri oxib' q'ij ruk' nik'iaj, ri Dios xeuk'astajisaj chi na, xewalij chi k'u na jumul. Konojel k'u ri winaq ri xeilowik sib'alaj xkixej na kib'. ¹² Te k'u ri' ri kieb' q'alajisanelab' xkita Jun ri ko xch'aw loq chikaj ri xub'ij chke: Chixpaqal loq je wa', —xcha'.

Ri e are' k'ut xepaqi chikaj pa jun sutz'. Xelilitaj k'u kumal ri ki k'ulel. ¹³ Che we chanim ri' xub'an jun nimalaj káb'raqan. Are k'u ri ulajujil ri ja re ri tinimit xewulijik, wuqub' mil winaq k'ut xekām rumal ri nimalaj káb'raqan. Ri winaq ri xek'asi kanoq sib'alaj xkixej kib', xkinimarisaj k'u u q'ij ri Dios ri k'o chila' chikaj.

¹⁴ Xok'ow ri ukab' nimalaj k'äxk'ol, chanim k'ut kápe na ri urox.

Koq'isax ri uwuq tun

¹⁵ Ri uwuq ángel xroq'isaj ru tun, xetataj k'ut chi e k'o ri sib'alaj ko xech'aw loq chikaj ri xkib'ij:

Ronojel taqanik ri k'o pa ki q'ab' ri nimaq taq taqanelab' ajuwächulew k'o chik pu q'ab' ri Qajaw Dios xuquje' pu q'ab' ri u Cristo.*

Ri Are' k'ut kátaqan na amaq'el pa taq ri q'ij ri junab' ri kepetik,

—xecha'. ¹⁶ Ri juwinaq kiejeb' k'amal taq ki b'e ri kojonelab' ri e t'uuyul pa taq ri je'lalaj ki t'uuyulib'al cho ri Dios xkimej kib' chuwäch ri Are', xkix'ijilaj k'ut. ¹⁷ Xkib'ij:

Kujmaltioxin che la, Qajaw Dios, lal ri' ri Dios ri k'o ronojel u wäch chuq'ab' ruk', lal ri' ri k'o la ojer, ri k'o la kāmik, ri xuquje' kápe na la. Je ri', rumal chi kojom la ri nimalaj chuq'ab' la,

k'utum k'u la kāmik chi k'o taqanik pa q'ab' la.

¹⁸ Konojel ki wäch winaq cho ronojel ruwächulew yaktajinaq koyowal.

Xopan k'u ri q'ij ri kāk'ājisaj la ki wäch,

xuquje' xopan ri q'ij ri kāk'at la tzij pa ki wi' ri kāmīnaqib'.

Kāya k'u la ri tojb'al ke ri kepatānin che la,

ri q'alajisaj taq re ri Loq' Pixab' la, xuquje' ri winaq ri ki jachom kib'

pa q'ab' la, xuquje' ri nim kākil wi ri b'i' la, chi nimaq chi ch'utiq.

Xuquje' xopan ri q'ij ri kāsach la ki wäch ri kesachow ki wäch ri winaq re ruwächulew,

—xecha ri'.

¹⁹ Te k'u ri' xjaqtaj ri nimalaj rachoch Dios ri k'o pa ri kaj, xq'alajin k'u loq ri kaxa ri k'o pa ri rachoch Dios ri k'olotal wi ru Trato† ri Are'. Xub'an kaypa, xtataj nimalaj wojojem, xub'an kiäqulja. Xub'an k'u jun nimalaj káb'raqan, xuquje' xqaj nimalaj sagb'äch.

12

Waral kākil wi ri ixoq ruk' ri nimalaj itzel kumāt

¹ Te ri' xilitaj jun nimalaj etal cho ri kaj. K'o jun ixoq ri ch'uqtal rumal ri q'ij je' ta ne ri u kojom che ratz'iaq. K'o ri ik' chuxe' ri raqan, kojom k'u jun corona chujolom ri e k'o kab'lajuj ch'imil chrij. ² Ri ixoq ri', are yawab' winaq chik, kuraq k'u u chi' rumal ri q'axom. Ruk' taq k'äx k'ut tajin kārīl u wäch ri ral. ³ Te ri' xilitaj jun kajmab'al etal chik cho ri kaj. Are jun nimalaj itzel

* 11:15 Ri tzij "Cristo" kel kub'ij chi ri Jesús are ri Mesías, ri To'l Qe, ri qas kátaqan pa qa wi'.
† 11:19 Ri "Trato" ri káb'ix waral, are wa' ri "ojer Trato" ri xub'an ri Dios kuk' ri winaq aj Israel.

kumätz kiäq rij, wuqub' u jolom, lajuj ru k'a' k'olik. K'o k'u jujun corona pa ki wi' ri jujun u jolom. ⁴Ruk' ru je' xeujik' loq ri urox mulaj chke ri ch'imil cho ri kaj, xeuk'iaq k'u cho ri uwächulew. Ri nimalaj itzel kumätz ri' xtak'i chuwich ri ixoq ri tajin käril u wäch ri ral rech kutij ri ral ri ixoq xuwi ta ne kilitaj u wäch. ⁵Xril k'u u wäch jun ral ala ri ixoq, ri kätäqan na pa ki wi' konojel ki wäch winaq cho ruwächulew ruk' jun vara re ch'ich'.^{*} Xesax k'u b'i ri ral ri ixoq, xk'am b'i ruk' ri Dios, rech kät'uyi pa ri je'lalaj u t'uyulib'al. ⁶Are k'u ri ixoq xanimaj b'ik, xe' k'u pa ri juyub' ri kätz'inowik jawije' ri b'anom wi u b'anik jun k'olib'al che rumal ri Dios. Jela' k'ut kätzuq wi na mil kieb' cientos ruk' oxk'al q'ij.

⁷Te k'u ri' xb'an jun nimalaj ch'oj pa ri kaj. Ri arcángel Miguel e rachi'l ri ángeles rech ri are' xech'ojin ruk' ri nimalaj itzel kumätz. Xch'ojin k'u ri nimalaj itzel kumätz e rachi'l ri ángeles rech ri are'. ⁸Man xekowin tä k'ut xech'akan pa ri ch'oj, man xyi' tä k'u chke chi kek'oji chi pa ri kaj. ⁹Xesax k'u loq ri nimalaj itzel kumätz, ri ojer kumätz ri käb'ix Itzel xuquje' Satanás che ru b'i'. Are k'u wa' ri keusub' ri winaq cho ronojel ruwächulew. Ri are' junam kuk' ri ángeles rech ri are' xek'iaq loq cho ruwächulew.

¹⁰Te k'u ri' xinta jun ri ko xch'aw loq chikaj ri xub'ij: Xopan ri q'ij ri káqariq ru tob'anik ri Dios, ketamax k'u na chi ri qa Dios k'o nimalaj u chuq'ab', chi Are' kätäqan na pa qa wi'. Käyi' k'u na taqanik pu q'ab' ri i Cristo. Je ri', rumal chi esam b'i ri jun ri kuyak tzij chkiy ri qachalal. Xuyak k'u tzij chkiy chuwich ri qa Dios chi paq'ij chi chaq'ab'. ¹¹Ri qachalal e ch'akaninaq puwi' rumal ru kik'el ri Alaj Chij, xuquje' rumal ru Loq' Pixab' ri Dios ri xkítzijo. Man xkixej tä k'u kib' chuya'ik ri ki k'aslemal, xane xkijach kib' cho ri kämikal. ¹²Chixkikot b'a' iwonojel ix, ri ix k'o pa taq ri kaj. Toq'ob' k'u i wäch ix, ri ix k'o cho ruwächulew xuquje' ri ix k'o pa ri mar, rumal chi ri Itzel qajinaq b'i iwuk' ruk' nimalaj oyowal, retam k'ut chi xaq kieb' oxib' q'ij chik kákanaj che, —xcha ri jun ri xch'aw loq chikaj.

¹³Aretaq ri nimalaj itzel kumätz xrilo chi xk'iaq loq cho ruwächulew, xuchap roqataxik ri ixoq ri rilom u wäch ri ral ala. ¹⁴Are k'u ri ixoq xeyi' che kieb' nimaq taq u xik' je' jas ri u xik' jun nimalaj xik rech kákowinik kárapap b'ik, ke' pa ri u k'olib'al pa taq juyub' ri kätz'inowik, naj che ri kumätz. Chila' k'ut kätzuq wi na oxib' junab' ruk' ri nik'iaj. ¹⁵Ri nimalaj itzel kumätz xresaj loq joron pu chi' chub'anik jun nima' rech kák'am b'i ri ixoq rumal ri ja'. ¹⁶Ri ulew k'ut xuto' ri ixoq. Xujaq rib' ri ulew, xub'iq'

k'u b'i ri joron ri xresaj loq ri nimalaj itzel kumätz pu chi'. ¹⁷⁻¹⁸Rumal ri' ri nimalaj itzel kumätz xyaktaj royowal chrij ri ixoq. Xe' k'ut, xch'ojin kuk' ri nik'iaj ralk'ual ri ral ri ixoq, ri keniman chke ru taqanik ri Dios, ri ki jikib'am kanima' chrij ri Qas Tzij ri xuq'alajisaj ri Jesucristo.

13

Waral káqil wi ri kieb' xib'ib'alalaj taq awaj

¹Xintak'i in chuchi' ri mar, xinwil k'ut xel loq pa ri mar jun xib'ib'alalaj awaj ri k'o wuqub' u jolom, lajuj k'u ru k'a'. E k'o jujun corona pa ki wi' ri jujun ru k'a'. Chke taq ru jolom e k'o jujun b'i'aj ri sib'alaj áwas ki b'ixik wa' chuwich ri Dios. ²Ri xib'ib'alalaj awaj ri' ri xinwilo je' kápe jun b'alam, ri raqan k'ut e junam ruk' ri raqan jun oso, ri u chi' junam ruk' ri u chi' jun koj. Ri nimalaj itzel kumätz xuya ru chuq'ab' che xuquje' ri je'lalaj u t'uyulib'al. Xuquje' xuya ri nimalaj u taqanik pu q'ab'. ³Jun chke ru jolom ri xib'ib'alalaj awaj ri' k'o jun nimalaj soktajinaq che je' ta ne ri xa jub'iq' man kákämik. Xkunataj k'u ru soktajin ri kuya kämikal, je ri' chi konojel ri winaq cho ruwächulew sib'alaj xkikajmaj, xkiterenej k'u ri xib'ib'alalaj awaj. ⁴Ri winaq xkij'ijilaj ri nimalaj itzel kumätz rumal chi u yo'm junam ruk' pu q'ab' ri xib'ib'alalaj awaj, xuquje' xkij'ijilaj ri xib'ib'alalaj awaj, xkib'ij k'ut: ¿Jachin ta lo jun ri junam ruk' we xib'ib'alalaj awaj ri'? ¿Jachin ta k'u ri kákowinik käch'ojin ruk'? ¡Man k'o taj! —xecha'.

⁵Xuquje' xyi' che ri xib'ib'alalaj awaj chi kub'ij taq tzij re nimal, ri áwas ki b'ixik chrij ri Dios. Xuquje' xyi' che chi kätäqan kawinaq kieb' ik'. ⁶Je' k'u xub'ano. Xub'ij k'äxalaj taq tzij chrij ri Dios, xuquje' xub'ij ri áwas u b'ixik chrij ru b'i', chrij ri loq'alaj rachoch Dios, xuquje' chkiy ri e k'o chila' chikaj. ⁷Xuquje' xyi' che chi käch'ojin kuk' ri winaq ri e rech ri Dios k'a' keuch'ak na. Xuquje' xyi' taqanik pu q'ab' chi kätäqan pa ki wi' konojel ki wäch winaq cho ruwächulew, winaq ri jalajoj taq ki tinimit, winaq ri jalajoj kech'awik, xuquje' winaq ri jalajoj keka'yik. ⁸We xib'ib'alalaj awaj ri' xq'ijilax kumal konojel ri winaq ri e k'o cho ruwächulew, konojel ri winaq ri tzaretaq xb'an ri ká-julew man tz'ib'tal tä ri ki b'i' pa ri wuj re k'aslemal ri k'o ruk' ri Alaj Chij ri xkämisaxik.

⁹We k'o jun ru jikib'am ranima' chutatab'exik ri nu tzij, chutatab'ej b'a' ri kinb'ij. ¹⁰Ri winaq ri kekichap b'i nik'iaj winaq chik, ri e are' k'ut kechap na b'ik xuquje'. Ri winaq ri kákikámisaj nik'iaj winaq chik ruk' machete, ri e are' k'ut

* 12:5 Kukoj na ru vara je' jas ri kub'an jun ajyuq' kuk' taq ru chij.

kekämisax na ruk' machete xuquje'. Rumal ri' ri winaq ri e rech ri Dios rajwaxik käkichajij paciencia xuquje' rajwaxik chi qas kekojon che ri Dios.

¹¹ Te ri' xinwil jun xib'ib'alalaj awaj chik ri xel loq pa ri ulew. Ri jun ri' k'o kieb' ru k'a' ri je' käpe ru k'a' chij. Are k'u ri käch'awik je' käch'aw jun nimalaj itzel kumätz. ¹² Ri taqanik ri k'o pu q'ab' ri xib'ib'alalaj awaj ri' are je' jas ri k'o ruk' ri nab'e awaj. Chuwäch k'u ri nab'e xib'ib'alalaj awaj xub'ano chi ri uwächulew xuquje' konojel ri winaq ri e k'o cho ruwächulew käkij'ijilaj ri nab'e xib'ib'alalaj awaj ri xkunataj che ru soktajik ri xa jub'iq' man xkam tä rumal. ¹³ Xuquje' xub'an nimaq taq etal ri kajmab'al, je' ri' chi xkowinik xuqasaj loq q'aq' chikaj cho ruwächulew chkiwäch ri winaq. ¹⁴ Rumal k'u ri kajmab'al taq etal ri xyi' che chi kub'an chuwach ri nab'e xib'ib'alalaj awaj, xeusub' ri winaq ri e k'o cho ruwächulew. Xeutaq k'u chub'anik jun u wächb'al ri nab'e xib'ib'alalaj awaj ri pune xsok che machete, xk'asi k'ut. ¹⁵ Xyi' che ri ukab' xib'ib'alalaj awaj chi kuya u k'aslemaal ru wächb'al ri nab'e xib'ib'alalaj awaj, rech käkowinik käch'awik, xuquje' keukämisaj jachin taq ri man keq'ijilan tä che. ¹⁶ Man xaq xuwi tä wa', xane xuquje' xub'ano chi konojel ri winaq kok ketal che ri ki q'ab' re ru wikiäq'ab' o chukrusil ri ki palaj chi ak'alab', chi ri'jab', chi q'inomab', chi meb'a'ib', xuquje' ri winaq ri e k'o pu q'ab' jun patrón o winaq ri man k'o tä ki patrón. ¹⁷ Man k'o tä k'u jun winaq kuya' käloq'omik o käk'ayinik we man kojom retal o man kojom tä ru b'i' ri xib'ib'alalaj awaj chrij o ri rajilb'alil ru b'i'. ¹⁸ Waral q'alaj wi chi rajwaxik ri etamanik. Jachin ri k'o u no'j, chuch'ob'o ri rajilb'alil ri xib'ib'alalaj awaj. Are rajilb'alil jun winaq. Ri rajilb'alil are waqib' ciento ruk' oxk'al waqib'.

14

Waral kätzijox wi ri ki b'ix ri jun ciento ruk' kawinaq kiejeb' mil winaq

¹ Te ri' xinka'yik, xinwil ri Alaj Chij chakal puwi' ri juyub' Sión. E rachi'l jun ciento ruk' kawinaq kiejeb' mil winaq ri tz'ib'tal ru b'i' ri Alaj Chij chukrusil ri ki palaj, xuquje' ru b'i' ru Tat ri Alaj Chij. ² Xinta k'ut k'o jun wojojem ri xpe chikaj ri junam ruk' ru chojojem k'ia nima', je' ta k'u ne ru tililem jun nimalaj kiäqulja. Ri wojojem ri' junam ruk' ri roq'eb'al k'ia arpas ri tajin käkij'ojomaj ri ajq'ojomab'. ³ Tajin k'u käkib'ixoj jun k'ak' b'ix chuwach ri je'lalaj t'uyulib'al xuquje' chkiwäch ri kiejeb' ri je' kepe ángeles, xuquje' chkiwäch ri k'amal taq ki b'e ri kojonelab'. Man k'o tä k'u jun käkowinik käreتامaj ri b'ix ri', xane xaq xuwi

ri jun ciento ruk' kawinaq kiejeb' mil winaq chkixol ri winaq ajuwächulew ri xkiriq ru tob'anik ri Dios. ⁴ E are taq wa' ri man xka'n tä ri nimalaj mak ri äwas u b'anik kuk' taq ixoqib', ch'ajch'oj ri ki k'aslemaal, ki terenem k'u ri Alaj Chij apawije' chi' ri ke' wi. Xkiriq ru tob'anik ri Dios chkixol ri winaq rech kek'oji che nab'e taq sipanik ri käyi' cho ri Dios je' jas jun sipanik re kosecha, xuquje' cho ri Alaj Chij. ⁵ Man käriqtaj tä jun b'anal tzij chkixol, xane ch'ajch'oj ri kanima' cho ri je'lalaj u t'uyulib'al ri Dios.

Waral kätqariq wi ri ki tzij ri oxib' ángeles

⁶ Te k'u ri' xinwil jun ángel chik ri tajin kärapap pu nik'iajal ri kaj, ruk'am ri Utzajal Tzij re ri Evangelio ri man k'o tä u k'isik rech kutzijoj wa' chke ri winaq ri e k'o cho ruwächulew, konojel ki wäch winaq, winaq ri jalajoj keka'yik, ri jalajoj kech'awik, xuquje' ri jalajoj taq ki tinimit. ⁷ Ko xch'awik, xub'ij: Chixej iwib' cho ri Dios, nim chiwila wi, chiya k'u u q'ij, rumal chi xopan ri q'ij aretaq ri Are' kuq'at tzij pa ki wi' ri winaq. Chiq'ijilaj ri xb'anow ri kaj, ri ulew, ri mar, xuquje' ru k'iyib'al taq ja'.

⁸ Te k'u ri' xteri chi loq jun ángel chik ri xub'ij: xwulijik, ya xwulij ri nimalaj tinimit Babilonia! Je' ri', rumal chi u q'ab'arisam konojel ki wäch winaq cho ruwächulew ruk' ru vino ri sib'alaj k'o u chuq'ab' re ri mak ri sib'alaj äwas u b'anik ri sachinaq u k'ux rumal, —xcha ri ángel.

⁹ Te k'u ri' xteri chi loq jun urox ángel chik ri ko xch'awik, xub'ij: We k'o jun kuq'ijilaj ri xib'ib'alalaj awaj xuquje' ru wächb'al, kuya k'u rib' chi kok ri retal ri xib'ib'alalaj awaj chukrusil u palaj o che ru q'ab', ¹⁰ ri winaq ri' kutij na re ri vino rech ri nimalaj k'äjisab'al wächaj ri kuya na ri Dios, ri man k'o tä jas yujtal ruk', xane sib'alaj k'o u chuq'ab', ri q'ijom pa ri vaso rech ri nimalaj royowal. Káb'an na k'äx che ruk' q'aq', xuquje' ruk' azufre chkiwäch ri ángeles rech ri Dios xuquje' chuwach ri Alaj Chij. ¹¹ Ru sib'el ri k'äxk'ol ri kuriqo käb'uquw na pa taq ri q'ij ri junab' ri kepetik. Man k'o tä k'u uxlanem paq'ij o chaq'ab' chke ri winaq ri keq'ijilan ri xib'ib'alalaj awaj, xuquje' ru wächb'al, o ri käkija kib' chi kok ri retal ru b'i' chke. ¹² Rumal ri' ri winaq ri e rech ri Dios, ri kekinimaj taq ru taqanik, xuquje' jikom ri kanima' chrij ri Jesús, rajwaxik käkichajij paciencia.

¹³ Te k'u ri' xinta jun ri xch'aw loq chikaj ri xub'ij chwe: Chatz'ib'aj we tzij ri: "Kämik kächaptaj b'ik, utz ke ri kekämik, ri xekojon b'i' che ri Qajaw Jesús." —xcha'. Je', je' ri', —kächa ri Loq'alaj Espíritu. Rumal chi keuxlan na che ri ki chak. Ronojel k'u ri utzil ri ka'nom man käsach tä ri', xane kät'alajin na wa' kuk' chila'.

Waral kăqil wi ri q'ij ri kămulix ri kosecha cho ruwăchulew

¹⁴ Te k'u ri' xinka'yik, xinwil jun sutz' ri sib'alaj saq. T'uyul Jun puwi' ri sutz' ri junam ruk' ru k'ojol jun winaq. Kojom k'u jun u corona re q'ân puag, ruk'am jun ixjos pu q'ab' ri sib'alaj k'o u pu chi'. ¹⁵ Xel k'u loq jun ângel chik pa ri nimalaj rachoch Dios ri xuraq u chi' chuch'ab'exik ri Jun ri t'uyul puwi' ri sutz', xub'ij k'u che: Kojo la ri ixjos la, mulij k'u la ri kosecha, rumal chi ya xopan ri q'ij. Ronojel ki wăch ri tiko'n cho ruwăchulew e are' utz chik, —xcha che.

¹⁶ Ri Jun k'ut ri t'uyul puwi' ri sutz' xrok'owisaj ri rixjos puwi' ruwăchulew, xumulij ri kosecha ri k'o cho ruwăchulew.

¹⁷ Te k'u ri' xel chi loq jun ângel chik pa ri nimalaj rachoch Dios ri k'o pa ri kaj. Ri are' xuquje' ruk'am jun ixjos ri sib'alaj k'o u pu chi'. ¹⁸ Xuquje' xel chi loq jun ângel chik ruk' ri ta'b'al toq'ob' ri k'o taqanik pu q'ab' puwi' ri q'aq'. Ko xuraq u chi' chuch'ab'exik ri ângel ri ruk'am ri ixjos ri sib'alaj k'o u pu chi', xub'ij che: Chakojo ri awixjos ri sib'alaj k'o u pu chi'. Cheaq'ata ri jutaq tzayaj uva che ri ki che'al, ri e tikitoj cho ruwăchulew, rumal chi e chaq' chik, —xcha che.

¹⁹ Ri ângel k'ut xrok'owisaj ri rixjos puwi' ruwăchulew, xeumol k'u ri uvas ri e k'o cho ruwăchulew, te k'u ri' xeuk'iâq pa jun nimalaj k'olib'al jawije' ri kepitz' wi. Are wa' kel kub'ij ri nimalaj k'âjisab'al wăchaj ri kuya ri Dios. ²⁰ Ri uvas chrij ri tinimit xepitz' wi. Pa ri k'olib'al ri xepitz' wi xel loq nimalaj kik' ri xopan aq'an pa taq ri jik'b'al ri ki chi' ri kiej, xuqajb'ej k'u oxib' ciento kilômetros.

15

Waral kăqil wi ri wuqub' ângeles ri kuk'am ri wuqub' k'isb'al taq k'ăxk'ol

¹ Xinwil chi jun nimalaj etal chik cho ri kaj ri sib'alaj kajmab'al u b'anik. Xeinwil wuqub' ângeles ri kuk'am ri wuqub' k'isb'al taq k'ăxk'ol. Ruk' k'u wa' kăk'is u tza'm ri nimalaj royowal ri Dios.

² Xuquje' k'o ri xinwilo ri je' u b'anik jun mar re vidrio ri kăkowin kăka'y jun chupam ri ujital ruk' q'aq'. Chuchi' k'u ri mar ri' re vidrio e tak'atoj wi ri e ch'akaninaq puwi' ri xib'ib'alalaj awaj, puwi' ru wăchb'al, xuquje' puwi' ri jun ri xyl' jun ajilab'al che ru b'i'. Kuk'am k'u jujun ki q'ojom arpas ki b'i' ri yo'm chke rumal ri Dios. ³ Kăkib'ixoj k'u ru b'ix ri qa mam Moisés ri patănil re ri Dios, ru b'ix ri Alaj Chij ri kub'ij:

Sib'alaj nim, xuquje' kajmab'al
ronojel ri b'anom la,
Qajaw Dios, ri k'o ronojel
u wăch chuq'ab' uk' la.
E jikom xuquje' e gas tzij
ru b'eyal ri chomanik la,

lal ri' Nimalaj Taqanel pa ki wi'

konojel ki wăch winaq cho ruwăchulew.

⁴ ¿Jachin ta ri mat kuxej rib' chu wăch la, nimalaj Qajaw?

¿Jachin ta ri mat kunimarisaj q'ij la?

Xuwi k'u ri lal, lal loq'alaj qa Dios.

Konojel ki wăch winaq cho ruwăchulew kepe na che q'ijilaxik la.

Je ri', rumal chi kilom chi jikom anima' la chub'anik ronojel, —kăcha ri b'ix.

⁵ Te k'u ri' xinka'yik, xinwil k'ut xjaqjob' ru chi' ri Loq'alaj Rachoch Dios ri k'o pa ri kaj, ri Loq'alaj Ja ri k'olotal wi ri tz'alam taq ab'aj re ru Pixab' ri Dios. ⁶ Chupam k'u ri Loq'alaj Rachoch Dios che'el wi loq ri wuqub' ângeles ri kuk'am ri wuqub' k'ăxk'ol. Ki kojom ch'ajch'oj atz'iaq re lino ri kăjuluwik, ximital jujun pas re q'ân puag cho ki k'ux. ⁷ Te k'u ri' jun chke ri kiejeb' ri je' kepe ângeles xuya wuqub' laq re q'ân puag chke ri wuqub' ângeles chkijujunal. E nojinaq k'u ri laq che ri nimalaj k'âjisab'al wăchaj ri kuya ri qa Dios ri man kăkăm taj ri k'asal pa taq ri q'ij ri junab' ri kepetik. ⁸ Xnoj k'u ri Loq'alaj Rachoch Dios che sib' rumal ri nimalaj u q'ij ri Dios xuquje' rumal ri nimalaj u chuq'ab'. Man k'o tă k'u jun ri kuya' kok b'i chupam k'ă kăk'is na ri wuqub' k'ăxk'ol ri kuk'am ri wuqub' ângeles.

16

Waral kăqil wi ri kăb'anik aretaq kăjamix ri k'o chupam ri wuqub' laq

¹ Te k'u ri' xinta jun ri ko xch'aw loq pa ri Loq'alaj Rachoch Dios, ri xub'ij chke ri wuqub' ângeles: jix b'a'! Jijamij puwi' ruwăchulew ri nimalaj k'âjisab'al wăchaj ri kuya ri Dios ri k'o pa taq ri wuqub' laq, —xcha'.

² Xe' ri nab'e ângel, xujamij puwi' ruwăchulew ri k'o pa ru laq. Konojel k'u ri winaq ri k'o ri retal ri xib'ib'alalaj awaj chke, ri xuquje' kăkiq'ijilaj ru wăchb'al, xel loq jun itzel ch'a'k chkiq ri sib'alaj kăq'aq'anik.

³ Ri ukab' ângel xujamij puwi' ri mar ri k'o pa ru laq. Xub'an k'u kik' ri joron re ri mar, je' ta ne ru kik'el jun kăminaq. Konojel k'u ri e k'aslik ri e k'o pa ri mar xekămik.

⁴ Ri urox ângel xujamij ri k'o pa ru laq puwi' taq ri nima', xuquje' puwi' ru k'iyib'al taq ja', xub'an k'u kik' taq ri ja'. ⁵ Te k'u ri' xinto xub'ij ri ângel rech taq ri ja': Ri lal jikom anima' la rumal chi je wa' b'anom la chuq'atik tzij, Qajaw, loq'alaj qa Dios, lal ri' ri k'o la kămik, xuquje' xk'oji la ojer. ⁶ Je ri', rumal chi we winaq ri' ki kămisam ri

winaq ri ki jachom kib' pa q'ab' la, xuquje' ki kāmisa ri q'alajisal taq re ri Loq' Pixab' la. Kāmik k'ut yo'm la kik' chke pa tijik rumal chi je wa' ri taqal chke, —xcha'.

⁷ Xuquje' xinta jun ri xch'aw loq ruk' ri ta'b'al toq'ob' ri toq'ij: Je', Qajaw, qa Dios ri k'o ronojel u wäch chuq'ab' uk' la, qas tzij xuquje' qas jikom b'anom la chuq'atik tzij pa ki wi', —xcha'.

⁸ Ri ukaj ángel xujamij ri k'o pa ru laq puwi' ri q'ij, xyi' k'u u chuq'ab' ri q'ij che ki poroxik ri winaq ruk' ru q'aq'al. ⁹ Konojel k'ut sib'alaj xek'atik. Pune ta je ri', man xkik'ex tä ri kanima', ri ki chomanik, man xkiya tä k'u u q'ij ri Dios, xane xa xkib'ij tzij ri äwas u b'ixik chrij ri Dios ri k'o u taqanik pa ki wi' taq we k'äx'ol ri'.

¹⁰ Ri uro' ángel xujamij ri k'o pa ru laq puwi' ri je'lalaj u t'uyulib'al ri xib'ib'alalaj awaj, xq'equmar k'u ronojel ri tinimit ri kátaqan wi. Ri winaq k'ut xkitia' ri kaq' rumal ri q'axom. ¹¹ Pune je ri' man xkiya tä kan u b'anik ri etzelal ri tajin káka'no, xane xa xkib'ij tzij ri äwas u b'ixik chrij ri qa Dios ri k'o chila' chikaj rumal ri ki q'axowem xuquje' rumal ri ch'a'k ri k'o chikij.

¹² Ri uwaq ángel xujamij ri k'o pa ru laq puwi' ri nimalaj nima' Eufrates. Xtzaj k'u ri joron re ri nima' rech kuya' káb'an jun b'e chke ri nimaq taq taqanelab' ri kepe pa ri relb'al q'ij.

¹³ Te k'u ri' xinwilo chi pu chi' ri nimalaj itzel kumätz, pu chi' ri xib'ib'alalaj awaj, xuquje' pu chi' ri jun ri kub'an che rib' chi q'alajisal re ru Loq' Pixab' ri Dios, xeb'el loq oxib' itzel taq espíritus ri je' kepe ixtutz'. ¹⁴ E are itzel taq espíritus wa' ri káka'n kajmab'al taq etal, keb'el k'u b'i che ki mulixik konojel taq ri nimaq taq taqanelab' re ruwächulew che ri nimalaj ch'oj re ri nimalaj u q'ij ri qa Dios ri k'o ronojel u wäch chuq'ab' ruk'. ¹⁵ “iChitampe'! Ri in kinpe na je' jas ru petik jun elaq'om, man kina' tä k'ut. Utz re ri man káwar taj, ri kok il che ri ratz'iaq, rech man käch'ani tä kanoq, kel k'u u k'ixb'al chkiwäch ri winaq.” —kácha ri Jesús. ¹⁶ Ri itzel taq espíritus xekimulij k'u ri nimaq taq taqanelab' pa ri lianik ri u b'i' Armagedón pa ri ch'ab'al hebreo.

¹⁷ Ri uwuq ángel xujamij ri k'o pa ru laq pa ri kiäqiq', k'o k'u Jun ri ko xch'aw loq pa ri Loq'alaj Rachoch Dios ri k'o pa ri kaj, qas ruk' ri je'lalaj t'uyulib'al xch'aw wi loq, xub'ij: Ya xb'antajik, —xcha'.

¹⁸ Te k'u ri' xub'an taq kaypa', wojojem, xuquje' kiäqulja. Ruwächulew xslab'isax rumal jun nimalaj káb'raqan. We káb'raqan ri' sib'alaj nim na chkiwäch ri nik'iaj káb'raqan ri u b'anom tzaretaq e k'o winaq cho ruwächulew. ¹⁹ Ri nimalaj tinimit Babilonia xutas rib', xub'an oxib'. Konojel k'u ri tinimit ri e k'o cho ruwächulew xewulijik.

Man xsach tä k'u ri nimalaj tinimit Babilonia che ri Dios, xane xub'ano chi xuna' ri nimalaj k'äx re ri k'äjisab'al u wäch ri xutaq loq chrij rumal ri nimalaj royowal ri Are'.

²⁰ Konojel ri ch'äqataq taq ulew ri e k'o pa ri mar xuquje' taq ri juyub' xsach ki wäch.

²¹ Xuquje' xqaj loq chikaj pa ki wi' ri winaq nimaq taq saqb'äch ri xa jub'iq' man kepa-jan jujun quintal chkiujunal, ri winaq k'ut xkib'ij ri äwas u b'ixik chrij ri Dios rumal ri k'äx'ol re ri saqb'äch, rumal chi are jun k'äjisab'al wächaj ri sib'alaj nim na.

17

Waral káqil wi ri tinimit Babilonia ri je' jas jun nimalaj itzel ixoq

¹ Te k'u ri' xpe jun chke ri wuqub' ángeles ri kuk'am ri wuqub' laq, xub'ij k'u chwe: Tasa'jmepe', kink'ut k'u na chawäch ru k'äjisaxik u wäch ri nimalaj itzel ixoq, ri nimalaj tinimit ri t'uyul pa ki wi' taq ri mar, —xcha'. ² Ri nimaq taq taqanelab' re ruwächulew ka'nom ruk' ri ixoq xa jas ri káka'n ri tz'i' ri xaq kákiriq kib', man k'o tä ki pixab', xuquje' ri winaq ri e k'o cho ruwächulew e q'ab'arinaq ruk' ru vino ri sib'alaj k'o u chuq'ab' re ri mak ri sib'alaj äwas u b'anik ri sachinaq ki k'ux rumal.

³ Te k'u ri', chupam ri xk'ut chnuwäch rumal ri Loq'alaj Espiritu, ri ángel xinuk'am b'i pa ri juyub' ri kätz'inowik. Chila' k'ut xinwil wi jun ixoq t'uyul puwi' jun xib'ib'alalaj awaj kiäq rij, ri tz'ib'tal ronojel ri rij che taq b'i'aj ri sib'alaj äwas ki b'ixik chrij ri Dios. Ri awaj ri' k'o wuqub' u jolom, k'o k'u lajuj ru k'a'. ⁴ We ixoq ri' u kojom atz'iaq ri kieb' u wäch káka'yik, morada xuquje' kiäq. Wigtal ruk' q'an puaq, kuk' taq ab'aj ri paqal kajil, xuquje' kuk' perlas. Ruk'am jun vaso re q'an puaq pu q'ab' ri nojinaq che ronojel u wäch ri man utz taj, xuquje' ri u tz'ilol ri nimalaj mak ri u b'anom ri sib'alaj äwas u b'anik, je' jas ri káka'n ri tz'i' ri xaq kákiriq kib', man k'o tä ki pixab'. ⁵ Tz'ib'tal k'u jun b'i'aj chukrusil ru palaj ri ixoq ri man k'o tä jun käch'ob'owik. Are wa' ri b'i'aj: “Ri nimalaj Babilonia, ki nan ri itzel taq ixoqib', xuquje' konojel ri itzel taq winaq ri e k'o cho ruwächulew,” —kuchixik. ⁶ Te ri' xinwilo chi ri ixoq q'ab'arinaq rumal ru tijik ri ki kik'el ri winaq ri e rech ri Dios, xuquje' rumal ru tijik ri ki kik'el ri e kāmisa rumal chi xkitzijoj ronojel ri xub'an ri Jesús. Aretaq xinwilo, sib'alaj xinkajmaj wa'. ⁷ Te k'u ri' xub'ij ri ángel chwe: ¿Jas che sib'alaj a kajmam awib'? Kinq'alajisaj na chawäch ri man etamtal taj chrij we ixoq ri', xuquje' chrij ri xib'ib'alalaj awaj ri kāmowinaq b'ik, ri k'o wuqub' u jolom, ri xuquje' k'o lajuj ru k'a'. ⁸ Ri xib'ib'alalaj awaj ri xawilo are wa' ri xk'o'ji na, kāmik k'ut man k'o tä

chik. Pune ta ne je ri' kel k'u na loq pa ri nimalaj jul ri sib'alaj naj u pam aretaq mäjoq ke' pa ri k'isb'al kämikal. Ri winaq ri e k'o cho ruwächulew, ri man tz'ib'tal tä ri ki b'i' pa ri wuj re k'aslema! tzaretaq xb'an ruwächulew, käkikajmaj na aretaq käkil ri xib'ib'alalaj awaj ri xk'oji na, ri man k'o tä chi k'ut, ri käpe chi k'u na jumul chik, —xcha chwe.

⁹ Waral k'o wi jun chomanik chke ri kekowinik kech'ob'onik. Ri wuqub' jolomaj kel kub'ij wuqub' juyub'. Pa ki wi' k'u wa' t'uyl wi ri ixoq. ¹⁰ Ri wuqub' jolomaj xuquje' kel kub'ij wuqub' nimaq taq taqanelab'. Job' chke we taqanelab' ri' xsach ki wäch wa'. Jun chke tajin kätaqan kämik, ri jun chi k'ut k'a mäja' käpetik. Aretaq käpe ri k'isb'al taqanel, man naj tä k'u na kätaqanik. ¹¹ Ri xib'ib'alalaj awaj ri xk'oji na, ri man k'o tä chik, are ri u wajxaq taqanel. Ri are' jun kuk' ri wuqub'. B'enam k'u re wa' pa ri k'isb'al kämikal.

¹² Ri lajuj u k'a' ri xawilo, e are lajuj nimaq taq taqanelab' wa' ri k'a mäja' käkichap taqanik. Käyi' k'u na taqanik pa ki q'ab' rech ketaqan pa ki wi' ri winaq jun hora, junam ruk' ri xib'ib'alalaj awaj. ¹³ We lajuj nimaq taq taqanelab' ri' junam ri ki chomanik, käkiya k'u na ri ki chuq'ab' xuquje' ri ki taqanik che ri xib'ib'alalaj awaj. ¹⁴ Kech'ojin na ruk' ri Alaj Chij, kech'aktaj k'u na rumal ri Alaj Chij junam kuk' ri e k'o ruk'. Je ri', rumal chi ri Alaj Chij are Kajaw ri ajawib', xuquje' are Nim Taqanel pa ki wi' konojel ri nimaq taq taqanelab'. Ri e k'o ruk' e sik'ital wa' rumal ri Dios, xuquje' e cha'talik, jikom k'u ri kanima'.

¹⁵ Xuquje' xub'ij ri ángel chwe: Ri nimaq taq mar ri xeawilo, ri t'uyl wi ri itzel ixoq pa ki wi', are kel kub'ij wa' chi e konojel ki wäch winaq, e winaq ri jalajoj keka'yik, e winaq ri jalajoj taq ki tinimit, e winaq ri jalajoj kech'awik. ¹⁶ Ri lajuj u k'a' ri e k'o che ri xib'ib'alalaj awaj ri xawilo, käketzelaj na u wäch ri itzel ixoq, käkiya k'u na kanoq u tukiel, käkich'anab'a na kanoq. Käkitij na ru tijol, käkiporoy k'u na ru b'aqil pa q'aq'. ¹⁷ Ri Dios yo'winaq pa kanima' ri lajuj taqanelab' ri' chi käka'no jachike ri kraj ri Are', chi käjunamataj ri ki chomanik chuya'ik taqanik pu q'ab' ri xib'ib'alalaj awaj, k'a käb'antaj na ronojel ru b'im ri Dios. ¹⁸ Ri ixoq ri xawilo, are wa' ri nimalaj tinimit ri kätaqan pa ki wi' ri nimaq taq taqanelab' ajuwächulew, —xcha ri ángel chwe.

18

Käsachisax u wäch ri nimalaj tinimit Babilonia

¹ Te k'u ri' xinwil jun ángel chik ri tajin käqaj loq chikaj, k'o k'u nimalaj taqanik pu

q'ab'. Ru juluwem xuya saqil cho ronojel ruwächulew. ² Ko xch'awik, xub'ij: ¡Xwulijik! Ya xwulij ri nimalaj tinimit Babilonia. Kojom chi wa' che kachoch itzel taq espíritus. Are ki jul ronojel ki wäch itzelalaj taq espíritus chik, xuquje' are ki sok k'äx taq chikop ajuwokaj ri tzel keilitajik. ³ Je ri', rumal chi ronojel ki wäch winaq cho ruwächulew e q'ab'arinaq rumal ru tijik ri vino re ri nimalaj mak ri kub'ano. Xuquje' ri nimaq taq taqanelab' re ruwächulew je' ka'nom ruk' ri ixoq jas ri käka'n ri tz'i' ri xaq käkiriq kib', man k'o tä ki pixab'. Ri ajk'ayib' k'ut ri e k'o cho ruwächulew e q'inomarinaq rumal chi ri nimalaj tinimit Babilonia sib'alaj ok'owinaq u wi' ri u rayib'al chke ronojel u wäch taq jastaq, —xcha'.

⁴ Te k'u ri' xinta chi Jun ri xch'aw loq chikaj ri xub'ij: Chixel loq pa we tinimit ri', winaq ri ix wech in, rech man kib'an tä iwe ri mak ri käb'an pa we tinimit ri', rech man kiriq tä k'u iwe ri nimaq taq k'äx ri kepe na puwi'. ⁵ Xaq k'u u mulim rib' ru mak, opaninaq k'a chikaj, na'tal k'u ronojel wa' ri retzelal che ri Dios. ⁶ Chib'ana che ri are' jas ru b'anom ri are' chke nik'iaj chik, chiya u kamul ri rajil u k'exel che ri are' jas ri u b'anom chiwe. Chiyujaj ri kutijo, ri sib'alaj k'äx na u tijik wa' chuwa'ch ri xuya ri are' chke nik'iaj chik, chiya k'u wa' che. ⁷ Chiya k'äxk'ol che, xuquje' b'is, jas ru nimal ri nimarisan ib' ri xk'i'y pa ranima', xuquje' jas ri nimalaj u rayib'al chke k'ia taq jastaq. Xub'ij k'u pa ranima': "Ri in, in t'uyl waral je' jas jun ixoq nim taqanel, man in malka'n taj, man k'o tä k'u k'äx kinriq na," —kächa'. ⁸ Rumal ri' xa pa jun q'ij kepe na ronojel ru k'äxk'ol puwi'. Käpe na kämikal, käpe na b'is, xuquje' wi'jal. Käporox k'u na ruk' q'aq'. Je ri', rumal chi ri Dios sib'alaj k'o u chuq'ab', ri Qajaw Dios ri u q'atom tzij puwi' chi käk'äjisax u wäch.

⁹ Ri nimaq taq taqanelab' re ruwächulew ri xka'n ruk' are' jas ri käka'n ri tz'i' ri xaq käkiriq kib', man k'o tä ki pixab', ri xkiya kib' chutzukuxik ruk' are' ri k'ia jastaq ri xkirayij, keb'oq' na, käkiraq k'u ki chi' aretaq käkil ru sib'el ri q'aq' re ru poroxik. ¹⁰ Naj ketak'i wi na che rumal ri ki xib'rikil. Sib'alaj käkixej na kib' che ri nimalaj k'äjisab'al u wäch ri tajin kuriqo, käkib'ij k'u na: ¡Ay! ¡Toq'ob' a wäch, nimalaj tinimit Babilonia, tinimit ri nim u q'ij! Xaq te'talik xpe ri k'äx pa wi', xk'äjisax k'u a wäch, —kecha na.

¹¹ Ri ajk'ayib' ri e k'o cho ruwächulew xuquje' keb'oq' na, käkiraq k'u na ki chi' che we tinimit, rumal chi man k'o tä chi na jachin ri käloq'ow ri jastaq ri käkik'iyij. ¹² Ri käkik'iyij are ri q'an puq, ri saq puq, ri ab'aj ri paqal rajil, ri perlas, ri manta re lino ri kok' u wäch, ri manta re xela, ri manta

morada, xuquje' ri manta ri sib'alaj kiäq u wäch. Käkik'iyij k'u taq che' ri kek'ok'otik, jastaq re marfil,* re che' ri paqal kajil, re ri ch'ich' bronce, re xaq ch'ich', xuquje' jastaq re mármol.† 13 Xuquje' käkik'iyij ri canela, ri molom taq q'ayes ri kek'ok'otik, ri incienso, ri mirra,‡ k'ok'alaj taq kunab'al, vino, aceite, kok'alaj k'äj, ri triko k'ut. Käkik'iyij k'u k'ia ki wäch taq awaj, wakäx, awaj re taq eqa'n, chij, xuquje' kiej ruk' ri ki carruaje, xuquje' winaq, e are' winaq wa' ri xa käkikoj nik'iaj winaq chik che patänil taq ke. 14 Käkib'ij k'u na che ri tinimit: ¡Konojel ri je'lalaj taq jastaq ri sib'alaj xarayij ki wäch, ri sib'alaj xqaj chkiwäch ri winaq, ya man k'o tä chik! ¡Xsach k'u u wäch ronojel ra q'inomal, xuquje' ronojel ri a je'lal ri k'o nab'e!

15 Ri ajk'ayib' ri xka'n ki k'ay kuk' taq we jastaq ri', ri e q'inomarinaq rumal we tinimit ri', naj ketak' wi na che ri tinimit rumal chi käkixej kib' we ne käkiriq ke ri e are' ri nimalaj k'äjisab'al u wäch we tinimit ri'. Keb'oq' na, kää'axow k'u na ri kanima'. 16 Käkib'ij k'u na: ¡Ay! ¡Toq'ob' u wäch ri nimalaj tinimit! Junam k'u ri are' ruk' jun ixoq ri u kojom kok'alaj lino che ratz'iaq, xuquje' u kojom manta morada xuquje' manta ri sib'alaj kiäq u wäch, u wiqom k'u rib' ruk' q'an puaq, kuk' taq ab'aj ri paqal kajil, xuquje' kuk' perlas. 17 ¡Xaq te'talik k'ut xsach u wäch ronojel ri nimalaj u q'inomal! —kecha na.

Konojel ri e kojom che kaporal chke taq ri barcos, xuquje' ri winaq ri keb'e' pa taq barcos, ri e b'inisel taq barcos, konojel k'u ri kechakun pa ri mar, naj xetak' wi kan che ri tinimit. 18 Aretaq xkil ru sib'el ri tinimit ri tajin káporoxik, xkíraq ki chi', xkib'ij: ¡A xk'oji lo jumul jun tinimit junam ruk' we nimalaj tinimit ri'? ¡Man xk'oji taj! —xecha'.

19 Xkik'iaq ulew pa ki jolom (k'utb'al re ri ki b'is). Xeb'oq'ik, xq'axow k'u ri kanima', xkíraq ki chi', xkib'ij: ¡Ay! ¡Toq'ob' u wäch ri nimalaj tinimit! Ruk' k'u ru q'inomal e q'inomarinaq konojel ri k'o ki barcos pa ri mar. ¡Xaq te'talik k'ut xsach u wäch we nimalaj tinimit ri'! —xecha'.

20 Chixkikot b'a' iwonojel ix, ri ix k'o pa taq ri kaj rumal ri xb'antaj che we tinimit ri'. Chixkikot ix xuquje', ri ix rech ri Dios, xuquje' ri ix, ix apóstoles, ri ix xuquje' ri ix q'alajisal taq re ru Loq' Pixab' ri Dios rumal chi aretaq ri Dios xuq'at tziq puwi' we tinimit ri' chi kää'äjisax u wäch, xuya ri rajil u k'exel ri k'äx ri u b'anom we tinimit ri' chiwe, —xcha ri Jun ri xch'aw loq chikaj.

21 Te k'u ri' jun ángel ri sib'alaj k'o u chuq'ab' xuwalijisaj jun ab'aj ri junam ruk' jun nimalaj ka', xuk'iaq b'i pa ri mar, xub'ij k'ut: Are je wa' káb'an na che ri nimalaj tinimit Babilonia, káwulij na. ¡Ruk' chuq'ab' káwulixik! Man k'o tä k'u jumol ri kilitaj chi na u wäch. 22 ¡Babilonia! Man k'o tä chi na jumol ri kátataj chi awuk' ri roq'eb'al ri q'ojom arpa u b'i', ri su', o ri tun. Man káriqtaj tä chi na jun ajchak ri kub'an apachike u wäch chak. Man kátataj tä chi na jun winaq ri kájuqnaj ru ka' pa ri tinimit. 23 Man kátunun tä chi na pa taq ja ru saqil ri jun cendela, man kátataj tä k'ut ri wojkorem pa taq ri k'ulanem. Nab'e kanoq ri ajk'ayib' ri e k'o awuk' e are nimaq ki q'ij cho ruwächulew. Xesub'taj k'u konojel ki wäch winaq cho ruwächulew ruk' ri itzinik ri xab'ano, —xcha'.

24 Chupam k'u we tinimit ri' xekämisax wi ri q'alajisal taq re ru Loq' Pixab' ri Dios, xuquje' ri winaq ri e rech ri Dios. Xriqtaj k'u ri ki kik'el konojel ri winaq ri e kämisam cho ronojel ruwächulew chupam we tinimit ri', —xcha ri ángel.

19

1 Te k'u ri' xinta sib'alaj k'ia winaq ri e k'o pa ri kaj ri ko xech'awik, xkib'ij:

¡Aleluya! Ruk' ri qa Dios
qa rigom wi ri to'b'al qib'.
Xuwi che ri Are' taqal wi
chi kánimarisax u q'ij.
Xuwi ri Are' taqalik káb'ix che
chi k'o nimalaj u chuq'ab'

2 rumal chi u b'anom ri jikomal,
u b'anom k'u ri qas tziq chuq'atik tziq.

Xuq'at k'u tziq puwi'

ri nimalaj itzel ixoq
chi kää'äjisax u wäch.

Are k'u ri are' ri retzelam ruwächulew
ruk' ronojel ri man utz taj
ri xub'ano.

Xuya k'u ri Dios che ri ixoq ri rajil
u k'exel ri ki kämikal
ri patänil taq re ri Are',
—xecha ri'.

3 Te k'u ri' xech'aw chik, xkib'ij: ¡Aleluya!
Ru sib'el ri nimalaj tinimit ri tajin káporoxik,
man kätäni taj, xane xaq tajin wi káb'uquw
na pa taq ri q'ij ri junab' ri kepetik, —xecha'.

4 Ri juwinaq kiejeb' k'amal taq ki b'e ri konojelab' xuquje' ri kiejeb' ri je' kepe ángeles
xkimej kib', xkiq'ijilaj k'u ri Dios ri t'uylul
pa ri je'lalaj u t'uylulib'al, xkib'ij: ¡Amén!
¡Aleluya! —xecha'.

5 Te k'u ri' xtataj Jun ri xch'aw loq ruk' ri
je'lalaj t'uylulib'al ri xub'ij:

* 18:12 Ri "jastaq re marfil" e are' jastaq wa' ri b'anom chke ru ka' ri tix (elefante), sib'alaj paqal rajil k'u wa'. † 18:12

Ri "jastaq re mármol" e are' jastaq ri b'anom che jun ab'aj saq u wäch ri sib'alaj paqal rajil. ‡ 18:13 Chawila' ri nota chrij ri "mirra" pa San Marcos 15:23.

Chiya u q'ij ri qa Dios,
iwonoljel ix ri kixpatänin che,
ri kixej iwib' chuwäch,
ri nim kiwil wi, chi ak'alab'
chi ri'jab',
—xcha'.

*Waral käqil wi ri nimaq'ij re ru k'ulanem
ri Alaj Chij*

⁶ Xuquje' xinta jun wojojem ri je' ta ne e
k'ia winaq tajin kech'awik, ri je' ta ne ru
chojojem k'ialaj nimaq taq ja', xuquje' je' ta
ne ru tililem kowilaj taq käqulja ri xkib'ij:
¡Aleluya! Ri Qajaw, ri qa Dios,

ri k'o ronojel u wäch chuq'ab' ruk',
u kutum chi Are' tajin kätaqanik.

⁷ Chujkikotoq, gas chikikot qanima',
qanimarisaj k'u u q'ij ri Dios
rumal chi xopan ri q'ij
ri käk'uli ri Alaj Chij.
Ri rixoxil k'ut u b'anom
u b'anik rib'.

⁸ Yo'm che chi kukoj ch'ajch'oj atz'iaq
re kok'alaj lino ri käjuluwik,

—xecha'. Ri kok'alaj lino kel kub'ij ri jiko-
malaj ki k'aslemal ri winaq ri e rech ri Dios.

⁹ Te k'u ri' xub'ij ri ángel chwe: Chatz'ib'aj
wa' we tzij ri': "Utz ke ri e sik'im che ri
nimalaj wi'm ri káb'an pa ru k'ulanem ri Alaj
Chij," —xcha'.

Xub'ij chi k'u chwe: We tzij ri', gas e are u
Tzij ri Dios wa', —xcha chwe.

¹⁰ Xinxuki k'u chuwäch ri ángel
chuq'ijilaxik. Ri are' k'ut xub'ij chwe:
¡Mab'an wa'! Ri in xuquje' xaq in patänil re ri
Dios je' jas ri at, junam kuk' ri awachalal ri
jikom kanima' chrij ri gas tzij ri xuq'alajisaj
ri Jesús. Are chaq'ijilaj ri Dios, —xcha chwe.

Ri gas tzij ri xuq'alajisaj ri Jesús, are k'u
wa' ri käyo'w ki chuq'ab' ri q'alajisaj taq re
ru Loq' Pixab' ri Dios.

*Waral käqil wi ri jun ri kiejeninaq chrij ri
saq rij kiej*

¹¹ Te k'u ri' xinwil ri kaj jaqtalik, xuk'ut
k'u rib' jun saq rij kiej. Ru b'i' ri Jun ri
kiejeninaq chrij are wa': Jikom Ranima'
xuquje' Qas Tzij. Ruk' k'u jikomak kuq'at
tzij xuquje' kub'an ri ch'oj. ¹² Ru waq'äch
kejluluwik je' jas ru xaq q'aq', e kojom k'u
k'ia corona chujolom. K'o jun b'i'aj tz'ib'tal
chrij ri xaq xuwi ri Are' gas käch'ob'owik.

¹³ U kojom jun u q'u' ri tz'ajom che kik'. Ru
b'i' k'ut are "Ru Tzij ri Dios". ¹⁴ Ternetal
k'u kumal ri soldados ajchikaj ri ki kojom
saq atz'iaq re kok'alaj lino ri ch'ajch'oj. E
kiejeninaq k'ut chikij saq taq kiej. ¹⁵ Pu chi'
kel wi loq jun machete ri sib'alaj k'o u pu
chi', ri kukoj che ki sokik konojel ri wäch
winaq cho ruwächulew. Kätaqan k'u na pa ki
wi' ruk' jun vara re ch'ich'. Kuq'at k'u na tzij
pa ki wi'. Je' kub'an na chke jas ri kub'an
jun winaq che ki pitz'ik ri uvas ruk' ri raqan,

keutak'alej. Xuquje' kub'an na chi kākina' ri
k'äx re ri nimalaj k'äjisab'al ki wäch ri käpe
pa ki wi' rumal ri nimalaj royowal ri Dios, ri
qa Dios ri k'o ronojel u wäch chuq'ab' ruk'.
¹⁶ Tz'ib'tal k'u we b'i'aj ri' che ru q'u' xuquje'
che ri raqan ri kub'ij: Are "Nim Taqanel pa
ki wi' ri nimaq taq taqanelab', Kajaw k'u
konojel ri ajawib'."

¹⁷ Te ri' xinwil jun ángel ri tak'al pa ri q'ij,
ri xuraq u chi', ko xch'awik che ki ch'ab'exik
konojel ri chikop ri kerapap chikaj, xub'ij
chke: ¡Chixsa'j! Chimulij iwib' che ri nimalaj
wi'm ri kuya ri Dios. ¹⁸ Chixsa'j rech kitij ri
ki ti'jol nimaq taq taqanelab', ri ki ti'jol ri
ki nimaqil taq soldados, xuquje' ri ki ti'jol
achijab' ri sib'alaj k'o ki chuq'ab'. Kitij k'u
na ri ki ti'jol taq kiej, xuquje' ri ki ti'jol taq
ri ajkijab', ri ki ti'jol ronojel ki wäch winaq,
winaq ri e k'o pu q'ab' jun patrón o ri man
k'o tä ki patrón, chi ak'alab', chi ri'jab', —
xcha'.

¹⁹ Te k'u ri' xinwil ri xib'ib'alalaj
awaj xuquje' ri nimaq taq taqanelab'
ajuwächulew kachi'l ri ki soldados, ri ki
mulim kib' rech kech'ojin ruk' ri Jun ri
kiejeninaq chrij ri kiej xuquje' kuk' ru
soldados ri Are'. ²⁰ Xchap k'u ri xib'ib'alalaj
awaj junam ruk' ri jun ri kub'an che rib'
chi are q'alajisaj re ru Loq' Pixab' ri Dios,
ri u b'anom kajmab'al taq etal chuwäch ri
xib'ib'alalaj awaj. Kumal k'u we kajmab'al
taq etal ri' xesub' ri winaq ri xkiya
kib' chi kok ri retal ri xib'ib'alalaj awaj
chke, ri xuquje' xkiq'ijilaj ru wächb'al. Ri
xib'ib'alalaj awaj xuquje' ri jun ri kub'an
che rib' chi are q'alajisaj re ru Loq' Pixab'
ri Dios, e k'aslik xek'iaq b'i' pa ri q'aq' ri je'
jas jun nimalaj mar ri sib'alaj känikow ruk'
azufre. ²¹ Are k'u ri nik'iaj chik, xekämisa
ruk' ri machete ri kel loq pu chi' ri Jun ri
kiejeninaq chrij ri kiej, konojel k'u taq ri
chikop ajuwokaj xnoj ki pam ruk' ri ki ti'jol
we winaq ri'.

20

Waral kätzijoq wi ri jun mil junab'

¹ Te k'u ri' xinwil jun ángel ri tajin käqaj
loq chikaj, ruk'am pu q'ab' ri lawe rech ri
nimalaj jul ri sib'alaj naj u pam, xuquje'
ruk'am jun nimalaj ximib'al re ch'ich'. ² We
ángel ri' xuchap ri nimalaj itzel kumätz, ri
ojer kumätz ri káb'ix Itzel xuquje' Satanäs
che u b'i'. Mil junab' k'ut xuxim na ruk'
ri ximib'al re ch'ich'. ³ Xuk'iaq b'i' pa ri
nimalaj jul, xutz'apij kan u chi' ri jul, xukoj
jun t'iqb'al che ri tz'apib'al re rech man
keusub' tä chi ri winaq cho ruwächulew k'ä
kätz'aqat na ri mil junab'. Aretaq kätz'aqat ri
mil junab' rajwaxik k'ut kätzoqopix na kieb'
oxib' q'ij.

⁴ Te k'u ri' xinwil jujun je'lalaj taq t'uuyulib'al. Chila' k'ut e t'uuyul wi ri yo'm taqanik pa ki q'ab' chuq'atik tzij. Xuquje' xinwil ri kanima' ri winaq ri esam ki jolom rumal ru tzijoxik ru Loq' Pixab' ri Dios ri xuq'alajisaj ri Jesús. Ri e are' man xkiq'ijilaj tä ri xib'ib'alalaj awaj. Man xkiq'ijilaj tä ru wächb'al, man xkiya tä k'u kib' chi kok ri retal ri are' chukrusil ri ki palaj o che ri ki q'ab'. Xinwilo chi xek'astaj chxixol ri käminaqib', xetaqan k'ut junam ruk' ri Cristo pa ri mil junab'. ⁵ Are wa' ri nab'e k'astajib'al. Are k'u ri nik'ijäw käminaqib' chik man xek'astaj tä che we chanim ri', xane k'ä te' xek'astajik aretaq xtz'aqat na ri mil junab'. ⁶ jUtz ke ri xek'astaj pa ri nab'e k'astajib'al! E are wa' ri ki jachom kib' pu q'ab' ri Dios. Ri ukab' kämikäl man käriqtaj tä chi na kumal ri e are', xane keb'ok na che sacerdotes rech ri Dios xuquje' rech ri Cristo. Xetaqan k'u na ruk' ri Cristo pa ri mil junab'.

⁷ Aretaq kätz'aqat ri mil junab', ri Satanäs kätzoqopix na, kel k'u na loq jawije' ri tz'aptal wi. ⁸ Kel k'u na b'i che ki sub'ik ri winaq cho ronojel ruwächulew. E are k'u wa' ri Gog, xuquje' ri Magog. Keumulij na ri ki soldados che ri ch'oj, ri sib'alaj e k'ia je' jas ri senyáb' ri k'o chi' ri mar ri man kākowin tä jun che kajilaxik. ⁹ Xepaqi k'u loq cho ronojel ruwächulew, xkisutij rij ri k'olib'al ri e k'o wi ri winaq ri e rech ri Dios, xuquje' ri tinimit ri loq' chuwäch. Ri Dios k'ut xutaq loq q'aq' chikaj, ri xeuporoj konojel. ¹⁰ Ri Itzel k'ut, ri u b'anom sub'unik chke, xk'iaq b'i pa ri nimalaj q'aq' ri je' ta ne are jun mar ri sib'alaj känikow ruk' azufre, jawije' xk'iaq wi b'i ri xib'ib'alalaj awaj xuquje' ri jun ri kub'an che rib' chi are q'alajisäl re ru Loq' Pixab' ri Dios. Chila' k'ut kākiriq wi na nimalaj k'äx chi paq'ij chi chaq'ab' pa taq ri q'ij ri junab' ri kepetik.

Waral kätzijox wi ri q'atow tzij ri käb'an chuwäch ri nimalaj t'uuyulib'al ri saqloloj

¹¹ Xinwil k'u jun nimalaj t'uuyulib'al ri saqloloj, xuquje' xinwil ri Jun ri t'uuyul chila'. Chuwäch k'u ri Are' xsach u wäch ri ulew xuquje' ri kaj, man k'o tä jumul xilitaj chi ki wäch rumal chi man k'o tä chi k'u k'olib'al jawije' chi' kuya' kek'oji wi. ¹² Te k'u ri xeinwil ri käminaqib', chi ri jab' chi ak'alab' e tak'atoj chuwäch ri Dios. Xejatqat k'u taq ri wuj xuquje' xjaqtaj jun wuj chik, ri wuj re k'aslemaal. Xq'at k'u tzij pa ki wi' ri käminaqib'. Xilik jas ri xka'no aretaq e k'asal cho ruwächulew, ri tz'ib'tal pa taq ri wuj. ¹³ Ri mar xeujach ri käminaqib' ri e k'o chupam. Ri kämikäl xuquje' ri k'olib'al ri e k'o wi ri käminaqib' xekijach ri käminaqib' ri e k'o chupam. Konojel k'ut xq'at tzij pa ki wi' chrij ronojel ri xka'n pa ri ki k'aslemaal.

¹⁴ Te k'u ri' ri kämikäl xuquje' ri k'olib'al ri e k'o wi ri käminaqib', xek'iaq b'i pa ri nimalaj q'aq' ri je' ta ne jun mar tajin kāk'atik. Are k'u wa' ri ukab' kämikäl. ¹⁵ Chila' k'ut xek'iaq wi b'i ri man tz'ib'tal tä ri ki b'i' pa ri wuj re k'aslemaal.

21

Waral käqil wi ri k'ak' kaj xuquje' ri k'ak' uwächulew

¹ Te k'u ri' xinwil jun k'ak' kaj xuquje' jun k'ak' uwächulew, rumal chi ri nab'e kaj xuquje' ri nab'e uwächulew xsach ki wäch, xuquje' ri mar man k'o tä chik. ² In ri', ri Juan, xinwil ri loq'alaj tinimit, ri k'ak' Jerusalén, tajin käqaj loq chikaj ruk' ri Dios. B'anom k'u u b'anik je' jas jun ali ri u kojom chi ri ratz'iaq re k'ulanem rech kāk'uli ruk' ri ala ri kok che rachajil. ³ Xinta k'u jun ri ko xch'aw loq chikaj ri xub'ij: jChawilampe! Ri Dios u yakom chi ri rachoch kämik chxixol ri winaq. Käjeqi na junam kuk', ri e are' k'ut keb'ok na che u winaqil ri Are'. Tzare k'u ri qas Dios kāk'oji na kuk' che ki Dios. ⁴ Ri Dios kusu' na ri u wa'l ki wäch. Man k'o tä chi k'u kämikäl, man k'o tä chi oq'ej, man käq'axow tä chi na ri kanima, man k'o tä chi k'u q'axom. Je ri', rumal chi ronojel ri k'o nab'e ya man k'o tä chik, xsach k'u u wäch wa', —xcha'.

⁵ Are k'u ri Jun ri t'uuyul pa ri nimalaj t'uuyulib'al xub'ij chwe: Chawilampe', ri in kinb'an k'ak' che ronojel ri k'olik, —xcha chwe.

Xuquje' xub'ij: Chatz'ib'aj wa' rumal chi we tzij ri' e qas tzij, kuya' k'ut qas kāk'u b'i u k'ux jun chkiq, —xcha'.

⁶ Te k'u ri' xub'ij chi chwe: jYa xb'antajik! In ri' ri chapleb'al xuquje' ri k'isb'al, je' jas ri nab'e letra xuquje' ri k'isb'al letra rech ri alfabeto, ri "A" ruk' ri "Z". Jachin ri kächaqi'j u chi' kinya na che ri are' chi kutij re ri joron re ri u k'iyib'al ja' ri kuya' k'aslemaal, ri xaq kāsipaxik. ⁷ Jachin ri käch'akanik kärechb'e' na ronojel wa'. Ri in kinok na che u Dios, ri are' k'ut kok na che walk'ual in. ⁸ Are k'u ri winaq ri e xib'rib', ri man kekojon taj, ri winaq ri etzeltajinaq ki k'aslemaal cho ri Dios, ri kämisanelab', ri winaq ri je' kāk'a'no jas ri kāk'a'n ri tz'i' ri xaq kākiriq kib', man k'o tä ki pixab', ri winaq ri kāk'a'n itzinik, ri kekiq'ijilaj taq tiox ri xa e b'anom kumal winaq, xuquje' konojel ri b'anal taq tzij, konojel wa' keb'e' na pa ri nimalaj q'aq' ri je' ta ne jun mar ri tajin kāk'atik ruk' azufre. Are k'u wa' ri ukab' kämikäl, —xcha ri Dios chwe.

Waral käqil wi ri k'ak' tinimit Jerusalén

⁹ Te k'u ri' xpe jun chke ri wuqub' ángeles ri kuk'am ri wuqub' laq ri nojinajq che ri k'isb'al taq k'äx'ol, xub'ij chwe: Tasa',

kink'ut ri ali chawäch, ri rixoqil ri Alaj Chij, —xcha chwe.

¹⁰ Chupam ri xuk'ut ri Loq'alaj Espiritu chnuwäch xinwilo chi ri ángel xinuk'am b'i puwi' jun nimalaj juyub' ri sib'alaj naj paqalinaq, xuk'ut k'u ri nimalaj tinimit chnuwäch, ri loq'alaj Jerusalén ri tajin kâqaj loq chikaj jawije' xel wi loq chuwach ri Dios. ¹¹ Ri tinimit kâjuluw rumal ru je'lalaj u juluwem ri Dios, ru juluwem are junam ruk' jun ab'aj ri sib'alaj paqal rajil, junam ruk' jun ab'aj re jaspe, ri kuya' kâka'y jun chupam jas ri vidrio. ¹² Ri tinimit sutim rij che jun nimalaj tapya ri naj paqalinaq. E k'o kab'lajuj uchib'e che ri tapya, e k'o k'u jujun ángel chuchi' taq ri uchib'e. Ri ki b'i' ri kab'lajuj tinimit re Israel e tz'ib'tal cho ri jujun porta re ri uchib'e. ¹³ Oxib' uchib'e e k'o chrelb'al q'ij, oxib' chik e k'o chuwikiäq'ab' ri relb'al q'ij, e k'o oxib' chumoxq'ab' ri relb'al q'ij, e k'o k'u oxib' chik chuqajb'al q'ij. ¹⁴ Ri tapya rech ri tinimit kojom kab'lajuj ab'aj che u tak'alib'al. Ri ki b'i' ri kab'lajuj apóstoles re ri Alaj Chij e tz'ib'tal chkij taq ri ab'aj.

¹⁵ Ri ángel ri tajin kâtzijon wuk' ruk'am jun aj re q'an puag che retaxik ri tinimit, xuquje' k'u taq ri uchib'e ruk' ri tapya. ¹⁶ Ri tinimit xaq junam retab'alil ri pa taq u xkut. Ri raqan xaq junam ruk' ru wäch. Ri ángel xretaj ri tinimit ruk' ri aj ri ruk'am. Kieb' mil ruk' kieb' ciento kilómetros ketanik. Ri raqan, xuquje' ri u wäch ri paqalinaq xaq junam keetanik. ¹⁷ Te k'u ri xretaj chi ri tapya, ketan k'u oxk'al ruk' kiejeb' metros ru pimal, jas ri etab'al ri kâkikoj ri winaq are wa' ri tajin kukoj ri ángel.

¹⁸ Ri tapya are ab'aj re jaspe* ri kojom che ri tapya. Are k'u ri tinimit are q'an puag ri man k'o tä yuja'm ruk' kojom che, junam ruk' ri vidrio ri ch'ajch'oj. ¹⁹ Ri ab'aj ri e kojom che ru tak'alib'al ri tapya e wiqtal ruk' ronojel ki wäch ab'aj ri paqal kajil. Ri nab'e ab'aj re ri tak'alib'al, wiqtal ruk' jaspe, ri ukab' ab'aj wiqtal ruk' zafiro, ri urox ab'aj wiqtal ruk' ágata, ri ukaj ab'aj k'ut, are wiqtal ruk' esmeralda. ²⁰ Ri uro' ab'aj wiqtal ruk' ónice, ri uwaq ab'aj wiqtal ruk' cornalina, ri uwaq ab'aj wiqtal ruk' crisólito, ri uwajxaq ab'aj wiqtal ruk' berilo, ri ub'elej ab'aj wiqtal ruk' topacio, ri ulajuj ab'aj wiqtal ruk' crisoprassa, ri ujulajuj ab'aj wiqtal ruk' jacinto, ri ukab'lajuj ab'aj k'ut, are wiqtal ruk' amatista. ²¹ Ri kab'lajuj porta re ri u chi' taq b'e e kab'lajuj perlas wa'. Chkijujunul ri porta e jujun perlas. Ri b'e ri kok'ow pu nik'iajal ri tinimit are re q'an puag ri man k'o tä yuja'm ruk', je' jas ri vidrio ri kâkownik kâka'y jun chupam.

²² Man xinwil tä jun Loq'alaj Rachoch Dios pa ri tinimit ri', rumal chi ri Qajaw Dios ri k'o ronojel u wäch chuq'ab' ruk', are ri Are' ri Loq'alaj Rachoch Dios junam ruk' ri Alaj Chij. ²³ Ri tinimit man rajwaxik taj chi kâka'y ri q'ij puwi', man rajwaxik tä k'u ri ik' rumal chi ri je'lalaj u juluwem ri Dios are kâka'y puwi'. Ri Alaj Chij k'ut Are u saqil. ²⁴ Konojel ki wäch winaq cho ruwächulew ri ki rigom ru tob'anik ri Dios keb'in na pa ru saqil ri tinimit ri'. Are k'u ri nimaq taq taqanelab' re ri uwächulew kâkik'am na b'i ri jastaq ke ri nimaq ki q'ij, ri nim keil wi, kekiya k'u na kan pa ri tinimit. ²⁵ Ru chi' taq b'e re ri tinimit man ketz'apix tä paq'ij. Chila' k'ut man k'o tä chaq'ab'. ²⁶ Kâk'am na b'i jela' ri q'inomal ri sib'alaj nimaq ki q'ij, ri nim keil wi kech konojel ki wäch winaq cho ruwächulew. ²⁷ Man k'o tä k'u jas ri man ch'ajch'oj taj kok b'i pa ri tinimit. Man kok tä k'u b'i jun winaq ri etzeltajinaq ru k'aslemaal cho ri Dios, o jun ri u b'anom sub'unik. Xaq xuwi keb'ok na b'i ri winaq ri tz'ib'tal ri ki b'i' pa ri wuj re k'aslemaal ri k'o ruk' ri Alaj Chij.

22

¹ Te k'u ri' ri ángel xuk'ut chnuwäch jun nima' ri saqloloj re joron ri kuya k'aslemaal. Kâkownik kâka'y jun chupam je' jas ri cristal. Chila' k'ut kel wi loq ri nima' ruk' ri je'lalaj t'uyulib'al ri e k'o wi ri Dios xuquje' ri Alaj Chij. ² Pu nik'iajal ri b'e ri kok'ow pa ri tinimit xuquje' pa taq u xkut ri nima' e k'iyinaq wi ri che' re k'aslemaal. Kab'lajuj mul kâwächin che ri jun junab'. Chi ik' kuya ru wäch. Are k'u ru xaq kok che kunab'al ke konojel ki wäch winaq cho ruwächulew. ³ Chila' man k'o tä jas ri etzelam u wäch rumal ri Dios. Are k'u ri je'lalaj t'uyulib'al ri e k'o wi ri Dios xuquje' ri Alaj Chij kâk'oji na pa ri tinimit ri'. Ri patânil taq re ri Dios k'ut, keq'ijilan na che ri Are'. ⁴ Qas kâkil na rib' ki wäch chb'il kib', are k'u ru b'i' kâk'oji na chukrusil ri ki palaj. ⁵ Chila' man k'o tä chi chaq'ab'. Ri winaq ri kejeqi chila' man rajwaxik tä ru saqil jun candelâ chke. Man rajwaxik tä k'ut ru saqil ri q'ij rumal chi ri Dios ri Qajaw kuya na saqil pa ki wi'. Ri e are' k'ut ketaqan na pa taq ri q'ij ri junab' ri kepetik.

Xa jub'iq' kraj chi kâpe chi na jumul ri Jesucristo

⁶ Te k'u ri' xub'ij ri ángel chwe: We tzij ri' e qas tzij, kuya' k'ut qas kâku'b'i u k'ux jun chkij. Ri Qajaw k'ut, ri tzare Dios wa', ri kâyo'w ki chuq'ab' ri q'alajisal taq re ru Loq' Pixab', u taqom loq ru ángel chuk'utik

* **21:18** Konojel ri ab'aj ri keb'ix waral, ri jaspe, ri esmeralda, ri perlas, xuquje' ri nik'iaj chik, e are' ab'aj wa' ri sib'alaj paqal kajil.

chkiwäch ri patänil taq re jas ri káb'antaj na chanim, —xcha chwe.

⁷ ¡Chitampe! ¡Chanin kinopanik! —xcha ri Jesús.

¡Utz re ri kunimaj ru Loq' Pixab' ri Dios ri tz'ib'tal pa we wuj ri! —xcha chwe.

⁸ In ri', ri Juan, xinto, xuquje' qas xinwil ronojel ri kätzijox waral. Aretaq xtataj wa' wumal xuquje' xilitaj wumal, xinxuki chuwäch ri ángel ri xk'utuw ronojel wa' chnuwäch rech kinq'ijilaj. ⁹ Ri ángel k'ut xub'ij chwe: ¡Mab'an wa'! Ri in xaq in patänil re ri Dios je' jas ri at xuquje' taq ri awachalal ri q'alajisal taq re ru Loq' Pixab' ri Dios, xuquje' konojel ri keniman che ru Tzij ri Dios ri tz'ib'tal pa we wuj ri'. ¡Are chaq'ijilaj ri Dios! —xcha chwe.

¹⁰ Xuquje' xub'ij chwe: Meak'u' ru Loq' Pixab' ri Dios ri tz'ib'tal pa we wuj ri', rumal chi xa jub'iq' chik kraj chi kopan ri q'ij ri káb'antaj na ronojel wa'. ¹¹ Xaq b'a' chaya che ri b'anal etzelal chi kutagej u b'anik ri etzelal ri kub'ano, xuquje' ri winaq ri man ch'ajch'oj tä ranima' chutagej na u b'anik ri man ch'ajch'oj taj. Are k'u' ri utzalaj winaq chutagej u b'anik ri utzil, ri winaq k'ut ru jachom rib' pu q'ab' ri Dios chutagej u b'anik ri jikom cho ri Dios, —xcha'.

¹² ¡Chitampe! —kächa ri Jesús. ¡Chanin kinopanik! Wuk'am b'i ri tojb'al ri kinya na chke ri winaq chkijujunal, jas u wäch ri ka'nom. ¹³ In ri', in ri nab'e xuquje' in ri k'isb'al, ru chapleb'al xuquje' ru k'isik ronojel. Ri in, in je' jas ri nab'e letra xuquje' ri k'isb'al letra rech ri alfabeto, ri "A" ruk' ri "Z", —xcha ri Are'.

¹⁴ Utz ke ri ki ch'ajom ri katz'iaq (kel kub'ij wa' chi e nimaninaq chwe), rech kuya' käkitiq ke ru wäch ri che' ri kuya' k'aslemal.

Xuquje' kuya' keb'ok pa ri uchib'e rech ri tinimit. ¹⁵ Are k'u' ri itzel taq winaq, xuquje' ri winaq ri kaka'n itzinik, ri winaq ri je' kaka'no jas ri kaka'n ri tz'i' ri xaq käkiriq kib', man k'o tä ki pixab', ri kämisanelab', ri winaq ri käkik'ijilaj taq tióx ri xa e b'anom kumal, xuquje' konojel ri utz käkil wi ri b'anow tzij, ri kaka'n sub'unik kekanaj na kan ri e are' chrij ri tinimit.

¹⁶ In ri', ri Jesús, nu taqom b'i ri nu ángel chuq'alajisaxik ronojel wa' chke taq ri qachalal kojonelab'. Wuk' in xel wi ri a mam David ri nim taqanel, in k'ut ri rachalaxik kan ri are'. In ri' ri nimalaj ch'imil ri sib'alaj käjuluwik pa ru saqirib'al, —xcha ri Are'.

¹⁷ Ri Loq'alaj Espiritu xuquje' ri rixoqil ri Alaj Chij käkib'ij; ¡Chixsa'j! —kecha ri'.

Jachin ri kätowik, chub'ij: ¡Chixsa'j! —kächa na.

Jachin ri kächaq'ij u chi', ri kraj re ri joron, chpetoq, chutija re ri joron ri kuya' k'aslemal ri xaq käsipaxik.

¹⁸ Konojel ri käkatab'ej ru Loq' Pixab' ri Dios ri tz'ib'tal pa we wuj ri', in ri', ri Juan, kinb'ij wa' chke: We k'o jun kuya u wi' taq we tzij ri', ri Dios kuya na u wi' ri k'äxk'ol chrij ri are' ri e tz'ib'tal pa we wuj ri' ri kepe na chkij ri winaq. ¹⁹ Xuquje' we k'o jun k'o käresaj che ru Loq' Pixab' ri Dios ri tz'ib'tal pa we wuj ri', ri Dios käresaj na ru b'i' ri winaq ri' pa ri wuj re k'aslemal, man kuya tä k'u' che chi kok pa ri loq'alaj tinimit. Are k'u' wa' ri e tz'ib'tal chkij pa we wuj ri'.

²⁰ Ri Jun ri käh'alajisan taq we tzij ri', kub'ij: ¡je', je' ri'! ¡Kinopan na chanim!

Amén. ¡Sa'j la, Qajaw Jesús!

²¹ Are ta b'a' ri Qajaw Jesucristo kutoq'ob'isaj i wäch iwonojel. Amén.